

ತುಳು ಕೆಲಂಜಿ ಭಾರತೊ

ಬರೆತಿನಾರ್
ಕೆಲಂಜಿ ಸೀತರಾಮ ಅಳ್ಳ



ಕರ್ನಾಟಕ ತುಳು ಸಾಹಿತ್ಯ ಅಕಾಡೆಮಿ

ಮಂಗಳೂರು - ೫೭೫ ೦೦೩

Tulu Kelinja Bharatho	:	Tulu Mahabharatha Epic
Poet	:	N. Seetharama Alva Sharada Nilaya Naduvalachil, Veerakamba Bantwala Taluk, D.K.
Published	:	Karnataka Tulu Sahitya Academy Lalbagh, Mangalore - 575 003 Phone : 0824 - 2459389
Publisher	:	Chandrasahara Rai B, Registrar Karnataka Tulu Sahitya Academy
Copyright	:	All rights reserved. No part of this book may be reproduced or utilized in any form or by any means, electronic or mechanical, including photocopying, recording or by any information storage or retrieval system, without the permission in writing from the publisher
Copies	:	500
First Impression	:	2015
Pages	:	xii + 372
Price	:	Rs. 600/-
Cover Design	:	Prasanna Kumar
Printed at	:	Pawan Graphics, Alake, Mangalore Cell : 9242885743



ಸುರುತ ನುಡಿ

ತುಳು ಬಾಸೆ ರಡ್ಡ್ ಸಾರ ವರ್ಸೊದಾತ್ ಪಿರಾಕ್‌ದವು, ತುಳು ಸಾಹಿತ್ಯೊದ ಬುಳೆಚ್ಚಿಲ್ ಎಚ್ಚಿ ಕಮ್ಮಿ ಏಳ್ಳೊಂದು ವರ್ಸೊಡ್ಲಿಂಚ ನಡತೊಂದುಂಡುಣ್ಣೆನ್ ಆದೆರೊಲುಲ್ಲ. ತುಳು ಜಾನಪದ ಸಾಹಿತ್ಯೊದ ತುಪ್ಪೆಲಾ ಬಾರಿ ಮಲ್ಲೆನೆ! ಜನಪದ ಕಾವ್ಯೊಲಾಯಿನ ತುಳುಪಾಡ್ಲನೊಲ್ ಬಾಸೆಲ್ ಮಿಶನರಿದಕ್ಲೆನ ಬೆನ್ನಾಟೊಡು ಸುರುಕು ಬೊಳ್ಳುಗ್ ಬತ್ತಿತ್ತ. ಇಂಚಿಪ ವೆಂಕಟರಾಜ ಪುಣೆಂಚತ್ತಾಯಿರ್ ನಾಡ್ಲ, ಸಂಪೊಲಿತ್‌ದ್ ಕೊರ್ದಿನ ತುಳುತ ಪಿರಾಕ್‌ದ ಕಾವ್ಯೊಲಾಯಿನ ಶ್ರೀ ಬಾಗವತೊ, ಕಾವೇರಿ, ದೇವಿ ಮಹಾತ್ಮೆ, ತುಳು ಮಹಾಭಾರತೊ ಇಂಚಿತ್ತಿನೆನ್ ತೂನಗ ತುಳು ಬರವುಗು ಪಿರಾಕ್‌ದ ಪೆರ್ಲೆ ಉಂಡುಣ್ಣೆನವು ತೆರಿದ್ ಬರ್ಪುಂಡು. ಒಡಿಪು ಮರೊತ ವಾದಿರಾಜ ಸ್ವಾಮಿಲ್ ಬರೆತಿನ ತುಳು ಕಬಿತೆ, 'ದಶಾವತಾರೊ'ದ ಕಾವ್ಯ ಸಗ್ಗಿ ದಿಂಜನೆ! ಎಸ್.ಯು.ಪಣಿಯಾಡಿದಾರ್ ಒಡಿಪುಡು, 1928ಡ್ಲ ಸುರುಮಲ್ತಿನ ತುಳು ಚಳುವಳಿತಪಗ ತುಳುಟು ಕಾದಂಬರಿ, ಯಕ್ಷಗಾನ ಪರಂಗ, ತುಳು ಬರವುದ ಬೂಕುಲು, ತುಳು ನಾಟಕ ಇಂಚ ಮಾತ 'ತುಳು ಸಾಹಿತ್ಯ ಮಾಲೆ'ಡ್ ಪ್ರಕಟ ಆದಿತ್ತ. ಕೆಮ್ಮೂರ್ ದೊಡ್ಡಣ್ಣ ಸೆತ್ತಿನ ನಾಟಕೊದ ರಸ ದಿಂಜಿದಿನ ಪದೊಕುಲು ತುಳು ನಾಡೊರೆಲಾ ತುಳುವೆರ್ ನಾಲಾಯಿಡ್ ನಲ್ಲೊಂದಿತ್ತ. ಅಯಿಡ್ಲ ಬೊಕ್ಕೊದ ತುಳು ಸಾಹಿತ್ಯೊದ ಬೆನ್ನಿಡ್ ತಿರ್ದದ ಸತುತ್ತ ಮಾಮಲ್ಲ ಬುಳೆಚ್ಚಿಲಾದ್ ಬೊಳ್ಳುಗ್ ಬತ್ತಿನ ಕಾವ್ಯ, ಮಂದಾರ ಕೇಶವ ಭಟ್ಟಿನ 'ಮಂದಾರ ರಾಮಾಯಣ'. ಈ ಕಾವ್ಯೊ ತುಳು ಬಾಸೆಗ್ ನಮ ದೇಸೊಡೇ ಮಲ್ಲ ತಾನಮಾನ ಕೊರ್ಪಾವುನಂಚಿನ ಗುಣಮಟ್ಟೊದವು. ಆರೆನ 'ಬೀರೊದ ಬೊಳ್ಳು'ಲಾ ದಿಂಜ ಮಿನ್ನತ್‌ದ ಬರವು. ಆತಾನಗ ಕೆಲಿಂಜ ಸೀತಾರಾಮ ಆಳ್ವೆರ್ ಭಾಮಿನಿ ಛಂದಸ್‌ಡ್ 'ಗೀತೆದ ತಿರ್ದ', ಸಾಂಗತ್ಯ ಛಂದಸ್‌ಡ್ 'ತುಳು ಹರಿಶ್ಚಂದ್ರಕಾವ್ಯೊ', ಬೂಮಿಪುತ್ರೆ ಬಲಿಯೇಂದ್ರ, ಬರೆಯೆರ್. ಬಂಟ್ವಾಳ ತಾಲೂಕುದ ಒರುಂಬ ಕೋಡಿಡ್ ಶಕ್ತಿ ದೇವತೆಯಾದ್ ನಿಲೆಯಾತಿನ ಉಳ್ಳಾಲಿನ ಬಗ್ಗಡ್, 'ಕೆಲಿಂಜದ ಉಳ್ಳಾಲಿನ ಬಗ್ಗಿ ಸಾರೊ' ಪನ್ನಿ ಪದ್ಯಾವಳಿನ್ಲಾ ಬರೆಯೆರ್. ರಗಲೆ ಛಂದಸ್‌ಡ್ ಸತ್ಯವತಿ ಬೊಕ್ಕ ಕರ್ಣ ಕತೆನ್ಲಾ ಬರೆತೆರ್. ಕೆದಂಬಾಡಿ ಜತ್ತಪ್ಪ ರೈ ಮುದ್ದಣ ಕವಿನ ಶ್ರೀ ರಾಮಾಶ್ವಮೇಧ ಕಾವ್ಯೊನ್ ತುಳುಕು ತರ್ಜುಮೆ ಮಲ್ತೆರ್. ಕುವೆಂಪು ಬರೆತಿನ 'ಬೊಮ್ಮನ ಹಳ್ಳಿಯ ಕಿಂದರಿಜೋಗಿ' ಕಾವ್ಯೊದ ಆದೆರೊಡು 'ಅಸೆನಿಯಾಗೊ ಕಾಂತಗಜೋಗಿ' ಖಂಡಕಾವ್ಯೊನುಲ ಬರೆಯೆರ್. ಅಯಿಚೆ ಬೆರಿಯೇ ಬತ್ತಿನ ನನೊಂಜಿ ಭಾಮಿನಿ ಷಡ್ವದಿ ಕಾವ್ಯ ಎನ್. ಪಿ.ಸೆಟ್ಟಿನ 'ಬತ್ತೆ ಕೆತ್ತರೆ ಉತ್ತರೆ'. ಮುಲ್ಲ ನೆಂಪು ಮಲ್ತೊನೊಡಾಯಿನ ನನ ರಡ್ಡ್ ಕೃತಿಕುಲು ಪೊ. ವೇದಾವತಿ ಮೆರೆನ ಕನ್ನಡೊಡ್ಲ ತರ್ಜುಮೆ ಆಯಿನ 'ತುಳು ಜೈಮಿನಿ ಭಾರತ', ಈಶ್ವರ ಭಟ್ಟಿನ 'ಮಾಣಿಗರಡ್ ಪಾತೆರೆ'. ಇಂಚ ತುಳು ಬಾಸೆದ ಕಾವ್ಯಕಚ್ಚೊಲು ದುಂಬರಿಯೊಂದು

ಪೊವೊಂದುಪ್ಪುನಗನೇ ನನೊಂಜಿ ಮಾಮಲ್ಲ ಕಾವ್ಯೊನ್ ಕೆಲಿಂಜದಾರೇ ಬರೆಯೆರ್. ಅವ್ವೇ 'ತುಳು ಕೆಲಿಂಜ ಭಾರತೊ'

4-3-1920ನೇ ಇಸವಿಡ್, ವೀರ ಕಂಬ ಗ್ರಾಮೊದ ಕೆಲಿಂಜ ನಡುವಳಚ್ಚಿಲ್ ಪನ್ನಿನ ತರವಾಡ್ಡ್ ಪುಟ್ಟಿನ ಸೀತಾರಾಮ ಆಳ್ವೆರ್ ಅಮ್ಮೆರ್ ಕುಂಬಳೆ ಸೀಮೆದ ಮಂಜಕೊಟ್ಟಿ ಚಿಕ್ಕಪ್ಪ ಆಳ್ವೆರ್. ಇಂಬೈರ್ ಯಕ್ಷಗಾನ ಅರ್ದ ಪಣ್ಣೆನೆಟ್ ಪುದರ್ ಪಡೆತಿನಾರ್. ಅಪ್ಪ ಕೆಲಿಂಜೊದ ದಾರಮ್ಮ. ಇಂಬೈರ್ ತುಳು ಸಂದಿ, ಪಾಡ್ಲನ, ನುಡಿಕ್ಲೆ ತೆರಿದಿತ್ತೆರ್. ಬೆನ್ನಿ ಮೂಲೊದ ಕುಟುಂಬೊದ ಕೆಲಿಂಜ ಸೀತಾರಾಮ ಆಳ್ವೆರ್ ಅಪಗನೇ ಬರವು ಕಲ್ಡ್ ಸಾಲೆಡ್ ಮಾಸ್ಪೆರ್ ಆಯೆರ್. ಜೋಕ್ಲೆ ಪದೊಕುಲು, ಜೋಕ್ಲೆಗಾದ್ ನಾಟಕೊಲು, ಯಕ್ಷಗಾನ ಪ್ರಸಂಗೊಲೆನ್ ಕನ್ನಡೊಡು ಬರೆವೊಂದಿತ್ತಿನ ಇಂಬೈರ್ ತುಳು ಬರವುದಂಚಿಲ ಗೇನ ದೀಯೆರ್. ಯಕ್ಷಗಾನ ತಾಳಮದ್ಲೊಲಿಡ್ ಪುದರ್ ಪಡೆಯಿನ ಕಲಾವಿದೆರಾದ್ ದುಂಬರಿಯೊಂದಿತ್ತಿನ ಆಳ್ವೆರ್ ಕಾವ್ಯಕಚ್ಚೊದ ಜಾನಗೇನ, ಚಂದಸ್‌ದ ಜಾನಗೇನ ಮಿಗಿಲಾಯಿನನೆ. ತುಳುಟು ಬರೆಪಿನಕ್ಲೆಗ್ ಒವ್ವೇ ಬಗೇಟ್ ಬೆರಿಬೊಟ್ಟುನಕುಲು ಇಜ್ಜಂದಿನ ಕಾಲೊಡುಲ ತುಳುಟು ಮಹಾಭಾರತ ಕಾವ್ಯೊ ಬರೆಪಿನ ಆರೆನ ಸಂಕಲ್ಪೊಗ್ ತುಳು ಅಪ್ಪನೇ ಪ್ರೇರಣೆ ಕೊರ್ತೆಂದ್ ಎಣ್ಣೊಡಾಪುಂಡು. ಕನ್ನಡೊದ ಕುಮಾರವ್ಯಾಸ ಮಹಾಕವಿನ ಕಾವ್ಯೊದ ಆದೆರೊಡು, ಅವ್ವೇ ನಡಕೆಡ್, ದುಂಬರಿಯುನ ತುಳು ಕೆಲಿಂಜ ಭಾರತೊನ್ ಒಂಜೇ ಬರಸ್‌ಡ್ ಓದುದು ಕಾವ್ಯ ಸಬಿನ್ ಅನ್ವೇಸೊಲಿ. ಆಂಡ ಅವ್ವೆನ್ ಪರ್ದಯ ಮಲ್ಪುನವು ಬಂಗೊನೇ. "ಯಾನ್ ಏರ್ದಿನ ಎತ್ತರೊಗ್ ಈ ಏರ್ಡ್ ಬರುವನ..?" ಇಂಚ ಸವಾಲ್ ಪಾಡುಲೆಕೊದ ಈ ಕವಿನ ಬರವುನ್ ಓದುನನೇ ಒಂಜಿ ಬಾಗ್ಗೆ! ಎಂಚ ಕುಮಾರವ್ಯಾಸ ಕನ್ನಡದಕ್ಲೆನ ಪೆರೆದ ಕವಿ ಆದಲ್ಲೆನ, ಅಂಚಿನೇ ಕೆಲಿಂಜದ ಸೀತಾರಾಮ ಆಳ್ವೆರ್ ತುಳುತಕ್ಲೆನ ಪೆರೆದ ಕವಿಯೆ! ಆರೆನ ತುಳು ಬೇಲೆದ, ಕಾವ್ಯೊ ಬೆನ್ನಿದ ಬಿಲೆನಿಲೆ ತೆರಿಯೊಂದು ಕರ್ನಾಟಕ ತುಳು ಸಾಹಿತ್ಯ ಅಕಾಡೆಮಿ ಆರೆಗ್ 1996ಟ್ ಗೌರವ ಪ್ರಶಸ್ತಿ ಕೊರ್ಪುಂಡು. ಇತ್ತೆ 2015ನೇ ಇಸವಿಡ್ ಆರೆನ ಮಾಮಲ್ಲ ಕಾವ್ಯ 'ತುಳು ಕೆಲಿಂಜ ಭಾರತೊ' ನು ಬೊಳ್ಳುಗ್ ಕಣಪಿನ ಕಚ್ಚೊನ್ಲಾ ಮಲ್ತೊಂದುಂಡು.

'ತುಳುಕೆಲಿಂಜ ಭಾರತೊ' ಮಹಾಕವಿ ಕುಮಾರವ್ಯಾಸನ 'ಕರ್ನಾಟ ಭಾರತ ಕಥಾಮಂಜರಿ' ಕಾವ್ಯೊನ್ ದುಂಬು ದೀವೊಂದು ಬರೆತಿನವು. ಕೆಲವು ಪರಂಗೊಲೆಡ್ ಆಳ್ವೆರ್‌ನೇ ವಸ್ತು ವಿಸಯೊದ, ರಸಪಾಕೊದ ಬಾಗೊಲುಲ್ಲ. ಆರೆಗ್ ಇಸ್ಪೊದ ಮೂಜಿ-ನಾಲ್ ಮಾತ್ರಾಗಣ ನಿಯಮೊದ ಭಾಮಿನಿ ಷಡ್ವದಿಡೇ ಕಾವ್ಯೊನ್ ಬರೆತಿನಾಂಡಲಾ ಭಾಮಿನಿದ ಆದಿಪ್ರಾಸಾಕ್ಷರ

ಈ ಕಾವ್ಯೊಡು ಇಜ್ಜಿ. ಆದಿಪ್ರಾಸೊಡು ಬರೆವೆರೆ ಪುಣೆದ್, ಆ ಪುಣೆ ಪಾಟೊಡು ಕಾವ್ಯೊದ ಪೊರುಗ್, ನಡಕೆಗ್ ಉನ ಬರ್ರಿನೆನ್ ತೆರಿದ್, ತುಳು ಬಾಸೆನ್ ಸಂಸ್ಕೃತೊಡು ಮುರೆತ್ದ್ ಬರೆಪಿನ ಇಜ್ಜಿ ಇಜ್ಜಾಂದೆ, ಒತ್ತಾಯೊದ ಪ್ರಾಸೊದ ಗೋಜಿನೇ ಬುಡಿಯೆರ ದಾನ್ನೆ? ಆಂಡ ಬರವುಡು ಅಲ್ಲಲ್ಲ ಪ್ರಾಸ, ಅನುಪ್ರಾಸೊಲು ಬತ್ತ್ದ್ ಕಾವ್ಯೊದ ಪೊರುಗ್ ನೆಗತ್ ತೋಜಾದ್ಂಡ್. ಆಯಿನಾತ್ ತುಳು ಪದೊಕ್ಲೆನೇ ಗಳಸೊನುನ ಆರೆನ ಬದ್ಡತೆಡಾದೇ ಇಂಚ ಬರೆದಿಪ್ಪೊಡು. ಮಹಾಪ್ರಾಣ ಅಕ್ಷರೊಲೆನ್ ಗರ್ಜಿಗಾಪಿನಾತೇ ದೀವೊಂದೆರ್. ತುಳುವೆರ್ನ ಬಾಯಿ ಬಾಸೆಡಿತ್ತಿಲೆಕೊದ ಅಲ್ಲ ಪ್ರಾಣಾಕ್ಷರ ರೀತಿದೇ ಬರೆತೆರ್. ಪುದರ್ಲೆಡ್ಲಾ ಇಂಚೊದ ಬಳಕೆನ್ ತೂವೊಲಿ. “ಅಂಚ ಬರೆವೊಲಿಯ” ಇಂಚ ಆರೆಡನೇ ಕೇಣೊಡಾಯಿನ ಪ್ರಶ್ನೆನ್ ಕೇಣ್ಯೆರಾವಂದಿನ ಈ ಪೊರುಡು ಆರ್ ಬರೆತಿಲೆಕೊನೆ ಅಜ್ಜಿ ಮಲ್ದೆಂಡ್.

ಕಾವ್ಯೊದ ದಿಸ್ತಿ, ಕತೆತ ಆಯ ಉಂದೆನ್ ಒರೊಂದು, ಬೋಡಿತ್ತಿನಾತೇ ಪಣೊಂದು ಕತೆತ ನಡಕೆನ್ ಬೀಸೊಡೇ ದುಂಬರಿತೆರ್. ಚಂದಸ್ಸದ ಲಚ್ಚಣೊಡು ಅರಕೆ ಇತ್ತಂಡಲಾ ಕಾವ್ಯೊದ ಗುಣೊಟು ಅರಕೆ ಇಜ್ಜಂದಿಲೆಕ ಬರೆತಿನ ಬಗೆ ಅಚ್ಚಿರದೊನೆ! ಕಾವ್ಯೊದ ಸುರುಟು ಅಂಚಿನೇ ಮಾತ ಸಂದಿಲೆನ ಅಕೇರಿಡ್ ಬಗ್ಗಿದ ಸುಗಿಪು ಉಂಡು.

ಶ್ರೀ ಅನಂತಕೋಡಿ ಸುಬ್ರಾಯದೇವರೆ ನಿರ್ಪೊಡು,
ಪರಿವಾರೊ ದೈವೊಲೆನ ಬೆರಿ ಸಾಯೊಡು
ಕೆಲಿಂಜದೂರುಡು ನಿಲೆಯಾಯಿನ
ಅಪ್ಪೆ ಸಿರಿ ಉಳ್ಳಾಲ್ದಿನ ದಯೊಟು
ತುಳು ಕೆಲಿಂಜ ಭಾರತೊನು ಬರೆದ್ ಮುಗಿತೆ -

ಇಂಚ ಪಣಿನ ಪಾತೆರೊಡು ಆರೆನ ತಗ್ಗಬಗ್ಗನ ಸುಬಾವೊನ್ನ ತೆರಿಯೊನೊಲಿ. ಮಾಮಲ್ಲ ಸಾದನೆದಕ್ಷೆನ ಮಲ್ಲಗುಣ ಉಂದುವೆ!

ತನಡ್ಲ ದುಂಬುದ ಹಿರಿಯ ಕವಿನಕ್ಷೆನ್ ನೆಂಪು ಮಲ್ತೊಂದು ಬರೆತಿನ ಪದ್ಯ ಇಂಚ ಉಂಡು.

ಆದಿಕವಿ ವಾಲ್ಮೀಕಿ ವ್ಯಾಸರೆ
ಪಾದೊನೆಣ್ಣೆದ್ ಪಂಪ ರನ್ನರೆ
ಸಾದನೆನ್ ಪುಗೊಂದು ಗದುಗುದ ನಾರಣಪ್ಪನ್||
ಆದರೊದ ಕವಿ ರಾಗವಾಂಕನ್
ಸೋದನೆಡ್ ಕಾವ್ಯೊಲೆನ್ ಬರೆಯಿನ
ಜಾದುಗಾರನೆಲಾ ಕುವೆಂಪುನು ನೆನೆತ್ದೇ ಬರೆಪೆ ||

ತುಳು ಬಾಸೆದ ಪೊರುಗ್ ದೆರ್ತ ತೋಜಾವುನಂಚದ ಈ ಕಾವ್ಯೊಡು ತುಳು ಗಾದೆ, ನುಡಿಕ್ಲೆಲೆನ ಬಳಕೆದ ಚಾತುರ್ಮೆನ್, ತುಳು ಸಂಸ್ಕೃತಿನ್ ಪಣಿನ ಬುದ್ಧಂತಿಕೆನ್ ತೆರಿಯೊನೊಲಿ. ಕೆಲವು ಪದೊಕುಲೆಡ್ ಆದಿಪ್ರಾಸ ಅನುಪ್ರಾಸೊಲು ತನಡ್ ತಾನೇ ಪರತ್ ಬತ್ತಿಲೆಕಲ ಉಂಡು. ತುಳು ಬಾಸೆದ ಸಬ್ಬಸಂಪೊತ್ತುನ್ ಭಾಮಿನಿದ ಮಾತ್ರಾ ಗಣೊಕ್ ಒಗ್ಗಾವೊಂದು ಪೋತಿನ ನಮೂನೆನ್ ಮೆಚ್ಚೊಡಾಪುಂಡು.ಕೆಲಿಂಜದರೆನ ಕವಿ ಪ್ರತಿಭೆ ಭಾರತ ಯುದ್ಧೊದ ಬಣ್ಣನೆಡ್ ಝಳಕ್ಕ್ದ್ ತೋಜುಂಡು. ಯುದ್ಧಬೆಂದುನ

ಬಗೆ, ಕಯ್ಯುಕಡ್ಲೆದ ಗಸನಿಗಸನೆ ಒಂಜೊಂಜಿ ಸಂದಿಡ್ಲಾ ಬೇತೆಬೇತೆನೆ! ಬೀರಬಿರೊಲಿದಕ್ಷೆನ ನುಡಿನಡೆಣ್ಣಾ ಏತೊಂಜಿ ಬಗೆ! ಜನೊಕ್ಷೆನ ಬಾಯಿಡಿತ್ತಿನ ನೆರಡೆಲ್ಲಾ ಕಾವ್ಯೊಡು ಬೋಡಿತ್ತಿನಲ್ಲ ಸರೀಟಿ ಒಂಬುದು ಕುಲ್ಲುದ! ಕೋಂಗಿ, ಮಸ್ತಿರಿ, ಕೆಡುನುಡಿ, ಓರೆನುಡಿ, ಪಿಲೆಪಾತೆರ, ದೂರುದುರ್ಜನ ಒವ್ವು ಓಲು ಬೋಡಾ ಅವುಲೇ ಉಂಡು. ಕಾವ್ಯ ರಸೊತ ಚಿಲ್ಮೆಲ್ ರಟ್ಟುನ ಪೊರುಗ್ಲಾ ಉಂದೆಟ್ ತೂವೊಲಿ. ಬೋಡಾಯಿನಾತೇ ಬಣ್ಣನೆಲ್. ಸಾಜವಾಯಿನ, ಇತಿಮಿತಿತ ಬಣ್ಣನೆಲ್! ಯುದ್ಧೊದ ಬಣ್ಣನೆಲ್ ಕಣ್ಣೆಗ್ ಕಟ್ಟುನಂಚದವು! ಪುಟ ರಾಪಾದ್ ಓದುನೆಕ್ ಇಡೆನೆ ಇಜ್ಜಿ. ಸಬ್ಬ ಸಂಪೊತ್ತುದ ಪೊರುಗ್ಲಾ ಪುಗೊಡಾಯಿನನೆ! ನನ ಮಿತ್ತ್ಗ್ ತುಳುಟ್ ಮಾಮಲ್ಲ ಕಾವ್ಯ ಬರೆಪಿನಕ್ಲೆಗ್ ಮಂದಾರದಾರ್ ತನ ರಾಮಾಯಣೊಡು ಎದ್ದಾರಿ ತೋಜಾಯಿನಂಚಿನೇ ಕೆಲಿಂಜದಾರ್ಲಾ ತನ ಭಾರತೊಡು ಮಲ್ಲ ಮಾರ್ಗೊನೇ ತೋಜಾದೆರ್. ಆರೆನ ಕವಿಪ್ರತಿಭೆದ ಪರ್ವಯೊಗಾಪಿನ ಒಂಜಿ ರಡ್ಡ್ ಪದ್ಯೊಲು..

ತನ ಪುಟ್ಟುದ ಗುಪಿತೊನ್ ಪಂಡ್‌ದ್, ಪಾಂಡವೆರೆನ ಜತೆಟ್ ಸೇರೊನ್ನ ಪಂಡಿನ ಕೃಷ್ಣಗ್ ಕರ್ಣನ ಸಂದಾಯ ಇಂಚ-

ಕೆರೈನೇ ಓ ಶ್ರೀ ಕ್ರಿಷ್ಣ ಕೌರವ
ನೆನ್ನ ಸ್ವಾಮಿನ್ ಯಾನ್ ಪುಟ್ಟೊನ
ಮಲ್ಲಕತೆನೇ ಪಣ್ಡ್ ಅನ್ನನ್ ಲಗಡಿದೆತ್ತತ್ತೊ?
ಯುದ್ಧೊದಾ ಸಿರಿ ಬೂಳೊ ಪತ್ತೆದ್
ಇತ್ತೆ ಪಣಿಯೆರೆ ನಿಕ್ಕ ಪುರೊತು
ತಿಕ್ಕನೆನೆ ಹಾ! ಪನ್ದ್ ಬುಲ್ದ್ ತರೆಕ್ ಹಾಕೊಂಡೆ.||

ಇಂಚ ಬುಲ್ತೊಂದೇ ತನ್ನಲಾ ಕೌರವನಲಾ ಇಸ್ವಮಿತ್ರಾದಿಗದ ಬಗ್ಗೆಡ್ ಕರ್ಣ ಇಂಚ ಪಣೊಂಬೆ.

ಕೂಟೊ ಕೌರವನೊಟ್ಟು ವಣಸಲ
ಸ್ವಾಮಿಯಾಯನ ಒಟ್ಟು ನಿದೆರುನೆ
ರಾಜನೊಟ್ಟುಗೆ ಬೋಂಟೆ ಕುರುಕುಲ ವೀರನೊಟ್ಟುಗೆನೆ!....

ಗದಾಯುದ್ಧೊದಪಗ ಬೀಮೆ ಕೌರವಗ್ ಪಣ್ಣೆ.. ..

ಅಪ್ಪೆ ಬಂಜಿಗ್ ನೂರ್ದಡಲ ಈ
ಕುರ್ಚಿ ಬಂಗುಡೆ ಆದ್ ಕಡಲ್ಡೆ
ಇತ್ತಡಲ ಯಾನ್ಪುಡಯೆ ನಿನ್ನನ್ ಕೆರ್ದೆ ಪಾಡಂದೆ..

ಕೆಲಿಂಜದಾರ್ ಲಡಾಯಿದ ಬಗೆನ್ ಬಣ್ಣನೆ ಮಲ್ತಿಲೆಕೊನೇ ಕುರುಕಂಡೊದ ಬಣ್ಣನೆನ್ನಾ ಕಣ್ಣೆಗ್ ಕಟ್ಟುಲೆಕ ಮಲ್ತೆದ್.. . .

ಕಳೊನೆ ಪೊಡಿಪೊಡಿಯಾದ್ ನೆತ್ತೆರ್
ಅರಿದ್ ಎರ್ಕ್ದ್ ಕೆಸರ್ ದಿಂಜಿದ್
ಕೊಳಕೆ ಕಂಡೊನೆ ಆಂಡಲಾ ಕುರುಕಂಡೊದಾ ಕಳೊನೆ!

ಕೃಷ್ಣ ತೋಜಾವುನ ವಿಶ್ವರೂಪೊಡು ಲೆಕ್ಕಿಸಿರಿ, ಕಲ್ಲುಟಿ, ಕಲ್ಲುಡೆ, ಮಲರಾಯೆ ಜುಮಾದಿ, ಪಂಜುಲಿ, ಗುಳಿಗೆ ಬೂತೊಲುಲಾ ತೋಜಿದ್ ಬರ್ಪ. ಕ್ರಿಷ್ಣ ಪಾರ್ತನ ರತೊಕು ಸಾರತಿ ಆಪಿನವು ತಣ್ಣಣೊಗು ಪೊಡಿ ಉಪ್ಪುದಂಚಿನೆ! “ಮೆಗ್ಗನಕಲೆನ ಬುಡೆದಿಯಲ್ಲೆಗ್ ಮಯ್ಯು ಬುಡುದಾರೆ”, “ದೈವ ದೇವೆರೆಗ್ ಈಡ್‌ಕಟ್ಟೆದ್ ದೀಪಿನಿ”, “ಕೊಚ್ಚಿಕೊಚ್ಚಿದ್ ಬೂತೊಗಗಿಲ್‌ನ್ ಬಳಸುವೆ”, “ಕುಟುಮ ಕುರ್ಚಿ ಮಲ್ಲುನು.”, ಇಂಚ

ಏತೇತೋ ತುಳು ಬದ್ಡಾದ ಸಂಗತಿಲ್, ನುಡಿನಡಕೆಲ್, ತುಳುನಾಡ್‌ದ ಏತೋ ಜಾಗೆಲೆನ ಪುದರ್‌ಲ್, ಕೆಲಿಂಜ ಭಾರತೊಡು ಸಂದರ್ಪುಗ್ ಸರಿಯಾದ್ ಸೇರೊಂದ.

ಕೆಲಿಂಜದರೆನ ಸಾಹಿತ್ಯೊದ ಬೆನ್ನಿಗ್ ಪತ್ತಾಜಿ ಮೋನೆಲ್. ಎಲ್ಯ ಪದೊಕ್ಲೆಡ್ಡ್ ಮಾಮಲ್ಲ ಕಾವ್ಯೊದ ಮುಟ್ಟೊದ ಬರವುನ್ ತುಂಡ ಆರೆನ ಪ್ರತಿಭೆ ಅಂಚೆನೇ ಪಾಂಡಿತ್ಯೊದ ಪೊಲಬು ಆಪುಂಡು. ಬೆಕ್ಕಸೊಲಾ ಆಪುಂಡು. ತುಳುಟು ಸಾಹಿತ್ಯೊದ ಕಜ್ಜ ಬೆನ್ನೆರೆನೇ ಪುಟ್ಟುದಿನಾರ್? ಪಣ್ಣಿಲೆಕೊದ ಆರೆನ ಸಾದನೆಗ್ ತುಳುವೆರ್ ಮಾನಾದಿಗೆ ಮಲ್ತೆದ್ಲೆ. ತುಳು ಸಾಹಿತ್ಯ ಅಕಾಡೆಮಿ ಪ್ರಶಸ್ತಿ, ಪೊಳಲಿ ಶೀನಪ್ಪ ಹೆಗ್ಗಡೆ ಪ್ರಶಸ್ತಿ, ಪಣಿಯಾಡಿ ತುಳು ಕಾದಂಬರಿ ಪ್ರಶಸ್ತಿ, ಅಕಾಡೆಮಿದ ಬೂಕುದ ಇನಾಮು, ಬೇತೆಬೇತೆ ತುಳು ಸಾಹಿತ್ಯ ಸಮ್ಮೇಳನೊಡು ಸನ್ಮಾನ, ಇಂಚದ ಏತೇತೊ ಮಾನಾದಿಗೆದೊಟ್ಟುಡು 'ತುಳು ಗೀತಾಚಾಯೆ' ಪಣ್ಣಿನ ಬಿರ್ದಲಾ ಆರೆಗ್ ಸಂದ್‌ದ್‌ಂಡ್.

"ಮಂದಾರ ಕೇಶವ ಭಟ್ಟೆರೆನ ಮಂದಾರ ರಾಮಾಯಣ ಮೂಡುದು ಬತ್ತೆದ್ ತುಳುಕು ಮನ್ನಣೆದ ಮಣೆ ಸಂದ್‌ಂಡ್. ಶ್ರೀ ಆಳ್ವೆರೆನ ಮಹಾಭಾರತ ಕಾವ್ಯೊಲಾ ಬೊಳ್ಳುಗು ಬತ್ತೆಂಡ, ತುಳು ಸಾಹಿತ್ಯೊದ ಉಳ್ಳಾಲಿನ ಗುಂಡೊಡು ರಡ್ಡ್ ನಂದಾರ್ ದೀಪೊ ಅರುಲೆಕ್ಕ ಆವು..." ಡಾ.ಅಮೃತ ಸೋಮೇಶ್ವರ್ ಬಯಕಿನ ಈ ನುಡಿಂತಚೆ ಕೆಲಿಂಜದರೆನ ಈ ಕಾವ್ಯ ಬೊಳ್ಳುಗ್ ಬತ್ತೆದ್ ತುಳುವೆರೆನ ಸಂತೋಸುನ್, ಸಂಸ್ಕೃತಿನ್, ನೀತಿ ನಿರ್ಪೊನ್ ಎರ್ಕಾವೆರೆಗ್ ಸಾಯ ಮಲ್ಪುಂಡುಣ್ಣಿನ ಇಸ್ವಾಸ್ ಅಕಾಡೆಮಿದವು.

ಈ ಕಾವ್ಯೊನ್ ಬೊಳ್ಳುಗ್ ಕಣಪಿನ ಅಂಗಲಪ್ಪು ಕೆಲಿಂಜದರೆಗೇ ಇತ್ತೆಂಡ್. ಅಯಿಕ್ವಾದ್ ಆರ್ ಒಂತೆ ಪ್ರಯತ್ನೊನ್ಲಾ ಮಲ್ತೆದರ್. ಆಂಡ ಅವು ಕಾವ್ಯೊದ ಒರುಟು ಅಚ್ಚಿ ಆದ್ ಬರ್ಪಿನೆನ್ ತೂಪಿನಾತ್ ಕಾಲ ಆರ್ ಬದ್ಡಿಚೆರ್. 24-1-2007 ಈ ದಿನ ಆರ್ ಕಾಯ ಬುಡಿಯೆರ್. ಅಯಿಡ್ಡೆದುಂಬು ಈ ಕಾವ್ಯೊದ ಕೈ ಬರವುನ್ ಅಕಾಡೆಮಿಗ್ ಕೊರ್ಪಿತ್ತೆರ್. ಕರ್ನಾಟಕ ತುಳು ಸಾಹಿತ್ಯ ಅಕಾಡೆಮಿದ ಪೊಸ ಆಡಳಿತ ಕೂಟೊದ ಯೆಂಕುಲು ಆರೆಗ್ ಪುಡ್ಯಾಡೊಂದು, ಪ್ರಕಟಣೆದ ಕಜ್ಜೊಡು ದುಂಬರಿದ್ ಈ ಕಾವ್ಯೊನ್ ತುಳುವೆರ್ ಕೈಕ್ ಎತ್ತಾವುನ ಬೇಲೆನ್ ಕೋಡಿ ಎತ್ತಾವೊಂದುಲ್ಲ.


ಬರವುಸರವು ಪುರಾಣ ಗೇನೊನು
ಪಾರಿ ಪಾಡ್ಡನ ಯಕ್ಷಗಾನೊನು
ಭಾರತೊದ ಮಾಮಲ್ಲ ಕವಿಕುಲೆ ಕಾವ್ಯೊದಾಗುಣೊನು||
ತೆರಿದ್‌ತನ್ನನೆ ಸಗ್ಗಿ ಬಗ್ಗಿಡ್
ಬರೆದ್‌ಕಾವ್ಯ 'ಕೆಲಿಂಜ ಭಾರತೊ'

ಪೊರ್ನು ತುಳು ಬಟ್ಟಲ್‌ಡ್ ದೀಡ್‌ದ್ ಕೊರ್ಪಿನಾಳ್ವೆರೆನ್||
ಲೋಕೊರೆಡೆ ತುಳುವೆರೆಂಕುಲು ಮಾನಾದಿಗೆಡ್ ನಿನೆತೊಂದು ಸಾನಾದಿಗೆದ ಬೊಳ್ಳು ತೋಜಾವೊಂದುಲ್ಲ. ಪ್ರಕಟಣೆದ ಪೊರ್ನುಡುಆಶೀರ್ವಾದ ಮಲ್ತೆದಿನ ಪದ್ಮವಿಭೂಷಣ ಡಾ. ವೀರೇಂದ್ರ ಹೆಗ್ಡೆರೆಗ್, ಒಡಿಯೂರ್ದ ಶ್ರೀ ಶ್ರೀ ದೇವಾನಂದ ಸ್ವಾಮೀಜಿಯೆರೆಗ್ ಅಕಾಡೆಮಿದ ಪುದರ್ ಸೊಲೆ ಸಂದಾವೆ. ಕೆಲಿಂಜ ಭಾರತೊನ್ ಪ್ರಕಟ ಮಲ್ಪೆರೆ ಒಪ್ಪಿಗೆ ಕೊರ್ಪಿನ ಶ್ರೀಮತಿ ಲಕ್ಷ್ಮೀ ಸೀತಾರಾಮ ಆಳ್ವೆರೆಗ್ ಬೊಕ್ಕ ಆರೆನ ಜೋಕ್ಲೆಗ್ ಕರ್ನಾಟಕ ತುಳು ಸಾಹಿತ್ಯ ಅಕಾಡೆಮಿ ಸುರುಟು ಸೊಲೆ ಸಂದಾವೊಂದುಂಡು. ಅಕಾಡೆಮಿದ

ಈ ವರ್ಸೊದ ಈ ಮಲ್ಲಕಜ್ಜೊಡು ದಿಂಜ ಜನ ಬೆನೊಡಾಂಡ್. ಮುಕ್ಕೊರಾದ್ ಗಮಿ ವಿಶ್ವನಾಥ ಶೆಟ್ಟಿ ಮೇರ್. ಈ ಕಾವ್ಯೊನು ದಿಂಜ ಜಾಗೆಡ್ ವಾಚನ ಮಲ್ತೆದಿನ ವಿಶ್ವನಾಥ ಶೆಟ್ಟಿ ಈ ಕಾವ್ಯೊ ಏಪ ಬೊಳ್ಳುಗು ಬರು ಪಣ್ಣಿ ಕಾತೊಂದಿತ್ತೆರ್. ತಾನೇ ಪ್ರಕಟ ಮಲ್ಪುನೆಕ್ ತನ್ನ ಮನಸ್‌ನ್ ಅಂಚೆನೇ ಪಣವುದ ಹೊಂದಾಣಿಕೆನ್ ಮಲ್ಪೊಡುಣ್ಣಿನಾತ್ ಆಸೆಲಾ ಆರೆಗಿತ್ತೆಂಡ್. ಈ ಕಾವ್ಯೊನು ತರೊಂಡಿನಕ್ಲೆಡ್ ಶ್ರೀ ರವಿರಾಜ ಶೆಟ್ಟಿಲಾ ಒರಿ. ಆರ್ ತನ ಬೇಲೆದ ಇಡೆಟ್ ಪುರೊಣು ತಿಕ್ಕಿನಪಗ ಉಂದೆನ್ ಬಾರಿ ತಾಳ್ಳೆಡ್ 'ಡಿ.ಟಿ.ಪಿ.' ಮಲ್ತ ದೀಪಿನ ಪ್ರಯತ್ನೊಡಿತ್ತೆರ್. ವಿಜಯ ಕುಮಾರ್ ಭಂಡಾರಿ ಹೆಬ್ಬಾರಬೈಲ್ ಮೇರ್ ಪ್ರಕಾಶಕೆರೆನ್ ನಾಡುನ ಪ್ರಯತ್ನ ದುಂಬರಿತೊಂದು ಬಯ್ದೆರ್. ಮೊಕಲ್ನ ಈ ನಮೂನೆದ ಬೇಲೆನ್, ಬಾಮೊಲೆನ್ ಅಕಾಡೆಮಿ ನೆಂಪು ಮಲ್ಪೊಂದು ಸೊಲೆ ಸಂದಾವೊಂದುಂಡು.ಅಚ್ಚಿದಿಲ್ಲಗ್ ಪೋವೊಡ್ಡು ದುಂಬುದ ದಿಂಜ ಬೇಲೆನ್ ಪಟೊಂದಿನ ಚಂದ್ರಹಾಸ ರೈ. ಬಿ., ಅಕಾಡೆಮಿದ ಸರ್ವ ಸದಸ್ಯರ್, ಶ್ರೀ ವಾಮನ್ ಇಡ್ಯಾ, ಅಕಾಡೆಮಿ ಕಛೇರಿದ ವಿಜಯ ಕೆ., ಸುಕನ್ಯ ಪ್ರಶಾಂತ್ ಬಿ., ಚೈತ್ರ, ಸೌಮ್ಯ ಪಿ., ಅಂಚೆನೇ ಪವನ್ ಗ್ರಾಫಿಕ್ಸ್‌ದ ಪ್ರಸನ್ನ, ಮೊಕ್ಲೆನ ಉಪಕಾರೊನ್ ನಿನೆತೊನುವೆ. ಈ ಮಲ್ಲ ಕಾವ್ಯೊನ್ ಓದುದು ಕಾವ್ಯೊ ರಸೊನು ಅನ್ವೇಸುನ ಮಾತ ತುಳು ಬಂದುಲೆಗ್ ಅಕಾಡೆಮಿದ ಪುದರ್ ಪಂಡೊಂದು ಸೊಲೆ ಸಂದಾವೆ.

ಕುಡ್ಡ
15-3-2015
ಎಮ್. ಚಾನಕಿ ಬ್ರಹ್ಮಾವರ
ಅಧ್ಯಕ್ಷೆ
ಕರ್ನಾಟಕ ತುಳು ಸಾಹಿತ್ಯ ಅಕಾಡೆಮಿ.

ಅಕಾಡೆಮಿದ ಸರ್ವಸದಸ್ಯೆರ್
ಪ್ರೊ. ವೇದಾವತಿ
ಶ್ರೀ. ಡಿ. ಎಮ್. ಕುಲಾಲ್
ಶ್ರೀ ಸುಭಾಶ್ಚಂದ್ರ ಪಡಿವಾಳ್
ಶ್ರೀ ದುರ್ಗಾಪ್ರಸಾದ್ ರೈ. ಕುಂಬ್ರ
ಶ್ರೀಮತಿ ಜಯಶೀಲ
ಶ್ರೀ ಮೋಹನ ಕೊಪ್ಪಲ
ಶ್ರೀ ವಸಂತ ಶೆಟ್ಟಿ ಬೆಳ್ಳಾರೆ
ಶ್ರೀ ಕೃಷ್ಣಪ್ಪ ಉಪ್ಪೂರು
ಶ್ರೀ ರಘು ಇಡ್ಡಿಡು
ಶ್ರೀಮತಿ ರೂಪಕಲಾ ಆಳ್ವ
ಶ್ರೀ ಕೆ. ಟಿ. ವಿಶ್ವನಾಥ
ಶ್ರೀ ನವೀನ್ ಡಿ. ಪಡಿಲೆಲ್
ಶ್ರೀ ದಿವಾ ಕೊಕ್ಕಡ



ಶ್ರೀ ಧರ್ಮಸ್ಥಳ - 574 216
ದಕ್ಷಿಣ ಕನ್ನಡ, ಕರ್ನಾಟಕ
ಫೋನ್ : ಕಛೇರಿ : 08256 - 277121
ಫ್ಯಾಕ್ಸ್ : 277116
email : dvheggade@hotmail.com

ಡಿ. ವೀರೇಂದ್ರ ಹೆಗ್ಡೆಯವರು

ರಿಗೆ,

ಅಧ್ಯಕ್ಷರು
ಕರ್ನಾಟಕ ತುಳು ಸಾಹಿತ್ಯ ಅಕಾಡೆಮಿ
ಮಂಗಳೂರು - 575 003

ಕರ್ನಾಟಕ ತುಳು ಸಾಹಿತ್ಯ ಅಕಾಡೆಮಿ ಆಶ್ರಯದಲ್ಲಿ "ಕೆಲಿಂಜ ಭಾರತ"
ತುಳು ಕಾವ್ಯವನ್ನು ಪ್ರಕಟಿಸುತ್ತಿರುವ ವಿಚಾರ ತಿಳಿದು ಸಂತೋಷವಾಯಿತು.

ತುಳು ಭಾಷೆಯ ಅಪೂರ್ವ ಕೃತಿಯನ್ನು ಪ್ರಕಟಿಸುತ್ತಿರುವುದು ತುಳು ಭಾಷೆ,
ಸಂಸ್ಕೃತಿಗೆ ನೀಡಿದ ಅಪೂರ್ವ ಕೊಡುಗೆಯಾಗಿದೆ. ಅಭಿನಂದನೆಗಳು.

"ಕೆಲಿಂಜ ಭಾರತ" ಪ್ರಕಾಶನಾ ಕಾರ್ಯ ಯಶಸ್ವಿಯಾಗಲೆಂದು ಹಾರೈಸುತ್ತೇನೆ.

ಶ್ರೀ ಮಂಜುನಾಥ ಸ್ವಾಮಿಯ ಅನುಗ್ರಹವಿರಲಿ.

ಇತೀ

ಡಿ. ವೀರೇಂದ್ರ ಹೆಗ್ಡೆಯವರು
(ಡಿ. ವೀರೇಂದ್ರ ಹೆಗ್ಡೆಯವರು)



|| ಶ್ರೀ ಗುರುದೇವ್ ||



ಶ್ರೀ ಗುರುದೇವದತ್ತ ಸಂಸ್ಥಾನಮ್, ಓಡಿಯೂರು

ಅಂಚೆ: ಓಡಿಯೂರು-574 243, ಬಂಟ್ವಾಳ ತಾಲೂಕು, ದ.ಕ., ಕರ್ನಾಟಕ

Shree Gurudevadatta Samsthanam, Odiyoor

Post: Odiyoor - 574 243, Bantwal Tq., D. K. Dist., KARNATAKA

ಪರಮಪೂಜ್ಯ ಶ್ರೀ ಶ್ರೀ ಗುರುದೇವಾನಂದ ಸ್ವಾಮೀಜಿ
His Holiness Shree Shree Gurudevnananda Swamiji

Tel: 08255-266211/266282, Mob: 9448177811

web: <http://www.shreeodiyoor.org>

email: info@shreeodiyoor.org/gurudev@shreeodiyoor.org

Ref. No.:SGSO-152/2015

Date: 06-03-2015

ತುಭಾಶೀರ್ವಾದ

ಲಗೆ,

ಶ್ರೀಮತಿ ಎಮ್. ಜಾನಕಿ ಬ್ರಹ್ಮಾವರ

ಅಧ್ಯಕ್ಷರು, ಕರ್ನಾಟಕ ತುಳು ಸಾಹಿತ್ಯ ಅಕಾಡೆಮಿ, ಮಂಗಳೂರು

ಸಾರ್ವಕಾಲಿಕ ಸಾಹಿತ್ಯವು ಸಾಹಿತಿಗಳನ್ನು ಮೆರೆಯುತ್ತದೆ. ದಿ. ಕೆಲಂಜ ಸೀತಾರಾಮ ಅಟ್ಟರ 'ಕೆಲಂಜ ಭಾರತ' ಈ ಕೃತಿಯ ಕರಡುತ್ವತಿಯಲ್ಲಿ ಕಣ್ಣಾಡಿಸಿದ್ದೇವೆ. ಉತ್ತಮವಾದ ತುಳುಭಾಷೆಯ ಅಂದಜಂದವನ್ನು ಸಮರ್ಪಕವಾಗಿ ಅಟ್ಟರು ಭಾಮಿನಿ ಪಟ್ಟದಿಯಲ್ಲಿ ಪೋಷಿಸಿರುವುದು ಅವರ ವಿಶೇಷ. ಶ್ರೀ ಕ್ಷೇತ್ರದ ಮುಖ್ಯ ಅಭಿಮಾನಿಗಳಲ್ಲಿ ಓರ್ವರಾಗಿರುವ ಅಟ್ಟರು ಸ್ತುತ್ಯರ್ಹರು.

ಕರ್ನಾಟಕ ತುಳು ಸಾಹಿತ್ಯ ಅಕಾಡೆಮಿಯು 'ಕೆಲಂಜ ಭಾರತ' ತುಳು ಕಾವ್ಯವನ್ನು ಪ್ರಕಟಿಸುವ ಯೋಜನೆಯನ್ನು ಹಮ್ಮಿಕೊಂಡಿರುವುದು ಸಂತಸದ ವಿಚಾರ. ಶ್ರೀಯುತ ಅಟ್ಟರು ಈ ಮೊದಲೇ ಹಲವಾರು ತುಳು ಕೃತಿಗಳನ್ನು ಸಾರಸ್ವತ ಲೋಕಕ್ಕೆ ಸಮರ್ಪಿಸಿರುವುದು ಅವಿಸ್ಮರಣೀಯ.

ಸದ್ರಿ ಕೃತಿಯು ಸುಂದರವಾಗಿ ಮೂಡಿಬಂದು ಓದುಗರ ಕೈಸೇರಲೆಂದು ಆಶಿಸುತ್ತೇವೆ. ಅಕಾಡೆಮಿಯ ಅಧ್ಯಕ್ಷರಾದ ನಿಮ್ಮ ಉತ್ಸುಕತೆ, ಪ್ರಾಮಾಣಿಕ ಪ್ರಯತ್ನ ನಮಗೂ ಮೆಚ್ಚುಗೆಯಾಗಿದೆ. ಶ್ರಮಿಸುವ ನಿಮಗೂ, ಎಲ್ಲರಿಗೂ ಆರಾಧ್ಯದೇವರು ಶಕ್ತಿ ತುಂಬಲ ಎಂದು ಪ್ರಾರ್ಥಿಸಿ ಹಾರೈಸುತ್ತೇವೆ.

|| ಶ್ರೀ ಗುರುದತ್ತಾಂಜನೇಯೋ ವಿಜಯತೇ ||



ಸತ್ತೇಮ ಶ್ರೀಮನ್ಮಾರಾಯಣ ಸ್ಮರಣೆಗಲೊಂದಿಗೆ,

ಶ್ರೀ ಶ್ರೀ ಗುರುದೇವಾನಂದ ಸ್ವಾಮೀಜಿ

ಕೆಲಿಂಜ ಬಾರತೊದ ಬಗೆಟ್....

‘ಕುಮಾರವ್ಯಾಸ ಭಾರತ ಕನ್ನಡ ನಾಡ್‌ದ ಮಹಾಭಾರತ’ ಪಣ್ಣಿ ಪಾತೆರ ಉಂಡು. ಅವ್ವೇ ನೋಟೊಡು ತೂಂಡ ಕೆಲಿಂಜ ಸೀತಾರಾಮ ಆಳ್ವೆರೆನ ‘ತುಳು ಕೆಲಿಂಜ ಭಾರತೊ’ ತುಳುನಾಡ್‌ದ ಮಹಾಭಾರತ ಕಾವ್ಯ. ಸಂಸ್ಕೃತೊಡುಪ್ಪುನ ವ್ಯಾಸ ಭಾರತೊನ್ ಬೇತೆ ಬೇತೆ ಬಾಸೆದ ಕವಿನಕುಲು ತಂಕ್ಲೆನ ಬಾಸೆಡ್ ಬರೆತೆರ್. ಆಂಡ ವ್ಯಾಸೆರ್ ಬರೆತಿಲೆಕೊನೇ ಬರೆತ್‌ಜೆರ್, ಬರೆಯೆರೆಗಾತಿಜಿ. ವ್ಯಾಸೆರೆನ ರುಸಿ ಪ್ರತಿಭೆಡ್ಡ್ ಮೂಡ್ಡ್ ಬಯ್ಯಿನ ಮಹಾಭಾರತೊನ್ ಇಡಿಯಾದ್ ತೆರಿಯೊನುನಲ ಸೊಲಬ ಅತ್ತ. ಅಯಿಟ್ ಒವ್ವುಂಡು? ಒವ್ವುಜ್ಜಿ?

ಬದ್ಕದ ಸಾಜವಾಯಿನ ಮಾತ ಸಂಗತಿಲೆಲಾ ಉಲ್ಲ. ಅಂಚ ಇತ್ತಿತ್ತಿಲೆಕೊನೇ ಬರೆವಂದೆ ಅಯಿತ ಆದೆರೊಡು, ಅಕಲಕಲ್ಪ ದಿಸ್ತೆಡೇ ಗ್ರಯಿತೊಂದು ಬರೆತೆರ್. ಕೆಲಿಂಜ ಸೀತಾರಾಮ ಆಳ್ವೆರೊಲ ವ್ಯಾಸಭಾರತೊನ್ ಓದೊಂದೆರ್, ಅಯಿತ ಆದೆರೊಡು ಉಂಡಾತಿನ ಯಕ್ಷಗಾನ, ತಾಳಮದ್ದಳೆ ಪರಂಗೊಲೆನ್ನಾ ತೆರಿಯೊಂದೆರ್. ಕುಮಾರವ್ಯಾಸ ಭಾರತೊನು ಎದುರುದೀವೊಂದು ತನ ಕೆಲಿಂಜ ಭಾರತೊನ್ ಬರೆತೆರ್ ಉಂದೆಟ್ ಆಳ್ವೆರ್ನ ಸೊಂತ ಕಾವ್ಯ ನೋಟ ಉಂಡು. ಯಕ್ಷಗಾನ , ತಾಳಮದ್ದೊಲಿ ತೂವೊಂದು ಕೇಣೊಂದು ನಲಿತೊಂದು ಪಣೊಂದು, ಅನ್ವೇಸೊಂದು ಇತ್ತಿನ ಕಾವ್ಯೊ ಕಜ್ಜೊದ ಸಾರೊಲಾ ಉಂಡು.

ತುಳುನಾಡ್‌ದ ಈ ಮಾಮಲ್ಲ ಕವಿ ಯೆನ್ನ ಇಸ್ಪ ಮಿತ್ತೆರ್‌ಂದ್ ಪಣ್ಣಿಗನೇ ಯೆಂಕ್ ಪೆರೆದ ಸಂಗತಿ. ಯಾನ್ಲಾ ಯಕ್ಷಗಾನ, ತಾಳಮದ್ದೊಲಿ ಕಾವ್ಯವಾಚನ ಇಂಚಿತ್ತಿನೆಟ್ ಮನಮರ್ಲ ದೀವೊಂದಿನ ನರಮಾನಿ. ಯೆನ ಅಮ್ಮೆರ್, ಸಿದ್ಧಮ್ಮೆರ್, ಪರಯೆ ಮೊಕುಲ್ಲಾ ಯಕ್ಷಗಾನೊದ ಪದ, ಪರಂಗ, ಅರ್ತ, ತೆರಿದನಕುಲು ...ಎಲ್ಯಡ್ಡಿಂಚಲಾ ದೇವಸ್ಥಾನೊಲೆಡಾಪಿನ ಉಚ್ಚಯ, ಮಂತ್ರ ತಂತ್ರ ಪೂಜೆ ಉಂದು ಮಾತೆಡ್ಡಲಾ ಯಕ್ಷಗಾನ ಕಲೆ ಮಿತ್ತ್‌ಣ್ಣಿನೇ ಯೆನ ನಂಬಿಕೆ. ಮನಮುಟ್ಟುನಂಚದ ನಮ ಹಿರಿಯೆರ್ನ ಈ ಅಪೂರ್ವೊದ ಕಲೆನ್ ಒರಿಪಾವೊಡುನ್ವಿನೇ ಯೆನ ಸಂಕಲ್ಪೊ. ಈ ನಿಲೆಟ್ ಬೆನೊಂದಿತ್ತಿನ ಯೆಂಕ್ ಎಡ್ಡೇನ ಪಾಸಡಿಯಾದ್ ಒದಗಿನಾರ್ ಯೆನ್ನ ಇಸ್ಪಮಿತ್ತೆ ಕೆಲಿಂಜ ಸೀತಾರಾಮ ಆಳ್ವೆರ್. ಬದುಕುನವುಲಾ ಒಂಜಿ ಕಲೆ- ಈ ಕಲೆಕ್ ಯಕ್ಷಗಾನ ಕಲೆ ಸಾದಿ ತೋಜಾವುಂಡು. ಬದ್ಕದ ಕಸ್ತೊಲೆಗ್ ಪರಿಯಾರ ತೋಜಾವುಂಡು- ಇಂಚ ಯೆಂಕುಲು ತೆರಿದಿತ್ತ. ಒರಿಯಡ ಒರಿ ಪಣೊಂದುಲಾ ಇತ್ತ.

ಯಕ್ಷಗಾನೊಡು ಯೆಂಕುಲು ಒಟ್ಟುಡೇ ಏಸ ಮಲ್ತೆದ ‘ಅತಿಕಾಯ ಕಾಳಗ’ ಉಂದೆಟ್ ಆಳ್ವೆರೆನ ರಾಮೆ ಯೆನ್ನ ಲಕ್ಷ್ಮಣೆ ‘ಹನುಮೋದ್ಧ’ವೊಡು ಆಳ್ವೆರ್ನ ಹನುಮಂತೆ, ಯೆನ್ನ ವಾಲಿ- ಈ ಪ್ರಸಂಗೊನ್ ಇಟ್ಟೆಲ್‌ಡ್ ಒರ ಬೊಳ್ಳುಗು 9-30 ಗಂಟೆ ಮುಟ್ಟೊಲಾ



ಗಮಿ ವಿಶ್ವನಾಥ ತಟ್ಟಿ

ದುಂಬರಿತ್‌ದ. ಒಡಿಯೊರುಡು ಗುರು ದೇವಾನಂದ ದತ್ತ ಸ್ವಾಮಿಲೆಗ್ ಯೆಂಕ್ಲೆನ ಕೂಟ ಬಾರಿ ಮೆಚ್ಚಿಗದನೆ. ‘ರಾವಣ ಮೋಕ್ಷೊ’ಡು ಆಳ್ವೆರ್ನ ರಾಮೆ-ಯೆನ್ನ ರಾವಣೆ ಈ ಪ್ರಸಂಗ ತೂಯಿನ ಸ್ವಾಮಿಲ್ “ ಯಾನ್ ಮೇಳ ಕಟ್‌ದ್ ಕೊರ್ಪೆ ನಡಪಾಲೆ” ಪಂಡೆರ್. ಆಂಡ ಯೆನಡ್ಡ್ ಆವಂದೆ ಪೋಂಡು...

ಸೀತಾರಾಮ ಆಳ್ವೆರ್ ಬರೆಪಿನೆಟ್ ಮಲ್ಲ ಪ್ರತಿಭೆದಾರ್ ...ಆರ್ ಬರೆತಿನವು ಮಾತಲಾ ಎಡ್ಡೆ ಬರವುಲೆ! ಸುರುಟು ಕನ್ನಡೊಡೇ ಬರೆವೊಂದಿತ್ತಿನ ಆರ್ ಒವ್ವಾ ಒಂಜಿ ಎಡ್ಡೆ ಗಳ್ಳೆಡ್ ತುಳುಟು ಬರೆಪಿನ ಸಂಕಲ್ಪ ಮಲ್ತೆರ್... ಬೇತೆ ಬೇತೆ ಕೃತಿ ರಚನೆ ಮಲ್ತೆದರ್. ಆರೆನವು ಸಾಟಿ ಇಜ್ಜಿಣ್ಣಿಲೆಕೊದ ತುಳು ಕಾವ್ಯ ಕಜ್ಜಿ! ಆರೆನ ಸುರುತ್ತ ತುಳು ಪರಂಗ “ವಿಭೀಷಣ ನೀತಿ” ಉಂದು ಕಡಬ ಭಜನಾ ಮಂದಿರೊಡು ನಡತ್‌ಂಡ್. ಅಯಿಟ್ ಆರ್ ರಾಮೆ ಯಾನ್ ರಾವಣೆ ಉಂದೆತ ಕ್ಯಾಸೆಟ್‌ಲಾ ಆತ್‌ಂಡ್. ಆರೆನ ಕಾವ್ಯೊನ್ ವಾಚನ ಮಲ್ಪುನೇ ಯೆಂಕ್ ದಿಂಜ ಉಲ್ಲಾಸ್‌ದ ಬೇಲೆ.

ಕೆಲಿಂಜದಾರ್ ಒಂಜಿ ದಿನ “ಯಾನ್ ಭಾಮಿನಿ ಷಡ್ಡದಿಡ್ ಭಾರತೊ ಬರೆಯೆರೆ ಸುರು ಮಲ್ತೆದ್” ಪಂಡೆರ್. “ಒಂಜಿ ಪರ್ವೊ ಆಯಿನಪಗನೇ ಯೆಂಕ್ ಕೊರ್ಪೆ” ಯಾನ್ ಓದುದು ಕೊರ್ಪೆ ಪಂಡೆ. ಬೇಗೊಡೆ ಆದಿ ಪರ್ವೊ ಬರೆದ್ ಮುಗಿತೆರ್. “ ನಾಲೇ ದಿನೊಟು ಪಿರ ಕೊರೊಡು, ಬೇತೆ ಏರೆಗ್ಲಾ ಇತ್ತೆ ಕೊರೊಡ್ಡಿ” ಪಂಡೆರ್. ಭಾಮಿನಿಡ್ ಬರೆತಿನ ಬರವು ಅತ್ತ? ವಾಚನೊದ ಉಮೇದ್‌ದ ಯೆನನ್ ಅವು ಓದುನಗನೆ ಒಯ್ತೆ ಪತ್ತೊಂಡು! ಯಾನ್ ಯೆನ ಜೋಕುಲ್ ಮಾಲಿನಿ, ಶಾಲಿನಿ, ಮಣಿಮಾಲಿನಿ ಮೊಕೆಲ್ನ ಪೊರ್ಲದ ಕೈ ಬರವುಡು ಬರೆಪಾದ್ ದೀವೊಂಡೆ. ಅಯಿಡ್ಡ್ ಬೊಕ್ಕ ‘ಸಭಾ ಪರ್ವೊ’ ‘ಅರಣ್ಯ ಪರ್ವೊ’, ‘ಉದ್ಯೋಗ ಪರ್ವೊ’ ಇಂಚ ಆರ್ ಬರೆಪಿ ಯೆಂಕ್ ಕೊರ್ಪಿ, ಯಾನ್ ಓದುನು ಯೆನ್ನ ಕೈ ಬರವುಡ್ ಬರೆದ್ ದೀಪಿನಿ ಒಟ್ಟು ಪತ್ತೆ ಪರ್ವೊಲೆನ ಆಜಿ ಬೂಕು! ಕಾವ್ಯ ಸೃಷ್ಟಿದ ಆರೆಗ್ ಎಚ್ಚಿ ಕಮ್ಮಿ ಪತ್ತೆ ವರ್ಸೊನೇ ಬೋಡಾಂಡ್. ಆಂಡ ಕೈಬರವುಡ ಯಾನ್ ಹಟಕಟ್‌ದ ಒಂಜೊಂಜಿ ಪರ್ವೊನ್ ಪತ್ತೆ ದಿನೊಟೇ ಬರೆದ್ ಮುಗಿತೊಂದಿತ್ತೆ. ಇಂಚ ಬರೆಯಿನ ಭಾರತೊದ

ವಾಚನ ಬೇಲೆಲಾ ಯೆಂಕ್ಲೆಗ್ ಉಲ್ಲಾಸ್‌ದನೆ ! ಯೆನ್ನ ವಾಚನ, ಆರೆನ ಪ್ರವಚನ, ಇರುವೆರಾ ಮನದೀದ್ ವಾಚನ ಪ್ರವಚನ ಮಲ್ಲಿನೆನ್ ಕೇಂಡಿನಕುಲು ಭಾರತ ವಾಚನೊಗು ಇಸ್ಕೊಡೇ ಯೆಂಕ್ಲೆನ್ ಲೆತ್ತರ್. ಅಬ್ಬಕ್ಕ ಉತ್ತವೊಡು, ಟೌನ್‌ಹಾಲ್‌ಡ್, ಬಂಟೆರೆ ಸಂಘೊಡು, ಭಗವತಿ ದೇವಸ್ಥಾನೊಡು ಇಂಚ ಒಂಚೆತ ಬೆರಿಯೆ ನನೊಂಜಿ ವಾಚನ-ಪ್ರವಚನ ಕಜ್ಜ ನಡತ್‌ಂಡ್. ಯೆಂಕ್ಲೆನ ಪುದರ್‌ಲಾ ಪಸೆರ್‌ಂಡ್. ಒರೊರ ಯೆನ್ನ ವಾಚನ ಮಾತ್ರ..ಯಾನ್ ಕೆಲಿಂಜ ಭಾರತೊದ ಕರ್ಣನ ಕತೆನ್ ವಾಚನ ಮಲ್ಪುನಗ ಕೇಣುನಕ್ಲೆನ ಕಣ್ಣ್ಡ್ ನೀರ್ ಜತ್ತೊಂದಿತ್ತಂಡ್. ತುಳುಟು ಭಾರತ ಕಾವ್ಯ ಬರೆಪಿನವು ಮಾಮಲ್ಲ ಸಾದನೆನೆ... ಇಂಚ ಪಣೊಂದು, ಪೇಜಾವರ ವಿಶ್ವೇಶ್ವರ ತೀರ್ಥ ಸ್ವಾಮಿಲ್ ಆಳ್ವೆರೆಗ್ “ತುಳುನಾಡ ವ್ಯಾಸ” ಪಣ್ಣಿ ಪುಗರೆಲಾ ಪಣ್ಣೆರ್.

ಕುಮಾರವ್ಯಾಸೆ ತನ್ನ 'ಗದುಗು ಭಾರತ' ಎಂಚ ಉಂಡುಂದು ಇಂಚ ಪಣೊಂದೆ...

ಅರಸುಗಳಿಗಿದು ವೀರ ದ್ವಿಜರಿಗೆ
ಪರಮವೇದದ ಸಾರ ಯೋಗೀ
ಶ್ವರರ ತತ್ವ ವಿಚಾರ ಮಂತ್ರೀ ಜನಕೆ ಬುದ್ಧಿ ಗುಣ||
ವಿರಹಿಗಳ ಶೃಂಗಾರ ವಿದ್ಯಾ
ಪರಿಣತರಲಂಕಾರ ಕಾವ್ಯಕೆ
ಗುರುವೆನಲು ರಚಿಸಿದ ಕುಮಾರವ್ಯಾಸ ಭಾರತವ ||

ಆಳ್ವೆರಾ ತನ ಕಾವ್ಯೊ ಎಂಚ ಉಂಡುಂದು ಪಣೊಂದಿನಿ ಇಂಚ-

ಜೋಕುಲೆನ ಗೊಬ್ಬುಂಡು ಜವ್ವನೊ
ದಾಕ್‌ಲೆನ ಕುಸಲುಂಡು ಕಾಮೊದ
ಪೋಕಲೊಗ್ ಮರ್ದೊಂಡು ಪರಬೆರೆ ನೀತಿ ನೆಟ್ಟುಂಡು||
ಪಾಕೊ ಪೊಣ್ಣಲೆ ಸೇಲೆ ಒಯ್ಯಾರೊ
ಮೋಕೆ ಪತಿರುತೊ ಧರ್ಮ ವೀರೆರೆ
ನೂಕು ನುಕುರದ ಲಡಯಿನೋದುನಗಾವು ಸರಿ ಒಸಯೊ||

ಕಾವ್ಯೊದ ಬಾಸೆದ ಪೊರ್ದುನ್, ಬಣ್ಣನೆದ ಚಾತುರ್ಮೆನ್ ಓದುನನೇ ಕುಸಿತ ಅನ್ನವೊ ! 'ಬೀಮೆ ಕೀಚಕನ್ ಕೆರೈ', ಬ್ರಹ್ಮನ್ನಲೆ ಉತ್ತರಗ್ ಸಾರತಿ ಆಯೆ. ಇಂಚಿತ್ತಿನ ಬಣ್ಣನೆಲ್ ಕಾವ್ಯರಸ ಒಸರುಲೆಕದನೆ . ಬಕಾಸುರಡ ಬೀಮೆ ಪಣೊಂಬಿನಿ ಇಂಚ

“ ಒಣಸ್ ಬಲೆನೊ ಆಂಡೆ ದೈತೆರೆ
ಈರೆ ಬಂಜಿಗ್ ದಾಲ ಒರಿಜಿಯೆ
ಈರ್ ಎನ್ನನ್ ಊರ್ದ ಬೆರಣನ್ ಮಾತ ನಿಂಗ್‌ಲೆಯೆ ||

ತನ್ನ ಈ ಕಾವ್ಯೊ ಬೊಳ್ಳುಗ್ ಬರೊಡುಣ್ಣಿನ ಆಸೆಡ್ ಆರ್ ಪ್ರಕಾಶಕೆರೆನ್ ನಾಡೊಂದೇ ಇತ್ತೆರ್. ಇಡೀ ಕಾವ್ಯೊನ್ ತನ ಪೊರ್ದುದ ಕೈ ಬರವುಡು ಕುಡ ಒರ ಬರೆದ್, ಬರೆತಿನ ಕಟ್ಟ್ ಪತೊಂದು ಎತೇತೊ ಸಂಘ ಸಂಸ್ಥೆಡೆ ಸಾಯ ಕೇಣೊಂಡೆರ್. ಕಟ್ಟ್ ಬುಡ್ವಾದ್

ತೂಯಿನಕುಲು ಪ್ರಕಟ ಆವೊಡಾಯಿನ ಬರವುಂದೇ ಗ್ರಯಿತೆರ್. ಸಾಯ ಮಲ್ಪುನ ಉಮೇದ್‌ಲಾ ತೋಜಾಯೆರ್. ಆಂಡ ಮಾಮಲ್ಲ ಕಾವ್ಯೊದ ಪ್ರಕಟಣೆ ಕುಸೆಲ್ದ ಕೆಲಸ ಅತ್ತಂಡ್ ಪಿರ ಪಜ್ಜೆ ಪಾಡಿನಕುಲೇ ದಿಂಜ. ಪ್ರಕಟಣೆದ ಗಳ್ಳೆನೇ ಬತ್ತಜಿಂದಾನಗ ಆಳ್ವೆರೆನ ಮನಸ್‌ದ ಉಲ್ಲಾಸ್ ಕಮ್ಮಿ ಆಂಡ್. ಜೂವೊದ ಸಗ್ತಿ ಕುಂದುಂಡು. ಅಕೇರಿಗ್ ಕರ್ನಾಟಕ ತುಳು ಸಾಹಿತ್ಯ ಅಕಾಡೆಮಿದ ಚಾವಡಿಗ್ ಪೋದು, ತನ ಕಿಡ್ಕಿಲ್‌ಡಿತ್ತಿನ ಕಾವ್ಯೊದ ಗಂಟ್‌ನ್ ಕೊರಿಯೆರ್. ಬನ್ನಗ ಆರೆಗೊಂಜಿ ನಮೂನೆಡ್ ಸಮದನನೇ ಇತ್ತಂಡ್. ಇನಿ ಅತ್ತಾಂಡ ಎಲ್ಲೆ ತನ ಕಾವ್ಯೊಗ್ ಬೊಳ್ಳುಗ್ ಬರ್ದಿನ ಬಾಗ್ಯ ಬರು ಪಣ್ಣಿನ ಇಸ್ವಾಸೊಡೇ ಪಿರ ಬತ್ತೆರ್. ಆರ್ ಆಯಿಸ ಮುಗಿನಗ ಕಾಯ ಬುಡಿಯೆರ್...ಯಾನ್ ಆರ್ ಇಜ್ಜಂದಿನ ಬಿಗು ಬೇಜರ್ಡ್ ಕೂರೊಂದಿತ್ತೆ.

ಆಂಡ ಭಾರತ ಕಾವ್ಯ ಕಾತೊಂದೇ ಇತ್ತಂಡ್...ಅಕಾಡೆಮಿಡ್ ಅವು ಒರಿದ್ ಪೋತಿನೆನ್ ತೆರಿದಿನ ಯಾನ್ ಅಕಾಡೆಮಿಗ್ ನೆಂಪು ಪುಟ್ಟಾವೊಂದೇ ಇತ್ತೆ. ಒಂಜಿ ಮಜಲ್‌ಡ್ ಯಾನೇ ಪ್ರಕಟ ಮಲ್ಪುನ ಅಲಚನೆನ್ ಮಲ್ತದೆ. ಆಂಡ ಯೆನಡ್ಡ್ ಈ ಮಾಮಲ್ಲ ಬೇಲೆ ಆವಂದೆ ಒರಿಂಡ್.

ಈ ವರ್ಸ ಆಳ್ವೆರ್ ಬಯಕಿನಂಚಿನ ಬಾಗ್ಗೆ ಬತ್ತಂಡ್. ಕಾವ್ಯೊ ಪ್ರಕಟ ಆಪಿನ ಗಳ್ಳೆ ಕೂಡ್ಡು ಬಯ್ಯಂಡ್. ಈ ಕಾವ್ಯೊನು ಸುರುಡ್ಡಿಂಚ ತೆರಿಯೊಂದಿನ, ವಾಚನ ಮಲ್ತದ್ ಸಾರ, ಲಕ್ಷ ಜನವಾನಿಲೆಗ್ ಕೇಣ್ಪಾಯಿನ ಯಾನ್, ಕೆಲಿಂಜದರೆನ ಇಸ್ವಮಿತ್ತೆಯಾದಿತ್ತಿನ ಯಾನ್, 'ರಡ್ಡ್ ಪಾತೆರೆ' ಬರೆದ್ ಕೂರೊಡುಂದು ತುಳು ಸಾಹಿತ್ಯ ಅಕಾಡೆಮಿ ಬಯಕ್‌ಂಡ್. ಯೆಂಕ್ ಉಂದು ಪೆರೆದ ಸಂಗತಿ. ಅಂಚ ಒಪ್ಪಿದ್ ಬರೆತೆ. ಕಾವ್ಯೊ ಬೊಳ್ಳುಗು ಬರ್ದಿನೆನ್ ತೂಪಿನ ಬಾಗ್ಯ ತಿಕ್ಕದಿನವೇ ಯೆಂಕ್ ಬಾರಿ ಕುಸಿ. ಈ ಮಾಮಲ್ಲ ಬೇಲೆನ್ ಮಲ್ತದಿನ ತುಳು ಸಾಹಿತ್ಯ ಅಕಾಡೆಮಿಗ್ ಯಾನ್ ಉಡಲ್‌ದಿಂಜಿದ್ ಸೊಲೈ ಸಂದಾವೆ. ಎಡ್ಡೆಪುನೇ ಬಯಕುವೆ. ಈ ಪೊರ್ದುಡು ಆರ್ ಆತ್ಮೊಲ ಸಲ್ಮಿತೊಡು ಆಶೀರ್ವಾದ ಮಲ್ತೊಂದುಂಡುಂದು ಎಣ್ಣೊನುವೆ!

ತುಳು ಒರಿಯೊಡುಂದು ಸಬೆಟ್ ದಿಂಜ ಪಾತೆರುನ ಕುಲುಲ್ಲೆರ್, ಬಾಷಣೊಲು ನೆಂಪುಡು ಒರಿಯಂದ್. ಆಂಡ ತುಳುಟು ಎಡ್ಡೆನ ಬೂಕುಲು ಬೊಳ್ಳುಗು ಬತ್ತಂಡನೇ ಓದೊಲಿ, ಒರೊನೊಲಿ . ಜೋಕ್ಲೆಗ್ ಆಸ್ತಿದಲೆಕ ಒರಿಪಾವೊಲಿ. ಆಳ್ವೆರೆನ ಈ ತುಳು ಭಾರತೊನ್ ಸಾರ ಸಾರ ಜನ ಓದಡ್ ತುಳುವೆರ್ ಇಲ್ಲ ಇಲ್ಲಡ್ ಪೊಲ್ಪುದ ಸೊತ್ತು ಆದ್ ಒರಿಯಡ್ ಇಂಚ ಬಯಕೊಂದು ಆಳ್ವೆರೆನ್ ನೆಂಪು ಮಲ್ತೊಂದು ಮಾಮಲ್ಲ ಕವಿ ಆರೆಗ್ ಮನಸ್‌ಡೇ ಪುಡ್ಯಾಡೊನುವೆ.

20-2-2015

ಗಮಿ ವಿಶ್ವನಾಥ ಶೆಟ್ಟಿ



ಪ್ರಕಾಶಕೆರೆನ ಪಾತೆರ

ತೆಣ್ಣಾಯಿ ಭಾರತೊದ ಐನ್ ಮುಕ್ಯ ದ್ರಾವಿಡ ಬಾಸೆಲೆಡ್ ತುಳು ಬಾಸೆಲಾ ಒಂಜಿ. ಉಂದು ಬಾರಿ ಪಿರಾಕ್‌ಡ್ಲಿಂಚಿ ಇತ್ತಿನ ಬಾಸೆ. ಸ್ವಂತ ಲಿಪಿಲಾ ಇತ್ತಿನ ಬಾಸೆ. ಕರ್ನಾಟಕೊಡು ಕನ್ನಡನೇ ರಾಜ್ಯ ಬಾಸೆ ಆಯಿನೆಡ್ಲಾದ್ ತುಳುತ ತಾನಮಾನ ಕಮ್ಮಿ ಆವೊಂದು ಪೋಂಡು. ಆಂಡ ಅಯಿತ ತಿರ್ಲ, ಪೊರ್ಲು ಕಮ್ಮಿ ಆಯಿಜಿ. ಬಂಗಾರ್ನ್ ಮಣ್ಣೆಡ್ ಸೇರಾಂಡಲಾ ಅಯಿತ ಗುಣೊಕು ಅರಕೆ ಬರಂದ್. ಒಂಜಿ ಸತ್ತೊದ ಬಾಸೆ ಮದೆಕ್ ಪೋಂಡಲಾ ಅಳಿಗೊಳಿ ಆವಂದ್ ಪಣ್ಣಿನೆಕ್ ತುಳು ಬಾಸೆದ ಚರಿತ್ರೆ ಸಾಕ್ಷಿ ಆಪುಂಡು. ಕರ್ನಾಟಕೊಡು ಕನ್ನಡದ ಮೇಲಾಟ, ಇಂಗ್ಲಿಷ್‌ದ ಆರಾಟೊಡು ತುಳು ಪಿರ ಒರಿದಿತ್ತಂಡ್. ಆಂಡ ಇಂಚಿಪ ತುಳುತ್ರೆ ಸಿರಿ ಸಂಪೊತ್ತುನು ಲೋಕೊರೆ ನೆಗತ್ ತೋಜಾವುನಂಚಿನ ಬೇಲೆ ಆವೊಂದುಂಡು. ಅಯಿತ ಒಂಜಿ ಮರ್ಗಿಲ್‌ದ ಬೇಲೆ ಪಂಡ ತುಳುಟು ಸಾಹಿತ್ಯೊದ ಬುಳೆಚ್ಚಿಲ್. ಸಾಹಿತ್ಯೊದ ಮಾತ ಪ್ರಕಾರೊಲೆಡ್ಲಾ ಇತ್ತೆ ಬೆನ್ನಿ ನಡತೊಂದುಂಡು. ಇತ್ತೆದ ಜವಣೆರ್‌ಲಾ ಈ ಬೇಲೆಗ್ ದುಂಬಾತೆರ್ ಪಣ್ಣಿನನೇ ಕುಸಿತ ಸಂಗತಿ.

ತುಳು ಸಾಹಿತ್ಯೊದ ಬುಳೆಚ್ಚಿಲ್‌ಗಾದ್ ದಿಂಜ ಬೆನ್ನಿನೆಕ್ಲೆಡ್ ಕೆಲಿಂಜ ಸೀತಾರಾಮ ಆಳ್ವೆರ್‌ಲಾ ಒರಿ.. ಆರ್ ಯಕ್ಷಗಾನ ಪ್ರಸಂಗ, ನಾಟಕ, ಕಬಿತೆ, ಕಾವ್ಯ ಇಂಚ ದಿಂಜ ಬಗೆತ ಸಾಹಿತ್ಯ ಬರೆತಿನಾರ್. ಅರೆನ ಮಾಮಲ್ಲ ಕಾವ್ಯೋನೇ **ತುಳು ಕೆಲಿಂಜ ಭಾರತೊ**.

ಈ ಮಾಮಲ್ಲ ಕಾವ್ಯೊನು ಭಾಮಿನಿ ಭಂದಸ್‌ಡ್ ಬರೆದ್ ತುಳು ಬಾಸೆದ ಸಗ್ಗಿನ್ ದೆರ್ತ ತೋಜಾದೆರ್. ತುಳುಟು ಒವ್ವೇ ಸಂಗತಿನ ಪಂಡ್ ತೋಜಾವೊಲಿಣ್ಣಿನ ಗೇನೊನ್ನಾ ಕೊರೆರ್. ಈ ಕಾವ್ಯ ಓದುನಗ ತುಳು ಬಾಸೆದ ಸಬ್ಬ ಸಂಪೊತ್ತುದ ಪರ್ವಯ ಆಪುಂಡು. ಬಾಸೆದ ಸಗ್ಗಿಲಾ ತೆರಿಯುಂಡು.

ತುಳು ಕೆಲಿಂಜ ಭಾರತೊ ತುಳುವೆರ್ ಮಾತೆರ್ಲಾ ಓದೊಡಾಯಿನ ಕಾವ್ಯ. ತುಳುವೆರ್ ಇಲ್ಲೆಲ್ಲಡ್ ಉಪ್ಪೊಡಾಯಿನ ಕಾವ್ಯ. ಅಂಚ ಉಂದೆನ್ ಅಚ್ಚಿ ಮಲ್ಪುನ ಬಯಕೆಡ್ ಕವಿ ಸೀತಾರಾಮ ಆಳ್ವೆರೆ ಕರ್ನಾಟಕ ತುಳು ಸಾಹಿತ್ಯ ಅಕಾಡೆಮಿಗ್ ಕೊರ್ದಿತ್ತೆರ್. ಆರ್ ತೀರ್ತ್ ಪೋಯಿನೆಡ್ಲ ಬೊಕ್ಕ ಆರೆನ ಬೊಡೆದಿ ಲಕ್ಷ್ಮೀ ಆಳ್ವೆರ್ ಪ್ರಕಟಣೆಗ್ ಒಪ್ಪಿಗೆ ಕೊರೆರ್. ಅಂಚ ಅಚ್ಚಿ ಮಲ್ಪುನ ಬೇಲೆ ದುಂಬರಿಂಡ್. ತುಳುತ ಮಾಮಲ್ಲ ಭಾರತೊ ಕಾವ್ಯ ಬೊಳ್ಳುಗ್ ಬರ್ಪಿನ ಈ ಪೊರ್ರುಡು ತುಳುವೆರ್ ಉಂದೆನ್ ಮೋಕೆಡ್ ಎದೊನುವೆರ್ .ತಂಕ್ಲೆನ ಇಲ್ಲಡ್ ಈ ಕಾವ್ಯೊನ್ ಒರಿತೊಂದು ದುಂಬುದ ತರೆಮಾರ್‌ಗ್ ಪರ್ವಯ ಮಲ್ಪುವೆರ್ ಪಣ್ಣಿನ ಆಸೆಡ್ ಕರ್ನಾಟಕ ತುಳು ಸಾಹಿತ್ಯ ಅಕಾಡೆಮಿ ಉಂದೆನ್ ತುಳುವೆರ್ ದುಂಬು ದೀವೊಂದುಂಡು. ಉಂದೆನ್ ಓದುನ, ಓದುಲೆಕ ಉಮೇದ್ ಕೊರ್ದಿನ ಮಾತೆರೆಗ್ಲಾ ಸೊಲೆಲ್. ಪೊರ್ರುಡ್ ಮುದ್ರಣ ಮಲ್ತಿನ ಪವನ ಗ್ರಾಫಿಕ್ಸ್ ಕೂಟದಕ್ಲೆಗ್ ಸೊಲೆಲ್.

ಕೆಲಿಂಜ ಭಾರತೊ – ತುಳು

ಆದಿ ಪರ್ವೊ

ಸುರುತ ಸಂದಿ.....	01 – 30
ರಡ್ಡನೆ ಸಂದಿ	30 – 52
ಮೂಜನೆ ಸಂದಿ	52 – 78
ನಾಲನೆ ಸಂದಿ.....	78 – 96

ಸಭಾ ಪರ್ವೊ

ಸುರುತ ಸಂದಿ.....	97 – 115
ರಡ್ಡನೆ ಸಂದಿ	115 – 133
ಮೂಜನೆ ಸಂದಿ	134 – 152
ನಾಲನೆ ಸಂದಿ.....	153 – 173

ಅರಣ್ಯ ಪರ್ವೊ

ಸುರುತ ಸಂದಿ.....	174 – 182
ರಡ್ಡನೆ ಸಂದಿ	182 – 196
ಮೂಜನೇ ಸಂದಿ	196 – 204
ನಾಲ್ಕನೆ ಸಂದಿ	204 – 231

ವಿರಾಟ ಪರ್ವೊ

ಸುರುತ ಸಂದಿ.....	232 – 243
ರಡ್ಡನೆ ಸಂದಿ	244 – 255

ಉದ್ಯೋಗ ಪರ್ವೊ

ಸುರುತ ಸಂದಿ	256 – 273
ರಡ್ಡನೆ ಸಂದಿ	273 – 286

ಭೀಷ್ಮ ಪರ್ವೊ

ಸುರುತ ಸಂದಿ	287 – 295
ರಡ್ಡನೆ ಸಂದಿ	295 – 305

ದ್ರೋಣ ಪರ್ವೊ

ಸುರುತ ಸಂದಿ	306 – 317
ರಡ್ಡನೆ ಸಂದಿ	317 – 327

ಕರ್ಣ ಪರ್ವೊ

ಸುರುತ ಸಂದಿ	328 – 336
ರಡ್ಡನೆ ಸಂದಿ	336 – 345
ಮೂಜನೆ ಸಂದಿ	345 – 349

ಸಲ್ಯ ಪರ್ವೊ

ಸುರುತ ಸಂದಿ	350 – 353
ರಡ್ಡನೆ ಸಂದಿ	353 – 355

ಗದಾ ಪರ್ವೊ

ಸುರುತ ಸಂದಿ	356 – 360
ರಡ್ಡನೆ ಸಂದಿ	361 – 367
ಮೂಜನೆ ಸಂದಿ	367 – 371

ಕೆಲಿಂಜ ಬಾರತೊ-ತುಳು

ಆದಿ ಪವೊರ್- ಒಂಜನೆ ಸಂದಿ

ಪೀಟಿಗೆ

ಸಾರದೆನ್ ನೆನೆತೊಂದುಲಾ ಮದ -
 ಊರ್ದ ಮಹಗಣಪತಿನ ನಂಬುದು
 ಕಾರಣೀಕೆರ್ ಮೂಜಿ ಮೂರ್ತಿಲೆಗರಿಕೆ ಮಲ್ತೊಂದು ||
 ಊರುದುಳ್ಳಾಲ್ದೀಗ್, ಪೆದ್ದನ
 ದಾರಮಗ್ , ಅಮೆರೆಗ್, ಬುಕ್ಕೊ ಉ-
 ದಾರೊ ಮನಸ್‌ಡ್ ಕಲ್ಪಯಿನ ಗುರುಕಾರ್ಗ್ ಪುಡ್ಯಾಡ್ಲೆ ||

1

ಸತ್ಯೊ ಸಿವ ಸುಂದರೊಡು ಊರ್ಜಿತೊ -
 ಡಿತ್ತಿ ಚೇತನೊ ವಿಸ್ವ ಸಗ್ತಿಲೆ -
 ನಿತ್ತೆ ತೋಜವಿಸಿರಿ ಪುರಾಣೊದ ಕಾವ್ಯೊ ಬಾರತೊನು ||
 ನಿತ್ಯೊ ಓದ್‌ನಗ್‌ಕೆಲೆ ಜಲ್ಮೊದ
 ಕುತ್ಯೊ ಸರಿ ಪರಿಯಾರೊಗಾಪುನ
 ತತ್ಯೊ ಸಾಸ್ತ್ರೊದ ಕತೆನ್ ಪನ್ತನೆ ವೇದವ್ಯಾಸೆರ್‌ಗೆ ||

2

ವೇದೊ ಐನನೆ ಪನ್ನಿ ಬಾರತೊ
 ಆದಿ ನಾರಾಯಣನ ಕಾರ್ನಿಕೊ
 ಬಾದರಾಯಣೆರಾನಿ ಪನ್ನಗ ಬರೆಯೆ ಸಿರಿಗಣಪೆ ||
 ಓದುದೀ ಮಹಕಾವ್ಯೊದರ್ತೊನು
 ಸಾದು ವೈಸಂಪಾಯು ರುಸಿ ಸರಿ-
 ಯಾದ್ ಜನಮೇಜಯಗ್ ಪಂಡೆರ್ ಇವರೊ ಇವರಾದ್ ||

3

ವೇದ ಧರ್ಮೊದ ಸಾರೊ, ಮೋಕ್ಷೊದ
 ಸಾದನೆಗ್ ಸಿರಿಕ್ರಿಷ್ಟೆ ಪಾರ್ತಗ್
 ಸಾದಿ ತೋಜಯಿ ಗೀತೆದಮ್ಪುತೊ ಸೇರ್ಡ್ ಇತ್ತ್‌ನೆಟ್ ||

ವೇದವ್ಯಾಸೆರ್ ಪಾತ್ರೊದಾರಿಯಿ
 ಆದ್ ನಡಪಯಿ ಕತೆನ್ ಕೇಂಡ್‌ದ್
 ವ್ಯಾದಿ ಗುಣೊ ಆವೊಂದು ಜನಮೇಜಯನೆ ಬದ್‌ಕೊಂಡೆ ||

4

ರಾಜಕೀಯೊಗು ತಂತ್ರೊ ಕರ್ಮೊನು
 ತೋಜವುನ ಮಹತತ್ಯೊ ಇಸ್ವೊ ಸ-
 ಮಾಜ ನೀತಿಗ್ ಸಾಸ್ತ್ರೊ ಧರ್ಮೊಗು ಪತ್ತಿ ಕೈತುಡರ್ ||
 ರಾಜಿಗೊಪ್ಪಂದ್‌ನಯ ಪುದರ್‌ನ್
 ಮಾಜವುನ ಕೆಣಿ ಕುಸೆಲ್ ಕ್ರಿಷ್ಟನ
 ತೋಜುನೆನೆ ಅಲ್ಪಲ್ಪ ಬಾರತೊ ಕಾವ್ಯೊನೋದ್‌ನಗ ||

5

ಜೋಕುಲೆನ ಗೊಬ್ಬುಂಡು , ಜವ್ವನೊ-
 ದಾಕಲೆನ ಕುಸಲುಂಡು ಕಾಮೊದ
 ಪೋಕಲೊಗು ಮದ್ದುಂಡು ತೆರಿಯೆರೆ ನೀತಿ ನೆಟ್ಟುಂಡು ||
 ಪಾಕೊ ಪೊಣ್ಣುಲೆ ಸೇಲೆ ಮಾಕಟೆ
 ಮೋಕೆ ಪತಿರುತೊ ಧರ್ಮೊ ವೀರೆರೆ
 ನೂಕು ನುಕುರ್‌ದ ಲಡಯಿನೋದ್‌ನಗಾವು ನಂಕೊಸಯೊ ||

6

ಆದಿ ಕವಿ ವಾಲ್ಮೀಕಿ ವ್ಯಾಸೆರೆ
 ಪಾದೊನೆಣ್ಣೆಡ್ ಪಂಪ ರನ್ನೆರೆ
 ಸಾದನೆನ್ ಪುಗರೊಂದು ಗದುಗುದ ನಾರಣಪ್ಪನ್‌ಲ ||
 ಆದರೊದ ಕವಿ ರಾಗವಾಂಕನ
 ಸೋದನೆಡ್ ಕಾವ್ಯೊಲೆನ್ ಬರೆಯಿನ
 ಜಾದುಗಾರೆನೆಲಾ ಕುವೆಂಪುನು ನೆನೆತ್‌ದೇ ಬರೆಪೆ ||

|| ಚಂದ್ರವಂಸೊದ ತರವಾಡ್ ||

ಆದಿ ಸಿಸ್ಟಿಡ್ ಬ್ರಹ್ಮ ದೇವರ್
ಸಾದುಲೇಲ್ವನೊ ರುಸಿಕುಲೆನ್ ಸರಿ-
ಯಾದ್ ಸಿಸ್ಟಿಡ ಕಾರ್ಯೋಗಾತ್ಮೋನೆ ಉಂಡು ಮಲ್ತೆರ್ಗೆ ||
ಸಾದನೆದ ರುಸಿಯತ್ರಿ ಕಣ್ಣಾಡ್ -
ಮೇದಿನಿದ ಸಸ್ಯೋಲೆನ ಬಲಕೆಗ್
ಲಾದ್ ಪುಟ್ಟಿನೆ ಚಂದ್ರೆ ತಿಂಗೊಳು ದೇವೆರಾವೊಂದು ||

1

ಆಯಡ್ಡಾಯಿನ ಮಲ್ಲ ಸಂತೆತಿ
ಗಾಯನವೆ ಪುದರಾಂಡ್‌ಲಾಯಗ್
ಪ್ರಿಯೊದಾ ಮಗೆ ಬುದನೆ ವಿಷ್ಣುನ ಬಗ್ಗೆ ಸಜ್ಜನೆನೆ ||
ಪ್ರಾಯೊ ದಿಂಜಿದ್ ಮದಿಮೆ ಆವೊಂ-
ದಾಯೆ ಉಪ್ಪುನಗಾ ಪುರೂರವೆ -
ನಾಯಗೇ ಮಗೆಯಾದ್ ಪುಟ್ಟುದು ಸುಕೊಟು ಬಲತೊಂಡೆ

2

ಮಿತ್ತ ಮಿರಿ ಲೋಕೊದಲ್ ಊರ್ವಸಿ
ನರ್ತನೊದ ಕಲೆಗಾರ್ತಿಯಾಲೆನ್
ಸತ್ಯೊ ಸಾಕ್ಷಿಡ್‌ಲಾ ಪುರೂರವೆ ಮದಿಮೆ ಆವೊಂದು ||
ನಿತ್ಯೊ ಸುಕೊ ಸಂಸಾರೊಡಿತ್ತದ್
ಉತ್ತಮನ್ ಪಡೆವೊಂಡೆ ಆಯುನು
ಸತ್ಯೊ ಸಾಸಿಯೆ ಆದ್ ಬಲತೆನೆ ಬಾಲೆ ಪೊರ್ಲಾದ್ ||

3

ಬಲಪಿ ಬಾಲೆಗ್ ವಿದ್ಯೆ ಬುದ್ಧಿನ್
ಕಲ್‌ಪದಾದ್‌ಲ ಪಟ್ಟೊಗೇರ್ಸದ್
ಕುಲೊ ಕುಟುಂಬೊನು ತೊದು ಮದಿಮೆನ್ ಮಲ್ತೆ ಸಂತೊಸುಡು ||
ಬಲೊಟುಲಾಯು ಕುಮಾರೆ ಚಂದ್ರನ
ಕುಲೊತ ಕೀರ್ತಿದ ಮುಗುಳಿನೇರ್ಲದ್
ಗಿಲಪುಡುಪ್ಪುನಗಾಯಗೊರಿ ಮಗೆ ನವುಸೆ ಪನ್ಪುನಯೆ ||

4

ಆ ನವುಸೆ ಮಹ ಯಜ್ಞೊ ಯಾಗೊನು
ತಾನೆ ಮಲ್ಪದ್ ದೇವಲೋಕೊಡು
ಮಾನಿತೆನೆ ಆವೊಂದು ಇತ್ತೆಗೆ ಏರ್ ತೂಯ್ಕಲ್ ||
ದಾನಿಯಾಯಿನ ರಾಜೆ ನವುಸನ
ರಾಣಿ ಪೆದ್ದನ ಬಾಲೆ ಪೊರ್ಲಾದ್
ಆಣ್ ಮಗೆನೆ ಯಯಾತಿ ಪನ್ಪುನ ಚಂದ್ರ ವಂಸೊದಯೆ ||

5

ಆ ಯಯಾತಿಗ್ ದೇವಯಾನೆನೆ
ಪ್ರಿಯೊದಲ್ ಸರ್ಮಿಸ್ತೆ ಪನ್ಪುನ -
ಲಾಯಗಿರ್ಲೆರ್ ಬುಡೆದಿನಾಕ್‌ಲ್ ಪೆದ್ಯೆರಿರ್ಲೆರ್ ||
ದಾಯವಾದಿಲು ತನ್ನ ಬಾಲೆಲು
ಆಯೆರೆಂದ್‌ದ್ ಚಂದ್ರ ವಂಸೊನು
ದಾಯ ಬಾಗೊನು ಮಲ್ತೆ ಆ ಯದು ಪುರುಗು ಒಮ್ಮತೊಡು

6

ಯಾದವೆರೆ ಕವರಾಂಡ್ ಯದುನವೆ
ಸಾದನೆಡ್ ಪುರು ಪನ್ಪುನಾಯನ-
ವಾದ್ ಮೆರೆಯಿನ ಕುಟುಮೊ ಮಲ್ಲವೆ ಪನ್ನಿ ಕುರುವಂಸೊ ||
ಆದ್ ಪೋಯೆರ್ ಏತೊ ಅರಸುಲು
ಸೋದನೆಡ್ ಸಾದನೆಡ್ ಬರ್ಸೆರ್
ಕಾದುನೆಟ್ ಸತ ಕೀರ್ತಿ ಪಡೆಯಿನ ವೀರ ಚತ್ರಿಯೆರ್ ||

7

ವೀರ ದುಸ್ಯಂತೆಂದ್ ಪುದರ್‌ದ
ಬಾರಿ ಕೀರ್ತಿದ ಅರಸುಗಾಯೆನೆ
ಭಾರತೊಗೆ ತನ ಪುದರ್ ಲೆಪುಡಯಿ ಮಗೆ ಸಕುಂತಲೆನ ||
ಏರ್ ಸರಿ ಈ ಭರತ ರಾಜಗ್
ಊರುಡಿತ್ತನ ಅರಸುನಾಕ್‌ಲ್
ಪೂರ ಕಪ್ಪೊನು ಕೊರ್ದು ನಿಜೊ ಸಾಮಂತೆರಾಯೆರ್ಗೆ

8

ಭರತಗೊರಿ ಮಗೆ ಆ ಸುಹೋತ್ರನೆ
ಬಿರುತ ವಿದ್ಯೆಡ್ ಬರ್ಸೆನಾಯಗ್
ಕುರುಕುಟುಂಬೊಗು ಕೀರ್ತಿದಾ ಮಗೆ ಹಸ್ತಿ ಪನ್ಪುನಯೆ ||
ಹಿರಿಯ ಮಗೆನೇ ಪ್ರಾಯೊದಿಂಜಿದ್
ಸಿರಿತ ಸಿಮ್ಮಾಸನೊನು ಏರ್‌ದ್
ಮೆರೆಯಿ ರಾಜ್ಯೊಗು ಹಸ್ತಿನಾವತಿ ಪನ್ನಿ ಪುದರಾಂಡ್ ||

9

ವೀರ ಸಂವರಣೆನ್ನಿ ರಾಜ ಕು
ಮಾರೆ ಪುಟ್ಟಿಯೆ ಹಸ್ತಿಗಾಪಗ
ಊರುನಾಳ್‌ದ್ ಸೂರ್ಯ ಮಗಲೆನ್ ಮದಿಮೆ ಆವೊಂಡೆ ||
ಬಾರಿ ತೇಜಿದ ಕುರುನು ಪೆದ್ಯೆಲ್
ಕಾರಣೀಕನ ಪುದರ್ ವಂಸೊಗು
ಸೇರ್‌ನೆಟ್ ಕುರು ವಂಸೊ ಪನ್ಪುನ ಮಲ್ಲ ಪುದರಾಂಡ್ ||

10

ಆಯನವೆ ತರವಾಡ್‌ಡೇತ್‌ಲ
ನಾಯಕೆರ್ ಈ ರಾಜ್ಯೊನಾಳ್‌ದ್
ಪೋಯಿನಾಕ್‌ಲೆ ಪೈಕಿಡೊರಿಯೆ ಪ್ರತೀಪ ಮಹರಾಜೆ ||
ಆಯ ಮಗನೇ ಸಂತನುಂದುದು -
ಲಾಯನಾ ಕೈ ಪತ್ತನಾಲೇ
ದೇಯಿ ಗಂಗೆನೆ ವಿಷ್ಣು ಪಾದೊಡು ಪುಟ್ಟಿ ಬಾಗಿರತಿ ||

|| ವೇದವ್ಯಾಸೆರೆ ಜನನೊ ||

ಬ್ರಹ್ಮ ದೇವೆರೆ ಸಾಪೊಡ್ಡಾವರೊ
ಪುಣ್ಯೊ ಲೋಕೊನು ಬುಡುದು ಗಂಗೆನೆ
ಹಸ್ತಿನಾವತಿದರಸುಗಾಯಲ್ ಪಟ್ಟಿದಾರಾಣಿ ||
ಒರೊ ಒರೊಡು ಪೆದ್ದದ್ ಬಾಲೆಲು
ಪುಟ್ಟಿ ಸಾತ್‌ಗೆ ಸೈತ್ತೊ ಅವ್ವೇ
ತಿಕ್ಕಿ ಸಾಪೊಡು ಏಳ್ ವಸುಕುಲು ಬದ್‌ಕ್‌ನಯೆ ಒರಿಯೆ ||

1

ಆಯನೇ ಬೀಸ್ಮೆದ್ ಪುದರ್‌ದ
ಬಾರತೊಗು ರಡ್ಡನೆದ ಸೂರೈನೆ
ಬಾಲೆನರಸುಗು ಕೊರ್ದು ಪೋಯಲ್ ಗಂಗೆ ಕೈಬುಡುದು ||
ಆಲ್ ಪೋಯಿನ ದುಕ್ಕೊ ಆಂಡಲ
ರಾಜೆ ಸಂತನು ಬಾಲೆ ಮೋನೆನ್
ತೂದು ಮರತೆನೆ ತನ್ನ ಬುಡೆದಿನ್ ಗಟ್ಟಿ ಮನಸ್‌ಡ್‌ಲ ||

2

ವಿದ್ಯೆ ಬುದ್ಧಿನ್ ವೇದೊ ಸಾಸ್ತೊನು
ಕಲ್ಪಯೆನೆ ಧನುರ್ವೇದೊ ಬಾಲೆಗ್
ತತ್ತೊ ಸಾಸ್ತೊನು ರಾಜ ನೀತಿನ್ ಪರಸುರಾಮೆರೆಡ ||
ಕಲ್ತಿ ವಿದ್ಯೆಡ್ ಸಾಂಕ್‌ನಮ್ಮನ
ನೆತ್ತೆರ್ದದ ಗುಣೊ ಪಡೆದ್ ಬೀಸ್ಮೆನೆ
ಅಪ್ಪೆ ಸಾಂಕನೊ ದೂರೊ ಆಂಡಲ ಕೀರ್ತಿ ಪಡೆವೊಂಡೆ ||

3

ಏತೊ ಮೊಗವೀರೆರೆನ್ ದುಂಬುದ
ರಾಜೆರಾ ಕುರು ವಂಸೊದಾಕ್‌ಲ್
ಕೇರಳದ ಗಡಿನಾಡ್‌ದಲ್ಲಡ್‌ದಕ್‌ಲೆ ಕುಟುಮೊಲೆನ್ ||

ಆರ್ಯವರ್ತೊದ ಗಂಗೆದಾ ಬರಿ-
ಟಾಕ್‌ಲೆನ್ ಕುಲ್ಲದೆರ್ ಉಂಬೊಳಿ
ಬೂಡು ಬುಡರೊನು ಕೊರ್ದುಲರಮನೆದೊಳಿಗೊಗುಲಾದ್ ||

4

ಕಡಪುದೋಡೊನು ಒಚ್ಚೊಡಾಕ್‌ಲ್
ಸುದೆಟ್ ಪತ್ತನ ಮೀನ್ ಮಾರೊಡು
ಅರಸುಲೆನ ಪಲ್ಲೇಂಕಿ ತುಂಬೊಡು ಸುಕೊತ ಜೀವನೊಗು ||
ನೂದು ಇಲ್ಲೆಲೆಗೊರಿಯೆನೇ ಗುರಿ-
ಕಾರೆ ಆಯನ ಕಟ್ಟ್ ಮೀರೈರೆ
ಏರೆಗ್‌ಲ ಹಕ್ಕಿದ್ ದಾಸೆನೆ ಪನ್ನಿ ಗುರಿಕಾರೆ ||

5

ಆಯಗೊರ್ತಿಯೆ ಮಗಲ್ ಆಲೆಗ್
ತಾನೆ ಕಲ್ಪಯೆ ವಿದ್ಯೆ ಬುದ್ಧಿನ್
ಕೇರಳದ ಮಲ್ಯಾಲೊ ಬಾಸೆದ ಪಾಟ್ ಪಾರ್ದನೊನು ||
ಆಲೆನೇ ಕುಂಞಮ್ಮ ಪಂಡ್‌ದ್
ಮೋಕೆಡೇ ಲೆಪ್ಪೆದೆನೆ ತರವಡ್ -
ದಾಕ್‌ಲೆನ ಮರ್ಜಿದವೆ ಪುದರ್‌ಡ್ ಬಲತಲಾ ಮಗಲ್ ||

6

ಪುಣ್ಯೊ ಗಂಗೆದ ಬರಿಟ್ ಇತ್ತನ
ಗಣೈರಾ ಮೊಗವೀರ ಜಾತಿದ
ಪೊಣ್ಣುಗುಳು ಸತ ಓಡೊನೊಚ್ಚೆರ್ ಆಯಿರಿಯೆರೆಗ್ ||
ತನ್ನ ತಪಸ್‌ದ ಯೋಗೊ ನಿದ್ರೆಡ್
ಕಣ್ಣ್ ಮುಚ್ಚಿನ ರುಸಿ ಪರಾಸರೆ-
ರೆಣ್ಣಿಯೆರ್ ಈ ಲೋಕೊ ಸಂಗ್ರಹೊಗೊರಿಯೆ ಬೋಡುಂದು||

7

ನಾಲ್ ಪುರುಸಾರ್ತೊಲೆಡ್ ಧರ್ಮೊಗು
ನೇಲ್ಯ ಮಣೆದೀಡ್ಡಿತ್ತಿ ರಾಜ್ಯೊನೆ
ಬಾರಿ ಪುದರ್‌ದ ಹಸ್ತಿನಾವತಿದೊರ್ಮೆ ತಿರ್ಗಿಯೆರ್ ||
ಆರೆಗೊಪ್ಪುನ ಸಿಸ್ಯನಾಕ್‌ಲ್
ಏರ್ಲ ತಿಕ್ಕೈಚೆರ್ದದ್ ಗಂಗೆದ
ಆಯೆರೆಗ್ ಕಡಪಿಯೆರೆ ಬತ್ತೆರ್ ಓಡೊ ಕಡಪುದಡೆ ||

8

ಓಡೊ ಕಡಪವಿ ಪೊಣ್ಣು ಆರೆನ್
ತೂದು ಕೈ ಮುಗಿಯೊಂದು ಪಂಡಲ್
ಈರ್ ಮಿತರೆಲೆ ಸ್ವಾಮಿ ಓಡೊಗು ಯಾನೆ ಒಚ್ಚುನಲ್ ||

ಕೂವೆ ಮರಕಕ್ಡ್‌ದಿ ಪಾಯಿನ್
ಆಲೆ ಬುಡ್ಡ್ ಮುಕಿಟ್ ಕುಲ್ಯಲ್
ಆ ರುಸಿಲ ಕುಲ್ಲಿಯೆರ್ ಓಡೊಡು ಒಚ್ಚಲಾ ಪೊಣ್ಣು ||

9

ಓಡೊನೊಚ್ಚುನಗಾಲೆ ಮೆಯಿತವೆ
ನಾತೊ ಮೀನ್‌ದ ಪೊಡಸ್ ಮೂರಿಡ್
ಆ ರುಸಿಕ್ ತನ್ನುಸುಲು ಕಟ್ವೆ ಆನಗಾರಪಗ ||
ಚೀಲೊದಾ ಕಸ್ತೂರಿ ಬುಡ್ಡೆದ
ಬಾಯಿ ದೆತ್ತದ್ ಪೂಜ್ಯರಾಲೆನ
ಮೇಲ್‌ಗಾ ಪುಣ್ಯಾತ್ಮೆ ಕಮ್ಮೆನೊ ಒರಿಪಿ ವರೊಕೊದುರ್ ||

10

ಕಾಮೊದಾ ಜರೊಟಿಕ್‌ಲ್ ಒಟ್ಟುಗು
ಓಡೊಡೇ ಜೆಪ್ಪುನಗ ಮೈಂದ್‌ಡ್
ಎರೆಗ್‌ಲ ಸುದೆ ನಡುಟು ತೋಜಿಜಿ ಓಡೊ ಆಯೆರೆಗ್ ||
ಸೀದ ಎತ್ತನಗಪಗ ಆಲೆಗ್
ಬೋದೊ ಮತಿ ಇದ್ಯಾಂಡ್‌ಲದಗನೆ
ಬಾಲೆ ಒರಿ ಬಂಜಿಡ್‌ದ್ ಪಿದಡ್‌ದ್ ಉಂತ್ಯೆ ಕೈಮುಗಿದ್ ||

11

ತನ್‌ಕೊರಿಯೆ ನಿಜೊ ಸಿಸೈ ಬೋಡುಂ
ದೆನಿಪಿ ಮುನಿ ಸಂಕಲ್ಪುಡಿಂಚಿನ
ಕೊಡಿಪು ಕೊಡಿತ್‌ನೆ ಆರೆ ತಪಸ್‌ದ ಪುಣ್ಯೊಡ್ಲಾವರೊನೆ
ಚಣೊಟು ಬಲತ್‌ದ್ ಬಾಲೆ ಮಲ್ಲೆನೆ
ಒರುಸೊ ಐನೆತ ಒಡ್ಲರೊಡು ಸರಿ
ಕಯಿನ್ ಮುಗಿದುಂತ್‌ದ್‌ನ ತೂಯೆರ್ ರುಸಿ ಪರಾಸರೆರ್ ||

12

ಅಪ್ಪೆ ಈರೆಗ್ ಕಸ್ತೊ ಬನ್ನಗ
ಎನ್ನನೇ ನೆನೆಪಿಂದ್ ಕಾರ್‌ಗ್
ಅಡ್ಲೊ ಬೂರ್ನಗ ಕಣ್ಣು ಬುಡಿಯಲ್ ಪೊಣ್ಣು ಗೋಚರೊಡು ||
ಪೊಣ್ಣೆ ಈ ನನ ಮೆಯಿತ ಕಮ್ಮೆನೊ-
ಡುಪ್ಪುಲಯ ಕನ್ಯೇಪು ನಮುನೆಡೆ
ಪನ್ದ ಮಗನೊಟ್ಟಿಗೆನೆ ಪೋಯೆರೆ ಆ ಪರಾಸರೆರ್ ||

|| ಸಂತನುನ ಮದಿಮೆ ||

ಅರಸು ಸಂತನು ಮಗನ ಏಗಿತೊ
ಪೆದ್‌ನ್ ಅಪ್ಪೆನ ಒಟ್ಟು ತೂಪುನ

ರುಣೊನೆ ಇದ್ಯಂದಾಂಡೆ ಪನ್ನುನ ಮಲ್ಲ ಬೇಜರೊಡು ||
ಒರಿಯೆ ಪಿದಡ್‌ದ್ ಗಂಗೆದಾ ಬರಿ
ತಿರ್‌ಗ್ ತಿರ್‌ಗ್‌ದ್ ಮರತ ನಿರೆಲ್‌ಡ್
ಪರಿಪು ಗಂಗೆದ ಪೊಯ್ಲ ತೂವೊಂದಾಯೆ ಕುಲ್ಲೊಂಡೆ ||

1

ಗಾಳಿ ಬೀಜಿನಗಾಯ ಮೂಂಕುಗು
ಬಾರಿ ಕಮ್ಮೆನೊ ಕಸ್ತೂರಿದ ನಿಜೊ-
ವಾದ್ ಬತ್ತನೆ ಒಲ್ಲು ಪಂಡ್‌ದ್ ಸುತ್ತ ನಿಲ್ಕನಗ ||
ಓಡೊದಾ ಮುಕಿಟೊರ್ತಿ ಕುಲ್ಲುದು
ಪಾಟ್ ಪಂಡೊಂದಿತ್ತನಾಲೆನ್
ತೂಯೆನಾ ಮಹರಾಜೆ ಕಾಮೊದ ಕಣ್ಣೆ ಬುಲವೊಂದು ||

2

ಬೊಲ್ಲು ಸೀರೆಡ್ ಪೊರ್ಲಕಂಟ್‌ಡ್
ಕುಲ್ಲನಾಲೆನ ಕಮಲ ಮೋನೆನೆ
ನೆಯ್ ಬುಡ್ಡನ ಕುಜಲ್ ಗುಂಗುರು ಸಂಕ ಪಾಲಲೆಕೊ ||
ಇತ್ತನೆನ್ ತೂವೊಂದು ಸಾರದೆ
ಮಿತ್ತಡ್‌ದ್ ಬತ್ತನಲೊ ಬೀಣೆನ್
ಪತ್ತದಲೊ ಪಂಡೊಂದು ಗ್ರೇಯಿತೆ ತೂದು ಚುಕ್ಕಾಣಿ ||

3

ಕೈತಡೆಗ್ ಪೋದಾಲೆ ಮೋನೆನ್
ತೂನಗಾಲ್‌ಲ ತೂಯಲಾಯನ್
ತಾನ್ ತೆಲಿಪುನಗಾಲ್‌ಲಾ ತೆಲಿತೊಂದು ಉಂತಿಯಲ್ ||
ಪಾತೆರೆರೆ ದೈರಾಂಡ್‌ಲಾಯಗ್
ಎರ್ ಈ ಪನ್ ಪೊಣ್ಣೆ ಪುಟ್ಟದ್
ಸಾಂಕನಾ ಅಪ್ಪೆಮ್ಮನಾಕ್‌ಲ್ ಏರ್ ಒಲ್ತಕ್‌ಲ್ ||

4

ದಾಸ ಗುರಿಕಾರೆಂದ್ ಪುದರ್‌ದ
ವೀರ ಮೊಗವೀರೆರೆನ ಜಾತಿಡ್
ಮೇಲ್‌ದಾರೆನ ಮಗಲ್ ಯಾನೇ ಪುದರ್ ಕುಂಞಮ್ಮ ||
ಓಡೊನೊಚ್ಚುವೆ ಪಾಟ್ ಪಾಡುವೆ
ಮೀನ್ ಪತ್ತದ್ ಮಾರ್ಲೆ ತುಂಬುದು
ಸಾಂಕನಮ್ಮನ ಸೇವೆ ಮಲ್ಲುವೆ ಅಪ್ಪೆ ಎಂಕಿಡ್ಲಿ ||

5

ಯಾನ್ ಊರುಗು ಅರಸು ಆಯ್ಕೆಯೆ
ರಾಣಿ ಎಂಕ್‌ಲ ಇದ್ಯಲಿತ್ತನೆ

ಈಯೆ ಬಲ ಎನ್ನೊಟ್ಟು ನಿನ್ನನೆ ಮದಿಮೆ ಆವೊನುವೆ ||
 ಊರುಗೇ ಅರಸಾಂಡ ಪೆದ್ದಾದ್
 ಸಾಂಕ್‌ನಪ್ಪೆಗ್ ಮಗನೆ ಅತ್ತೊಯಿ
 ಸಾದಿಡೇ ಬೂರ್ನಕ್‌ಲ್ ಪೋಣ್ಣಲು ಪನ್ದ್ ಗ್ರೇಯ್ತದನ ||

6

ಮದಿಮೆ ಆಪಂದಾಂಡ ಎನ್ನನೆ
 ಪಡೆದ್ ಸಾಂಕ್‌ನ ಅಮ್ಮರುಲ್ಲೆರ್
 ಮರಿಯದಿಡ್ ಕೇನ್ನಾರೆ ಒಪ್ಪಿಗೆ ಪಡೆದ್ ತಯರಾಲ ||
 ತನ್‌ಕ್ ಮೋನೆಗ್ ಹಾಕ್‌ನಂಚಿನೆ
 ಪನುಪುನಾ ಪೋಣ್ಣನವೆ ಪಾತೆರೊ
 ಅರಸುತನೊಕೇ ಕೊರತೆ ಪಂಡ್‌ದ್ ಪೋಯೆ ಬೆರಿಪಾಡ್ಡ್ ||

7

ಅರಮನೆಗ್ ಬತ್ತನಯೆ ಮಾಳಿಯೊ
 ಮಿತರ್‌ನಾಯೆನೆ ಕೋಣೆದುಲಯಿಡ್
 ಒರಿಯೆ ಜೆತ್ತಾದ್ ಬಾಕಿಲೊಯ್ತಾದ್ ಚೀಪು ತಿಕ್ಕಾಯೆ ||
 ಉಣಿಯೆರೆಗ್ ತಿನಿಯೆರೆಗ್ ಲಕ್ಕಚೆ
 ಕರೆಕರೆಡ್ ಮಂತ್ರಿಗುಳು ಲೆತ್ತೆರ್
 ಹಿರಿಯಕ್‌ಲ್ ಚಾಕಿರಿದ ಜನೊಕುಲು ಬುಲೆರೆತೊಜನೊ ||

8

ಈತ್ ಸುದ್ದಿಲ ಆಯಿ ಸಾತ್‌ಗ್
 ಬೀಸ್ಮೆ ಪಾರ್‌ದ್ ಬತ್ತದರಸುನ
 ಕೋಣೆದವೆ ಬಾಕಿಲ್‌ನ್ ಬೊಟ್ಟುದು ಕೇಂಡೆ ಸಂತನುಡ ||
 ದಾಯೆಗಮ್ಮೆರೆ ಈರೆಗೆಂಚಿನ
 ಆವೊಡುಂದುದು ಪನ್ಲೆ ಎನ್ನಡ
 ಮೇಲ್ ಲೋಕೊಗು ಪೋಯಿನಪ್ಪೆನ್ ಒಯ್ತ ಕೊಂಡೊಡೊಯೆ ||

9

ಮಗನ ಪಾತೆರೊ ಕೇನ್ದ್ ಸಂತನು
 ನರಕೊನುಂದೇ ಪಂಡೆ ಪೆರದನಿ
 ಬರಡ್ ಈಡೆಗ್ ಪನ್ಲೆ ಆಯಡ ಆಯಿ ಸಂಗತಿನ ||
 ಅರಸುನಾಡೆಗ್ ಬತ್ತಿ ಮಂತ್ರಿಡ
 ತನಕ್ ಆಯಿನ ಬೇನೆ ಮಾತೆನ್
 ಇವರಿತ್‌ದ್ ಪಂಡನೆನ್ ಬೀಸ್ಮಡ ಪಂಡೆನಾ ಮಂತ್ರಿ ||

10

ಪೆರದನಿನ ಪಾತೆರೊನು ಕೇಂಡ್‌ದ್
 ಅರಸುನಾ ಮಗೆ ಪಿದಡ್‌ದೆತ್ತಾದ್

ಮರಕಲೆರೆನಾ ಕೇರಿಡುಂತಯೆ ತೇರ್‌ನಾಪಗನೆ ||
 ಜನೊನು ಕಡಪುಡಿ ಸಾತ್‌ಗೆತ್ತೆನೆ
 ಪರಬೆ ಗುರಿಕಾರೆನ್ನಿ ದಾಸೆನೆ
 ತರೇಟ್ ತುಂಬನ ಬೊಂಡೊ ಪಂದ್‌ದ ಪುದೆನ್ ಜಾದಾಯೆ ||

11

ಕಾರ ಮುದೆಲ್‌ಡ್ ದೀಡ್ ಪಂಡೆನೆ
 ಈರೆ ದಾಯೆಗ್ ಬತ್ತರೀಡೆಗ್
 ಯಾನೆ ಲೆಪುಡಯಿ ಸಾತ್‌ಗೆತ್ತೆದ್ ಅಡ್ಲೊ ಬೂರ್ವೆತ್ತೊ ||
 ದಾಸ ಗುರಿಕಾರೆಂದ್ ಪುದರಾದ
 ಕೀರ್ತಿದಾರೆನ ಕೈತಡೆಗ್ ಯಾ-
 ನೇತ್ ಸರ್ತಿಲ ಬರುವೆ ಪಿರಯೊಡು ಎಲೈ ಯಾನತ್ತೊ ||

12

ಎನ್ನ ಅಮ್ಮೆರ್ ಊರುದರಸುಲು
 ಪೋಣ್ಣ ಕೇನ್ನೆರೆ ಬೈದೆ ಈರೆನ
 ಪೊರ್ಲಕಂಟ್‌ದ ಮಗಲೆ ಮದಿಮೆನ್ ಮಲ್ತ್ ಕೊರ್ಪರೆಯೆ ||
 ಎಲ್ಯ ಪಿರಯೊದರೀರ್ ಈರೆನ
 ಅಮ್ಮೆರೆಡ ಪಾತೆರೆ ಬತ್ತದ್
 ಪೋಣ್ಣನೀರೆಗ್ ಕೊರೈರೆಗ್ ಆರೊಪ್ಪಿಯೊಡು ಎನಡ ||

13

ಯಾನ್ ಕೇಂಡನೆ ಎಂಕ್ ಪಂಡ್‌ದ್
 ಗ್ರೇಯಿತರೊ ಈರಿತ್ತೆ ಸಂತನು
 ರಾಜೆರೇ ಎನ್ನಮ್ಮೆರಾರೆಗ್ ಕೊರ್ಪರೋ ಪನ್‌ಲೆ ||
 ಬೀಸ್ಮ ಪಾತೆರೊ ಕೇನ್ದ್ ದಾಸೆನೆ
 ಏಚನೆನ್ ಮಲ್ತೊಂದು ಪಂಡೆನೆ
 ಈರ್ ಬೇಜರೊ ಮಲ್ಪುಜರ್‌ಡೇನರಿಕೆ ಮಲ್ತೊನುವೆ ||

14

ಎನ್ನ ಮಗಲೆನ್ ಊರುದರಸುಗು
 ಲಗ್ನೊ ಮಲ್ತಾದ್ ಕೊರ್ಡ ಅಲೇ
 ಪೆದ್ದಿ ಬಾಲ್ಗೆ ಪಟ್ಟೊ ತಿಕ್ಕುವೊ ಈರ್ ಉಪ್ಪುನಗ ||
 ಎನ್ನ ಹಕ್ಕನ್ ಕಳೆದ್ ಅಕ್‌ಲೆಗ್
 ತಿಕ್ಕೊಡದಿಕಾರೊಂದು ಸಾಸನೊ
 ಮಲ್ಪುವೆನೆ ಎನ್ನಮ್ಮೆರೆಡ ನಿಜೊ ಕೊರ್ಲೆ ಮಗಲೆನಿನಿ ||

15

ಈರ್ ಹಕ್ಕನ್ ಬುಡಿಯರ್‌ಡಲಾ
 ಈರೆ ಬಾಲೆಲು ಬುಡುವೆರೊಯೆ ಪನಿ
 ಊರುದರಸುನ ಸುಕೊಕು ಪೋಣ್ಣನ್ ಕೊರಯೆ ಕಂಡಿತೊನೆ ||

ದಾಸೆ ಪನ್ನುನ ನ್ಯಾಯೊ ಪಂಡ್‌ದ್
ಬೀಸ್ಮ ಮನಸ್‌ಗ್‌ಲಾಂಡ್ ಆಯೆನೆ
ಬೂಮಿಗೇ ಪುಡ್ಯಾಡ್ ಕೈ ಮುಗಿದುಂತ್ಯೆ ಪನಿಯೆರೆಗ್ ||

16

ದಾಸ ಗುರಿಕಾರೆರ್‌ಲ ಮುಲ್ದದ
ಮಾನಿತೆರ್ ಮೊಗವೀರನಾಕ್‌ಲ್
ಮಾತ ಕೇನ್‌ಲೆ ನಿಕ್‌ಲೆನೆದುರುಡು ಆಚೊ ಪಾಡುನೆನ್ ||
ಭೂಮಿದೇವಿಯೆ ಎನನ್ ಪೆದ್ದನ
ದೇವಿ ಬಾಗೀರತಿಗ್ ಸಮೋನೆ-
ದೇನ್ ಗ್ರೇಯ್‌ದ್ ಪಟ್ಟೋನೇರಯೆ ಪೊಣ್ಣ ಸಂಸಾರೊ ||

17

ಹಿರಿಯಕ್‌ಲ್ ಅಪ್ಪೆಂದ್ ಕಿರಿಯೆರ್
ಮೆಗಿದಿನಾಕ್‌ಲೆ ಮದಿಮೆ ಆವಯೆ
ಬೆರಮ ಚರ್ಯೆಡೆ ನೂಕ್ಚೆನಾವುಸೊ ಎಂಕ್ ಇತ್ತನೆಟ ||
ನುಡಿಕ್ ಸಾಕ್ಷಿಯೆ ಸೂರ್ಯ ಚಂದ್ರೆರ್
ಎನುಮೊ ದಿಕ್ಕುಲು ಪಂಚ ಭೂತೊಲು
ಸುರನರೋರಗರಾದಿ ಸಗ್ತಿಲು ದೈವೋದೇವೆರ್‌ಲ ||

18

ಈತ್ ಸಾಕ್ಷಿಲೆ ದೀಡ್ ಪನ್ನುನ
ಪಾತೆರೊನು ನಂಬೊಂದು ಕಡಪುಡಿ
ಈರೆ ಮಗಲಾ ಎನ್ನ ಸಿದ್ಧಪ್ಪೇನ್ ಎನ್ನೊಟ್ಟು ||
ಮೂರ್ತೊ ಕೇಂಡ್‌ದ್ ಮದಿಮೆ ಮಲ್ಪವೊ
ಬಾರಿ ಗೌಜಿಡ್ ಆನಿ ಬತ್ತದ್
ದಾನೊಡೇ ಮೇಲಾಯಿ ಕನ್ಯಾದಾನೊ ಮಲ್ಪೀರ್ ||

19

ಬೀಸ್ಮನಾಚೊನು ಮೆಚ್ಚಿನಾ ಸುರ-
ಲೋಕೊದಾಕ್‌ಲ್ ಪೂತ ಬಸೊನು
ಮಾತೆರೆನ ತರೆಕಲ್ಪ ದೊರಿತ್‌ದ್ ಆನಗನೆ ದಾಸೆ ||
ಬೀಸ್ಮ ಬೀಸ್ಮೆಂದೇತೋ ಸರ್ತಿಲ
ರಾಗದೊಸಯೊಡೆ ಪನ್ನಗಪಗನೆ
ದಾನೆ ಸಂಗತಿ ಪನ್ದ್ ಸೇರೈರ್ ಆಣ್ ಪೊಣ್ಣುಗುಳು ||

20

ಮಗಲೆನಾ ಕೈಪತ್ತದಾಪಗ
ನಿನನ್ ಊರುದ ಅರಸುಗೇನೇ
ಮದಿಮೆ ಮಲ್ದದ್ ಕೊರ್ಪೆ ಈ ಇನಿ ಪೋಲ ಅರಮನೆಗ್

ಪೆದ್‌ನ ಅಪ್ಪೆನ್ ತೂತ್‌ಜನೆ ಮಗ
ನಿನನ್ ಸಾಂಕ್‌ದ್ ಮಲ್ಲೆ ಮಲ್ಲೆನೆ
ಸುಕೊಟು ಬದ್‌ಕ್‌ಲ ನಿಕ್ಯ ಬಗವತಿ ಕೊರ್ವೆರೆಡ್ಡೆ ಮಗ ||

21

ಕಣ್ಣಾನುದುರ್‌ದ್ ಬುಲ್ವುನಮ್ಮನ್
ತರ್ಕೊನುಂದೇ ಪೊಣ್ಣನರಬಯಿ
ಗಣ್ಯೆ ಬೀಸ್ಮನ ಕಣ್ಣೆಡ್‌ಲ ಸರಿ ನೀರ್‌ನರಿಪಾಂಡ್ ||
ಅಪ್ಪೆ ಮಿತರ್‌ದ್ ಕುಲ್ಲಿ ತೇರ್‌ಡ್
ಬುಲ್ವುಡೇನೇ ಮಗನೆ ಈರೆಗ್
ಎತ್ತವೆನೆ ಅರಮನೆಗ್ ಪಂಡ್‌ದ್ ಕಾರ್ಗ್ ಪುಡ್ಯಾಡ್ಯೆ ||

22

ಮಾತೆರೆನ ಕಾರ್ಪತ್ತದೇರೈಲ್
ಬೀಸ್ಮ ತೇರ್‌ಡ್‌ಲಾಲ್ ಕುಲ್ಲುದು
ಸೀರೆದಾ ಪೊದಕೇಡ್ ಕಣ್ಣೆದ ನೀರ್‌ನುದೊಂದು ||
ಸೇರ್‌ನಾಕ್‌ಲೆ ಮೋನೆ ತೂದೇ
ಬಾರಿ ಟಕ್ಕದ ತೆಲಿಕೆ ತೆಲಿತ್‌ದ್
ಪೋಪಿಸ್ತುರೊ ತೋಜಯಲ್ ತನ್ನಮ್ಮ ಸಂತೊಸುಗು ||

23

ತೇರ್ ಪಿದಡ್‌ದ್‌ಲಾಂಡ್ ಗಾಳಿಗ್
ದೂಳು ಮೋನೆಗ್ ರಾದ್ ಅಲಸ್‌ದ್
ಸೇರ್‌ನಾಕ್‌ಲ್ ಕಣ್ಣೆ ಮುಚ್ಚಿನ ಬುಲದ್ ತೂನಗನೆ ||
ದೂರೊಗೆತ್ತದ್ ಬೀಸ್ಮ ತೇರ್‌ಡ್
ತಾರಿದಾ ರೂಪೊದವೆ ಬಂಗರ್ -
ಡಾತಿ ಕೊಡಿಮರ ತೂದ್ ಮಾತೆರ್ ಅಗತೆರಲ್ಪಡ್‌ದ್ ||

24

ದಾಸೆ ಕಣ್ಣೆಡೆ ನೀರ್‌ನರಿಪದ್
ಕೇರಿದವೆ ಪೊಲ್ಲಿನಿಯೆ ರಾದ್‌ಲ
ಪೋಂಡು ಪಂಡೊಂದಾಯೆ ಪೊಗ್ಗಿಯೆ ಉಳಯಿಗಿಲ್ಲದವೆ ||
ರಾಜದಾನಿಗ್ ತೇರ್ ಎತ್ತನ
ತೂದ್ ಮಾತೆರ್ ನಿಲ್ಕ ತೂಯೆರ್
ಏರ್ ಬತ್ತನೆ ಪನ್ದ್ ತೆರಿಪಯೆರಕ್‌ಲ್ ಮಂತ್ರಿಲೆಗ್ ||

25

ಬತ್ತ ತೂನಗ ತೇರ್‌ದುಲಯಿಡ್
ಒರಿ ಪೊಣ್ಣುಲ ಅರುಸುನಾ ಮಗ -

ನೊತ್ತು ಕುಲ್ದನ ತೂದ್ ಕೇಂಡೆರ್ ಬೀಸ್ಮಡೇರ್‌ಂದ್ ||
ಅಮ್ಮೇರೇ ಮೆಚ್ಚಿದ್‌ನ ಪೊಣ್ಣನ
ಅಮ್ಮನೊಪ್ಪದ್ ಮದಿಮೆ ಮಲ್ತೆರೆ
ಎನ್ನವೀ ಸಿದ್ಯಪ್ಪನೀಡೆಗ್ ಕನತೆ ಪಂಡೊಂಡೆ ||

26

ಅರಮನೆಗ್ ಈ ಸುದ್ದಿ ಎತ್ತನ-
ಗಪಗ ಬತ್ತೆರ್ ಪೊಣ್ಣಲಾರತಿ
ಕುರುದಿ ನೀರ್‌ದ ಬೊಳ್ಳಿ ಬಟ್ಟಲ್ ಕೈಟ್ ಪತ್ತೊಂದು ||
ಮದಿಮಲೆನ್ ತೇರ್‌ಡ್ ಜಪುಡದ್
ಬೆಳಗಯೆರ್ ಆರತಿನ ಕುರ್ದಿದ್
ಅರಿಯಣೊನು ತೊರತೊಂದು ಮುಂಡೊಗು ಬೊಟ್ಟು ಪಾಡಿಯೆರ್ ||

27

ಕಯಿಟ್ ಪತ್ತದ್ ಉಲಯಿ ಪೊಗ್ಗಯೆ -
ರರಮನೆಗ್ ಚಾವಡಿದ ಸಿಮ್ಮಾ-
ಸನೊಗು ಪುಡ್ಯಾಡ್ಪದ್ ಮೇಲ್ಮಾಳಿಯೊಡು ಕುಲ್ಲಯೆರ್ ||
ಪರಿಯೆರೆಗ್ ಪೇರ್‌ದ್ ಕುಂಟುನು
ಪರತ್ ಮಾಪದ್ ಪೊಸತ್ ತುತ್ತದ್
ಕುಸಲ್ ಪಾತೆರ್‌ದಲೆ ನಾಚಿಗೆ ಎಸನೊ ಬುಡ್ಪಯೆರ್ ||

28

ಸುದ್ದಿ ತಿಕ್ಕದ್‌ಲಾಂಡ್ ಅರಸುಗು
ಲೆಪ್ಪಯೆನೆ ಗುರು ಗೌತಮೇರೆನ್
ಎಡ್ಡೆ ಮೂರ್ತೊನು ತೂಲೆ ಎನ್ನವೆ ಮದಿಮೆದಾ ದಿನೊಕು ||
ಸುದ್ದೊ ಬೊಳ್ಳಿಂಗೊಳುದ ಪಂಚಿಮಿ-
ಡೆಡ್ಡೆನೇ ಗೋದೊಳಿ ಲಗ್ನೊಡು
ಕನೈಪುನ ಕೈ ಪತ್ತ ಪಂಡೆರ್ ಗುರು ಪುರೋಯಿತೆರ್ ||

29

ಆ ಪುರೋಯಿತೆರೊಪ್ಪಿಗ್‌ಡ್ ಮಹ -
ರಾಜೆ ದಿನೊ ದೀಡ್ಪಾದ್ ಹೇಳಿಕೆ
ಮಾತ ಸಾಮಂತೆರೆಗ್ ಬಂದುಲು ಪೊದ್ವೆರೆಪ್ಪೆರೆಗ್ ||
ದಾಸ ಗುರಿಕಾರಗ್‌ಲಾ ಉಡಿಗೆರೆ
ಓಲೆದೊಟ್ಟಿಗೆ ಕೊರ್ದು ಕಡಪುಡಿ
ಸಾತ್‌ಗೆತ್ತೆರ್ ಮದಿಮೆದೊಂಪೊಗು ಮುರ್ತೊ ತೂವೊಂದು ||

30

ಮದಿಮೆ ಗೌಜಿಡೆ ಆಂಡ್ ನಾಲ್ದಿನೊ
ಅಗತೆರೆತಲ ಬತ್ತಿ ಬಿನ್ನೆರ್

ಮಗನ್ ಕೈತಡೆ ಲೆತ್ತ್ ಕೇಂಡೆನೆ ಆಯಿನೆಂಚಂದ್ ||
ನನಗ್ ಪಟ್ಟೊದ ಹಕ್ಕು ಈರೆನ
ಬುಡೆದಿ ಜೋಕುಲೆಗ್‌ಂದ್ ಯಾನೇ
ಬೆರಮಚರ್ಯೆಡ್ ಉಪ್ಪೆ ಪಂಡ್‌ದ್ ಆಜೊ ಪಾಡೊಂದೆ ||

31

ಅಪ್ಪೆ ಜಕ್ಕೇಡೆಂಕ್ ಬಲಪುನ
ಎಡ್ಡೆ ಯೋಗೊನು ತಪ್ಪಯಿನ ವಿದಿ
ಇತ್ತೆ ಈ ಸಿದ್ಯಪ್ಪನಾಂಡಲಾ ಒದಗದಾಂಡತ್ತೊ ||
ಪನ್ನುನೆನ್ ಕೇನೊಂದು ಸಂತನು
ಕಣ್ಣೆಡರಿಪಯೆ ನೀರ್ ಬೀಸ್ಮನ್
ಮುಟ್ಟಲೆತ್ತದ್ ತರೆಕ್ ಕೈದೀಡ್ಲರದ್ ಪತ್ತೊಂಡೆ ||

32

ಕೇನ್ ಮಗ ಈ ಬೀಸ್ಮೆ ಪನ್ನುನ
ವೀರತನೊತಾಚೊದವೆ ಪುದರ್‌ನ್
ಸಾರ್ತಕೊನು ಮಲ್ತಂದ್ ಸಂತೊಸು ಆಂಡ್ ಎಂಕಿತ್ತೆ ||
ಈಯೆ ನಿನ್ನಿಚ್ಚೆದವೆ ಕಾಲೊಡು
ಆವುಸೊನು ಕಳೆವೊಂದು ಕೀರ್ತಿನ್
ಸೂರ್ಯ ಚಂದ್ರೆರ್ ಇತ್ತಾನೇಟಲ ಒರಿತೊನೆನ್ನ ಮಗ ||

33

ಸತ್ಯವತಿ ಪನ್ನುನವೆ ಪುದರ್‌ಡ್
ಲೆತ್ತರಾಲೆನ್ ರಾಣಿವಾಸೊದ
ಪೊಣ್ಣು ಪೊಂಜೊವು ಮಾತ ಪ್ರೀತಿಡ್ ಇತ್ತೆರೊಟ್ಟಿಗೆನೆ ||
ಮಿತ್ತ ಲೋಕೊದ ಸಿರಿನ ಪೊರ್ಣುಡು
ಇತ್ತನಾಲೆನ್ ತೂದ್ ತನ್ನನ್
ಬುಡ್ಡು ಪೋಯಿನ ಗಂಗೆ ನೆಂಪುನು ಮರತೆ ಮಾರಾಜೆ ||

ಸತ್ಯವತಿನ ಸಂತೆತಿ

ಸುಕೊಟು ಸಂತನುನೊಟ್ಟು ಬಾಳ್‌ದ್
ಒರುಸೊ ಕರಿನಗ ಆಣ್ ಬಾಲೆನ್
ಪೆದ್‌ದ್ ವಂಸೊದ ತೆಗ್‌ಲೆ ಸತ್ಯಾವತಿಯೆ ಪುಟ್ಟಯಲ್ ||
ಮಗ್‌ರೊರುಸೊ ಆನಗನೆ ಪೆದ್ವಲ್
ಪೊರ್ಣುದಾಣನ್ ಬರತ ವಂಸೊದ
ಗುರುಜಿ ಮೇರುವೆಗೊಂಜಿ ನಿಲೆನೇರ್‌ಯಲ್ ಪುಣ್ಯಾತ್ಮೆ ||

1

ಹಿರಿಯ ಮಗೆ ಚಿತ್ರಾಂಗಿ ಕಿರಿಯಯೆ
ಪುದರ್‌ಡಾಯೆ ವಿಚಿತ್ರವೀಯೆಂ-
ದೆನಿಪಿ ರಾಜಕುಮಾರೆರೊಟ್ಟುಗು ಬಾಲ್ಯೊ ಕರಿನಗನೆ ||
ಬರವು ಸರವುನು ಕಲ್ತೆರಾಕ್‌ಲ್
ಬಿರುತ ವಿದ್ಯೆಡ್ ಬಿಸೆರಾಯೆರ್
ಪಿರಯೊ ದಿಂಜಿನಗರಸು ಪಟ್ಟೊಗು ಏರೈ ಚಿತ್ರಾಂಗಿ ||

2

ಪಟ್ಟೊದಾ ಸಿರಿ ಪೀಟೋಗೇರ್‌ಸೆಯಿ -
ನಮ್ಮೆ ಸಂತನು ಕಾಡ್ ಸೇರ್‌ಡ್
ಇತ್ತಾನಾಪಗ ವಾನಪ್ರಸ್ತೊಡೆ ಸೊರ್ಗೊ ಸೇರಿಯೆನೆ ||
ಅಮ್ಮನಾ ಕಿರೈಲೆನ್ ತೀರ್‌ದ್
ಸೊಸ್ತೊಡಿತ್ತನ ಮಗನೆ ಒರೈಡ್
ಯುದ್ಧ ಮಲ್ತದ್ ಪೆರಣೊ ಬುಡಿಯೆನೆ ಅರಸು ಚಿತ್ರಾಂಗಿ ||

3

ಪಲಯೆ ಸೈತ್ತನ ಬೆರಿಕ್ ಪಟ್ಟೊದ
ಮಣೆಟ್ ಕುಲ್ಲದ್ ಮೆಗಿ ವಿಚಿತ್ರನ
ಬೆರಮಚರೈದ ಬೀಸೈ ರಾಜ್ಯೊಡು ಮಲ್ತಿನಾಡಳ್ಳೆ ||
ಸುರೆರೆಲೋಕೊಡು ಸಾನ್ ಕೀರ್ತಿಡ
ಮುಗುಳಿನೇರೈಯೆ ಪಟ್ಟೊನೇರ್‌ನ
ಕುರುಕುಲೊತ ಮಹರಾಜೆ ಅಪ್ಪಿನ ಮನಸಗಾನಂದೊ ||

4

ಬಾರಿ ಪೊರ್ಲುದ ಜವನೆ ಆಯಿನ
ರಾಜಗಿತ್ತನೆ ಮದಿಮೆ ಮಲ್ತದ್
ರಾಣಿವಾಸೊದ ಪಟ್ಟೊನೇರ್‌ಸವೊಡುಂದು ಸತ್ಯವತಿ ||
ಬೀಸೈಡನೆ ಪಂಡನೆಟ್ ತೂಯೆರೆ-
ಗೇರೆಪೊದು ನಮಕಾವು ಪನ್ನುನ
ಆಸೆಡೊರ್‌ಮೆಲ ತಾನ್ ತಿರ್‌ಗಯೆ ಮಂತ್ರಿನಾಕ್‌ಲೆನ್ ||

5

ಕಾಸಿ ದೇಸೊದ ಅರಸು ತನ್ನವೆ
ಮೂಜಿ ಪೊನ್ನೋಕುಲೆಗ್ ಒರೈನೆ
ಆಣ್ ತಿಕ್ಕೊಡು ಮದಿಮೆ ಆಯೆರೆ ಪಂಡದೊಂಜಿ ದಿನೊ ||
ರಾಜ ರಾಜಕುಮಾರೆರೆನ್ ಕೂ
ಡ್ಯಾದ್ ಲಡಯಿದ ಕಳಕ್ ಜಪುಡಯೆ
ಏರ್ ಗೆಲ್ಪೆರೊ ಅಕ್‌ಲೆಗೀ ಮಗಲಲ್ಲೆ ಮದಿಮೆಂದ್ ||

6

ಸುದ್ದಿ ಕೇಂಡ್‌ದ್ ಬೀಸೈ ಕಾಸಿಡ್
ಪೊಣ್ಣಲೆನ್ ಮೆಗೈಗಲ ತೂಯೆರೆ
ಯುದ್ಧೊ ಮಲ್ಪುನ ಕಳಕ್ ಪೋಯೆನೆ ತೂನಗವುಲೊರ್‌ಮೆ |
ಒರೈಗೊರೈಡ ಲಡಯಿ ಆನಗ
ನೆತ್ತೆರ್‌ದ ಓಕುಳಿದ ನಡುಟೇ
ಪುರೈ ಮಾಲೆನ್ ಪತ್ತಾದುಂತ್‌ನ ಪೊಣ್ಣಲೆನ್ ತೂಯೆ ||

7

ತಾನ್ ಬತ್ತನ ತೇರ್‌ನುಂತದ್
ಏರೈ ಮದಿಮಾಲಲ್ಲು ತೇರ್‌ನ್
ಏರ್ ತಲಿಪೆರೊ ತೂಪೆ ಪನ್ನುನ ಬೀಸೈನಾ ಮೋನೆ ||
ತೂಯಿನಾ ಪೊರೈದಿಲು ಏರೈರ್
ಮಾತೆರೆದುರುಡೆ ಬೀಸೈಡೇರಾಲ
ಪಾತೆರಂದೆನೆ ಉಂತ್‌ನಾಪಗ ಸಾಲ್ತೆನೆದುರುಂತ್ಯೆ ||

8

ಪೊಣ್ಣಲೆನ್ ರಟ್ಟಯೆರೆ ಬುಡ್ಡುನ
ಪುಕ್ಕೈ ಯಾನೋ ಬೀಸೈ ಉಂತ್‌ಲ
ಗೆಲ್ತದೆನ್ನನ್ ಕೊಂಡು ಪೋಲಯ ಮದಿಮೆ ಆಯೆರೆಗ್ ||
ಬಿಲ್ಲ ದೆರ್‌ದ್ ಬಾಣೊ ರಟ್ಟಯೆ
ಬತ್ತಿ ಪಗರಿನ್ ತುಂಡು ಮಲ್ತದ್
ನೆತ್ತಿಗೊಂಜೇ ಬೀಸೈ ಹಾಕ್‌ನ ಪೆಟ್ಟೆಗಾ ಸಾಲ್ತೆ ||

9

ತಿರ್‌ಗ್ ತಿರ್‌ಗ್‌ದ್ ಕಳಟ್ ಬೂರೈನೆ
ನೆತ್ತೆರ್‌ನ್ ಕಕ್ಕೊಂದು ಕಳಟೇ
ಬುಕ್ಕೊ ಎತ್ತಯೆ ಗಂಗೆನಾ ಮಗೆ ತೇರ್‌ನರಮನೆಗ್ ||
ಅಪ್ಪೆ ತೂಲೆಯೆ ಮದಿಮಲಲ್ಲೆನ್
ಪನ್ನಿ ಪಾತೆರೊ ಕೇನ್ದ್ ಮಾಳ್ಕೊಡು
ಇತ್ತಿ ಸತ್ಯಾವತಿಯೆ ಜತ್ತದ್ ಬತ್ತಲಾಡೆಗೆನೆ ||

10

ಆ ಪ್ರತಾಪನ ಜೋಕ್ಕು ಮುಕುಲೆನ್
ವೀರತನೊಟೇ ಗೆಲ್ತನೊರೈಗೆ
ದಾರೆ ಮಯ್ತದ್ ಕೊರ್ಪೆ ಪಂಡದ್ ಲಡಯಿದಾ ಕಳಟ್ ||
ವೀರೆರೆನ್ ಕೂಡ್ತಾದ್ ಯುದ್ಧೊಡು
ಆಯೆ ಮಲ್ಪಯಿ ಕಳಕ್ ಪೋದೇ
ಯಾನೆ ಗೆಲ್ತದ್ ಕನತೆ ಪನ್ನಗ ಬೀಸೈ ಸಿದ್ಧಪ್ಪೆ ||

11

ಪೊರ್ದೆದಿಲು ಮುಕುಲಂದ್ ಎಲ್ಲೆನೆ
ಎಡ್ಡೆ ಮೂರ್ತೊನು ತೂದು ಮದಿಮೆನ್
ಮಲ್ಪುಗೊಂದುದು ಪನ್ನಗೊಪ್ಪಿಯೆ ಜಾನ್ನವೀ ಮಗನೆ ||
ಮಿಶ್ತ್ ಮಾಳ್ಕೊದ ರಾಣಿ ವಾಸೊಡು
ಕುಲ್ಲಯಲ್ ಆ ಮದಿಮಲಲ್ಲೆನ್
ಪರೈರೆಗ್ ಪೇರೊರ್ದು ಬಲ್ಮನೊದೊಣಸ್ ಮಲ್ಪಯಲ್ ||

ಹಟೊಮಾರಿ ಅಂಬೆ

ಆನಿದಾ ಮನದಾನಿ ಬೀಸ್ಮೆನೆ
ರಾಣಿವಾಸೊಡು ಕುಲ್ಲದನ ಮದಿ-
ಮಾಲ್‌ನಕಲೆನ್ ತನ್ನ ಸಿದ್ಯಪ್ಪೆನವೆ ಕೈತಡೆಗ್ ||
ಪ್ರಿಯೊಡೇ ಲೆಪುಡಾದ್ ಕೇಂಡೆನೆ
ಮೂವೆರೆನ ಪುದರ್ಮಾತ ಪೊರ್ಲುದ
ಬಾಸೆಡಕಲೆಡ ಪಾತೆರೊಂದೇ ಮಾತ ಸುಕೊ ದುಕ್ಕೊ ||

1

ಕಡಿರ್‌ದಾಲೇ ಅಂಬೆ ಆಲೆನ
ಬೆರಿತ ಮೆಗ್ಗಿಯೆ ಪೊರ್ಲುದಂಬಿಕೆ
ಕಡೆತಲಂಬಾಲಿಕೆನೆ ಪಂಡ್‌ದ್ ಪೂರ ತೆರಿಯೊಂಡೆ ||
ನಿಕುಲು ಎನ್ನವೇ ಪಾತೆರೊಗು ಇನಿ
ಮರಿಯದಿನ್ ಕೊರ್‌ದೆನ್ನ ಮೋಕೆದ
ಮೆಗಿ ವಿಚಿತ್ರನ ಕೈನ್ ಪತ್ತೆದ್ ಮದಿಮೆ ಆವೊಂದು ||

2

ಕುರುಕುಲೊತ ಮಹಾರಾಣಿಲೇರ್‌ನ
ಪರಮ ಪದವಿದ ಪಟ್ಟೊದಾ ಸಿರಿ
ಮಣೆಟ್ ಕುಲ್ಲನ ಯೋಗೊ ನಿಕ್‌ಲೆಗ್ ಒದಗುನವು ನಿಜೊನೆ ||
ಪನ್ನನೆನ್ ಕೇನೊಂದು ಅಂಬೆನೆ
ತರೆಕ್ ಹಾಕೊಂದಾಲ್ ಮೋನೆನ್
ತಿರ್‌ಗದುಂತ್ಯಲ್ ತನ್ನ ನೌಂಡುನು ತಾನೆ ತುಚ್ಚೊಂದು ||

3

ಮೆಗ್ಗಿನಕಲಿರ್ದೆರಾಲ ಮದಿಮೆಗ್
ಒತ್ತೊನುಂದೇ ಬೀಸ್ಮ ಕಾರ್‌ಗ್
ಅಡ್ಡ ಬೂರ್‌ನಗ ಅಂಬೆ ಕೋಪೊಡು ತಿರ್‌ಗದುಂತಿಯಲ್ ||
ಮರೈದಿನ್ ಮಾರೊಂದು ಬದ್ಡುನ

ಪೊಣ್ಣಲೆಗ್ ದಿಕ್ಕಾರೊ ನಿಕ್‌ಲೆನ್
ಎನ್ನ ತಂಗಡಿಲೆಂದ್ ಪಂಡ್ರೆಯೆ ಮದಿಮೆ ಆಯರ್‌ಡ ||

4

ಬೀಸ್ಮೆರೆಡ ಯಾನೊಂಜಿ ಕೇನುವೆ
ಈರ್ ಎಂಕ್ಲೆನ್ ಮದಿಮೆ ಆಯೆರೆ
ಆಣನಜಪುನ ಕಳಕ್ ಬತ್ತೆದ್ ತೇರ್‌ನೇರ್ದೆಂದ್ ||
ವೀರನಂಚೆನೆ ಪನ್ನಗೊಂಕ್ಲೆಗ್
ಬಾರಿ ಸೌರೊದ ಜವನೆ ತಿಕ್ಕನ
ಏವುರೊಡು ಏರೊಂದೊ ತೇರ್‌ನ್ ಈರೆ ಪಾತೆರೊನು ||

5

ಕೇನ್ನಗೆನ್ನವೆ ತರೆಕ್ ತೆಡಿಲೇ
ಹಾಕಿಲೆಕ್ಕಾಂಡತ್ತೊ ಈರೆನ
ಬೇರೊ ಎಂಚಿನ ಬೇತೆ ಒರೈಗ್ ಎನನ್ ಮಾರ್ಲರೊಯೆ ||
ಭಾರತೊದ ಮಹವೀರೇರೀತ್ನಟ್ಟ
ಏರ್‌ಲಾ ಮಲ್ಪುದಿ ಹೇಸಿಗೆ
ಈರ್ ದಾಯೆಗ್ ಮಲ್ತರಿಂಚಾಚಾರ್ಯರಾವೊಂದು ||

6

ಅಂಬೆ ಕೇನ್‌ಲ ಪನ್ನಿ ಪಾತೆರೊ
ನಂಬೊನುಲ ಯಾನೊಂಜಿ ಬಾಸೆನ್
ದುಂಬು ಪಾಡ್ಲೆನ್ ಬುಡಿಯೆರಾವಂದಿಂಚ ಮಲ್ತನೆಯೆ ||
ಸಂಬು ಸಿವನಾಚೊಂದು ಮನಸ್‌ನ್
ಇಂಬು ಮಲ್ಪಯೆ ಮದಿಮೆಗೇನಿನಿ
ಕುಂಬರುನ ಬುಡು ಕೋಪೊಡೀಯೆ ಮಲ್ಪು ಸಮದಾನೊ ||

7

ಮದಿಮೆ ಆವಯೆ ಪಟ್ಟೊನೇರಯೆ
ಬೆರಮ ಚರ್ಯೊಡೆ ದಿನೊನು ನೂಕುವೆ
ಎನುಮೊ ದಿಕ್ಕುಲು ಸೂರ್ಯಚಂದ್ರೆರ್ ದೇವ ದೇವತೆಲು ||
ಪರಮ ತತ್ತೊಲು ಪಂಚ ಭೂತೊಲು
ಕುರುಕುಲೊಡು ನಿಲೆವೂರಿ ಸತ್ತೊಲೆ
ನಿಲೆತ ಸಾಕ್ಷಿನ್ ದೀಡ್ಡೆಲಾಚೊನು ಪಾಡ್ಡೆಯಾನ್ದುಂಬು ||

8

ಆಚೊ ಪಾಡ್ಲರ್ ಈರ್ ಲಡಯಿಗ್
ದಾಯೆಗುಂತ್ಯರ್ ಮದಿಮಲಲ್ಲೆನ್
ತೂದು ತೇರ್‌ಗ್ ಏರ್ಲೆ ಪಂಡನೆ ಎಂಚಿನೆಕ್ ಪನ್‌ಲೆ ||

ತೇರ್ ಮಿತರ್‌ನಗಪಗ ಎಂಕ್ಲೆಡ
ಈರೆನಾಚೊನು ಪನ್ವ್ವರ್‌ಡ ನಿಜೊ
ಕಾರ್ ಪತ್ತ್‌ದ್ ತಿರ್ತ್ ಜತ್ತ್‌ದ್ ಬೇತೆ ಕೈ ತೂತ್ಲೊ ||

9

ಪೊಣ್ಣ ಜೀವನೊ ಹಾಲ್ ಮಲ್ಪೆರೆ
ಬಲ್ಲಿ ಪನ್ವುನ ಸಾಸ್ತೊನೀರೇ
ಕಲ್ತನಾರಾವೊಂದು ಇಂಚನೊ ಪನ್ವುನೆನ್ನಡನೆ ||
ಎನ್ನನೀರೇ ಮದಿಮೆ ಆಯ್ವೆ
ಪುಣ್ಯೊ ಕೀರ್ತಿನ್ ಪಡೆದ್ ಪೊಣ್ಣನ
ಜಲ್ಮೊ ಸಾರ್ತಕೊ ಮಲ್ಪಿ ಪಂಡ್‌ದ್ ಕಾರ್ ಪತ್ತಿಯಲ್ ||

10

ಆಜೊ ಪಾಡ್ಲೆನ್ ಬುಡಯೆ ಪೊಣ್ಣನ
ಆಸೆ ತೀರ್ಪೆರೆಗಾದ್ ನಿಕ್ಕೇ
ಈ ವಿಚಿತ್ರನೇ ಆಯ್ಲಿ ಪನ್ವಡ ಬೇತೆ ಏರಾವು ||
ಆಯಗೇ ನಿನನೇನ್ ಒಪ್ಪದ್
ಬಾರಿ ಗೌಜಿದ ಮದಿಮೆ ದೊಂಪೊಡು
ದಾರೆ ಮಯ್ತ್‌ದ್ ಕೊರುವೆ ಈಯೇ ಮರ್ಪಲೆಂಕ್‌ಂದ್ ||

11

ತಿಕ್ಕನಾಯಗ್ ಕೊರೈ ಪಂಡ್‌ದ್
ಸೊರುಡೆನ್ನನ್ ಕನತರತ್ತೊಯೆ
ಎಡ್ಡೆ ಪಾತೆರೊಡಿರೆ ಎನ್ನನ್ ಮದಿಮೆ ಆಲೆಂದ್ ||
ಪನ್ನಗನೇ ಆ ಬೀಸ್ಮೆ ಕೋಪೊಡು
ಸೊರ್ಕಿ ಪೊಣ್ಣಲು ಇಲ್ಲುಂತಯೊ
ಎನ್ನ ಮೆಗ್ಯಗ್ ಸಾನ್ ನಿನ್ನನ್ ಮದಿಮೆಗೊಪ್ಪವಯೆ ||

12

ಈತ್ ಪಂಡ್‌ನ ಕೇನ್ದಲಂಬೆನೆ
ಕೋಪೊಡೇ ತನ ಕಣ್ಣ್ ಮಗ್ಗ್‌ದ್
ದಾನೆ ಗ್ರೇಯ್ತದ ಬೀಸ್ಮೆ ಪೊಣ್ಣಲು ಕಡೆನೊ ಕಜವುಡ್ಡು ||
ಈಯೆ ಮಲ್ತನ ಡೋಂಗಿಗಿತ್ತೆನೆ
ಕಾಡ್ ಸೇರ್‌ದ್ ತಪಸ್ ಮಲ್ತ್‌ದ್
ಸಾಪೊ ಕೊರ್ಪುನ ಸಗ್ಗಿ ಪಡೆದೇ ನಿನನ್ ಪೊತ್ತಾವೆ ||

13

ಪೊಣ್ಣಲೆಗ್ ಹಟೊ ಉಂಡು ಬಾಸೆನ್
ತೀರ್ವುನ ಚಟೊ ಉಂಡು ಪನ್ವುನ
ಮಲ್ಲತಿಗೆನೊರಿಪಾವೆ ಪಂಡ್‌ದ್ ಅಂಬೆ ಪಿದಡಿಯಲ್ ||

ಸತ್ಯವತಿಗುತ್ತರೊನು ಕೊರೈರೆ
ಕಸ್ತೊ ಆದೇ ಮನಿತ್‌ಜಲ್ ನಿಜೊ
ಪೊಣ್ಣ ಮನಸಾದ ಬೇನೆಡಾಲೇ ತರೆನ್ ತಗ್ಗಯಲ್ ||

14

ಧಡ ಧಡಂದ್‌ದ್ ಆಲ್ ಅರಮನೆ
ಬುಡುದು ಬೈಲ್‌ದ ಸಾದಿ ಪತ್ಯಲ್
ನಡತ್ ಪೋಪುನ ಪೊಣ್ಣು ಏರೋ ಪನ್ದ ಜನೊ ಮಾತ ||
ನಿಲ್‌ಕ್ ತೂಯೆರ್ ಪೋಪುನಾಲೆನ್
ಬಿರ್‌ಸೆದಿಯೆ ಆದುಪ್ಪೊಡುದುದ್
ನೆನೆತ್‌ದಾಕ್‌ಲ್ ಪಾತೆರಂದೆನೆ ಇತ್ತೆರಲ್ಲು ||

15

ಬತ್ತ್ ಬತ್ತ್‌ದ್ ಗಂಗೆದಾ ಬರಿ-
ಕೆತ್ತಿಯಲ್ ಕಡಪಿಯೆರೆಗಾಯೆರೆ-
ಲೆತ್ತಲೋಡದ ಕಡಪುದಾಯನ್ ಕೂಕ್ಲು ಪಾಡೊಂದು ||
ಬತ್ತೆ ಓಡೊನು ಒಚ್ಚುನಾಯೆನೆ
ಕುಲ್ಲಿಯೆರೆ ಪನ್ನಗನೆ ಕುಲ್ಯಲ್
ಒಚ್ಚಿ ಒಚ್ಚಿದ್ ಸುದೆತ ಆಯೆರೆಗೋಡೊನೆತ್ತಾಯೆ ||

ಪರಸುರಾಮೆರೆಡ ಅಂಬೆನ ದೂರು

ಓಡೊಡುದು ಜತ್ತೊಂದು ನಡತ್‌ದ್
ಏರಿಯಲ್ ಸಿಮೊಗುಡ್ಡೆ ಪರ್ವತೊ
ಪಾರ್‌ದೆತ್ಯಲ್ ಬದರಿಕಾಸ್ತಮೊದಾಡೆ ಸೇಂಕೊಂದು ||
ಯೋಗಿಲೆನ್ ತೂದಕ್‌ಲೆ ಕಾರ್‌ಗ್
ಬೂರಿಯಲ್ ನೀಟಪ್ಪ ಬೀಸ್ಮನ
ದೂರು ಪಂಡ್‌ದ್ ತಾನ್ ತಪಸ್‌ಗ್ ಬತ್ತಿನೀಡೆಂದ್ ||

1

ಅಕಲೆಗಂಬೆನ ದುಕ್ಕೊ ಪರಿಯರೊ
ಮಲ್‌ಪಿಯೆರ್‌ಗಾ ಪರುಸುರಾಮೆರ್
ಕರುಣೆದೀಡ್ಯೆರಾಡಾವು ಪಂಡ್‌ದ್‌ಲಾಂಡ್ ನಂಬೊಳಿಗೆ ||
ಬುಲುಪಡಯ ಓ ಪೊಣ್ಣೆ ಬೀಸ್ಮಗ್
ಪರಸುರಾಮೆರೆ ಕಲ್ಪಯಿನ ಗುರು
ನಿನನ್ ಆಯಗೆ ಮದಿಮೆ ಮಲ್ಪವೆರ್‌ಂದ್ ನಂಬೊನುಲ ||

2

ಮುಲ್ಪಡ್ಡ್ ಮೂಡಾಯಿ ತಿರ್ಗ್ಗಡ್
ಪತ್ತ್ ಅರದರಿ ಪೋನಗಾ ರುಸಿ
ಇತ್ತನಾಸ್ರಮೊ ತಿಕ್ಕು ಇತ್ತನೆ ಪೋಲ ಆರೆನಡೆ ||
ಸತ್ಯೋನೇ ರುಸಿಕುಲೆನ ಪಾತೆರೊ
ಪನ್ದ್ ಗ್ರೇಯ್ಡ್ ಪೋನಗಾಲೆಗ್
ಕಣ್ಣೆಗಾಂಜಿದ್ ಆಂಡ್ ಭಾರ್ಗವ ರುಸಿನ ಆಸ್ರಮೊನೆ ||

3

ಪೆತ್ತ ಪಿಲಿಕುಲು ನಾಯಿ ಮೇರುಲು
ಪಕ್ಕಿ ಪುದಕುಲು ಮಾತ ಒಟ್ಟಿಗೆ
ತಿರ್ಗುನೆನ್ ತೂದಾಲೆ ಮನಸ್ಗ್ ಆಂಡ್ ಬೆಕ್ಕಸೊನೆ ||
ಅಲ್ಪನೇ ಪೂ ದರ್ಬೆ ಕೊಯ್ಪುನ
ಸಿಸೈರೆಡ ರುಸಿ ಪರಸುರಾಮೆರೆ
ಸನ್ನಿದಿಗ್ ಪೋವೊಲಿಯೊ ಪೊನ್ನೊವು ಪನ್ದ್ ಕೇನ್ನಗನೆ ||

4

ಸಿಸೈರೆನ ಒಪ್ಪಿಗೇಡ್ ಉಲಯಿಗ್
ಎತ್ತನಾಲೆಗ್ ನಡುತ ಚಾವಡಿ-
ಡಿತ್ತಿ ಮುನಿಯಾಂಜಿಯೆರ್ ಕುಲ್ಲುದು ಯೋಗೊ ದ್ಯಾನೊಡುಲ ||
ಬಿಲ್ಲ್ ಬಾಣೊಲು ದತ್ತ ಮರ್ಗಿಲ್
ಡಿತ್ತೊ ದೀಡ್ಡ್ ಕುಡರಿ ಪುಗಲ್ಡ್
ಕಿಷ್ಟ ಮುರ್ಗೊದ ಚರ್ಮೊಡಟ್ಟಿ ಪಾಡ್ಡ್ ಕುಲ್ಲೊಂದು ||

5

ದಿಸ್ಪಿ ಮೂಂಕುದ ಕೊಡಿಟ್ ಉಂತದ್
ಸಿದ್ದಿದವೆ ಮಂತ್ರೊಲೆನ್ ಜಪಿಪುನ
ತತ್ತೊ ನಿಧಿ ಭಾರ್ಗವೆರೆ ಕಾರ್ಗ್ ಅಡ್ಡ ಬೂರಿಯಲ್ ||
ಸುದೊ ಬಗ್ಗಿದ ಬಾಮೊಡಾರೆಗ್
ತನ್ನ ಪುದರ್ನ್ ಅಪ್ಪೆ ಅಮ್ಮನ್
ಪನ್ದ್ ಪುಗರುನ ಸೊರೊಕು ಬ್ರಗುರಾಮೆರ್ಲ ಕಣ್ಣುಡುದು ||

6

ತೂನಗನೆ ಪೊಣ್ಣೊಂಜಿ ಬುಲ್ಪುದು
ಕಾರ್ ಪತ್ತನಗಾರ್ ಆಲೆನ್
ಪ್ರೀತಿ ಬಾವೊದ ದಿಸ್ಪಿ ದೀಡ್ಡ್ ಲಕ್ಕು ಲಕ್ಕುಂದ್ ||
ವೇದೊ ಮಂತ್ರೊಡು ತಯರ್ ಮಲ್ತ್ದ್
ದೀಡ್ಡ್ಡ್ ಅರಿ ತರೆಕ್ ಪಾಡೈರ್
ನೀರ್ ಕಣ್ಣೆಡ್ ಅರಿಪದಾಲೆ ಲಕ್ಕುದುಂತಿಯಲ್ ||

7

ಮಗಲೆ ಪನ್ ಪನ್ ನಿನ್ನ ಕಸ್ತೊನು
ಎನಡ ಇತ್ತನೆ ಮನಸ್ಗಾಯಿನ
ಎತೆಕ್ ಕಾರಣೊ ದಾನೆ ಕೇನ್ನಗ ಅಂಬೆ ಬೀಸ್ಮನವೆ ||
ನಡತೆಡನ್ಯಯೊ ಆಯಿನೆಟ್ ನನ
ಮದಿಮೆನೇ ಇದ್ಯಂದಿ ಯೋಗೊನು
ತನ್ಕ್ ಒದಗಯೆ ಪನ್ನಗಪಗನೆ ಪರಸುರಾಮೆರೆಗ್ ||

8

ಎನ್ನ ಮೋಕೆದ ಸಿಸೈ ಇಂಜಿನ
ಅನ್ಯಯೊನು ಮಲ್ತೆತ್ತೊ ಸಿವ ಸಿವ
ಪೊಣ್ಣ ಜನ್ನೊನು ಹಾಲ್ ಮಲ್ತೆನೆ ಚತ್ತಿ ಜಾತಿದಯೆ ||
ಚತ್ತಿಯೆರೆ ಪಗೆ ನನಲ ಪೋತಾಜಿ
ಕಲ್ಪಯಿನೆ ಸುರಗಂಗನಾ ಮಗೆ
ಪನ್ನಿ ಇಸ್ವಾಸೊಡುಲ ನಂಬೈರೆ ತೀರ್ವೊ ಚತ್ತಿಲೆನ್ ||

9

ಮದಿಮೆ ಮಲ್ಪದೆ ಬುಡುವೆ ನಿನ್ನನ್
ಎನಡ ಸೀಂತಿರಿ ಗೊಬೈಡಾಯನ್
ಬುಡಯೆ ಲಡಯಿಡೆ ಒಪ್ಪವೆನೆ ನಿಜೊ ನಂಬು ನಂಬುಂದು ||
ಪಗರಿ ಮೂಡಿಗೇ ಬೆರಿಕ್ ತಿಕ್ಕದ್
ಎಡತ ಕೈಟೇ ಬಿರುನು ಕುರ್ಕದ್
ಪರಮ ಸೀರ್ತೊದ ಗಿಂಡೈ ಪತೊನುದು ಲಕ್ಕುದುಂತಿಯೆರ್ ||

10

ದಾರೆ ಮಯೈರೆ ಗಿಂಡೈದಾ ಸಿರಿ -
ಸೀರ್ತೊ ತತ್ತೆಡ ಮಂತ್ರ ಬಾಣೊಲೆ
ಬೇನೆ ಎಂಚಂದೇನೇ ತೆರಿಪವೆ ತನ್ನ ಸಿಸೈಡನೆ ||
ಪಾಪೊ ಈ ಪೊಣ್ಣೊಂದು ಮಂತ್ರೊಡು
ತೇರ್ ತರ್ಪದ್ ಕುರುನ ಕ್ಷೇತೊಗು
ಮೂವೆರೊಟ್ಟಿಗೆ ಬತ್ತದೆತ್ತದ್ ತನ್ನ ಸಿಸೈಡನೆ ||

11

ಬರ್ಪಯೆರ್ಲಾ ಬೀಸ್ಮನಾಡೆಗ್
ಬತ್ತನಯೆ ಕೈ ಮುಗಿದ್ ಕಾರ್ಗ್
ಅಡ್ಡೊ ಬೂರ್ಡ್ ಬಿನ್ನ ಪೂಜೆನ್ ಮಲ್ತೆ ಪೂಜೈರೆಗ್ ||
ಎನ್ನನೀಡೇ ದಾಯೆ ಗುರುಕುಲೆ
ಬರೈರೆಗ್ ಲೆಪುಡಾಯರೆಂದ್
ಕೇನ್ನಗನೆ ಗುರು ಪರಸುರಾಮೆರ್ ಕಣ್ಣೆ ಮಗ್ತರ್ಡ್ ||

12

ದಾನೆಯಾ ನಿನ ಬುದ್ಧಿಗಿಂಚಿನ
ಹೀನ ಕೆಲಸೊನು ಮಲ್ಪಿಯೆರೆ ಇನಿ
ಏರ್ ಕಲ್ಪಯೆರ್‌ಂದ್ ಪನ್ ಪನ್ ಸತ್ಯೊ ಸಂಗತಿನೆ ||
ಯಾನ್ ಎಂಚಿನ ಮಲ್ತೆ ಗುರುಕುಲೆ
ಹಾಲ್ ಕೆಲಸೊನು ಪನ್‌ಲೆ ಇತ್ತೆನೆ
ದಾಯೆಗೀರೆನ್ನಡನೆ ಕೋಪೊಡು ಲಾಗಿವರ್ ಸ್ವಾಮಿ ||

13

ಈ ಸ್ವಯಂವರೊ ಕಳಟ್ ಗೆಲ್ತೆದ್
ತೇರ್‌ಡೇ ಕುಲ್ಲಾದ್ ಕನಶ್‌ನ
ಬಾಲೆ ಅಂಬೆನ್ ಮದಿಮೆ ಅಪುಜ ದಾನೆ ಕಾರಣೊಡು ||
ಸ್ವಾಮಿ ಯಾನೇ ಆಚೊ ಪಾಡ್‌ದೆ
ಬೂಮಿ ನೀರ್ ಸೂ ಗಾಳಿ ಬಾನೊದ
ಸಾಕ್ಷಿ ಪಂಡ್‌ದ್ ಮದಿಮೆ ಆವಯೆ ಪಟ್ಪೊನೇರಯೆನೆ ||

14

ಬೆರಮಚರ್ಯೆಡ್ ಮಲ್ತೆ ಜೀವನೊ
ಪನುಪನೆನ್ ಕೇನೊಂದು ಭಾರ್ಗವೆ
ರಪಗ ಪಂಡೆರ್ ಆ ಸ್ವಯಂವರದಾಡೆ ಪೋಯಿನವು ||
ಸಮೊನೊ ನಿನ್ನವು ಕನತಿ ಪೊಣ್ಣನ್
ಮದಿಮೆ ಅದೇ ನಿನ್ನ ತಪ್ಪನು
ತೆರಿದ್ ರಾಜೆರೆ ನೀತಿ ಧರ್ಮೊನು ಪೂರ ತಿದ್ಪೊನುಲ ||

15

ಕೆಸರ್‌ನೊದ್ದುದು ಪೆರಪ ದೆಕ್ಕುನ
ಕೆಲಸೊ ದಾಯೆಗ್ ಸ್ವಾಮಿ ಗುರುಕುಲೆ
ಕೆಸರ್‌ನೇ ಒದ್ದಂದೆ ಉಪ್ಪುನವೆಡ್ಡೆ ಪನ್‌ಜರೊ ||
ಎನಡ ದಾಯೆಗ್ ಮೋಲೆ ಚಾಡಿನೆ
ತರೆಕ್ ದೆತೊನುದು ಪಿಸ್‌ರ್‌ಡುಲ್ಲರ್
ಬೆರಮಚರ್ಯೆನ್ ಬುಡಯೆ ಕಂಡಿತೊ ಈರೆನೊತ್ತಯೊಗು ||

16

ತನ್ನ ಸಿಸೈನೆ ಪಂಡಿ ಪಾತೆರೊ
ದಿಕ್ಕರಿತ್‌ದುಂತ್‌ನಗ ಕೋಪೊನು
ಬುಡ್ಡುನಂಚಿನ ಪುಕ್ಕು ಗುರು ಯಾನತ್ತ್ ತೆರಿಯೊನುಲ ||
ಪೊಣ್ಣನೀಯೇ ಮದಿಮೆ ಆವೊಡು
ಅತ್ತೆಡೆನ್ನಡ ಲಡಯಿಗುಂತೊಡು
ನೆಟ್ತ್ ಒವ್ವಾವುಂದು ಪನ್ ಪನ್ ಸತ್ಯ ಸಂಗತಿನೆ ||

17

ಲಡಯಿಗುಂತುದು ಈರೆ ಪಾದೊದ
ಅಡಿಟ್ ಸೈತ್ತೆಡ ಮೋಕ್ಷೋಗೇರುವೆ
ಬೆರಮಚರ್ಯೆನ್ ಬುಡಯೆನೀರೆನ ಪೋಡಿಗೇಡ್ ನಿಜೊನೆ ||
ನಿನಡ ಇತ್ತ್‌ನ ಚತ್ರಿ ಜಾತಿಡ
ಗುಣೊತ ಗರ್ವೊನು ಯಾನೆ ಕಕ್ಕವೆ
ತಯರ್‌ಡುಂತುಲ ಪಗರಿ ರಟ್ಟವೆ ಪನ್ದ ರಟ್ಟಯೆರ್ ||

18

ಗುರುನ ಬಾಣೊನು ತುಂಡು ಮಲ್ತೆದ್
ಗರುವೊಡೇ ಸುರ ಗಂಗೆನಾ ಮಗಿ
ಪೆರಪ ಮಂತ್ರೊದ ಬಾಣೊ ಬುಡ್ಡೆನ್ ಗುರುವೆ ರಟ್ಟಯೆರ್ ||
ನಮುನೆ ನಮುನೆದ ಪಗರಿನಾಕ್‌ಲ್
ಬುಡುದು ರಟ್ಟದ್ ಬಚ್ಚೆರಿರ್ದೆರ್
ಪಗಲ್ ಬಡವುಲ ಇರ್ಲ್ ನಿರ್ದೆಲ ಅಕ್‌ಲೆಗಿದ್ಯಂದೆ ||

19

ಇಂಚಿನೇ ಲಡಯಾಂಡ್ ಇರ್ದೊ-
ತ್ತೊಂಚಿ ದಿನೊ ಗುರು ಸಿಸೈನಕ್‌ಲೆಗ್
ಮಂತ್ರೊ ಬಾಣೊಡು ಗುರುನ ತೇರ್‌ನ್ ಬೀಸೈ ಪೊಡಿಮಲ್ತೆ
ಎಂಚ ಪುಣೆದಲ ಆಯ್ವಿ ಬೀಸೈನೆ
ಪಂಡ್‌ದಿತ್ತ್‌ನ ಆಚೊ ಬಾಸೆನ್
ದಂಡೊ ಮಲ್ಪೆರೆ ತೀರಿ ಭಾರ್ಗವರಾಮದೇವೆರೆಗ್ ||

20

ಪೊಣ್ಣೆ ಈ ನನ ಬೀಸೈನಾಸೆನ್
ಬುಡ್ಡ ಎಂಕೇ ತೀರಿ ಆಯಡ
ನಿಕ್ಕು ಬೋಡಾದೇನೇ ಸಾದನೆ ಮಲ್ತೆನೀತ್ ದಿನೊ ||
ತನ್ನ ತರೆ ತಗ್ಗಾದ್ ಪೋಯೆರ್
ಮಲ್ಲರುಸಿ ಜಮದಗ್ಗಿ ಮಗನೇ
ಅಲ್ತ್ ಪೋಯಲ್ ಅಂಬೆ ತಪಸ್‌ಗ್ ಜಾಗೆ ನಾಡೊಂದು ||

21

ಅಂಬಿಕೆನ ಅಂಬಾಲಿಕೆನ ಕೈ
ಸಂಬ್ರಮೊಡು ವಿಚಿತ್ರ ವೀರೈನೆ
ದಿಂಜ ಸಂತೋಸಾದ್ ಪತ್ಯೆನೆ ಮದಿಮೆದಾ ಸಬೆಟ್ ||
ಚಂದ್ರ ವಂಸೊದ ಕೀರ್ತಿನೊರಿಪೆರೆ
ಸಂಗೊ ತಿಕ್ಕನೆ ಪಲಯೆ ಬೀಸೈನ
ಮಂಗಲಾತ್ಮನ ದಯೊಟು ಪಂಡ್‌ದ್ ರಾಜ್ಯೊನಾಳಿಯೆನೆ ||

22

ಸತ್ಯವತಿಗಲ ಮಗನ ಕಾರ್ಬರ್
ನಿತ್ಯೊ ತೂನಗ ಸಂತನುನ ಕೈ
ಪತ್ತಿ ಬಾಗ್ಯೊನೆ ಪನ್ದ ನೆನೆತೊಂದಿತ್ತಲಪಗಪಗ ||
ಯಜ್ಞೊ ಯಾಗೊದ ಹವಿಸ್‌ನುಂಡುದು
ಮಿತ್ತಲೋಕದ ಅನಿಮಿಸಾದಿಲು
ಬರೊ ಜಪುಡವುನೇಟ್ ರಾಜ್ಯೊಡು ಆಂಡ್ ಬುಲೆ ಬಾಗ್ಯೊ ||

ಅರಿನ ಸಂತತಿ ಒರಿದಾಂಡ್

ಅಪ್ಪನಾಸೀರ್ವಾದೊ ಬೀಸ್ಮನ
ತತ್ತೊದೂರ್ಜಿತೊ ರಾಜನೀತಿಗ್
ರಡ್ಡ್ ಪಟ್ಟೊದ ರಾಣಿನಾಕ್‌ಲೆ ಸುಕೊತ ಸಂಸಾರೊ ||
ಎಡ್ಡೆ ಆಯ್ಲಿ ವಿಚಿತ್ರ ವೀರ್ಯಗ್
ಸೊರೊ ಸುಕೊತವೆ ಸಾದಿ ಪತ್ತೆರೆ
ತನ್ನ ಗೌರವೊ ಕೀರ್ತಿನೊರಿತ್‌ದ್ ಕಣ್ಣ್ ಮುಚ್ಚೊಂಡೆ ||

1

ಕತ್ತಲೆನೆ ಕಬಿದಾಂಡ್ ಅರಮನೆ
ಡೊರೆ ದುಕ್ಕೊಡು ರಾಣಿನಾಕ್‌ಲೆ
ಬುಲ್ಬುಗೇರ್ಸಮದಾನೊ ಮಲ್ಪುನೆ ಬೀಸ್ಮಗುಸುಲಿದ್ದಿ ||
ಸತ್ಯವತಿ ಮತಿ ತತ್ತ್ ಬೂರ್ಯಲ್
ಉತ್ತಮೆರ್ ಮಂತ್ರಿಗುಳು ರಾಜೆನೆ
ಸೈತ್ತಿ ಪುಣ ಸುಡ್ಪುನವೆ ಕಾರ್ಯೊನು ಪೂರ್ತಿ ಮಲ್ಪಯೆರ್

2

ಸಾವು ಸೂತಗೊ ಮಾತ ಮುಗಿತ್‌ದ್
ಆನಗನೆ ವೈರಾಗ್ಯೊ ಮಸಣೊದ
ಪೂರ ಮದತ್‌ದ್ ಸತ್ಯವತಿಯೇ ತನ್ನ ಕೈತಡೆಗ್ ||
ಬೀಸ್ಮನಲ ಲೆಪುಡಾದ್ ಪಂಡಲ್
ಕೇನ್ ಮಗ ನಮ ಕುಟುಮೊದಾ ಕೊಡಿ
ಬಾಡ್‌ದಾಯ್‌ಟ್ ಹಸ್ತಿನಾವತಿಗರಸು ನನ ಏರ್ ||

3

ಈಯೆ ನನ ಈ ಸಿಮ್ಮೊಪೀಟೊನು
ಏರ್‌ದಾಡಳ್ಳೇನ್ ಮಲ್ತ್‌ದ್
ಪೂರ್ವಿಕೆರೆ ಮಹಕೀರ್ತಿನೊರಿಪುಲ ಮದಿಮೆ ಆವೊಂದು||
ಈರ್ ಎನ ಸಿದ್ಧಪ್ಪೆ ಆಂಡಲ
ಯಾನ್ ಈರೆನ ಮಗನೆ ಪನ್ಪುನ
ಬಾವನೆಡ್ ಪನ್ನೇನ್ ಕೇನ್‌ಲೆ ಅಪ್ಪೆ ಕೆಬಿಕೊರುದು ||

4

ಸೂರ್ಯಚಂದ್ರೆರ್ ಪಂಚ ಭೂತೊಲೆ
ಸಾಕ್ಷಿಡೇನೇ ಆಚೊ ಪಾಡ್‌ದ್
ರಾಜ್ಯೊನಾಳಯೆ ಮದಿಮೆ ಆವಯೆ ಪನ್ನೆ ದುಂಬೇನ್ ||
ಊರುನಾಳುನ ಪದವಿಗಾದೇ
ಪಾಡ್‌ನಾಚೊನು ಬುಡೊಡು ಚೀಂಕ್‌ರ್-
ದಾಸೆಗೇರ್‌ಲ ತಾರೆ ಕಡ್ಬೊ ಪನ್‌ಲೆ ಎನ್ನಪ್ಪೆ ||

5

ಉತ್ತರೊನು ಕೊರೈರೆಗ್ ತೀರ್‌ಜಿ
ಸತ್ಯವತಿಗೇ ಬೀಸ್ಮನೆದುರುಡು
ಕಣ್ಣೆಡೆನೆ ನೀರರಿಪಯಲ್ ಸರಿ ಬುಲ್ಬು ಬುಲ್ಬೊಂದು ||
ಎನ್ನಡ್‌ದ್ ಕಡೆಯಾಂಡೆ ಕುಟುಮೊಗು
ಎನ್ನ ಕಂಡನಿ ಎನನ್ ಆಯ್ಕೆಟ್
ಪನ್ಪುನಪಕೀರ್ತಿಗಲ ಕಾರಣೊ ಯಾನೆ ಆಯೆತ್ತೊ ||

6

ಆನಿದಾ ದಿನೊ ಪಗೆಲ್ ದುಕ್ಕೊಡೆ
ಪೋದು ಕತ್ತಲೆ ಕಬಿದ್ ಆನಗ
ಮೀಪುನುಣ್ಪುನ ಬುಡುದು ಚೆತ್ತಲ್ ನೆಲಟಿ ಸತ್ಯವತಿ ||
ದೀಪೊ ತೆಕ್ಕಯಿ ಸಾತ್‌ಗಾಲೆಗ್
ತಾನ್ ಮದಿಮೆಗ್ ದುಂಬು ಪೆದ್ದನ
ಆಣ್ ಬಾಲೆದ ನೆಂಪು ಆನಗ ಲಕ್‌ದ್ ಕುಲ್ಲಿಯಲ್ ||

7

ಈರೆ ಕಸ್ತೊಗು ನೆನೆಪುಲೆನ್ನನ್
ಆನಿ ಪಂಡ್‌ದ್ ಪೋಯಿನಾ ಮಗೆ
ತಾನೆ ಬತ್ತದ್ ಎಂಕ್ ಸಕಯೊನು ಮಲ್ಪುವೆನೊ ದಾನೊ ||
ಈತೆ ನೆಂಪುನು ಮಲ್ತಿ ಸಾತ್‌ಗ್
ಕೋಣೆಡೇ ಬೊಲ್ಬೊಂಜಿ ಬೂರೈಟ್
ಆಲೆಗಾಂಜಿದ್‌ಲಾಂಡ್ ಸಿವೆನೇ ಎದುರು ಉಂತಿಲೆಕೊ ||

8

ಕಪ್ಪು ಸೈರೊದ ಕೆಂಪು ಕುಜಲ್‌ದ
ಕ್ರಿಷ್ಣ ಮುರ್ಗೊದ ಚರ್ಮೊ ತುತ್ತ್‌ನ
ದಿವ್ಯೊ ರೂಪೊದ ಸ್ವಾಮಿಯಪ್ಪೆನ ಕಾರ್ಗ್ ಪುಡ್ಯಾಡ್ ||
ಅಪ್ಪೆ ಈರೆಗ್ ದಾನೆ ಆವೊಡು
ಬತ್ತಿ ಕಸ್ತೊಲು ಎಂಚಿನವು ಪನಿ
ಇತ್ತೆನೇ ಪಂಡೊಂದು ಜಕ್ಕೆಲ್‌ಗಾರ್ ಬೂರಿಯೆರ್ ||

9

ಎನ್ನ ಮಗೆ ಸಂತಾನೊ ಇದ್ಯಂ-
 ದೆನ್ನನೇ ಬುಡುಡಿತ್ತೆ ಎಲೈಡೆ
 ಸೊರೊಸಾದಿನ್ ಪತ್ಯೆ ಆಯನ ರಡ್ಡ್ ಬುಡೆದ್ಯಲ್ಲು ||
 ಪೆದ್ದಾಜೆರ್ ಇನಿಮುಟ್ಟು ಸಂತೆತಿ
 ಎನ್ನಡ್ಡ್ ಕಡೆಯಾಂಡ್ ವಂಸೊದ
 ಎಗ್ಗನೇ ರಟ್ಟಾಯಿ ಕುಡರಿಯೆ ಆದ್ ಪೋಯೆ ಮಗ ||

10

ಬುಲ್ಲಡೆಯೆ ಎನ್ನಪ್ಪೆ ಈರೆನ
 ಮರ್ಮಲಲ್ಲೆನ ಬಂಜಿದುಲಯಿಡೆ
 ಬಿತ್ತ್ ಕೊಡಿಪವೆ ಚಂದ್ರವಂಸೊದ ಮಲ್ಲ ಸಂತೆತಿದ ||
 ಒರಿ ಒರಿಯೆ ಬರಡ್ ಮುಲ್ಲದ
 ಗುಟ್ಟುದದಕೇ ವೇದವ್ಯಾಸೆರ್
 ಪನ್ದ ಪೊಗೈರ್ ಕೋಣೆದುಲಯಿಗ್ ಬಾಕಿಲೊಯ್ತೊಂದು ||

11

ಮಾಮಿ ಪಾತೆರೊ ಕೇನ್ದಲಂಬಿಕೆ
 ಕೋಣೆದುಲಯಿಡ್ ಕುಲ್ದಿತ್ತಾನ
 ಬಾದರಾಯಣ ರುಸಿನ್ ತೂದೇ ಕಣ್ಣ್ ಮುಚ್ಚಿಯಲ್ ||
 ಆಲ್ ಬತ್ತನ ಕೆಲಸೊ ಆದಲ್
 ಪೋಯಲಪಗನೆ ಮೆಗಿದಿ ಮಾಮಿನ
 ಪಾತೆರೊನು ಮೀರಂದೆ ಪೊಗೈಲೆ ಅದೆಕ್ ನಾಚಿಗೇಡ್ ||

12

ರುಸಿನ್ ಅಂಬಾಲಿಕೆನೆ ತೂನಗ
 ಒಸಯೊ ತತ್ತದ್ ಬೂರ್ನಗಾಲೆನ
 ಮೆಯಿತ ಬಣ್ಣೊನೆ ಬೊಳ್ಳೆ ಬೊಳ್ಳೆನೆ ಆಂಡ್ ಪೋಡಿಗೇಡ್ ||
 ಒರಿಪಿಯೆರೆ ಸಂತತಿನ ಪಂಡ್ಡ್
 ಅದೆಕ್ ಪೊಗ್ಗನ ರಾಣಿ ಬತ್ತನ
 ಕೆಲಸೊ ಮುಗಿತ್ತದ್ ಪಿದಯಿ ಪೋಯಲ್ ಅಡಿಕ್ ತೂವೊಂದು

13

ಕಡೆಕ್ ಚಾಕ್ರಿದ ಪೊಣ್ಣೊನೊರಿನ್
 ಕಡಪುಡಿಯಲಾ ಸತ್ಯವತಿ ತನ
 ಮಗನ ಕೈತಡೆ ದಾಯೆಗ್ಂದ್ ಎರೆಗರ್ತಾವು ||
 ಕುಸಲ್ಡಾಲೇ ಅದೆಕ್ ಪೊಗೈಲ್
 ತೆಲಿತ್ದಾ ರುಸಿನೊಟ್ಟು ಕೂಡ್ಡ್
 ತನ್ಕ್ ಆಯಿನ ಸಂತೊಸುಡು ಪಿರ ಪಿದಯಿಗತ್ತಿಯಲ್ ||

14

ಮೂವೆರೆಗಲಾ ಗಬೊದಾನೊನೆ
 ಆಂಡ್ ಪಂಡ್ಡ್ ಬಾದರಾಯಣ
 ಕೋಣೆಡ್ಡ್ ಬತ್ತೊಂದು ಅಪ್ಪೆಡ ಪಂಡೆರಾಪಗನೆ ||
 ನಾಸೊ ಆಯಿನ ವಂಸೊನೊರಿಪೆರೆ
 ಸಾಸ್ತೊಡಿಂಚಿ ನಿಯೋಗೊ ಪದ್ಧತಿ-
 ಡಾಂಡ್ ಕೊರತೆನೆ ಇದ್ದಿ ಕುಟುಮೊದ ಮಾನೊ ಮರೈದಿಗ್ ||

15

ಹಿರಿಯ ಮರ್ಮಲ್ ಪೆದ್ದುವಲ್ ನಿಚೊ
 ಕುರುಡ ಬಾಲೆನ್ ಕಿರಿಯ ತಂಗಡಿ
 ಬೊಲುದು ಚರ್ಮೊದ ರೋಗೊದಾಯನ್ ಪೆದ್ದಲಾಣೊಂಜಿ
 ಕೆಲಸೊದಾಲೆಗ್ ಪೊರ್ಲಕಂಟ್
 ಮಗನೆ ಪುಟ್ಟುನ ಯೋಗೊ ಪಂಡ್ಡ್
 ಬದರಿಕಾಸ್ರಮೊಗಲ್ ಪೋಯೆರ್ ಅಪ್ಪೆನೊಪ್ಪಿಗೇಡ್ ||

16

ಮೂವೆರ್ಲ ಸರಿ ಬಂಜಿನಾಕ್ಲ್
 ಆಯಿನೆನ್ ತೆರಿಯೊಂದು ಬಯಕೆನ್
 ಬಾರಿ ಗೌಜಿಡ್ ಮಲ್ಲಯಲ್ಲಾ ಮಾಮಿ ಸತ್ಯವತಿ ||
 ರಾಣಿನಾಕ್ಲೆಗಿದ್ದಿ ಕಂಡನಿ
 ಆಂಡಲಾಕ್ಲ್ ಪೆದ್ದುನೆಂಚಂ
 ದೇರ್ಲ ಕೇನ್ದೆರ್ ಚಕ್ರವರ್ತಿಲೆ ಸುದ್ದಿ ಬೊಡ್ಡಿದ್ ||

17

ಬಂಜಿನಾಕ್ಲ್ ಮೂವೆರೊಟ್ಟುಗು
 ಒಂಬೊ ತಿಂಗೊಳು ಕರಿದ್ ಪೆದ್ದನ
 ಸಂಬ್ರಮೊದ ಮಾಗೊಜಿ ರಾಜ್ಯೊಡು ಆಂಡ್ ವೈಬವೊಡು ||
 ಚಂದ್ರವಂಸೊದ ಕೊಡಿಯೆ ತೆಗಲ್
 ಇಂದ್ರ ಲೋಕೊಡು ಸಾನ್ ಸುದ್ದಿಯೆ
 ಬಂದುಗುಳು ಮಾತೆರ್ಲ ಜೋಕ್ಲೆನ್ ತೂಯೆರೆತ್ತಿಯೆರ್ ||

18

ಅಂಬಿಕೆನ ಮಗೆ ಕುರುಡೆ ದ್ರತರಾ-
 ಸ್ತೆದ್ ಲೆತ್ತೆರ್ ಮೆಗಿದಿನಾ ಮಗೆ
 ಪಾಂಡು ಪಂಡೆರ್ ಬೊಲ್ಲು ಚರ್ಮದ ಬಾಲೆ ಆಣ್ಂದ್ ||
 ಪೊಯ್ಯೆ ಕಂಡೊದ ಕೊಡಿಪುದಂಚಿನೆ
 ಪೊರ್ಲು ಪೊರ್ಲಾದಿತ್ತಿ ಬಾಲೆಗ್
 ಒಪ್ಪುವೆ ವಿದುರೆಂದ್ ಪುದರ್ನ್ ದೀಡ್ಡ್ ಸಾಂಕಿಯೆರ್ ||

19

ಜೋಕುಲೆನ್ ಸಾಂಕಾಯೆ ಬೀಸ್ಮೆನೆ
ಪ್ರೀತಿ ಮೋಕೆಡ್ ತನ್ನ ಮೆಗ್ಗನ
ಬಾಲೆಲುಂದೇ ಜಾತಗೊನು ಬರೆಪಾದ್ ಸಾಸ್ತ್ರಲೆಡ್ ||
ಓದಿಯೆರೆ ಬರೆಯೆರೆಗ್ ಕಲ್ತ್ದ್
ರಾಜನೀತಿನ ತತ್ತ್ವೊ ಸಾಸ್ತ್ರೊನು
ಮೂವೆರೊಟ್ಟುಗು ಬಿರುತ ವಿದ್ಯೆನ್ ಪೂರ ತೆರಿಯೊಂದು ||

20

ಬೊಳಿಯ ತಿಂಗೊಳು ದೇವೆರೆನ ಲೆಕೊ
ಬಲತ್‌ದಾಕ್‌ಲು ಜವನೆರಾಯೆರ್
ನನಗ್ ಪಟ್ಟೊದ ಮಣೆಟ್ ಒರೈನ್ ಕುಲ್ಲಯೆರೆ ಬೀಸ್ಮೆ ||
ಕುರುಡೆ ಹಿರಿಯಯೆ ಪಟ್ಟೊಗೇಯೆರೆ
ಸರಿತಯೆನೆ ಅತ್ತಂದ್ ಪಾಂಡುನು
ಕುರುಕುಲೊತ ಸಿರಿಪೀಟೊಗೆರ್ಸಯೆ ಅಕ್‌ಲೆ ಸಲ್ತೊಡು ||

21

ವಿದುರೆ ಪೆರದನಿ ಮಂತ್ರಿ ಸಂಜಯೆ
ದಳೊಕು ನಾಲ್ವಳವಾಯಿನಾಕ್‌ಲೆ
ಪುದರ್ ಪಂಡ್‌ದ್ ಬೀಸ್ಮೆ ತೆರಿಪಯೆ ರಾಜ ಚಾವಡಿಡ್ ||
ಜಯೊನೆ ಜಯ ಜಯೊ ಚರ್ಕವರ್ತಿಗ್
ಜಯೊನೆ ಕುರುದೊರೆ ಪಾಂಡು ರಾಜಗ್
ಜಯ ಜಯೊಂದುದು ಕಾಣೆಗೆನ್ ಸಾಮಂತೆರೊಪ್ಪಯೆರ್ ||

22

ಪಾಂಡು ರಾಜೆನೆ ತನ್ನ ರಾಜ್ಯೊಡು
ನಾಲ್ ವರ್ಣೊದ ಜನ ಸಮಾಚೊಗು
ಬೋಡು ಬೋಡಿತ್ತನೆನ್ ಮಲ್ಪದ್ ಕೀರ್ತಿ ಪಡೆವೊಂಡೆ ||
ಯಾಗೊ ಯಜ್ಞೊದ ಹವಿಸ್‌ನುಂಡುದು
ದೇವತೆಲು ಸಂತೊಸುಡು ಬರ್ಸೊನು
ಕಾಲೊ ಕಾಲೊಗು ದೊರಿತೆರೆತ್‌ಲ ಹಸ್ತಿನಾವತಿಡ್ ||

23

ಊರುಡಿಡಿ ಬುಲೆಬಾಗ್ಯೊ ಪೆತ್ತಲೆ
ಪೇರ್‌ದೊಸರ್‌ದ ಪರಿಪು ಇಲ್ಲಡ್
ಸ್ವಾಮಿಯೆ ಕೈಪತ್ತಿ ಕಂಡನಿ ಪನ್ನಿ ಪೊಂಜೋವು ||
ಹಾದರೊದಜನ ಇದ್ದಿ ಕಂಡುನು
ಗಾತಕೆರೆ ಕುಡ್ಚೆಲೆರ್ ಸುಲಿಗದ
ಮೋಸಗಾರೆರ್ ಇದ್ಯಂದಿತ್ತನ ರಾಜ್ಯೊ ಗಜನಗರೊ ||

ಕರ್ಣನ ಜನನೊ

ಯದು ಕುಲೊತ ವಸುದೇವ ತಂಗಡಿ
ಅರಸು ಕುಂತೀ ಬೋಜನರಮನೆ-
ದುಲಯಿ ಬಲತೊಂದಿತ್ತನಲ್ ಸಾಂಕನೊದ ಮಗಲಾದ್ ||
ಪೊರ್ಲು ಪೊರ್ಲಾದಿತ್ತಿ ಕುಂತಿಯೆ
ಮುಗುರು ಮಿರೆ ಮೂಡೊಂದು ಬರ್ಪುನ
ವಜಯೊಡೇ ಕೆರ್ಮಾಲ್ ನಡೆನುಡಿಟಾಲ್ ಮಾಣಿಕೊನೆ ||

1

ಬಾರಿ ಕೋಪೊದ ರುಸಿಯೆ ದೂರ್ವಾ-
ಸೇರ್ ಬತ್ತೆರ್ ರಾಜದಾನಿಗ್
ರಾಜಕಾರಣೊಡ್ಲಾದ್ ಅರಸುಗು ಪುರೊತ್ತಾವಂದೆ ||
ಆರೆನೆದೊನ್ನಿಯೆರೆನೆ ತೀರ್‌ಜಿ
ತಾನ್ ಬತ್ತನ ಗಮನೊ ಮಲ್ತೆಜಿ
ರಾಜಿ ಪನ್ನುನ ಕೋಪೊಡಾರೇ ಕಣ್ಣ ಪುರೆಲ್ಪುನಗ ||

2

ಪಾರ್ ಬತ್ತನ ಕುಂತಿ ಕಾರ್‌ಗ್
ಬೂರ್‌ಲಾರೆನ್ ಉಲಯಿ ಕುಲ್ಲದ್
ಯೋಗಿಲೆಗ್ ಮಲ್ಪಿಂಚಿ ಸಮ್ಮನೊ ಮಲ್ತ್ ಸಂದಯಲ್ ||
ಪೇರ್ ಪಂದ್‌ನ್ ಕೊರ್ದು ಕೈಮುಗಿ-
ದಾಲ್ ಉಂತ್‌ನ ತೂದು ರುಸಿನವೆ
ಕೋಪೊದಾ ಸೂ ತೆಕ್ಕದಾನಗ ಆಂಡ್ ಸಂತೋಸು ||

3

ಮಗಲೆ ನಿಕ್ಕೇನೊಂಜಿ ಮಂತ್ರೊನು
ಕೆಬಿಟ್ ಪಂಡ್‌ದ್ ಕೊರ್ಪ ಏನೇ
ನೆನೆಪು ದೀಡ್‌ದ್ ಈಯೆ ಮೆಚ್ಚಿನ ದೇವ ದೇವತೆನ್ ||
ಪುದರ್ ಪಂಡ್‌ದ್ ಜಪೊನು ಮಲ್ತಡ
ಒಲಿದ್ ಬರುವೆನೆ ನಿಕ್ಕಲಾಯನ
ಗುಣೊತ ಮಗೆನೇ ಪುಟ್ಟೆ ಪಂಡ್‌ದ್ ಮಂತ್ರೊ ಕಲ್ಪಯೆರ್ ||

4

ಅಲ್ತ್ ಪೋಯೆರ್ ಮುನಿಯೆ ಕಾಡ್‌ಗ್
ಸಿದ್ದಿದಾ ಮಹಮಂತ್ರೊ ಕುಂತಿಗ್
ಕಲ್ತದಾನಗ ಜೋಕುಲಾಟಿಕೆಡಾಲ್ ಗ್ರೇಯಿತಲ್ ||
ಇತ್ತೆನೇ ಈ ಮಂತ್ರ ಪಲಿಪುನೆ-
ನೆನ್ನ ಕಣ್ಣೆಡೆ ತೂವೊಡುಂದುದ್
ಸರೊ ಪಾರ್ಯಲ್ ಗಂಗೆದಾ ಸುದೆ ಬರಿಕ್ ಏವುರೊಡು ||

5

ಮೀದ್ ಸುದ್ದೊಡೆ ಚಂಡಿ ಕುಂಟುಡೆ
ಬಾನೊಗೇ ಸರಿ ದಿಸ್ತಿ ದೀಡ್‌ದ್
ಸೂರೈ ನಾರಾಯಿಣನ್ ತೂದೇ ಮಂತ್ರೊ ಜಪಿತೊಂದು ||
ತಾನ್ ಉಂತ್‌ನಗಪಗ ಕಣ್ಣ್‌ಗ್
ಆಂಜಿದಾಂಡ್‌ಲ ದಿವ್ಯೊ ತೇಜಿದ
ರೂಪೊ ಒಂಜೆನ್ ತೂದ್ ಪೋಡಿಡ್ ಕಣ್ಣ್ ಮುಚ್ಚಿಯಲ್ |

6

ಕಣ್ಣ್‌ಗೇ ಕೈ ಪತ್ತದುಂತ್‌ನ
ಪೋಣ್ಣು ಬುಲ್ಲುದು ಸೇಂಕ್ ಸೇಂಕ್‌ದ್
ಮುಲ್ಲು ಒರ ಪೋಲೆಂದ್ ಪನ್ನಗ ಸೂರೈ ತೆಲಿತೊಂದು ||
ಮಲ್ಲ ರುಸಿ ಮಂತ್ರೊನುಲ ಜಪಿತ್‌ದ್
ಎನ್ನನೀಡೆಗ್ ಈಯೆ ಬರ್ಪಯ
ನಿಕ್ಕ್ ಎನ್ನವೆ ತೇಜಿದಂಚಿನ ಬಾಲೆ ಆವುಂದು ||

7

ಆಲೆನಾ ಮೆಯಿ ಮುಟ್ಟದಪಗನೆ
ಬಾನೊಗೇಯೆನೆ ಸೂರ್ಯೆ ಕುಂತಿಗ್
ಗೇನೊ ತತ್ತದ್ ಬೂರುನ್ಬಾಲೆಗ್ ಬಾಲೆದಾ ಬುಲ್ಲು
ಕೇಂಡಿ ಸಾತ್‌ಗ್ ಮತಿಯೆ ಬತ್ತದ್
ತೂನಗೆಂಚಿನ ಬಾಲೆ ಸೂರೈನ
ತೇಜಿನೇ ಕರವೊಂದು ಮೈತ್ತನ ಗೊಂಬೆ ಪುತ್ತೊಳಿದ ||

8

ಕಾರ್‌ದಡಿ ಕೆಂಪಾದ್ ಸೈರೊನೆ
ಪಾಲೆ ಬುಡಿ ಪಿಂಗಾರದಂಚಿನೆ
ಕಾಡಿಗೇದ ಕರಿ ಕಪ್ಪು ಪಿಳಿ ಪಿಳಿ ಕಣ್ಣ್ ಮೆಣ್ಣುನೆನ್ ||
ತೂದು ಕೊಂಡಟೊಡೈನ್ ತರ್ಕ್ಯಲ್
ಮಾಣಯಲ್ ಮೋನೆಗಲ ಮುತ್ತೊನು
ತಾನೆ ಕೊರ್ನಗ ತನ್ನ ಮನಸ್‌ಡ್ ಮಲ್ಲ ಎತೆಯಾಂಡ್ ||

9

ಬಾಲೆನರಮನೆಗೆಂಚ ಕೊಂಡೊವೆ
ಮಾತೆರ್‌ಲ ಪಿಲೆ ಪನುವೆರೆಂಕೇ
ಮೂಲು ಬುಡಿಯೆರೆ ಮನಸ್ ಬರ್ಪುಜೆ ದಾನೆ ಮಲ್ಲೇನ್ ||
ಏಚನೆಡ್ ಕುಲ್ಲೊಂದು ಗಂಗೆದ
ನೀರ್ ತೂನಗ ಆಲೆಗಾಂಡ್‌ಲ
ಬಾಲೆನರ್ಪಿತೊ ಮಲ್ಲೆ ಗಂಗೆಗ್ ಪನ್ನಿ ಯೋಚನೆನೆ ||

10

ರಡ್ಡ್ ಕೈಟ್‌ಲ ತರ್ಕೊನುಂದೇ
ಒಯ್ಲ್ ನೀರ್‌ದ ಬರಿಟ್ ಉಂತುದು
ಅಪ್ಪೆ ಗಂಗಾದೇವಿ ಬಾಲೆನ್ ನಿಕ್ಕ್ ಕೊರ್ಪೇನ್ ||
ಕೆರ್ದಡಲ ಈ ಕೆರ್ದ ಇಂದೆನ್
ಬದ್ಧವಡ ಬದ್ಕಾಲ ಪಂಡ್‌ದ್
ಪುಣ್ಯೊ ನೀರ್‌ಡ್ ಬುಡುದು ಪೋಯಲ್ ಮಗ್‌ರ್ ತೂವಂದೆ

11

ಏಳ್ ಬಾಲ್ಲೆನ್ ನೀರ್‌ಗ್ ದಕ್ಕನ
ಪಾಪಿಯಾಂಡಲ ಗಂಗೆ ಕರುಣೆದ್
ಬಾಲೆನೇ ಪಾಂಬಾದ್ ಒಚ್ಚಿದ್ ಪೊಯೈಗಡಕಿಯಲ್
ಬೂರಿ ಸಾತ್‌ಗ್ ಬಾಲೆ ಪೊಯೈನ್
ಕಾರ್ಡ್ ಕೆರೆಚಿದ್ ಮಿತ್ತ್ ಸೂರೈನ್
ತೂದು ಬುಲ್ಲುನ ಸೊರೊನು ಕೇಂಡೆನೆ ಓಡೊನೊಚ್ಚುನಯೆ ||

12

ಪಾರ್ ಬತ್ತದ್ ತೂಯೆ ಬಾಲೆನ್
ಏರೊ ಪೆದ್ದದ್ ಬುಡುದ್ ಪೋಯಿನ
ಹಾಲ್ ಸೀಲೊದ ಪೋಣ್ಣು ರಕ್ಕಸಿ ಪನ್ನ್ ತರ್ಕೊಂಡೆ
ಈತ್ ಪೋರ್ಪದ ಬಾಲೆ ತಿಕ್ಕರೆ
ಏತ್ ಪುಣ್ಯೊದ ಪಲೊನೊ ಪಂಡ್‌ದ್
ಪ್ರೀತಿ ಮೋಕೆಡ್ ಮುತ್ತೊ ಕೊರೈನೆ ಬೋವಿ ಅದಿರತೆನೆ ||

13

ಎಂಕ್ ಜೋಕುಲು ಇದ್ದಿ ಪನ್ನುನ
ಸಂಕಡೊನು ಪರಿಯಾರೊ ಮಲ್ಲೆರೆ
ಇಂಚಿ ಬಾಲೆನ್ ಕೊರ್ನ ದೇವೆರ್ ಪನ್ನೆ ನೆನೆತೊಂಡೆ ||
ತಿಗಲೆಡೈನೇ ಪಾಡ್ಡ್ ಮೇಲ್‌ಗ್
ತರೆತ ಕುಂಟುನ್ ಪೊದೆತ್‌ದಾಯೆನೆ
ನಡತ್‌ದೆತ್ತೈನೆ ತನ್ನ ಇಲ್ಲಡೆ ಬಾರಿ ಸಂತೊಸುಡು ||

14

ರಾದು ಓಲ್ಲಯ ದೆಪ್ಪು ಬಾಕಿಲ್
ಯಾನ್ ಕನತ್‌ನೆ ತೂಲ ಎಂಚಿನೆ
ದಾನೆ ಮಲ್ಲುವ ಉಲಯಿಡೀಯೇ ಬೇಗೊ ಬಲ ಈಡೆ ||
ಮೀನ್ದ ಗಸಿ ಕೊದಿತೊಂದು ಉಂಡುಯೆ
ಈರೆಗಮಸರೊ ದಾನೆ ಪಂಡ್‌ದ್
ಬಾಕಿಲ್‌ಗ್ ಪಾರ್ ಬತ್ತಲಾಯನ ಮದನ ಮುಡ್ಕಣೆನೆ ||

15

ಕಂಡನಿನ ಕೈಟಿತ್ತಿ ಬಾಲೆನ್
 ಎಂಚಿನಂದ್ ತೂದ್ ತೆಲಿತಲ್
 ಇಂಚಿನೆನ್ ದಾಯೆಗ್ಗೆಯೆ ಕನತರ್ ಏರ್ ಸಾಂಕಿಯೆರೆ ||
 ಬುಲ್ಬುನಗ ಮಿರೆ ಜುಂಬವುನ ಪೆದಿ-
 ಯಪ್ಪೆ ಓಲ್ಲಲ್ ಪನ್ದ್ ಏತ್ಲ
 ಪ್ರಸ್ನೆ ಕೇಂಡಲ್ ನಮುನೆ ನಮುನೆಡ್ ತನ್ನ ಕಂಡನಿಡ ||

16

ಏರೊ ಪೆದ್ದದ್ ಬುಡುದ್ ಪೋಯಿನ
 ಬಾಲೆ ತಿಕ್ಕನೆ ಸುದೆತ ಪೊಯ್ಯೆಡ್
 ಯಾನ್ ಕನತನೆ ನಂಕ್ ಸಾಂಕ್ಯೆರೆಗಾವು ಪಂಡೊಂದು ||
 ಜೋಕುಲಿದ್ಯಾಂದಿಲ್ಲ ನಮ್ಮವು
 ಪ್ರೀತಿಡಿಂದೆನ್ ಸಾಂಕೊನುಗೊ ನನ-
 ಗೀಯೆ ಸಂತೊಸುಡುಪ್ಪು ಪಂಡ್ ಬುಡೆದಿನೊಪ್ಪಾಯೆ ||

17

ಆಲ್ ಬಾಲೆನ್ ಉಲಯಿ ಜೆಪುಡದ್
 ಸೀಯನೆಯಿತರುವೆನ್ಲ ಬಾಯಿಗ್
 ದೀಡ್ಡ್ ಕುಂಟುದ ನೇಲೆ ಕಳ್ವದ್ ಜೆಪುಡದೊಚ್ಚಿಯಲ್ ||
 ರಾದೆನೇ ಪೆದನೆಂದ್ ಉರುದ
 ಜಾತಿದಕಲೆಗ್ ಪನ್ದ್ ತೊಟ್ಟಿಲ್-
 ಡೈನ್ ಜೆಪುಡದ್ ಕರ್ಣೆ ಪಂಡ್ ಪುದರ್ ದೀಡಿಯೆರ್ ||

18

ಪಾಲೆಡೆಣ್ಣೆಡ್ ಪುಡೆರ್ನಗ ನಿಜೊ
 ಮೀನ್ ಬಂಜಿನ್ ಒಯಿಪುನಗನೇ
 ಏಮೆ ಪರಪುನ ಪಂಜಿ ಉಂತ್ನಗಾಯೆ ನರಸಿಂಗ್ ||
 ವಾಮನೆನೆ ತಿನಿಯೆರೆಗ್ ನಟ್ಟುವೆ
 ಹಾಕ್ನಗ ಭಾರ್ಗವೆನೆ ಅಪ್ಪೆಗ್
 ಆಲ್ ಟಕ್ಕಡ್ ಬುಲ್ಬುನಗನೇ ಆಯೆ ಶ್ರೀ ರಾಮೆ ||

19

ದೇವೆರೆನ ಏಳಾವತಾರೊದ
 ಲೀಲೆದವೆ ನಿಜೊ ರೂಪೊ ತೋಜದ್
 ರಾದೆನಾ ಜಕ್ಕೆಲ್ಡ್ ಬಲತೊಂದಿತ್ತನಾ ಕರ್ಣೆ ||
 ಪೇರ್ಗ್ಗೆ ಪೆತ್ತಲು ಜಾಲ್ಡ್ ಕದಿಕೆಲು
 ತಾರೆ ಬಾರೆಲು ತೋಟ ಕಂಡೊಲು
 ಏರುದಾಂಡೈಸುರೊನೇ ಕರ್ಣೆ ಸಾಂಕಿ ಲಚ್ಚಣೊಡು ||

ಹಸ್ತಿನಾವತಿಡ್ ಮದಿಮೆ

ಜವನೆರಾಯಿನ ಮೆಗ್ಗೆ ಜೋಕುಲೆ
 ಮದಿಮೆ ಗೌಜಿಡೆ ಮಲ್ಪೊಡುಂದುದು
 ಪೊದುನು ತೂಯೆರೆ ಮಂತ್ರಿನಕಲೆನ್ ಬೀಸ್ಮೆ ಕಡಪುಡಿಯೆ ||
 ಅಕ್ಲ್ ಆ ಗಾಂದಾರೊ ದೇಸೊದ
 ಸುಬಲ ರಾಜಕುಮಾರಿ ಪೊಲ್ಲೆದಿ
 ಪನುಪುನೆನ್ ಕೇನೊಂದು ಪಂಡೆರ್ ಸುದ್ದಿ ಬೀಸ್ಮಡನೆ ||

1

ಬೀಸ್ಮೆ ತೇರ್ಡ್ ಎತ್ತೆನಾಡೆಗ್
 ತಾನ್ ಬತ್ತನ ಸುದ್ದಿ ತೆರಿಪದ್
 ಆನಗನೇ ಆ ಸುಬಲ ರಾಜೆನೆ ಬತ್ತದೆದುಕೊಂಡೆ ||
 ರಾಜ ಚಾವಡಿಡಯನ್ ಕುಲ್ಲದ್
 ಕೇಂಡೆ ಸುಕೊ ದುಕ್ಕೊಲೆನ್ ಬಿನ್ನೆರೆ
 ಗಾಪಿ ಸಮ್ಮನೊ ಮಲ್ತೆದುಂತ್ಯೆನೆ ತಾನ್ ಕೈ ಮುಗಿದ್ ||

2

ಕುಲ್ಲು ಕುಲ್ಲುಲ ಸುಬಲ ಕೈತಲ್
 ಪೊಣ್ಣು ಕೇನೈರೆ ಬತ್ತೆ ಯಾನೇ
 ನಿನ್ನ ಮಗಲೆನ್ ಎನ್ನ ಮೆಗ್ಗೆನ ಮಗನೆ ದ್ರತರಾಸ್ತೆ ||
 ಅಗ್ಗಿ ಸಾಕಿಡ್ ಮದಿಮೆ ಆಯೆರೆ -
 ಗೊಪ್ಪುನಾ ಜವ್ವನಗ್ ಕೊರ್ಪನ
 ಪನ್ನಿ ಪಾತೆರೊ ಕೇಂಡ್‌ದಾಯೆನೆ ಪಂಡೆ ಬೀಸ್ಮಡನೆ ||

3

ಪ್ರಾಯೊ ಬತ್ತನ ಮಗನವುಲ ಅಬಿ-
 ಪ್ರಾಯೊ ಕಲ್ತನ ಪೊಣ್ಣಡಲ ನಮೊ
 ಆವೊ ಪಂಡ್‌ದ್ ಕೇನೊ ಅಕಲೆಡ ನಮ್ಮ ಎದುರುಡೆನೆ ||
 ಜೋಕುಲೆನ್ ಸಬೆತಾಡೆ ತರ್ಪದ್
 ಆಣ್‌ಮಗೆ ಸಕುನಿಡನೆ ಕೇನ್ನಗ
 ಆಯೆ ಮೆಗಿದಿನ ಮೋನೆ ತೂದೇ ಪನ್ನಿನಕಲೆಡನೆ ||

4

ಕುರುಡೆ ದ್ರತರಾಸ್ತೆಂದ್ ಪನ್ನುನ
 ವಿಸಯೊ ಕೇನ್‌ದೆನೆನ್ನ ತಂಗಡಿ
 ಸುಕೊಟು ಕರಿವಲೊ ಪನ್ನಿ ಸಂಸಯೊ ಎಂಕ್ ಆಯಿನೆಟ್ ||
 ಸರಿತ ಉತ್ತರೊ ಪನಿಯೆರಾಪುಜೆ
 ತೆರಿನ ಪೊಣ್ಣೇ ಮೋಲು ಆಯ್ಕೆಟ್
 ಪನಡ್ ತನ್ನಬಿಪ್ರಾಯೊ ಪಂಡ್‌ದ್ ಮೋನೆ ತೂನಗನೆ ||

5

ಅಮ್ಮೇರೇ ಜಬುದಾರಿ ತಪ್ಪದ್
ಅಣ್ಣ ಮೇಲ್‌ಗ್ ಪಾಡ್ಡ್ ಕುಲೈರ್
ಅಣ್ಣೆಲಾ ನುಗೊ ತಪ್ಪದಾನಗ ಎಂಕ್ ಏರುಂಡು ||
ಚಕ್ರವರ್ತಿಲೆ ಮನೆತನೊದ ಸಿರಿ
ಬೊಲ್ಪು ಬೆಳಗವಿ ಯೋಗೊನೇನಿನಿ
ತಪ್ಪವುನ ಸರಿಯತ್ತ್ ಪಂಡ್‌ದ್ ನೆನೆತಿ ಗಾಂದಾರಿ ||

6

ಬೀಸ್ಮನಾ ಕಾರ್ಪತ್ತದಪಗನೆ
ಯಾನ್ ಈರೆನ ಮರ್ಮಲಾಯೆರೆ
ಏತ್ ಜಲ್ಲೊದ ಪುಣ್ಯೊ ಪಡೆತನೊ ಪನ್ದ ಬುಲ್ಪುನಗ ||
ಆಲೆನೇ ಲಕ್ಕಾದ್ ನೆತ್ತಿಗ್
ತಾನ್ ಕೈ ದೀಡೊಂದು ಪಂಡೆನೆ
ಈಯೆ ಮಹಪತಿರುತೆನೆ ಪನ್ನುನ ಕೀರ್ತಿನೊರಿತೊನುಲ||

7

ನಿಚ್ಚೆಯೊದ ಸಿರಿ ಬೂಳ್ಳೊ ಬೀಸ್ಮೆನೆ
ಪತ್ತೊನುಂದೇ ಪಂಡೆ ಸುಬಲಡ
ಹಸ್ತಿನಾವತಿದರಮನೆಡೆ ಈ ಮದಿಮೆ ಆಯೆರೆಗ್ ||
ಎಡ್ಡೆ ದಿನೊ ತೂವೊಂದುಲಾಯನ
ಮೆಗ್ಯಾಗಲ ಪೊದು ನಾಡ್ಡ್ ಒಟ್ಟಿಗೆ
ಗಡ್ಡಡೇ ಮಲ್ಪಾವೆ ಪಂಡ್‌ದ್ ತೇರ್‌ನೇರೊಂಡೆ ||

8

ಅರಮನೆಗ್ ಬತ್ತನಯೆ ಮನದನಿ
ಅರಸು ಕುಂತೀ ಬೋಜನಾಡೆಗ್
ಜನೊನು ಕಡಪುಡುದಾಯನೇ ಬರ್ಪಾಯೆ ತನ್ನಡೆಗ್ ||
ಯದುಕುಲೊತ ಪೊಣ್ಣೊರ್ತಿನೀಯೇ
ಅರಮನೆಡ್ ಸಾಂಕೊಂದು ಉಲ್ಲಗೆ
ಮದಿಮೆ ಮಲ್ಪದ್ ಕೊರ್ಪನಯ ಈ ಪಾಂಡು ಬೂಪತಿಗ್

9

ಈತ್ ಪಂಡ್‌ನ ಕೇನ್ದ ಕುಂತೀ-
ಬೋಜೆ ತನ್ನನ್ ತಾನ್ ಮರತ್‌ದ್
ಈರೆ ಪೊದು ಆಪುನವೆ ಬಾಗೊನೆ ಎಂಕ್ ಆಂಡತ್ತೊ ||
ಯಾನ್ ಸಾಂಕ್‌ನ ಬಾಲೆ ಕುಂತಿಯೆ
ಆಲೆಡನೆ ಈ ಅರಮನೆದ ಸಿರಿ-
ದೀಪೊ ಬೆಳಗಲೆ ಪನ್ದ ಬೀಸ್ಮಗ್ ತಾನ್ ಕೈ ಮುಗಿಯೆ ||

10

ಇರ್ದೆರ್‌ಲ ನಿಚ್ಚೆಯೊದ ಬೂಳ್ಳೊನು
ಪಟ್ಟೊನುಂದಾನಗನೆ ಬೀಸ್ಮೆನೆ
ಎಡ್ಡೆ ಮೂರ್ತೊನು ತೂದು ತೆರಿಪವೆ ಪಂಡೆ ಪೊದ್ವಡನೆ ||
ಅಲ್ಪಡ್‌ದ್ ಆ ಕುಂತಿ ಬೋಜೆನೆ
ತನ್ನ ಅರಮನೆಗೆತ್ತೆ ಕುಂತಿಗ್
ನಿಚ್ಚೆಯೊದ ಸಿರಿ ಬೂಳ್ಳೊ ತೋಜದ್ ಸುದ್ದಿ ತೆರಿಪಾಯೆ ||

11

ಜಾನ್ನವಿನ ಮಗೆ ದೌಮೈರೆನ್ ತ-
ಪಾರ್‌ದ್ ಮದಿಮೆಗ್ ದಿನೊನು ಕೇಂಡ್‌ದ್
ಮೂರ್ತೊಗೇ ಸರಿಯಾದ್ ಬರೈರೆ ಪೊದ್ವೆರಿಪ್ಪೆರೆಗ್ ||
ಓಲೆನುಡಿಗಿರೆ ಕೊರ್ದು ಕಡಪುಡಿ
ಸೇವಕೆರ್ ಪಿರ ಬತ್ತಿ ಸಾತ್‌ಗ್
ಚಾವಡಿಡ್ ಮಂತ್ರಿಲೆಗ್ ತೆರಿಪಯೆ ಮದಿಮೆದಟ್ಟನೆನ್ ||

12

ಅರಮನೆದ ಜಾಲ್ಲೆದುರು ದೊಂಪೊನು
ತಗಡ್ ಮುಚ್ಚದ್ ಪೊರ್ಲು ರಂಗನ್
ಕೊರುದು ಉಂತಯಿ ಸಾರ ಕಮ್ಮೊಲೆ ಚಿತ್ತೊ ಕಮನುಗುಳು ||
ನೆಲಕ್ ಕುಂಕುಮೊ ಬಿರ್ಕ್ಕದರೆಪದ್
ಅರಸುಲೆಗ್ ಸಾಮಂತೆರೆಗ್ ಸರಿ
ಸರಿಟ್ ಕುಲೈರೆ ಪೀಟೊ ದೀಡೈರ್ ಲಚ್ಚೊದಂದಾಜಿ ||

13

ರಾಣಿನಕ್‌ಲೆಗ್ ಸೇನೆದೊಡಕರ-
ನಾಕ್‌ಲೆಗ್ ಪ್ರಜೆಕುಲೆಗ್ ಬೇತೆನೆ
ಜಾಗೆ ದೊಂಪೊಡು ಪೊರ್ಲು ಮಲ್ತೆರ್ ಕುಲ್ದ ತೂಯೆರೆಗ್
ವಾದ್ಯೊದಾಕ್‌ಲ್ ಕೊಂಬುನುರಿಪುನ
ಮೇಳೊದಾಕ್‌ಲ್ ಮಾತ ಕುಲೈರೆ
ಬೇತೆ ಜಾಗೆನೆ ಮಂಟಪೊದ ಸರಿ ಬಲತ ಬರಿಟೊಲೆ ||

14

ರಡ್ಡ್ ದಿಬ್ಬಣೊದಕ್‌ಲೆಗುಂತೈರೆ
ಪೊರ್ಲು ಮಂದಿರೊ ಬೇತೆ ಬೇತೆನೆ
ಅಟ್ಟಿಯೊಣಸಗ್ ಪಿದಯಿ ಸುತ್ತೊಡು ಮಾಡ್ ಕಟ್ಟಿಯೆರ್
ಮಿತ್ತ್ ದೊಂಪೊಡು ತಿಕ್ಕದಿತ್ತನ
ಪನ್ನಿರ್‌ದ ಪನಿ ಸುತ್ತು ರಟ್ಟವಿ
ಮಲ್ಲ ಯಂತರ ನಡಪವೆರ್ ಸರಿ ತಂತೊಗಾರೆರ್‌ಲ ||

15

ರಾಜ ರಾಜೆರೆ ತೇರ್ ಕೊಟ್ಟುಲು
ಆನೆ ಕುದುರೆಲೆಗಾಂಡ್ ಲಾಯೊನೆ
ದಾರೆ ಮಯ್ಪುನ ಮಂಟಪೊನು ಸರಿ ಮುತ್ತು ರತ್ನೊಲೆನ
ಜಾಲಿ ಚೌರಿಡ್ ಪುರ್ಪ ಚೋರ್ಣೊಡು
ಮೇಲ್ಡೆತ್ತರೊ ಮಲ್ತಿ ಜಾಗೆಡ್
ಚೋಡಿತ್‌ದ್ ದೀಡ್ಡನೆನ್ ತೂನಗ ಆವು ಬೆಕ್ಕಸೊನೆ ||

16

ಮದಿಮೆಗೇ ದುಂಬ್ಬಾನಿ ದಿಬ್ಬಣೊ
ಪೊರುಲುಡೆತ್ತನ ತೂದ್ ಬೀಸ್ಮೆನೆ
ಎದುರುಗಂಸನಿ ಮಲ್ತೆ ಬಂದುಲೆನೊಟ್ಟು ಸೇರ್ದಾದ್ ||
ಮದಿಮಲಲ್ಲೆನ್ ರೇಂಚಿಡ್‌ದ್ ಜಪು-
ಡಯೆರ್ ಪೊಂಚೊವು ಪತ್ಯೆರಾರತಿ
ಉಳಯಿ ಪೊಗ್ಗನಗಾಂಡ್ ವಾದ್ಯೊದ ಸೊರೊತ ಸಂಗೀತೊ ||

17

ಆನಿದಾ ಮನದಾನಿ ದೌಮ್ಯೆರ್
ಕಾಂಡೆ ಗಣಪತಿ ಹವನೊ ಮಲ್ತೆರ್
ಮುರ್ತೊಗೇ ಸರಿಯಾದ್ ಮದಿಮಯೆ ಮದಿಮಲಲ್ಲೆನ್‌ಲ ||
ಹೋಮೊ ಕುಂಡೊದ ಎದುರು ಕುಲ್ಲದ್
ನೀರ್ ತಲಿತೆರ್ ಮಂತ್ರೊ ಪಂಡ್‌ದ್
ಮಾಲೆ ಪಾಡ್ವಿ ಲಾಜ ಹೋಮೊನು ಆರ್ ತೀರ್ದಯೆರ್ ||

18

ಚೋಡಿಲೆನ್ ಎದುರೆದುರು ಉಂತದ್
ಮೋನೆದಡ್ಡೊಗು ಒಂಜಿ ಕುಂಟುನು
ಬ್ರಾಣೆರಿರ್ದೆರ್ ಪತ್ತಾದುಂತನಗಪಗ ದೌಮ್ಯರುಸಿ ||
ಮಾಲೆ ಪಾಡ್ವಯೆರೆಕೆಲೆಡನೆ ಸರಿ-
ಯಾದ್ ಸಾಸ್ತೊದ ವಿಡಿಟ್ ದೇವೆರೆ
ಸ್ಲೋಕೊ ಪಂಡ್‌ದ್ ಬಗ್ಗಿ ಬಾವೊಡು ಮಂತ್ರೊದರಿ ಪಾಡ್ಡ್||

19

ಹೋಮೊ ಕುಂಡೊಡು ಅಗ್ಗಿ ಪೊತ್ತದ್
ಮೂಲೊ ಮಂತ್ರೊನು ಜಪಿತ್‌ದಾರೇ
ಚೋಡಿಲೆನ್ ಅಪ್ಪೆಮ್ಮನಕೆಲೆನ್ ಎದುರು ಉಂತಾದ್ ||
ಸಾಸ್ತೊಡಿತ್ತನ ವಿಡಿ ವಿದಾನೊಡು
ದಾರೆ ಮಯ್ಪುನ ಕಲಸೊನುಲ ಮದಿ-
ಮಾಯ ಮದಿಮಲೆ ಕೃತ ಮೇಲ್ಡ್ ದೀಡ್ಡ್ ಮಯ್ಪುಯೆರ್ ||

20

ಏಳ್ ಪಜ್ಜೆನ್ ನಡಪದಕೆಲೆನ್
ಹೋಮೊದೆದುರುಡು ಉಂತಯೆರ್ ಸರಿ
ವೇದೊ ಮಂತ್ರೊಡು ಅಗ್ಗಿ ಸಾಕಿನ್ ದೀಡ್ಡ್ ಮದಿಮಯಡ ||
ತಾನ್ ಧರ್ಮೊಡು ಅರ್ತೊ ಕಾಮೊಡು
ಏಪೊಲಾ ಅತಿಕ್ರಮೊನು ಮಲ್ಪಯೆ
ನೇಕ್ ಸಾಕ್ಷಿಯೇ ಅಗ್ಗಿ ಪಂಡ್‌ದ್ ಬೂಮಿ ಮುಟ್ಟಯೆರ್ ||

21

ಪೊಣ್ಣುಲಾರತಿ ಕೊರ್ದು ಉಲಯಿಡ್
ಕುಲ್ಲದಕೆಲೆಗ್ ಪೇರ್ ಕೊರ್ದೆರ್
ಸತ್ಯವತಿನವೆ ಬುಕ್ಕೊ ಬೀಸ್ಮೆನ ಕಾರ್ ಪತ್ತಯೆರ್ ||
ಬತ್ತನಾಕಲ್ ಮಾತ ಅಗತೆರ್
ಬಲ್ಮಣೊದ ಒಣಸಾದ್ ಬ್ರಾಣೆರ್
ದಚ್ಚಿಣೆನ್ ಕೈದಿಂಜ ಪತೊನುದು ಪೋಯೆರಲ್ಪಡ್‌ದ್ ||

22

ಕುರುಡಗೇ ಕಣ್ಣಾದ್ ಕಂಡನಿ
ಉಣುಪಿ ಸಮಯೊಡು ಅಪ್ಪೆನಂಚಿನೆ
ಕರಣೊ ಕಾರ್ಯೊಡು ಮಂತ್ರಿ ಸೇವೆಡ್ ಚಾಕ್ರಿದಾಲೆ ನಿಜೊ ||
ಮದನ ಗೊಬ್ಬುಡು ಇರ್ಲ್ ಬೊಡಿಪವಿ
ಬುಡೆದಿ ಕುರುಡನ ಬಾಗ್ಯೊದೇವತೆ
ಪರಮ ಪತಿರುತೆ ಸುಬಲರಾಜನ ಮಗಲ್ ಗಾಂಧಾರಿ ||

23

ಕುಂತಿ ಪಟ್ಟೊದ ರಾಣಿಯಾಂಡಲ
ಸೊಂತೊ ಸುಕೊ ಗೆರೆಪಂದೆ ಕುಟುಮೊದ
ದುಂಬುದಾಕೆಲೆ ಪುದರ್‌ನೊರಿಪೆರೆ ರಾಜಕಾರಣೊಡು ||
ಕಂಡನಿಯನವೆ ಬಲತ ಕೈ ನಿಜೊ
ದಂಡೊ ಯಾತ್ರೆಗ್ ಪಿದಡ್‌ನಾಯನ್
ಉಂತವಂದೆನೆ ಆಲ್ ಗೆಲುವುದ ಮಾಲೆ ಪಾಡಿಯಲ್ ||

24

ನಾಲ್ ರಂಗೊದ ಸೇನೆ ಕೂಡ್ಡದ್
ರಾಜ ರಾಜೆರೆ ಗರ್ವೊನುಂತದ್
ಕಾಣಿಗಿನ್ ತುಂಬಾವೆನಕೆಲೆನ ತರೆಟಿ ಪನ್ನುನವೆ ||
ಸಾರ್‌ನಾ ಡಂಗುರೊನು ಕೇಂಡೆದೆ
ಏರ್‌ಲಾ ಎದುರುಂತುಚೆರ್ ನಿಜೊ
ಮಾದ್ರ ದೇಸೊದ ಸಲ್ಯೆ ಮೆಗಿದಿನ್ ಕೊರ್ದು ಕೈ ಮುಗಿಯೆ ||

25

ಮಾದ್ರಿ ದೇವಿನ್ ಮದಿಮೆ ಆದೇ
ಊರುಗತ್ತನ ಪಾಂಡು ರಾಜನ್
ತೂದು ಕುಂತಿಯೆ ಕೊರೈಲಾರತಿ ತನ್ನ ಮದಿಮೆಯಗ್ ||
ಈಶ್ ಪೊರ್ದುದ ಪೊಣ್ಣು ಎನ್ನವೆ
ಪ್ರೀತಿದಾ ತಂಗಡಿಯೆ ಪಂಡ್‌ದ್
ರಾಣಿವಾಸೊಡು ಉಲಯಿ ಕುಲ್ಲದ್ ಪೇರ್ ಪರ್ದಯಲ್ ||

26

ಬುಡೆದಿನಕ್‌ಲಿರ್ದೆರೆನ ಸೇವೆಡ್
ಅರಸು ಸುಕೊ ಸಂತೋಸುಡಿತ್ತದ್
ಗಜನಗರೊಡಾಡಳ್ಳಿ ಪೊರ್ದುಡೆ ಮಲ್ತದಾನಗನೆ ||
ಅರಸುನಾಕ್‌ಲ್ ಕಪ್ಪೊ ಕಾಣಿಗೆ
ಕೊರುದು ನಿಜೊ ಸಾಮಂತರಾಯೆರ್
ಒರಿನಕ್‌ಲ್ ಏರುಂಡು ಎದುರುಗು ಬರ್ಪುನಕ್‌ಲಿತ್ತೆ ||

ಪಾಂಡುಗು ಮುನಿ ಸಾಪೊ

ಕುರುಡೆನಾ ದ್ರತರಾಸ್ತೆ ಬುಡೆದಿನ
ಸುಕೊಟು ದಿನೊ ನೂಕನಗ ಆಯಗ್
ಕುರುಕುಲೊಕು ಸಂತಾನೊ ತನ್ನವೆ ಆವೊಡುಂದೆನ್ನಿ ||
ಕೊಡಿಟ್ ವೇದವ್ಯಾಸೆರೆನ ಪ್ರಾ-
ರ್ತನೆನ್ ಮಲ್ಪುನ ಮಗನ ಕೈತಡೆ
ತೆರಿದ್ ಬತ್ತೆರ್ ಹಸ್ತಿನಾವತಿದರಮನೆದ ಉಲಯಿ ||

1

ಅರ್ ಬತ್ತನ ಸುದ್ದಿ ಕೇಂಡ್‌ದ್
ಕಾರ್ ಪತ್ಯೆರೆ ಬುಡೆದಿನೊಟ್ಟುಗು
ಸೀದ ಬತ್ತದ್ ಪರಡ್ ಪರಡ್‌ದ್ ಕಾರ್ಗ್ ಪುಡ್ಯಾಡ್ಯೆ ||
ದಾನೆ ಮಗ ಈ ನೆನತನೆನ್ನನ್
ಬೇಕೊ ಪನ್ ಪನ್ ಪನ್ನಗಾಯೆನೆ
ಯಾನೆ ಸಂತಾನೊದವೆ ಆಸೆಡ್ ನೆನೆತೆ ಪಂಡೊಂಡೆ ||

2

ನಿಕ್ಕ ಜೋಕುಲು ನೂದು ಆಪುನ
ಮಲ್ಲ ಯೋಗೊನೆ ಉಂಡು ಪಂಡ್‌ದ್
ಅಲ್ಪನೇ ಗಾಂದಾರಿ ಇತ್ತನ ತೂದುಲಾ ಮಯಿಮೆ ||
ತನ್ನ ಕೈಟೇ ಮಂತ್ರೊ ಪಿಂಡೊನು

ಕೊರ್ದು ಪಂಡರ್ ನೇನ್ ನಿಂಗ್‌ಲ
ಗರ್ದೊ ಉಂತುದು ಈಯೆ ಪೆದ್ದುವ ಪನ್ದ ಪೋಯೆರ್‌ಲ ||

3

ಪಾಂಡು ರಾಜೆನೆ ಸಿಮ್ಮೊ ಪೀಟೊಡು
ರಾಜ ಚಾವಡಿಡುಪ್ಪಿ ಸಮಯೊನು
ಕಾತೊನುಂದೇ ಊರುದಾಕ್‌ಲ್ ಅಡ್ಡೊ ಬೂರಿಯೆರ್ ||
ಕಾಡ ಮುರ್ದೊಲು ಊರು ಜತ್ತದ್
ನಾಸೊ ಮಲ್ತೊನೆ ಬುಳೆನ್ ಅರಸುಲೆ
ಈರ್ ಬೋಂಟೆಗ್ ಬತ್ತದೆಂಕ್ಲೆನ್ ಕಾಪೊಡಿತ್ತೆಂದ್ ||

4

ಬುಲ್ಪುನಾ ಬೆನ್ಯಾಲನಕ್‌ಲೆನ
ಕಸ್ತೊಲೆನ್ ತೆರಿಯೊಂದು ರಾಜೆನೆ
ಬರ್ದೆ ಬೋಂಟೆಗ್ ಪನ್ದ ಕಡಪುಡುದಾದ್ ಮಂತ್ರಿಲೆಡ ||
ಎಲ್ಲೆ ಬೋಂಟೆಗ್ ಪೋಪುನಟ್ಟನೆ
ಮಲ್ಪುವೊಡು ನಿಕ್‌ಲ್‌ಂದ್ ಅಪ್ಪಣೆ
ಕೊರ್ದು ಸಾತ್‌ಗ್ ಬೋಂಟೆದಕ್‌ಲೆಗ್ ಮಾತ ತೆರಿಪಯೆರ್ ||

5

ಬಿಲ್ಲ್ ಬಾಣೊಡು ಕತ್ತಿ ದೊಣ್ಣೆಡ್
ಬತ್ತೆರೇತ್‌ಲ ಬೋಂಟೆಗಾರೆರ್
ತನ್ನ ಕುದುರೆನ್ ಏರ್ಡ್ ಪಿದಡಿಯೆ ಪಾಂಡು ಮಾರಾಜೆ ||
ಮಲ್ಲ ಗೌಜಿಡೆ ಪೋಪುನಕ್‌ಲೆಗ್
ತಿಕ್ಕನಪಸುಕುನೊಲೆನ್ ತೂದುಲ
ಗಣ್ಯೊ ಆಯಿಜಿ ಬರೊಟು ಎತ್ತೆರ್ ಕಾಡ್ಡ ನಡು ನಡುಕು ||

6

ಪಿಲಿಕುಲೆನ್ ಪಂಜಿಲೆನ್ ಕೆರೈರ್
ಕರಡಿ ಸಿಮ್ಮೊಲೆ ಮಗ್ಗ ಪಾಡೈರ್
ಉರೆ ಬರಿಂಕಲೆ ಬುಡುದು ಆನೆಲೆನಕ್‌ಲ್ ಜೆಪುಡಯೆರ್ ||
ಪಿಲಿತ ಚರ್ಮೊನು ಪಂಜಿದುಬ್ಬೊನು
ಕಡಮ ಚೋಲಿನ್ ಆನೆದಾಡೆನ್
ಸಯಿತಿ ಜಿಂಕೆಲೆ ಕಬರ್ ಕೊಂಬುನು ಮಾತ ಕಟ್ಟಿಯೆರ್ ||

7

ಮಾಸೊ ತಿನ್ನುನ ಆಸೆದಾಕ್‌ಲ್
ದಾಯೊ ದಾಯೊನು ಕೊಡ್ ಕಟ್ಟೆರ್
ಆತ್ ಪೊರ್ದುಗು ಒಂಜಿ ಕೊಂಬುದ ಜಿಂಕೆ ಪಾರೊಂದು ||
ನಾಲ್ ಕಾರ್ಡ್ ಗುತ್ತು ದೆಪ್ಪುನ

ತೂದು ರಾಜೆನೆ ಕುದುರೆನೇರ್‌ದ್
ಪಾರುನೆತ ಬೆರಿ ಪತ್ತೆದತ್ತೆನೆ ಮಲ್ಲ ಕಾಡ್ತಲಯಿ ||

8

ದೂರೊಡುದು ತೂನಗನೆ ಕಾಡ್‌ಡ್
ಜೋಡಿ ಜಿಂಕೆಲು ಮೊಳೊಡಿತ್ತೊನೆ
ಬಾಣೊ ಒಂಜೇ ಅವೆಕ್ ಬುಡಿಯೆಡ ರಡ್ಡ್ ತಿಕ್ಕುಂದು ||
ಆಸೆಡಾಯೆನೆ ಪಗರಿ ರಟ್ಟಯಿ
ಸಾತ್‌ಗೇ ಅಯ್ಯಯ್ಯ ಪಂಡ್‌ದ್
ಏರೊ ಬುಲ್ಪುನ ಸೊರೊನು ಕೇಂಡ್‌ದ್ ಪಾರೈನಾಡೆಗೆನೆ ||

9

ಅಲ್ಪ ತೂನಗ ಎಂಚಿನಾಚಿರೊ
ರಡ್ಡ್ ರುಸಿ ದಂಪತಿಲು ಬೂರುದು
ಕೆರಿ ಪಾಡ್ಡಾನ ಬೊಂಡೊದಂಚಿನೆ ನೆಲಟ್ ಪುಡೆರುವೆರ್ ||
ಪೊಗ್ಗದ್‌ನ ಬಾಣೊಂಜಿ ಆಣನ
ಮಿತ್ತ್ ಬೆರಿತವೆ ಮೇಲ್ದ ನೂರುದು
ಪೊಣ್ಣಿನಾ ಕಿರಿಬಂಜಿಗತ್ತನ ತೂದು ಮಾರಾಜೆ ||

10

ಬಿರುನು ದಕ್ಕದ್ ಪೋದು ಕೈತಡೆ
ಪಗರಿ ನೂರ್ದಾನೆನ್ಯೊತ್ತ ದೆಪ್ಪನ-
ಗಪಗ ಮೋನೆಗ್ ರಟ್ಟ ನೆತ್ತೆರ್‌ನಾಯೆನುದೊಂದು ||
ರುಸಿಕುಲಾದೀ ಪಗೆಲ್ ಕಾಡ್‌ಡ್
ಸೊರುಕುದೆನ್ನನ್ ಪಾಪೊ ಮಲ್ಪಯಿ
ದುರುಳೆರ್‌ಂದ್‌ದ್ ನೆರ್ದುನೆಂಚನೊ ನಿಕ್‌ಲ್ ತಪಸಿಗುಳು ||

11

ದುಸ್ಸ ಈಯೇ ಹಾಕ್‌ದಂಕ್ಲೆನ
ಅನ್ಯೊನು ಪನ್ನನಯ ಎಂಕುಲು
ಸೈಪ್ಪುನಾಕ್‌ಲ್ ಏಪೊಗಾಂಡಲ ಇತ್ತೆ ಸೈಪ್ಪನೆಟ್ ||
ಇದ್ದಿ ಚಿಂತೆನೆ ಎಂಕ್ಲ ದಂಪತಿ-
ಲೊಟ್ಟು ಸೈರೊದ ಸುಕೊನು ಪಡೆನಗ
ಕೆರೈರೆಂದ್‌ದ್ ಬಾಣೊ ಬುಡಿಯನೆ ಮೂರ್ಕ ಕೇನಿಂಚಿ ||

12

ಈಯೆ ನಿನ್ನಾ ಬುಡೆದಿನೊಟ್ಟುಗು
ಸೇರಿಯಡ ಸೈಲಂದ್ ರುಸಿಕುಲು
ಸಾಪೊ ಕೊರ್ದೇ ಕಣ್ಣ ಮುಚ್ಚೆರ್ ಪಾಂಡುಗಾಂಡಪಗ ||
ಜೀವನೊಡೆ ಸೋಲೊಂಜಿ ಆಂಡಲ

ಕಾಡ್‌ಡಕ್‌ಲೆನ ಪುಣೊನು ಪೊತ್ತದ್
ಮೀಯೊನುಂದೇ ಬತ್ತೆನರಮನೆದುಲಯಿ ಬೇಜರೊಡು ||

13

ಬುಡೆದಿನಾಕ್‌ಲ್ ಕಂಡನೀಯನ
ಎತೆನ್ ಕೇಂಡ್‌ದ್ ದುಕ್ಕೊ ಮಲ್ತೆರ್
ಕಡೆಕ್ ಕುಂತಿಯೆ ದೈರೊ ಪಂಡಲ್ ತನ್ನ ಸ್ವಾಮಿಡನೆ ||
ತೆರಿದ್ ಮಲ್ತನ ಪಾಪೊ ಅತ್ತಾಯೆ
ಪರಿಯರೊಗು ಸಾದಿಂಡೊ ಪಂಡ್‌ದ್
ಹಿರಿಯರೆಡ ಕೇನ್ನೊಂದು ಬೀಸ್ಮಡ ಪಂಡೆರೀ ಸುದ್ದಿ ||

14

ಪಾಪೊಲೆನ್ ಪರಿಯಾರೊ ಮಲ್ಪುನ
ಯಾಗೊ ಯಜ್ಞೊಲು ಉಲ್ಲೊ ಈ ನನ
ಬೇಜರೊನು ಬುಡು ಯಾನೆ ಮಲ್ಪವೆ ನೇಕ್ ಆಪುನೆನ್ ||
ಆಂಡಲಾ ಈ ಪಾಂಡು ರಾಜಗ್
ದಾಲ ಬತ್ತೆಜಿ ದೈರೊ ಮನಸ್‌ಗ್
ತಾನ್ ಪಾತಕಿ ಆಯೆ ಪನ್ನುನ ಚಿಂತೆ ಜೋರಾಂಡ್ ||

15

ತಪಸ್ ಮಲ್ತದ್ ಮಲ್ತಿ ಪಾಪೊನು
ಕಳೆವೆ ಪಂಡ್‌ದ್ ಕಾಡ್ಗ್ ಪಿದಡಿಯೆ
ಮನಸ್ ಗಟ್ಟಿಡ್ ರಾಜ್ಯೊದಾಸೆನ್ ಬುಡುದು ಮಹರಾಜೆ ||
ಅರಸು ಮುದ್ದೆದ ಉಂಗಿಲೊನು ತನ
ಪಲಯೆ ದ್ರತರಾಸ್ತ್ರನವೆ ಬಿರೆಲ್‌ಗ್
ಸುರಿದ್ ಪಂಡೆನೆ ತಾನ್ ಪಿದಡ್‌ನ ಪೂರ್ತಿ ಸಂಗತಿನ್ ||

16

ಕುರುಡೆ ಕಣ್ಣೆಡೆ ನೀರ್ ಜಪುಡಯೆ
ಬುಡೆದಿನಾಕ್‌ಲ್ ಬುಲೆರೆತಲ
ವಿದುರ ಸಂಜಯನಕ್‌ಲ್ ಪಂಡೆರ್ ಬೊಡ್ಡಿ ಬೊಡ್ಡಿಂದ್ ||
ಪೆದ್‌ನ ಅಪ್ಪೆನೆ ಪಂಡಲೇತಲ
ತೆರಿದ್ ಅಜ್ಜಿನ ಬುಲ್ಪುಗಾಂಡಲ
ಮನಸ್ ಪಿರ ಮುಕೊ ಮಲ್ತೆನೆ ಹಟೊಮಾರಿಯಾವೊಂದು

17

ತನ್ನ ಚಲೊಕುಲ ಸಾಣೆ ತರೆಕ್‌ಲ
ಮರ್ದ್ ಓಲುಂಡುಂದು ಬೀಸ್ಮೆನೆ
ಒಪ್ಪಿಗನ್ ಕೊರ್ನಗನೆ ಕಾರ್‌ಗ್ ಅಡ್ಡೊ ಬೂರೊಂಡೆ ||
ತನ್ನ ಸೊಂತೊದ ಬದ್‌ಕ್ ಮಾತೆನ್

ಅಲ್ಪದಾ ಬಡವೆರೆಗ್ ದಾನೊನು
ಕೊರ್ದು ಪಿದಡ್‌ನಗಾಯ ಕಣ್ಣೆಡೆ ನೀರ್ ಅರಿದಾಂಡ್ ||

18

ಪೋಪುನಾಯನ ಬೆರಿನ್ ತೂದ್‌ಲ
ರಾಣಿವಾಸೊಡು ಬುಡೆದಿನಾಕ್‌ಲ್
ಬೋದೊ ತತ್ತದ್ ಬೂರೈರಪಗನೆ ಅಪ್ಪೆನಕ್‌ಲೊಟ್ಟು ||
ರಾಜ್ಯೊದಾ ಪರಿವಾರೊ ಪ್ರಜೆಕುಲು
ಮಾತ ಮಂತ್ರಿಲು ಸೇನೆದೊಡಕರ -
ನಾಕ್‌ಲೆಗ್ ಸಮದಾನೊ ಪಂಡ್‌ದ್ ಅರಸು ದುಂಬೊತ್ಯೆ ||

19

ನಡತ್ ನಡತ್‌ದ್ ಎತ್ಯೆ ಗಂಗೆದ
ಬರಿತ ಓಡೊದ ಕಡಪುದಾಡೆಗ್
ಸುದೆನ್ ಕಡಪಯೆರೋಡದಾಕ್‌ಲ್ ಜತ್ತೆನಾಯೆರೆಡ್ ||
ತೆರಿನ ಸಾದಿಡೆ ಗುಡ್ಡೆ ಮಿತರ್‌ದ್
ಸಿಮೊತ ಪರ್ವತೊಲಿತ್ತಿ ಜಾಗೆಡ್
ಮುನಿಕುಲೆನ ಆಸ್ತಮೊನು ನಾಡೊಂದಾಯೆ ತಿರ್ಗಿಯೆನೆ ||

20

ಅಲ್ಪನೇ ಸತಸ್ತ್ರಂಗ್ ಪರ್ವತೊ-
ಡಿತ್ತನಾಸ್ತಮೊ ತೂದ್‌ಲಾಡೆಗ್
ಎತ್ತದಾನಗ ಕಾರ್ ಬಚ್ಚಿದ್ ಕುಲ್ಲದಿತ್ತನಯೆ ||
ಸುತ್ತ ತೂನಗ ಮುರೊ ಪಕ್ಕಿಲು
ತಿರುವೊನೆ ಒಟ್ಟೊಟ್ಟು ಜಾತಿಡ್
ಇತ್ತಿ ಪಗೆನ್‌ಲ ಬುಡುದು ಪ್ರೀತಿಡ್ ಆ ವಟಾರೊಡೆನೆ ||

21

ಕುಲ್ಲಿ ರಾಜನ್ ತೂದ್ ರುಸಿಕುಲು
ಒಲ್ಲು ಬತ್ತನೆ ಓಡೆ ಪೋಪುನೆ
ಮುಲ್ಪ ಕುಲ್ಲನೆ ದಾಯೆ ಪಂಡ್‌ದ್ ಕೇನ್ನಗೊರಿಯೊರಿಯೆ ||
ಹಸ್ತಿನಾವತಿದರಸು ಯಾನೇ
ಎನ್ನ ಕೊಲೆ ಪಾತಕೊನು ಕಳೆಯೆರೆ
ಮುಲ್ಪ ತಪಸ್‌ನ್ ಮಲ್ತದಾಂಡಲ ಸಾದಿ ಉಂಡೊಂದು ||

22

ರಾಜದಾನಿನ್ ಬುಡುದು ಬತ್ತನೆ
ಈಡೆಗೆನಿನಿ ಎಂಕ್ ನಿಕ್‌ಲೆನ
ಅಸ್ತಮೊಡು ಕಲ್ಪವರೊ ತಪಸ್‌ನ್ ಮಲ್ಪುನೆಂಚಂದ್ ||

ಈತ್ ಪನ್ನುನ ಕೇನ್ದ ರುಸಿಕುಲು
ಆಚಿರೊಡು ಆ ಪಾಂಡು ರಾಜನ್
ಪ್ರೀತಿಡಾಸ್ತಮೊದುಲಯಿ ಕುಲ್ಲದ್ ಮಲ್ತೆರುಪಚಾರೊ ||

23

ಆಯಗೇ ಅಸ್ತಾಂಗ ಯೋಗೊದ
ಸಾದನೆನ್ ಕಲ್ಪದ್ ತಪಸ್‌ದ
ಮೂಲೊ ಮಂತ್ರೊನು ತೆರಿಪದಾನಗ ಪೂರ ಕಲ್ತೊಂಡೆ ||
ಆಸ್ತಮೊಡು ರುಸಿಕುಲೆನ ಸೇವೆಡ್
ತಾನ್ ಯೋಗೊದ ಸಿದ್ಧಿಗಾದೇ
ಬಾರಿ ಬಗ್ಗಿಡ್ ಇತ್ತನಯೆ ಸಂಸಾರೊ ಸುಕೊ ಮರತೆ ||

24

ಅರಮನೆಡ್ ಆ ಕುಂತಿ ಮಾದ್ರಿಲು
ನೆನೆತ್‌ದರಸುನ ಗುಣೊನು ದಿನೊ ದಿನೊ
ಮರುಗುವೆರ್ ಬುಲ್ಪುವೆರ್ ಉನ್ನುನ ತಿನ್ನುನೆನ್ ಬುಡುದು ||
ರುಸಿನ ಮಂತ್ರೊದ ಪಿಂಡೊ ನಿಂಗ್‌ನ
ಕುರುಡ ಬುಡೆದಿಗ್ ಗರ್ಬೊ ಉಂತುದು
ಬಯಕೆ ಸಂಕಡೊ ಆನಗಾಲೆಗ್‌ಲಾಂಡ್ ಸಂತೋಸು ||

ಕುಂತಿ ಮಾದ್ರಿಲು ಪಾಂಡುನೊಟ್ಟುಗು ಸೇರೈರ್

ಯೋಗೊ ಸಿದ್ಧಿಯೆ ಆಂಡ್ ಪಾಂಡುಗು
ಜೀವನೊಡೆ ನಿಜೊ ಯೋಗಿಲೆನ ಲೆಕೊ
ಆದ್ ರುಸಿಕುಲೆ ಒಟ್ಟು ಸೇರ್‌ದ್ ಮಲ್ತೆ ಸಾದನೆನ್ ||
ನಾರ್ ಮಡಿ ತುತ್ತೊಂದು ಕುಜಲ್‌ನ್
ಬಾರ್ಡ್ ಜಿಡೆ ಕಟ್ಟಾದ್ ಬಸ್ತೊದ
ಲೇಪನೊಡು ಏರೆಗ್‌ಲ ಅರಸುನ ಗುರೊ ತಿಕ್ಕಂದ್ ||

1

ರುಸಿಕುಲಾಯಗ್ ಬೇತೆ ಅಸ್ತಮೊ
ಮಲ್‌ತ್ ಕೊರೈರ್‌ಲಾಯೆ ಸಾದನೆ
ಅಯಿಟಿ ಮಲ್ತದ್ ನಿತ್ಯ ಕರ್ಮೊನು ಪೂರ ತೀರ್ಸಾವೆ ||
ಅರಮನೆಡ್ ಆ ಕುಂತಿ ಮಾದ್ರಿಲೆ
ಎತೆನ್ ತೂಯೆರೆ ತೀರ್ಚಿ ಬೀಸ್ಮಗ್
ನಿಕ್‌ಲೆಗೆಂಚಿನ ಆವೊಡುಂದುದು ಕೇಂಡೆ ಅಕ್‌ಲೆಡನೆ ||

2

ಕಾಡ್‌ಡೆಂಕ್ಲೆನ ಸ್ವಾಮಿ ಕಸ್ಲೊದ
ಸಾದನೆಡ್ ಉಪ್ಪುನಗ ಎಂಕುಲು
ಮೂಲು ಸುಕೊಟುಪ್ಪುನವು ಸಮೊನೋ ಪನ್ನೆ ಮಾಮಣ್ಣಿ ||
ಆರೆನಾಡೆಗ್ ಪೋದು ಎಂಕುಲು
ಸೇವೆ ಮಲ್ತಾದ್ ರುಣೊನು ಸಂದವೊ
ಪ್ರೀತಿಡೀರೇ ಕಡಪುಡೊಡ್‌ಂದ್ ಕಾರ್ ಪತ್ತಿಯೆರ್ ||

3

ನಿಕ್‌ಲ್ ಆಯನ ಮನಸ್ ತಿರ್ಗದ್
ಪೆರಪ ಗಂಡಾಂತ್ರೊಲೆನ್ ಮಲ್ಪಡೆ
ನಡತ್ ಪೋಯೆರೆ ಬಲ್ಲಿ ತೇರ್‌ಡೆ ಪೋಲೆ ಕುಲ್ಲೊಂದು ||
ಮರ್‌ಮಲಲ್ಲೆಗ್ ಆಂಡ್ ಸಂತೊಸು
ಉಲಯಿ ಪೊಗ್ಗುದು ಮಾಮಿನಕ್‌ಲೆಡ
ಪರಬು ಅಜ್ಜಿಡ ಅಕ್ಕ ಬಾವಡ ಪನ್ದ ಪಿದಡಿಯೆರ್ ||

4

ತೇರ್‌ಡೇ ಕುಲ್ಲನಗ ಬೀಸ್ಮೆನೆ
ಗಾಡಿಲೆಡ್ ಮುಡಿಯರಿನ್ ತಾರಯಿ
ಬೋಡಯಿನ ಸಾಮಾನ್ ದಿಂಜದ್ ತಯರ್‌ಡುಂತಾಯೆ ||
ಆಪಗಾಪಗ ನಿಕ್‌ಲೆ ಕರ್ಚಿಗ್
ಯಾನ್ ಕಡಪುಡುವೆಂದ್ ಅಕ್‌ಲೆನ್
ಪ್ರೀತಿಡೇ ಪೋಲೆಂದ್ ಪಂಡೆನೆ ಕಣ್ಣಾನುದೊಂದು ||

5

ಬತ್ತ ಬತ್ತದ್ ತೇರ್ ಗಾಡಿಲು
ಮಿತ್ತ ಸತಸ್ತ್ರಂಗೊಂದು ಪನ್ನುನ
ಮಲ್ಲ ಪರ್ವತೊದುಲಯಿದಾಸ್ತ್ರಪೊದಾಡೆ ಎತ್ತಿಯೊನೆ ||
ಒತ್ತು ಈ ತೇರ್‌ಗಾಡಿಲೊಟ್ಟುಗು
ಬತ್ತನೆನ್ ಪಂಡೊಂದು ರುಸಿಕುಲು
ಗುರ್ತೊ ತಿಕ್ಕಂದಕ್‌ಲೆಡನೆ ಪರಿಚಯೊನು ಕೇನೊಂದು ||

6

ರಾಜ ನಿನ್ನವೆ ಬುಡೆದಿನಾಕ್‌ಲ್
ಈಡೆ ಬತ್ತೆರ್ ಪನ್ನಿ ಸುದ್ದಿನ್
ಆಯಡನೆ ಪನ್ನಗನೆ ದ್ಯಾನೊಡು ಇತ್ತಿ ಮಾರಾಜೆ ||
ಗೇನೊ ಬತ್ತದ್ ಬತ್ತೆನಾಡೆಗ್
ಮೋನೆನಕ್‌ಲೆನ ತೂದು ಉಂತ್‌ನ-
ಗಾಯನವೆ ಗುರ್ತಾಯ್ಣಿ ಕುಂತಿಗ್ ಮಾದ್ರಿಗ್‌ಲ ನಿಜೊನೆ ||

7

ಬೆಪ್ಪು ಕಟ್ವೆದ್ ಉಂತ್‌ನಕ್‌ಲೆನ
ಗುಟ್ಟು ರುಸಿಕುಲೆಗರ್ತೊ ಆಯ್ಣಿಟ್
ಗುರ್ರೊ ತಿಕ್ಕಚೊ ನಿಕ್‌ಲೆ ಕಂಡನಿ ಪಾಂಡು ಬೂಪಾಲೆ ||
ಇತ್ತೆ ಮಹ ಸನ್ನೇಸಿ ಪನ್ನಗ
ಇರ್ವೆರ್‌ಲ ಕಾರ್‌ಗಡ್ಲೊ ಬೂರುದು
ಬುಲ್ಪುನಗ ಗಂಬೀರೊ ಮುದ್ರೆಡ್ ತೂಯೆನಾಕ್‌ಲೆನ್ ||

8

ಈರೆ ಸೇವೆಡ್ ಎಂಕ್ಲೆ ಜಲ್ಲೊದ
ಸಾರ್ತಕೊನು ಮಲ್ಪೊಂದು ಪಿದಡ್‌ದ್
ಈಡೆಗತ್ತಿಯೊ ಎಂಕ್ಲೆಗಪ್ಪಣೆ ಕೊರ್ರೆ ಉಂತೆರೆಗ್ ||
ಆ ಪತೀರುತೆ ಕುಂತಿ ಪನ್ನಗ
ಪಾಂಡು ಮನಿತ್‌ಚೆನಪಗ ಮುನಿಕುಲೆ
ಮೋನೆ ತೂನಗ ಅಕ್‌ಲ್ ಪಂಡೆರ್ ಧರ್ಮೋ ನೀತಿಲೆನ್ ||

9

ಪಾಂಡು ಕೇನ್‌ಲ ಯೋಗಿಲುಲ ಸಂ-
ಸಾರೊಡಿತ್ತಾದ್ ಬ್ರಹ್ಮಚರ್ಯೆನ್
ಪಾಲಿತ್‌ದ್ ನಿಜೊ ಮೋಕ್ಷೊ ಪಡೆವೊಲಿ ಸಾಸ್ತ್ರೊ ಸಲ್ಮತೊಡು ||
ಈ ಪತೀರುತೆನಕ್‌ಲ್ ನಿನ್ನವೆ
ಸೇವೆ ಮಲ್ಪೊಂದುಪ್ಪಡ್‌ಂದ್‌ದ್
ಆ ಮುನಿಕುಲೊಟ್ಟಾದ್ ಪನ್ನಗ ರಾಜೆನೊತ್ತೊಂಡೆ ||

10

ನಿತ್ಯೊ ಪೂಜೆಗ್ ಪುಸ್ತೊ ತೊಲಸಿನ್
ತಪ್ಪವಂದೆನೆ ಕ್ರೊದ್ ಕನಪೆರ್
ಯಚ್ಚೊಗಾಪುನ ಕನಕ್ ಪೂಲುದು ಅಟ್ಟಿ ಒಯ್ಪೆದರ್ ||
ಅರುವೆರ್ ನಾರ್‌ಡಿನ್ ಮೋಹೊಗು
ತಿಕ್ಕಯೆರ್ ದೂರೊಡ್ಲೊ ಸೇವೆನ್
ಮಲ್ಪುವೆರ್ ಕಂಡನಿಯು ಸೈರೊದ ಸುಕೊನು ಮರತೊಂದು ||

11

ಇಂಚೆನೇ ರಡ್ಡೊರ್ಸೊ ಕರಿನಗ
ಸಂತೆತಿಯೆ ತನ್‌ಕಿದ್ಯೆ ಪನ್ನುನ
ಚಿಂತೆಡೇ ಮರ್ಗಿಯಲ್ ಕುಂತಿಯೆ ಎಸನೊ ತಡೆವಂದೆ ||
ಮುನಿನ ಮಂತ್ರೊದ ಪಿಂಡೊಡ್ಲಾವರೊ
ಪೆದ್‌ದ್ ಉಪ್ಪಲ್ ಅಕ್ಕ ಆಲೆನ
ಮಗೆನೆ ಮಗನಾ ಮಗೆಲ ಕುರುಕೊಲೊದರಸುಲಾಪುನೆನೆ ||

12

ಮೂಲು ಬೆದರಿತುನ್ನು ಕಜಿಪುಗು
ಸಾರ್ ತಂಬೊಳಿ ಬದ್ಡ ಮುಸ್ತಿ ಕ
ಸಾಯೊನೇ ಗತಿ ಪನ್ದ ನೆನೆತ್‌ದ್ ಕಂಡನಿಯನೆದುರು ||
ನೀರ್ ಕಣ್ಣೆಡೆ ಜಪುಡನಗ ನಿಜೊ
ಯೋಗಿರಾಜೆನೆ ತೂದು ಕೇನುವೆ
ದಾನೆ ಬುಲ್ವುವ ಕುಂತಿ ಮನಸ್‌ಗ್ ಬೇನೆ ದಾಯ್ತಾಂಡ್ ||

13

ನಂಕ್ ಆಪುಜೆ ನನಗ್ ಜೋಕುಲು
ಎಂಕೆ ಎತೆ ಅವ್ವೆಂದ್ ಪೋಡಿಡ್
ಕಂಡನೀನಾ ಮೋನೆ ತೂಯಲ್ ದುಕ್ಕೊ ಮಲ್ತೊಂದು ||
ಕುಂತಿ ಬುಡು ಬೇಜರೊನು ಈಯೇ
ಸಂತೆತಿಗ್ ಬೋಡಾದ್ ಬುಲ್ವಡ
ಇಂಚಿನಾಪತ್ತೆಲೆಗ್ ರುಸಿಕುಲು ಸಾದಿ ಮಲ್ಪೆರಾಯೆ ||

14

ಕುಟುಮೋಡೇ ಸಂತಾನೊ ಇದ್ದಿಡ
ನನ ನಿಯೋಗೊದ ಕ್ರಮೊಟು ಜೋಕುಲೆ
ಪಡೆಪುನವು ಸಾಸ್ತೊಲೆಗ್ ಸಲ್ತೊ ಕೇನ್ ರುಸಿಕುಲೆಡ ||
ಇನಿಯೆ ಈ ಪೋದಕೆಲೆನೊಪ್ಪಿಗೆ
ಪಡೆದ್ ಸಂತತಿ ಮಲ್ತೊನುಲ ನಿನ
ಬಯಕೆ ತೀರ್ರಯೆರೆಂದ್ ಪನ್ನಗ ಪನ್ನಲಾಯಡನೆ ||

15

ಎಂಕ್ ದೂರ್ವಾಸೇರ್ ಎಲ್ಯೆಡ್
ಮಂತ್ರೊ ಕಲ್ಪದ್ ಕೊರೆರ್ಯೆನೇ
ಸಂತೆತಿಗ್ ಬೋಡಾದ್ ಜಪಿತೆಡ ಯಾನ್ ಪೆದ್ಯೆರೆಗ್ ||
ದುಂಬು ಈರೆನ ಬೋಡು ಒಪ್ಪಿಗೆ
ನಂಬುಲೆಂದ್‌ದ್ ಪನ್ನಗಾಲೆಗ್
ಸಂಬ್ರಮೊಡು ಆವುಂದು ಪಂಡೆನೆ ಯೋಗಿ ಮಾರಾಜೆ ||

16

ಕಾರ್ ಪತ್ಯಲ್ ಕಂಡನೀಯನ
ಯಾನ್ ಸಾದಿನ್ ತತ್ಯೆ ಪಂಡ್‌ದ್
ಈರ್ ಬೇಜರೊ ಬುಡ್ಲೆ ಇಂದೆಟ್ ದಾಲ ತಪ್ಪಿದ್ದಿ ||
ಯಾನ್ ಮಂತ್ರೊನು ಜಪಿತಿದೇವತೆ
ತಾನೆ ಒಲಿಯೊಂದೆಂಕ್ ಕೊಪುನೆ
ಜೋಕುಲಾಪುನ ವರೊನು ಆಣಲೆಡಿದ್ದಿ ಸಂಪಕೊರ್ ||

17

ನಿನ್ನ ಮಾನೊಗು ಊನ ಬರ್ಪುನೆ-
ನಿತ್ತೆ ತಪ್ಪವಿ ಹೊಣೆನೆ ನಿನ್ನವು
ಎನ್ನವೇ ಜವಬ್ದಾರಿ ಅತ್ತಾಯೆ ನಿಕ್ಕ ತೆರಿಯಂದೊ ||
ಪೊರು ದೆಪ್ಪುನ ಬೊಡ್ಡಿ ಬೇಕೊನೆ
ಮಲ್ತೊಡಾಯಿನ ಕ್ರಮೊನು ಮಲ್ಪುಲ
ನಿಕ್ಕ ಬೊಡ್ಲಲ್ತಾನೊ ಎನ್ನವೆ ಉಂಡು ಒಪ್ಪಿಗೆನೆ ||

ಪಾಂಡು ದ್ರತರಾಸ್ತ್ರನಕ್‌ಲೆಗ್ ಆಂಡ್ ಸಂತಾನೊ

ಕಂಡನಿಯನೊಪ್ಪಿಗೆಡ್ ಮನದನಿ
ಕುಂತಿದೇವಿಯೆ ಕಾಂಡೆ ಲಕ್ಕದ್
ಉಂಡು ಮಲ್ತನ ಬ್ರಹ್ಮದೇವಗ್ ಪರಕೆ ಪಂಡೊಂದು ||
ಬೂಮಿ ನೀರೊ ಗಾಳಿ ಬಾನೊಗು
ತಾನ್ ಕೈಮುಗಿಯೊಂದು ಪಾಂಡುನ
ಪಾದೊಗೊಂದನೆ ಮಲ್ತ್ ಪಿದಡ್‌ನಗಾಂಡ್ ಸುಬ ಸಕುನೊ ||

1

ಸುದೊ ನೀರ್‌ಡ್ ಮೀದ್‌ಲಾ ಯಮ-
ಧರ್ಮರಾಯನ್ ನೆನೆತ್‌ದಾಲೇ
ಬಗ್ಗಿ ಬಾವೊಡು ಮಂತ್ರ ಜಪಿತಲ್ ತಾನ್ ಕಲ್ತದ್‌ನ ||
ಸೊರ್ಕಿ ಗೋಣನ ಬೆರಿಟ್ ಕುಲ್ಲುದು
ಕಣ್ಣೆಗಾಂಜಿನ ರೂಪೊ ಯಮನವೆ
ಪನ್ದ ಕುಂತಿಯೆ ತರೆನ್ ತಗ್ಗಯಲಪಗ ನಾಚಿಗೇಡ್ ||

2

ದಾಯೆ ಬರ್ಪಯ ಎನನ್ ಮಂತ್ರೊಡು
ಕೇನ್ನಗನೆ ತನ್‌ಕೊಂಜಿ ಬಾಲೆನೆ
ಬೋಡು ಪಂಡ್‌ದ್ ನೆನೆತೆ ಪನ್ನಗ ತೆಲಿತ್‌ದಾ ಯಮನೆ ||
ಈಯೆ ಎನ್ನವೆ ತೇಜಿದಂಚಿನ
ಬಾಲೆ ಪೆದ್ದೆಲ ಪನ್ದಲಪಗನೆ
ಆಲೆ ಮೆಯಿ ಮುಟ್ಟೊಂದು ಪೋಯೆನೆ ಸೈಮುನೀ ಪುರೊಕು ||

3

ಗರೊ ಉಂತ್‌ಲಾಂಡ್ ಕುಂತಿಗ್
ಒಂಬೊ ತಿಂಗೊಳು ಕರಿದ್ ಪೆದ್ಲಲ್
ಪೊರ್ಲುದಾಣನ್ ಆಸ್ರಮೊಡು ರುಸಿ ಜನೊಕು ಸಂತೋಸು |
ಪುಟ್ಟಿದಿನೊ ನಚ್ಚತ್ತೊ ಮಾತೆನ್
ಲೆಕ್ಕೊಡೇ ಗುಣಿತೊಂದು ಮುನಿಕುಲು
ದರ್ಮಜೆಂದ್ ಪುದರ್ ದೀಡ್‌ದ್ ತರೆನ್ ಪೂಜಿಯೆರ್ ||

4

ಸುದ್ದಿ ಎತ್ತದ್‌ಲಾಂಡ್ ಅರಮನೆ-
ಡಿತ್ತನಾ ಗಾಂದಾರಿಗಪಗನೆ
ಎನ್ನ ಬಂಜಿಗ್ ರಡ್ಡ್ ವರ್ಸೊನೆ ಪೂರ ಕರಿದಾಂಡೆ ||
ಟಕ್ಕ ರುಸಿ ಒರಿ ಮಂತ್ರ ಪಿಂಡೊನು
ಕೊರ್ದು ಪೋಯ್ತೆ ಬಂಜಿ ಬಲತ್‌ದ್
ತಿರ್ತ ನೆಲ ತೋಜಂದೆ ಉಲ್ಲೆನೆ ದಾನೆ ಮಲ್ಪೇನ್ ||

5

ಬಾಲೆದಾಸೆಡ್ ಕುಂತಿ ಪಿದಯಿಗ್
ಬೇತೆ ಕೈ ನಡಪಯಲೊ ದಾನೆನೊ
ಆಂಡಲಾ ತಪ್ಪತ್ತ ಸಂತೆತಿದಾಸೆ ಪೊಂಜೊವೆನ ||
ಜೋಯಿಸೆರ್‌ಡ ಕೇನ್ನಗಾಕ್‌ಲ್
ಬಾಲೆ ಬಂಜಿಡ್ ಉಂಡು ಪನ್ನೆರ್
ಏಪೊ ಪೆದ್ದೆನೊ ತಾನ್ ಪನ್ನುನ ಚಿಂತೆ ಆಂಡಲೆಗ್ ||

6

ಪೊಜೆಕ್ ಪೊಜೆಕ್‌ದ್ ಬಂಜಿದುಲಯಿಡ್
ಬುಲೆಪಿ ಗರ್ಬೊನೆ ಆಂಡ್ ಪೊಡಿ ಪೊಡಿ
ಕುರುಡ ಬುಡದಿಯೆ ಪೆದ್ಲಲಪಗನೆ ಮಾಸೊ ತುಂಡುಲೆನ್ ||
ಅವೆನ್ ತೂದೇಸಿಗಡ್ ಚಾಕಿರಿ-
ದಕ್‌ಲೆಡನೆ ಕೌಂಪಿಂದ್ ಪನ್ನಗ
ಮುನಿಕುಲೆನ ಗುರು ವೇದವ್ಯಾಸೆರ್ ಬತ್ತೆರಾಡೆಗೆನೆ ||

7

ಮೂರ್ಕೆದಿಯೆ ನಿನ ಗರೊ ನಾಸೊನು
ಈಯೆ ಮಲ್ತನೆ ಪನ್ನಗಾರೆಡ
ಈರೆ ಮಂತ್ರೊದ ಪಿಂಡೊ ನಿಂಗ್‌ದ್ ಆಂಡೆ ರಡ್ಡೊಸೊರ್ ||
ಯಾನ್ ತುಂಬುನ ಪುದೆನ್ ಜಾಯೆರೆ
ಆಯಿಜಿಂದ್ ಪನ್ನಗಪಗನೆ
ಯೋಗಿಲೆನ ಮಹಮಂತ್ರೊ ಸಗ್ಗಿನ್ ಈಯೆ ತೆರಿಜತ್ತೊ ||

8

ಪಂಡ್‌ದಾರೇ ಚೆಂಬು ತೊಟ್ಟಲ್-
ದಂಚಿನಾ ಪಾತ್ರೊಲೆನ್ ತರ್ಪದ್
ಪಿಂಡೊ ಪೊಡಿಯಾಯಿನೆನ್ ದೀಡ್‌ದ್ ನೆಯಿನ್ ಮಯ್ಯೊಂದು
ಮಂತ್ರೊ ಪಂಡ್‌ದ್ ನೀರ್ ತಲಿತೆರ್
ಇಂದೆನೇ ತೂವೊಂದು ಉಪ್ಪುಲ
ಕಂಡಿತೊನೆ ಬದ್‌ಕೊನುವೊ ಪಂಡರ್ ವ್ಯಾಸ ಮುನಿರಾಯೆ ||

9

ಮೂಜಿ ತಿಂಗೊಳು ಕರಿದ್ ಕುಂತಿಯೆ
ಬಾಲೆದಾಸೆಡ್ ಮಿದ್ ಸುದ್ದೊಡು
ವಾಯದೇವನ ಮಂತ್ರೊ ಜಪಿಪುನಗಾಯೆ ಒಲಿಯೊಂದು ||
ಆಲೆನಾ ಮೆಯಿ ಮುಟ್ಟಿ ಪ್ರೀತಿಡ್
ಈಯೆ ಪೆದ್ದುವ ಆಣ್ ಬಾಲೆನ್
ಆಯನೇ ಬೀಮಂದ್ ಸಾಂಕ್‌ಲ ಬಾರಿ ಬಲೊತಯನ್ ||

10

ವರುಸೊ ಒಂಜಾನಗನೆ ಪೆದ್ಲಲ್
ಕುರುಕುಲೊತ ನಿಜೊ ಕಾಲರುದ್ವನ್
ಬಲೊತ ಬೀಮನ್ ವಾರೊದಂಗಾರೆದವೆ ದಿನತಾನಿ ||
ಇರ್‌ಲ್‌ಡಾನಿಯೆ ಕಣ್ಣ್ ಕೈಕಾ-
ರುದಿತ್‌ದಾನಗ ಹಸ್ತಿನಾವತಿ
ದರಮನೆಡ್ ಬಾಲೆದವೆ ಬುಲ್ವುನು ಕೇನ್ಡ್ ಗಾಂದಾರಿ ||

11

ತೂನಗಪಗನೆ ಪಳ್ಳು ಕುದ್ದೆರ್
ಬಾಂಗ್ ಪತ್ತೆಯೊ ಬಾನೊ ಬೈಲ್‌ಡ್
ದೂಮಕೇತುವೆ ಮೂಡ್ಡು ಬರ್ಸೊಡು ಬೊಲ್ಲೊ ಏರ್‌ದಾಂಡ್
ಬಾಲೆ ಕುಲೊ ನಾಸೊದವೆ ಪನ್ನುನ
ಕೇನ್‌ಜಲ್ ಪೆದಿಯಪ್ಪೆ , ದಿನೊ ದಿನೊ
ಜೋಕುಲೇ ಪುಟ್ತೆನವು ನೂದೆತ ಮಿತ್ತ ಒಂಜಾಂಡ್ ||

12

ನೂದು ಆಣುಲೆಗೊರ್ತಿ ಪೊಣ್ಣುಲ
ಆನಗನೆ ದ್ರತರಾಸ್ತ್ರ ಸೂಳೆಗ್
ಆಣ್ ಬಾಲೆನೆ ಆಂಡ್ ಲೆಕ್ಕೊಗು ನೂತ ಒಂಜಾದ್ ||
ಆಯಿನೊರ್ತಿಯೆ ಪೊಣ್ಣು ಪೊರ್ಲುದ
ಆಲೆಗೇ ದುಸ್ಸಲೆನೆ ಪಂಡ್‌ದ್
ಪ್ರೀತಿದಾ ಪುದರೊಂಜಿ ದೀಡ್ಲಲ್ ದೇವಿ ಗಾಂದಾರಿ ||

13

ಹಿರಿಯ ಮಗೆ ದುರ್ಯೋಧನಂದಂದ್
ಕಿರಿಯಕ್ಲ್ ದೂಸ್ಲಾಸೆ, ದುರ್ಮದ
ಕಲಿ ವಿಕರ್ಣೆನೆ ಪನ್ನುನಂಚಿನ ನೂದು ಆಣಲೆಗ್ ||
ಪುದರ್ ದೀಡ್ ದ್ ಬಾರಿ ಪೊರ್ಲುಡೆ
ಕುರುಡೆ ಸಾಂಕಯೆ ಚಾಕ್ರಿದಕ್ಲೆಡ
ಬಡವೆರೆಗ್ ಗಾಂದಾರಿ ಕೊರ್ಯಲ್ ದಾನೊ ದರ್ಮಲೆನ್ ||

14

ಪಿರಲ ಬಾಲೆದ ಆಸೆ ಕುಂತಿನ
ಮನಸ್‌ಗಾಯ್ತ್ ದೇವಲೋಕೊದ
ಅರಸು ಇಂದ್ರನ ಮಂತ್ರೊ ಜಪಿತಲ್ ಒಲಿದ್ ಬರೈರೆಗ್ ||
ಸುಮನಸೇರೆನ ಒಡೆಯೆ ಬತ್ತನೆ
ಸುರಪೆ ಕುಂತಿನ ಮೆಯಿನ್ ಮುಟ್ಟಿಯೆ
ಪೆದ್ಲ ಪೊರ್ಲುದ ಮಗನ್ ಕೀರ್ತಿದ ಮುಗುಳಿನೇರ್ವುವನ ||

15

ಆಣಲೆಡ ಆಣಂದ್ ಪನ್ನವಿ
ವೀರನೀಯೆ ಪೆದ್ದ ಪಂಡ್‌ದ್
ಮೇಲ್ ಲೋಕೊಗು ಪೋಯೆ ಕುಂತಿಗ್ ಗರ್ಬೊ ದಾನಾಂಡ್ ||
ಪೂರ್ತಿ ಬಂಜಿಗ್ ತಿಂಗೊಳಾನಗ
ವೀರತನೊ ರೂಪಾದ್ ಬತ್ತನ
ಬಾಲೆನೊಂಜೆನ್ ಸುಕೊಟು ಪೆದ್ದಲ್ ಪೊರ್ಲಕಂಟ್‌ದೆನ್ ||

16

ದೇವ ಲೋಕೊಡು ದುಂದುಬಿದ ಸೊರೊ
ದೇವತೆಲು ಲಕ್ಕಯೆರ್ ಪುರೊದ
ಬಾರಿ ಬರ್ಸೊನೆ ಬೂರ್ದು ಪ್ರಕೃತಿ ಸಂಪು ಸಂಪಾಂಡ್ ||
ಮೂಜಿ ತಿಂಗೊಳು ಕರಿನ ಸಾತ್‌ಗ್
ದೇವಕಿಗ್ ಮಗೆ ಪುಟ್ಟಿ ಮತುರೆಡ್
ರೋಹಿನೀ ನಚ್ಚತ್ತೊದಾನಿಯೆ ಕ್ರಿಷ್ಣ ಪರಮಾತ್ಮೆ ||

17

ನರೆನೆ ಅರ್ಜುನೆ ಕ್ರಿಷ್ಣೆ ನಾರಾ-
ಯಿಣೆನೆ ಪಂಡ್‌ದ್ ರುಸಿಕುಲೊಟ್ಟುಗು
ತೆರಿದ್ ಸಂತೊಸು ಪಡೆಯೆರೆತ್‌ಲ ಅಲ್ಪದಾಸ್ತಮೊಡು ||
ಅರಸು ಜೋಕುಲೆ ಗೊಬ್ಬು ಲೂಟಿನ್
ತೆಲಿಕೆ ನಲಿಕೆನ್ ತೂದ್ ತೂದೇ
ರುಸಿಕುಲೆನ ಜಪೊ ಮಲ್ಪಿ ಪೊರ್ತುಲ ಆಂಡ್ ಅಡಿಮೇಲ್ ||

18

ತನ್‌ಕ್ ಮೂಜೇ ಯಾವು ಜೋಕುಲು
ಮೆಗಿದಿ ಮಾದ್ರಿಗ್‌ಲಾವೊಡೆಂದ್‌ದ್
ಮುನಿನ ಮಂತ್ರೊನು ಕಲ್ಪಯಲ್ ಆಲೆಗ್‌ಲ ಸಂತೊಸುಡು ||
ಆ ಮಹಾರುಸಿ ಮಂತ್ರೊಲಾ ಗಿಳಿ
ಪಾಟೊ ಬಾಯಿಡ್ ಆನಗನೆ ಸರಿ
ಮಾದ್ರಿ ಸುದೊಡು ಮೀದ್ ಜಪಿತಲ್ ದೇವಲೋಕೊದವೆ ||

19

ಅಸ್ವನೀ ದೇವತೆಲೆ ಮಂತ್ರೊನು
ಬಗ್ಗಿಡಾಲೇ ಜಪಿತದಾನಗ
ಬತ್ತೆರಿರ್ಲೆ ಪೊರ್ಲುದಾಕ್‌ಲ್ ಮುಟ್ಟುದಾಲೆನ್‌ಲ ||
ನಿಕ್ಕ್ ಎಂಕ್ಲೆನ ಲೆಕೊನೆ ಬಾಲೆಲು
ಪೊರ್ಲುದಾವಡ್ ಪನ್ದ ಪೋಯೆರ್
ಮಿತ್ತ ಮಿರಿಲೋಕೊಗುಲ ಮಾದ್ರಿಗ್ ಗರ್ಬೊ ಆದಾಂಡ್ ||

20

ರಡ್ಡೆ ಜೋಕುಲೆನಾಲ್ ಪೆದ್ದಲ್
ಪೊರ್ಲುದಮರುಲು ಪುದರ್ ದೀಡ್ಯೆರ್
ಮಲ್ಲಯಗ್ ನಕುಲೆಂದ್ ಎಲ್ಯಯೆ ಬಾಲೆ ಸಹದೇವೆ ||
ಧರ್ಮನಂದನೆ ಭೀಮೆ ಅರ್ಜುನೆ
ಎಲ್ಯಕ್‌ಲ್ ಸಾದೇವ ನಕುಲೆರ್
ಪನ್ನುನೈವೆರ್ ಜೋಕುಲಾಯೆರ್ ಪಾಂಡು ಬೂಪತಿಗ್ ||

ಪಾಂಡುನ ಮರಣೊ

ಯೋಗಿಲೆಗ್ ಸಂಸಾರೊಡುಲ ಸುಕೊ-
ಸಾರೊನೇ ಉಂಡುಂದು ತೆರಿಪವಿ
ಜೋಕುಲೆನ ಸರಿ ಬಲಕೆ ತೂವೊಂದಿತ್ತಿ ಮಾರಾಜೆ ||
ಆಸ್ತಮೊಡು ತನ ಬುಡೆದಿಯಲ್ಲೆನ
ಸೇವೆ ಕೈಕೊಂದಾಯೆ ಮನಸ್‌ಡ್
ರಾಜವೈಬವೊ ಕನತ ಗಂಟೊಂದಪಗ ನೆನೆತೊಂಡೆ ||

1

ವಾಯು ದೇವನ ಕುಸಲ್ ಬೋಂಟೆನೆ
ಆದ್ ಕೆಡ್ಡೆಸೊ ಕರಿದ್ ಬತ್ತನ
ಮಾಯಿ ಸುಗ್ಗಿಡ್ ಗರ್ಬೊದಾನೊನೆ ಆಂಡ್ ಸಸ್ಯೊಲೆಗ್ ||
ಕಾಯಿ ಪೂ ಮುಡಿ ಪರ್‌ಂದ್ ದಿಂಜಿದ್

ಬೂಮಿ ದೇವಿಗ್ ಬಿಸುಕಣಿತ ನಿಜೊ
ಕಾಣಿಗೇದಲೆಕೊ ದಿಂಜಿದಿತ್ತನವಪಗ ಪ್ರಕೃತಿಡ್ ||

2

ಜೂವೊರಾಸಿಗ್ ಸೈರೊ ಸುಕೊತಾ
ಚೇತನೊನು ಕೊರ್ಪಿಂಚಿ ಸಂಪುದ
ಗಾಳಿ ಬೀಜುನ ರುತು ವಸಂತೊನೆ ಬತ್ತದಾಂಡೊಮೆ||
ಕೋಗಿಲೆಲೆ ಸೊರೊ ಕೆಬಿಕ್ ಪೂತವೆ
ಮೂಂಕುಗೆಡ್ವುನ ಕಮ್ಮೆನೊನೆ ನಿಜೊ
ಆಸೆ ಪುಟ್ಟವುನುಂದ್ ವಿಸಯೊದ ಸುಕೊತ ಸಾದನೆಗ್ ||

3

ಅಪಗ ಬಯ್ಯದ ಪೊರ್ತುಡಾಸ್ತಮೊ
ಜಗಲಿಡೇ ಕುಲ್ಲೊಂದು ರಾಜನೆ
ರುತು ವಸಂತೊದ ಪೊರ್ಲು ತೂವೊಂದಿತ್ತೆ ಸಸ್ಯೊಲೆಡ್||
ಅರಳ್ದಿತ್ತನ ಬಯ್ಯ ಮಲ್ಲಿಗೆ
ಕೊಯಿದ್ ಮಾಲೆನ್ ಕಟ್ಟಿರೆಂದ್
ಬುಡೆದಿ ಮಾದ್ರಿಯೆ ಬತ್ತನಾಲೆನ್ ಪಾಂಡು ತೂವೊಂಡೆ ||

4

ಬಲ್ಲೆಡೇ ಅರಳ್ದನ ಪುಸ್ಸೊನು
ಎಕ್ಕಲ್ದ್ ಕೊನ್ನಗನೆ ಅಲೆನ
ಪೊರ್ಲು ಪಿರವುಡೆ ತೂಯೆ ಜಗಲಿಡ್ ಕುಲ್ಲದಿತ್ತನಯೆ ||
ಬೊಲ್ದು ನಾರ್ಡಿ ತುತ್ತನಾಲೆನ
ಕಪ್ಪು ಕುಜಲ್ದ ಜಿಡಲ ಬೆರಿಟೇ
ಜತ್ತದಿತ್ತನ ತೂದು ತೂನಗ ರಡ್ಡ್ ಪುಡೆತಳ್ಳೆ ||

5

ಮಡಿಕೆ ಮಾಸೊದ ಪೊರ್ಲು ಗೊಬ್ಬೆರೆ
ಮದನ ಮಾಳಿಯೊದೇಣಿ ಪನ್ನುನ
ಕಬಿತೊದಾ ಚೇತನೊನೆ ಮನಸ್ಡ್ ಪುಟ್ಟದಾಂಡಪಗ ||
ಪಿರವುಡೆನೆ ಪೋದಾಯೆನಾಲೆನ
ಜಿಡೆನ್ ಒಯ್ತೆನೆ ಕೈಟಲಾಪಗ
ತಿರ್ಗಾದಂತುದು ಮಾದ್ರಿ ತೂಯಲ್ ಕಂಡನೀಯನ್ ||

6

ತನ್ನ ಸೈರೊದ ಸುಕೊಕು ಬೋಡದ್
ಒಯ್ತನೆನೆ ತನ ಜಿಡೆನ್ ಪನ್ನುನ
ನಿಚ್ಚಯೊನು ಮಲ್ತೊಂದು ಪೋಡಿಡ್ ಮಾದ್ರಿ ನಡ್ಗಿಯಲ್ ||
ಮುಟ್ಟಡೆನ್ನನ್ ಮುತ್ತು ರೂಪೊದ

ರಕ್ಕಸಿಯೆ ಯಾನ್ಂದ್ ರುಸಿಕುಲು
ಕೊರ್ನ ಸಾಪೊನು ಮರತರೋ ಪನಿ ದಾಯೆಗೀ ಬುದ್ಧಿ ||

7

ಜಿಡೆನ್ ಒಯ್ತದ್ ರಟ್ಟದಾನಗ
ಪೊದೆಕೆನ್ನೊತೆನೆ ಆಲ್‌ಲಪಗನೆ
ಬಲಿಪುನಗ ಆ ಪೊದೆಕೆ ಬಿಚ್ಚಿದ್ ಲಂಗೊ ಒರಿನಗನೆ||
ಪುದೆಲ್ ದಡ್ಡೊಗು ಪಾರ್ನಗಾಲೆನ
ಬೆರಿಯೆನೇ ಪೋದಾಯೆ ತರ್ಕದ್
ಮಗ್‌ತ್ ಪಾಡ್‌ದ್ ಯಮನ ಪಾಸೊಗು ನಾಲಿನೊಡ್ಡಾಯೆ ||

8

ಮಾದ್ರಿ ತಿಗಲೆಡೆ ಜೂವೊ ಪೋಯಿನ
ಪಾಂಡುರಾಜನ ಪುಣನ್ ತಿರ್ತ್‌ಗ್
ಜಾರದಪಗನೆ ಮೂಂಕುಡುಸುಲುಲ ಉಂಡೊ ತೂವೊಂದು ||
ಅಳ್ಳೆಲೆಡ್ ಎಕ್ಕುಂಡೊ ತಿಗಲೆಡ್
ಬೆಚ್ಚ ರೋಮೊಡು ಗಟ್ಟಿ ಉಗುರುನು
ಕಿನ್ನನಗ ನೆತ್ತರಾದ ಚಾಯೆನೆ ದಾಲ ತೋಜಂದೆ ||

9

ತರೆಕ್ ತಿಗಲೆಗ್ ಹಾಕೊನುಂದೇ
ಕೆರಿಯೆನೆನ್ನವೆ ಕಂಡನೀಯನ್
ಮರ್‌ಲ್ ಬೂತೊದ ಲೆಕೊನೆ ಆಯೆನೆ ಪುಣ್ಯೊದಾಸ್ತಮೊಡು||
ನನಗ್ ಗತಿಯೇರೆಂಕ್ ಯಾನೇ
ಪೆದ್‌ನ ಜೋಕುಲೆಗೇರ್ ಅಮ್ಮೆನೆ
ಸಿವ ಸಿವಾ ಬಲ ಅಕ್ಕ ತೂಲಯ ಎಂಚಿನಾಂಡ್‌ಂದ್ ||

10

ಬುಲ್ವಿ ಬೊಬ್ಬೆನ್ ಕೇನ್ಡ್ ಕುಂತಿಯೆ
ಬಯ್ಯಮಲ್ಲಿಗೆ ಪುದೆಲ್‌ದಾಡೆಗ್
ಬತ್ತ ತೂನಗ ಅಕ್‌ಲ್ ತತ್ತದ್ ಬೂರ್ಡ್ ಪುಡೆರೊಂದು ||
ಇತ್ತಿ ಮಾದ್ರಿನ್ ಒಯ್ತ ದೀಪೆಕ್
ಕುಲ್ಲದಾಲೆ ಪುಣತ ಮೋನೆನೆ
ದಿಸ್ಪಿ ದೆಪ್ಪಂದಪಗ ತೂದೇ ತೆಲಿತ್ ತೆಲಿತೊಂದು ||

11

ಎನನ್ ಬುಡುದೇ ಪೋಯರತ್ತೊಯೆ
ಸಿರಿಕುಲೆ ಪೊರ್ರುಂದು ಸೊರ್ಗೊಗು
ಪರಬೆ ಈರೆನ್ ಗಣ್ಯೊ ಮಲ್ಪೆರೊ ಸೊರ್ಕಿ ಕುದುರೆಲುಲ ||

ಪಿರವುಡೆನೆ ಯಾನ್ವತ್ತಾದ್ಕಲೆನ
ಕುಜಲ್ ಗೀಸದ್ ಎನ್ನ ಚಾಕಿರಿ
ಮಲ್ ಪವುನ ಬಿಸ್‌ತಿಗೆ ತೂಲೆಯೆ ಚಾತ್ರಿಯಾಣೆನವೆ ||

12

ಆತ್ ಪೊರ್ತುಗು ಪಂದ್‌ ಕುಕ್ಕುನು
ತಾಲ್ಪುನವ್ವೇ ಪಂತೊಡಿತ್ತನ
ಜೋಕುಲೆಗ್ ಈ ಬುಲ್ಪು ಕೇನ್ನಗ ಬತ್ತೆರಾಡೆಗೆನೆ ||
ಏಪೊ ಸೈತ್ತನೆ ಏರ್ ಕೆರ್ತನೆ
ಪಾಪಿಲೆನ್ ದೀಡಯೊನೆ ಪಂಡ್‌ದ್
ಮಾತ ಜೋಕುಲು ಬೊಬ್ಬೆ ಪಾಡ್‌ಗ ಮುನಿಕುಲೆತ್ತಿಯೆರ್ ||

13

ಬುಲ್ಪುನಾ ಬುಡೆದ್ಯಲ್ಲೆಗೇಶಲ
ಸೈತ್ತ ಪುಟ್ಟುನ ಪುಟ್ಟು ಸೈಪ್ಪುನ
ಸತ್ತೊ ಸಾಂಕ್ಯೊದ ಗುಟ್ಟು ಮಾತೆನ್ ಇವೊರೊ ಇವೊರಾದ್ ||
ಪನ್ದ್ ಸಮದಾನೊನುಲ ಮಲ್ತಾದ್
ಅಲ್ಪಡ್‌ದ್ ಸಾಗಯೆರ್ ರಾಜನ
ಸೈತ್ತಿ ಪುಣತವೆ ಕಿಯೆ ಮಲ್ಪೆರೆನಕೆಲೆನಾಸ್ತಮೊಗು ||

14

ಇರ್ದೆರಾ ಬುಡೆದ್ಯಲ್ಲು ಪುಣತವೆ
ಒಟ್ಟು ಕಾಟೊಗು ಬೂರ್ದು ಪೊತ್ತೆರೆ
ಚರ್ದೆ ಮಲ್ತೆರ್ ತಾನ್ ತಾನ್‌ಂದಕೆಲ್ ಏವುರೊಡು ||
ಎನ್ನ ತಿಗಲೆಡೆ ಸೈತ್ತಿ ಕಂಡನಿ-
ನೊಟ್ಟುಗೇನೇ ಸೈಪ್ಪುನೆಡ್ಡೆನೆ
ಅಕ್ಕ ಈಯೇ ಜೋಕುಲೆನ್ ಸರಿ ಸಾಂಕ್‌ಯೆರೆಗುಂತು ||

15

ಈಶ್ ಪಂಡ್‌ದ್ ಮೋನೆ ತೂಯಲ್
ಯೋಗಿಲೆನವೇ ಆಕ್‌ಲಾಪಗ
ನ್ಯಾಯೊ ಸಲ್ತೊದಂಚ ಮಾದ್ರಿಯೆ ಸೈಪ್ಪುನೆಡ್ಡೆಂದ್ ||
ಮಾತೆರ್‌ಲ ಪನ್ನಗನೆ ಕುಂತಿಯೆ
ಆವು ಪಂಡ್‌ದ್ ಒತ್ಯಲಾಪಗ
ಮಾಸ್ತಿ ಮಾದ್ರಿಯೆ ಆಪುನೆಂದ್‌ದ್ ತೀರ್ಪು ಆಂಡವುಲು ||

16

ಕಾಡ್‌ಡಿತ್ತನ ಗಂದೊದಾ ಮರ
ಯೋಗಿಲೇ ಕಡ್ತೊಂದು ಪೂಲೈರ್
ಕಾಟೊಗೂರುದು ಪುಣನ್ ಮೀಪದ್ ತುಂಬೈರಕೆಲೊಟ್ಟು ||

ಸೂನು ಕಾಟೊಗು ಕೊರ್ನಗಾಪಗ
ಮಾದ್ರಿಲಾಗ್ಯಲ್ ಪುಣನೆ ಪೊತ್ತುನ
ತೂದ್ ಬತ್ತೆರ್ ಸುದ್ಲೊ ಮಲ್ತೆರ್ ಪುಣೊದಾಸ್ತಮೊನು ||

17

ಹಸ್ತಿನಾವತಿರಮನೆಗ್ ಈ
ಸುದ್ದಿ ಎತ್ತನಗಲ್ಪ ಮಾತೆರ್
ಬುಲ್ಪೆರೆಶಲ ಪಾಂಡುನಾ ಗುಣೊ ಕೀರ್ತಿ ಪುಗರೊಂದು ||
ಬೀಸ್ಮೇನೆ ತಿಲ ಹೋಮೊ ಪಿಂಡೊದ
ಕಾರ್ಯೊ ಮಲ್ಪದ್ ಅನ್ನದಾನೊನು
ಸಾವುದಂಚೆನೆ ಮಲ್ತೆ ಪಾಂಡುನ ಆತ್ಮೊ ಸಾಂತಿಗಲ್ ||

ಕುಂತೀ ದೇವಿ ಜೋಕುಲೆನೊಟ್ಟು ಅರಮನೆಗ್ ಬತ್ತಲ್

ಪಾಂಡು ಸೈತ್ತನ ಸಾವು ಕರಿನಗ
ಜೋಕುಲೆಗ್ ಅಪ್ಪೆಗಲ್ ಆಯಿನ
ಬೇಜರೊಲು ಒಂತೊಂತೆ ಕಮ್ಮಿಯೆ ಆಪುನೆನ್ ತೆರಿದ್ ||
ಯೋಗಿ ರುಸಿಕುಲು ಒಟ್ಟು ಸೇರ್‌ದ್
ರಾಜನಾ ವಿದವೆನ್‌ಲ ಮುಲ್ಪದ
ಆಸ್ತಮೊಡು ಉಂತವುನ ಸರಿಯತ್ತಂದ್ ಪಾತೆರ್‌ದ್ ||

1

ಆಲೆನೇ ಸಮದಾನೊ ಮಲ್ತಾದ್
ಜೋಕುಲೆನ್ ಅರಮನೆಗ್ ಕೊಂಡೊದು
ರಾಜ ವಿದ್ಯೆನ್ ಕಲ್ಪಯೆರೆ ಪನ್ ನಿನ್ನ ಹಿರಿಯಯಡ ||
ಆಂಡ್ ಇತ್ತೆನೆ ಪೋಪೆ ಸಾದಿಡ್
ಪಾಸಡಿಗ್ ಏರುಂಡು ಪನ್ನಗ
ನಾಲ್ ಸಿಸೈರೆನೊಟ್ಟು ನಿನ್ನನ್ ಆಡೆ ಕಡಪುಡುವೊ ||

2

ಪನ್ನಗನೆ ತಯರಾದ್ ಜೋಕುಲೆ-
ನೊಟ್ಟು ಪಿದಡ್‌ದ್ ಉಂತ್ಯಲದಗನೆ
ಬುತ್ತಿ ಮಾರಪು ಚೀಲದೊಟ್ಟುಗು ಸಿಸೈರೆತ್ತಿಯೆರ್ ||
ಸುತ್ತು ಬತ್ತಾದ್ ಆಸ್ತಮೊದ ಗುಡಿ-
ಟಿತ್ತಿ ದೇವೆರೆಗಡ್ಲೊ ಬೂರೈಲ್
ಪೆತ್ತ ಕಂಜಿಲೆ ಮೋನೆ ಮುಂಡೊಗು ಮುತ್ತು ಕೊರ್ದಾದ್ ||

3

ರುಸಿಕುಲೆನ ಪಾದೊಲೆಗ್ ಜೋಕುಲೆ
ತರೆನ್ ತಾಂಟದ್ ಪುಡಿಯಾಡ್ವದ್
ಕರುಣೆ ದೀಡ್ಲೆ ಸ್ವಾಮಿ ಪಂಡ್‌ದ್ ಕಾರ್ ಪತ್ತಿಯಲ್||
ಮುನಿಕುಲೆನ ಕಣ್ಣಾಡ್ಲ ನೀರರಿ-
ನಗನೆ ಉರ್ದುದು ತರೆಕ್ ಮಂತ್ರೊದ
ಅರಿನ್ ಪಾಡ್‌ದ್ ದೇವೆರೆನ ಸುತಿ ಮಲ್ತೆರಕ್‌ಲೊಟ್ಟು ||

4

ಸಿಸೈ ಒರೈನೆ ತುಂಬೈ ಮಾರಪು
ಎಲ್ಯಕಲೆನಿರ್ವೆರ್‌ಲ ತಟ್ಟಿರ್
ಬುಕ್ಕೊ ಒರ್ಯನ ದತ್ತ ಬಲತ್‌ಡ್ ಭೀಮ ಧರ್ಮಜೆರ್ ||
ಅರ್ಜುನನ ಕೈಪತ್ತದಪ್ಪನೆ
ಎತ್ಯಲಕಲೆನ ಪಿರವೆ ನಡತ್‌ದ್
ಬತ್ತ ಬತ್ತದ್ ಕಾಡ್ ಕರಿನಗ ಆಂಡ್ ಕತ್ತಲೆನೆ ||

5

ಗಂಗದಾ ಬರಿಟಿತ್ತಿ ಚತ್ತೊಡು
ಉಂತ್ಯೆರಾಕ್‌ಲ್ ಮುಕುಲು ರುಸಿಕುಲೆ
ಸಂತೆತಿಲು ಪಂಡೊಂದು ಅಡೆಗಿದ ಬಟ್ತ ಉನ್ಪಯೆರ್ ||
ಕಾಂಡೆ ಲಕ್ಕದ್ ಪಿದಡ್‌ದಾಕ್‌ಲ್
ಓಡ ಕಡತ್‌ದ್ ಎತ್ತೆರಾಯೆರೆ
ಸಾದಿ ಕೇನೊಂದಕ್‌ಲ್ ಬೈಲ್‌ಡೆ ನಡತೆರೊಟ್ಟಿಗೆನೆ ||

6

ಅರಮನೆದ ಬಾಕಿಲ್‌ಗ್ ಎತ್ತನ-
ಗಪಗ ಕುಂತಿಗ್ ನೀರ್ ಕಣ್ಣಾಡೆ
ಅರಿನಗಾಲೆ ಸೇಂಕ್ ಸೇಂಕ್‌ದ್ ಬುಲ್ತಲಾಪಗನೆ ||
ಅಯಿನ್ ತೂಯಿನ ಧರ್ಮ ಭೀಮೆರ್
ಬುಲುಪಡೆಂದ್‌ದ್ ಪೊದಕೆಡುರ್ದೈರ್-
ದವುಡೆನರಿನವೆ ನೀರ್‌ನಾಕ್‌ಲ್ ಮೋಕೆಡಪ್ಪೆನವೆ ||

7

ಬಾಕಿಲ್‌ಡೆ ಪೊಗ್ಗನಗ ಚಾಕಿರಿ-
ದಾಕಲೆಗ್ ಸರಿ ಗುರ್ತೊ ತಿಕ್ಕದ್
ಚಾವಡಿಡ್ ಕುಲ್ಲಯೆರ್ ಕುಂತಿಯೆ ಮಿತ್ತ ಮಾಳಿಯೊಗು||
ಜೋಕುಲೆನ್ ಬಡತಾದ್ ಪೊಗ್ಯಲ್
ಮಾಮಿನಕಲೆನ್ ಪ್ರೀತಿದಜ್ಜಿನ್
ತೂದು ಬುಲ್ತಲ್ ಎನ್ನ ಮೋನೆನ್ ತೂಲೆ ಪಂಡೊಂದು ||

8

ಸತ್ಯವತಿಲಾ ಮರ್ಮಲಲ್ಲೆನ
ಒಟ್ಟು ಕುಂತಿನ ಮೋನೆ ತೂದೇ
ಬುಲ್ತು ಬುಲ್ತುದು ಕಂಗಲಾನಗ ಕುಂತಿ ಮೂವೆರೆಡ ||
ನಮ್ಮ ನಾಲ್ತೆರೆ ಮುಂಡದಾ ಸಿರಿಡೊ
ಬೊಟ್ಟುನುರ್ದನೆ ವಿದಿಯೆ ಕಂಡಿತೊ
ನಮ್ಮವೀ ಜೋಕುಲೆನ್ ತೂದೇ ದೈರೊ ಮಲ್ತೊನುಗೊ ||

9

ಚಾವಡಿಡ್ ಕುಲ್ಲದ್‌ನ ವಟುಕುಲೆ
ಪೂರ ಪರಿಚಯೊ ಕೇನ್ದ್ ಬೀಸೈನೆ
ಮಾಳಿಯೊಗು ಮಿತರೊಂದು ಕುಂತಿನ್ ಬುಕ್ಕೊ ಜೋಕುಲೆನ್ ||
ತೂನಗನೆ ಸಂತೊಸುಡು ಕಣ್ಣಾಡ್
ನೀರ್ ಅರಿನೆನೆ ಉರ್ದುದಾಪಗ
ಮಾದ್ರಿ ಜೋಕುಲೆನಲ್ಪ ತಕ್ಕೈನೆ ರಡ್ಡ್ ನಿಟ್ಟಿಲ್‌ಡ್ ||

10

ಧರ್ಮಜನ ತರೆ ಮೆಯಿನ್ ಈಸಿಯೆ
ತನ್ನ ಪೀಟೊಡು ಕುಲ್ಲು ಭೀಮನ್
ದೆರ್ತದಪಗನೆ ತಿರ್ತ ಜಪುಡಯೆ ದಿನ್ನೊದಾಯೆಂದ್ ||
ಅರ್ಜುನನ್ ಜಕ್ಕೆಲ್‌ಗ್ ಒಯ್ತದ್
ಪೊರ್ರು ಕಂಟ್‌ಂದಾಯ ಮೋನೆಗ್
ಮುತ್ತೊ ಕೊರ್ನಗ ಸತ್ಯವತಿಗ್‌ಲ ಆಂಡ್ ಸಂತೋಸು ||

11

ವಿದವೆ ಮರ್ಮಲ್ ಪಾಂಡು ಸೈತ್ತನ
ವಿಸಯೊ ಕೇನ್ನಗ ಬುಲ್ತು ಬುಲ್ತುದು
ಪನಿಯೆರೆನೆ ತೀರಂದೆ ಸೇಂಕ್‌ದ್ ಮೂಂಕುನುದೊಂದು ||
ಕಡೆಕ್ ಪಂಡಲ್ ಆಯ್ನ ಸಂಗತಿ
ಎನನ್ ಕಾಪುಲೆ ಎನ್ನ ಜೋಕುಲೆ
ದಿನ್‌ಸ್ ತೂದೀರ್‌ಂದ್ ಕಾರ್‌ಗ್ ಅಡ್ಡ ಬೂರಿಯಲ್ ||

12

ಬತ್ತನಾ ರುಸಿ ಸಿಸೈರೆಗ್ ಸರಿ
ಕೊರ್ದಯೆನೆ ಬಂಜಾರೊ ತಿನಿಯೆರೆ
ಮಸ್ತ ಸಾಮನ್‌ಲೆನಾಸ್ತಮೊಗಾಯೆ ಕಡಪುಡಿಯೆ ||
ಎನ್ನ ಬಗ್ಗಿದ ವಂದನೇಲೆನ್
ಅಲ್ಪದಾ ರುಸಿಕುಲೆಗ್ ತೆರಿಪಲೆ
ಪನ್ದ ಕಡಪುಡಿ ಸಿಸೈನಾಕ್‌ಲ್ ಎತ್ತೆರಾಸ್ತಮೊಗು ||

13

ಆತ್ ಪೊರ್ತುಗು ವೇದ ವ್ಯಾಸೆರ್
ಆಡೆಗತ್ತಾನ ತೂದು ಬೀಸ್ಮೆನೆ
ಪಾದೊ ಪೂಜೆನ್ ಮಲ್ತಾದುಂತ್‌ನವಪಗ ಮುನಿರಾಯೆ ||
ಯಾನ್ ಬತ್ತನೆ ಸತ್ಯವತಿನವೆ
ಸೋಕೊ ದುಕ್ಕೊನು ಕಮ್ಮಿ ಮಲ್ಲೆರೆ
ಈಯೆ ಮುಲ್ಪನೆ ಉಂತು ಪಂಡ್‌ದ್ ಮಾಳ್ಕೊ ಮಿತರಿಯೆರ್ ||

14

ಅಪ್ಪೆ ಈ ನನ ಮೂಲು ಉಂತಡ
ದುಸ್ಪೆರನ್ಯಾಯೊದವೆ ಜೋಕುಲು
ಪುಟ್ವೊದೊನೆ ನೂತ್ತೊಂಜಿ ಕುರುಡಗ್ ಪೋಪಿ ಕಾಲೊದವೆ ||
ನಿನ್ನ ಕಣ್ಣೆಡೆ ಕುರುಕುಟುಮೊ ನನ
ಕುರ್ಲಿಯೆ ಆಪುನೆನ್ ತೂಯೆರೆ
ಕಸ್ಪ ಪೋದೀ ವಾನಪ್ರಸ್ತೊದ ರುತೊನು ಕೈಕೊನುಲ ||

15

ಮುನಿಯೆ ಪೋದಾನಗನೆ ಮಾಳ್ಕೊಡು
ತಡಿಪೆದಲ್ ಗಾಂದಾರಿ ಕುಂತಿಡ
ನೆರ್‌ದ್ ನೆರ್ಪುನ ಸೊರೊನೆ ಮಲ್ಲೆಡ್ ದಿಂಜಿದಾಂಡವುಲು ||
ಪುರಿಟ್ ಪಿಲೆ ಪನ್ನೆದಲ್ ಕುಂತಿಗ್
ರುಸಿಕುಲೆಗ್ ಪುಟ್ವೊದ್‌ನ ಜೋಕುಲು
ಪನ್‌ಪುನೆನ್ ಕೇನೊಂದು ಗಂಗೆನ ಮಗಟ ಸತ್ಯವತಿ ||

16

ಕೊಟ್ಟು ಕಡ್ಲೆ ಪಕ್ಕಿ ಅರೆದುನ
ಲಚ್ಚಣೊಡು ಅರಮನೆಗ್ ದೋಸೊಲು

ಬರ್ಪುನೆಕ್ ದುಂಬೇನ್ ಕಾಡ್‌ಗ್ ಪೋದುಲಾಸ್ತಮೊಡು
ಎನ್ನ ಕಡೆತಾವುಸೊನು ಮುನಿಕುಲೆ
ಸನ್ನಿಡಿಡ್ ಕಳೆವೊನುವೆ ಪನ್ನಗ
ಒತ್ತಾದಾಯೆನೆ ಪೋಪುನಟ್ಟನೆ ಮಲ್ಲೆ ಬೋಡಯಿನ ||

17

ಗಾಡಿಲೆಡ್ ಸನ್ನಯೊಲೆ ದಿಂಜದ್
ತೇರ್‌ಡಾಲೆನ್ ಕುಲ್ಲದಾಪಗ
ತಾನ್‌ಲಾ ಸಿದ್ಯಪ್ಪೆನೊಟ್ಟುಗೆ ಕುಲೈ ತೇರ್ಪುಲಯಿ ||
ಪ್ರೀತಿ ಮೋಕೆದ ಮರ್ಮಲಲ್ಲುಲ
ಮಾತೆರೆಡ ಪಂಡೊಂದು ಪಿದಡ್‌ದ್
ಆನಗನೆ ಕುದುರೆಲೆನ್ ಸಾರತಿ ದೇರೈ ಬೀದಿಡನೆ ||

18

ಕಾಡ್‌ದಾ ಸತ್‌ಸ್ತಂಗ ಪರ್ವತೊ-
ದಾಡೆ ಎತ್ತನಗಪಗ ರುಸಿಕುಲು-
ಏರ್‌ಬತ್ತನೆ ಪನ್ದ ತೂನಗ ತೇರ್ ಅರಮನೆದ ||
ಮಾತೆರ್‌ಲ ಜತ್ತೊಂದು ಮುನಿಕುಲೆ
ಕಾರ್‌ಗಡ್ಲೊನೆ ಬೂರ್ಪುಲಾನಗ
ಬೀಸ್ಮೆ ಪಂಡೆನೆ ಬತ್ತಿ ಸಂಗತಿನಪಗ ಕೈ ಮುಗಿದ್ ||

19

ಮುನಿಕುಲೆನ ಅಸ್ತಯೊಡು ಉಂತದ್
ಪಿದಡಿ ಬೀಸ್ಮೆಗ್ ಸತ್ಯವತಿ ತನ
ಮಗೆನೆ ಪಂಡ್‌ನ ವಿಸಯೊ ತೆರಿಪದ್ ಪಂಡಲಾಯಡನೆ ||
ಕಯಿತ ಎಣ್ಣೆನ್ ನಿನ್ನ ಕಣ್ಣೆಗ್
ಒರೆಸುನೆನ್ ತಪ್ಪಾದ್ ಕುರುಕುಲೊ-
ನೊರಿಪು ಈ ದೇವೆರೆನ್ ನಂಬುದು ನಿಕ್ಕೈ ಗೇಲವಡ್ ||

ರಡ್ಡನೇ ಸಂದಿ

ಜೋಕುಲೆನ ಗೊಬ್ಬು

ಪಾಂಡು ಬಾಲೆಲೆ ಪುದರ್ ಅರಮನೆ-
ಡಾಂಡ್ ಪಾಂಡವೆರೆಂದ್ ನೂದೆಕ್-
ಲಾಂಡ್ ಒಂಜೇ ಪುದರ್ ಕುಲೊತವೆ ಕೌರವೇರ್‌ಂದ್ ||
ಪುದರ್‌ಡೇ ಲಡಯಾಂಡ್ ಕುರುಕುಲೊ-
ದರಸುಲಾಪುನೆ ಎಂಕುಲೆಂದ್‌ದ್
ಕುರುಡ ಬಾಲೆಲು ಪಂಡಿಸಾತ್‌ಗೆ ಬೀಮೆ ಲಕ್‌ದುಂತ್ಲೆ ||

1

ಅಪ್ಪೆ ಪಂಡ್‌ನ ನೀತಿ ಕೇಂಡ್‌ದ್
ಸೊಸ್ತೊ ಕುಲ್ಲನ ಬೀಮನಾಕ್‌ಲೆ
ಕುಟ್ಟು ಕುಟ್ಟುದ್ ತಮಸ್ ಮಲ್ಲೆರ್ ಕೌರವಾದಿಗುಳು ||
ಕಲ್ಪವೊಡು ಒರೊ ಮುಕುಲೆಗ್‌ಂದ್‌ದ್
ತನ್ನ ಮನಸ್‌ಡೆ ತಿಂದೆ ಮಂಡಿಗೆ
ತಿಕ್ಕೆರೆಂಕೇಪಾಂಡಲಾ ಅಕ್‌ಲ್‌ಂದ್ ನೆನೆತೊಂಡೆ ||

2

ತನ್ನ ಜೋಕುಲೆ ಹಕ್ಕದಾಕ್ಲ್
ಹಸ್ತಿನಾವತಿಗ್ಂದ್ ಅಕ್ಲೆನ
ಅಪ್ಪೆ ಗಾಂದಾರಿಗ್ಲ ಹಮ್ಮೊತು ಏರ್ದ್ ಬಾಲೆಲೆಗ್ ||
ಗುಟ್ಟುಡೇ ತಿನ್ನಾದ್ ಬೇತೆನೆ
ಮಲ್ಲತಿಗೆದಾಬರಣೊ ಪದ್ವೊಯಿ
ಮಲ್ಲಯಲ್ ಮಾತೆರೆಗ್ ಕುಂತಿನ ಜೋಕುಲೆನ್ ಬುಡುದು ||

3

ಎಲೈಡಾಸ್ರಮೊಡಿತ್ತಿ ಜೋಕುಲು
ಬೊಳ್ಳಿ ಬಂಗಾರ್ಲೆನ್ ತೂದುಲ
ಕಲ್ಲ್ ಮಣ್ಣಾಗ್ ಸಮೋನೆ ಪಂಡ್ಡ್ ಗಣ್ಯೊ ಮಲ್ತಜೆರ್ ||
ಅಜ್ಜ ಬೀಸ್ಮಗ್ ಆಂಡ್ ಮನಸ್ಡ್
ಮರ್ಮಲೆನ ಈ ಬೇದೊ ದುಂಬುಗು
ಮಲ್ಲ ಗಂಡಾತ್ರೊಲೆನ್ ಮಲ್ಲವು ಕುಟುಮೊ ಕುರ್ಲರಿದ ||

4

ಮೆಗಿ ಪಲಯ ಜೋಕುಲೆಗ್ ಒಂಜೇ
ಕಳಟ್ ಒಟ್ಟಿಗೆ ಗೊಬೈರಂದ್
ಅರಮನೆದ ಪಿರವಿತ್ತಿ ಮಲ್ಲವೆ ಬೊಟ್ಟಿ ಕಂಡೊಲೆನ್ ||
ಬೆನುಪುನಕ್ಲೆಡ ಬುಡ್ವದಾಯೆನೆ
ಅರಸು ಬಾಲೆಲು ನಿಕ್ಲ್ ಗೊಬ್ಬಲೆ
ಕುರುಕುಲೊತ ಪೋರೆರೆಗ್ ಪನ್ನಗ ಲಾಗೈರಕ್ಲೊಟ್ಟು ||

5

ಅಜ್ಜನೇ ಪುಗರೊಂದು ಪಾರೈರ್
ಅಪ್ಪನಕ್ಲೆನ ಪಾತೆರೊಗು ಕೆಬಿ
ಕೊರ್ದೆರಾಕ್ಲ್ ಗೊಬ್ಬುದಾತುರೊಡಿತ್ತಿ ಮರ್ದೆರಲ ||
ಎತ್ತಿಯೆರ್ ಪಾರ್ದಕ್ಲ್ ಕಂಡೊಗು
ಸುತ್ತು ಬತ್ತದ್ ಸಾಲ್ಡುಂತ್ಯೆರ್
ಲೆಕ್ಕೋಗೇ ನೂತ್ತೈನ್ ಗೊಬ್ಬೆರೆ ಯಾವು ಪಂಡೊಂದು ||

6

ಕುಂತಿ ಜೋಕುಲು ಒಂಜಿ ಕಡೆ ಸರಿ-
ಟುಂತಿಯೆರ್ ದ್ರತರಾಸ್ತ್ರ ಬಾಲೆಲು
ಇಂಚಿಗುಂತ್ಯೆರ್ ಎದುರು ಕಡೆಟೇ ಗೊಬ್ಬು ಗೊಬ್ಬೆರೆಗ್
ಎಂಚಿನಾಟೊನು ಗೊಬ್ಬುನೆಂದ್
ದುಂಬು ದುರ್ಯೋದನೆನೆ ಕೇನ್ನಗ
ಪುಂಡು ಪೋಕ್ತಿಯೆ ಬೀಮೆ ಪಂಡೆನೆ ಗೊಬ್ಬಲೆನ ಪುದರ್ ||

7

ಕುಟ್ಟಿ ದೊಣ್ಣೆನೊ ಮುಟ್ಟುನಾಟೊನೊ
ಕುಟ್ಟುನೆನೊ ಚರ್ಮೊದವೆ ಚೆಂಡ್ನ್
ಪಳ್ಳಿ ಪತ್ತುನ ಗೊಬ್ಬು ಗೊಬ್ಬೆರೆಗಾವೊ ನಂಕಿತ್ತೆ ||
ಕಳ್ಳೆರಾಟೊನೊ ಆವೊ ಚಡುಗುಡು
ಕಟ್ಟುಗೊನೊ ಕೋರಿತ್ತೆ ಪನ್ನಗ
ಒರೈ ಮೋನೆನೆ ಒರೈ ತೂದೇ ಏರ್ಲ ಮನಿತಜೆರ್ ||

8

ಸುರುಟು ಚಡುಗುಡು ಗೊಬ್ಬುಗೊಂದುದು
ನಕುಲ ಸಾದೇವೆರ್ಲ ಪನ್ನಗ
ಕಳಕ್ ಗೆರೆ ಪಾಡಿಯೆರ್ ಜೋಕುಲೆ ಗೊಬ್ಬು ಸುರುವಾಂಡ್ ||
ಭೀಮೆ ಚಡುಗುಡು ಪಂಡೊನುಂದೇ
ಆಪೆಕ್ದ ಕಡೆ ನಡುಕು ನುರ್ಕಿಯೆ
ಆಯನ್ಲ ಪತ್ಯೆರೆಗ್ ಪುಣೆಯೆರ್ ನೂದು ಕೌರವೆರ್ ||

9

ಈತೆನ್ಲ ಒರಿ ಮಗ್ತ್ ಪಾಡ್ಡ್
ಕಾರ್ಡೊದ್ದುದು ಗುದೈನಳ್ಳೆಗ್
ಬೂರುನಕ್ಲೆನ್ ಒಯ್ತು ಕಂಡೊಡು ಚೋಲಿ ಜಾರ್ನೇಟ ||
ನೂಕು ನುರ್ಕುದು ಕಳನ್ ಬುಡಿಯೆರ್
ಆಪೆಕೆತ್ತದ್ ಉಡೈರವುಲೇ
ನೋಪುನೆನ್ ತೂವೊಂದು ಧರ್ಮಜೆ ಬೊಡ್ಡಿ ಬೊಡ್ಡಿದೆ ||

10

ನೆತ್ತೆರದ ಓಕುಳಿಡ್ ಮೀಯೆರ್
ಗೊಬ್ಬುದಾ ಗಾಂದಾರಿ ಜೋಕುಲು
ಸರೊ ಉಂತ್ಯೆರೆ ಪಾರ್ದ ಬಲಿಪೆರೆ ತೀರ್ಚಿ ಪೆಟ್ಟಾದ್ ||
ಅಜ್ಜಡನೆ ಪನ್ನೊಂದು ಪಿದಡ್ನ
ಪುಕ್ಕೆರೆಗ್ ಪಿರ ಹಾಕ್ದಾಯೆನೆ
ಅಲ್ತ ಪಿದಡಿಯೆ ಪೋಯಿ ಪಂಡ್ಡ್ ತನ್ನ ಪಲಯಡನೆ ||

11

ಅಕ್ಲ್ ಎತ್ತುನ ದುಂಬು ಎತ್ತೆರೆ
ಬರೊಟು ಪಾರ್ಡ್ ಬೀಮೆ ಮುಳ್ಳುಡು
ತನನ್ ಗೀರ್ಡ್ ನೆತ್ತೆರೆಪದ್ ದೂಳ್ಳು ಪುಡೆರೊಂಡೆ ||
ಕುಸೆಲ್ಡೇ ನರಕೊಂದು ಬತ್ತದ್
ಪನ್ಪೆನಜ್ಜಡ ಎಂಕ್ ನೋತೆರ್
ದುರುಳೆರಾ ದುರ್ಯೋದನಾದಿಲು ನೂದು ಜನೊ ಸೇರ್ಡ್ ||

12

ಆತ್ ಪೊರುಗು ಬತ್ತೆರಾ ದ್ರತ
ರಾಸ್ತ ಬಾಲೆಲು ಮೋಂಟ ಮೋಂಟದ್
ಬೀಸ್ಮೆನೇ ತೂದಕ್ಲೆ ಗಾಯೊಗ್ ಮರ್ದ್ ತಾಗಾದ್ ||
ಲೂಟಿ ಮಲ್ತೊನುವರ್ಡ ನನ ನಿಕ್
ಲಾಡೆ ಪೋಪುನ ಬೊಡ್ಡಿ ಗೊಬ್ಬೆರೆ
ಬೇತೆ ಬೇತೆನೆ ಪೋಲೆ ಪಂಡ್ ಮಲ್ತೆ ಸಮದಾನೊ ||

13

ಜೋಕುಲೆನ ಈ ಪೆಟ್ತ್ ತೂಯಿನ
ರಾಣಿ ಗಾಂದಾರಿಗ್ಲ ನೆತ್ತಿಡೆ
ಕೋಪೊ ಏರ್ದ್ ಕುಂತಿನಾಡೆಗೆ ಲೆತ್ತದಾಪಗನೆ ||
ತೂಲ ನಿನ ಜೋಕುಲುಲ ಮಲ್ತನ
ಬೇಲೆ ನನ ಈ ಪಂಡ್ ಕೊರ್ದಯ
ಬೀಮಡನೆ ಮಾತೆರೆನ್ ಕೆರೈರೆ ಕಂಡ್ರಕುಟ್ಟಿಡನೆ ||

14

ನೆರುನವು ಬೊಡ್ಡಕ್ಕ ಎಂಕುಲು
ಮುಲ್ಪ ಉಪ್ಪುನ ನಿಕ್ ಆಪುಚೊ
ಹಕ್ಕ್ ಎಂಕಲ ಉಂಡು ಯಾನೇ ಪಾರ್ಡ್ ಬತ್ತನಲೊ ||
ಮುಕ್ಕ್ ತಿಂದನಲೀಯೆ ಕಂಡನಿ-
ನಿಲ್ಲದವೆ ಈ ಹಕ್ಕ್ ಉಂಡು-
ದಿತ್ತೆ ಪಂಡಡ ಕುಡ್ತು ನೂಕುವೆ ಪೋಲ ಮುಲ್ಪಡ್ ||

15

ರಾಣಿವಾಸೊಡು ಲಡಯಿ ಆನಗ
ಏರ್ ಬುಡ್ಡವುನೆಂದ್ ಚಾಕಿರಿ-
ದಾಕ್ಲೇ ಬೀಸ್ಮಡನೆ ಪಂಡೆರ್ ಬುಲ್ತುದೀ ಸುದ್ದಿ ||
ಮಾಳಿಯೊಗು ಮಿತರೊಂದು ಬತ್ತನ
ಬೀಸ್ಮ ಮೋನೆನ್ ತೂದಲಪಗನೆ
ಬಾಯಿ ಮುಚ್ಚಿದ್ ಕುಲೈರಾಪಗ ಅಡಿಕ್ ತೂವೊಂದು ||

16

ಜೋಕ್ಲೆ ಕೋಪೊನು ರಾಜಿ ಮಲ್ತೆರೆ
ಏರ್ಲ ಬೋಡುಂದಿದ್ದಿ ಅಕ್ಲೇ
ರಾಜಿಯಾಪೆರ್ ಅಪ್ಪೆನಾಕ್ಲ ದಾಯೆ ತಡಿಪುನೆನೊ ||
ಆನಿದಾ ಮನದಾನಿ ಕಾಂಡೆನೆ
ಭೀಮೆ ಲೆತ್ತದ್ ಪಂಡೆ ಯಾನಿನಿ
ನೋತೆಡನೆ ದೇವೆರ್ ಆಜೊನೆ ಉಂಡು ಪನ್ನಗನೆ ||

17

ಬತ್ತೆರಾ ಬೋರುಂಡನಾಕ್ಲ್
ಕಚ್ಚೆ ಕೋಮಣೊ ಬಿಗಿತ್ ಕಚ್ಚೆದ್
ಅಲ್ಪ ಸಾದಿಡೆ ಬಂಬಲ್ದ ಮರ ತೂದ್ ಉಂತಿಯೆರ್ ||
ಕುಕ್ಕುದಾ ಮರ ಉಂದು ಮಿತರುಗೊ
ಪನ್ದ ಏರೈರ್ ಭೀಮೆ ಮುದೆಲ್ಗ್
ಒದ್ದದೇ ಕುರ್ಕನಗ ಬೂರ್ಯೆರ್ ಕುಕ್ಕು ತಾಲಿಲೆಕೊ ||

18

ಬೂರ್ಕಲೆ ಕೈಕಾರ್ ಪೊಲಿನೆಟ್
ಆನಿ ಗೊಬ್ಬೆರೆ ಆಯ್ಜಿಯಕ್ಲೇ
ಬೀಮನ್ಲ ಕೆರೊಡುಂದು ಚತ್ತೊದ ಅಡಿಗೆ ಬಟ್ಟಿಡನೆ ||
ಲಾಡ್ ಮಲ್ವಾದಕ್ಲ್ ಒಂಚೆಕ್
ಪಾಸನೊದ ಇಸೊ ಪಾಡ್ಡ್ ಆಯಗೆ
ಈರ್ ಬಲಸೊಡು ಪನ್ದ ಕೊರೈರ್ ಬಟ್ಟಿಗುಡಿಗಿರೆನ್ ||

19

ಇತ್ತೆನೇ ನಮೊ ಚತ್ತೊದಾಡೆಗ್
ತಿರೊನುಂದೇ ಬರ್ಕೊ ಬಟ್ಟಿಡ
ಬೆಲ್ಲೊ ಪಾಡ್ಡ್ ಲಾಡ್ ಮಲ್ತೆರೆ ಪನ್ನೆ ನಂಕಂದ್ ||
ನಮ್ಮೊ ಒಟ್ಟಿಗೆ ಪೋದು ತಿನ್ನೊನೊ
ದುಸ್ಸೆ ದುರೈದನೆನೆ ಪನ್ನಗ
ಸತ್ಯ ನಂಬುದು ಮಾತೆರೆತ್ತೈರ್ ಚತ್ತೊದಾಡೆಗೆನೆ ||

20

ಬತ್ತನಕ್ಲೆನ್ ತೂದು ಚತ್ತೊದ
ಬತ್ತೆ ಉಣಿಯೆರೆ ಕುಲ್ಲಿ ಪನ್ನಗ
ಒಟ್ಟುಗೇ ಮಾತ್ತೆರ್ ಕುಲೈರ್ ಪಂತ್ಯೊ ಪಾಡೊಂದು ||
ಕುಲ್ಲನಕ್ಲೆಗ್ ಬಲಸ್ನಡಿಗದ
ಬಕ್ಷೊಲೆಗ್ ಸರಿ ಅಮಲ್ ಬೆರಸದ್
ಇತ್ತೆನೆನ್ ಬಲಸಿಯೆರ್ ಪಾಂಡವನಕ್ಲೆ ಇರೆಕೊಲು ||

21

ಇಸೊತ ಲಾಡನ್ ಬೀಮಗೊರೈಗೆ
ಬಲಸ್ನೆನ್ ಸರಿ ತಿಂದದಾನಗ
ತರೆನೆ ತಿರ್ಗದ್ ಮತಿಯೆ ತತ್ತದ್ ಬೂರೈ ಕುಲ್ಲನಯೆ ||
ಅಮಲ್ ಬಕ್ಷೊನು ತಿಂದಿ ಪಾಂಡವೆ-
ರಪಗ ನಿದ್ರೆಡ್ ಕಣ್ಣ್ ತೂಂಕೈರ್
ಕುರುಡ ಬಾಲೆಲು ಬೀಮನೊತ್ತದ್ ಕೆದುಕು ಪಾಡಿಯೆರ್ ||

22

ಮಾತೆರ್ಲ ಪಿದಡಿಯೆರ್ ನಿದೆರ್ನ
ಪಾಂಡವೆರ್ ಲಕ್ಕೊಂದು ಬೀಮನ್
ನಾಡ್ನಗ ಕೌರವೆರ್ ಪಂಡೆರ್ ಆಯೆ ಪೋಯೆಂದ್ ||
ಪಾರ್ಡ್ಡ್ ಅರಮನೆಗ್ ಎತ್ತೆದ್
ಬೀಮೆ ಬತ್ತೆನೊ ಪನ್ದ್ ಕೇನ್ನಗ
ಆಯನೇನಿನಿ ತೂತ್‌ಜೆಂದ್ ಪಂಡಲಾ ಕುಂತಿ ||

23

ಧರ್ಮನಂದನೆ ಮೆಗ್ಗನಕ್‌ಲೆನ್
ಬುಡ್ಡು ಪಾರ್ವೆನೆ ಚತ್ತೊದಾಡೆಗ್
ಅಲ್ಪ ಬೀಮೆನೆ ಕೆದುಟು ನೀಂದ್‌ದ್ ಮಿಶರುನೆನ್ ತೂಯೆ ||
ತನ್ನಕಾರ್‌ಗ್ ಒಳ್ಳೆ ಕಂದಡಿ
ತುಚ್ಚಿ ಗಾಯೊಡು ನೆತ್ತೆರರಿನೆನ್
ಉರೊನುಂದೇ ಕೆದುತ ದಂಡೆಡ್ ತೂಯೆ ದರ್ಮಜನ್ ||

24

ತಾನ್ ಈ ಕೆದುಕೆಂಚ ಬೂರ್ಡ್‌ನೆ
ಎರ್ ನೂಕುದು ಪಾಡ್ಲೆ ಪನ್ನುನ
ದಾಲ ತೆರಿಯಂದಾಯೆ ಅಣ್ಣನ ಮೋನೆ ತೂನಗನೆ ||
ದೇವೆರೆನ ದಯೊ ಇತ್ತನಕ್‌ಲೆಗ್
ಎರ್ ಎಂಚಿನ ಮಲ್ತೆರಾಂಡಲ
ಪೋಡಿಗನೆ ಇದ್ದಿಂದ್ ಪಂಡೆನೆ ಸಾದು ಧರ್ಮಜೆನೆ ||

25

ಚತ್ತೊದಾ ಬಟ್ಟೆನ್‌ಲ ಲೆತ್ತೆದ್
ಜುಟ್ಟು ಬಗ್ಗದ್ ಗುದ್ದುನಾಪಗ
ಸತ್ಯೊ ಸಂಗತಿ ಬಾಯಿ ಬುಡಿಯೆರ್ ಬೀಮಡಾಪಗನೆ ||
ಧರ್ಮಜೆನೆ ಬಟ್ಟೆನ್‌ಲ ಬುಡ್ಡದ್
ಒಳ್ಳೆ ಕಂದಡಿ ತುಚ್ಚಿನೆಟ್ ಸರಿ
ನೆತ್ತಿಗೇರ್‌ನ ಇಸೊನೆ ಜಾರ್‌ನೆ ಪಂಡೆ ಮೆಗಿಯಡನೆ ||

26

ಅರಮನೆಗ್ ಪಾರ್ವೊದು ಅಜ್ಜಡ
ನಡತಿ ಸಂಗತಿ ಪನ್ನಗಪಗನೆ
ತರೆಕ್ ಹಾಕೊಂದಾಯೆ ಕುರುಕುಲೊ ಒರಿಪುನೆಂಚಂದ್ ||
ಇರ್‌ಲ್‌ದಾ ನಿಡ್ಡೆನ್‌ಲ ಪಗ್‌ಲೆದ
ಬಡವು ಬಾಜೆಲ್ ಬುಡುದು ಏಚನೆ
ಮಲುಪುನಗ ಜೋಕುಲೆಗ್ ಕಲ್ಪವೊಡುಂದು ನೆನೆತೊಂಡೆ ||

ಹಸ್ತಿನಾವತಿದ ಗುರು ಮಟೊ

ಹಸ್ತಿನಾವತಿಡೊಂಜಿ ಗುರುಮಟೊ
ಕಟ್ಟಯೆನೆ ಆ ಬೀಸ್ಮೆ ಕೃಪೆರೆನ್
ಕಲ್ಪಯೆರೆಗುಂತಾಯೆ ಆರೇ ದಿವ್ಯೊ ಜ್ಞಾನಿಂದ್ ||
ಧರ್ಮ ಸಾಸ್ತೊನು ರಾಜನೀತಿನ
ಚತ್ತಿಜಾತಿದ ಸಂಪ್ರದಾಯೊನು
ಕಲ್ಪವೊಡು ಈರ್‌ಂದ್ ಕರ್ಚಿಗ್ ಬುಡಿಯೆ ಉಂಬೊಳಿನ್ ||

1

ಎಡ್ಲೆ ಮೂರ್ತೊನು ತೂದು ನೂದೆತ
ಮಿತ್ತದಾಜೆನ್ ಬೀಸ್ಮೆ ಲೆತೊನುದು
ಬತ್ತನಾಯೆನೆ ಗುರುಕುಲೆಗ್ ಕೈ ಮುಗಿದ್ ಉಂತ್‌ನಗ ||
ಕುಲೈರೆಗ್ ಸರಿ ಪೀಟೊ ತೋಜದ್
ಚತ್ತಿಯೆರೆಡಾಚಾರ್ಯ ಪದವಿದ
ಉತ್ತಮೆನೆ ಈ ಕುಲ್ಲು ಪಂಡ್‌ದ್ ಕೃಪೆರ್ ಕುಲ್ಲಯೆರ್ ||

2

ಜೋಕುಲೆನ್ ತೂದಕ್‌ಲೆ ದವುಡೆನ್
ಈಸಿಯೆರ್ ಮಾತೆರೆನ ಪುದರ್‌ನ್
ಓಲೆ ಗ್ರಂತೊಡು ಬರೆದ್ ದುಸ್ಸಲೆನಾರ್ ತರ್ಕೊಂದು ||
ಬಾರತೊದ ನಮ ಪೋಣ್ಣ ಜೋಕುಲು
ವೇದ ಸಾಸ್ತೊನು ಧರ್ಮೋ ನೀತಿನ
ಮಾತೆರ್‌ಲ ಕಲ್ತೆರಡ ದೇಸೊಡು ಧರ್ಮೋನಿಲೆ ಊರು ||

3

ಎಡ್ಲೆ ದಿನೊ ಇನಿ ಪನ್ದ್ ಜೋಕುಲೆ-
ನಿತ್ತೆ ಲೆತೊನುದು ಬತ್ತೆ ಗುರುಕುಲೆ
ಕಲ್ಪದೀರೇ ಎಂಕ್ಲೆ ಕುಟುಮೊನು ಒರಿಪಿ ಪನ್ನಗನೆ ||
ಬೊಳ್ಳಿದಾ ಮಣೆ ಮೇಲ್ಗ್ ಬಂಗರ್
ಮುಚ್ಚಿನೆನ್ ಎದುರಿದ್ ಜೋಕುಲೆ
ಸುತ್ತ ಕುಲ್ಲದ್ ತಾನ್‌ಲಟ್ಟಿ ಪಾಡ್ಡ್ ಕುಲ್ಲಿಯೆರ್ ||

4

ಸುತ್ಯೆ ದೀಡ್‌ದ್ ಗಣಪ ದೇವೆರ್
ವಿಗ್ಗ ನಾಸೊನು ಮಲ್ಪಿ ಮಂತ್ರೊನು
ಗಟ್ಟಿಡೇ ಪಂಡೊಂದು ಸಾರದೆನಾರ್ ಸುಗಿತೆರ್‌ಲ ||
ಮುಟ್ಟು ದೀಡ್‌ದ್ ಮಣೆತ ಮೇಲ್‌ಡ್

ಬಿಕ್ಕಿಯೆರ್ ಬೊಲ್ದರಿನ್ ಸುತ್ತಲ
ಕುಲ್ದಿತ್ತನ ಜೋಕುಲೆಡ್ ಹಿರಿಯಾಯೆ ಧರ್ಮಜನ ||

5

ಬಿರೆಲ್ ಪತ್ತದ್ ಗಣಪ ದೇವೆರೆ
ಪುದರ್ ಬರೆಪದ್ ಆಯ ಬಾಯಿಡ್
ಪನ್‌ಪಯೆರ್ ಸರಿ ಬಾಕಿದಕಲೆನ್ ಲೆತ್ತದೊರೈಯ್ ||
ಪುದರ್ ಕೇಂಡ್ ಬರೆಪದಾನಗ
ಸಮಯೊ ಮದ್ಯನ ಆಂಡ್ ಬೀಸ್ಮನ್
ಉಣುಪಯೆರ್ ತನ್ನೊಟ್ಟು ಕುಲ್ಲದ್ ಮಾತ ಜೋಕುಲೆನ್ ||

6

ಬೀಸ್ಮೆ ಜೋಕುಲೆನಾರೆಗೊಪ್ಪದ್
ಪೋನಗನೆ ಆ ಬ್ರಮ್ಚಾರಿಗ್
ಮೋಹೊ ಪಾಸೊದ ಉರುಕಾಯಿನೆಟರಿನೆ ಕಣನೀರ್ ||
ಓದಿಯೆರೆ ಬರೆಯೆರೆಗ್ ಕಲ್ಪದ್
ವೇದ ಸಾಸ್ತ್ರೊನು ರಾಜನೀತಿನ
ತಾನ್ ತೆರಿನೆನ್ ಕಲ್ಪವೊಂದೇ ಇತ್ತೆರಾ ಕೃಪೆರ್ ||

7

ಗುರುಕುಲೇ ಕಲ್ಪಯಿನ ವಿದ್ಯೆನ್
ಸರಿಟ್ ಕಲ್ತೆರ್ ಮಾತ ಜೋಕುಲು
ಅರಸು ಬಾಲೆಲು ಬಿರುತ ಸಾಸ್ತ್ರೊನು ಕಲ್ಪೊಡತ್ತೊಂದು ||
ವಿದುರ ಸಂಜಯನಕಲೆನೊಟ್ಟುಗು
ಗುರುಕುಲೇರಾವುಂದು ಕೇಂಡ್
ಅರಮನೆಡ್ ಏಚನೆನ್ ಮಲ್ತೊಂದಿತ್ತೆನಾ ಬೀಸ್ಮೆ ||

8

ದ್ರೋಣೆ ಮುನಿ ಭರದ್ವಾಜೆರೆನ ಮಗೆ
ನಾಯಗೇ ಧನುರ್ವೇದೊ ಮಂತ್ರೊನು
ಪ್ರೀತಿಡೇ ಕಲ್ಪದ್ ಕೃಪೆರೆನ ಮೆಗಿದಿನಾರ್ತೊದು ||
ಜಾತಿದಾ ರೀತಿದನೆ ಮದಿಮೆನ್
ತೀರ್ಸಯೆರ್ ಗುರು ಮುಟೊನು ಕಟ್ಟದ್
ಆಯನೊಟ್ಟುಗು ಅರಸು ಬಾಲೆಲೆಗಲ್ಪ ಕಲ್ಪಯೆರ್ ||

9

ಕಲ್ಪಿಯೆರೆ ಪಾಂಚಾಲ ರಾಜನ
ಪುತ್ರ ದ್ರುಪದಲ ಸೇರ್ದಿತ್ತೆನೆ
ಅಲ್ಪ ದ್ರೋಣಡ ಮಿತ್ರ ಬಾಮೊಡೆ ಇತ್ತೆ ಕಲ್ಪೊಂದು ||

ಕಲ್ಪುನವು ಕೈದಾದ್ ಪೋನಗ
ನಿನ್ನನೇಪೊಲ ಮರಪಯೆಂದ್
ಪನ್ನಿ ಬಾಸೆನ್ ಕೊರ್ದು ದ್ರೋಣಗ್ ಪೋಯೆನಾ ದ್ರುಪದೆ ||

10

ದ್ರೋಣಗಸ್ವತ್ತಾಮೆ ಪುಟ್ಟಿಯೆ
ಭಾರದ್ವಾಜೆರ್ ಸೈತ್ತದಾನಗ
ಬಾರಿ ಬಡತನೊ ತಡೆಯೆರಾಯಿಜಿ ಮಗನ್ ಸಾಂಕಿಯೆರೆ ||
ಕಾಡ್‌ಡೆನೆ ಮಗನೊಟ್ಟು ಪಿದಡ್‌ದ್
ಬಾರ್ಗವೆರೆನಾಸ್ತಮೊಗು ಬತ್ತೆರ್
ಆರೆಡ್‌ದ್ ಮಹ ಪಗರಿನೊಂಜೆನ್ ದಾನೊ ಪಡೆವೊಂದು ||

11

ಬತ್ತೆರ್‌ಲ ಪಾಂಚಾಲ ರಾಜ್ಯೊಗು
ಅಲ್ಪ ದ್ರುಪದನೆ ಅರಸು ಪಂಡ್‌ದ್
ತಾನ್ ನಂಬ್‌ನ ದ್ರುಪದನಾ ಅರಮನೆಗ್ ಎತ್ತಿಯೆರ್ ||
ಬಾಕಿಲ್‌ಡ್ ಬಡ ಬೆರಣೆ ಪಂಡ್‌ದ್
ಏರ್ಲ ಪೊಗ್ಗೆರೆ ಬುಡುಜೆರುಲಯಿಗ್
ನೋತುದಕಲೆನ್ ಜೆಪುಡುದಾಸ್ತಾನೊಗುಲ ನುರ್ಕಿಯೆರ್ ||

12

ಎನ್ನ ಗುರ್ತೊನೆ ಇದ್ಯೊ ದ್ರುಪದಗ್
ನಮ್ಮೊ ಒಟ್ಟುಗೆ ಕಲ್ತನಾಕ್‌ಲ್
ಅಮ್ಮೆರೆನ ಗುರುಮುಟೊಟು ಪನ್ನುನ ನೆಂಪು ನಿಕ್ಕುಂಡೊ ||
ನರಮನಿಗ್ ನಾಯಿಲೆಡ ಅತ್ತಡ
ಪಿಲಿಕ್ ಪೀ ಪಂಜಿಲೆಡ ಬಡವುದ
ಬೆರೆಣೆರೆಡ ಅರಸುಲೆಗ್ ಸಕ್ಕೊನೊ ನಡಪು ಮುಲ್ಪಡ್ ||

13

ಪಂಡಿ ಪಾತೆರೊ ಕೇನ್ದ ದ್ರೋಣೆರೆ
ಮಂಡೆಗೇ ಸರಿ ದಾರೆ ಕಟ್ಟದ್
ಗೆಂಡೊ ಬಸೊನೆ ದೊರಿನ ಲೆಕೊ ತನ ಕಣ್ಣೆ ಕೆಂಪಾದ್ ||
ಕೇನ್ ಓ ಪಾಂಚಾಲ ಬೂಪತಿ
ಯಾನ್ ಕಲ್ಪಯಿ ಜೋಕುಲೆಡ ನಿನ
ಕಾರ್ ಕೈ ಕಟ್ಟದ್ ತರ್ಪವೆನ್ನೆನ್ ಕಾರ್ಡಿಕೆ ||

14

ಆಜೊ ಪಾಡ್‌ದ್ ಪಿದಡಿ ದ್ರೋಣೆರ್
ಸೀದ ಹಸ್ತಿನ ಪುರೊಕು ಬನ್ನಗ
ಸಾದಿಡೊಂಜೇ ಪಡ್ಪುಡಿತ್ತೆರ್ ಜೋಕ್ಕು ನೂತ್ತೊನ್ ||

ಊರುದರಸುಲೆ ಜೋಕುಲೊಟ್ಟಿಗೆ
ಲಾಗೊ ಪಾಡೊಂದುಪ್ಪಿ ಪೊದ್ಲನು
ತೂದು ಉಂತ್ಯೆರ್ ಗುರ್ತೊ ತಿಕ್ಕಾಜಿ ಏರ್ ಮುಕುಲುಂದು ||

15

ಅಪಗ ಧರ್ಮಜ ರತ್ನದುಂಗಿಲೊ
ಕೆದುಕು ರಟ್ವೆರ್ ಬೂರ್ಡ್ ಗುಂಡಿಗ್
ನಿಲ್ಕ್ ತೂಯೆರ್ ಕಣ್ಣಿಗಾಂಜಿಜಿ ದೆಪ್ಪುನೆಂಚಂದ್ ||
ಒರಿಯೊರಿಯೆ ಒಂಜೊಂಜಿ ಪನ್ನಗ
ಮಗನ ಮೋನೆನೆ ತೂದು ದ್ರೋಣೆರ್
ಕಿರೆಕ್ ಬೂರ್ಡ್ನ ಉಂಗಿಲೊನು ಈ ಮಿತ್ತ್ ದೆಪ್ಪು ಮಗ ||

16

ಪನುಪುನೆನ್ ಕೇನೊಂದುಲಾ ಮಗೆ
ಮುಳಿತ ಗಡ್ಡಿನ್ ಮಂತ್ರೊ ಮಲ್ತೆರ್
ಬಿರುಕು ಕೊಲ್ಪೆರ್ ಬುಡಿಯೆನಾಪಗ ತುಚ್ಚಿದುಂಗಿಲೊನು ||
ಕೆದುತ ಮೇಲ್ಗ್ ಬತ್ತನೆನ್ ಸರಿ
ನಿಲ್ಕ್ ತೂಯಿನ ಮಾತ ಜೋಕುಲು
ತೆಲಿತೆರಾಚಿರೊಡಪಗ ಉಂಗಿಲೊ ಕೊರೈ ಧರ್ಮಜಗ್ ||

17

ಮಾತೆರ್ಲ ದ್ರೋಣೆರೆನ ಕಾರ್ಗ್
ನೀಟೊ ಬೂರುದು ಪಂಡೆರಾಪಗ
ಈರೆ ಎಂಕ್ಲೆಗ್ ಕಲ್ಪವೊಡು ಧನುರ್ವೇದ ಸಾಸ್ತ್ರೊಲೆನ್ ||
ಆಂಡ್ ಕಲ್ಪವೆ ಪಂಡೆದಾರೇ
ತಾನ್ ಉಪ್ಪುನ ನಿಲೆನ್ ಪಂಡೆರ್
ಮಾತ ಜೋಕುಲು ಪಾರ್ದೆತ್ತೆರ್ ಅಜ್ಜ ಕೈತಡೆಗ್ ||

18

ಈತ್ ಸುದ್ದಿನ್ ಪಂಡೆರಜ್ಜಡ
ಅಪಗನೆ ದ್ರೋಣೆರೆನ್ ತರ್ಪದ್
ಪ್ರೀತಿ ಗೌರವೊಡಾರೆಗೇತ್ಲ ಮಲ್ತೆ ಸಮ್ಮನೊನು |
ಯಾನ್ ನಮ್ಮರಮನೆದ ಕರ್ಚಿಡ್
ಜೋಕುಲೆಗ್ ಧನುರ್ವೇದೊ ಕಲ್ಪೆರೆ-
ಗಾಪುನವೆ ಗುರುಮುಟೊನು ಕಟ್ಟವುನಂದಜಿಡ್ ಉಲ್ಲೆ ||

19

ಈರ್ ಕಲ್ಪಯೆರುಂತುವರೊ ಪನಿ
ಈರೆಗೆಂಚಿನ ಆವೊಡುಂದುದು
ದಾಚಿಣೊನು ಮಲ್ಪಂದೆ ತೆರಿಪಲೆ ಪನ್ನಗಾರಪಗ ||
ಯಾನ್ ಪಂಡೆನ ರೀತಿಡೇ ಮುಟೊ-

ನೀಯೆ ಮಲ್ಪದ್ ಕೊರ್ಲ ದೇಸೊದ
ರಾಜರಾಜೆರೆ ಜೋಕ್ಕು ಕಲ್ಪೆರೆಗಾಪಿ ನಮುನೆದವೆ ||

20

ಆಂಡ್ ಪಂಡೆದ್ ಬೀಸೈ ಜಾಗೆನ್
ತೂದ್ ತಟ್ವೆನ್ ಮಲ್ಪಯೆನೆ ಸರಿ
ನೂದು ಯೋಜನೊ ಉದ್ದಗೆಲೊ ಮುಟೊ ನಡುಟು ಕಟ್ಟಯೆರೆ
ಬಾರಿ ಗಟ್ಟಿದ ಕಲ್ಲೆ ಕಡ್ಡದ್
ಮೇಸ್ತಿನಕಾಲೆಡ ಮುಟೊನು ಕಟ್ಟದ್
ಆಂಡ್ ದ್ರೋಣೆರೆ ಬುಡರೊಗಿಲ್ಲೆಲ ಪೊರ್ದಕಂಟ್‌ದವೆ ||

21

ಕುತ್ತಿ ಪೂಜೆಗ್ ಸಾರೊ ಅಗೆಲ್ಡ್
ಪೊತ್ತಿ ಪೊರಿ ಬಲಸೊಂದು ತಾರಾಯಿ
ನರ್ತ್ ದೀಡೈರ್ ಗಡೆನ್ ಬಚ್ಚಿರೆ ಪೂಲುಮೊಟ್ಟಿಗೆನೆ ||
ನೆತ್ತೆರ್‌ದ ಆವರೊನು ಗಣೊಕುಲೆ-
ಗಲ್ಲ ಕೊರೈರೆ ಕೋರಿ ಕುರಿಕುಲೆ
ಕಡ್ತೆರೆತ್ಲ ತರೆನ್ ಸುತ್ತಲ ಎನ್ನೊ ದಿಕ್ಕೆಲೆಡ್ ||

22

ಎಡ್ಡೆ ಮುರ್ತೊದ ದಿನೊಟು ಗುರುಮುಟೊ
ಒಕ್ಕೆಲಾಪುನ ಸುದ್ದಿ ತೆರಿಪವಿ
ಒಕ್ಕಣೆದ ಓಲೆಲೆನ್ ದೇಸೊದ ರಾಜ ರಾಜೆರೆಗ್ ||
ಕೊರ್ದಯೆರ್ ಆಚಾರ್ಯ ದ್ರೋಣೆರ್
ಬತ್ತೆರೆತ್ಲ ಅರಸುನಾಕಲ್
ಪಟ್ಟೊದಾನೆದ ಬೆರಿಟ್ ತೇರ್ಡ್ ದೋಲಿ ರೇಂಜಿಲೆಡ್ ||

23

ಬತ್ತನಕಾಲೆನ್ ಬೀಸೈ ಪ್ರೀತಿಡ್
ಎದ್ದೊನುಂದೇ ಉಲಯಿ ಕುಲ್ಲದ್
ಪರೈರೆಗ್ ಬೊಂಡದವೆ ನೀರ್‌ನ್ ಸಬೆಕ್ ಪಟ್ಟಾಯೆ ||
ದ್ರೋಣೆರೇ ಗಣಹೋಮ ಮಲ್ತೆರ್
ವಾಸ್ತುಪೂಜೆನ್ ಕೃಪೆರ್ ತೀರ್ನದ್
ಸಾಸ್ತ್ರೊಡೇ ಸರಿ ಬ್ರಹ್ಮಕುಲಸೊನು ಮಲ್ತಿ ಬೆರೆಣೆರೆಗ್ ||

24

ಬಲ್ಮಣೊದ ಒಣಸಾಂಡ್ ಮಾತೆರ್
ಬತ್ತನಾಕಲ್ ಪೋಯೆರುಂಡುದು
ಕಲ್ಪಿಯೆರೆ ಸೇರಿಯೆರ್ ಜೋಕುಲು ಏತೊ ಬೇತೆಕ್‌ಲ್ ||

ಮಂತ್ರೊ ಬಾಣೊಲೆ ಬುಡ್ಡಿ ವಿದ್ಯೆನ್
ಯಂತ್ರೊ ಮೀನ್‌ದ ಕಣ್ಣೆಗಾಕುನ
ತಂತ್ರೊಲೆನ್ ಧನುರ್ವೇದೊ ನೀತಿನ್ ದ್ರೋಣೆ ಕಲ್ಪಯೆರ್ ||

ಕರ್ಣನ ವಿದ್ಯಾಬ್ಯಾಸೊ

ಓಡೊನೊಚ್ಚುನ ಮೀನ್ ಪತ್ತುನ
ರೂಡಿದಾ ಮೊಗವೀರನಾಕ್‌ಲ್
ರಾಜೆರೆನ ಪಲ್ಲೇಂಕಿ ತುಂಬುನ ಸೂತನಕ್‌ಲಾದ್ ||
ರಾಜೆರರಮನೆಡಿತ್ತಾನೆಟ್ ಪನಿ
ನಾಗರಿಕ ಏಗಿತೊಲು ಬತ್ತದ್-
ಲಾಯಿನೆಟ್ ಸರಿಯಾದ್ ಕರ್ಣನ್ ಸಾಂಕ್ಯೆನದಿರತೆನೆ ||

1

ರಾದೆಲಾ ಸೂತೆರೆನ ಜನಪದೊ
ಪಾಟ್ ಪಾರ್ವನೊಡಿತ್ತಿ ಕತೆಕಲೆ
ಡೇತೊ ಪುಣ್ಯೊದ ಕತೆನೆ ರಾಮಾಯಣೊಗು ಸರಿಯಾದ್ ||
ಬೇತೆ ಒಂಜಿಲ ಇದ್ದಿ ಪಂಡ್‌ದ್
ರಾಮನಾ ಗುಣೊ ಕೀರ್ತಿನೇಪೊಲ
ಪ್ರೀತಿಡೇ ಪುಗರೊಂದು ಪೊರ್ಲುಡೆ ಮಗಕ್ ಪನ್ನೆದಲ್ ||

2

ಬುಡ್ಡು ಬಾಣೊನೆ ವೈರಿ ತರೆನಾಲ
ರಟ್ಟಯಿನ ಆ ಪಗರಿ ಪಿರನೇ
ಬತ್ತದವು ಮೂಡಿಗನ್ ಸೇರುನ ಕತೆನ್ ಕೇನ್ನಗನೆ ||
ಕರ್ಣಗಾಂಡ್‌ಲ ಆಸೆ ಬಾಣೊದ
ವಿದ್ಯೆ ಕಲ್ಪನವಪಗ ಆಯೆನೆ
ಅಪ್ಪನಾ ಕೆಬಿಕ್ಯೆನ್ ಪಾಡ್‌ದ್ ಪೋಯೆ ಗುರುಮಟೊಕು ||

3

ತನಡ್‌ದೆಲ್ಯವೆ ಚೋಕುಲಲ್ಪನೆ
ಬಿರುನ ನೋಟೊನು ಪತ್ತೆರೊರಿಯೊರಿ
ಗುರುಕುಲಕಾಲೆಗ್ ಕಲ್ಪವೆರ್ ಸರಿ ನೋಟೊ ತೂಯೆರೆಗ್ ||
ಪಿರ ಪಿರಲ ಬುಡ್ಡವೆರ್ ಅಕ್‌ಲೆಡ
ಮರಟ್ ಪಕ್ಕಿದ ರೂಪೊ ದೀಡ್‌ದ್
ಸರಿಟ್ ಕಣ್ಣೆಗ್ ಹಾಕಿ ಪನ್ನಗ ತೀರ್ಜಿ ಏರೆಗ್‌ಲ ||

4

ಅರ್ಜುನೆನೆ ಸರಿ ಹಾಕೆ ಪಕ್ಕಿದ
ಕಣ್ಣೆಗಾಯೆನೆ ಪಗರಿ ನಾಟಯೆ
ನಿಲ್ಕೊನುಂದೇ ಇತ್ತಿ ಕರ್ಣೆನೆ ತಾಟಿ ಬೊಟ್ಟಿಯೆನೆ ||
ಕಯಿನ್ ಬೊಟ್ಟೆನೆ ಏರ್ ಪಂಡ್‌ದ್
ಗುರುಕುಲಾಯನ್ ತೂದ್ ಲೆತ್ತೆರ್
ಉಲಯಿಗಪಗನೆ ಏರ್ ಮಗ ಈ ಪನ್‌ಲ ಒಲ್ತಾಯೆ ||

5

ಗುರುಕು ಕೈ ಮುಗಿಯೊಂದು ಅದಿರತ
ಮಗೆನೆ ಎನ್ನವು ಪುದರ್ ಕರ್ಣೆನೆ
ಬಿರುತ ವಿದ್ಯೆನ್ ಕಲ್ಪೊಡುಂದುದು ಬತ್ತೆ ಈಡೆಗೆನೆ ||
ಕಲ್‌ಪದೆನ್ನನ್ ವೀರೆರೆನ ನಡು-
ಟೊರಿಯೆ ಕರ್ಣೆಲ ಉಲ್ಲೆ ಪನ್ನವಿ
ಪುದರ್ ಈರೆಗ್ ಬರಡ್ ಪಂಡ್‌ದ್ ಕಾರ್ ಪತ್ತಿಯೆನೆ ||

6

ನಿನ್ನ ಪಾತೆರೊ ಕೇನ್ನಗೆಂಕ್‌ಲ
ಕಲ್ಪವೊಡು ನಿಕ್ಕೊಂದ್ ಆಸೆನೆ
ಪುಟ್ಟದಾಂಡ್‌ಯ ಆಂಡ ಎಂಕೇ ಸಾದ್ಯೊ ಇದ್ಯತ್ತೊ ||
ಹಸ್ತಿನಾವತಿದರಸುನಾಕ್‌ಲ್
ಕಟ್ಟಯಿನ ಈ ಮಟೊಟು ಕಲ್ಪುನ
ಹಕ್ಕ್ ಚತ್ತಿಲೆಗ್‌ಂದ್ ಅಕ್‌ಲೆನ ಆಚ್ಚೆ ಉಂಡೆಂಕ್ ||

7

ವಿದ್ಯೆ ಕಲ್‌ಪುನ ಹಕ್ಕ್ ಮಾತೆರೆ-
ಗಿತ್ತಾನೆನ್ ದೆಂಗಾದ್ ಈರೇ
ಬೊಳ್ಳೆಯಿತ ಕುಜಲೈಪಿ ನಮುನೆಡ್ ಪನ್ನುನಾಚಿರೊನೆ ||
ಬ್ರಹ್ಮ ಸೂತ್ರೊನೊ ವೇದೊ ನೀತಿನೊ
ಕಲ್ತನಾ ಗುರು ಬಡವೆ ಎನ್ನನ್
ಕಲ್ಪದೀರೆ ಬದ್‌ಕಲೆಂದ್‌ದ್ ಕಾರ್ಗ್ ಪಿರ ಬೂರೈ ||

8

ಸೂತನಾ ಮಗೆ ಇತ್ತೆನೇ ಈ
ಪಾತೆರುವ ನನ ಕಲ್ತದಾನಗ
ದಾನೆ ಮಲ್ಪನೊ ಪನ್ನಿ ಪೋಡಿಗಿಡೇನ್ ಕಲ್ಪವಯೆ ||
ಪೋಲ ಮುಲ್ಪಡ್ಡೀಯೆ ಪನ್ನಗ
ಈರೆಡ್‌ದ್ ಮಾಮಲ್ಲ ಗುರುಕುಲೆ
ಡೇನ್ ಕಲ್ತದ್ ಬರುವೆ ಪಂಡ್‌ದ್ ಪೋಯೆನಲ್ಪಡ್‌ದ್ ||

9

ಸೀದ ಬತ್ತನ ಮಗನ ಮೋನೆನ್
ತೂದು ರಾದೆಗ್ ಆಂಡ್ ಪೋಡಿಗ್
ಕೇನಿಯೆರೆ ತೀರಂದೆ ಪಂಡಲ್ ಕುಲ್ಲು ಉಣಿಯೆರೆಗ್ ||
ಎನನ್ ನಾಡಡೆ ಪನ್ದ್ ಬೇಕೊನೆ
ಪಿದಡ್‌ದಪ್ಪೆನ ಕಾರ್ ಪತ್ತಾದ್
ನಡತ್‌ನಾಯನ್ ತೂದು ರಾದೆಗ್ ಮತಿಯೆ ತತ್ತಂಡ್‌ಲ ||

10

ನೆಲಟ್ ಬೂರುದು ಪುಡೆರ್‌ನಾಪಗ
ಅದಿರತೆನೆ ಸುದೆತಲ್ತ್ ಬತ್ತಾದ್
ಬುಡೆದಿ ಮೋನೆಗ್ ನೀರ್ ತಲಿತ್‌ದ್ ಗಾಳಿ ಪಾಡ್‌ನಗ ||
ಬುಲಯಿ ಕಣ್ಣಡ್ ನೀರ್ ಜಪುಡದ್
ಮಗೆನೆ ನನ ನಂಕಿದ್ಯೆ ಪನ್ನಗ
ತರ್‌ಕದಾಲೆನ್ ಉಲಯಿ ಕುಲ್ಲದ್ ಕೇಂಡೆ ನಡತ್‌ನೆನ್ ||

11

ಆಲ್ ಪಂಡ್‌ನ ಕೇನ್ದಲದಿರತೆ
ಬೇಜರಾಂಡಲ ತೆರಿಪವಂದೆನೆ
ಈಯೆ ಬುಲ್ಲಡ ಆಯೆ ಪೋಯಿನೆ ಪೆರಪ ಬರ್ಯೆರೆಗ್ ||
ಕೋಡೆನೇ ಗುರುಮಟೊಕು ಕಲ್ಪರೆ
ಪೋಪೆ ಪನ್ನೆನೆ ಎನಡ ಇತ್ತೆನೆ
ಪೋತ್‌ನೆನೆ ಕಲ್ಪರೆಗ್ ಕಂಡಿತೊ ಬರ್ವೆ ಈಡೆಗೆನೆ ||

12

ತನ್ನ ಮಗೆನೇ ಪನ್ನಿ ಮೋಕೆದ
ಅಚ್ಚಿ ಬೆಲ್ಲೊಗು ಕಂಬು ಆಯಿನ
ಅಪ್ಪೆ ರಾದೆಗ್ ಪೋರ್ತು ಪೋಯಿಜಿ ಕರ್ಣೆ ಇದ್ಯಂದೆ ||
ಅಟ್ಟಿಲೋಸ್‌ಗ್ ಉಲಯಿಗಾಲೇ
ಪೊಗ್ಗನಗ ಸಾಂಕನೊದ ಮಗನವೆ
ಪೊರ್ಲು ಮೋನೆದ ನೆಂಪು ಆನಗ ತಾನ್ ಬುಲ್ಲೆದಲ್ ||

13

ಪಿದಡಿ ಕರ್ಣೆನೆ ಓಡೊ ಕಡತ್‌ದ್
ಸಿಮೊತ ಗುಡ್ಡೆದ ಬರಿಟ್ ಇತ್ತನ
ಬದರಿಕಾಸ್ತಮೊ ತೂದು ರುಸಿಕುಲೆ ಕಾರ್ಗ್ ಬೂರೊಂಡೆ ||
ಬಿರುತ ವಿದ್ಯೆನ್ ಕಲ್ಪುವನ ಗುರು
ನಿಕ್‌ಲೆಡೇರ್‌ಂದಾಯೆ ಕೇನ್ನಗ
ಪರಸುರಾಮೆರ್ ಉಲ್ಲೆರತ್ತೊಯೆ ಮಲ್ಲ ಗುರು ಮಟೊಟು ||

14

ಮುಲ್ಲಡ್‌ದ್ ಮೂಡಾಯಿ ದಿಕ್ಕಡ್
ಸರೊ ನಾಲರದಾರಿ ಪೋನಗ
ತಿಕ್ಕುನಾಸ್ತಮೊ ಭಾರ್ಗವೆರೆನವೆ ಆರ್ ಕಲ್ಪವೆರ್ ||
ಮಿತ್ತ ಜಾತಿದ ಬೆರಣೆರೆಗ್ ಆ-
ರಿತ್ತೆ ಮಾತ್ತೊನೆ ಕಲ್ಪುವನೆ ಈ
ನೆಟ್ಟೆ ಪೋಲಯ ಪನ್ನಗಾಯೆನೆ ತಿರ್ಗೈ ಮೂಡಯಿಗ್ ||

15

ಪೋನಗನೆ ಬ್ರಾಣೆಂದ್ ಆರೆಡ
ಯಾನ್ ಕಳು ಪಂಡೊಂದು ಕಲ್ಪೊಡೆ
ಆಂಡ ಕಲ್ಪೆರೆಗಾದ್ ಪನ್ನುನ ದಾಲ ತಪ್ಪತ್ತೆ ||
ಪೋದು ಎತ್ತೆನೆ ಪರಸುರಾಮೆರೆ
ಆಸ್ತಮೊದ ಆ ಪುಣ್ಯೊ ಜಾಗೆಗ್
ತೂನಗನೆ ಸಂತೋಸು ಮನಸ್‌ಗ್ ಆದ್ ಉಂತೊಂಡೆ ||

16

ಅಲ್ಲ ತಿರ್ಗೊಂದಿತ್ತಿ ಸಿಸ್ಯಡ
ಪೊರ್ತು ಸಮಯೊದಂದಜಿ ಕೇನ್ದ ಉಲಯಿಗ್
ಪೊಗ್ಗುದುಂತುದು ತೂಯೆನಾಯೆನೆ ಪರಸುರಾಮೆರೆನ್ ||
ಕುಲ್ಲದಿತ್ತನ ಭಾರ್ಗವೆರೆನ
ದತ್ತ ಮೆಯಿಟೇ ಬಿಲ್ಲೆ ಬಾಣೊಲು
ಬುಕ್ಕೊ ಬಲತ್‌ಡ್ ಕುಡರಿ ಚತ್ತಿಲೆ ತರೆನ್ ರಟ್ಟಯಿನ ||

17

ದೂರೊಡುದು ಕಾರ್ಗಡ್ಡೊ ಬೂರ್ಗ್
ಎರ್ ಈ ಲಕ್ಕಂದ್ ಭಾರ್ಗವೆ-
ರಾಯನೇ ತೂವೊಂದು ಕೇನ್ನಗ ಕರ್ಣೆ ಪಂಡೊನುವೆ ||
ಯಾನ್ ಪಡ್ಡೊಯಿ ಕಡಲ ಬರಿತವೆ
ಕ್ಷೇತ್ರೊ ತುಳುನಾಡ್‌ಂದ್ ಪನ್ನುನ
ಊರುದಾ ತುಳು ಬ್ರಾಣೆ ಪುದರ್‌ಡ್ ಕರ್ಣೆ ಕೆದಿಲಾಯೆ ||

18

ಬಿಲ್ಲೆ ವಿದ್ಯೆನ್ ಕಲ್ತದೇನೇ
ಕಲ್ಪುವನ ಗುರು ಆವೊಡುದುದು
ಬತ್ತೆ ಈಡೆಗ್ ಸ್ವಾಮಿ ಕಲ್ಪಲೆ ಪನ್ನೆ ಪುಡ್ಯಾಡ್ಡೆ ||
ಎನ್ನ ತಪಸ್‌ದ ಸಗ್ಗಿಡೆಂಕೇ
ತಿಕ್ಕಿ ನಾಡ್‌ನ್ ದಾನೊ ಮಲ್ತನ
ಪುನ್ನೊ ಬೂಮಿಯೆ ತುಳುವೆರೆನ ಸಿರಿ ನಾಡ್‌ದಾಯೆನೆನೊ ||

19

ಆವಡ್‌ಯ ನಿಕ್ಕೇನ್ ಕಲ್ವದ್
ಆತ್ಮೊ ಸಂತೋಸುನುಲ ಪಡೆವೆನೆ
ಮೂಲೆ ಉಂತುಲ ಪಂಡ್‌ದಾಯನ್ ತನ್ನ ಸಿಸೈರೆನ ||
ಕೂಟೊಡೇ ಉಂತಾದ್ ಕಲ್ವವಿ
ರೀತಿನೇ ತೂವೊಂದು ಕರ್ಣೆನೆ
ಭಾರ್ಗವೆರೆ ಏಗಿತೊನು ಮನಸ್‌ಡೆ ತಾನ್ ಪುಗರೊಂಡೆ ||

20

ಕಲ್ವಯಿನ ಧನುರ್ವೇದೊ ಸಾಸ್ತ್ರೊನು
ಕಲ್ಪೊನುಂದೇ ಗುರುನ ಸೇವೆಡ್
ಪರಮ ತತ್ತೊನು ತೆರಿಯೆನೇರ್‌ಲ ತೆರಿಯಂದಿತ್ತಾನೆನ್ ||
ಕೃತಯುಗೊಟು ಬ್ರಗುರಾಮೆ ತ್ರೇತಾ-
ಯುಗೊಟು ರಗುರಾಮನವೆ ಅಬತರೊ
ಯುಗೊ ಯುಗೊಟು ಸಿರಿ ರಾಮ ತತ್ತೊನೆ ಬೋಡು ಊರ್ಜಿತೊಡು ||

|| ಏಕಲವ್ಯನ ಗುರುದಕ್ಷಿಣೆ ||

ಕಲ್ಪಯೆರ್ ಗುರು ಮಟೊಟು ದ್ರೋಣೆರ್
ಅಗ್ನಿಯಸ್ತ್ರೊಗು ಬರ್ಸೊ ಬರ್ಸೊನು
ರಟ್ಟಯೆರೆನೇ ವಾಯು ವಾಯುಗು ಸರ್ವೆ ಎದುರಸ್ತ್ರೊ ||
ಸರ್ವ ಬಾಣೊಗು ಗರುಡೆ ಗರುಡೆಗ್
ವಿಷ್ಣು ಮಂತ್ರೊದ ಬಾಣೊ ಸೂರ್ಯಗ್
ಕತ್ತಲೆನೆ ಕತ್ತಲೆಗ್ ರವಿನವೆ ಪಗರಿ ಮಂತ್ರೊದವೆ ||

1

ದರ್ಮಜಿನೆ ಧನುರ್ವೇದೊ ನೀತಿನ
ಕಲ್ತದಾಯೆ ಯುದಿಸ್ಪಿರೆಂದ್‌ದ್
ಮಲ್ಲ ಪುದರ್‌ನ್ ಪಡೆಯೆ ಭೀಮಗ್ ಗದತ ಅಭೈಸೊನೆ ||
ಅರ್ಜುನನ ಗುಣೊಕುಲೆಗ್ ಸರಿತವೆ
ಪತ್ತ ಪುದರ್‌ಡ್ ಲೆತ್ತೆರಾಯನ್
ಗೆಲ್ಲುನಕೆಲೇರುಂಡು ಪಂಡೆರ್ ದ್ರೋಣೆ ಮಾತೆರೆಡ ||

2

ನಕುಲ ಸಾದೇವೆರ್‌ಲ ಲಡಯಿಡ್
ಬಿರ್‌ಸೆರಾಯೆರ್ ದುಸ್ಸೆ ದುರ್ರೋ-
ದನೆಲ ಯುದೊಡು ಗದೆನ್ ಬೀಸೈರೆ ಕಲ್ತೆ ಗುರುಕುಲೆಡ ||
ಬುಕ್ಕೊದಾಕ್‌ಲ್ ಆಕ್‌ಲಾಕ್‌ಲೆ

ಸಗ್ಗಿಗೇ ಸರಿಯಾದ್ ಕಲ್ತೆರ್
ಒಕ್ಕಣೆಗ್ ತಿಕ್ಕಂದಾನಾಯೆನೆ ಪಾರ್ತೆ ಕುಂತಿ ಮಗೆ ||

3

ಕಾಡ್‌ಡಿತ್ತನ ಸಬರ ಜಾತಿಡ
ಏಕಲವ್ಯೆನೆ ಪನ್ನಿ ಜವನಗ್
ಬಾಣೊ ಬುಡಿಯೆರೆ ಕಲ್ಪೊಡುಂದುದು ಆಸೆ ಏರ್ದಾಂಡ್ ||
ತಾನೆ ಅಮ್ಮಡ ಕೇನ್ನಗಾಪಗ
ಆ ಹಿರಣ್ಯಕೆ ಪಂಡೆ ಬೆರಣೆರ್
ಹೀನೊ ಜಾತಿಡ ನಂಕ್ ವಿದ್ಯೆನ್ ಅಕ್‌ಲ್ ಕಲ್ಪವೆರೊ ||

4

ಹಸ್ತಿನಾವತಿಡೊಂಜಿ ಗುರುಮಟೊ
ಕಟ್ಟಯಿನೆ ಬೀಸೈಂದ್ ಪನ್ನೆರ್
ಅಲ್ಪದಾ ಗುರುಕಲ್ಪವೆರೊ ಕೇನ್ನೆಂದ್ ಪಿದಡಿಯೆನೆ ||
ಬತ್ತನಯೆ ಗುರು ಮಟೊತ ಜಗಲಿಡ್
ಕುಲ್ಲನಗ ಅಪುಲಿತ್ತಿ ಜೋಕುಲು
ಒಲ್ಲು ಬತ್ತನೆ ಕೇನ್ನಗಾಯೆನೆ ಪಂಡೆನಕ್‌ಲೆಡನೆ ||

5

ಏನ್ ಕಾಡ್‌ದ ಸಬರನಾ ಮಗೆ
ಬಾಣೊ ರಾಪವಿ ಕೆರಮೊ ಕಲ್ಪುನ
ಆಸೆಡೇನಿನಿ ಈಡೆ ಬತ್ತನೆ ನಿಕ್‌ಲ್ ಗುರುಕುಲೆನ್ ||
ತೋಜವರೊ ಪನ್ನಗನೆ ಆಯನ್
ದ್ರೋಣೆರೆನ ಎದುರುಂತದಾನಗ
ನೀಟೊ ಕಾರ್‌ಗ್ ಅಡ್ಲೊ ಬೂರಿಯೆ ಪುದರ್ ಪಂಡೊಂದು||

6

ಲಕ್ಕ ಲಕ್ಕಲ ಏರೆ ಮಗೆ ಈ
ಒಲ್ಲು ಬತ್ತನೆ ಪನ್ದ್ ದ್ರೋಣೆರ್
ಮುಟ್ಟ ಉಂತಡ ದೂರೊಡುದು ಸರಿ ಪನ್ನ ಪನ್ನಗನೆ ||
ಲಕ್ಕನಯೆ ಕೈ ಮುಗಿದ್ ಉಂತಿಯೆ
ಮುಟ್ಟ ಉಂತಡ ಪಂಡಿ ಪಾತೆರೊ
ಸುರೈಡೇ ಸರಿ ಕೆಬಿಕ್ ಕುತ್ತನಲೆಕೊನೆ ಆಂಡಯಗ್ ||

7

ಪಗರಿ ವಿದ್ಯೆನ್ ಕಲ್ಪೆರೆಂದ್‌ದ್
ಗುರುಕುಲೀರೆಡ ಕೇನ್ನೆರಾದೇ
ಸಬರ ಜಾತಿಡ ಆ ಹಿರಣ್ಯಕ ಮಗೆನೆ ಯಾನೀಡೆ ||
ಮನಸ್‌ದಾಸೆಡ್ ಬತ್ತನಾಯಗ್

ಕಲ್‌ಪದೆನ್ನನ್ ಮಲ್ಲಿ ನರಮನಿ
ಕೊರಿಯೆರನ್ನಡ ದಾಲ ಇದ್ದಿಂದಾಯೆ ಬೂರೊಂಡೆ ||

8

ಚತ್ತಿಯೆರೆಗತ್ತಂದೆ ಬಾಣೊದ
ವಿದ್ಯೆ ಏರೆಗ್ ದಾಯೆ ಯಾನ್‌ಲ
ಕಲ್ಪವಯೆ ಅನ್ಯೆರೆಗ್ ಪೋಲಯ ಬೋಂಟೆ ದೇರಿಯೆರೆ ||
ಬಿಲ್ಲೆ ಬಾಣೊಲು ದಾಯೆ ನಿಕ್ಕ
ಬರ್ರಿ ದೊಣ್ಣೆಲು ಈಟಿ ತಂದೆಲ್
ಬುಕ್ಕೊ ಪರಿತೆದ ಕತ್ತಿ ಕಡ್ಬೆರೆ ಈತೆ ಯಾವಂದೊ ||

9

ಸಬರ ಚಾತಿದ ಆಣಗಾಪಗ
ಎದುರು ಉತ್ತರೊ ಕೊರೈರಾಯಿಜಿ
ತರೆನ್ ಕಿಂಬುದು ಉಂತ್ಯೆ ದ್ರೋಣೆರೆ ಮೋನೆ ತೂವೊಂದು ||
ಮಟೊತ ಉಲಯಿಗ್ ಪೊಗೈ ಸುದ್ದೊದ
ಕಲಸೊ ಮಲ್ಪಯೆರಾಂಡೆ ನನ ಈ
ಮುಲುಪ ಉಂತಡ ಪೋಲ ಪಂಡ್‌ದ್ ಗೌಜಿ ಲಕ್ಕಯೆರ್ ||

10

ದ್ರೋಣೆರೆನ ಪಾತೆರೊಡು ಕಣ್ಣೆಡೆ
ನೀರ್ ಜಪುಡದ್ ಪಿದಯಿ ಬತ್ತದ್
ತಾನ್ ಅಗರ್‌ದ ಬರಿಟ್ ಉಂತುದು ತೂಯೆ ಕಲ್ಪವುನ ||
ಏಳ್ ದಿನೊಟಿಂಚಾಯೆ ಪಿದಯಿಡೆ
ತೂದು ಅಂದಜಿ ಮಲ್ತೊನುಂದೆ
ಪೋಯೆ ಕಾಡ್‌ಗ್ ಗುರುನ ರೂಪೊನು ಮನಸ್‌ಡುಂತಾದ್ ||

11

ಆವೆ ಮಣ್ಣೆಡ್ ಮಲ್ತೆ ದ್ರೋಣೆರೆ
ಮೂರ್ತಿನೇ ಸರಿಯಾದ್ ಕಲ್ಲದ
ಪೀಟೊಡೈನ್‌ಲ ದೀಡ್ಡ್ ಕಾಡ್‌ದ ಪೂತ ಮಾಲೆಲೆನ್ ||
ಪಾಡ್‌ದಾಯೆನೆ ಬಗ್ಗಿ ಬಾವೊಡು
ಪೂಜೆ ಮಲ್ತದ್ ತಲಕೆದಾ ಬಿರು
ನೀಟೊ ಪತ್ತದ್ ಪಗರಿ ಕೊಲ್ಪಯೆ ಮೂರ್ತೊ ತೂವಂದೆ ||

12

ನೋಟೊ ತೂದೇ ಪಗರಿ ರಟ್ಟಯೆ
ದ್ರೋಣೆರೆನ್ ನೆನೆತೊಂದು ಬಗ್ಗಿಡ್
ಆಪಗಾಪಗ ಮಲ್ತೆ ಸಾದನೆ ನುಪ್ಪು ನೀರ್ಪುಡುದು ||
ರಾಪಿ ಪಕ್ಕಿಗ್ ಪಾರ್ನ್ ಜಿಂಕೆಗ್

ಹಾಕುವೆನೆ ಸೊರೊ ಕೇಂಡ್‌ನಾಡೆಗ್
ಬಾಣೊ ಬುಡ್ಪುನ ಸಿದ್ದಿ ಆಯಗ್ ಪಲಿತ್‌ದಾಂಡಪಗ ||

13

ಸಕ್ಕರೆನ್ ಪಿಜಿನಾದ್ ತಿನ್ನುನ
ತತ್ತೊದಾ ಸಿದ್ಧಾಂತೊಡೇರ್‌ಲ
ಬಗ್ಗಿ ಬಾವೊಡು ಮಲ್ತಿ ಸಾದನೆಡಾವು ಪರಿಪೂರ್ಣೊ ||
ಉತ್ತಮೆನೆ ಕಲಿ ಪಾರ್ತೆನಾಯಗ್
ಮಿತ್ತದಕ್‌ಲೇರುಂಡು ಪಂಡ್‌ದ್
ಕಲ್ಪಯಿನ ಗುರು ಪುಗರ್‌ನಾಪಗ ಹೆಮ್ಮೆ ಏಂಡ್‌ಯಗ್ ||

14

ಅರಸು ಬಾಲೆಲು ಬೋಂಟೆ ದೇರುನ
ಕುಸಲ್‌ನಬ್ಬೆಸೊ ಮಲ್ತೊಡುಂದುದು
ಗುರುಕುಲೇ ಕಾಡ್ತಾಡೆ ಲೆತೊನುದು ಪೋಯೆರೊಟ್ಟಿಗೆನೆ ||
ಕೊರೆಪಿ ನಾಯಿಲು ಅಕ್‌ಲೆನೊಟ್ಟಿಗೆ
ಕೊರೆತೊನುಂದೇ ಬನ್ನಗಾಪಗ
ಅವೆನ ಬಾಯಿಗ್ ಪಗರಿ ನೂರ್‌ನಗಾಂಡ್ ಆಚಿರೊನೆ ||

15

ಏರ್ ಬುಡ್ಡುಕ್‌ಲ್‌ಂದ್ ನಾಡೈರ್
ಕಾಡ್‌ಡೇರ್‌ಲ ತೋಜಿಜೆರ್ ನಿಜೊ
ದ್ರೋಣೆರೆಗ್ ತೆರಿದಾಂಡ್ ಸೌದೊಗು ನೋಟೊ ಪತ್ತುನವೆ ||
ಸಾಸ್ತೊ ಮಹದನುರ್ವೆದೊಡುಪ್ಪುನೆ-
ನೇರ್ ಕಲ್ತದೇರ್‌ಂದ್ ಜೋಕುಲೆ
ಮೋನೆ ತೂನಗ ಅರ್ಪುನೆನೆ ಗುರುಕುಲೆಡ ಪಂಡೊನುವೆ ||

16

ಎನ್ನನೀರೇ ಮೂಜಿ ಲೋಕೊಡು
ಬಿರೆ ಮಲ್ಪುವೆ ಪನ್ನರಾನಿಯೆ
ಇತ್ತೆ ಸೌದೊನು ಕೇಂಡಿ ಜಾಗೆಗೆ ನೋಟೊ ಪತ್ತುನಯೆ ||
ಎನ್ನಡ್‌ದ್ ಮಾ ಬಿರೆನೇ ಒರಿ
ಉಲ್ಲೆ ಪಂಡ್‌ದ್ ತೂಯೆ ನಾಯಿಲೆ
ಬೊಬ್ಬೆದಾ ಬಾಯ್ಕುಲಯಿ ಪಗರಿಲೆ ಬುಡ್ಡು ದಿಂಜಯಿನ ||

17

ಮನಿಪಡರ್ಪುನ ನಾಡೊ ಆಯನ್
ಪುದೆಲ್ ದಿಂಜಿನ ಕಾಡ್ಡ ಮರಕುಲೆ

ಇಡೆಟ್ ಉಲ್ಲೆನೊ ತೂಕೊ ಪಂಡ್‌ದ್ ನಾಡ್ಯೆರವುಲೊರೆ ||
 ಸಬರೆನ ಗುಡ್ಲೆಲ್‌ನ್ ತೂಯೆರ್
 ನಡುಟು ಪೊರ್ಲದ ತಟ್ ಜಾಗೆಡ್
 ಅಡಿತ್‌ದಂಬಿನ್ ಸುದೊಡ್ಲಿತ್‌ನ ಆ ವಟಾರೊಡುಲ ||

18

ಕಲ್ಲ ಪೀಟೊಡು ಒಂಜಿ ಮೂರ್ತಿನ್
 ಕುಲ್ಲದೇ ಒರಿ ಜವನೆ ಪೂಜೆನ್
 ಮಲ್ಪಿ ಪೂರ್ತುಗು ಬತ್ತನಕ್‌ಲೆನ್ ತೂದುಲಾಚಿರೊಡು ||
 ದಿಡ್ಡ ಲಕ್ಕ್‌ದ್ ಗುರುನ ಕಾರ್‌ಗ್
 ಅಡ್ಲೊ ಬೂರುದು ಲಕ್ಕ್‌ದುಂತಿಯೆ
 ಗುರೊ ತಿಕ್ಕ್‌ಚೊ ಸ್ವಾಮಿ ಗುರುಮಟೊಕಾನಿ ಬತ್ತನಯೆ ||

19

ಕಲ್ಪವರೊ ಬಿರು ವಿದ್ಯೆ ಪಂಡ್‌ದ್
 ಬಗ್ಗಿಡೇ ಕೇಂಡ್‌ನಯೆ ಸಬರೆ
 ಕುರ್ದೆ ಯಾನೇ ಸ್ವಾಮಿ ಕಲ್ತೆನೇ ಈರೆನಾ ದಯೊಟು ||
 ಅಚ್ಚಿರೊಡು ಗುರು ಕೇಂಡೆರಾಯಡ
 ಕಲ್ಪದಿಚೆ ನಿಕ್ಕೇನ್ ಏರ್ಡನೊ
 ಕಲ್ತದೀಯೇ ಸುಳ್ಳು ಪನ್ನನ ಪನ್ನಗಾ ಸಬರೆ ||

20

ಆನಿ ಕಲ್ಪನ ಆಸೆಡೇನೇ
 ಈರೆನಾಡೆಗ್ ಬತ್ತನಾಪಗ
 ತಾನ್ ಕಲ್ಪಯೆರಾಪುಜಿಂತ್‌ದ್ ಪಂಡರೀರಾನಿ ||
 ಯಾನ್ ಪಿರ ಬತ್ತನಯೆ ಈರೆನ
 ಮೂರ್ತಿನೇ ಎದುರೀದ್ ಕಲ್ತೆನೇ
 ಬಾಣೊ ಬುಡ್ಡುನ ವಿದ್ಯೆ ಮಾತೆನ್ ಮಲ್ಪಿ ಸಾದನೆಡ್ ||

21

ಸ್ವಾಮಿ ಈರಿತ್ತೆನ್ನ ನೆತ್ತಿಗ್
 ಪ್ರೀತಿಡೇ ಕೈದೀಡ್ ಎನ್ನನ್
 ಈತ್ ಸಿಸೈರೆ ಒಟ್ಟುಗೇನ್‌ಲ ಒರಿಯೆ ಪನೊಡುಂದು ||
 ಕಾರ್‌ಗಡ್ಲೊನೆ ಬೂರು ಬುಲ್ಪುನ
 ಏಕಲವ್ಯನ್ ಲಕ್ಕ್‌ದುಂತದ್
 ಆಯನಾ ತರೆಮೆಯಿನ್ ಈಸನಗಾಂಡ್ ಅರ್ಜುನಗ್ ||

22

ಮಚ್ಚಿರೊದ ಪುರಿಗಂಟ್‌ಡಾಯೆನೆ
 ತನ್ನ ಬಿಮ್ಮೊನು ತುಚ್ಚಿ ಗುರುಕುಲು

ಎನ್ನ ಸಿಸೈನೆ ಈಯೆ ಅಂದ್‌ಡ ಕೊರ್ದ ದಕ್ಷಿಣೆನ್ ||
 ಪನ್ನಗನೆ ಎಂಚಿನೆನ್ ಕೇನ್ವರ್
 ಕಡ್‌ದೇ ಕೊರೊಡೇನ್ ಈತರೆ-
 ನಿತ್ತೆನೆ ಪಂಡೊಂದು ಬಗ್ಗ್‌ದ್ ನಾಲಿನೊಡ್ಲಯೆನೆ ||

23

ಬಲತ ಕೈತವೆ ಕೊಂಬ ಬಿರೆಲ್‌ನ್
 ಕೊರುದು ಗುರು ರುಣೊ ಸಂದವೊನು ಈ
 ಪನುಪುನೆನ್ ಕೇಂಡ್‌ನವೆ ಸಾತ್‌ಗ್ ದೆತ್ತೆ ತಳ್ವಾರ್ ||
 ತಜಮರತ ಮೇಲ್ದಾಯೆ ಬಲತವೆ
 ಕಯಿನ್ ದೀಡ್‌ದ್ ಕೊಂಬ ಬಿರೆಲ್‌ಗ್
 ಕಡ್‌ಪುನಗ ತುಂಡಾದ್ ರಟ್ಟ್‌ನ ತುಂಡುನೇ ಪೆಜಿದ್ ||

24

ದ್ರೋಣೆರೆನ ಕಾರ್ಲವುಲು ದೀಡ್‌ದ್
 ದಾರೆ ಕಟ್ತ್‌ದ್ ಅರಿಪಿ ನೆತ್ತೆರ್ -
 ನಾಯೆ ಉರ್ದಿಯೆ ದೂಳು ಮಣ್ಣಾಡ್ ಬೇನೆ ತಡೆಯೊಂದು||
 ಬಾನೊಡೊರ್ಮೆಲ ಮುರೊದಾ ಸೊರೊ
 ಕೇಂಡ್‌ದಾನಗ ದ್ರೋಣೆರಪಗನೆ
 ಬೋದೊ ಮತಿ ಇದ್ಯಂದೆ ಬೂರೈರ್ ಸಬರ ಬಿತ್ತಲ್‌ಡ್ ||

25

ಸಿಸೈನಾಕ್‌ಲ್ ಗಾಳಿ ಪಾಡ್‌ದ್
 ಲಕ್ಕ್‌ದುಂತದ್ ಪೋನಗಾಪಗ
 ಧರ್ಮಜನ ಕೆಬಿಟೊಂಜಿ ಗುಟ್ಟುನು ಪನ್ನೆ ತೆರಿಪಯೆರ್||
 ದುಸ್ಪೆರೆಗ್ ಅಲ್ಪೆರೆನ ಸಾಯೊನೆ
 ತಿಕ್ಕುನೆನೆ ಈ ಸಬರೆ ಜಾತಿಡ್
 ಅಲ್ಪೆ ದುಸ್ಪೆರೆಗಾವೆ ಸಾಯೊಗು ನಿಕ್‌ಲೆಗೆದುರುಂತ್ಲೆ ||

26

ದುಸ್ಪ ಕೌರವನಕ್‌ಲ್ ನಿಕ್‌ಲೆಗ್
 ಅನ್ಯಯೊನು ಮಲ್ತೆರ್‌ಡ ಅಕ್‌ಲೆಗ್
 ಅಲ್ಪ ಜಾತಿದ ಸಬರೆ ಸಾಯೊನು ಮಲ್ಪೆ ಕೌರವಗ್ ||
 ಎನ್ನ ತಪ್ಪುಡು ನಿಕ್‌ಲೆಗೆಡ್ಲೆನೆ
 ಮಲ್ಪುನಾಸೆಡ್ ಮಲ್ತೆ ಏರ್ಡಲ
 ಸುದ್ದಿ ಪನ್ನನ ಬೊಡ್ಡಿ ಆಪುನೆನೀಯೆ ತೂವೊನುವ ||

ಕರ್ಣಗ್ ಗುರುಸಾಪೊ

ಭಾರ್ಗವೆರೆನಾಸ್ತಮೊಡು ಕರ್ಣನೆ
ಬಾಣೊ ಬುಡ್ಡುನ ವಿದ್ಯೆ ಕಲ್ತದ್
ಮೀನ್ದ ಯಂತೊನು ತಾಲ್ವೆ ರಾಪುನ ಪಕ್ಕಿಗಾಕುವೆನೆ ||
ಕೋಟೆ ಕಟ್ಟುವೆ ಕೋಟೆನುರ್ಕುವೆ
ತೇರ್ನೇರ್ದ್ ಲಡಯಿ ಮಲ್ತೆರೆ
ರಾದೆ ಸಾಂಕ್‌ನ ಮಗೆ ಮಹಾರತೆನಾಯೆ ಕಲ್ತೊಂದು ||

1

ಪುಲ್ಯಕಾಂಡೆನೆ ಲಕ್ಷೆ ಮೀಯೆರೆ
ಸುದೊ ಬಗ್ಗಿಡ್ ನೀರ್ಡ್ ಮುರ್ಕುದು
ಮಿತ್ತ್ ಬತ್ತ್‌ದ್ ಚಂಡಿ ಕುಂಟುಡೆ ಪನ್ನೆ ಗಾಯತ್ರಿ ||
ಬುಕ್ಕೊ ಆಸ್ತಮೊ ಸೇರ್ದ್ ಪೆತ್ತಲೆ
ಬಯ್ಯಣೆಗ್ ಬಯಿ ಪಂತಿ ಪಾಡ್‌ದ್
ಕಲ್ತನಾ ಧನುರ್ವೇದೊದಬ್ಬೆಸೊ ಮಲ್ಪೆದಿನೊ ನಿತ್ಯೊ ||

2

ಕರ್ಣನಂಚಿನ ಸಿಸೈರೀತ್ನಿಟ
ತಿಕ್ಕಚೆರ್ ಎನ ಪುಣ್ಯೊಡಿಂಬೈನೆ
ಕಲ್ಪುವೆನೆ ಪಂಡೊಂದು ಇತ್ತೆರ್ ದಿನೊಲ ಭಾರ್ಗವೆರ್ ||
ಇತ್ತೆ ಕಲ್ತದ್ ಆಯ್ಕೆ ಸಿಸೈನ್
ಮುಲ್ಪ ಉಂತುಲ ಪಂಡ್‌ದೇತೊ
ಮಲ್ತಿ ಸಾದನೆ ನೀರ್ಡ್ ಹೋಮೊನೆ ದೀಡಿಲೆಕ್ಕಾಂಡ್ ||

3

ಕಲ್ತನಾಯನ್ ಪೋಲ ಪನಿಯೆರೆ
ಕಸ್ಸೊ ಗುರುಕುಲೆಗಾದ್ ಚಿಂತೆಡ್
ಮದ್ಯನಡ್ ಆ ಕರ್ಣ ಜಕ್ಕಿಲ್‌ಡಾರ್ ತರೆದೀಡ್ ||
ಜೆತ್ತಿನಾರೆಗ್ ಎಡ್ಡೆ ನಿದ್ರೆನೆ
ಸೊರೊದಿಂದ್ರಗ್ ಆಂಡ್ ಏಚನೆ
ಎನ್ನ ಮಗೆನರ್ದುನಗ್ ಪಗೆತಯೆನಾವೆನೀ ಕರ್ಣೇ ||

4

ಪರಸುರಾಮೆರೆ ಸಿಸೈ ಆಯಿನ
ಬಿರ್‌ಸನೇರೆಗ್ ಸಾದ್ಯೊ ಗೆಲ್ಪೆರೆ
ಇನಿಯೆ ಆಯನ್ ಸೋಲ್ಪುವುನ ಕಣಿ ಗೊಬ್ಬಿಯೆರೆಗಿಂದ್ರೆ ||
ಗುರುನ ಸಾಪೊಡು ಕಲ್ತಿ ವಿದ್ಯೆನೆ

ಮರತ್ ಪೋಯೆರೆಗಾದ್ ಕರ್ಣನ
ತುಡೆನ್ ಕುರುವಾಯಾದ್ ಕೊರೆಯೆನೆ ಮಲ್ಲ ಸೀಂತ್ರಿದಯೆ ||

5

ಸೂಂಬು ತುಡೆತಾವೊಂದು ನೆತ್ತೆರ್
ದಾರೆದಾರೆನೆ ಅರಿನಗಾಪಗ
ಬೇನೆ ತಡೆದೇ ಕುಲೈ ಗುರುಕುಲೆಗೆಚ್ಚರಾವುಂದು ||
ತೋರೊ ತುಡೆಡ್‌ದ್ ಜತ್ತಿ ರಗ್ಗೊಡು
ನಾಲಿ ಚಂಡಿಯೆ ಆಯ್ಕೆ ಗುರುಕುಲು
ಕೂರಿಗೆದ ಮಹ ನಿದ್ರೆ ಬಿರಿನಗ ಲಕ್ಕಿರಾರಪಗ ||

6

ಕರ್ಣನಾ ತುಡೆ ತುಂಬಿ ಕೊರೆವೊಂ-
ದಿತ್ತನೆನ್ ತೂವೊಂದು ಕೋಪೊಡು
ದಿಡ್ಡ ಲಕ್ಕಾದ್ ಕರ್ಣ ಮೋನೆನೆ ತೂದು ಭಾರ್ಗವೆರ್ ||
ಕಲ್ಪಿಯೆರೆ ಬ್ರಾಣೆಂದ್ ಪಂಡ್‌ನ
ಕಳ್ಳೆ ಈಯೆನೊ ಬ್ರಾಣೆ ಪನ್ ಪನ್
ಚತ್ತಿಯೆರ್ ಅತ್ತಂದೆ ಬೇನೆನ್ ತಡೆವೆರೇರಿಂಚ ||

7

ತುಂಬಿ ಕೊರೆವೊಂದುಂಡು ಈಯೆ
ಗುಂಡು ಕಲ್ತದ ಲೆಕೊನೆ ಕುಲ್ತದ
ನಂಬುವೆನೊ ನಿನನೇನ್ ಬೆರಣೆನೆ ಅತ್ತ ಕಂಡಿತೊನೆ ||
ಎಂಕ್ ವಂಚನೆ ಮಲ್ತ್ ದೀಯೆ
ಕಂಡು ಬುದ್ಧಿಡ್ ಕಲ್ತಿ ವಿದ್ಯೆನೆ
ದಂಡೊ ಆವಡ್ ಪನ್ದ ನೆಲಕ್ಕಿ ಹಾಕ್‌ದುಂತಿಯೆರ್ ||

8

ಕೊರೆಯಿನಾ ಕುರುವಾಯಿ ರಾನಗ
ತೆಡಿಲ್ ಹಾಕ್‌ನ ಬಾರೆದಂಚೆನೆ
ಮಗ್‌ರ್ ದಿತ್ತನ ಕರ್ಣ ಗುರುಕುಲೆ ಮೋನೆ ತೂವೊಂದು ||
ಕಯಿನ್ ಮುಗಿಯೊಂದಪಗ ಕಟಕಟ
ತೆಲಿಪುನಗ ಆಚಿರೊಡು ತೂಯೆರ್
ಪರಸುರಾಮೆರ್ ಆಯ ಮೋನೆನ್ ದಿಸ್ಪಿ ದೆಪ್ಪಂದೆ ||

9

ಸೂತೆರೆನ ಜಾತಿದಯೆ ಗುರುಕುಲೆ
ಬ್ರಾಣೆ ಅತ್ತೇ ಅತ್ತ ಅದಿರತೆ
ಸಾಂಕ್‌ನಾ ಮಗೆ ಗಂಗೆದಾ ಬರಿಟಿತ್ತಿ ಊರುದಯೆ ||

ಬಾಣೊ ಬುಡ್ಡುನ ವಿದ್ಯೆ ಕಲ್ಪರೆ
ಆಸೆಡೇ ದ್ರೋಣೆರೆನ ಗುರುಮಟೊ
ನಾಡೊನುಂದೇ ಹಸ್ತಿನಾವತಿ ಗೆತ್ಯೆನೊಂಜಿದಿನೊ ||

10

ಆರೆಗಡ್ಡೊನೆ ಬೂರು ಕಲ್ಪುನ
ಆಸೆಡೇಡೆಗ್ ಬತ್ತೆ ಗುರುಕುಲೆ
ಈರ್ ಕಲ್ಪಲೆ ಬಿರುತ ವಿದ್ಯೆನ್ ಪನ್ನ ಕಾರ್ಪತ್ಯೆ ||
ತಾನ್ ಚತ್ತಿಲೆ ಜಾತಿಡಕಲೆಗ್
ಮಾತ್ರೊ ಕಲ್ಪವುನೆಂದ್ ಪನ್ನಗ
ಯಾನ್ ಆರೆಡ ಪಂಡೆ ಕಲ್ಪುನ ಹಕ್ಕ್ ನರಮನಿಗ್ ||

11

ಚತ್ತಿಲೆಗ್ ಮಾತ್ರತ್ತ್ ಮಾತೆರೆ-
ಗಿತ್ತನವೆ ಹಕ್ಕ್ಂದ್ ಪನ್ನಗ
ಮಲ್ಲ ಕೋಪೊಡು ನಡಪು ಪಂಡೆರ್ ಬ್ರಾಣೆ ಆಯಿನರ್ ||
ಕಲ್ಪಿಯೆರೆನೇ ಬತ್ತನಾಯನ್
ನೆರ್ಡ್ ನೂಕ್ಯರ್ ಈರೆಡ್ಡ್ ಮಾ-
ಮಲ್ಲ ಗುರುಕುಲೆಡೇನ್ ಕಲ್ತ್ದ್ ಬರುವೆ ಈರಾಡೆ ||

12

ಪಿದಡ್ನಾಯೆನೆ ತಿರ್ಗ್ ತಿರ್ಗ್ಡ್
ಬದರಿಕಾಸ್ರಮೊಗೆತ್ಯೆನಲ್ಪದ
ಮುನಿಕುಲೀರೆನ ಏಗಿತೊನು ಸರಿ ಪಂಡೆರೆನ್ನಡನೆ ||
ಬೆರಣೆ ಪಂಡ್ಡ್ ಪನ್ನನೆನೆ ಕಳು
ಕಲ್ಪನಾಸೆಡ್ ಸ್ವಾಮಿ ಗುರುಕುಲೆ
ಕಲ್ಪಪಯರ್ ಈರೆನ್ನ ತಪ್ಪುನು ಪೂರ ಮನ್ನಿಪುಲೆ ||

13

ದ್ರೋಣೆರೆಡ ಪಂಡ್ನವೆ ಬಾಸೆನ್
ಪೂರ್ತಿ ಮಲ್ತನ ಬಿರ್ನೆ ಆಯೆನೆ
ಈರೆ ಸಾಪೊಡು ಕಲ್ತನವು ಪಲಿಪಂದೆ ಪೊಂಡೆಂಕ್ ||
ದಾಲ ದುಕ್ಕೊನೆ ಇದ್ದಿ ರಾಜ್ಯೊನು
ಆಳಿಯೆರೆ ಎಂಕುಂಡೊ ಲಡಯಿದ
ಸೇನೆದಾ ತಂಡೇಲೆ ಆವೆನೋ ದಾಯೆಗೀ ವಿದ್ಯೆ ||

14

ಎನ್ನ ಪಾತೆರೊ ನಡಪಯೆಂದ್ಡ್
ಹಸ್ತಿನಾವತಿ ಮಟೊಟು ದ್ರೋಣೆರೆ
ಮುಟ್ಟಿ ಉಂತುದು ಪಂಡ್ಡವಗನೆ ಊರು ಬರ್ವೆನ್ ||

ಹರನ ಸಾಪೊನು ಹರಿಯೆ ಹರಿನೆನ್
ಹರೆನೆ ಗುರುನವೆ ಸಾಪೊನೆರೆರೆ
ಪರಿಹರಿಪುನಕಲಿತ್ತೆ ಪಾಪಿಯೆ ಯಾನ್ ಬದ್ಕೊಲಿಯೊ ||

15

ಪೆದ್ನಪ್ಪೆನೆ ಎನನ್ ಗಂಗೆಗ್
ದಕ್ಖನಾಲೆಗ್ ಏರೊ ಸಾಂಕ್ಡ್
ಮಲ್ಲ ಆಯಿನ ಎಂಕ್ ಗಂಗೆನ ನೀರೆ ಸಯ್ಯೆರೆಗ್ ||
ಅಪ್ಪಣೆನ್ ಕೊಲೆಂಕ್ ಪೋಯೆರೆ
ಮುಲ್ಲ ಬೇಕೊನೆ ಪೋಪೆ ದ್ರೋಣೆರೆ
ದಿವ್ಯೊ ಪಾದೊಗು ಬೂರ್ಡು ಪನಿಯೆರೆಗೆನ್ನ ಬಿಸ್ತತಿಗೆ ||

16

ಈತ್ ಪನ್ನುನ ಕೇನ್ಡ್ ಭಾರ್ಗವ
ರಾಮೆರೆನ ಕಣ್ಣೆಡೆನೆ ನೀರ್ಡ
ದಾರೆ ಜತ್ತನೆನುದುರಿದಾರೆನ ಕುಂಟು ಚಂಡ್ಯಾಂಡ್ ||
ಆಯನರದೇ ಪತ್ತಿಯೆರ್ ಸರಿ
ತಾನ್ ತಿಗಲೆಗ್ ಒಯ್ತದಪಗನೆ
ಏತೊ ಪೂರ್ತುಲ ಬುಲ್ಲ ಬುಲ್ಲದು ಪಂಡೆರಾಯಡನೆ ||

17

ಸಾಪೊ ಕೋರ್ದೆ ನಿನ್ನ ಜಲೊನು
ಹಾಲ್ ಮಲ್ತನ ಯಾನ್ ನನೊಗೀ
ಆಸ್ರಮೊಡು ಏರೆಗಲ ಕಲ್ಪಯೆರಿದ್ಡಿ ಕಂಡಿತೊನೆ ||
ಭಾರತೊದ ಮಹಲಡಯಿಡೀಯೆ
ಸೇನೆದಾ ತಂಡೇಲೆ ಆಪುನ
ಯೋಗೊ ನಿಕ್ಕುಂಡುಂದು ಗೇನೊಡು ಯಾನ್ ತೆರಿಯೊಂಡೆ ||

18

ನಿಕ್ಕಿ ಪಿರಿ ಸಾಪೊಗುಲ ಪಗರಿನ್
ಕೊರ್ದೆ ವಿಷ್ಣುನ ಸಗ್ಗಿ ಒಸಯೊದ
ಯುದ್ಧೊಗುಂತ್ಯಡ ನಿನ್ನ ತೇರ್ಗ್ ಮಾದ್ರ ಬೂಪತಿಯೆ ||
ದರ್ದುದಯೆ ಸಾರತಿಲ ಆಂಡನೆ
ಗೆಲ್ಲ ಈ ಪಂಡೊಂದು ಆಯನ
ನೆತ್ತಿನಿಸ್ಡ್ ಪೋಲ ಪಂಡೆರ್ ಪ್ರೀತಿಡಾಪಗನೆ ||

19

ಗುರುಕುಲೆನ ಕಾರ್ಪತ್ತ್ದಾಪಗ
ಪಿದಡ್ನಾಯೆನೆ ಮಗ್ಡ್ ತೂಯಿಜೆ
ಉರಿದ್ ಉರ್ಡಲೊ ಆಂಡ್ ಭಾರ್ಗವ ರುಸಿನ ಆಸ್ರಮೊನೆ ||
ಪರಸುರಾಮೆರ್ ತಪಸ್ ಮಲ್ತ್ದ್

ಅವತರೊನು ಉಂತಾಯೆರೆಂದ್
ಸಿಮೊತ ಗುಡ್ಡೆಡ್ ಜಾಗೆ ನಾಡ್ಯೆರೆಗಲ್ತ್ ಪಿದಡಿಯೆರ್ ||

4

ಪೆತ್ತಲೆನ್ ಈತೊಸೊ ಬೊರಿತ್ ಜಿ
ಎನ್ನ ಮಗೆ ಪೇರ್ವರಿ ಬಾಲೆನೆ
ಇದ್ಯೆ ಪಂಡ್ ಪಂಡ್ ಇತ್ತೆ ಬತ್ತೆನೆ ಬರೆ ಬೊರಿಯೊಂದು ||
ಅಲ್ತ್ ಪಾರ್ಯಲ್ ಸಾಂಕ್ ನಮ್ಮೆನೆ
ಕರ್ಣ ಕೈತಲ್ ಕುಲ್ಲೊನುಂದೇ
ಕಲ್ತನೇರೆಡ ಪನ್ದ ಕೇಂಡೆನೆ ಇವರೊ ಇವರಾದ್ ||

|| ಕರ್ಣ ದ್ರೋಣರೆ ಮಟೊಟುಂತ್ಯೆ ||

ಪರಸುರಾಮಾಸ್ರಮೊನು ಬುಡುದೇ
ನಡತ್ ಬತ್ತನ ಕರ್ಣ ಓಡೊಡು
ಕಡತ್ ದೆತ್ತೆನೆ ತಾನ್ ಬಲತ್ ನ ಇಲ್ಲ ಬಾಕಿಲ್ ಗ್ ||
ಗುರುತೊ ತಿಕ್ಕಜಿ ರಾದೆಗಾಯನ
ಬಿರು ಪಗರಿ ಕೈಟುಂಡು ನಾರ್ ದ
ಮಡಿನ ತುತ್ತದೆ ಕುಜಲ್ ಕಟ್ಟನ ಜಿಡೆನೆ ಆದುಂಡು ||

1

ಬತ್ತನಾಯೆನೆ ಅಪ್ಪ ಈರೆ-
ನ್ನಪ್ಪ ಪಂಡ್ ಕಾರ್ ಪತ್ತಿಯೆ
ಗುರ್ತೊ ತಿಕ್ಕಂದಾಲ್ ಮೋನೆನೆ ತೊದು ಉಂತ್ ನಗ ||
ಕರ್ಣ ಯಾನಪ್ಪೆಂದ್ ರಾದೆನ್
ತೊಟ್ಟು ಪತ್ತಾದ್ ಅರದ್ ಪತ್ತೆನೆ
ಬುಕ್ಕೊ ಗುರ್ತೊನೆ ಆದ್ ಮೋನೆಗ್ ಮುತ್ತೊ ಕೊರ್ದಾಲ್ ||

2

ಈಯೆ ರುಸಿಯಾಪೆಂದ್ ಪೋಯ್ನೊ
ಏತ್ ಒರ್ಸಾಂಡಿತ್ತೆ ಆಂಡಲ
ಈಡೆಗೆತ್ತೆನೆ ಎನ್ನ ನೆಂಪಾಂಡತ್ತೊ ಮಗ ನಿಕ್ಕ ||
ರಾದೆನಾ ಕರ್ಣಡೆನೆ ನೀರರಿ-
ನೇನ್ ಉರ್ದುದು ಐನ್ ಒರ್ಸೊಡು
ಯಾನ್ ಕಲ್ತದ್ ಬತ್ತೆ ಈರೆನ ನೆಂಪು ಆದೇನ್ ||

3

ಅದಿರತೆಲ ಬತ್ತನಯೆ ಕರ್ಣನ
ಗುರುತೊ ಆವಂದಾಯೆ ಉಂತ್ ನ
ತೆರಿದ್ ರಾದೆನೆ ಪಂಡಲಾಯಡ ನಮ್ಮ ಬಾಲೆತ್ತೊ ||
ಅರದ್ ಪತ್ತಾದ್ ಮೆಯಿನ್ ಈಸದ್
ಜವನೆ ಆಯೆನೆ ನಂಕ್ ನನ ಪೋ-
ಡಿಗನೆ ಇದ್ದಿಂದಾಯೆ ಬುಡೆದಿಡ ಪಂಡೆ ಸಂತೊಸುಡು ||

5

ಪೊರುತ್ತಕಂತ್ ದಾಲಾಂಡ್ ರಾದೆನೆ
ಪೆತ್ತಲೆನ್ ಬೊರಿಯೊಂದು ಬನ್ನಗ
ಪೊತ್ತಯೆನೆ ಕಾಲ್ವಿಪೊನದಿರತೆ ಎಣ್ಣೆ ಮಯ್ಯೊಂದು ||
ಕರ್ಣ ಪರ್ ಮಗ ಪೇರ್ ಬೊರಿನೆನ್
ಪನ್ದ ಚೆಂಬುನೆ ಕೊರ್ಯಲಾಯಗ್
ಪರೈ ಬಂಜರೊ ಬನ್ನಗಾರಿಗೆ ಚೆಂಬು ದೀಡಿಯೆನೆ ||

6

ಉಲಯಿಡುನಿಯೆರೆ ತಯರ್ ಮಲ್ಪುನ-
ಗಪಗ ಕರ್ಣಲ ಮೀದ್ ಜಪೊತಪೊ
ಮಲ್ತದಾನಗ ರಾತ್ರೆ ಕರಿದ್ ಆಂಡ್ ನಾಲ್ಕಿಗೆ ||
ಉಣಿಯೆರೆಗ್ ಬಲೆ ಪನ್ದ ಲೆತ್ತಲ್
ಮಣೆತ ಎದುರುಡು ಇರೆನ್ ಪಾಡ್ ದ
ಬಲಸಿಯಲ್ ಬೊಲ್ದರಿತ ನುಪ್ಪುನು ನೆಯಿನ್ ಮಯ್ಯೊಂದು ||

7

ತೆಲುಪು ಕಡೆಯಿನ ತಿಮರೆ ಚಟಿನಿನ
ಬಲಸನಗನೇ ಕರ್ಣ ಅಪ್ಪೆಡ
ನಿಕಲೆ ಕಜಿಪುನು ತಿನಿಯೆರೆನೆ ತೊಡು ಬಲಸಲೈನಿತ್ತೆ ||
ತೊರಕೆ ಮೀನ್ ದ ಗಸಿನ್ ಈಯೆ
ತಿನಯ ಪಂಡ್ ಚಟಿನಿ ಕಡೆಯಿನೆ
ಬಸಲೆ ಕೊದ್ಯೊಲುನೆಲ್ಲೆ ಮಲ್ಪುವೆ ನಿಕ್ಕ ಪ್ರೀತಿದೆನ್ ||

8

ಈರ್ ಬಲಸನವೆಂಚಿನಾಂಡಲ
ಯಾನ್ ತಿನ್ನುನ ಗೋರು ಮಂಚಾಣೆ
ಮೀನ್ ದಾ ಗಸಿ ನಕ್ಕಂದೇನ್ ಒರ್ಸೊ ಏತಾಂಡ್ ||
ಈತ್ ಪನ್ನಗ ಬಲಸಿಯಲ್ ಸರಿ
ಮಾಸೊ ತುಂಡುನೆ ನಾಡ್ ದಜತ್ ದ
ಪೂರನುಪ್ಪುನು ಮೊರೆತ್ ಮೊರೆತ್ ದ ಉಂಡೆ ಬಂಜಾರೊ ||

9

ರಾತ್ರೆ ನಿದೆರ್‌ದ್ ಕಾಂಡೆ ಲಕ್ಕನೆ
ಮೀದ್ ಜಪೊ ತೀರಾಡ್ ಉಂಡೆನೆ
ನಾರ್ ಮಡಿ ತುತ್ತೊಂದು ಪಿದಡ್‌ನ ಮಗನ್ ತೂವೊಂದು ||
ಮೋನೆ ಬಾಡಯಿನಪ್ಪೆಗಾಯೆನೆ
ಯಾನ್ ನನ ಓಡೆಗ್‌ಲ ಪೋವಯೆ
ಬೇಕೊ ಬರ್ಪೆಂದಾಯೆ ದ್ರೋಣೆರ್ ಗರೊಡಿಗತ್ತಿಯೆನೆ ||

10

ರುಸಿನ ರೂಪೊಡು ಬಿಲ್ಲ ಬಾಣೊನು
ಕಯಿಟೆ ಪತ್ತನ ಜವನ ಗುರ್ತೊನೆ
ಕಲುಪುನವೆ ಜೋಕುಲೆಗ್ ತಿಕ್ಕಜಿ ಕೇಂಡೆರಾಯಡನೆ ||
ಗುರುಕುಲೆಡ ಎನ ಗುರ್ತೊ ಪನುವೆನೆ
ನಿಕ್‌ಲ್ ಕೇನುನೆ ದಾಯೆ ಪಂಡ್‌ದ್
ಉಲಯಿ ಪೊಗ್ಗುದು ಕಾರ್‌ಗಡ್ಡೊನೆ ಬೂರೈ ದ್ರೋಣೆರೆನ ||

11

ಯಾನ್ ಅದಿರತ ಮಗನೆ ದುಂಬೊರೊ
ಈರೆಡನೆ ಕಲ್ಪುನವೆ ಆಸೆಡ್
ಕೇನಿಯೆರೆ ಬತ್ತನಯೆ ಸೂತೆರೆ ಜಾತಿದಾ ಕರ್ಣೆ ||
ಈರ್ ಚತ್ತಿಲೆ ಜಾತಿದಕಲೆಗ್
ಮಾತ್ರೊ ಕಲ್ಪುವನೆಂದ್ ಪಂಡರ್
ಈರೆಡ್‌ದ್ ಮಾಮಲ್ಲ ಗುರುಕುಲೆಡೇನ್ ಕಲ್ಪೊಂಡೆ ||

12

ಪರಸುರಾಮೆರೆ ಸಿಸೈ ಯಾನೇ
ಪನುಪುನೆನ್ ಕೇನೊಂದು ದ್ರೋಣೆರ್
ಮನಸ್‌ಡಾಯಿನ ಮಚ್ಚೆರೊನು ದೆಂಗಾದ್ ಕರ್ಣಡನೆ ||
ಅವಿರತನ ಮಗೆ ಆಂಡ ದಾನೆಯ
ಕಲ್‌ತಿ ವಿದ್ಯೆಗ್ ಜಾತಿ ಎಂಚಿನ
ನನಗ್ ಈ ಮಟೊಟುಂತು ಕಲ್ತನ ಮರಪೆರಾವಂದ್ ||

13

ದ್ರೋಣೆರೆನ ಗುಣೊ ಮೆಚ್ಚಿದಾಯೆನೆ
ಪಾಂಡವೆರ್ ಕೌರವೆರ್ ಕಲ್ಪುನ
ಕೂಟೊ ಸೇರ್‌ನ ಕರ್ಣ ಬಿಸ್‌ನ್ ತೂದು ಕೌರವೆನೆ ||
ತಾನ್ ಆಯನ ಸ್ನೇಹೊ ಮಲ್ತದ್
ವೀರ ಪಾರ್ತಗ್ ಎದುರು ಉಂತ್ಯೆರೆ
ಯಾವು ಇಂಬೈನೆ ಪನ್ದ್ ಆಯನ ಒಟ್ಟುಗಿತ್ತೊಂಡೆ ||

14

ಒಣಸ್ ಕರ್ಣನ ಒಟ್ಟು ಗೊಬ್ಬನ
ಮನಸ್ ಕರ್ಣನ ಒಟ್ಟು ನಿದೆರುವೆ
ಪಜೆಟ್ ಕರ್ಣನ ಒಟ್ಟು ತಿರ್ಗುವೆ ಕರ್ಣನೊಟ್ಟಿಗೆನೆ ||
ಯಮನ ಮಗೆ ಧರ್ಮಜೆನೆ ವಾಯುನ
ಮಗೆನೆ ಆ ಭೀಮತ್ತೊ ಅರ್ಜುನೆ
ಸುರಪನಾ ಮಗೆನಮರ್ ಜೋಕುಲು ಅಸ್ವನೀನಕ್‌ಲೆ ||

15

ಪಾಂಡವೆರ್ ಐವೆರ್‌ಲ ಪುಟ್ಟನೆ
ಪಾಂಡುರಾಜಗ್ ಅತ್ತ ಅಜ್ಜೆರ್
ಮಾರಿಲೆನ್ ಸಾಂಕುವೆರ್ ಎಂಕ್‌ಲೆ ಅರಮನೆಡ್ ಕರ್ಣ ||
ನೂದು ಮೆಗಿ ಪಲಯಲ್ಲೆಗೀ ಒರಿ
ಸೇರಿಯಡ ನೂತ್ತೊಂಜಿ ಆಯೊನೆ
ಆಕ್‌ಲೆನ ಪುದರಿದ್ ಪನ್ನವೊ ನಮೋನೆ ಒಂಜಾದ್ ||

16

ದುಸ್ಸ ದುರ್ರೋದನೆನೆ ಕರ್ಣಗ್
ಪನ್ನದ್‌ನ ದುರ್ನೀತಿ ಮಾತಲ
ಎಡ್ಡೆ ತೋಜಿನೆ ಕೌರವೆರೆನಾ ಮಲ್ಲತಿಗಿಡ್ಡಾದ್ ||
ಮಲ್ಲತಿಗೆ ಏರೆರೆ ನಡತೆನ್
ಮಲ್ಪುವನೆ ಹಾಲ್‌ಂದ್ ತೆರಿಜೆನೆ
ಉತ್ತಮೆನೆ ಈ ಕರ್ಣೆ ವಿದಿನವೆ ಗೊಬ್ಬುಡಿಂಜಾದ್ ||

|| ಅರ್ಜುನನ ಗುರುದಕ್ಷಿಣೆ ||

ಸಿಸೈನಾಕ್‌ಲ್ ಮಾತ ಕಲ್ತದ್
ಬಿರೆರಾಯೆರ್ ದ್ರೋಣೆರೆನ ಮಟೊ-
ಟಿತ್ತದೇ ಕಲ್ಪೊಂದು ಪಿರಯೊಡು ಜವನೆರಾದಕ್‌ಲ್ ||
ಪೊರ್ಡು ಪೊರ್ಡಾವೊಂದು ಬಲತ್‌ನ
ಹಸ್ತಿನಾವತಿದರಸು ಜೋಕುಲೆ-
ನೊಟ್ಟು ಕುಲ್ಲದ್ ದ್ರೋಣೆರಕ್‌ಲೆನ ಮೋನೆ ತೂವೊಂದು ||

1

ಚಂದ್ರವಂಸೊದ ಅರಸು ಬಾಲೆಲು
ಇಂದ್ರನವೆ ಏಗಿತೊನು ಪಡೆಯರ್
ಮಂತ್ರೊ ಬಾಣೊಲೆ ವಿದ್ಯೆ ಕಲ್ತದ್ ನಮ್ಮವೀ ಮಟೊಟು ||
ದುಂಬುದಾಕ್‌ಲ್ ಪಡೆಯಿ ಕೀರ್ತಿಗ್

ಇಂಬುದಾ ಧನುರ್ವೇದೊ ವಿದ್ಯೆನ್
ನಂಬುದೇ ಕಲ್ತನೆಟ್ ಪೂರ್ತಿಯೆ ಆಂಡ್ ಕಲ್ಪುವು ||

2

ಮಟೊ ಬುಡುದು ಪೋನಗನೆ ಕಲ್ಪಯಿ
ಗುರುನ ದಕ್ಷಿಣೆ ಕೊರ್ದು ಪೋಪುನ
ಕೆರಮೊ ದುಂಬುಡ್ಡಿಂಚಿ ಇತ್ತನೆನ್ನೆನ್ ತಪ್ಪಯೆರೆ ||
ಮನಸ್ ಎಂಕಲೆಗಿದ್ದಿ ಆಸೆಡ್
ಪೊಲೆಜುನಾಕ್ ಪನ್ದ ಗೆರೆಪಡೆ
ಮಟೊನೆ ನಿಹಲೆನ ಅರಮನೆದವೇ ಆದ್ ಉಂಡತ್ತೊ ||

3

ಮಾತೆರೆನ ಸಿರಿ ಮೋನೆ ದ್ರೋಣೆರ್
ತೂನಗನೆ ಆ ಧರ್ಮನಂದನೆ
ಆವುಸೊದ ಮಿತಿ ಪನ್ಲೆ ಎನ್ನಡ ಯಮಗ್ ತೆರಿಪಯೆರೆ||
ಭೀಮಸೇನೆನೆ ಲಕ್ಕದುಂತುದು
ಏಕಲವ್ಯನ ಬಿರೆಲ್ ಕೇನ್ಯರ್
ರಟ್ಟಿನೇ ಕೇನುವರೊ ಕಡ್ತಾದ್ ಕೊರ್ವೆ ಪಂಡೊಂದು ||

4

ಈರ್ ಐರಾವತೊಡು ಕುಲ್ಪರೊ
ಯಾನ್ ಬಾಣೊಡೆ ಸಾದಿ ಮಲ್ತಾದ್
ದೇವಲೋಕೊದ ಆನೆ ತರ್ಪವೆ ಪಂಡೆನರ್ಜನೆನೆ ||
ಆ ನಕುಲ ಸಾದೇವರೊಟ್ಟಿಗೆ
ದ್ರೋಣೆರೆನ ಕಾರ್ಗಡ್ಲೊ ಬೂರುದು
ಈರೆನಾರೋಗ್ಯೊಗುಲ ಕೊರತೆನೆ ಉಂಡೊ ತೆರಿಪಾಲೆ ||

5

ಬಿರೆಲ್ ಕೇನ್ನರ್ ಕೇನ್ವೆರೆಂಕ್ಲೆಡ
ಕಯಿನ್ ಪಂಡ್ಡಾದ್ ಕೊರವಾದಿಲು
ಮನಿತ್ಚೆರ್ ಆ ಕರ್ಣೆ ಲಕ್ಕದ್ ಉಂತ್ಯೆ ಪನಿಯೆರೆಗ್ ||
ಗುರುಕುಲೀರೆನವಾಚ್ಚೆ ಎಂಚಿನ
ಪನ್ಲೆ ನಡಪದ್ ಕೊರ್ದೆ ಕಂಡಿತೊ
ಪನುಪುನೆನ್ ಕೇನೊಂದು ದ್ರೋಣೆರೆಗಾಂಡ್ ಸಂತೋಸು ||

6

ಸಿಸ್ಯನಾಕ್ಲೆ ಕೇನಿ ತೆನ್ನಯಿ
ಪತ್ತೆ ಅರದರಿ ದೂರೊಡುಪ್ಪುನ
ಪೊರ್ದುದಾ ಪಾಂಚಾಲ ರಾಜ್ಯೊನೆ ಆಡೆ ಪೋದಿತ್ತೆ ||

ಅಲ್ಪ ದ್ರುಪದನೆ ಅರಸು ಆಯನ್
ಕಟ್ಟೆದೀಡೆಗ್ ಕನಲೆ ಪನ್ನಗ
ಕರ್ಣನೊಟ್ಟಿಗೆ ದುಂಬುಲಾಗ್ಯೆರ್ ಕೊರವಾದಿಗುಳು ||

7

ದ್ರುಪದ ರಾಯನ ರಾಜ್ಯೊ ನುರ್ಕನ
ಕುರುಡ ಬಾಲೆಲು ಪೆಟ್ಟೆ ತಿಂದಾದ್
ಪಿರನೆ ಬತ್ತೆರ್ ಗುರುಕು ದೆಂಗದ್ ಕಣ್ಣೆ ತಪ್ಪಯೆರ್ ||
ಪಲಯನಾಕ್ ಲಕ್ಕದುಂತ್ನ
ತೆರಿದ್ಲರ್ಜನೆ ಪಂಡೆನಕಲೆಡ
ನಿಕ್ಲೆ ಉಂತ್ಲೆ ಯಾನ್ ಒರೈನೆ ಪೋಪೆನಾಡೆಗೆನೆ ||

8

ಪಗೆನಕುಲು ನುರ್ಕವೆರ್ ಪಂಡಾದ್
ದ್ರುಪದರಾಜೆನೆ ಗಡಿತ ಸುತ್ತಲ
ಪಡೆನ್ ಉಂತದ್ ಇತ್ತೆ ಪೋಡಿಗದಾಲ ಇದ್ಯಂದೆ ||
ರತೊನು ಏರ್ದಾದ್ ಬತ್ತನರ್ಜನೆ
ಗಡೆನ್ ಕಾಪುನ ಬಟೆರೆ ಮೇಲ್ಗ್
ಮತಿನ್ ತಪ್ಪವಿ ಮೋಹನಾಸ್ತೊನು ಬುಡಿಯೆನಾಪಗನೆ ||

9

ಮಾತೆರ್ಲ ಮತಿ ತತ್ತ ಬೂರ್ನ
ಸಾತ್‌ಗಾಯೆನೆ ರಾಜ್ಯೊದುಲಯಿಗ್
ತೇರ್ ನಡಪದ್ ಬತ್ತೆನರಮನೆದಾಡೆ ಅಮಸರೊಡು ||
ಸೂಚನೆನ್ ತೆರಿಪಾವಿ ಸಂಕೊನು
ಬಾಯಿಡುರಿತನ ಸೊರೊನು ಕೇಂಡಾದ್
ಪಾರ್ ಬತ್ತೆರ್ ಆಡೆಗರಮನೆಡಿತ್ತಿ ಪಟು ಬಟೆರ್ ||

10

ಎದುರು ಬತ್ತನವಕಲೆಗಾಕ್ದ
ಜೆಪುಡದಾನಗ ಬತ್ತೆ ದ್ರುಪದನೆ
ಬಿರುನು ಕುರ್ಕದ್ ಉಂತುದಾಯನ್ ತೂಯೆ ಕಣ್ಣಡುದು ||
ಜವನ ಪಿರಯೊದ ಮರ್ಲಡೀಯೆ
ಗಡೆನ್ ಕಾಪುನ ಪಡೆನ್ ಕೆರ್ದಲ
ಉಲಯಿ ನುರ್ಕಿಯೆ ನಿಕ್ಲೆ ಏರ್ಲ ಪನ್ನುನಕಲಿದ್ಯೊ ||

11

ಎನ್ನ ಗುರು ದ್ರೋಣೆರ್ಲ ಪನ್ನೆರ್
ನಿನ್ನವೇ ಕೈಕಾರ್ ಕಟ್ಟಾದ್

ಸನ್ನಿಡಿಗ್ ಒಪ್ಪಯೆರೆ ಬತ್ತನೆ ಯಾನ್ ಐಕ್ಯಾದ್ ||
ನಿಕ್ಯ ಮರೊಯೆ ಬಡವ ಬೆರಣೆನೆ
ಪನ್ನೆ ಪಾತೆರೊ ಕೇನ್ದ ಬತ್ತನ
ಎನ್ನ ಸಂಗತಿ ನಿಕ್ಯ ತೆರಿತೆಜೊ ಏರ್ ಈ ಪನ್ಲ ||

12

ಪಾಂಡುರಾಜ ಕುಮಾರೆನರ್ಜುನೆ
ದ್ರೋಣೆರೆನ ನಿಜೊ ಸಿಸೈ ಕಲ್ತಾದ್
ಪೂರ್ತಿಯಾಯಿನ ಗುರುನ ದಕ್ಷಿಣೆ ಸಂದಯೆರೆ ನಿನನ್ ||
ಕಾರ್ ಕಟ್ವಾದ್ ಗುರುಕು ಒಪ್ಪವೆ
ಬಾಣೊ ದಕ್ವಾದ್ ಕೈನ್ ಮುಗಿಯಡ
ಬೇನೆ ಮಲ್ಪಂದೇನ್ ಕೊಂಡೊವೆ ಮಟೊಕು ನಿನನಿತ್ತೆ ||

13

ನಿನ್ನ ಮೋನೆನ್ ತೂನಗೇರ್ಲ
ಪೋಣ್ಣ ಕೊರ್ದೆರ್ ಆಂಡ ಎನ್ನಡ
ನಿಕ್ಯ ಕೊರೈಗಾಪಿ ಪೋಣ್ಣೋಕುಲುಲ ಇದ್ಯತ್ತೊ ||
ಮರ್ಲ್ ಬೆರಣನ ಪಾತೆರೊನು ಈ
ಬುಡ್ಲ ಅಕ್ಲೆಗ್ ಚತ್ತಿ ಜಾತಿನ
ಕುಟ್ಟೆ ದೆಪ್ಪನ ಬುದ್ಧಿ ನಿಕ್ಕೇ ದಾಲ ತೆರಿಯಂದ್ ||

14

ಕುಸೆಲ್ ಗೊಬ್ಬದ ಪಾತೆರೊನು ಈ
ಎನಡ ಪನ್ನುನ ಬೊಡ್ಡಿ ಪಂಡಾದ್
ಬುಡಿಯೆ ಪಗರಿನ್ ದ್ರುಪದೆ ರಟ್ಟದ್ ತಾನ್ಲಾ ಬುಡಿಯೆ ||
ಎದುರು ಬತ್ತನ ಬಾಣೊ ರಟ್ಟದ್
ಮರಿತ ಬಾಣೊದ ಮಂತ್ರೊ ಜಪಿತ್ದಾದ್
ಬುಡಿಯೆನರ್ಜುನೆ ದ್ರುಪದ ಕಾರ್ಗ್ ಸುತ್ತು ಪಾಡಿಯೊನೆ ||

15

ಮರಿಕುಲಾಯನ ಕಾರ್ ಕೈಕುಲೆ
ಬಿಗಿತ್ದರ್ಕಟ್ ಪಾಡ್ನಾಪಗ
ರತೊಟು ದೆರ್ತಾದ್ ಕುಲ್ಲದಾಯನ್ ದೇರೈ ಕುದುರೆಲೆನ್ ||
ಗುರು ಮಟೊಕು ತೇರೆತ್ತಿ ಸಾತ್ಗ್
ದ್ರುಪದ ರಾಜನ್ ಜಪುಡದರ್ಜುನೆ
ಗುರುನ ಪೀಟೊದ ಬರಿಟ್ ಕುಲ್ಲದ್ ತಾನ್ ಉಂತೊಂಡೆ ||

16

ದ್ರೋಣೆರಾಯನ ಕಟ್ವೆಬಿಚ್ಚದ್
ಆನಗನೆ ತರೆನಡಿಕ್ ಪಾಡ್ದಾದ್
ರಾಜೆ ದ್ರುಪದನೆ ಉಂತುನಾಪಗ ಪಂಡೆರಾಯಡನೆ ||

ಆನಿ ಅಮ್ಮೆರೆ ಮಟೊಟು ಕಲ್ತಾದ್
ಲಾದ್ ಪಿದಡ್ನಗನ್ನಡನೆ ಈ
ದಾನೆ ಪನ್ನಯ ನೆಂಪು ಮಲ್ಪುಲ ಇತ್ತೆ ಪಾಂಚಾಲ ||

17

ಬಡತನೊಟು ಎನ ಬಂಜಿ ಬಡವುನು
ತಡೆಯೆರೆನೆ ತಿರಂದೆ ಈಯೇ
ಕೊರುವ ಪಂಡಾದ್ ಬತ್ತೆ ನಟ್ಟೆರೆ ಅಪಗ ನಿಕ್ಕೆನ್ನ ||
ಗುರುತೊ ಆಯಿಜೆ ಮಲ್ಲತಿಗೆದವೆ
ಅರಮನೆದ ಚಾವಡಿಡ್ ಗತ್ತಾದ
ಅರಸುತನೊತಾ ಪೀಟೊಡೀಯೇ ಕುಲ್ಲೆನೇಟತ್ತೊ ||

18

ಇತ್ತೆ ಓಂಡುಯ ನಿನ್ನ ಹಂಕರೊ
ದರ್ಪುದಾ ಪಾತೆರೊಲು ಅರಸುಗು
ನಟ್ಟುನಾ ಬಡ ಬೆರಣೆ ಸ್ನೇಹಿತೆ ಅತ್ತ ನಿಕ್ಕಿತ್ತೆ ||
ಸಿಕ್ಕೆ ಕೊರ್ದುನ ಯಮೆನೊ ಪನ್ ಪನ್
ಪನ್ನಗನೆ ಕಣನೀರ್ ಜಪುಡಯೆ
ತನ್ನ ತಪ್ಪುನು ನೆನೆತೊನುಂದೇ ದ್ರುಪದ ಮಹರಾಯೆ ||

19

ನಿನನ್ ಪೋಯೆರೆ ಬುಡ್ಲೆ ಈ ನನ
ಬಡವೆರೆಗ್ ಬೆರಣೆರೆಗ್ ದುರ್ಬಲೊ-
ದಕಾಲೆಗೇಪೊಲ ಎದುರು ಉಂತಡ ಸಾಯೊ ಕೊರ್ದಕ್ಲೆ ||
ಮನಸ್ಸೊಪ್ಪಾವೊಂದು ರಾಜ್ಯೊಡು
ಅರಸುತನೊ ಮಲ್ತೊಂದು ಉಪ್ಪುಲ
ಎನಡ ಪುಣೆಪಡ ಪುಣೆಲ ಪಂಡಾದ್ ಬುಡಿಯೆರಾಯನ್ಲ ||

20

ನಾಚಿಗೇಡ್ ಮರ್ಯಾದಿ ಪೋಯಿನ
ರಾಜೆನರಮನೆದುಲಯಿ ಪೊಗ್ಗಿಜೆ
ಬ್ರಾಣೆರುಪ್ಪುನ ಅಗ್ರಹಾರೊಡು ಜೋಕುಲಾಪುನವೆ ||
ಯಾಗೊ ಮಲ್ಪಯೆರಾದ್ ಬೆರಣೆರೆ-
ನೇತಲಾ ಪರ ಊರುಡುದು ತ-
ಪಾದ್ ಬೋಡಯಿನಾತ್ ಸನ್ನಯೊ ತಯರ್ ಮಲ್ಪಯೆನೆ ||

21

ದ್ರೋಣೆರೆನ್ ಕೆರೈಗ್ ಆಪುನ
ಆಣ್ ಮಗನರ್ಜುನಗ್ ಕನ್ಯಾ-
ದಾನೊ ಮಲ್ಪೆರೆಗೊಂಜಿ ಪೋಣ್ಣನ್ ಪಡೆವೊಡುದಾಯೆ ||

ಯಾಗೊ ಮಲ್ವದ್ ಹವಿಸ್ ಸಂದಯೆ
ದೇವತೆಲೆಗಾಂಡಪಗ ಸಂತೊಸು
ಹೋಮೊದಗ್ಗಿದ ಕುಂಡೊಡುದಿತನೆ ದಿವ್ಯೊ ರೂಪೊದಯೆ ||

22

ಆಯೆ ಕೈಟೊಂಜಾಣ್ ಬಾಲೆನ್
ಪ್ರಿಯೊಡೇ ಬುಕ್ಕೊಂಜಿ ಪೊಣ್ಣನ್
ಯಾಗೊ ದೀಕ್ಷೆದ ರಾಜಗಪಗನೆ ಕೊರ್ದು ತೋಜಂದೆ ||
ಮಾಯೊಕಾಯಿನ ಮಯಿಮೆ ಯಜ್ಞೊದ
ಮೂಲೊ ಪುರುಸೆನೆ ಪನ್ದ ದ್ರುಪದನೆ
ಬಾಲೆಲೆನ್ ಅರಮನೆಗ್ ಕೊಂಡೊದು ಸಾಂಕ್ಯೆ ಕೊಂಡಟೊಡು ||

||ಗುರುಕುಲು ಕಲ್ಪಯಿನೆನ್ ಹಿರಿಯಾಕ್ಲ್ ತೂಯೆರ್ ||

ಮಾತೆರ್ಲ ಧನುರ್ವೇದೊ ಸಾಸ್ತ್ರೊನು
ರಾಜನೀತಿನ ಪೂರಕಲ್ತದ್
ಪೂರ್ತಿ ಮಲ್ತೆರ್ ಚಂದ್ರ ವಂಸೊದ ಜೋಕ್ಷು ಗುರುಮಟೊಟು ||
ಆ ಯುದಿಸ್ಪಿರೆ ಯುದೊ ನೀತಿನ
ಬಾರಿ ತೆರಿನಯೆ ಗದತ ಯುದೊಡು
ಭೀಮ ಕೌರವನಕ್ಲ್ ಬರ್ಸೆರ್ ಕಲ್ತದಾಯಿನೆಟ್ ||

1

ಅರ್ಜುನಗ್ ಸರಿ ಏರ್ ಲೋಕೊಡು
ಯುದೊ ವಿದ್ಯೆಡ್ ಮಂತ್ರೊ ಬಾಣೊನು
ಬುಡ್ಡಿ ವೀರೆರ್ ಪನ್ದ ದ್ರೋಣೆರ್ ನಿತ್ಯೊ ಪುಗರುವೆರ್ ||
ಅಸ್ವನೀ ದೇವತೆಲೆ ಬಾಲೆಲು
ಬುಕ್ಕೊ ದುಸ್ವಾಸಾದಿ ಜೋಕುಲು
ಬಿಲ್ಲ ವಿದ್ಯೆನ್ ಕಲ್ತೆರಾಕ್ಲೆ ತಾಕತ್ದ ಲೆಕೊನೆ ||

2

ಮುಕುಲೆ ಹಿರಿಯೆರೆ ಎದುರು ಕಲ್ತನ
ಬಿರುತ ವಿದ್ಯೆನ್ ತೋಜಯೆರೆ ಗುರು-
ಕುಲೆಗ್ ಆಸನೆ ಆದ್ ದ್ರೋಣೆರ್ ಪೋಯೆರರಮನೆಗ್ ||
ವಿದುರ ಬೀಸ್ಮೆರ್ ತೂದುಲಾರನೆ
ಉಲಯಿ ಕುಲ್ಲದ್ ಬಿನ್ನ ಪೂಜೆನ್
ಮಲ್ತೆದಾರೆಡ ಬೀಸ್ಮೆ ಕೇಂಡೆನೆ ಮಟೊತ ಸುಕೊದುಕ್ಕೊ ||

3

ಕಲ್ತದಾಯಿನ ನಿಕ್ಲೆ ಜೋಕುಲೆ
ಸತ್ತೊ ತೂವೊಡು ಮಾತ ಹಿರಿಯೆರ್
ಐಕ್ಯ ಬೋಡಾದೇನ್ ಕೇನೈರೆ ಬತ್ತೆ ಅರಮನೆಗ್ ||
ಪನ್ನಗನೆ ಆ ಬೀಸ್ಮೆ ತೆಲಿತ್ದ
ಪನ್ನೆ ಈರೆನ ಸಾದನೆಗ್ ಸರಿ
ಕೊರ್ದಿನುಂಬೊಳಿ ಇನಿತ ಕಾಲೊಡು ದಾಲ ಯಾವಂದ್ ||

4

ಆಂಡಲಾ ಈರೀತ್ ಜೋಕುಲೆ
ಊಟಲೆನ್ ತಡವೊಂದು ಸಾದನೆ-
ಡೇತೊ ಕಸ್ತೊನು ಪಡೆಯರೆಂಕ್ಲೆನ ಪ್ರೀತಿ ಗೌರವೊಡು ||
ದಾನೆ ಆವೊಡು ಪನ್ನೆ ಬೋಡಯಿ-
ನೇತ್ ಕರ್ಚಿಗ್ ಕೊರೊಡು ತೆರಿಪಲೆ
ಯಾನ್ ಕಡಪುಡುವೆಂದ್ ಪನ್ನಗ ಪೋಯೆರಲ್ಪಡ್ಡೆದ್ ||

5

ನೂದು ಯೋಜನೊ ಉದ್ದಗಲೊ ಸರಿ-
ಟಾಯೊ ತೂದೇ ತಟ್ಚ್ಚ ಮಲ್ವದ್
ನಾಲ್ ಸುತ್ತಲ ದೊಂಪೊ ಪಾಡ್ಡಯೆರಾರ್ ಪೊರ್ಲುದವೆ ||
ರಾಜೆರೆಗ್ ಕುಲ್ಲಿಯೆರೆ ಪೀಟೊನು
ದೀಡ್ಲಾ ಮೇಲ್ದೊಂಪೊನರಸುಲೆ
ರಾಣಿನಕ್ಲೆಗ್ ಕುಲ್ಲು ತೂಯೆರೆಗಾಂಡ್ ನಾಲ್ಪತ್ತ ||

6

ಪೊಗ್ಗಿಯೆರೆ ಎದುರಾನೆ ಬಾಕಿಲ್
ಬತ್ತನಾಕ್ಲೆ ತೇರ್ಗ್ ಕೊಟ್ಟುಲು
ಕಟ್ಟೆರೆಗ್ ಲಾಯೊಗುಳು ರಾಜೆರೆ ಆನೆ ಕುದುರೆಲೆಗ್ ||
ಕುತ್ತಿ ಪೂಜೆನ್ ಮಲ್ತದಪಗನೆ
ಕಡ್ಡಾದೇ ತರೆ ಪಂಜಿ ಗೋಣೆರ್
ನೆತ್ತೆರ್ದ ಆವರೊನು ಕೊರೈರ್ ಗಂಡಗಣೊಕುಲೆಗ್ ||

7

ದಿನೊನು ತೂದೇ ದೇಸೊ ದೇಸೊದ
ಅರಸುನಕ್ಲೆಗ್ ಓಲೆ ಕಡಪುಡು-
ದಪಗ ಎತ್ತೆರ್ ಗರೊಡಿ ವಿದ್ಯೆದ ಕಳಕ್ ಮಾತೆರ್ಲ ||
ವಿದುರ ಸಂಜಯನಕ್ಲೆ ಒಟ್ಟುಗು
ರತೊಟು ಬೀಸ್ಮೆಲ ಬತ್ತದೆತ್ತೆನೆ
ಎದುರು ಸಾಲ್ಡ್ ಕುಲ್ಲಯೆರ್ ಆಚಾರ್ಯರಾಕ್ಲೆನ್ ||

8

ಬತ್ತಲಾ ಗಾಂದಾರಿ ಕುರುಡನ
 ಒಟ್ಟುಗಾಯನ ಕೈನ್ ಪತೊನುದು
 ಬುಕ್ಕೊ ಕುಂತಿಲ ಬತ್ತ ಕುಲ್ಯಲ್ ದೊಂಪೊಡೆತ್ತರೊಡು ||
 ಮಿತ್ತ ದೊಂಪೊಡು ರಾಣಿನಾಕ್ಲ್
 ತಿರ್ತ್ತ ಅರಸುಲು ಮಂತ್ರಿ ಮಾರ್ಬಲೊ
 ಕುಲ್ಲಿಯೆರ್ ಒತ್ತೊತ್ತು ಸುತ್ತಲ ಬತ್ತಿ ಪರಿವಾರೊ ||

9

ಗಳಿಗೆ ಬಟ್ಟಲ್ ದೀದ್ ಮೂರ್ತೊನು
 ತೆರಿದ್ ತಾರಯಿ ದರ್ತದಪಗನೆ
 ಎದುರು ಉಂತುದು ದ್ರೋಣ ಕೃಪೆರ್ಲ ಸಬೆಕ್ ಕೈ ಮುಗಿದ್ ||
 ಮಟೊಟು ಜೋಕುಲು ಕಲ್ತಿ ವಿದ್ಯೆನ್
 ನಿಕ್ಲ್ ಮಾತೆರ್ ತೊದು ಎಂಕುಲು
 ಕಲ್ಪಯೀನೆಟ್ ಎಡ್ಡೆ ಹಾಲ್ನ್ ಪನೊಡು ತೆರಿನಕ್ಲ್ ||

10

ಸುರುಕು ಬತ್ತೆನೆ ಧರ್ಮನಂದನೆ
 ಗುರುಕುಲೆನ ಕಾರ್ಪತ್ಯೆ ಅಜ್ಜನ
 ತುಡೆಕ್ ತರೆದೀಡೊಂದು ಲಕ್ಕಾದ್ ಸಬೆಕ್ ಕೈ ಮುಗಿಯೆ ||
 ಕೃಪೆರ್ಲಾ ಧನುರ್ವೆದೊ ಸಾಸ್ತ್ರನು
 ಬಿರುತ ವಿದ್ಯೆನ್ ದ್ರೋಣರಾಯಡ
 ತೆರಿತನೆನ್ ತೋಜಾಲ ಪನ್ನಗ ಪೂರ ತೋಜಾಯೆ ||

11

ಆಯೆ ತೋಜಯಿ ಪಗರಿ ವಿದ್ಯೆದ
 ಮೋಡಿನೇ ತೂವೊಂದು ಮಾತೆರ್
 ತಾತಿ ಬೊಟ್ಟನಗಪಗ ಭೀಮನ್ ಕಳಕ್ ಲೆಪುಡಯೆರ್ ||
 ವೀರ ಕಚ್ಚೆನ್ ಬಿಗಿತ್ ಕಟ್ಟಾದ್
 ಬಾರಿ ಗದೆ ಬೀಜಾದ್ ಪುಗಲ್ಡ್
 ಮೂಡಿಗೇನ್ ತಿಕ್ಕಾದ್ ಬಿಲ್ಲನ್ ಕುರ್ಕದೆತ್ತಿಯೆನೆ ||

12

ಆತ್ ಪೊರ್ತುಗು ಮಲ್ಲ ಬೊಬ್ಬೆನೆ
 ಕೇನುನೆಂಚಿನ ಪನ್ದ ನಿಟ್ಟೆರ್
 ನೂದು ಜವನೆರ್ ಕೈಟ್ಲಾಯುದೊ ಪತ್ತಾನಕ್ಲೊಟ್ಟು ||
 ಕೌರವಗ್ ಬೊಲ್ಲುಡೆನ್ ಪತ್ತಾದ್
 ದೀರ ವೀರಗ್ ಜಯೊನೆ ಜಯೊ ಜಯೊ
 ಸಾದಿ ಬುಡಿ ಪಂಡೊಂದು ಎತ್ತೆರ್ ಕಳಕ್ ಮಾತೆರ್ ||

13

ಬತ್ತನಾಯೆನೆ ಗದೆನ್ ಬೀಜದ್
 ಪೆಟ್ ಹಾಕಿಯೆ ಬೀಮ ತಿಗಲೆಗ್
 ಅಟ್ಟಸ್ಡ್ ಆ ಭೀಮ ಕೌರವಗಾಕೈನೇ ಗದೆಟ್ ||
 ಇರ್ದೆರ್ಲ ಹಾಕೊಂದು ಪೊಡಿ ಪೊಡಿ
 ರಟ್ಟಯೆರ್ ಕಳನಲ್ಲ ಬೀಸೈನೆ
 ಬುಡ್ಲೆ ಬುಡ್ಲೆಂದೇತ್ ಪಂಡಲ ಬುಡ್ಲೆರಿರ್ದೆರ್ಲ ||

14

ಹಾಕ್ ಹಾಕೊಂದಕ್ಲ್ ಪಿದಯಿಗ್
 ಪೋದುಲಾನಗ ವಿದುರ ಬೀಸೈರ್
 ದ್ರೋಣೆರೆನ್ ತೂನಗನೆ ಲಾಗೈರ್ ಅಕ್ಲೆ ನಡುಕಾರ್ ||
 ಯಾರು ಉಂತುಲೆ ನಿಕ್ಲೆ ಬಿಸ್ಪನ್
 ತೂದು ಮಾತೆರ್ ತೆಲಿಪೆರಿತ್ತೆನೆ
 ಭೀಮ ಬುಡು ಬುಡು ಪನ್ದ ಬುಡ್ಡಯೆರಾರ್ ಸಿಸೈರೆನ್ ||

15

ಪುದ್ದರ್ಡ್ ಪೊಡಿಕಲ್ಲ ನುಪ್ಪುಡು
 ತಿಕ್ಕಿಗಾದೆನೆ ಆಂಡ್ ದುಂಬುಗು
 ಮಲ್ಲಿ ಕಚ್ಚೊಗು ಬೋಣಿ ಮಲ್ತೆರ್ ಭೀಮ ಕೌರವೆರ್ ||
 ಪನ್ನಿ ಪಾತೆರೊ ಸಬೆಟ್ ಗುಜು ಗುಜು
 ಸೌದೊ ಲಕ್ಕಾದ್ ಆನಗರ್ಜನೆ
 ಬನ್ನಗನೆ ಮಾತೆರ್ಲ ಮೌನೊಡು ಕುಲೈರಲ್ಲ ||

16

ದ್ರೋಣ ಕೃಪೆರೆನ ಕಾರ್ ಪತ್ತಿಯೆ
 ಬೀಸೈ ಜಕ್ಕಲ್ಡಾಯೆ ತರೆನ್ಲ
 ದೀಡ್ಡ್ ವಿದುರಗ್ ಮಲ್ತೆ ವಂದನೆ ಮಾತ ಸಬಿಕೆರೆಗ್ ||
 ತಾನ್ ಕೈ ಮುಗಿಯೊಂದು ದೊಂಪೊಡ
 ಮಾಳಿಯೊಡು ಕುಲ್ಲದನ ಕುಂತಿನ್
 ತೂದು ಹೆಮ್ಮೆಡ್ ಬಿರುನು ಕುರ್ಕಯೆನಪ್ಪೆನೆದುರೆದುರು ||

17

ಮಂತ್ರೊ ಬಾಣೊಲೆ ಸಗ್ಗಿ ಮೀನ್ದ
 ಯಂತ್ರೊಗಾಕುನ ಯುಗ್ಗಿ ಬಂಡಿದ
 ತಂತ್ರೊ ವಿದ್ಯೆನ್ ಪೂರ ತೋಜದ್ ಆನಗನೆ ಸಬೆಟ್ ||
 ಚಂದ್ರ ವಂಸೊದ ಕೀರ್ತಿನೊರಿಪುನ
 ಇಂದ್ರನಾ ಮಗಿನಿಂಬೈ ಸೈ ಸೈ
 ಪಂದ್ರಿಯೆರ್ ಮಾತೆರ್ಲ ಪುಗರುನ ಕೇನ್ದಲಾ ಕರ್ಣ ||

18

ಅರ್ಜುನನ್ ಪುಗರ್ನಕ್ಲೆ ದೊಂಡೆಗ್
ಕರ್ಮ ಕಾಯ್ದೆ ತಲ್ಲೊಡ್ತೆನೆ
ಪನ್ದ ಬಿರು ಕುರ್ಕಾದ್ ಪಾರ್ತನ ಎದುರು ಲಾಗೊಂದು ||
ಬಿರ್ದನಯ ಈ ಉಂತುಲೆದುರುಗು
ಬಿಲ್ ಬಾಣೊದ ಬಿರ್ ತೋಜಲ
ಪನ್ನಗನೆ ಕಲಿ ಕರ್ಣನೆದುರುಡು ಉಂತ್ಯೆನರ್ಜುನೆನೆ ||

19

ಇರ್ದೆರಾಲ ತಯರಾದ್ ಉಂತ್-
ಗಲ್ಲ ಬೊಬ್ಬೆನೆ ಆಂಡ್ ಗುರುಕೃಪೆ-
ರೆತ್ತಿಯೆರ್ ನಡುಕಕ್ಲೆ ಮೋನೆನ್ ತೂದು ಜೋರುಡೆನೆ ||
ಕರ್ಮ ಈ ಎದುರುಂತುನೇರೆಡ
ಅರ್ಜುನಡನೋ ? ಆಯನೆದುರುಗು
ನಿಕ್ಕ ಉಂತ್ಯೆರೆ ಉಂಡೊ ಏಗಿತೊ ಪನ್ದ ಗ್ರೇಯ್ಲುಲಯ ||

20

ಪೊದುಕು ಜೂಜುಗ್ ಪಂತೊ ಲಡಯಿಗ್
ಎದುರೆದುರು ಉಂತುನವೆ ವೀರೆರೆ
ಸರಿಸಮಾನೊನೆ ಬೋಡು ಏಗಿತೊ ನಿಕ್ಕ ತೆರಿಯಂದೊ ||
ಮರಿಯದಿದ ವಂಸೊದಯೆನರ್ಜುನೆ
ಅದಿರತನ ಮಗೆ ಈಯೆ ನಿಕ್ಲೆಗ್
ಸರಿತ ಜೋಡಿಯೆ ಅತ್ತ ಉಂತಡ ಪೋಲ ಮುಲ್ಪಡ್ ||

21

ಸಬೆಟ್ ಮರ್ಮದಿ ದೆತ್ತೆರಂದ್
ಗುರುಕು ಪನ್ನುನೆ ಎಂಚ ಪಂಡ್
ತರೆನಡಿಕ್ ಪಾಡೊಂದು ಉಂತಿಯೆ ಕರ್ಣನಾಪೆಕ್ಡ್ ||
ಗದೆನ್ ಪುಗಲ್ಡ್ ದೀಡ್ ಭೀಮೆನೆ
ಎದುರು ಉಂತುದು ಕೇಂಡೆ ಕರ್ಣಡ
ಮೆಗಿಯನೆದುರುಗು ಉಂತುನಾಯೆನೊ ಅಮ್ಮೆ ಏರಿನ್ನ ||

22

ಪಾಂಡು ರಾಜನ ಬುಡೆದಿ ಕುಂತಿಯೆ
ಆಂಡ ಈ ಪುಟ್ಟೆದನೆ ಏರೆಗ್
ವಾಯುನಾ ಮಗೆ ಪನ್ದ ನಿನ್ನನ್ ದಾಯೆ ಲೆಪ್ಪುವೆರ್ ||
ಸೂತನಾ ಮಗೆ ಎನನ್ ದೂರ್ದನ
ಯಾನ್ ನಿನ ತರೆ ದರ್ದೆ ಪಂಡ್
ಭೀಮೆ ಗದೆ ದೇರ್ಪನಗ ಕೌರವೆ ಬತ್ತದೆದುರುಂತ್ಯೆ||

23

ಕರ್ಮ ಜಾತಿನ್ ಪನ್ದ ದೂರ್ದೆರ್
ಇತ್ತೆ ಮಿತ್ತದ ಜಾತಿದಾಕ್ಲ್
ಪಟ್ಟೊ ಕಟ್ಟುವೆನಂಗ ರಾಜೊದ ಸಿಮ್ಮೊ ಪೀಟೊದವೆ ||
ಮುದ್ರೆದುಂಗಿಲೊ ಎನ್ನ ಅಮ್ಮೆರೆ-
ಡುಪ್ಪುನಗ ಯಾನತ್ತೊ ಕೊರ್ಪುನ
ಹಕ್ಕದಾಯೆನೆ ಏರ್ ತಲಿಪೆರ್ ಬರಡ್ ಎನ್ನೆದುರು ||

24

ಕರ್ಮ ಮೋನೆನೆ ತೂದು ಕುಂತಿಗ್
ತನ್ನ ದುಂಬುದ ಬಾಲೆ ಬಲತ್
ಇತ್ತೆ ಜವ್ವನೆ ಆಯಿನಾಯೆನೊ ಪನ್ನಿ ಸಂಸಯೊಡು ||
ನಿಲ್ಕ ನಿಲ್ಕದ್ ತೂನಗಾಲೆಗ್
ದುಕ್ಕೊ ಉರ್ಕದಾಂಡ್ ತರೆನೇ
ತಿರ್ದಲ್ಲನೆ ಬೂರ್ನ ಸಾತ್ಗ್ ಬೂಡುಗತ್ತಯೆರ್ ||

25

ವಿದುರ ಬೀಸ್ಮೆರ್ ಪಿದಡ್‌ದುಂತ್ಯೆರ್
ಸಬೆನೆ ಅಗಪುನ ತೂದು ಕೌರವೆ
ಎನಡ ಪ್ರೀತಿದ ಅರಸುಲುಂತುಲೆ ಕರ್ಣಗಬಿಸೇಕೊ ||
ಮಲ್ಪವೆನೆ ಪನ್ನಗನೆ ಬೀಸ್ಮೆಗ್
ತಡೆಯೆರೆನೆ ತಿರಂದಿ ಕೋಪೊಡು
ವಿದುರ ಸಂಜಯನಕ್ಲೆ ಒಟ್ಟುಗು ಪೋಯೆನಲ್ಪಡ್ ||

26

ಕೆಲವುದಾ ಸಾಮಂತೆರುಂತ್ಯೆರ್
ಅರಮನೆದ ಸಿರಿಗಿಂಡ್ಯೆ ತರ್ಪದ್
ಬೆರಣೆರೆಡನೇ ಸೀರ್ತೊ ತಲಿಪಯೆ ಕರ್ಣ ತರೆಕಪಗ ||
ಕಯಿಟ್ ಪತ್ತದ್ ಪೀಟೊಡಾಯನ್
ಪೊರುಲುಡೇ ಕುಲ್ಲಾದ್ ಮಿತ್ತಗ್
ಜಯೊ ಜಯೊನೆ ಪಂಡೊಂದು ದೇಸೆನ್ ಪಾಡ್ಯೆ ಕೌರವೆನೆ||

27

ಮಾತೆರಾಲ ಉಡಿಗಿರೆನ್ ಕೊರೈರ್
ಆರತಿನ್ ಬೆಳಗಯೆರ್ ಪೊಣ್ಣಲು
ಕಾಣಿಗಿನ್ ಸಾಮಂತೆರೊಪ್ಪದ್ ಅಗತೆರಲ್ಪಡ್ ||
ವಾದ್ಯೊ ಗೋಸೊಡು ಕರ್ಣನರಮನೆ-
ದಾಡೆ ಎತ್ತದ್ ಉಲಯಿ ಕುಲ್ಲದ್
ಪೇರ್ ಪರೈರೆ ಕೊರ್ದು ಸಮ್ಮನೊ ಗೌಜಿ ಮಲ್ಲಯೆರ್ ||

28

ವಿದುರ ಬೀಸ್ಮೆರ್ ಪಾತೆರಂದೆನೆ
ಅಕ್ಲೆನಾತೆಗೆ ಇತ್ನನಕ್ಲೆಗ್
ಕಯಿತ ಎಣ್ಣೆನೆ ಬುಲಯಿ ಕಣ್ಣೆಗ್ ತಾಗ್‌ದಾಂಡ್‌ಂದ್ ||
ತೆರಿದ್ ಮನಿತ್‌ಜೆರಕ್ಲ್ ಪಾಂಡವೆ-
ರಪಗ ಪಂಡರ್ ನಾಯಿ ಕುಬಲ್‌ಗ್
ಬಡತ್‌ನೆಂದ್ ಅಜ್ಜ ಮೋನೆನೆ ತೂದು ತೆಲಿತೊಂದು ||

|| ಕೌರವನ ಆಡಳಿ ||

ಮೆಗಿದಿಯಾಯಿನ ದುಸ್ಯಲೆಗ್ ಕೌ-
ರವೆನೆ ಪೊದು ನಾಡೊಂದು ಸ್ಯಂದವೆ
ಪನ್‌ಪಿ ಕೀರ್ತಿದ ಸಿಂದು ದೇಸೊದ ಅರಸು ಜಯದ್ರತಗ್ ||
ಮದಿಮೆ ಮಲ್ತ್‌ದ್ ಕೊರೈ ತಾನ್‌ಲ
ಮೆಗಿಯನಾಕ್‌ಲೆನೊಟ್ಟುಗೊಂಜೇ
ದಿನೊಟು ಮದಿಮಲ್ ಬಾನುಮತಿನವೆ ಕೈನ್ ಪತ್ತಿಯೆನೆ ||

1

ಮಿತ್ರೆಯಾಯಿನ ಕರ್ಣಗಪಗನೆ
ಪೊರುದರಮನೆನಂಗ ರಾಜ್ಯೊಡು
ಕಟ್ಟಿದಾದ್ಲ ಬಾರಿ ಸಂಬ್ರುಮೊಡಯನ್ ಕಡಪುಡಿಯೆ ||
ಚತ್ತೊ ಚಾಮರೊ ತೇಜಿಯೊಬವೊ-
ಡೆತ್ತನಾ ಕಲಿ ಕರ್ಣನರಮನೆ-
ಡಿತ್ತೆ ಸುಕೊ ಸಂತೋಸುಡಾಯೆಲ ಮದಿಮೆ ಆವೊಂದು ||

2

ರಾದೆನದಿರತನಕ್‌ಲೆನಾಡೆಗೆ
ತಾನ್ ತರ್ಪದ್ ಸೇವೆ ಮಲ್ತೆನೆ
ದಾನೊ ಧರ್ಮನು ಪುಣ್ಯೊ ಕಾರ್ಯೊನು ಪೊರು ಮಲ್ಪಾಯೆ||
ವೀರ ಕರ್ಣಗ್ ಸರಿತ ರಾಜೆರ್
ಎರ್‌ಲಾ ಇದ್ದಿಂದ್ ಪನ್ನುನ
ಊರುಡೂರುಡು ಮಲ್ಲ ಸುದ್ದಿಯೆ ಆಂಡ್ ಜನೊಕುಲೆಗ್ ||

3

ಕುರುಡ ರಾಜನ ಹಿರಿಯ ಮಗೆನೇ
ಅರಸುತನೊ ಮಲ್ಪುನೆಕ್ ಎರ್‌ಲ
ಎದುರು ಮನಿತ್‌ಜೆರಪಗ ತಾನೇ ಮಲ್ತೆನಾಡಳಿ ||
ಮೆಗಿದಿ ಕಂಡನಿ ಮೂಲೆ ಉಂತಿಯೆ

ಸಕುನಿ ಸಮ್‌ಲೆನೀಡೆ ತರ್ಪಯೆ
ಮೆಗಿಯನಾಕ್‌ಲೆನೊಟ್ಟು ಕರ್ಣಲ ಸೇರ್ದೆನಪಗಪಗ ||

4

ದುಸ್ಯ ಕೂಟೊನೆ ಆಂಡ್ ದುಂಬುಗು
ಹಸ್ತಿನಾವತಿ ಲಗಡಿ ದೆಪ್ಪರೆ
ಪನ್ನಿ ದುಕ್ಕೊಡು ವಿದುರ ಬೀಸ್ಮೆರ್ ಬುದ್ಧಿ ಪನ್ನುನೆನ್ ||
ಸೊರುದಾಕ್‌ಲ್ ಕೇನ್ವೆರೇರಾಲ
ತನ್ನವೇ ಹಟೊಟಿತ್ತಿ ಕೌರವೆ
ಮಿಕ್‌ದಿತ್ತೆನೆ ರಾಜನೀತಿಗ್‌ಲಾಂಡ್ ದುರೈಗೊ ||

5

ಕುಂತಿನೇ ಗಾಂದಾರಿ ಏಪೊಲ
ಮುಂಡೆ ಪನ್ನುನ ಭೀಮೆ ಕೇಂಡೆಡ
ಉಂತಯೆನೆ ಮನಿಪಂದೆ ಪಂಡ್‌ದ್ ಆಲ್ ತಡೆವೊಂದು ||
ನಿಂಗುವಲ್ ಪಾತೆರೊನು ಲಡಯಿದ
ರಂಗೊ ಮಲ್ಪುನೆ ದಾಯೆಗ್‌ಂದ್‌ದ್
ಸಂಗತಿನ ಪಂಡ್‌ಜಲ್ ಏರ್ಡಲ ಗುಟ್ಟು ಮಲ್ತೊಂದು ||

6

ಪಾಂಡವರ್ ಕೌರವರ್ ಪನ್ನುನ
ಬೇದೊ ಅರಮನೆಡಾಂಡ್ ನಿತ್ಯೊಲ
ತಾನೊ ಮಾನೊಡು ಒನಸ್ ತೆನಸ್‌ಡ್ ಕಾರ್ಯೊ ಕರ್ಮೊಲೆಡ್
ಆಪಗಾಪಗ ಭೀಮೆ ಲಕ್‌ದ್
ಕೋಪೊ ತೋಜಯಿ ಸಾತ್‌ಗಾಯನ್
ನೀತಿದಾ ಪಾತೆರೊಡು ಧರ್ಮಜೆ ಮಲ್ತೆ ಸಮದಾನೊ ||

7

ನಮ ನಮನ ಉಲಯಿಡ್‌ಲ ಕೋಪೊಡು
ಲಡಯಿ ಆನಗ ಅಕ್‌ಲ್ ನೂದುಲ
ನಮೋನೆ ಐವೆರ್ ಬೇತೆ ಬೇತೆನೆ ಭೀಮ ತೆರಿಯೊನುಲ ||
ನನೊರಿ ಬತ್ತೆಡ ನಮೋನೆ ಒಟ್ಟುಗು
ಲಡಯಿಗುಂತೊಡ ಆವು ಲೆಕ್ಕೊಗು
ಸರಿಟ್ ನೂತ್ತೈನ್‌ಂದ್ ನಂಬುದು ಕೋಪೊ ಬುಡು ಮೆಗಿಯ

8

ದುಸ್ಯ ದುರೈದನೆನೆ ಸ್ಯಂದವ

ಕರ್ಲ ದುಸ್ಯಾಸನೆರೆ ಕೂಟೊಡು
ತನ್ನ ಸಮ್ಮಲೆ ಸಕುನಿನೆದುರುಡು ಪನ್ನೆ ದುಕ್ಕಿತ್‌ದ್ ||
ಸಮ್ಮಲೆನೆ ರಾವಣಗ್ ಸಾಯೊನು
ಮಲ್ತನಯೆ ತನ ಜೂವೊದಾಸೆನ್
ಬುಡ್ತಿನಾ ಮಾರೀಚನಂಚಿನೆ ಕಾಪೊಡೀರೆನನ್ ||

9

ಕಡಲೆಡಿತ್ತನ ಕಲ್ಲ್ , ಪುಸ್ಪೊದ
ಎಸಲ್ ದುಲಯಿದ ಪುರಿಯೆ ದೊಂಡೆಡ್
ತಿಕ್‌ದಿ ಚೇಡೆದ ಮುಲ್ಲುದಂಚಿನೆ ಭೀಮೆ ನಮ್ಮುಲಯಿ ||
ಪಗತ ಮರಿಯೋ ಮಂಜಿದುಲಯಿದ
ಪಿಲಿಯೊ ಪನ್ನನ ನಮನೆಡಾಯೆನೆ
ಲಡಯಿಗೇ ಸರಿ ನೆಲಕರೊಕ್ಕುವೆ ದಾನೆ ಮಲ್ಪೆನ್ ||

10

ಸಾರೊ ಆನೆಲೆ ತೆರಣೊ ಭೀಮಗ್
ಸೇರ್‌ದುಪ್ಪುನಗಾಯನೆದುರುಗು
ಎರ್ ಉಂತ್ವೆರ್ ಗದೆತ ಪೆಟ್ಟಾನ್ ತಿಂದ್ ಸಯ್ಯೆರೆಗ್ ||
ಈರ್ ಭೀಮನ್ ಲಗಡಿದೆಪ್ಪೆರೆ
ದಾನೆ ಆಂಡಲ ಒಂಜಿ ಕುಸೆಲ್‌ನ್
ಪ್ರೀತಿದೇ ಪನ್‌ಲೆಂದ್ ಸಮ್ಮಲೆ ಕಾರ್ ಪತ್ತಿಯೆನೆ ||

11

ಕೇನ್ ಕೌರವ ಕುಂತಿ ಜೋಕುಲು
ಮಾತೆರ್‌ಲ ಪಗತಕ್‌ಲ್ ಭೀಮೆನೆ
ಮಾತ್ರೊ ಒರಿ ಅತ್ತಂದ್ ತೆರಿಯೊಂದೀಯೆ ಜಾಗ್ರತೆಡ್ ||
ಆ ವಿರೋದಿಲೆ ನಾಸೊಗಾತ್ರೊನೆ
ಈಯೆ ಪುಣೆವೊಡು ಬಂಜಿ ಬೆಯ್ಕಲ್
ಪಾಪೊ ಪುನೊನು ಬುಡುದು ಬದ್ಕುನ ಸಾದಿ ತೂವೊನೊಡು ||

12

ಕುಂತಿ ಪಟ್ಟೊದ ರಾಣಿ ಆಯ್ಕಲ್
ಸೊಂತೊದರಮನೆಡಿತ್ತನಾಂಡಲ
ಎಂಚಿನವುಲಾ ಹಕ್ಕ್ ಆಲೆಗ್ ಇತ್ತೆ ಇದ್ದತ್ತೊ ||
ಕಂತ ಮುಟ್ಟಿನೆ ಮಲ್ಪಲಾಲೆ
ದುಂಬುದಾ ಸುಕೊ ಬೋಗೊದಾಸೆಡ್
ನೆಂಪು ದೀವೊನು ಈಯೆ ಸುಲಬೊಡು ತಿಕ್‌ದ್ ಬೂರಡಯಿ ||

13

ಪಗೇನ್ ದಗೆಟೀ ಕೆರೊಡು ಪನ್ನನ
ತೆರಿನಕ್‌ಲೆ ಪಾತೆರೊನು ಏಪೊಲ
ಬುಡುದು ಪಾಡ್ಯೆರೆ ಬಲ್ಲಿ ಕೌರವ ಕೇನ್ ಪನ್ನನೆನ್ ||
ಅಕ್‌ಲೆ ಸಂತಾನೊದವೆ ಕೊಡಿಪುಡು
ಒರಿದ್ ಒಂಜೇ ಇತ್ತನಾಂಡಲ
ನಿಕ್‌ಲೆಗವ್ವೇ ಮಾರಿ ಇತ್ತೆನೆ ಮಾತ ಮುತ್ತಾಲ ||

14

ಪಾಲ್ ಕೊರುದಾಕ್‌ಲೆನ್ ಕಡಪುಡು
ವಾರಣಾವತೊ ಪನ್ನಿ ಊರುಗು
ರಾಜದಾನಿನ್ ಮಲ್ಪದಕ್‌ಲೆಗ್ ಕೊರ್ಲ ಪೊಸತಾದ್ ||
ಸೂನು ತೋಜಯಿ ಸಾತ್ ಪೊತ್ತುನ
ಸಾರ್ಣೆಗರಕ್‌ನ್ ಬೆರಕೆ ಮಲ್ತದ್
ಏರೆಗಲ ತೆರಿಯಂದಿನಂಚಿನೆ ಕಟ್ಟಲರಮನೆನ್ ||

15

ಅಕ್‌ಲ್ ಒಕ್ಕೆಲ್ ಆಯಿ ಸಾತ್‌ಗ್
ಇರ್‌ಲ್ ಸೂ ಕೊರ್ಪಾದ್ ಪೊತ್ತಲ
ಅರಮನೆದ ಉಲಯಿತ್ತಿ ಕುಂತಿನ ಜೋಕ್ಕು ಸಯ್ವೆರ್‌ಯೆ ||
ಸಕುನಿ ಪಾತೆರೊ ಕೇನ್ ಕೌರವೆ
ಮನಸ್‌ಡೇ ನೆನೆತೊಂಡೆ ಬೀಮನ
ಪುಣನ್ ತೂಪುನ ಯೋಗೊ ಪಂಡ್‌ದ್ ಕೂಟೊನಗಪಯೆನೆ ||

16

ಕೆಲವು ದಿನೊ ಪಾಂಡವೆರೆನೊಟ್ಟುಗು
ಕುಸೆಲ್ ಗೊಬ್ಬುದ ಕಳುನು ಪಂಡ್‌ದ್
ನಮೊ ನಮೊನೆ ಒಂಜತ್ತೊ ಪನ್ನದೆ ಮೂರ್ಕ ಕೌರವೆನೆ ||
ಕುರುಡನೊಪ್ಪದ್ ಅಜ್ಜ ಬೀಸ್ಮನ
ಕೆಬಿಕ್ ಪಾಡಿಯೆ ರಾಜ್ಯೊನೆಂಕ್ಲೆಗ್
ಸರಿ ಸಮಾನೊದ ಪಾಲ್ ಮಲ್ತದ್ ಈರೆ ಕೊರ್ದೆಂದ್ ||

17

ವಾರಣಾವತೊ ಪನ್ನಿ ಊರುಡು
ರಾಜಧಾನಿನ್ ಯಾನ್ ಮಲ್ಪವೆ
ಏರೆಗಾವುಂದಕ್‌ಲ್ ಪಂಡೆರ್‌ಡೇನ್ ಒತ್ತೊನುವೆ ||
ಬೀಸ್ಮಗಲ ಸರಿ ತೋಜಿದಾನಗ
ಪಾಂಡವೆರೆಗೇ ಸುದ್ದಿ ತೆರಿಪಯೆ
ವಾರಣಾವತೊ ಎಂಕ್ಲೆಗಾವುಂದಕ್‌ಲ್ ಒಪ್ಪಿಯೆರ್ ||

18

ಅರಮನೆದ ಬಂಡಾರೊ ಬದ್‌ಕ್‌ನ್
ರತೊನು ಸೇನೆನ್ ಆನೆ ಕುದುರೆಲೆ
ಸರಿಟ್ ಪಾಲ್‌ನ್ ಮಲ್ತ್ ಕೊರೈನೆ ಕುಂತಿ ಜೋಕುಲೆಗ್ ||
ಅಕ್‌ಲೆಗರಮನೆ ವಾರಣಾವತೊ
ನಗರೊಡೇ ಕಟ್ಟವುನ ಕಾರ್ಯೊದ
ಅಮಸರೊನು ತೋಜಾಯೆ ಕೌರವೆ ಸಕುನಿ ಪಂಡಿಲೆಕೊ ||

19

ಅಜ್ಜೆ ಪಾಲ್‌ನ್ ಮಲ್ತ್ ಕೊರೈನೆ
ಧರ್ಮಜೆನೆ ಕೈಕೊಂದು ಬಗ್ಗಿಡ್
ನಿರ್ಮಲಾತ್ಮಕೆ ಆದಿ ನಾರಾಯಣನ್ ನೆನೆತೊಂಡೆ ||
ಹಸ್ತಿನಾವತಿಡುಪ್ಪಿ ರುಣೊ ನನ-
ಗಿದೈ ಪಂಡ್‌ದ್ ದುಕ್ಕೊ ಮಲ್ತ್‌ನ
ಸತ್ಯೊ ಹೃದಯೊದ ಬೇನೆದತೊನೆ ಆವು ದೇವರೆಗ್ ||

ಮೂಜನೇ ಸಂದಿ

|| ಅರಕ್‌ದರಮನೆ ||

ದುಸ್ಸ ಕೂಟೊನು ಕೂಡವೊಂದೇ
ಕಟ್ಟಯೆನೆ ಪೊಸತೊಂಜಿ ಅರಮನೆ
ಸಿಲ್ವಿ ಸಾಸ್ತೊಡು ವಾರಣಾವತೊದೂರು ಕೌರವೆನೆ ||
ಗುಟ್ಟುಡಿಲೇರ್ ಸಾರ್ಣೆ ಮಲ್ಪಯೆ
ಪೊತ್ತುದೇಲುನವರಕ್ ಬೆರಸದ್
ಒಕ್ಕಲಾಪುನ ಪಾಂಡವೇರೆನ್ ಸುಡ್ಡು ಕೆರೊಡುಂದು ||

1

ವಿದುರೆ ಗುಟ್ಟುಡು ತೆರಿದ್ ಕಟ್ಟುನ
ಕೆಲಸೊದಾಕ್‌ಲೆ ಮೇಸ್ತಿನಪಗನೆ
ಕುಸಲ್‌ಡೇ ಬರ್ಪಾದ್ ಕುರುಬಾಕಿಲ್‌ದ ಬರಿಟೊಂಜಿ ||
ನೆಲಟ್ ಮಾಟೆನ್ ಮಲ್ತ್‌ದೈನವೆ
ಉಲಯಿಡ್‌ದ್ ಪಿದಯಿಗ್‌ಲ ಪೋಯೆರೆ
ಸರಿಟ್ ಆಪಿ ಸುರಂಗೊ ತೋಡಯೆ ತೊಂಡ ತೆರಿಯಂದ್ ||

2

ರಾಜ ಚಾವಡಿ ಮೇಲ್ ಮಾಳಿಯೊ
ರಾಣಿ ವಾಸೊಗುಲಾಪಿ ನಮುನೆದ
ಕೋಣೆಲಾಯುದೊ ದೀಪುನದೆಕುಲು ರಾಜ ಬಂಡಾರೊ ||
ಓಲು ಉಪ್ಪೊಡೊ ಔಲೆ ಮಲ್ಪಯೆ
ಸೇನೆದೊಡಕರನಕ್‌ಲೆಗಿಲ್ಲೆಲ
ಆನೆ ಕುದುರೆಲೆ ಲಾಯೊ ಕೊಟ್ಟುಲು ತೇರುಲುಂತ್ಯೆರೆಗ್ ||

3

ಮಾತ ಮಲ್ಪದ್ ಅಜ್ಜ ಬೀಸ್ಮಡ
ತೋಜಯೆನೆ ಸರಿ ವಾಸ್ತು ಪೂಜೆನ್
ಮಾತೆರೆನ ಎದುರ್ಡಾಯೆ ಮಲ್ಪಯೆ ದುಸ್ಸ ಬುದ್ಧಿದಯೆ ||

ಪಾಂಡವೆರ್ ಸುಬ ದಿನೊಟು ಒಕ್ಕೆಲ್
ಆಯೆರೆಗ್ ಪಿದಡ್‌ನಗ ವಿದುರೆನೆ
ಬೀಮಡನೆ ತೆರಿಪಾಯೆ ಕೌರವೆ ಮಲ್ತಿ ಗಾತಕೊನು ||

4

ಅರಮನೆಗ್ ಬೋಡಾಯಿ ಸನ್ನಯೊ
ಒದಗದಾ ಕೌರವೆನೆ ಗಾಡಿಡ್
ಕಡಪುಡಿಯೆ ಪಾಂಡವೆರೆ ಪ್ರೀತಿದ ಕಣ್ಣೆ ಕಟ್ಟಿದಯೆ ||
ಪಿದಡಿಯೆರ್ ಪಾಂಡವೆರ್ ಅಜ್ಜನ
ಕುರುಡನೇಲ್ಯಮೈನವೆ ಕಾರ್‌ಗ್
ಪುದರ್ ಪಂಡೊಂದಕ್‌ಲ್ ಬೂರುದು ನಡತೆರಲ್ಪಡ್‌ದ್ ||

5

ಮೂರ್ತೊ ಕೇಂಡ್‌ದ್ ಪೊಸತ್ ಅರಮನೆ -
ಡಾಕ್‌ಲೇ ಗಣಹೋಮೊ ಮಲ್ಪದ್
ಮಾತ ಸಾಮಂತೆರೆಗ್ ಪೋದಾಂಡಕ್‌ಲೆ ಲೆಪ್ಪೊಲೆ ||
ರಾಜ ರಾಜೆರ್ ಸೀಮೆದೊಡಕರ -
ನಾಕ್‌ಲೆತ್ಯೆರ್ ವೇಳ್ಕೊ ಗಳಿಗಿಡ್
ಆಪಿ ಕಾರ್ಯೊಗು ದುಂಬೆ ಬತ್ತದ್ ಸೇರೈರರಮನೆಡ್ ||

6

ಸಿಮ್ಮೊ ಪೀಟೊಡು ಧರ್ಮನಂದನೆ
ಕುಲ್ಲದಾನಗ ಪುಣ್ಯೊ ಸುದೆಕುಲೆ
ಸೀರ್ಮೊನಾಯನ ತರೆಕ್ ತಲಿತೆರಲಾ ಪುರೋಯಿತೆರ್ ||
ಧರ್ಮಜಗ್ ಜಯೊ ಜಯೊನೆ ಪನ್ನುನ
ಮಲ್ಲ ಗೋಸಣೆಡಪಗ ಸಬೆಡ್‌ದ್
ಲಕ್ಕೈರೊರಿಯೊರಿ ತುಂಡು ಅರಸುಲು ಕಾಣಿಗಿದ ಕೈಟ್ ||

7

ಆಯೆ ಸಾಮಂತೆರೆನ ಕಾಣಿಗೆ
ಪ್ರೀತಿದೇ ಕೈಕೊಂದು ಮಂತ್ರಿಯ
ಸೇನೆದೊಡಕರನಕ್ಲ್ ಏರೇರ್ಂದ್ ತೆರಿಪಾಯೆ ||
ಬೀಮನೇ ರಚ್ಚಣೆಗ್ ಪಾರ್ತನ್
ಲೋಕೊಯವಹಾರೊಲೆಗ್ ಮಾದ್ರಿನ
ಜೋಕುಲೆನ್ ಅರಮನೆಡ್ ಸ್ವಾಗತೊ ಮಲ್ಪೆರುಂತಾಯೆ ||

8

ಬಲ್ಮಣೊದ ಒಣಸಾದ್ ಮಾತೆರ್
ಅಲ್ತ ಪಿದಡ್ಡ್ ಪೋಯೆರಕ್ಲೇ
ಬತ್ತಿ ರತೊ ತೇರ್ಲೆನ್ ಏರ್ಡ್ ಪ್ರೀತಿ ಬಾವನೆಡ್ ||
ಪೊರ್ತು ಕಂತ್ಡ್ ಆಂಡ್ ಕತ್ತಲೆ
ನಿತ್ಯೊ ಕರ್ಮೊನು ತಿರ್ದಾಕ್ಲ್
ಅಪ್ಪೆನೊಟ್ಟುಗು ಒಣಸ್ ಮಲ್ತೆರ್ ಜೋಕುಲೈವೆರ್ಲ ||

9

ವೇದೊ ನೀತಿನ ಧರ್ಮೊ ಸಾಸ್ತ್ರೊನು
ದ್ರೋಣ ಕೃಪೆರ್ಲ ಪಂಡ್ ಕೊರ್ನನ್
ಪೂರ ನೆಂಪುನು ಮಲ್ತಾದಾನಗ ಕಣ್ಣ್ ತೂಂಕ್ನೆಟ್ ||
ಬೀಮನರಮನೆ ಸುತ್ತ ತಿರ್ಗಿಯೆ
ಬಾಕಿದಾಕ್ಲ್ ಅಪ್ಪೆ ಕೈತಲ್
ಆಸಿಗೇಡ್ ನಿದೆಯೆರ್ ಕೂರಿಗೆನೊಯ್ತದೊಯ್ತೊಂದು ||

10

ನಿದೆರ್ಜೆನೆ ಆ ಬೀಮೆ ಕತ್ತಲೆ
ಕಬಿದಾಲಾನಗ ತಿಂಗೊಳುದ ಸರಿ
ಬೊಲುಪು ಇದ್ಯಂದ್ನವೆ ಸಮಯೊಡು ಸೂಟೆ ಪೊತ್ತಾದ್ ||
ಬರುಪುನೊರೈನ್ ತೂದು ಬೀಮೆನೆ
ಮದೆಟ್ ದೆಂಗ್ಡ್ ಕುಲೈನಪಗನೆ
ಅರಮನೆಗ್ ಸೂ ಕೊರೈ ಬತ್ತನ ಸೂಟೆದಾಯೆನೆಲ ||

11

ಬೀಮೆನಾಯನ ಕೈಡ್ ಸೂಟೆನ್
ತಾನೆ ಒಯ್ತದ್ ನಾಲ್ ಸುತ್ತಲ
ಸೂನು ಕೊರ್ಡಾಯೆನ್ಲ ನೂಕುದು ಪಾಡೈ ಸೂತುಲಯಿ ||
ಬೇಕೊ ಉಲಯಿಗ್ ನೂರ್ತು ಜೆತ್ತನ
ಬಾಕಿದಕ್ಲೆನ್ ಮೆನಿತದಪ್ಪೆನ್
ದೇರ್ತದಾಯೆನೆ ನೆಲತ ಮಾಟೆಡೆ ಪಿದಡ್ಡದುಂತೊಂಡೆ ||

12

ಆಯ ಪಿರವುಡೆ ಬಾಕಿದಾಕ್ಲ್
ನೂರ್ದು ಪಿದಡ್ಡ್ ಮಗ್ಗರ್ ತೂನಗ
ಸೂತ ಏರಿಡ್ ಕರಡ್ ಬೂರ್ಡ್ಲ ಪೊರ್ತುದರಮನೆನೆ||
ಮಾತೆರ್ಲ ಅರಮನೆದ ಪಿರವುಡೆ
ಸಾದಿ ಇತ್ತನ ತೂದು ನಡತ್ಡ್
ಕಾಡ್ಗೆತ್ತೆರ್ ಬೀಮೆ ಅಪ್ಪೆನ್ ಪುಗ್ಲೆಗ್ಗೆರ್ಲಾದ್ ||

13

ಬತ್ತ ಬತ್ತದಲಾ ಹಿಡಿಂಬನ
ಮಲ್ಲ ಕಾಡ್ಗ್ ಎತ್ತೆರಾಕ್ಲ್
ಕತ್ತಲೆನೆ ಕರಿದಾದ್ ಪುಗ್ಲೆಡ್ ಸಾದಿ ನಡಪಿಯೆರೆ ||
ಕಸ್ಸೊ ಆಯ್ತೆ ಮರತ ಮುದೆಲ್ಡ್
ತಪ್ಪುನಡಿಕೇ ಪಾಡ್ಡ್ ಜೆಪುಡಯೆ
ಅಪ್ಪೆ ಕೈತಲ್ ಮೆಗೈನಕ್ಲೆನ್ ಬುಕ್ಕೊ ಪಲಯನ್ಲ ||

14

ನಡತಿ ಬಚ್ಚೆಲ್ಡಕ್ಲ್ ನಿದೆನ್
ಮಲುಪುನಗ ಆ ಬೀಮೆ ಒರೈನೆ
ನಿದೆರ್ಜೆನೆ ಅಪ್ಪೆನವೆ ಕಾರ್ನ್ ಕೈಟ್ ಪೊಜೆಕೊಂದು ||
ಕುರುಕುಲೊತ ಮಹರಾಣಿ ಆಯಿನ
ಬಿರ್ಸೆರೈವೆರೆ ಅಪ್ಪೆ ಕಾಡ್ಡ್
ನಿದೆರುನಾ ಗತಿಯಾಂಡೆ ಪಂಡ್ಡ್ ಚಿಂತೆ ಮಲ್ತೊಂಡೆ ||

15

ಆ ಹಿಡಿಂಬಾಸುರೆನೆ ಕಾಡ್ಗ್
ಏರೊ ನರಮನಿ ಬತ್ತದುಪ್ಪುನ
ಸೋವು ತೆರಿಯೊಂದಾಯೆ ಮೆಗಿದಿಡ ಪಂಡೆನಬ್ಬರೊಡು ||
ಓಲು ಉಲ್ಲ ಹಿಡಿಂಬೆ ಬಲ ಬಲ
ಕಾಡ್ಡುಲ್ಲೆರ್ ನರಮನಿಯೆರ್
ಈಯೆ ನಾಡ್ಡ್ ಕನಲ ಅಕ್ಲೆನ್ ತಿನ್ನೊ ಬಂಜಾರೊ ||

16

ದಾಯೊ ದಾಯೊನು ಕಾಯ್ತದೆಣ್ಣೆಡ್
ಮಾಸೊ ಬೆಯ್ತದ್ ತಿನ್ನೊ ಗಟ್ಟಿದ
ಬಾರಿ ಎಲು ಮಂಡೆನ್ಲ ದರ್ಡ್ ನೆಯಿಟ್ ಕಾಯ್ತೊಂದು
ಬೋಡು ಬೋಡಯಿನಾತ್ ತಿನ್ನುನ
ಯೋಗೊ ಒದಗ್ಡಲಾಂಡ್ ಬೇಕೊನೆ
ಪೋದು ಕೆರ್ದೆ ಕನಲ ಪನ್ನಗ ಆಲ್ ಪಿದಡಿಯಲ್ ||

|| ಭೀಮನ ಮದಿಮೆ ||

ಆ ಹಿಡಿಂಬಾಸುರನ ತಂಗಡಿ-
ಯಾಯಿನಾಲೆ ಹಿಡಿಂಬೆ ಬತ್ತದ್
ಕಾಡ್‌ದುಲಯಿಡೆ ನಾಡ್ಡ್ ತೂಯಲ್ ಬಲ್ಲೆದಡಿಟೊಮೆ ||
ನೇಲ್ಯ ಗೋಳಿದ ಮರತ ನಿರಲ್‌ಡ್
ನಾಲ್ ಆಂಜೊವು ಒರ್ತಿ ಪೊಂಜೊವು
ಕೂರಿಗೆನ್ ಒಯ್ಪೆದರ್ ನಿದ್ರೆಡ್ ಒರಿಯೆ ಕುಲ್ಲೊಂದೆ ||

1

ಕುಲ್ಲನಾಯನ ದೇಕಿ ಸೈರೊದ
ಪೊರ್ದುದಂಗಾಂಗೊಲೆನ ತೇಜಿನ್
ಆಣ್ಣೆಗಿತ್ತನ ಮೀಸೆ ಮೋನೆಡ್ ತೂಯ್ನ ರಕ್ಕಸಿಗ್ ||
ಮನತ್ತನ ಪೂ ಬಾಣೊ ನಾಟ್‌ದ್
ಸೊರೊಯೆನೆ ಇದ್ಯಂದೆಲಾಯನ್
ತನ್ನ ಸೈರೊದ ಸುಕೊಕು ಒದಗವೊಡುಂದು ಕೈ ಮುಗಿದ್ ||

2

ಸ್ವಾಮಿ ಈ ರಕ್ಕಸೆರೆ ಕಾಡ್‌ಗ್
ದಾಯೆ ಬತ್ತರ್ ಪನ್‌ಲೆ ಮುಲ್ಲೊರಿ
ದಾನವೆನೆ ಉಲ್ಲೆತ್ತೊ ಆಯನ ಮೆಗಿದಿಯಾನಿತ್ತೆ ||
ಕಾಡ್‌ದುಲಯಿಡ್ ಏರೊ ನರಮನಿ
ಸೇರ್‌ದುಲ್ಲೆರ್ ಪನ್ದ್ ತೂಯೆರೆ
ನಾಡ್ಡ್ ಬತ್ತನೆ ನಿಕ್‌ಲ್ ಪೋಪುನವೆಡ್ಡೆ ಮುಲ್ಲಡ್ಡ್ ||

3

ಎನ್ನ ಪಲಯೆನೆ ದುಸ್ವ ರಕ್ಕಸೆ
ಪನ್ನ ಕೇನಯೆ ನರಮನೀಯೆರ್
ಕಣ್ಣೆಗಾಂಜಿನ ಸಾತ್‌ಗಾಯೆನೆ ಕೆರ್ಡ್ ನಿಂಗುವೆನೆ ||
ದಡ್ಕ ಲಕ್ಕದ್ ಬೀಮೆ ಆಲೆಡ
ಪನ್ನೆ ನಿನ್ನವೆ ಪಲಯೆ ಬರಡ್‌ಯ
ಎನ್ನನಿತ್ತೆನೆ ನಿಂಗುವೆಡ ನಿಂಗೊನಡ್ ಪನ್‌ಲಯಡ ||

4

ಈತ್ ಪನ್ನುನ ಕೇನ್ದ್ ಆಲೆಗ್
ಪೋಡ್ಯನಯೆ ಅತ್ತಿಂಬೆ ಪನ್ನುನ
ಆತ್ಮೋಡೇ ಇಸ್ವಾಸೊ ಪುಟ್ಟುದು ಕೇನ್ವಲಾಯಡನೆ ||
ಈರೆ ಪೊರ್ದುನು ತೂದು ಮನಸಾಡ್
ಆಸೆ ಆಯ್ಪೆನ್ ಪನಿಯೆರೆಂಕಲ
ನಾಚಿಗನೆ ಆಪುನಿಟ್ ಕಸ್ಪೊನೆ ಆಂಡ್ ತೆರಿಪಯೆರೆ ||

5

ರಕ್ಕಸಿಗ್ ನಾಚಿಗಲ ಉಂಡೊಯ
ನಿನ್ನ ಮಿಂಡನ್ ಏರ್ ಕೆರ್ತೆರ್
ಐಕ್ಕ್ ಎನ್ನಡ ದೂರು ಪನಿಯೆರೆ ನಿಕ್ಕ್ ನಾಚಿಗನೊ ||
ಪನ್ನಗನೆ ಪಾರ್ಬತ್ತೆ ಮೆಗಿದಿನ್
ದುಸ್ವ ರಕ್ಕಸೆ ತೂದು ಕೋಪೊಡು
ಮುಲ್ಪ ಉಲ್ಲನ ದಾನೆ ಕಡೆಸನೆ ಏರ್ಡ್ ಪಾತೆರುವ ||

6

ಪಂಡ್‌ದಾಯೆನೆ ಬೀಮ ತಿಗಲೆಗ್
ಒಂಜಿ ಗುದ್ದುನು ಗುದ್ದೆನಪಗನೆ
ಕಂಡು ರಕ್ಕಸ ನಿನ್ ದೀಡಯೆ ಪನ್ದ್ ಬಲೊ ಬೀಮೆ ||
ಗುಂಡು ಕಲ್ಲನ್ ಕೈಟ್ ಪತ್ತದ್
ಮಂಡೆಗಸುರಗ್ ದರ್ತನಾಪಗ
ದೊಂಡೆಡೇ ನೆತ್ತೆರ್‌ನ್ ಕಕ್ಕದ್ ಬೂರ್ಕ್ಕರಬಯಿನ್ ||

7

ಜೆತ್ತನಾಕ್‌ಲ್ ಕೇನ್ದ್ ಲಕ್ಕೆರ್
ರಕ್ಕಸನ ಪುಣ ತೂದುಲರ್ಜುನೆ
ಒರೈ ಕಾದನೆ ದಾಯೆಗೆನ್ನನ್ ಈಯೆ ಮೆನಿಪಂದೆ ||
ಪೆಟ್ಟ್ ಬೀಮಗ್ ಆಂಡೊ ಪಂಡ್‌ದ್
ಅಪ್ಪೆ ಕುಂತಿಯೆ ಮೆಯಿನ್ ಈಸ್ಯಲ್
ಧರ್ಮಜೆನೆ ಸರಿ ನೆರೈ ಬೀಮಗ್ ಒರಿಯೆ ಕಾದನೆಕ್ ||

8

ಆ ಹಿಡಿಂಬೆನೆ ಬೀಮ ಮೋನೆನ್
ತೂದು ಬುಲ್ತಲ್ ಈರ್ ಕೆರೈರೆ
ಪ್ರೀತಿದಾ ಎನ್ನಣ್ಣಿನಿತ್ತೆನೆ ಎಂಕ್ ಗತಿ ಏರ್ ||
ಈರೆ ಎನ್ನವೆ ಕೈನ್ ಪತ್ತದ್
ಕಾಪೊಡುಂದುದು ಅಡ್ಡೊ ಬೂರ್ಕ್ಕಗ
ಬೀಮೆ ಕೋಪೊಡು ಪಂಡೆನಾಲೆಡ ನಡಪು ಮುಲ್ಪುದು ||

9

ಅಪ್ಪೆ ಪೆದಿಮಗೆ ನಿನ್ ಆಯೆರೆ-
ಗೊಪ್ಪಯೆನೆ ನಿಜೊ ನಿಕ್ಕ್ ಯಮನೇ
ಒಪ್ಪುನಾ ಕಂಡನಿಯೆ ನಿನ್ನನ್ ಆಡೆ ಕಡಪುಡುವೆ ||
ದುಸ್ಪೆದಿಯೆ ಪೋಲಂದ್ ಹಾಕೈರೆ
ದೆರಿ ಕೈ ತೂದಾಲ್ ಪೋಡಿಡ್
ಅಲ್ಪ ಇತ್ತನ ಕುಂತಿ ಕಾರ್‌ಗ್ ಬೂರ್ಕ್ಕ ಬುಲ್ಲೊಂದು ||

10

ಎನ್ನ ಪಲಯನ್ ಕೆರ್ನು ಇಂಚೆರೆ
ಎನ್ನವೇ ಕೈ ಪತ್ತೊಡುಂದುದು
ಬಿನ್ನಯೊನು ಮಲ್ಪುನಗ ಹಾಕೈರೆ ಬರೆಂಕಪ್ಪೇ||
ಪೋಣ್ಣ ಜಲ್ಲೊಡು ದಾಯೆ ಪುಟ್ಟಿನೊ
ಪನ್ದ ಬುಲ್ಪುನ ರಕ್ಕಸಿನ್ ಸರಿ
ದಿಸ್ತಿ ದೆತ್ತದ್ ತೂದು ಕುಂತಿಗಲಾಂಡ್ ಬೇಜಾರೊ ||

11

ದೈತ್ಯರೇ ದಿತಿ ದೇವಿ ಸಂತತಿ
ರಕ್ಕಸೆರ್ ಪನ್ಪಾಯೆರಾಕ್‌ಲ್
ಅನ್ಯಯೊನು ಮಲ್ತೊಂದು ವಂಸೊಗು ಕೊರತೆ ಇದ್ಯತ್ತೊ ||
ಪೋಣ್ಣ ರಕ್ಕಸಿ ರೂಪೊಡಿದ್ಯಲ್
ಲಚ್ಚಣೊಡು ಎಡ್ಡೆಂದ್ ತೋಜ್ವಲ್
ಒಪ್ಪಯೆರೆ ಬೀಮನ್‌ಲ ಲೆತ್ತಲ್ ತನ್ನ ಕೈತಡೆಗ್ ||

12

ಪೋಣ್ಣ ಜಲ್ಲೊನು ಹಾಲ್ ಮಲ್ತೆರೆ
ಬಲ್ಲಿ ಮಗ ಈ ಪಾಪೊದಾಲೆನ
ರಚ್ಚಣೆಗ್ ಬೋಡಾದ್ ಮದಿಮೆನೆ ಆವೊಡುಂದಾಲ್ ||
ಪನ್ನಗನೆ ಎನ್ನಣ್ಣೆ ಉಲ್ಲೆನೆ
ಪೋಣ್ಣನಾವಡ್ ಆಯೆ ಹಿರಿಯಯೆ
ಅಪ್ಪೆ ಈರೇ ಪನ್ನೆ ಆಯಡ ಎನನ್ ಬುಡ್ಲೆಂದೆ ||

13

ಪನುಪುನೆನ್ ಕೇನೊಂದು ಧರ್ಮಜೆ
ಹಿರಿಯಯೆನೆ ಈಯತ್ತೊ ಲೋಕೊಡು
ಜಲುಮೊ ಪಡೆಯಿನ ಜೀವೊ ರಾಸಿದ ಪ್ರಾಣರೂಪೆಂದ್ ||
ಪುದರ್‌ಡಿತ್ತನ ವಾಯುದೇವನ
ಮಗನೆ ಈ ಆವೊಂದು ಪನ್ನನ
ಎನನ್ ಹಿರಿಯಯೆ ಪನ್ದ ತತ್ತೊನು ದಾಲ ತೆರಿದ್‌ಜನ ||

14

ಅರ್ಜುನೆಲ ಸರಿ ಪಂಡೆ ಬೀಮಗ್
ಪೋಣ್ಣ ಮದಿಮೆಗ್ ಒಲಿದ್ ಬನ್ನಗ
ಬೊಡ್ಡಿ ಪನ್ನನ ಸುಬವೊ ಚಿತ್ರಲೆ ಜಾತಿಗಾವಂದ್ ||
ನಿಕ್ಕ ಸರಿತವೆ ಜೋಡಿ ಆಯಿನ
ಪೊರ್ಣುದಾಲೆನ ಕೈನ್ ಪತ್ತಲ್
ಪನ್ನಗನೆ ತನ ಕಣ್ಣ ಮಗ್ತರ್ದುಂತ್ಯೆನಾ ಬೀಮೆ ||

15

ನಕುಲ ಸಾದೇವೆರ್‌ಲ ಪಂಡೆರ್
ಅಪಗ ಬೀಮೆನೆ ಪನ್ನನಕ್‌ಲೆಡ
ನಿಕ್‌ಲೆನೊಟ್ಟುಗು ಯಾನ್ ಉಂತುಜಿ ಪೋಪೆ ಓಲಾಂಡ ||
ಮದಿಮೆ ಆವಯೆ ಪನ್ನಗಪಗನೆ
ಮುನಿಕುಲೆನ ಗುರು ವೇದವ್ಯಾಸೆರ್
ಸಿವನ ತೇಜಿಡ್ ಬತ್ತದುಂತ್ಯೆರ್ ಮುಕುಲೆ ಕೈತಲ್‌ಡ್ ||

16

ಮಾತೆರ್‌ಲ ಕಾರ್ಗಡ್ಲೊ ಬೂರುದು
ಬೀಮನೊಪ್ಪದ್ ಮದಿಮೆ ಮಲ್ತೆರೆ
ತೀರುಜಿಂದ್‌ದ್ ಪಂಡೆರಾಕ್‌ಲ್ ಮುನಿಕ್ ಕೈ ಮುಗಿದ್ ||
ಯಾನ್ ಬತ್ತನೆ ಅಯಿಕೆ ಪಂಡ್‌ದ್
ಬೀಮನೇ ಕೈತಡೆಗ್ ಲೆತ್ತದ್
ಪ್ರೀತಿಡಾಯನ ತರೆಕ್ ಕೈ ದೀಡೊಂದು ವ್ಯಾಸಮುನಿ ||

17

ನಿಕ್ಕ ಒರಿ ಸಾಮರ್ತಿಗೆದ ಮಗ
ಪುಟ್ಟಿಯೆರೆಗಿಂಬಲೆನ ಮದಿಮೆಗ್
ಒಪ್ಪುಲಯ ನನ ನಿಕ್‌ಲೆನೆಡ್ಲೆಗ್ ಪನ್ನಗೊತ್ತೊಂಡೆ ||
ಧರ್ಮ ಅರ್ತೊಡು ಕಾಮೊಡತಿಕ್ರಮೊ
ಮಲ್ಪಂದೀಯೇ ನಿನ್ನ ಬುಡೆದಿನ
ಒಟ್ಟುಗೇ ಸಂಸಾರೊ ಮಲ್ತದ್ ಸುಕೊನು ಪಡೆಲಂದ್ ||

18

ಆ ಹಿಡಿಂಬೆನ ಕೈನ್ ಪತ್ತದ್
ಪೋಯೆರಾರುಸಿ ವೇದ ವ್ಯಾಸೆರ್
ಬೀಮೆ ಬುಡೆದಿನ ಒಟ್ಟು ತಿಗೈನೆ ಕಾಡ ನಡುಟೊರೆ ||
ನೀರ್‌ದಬ್ಬಿಡ್ ಮೀಯೆರಾಕ್‌ಲ್
ಕಾಡ್ ಪರ್‌ದ್‌ನ್ ಕೊಡ್ ತಿಂದೆರ್
ಸೀಯೊದಾ ನೆಯಿ ನಕ್ಕಿಯೆರ್ ಸರಿ ಜೆತ್ತ ಪುರೆಲಿಯೆರ್ ||

19

ಇಂಚನೇ ಒಂಜೊರ್ಸೊ ಗೊಬ್ಬುದು
ಎಂಚ ಕರಿನೆನೊ ಪನ್ನಿ ಸಂಗತಿ
ಕುಂತಿನಾ ಮಗ ತೆರಿಜೆ ಬುಡೆದಿಗ್ ಗರ್ಬೊ ಉಂತ್‌ನೆನ್ ||
ಪಂಚ ಪಾಂಡವೆರಪ್ಪೆ ಕುಂತಿಯೆ
ಸಂತೊಸುಡು ಮರ್ಮಲೆಗ್ ಬಯಕೆದ
ಸಂಕಡೊಗು ಪುಲಮರ್‌ದ್ ಕಾಡ್‌ಡ್ ನಾಡ್ಲ ಪರ್ಪಯಲ್ ||

20

ಆ ಹಿಡಿಂಬಾಸುರನ ಅರಮನೆ-
ಡಾಲೆನೇ ಸಾಂಕಿಯೆರ್ ಪೊರ್ಲುಡೆ
ಏಳ್ ತಿಂಗೊಳುಡಾ ಹಿಡಿಂಬೆಗ್ ಬಯಕೆ ತೀರ್ದಯೆರ್ ||
ಆಣ್ ಬಾಲೆನ್ ಒಂಬೊ ತಿಂಗೊಳು
ಆದ್ ಒಂಬನೆ ದಿನೊಟು ಪೆದ್ಯಲ್
ಪಾಂಡವೆರೆ ಸಂತೋಸು ಕುಂತಿಗ್ ಪುಳ್ಳಿ ಸಾಂಕಿಯೆರೆ ||

21

ನಲ್ಯೊ ನೀರ್ನ್ ಮೀದ್ ಪೆದ್ದದಿ
ಲಕ್ಕಿಯಲ್ ಸುಕೊಟಾಲ್ ಬಾಲೆಲ
ಪೊರ್ಲು ಪೊರ್ಲಾಯೆನೆ ಗಟೋದ್ಗಜೆ ಬೀಮ ಸುಕುಮಾರೆ ||
ಅಲ್ಪಡ್ ಪಾಂಡವೆರ್ ಪಿದಡ್ಡದ್
ಕಲ್ ಮುಲ್ಲದ ಕಾಡ್ಡ ಸಾದಿಡೆ
ಬತ್ತನಾಕ್ ಏನೆ ಕಲ್ದದ ಗಟ್ಟಿಗತ್ತಿಯೆರ್ ||

|| ಬಕಾಸುರನ್ ಭೀಮ ಕಿರೈ ||

ಏನೆ ಕಲ್ಡದಾನೆ ಕಲ್ದದ
ಊರುದಾಡೆಗ್ ಪರ್ಬುದಿತ್ತನ
ಕಾಡೆನೆ ನಡತೊಂದು ಎತ್ತೈ ಇಸ್ವಿಕಾ ಪುರೊಕು ||
ಬ್ರಾಣೆರೆಂಕುಲು ಪನ್ದ ಬೆರಣೆರೆ
ಕೇರಿಡಿತ್ತನ ಅಗ್ರಹಾರೊಡು
ಸೇರ್ದಾಕ್ ಉಡರೊ ಮಲ್ತೆರ್ ಧರ್ಮೊ ಚತ್ತೊಡುಲ ||

1

ನಟ್ವೆ ತಿನ್ನುನ ಬ್ರಾಣೆರೆಂದ್
ನಿತ್ಯೊ ನಟ್ಟೆರೆ ಪೋಪೆರೂರುಡೆ
ದುತ್ತು ಐತೊನು ಬ್ರಾಣೆರೆಂಚಿನೆ ಅಕ್ ಲ ಮಲ್ತೊಂದು ||
ಇಸ್ವಿಕಾ ಪುರೊಟೊರೆ ತಿರ್ಗದ್
ಉತ್ತಮೆರೆ ಇಲ್ಲಾಲೆನ್ ಕೇಂಡ್
ನಟ್ಟೆರೆಗ್ ಬಾಕಿಲ್ಡ ಉಂತುದು ಪಾತ್ರೊ ತೋಜವೆರ್ ||

2

ಪಗಲ್ ನಟ್ವೆ ತಿಕ್ಕನೇನಲ
ಕನತ್ ಕೊರೈ ಅಪ್ಪೆ ಕುಂತಿಡ
ಬೆಯಿಪದಯಿನವೆ ಅರ್ದೊ ಪಾಲ್ ನ ಬೀಮಗೊರೈಗೆನೆ ||
ಒರಿನ ಅರ್ದೊನು ಬಾಕಿದಾಕಲೆ

ಇರೆಕ್ ಬಲಸ್ ದ್ ಕೊರೈಲೇಪೊಲ
ಸರಿಟ್ ಪಟ್ವೆದ್ ಕೊರ್ನನಾಕ್ ಲ್ ಪ್ರೀತಿಡುನ್ನೆದರ್ ||

3

ಮಲ್ಲತಿಗೆಡಾಕ್ ಲೆನ ತರವಡ್
ಹಸ್ತಿನಾವತಿದರಸು ಕುಟುಮೊನೆ
ಬಿರೈಗೆಡಿಂದ್ರಡ್ ಮೇಲ್ ದ ಕೀರ್ತಿ ಪಡೆಯಿನವೆ ||
ಚತ್ತಿ ಜಾತಿದ ವೀರೆರೆಗ್ ಇನಿ
ನಟ್ವೆ ತಿನ್ನುನ ಯೋಗೊ ಸಿವ ಸಿವ
ನೆಕ್ ಪನ್ನುನೆ ತರೆಟ್ ಬರೆಯಿನೆನಿರೆಟ್ ಪೂಜೊಲಿಯೊ ||

4

ಒಂಜಿ ದಿನೊ ಮೂಜಂಜ ಪೊರ್ತುಡು
ಕುಂತಿ ಬುಡರೊಡು ಒತ್ತೈ ಕುಲ್ಲುದು
ಚಿಂತೆಡುಪ್ಪುನಗಪಗ ನಿರತವೆ ಬೆರಣೆರಿಲ್ಲಡ್ ||
ಆಂಜೊವೆನ ಸೊರೊ ಬುಲ್ಲು ಕೇಂಡ್
ಬಂಜಿ ಬೆಯೈಲ್ಡಾಡೆ ಬತ್ತಲ್
ಪಂಚ ಪಾಂಡವೆರೆಪ್ಪೆನೇ ವಸುದೇವನಾ ಮೆಗಿದಿ ||

5

ಉಲಯಿ ಪೊಗ್ಗುದು ತೂನಗಲ್ಪನೆ
ಬೆರಣೆ ಒರಿ ತನ ಬುಡೆದಿನೊಟ್ಟುಗು
ಮಗನ್ ಕೈತಲ್ ಕುಲ್ಲವೊಂದೇ ಬಾರಿ ಬುಲೈದೆನೆ ||
ನಿರೆಕರೆಟ್ ಮನಿಪುಜೆರ್ ಏರ್ಲ
ಬುಲುಪುನೆಂಚಿನೆಕ್ಂದ್ ಪಿನಿಯೆರೆ
ಕರಕರೆಡ್ ಆ ಬೆರಣಡಪಗನೆ ಕೇಂಡಲಾ ಕುಂತಿ ||

6

ದಾಯೆ ಬುಲ್ಲುನು ಬಟ್ಟೆ ಈರೆಗ್
ದಾನೆ ಕಸ್ತೊನೆ ಆಂಡ್ ಪನ್ನೆಯೆ
ಏರೆಗಲ ತೆರಿಪಯೆರೆಗಾವಂದ್ ನವೆ ಆಪೊತ್ತೊ ||
ಯಾನ್ ಪಂಡ್ ದಾನೆ ಪ್ರೇಜನೊ
ಊರುಗೊರಿ ಮಾಮಾರಿ ರಕ್ಕಸೆ
ಸೇರ್ದುಲ್ಲೆ ಕಲೆಂಜಿ ಮಲೆತವೆ ಗಮಿಟ್ ದೆಂಗೊಂದು ||

7

ಆಯೆ ಊರುಗು ದಿನೊಲ ಜತ್ತದ್
ಕೇರಿ ಕೇರಿಡ್ ತಿಕ್ಕನಕ್ ಲೆನ್
ಪೂರ ನಿಂಗೊಂದಿತ್ತನಾಯಗ್ ಮಾತ ಊರ್ದಕ್ ಲ್ ||
ಸೇರ್ದ್ ಕೈ ಮುಗಿದಡ್ ಬೂರೈರ್

ಏಪೊಲಾ ದಿನೊಕೊಂಜಿ ಇಲ್ಲದ
ಆವರೊನು ಕಡಪುಡುವೊ ಪಂಡ್‌ದ್ ಆಯನೊಪ್ಪಯೆರ್ ||

8

ಎರ್ರೆಗಾಡಿಡ್ ನುಪ್ಪು ಕಜಿಪುನು
ನಿಲೈದಿಂಜದ್ ಐನ್ ಒಯ್ಪರೆ
ರಡ್ಡಾಗೋಣೆರ್ ದೇರೈರೊರೈನ್ ನಿತ್ಯೊ ಕಡಪುಡೊಡು ||
ಎತ್ತಿ ಸಾತ್‌ಗ್ ಗಾಡಿದುನ್ನುನು
ತಿನ್ನೆ ದೇರುನ ಜನೊನು ನಿಂಗುವೆ
ಒಯ್ಪುನೆರ್ರೆನ್ ಕೆರ್ಡ್ ತಿಂದ್‌ದ್ ಗಮಿಟ್ ನಿದೆರುವೆನೆ ||

9

ಎಲ್ಲೆದಾ ದಿನೊಟಿಂಕ್ಲೆನಿಲ್ಲದ
ಸರ್ತಿ ಗಾಡಿನ್ ದೇರೈರೇನೇ
ಇತ್ತಾನಯೆ ಒರಿ ಪನ್ನೆಗನ್ನವೆ ಬುಡೆದಿ ಒಪ್ಪುಜಲ್ ||
ಇತ್ತೆ ಮಗೆ ತಯರಾದ್ ಉಂತ್‌ನ-
ಗೆನ್ನ ಸಾರ್‌ದೊನು ಮಲ್ಪುನೇರಾಂ-
ದೆನ್ನಿ ಚಿಂತೆಡ್ ಸಾದಿ ತೋಜಂದೆಂಕ್ಲು ಬುಲ್ಪುವೊನೆ ||

10

ಈರ್ ಚಿಂತೆನ್ ಬುಡ್ಲೆ ಎಂಕೊರಿ
ಬಾರಿ ಬಂಜೆಲೆ ಪುಟ್ಟುದುಲ್ಲೆನೆ
ಆಯ ಬಂಜಿನ್ ದಿಂಜಯೆರೆ ಇನಿ ಎಂಕ್ ತೀರುಜಿಯೆ ||
ಗಾಡಿದೇರೈರೇಗಾವು ಜವ್ವನೆ
ದಾನವೆನೆ ಇನಿ ನಿಂಗಡಾಯನ್
ಮಾರಿ ಪೋಂಡುಂದೇನ್ ಗೆರೆಪುವೆ ಈರ್ ಬುಲ್ಪಡೆಯೆ ||

11

ಅಮ್ಮ ಈರೇ ದಾನೆ ಪನ್ನರ್
ದುಡ್ಡು ಬಂಗರ್ ಕೊರೈರೇರಾಲ
ಅಪ್ಪೆ ಆಯ್ಕುರ್ ಮಗನ್ ಕೊರೈರೊ ಬಾಯ್ಗ ರಕ್ಕಸನ ||
ಬಟ್ಟೆ ಕೇನ್‌ಲೆ ಸಿಬಿದದೀಚಿಯೆ-
ರಿತ್ತನಾಕ್‌ಲ್ ದುಂಬು ಎಂಚಿನ
ಕೊರೈರಂದ್‌ದ್ ಈರ್ ತೆರಿಯೊನಿ ಲೋಕೊ ರಚ್ಚಣೆಗ್ ||

12

ಯಾನ್ ಎನ್ನವೆ ಮಗನ್ ಕೊರೈಡ
ಊರುನೊರಿತ್‌ನ ಪುಣ್ಯೊ ಕೀರ್ತಿಯೆ
ಪಾಪಿಯಾಯಿನ ಎಂಕ್ ಒದಗಡ್ ಪನ್ನ್ ಕೊಪೇರ್ನ್ ||

ದೇವೆರೆನ ಮಾಯೊನೆನೊ ಪಂಡ್‌ದ್
ಸಾದು ಬ್ರಾಣೆನೆ ಒತ್ತಿ ಸಾತ್‌ಗ್
ಪಾರ್ ಬತ್ತಲ್ ಕುಂತಿ ಬೀಮಡ ಸುದ್ದಿ ಪನಿಯೆರೆಗ್ ||

13

ಬೀಮಗೀ ಪೊಸ ಸುದ್ದಿ ಕೇಂಡ್‌ದ್
ಬಾರಿ ಸಂತೋಸಾದ್ ಇರ್ಲೆಡ್
ತಾನ್ ನಿದೆರ್‌ಜೆ ಒಣಸ್ ಬಲ್ಲಣ ತಿಕ್ಕುನಾಸೆಡ್‌ಲ ||
ಬ್ರಾಣಿನಿಲ್ಲದ ನೆಸಲೆ ಪಾಡೈರೆ
ಕಾಯ್ಪುನೆಣ್ಣೆದ ಮೂರಿ ಮೂಂಕುಗು
ಬಾರಿ ಎಡ್ಪುನಗಪಗ ನಿದೆರ್‌ಜೆ ಬೊಲ್ಪು ಆಯ್ಕೇಟ ||

14

ಪುಲ್ಪನಗ ಲಕ್ಕೊಂದು ಮೀಯೆನೆ
ನಿತ್ಯೊ ಕರ್ಮೊನು ಬೇಕೊ ತೀರ್ರಯೆ
ಅಪ್ಪೆ ಕಾರ್‌ಗ್ ಅಡ್ಲೊ ಬೂರಿಯೆ ಅಣ್ಣ ಧರ್ಮಜನ ||
ಪುಣ್ಯೊ ಪಾದೊಗು ಮಲ್ತೆ ವಂದನೆ
ಅರುನ್ನನ ಬೆರಿ ಬೊಟ್ಟೆ ನಕುಲಗ್
ಬುಕ್ಕೊ ಸಾ ದೇವಗ್‌ಲ ಮುತ್ತುನು ಕೊರ್ದು ಪಿದಡಿಯೆನೆ ||

15

ದುಸ್ಸ ದನುಜನ್ ಕೆರ್ಡ್ ಊರುದ
ಕಸ್ತೊ ಪರಿಯರೊ ಮಲ್ಪು ಪನ್ನನ
ಅಪ್ಪೆನಾಸೀರ್ವಾದೊಡಾಯೆನೆ ಎತ್ತೆ ಬ್ರಾಣೆರಡೆ ||
ನಿಲೈ ಗಾಡಿಡ್ ನುಪ್ಪು ಕಜಿಪುನು
ಒಟ್ಟು ದಿಂಜದ್ ಗಾಡಿಗೈರೈನ್
ಕಟ್ಟೆದಿತ್ತನ ತೂದು ಲಾಗಿಡ್ ಕುಲೈ ಕತ್ತೆರಿಡ್ ||

16

ಮಗನ್ ರಕ್ಕಸ ಬಾಯ್ಗ ಕೊರೈನ
ಪೆದ್‌ನ ಅಪ್ಪೆಗ್ ಇದೈ ಕನಿಕರೊ
ಜನೊಕುಲಾಯನ್ ತೂಯೆರೆಂದ್‌ದ್ ಸೇರೈರೊಟ್ಟಾದ್ ||
ಎನನ್ ತೂಯೆರೆ ದಾಯೆ ಬತ್ತರ್
ಸಯಿಪುನಯೆ ಯಾನತ್ತೊ ರಕ್ಕಸೆ
ತಿನಡ್ ಸಾದಿನ್ ಬುಡ್ಲೆ ಗಾಡಿನ ದೇರೈರೆಂಕಿತ್ತೆ ||

17

ಎರ್ರೆ ಮೂಂಕುದ ಬಲ್ಲನೈತ್ತಾದ್
ಪತ್ತದಾಯೆನೆ ಬೆರಿಕ್ ಹಾಕಿಯೆ

ಪೆಟ್ತ್ ಬೂರ್ನುಗ ಪಾರ್ಯೊ ಗೋಣೆರ್ ನಾಲ್ ಬಕ್ಕರ್ಡ್ ||
 ಸರ್ರೊ ಸಾದಿಡೆ ಗಾಡಿ ಕಡತ್‌ದ್
 ಎತ್ತರೊದ ಪರ್ವತೊನು ಏರೈರೆ
 ಕಸ್ಸೊ ಆನಗ ಚಡವು ಮಿತರಿಯೊ ಎರು ಮೆಲ ಮೆಲ್ಲ ||

18

ಬೀಮಗೆಡ್ಡೆನೆ ಆಂಡ್ ಗಾಡಿಡ್
 ಕಾಂಟ್ಕ ಕಟರೊಡು ಇತ್ತಿನುಪ್ಪುಗು
 ಸಾರ್ ಕೊದ್ಯೊಲು ಕಜಿಪು ಮೊರೆತ್‌ದ್ ತಿಂದೆ ಬಕಮಾರಿ ||
 ನೀರ್‌ದಂಗದ್ ಪರೈನಾಪಗ
 ದೂರೊಡುದು ಈ ಗಾಡಿ ಬರ್ಪುನ
 ತೂನಗಾ ರಕ್ಕಸೆನೆ ಬೀಮನ್ ತೂದು ಪರು ಕಡೆಯೆ ||

19

ನಾಯಿ ಬಲ ಬಲ ಮಡೆನ್ ನಕ್ಕದ್
 ಈಯೆ ತಿನ್ನಯ ಪನ್ದ ಬೀಮೆನೆ
 ದಾನವನ್ ಲೆಪ್ಪುನಗ ಲಾಗಿದ್ ಬತ್ತೆ ಆಯನಡೆ ||
 ಲಾಡ್ ಹೋಳಿಗೆ ನಂಪ ನಂಪದ್
 ಬೀಮೆ ತಿನ್ನುನ ತೂದು ರಕ್ಕಸೆ
 ಏವುರೊಡು ಬೆರಿಕೊಂಜಿ ಗುದೈನೆ ಬಂಜಿ ಬೆಯ್ಪೆಲ್‌ಡ್ ||

20

ಆರಿಗೆನ್ ದೆತ್ತೊಂದು ಕುಂತಿನ
 ಪ್ರೀತಿದಾ ಮಗೆ ಲಕ್ಕದುಂತಿಯೆ
 ಆಪಗಾ ರಕ್ಕಸೆನೆ ಗೆಲ್ಲಡ್ ಬೆರಿಕ್ ಹಾಕಿಯೆನೆ ||
 ಆಯ ಕೈತವೆ ಗೆಲ್ಲನೈತ್ತಾದ್
 ಬೀಮೆ ಹಾಕ್‌ನ ಪೆಟ್ತ್ ತಾಂಗೈರೆ
 ತೀರ್‌ಜೀ ದಾನವಗ್ ಕಂಕಣೆ ಬೂರು ಪುಡೆರಿಯೆನೆ ||

21

ರಡ್ಡ್ ಅಳ್ಳೆಗ್ ತೊರಿತ್‌ದಾನಗ
 ನೆತ್ತೆರ್‌ನ್ ಕಕ್ಕೊಂದುಲಾರ್‌ಬುಟೆ
 ಕೊರ್ದು ಸೈನಗನೇ ಬಕಾಸುರೆ ಹಾಕೈ ಕೈಕಾರ್ ||
 ಕಡ್ಡ್ ದಕ್ಕಿಯೆ ಬೀಮೆ ಕಾರೈ
 ನೆತ್ತೆರಿದ್‌ಲ ತಿರ್ದ ಬೈಲ್‌ಗ್
 ಜತ್ತಾದಾಂಡ್‌ಲ ನೆತ್ತೆರ್‌ದ ಕಿರೆ ತೂಯೆರೂರ್‌ದ್‌ಲ್ ||

22

ದಕ್ಕನಾ ಕೈ ಬೂರ್ನು ಊರುನು
 ಅಲ್ಪ ಕೈಯ್ಯಾರ್‌ಂದ್ ಪಂಡೆರ್
 ಬುಕ್ಕೊ ಬಾಯಿದ ಬೊಬ್ಬೆ ಕೇಂಡ್‌ನ ಊರು ಬಾಯಾರ್ ||

ಕಡ್ಡಿ ಕಾರ್‌ನ್ ದಕ್ಕಿ ಜಾಗೆನ್
 ಲೆಪ್ಪುವೆರ್ ಕಾರ್ಯಾಡ್ ಪಂಡ್‌ದ್
 ಕಕ್ಕಿ ನೆತ್ತೆರ್ ಎರ್ಕಿ ಬೈಲೇ ಆಂಡ್ ನೆತ್ತೆರೆ ||

23

ಪುಣನ್ ಗಾಡಿಡ್ ಸರ್ರೊ ಉಂತದ್
 ಪೆರಪ ದೇರಿಯೆನಗ್ರಹಾರೊಗು
 ಬೆರಣೆರ್‌ಲ ಪೋಡ್ಯೊಂದು ಪಾರೈರ್ ಬತ್ತೆ ಬತ್ತೆಂದ್ ||
 ಅಕ್‌ಲೆನೇ ಪಿರಲೆತ್ತೆ ಬೀಮೆನೆ
 ನಿಕ್‌ಲ್ ಪೋಡ್ಯುನೆ ದಾಯೆ ರಕ್ಕಸೆ
 ಸಯಿತಿ ಪುಣವುಂದತ್ತೊ ಕೌಂಪುಗೊ ಪಂಡೆ ಮಾತೆರೆಡೆ ||

24

ಸೇರಿ ಬೆರಣೆರ್ ಮಂತ್ರೊದಾ ಅರಿ
 ಬೀಮ ತರೆಕೇ ಪಾಡ್ ಪಂಡೆರ್
 ಊರುನೊರಿತ್‌ನ ನಿನನ್ ಕಾಪಡ್ ಮೂಜಿ ಮೂರ್ತಿಗುಳು||
 ಆದಿ ಸಗ್ಗಿಲು ಊರುದುಳ್ಳು-
 ಲ್ಲೀಲ ರಚ್ಚಣೆ ಮಲ್ಪಡೇಪೊಲ
 ಸೂರ್ಯ ಚಂದ್ರೆರ್ ಇತ್ತನೇಟಲ ಒರಿವು ನಿನ ಕೀರ್ತಿ ||

|| ಪಾಂಡವೆರ್ ಪಾಂಚಾಲೊಗು ||

ನಟ್ಟಿಯೆರೆ ಬಲ್ಲಿಂದ್ ಊರುದ
 ಧರ್ಮನಿಸ್ತೆರ್ ಕುಂತಿ ಬಾಲೆಲೆ-
 ನಗ್ರಹಾರೊಡು ಸುಕೊಟು ಸಾಂಕ್ಯೆರ್ ಪ್ರೀತಿ ಗೌರವೊಡು ||
 ಇಸ್ವಿಕಾ ಪುರೊಕಾನಿ ಪಾಂಡವೆ-
 ರಿಸ್ಪೊಡೇ ನಿಲೆ ಊರ್ನು ಜಾಗೆಗ್
 ಇಟ್ಟೆಲ್‌ಂದ್‌ದ್ ಪುದರ್ ದೀಡೈರ್ ತುಳುವೆರೊಟ್ಟಾದ್ ||

1

ಪಂಚ ಪಾಂಡವೆರಿಟ್ಟೆಲ್‌ಡ್ ಸಿರಿ
 ಪಂಚಲಿಂಗನ ದೇವಸ್ತಾನೊನು
 ಅಂಚಿ ಪಡ್ಡೊಯಿದೆದುರು ಬಾಕಿಲ್ ದೀಡ್ಡ್ ಕಟ್ಟಿಯೆರ್ ||
 ಹರೆ ದಿಗಂಬರೆ ಪನ್ನಿ ಪುದರ್‌ಗ್
 ಸರಿತ ಅರ್ತೊನೆ ಎನ್ನೊ ದಿಕ್ಕುಲು
 ಸಿವೆನೆ ತುತ್ತನ ಕುಂಟು ದಿಕ್ಕಡ್ ಎಡ್ಡೆ ಹಾಲುಂಡೊ ||

2

ಅಗ್ರಹಾರೊದ ಬ್ರಾಣೆರೊಟ್ಟುಗು
ನಿತ್ಯೊ ಬಲಿ ಬೊಲ್ಪುಗುಲ, ಮದ್ಯನ-
ಡಿಲ್ಲಾ ಸರಿ ಪೂಜೆ ಮಲ್ಪುನ ಕಟ್ಟೆ ಮಲ್ತೆರಾಲ ||
ಒರೊಡೊರೊ ಕೊಡಿಯೇರ್ಡ್ ಜಾತ್ರದ
ಉಚ್ಚೆಯೊನು ದಿನೊ ಒಂಬೊ ಮಲ್ಪದ್
ಲಚ್ಚೊ ದೀಪೊನು ಪೊತ್ತವೊಡು ಸುರುತಾನಿ ದೇವಲೊಡು ||

3

ಪಾಂಡವೆರೆ ಕಟ್ಟಲೆನ್ ಮೀರುನ
ಬ್ರಾಣೆರೆರಾಲ ಇದ್ದಿ ಊರುಡು
ಬಾರಿ ಕೀರ್ತಿದ ಪುದರ್ ಪಡೆಯೆರ್ ಮುಕುಲು ಏರ್ಂದ್ ||
ಕೇಂಡ್‌ಚೆರ್ ಊರ್ದಕ್‌ಲ್ ಬೆರಣೆರೆ
ಆದ್ ಉಪೊಡು ಪನ್ದ ನೆನೆತೆರ್
ಬೀಮಗಿಲ್ಲಲ್ಡಾಲ ಸಮ್ಮನೊ ಆಂಡ್ ಗಮ್ಮತ್‌ದ ||

4

ಹಸ್ತಿನಾವತಿಡಿತ್ತನಾ ಒರಿ
ನಟ್ಟೆ ತಿನ್ನುನ ಬೆರಣೆ ಚತ್ತೊಗು
ಪೊರು ಕಂತ್‌ನಗಪಗ ಬತ್ತೆನೆ ಅಗ್ರಹಾರೊದಡೆ ||
ಧರ್ಮಜ್‌ ಗುರ್ತಾದ್ ಆಯನ್
ಉನ್ಪಯೆನೆ ತನ್ನೊಟ್ಟು ಬುಡರೊಡು
ಜೆಪ್ಪಿಯೆರೆ ಪಜೆ ಕೊರು ಕೇಂಡೆನೆ ಊರ್ದ ಸುಕೊ ದುಕ್ಕೊ ||

5

ಕೌರವೆರ್ ಸುಕೊಟ್ಟುಲ್ಲೆರೊ ಪನಿ
ಪಾಂಡವೆರೆ ಸುದ್ದಿಂಡೊ ವಿದುರಗ್
ಬೀಸ್ಮೆರ್ಗ್ ದ್ರತರಾಸ್ಮೆರೆಗ್‌ಲಾ ಸೌಕ್ಯೊನೋ ಪನಾಲೆ ||
ತಾನ್ ಏರ್ಂದಪಗ ಪಂಡ್‌ಚೆ
ಬ್ರಾಣೆಗ್‌ಲ ಗುರ್ತಾಯ್ತಿ ಊರುದ
ಮಾತ ಸುದ್ದಿಡ್ ಕೌರವೆರೆನ್ ದೂರು ಪಂಡೊಂಡೆ ||

6

ಅರಕ್‌ದಿಲ್ಲೆಗ್ ಸೂನು ಕೊರ್ಪದ್
ಕೆರಿಯೆ ಪಾಪೊದ ಪಾಂಡವೆರೆನ್
ಕುರುಡ ಮಗನಾಡಳ್ಳೆಡೆಂಕುಲು ನಟ್ಟಿರಾಂಡತ್ತೊ ||
ದ್ರುಪದ ರಾಜನ ಮಗಲೆ ಮದಿಮೆಗೆ
ಒನಸ್ ಬಲ್ಕೊ ದಾನೊ ದಚ್ಚಿಣೆ
ಕೊರುವೆ ಪನ್ನುನ ಆಸೆಡೇನ್‌ಲ ಆಡೆ ಪೋಪುನಯೆ ||

7

ಅರುನಗ್ ಕೊರೈರೆಗ್ ಬೋಡದ್
ಯಜ್ಞೊ ಮಲ್ತದ್ ಪುಟ್ಟಿ ಮಗಲ್‌ಗೆ
ಇಲ್ಲ ಪೊತ್ತನಗಾಯೆ ಸೈತ್ತದೆ ಪನ್ದ ದ್ರೋಪದಿನ್ ||
ಮಲ್ಲ ಮೀನ್‌ದ ಯಂತ್ರೊಗಾಕ್‌ದ್
ಗೆಲ್ತನಾಯೆಗೆ ಕೊರ್ಪನೆಂದ್‌ದ್
ಬಿರ್ದನಾಕ್‌ಲೆಗಾಯೆ ತೆರಿಪದೆ ಮಾತ ಸೇರ್ದೆರ್‌ಗೆ ||

8

ಕಾಂಡೆ ಲಕ್ಕದ್ ಯಾನ್ ಆಡೆಗ್
ಪೋಪೆ ಬರ್ಪರೊ ನಿಕ್‌ಲ್ ಒಟ್ಟಿಗೆ
ಪೋಯಿ ಪನ್ನಗ ಮೆಗ್ಗನಕ್‌ಲೆನ ಮೋನೆ ತೂವೊಂಡೆ ||
ವೀರ ಪಾರ್ತೆನೆ ಕಣ್ಣ ಸನ್ನೆಡ್
ಪೋಪುನೆನ್ ತೆರಿಪಾಯೆ ಮಾತೆರ್
ರಾತ್ರೆ ನಿದೆರ್‌ದ್ ಪುಲ್ಕಕಾಂಡೆನೆ ಲಕ್ಕದುಂತಿಯೆರ್ ||

9

ಅಗ್ರಹಾರೊದ ಬೆರಣೆರೆಗ್ ಸರಿ
ಎಚ್ಚರಿಕೆ ಆಪುನೆಕ್ ದುಂಬೆ
ನಿತ್ಯ ಕರ್ಮನು ತೀರ್ದದಾಕ್‌ಲ್ ಬೇಕೊ ಪಿದಡಿಯೆರ್ ||
ಪಂಚಲಿಂಗಗ್ ಅಡ್ಲೊ ಬೂರುದು
ಪಂಚ ಪಾಂಡವನಕ್‌ಲ್ ಅಪ್ಪೆನ
ದುಂಬು ಪಿರವುಡೆ ಬಟ್ಟೆನೊಟ್ಟು ಕೆಲಿಂಜಗೆತ್ತಿಯೆರ್ ||

10

ಅಲ್ಲದುಲ್ಲಾಲ್ದಿನವೆ ಮಾಡೊಗು
ಸುತ್ತು ಬತ್ತದ್ ಪರಕೆ ಪಂಡ್‌ದ್
ಬಲ್ಲ ಮಲೆನೇರೈರೆಗ್ ಕಚ್ಚೆನ್ ಬಿಗಿತ್ ಕಟ್ಟಿಯೆರ್ ||
ಅಪ್ಪೆ ಕುಂತಿನ್ ಬೀಮೆ ಪುಗೆಲ್‌ಡ್
ಕುಲ್ಲವೊಂದೇ ಮಿತ್ತ ಮಿತರ್‌ದ್
ಎತ್ತಿಯೆರ್‌ಲಾ ಸುಳ್ಳೆ ಮಲೆತವೆ ಸಂದ್ ಕೂಡುನಡೆ ||

11

ರಡ್ಡ್ ಮಲೆಕುಲೆ ಸಂದ್ ಕೂಡುದು
ಒಟ್ಟುಗಾನಗ ಊರು ಮುರ್ಕುನೆ
ಪನ್ನಿ ಸುದ್ದಿನ್ ದುಂಬೆ ಕೇನ್ನೆರ್ ಪಂಚ ಪಾಂಡವೆರ್ ||
ಐಕ್ಕೆ ಸಂದ್‌ದ ಜಾಗೆದಾಡೆಗ್
ಬತ್ತನಾಕ್‌ಲ್ ಮಣ್ಣೆಗರ್ಪೆರ್
ಕೊಟ್ಟು ದೀತೆರ್ ದುಂಬುದಾಕ್‌ಲ್ ತೂಯೆರೈನಲ್ಲ ||

12

ಮೂಜಿ ಸರ್ತಿಯೆ ಮಣ್ಣೆ ಗರ್ತಾದ್
ದೂರೊ ದಕ್ಕ್ದ್ ಸುಳ್ಳ ಮಲೆತವೆ
ಸೀರ್ತೊ ಗುಂಡಿಗ್ ಜತ್ತ ಮೀಯೆರ್ ಕಾಸಿದೊಸರ್ಂದ್ ||
ಒಟ್ಟುಗಿತ್ತಿನ ಬಟ್ ನಡಪೆರೆ
ಕಸ್ತೊ ಆಯ್ಕೆಟ್ ಪಿರವುಡೊರೈರ್
ಅಲ್ಪಡ್ಡ್ ಮೂಡಾಯಿ ತಿರ್ಗದ್ ನೇತ್ರವತಿ ಸುದೆನ್ ||

13

ಕಡತ್ದೇ ಕಾರಿಂಜ ಪರ್ವತೊ
ಸಿವನ ನಿಲೆ ಪಂಡೊಂದು ಏರೈರ್
ಅಕ್ಲ್ ಸಿವ ಲಿಂಗೊಗುಲ ಬಗ್ಗಿಡ್ ಅಡ್ಲೊ ಬೂರೊಂದು ||
ಕುದುರೆ ಮುಕೊ ಪರ್ವತೊಗು ಎತ್ತೈರ್
ನಡತ್ದೇ ಸಯ್ಯಾದ್ವಿದಾಡೆಗ್
ಮೆಲನೆ ಬನ್ನಗ ಆಂಡ್ ಕತ್ತಲೆ ಸಾದಿ ತೋಜಂದೆ ||

14

ನಡಪಿಯೆರೆ ಕಸ್ತಾನಗಾಕ್ಲ್
ತರೆಯಿ ಸಾದಿಡೆ ಪರಡ್ ಪರಡ್ಡ್
ಐವೆರಪ್ಪೆನ ಒಟ್ಟು ಕಾಡ್ಡೆ ದುಂಬು ಎತ್ತನಗ ||
ಬೊಲುಪು ಜಗ ಜಗ ಬೂರುದಾನಗ
ಪದೊನೆ ಪನ್ನುನ ಕೇನ್ದ ಗೆಜ್ಜೆದ
ಸೊರೊಟು ನಲಿಕೆದ ತಾಳೊ ಮದ್ದೊಲಿ ಕೆಬಿಕ್ ರಂಗಿತೊಡು ||

15

ಆಪುನೆನ್ ತೂವೊಂದು ಉಂತ್ನ-
ಗಾಪಗನೆ ಒರಿ ಯಕ್ಕೆ ಪೊಣ್ಣಲೆ
ಕೂಟೊಡುದು ಬತ್ತೆದುರು ಉಂತುದು ಕೇಂಡೆನಕ್ಲೆಡನೆ ||
ಏರ್ ನಿಕ್ಲೀ ರಾತ್ರೈ ತಿರ್ಗುನ
ಬೂತೊಗುಳೊ ನರಮಾನ್ಯೆರೋ ಪನಿ
ಈ ನಡೀರ್ಲ್ಡ್ ಯಕ್ಷರೆಂಕ್ಲೆನ ಸಮಯೊ ತಿರ್ಗೆರೆಗ್ ||

16

ಪೊಣ್ಣಲೆನ್ ರಟ್ಟಾದ್ ಕಾಡ್ಡ್
ಸೊರೈವನ ಓ ಕಳುವ ನಿನ್ನನ್
ಯಕ್ಕೆ ಪಂಡ್ಡ್ ನಂಬೈರಾಪುಜಿ ಪಂಡೆನರ್ದನೆನೆ ||
ಎನ್ನ ಪೆಟ್ಟೆನ್ ತಿಂದಿ ಬುಕ್ಕೊನೆ
ನಿಕ್ಕ್ ಯಾನೇರ್ಂದ್ ತೆರಿಪುನೆ
ಪನ್ದ ಹಾಕಿಯೆ ಪಾರ್ತ ಗೆಬ್ಬುಗು ಯಕ್ಕೆ ಬಜಿಕ್ಕೈಟ್ ||

17

ಬುಡ್ಡುನಯೆ ಅರ್ದುನೆನೊ ಆಯನ
ರಟ್ಟೆನ್ನೊತ್ತದ್ ನಾಲ್ ಎತ್ತಯೆ
ಪೆಟ್ಟೆ ತಾಂಗೈರೆ ತೀರ್ಚಿ ಯಕ್ಷಗ್ ಬೂರು ಪುಡೆರಿಯೆನೆ ||
ಪೊಣ್ಣಲಾಯನ್ ದೇರ್ತ್ ಲಕ್ಕದ್
ದಮ್ಮಯಾ ಬುಡ್ಲೆಂದ್ ಪಾರ್ತಗ್
ಅಡ್ಲೊ ಬೂರ್ದಗ ಬುಡಿಯೆ ಹಾಕುನ ಪೋಲೆ ನಿಕ್ಲೆಂದ್ ||

18

ಬೂರ್ನಾಯೆನೆ ಲಕ್ಕದುಂತುದು
ತಾನ್ ಕೈ ಮುಗಿಯೊಂದು ಕೇಂಡೆನೆ
ಏರ್ ಪನಿ ನಿಕ್ಲೆಂದ್ ಕೇನ್ನಗ ಪನ್ನೆನರ್ಜುನೆನೆ ||
ಪಾಂಡವೆರ್ ಎಂಕುಲಯ ಕಾಡ್ಡೆ
ಪೋಪುನೆನೆ ಪಾಂಚಾಲ ದೇಸೊಗು
ಈತ್ ಪನ್ನಗ ನೀಟೊ ಕಾರ್ಗ್ ಬೂರೈನಾ ಯಕ್ಕೆ ||

19

ದೇವತೆಲೆ ಸಮ್ಮದೊಡಾದೇ
ಪಾಂಡವೆರೆ ಜನನೊಂದು ಪನ್ನುನ
ದೇವ ಲೋಕೊಡು ಸುದ್ದಿ ಕೇನ್ದೆ ಯಾನ್ ಅಲ್ಲದಯೆ ||
ಬೀರ ಈ ಅಂಗಾರವರ್ಮನ್
ಏಪೊನೆನೆಪನೊ ಅಪಗ ಯಾನೇ
ಮಾಯಕೊಡು ನಿನ್ನಾಡೆ ಬತ್ತದ್ ಕೊರೈ ಮಂತ್ರಾಸ್ತೊ ||

20

ವೀರೆರಾಯಿನ ಪಾಂಡವೆರ್ ಅಂ-
ಗಾರವರ್ಮನ್ ಬುಡುದು ಪೋಯೆರ್
ನಾಲ್ ಯೋಜನೊ ಕರಿದ್ ಎತ್ತೈರ್ ದೊಮ್ಮೆರಾಸ್ರಮೊಗು ||
ಮೂಡಯಿಡ್ ಬೊಲ್ಪಾನಗಾಕ್ಲ್
ಮೀದ್ ಸುದ್ದೊಡು ನಿತ್ಯೊ ಕರ್ಮನು
ಪೂರ ತೀರ್ದದ್ ದೊಮ್ಮೆರುಸಿನಾ ಎದುರು ಕುಲ್ಲಿಯೆರ್ ||

21

ದುಪದ ಮಗಲೆನ ಮದಿಮೆದಾಡೆಗ್
ಪಿದಡ್ಡೆಂಕುಲು ಬತ್ತನಾಕ್ಲ್
ಅವುಲು ಮೀನ್ದ ಯಂತ್ರೊ ತಾಲ್ಪುನ ಪಂತೊ ದೀಡ್ಲೆರ್ಗೆ ||
ಅಯಿನ್ ಗೆಲ್ತನ ವೀರಗಾಲೆನ್
ಮದಿಮೆ ಮಲ್ತದ್ ಕೊರೈ ದುಪದೆನೆ
ಮೆಗಿಯೆ ಗೆಲ್ತೆಡ ದಾರೆ ಮಯ್ಯೊಡು ಈರ್ ಅರ್ದುನಗ್ ||

22

ಬತ್ತನಕಲೆಗ್ ರುಚಿ ಪಲಾರೊನು
ಕೊರ್ದು ದೌಮ್ಯೆರ್ ಸಂತೊಸುಡು ಇನಿ
ಬರ್ದೆ ಪಂಡ್‌ದ್ ಪಿದಡುನಟ್ಟನೆ ಮಲ್ತೆರಾಪಗನೆ ||
ಪೊರ್ದುದಾ ಬೈಲ್‌ಡೆನೆ ನಡತ್‌ದ್
ಎತ್ತೆರಾಕ್‌ಲ್ ದ್ರುಪದ ರಾಜ್ಯೊಗು
ದೌಮ್ಯೆರೊಟ್ಟಿಗೆ ಮೂಜಿ ಅರದರಿ ನಡತ್ ನಡತೊಂದು ||

|| ಮದಿಮೆದ ಅಟ್ಟಣೆ ||

ಅಕ್‌ಲ್ ಪಾಂಚಾಲೊದವೆ ರಾಜನ
ಅರಮನೆದ ಎದುರುಡೆನೆ ತಿರ್ಗ್‌ದ್
ಮಗಲೆ ಮದಿಮೆಗ್ ದ್ರುಪದೆ ಮಲ್ತನ ಪೊರ್ದುದಟ್ಟಣೆನ್ ||
ತಿರ್ಗ್ ತಿರ್ಗ್‌ದ್ ತೂದು ಬಚ್ಚೆರ್
ಮುನಿನ ಒಟ್ಟುಗು ಐವೆರಪ್ಪಲ
ಮನಸ್ ಮರ್ಲ್‌ದ್ ಸಂತೊಸುಡು ಸರಿ ಪುಗರ್ ಪುಗರೊಂದು ||

1

ಬೀದಿ ಬೀದಿಡ್ ದೊಂಪೊ ಚೋಣೊಲು
ತೋಜಿನಗ ದುಂಬೊತ್ತೆರಾಕ್‌ಲ್
ಓಲು ತೂಂಡಲ ಮಲ್ಲ ಮಾಳಿಯೊದಿಲ್ಲ ಸಾರ್ಣೆದವೆ ||
ಜಾಲ್‌ಡೇ ರಂಗೋಲಿ ಬುಡ್ಡದ್
ಪೂತ ಮಾಲೆನ್ ಜಪುಡದಿತ್ತೆರ್
ಬಾಕಿಲೆದುರುಡು ಪೊಣ್ಣು ಪೊಂಚೊವು ಐತ್ತೊ ಸಿಂಗರೊಡು ||

2

ಅರಿಯಣೊಡು ಕುಂಕುಮೊನು ಮಲ್ಲಿಗೆ
ನಿಲಿಕೆ ದಿಂಜದ್ ಬತ್ತನಕಲೆಗ್
ತಲಿಪೆದರ್ ಪನ್ನೀರ್ ಕುಂಕುಮೊ ಪೂನು ಕೊರ್ದೆದರ್ ||
ಕೆಬಿಕ್ ವಾದ್ಯೊದ ಸೊರೊನೆ ಕಣ್ಣೆಗ್
ಪೊರುಲು ತೋಜುನ ನೋಟೊ ಮೂಂಕುಗು
ಅರಗ್ ಚಂದನೊ ಗಂದೊ ಕಸ್ತೂರಿದವೆ ಕಮ್ಮೆನೊನೆ ||

3

ನಾಲಗೆಗ್ ರುಚಿ ರುಚಿ ಪಲಾರೊನೆ
ಗಾಳಿ ಬೀಜುನ ಯಂತ್ರೊ ತಿರ್ಗ್‌ದ್
ಮೇಲ್ ಸಂಪಾಯಿನೆಟ್ ಬೆಗರ್‌ಜಿ ತಿರ್ಗ್‌ನಾಕ್‌ಲೆಗ್ ||
ಐನ್ ಇಂದ್ರಿಯೊ ಸುಕೊನು ಪಡೆಯಿನ
ಐನ್ ಜನೊಲಾ ಅಪ್ಪೆನೊಟ್ಟಿಗೆ
ಕೈನ್ ಮುಗಿದೇ ಪೊಗೈರುಲಯಿಗ್ ನಂಬಿ ದೇವೆರೆಗ್ ||

4

ತೇರ್ ಪಲ್ಲೆಂಕಿಲೆಡ್ ಬತ್ತೆರ್
ಆನೆ ಕುದುರೆಲೆ ಸವರಿಡೆತ್ತೆರ್
ದೇಸೊ ದೇಸೊದ ರಾಜ ರಾಜೆರ್ ಅಕ್‌ಲೆ ಪರಿವಾರೊ ||
ಮಾತೆರೆನ್ ಎದೊಂದು ಅಕ್‌ಲೆಗ್
ಬೇತೆ ಬೇತೆನೆ ಬುಡರೊಗಿಲ್ಲೆನ್
ತೋಜಯೆರ್ ಉಂತ್ಯೆರೆಗ್ ದ್ರುಪದನ ಕಡತ ಜವ್ವನೆರ್ ||

5

ದೌಮ್ಯೆರೆನ ಕಾರ್ಗಡ್ಡೊ ಬೂರುದು
ಬ್ರಮ್ಮ ಸಬೆಕೇ ಮಲ್ತಿ ಬುಡರೊಡು
ಕುಲ್ಲಯೆರ್ ಪದ್‌ನಾಜಿ ನಮುನೆಡ್ ಮಲ್ತೆರುಪಚಾರೊ ||
ನಟ್ಟುನಕಲೆಗ್ ಬುಡರೊದಿಲ್ಲೆಲ
ಇದ್ದಿ ಪಂಡ್‌ದ್ ಒರಿ ಕುಲಾಲನ
ಕೊಟ್ಟಡೇ ಪಾಂಡವೆರ್ ಇತ್ತೆರ್ ಬುಡರೊ ಮಲ್ತೊಂದು ||

6

ಆಟೊದಾಕ್‌ಲ್ ಕೂಟೊದಾಕ್‌ಲ್
ಮೇಳೊದಾಕ್‌ಲ್ ಬೆನ್ನಿದಾಕ್‌ಲ್
ಬೇರೊದಾಕ್‌ಲ್ ಕಸುಬುದಾಕ್‌ಲ್ ಮಾತೆರೆತ್ತಿಯೆರ್ ||
ವಾದ್ಯೊ ಕೊಂಬುನು ಉರಿಪುನಾಕ್‌ಲ್
ಪಾರ್ದನೊನು ಸರಿ ಪನ್ನುನಾಕ್‌ಲ್
ಬೂತೊಲೆನ ಮಾನಿಯೆರ್ ಪಂಬದ ಪರವೆರೆತ್ತಿಯೆರ್ ||

7

ಜೋಯಿಸೆರ್ ಮಂತ್ರಾದಿನಾಕ್‌ಲ್
ಊರ ಮರ್ದನ್ ಕೊರ್ಪುನಾಕ್‌ಲ್
ದೇವಿ ದರ್ಸನೊದೊಸಯೊದಾಕ್‌ಲ್ ಆಡೆಗೆತ್ತಿಯೆರ್ ||
ಕಾಂಡೆ ಲಚ್ಚಣೊ ಪನ್ನುನಾಕ್‌ಲ್
ನಾಗ ಸರ್ಪನ ಕುರ್ದೆದಾಕ್‌ಲ್
ಕಾಡ ಮಂಗನ್ ಪತ್ತಿ ಕೊರಚಿಲು ಬತ್ತೆರಾಡೆಗೆನೆ ||

8

ಹರಿನ ಕೀರ್ತನೆ ಮಲ್ವಿದಾಸೆರ್
ಕತೆನ್ ಕಬಿತೆನ್ ಮಾತ ಬರೆಪುನ
ಕವಿಕುಲೆತ್ತೆರ್ ಗ್ರಂತೊ ಕಟ್ಟೆನ್ ದೀಡ್ಡ್ ಕಿಡ್ಲೆಡ್ ||
ಬೆರಣ ಸಾಸ್ತಿಲು ಕುಲೊ ಪುರೋಯಿತ-
ನಕ್‌ಲ್ ಕೂಡ್ಯೆರ್ ಮದಿಮೆ ದೊಂಪೊಡು
ಮರನೊ ಬೀಜನೊ ದುಂಬು ಒವ್ವಂದಕ್‌ಲೆ ಚರ್ಚೆಡ್‌ಲ ||

9

ನಾಲ್ ವರ್ಣೊದ ಜಾತಿದಾಕ್‌ಲ್
ಪೂರ ಸೇರೈರ್ ಬತ್ತನಾಕ್‌ಲೆ
ಜಾತಿ ರಿವಜಿಗ್ ಕೊರತೆ ಆಯೆರೆ ಬಲ್ಲಿ ಪಂಡೊಂದು ||
ಬೂರಿ ಬೋಜನೊ ಸಾಲೆ ಬೋಡಯಿ-
ನಾತ್ ಮಲ್ಪದ್ ಉನ್ನದಕ್‌ಲೆನ್
ಪ್ರೀತಿದೇ ಸಮ್ಮನಿಪಿ ಜನೊಕುಲು ಇತ್ತೆರಾಲೇತೊ ||

10

ಅರಸುನಾಕ್‌ಲೆಗ್‌ಲೆ ಪರಿವಾ-
ರೊಲೆಗ್ ಬುಡರೊಡೆ ಒಣಸ್ ಮಲ್ಪಿ
ಅಡಿಗದಾಕ್‌ಲ್ ಇತ್ತೆರಲ್ಲದ ಮಾತ ಬುಡರೊಲೆಡ್ ||
ಒನಸ್ ಮಾತೆರೆಗಾಯಿ ಸಾತ್‌ಗ್
ಅರಿಯಣೊಡುಲಾ ಪೂಲು ಬಚ್ಚೆರೆ
ತಿನಿಯೆರೆಗ್ ಪಟ್ಟುನವೆ ಜನೊಕುಲು ಅವುಲು ತೋಜೆದರ್ ||

11

ಪತ್ತೆ ಲಚ್ಚೊನೆ ಕುಲೈರಾಪುನ
ಪೊರ್ಲು ತಗಡ್‌ದ ಮಾಡ್ ಕಟ್ಟ್‌ದ್
ಇತ್ತನಾ ಮದಿಮೆದವೆ ಮಂದಿರೊನೆಂಚ ಪನ್ಪುನೆನೊ ||
ಎತ್ತರೊದ ಪೀಟೊಗುಳು ರಾಜೆರ್
ಕುಲ್ಲಿಯೆರೆ ಅಯಿನೊತ್ತುಗ್‌ಲೆನ
ಒಟ್ಟುಗಿತ್ತನ ಮಾತ ಪರಿವಾರೊಲೆಗ್ ದೀಡ್ಪುಂಡು ||

12

ಬಾಕಿದಕ್‌ಲೆನ ತಾನೊ ಮಾನೊಗು
ಯೇಗಿತೊಗು ಸರಿಯಾಯಿ ಪೀಟೊಲೆ
ದೀಡ್ಡ್ ಇತ್ತೆರ್ ದೊಂಪೊದುಲಯಿಡ್ ಸಾಲ್ ಸಾಲಾದ್ ||
ಕಾರ್ ದೀಡ್ಡಗ ನೆಲತ ಚೌಳಿಡ್
ರೋಮೊ ಕೊಕ್ಕೇರುನವೆ ಸಂಪುಡು
ಆಪುನಂಚಿನೆ ನೆಲನ್ ಕುಂಕುಮೊಡರೆದ್ ಮಲ್ತೆದರ್ ||

13

ಮುತ್ತು ರತ್ತೊದ ಜಲ್ಲಿ ಜಾಲಿನ್
ಸುತ್ತ ಜಪುಡದ್ ಮಲ್ತಿ ಮಂಟಪೊ
ಸೊರೊದರಸುನ ಸಜ್ಜೆದಂಚಿನೆ ಪೊರ್ಲು ತೋಜೊಂದು ||
ವಜ್ರೊ ಕಮ್ಮೊಲು ನಾಲ್ ಸುತ್ತಲ
ಮಿತ್ತೆ ಮಾಡ್‌ಡ್ ಯಂತ್ರೊ ತಿರ್ಗುನ
ರಟ್ಟಯೆರೆ ಪನ್ನೀರ್ ಸಂಪುಡ ಗಾಳಿ ಬೀಜಿಯೆರೆ ||

14

ಗಾಳಿದೆದುರುಗು ಗಂದೊ ಕಸ್ತುರಿ
ದೀಡ್ಡ್ ಇತ್ತನ ಬರೊಣೆ ಕುಲ್ಲದ್
ಸೇರ್‌ದುಪ್ಪುನ ಸಬೆಕ್ ಕಮ್ಮೆನೊ ಅಲಸೊಡುಂದವುಲು ||
ಯಾಗೊ ಯಜ್ಜೊದ ಅಗ್ನಿ ಕುಂಡೊಡು
ವೇದೊ ಮಂತ್ರೊದ ಸೊರೊಟು ಪುಟ್ಟೆನ
ಆ ಅಯೋನಿಜೆ ಮದಿಮೆ ಗಡ್ಡೆಡೆ ಆವೊಡುಂದತ್ತೊ ||

15

ದೇವಲೋಕೊಡು ಸುದ್ದಿಯಾನಗ
ಮಾತೆರ್‌ಲ ಪಿದಡಿಯೆರೆ ಬಾನೊಡು
ಸೇರ್‌ದುಂತ್ರೈರ್ ಆಕ್‌ಲಾಕ್‌ಲೆನಾ ವಿಮಾನೊಲೆಡ್ ||
ದೇವರಾಜೆನೆ ಸಚಿನ ಒಟ್ಟುಗ್
ವಾಯು ಅಗ್ನಿ ಕುಬೇರೆ ವರುಣೆಲ
ರಾದ್ ಬತ್ತೆರ್ ಯಕ್ಷಗಂದವೇರ್ ಕಿನ್ನರೆರ್ ||

16

ಎಲ್ಲೆ ಕಾಂಡೆನೆ ಮದಿಮೆ ದೊಂಪೊಡು
ಬತ್ತನಾಕ್‌ಲ್ ಮಾತ ಸೇರ್‌ದ್
ಕುಲೊಡಕ್‌ಲೆನವೆ ಯೇಗಿತೊಡಿತ್ತಿ ಪೀಟೊಲೆಡ್ ||
ಪೊಣ್ಣು ದ್ರೌಪದಿ ಸಬೆಟ್‌ನಾಡ್ಡಲ್
ತನ್ನ ಮನಸ್‌ಗ್ ಒಪ್ಪುನಾಯನ್
ಪನ್ನಿ ಡಂಗುರೊ ಮೂಲೆ ಮೂಲೆಡ್ ಕೇಂಡ್‌ದಾಂಡಪಗ ||

17

ಡಂಗುರೊದ ಸೊರೊ ಕೇನ್ಡ್ ರಾಜೆರ್
ನಂಬುನಾ ದೈವೊಲೆಗ್ ಪರಕೆನ್
ಪಂಡೊನುಂದೇ ದಿನೊನು ಕಳೆಯೆರ್ ಬಗ್ಗಿ ಬಾವನೆಡ್ ||
ಚಂದ್ರ ಮೋನೆದ ಪೊಣ್ಣು ತಿಕ್ಕಲ್-
ಡೆಂಕ್ ಸರಿಯೇರುಂಡು ಪಂಡ್‌ದ್
ಚಂದ್ರ ಸೇಕರನಕ್‌ಲ್ ನೆನೆತೆರ್ ಪೊಣ್ಣನಾಸೆಡ್‌ಲ ||

|| ಮದಿಮಲ್ ಐತ್ತಾದ್ ಸಬೆಕೆತ್ಯಲ್ ||

ಕಾಂಡೆ ಲಕ್ಕದ್ ಕರ್ಮೊಕಿಯೆನ್
ಪೂರ ತೀರ್ದೆಲಕ್‌ಲ್ ಗಣಪತಿ
ದೇವೆರೆಗ್ ಪಂಚಜ್ಜೆ ಅಪ್ಪೊದ ಪರಕೆ ಪಂಡೊಂದು ||

ಸೇರಿಯೆರ್ ಮಾತೆರ್ಲ ದೊಂಪೊಡು
ರಾಜ ರಾಜೆರ್ ಪೊರ್ಲು ಸಿಂಗರೊ-
ಡಾಕ್ಲೆ ಕುಲೊಂದು ತೂಯೆರ್ ಒರೈನೊರೈನ್ಲ ||

1

ಪೊಣ್ಣ ಮಾಲೆನೆ ಏರೆ ಕಂಟೆಲ್-
ಗಿತ್ತೆ ಬೂರೈನೊ ಪನ್ನ ಮನಸ್ಸಡ್
ತನ್ನ ಕಂಡಿತೊ ಬೂರುನೆಂದ್ ನೆನೆತೆರಕ್ಲೊಟ್ಟು ||
ಬುಕ್ಕೊಲಾ ಇಸ್ವಾಸೊ ಬತ್ತಜಿ
ಐಕ್ ನೆನೆತೆರ್ ನಂಬಿ ದೈವೊಗು
ಧರೈನೊಮೊನು ಕೊರೈ ಮದಿಮೆದ ಬೆರಿಕ್ ದಿನೊ ಕೇನ್ದ ||

2

ಸಾಲ್ ಸಾಲ್ಡೆ ಕೌರವಾದಿಲು
ಯಾದವೆರ್ ಚತ್ತಿಯೆರ್ ಕುಲೈರ್
ಆಕ್ಲಾಕ್ಲೆ ಸುತ್ತಡಕ್ಲೆನ ಮಂತ್ರಿ ಪರಿವಾರೊ ||
ಚಾಮರೊನು ಬೀಜುವೆರ್ ಕೆಲವೆರ್
ಪೂಲು ಬಚ್ಚೆರೆ ಮಡಿತ್ ಕೊರ್ಪೆರ್
ರಾಜೆರೆನ ಮಲ್ಲತಿಗೆ ಮಾತ್ತೊನೆ ತೋಜುಂಡಲ್ಲು ||

3

ಬಿರುನು ತರೈಲ ಮೀನ್ದ ಯಂತೊನು
ತಿರ್ಗಿಯೆರೆ ತಿಕ್ಕಾಲ ಮದಿಮಲ್
ಬರಡ್ ಸಬೆಕೇ ಆಂಡ ಸಿಂಗರೊ ಲೆಪ್ಪು ಲೆಪ್ಪುಂದು ||
ಒದಗ್ದಾಂಡ್ಗೆ ಮೂರ್ತೊ ಪಂಡರ್
ನಮನ ಜೋಯಿಸ ಬಟ್ತೆ ದ್ರೌಪದಿ-
ಗರಸುನಕ್ಲೆನ್ ತೂಪಲಯ ನಿನ ಮೆಗಿದಿಗಿತ್ತೆಂದ್ ||

4

ದ್ರುಪದ ರಾಜೆನೆ ದೃಸ್ಪದ್ಯುಮ್ಮಡ
ಪನುಪುನೆನ್ ಕೇನೊಂದು ಪೊಣ್ಣುಲು
ಮದಿಮಲೆನ ಕೈ ಮೆಯಿಕ್ ಪೂಜೈರ್ ಕುಂಕುಮೊದಲೇಪೊ ||
ಚವುಳಿ ಸೀರ್ತೊದ ನೀರ್ಡ್ ಮೀಪದ್
ಪೊಸತ್ ಪಟ್ಟಿದ ಸೀರೆ ತುತ್ತಯೆ-
ರವುಲು ಸೇರ್ನ ಪೊಣ್ಣು ಪೊಂಜೊವು ಸೇಲೆ ಮಾಡವುನ ||

5

ಮೆಯಿಕ್ ಒಂಬುನ ಸೀರೆ ಸೀರೆಗ್
ರವಕೆ ಎಂಚಿನ ಪನ್ನ ತೂಯೆರ್
ಕುಜಲ್ ಬಾರ್ಡ್ ಮಲ್ಲಿಗೆಡ್ ಸರಿ ಜಲ್ಲಿ ಜಪುಡಯೆರ್ ||
ಕೆಬಿಕ್ ವಜ್ರೊದ ಓಲೆ ಮೂಂಕುಗು

ಸಿರಿ ಬುಲಾಕ್ನ್ ದೀದ್ ಮುಂದಲೆ
ಪದಕೊ ಸರಪೊಳಿ ಮುತ್ತು ಬಗ್ಗಲೆ ಪೊರ್ಲೊಡೊಪ್ಪಯೆರ್ ||

6

ವಜ್ರೊ ವೈಡೂರೈದನೆ ಮಾಲೆಲು
ಗೆಜ್ಜೆ ಟಿಕ್ಕಡ್ ಪೊರ್ಲು ಕಂಟೆಲ್
ರತ್ತೊ ಕಾಜಿನ್ ನಾಗ ಮುರ್ಗಿನ್ ಬಿರೆಲ್ಗುಂಗಿಲೊನು ||
ಪಟ್ಟಿ ಸೊಂಟೊಗು ದೀಡ್ಡ ಕಾರ್ಡ
ಗೆಜ್ಜೆ ಸರಪೊಳಿಡೈತ್ತೊ ತೂನಗ
ಪೊರ್ಲು ಪೊರ್ಲಾದಾಲ್ ಮೀರೈಲ್ ಸಬೆಟ್ ರತಿ ಸಿರಿನ್ ||

7

ಮದಿಮಲೆನ ಸಂಗಾತೊಡಿತ್ತೆನ
ಪೊರುಲು ಪೊರುಲಾದಿತ್ತಿ ಪೊಣ್ಣುಲು
ಅರದ್ ಪತ್ತಡ್ ಮುತ್ತೊ ಕೊರೈರ್ ಮನಸ್ ಮರ್ಲಾದ್ ||
ಪೊಣ್ಣು ಪೊಂಜೊವೆಗಿಂಚ ಆನಗ
ಜವ್ವನೆರ್ ನನ ದಾನೆ ಮಲ್ಪೆರ್
ಬೊಟ್ಟು ಮಯಿತವೆ ದವುಡೆಗೊತ್ತೈರ್ ದಿಸ್ಪಿ ತಾಗುಂದು ||

8

ಮೋನೆ ಚಂದ್ರನ ಬಿಂಬೊ ಕಣ್ಣುಲು
ತಾಮರೆದ ಪೂತೆಸಲ್ ಪೊರ್ಲುದ
ಮೂಂಕು ಸಂಪಯಿ ಮುಗುರು ಪುರ್ಬುಲು ಪೊರ್ಲುದಜ್ಜಬಿರು
ಆಲೆ ಕಂಟೆಲ್ ಸಂಕೊ ಸಪುರೊದ
ಕಾಡ ಸಿಮ್ಮೊದ ಸೊಂಟೊ ನಡಕೆಡ್
ಆನೆದವೆ ನಿಜೊ ದೇಕಿ ತಿಗಲೆಡ್ ಮಲ್ಲ ಬೊಗೊರಿ ಮಿರೆ ||

9

ಸಾಲ್ ಕೂಲಿದ ಪೊರ್ಲು ತೆಲಿಕೆಡ್
ಪಾತೆರೊಡು ಸರಿ ಗಿಳಿತ ಉಚ್ಚೆರೊ
ಕೋಗಿಲೆದ ಸೊರೊ ಕೆಬಿಕ್ ರಂಗಿತೊ ಮದಿಮಲೆನ ನುಡಿಟ್ |
ಮೆಯಿತ ಕಮ್ಮೆನೊ ಮೂಂಕುಗೇರ್ಕ್ಕ
ಮನಸ್ಸಾಗಾಪುನ ಸಂತೊಸುನು ಸರಿ
ಪನಿಯೆರೆಗ್ ಓಲುಂಡು ಸೌದೊಲು ನರಮನಿನ ನುಡಿಟ್ ||

10

ಕಣ್ಣಾಡೇ ಕೊಡಿ ನೋಟೊ ಪುರ್ಬುಡು
ಮಲ್ಲತಿಗೆದೊಯ್ಯಾರೊ ಮನಸ್ಸಡ್
ತನ್ನ ಆಪುನ ಕಂಡನೀಯನ್ ನಾಡ್ಡ ತೂಪುನವೆ ||

ತನ್ನ ಸಂಗಾತಿಲೆಡ ಗುಟ್ಟುನು
ಪನ್ನಿ ಸೇಲೆದ ಸಿರಿಟ್ ನಲಿಪುನ
ಪೊಣ್ಣ ಮೋನೆದ ಪೊರು ಪನಿಯೆರೆ ತೀರೊ ಕವಿ ಜನೊಕು ||

11

ಕೂಡಿ ರಾಣಿಲು ಪತ್ಯೆರಾರತಿ
ದೇಸೆ ಪಾಡ್ಯೆರ್ ಮುತ್ತು ರಾಸಿಡ್
ದೇವೆರೆನ್ ಕೊಂಡಾಡ್ ಮುಂಡೊಗು ಬೊಟ್ಟು ದೀಡಿಯೆರ್ ||
ಮಲ್ಲ ಕನ್ನಟಿದೆದುರು ಮದಿಮಲ್
ತನ್ನ ಐತ್ತೊದ ಪೊರು ತೂಯಲ್
ಬಟ್ ಕೊರ್ನವೆ ಪೂಲು ಬಚ್ಚೆರೆ ಕೈಟ್ ಪತ್ತೊಂದು ||

12

ಸಾದಿ ಬುಡಿ ಮದಿಮಲೆಗ್ ಪನ್ನಗ
ಮಾತೆರ್ಲ ತೆಲದುಂತ್ಯೆರಪಗನೆ
ಆಲ್ ದಂಡಿಗದಾಡೆ ಬತ್ತಲ್ ಸಿರಿಯೆ ಬತ್ತಿಲೆಕೊ ||
ಸಾಲ್ ಸಾಲ್ಡೆ ದುಂಬು ಪಿರವುಡು
ಏತೊ ಪೊಣ್ಣಲು ಬತ್ತೆರೊಟ್ಟಿಗೆ
ವಾದ್ಯೊ ಕೊಂಬು ನಗಾರಿ ಬೇರಿಲು ಸೊರೊನು ಲಕ್ಕಾಯೊ ||

13

ಮದಿಮಲೆನ ಸಂಗಾತೊಡಿತ್ತನ
ಪೊರುಲುದಾಕಲೆ ರೂಪು ಸಿಂಗರೊ
ಪನ್ ಪಿ ಬಾಯಿಗ್ ರಸೊನೆ ತೂಪುನ ಕಣ್ಣಲೆಗ್ ಪರ್ಬೊ ||
ಅಕಲೆ ಮೋನೆನ್ ಕಣ್ಣ ಪುರ್ಬುನ್
ತಿಗಲೆ ಸೊಂಟೊನ್ ನಡಪಿ ನಡಕೆನ್
ಜವನೆರಕಲೆನೆ ತೂದು ಕುಲೈರ್ ಪೊಣ್ಣ ಮರೈರ್ಲ ||

14

ಯತಿಕುಲೆನ ತಪಸಿಲೆನ ಯೋಗಿಲೆ
ತಿಗಲೆ ಕಂತುನ ಸಪಳೊದಂಚಿನೆ
ಮದಿಮಲೆನ ಒಟ್ಟಿಗೆನೆ ಬತ್ತೆರ್ ಮದನ ಮುಡ್ಡಣೆಲು ||
ಅಕಲೆ ಕಣ್ಣದ ಕಾಂತಿ ಬೊಲ್ವುಡು
ಜವನೆರೆನವೇ ಮೋನೆ ಕಂದಾದ್
ನೆನೆಪು ಮರತ್ದ ತೂದೆ ಕುಲೈರ್ ಗೊಂಬೆದಾ ಲೆಕೊನೆ ||

15

ಪೊರುಲು ಪೊಲಿಗದ ಚೀತನೊ ಪರಿ-
ಮಲೊದ ಪುತ್ತೊಲಿ ಪೂವೊ ಸಿಂಗರೊ
ರಸೊನೆ ನಿಜೊ ರೂಪಾದ್ ಬತ್ತಲೊ ದ್ರೋಪದಿಯೆ ಸಬೆಕ್ ||

ಪೊರು ಪನ್ನುನ ಕಡಲ್ತುಲಿತ್ದ
ಪುಟ್ಟನಮುತ್ತೊದಂಚ ಬತ್ತನ
ಪೊಣ್ಣ ತಿಕ್ಕುನ ಬಾಗ್ಯೊ ಏರೆಗೊ ಪಂಡೆರಾ ಸುರೆರ್ ||

16

ಈತ್ ರೂಪೊದ ಪೊಣ್ಣ ಲೋಕೊಡು
ಆನಿ ಇತ್ತುದುವಲ್ಲ ಸಿವನೇ
ಯೋಗಿ ಆತ್ಮನೊ ಬೆರೆ ಮಗಲೆನ್ ಮದಿಮೆ ಆಪೆದನೊ ||
ಯಾನ್ ಗೌತಮ ರುಸಿನ ಬುಡೆದಿನ್
ಮೂಸಿಯೆರೆ ಪೋತುವೆನೊ ಪಂಡಾದ್
ದೇವರಾಜೆನೆ ಸಚಿನ ಮೋನೆನ್ ತೂದು ತೆಲಿತೊಂಡೆ ||

|| ದ್ರೌಪದಿ ಬಯ್ಯಿನರಸುಲೆನ್ ತೂಯಲ್ ||

ಜೋಯಿಸೆರ್ ದ್ರೌಪದಿನ ಜಾತಗೊ
ತೂದು ದ್ರುಪದಡ ಪನ್ನೆರಾನಿಯೆ
ಪಾರ್ತೆ ಬದ್ಕದ್ ಉಲ್ಲೆ ಸೈತ್ಯಜೆ ಮದಿಮೆದಾ ಕಳಕ್ ||
ಆಯೆನೇ ಬರ್ದೆಂದ್ ಪನ್ನೆಟ್
ರಾಜೆರೆನ್ ಕೂಡ್ನಾದ್ ನಾಡೈರೆ
ತಾನ್ ಮಲ್ತನ ಅಟ್ಟನೆಂದ್ ಏರ್ಲ ತೆರಿತ್‌ಜೆರ್ ||

1

ಕೂಡಿ ಸಬೆಟೇ ಇತ್ತನಾಕಲ್
ಏರ್ ಪಂಡಾದ್ ಇವರೊ ಮೆಗಿದಿಗ್
ಪೂರ ತೆರಿಪವೊಡುಂದು ಬತ್ತೆನೆ ದ್ರುಪದ ರಾಜ ಮಗೆ ||
ಸಾಲ್ ಸಾಲ್ಡೆ ಕುಲ್ಲದಿತ್ತನ
ರಾಜೆರೆನ ಕೈತಡೆಗ್ ದಂಡಿಗೆ
ಸೀದ ಕನತ್ದ ಮದಿಮಲೆನ್ ಉಲಯಿಡ್‌ದ್ ಜಪುಡಯೆರ್

2

ಮೆಗಿದಿ ತೂಲಯ ನಿಕ್ಕ ಆಪುನ
ಜತೆತಯನ್ ತೋಜವೆನೆ ತೂವೊನು
ಸಬೆಟ್ ಕುಲ್ಲನ ರಾಜ ರಾಜೆರೆಡೇರ್ ಆವುಂದು ||
ಅಕಲೆ ವಂಸೊನು ಪಡೆಯಿ ಕೀರ್ತಿನ್
ಸರಿಟ್ ಪಂಡಾದ್ ಯಾನ್ ತೋಜವೆ
ತೆರಿದ್ ಮಾಲೆನ್ ಪಾಡ್ಲ ಬವುಸೊದ ಸುಕೊಕು ಬೋಡಾದ್ ||

3

ಉಂದು ಕೌರವೆ ಆನೆ ಪುರೊತವೆ
ಚಂದ್ರ ವಂಸೊದ ಅರಸು ಒಟ್ಟಿಗೆ
ಇಂಬ್ಯನಾ ಮೆಗ್ಯಲ್ಲು ಉಲ್ಲೆರ್ ಆವೊ ತೂವೊನುಲ ||
ಅಕ್ಲೆ ಮೋನೆನ್ ತೂಯಿಜಲ್ ಈ
ಮೆಗಿದಿ ಪಂಡ್‌ದ್ ದುಂಬು ಸಾಗಯೆ
ಮದಿಮಲೆನ ದಂಡಿಗೇನ್ ದ್ರುಪದಕುಮಾರೆ ತೆಲಿತೊಂದು ||

4

ತೂಲ ದ್ರೋಪದಿ ಈ ವಿರಾಟನ್
ಆಯಿಜಿಡ ಉತ್ತರಲ ಕುಲ್ಲದ್
ಕೀಚಕಾದಿಲು ಮೂಡು ಸೀಮೆದ ರೋಚಮಾನಕೆರ್ ||
ನೀಲೆ ಚಿತ್ರಾಯುದನೆ ತೆನ್ನಯಿ
ಚೋಳೆ ಕೇರಳೆ ಚಂದ್ರ ಸೇನೆನೆ
ಪಾಂಡ್ಯೆ ರಾಜೆನೆ ಸಾಲ್ಡ್ ಕುಲ್ಲನ ಈಯೆ ತೂಲಮ್ಮೆ ||

5

ತೂಲ ಸರಿ ಕಾಳಿಂಗ ರಾಜನ್
ಚೇಕಿತಾನನ್ ಬಾನುದತ್ತನ್
ಆವೊ ಪಂಡ್‌ದ್ ಈಯೆ ತೂವೊನು ಎನನ್ ದೂರೊಡ್ಡಿ ||
ವೀರ ಪೌಂಡ್ರಕೆ ಹಂಸ ಡಿಬಿಕರೆ-
ರಾವೊ ಬಗದತ್ತೆನೆಲ ಸಿರಿ ಕಾಂ-
ಬೋಜೆ ಮಾ ಹರದತ್ತೆ ಬೂಪತಿ ಉಲ್ಲೆ ಮಾದ್ರೇಸೆ ||

6

ತಂಗಡಿಯೆ ಈ ತೂಲ ಮಾಗದ
ಸಂಗಡೊಡು ಸಾದೇವೆ ಕುಲ್ಲದೆ
ದಂಡದಾರಕೆ ವೀರ ಬೂರಿಸ್ತವೆಲ ಕುಲ್ಲದೆರ್ ||
ವೀರ ಬಾಹ್ಲಿಕೆ ವಿದ್ಯೆ ಚಿತ್ರಕೆ
ಆ ಜಯದ್ರತೆ ಸಿಬಿ ಸ್ತುತಾಯುದೆ
ಸೋಮದತ್ತನ ಒಟ್ಟು ಸೃಂಜಯೆ ಉಲ್ಲೆ ಕುಲ್ಲೊಂದು ||

7

ಇಂಬ್ಯನೇ ರುಕುಮಾಂಗಿ ಜಯದ್ವಲೆ-
ನಿಂಬ್ಯೆ ಸ್ತುತಸೇನಾಚ್ಚುತಾಯುದೆ-
ರಿಂಚಿ ಉಲ್ಲೆರ್ ಆ ಮಹೋದರೆ ಬುಕ್ಕೊ ಸೌಬಲೆಲ ||
ವೀರೆನೇ ಸಿಸುಪಾಲೆನಾ ದಮ-
ಗೋಸ ಮಗೆ ಮಹದಂತ ವಕ್ರಲ
ಸೇರ್‌ದುಲ್ಲೆರ್ ಪನ್ನಗಂಚಿಗಲಾಲ್ ತೂಯಿಜಲ್ ||

8

ಸೂರ್ಯ ತೇಜಿದ ಕರ್ಣೆ ತೂಲಯ
ಜೋಕುಲಿಂಬ್ಯನ ಇರ್ದೆರುಲ್ಲೆರ್
ನಾಲಿನೊಡ್ಡವೆರತ್ತೊ ಮಾಲೆಗ್ ಈಯೆ ತೂವೊನುಲ ||
ಆಲ್ ಮನಸ್‌ಡ್ ದಾನೊಗ್ಗೆ ಗೆರೆತ್‌ದ್
ಬಾವೊ ಉರ್ಕರ್‌ದಪಗ ಕರ್ಣನ
ಮೋನೆ ತೂಯ್‌ಲ್ ಪಕ್ಕ ದಿಸ್ಪಿನ್ ಅಂಚಿ ತಿರ್ಗಯಲ್ ||

9

ಕುಲ್ಲನರಸುಲೆನಾಡೆ ದಂಡಿಗಿ
ಬನ್ನಗನೆ ತಿಗಲೆಡಲ ಡಬಡಬ
ಸೌದೊ ಆನಗ ನಾಲಿ ನೀರ್ದೆರ್ ಮಾಲೆ ಬೂರಿಯೆರೆ ||
ಮಾಲೆ ಪಾಡುನ ಬುಡ್ಡು ಕಣ್ಣೆಡೆ
ತೂಯಿಜಲ್ ಏರೆನ್‌ಲ ದಂಡಿಗಿ
ಸೀದ ಪೋನಗ ಅಕ್ಲೆ ಮೋನೆನೆ ಕಪ್ಪು ಏರ್ದಾಂಡ್ ||

10

ತೂಲ ಮೋಕೆದ ಮೆಗಿದಿ ಕುಲ್ಲನ
ಯಾದವೆರೆಡುತ್ತಮನ್ ರಕ್ಕಸ
ಬಾರೆ ಪುಂಡೆಲ್ ನುರ್ಮನಾನೆನ್ ವೇದೊ ಗೋಚರನ್ ||
ಆದಿ ನಾರಾಯಿಣನ್ ಬೂಮಿದ
ಬಾರೊ ತಗ್ಗಯೆರಾದ್ ಪುಟ್ಟನ
ಸ್ವಾಮಿ ಕ್ರಿಷ್ಣಗ್ ಮಾಲೆ ಪಾಡ್ಯಡ ನಿನ್ನ ಪುಣ್ಯತ್ತೊ ||

11

ಮನ್ಮತಮೈನೆ ಬ್ರಹ್ಮದೇವೆರೆ
ಪುಣ್ಯೊ ಜಲೊಗು ಮಂಗಲಾಸ್ತಯೊ
ಕೊರ್ಮ ಪೂವೊಲು ಇತ್ತನಾಯೆನೆ ದೇವಕೀ ಮಗನೆ ||
ಬೂಮಿ ದೇವಿಲ ಸಿರಿಲ ಸೇರ್‌ದ್
ಪಾದೊ ಸೇವೆನ್ ಮಲ್ಲೆರೇಪೊಲ
ಯೋಗೊ ನಿಕ್ಕಲ ಅವ್ವೆ ಬರೈರೆ ಮಾಲೆ ಪಾಡ್ಲಮ್ಮೆ ||

12

ಆಯ ಪಾತೆರೊ ಕೇನ್ದ ದ್ರೋಪದಿ
ತೂದು ಕ್ರಿಷ್ಣನ್ ಬಗ್ಗಿದಾ ರಸೊ
ಬಾವೊ ಹೃದಯೊಡು ಉರ್ಕರ್‌ದ್ ತನ ಕಣ್ಣೆ ಮುಚ್ಚಿಯಲ್ ||
ಪ್ರಾರ್ಥನೆನ್ ಮಲ್ಲೊಂದು ಮನಸ್‌ಡ್
ಪ್ರೀತಿಡಣ್ಣಡ ಪನ್ನಲಪಗನೆ
ಈ ಮಹಾತ್ಮಡ ಎಂಕ್ ಇತ್ತೆನೆ ಆಂಡ್ ಗುರುಬಗ್ಗಿ ||

13

ಪನ್ನಗನೆ ತೋಜಾಯೆನಲ್ಲನೆ
ಕುಲ್ಲದ್‌ನ ಬಲಬದ್ರ ಸ್ವಾಮಿನ್
ಬುಕ್ಕೊ ಮದನನ್ ಐನ್ ಪೂತವೆ ಪಗರಿ ಪತ್ನಯನ್ ||
ಮನ್ಮತನ್ ಸಿವ ಕಣ್ಣದಗ್ಗಿಡ್
ಪೊತ್ತನಾಯನ್ ಆಣ್ ಪೊಣ್ಣನ್
ಒಟ್ಟು ಸೇರವಿ ಮಾಯಗಾರನ್ ಮಾತ ಯದು ಕುಲೊನು ||

14

ಸಾರಣೆನೆ ಕಲಿ ಸಾಂಬೆನಿಂಬೈನೆ
ವೀರ ದೀಪಕೆ ಬುಕ್ಕೊ ಬಗ್ಗಿದ-
ಕ್ರೂರೆ ಸತ್ಯಕೆ ಸಾತ್ಯಕಿಯೆ ಮಹವೀರೆ ಕೃತವರ್ಮೆ ||
ಸಾರಮೌಂಜಸೆ ಬುಕ್ಕೊ ವೀರ ವಿ-
ದೂರಣಾದಿಲು ಕ್ರಿಷ್ಣ ಬಾಲೆಲು
ಮಾತ ಯಾದವ ಕುಲೊನು ತೋಜಯೆ ತಂಗಡಿಗಲಾಯೆ ||

15

ಬೂಮಿ ನೀರೂ ಗಾಳಿ ಬಾನೊನು
ಮಾತ ಇಂದ್ರಿಯೊ ಕರಣೊ ಮೂಜೆನ್
ಸಾಸ್ತ್ರೊ ಧರ್ಮೊನು ತರೆಟ್ ದಿಂಜದ್ ತತ್ತೊ ನಾಡಿಲೆಕೊ ||
ತಾನ್ ಜೀವನದಾಸೆ ಬಯಕ್‌ದ್
ಆಪುನಾ ಜತೆಗಾರೆ ಬೋಡುಂ-
ದಾಲೆ ಅರಿತಲ್ ಕಣ್ಣದರಿಪೆಡ್ ಮಾತ ಅರಸುಲೆನ್ ||

16

ಕೆಲವೆರಾಲೆನ ಮೋನೆ ಲಚ್ಚಣೊ
ಕೆಲವೆರಾಲೆನ ಕಣ್ಣ ಮೆಣ್ಣನ
ಕೆಲವೆರಾಲೆ ಪನ್ನುನೇನ್‌ಲ ತನ್ನ ಸಕಿಯೆರೆಡ ||
ತೂದು ಕೇಂಡ್‌ದ್ ಆಸೆ ಮಲ್ಲೆರ್
ಮಾಲೆ ತನ್‌ಕೇ ಪಾಡ್ವಲೆಂದ್‌ದ್
ರೇಂಜಿಯಕ್‌ಲೆನ್ ಕಡತ್ ಪೋನಗ ಅಕ್‌ಲ್ ಬೈರಾಸ್ ||

17

ಮಲ್ಲಗವೊದ ಪೊಣ್ಣ ದ್ರೌಪದಿ
ಕುಲ್ಲಿ ದಂಡಿಗೆ ದುಂಬು ಪೋನಗ
ಕಣ್ಣ ಕರಣೊನು ಮಾತ ಇಂದ್ರಿಯೊ ಗಟ್ಟಿ ಮಲ್ತೊಂದು||
ಸಿಮ್ಮೊ ಪೀಟೊಡು ಬೂಟು ಬಿರ್ಸಡ್
ದರ್ದುದರಸುಲು ಮಾತ ಗವೊಡು
ಕುಲ್ಲದಿತ್ತೆರ್ ಕ್ರಿಷ್ಣ ಬೀಸ್ಮೆರ್ ಇರ್ದೆರತ್ತಂದೆ ||

18

ಮಡಿತಿ ಬಚ್ಚೆರೆ ಬಿರೆಲ್ ದಿಡೆಟೀ
ಅಗಿಪಿ ಪೂಲುಲ ಬಾಯಿದುಲಯಿಡೆ
ಕೆಬಿಕ್ ಕೇನುಜಿ ಮಂತ್ರಿ ಪಾತೆರೊ ಅರಸುನಾಕ್‌ಲೆಗ್ ||
ಮದನ ಬಾಣೊದ ಉರಿಕ್ ನೌಂಡುನು
ಸರಿಟ್ ತುಚ್ಚಿದ್ ಕುಲ್ಲದಿತ್ತೆರ್
ಪೊದಕೆ ಮೆದ್‌ಕಾವಂದೆ ಕಣ್ಣದ ಸೋಲು ತಡವೊಂದು ||

19

ದುಪದರಾಜೆನೆ ಪನ್ನೆ ಮಗಲೆಗ್
ಸರಿತ ಕಂಡನಿ ನಾಡ್ಡ ತಿಕ್ಕಚ್ಚೆ
ಪಿರನೆ ಪೋಯಲ್ ನಾಡ್‌ನಾಡ್‌ದ್ ಹಾ ಮಹಾದೇವ ||
ದೋಯಿಸೆರ್ ಜಾತಗೊದ ಪಲೊನುಲ
ಕೋಡೆ ಪಂಡ್‌ನ ಕಳುವೊ ಪಾಂಡವ
ಪಾರ್ತನ್‌ಲ ತೋಜಯೆರೆ ನಾರಯಿಣನೆ ನಟ್ಟೊಂಡೆ ||

|| ಅರಸುನಾಕ್‌ಲ್ ಮೀನ್ದಯಂತ್ರೊದ ಪಂತೊಗುಂತ್ಯೆರ್ ||

ಕೂಡಿ ಸಬೆಟ್‌ಲ ತನ್‌ಕ್ ಆಪುನ
ಜೋಡಿ ನಾಡ್‌ದ್ ತಿಕ್ಕಜಿಂದ್‌ದ್
ದ್ರೋಪದಿಯೆ ಪಿರ ಪೋಯಲುಳಯಿಗ್ ಪೊಣ್ಣಲೊಟ್ಟಿಗೆನೆ||
ರೂಪೊ ಸಿರಿದರ್ಬಾರ್‌ಡೇರ್‌ಲ
ಆಲೆ ಕಣ್ಣಗ್ ಪತ್ತಜೆರ್ ನಿಚೊ
ಬಾಣೊದಾ ಬಿರ್ಸತಿಗೆಡಾಂಡಲ ಗೆಲ್ಲಿ ಮದಿಮಲೆನ್ ||

1

ಸಾರಿಯೆರ್ ಡಂಗುರೊನು ಜವನೆರ್
ಏಳ್ ಜನೊ ತುಂಬೊಂದು ಬಿಲ್ಲನ್
ದೀಡಿಯೆರ್ ಕೈತಲ್‌ಡ್ ಬಾಣೊನು ಐನ ಮಿತ್ತಡ್‌ದ್ ||
ಮೀನ್ದ ಯಂತ್ರೊನು ನೇಲ್ತ್ ಕಟ್ಟೆರ್
ಸೂತ್ರೊ ತಿರ್ಗುನ ತೂದು ಎಣ್ಣೆದ
ಪಾತ್ರೊನಡಿಡೇ ದೀಡ್ಡ ಮಯ್ತೆರ್ ನಿಲಿಕೆ ಬೊಲ್ದೆಣ್ಣೆ||

2

ಪೂಜೆ ಮಲ್ಲೆರ್ ವಿದಿ ವಿದಾನೊಡು
ಬೇರಿ ವಾದ್ಯೊ ನಗಾರಿ ಸೌದ್ಯೊಗು

ಕೂಡಿ ರಾಜೆರ್ ಕೆಬಿಕ್ ಕೈ ಪತ್ತೊಂದು ನುರ್ಕಿಯೆರ್ ||
ಯಾನ್ ತಾನ್‌ಂದಕ್ಲ್ ರಕ್ಸ
ನಾಕ್‌ಲೇ ಕೈಲಾಸೊ ದೆರ್ಪೆರೆ
ಸಾಸೊ ಮಲ್ತನ ಲೆಕೊನೆ ಆಂಡಾಲ ಬಿರುನು ದೆರ್ಪನಗ ||

3

ಬಿಲ್ತನಡಿ ಪಂದಾಯೆರಾಯಿಜಿ
ಬತ್ತಿ ರಾಜೆರೆ ಮಾನೊ ಮರೈದಿ
ಇತ್ತನವೆ ಪೋದಾಂಡ್ ರತ್ತೊದ ಮಾಲೆ ತುಂಡಾದ್ ||
ತಿರ್ತ್ತ ರಟ್ಟಾದ್ ಕೆಬಿತ ಕುಂಡಲೊ
ಮುತ್ತು ಮಾಣಿಕೊಡಾಯಿ ಪದ್ಲೊಯಿ-
ಲಲ್ವ ಬೂರುದು ಆಂಡ್ ಪೊಡಿ ಪೊಡಿ ಪೆಜಿಪುನೇರವೆನ್ ||

4

ಪೋಣ್ಣುಗುಳು ತೆಲಿಪುನಗ ಸಾದನೆ
ಮಲ್ಲಿ ರಾಜೆರ್ ತರೆನ್ ತಗ್ಗದ್
ಕುಲ್ಲಿಯೆರ್ ಪೀಟೊಡುಲ ಯಂತ್ರೊನು ತಾಲ್ಪುನೇರ್‌ಂದ್ ||
ತೂವೊಡುಂದುದು ಕಾತ್‌ದಿತ್ತೆರ್
ಮಾನೊ ಮರೈದಿ ಕಳೆಯಿನಾಕ್‌ಲ್
ದ್ರೋಪದಿನ್ ಕೈ ಪತ್ತುನಾಸೆನ್ ಬುಡ್ಡು ಸಾಬಿತ್‌ಡ್ ||

5

ಆಯಿನೆಡ್ಡೆನೆ ಆಂಡ್ ಯಂತ್ರೊಗ್ಗೆ
ಬಾಣೊ ಬುಡ್ಡುನ ಪಂತೊಡರಸುಲೆ
ಮಾನೊ ಮರೈದಿಲೆನ್ ದೆತ್ತನವೆನ್ನ ಗೇಲತ್ತೊ ||
ಮಾಗದೆನೆ ಪಂಡೊಂದು ಲಕ್ಕೈನೆ
ಬಾಣೊ ಬಿರು ದೀಡ್ಡಿತ್ತನಾಡೆಗ್
ಸೀದ ಬತ್ತಾದ್ ಕೈತ ಬಳೆನ್‌ಲ ಪಿರವು ನೂಕ್‌ನಗ ||

6

ಬಿರುನು ದೆರ್ತೆಡ ಮಾಲೆ ಪಾಡ್ಡಲೊ
ಪರಬೆ ಪಂಡ್‌ದ್ ಬುಡುವಲೋ ನಮ
ಮದಿಮಲೆನ್ ನಂಬೊಲಿಯೊ ಪಂಡೆರ್ ಸಕಿಕುಲಾಪಗನೆ ||
ಆಯೆ ಬಗ್ಗದ್ ದೆರ್ತೆ ಬಿಲ್ತನ
ಬಾಣೊದೆಪ್ಪುನಗವ್ವೆ ಮಾಲ್‌ದ್
ಬೂರೈರಾನಗ ಪಿರಲ ತಾಂಗ್‌ದ್ ಕೂಟ್ ಪತ್ತೊಂಡೆ ||

7

ಮೋನೆಡರಿನವೆ ಬೆಗರ್ ಸೀಂಟ್‌ದ್-
ಲಾದ್ ಸರಿ ಮೊರಂಪೂರ್ದು ತಿಗಲೆಡ್

ಸಾದನೆಡ್ ಅಮಪುನಗ ಬೂರುದು ಮಲ್ಲ ಸೌದ್ದಾಂಡ್ ||
ತಾತಿ ಬೊಟ್ಟುದು ತೆಲಿತೆರಾಪಗ
ದ್ರೋಪದಿನ ಸಂಗಾತಿದಾಕ್‌ಲ್
ಮಾಗದೆನೆ ಬಿರು ಸುಡಡ್ ಪಂಡ್‌ದ್ ಪೋಯೆ ನಾಚಿಗೇಡ್ ||

8

ಕೋಪೊಡೇ ದಮಗೋಸನಾ ಮಗೆ
ಮಾಗದನ ಮರೈದಿ ದೆತ್ತನ
ಈ ಬಿರುನು ಯಾನಿತ್ತೆ ದಕ್ಕುವೆ ತೋಡುದಾಯೆರೆಗ್ ||
ತೆಲಿಪಿ ಕುದುರೆಲೆ ಜುಟ್ಟು ಕೊಪದ್
ದ್ರುಪದ ಮಗಲೆನ್ ಒಯ್ತ ಕೊಂಡೊವೆ
ಪನುಪುನಾ ಸಿಸುಪಾಲೆ ಬತ್ತೆನೆ ಬಿರುತ ಕೈತಡೆಗ್ ||

9

ಇಂಬೈ ದುಂಬುದ ರಾವಣೆಗೆ ನನ
ಕಂಡಿತೊನೆ ಬಿರುದೆರ್ಪೆ, ದ್ರೋಪದಿ
ದುಂಬು ಮಲ್ತನ ಪಾಪೊದಾ ಪಲೊಟಿಂಬೈ ಕಂಡನಿಯೆ ||
ಆಪುನೆನೆ ಹಣೆಬರೊನು ತಪ್ಪವು-
ನೇರ್ ಪಂಡ್‌ದ್ ಸಬೆನೆ ತೂನಗ
ನೂಕು ತೂಯೆನೆ ಬಿರುನು ಪಂದುವೊ ಪನ್ದ್ ಸಿಸುಪಾಲೆ ||

10

ದಾನೆ ಪನ್ನುನೆ ಬಿಲ್ ಪಂದುಜಿ
ಮಾನೊ ಮರೈದಿಗ್‌ಲ ಕೊರತೆನೆ
ಆದ್ ಪೋಣ್ಣಲೆ ತೆಲಿಕೆಗಿತ್ತೆನೆ ಸಾದಿ ಆಂಡತ್ತೊ ||
ರಾಜ ರಾಜೆರೆ ರಂಗ್ ಪಾತೆರೊ
ಕೇನ್ದ ದೈತ್ಯ ಸಮಾನೊದಾಯೆನೆ
ಆಸೆ ಬುಡುದೇ ಪೆರಪ ಬತ್ತೆನೆ ಅಡಿಕ್ ತೂವೊಂದು ||

11

ಕುಲ್ಲನಾಯನ್ ಲೆತ್ತೆ ಮಾಗದೆ
ಬಿಲ್ ಮೋಸೊದವುಂದು ಮಂತ್ರೊದ
ಕೊಲ್ಲಿ ಕೆಟ್ಟೊನೆ ಬತ್ತದೀಡೆಗ್ ಮಾನೊ ಪೋಂಡತ್ತೊ ||
ಕುಲ್ಲದಿತ್ತನ ಮಾತ ಅರಸುಲು
ಬುದ್ಧಿದಾಂತಿನ ಮಂಗೆರೇ ನಿಜೊ
ಪೋಣ್ಣಲಕಲೆನ್ ರಂಗ್ ಮಲ್ಪಡ್ ಪೋಯಿ ನಮೊ ಮುಲ್ತು ||

12

ಬಾರಿ ಬಿಸೆರ್ ಚೈದ್ಯ ಮಾಗದ-
ನಾಕ್‌ಲೆತ್ತೆರ್ ಊರುಗಕ್‌ಲೆನ

ಬಾಕಿದಾಕ್ಲೆ ಕತೆನೆ ಪಂತೊಡು ಬಾರಿ ಪೊರ್ಲಾಂಡ್ ||
ಬಿರುತ ಸುದ್ದಿಗ್ ನಮೊಲ ಪೋಂಡನೆ
ಕೊರತೆ ಮಾನೊಗು ಆವು ಕಂಡಿತೊ
ಗೆಲ್ಪಡೇರ್ಲ ನಂಕ್ದಾಯೆಗ್ ಪಂಡೆರರಸುಗುಳು ||

13

ಮರ್ಲ್ ಪೊಣ್ಣನ ಕಣ್ಣ ನೋಟೊದ
ಮಲ್ಲ ಬಲೆನೊಡ್ಡಾದ್ ದ್ರುಪದನೆ
ಬಿಲ್ಲ ಪನ್ನುನ ಮಾರಿದಡಿ ಬಲೆಟರಸು ಮುರ್ಗೊಲೆನ್ ||
ಪತ್ಯೆರೆಗ್ ತೂಪೆತ್ತೊ ಆವಡ್
ಎನ್ನ ಸಾಸೊಡು ಬಿರುನು ದೆರ್ಪೆರೆ
ಸಲ್ಯೆನೇ ತೀರ್ಪೊಂದು ಲಕ್ಯೆನೆ ಸಬೆಟ್ ಕುಲ್ಲನಯೆ ||

14

ರಟ್ಟೆ ಬಲೊ ಮಾಗದಗ್ ನಾಲಗೆ
ಉದೊ ಸಿಸುಪಾಲನವೆ ಸೋಲುದ
ಪರೊ ಇರ್ವೆರೆಗಾಂಡ್ ಬಾಕಿದ ರಾಜೆರೆಗ್ ಮಣ್ಣೆ ||
ಇತ್ತೆ ಬತ್ತನ ಮಾದ್ರ ರಾಜೆನೆ
ಬಿಲ್ಲ ದೆರ್ಪೆನೊ ಅಡಿಕ್ ಬೂರ್ದೆನೊ
ಪನ್ದ ನಿಲ್ಕೆರ್ ಮದಿಮಲೆನ ಪಾಸಡಿದ ಕುದುರೆಗುಳು ||

15

ಬಿರುತ ಕೈತಡೆ ಬತ್ತನಾಯೆನೆ
ತೆಲಿಪುನಕ್ಲೆಗ್ ಕಣ್ಣ ಮಗ್ತಾದ್
ಅಮತ್ ಪತ್ತಾದ್ ತನ್ನ ರಟ್ಟೆಡ್ ಸರುತೊ ಉಂತಯೆನೆ ||
ಪಗರಿ ಕೊಲ್ಪಯೆರೆಂದ್ ತೂನಗ
ಕಯಿತ ಬಲೊಯಾವಂದೆ ಬೂರಿಯೆ
ಬಿರುತ ಅಡಿಕೇ ಬಲೊಟು ಸಲ್ಯೆನೆ ಪನ್ನಿ ಪುದರ್‌ದಯೆ ||

16

ಸಲ್ಯ ಬೂಪತಿ ಸುಡಡ್ ಪಂಡ್‌ದ್
ಲಕ್ಯೆದಾನಗ ಪೊಣ್ಣಲಪಗನೆ
ಬೊಬ್ಬಿ ಪಾಡ್ಯೆರ್ ತಾತಿ ಬೊಟ್ಟೆರ್ ಕೀರಿ ಕುಟ್ಟಿಯೆರ್ ||
ಬಿಲ್ಲ ದೆರ್ಪೆದ್ ಮೀನ್ಯ ಯಂತ್ರೊನು
ಗೆಲ್ತದೇನೇ ಪೊಣ್ಣ ಮದಿಮೆನ್
ಎನ್ನ ಕೌರವ ಸ್ವಾಮಿಗಿತ್ತೆನೆ ಮಲ್ಟೆ ಪಂಡೊಂದು ||

17

ಕರ್ಣೆ ಲಕ್ಯೆನಗಾಯ ರೂಪೊನು
ಪೊಣ್ಣಲಪಗನೆ ತೂದು ಪಂಡೆರ್

ಅರ್ಜುನೆನೆ ಬರ್ಜುನಯೆ ಗೆಲೆಡ ಬಾಗ್ಯೊ ಮದಿಮಲೆನ ||
ನಮ್ಮ ಮದಿಮಲೆಗಿಂಚಿ ಕಂಡನಿ
ತಿಕ್ಕಿಯೆಡ ಪುಣ್ಯೊಂದು ಆಸೆಡ್
ನಿಲ್ಕೆ ತೂಯೆರ್‌ಲಾಯ ರೂಪೊನು ಕಣ್ಣ ದೆಪ್ಪಂದೆ ||

18

ಬಿರುನು ದೆರ್ಪೆರೆ ತೂಯೆ ಮೆದ್ಯೆಜಿ
ಸರಿ ಮೊರಂಪುನು ಊರ್ದು ಕೈತವೆ
ಬಲೊಟು ದಂಡ್‌ಗ್ ಪಾಡ್ ಬಿಕ್ಕಾದ್ ಸರ್ತೊ ಉಂತಯೆನೆ ||
ಪಗರಿ ಕೊಲ್ಪಯೆರೆಂದ್ ತೂನಗ
ಪಿರಲ ಜಾರ್‌ದ್ ತಿರ್ತ್ ಬೂಂಡ್‌ವು
ತೆಲಿತ್‌ಜೆರ್ ಪೊಣ್ಣುಗುಳು ಕರ್ಣಗ್ ಆಂಡ್ ನಾಚಿಗನೆ ||

19

ಮಗದ ಚೈದ್ಯಗ್ ಸಲ್ಯ ಕರ್ಣಗ್
ಮೆದ್‌ಕಯೆರೆ ತೀರಂದಿ ಕೆಲಸೊಗು
ನಮೊಲ ಪೋಪುನೆ ದಾಯೆ ಪಂಡೆರ್ ಕೌರವಾದಿಗುಳು ||
ಮೋಸೊ ಟಕ್ಕದ ಬಿರುನು ಪೊಲ್ಪುದಿ
ಡೋಂಗಿ ದ್ರುಪದನ ಮಗಲೆ ಜುಟ್ಟುನು
ಯಾನೆ ಒಯ್ತಾದ್ ಕೊನೊಪೆ ಪಂಡ್‌ದ್ ಲಕ್ಯೆ ಬಲರಾಮೆ ||

20

ಹಲದರನ ಅಮಸರೊಗು ಕ್ರಿಷ್ಟನೆ
ಕಯಿತಲುಂತುದು ಕೆಬಿಟ್ ಪಂಡೆನೆ
ದ್ರುಪದ ಮಗಲೇ ನಂಕ್ ತಂಗಡಿ ನನಗ್ ಆಪುನಲ್ ||
ಮಾಮಿ ಕುಂತಿನ ಜೋಕುಲೆಗ್ ಈ
ದ್ರೋಪದಿಯೆ ನಿಜೊ ಬುಡೆದಿಯಾಪುನೆ
ಈಯೆ ತೂವೊನು ಎಂಚ ಪಂಡ್‌ದ್ ಬುಕ್ಕೊ ಪನ್‌ಲೆನಡ ||

21

ಬಿರೆಲ್ ಮೂಂಕುಡು ದೀಡ್ ಕ್ರಿಷ್ಟಡ
ಪನ್‌ಪೆನೇ ಬಲರಾಮೆ ಪಾಂಡವ-
ನಕ್ಲೆ ಪೊತ್ತುದು ಸೈತ್ತಿ ಸುದ್ದಿನ್ ಲೋಕೊ ತೆರಿದುಂಡು ||
ಎನಡ ಈ ಕಳು ದಾಯೆ ಪನ್ನಯ
ನಿನನ್ ನಂಬಯೆನೆಂದ್ ಪನ್ನಗ
ಮದಿಮೆನುಂತವಿ ಕೆಲಸೊ ಮಲ್ಪಡ ಅಣ್ಣ ಕೇನಿಂಚಿ ||

22

ಪಾಂಡವೆರ್ ಈ ದ್ರುಪದ ಮಗಲೆನ್
ಸಾಸ್ತೊ ಸಲ್ಮತೊದಂಚ ಮದಿಮೆನೆ

ಆಪಿ ಸಂಬ್ರುಮೊ ನಿಕ್ಕ್ ತೋಜವೆ ಅಪ್ಪನಾಜೊಂದು ||
ಪನ್ನುನೆನ್ ಕೇನೊಂದು ಸಿವ ಸಿವ
ಸೈತ್ತ್ನಕ್ಲೇ ಬದ್‌ಕ್‌ದುಲ್ಲೆರೊ
ನಿನ್ನ ಗೊಬ್ಬನು ತೂಪೆ ಪಂಡ್‌ದ್ ಕುಲೈ ಮನಿಪಂದೆ ||

23

ಕೂಡಿ ರಾಚೆರೆ ಪೈಕಿ ನಾಡ್‌ದ್
ಸಾಸೊ ಸೌರೊದ ಪಂತೊಡಾಂಡಲ
ಪಾರ್ತೆ ತಿಕ್ವೆನೊ ಪನ್ನಿ ಆಸೆಡ್ ಸಬೆನ್ ಕೂಡ್ವಯೆನೆ ||
ದಾನೆ ಮಲ್ಪೊಲಿ ಎನ್ನ ಮಗಲೆನ್
ಆಪಿ ಯೇಗೈರ್ ತಿಕ್ವೆಚೆರ್ ಇನಿ
ಪಾಂಡವೆರ್ ಸೈತ್ತ್‌ದೆರ್ ಪಂಡ್‌ದ್ ಚಿಂತೆ ಮಲ್ಪೊಂಡೆ ||

24

ಅರಸುನಾಕ್‌ಲೆ ಮಾನೊ ಮರೈದಿ
ಬಿರುತ ಪಂತೊಡು ಪೋಂಡ ನನಗ್‌ಲ
ಬೆರಣೆರಾಂಡಲ ಪಂತೊ ಗೆಲ್ತೆರಡಾವು ದ್ರೋಪದಿನ್ ||
ಮದಿಮೆ ಆಯೆರಡೆನ್ನ ಚಿಂತೆಗ್
ಪರಿಯರೊನೆ ಆವುಂದು ದ್ರುಪದೆನೆ
ನೆನೆತೆದೇ ಡಂಗುರೊನು ಸಾರೈರೆ ಮಲ್ತೆನಂದಾಜಿ ||

|| ಪಂತೊ ಗೆಲ್ತನ ಟಕ್ಕ್ ಬ್ರಾಣಗ್ ದ್ರೋಪದಿ ಮಾಲೆ ಪಾಡ್ಯಲ್ ||

ಬ್ರಹ್ಮ ಸಬೆ ಕೂಡ್ವಿತ್ತನವುಲೇ
ಸೌದೊ ಲಕ್ಕದ್ ಸಾರ್‌ಡ್ ಡಂಗುರೊ
ಲಕ್ಕ ಲಕ್ಕಲೆ ಬೆರಣೆರಾಂಡಲ ಆವು ದ್ರೋಪದಿನ್ ||
ಇತ್ತೆ ಮದಿಮೆನೆ ಆಪಿ ಪಂತೊನು
ಗೆಲ್ಪಿಯೆರೆ ತಯರಾಲೆ ಪನ್ನಗ
ಬೊಬ್ಬೆ ಪಾಡ್ಯರ್ ಕುಲ್ನನಾಕ್‌ಲ್ ಕೇನ್ದ್ ಡಂಗುರೊನು ||

1

ದಾಯೆ ಚಿತ್ರಲೆ ಪೋಣ್ಣ ಎಂಕ್ಲೆಗ್
ಬಾಣೊ ರಾಪವಿ ಸುದ್ದಿ ದೆಪ್ಪುನ
ಬ್ರಾಣೆರೆಂಕುಲು ಅತ್ತ್ ಬಲ್ಮಣೊದೊಣಸ್ ದಚ್ಚಿಣೆಗ್ ||
ನೀಡುವೊನೆ ಕೈನೆಂಕ್ಲು ಯಂತೊನು

ತೂಯಿನಾಕ್‌ಲ್ ಅತ್ತ್ ಪಂತೊಗು
ಸೇರ್‌ಜಿಡ ಮರೈದಿ ಪೋಯೆರೆಗುಂಡೊ ಆ ಸಬೆಟ್ ||

2

ನಾಲಯಿಡ್ ಸರಿ ಬಿಸೆರೆಂಕುಲು
ಜಾತಿ ಸೂರೆರ್ ಚಿತ್ರಲಾಂಡಲ
ಬಾಣೊ ವಿದ್ಯೆಡ್ ಸೋಲ್ತೆರಿತ್ತೆನೆ ಪಂತೊಗುಂತೊಂದು ||
ತೂಪರ್‌ಡ ನಿಕ್‌ಲೆಂಕ್ಲೆ ಬಿಸ್‌ನ್
ಮಾತ ಪಂಡಿತೆರೆದುರು ಉಂತಡ್
ಬಾಯಿಡೆಂಕ್ಲೆನ ಯಂತ್ರ ತಿರ್ಗುನೆನಿತ್ತೆ ತೋಜವೊನೆ ||

3

ವೇದೊ ವೇದಾಂಗೊಲೆನ ಸಂಗತಿ-
ಲಾ ಪುರಾಣೊಲೆ ಅರ್ತೊ ಇವರಣೆ
ಮಾತ ಸಾಸ್ತೊಲೆ ತತ್ತೊ ಬುಡ್ಡಡ್ ಪಂತೊ ಗೆಲ್ಪೊಂದು ||
ದ್ರೋಪದಿಗ್ ಕೈ ಕೊರೊಡೊ ಮದಿಮೆಡ್
ಕಾಮೊ ಸೂತ್ರೊನು ಕಲ್ಪವೊಡೊ ಪನಿ
ಬೇತೆ ಎಂಚಿನ ದಾಯೆಂಕ್ಲೆಗ್ ಬೆರಣೆರೆಂಕ್ಲೆತ್ತೊ ||

4

ಅತ್ತ್ ನನಲಾ ಬೋಡೊ ಎಂಕ್ಲೆನ
ಮಲ್ಲ ಕಾರ್ಬಾರುಂಡು ಬಗೆ ಬಗೆ
ಬೆಲ್ಲೊ ಪಾಡ್‌ದನ ಪ್ಯಾಸೊ ಬೋಡವು ಎದುರು ಉಂತ್ಯೆರೆಗ್ |
ಜಿಲ್ಲೆ ಓಳಿಗೆ ಲಾಡ್ ಮೀಟಯಿ
ನುಪ್ಪುಕೊದೊಲು ಆಜಯಿನ ಪುಳಿ-
ಕಜ್ಜು ತಂಬೊಳಿ ಉಪ್ಪಡಪ್ಪಲೊ ಬುಕ್ಕೊ ಎರೆದಳೆ ||

5

ಮಾತ ಎದುರುಗು ಬರಡ್ ಎಂಕ್ಲೆನ
ಬಾರಿ ಸಾಮರ್ತಿಕೆನ್ ತೂವೊನಿ
ಬ್ರಾಣೆರೆನ ಸಬೆಟಾಂಡ್ ಬೊಬ್ಬೆನೆ ಬೊಬ್ಬೆ ಪಾತೆರುನ ||
ಜೀವೊ ಬಾವೊದ ನಡುಟು ಸೇರ್‌ನ
ಆತ್ಮೊದಂಚಿನೆ ಟಕ್ಕ್ ಏಸೊಡು
ಬೂಸುರೆರೆ ನಡುಟಿತ್ತಿ ಧರ್ಮಣೆ ಕೇಂಡ್‌ದೀ ಸೊರೊನು ||

6

ಮೆಗ್ಗೆ ಮೋನೆನ್ ತೂಯೆ ಕಣ್ಣೊಡ್
ಸನ್ನೆ ತೆರಿಪಯೆನಪಗ ಪಾರ್ತೆನೆ
ಲಕ್ಕದುಂತಿಯೆ ಕುಂತಿ ಬೀಮಗ್ ಮನಸ್‌ಡೊಂದನೆನ್ ||

ಮಲ್ಲೊನುಂದೇ ತನ್ನ ಕೈತಲ್
ಕುಲ್ಲದಿತ್ತನ ಮಾತ ಬೆರಣೆರೆ
ದಿಸ್ತಿ ತನ್ನಾಡೆಗೆನೆ ಬೂರ್ನಗ ಮುಗುರು ತೆಲಿತೊಂಡೆ ||

7

ಜೋತ್ತೊ ದರ್ಬೆನ್ ಬಿಗಿತ್ ಕಟ್ಟೆನ್-
ಗಾಪಗನೆ ಬ್ರಾಣೆರಾಲ ಕೇಂಡೆರ್
ದಾನೆ ಸಾಸ್ತಿಲು ಲಕ್ಕುದುಂತ್ಯರ್ ಪೊಣ್ಣನಾಸೆಗೊಯೆ ||
ಗರುಡ ಪಕ್ಕನೆ ಕೆರ್ತನಾ ಇಸೊ
ಕೊರಜಿಲೆಗ್ ತಾಗಂದೊ ಗ್ರೇಯ್ತುಲೆ
ಬಿರುತ ಸುದ್ದಿಗ್ ಪೋಪುನಾಸೆನೆ ಈರೆ ಮರ್ದತ್ತೊ ||

8

ಮದಿಮೆ ಆಪರ್ಡಾಂಡ ನಮ್ಮವೆ
ಸರಿತ ಜಾತಿಡ್ ಪೊಣ್ಣುಲಿದ್ಯೊನೊ
ಅವೆಟ್ ಒಂಜೆನ್ ತೂದು ಆಂಡನೆ ಸುಕೊತ ಸಂಸಾರೊ ||
ಚಾತ್ರಿಯಾಣೆನ್ ಈರೆಗಿತ್ತನೆ
ಆಲಿಪುನ ತಾಕತ್ ಉಂಡೊಯೆ
ದಾಯೆಗೀರೆಗ್ ಈ ಬಗೀರತ ಯತ್ತೊದಾ ಮರ್ದ ||

9

ನಿಕ್ಲ್ ಮನಿಪಡೆ ಸುದ್ದೊ ಬಾವೊದ
ಮನಸ್ಡಾಸೀರ್ವಾದೊ ಮಲ್ಪುಲೆ
ಅಯಿನ ಬಲೊಟೇನಿತ್ತೆ ಗೆಲ್ಪುವೆ ಪಂಡೆನರ್ದನೆ ||
ಪೋಪುನವು ಬೊಡ್ಡಿಂದ್ ಕೆಲವೆರ್
ಆಯೆ ಗೆಲ್ಪುರುವೆಂದ್ ಕೆಲವೆರ್
ಸೋಲ್ತೆಡನೆ ನಾಲೀಸ್ ಬೆರಣೆರೆ ಜಾತಿಗಾವತ್ತೊ ||

10

ಪೋಪುನವು ಎಡ್ಡೆತ್ತ ಪಂಡೆರ್
ಆಯ ರಟ್ಟೆನ್ ತಿಗಲೆದಾಯೊನು
ತೂದು ವೀರೆರೆಗಿತ್ತಿ ಲಚ್ಚಣೊ ಉಂಡು ಪನ್ನಗನೆ ||
ಪಾಡಿ ಪೊಸ ಜನ್ನೊರೊನೀಸ್‌ದ್
ವೀರ ಕಚ್ಚೆನ್ ಬಿಗಿತ್ ಕಟ್ಟೆನ್
ಸಾದಿ ತೆಲಪದ್ ಬತ್ತೆನರ್ದನೆ ಬಿರುತ ಕೈತಡೆಗ್ ||

11

ತಿರ್ಗದರಸುಲು ತೂದು ತೆಲಿತೆರ್
ಮರ್ದೆ ಪೆಂಗನೊ ಹೆಡ್ಡೆಯಬಗೆನೊ
ಅತ್ತ ಬೆರಣನ ಏಸೊ ಮಲ್ತ್‌ದ್ ಬತ್ತಿ ಸುರಪತಿಯೊ ||

ಪೊಣ್ಣ ಮರ್ದಾಡ್ ಕೆಲವು ಜವನೆರ್
ಪೊತ್ತಿ ಸೂಕುಲ ಕೈನ್ ಪಾಡ್ಡೆರ್
ಇತ್ತೆ ತೂನಗ ಇಂಬೈ ಮರ್ದನೆ ಪಂಡೆರರಸುಗುಳು ||

12

ಬಿಲ್ಲ ದೆರ್ಪುನ ಕುಸಲೊ ದರ್ಬೆನೊ
ಕ್ರಿಷ್ಟ ಮುರ್ಗೊದ ಚರ್ಮೊನೊ ಅವು
ಚೆಕ್ಕಿ ಪೂಲ್‌ನ ಕನಕೊ ಸಾಲಿಗ್ರಾಮೊದಾ ಕಲ್ಲೊ ||
ಪನ್ನಿ ರಂಗ್‌ದ ಬೊಬ್ಬೆ ಕೇಂಡ್‌ದ್
ಮಿತ್ತ ಮದಿಮಲೆ ಒಟ್ಟುಗಿತ್ತನ
ಪೊಣ್ಣುಲಪಗನೆ ನಿಲ್ಕ ತೂಯೆರ್ ಆಯೆ ಬರ್ಪುನೆನ್ ||

13

ಆಯೆ ಬರ್ಪುನ ನಡಕೆನಾಕ್‌ಲ್
ತೋಜಯೆರ್ ದ್ರೌಪದಿಗ್ ನಟನೆಡ್
ತೂಲ ಬರ್ದೆರ್ ಮಲ್ಲ ಗಡ್ಡೊದ ಬಟ್ ಬಿರುತಾಡೆ ||
ಆರ್ ಗೆಲ್ಪೆರ್ ಬಿರುನು ದೆರ್ತ್‌ದ್
ಮಾಲೆ ಪಾಡ್ಯಡ ನಿನ್ನ ಪುಣ್ಯೊನೆ
ಈತ್ ಪನ್ನಗ ಅಡಿಕ್ ತೂಯಲ್ ದಿಂಜ ನಾಚೆಗಡ್

14

ಅಣ್ಣ ತೂಲಯ ಪಾರ್ತೆ ಬರ್ಪುನ
ಗತ್ತಡಾಯೆನೆ ಬೆರಣ ಏಸೊಡು
ಕುಲ್ಲದಿತ್ತೆನೆ ಬ್ರಮ್ಮ ಸಬೆಟೇ ನಿಕ್ಕು ಗುರ್ತಾಯ್ಲೊ ||
ಅಪ್ಪೆನಾಜೊನೆ ಪಾಡ್ಡ ಪಂಡ್‌ನ
ಸತ್ಯೊನೊ ಕಳುವಂದೊ ಪಂಡ್‌ದ್
ಇತ್ತೆ ತೂವೊನು ಪಂಡೆ ಬಲರಾಮಡನೆ ಸಿರಿಕ್ರಿಷ್ಟೆ ||

15

ಧರ್ಮನಂದನೆ ಬಾಕಿದಾಕ್‌ಲ್
ಬ್ರಮ್ಮ ಸಬೆಟೇ ಕುಲ್ಲದುಪ್ಪುನ
ಗುರ್ಮೊ ತಿಕ್ಕುವೊ ತೂಲ ಪನ್ನಗ ಪನ್ನೆ ಬಲರಾಮೆ ||
ಅರಕ್‌ದರಮನೆಡಕ್‌ಲ್ ಪೊತ್ತುದು
ಒರಿನೆ ಎಂಚನೊ ನಿನ್ನ ಮಾಯೊಗು
ತೆರಿನೆ ಎಂಚನೊ ಪನ್ನ ನಿಲ್ಕದ್ ತೂಯೆನಚ್ಚಿರೊಡು ||

16

ಅರಸುಲೆನವೇ ರಂಗ್ ಪಾತೆರೊ
ಕುದುರೆ ಪೊಣ್ಣಲೆ ತಮಸ್ ಬೆರಣೆರೆ
ನಮುನೆ ನಮುನೆದ ಹಿತೊತ ಕಡ್ಡುದ ಪಾತೆರೊಲೆ ಕೇನ್ದೊ ||

ಮುಗುರು ತೆಲಿಕೆಡ್ ಸೊರ್ಕುದಾನೆದ
ಲೆಕೊನೆ ಬರ್ಪುನ ಗತ್ತ್ ತೂಯೆರ್
ಪುರಿನ್ ಮಚ್ಚೆರೊ ಬುಡುದು ವೀರೆರ್ ಮಾತ ಪುಗರಿಯೆರ್ ||

17

ಬನ್ನಗನೆ ಗುರು ಬೀಸ್ಮೆರೆಗಲಾ
ಕ್ರಿಷ್ಟ ಸ್ವಾಮಿಗ್ ಕಣ್ಣ್ ಮುಚ್ಚಿದ್
ಬಗ್ಗಿಡೇ ವಂದನೆನ್ ಸಂದದ್ ಪರಕೆ ಪಂಡೊಂದು ||
ಬತ್ತದಾಲೇ ಇತ್ತಿ ಬಾಣೊನು
ದೆರ್ತ್ ಪತ್ತದ್ ಕಡೆಟ್ ಬ್ರಮ್ಮನ್
ವಿಷ್ಟು ಮೂರ್ತಿನ್ ನಡುಟು ಸಿವನ್‌ಲ ಕೊಡಿಟ್ ಉಂತಯೆನೆ ||

18

ಚತ್ತಿಯೆರೆನಾ ಗರ್ವೊನುಂತಯಿ
ಬಿಲ್ಲ್ ಉಂದೆನೊ ಪನ್ದಲಾಯೆನೆ
ದತ್ತ ಕೈಟೇ ಸರ್ತೊ ಉಂತದ್ ಬಾಣೊ ಕೊಲ್ಪಾಯೆ ||
ಕೆಬಿತ ಕಂಡೆದ ಬರಿಕ್‌ನಾರ್‌ನ್
ಒಯಿತ್ ತೂಯೆನೆ ಬಿಲ್ಲ್ ದಾಳಿತೊ
ಸರಿಟ್ ರಟ್ಟಯೆ ಬಾಣೊ ಕೊಲ್ಪದ್ ನೋಟೊ ತೂವೊಂದೆ ||

19

ಮೀನ್ದ ಯಂತೊಗು ನೋಟೊ ಪತ್ತುನ
ಸಾಪು ಸಾಪಾದಿತ್ತಿ ಪಾರ್ತನ
ಬಾಣೊ ಯಂತೊನು ತಾಲ್ತದೋಡೆಗೊ ರಟ್ಟದಾಂಡಪಗ||
ಬ್ರಾಣೆರೊಟ್ಟುಗು ತಾತಿ ಬೊಟ್ಟೆರ್
ರಾಜೆರೆಗ್ ನಿಜೊ ಆಚಿರಾನಗ
ಆಕ್‌ಲೆನ ಎದುರುಡೆನೆ ಪಂಡೆರ್ ಗೆಲ್ತೆ ಎಂಕ್ಲೆನಯೆ ||

20

ವಾದ್ಯೊ ಕೊಂಬು ನಗಾರಿ ಕದಿನೊದ
ಬೂಮಿಯದುರುನ ಸೌದ್ಯೊ ಬೆರಣೆರೆ
ಗೇಲ್‌ದಾ ಸಿರಿ ಮಂತೊ ಮಾತಲ ಸೇರ್‌ದೊಂಜಾಂಡ್ ||
ಕತ್ತಿದಾಯುದೊ ಪತ್ತಿ ವೀರೆರ್
ಗೆಲ್ತನಾಯನ ಅಂಗೊ ರಚ್ಚಣೆ
ಮಲ್ಪಿಯೆರೆನೇ ದ್ರುಪದರಾಜೆನೆ ಸುತ್ತ ಉಂತಾದೆ ||

21

ಪೊಣ್ಣಲೆನ್ನಿನ ಮಣಿ ಕಿರೀಟೊದ
ರತ್ನೊ ಮದನನ ಪಟ್ಟದಾನೆನೆ

ಬರ್ದಲಾ ಸಿರಿದೇವಿ ದ್ರೌಪದಿ ಸಬಿತ ಮಂಟಮೆಗ್ ||
ಲಕ್ಕಿ ಲಕ್ಕಲೆ ಸಾದಿ ತೆಲಲೆಯೆ
ಬರಿ ಮದಿಮಲೆ ರೇಂಜಿಗ್‌ಂದ್‌ದ್
ಪೊಣ್ಣುಗುಳು ಪನ್ನಗನೆ ದಂಡಿಗೆ ಬತ್ತದಾಂಡಡೆಗೆ ||

22

ಅರಳಿ ತಾಮರೆ ಪೂತ ಮೋನೆದ
ಸಿರಿಟ್ ದಂಡಿಗೆ ಜತ್ತದುಂತ್ಯಲ್
ಮನಸ್ ತಳಮಳೊ ಆಂಡ್ ಸಂತೊಸು ನಾಚಿಗಲ ಸೇರ್‌ದ್||
ಬಾರಿ ನಾಚಿಗೇ ಆದ್ ಮದಿಮಲೆ
ಮೇಲ್ ಬೆಗರ್‌ದ್ ಪೊದಕೆ ಜಾರ್‌ನ-
ಗಾಲ್ ಸರಿ ಮಲ್ತೊಂದು ಪಾಡ್ಯಲ್ ಮಾಲೆ ಮದಿಮಯಗ್ ||

23

ಪೊರ್ಡು ಸುಂದರೊ ರೂಪೊದಾಯನ್
ಕಣ್ಣ್ ದೆರ್ತ್‌ದ್ ತೂನಗಾಲೆಗ್
ಮನ್ನತೆನೊ ಉಂತ್‌ದಾನೆ ಪನ್ನುನ ಬ್ರಮೆಟ್ ಪಿರ ಪಿರಲ||
ನಿಲ್ಕನಗ ನಾಚಿಗಡ್ ಮೋನೆನ್
ತಗ್ಗಯಲ್ ತನ ಮನಸ್‌ದಾಸೆನ್
ಲೆಜ್ಜಿ ಗೆಲ್ತದ್ ಒರೊರೊ ತೂಪಲ್ ತನ್ನ ಮದಿಮಯನ್ ||

24

ಮದಿಮಯನ್ ಮದಿಮಲೆನ್ ಒಟ್ಟಿಗೆ
ಕೊನೊದು ಬತ್ತೆರ್ ರಾಜ ಚಾವಡಿ-
ಗಪಗ ವಾದ್ಯೊಡು ಉರಿಪಿ ಮಂಗಲೊ ಗೀತೆ ಕೇನ್ನಗನೆ ||
ದ್ರುಪದ ರಾಜಗ್ ಜಲ್ಮೊ ಸಾರ್ತಕೊ
ಪನ್‌ಪಿ ಸಂತೊಸುಲಾದ್ ಅಕ್‌ಲೆನ್
ಸರಿಟ್ ಕುಲ್ಲದ್ ಪೇರ್ ಕೊರ್ಪಯೆ ತನ್ನ ರಾಣಿಡನೆ ||

|| ಅರಸುಲೆನ ಪುರಿಗಂಟ್ ||

ಆ ದುರ್ರೋದನೆ ಪಂಡೆ ಲಕ್ಕದ್
ತೂಯೆರೋ ಪಾಂಚಾಲೆ ಮಲ್ತನ
ಮಾನೊ ಹೀನೊದ ಕೆಲಸೊ ಮಾತೆರ್ ಸೇರ್ನ್ ಕಳಟಿತ್ತೆ ||
ತೂಯೆರೋ ಮರ್ಯಾದಿದಾಕ್‌ಲ್
ಬಾರಿ ಪುದರ್‌ದ ರಾಜ ರಾಜೆರ್
ತೂಯೆರೋ ಓ ಕರ್ಣ ಸಕುನಿಲು ಜಯದ್ರತಾದಿಗುಳು ||

1

ಓಲೊ ಇತ್ತನ ಪರತ್ ಬಿಲ್ಲ್ಯನ್
ಹಾಲ್ ಮಂತ್ರೊದ ಒಸಯೊಡುಂತದ್
ಬ್ರಾಣ ಮಾಣಿಡ ದೆರ್ಪದೇ ನಮ ಮೋನೆ ತಗ್ಗಯೆನೆ ||
ಆಯ ಮಗಲ್‌ಲ ಮಾಲೆ ಪಾಡ್ಯಲ್
ಬೇಡ್ಡ್ ಬದುಕುನ ಬೆರಣ ಕೆಕ್ಕಿಗ್
ನೇಟ್ ದಾನೋ ಗೊಬ್ಬು ಗೊಬ್ಬುದೆನರಸು ಪಾಂಚಾಲೆ ||

2

ಮೂಲು ಕೂಡ್ಡನ ನಿಕ್‌ಲ್ ಅರಸುಲೊ
ಮಾನೊ ಮಾರ್ಡನ ಪೊಡಸುಲೋ ಪನಿ
ಬ್ರಾನ್ಡಿ ಚಾಕಿರಿಗಿನಿಯೆ ಕಡಪುಡಿ ನಿಕ್‌ಲೆ ಪೊಣ್ಣಲೆನ್ ||
ಆಣ್ಣೆಡಿತ್ತನ ಅರಸುನಕ್‌ಲೆನ್
ತೂದು ಬೊಡ್ಡಿಂದಾಲ್ ನಟ್ಟುನ
ಬ್ರಾಣೆನೇ ಆವುಂದು ಪೋಯ್‌ಟ್ ದಾನೋ ಗುಟ್ಟುಂಡು ||

3

ಕುರುಕುಲೇಸ್ವರ ಪಾತೆರೊನು ಸರಿ
ಅರಸುನಾಕ್‌ಲ್ ಕೇನ್ಡ್ ಲಕ್ಕೇರ್
ದುಪದ ಮಾಸೊನು ಕಕ್ಕೆ ಕುರುಕುಲೆಗೆಂಕ್ಲು ತಿನ್ಪಾದ್ ||
ಮದಿಮಲೆನ್ ಒಯ್ಯೊಂದು ಎಂಕ್ಲೆನ
ಬುಡೆದಿಯಲ್ಲೆನ ಚಾಕ್ರಿಗುಂತವೊ
ಬೆರಣ ಮಾಣಿಗ್ ನಾಲ್ ಪಾಡುವೊ ನಟ್ಟ್ ತಿಂದೊನಡ್ ||

4

ಲಕ್ಕಿ ಮುತ್ತಿಗೆ ಪಾಡಿ ದ್ರುಪದನ
ಪಟ್ಟಣೊನು ಪೊಡಿ ಮಲ್ಪಿ ಕೋಟೆನ್
ಕುಟ್ಟುದೇ ಜರ್ಪಿಂದ್ ನುಕ್ಯೆರ್ ಸೇರ್ನ್ ಅರಸುಗುಳು ||
ಮಲ್ಲ ಗಡಿ ಬಿಡಿಯಾಂಡ್‌ಲರಸುಲೆ
ನುರ್ದುಟೊಗು ಪಾಂಚಾಲೆ ಸೇನೆಗ್
ಕೊರೈನಾಚ್ಚೆನ್ ಕೆರೈ ನೋಪುಲೆ ಮುಲ್ತು ಗಿಡರಿಂದ್ ||

5

ನುರುಕುನಕ್‌ಲೆನ್ ಪೊಡಿಯೆ ರಟ್ಟದ್
ಕತ್ತಿದಾಯುದೊಡಕಲೆ ತರೆನಲ
ಕಡ್ಡ್ ಕಡ್ಡ್ ರಟ್ಟಯೆರ್ ಪಾಂಚಾಲ ಕಡೆತಕ್‌ಲ್ ||
ಮುತ್ತಿಗೆನ್ ರಟ್ಟವುನ ತೂದೇ
ಹಸ್ತಿನಾವತಿಡಕ್‌ಲ್ ಎದುರುಗು
ಬತ್ತಾದುಂತ್ಯೆರ್ ಕರ್ಣ ಜಯದ್ರತೆ ಮಾತ ಸೈನಿಕೆರ್ ||

6

ನೋತು ಪಾಡ್ಯೆರ್ ಕಡ್ಡ್ ಕೆರೈರ್
ಬಾಣೊ ಬುಡಿಯೆರ್ ದ್ರುಪದ ಸೇನೆಗ್
ಸೋಲು ಆಯ್ನ ಬೆರಣ ಏಸೊಡು ಇತ್ತಿ ಧರ್ಮಜೆನೆ ||
ತೂದು ಪಾರ್ತನ ಕೆಬಿಟ್ ಪಂಡೆನೆ
ಈಯೆ ಪೊದ್ದೆರೆ ಸಾಯೊಗುಂತುದು
ಆಕ್‌ಲೆನ್ ಗಿಡರ್ಲಂದ್ ಅಪ್ಪಣೆ ಕೊರ್ದು ಕಡಪುಡಿಯೆ ||

7

ಅಣ್ಣನಾಚ್ಚೆಡ್ ಬಾಣೊ ರಾಪಯೆ
ಬೊಲ್ಲೊ ಬರ್ಸೊದ ಲೆಕೊನೆ ಅರುನೆ
ಕರ್ಣಗಾಂಡ್‌ಲ ದಿಂಜ ಪೋಡಿಗೇ ಮುಕ್ಯೆ ನೆತ್ತೆರ್ಡ್ ||
ಮಲ್ಲ ಗೆಲ್ಲ್ಯನ್ ಬೀಮೆ ಪತ್ತಾದ್
ಸಲ್ಯಗಾಕಿಯೆ ಪಾರ್ತ ಕರ್ಣಲ
ಯುದ್ಧೊ ಮಲ್ತೆರ್ ಸಲ್ಯ ಬೀಮೆಲ ಉಂತುದೆದುರೆದುರು ||

8

ಬೀಮೆ ಪೆಟ್ವೆನ್ ತಡೆಯೆರಾಯಿಜಿ
ಪಾರೈ ಸಲೈನೆ ಪಾರ್ತ ಬಾಣೊಡು
ಸೋಲು ಕರ್ಣಗ್ ಆಯಿ ಸಾತ್‌ಗ್ ಪಂಡೆ ಕೌರವಡ ||
ಬ್ರಾಣೆರೆಡ ನಮೊ ದಾಯೆ ಕಾದುನೆ
ಪೋಯಿ ನಮೊ ಮುಲ್ಪಡ್ ದ್ರುಪದಡ
ತೂಕೊ ನನ ಒರೊ ಬತ್ತದಿತ್ತೆನೆ ಬೊಡ್ಡಿ ಪುನೆಪುನವು ||

9

ಕರೈ ಪಂಡನ ಪಾತೆರೊನೆ ಸರಿ
ಬ್ರಮ್ಮ ಹತ್ತೆನ್ ಬೊಡ್ಡಿ ಮಲ್ಪುನ
ಹಸ್ತಿನಾವತಿಗಿತ್ತೆ ಪೋಯಿಗೇ ಪಂಡೆ ಕುರುರಾಯೆ ||
ನನೊರೊ ಬತ್ತಾದ್ ತೂಕೊ ಇಂಬ್ಯನ
ಕಡೆಟ್ ಏರೇರುಲ್ಲೆರೆಂದ್‌ದ್
ಪೆರಪ ಬತ್ತೆರ್ ಸೇನೆದೆತ್ತಾದ್ ಹಸ್ತಿನಾವತಿಗ್ ||

10

ಮರತ ಗೆಲ್ಲ್ಡ್ ಬೀಮೆ ನೋತುದು
ಅರಸುಲೆನ ಪುಣ ಪಾಡ್ಡ್ ಮೂಲ್ಯನ
ಬುಡರೊದಿಲ್ಲಗ್ ಬತ್ತದಣ್ಣನ ಕಾರ್ ಪತ್ತಿಯೆನೆ ||
ಪಾರ್ತ ಕರ್ಣಾದಿಲೆನ್ ಗೆಲ್ಲ್ಡ್
ಸೀದ ಅರಮನೆಗೆತ್ತೆ ಜಯೊ ಸಿರಿ
ಮಾಲೆ ಪಾಡ್ತೆ ಸುದ್ದಿ ಪನಿಯೆರೆ ತನ್ನ ಮದಿಮಲೆಡ ||

11

ನಮ್ಮ ಜಾತಿಡ್ ಇಂಚ್ಚೆ ಪುಟ್ಟುದು
ಮಲ್ಲ ಕೀರ್ತಿಯೆ ಬತ್ತನೆಟ್ ಇನಿ
ಚತ್ತಿ ಜಾತಿದ ಬಿರತ್ತಿಗೇನೇ ರಾದ್ ಪೊಂಡತ್ತೊ||
ಗೆಲ್ತಿ ವೀರಡ್ಡಾದ್ ವಂಸೊಗು
ಮಿತ್ತ ಲೋಕೊನೆ ಪುಗರುನಂಚಿನ
ಸತ್ಯೊ ಸಿವ ಸುಂದರೊದ ಕೀರ್ತಿಲ ಊರ್ಜಿತೊನೆ ಆಂಡ್ ||

12

ಬ್ರಾಣೆರೇ ಪಂಡೊಂದು ಪುಗರ್‌ದ್
ಆಯಗಾಸೀರ್ವಾದೊ ಮಲ್ತದ್
ಪೋಯೆರಾಕಲೆ ಇಲ್ಲಡೆಗ್ ನನ ಬರ್ಪೊ ದ್ರೋಪದಿನ||
ಬಾರಿ ಗೌಜಿಡ್ ಆಪಿ ಮದಿಮೆಗ್
ಏಳ್ಕೊ ಗಳಿಗ್ ದುಂಬು ಎತ್ತುವೊ
ರಾಜ ದ್ರುಪದಡ ಪಂಡ್‌ದಾಕ್‌ಲ್ ಮಾತ ಪಿದಡಿಯೆರ್ ||

|| ದ್ರೌಪದಿ ಐವೆರೆಗ್ ಬುಡದಿ ಆಯಲ್ ||

ಮಲ್ಲ ಗತ್ತದ ವೀರ ತೇಜಿಡ್
ಲೆತ್ತೆ ದ್ರೋಪದಿನಪಗ ಬತ್ತಲ್
ಇರ್ದೆರೊಟ್ಟುಗು ಅಲ್ತ್ ಪೋಯೆರ್ ಬುಡರೊದಾಡೆಗೆನೆ
ಪೋಣ್ಣನಲ್ಪನೆ ಪಿದಯಿ ಉಂತದ್
ಇಲ್ಲದಲಯಿಗ್ ಪೊಗ್ಗುದೊರೈನೆ
ಅಪ್ಪೆ ಕಾರ್‌ಗ್ ಅಡ್ಕೊ ಬೂರಿಯೆ ಬಾರಿ ಸಂತೊಸುಡು ||

1

ಅಪ್ಪೆ ಈರೆನ ದಯೊಟು ಯಾನಿನಿ
ಬಿಲ್ಲೆ ಬಾಣೊದ ಪಂತೊ ಗೆಲ್ತದ್
ತಿಕ್ಕಿ ರತ್ನೊನು ಕನತೆ ಪನ್ನಗ ಕುಂತಿ ತೆಲಿತೊಂದು||
ಅಯಿನ್ ಐವೆರ್ ಪಟ್ಟೊನುಂದೇ
ಸುಕೊಟು ದಿನೊ ಕಳೆವೊಂದು ಉಪ್ಪುಲೆ
ನಮನ ಗೆರಚರೊ ಬಿರಿದ್ ಊರುಗು ಏಪೊ ಎತ್ತುವೊನೊ||

2

ಈರೆನಾಸೀರ್ವಾದೊ ಮಲ್ಲನೆ
ಯಾನ್ ಕನತ್‌ನ ರತ್ನೊ ತೂಲೆಗೆ
ದ್ರೋಪದಿನ್ ಕೈಟೊಯ್ತದಾಲೆನ್ ಕಾರ್ ಪತ್ತಾಯೆ||

ಸಿವ ಸಿವಾ ಉಂದೆಂಚಿ ರತ್ನೊನೊ

ನಿಕ್‌ಲ್ ಐವೆರ್ ಪಟ್ಟೊನಿಂದ್‌ದ್
ತೆರಿಯಂದಿತ್ತೆನೆ ಪಂಡಿ ಪಾತೆರೊ ನಡಪುನವು ಸಮೊನೊ ||

3

ಅಪ್ಪೆ ಈರೇ ಪಂಡಿ ಪಾತೆರೊ
ತಪ್ಪವಯೊ ಈ ಪೋಣ್ಣ ಎಂಕ್ಲೆಗ್
ಐವ್ವೆರೆಗ್‌ಲಾ ಬುಡೆದಿ ಪಂಡೆನೆ ಪಾರ್ತ ಕುಂತಿಡನೆ||
ಪನ್ನುನೆನ್ ಕೇನೊಂದು ಧರ್ಮಣೆ
ಬುಕ್ಕೊ ಬೀಮೆಲ ಮಾದ್ರಿ ಜೋಕುಲು
ಮರ್ಲ್ ಪಾತೆರೊ ಬುಡ್ಲ ಪಂಡೆರ್ ಕೋಪೊಡಕ್‌ಲೊಟ್ಟು||

4

ಮಾತ ಧರ್ಮೊದ ಸಾರೊ ನಿಕ್‌ಲೇ
ಪೂರ ತೆರಿನಕ್‌ಲಾದ್ ಪನ್ನುನ
ರೀತಿ ಕೇನ್ನಗ ಎಂಕ್‌ಲಾಚಿರೊ ಪಂಡೆನರ್ಜನೆನೆ||
ವೇದೊ ನೀತಿನ ಧರ್ಮೊ ಸಾಸ್ತೊನು
ಓದುದಾನಗ ಅಪ್ಪೆಡ್‌ದ್ ಮೇ-
ಲಾಯಿ ದೇವೆರ್ ಇದ್ಯೆರ್‌ಂದ್‌ದ್ ನಂಕ್ ತೆರಿವತ್ತೊ||

5

ಅಪ್ಪೆ ಪಾತೆರೊ ಮೀರೈರಾವಂ-
ದೆನ್ನಿ ಸಾಸ್ತೊನು ತೆರಿದ್ ಲೋಕೊಡು
ಧರ್ಮೊನಿಸ್ಪೆರ್‌ಲಾದ್ ಬದುಕುನವೆಡ್ಡೆ ನಂಕಿತ್ತೆ ||
ಲೋಕೊ ಮೆಚ್ಚಿ ಕೆಲಸೊದಾಯೆಗ್
ನೀತಿ ನಿಯಮೊಡು ನಮನೆ ಇತ್ತೊಡ
ದೋಸೊ ಎಂಚಿನ ಧರ್ಮೊನೇ ನಮ ಕರ್ಮೊ ಸಾದನೆಗ್||

6

ದೂರುವೆರ್ ಮಾತೆರ್ಲ ಪಂಡ್‌ದ್
ಪೋಡಿನವು ಸರಿಯತ್ತ ಧರ್ಮೊದ
ಮೂಡಿಗೇಡ್ ಬಾಣಾದ್ ಉಪ್ಪುಗೊ ಪಂಡೆನರ್ಜನೆನೆ||
ಪಾರ್ತ ಪಾತೆರೊ ಮಾತೆರೊಪೈರ್
ಆಕ್‌ಲೈವೆರ್ ಕುಂತಿ ಮೋನೆನ್
ತೂನಗಾಲ್‌ಲ ಒಪ್ಪಲಪಗನೆ ಕೇನ್ದ ದ್ರೋಪದಿಡ ||

7

ಮಾಮಿ ಕುಂತಿಯೆ ಮರ್ಮಲೆನ್‌ಲಾ
ಪ್ರೀತಿಡೇ ಕೈತಲ್‌ಡ್ ಕುಲ್ಲದ್
ಬೀಮ ಪಾಲ್‌ಗ್ ಒಣಸ್ ಬಲಸುನ ಕೆರಮೊ ತೆರಿಪಯಲ್||

ಬಾಕಿದಾಕ್ಲೆ ಗುಣೊನು ನಡತೆನ್
ಪೂರ ಪಂಡ್‌ದ್ ಈ ಪತೀರುತೆ
ಆದ್ ನಿನ್ನನ್ ಪೊಣ್ಣು ಪೊಂಜೊವು ಕಾಂಡೆ ನೆನೆತೊನಡ್||

8

ಪೊರು ಕಂತ್‌ನಗಪಗ ಮಾತೆರ್
ನಿತ್ತೊ ಮಲ್ಪುನ ಕರ್ಮ ತೀರ್ಪಡ್
ಅಪ್ಪೆ ಕಾರ್‌ಗ್ ಅಡ್ಲೊ ಬೂರುದು ನಾಮೊ ಕೀರ್ತನೆನ್||
ಮಲ್ತದಾನಗ ಆಂಡ್ ಕತ್ತಲೆ
ಪೊತ್ತಯೆರ್ ಎಲ್ಯೊಂಜಿ ತಿಬಿಲೆನ್
ಬುಕ್ಕೊ ಮದಿಮಲೆ ರತ್ನೊ ಕಾಂತಿಡ್ ದಿಂಜ ಬೊಲ್ಪಾಂಡ್ ||

9

ಒಣಸ್ ಮಲ್ತದ್ ಚೆಪ್ಪೆರಾಲೆಗ್
ಪಜೆನ್ ಕೊರೈರೆ ಉಂಡೊ ಅಕ್ಲೆಡ
ಅಕ್ಲೆ ಚೆತ್ತೆರ್ ನೆಲೆಟೆ ಕುಂತಿನ ಕಾರಮುದೆಲ್‌ಡೆನೆ||
ನಿದೆರ್‌ಜೆನೆ ಆ ಪಾರ್ತೆ ಗೆಲ್ತನ
ಕತೆನ್ ಪಲಯಡ ಪಂಡೊನೀಯೆರೆ
ಪುಡೆರ್‌ದಾಯೆನೆ ಕುಲೈ ಲಕ್ಕದ್ ಅಣ್ಣ ಕೈತಲ್‌ಡ್||

10

ಮಾತೆರೆನ್ ಗೆಲ್ತನವೆ ಸಂಗತಿ
ಕೌರವೆರ್ ಪಾರ್‌ನವೆ ಸುದ್ದಿನ
ಸೂತನಾ ಮಗೆ ಸೋಲ್ತನೇನ್‌ಲ ಪಂಡೆ ಇವರಾದ್||
ಮೀನ್ದ ಯಂತೊಗು ಎಂಚ ಹಾಕುನೆ
ಸೋಲ್ಪಯೆರೆ ವೈರಿಲೆನ್ ಮಂತೊದ್ರ
ಬಾಣೊ ಬುಡ್ಪುನ ರೀತಿನಾಯೆನೆ ಪೂರ ಪಂಡೊಂಡೆ ||

11

ಆನೆಲೆನ್ ಪಳಗವುನ ಕೆರಮೊನು
ಕಾಳಗೊಡು ಕುದುರೆಲೆನ್ ನುರ್ಕದ್
ತೇರ್‌ನೇರ್‌ದ್ ಯುದ್ಧೊ ಮಲ್ಪುನ ಮಲ್ಲ ಬಿರ್ಸತಿಗೆ||
ಆಯೆ ಮದಿಮಲೆನೆದುರು ಕೊಚ್ಚಿದ್
ಆನಗಕ್ಲೆಗ್ ಕಣ್ಣ ತೂಂಕ್‌ದ್
ಮಾತೆರ್‌ಲ ನಿದೆರಿಯೆರ್ ಆವೆದ ಕೊಟ್ಟಿದುಲಯಿಡೆನೆ||

12

ಮೀನ್ದ ಯಂತೊನು ಗೆಲ್ತನಾಯೆನೆ
ಏರ್ ಪಂಡ್‌ದ್ ಪಿನಿಯೆರಾದೇ
ಕಾಸ್ಯಪೆರೆ ಒಟ್ಟಿಗೆನೆ ಬತ್ತದ್ ದ್ರುಪದರಾಜ ಮಗೆ||

ಆವೆಕೊಟ್ಟಿದ ಪಿರವು ದೆಂಗ್‌ದ್
ಕಾತ್ ಕುಲ್ಲದು ಇರ್ಲಡರ್‌ಜುನೆ
ಪಾತೆರುನೆನೇ ಕೇನ್ ಮನಸ್‌ಡ್ ಆಂಡ್ ಸಂತೋಸು||

13

ತನ್ನ ಅಮ್ಮಡ ಪಂಡೆನಾಕ್‌ಲ್
ಇರ್ಲ ಸಾಸ್ತೊ ಪುರಾಣೊನೋದುದು
ಚರ್ಚೆ ಮಲ್ಪುನ ವಿಸಯೊನೇನೇ ಕೇಂಡೆ ಕೆಬಿಕೊರು||
ಬಾಣೊ ಬುಡ್ಪುನ ರೀತಿ ನೀತಿನ
ಆನೆ ಕುದುರೆ ಸವಾರಿ ಮಾತೆನ್
ರಾಜನೀತಿನ ಪನ್ನುನೇನ್‌ಲ ಕೇಂಡೆಯಾನಿರ್||

14

ಒಟ್ಟುಗಾ ಕಾಸ್ಯಪೆರ್ ಪಂಡೆರ್
ಬ್ರಹ್ಮ ವಿದ್ಯೆನ್ ಚರ್ಚೆ ಮಲ್ಪುನೆ
ಬ್ರಹ್ಮ ಜ್ಞಾನಿಲು ಆಯಿ ಬೆರಣೆರ್ ಮಾತ್ರೊ ಮಹರಾಜ ||
ಯುದ್ಧೊ ನೀತಿದ ಸುದ್ದಿ ಪನ್ನುನೆ
ಚತ್ತಿಯೆರ್ ನಿಜೊ ಕೃಷಿತ ಗೋವುಲೆ
ರಚ್ಚಣೆನ್ ವೈಸ್ಯೆರ್‌ಲ ಸೂದ್ರೆರ್ ಸೇವೆ ಮಲ್ಪುನೆನ್ ||

15

ಪನುವೆರೇಪೊಲ ಅಕ್ಲೆ ಚತ್ತಿಲು
ನಿಜೊನೆ ಸಂಸಯೊ ಬೊಡ್ಡಿ ಪನ್ನಗ
ದ್ರುಪದೆ ಪಂಡೆನೆ ಮಗಟ ಅಕ್ಲೆನ್ ಲೆತೊನುದೀಡೆ ಬಲ ||
ಮಗೆನೆ ಆವೆದ ಕೊಟ್ಟಿಗೈನೆ
ಅರಸು ಮಲ್ಪಯೆ ಮದಿಮೆದಟ್ಟನೆ
ಬೆರಣ ಏಸೊಡು ಇತ್ತನಕ್ಲೆನ್ ರಾಜ ಮರೈದಿಡ್ ||

16

ಕನತ್‌ನಕ್ಲೆನ ಮೋನೆ ಸೈರೊನು
ನಡಪಿಗತ್ತನ್ ಪೂರ ತೂನಗ
ಅರಸು ಬಾಲೆಲು ಮುಕುಲು ಪಂಡ್‌ದ್ ದ್ರುಪದೆ ತೆರಿಯೊಂಡೆ||
ಮೀಪಯೆರ್ ಪನ್ನೀರ್‌ಲಕ್ಲೆನ್
ಮಾತೆರೆಗ್‌ಲಾ ಪಟ್ಟಿ ತುತ್ತದ್
ಆರತಿನ ಬೆಳಗೆಯೆರ್ ಪೊಣ್ಣುಲು ಪನ್ನ ಸೋಬಾನೆ ||

17

ಕೆಬಿಕ್ ಕುಂಡಲೊ ಪದಕೊ ಮಾಲೆನ್
ಬಿರೆಲ್‌ಗುಂಗಿಲೊ ಮಾತ ಪದ್ವೊಯಿ
ಸರಿಟ್ ಒಪ್ಪದ್ ಗಂದೊ ಕಸ್ತುರಿ ಮೇಲ್ನ್ ಪೂಜಯೆರ್ ||

ಮುಂಡೊಗೇ ಬಾಸಿಂಗೊ ಕಟ್ವೆದ್
ಮಂಟಪೊಡು ಪಾಡ್ಡಿತ್ತಿ ಹಾಸ್‌ಡ್
ಸಂಬ್ರಮೊಡು ಐವೆರ್‌ಲ ಕುಲ್ಲ್‌ನ ತೂದುಲಾಚಿರೊಡು||

18

ಮದಿಮಯೆನೆ ಒರಿ ಮಾತ್ರೊ ಕುಲ್ಲನೆ
ಮದಿಮೆದಾ ಮಂಟಪೊಡು ಐವೆರ್
ಸರಿಟ್ ಕುಲ್ಲನೆ ದಾಯೆ ಕೇಂಡೆನೆ ಕಾಸ್ಯಪೇರಡೆನೆ||
ಮನಿಪಡಯ ಮಹರಾಜ ಅಕ್‌ಲೆನೆ
ರಿವಜಿಡುಂಡೊಡೊ ಇಂಚ ಪಂಡ್‌ದ್
ಮದಿಮಯನ್ ಹೋಮೊದಡೆ ಲೆತ್ತೆರ್‌ಲಾ ಪುರೋಯಿತೆರ್||

19

ಆಪಗನೆ ಐವೆರ್‌ಲ ಕುಲ್ಯೆರ್
ಹೋಮೊ ಕುಂಡೊದ ಎದುರು ಒಟ್ಟಿಗೆ
ಈ ವಿಚಿತ್ರೊನು ತೂದು ರಾಜೆನೆ ಕೋಪೊದೊಸೊಯಾದ್||
ದಾರೆ ಮಯ್ವೆರೆ ಪತ್ತಿ ಕಲಸೊನು
ಪಾಡ್ಯೆ ಕಂಕಣೆ ಬುಕ್ಕೊ ಅಕ್‌ಲೆನೆ
ತೂದು ಕೇಂಡೆನೆ ಏರ್ ಪನಿ ನಿಕ್‌ಲ್‌ಂದ್ ಎನ್ನಡೆನೆ||

20

ದೇವತೆಲೊ ರಕ್ಕಸೆರೊ ಬುಜಗೆರೊ
ಊರುದರಸುಲೆ ಬಾಲೆಲಂದ್‌ಡ
ಸೀದ ಸತ್ಯೊನು ಪನ್‌ಲೆ ನರಮನಿನಕ್‌ಲ್ ನಿಕ್‌ಲತ್ತ್||
ಯಾನ್ ಧರ್ಮಜಿ ಇಂಬ್ಯೆ ಬೀಮೆನೆ
ಆಯೆನರ್ಜನೆ ಎಲ್ಯಕ್‌ಲ್ ಸಹ-
ದೇವನಕುಲೆರ್ ಪಂಚ ಪಾಂಡವನಕ್‌ಲ್ ಎಂಕುಲುಯೆ ||

21

ಈರೆ ಮಗಲೆಗ್ ಎಂಕುಲೈವೆರ್-
ಲಾತೊನೇ ಕಂಡನಿಲು ಪಂಡ್‌ದ್
ಆ ಯುದ್ಧಿರೆ ಕಾರ್ ಪತ್ತಿಯೆ ತನ್ನ ಸಮ್‌ಲೆನ||
ಪತ್ತಿ ಕಾರ್‌ನ್ ಕುಡ್ತು ನೂಕುದು
ಹಸ್ತಿನಾವತಿದರಸು ಮನೆತನೊ
ಗಿತ್ತೆ ಕೊರತೆನ್ ಮಲ್ತರತ್ತೊಯ ಪಂಚ ಪಾಂಡವೆರ್ ||

22

ಒರಿಯಗೇತ್‌ಲ ಪೊಣ್ಣುಲುಲ್ಲೆರ್
ಒರಿಯೆ ಕಂಡನಿ ಒರಿ ಪೊಣ್ಣಗ್
ಸಿವ ಸಿವಾ ಕಂಡನಿಲು ನಾಲೈನುಂಡೊ ಪನ್‌ಲೆನಡ||

ಲೋಕೊ ಸಲ್ಮತೊ ಅತ್ತ್ ಸಾಸ್ತೊದ
ರೀತಿ ನೀತಿಗ್‌ಲತ್ತ್ ದುಸ್ತೆರ್
ಕಾಮೊ ಮೋಹೊಗು ತಿಕ್‌ದ್ ಬೂರೈರೊ ನಿಕ್‌ಲ್ ಸೋದರೆರ್||

23

ಪಾಂಡು ಬಾಲೆಲು ಧರ್ಮೊನಿಸ್ತೆರೆ
ಯಾನ್ ಪನ್ನುನ ಕೇನ್ನೆ ನಿಕ್‌ಲೆಗ್
ದಾನೆ ಆತ್‌ನೆ ಕೌರವಾದಿಲು ಮಾಟೊ ಮಲ್ತೆದೊ ||
ಕಾಮೊ ಮೋಹೊಗು ತಿಕ್‌ದ್ ಬೂರಯೊ
ಸಾಸ್ತೊ ಧರ್ಮೊನು ಮೀರ್ಡ್ ನಡಪಯೊ
ಪಾಂಡು ರಾಜನ ಬಾಲೆಲೆಂಕುಲು ಕುಟುಮೊ ಕುರುಕುಲೊತ||

24

ಅಪ್ಪೆ ಪಾತೆರೊ ಮೀರೈರಾವಂ-
ದೆನ್ನಿ ತತ್ತೊನು ತೆರಿದ್ ಆಯಿನೆ
ಪೊಣ್ಣೊನೊರ್ದಿನ್ ಐವೆರೆಂಕುಲು ಪಂಡಿ ಪಾತೆರೊಗು ||
ಉತ್ತರೊನು ದಾನೆಂದ್ ಕೊರ್ದುನೆ
ನೆರ್ದುನೆನೊ ಅಕ್‌ಲಪ್ಪೆ ಪರಬುನು
ಇತ್ತೆ ಮಲ್ಪುನೆ ದಾನೆ ಪಂಡ್‌ದ್ ತರೆಕ್ ಹಾಕೊಂಡೆ||

25

ಆತ್ ಪೊರ್ತುಗು ವೇದ ವ್ಯಾಸೆರ್
ಸೀದ ಬತ್ತೆದ್ ಉಂತ್‌ನಾಪಗ
ಮಾತೆರ್‌ಲ ಕಾರ್ಗಡ್ಲೊ ಬೂರೈರ್ ಮುನಿನ್ ಕೊಂಡಾಡ್||
ಸ್ವಾಮಿ ಈರೆನ್ ಯಾನ್ ನಂಬುನ
ದೇವೆರೇ ತರ್ಪಯಿನ ಎನ್ನವೆ
ಪೂರ್ವೊ ಕರ್ಮೊದ ಕಸ್ಸೊ ಪರಿಯರೊಗ್‌ಂದೆನಾ ದ್ರುಪದೆ||

|| ವೇದವ್ಯಾಸೆರ್ ದ್ರೋಪದಿಗ್ ಮದಿಮೆ ಮಲ್ಪಯೆರ್ ||

ರಾಜ ದ್ರುಪದೆನೆ ರಾಣಿನೊಟ್ಟುಗು
ಪಾದೊ ಪೂಜೆನ್ ಮಲ್ತದಾದ್‌ಲ
ಸ್ವಾಮಿ ಈರೇ ಎನ್ನ ಬಾಗ್ಯೊಡು ಈಡೆಗೆತ್ತಿಯರ್||
ಪಾಂಡು ಬಾಲೆಲು ಮುಕುಲು ಐವೆರ್
ದ್ರೋಪದಿನ್ ಕೈ ಪತ್ತುನೆಗೆ ನನ
ಯಾನ್ ಒಪ್ಪುನೆ ಎಂಚ ಧರ್ಮೊಗು ಮೀರಿ ನ್ಯಾಯೊಲೆಗ್ ||

1

ಜೋಕ್ಕು ಮುಕುಲೆಗ್ ಬುದ್ಧಿ ಪಂಡ್‌ದ್
ದೋಸೊ ಕಾರ್ಯೊನು ಬುಡ್ಡವೊಡು ಮಹ-
ಸ್ವಾಮಿ ಈರೇ ಪನ್ದ್ ಕಾರ್‌ಗ್ ಬೂರೈನಾ ದ್ರುಪದೆ||
ಕಾರ್‌ಗಡ್ಡೊನೆ ಬೂರೈ ದ್ರುಪದನ್
ವೇದವ್ಯಾಸೆರ್ ಲಕ್ಕದುಂತದ್
ಪಾಂಡು ಬಾಲೆಲೆ ತರೆಕ್‌ಲಾ ಕೈ ದೀಡ್ಡ್ ದ್ರೌಪದಿನ ||

2

ತರೆನ್ ಈಸ್ದಲಾ ಅರುಂದತಿ
ಲೆಕೊನೆ ಮಯಿಮೆದ ಯೋಗೊ ಬಾಗ್ಯೊನು
ಪಡೆದ್ ಪುಟ್ಟೆನ್ ಮಗಲ್ ಕೇನ್‌ಲೆ ಜಲ್ಲೊದಾ ಕತೆನ್ ||
ಪಾಂಡು ಬಾಲೆಲು ಅಪ್ಪೆ ಪಾತೆರೊ
ಮೀರಿಯೆರೆಗಾವಂದೆ ಒತ್ತೆನ್
ಕಾರಣೊನೆ ಈ ಕತೆಟ್ ಉಂಡುಯ ಕೇನ್ ಮಹರಾಜ ||

3

ಮೋಲು ನಾರಾಯಣಿಯೆ ಪನ್ನುನ
ಬಾರಿ ಪೊರ್ಲುದ ಪೊಣ್ಣು ದುಂಬುಡು
ಆದ್ ಇತ್ತಲ್ ಆಲೆ ಕಂಡನಿ ತಪಸ್ ಮಲ್ಪುನಯೆ||
ತನ್ನ ಕಂಡನಿ ಮಲ್ಲ ದೆಯ್ಯೊನೆ
ಪನ್ನಿ ಬಗ್ಗಿಡ್ ಸೇವೆ ಮಲ್ತೊಂ-
ದಿತ್ತಲಾಯನ ಎಡ್ಡೆ ತನೊನೇ ದಿನೊಲ ಪುಗರೊಂದು ||

4

ಮುನಿಕ್ ಮದಕರಿ ರೋಗೊ ತಾಗ್‌ದ್
ಕುರಿದ್ ಕುರ್ತೆಲ್ ಆಂಡಲಾಯನ
ಬುಡೆದಿ ಮಲ್ಪುನ ಸೇವೆ ಮಲ್ತಲ್ ಸುದ್ಲೊ ಬಾವನೆಡ್||
ರುಸಿಯೆ ಆಲೆನ ಸೇವೆ ಮೆಚ್ಚಿದ್
ವರೊನು ಕೊರೈರೆಗಾದ್ ಪರಿಸೊನು
ನನಲ ಮಲ್ತೊಡು ಪನ್ನಿ ಏಚನೆಡುಪ್ಪುನಾಪಗನೆ ||

5

ಉಣುಪಿ ಬಟ್ಟಲ್‌ಗವುಲೆ ಆಯನ
ಬಿರೆಲ್ ತಾಲ್‌ದ್ ಬೂರೈಗೈನಾಲ
ಬರಿಟ್ ಒಂದದ್ ಮಡೆನ್ ತಿನ್ನಗ ಮುನಿಯೆ ತೂವೊಂಡೆ ||
ಬಾರಿ ಸಂತೊಸು ಪಡೆದ್ ಆಲೆಡ್
ಕೇಂಡೆನೇ ನಿಕ್ಕೆಂಚಿನಾ ವರೊ
ಬೋಡು ಪನ್ ಪನ್ ಪನ್ನಗಾಲೇ ಪನ್ನಲಾಪಗನೆ ||

6

ಪೊರ್ಲುದಾ ರೂಪಾದ್ ಎನ್ನವೆ
ಜವ್ವನೊದ ಈ ಸೈರೊ ಸುಕೊನುಲ
ಇತ್ತೆ ಪಡೆಲೆಯೆ ಈರ್ ಪನ್ನಗ ರುಸಿಯೆ ಪೊರ್ಲಾದ್||
ಇರೈರ್‌ಲ ಸರಿ ಕಾಮನಾಟೊದ
ಗೊಬ್ಬು ಗೊಬ್ಬುದು ಎಡೆನೊ ಬೊಡಿಯೆರ್
ಬುಕ್ಕೊ ದುಂಬುದ ರೂಪೊನಾಪೆಂದಾಯೆ ಪನ್ನಗನೆ||

7

ಬೊಡ್ಡಿ ಬೊಡ್ಡಿಂದಾಲ್‌ಲಾಯನ
ತೊಟ್ಟು ಪತ್ಯಲ್ ಬುಡಯೆ ಪಂಡ್‌ದ್
ಮಲ್ಪುನಾ ಹಟೊ ತಡೆಯೆರಾಯಿಜಿ ಕೋಪೊಡಾರುಸಿಯೆ||
ಚತ್ತಿ ಜಾತಿದ ಪೊಣ್ಣು ಆದೇ
ಪುಟ್ಟೆಲಯ ಈ ಪನ್ನಿ ಸಾಪೊನು
ಕೊರ್ರು ಪೋಯೆನೆ ಮುನಿ ತಪಸ್‌ಗ್ ಜಾಗೆ ನಾಡೊಂದು ||

8

ತಾನ್‌ಲಾ ದೇವೆರೆನ ತಪಸ್‌ನ್
ಕಾಡ್‌ಡೇ ಮಲ್ತೆಂದ್ ಪೋಯಲ್
ಜಾಗೆ ನಾಡ್‌ದ್ ಕುಲ್ಯಲಲ್ಪನೆ ತಪಸ್ ಮಲ್ತೆರೆಗ್
ಏತೊ ದಿನೊ ತಿಂಗೊಳುಲ ಒರ್ಸೊಲ
ಆಂಡಲಾ ಸಿವೆನೊಲಿದ್ ಬತ್ತೆಜೆ
ಪಾಪೊದಾ ಈ ಪೊಣ್ಣು ಕಂಗಲ್ ಆದ್ ಬಚ್ಚಿಯಲ್ ||

9

ನುಪ್ಪು ನೀರ್‌ನ್ ಬುಡುದು ಗಾಳಿನ್
ಒಯ್ಪಿದಲ್ ಬುಡ್ಡೆದಲ್ ಮೂಂಕುಡೆ
ಕಸ್ತೊ ಆಂಡಲ ತಪಸ್ ಬುಡ್ಡಲೆ ಆ ಸದಾಸಿವೆನೆ||
ಸತ್ಯೊ ಸುಂದರ ರೂಪೊಡುಂತಿಯೆ
ನಿತ್ಯೊ ತಪಸ್‌ಡ್ ಕಂಗಲಾಯಿನ
ಪೊಣ್ಣನೆದುರುಡುಲಪಗ ಕಣ್ಣೆನ್ ಬುಡ್ಡು ತೂನಗನೆ||

10

ಆ ಸದಾಸಿವೆನೊಲಿಯೆ ಪಂಡ್‌ದ್
ಕಾರ್‌ಗಡ್ಡೊನೆ ಬೂರೈ ಪೊಣ್ಣನ್
ದೇರ್ತ್ ಲಕ್ಕದ್ ಚಂದ್ರ ಸೇಕರೆ ಕೇಂಡೆನಾಲೆಡನೆ||
ದಾಯೆ ತಪಸ್‌ನ್ ಮಲ್ತ ನಿಕ್ಕೇ
ಬೋಡಯಿನ ವರೊ ಎಂಚಿನವು ಪನ್
ಆಪಗನೆ ಕೇಣಿಯೊಲು ಸಿವಡನೆ ತನ್‌ಕ್ ಕಂಡನಿನ್

11

ಕೊರ್ದೆ ದೇವೆರೆ ಕಂಡನೀಯನ್
ಕೊರ್ದೆ ಕೊರ್ದೆಂದಾಲ್ ಕೇಂಡಲ್
ಸರ್ತಿ ಐನ್‌ಲ ಆನಗಾ ಸಿವೆ ಆಂಡ್ ಆಂಡ್‌ಂದ್||
ನಿನ್ನ ಆಸೆಲು ಮಾತ ಫಲಿಸಡ್
ಐನ್ ಸರ್ತಿಲ ಪಂಡಿನೇಟ್‌ಲ
ಐನ್ ಕಂಡನಿನಕ್‌ಲ್ ಆವೆರ್ ಪನ್ನಿ ವರೊ ಕೊರ್ದೆ||

12

ಅಯ್ಯೊ ದೇವೆರೆ ಯಾನ್ ಮಲ್ತನ
ತಪ್ಪು ಎಂಚಿನ ದಾಯೆಗೀವರೊ
ಕೊರ್ದೆ ಸಿವ ಸಿವ ಪನ್ದ ಬುಲ್ಪುನ ಪೊಣ್ಣಗಾ ಸಿವನೆ||
ಪೋಡ್ಯಡಯ ಈ ನನದ ಜಲ್ಲೊಡು
ವೇದೊ ಸಲ್ಮತೊದಂಚ ಮದಿಮೆನೆ
ಆದ್ ಲೋಕೊಡು ಈ ಪತೀರುತೆ ಪನ್ನಿ ಪುದರಾವು ||

13

ನಿನ್ನ ಕತೆನೇ ಪುಣ್ಯೊದಾ ಕತೆ
ನಿನ್ನ ಚರಿತೆನೆ ಪುಣ್ಯೊ ಚರಿತೆಲ
ನಿನ್ನ ಪುದರ್‌ನ್ ಪನಡ್ ಮುತ್ತೇಸಿಲುಲ ದಿನೊ ನಿತ್ಯೊ||
ಹರಿಯೆ ನಿನ್ನವೆ ಮಾನೊ ಕಾಪುವೆ
ಎತೆನ್ ಮಲ್ಪಡ ಪನ್ದಲಾ ಸಿವೆ
ತರೆನ್ ಪೂಜಿದ್ ಮಾಯಕಾಯೆನೆ ನಿಕ್‌ಲೆಗರ್ತಾಂಡೊ||

14

ಸಿವನ ನುಡಿಯೇ ವೇದೊ ಸಲ್ಮತೊ
ಸಿವನೆ ಸತ್ಯೊನೆ ಸತ್ಯೊನೇ ಸಿವೆ
ಸಿವನೆ ಮಾಜವೆ ಬ್ರಮ್ಮ ಬರವುನು ಆಯೆ ಸರ್ವೇಸೆ ||
ಸಿವನ ಬರವುನು ಮಾಜಯೆರೆ ಇನಿ
ಹರಿಗ್ ತೀರುವೊ ಬ್ರಮ್ಮಗಾವೊಯ
ಸರಿಟ್ ಗ್ರೇಯ್ಪುಲ ದ್ರುಪದ ನಿನ್ನವೆ ಮಗಲ್ ಏರ್‌ಂದ್ ||

15

ಅಂಚ ಇಂಬಲೆಗೈವೆರಾಯೆರ್
ಕಂಡನೀಯೆರ್ ಸಿವನ ಆಚ್ಚೆಡ್
ಚಿಂತೆ ಬುಡು ಪಾಂಡವೆರೆ ಕತೆನಲ ಕೇನ್ ಮಾರಾಜ ||
ಸಂಕರನ ಸಾಪೊಡುಲ ಇಂದ್ರನೆ
ದುಂಬು ಬೊಳ್ಳಿದ ಗುಡ್ಡೆದಾ ಬರಿ-
ಟೊಂಜಿಗಮಿತಾ ಉಲಯಿದೆಂಗ್‌ದ್ ಇತ್ತೆ ಯುಗೊ ಯುಗೊಟು ||

16

ತಾನ್ ಓಲುಲ್ಲೆಂದ್ ಮರತ್‌ದ್
ಆನಗನೆ ಆಡೆಗ್‌ಲ ಬತ್ತ್‌ದ್
ಸೇರಿಯೆನೆಲಾ ಬುಕ್ಕೊದಿಂದ್ರನೆ ಐನ್ ಸರ್ತಿಡ್‌ಲಾ||
ಬೇತೆ ಬೇತೆನೆ ಐವೆರಿಂದ್ರೆರ್
ಸೇರ್‌ದಿತ್ತೆರ್ ಸಿವನ ಕೋಪೊಡು
ಆಕ್‌ಲೆನ್ ಬುಡ್ಡಯಲ್ ದೇವಿಯೆ ಆಂಡಲಾ ಸಿವನೆ ||

17

ಕೋಪೊಡಕಲೆಗ್ ಪಂಡೆ ಪಿಸ್‌ರಾಡ್
ಊರುದರಸುನ ಬಾಲೆಲಾದೇ
ಸೋದರೆರ್ ಆವೊಂದು ಪುಟ್ಟುಲೆ ನನದ ಜಲ್ಲೊಡುಲ ||
ನಿಕ್‌ಲೆಗಾವಡ್ ಒರಿ ಬುಡೆದಿಯೆ
ಪನ್‌ಪಿ ಸಾಪೊನು ಕೊರ್ದೆಗಾಕ್‌ಲ್
ಸಿವನ ಕಾರ್‌ಗ್ ಬೂರು ಬುಲ್ತೆರ್ ಹರಹರಾ ಪನ್ದೊ ||

18

ನರಮನಿಯೆರಾವೊಂದು ಪುಟ್ಟುನ
ಪರಮ ಕಸ್ತೊನೆ ಬುಡೆದಿ ಐವೆರೆ-
ಗೊರುತಿ ಆಂಡನೆ ಬದುಕುನೆಂಚನೊ ಸ್ವಾಮಿ ಸರ್ವೇಸಾ||
ಕರುಣೆ ದೀಡ್‌ದ್ ಕೊರ್ನ ಸಾಪೊಗು
ಪಿರಿಯೆ ಮಲ್ಪೊಡು ದೇವೆರೆಂಕ್ಲೆಡ
ಮುನಿಯಡೆಂದ್‌ದ್ ಬುಲ್ತ್ ಬುಲ್ತ್‌ದ್ ಕಾರ್ ಪತ್ತಿಯೆರ್ ||

19

ಕಾರ್‌ಗಡ್ಡೊನೆ ಬೂರ್‌ನಕ್‌ಲೆಗ್
ಪ್ರೀತಿಡೇ ಸಿವೆ ಪನ್ನೆ ಮುನಿನವೆ
ಸಾಪೊ ತಿಕ್ಕನ ಬುಡೆದಿ ತಪಸ್‌ಡ್ ವರೊನು ಪಡೆಯಿನಲ್
ಆಲೆ ನಿಕ್‌ಲೆನ ಬುಡೆದಿಯಾಪುನೆ
ಸಾಸ್ತ್ರೊ ಸಲ್ಮತೊದಂಚ ನಿಕ್‌ಲೆನ್
ದೂರುನಾಕ್‌ಲ್ ನರಕೊ ಗುಂಡಿಗ್ ಬೂರು ಪುರೆಲುವೆರ್ ||

20

ಸಿವನೆ ಪಂಡ್‌ದ್ ಮಾಯಕಾಯೆನೆ
ಮುಕುಲು ಪುಟ್ಟಿರ್ ರಾಜ್ಯೊನಾಳುನ
ಅರಸು ಬಾಲೆಗುಳಾದ್ ಐವೆರ್ ಹಸ್ತಿನಾವತಿಡ್ ||
ದ್ರುಪದ ತೂಲಯ ನಿನ್ನ ಮಗಲೆನ

ಕಯಿನ್ ಪತ್ತುನೆ ಏರ್ ಪನ್ನುನ
ತೆರಿಯೆರೆನೆ ಸರಿ ಗೇನೊ ದಿಸ್ಪಿನ್ ಕೊರ್ಪೆ ತೂವೊನುಲ ||

21

ದಿವ್ಯೊ ತೇಜಿಡ್ ಸೈರೊ ಮೆಣ್ಣ್ಕಾದ್
ಕಣ್ಣೆಗಾಂಜಿನ ಪೊರ್ಲು ಪದ್ವೊಯಿ
ತುತ್ತುದಿತ್ತನ ಜರಿತ ಕುಂಟು ಕಿರೀಟೊ ರತ್ನೊದವೆ ||
ಸರೊ ಸುಂದರೊ ರೂಪೊಡಾಕ್ಲ್
ಐವ್ವೆರೊಂಜೇ ಎರಕೊಡಾಯಿನ
ಪೊರ್ಲು ಪುತ್ನೊಳಿ ನಗೊತ ನಮನೆಡೆ ಸಾಲ್ಡುಂತಿಯೆರ್ ||

22

ತೂದು ಬಿಂಗಿರಿಯಾಯೆ ಮನಸ್ಡ್
ಬಾವೊ ಉರ್ಕರ್‌ದಪಗ ಚಿಂತೆನ್
ಪೂರ ಕಳೆಯೆನೆ ಸಂತೊಸುಡು ಮೆಯಿ ಮರ್ಲ್‌ಲಾಂಡಯಗ್ ||
ತೂಯನಯ ಸರಿ ಮುಕುಲು ಇಂದ್ರೊ

ಆ ನರೇಂದ್ರೊ ಪನ್‌ಲ ಸಂಸಯೊ
ದಾಲ ದೀವಂದಿತ್ತೆ ಪೊರ್ಲುಡೆ ತೂದು ತೆರಿಯೊನುಲ ||

23

ದೇವೆರೇ ಈರಾದ್ ಬತ್ತರ್
ಬಾಗ್ಯೊಡೆನ್ನವೆ ಪುನ್ಯೊಡೆಂದ್
ಈರೆ ಪಾತೆರೊದಂಚ ನಡಪುವೆ ಪನ್ದ್ ಪುಡ್ಯಾಡ್ಯೆ||
ದಾರೆ ಮಯ್ತಾದ್ ಕೊರ್ಲ ಮಗಲೆನ್
ಲಾಜ ಹೋಮೊನು ಮಲ್ತೆ ಕಾಸ್ಯಪೆ
ಯಾನ್ ಕರ್ಯಣಿ ಕಟ್ಟವೆನೆ ಸಿರಿ ಮಂತ್ರೊದರಿ ಪಾಡ್||

24

ದ್ರುಪದರಾಜೆನೆ ಮಗಲೆ ಮದಿಮೆನ್
ಮುನಿಕುಲೆದುರುಡು ರಾಜರಾಜೆರೆ
ಸಬೆನ್ ಕೂಡ್ಲದ್ ಬಾರಿ ಗಡ್ಡ್ಡ್ ಮಲ್ತೆ ಸಂತೊಸುಡು ||
ಮದಿಮಲೆಗ್ ಮದಿಮಾಯನಕಲೆಗ್
ಮುನಿಕುಲೆನ ಗುರು ವೇದವ್ಯಾಸೆರ್
ಕರುಣೆಡಾಸೀರ್ವಾದೊ ಮಲ್ತಾದ್ ಪೋಯೆರಲ್ಪಡ್ ||

ನಾಲನೆ ಸಂದಿ

|| ದ್ರೌಪದಿನ ಮದಿಮೆದ ಸುದ್ದಿ ಊರೊರೈ ||

ದ್ರೌಪದಿನ್ ಪಾಂಡವೆರ್ ಮದಿಮೆನೆ
ಆದ್ ಸಮ್ಲೆನರಮನೆಡ್ ಸುಕೊ
ಸಾಗರೊಡು ಮೀಂದೊಂದು ಇತ್ತೆರ್ ಅಪ್ಪೆನೊಟ್ಟಿಗೆನೆ ||
ಆನಿ ಸೋಲ್ತುದು ಪೋಯಿನರಸುಲೆ-
ಗೇರೊ ಪಂಡೆರ್ ಬ್ರಾಣೆರೈವೆರ್
ಆಯಿನೆಗೆ ಮೆಗಿ ಪಲಯನಾಕ್ಲ್ ಒತ್ತಿನೇ ಪನ್ದ್ ||

1

ದಾರೆ ಮಯ್ತಾದ್ ಕೊರ್ನ್ ಅಮ್ಮಗ್
ಮಂತ್ರ ದಾದನೊ ಮಲ್ತೆರತ್ತಡ
ಬ್ರಾಣೆರೇ ಕೈಕಂಜಿಲಾಯೆರೊ ಬಾರಿ ಆಚಿರೊನೆ ||
ಏರೆಗಲ ಆ ಬಿರುನು ದೇರ್ಪೆರೆ
ತೀರಂದುಪ್ಪೆರೆ ದಾನೆ ಕಾರಣೊ
ಮಾಟೊ ಮಂತ್ರೊದ ಸಗ್ತಿದಾ ಬಲೊಟಂದ್ ಕಂಡಿತೊನೆ ||

2

ಸುದ್ದಿ ಕೇಂಡ್ ಕೌರವಾದಿಲು
ಒರಿ ಪೊಣ್ಣನ್ ಆಣುಲೈವೆರ್
ಒಟ್ಟು ಸೇರ್‌ದ್ ಮದಿಮೆ ಆನಗ ಕೇನುನಕಲಿದ್ಯೊ ||
ಚಕ್ರವರ್ತಿಲೆ ಸ್ತಾನೊ ದಾದೆಕ್
ನೆನ್ನ ಕೇನ್ನಿಡ ಹಸ್ತಿನಾವತಿ
ಮರ್ಯದಿಗ್ ಕೊರತೆಂದ್ ಕರ್ಣನ್ ಜಯದ್ರತಾದಿಲೆನ್ ||

3

ಲೆಪುಡದಾ ಕೌರವೆನೆ ಸೇನೆಗ್
ಕೊರಿಯೆನಾಜ್ಞೆನ್ ದ್ರುಪದ ನಗರೊಗು
ಪಡೆನ್ ನುರ್ಕದ್ ಮದಿಮೆ ಆಯಿನ ಬ್ರಾಣೆರೈವೆರೆನೆ ||
ತರೆನ್ ಗೀಸದ್ ನಟ್ಟ್ ತಿನಿಯೆರೆ
ಕಡಪುಡುದು ಆ ಪೊಣ್ಣ ನೀಡೆಗ್
ಕನಲೆ ನಮ್ಮವೆ ಬುಡೆದಿಯಲ್ಲೆನ ಚಾಕ್ರಿಗುಂತಾಗೊ ||

4

ನಾಲ್ ನಮನೆದ ಸೇನೆ ಪಿದಡ್ಡಾದ್-
ಲಾನಗನೆ ಜಯೊ ಬೇರಿ ಸೌದೊಡ್ಡು
ಕೇನುನಾ ಕೆಬಿ ಪೊಟ್ಟು ಕಟ್ವಾದ್ ಆಂಡ್ ಗಿರಿಗಿಮ್ಮು ||
ರಾಜ ದ್ರುಪದನ ರಾಜ್ಯೊದಾಗಡಿ
ಜಾಗೆ ನಾಡ್ ಪೂರ ನುಕ್ಯೆರ್
ಬೀಮ ಪಾತೆರೆ ನೋತು ನೋತುದು ಕೆರ್ಡ್ ಪಾಡಿಯೆರ್ ||

5

ಒರಿನಕ್ಲ್ ಪಾರಿಯೆರ್ ಕೆಲವೆರ್
ತರೆನ್ ತಗ್ಗದ್ ದಕ್ಯೆರಾಯುದೊ
ಕೆಲವುದಾಕ್ಲ್ ಬಲ್ತಿ ಜಾಗೆಡೆ ಪಂತಿ ಕೊಡಿಪಂದ್ ||
ಗೇಲ್ದಾ ಎದೋಲು ಬೊಟ್ಟಯೆ
ರಾಜ ದ್ರುಪದನೆ ವೈರಿನಾಸೊದ
ಬಾರಿ ಸಂತೊಸುಡಿತ್ತಿ ಸುದ್ದಿಲ ಆಂಡ್ ಊರೂರು ||

6

ಪಾಂಡವೆರ್ ದ್ರೋಪದಿನ್ ಆಯೆರ್
ಪಾತೆನೇ ನಿಜೊ ಯಂತ್ರೊ ಗೆಲ್ತನೆ
ಬ್ರಾಣೆರೆನ ಏಸೊಡುಲ ಅಕ್ಲೆನ ಗುರ್ತೊ ಆಯ್ವಿಂದ್ ||
ಊರುಡೊರೆಲ ಸುದ್ದಿ ಆನಗ
ಪಾಂಡವೆರ್ಲಾ ಪೊದ್ದೆರರಮನೆ
ಸೂರ್ಯ ತೇಜಿಡ್ ಬೆಳಗಯೆರ್ ನಿಜೊ ಗುಣೊಕು ಮಚ್ಚೆರೊನೊ ||

7

ಆಡೆಗೇ ಸಿರಿಕ್ರಿಷ್ಟೆ ಯಾದವ
ವೀರೆರೆನ್ ಕೂಟೊಂದು ಬನ್ನಗ
ಪಾಂಡವೆರ್ ಕೈ ಮುಗಿದ್ ಉಲಯಿಡ್ ಕುಲ್ಲದಾನಗನೆ ||
ರಾಜ ದ್ರುಪದಲ ರಾಣಿನೊಟ್ಟಿಗೆ
ಕಾಣೆಗಿನ್ ಕಾರ್ಡವುಲು ದೀಡ್ಡಾದ್
ವಾಸುದೇವನ ಸುತಿನ ಮಲ್ತನೆ ಬಗ್ಗಿ ಬಾವನೆಡ್ ||

8

ಆ ಮುರಾರಿಯೆ ಕನತಿ ಉಡಿಗಿರೆ
ಮಾತ ಕೊರೈನೆ ಬಾವನಕ್ಲೆಗ್
ದ್ರೋಪದಿಗ್ ಪೊಸ ಪಟ್ಟೆ ಸೀರೆನ್ ಕೊರ್ದು ತರೆ ಪೂಜ್ಯೆ ||
ಮಾಮಿ ಕುಂತಿನ ಕಾರ್ ಪತ್ತನ್-
ಗಾಲ್ ಪಂಡಲ್ ತನ್ನ ಬಾಲ್ಡೆಡ
ಈ ಮಹಾತ್ಮನೆ ಎನ್ನ ಪಲಯನ ಮಗನೆ ಸಿರಿಕ್ರಿಷ್ಟೆ ||

9

ದೇವಕೀ ವಸುದೇವನಕ್ಲೆಗ್
ಬೂಮಿ ದಿನೊನು ತಗ್ಗಯೆರೆನೇ
ಆದಿ ನಾರಾಯಿಣನ ಎನ್ನನೆ ಸರ್ತಿವತಾರೊ ||
ಬಾಲೆಲೆಡ ಸಿರಿಕ್ರಿಷ್ಟ ಪಾದೊಗು
ನೀಟೊ ಬೂರೈರೆ ಪನ್ದ ಪಂಡಲ್
ಕಾಪೊಡೀಯೇ ಎನ್ನ ಜೋಕ್ಲೆನ್ ಕಣ್ಣೆನುದೊಂದ್ ||

10

ಮುಕುಲೆ ಅಮ್ಮೆನೆ ಕಾಡ್ಡ್ ತೀರೈರ್
ಮುನಿಕುಲೆನ ಆಸ್ರಮೊಡು ಉಪ್ಪುನ
ಸಮೊನೆ ಅತ್ತಂದೇನ್ ಬತ್ತನೆ ಹಸ್ತಿನಾವತಿಗ್ ||
ಅವುಲು ಬೀಸೈರ್ ಸಾಂಕ್ಯೆರೆಂಕ್ಲೆನ್
ಕುರುಡ ಬಾವನ ಜೋಕ್ಲು ಕೌರವ-
ನಕ್ಲ್ ಅರಕ್ದ ಇಲ್ಲೆಡೆಂಕ್ಲೆನ್ ಸುಡುದು ಕೆರೊಡುಂದು ||

11

ಸೂನು ಕೊರೈರ್ ಆಂಡ ಎಂಕುಲು
ದೇವೆರೆನ ದಯೊಟಪಗ ಸೈತ್ಯಾಚೊ
ಕಾಡ್ ತಿರ್ಗದ್ ನಟ್ವೆ ತಿಂದೊನೆ ಬದ್ಕದಿತ್ತನೆಟ್ ||
ದಾನೊ ಜೋಕುಲು ಪುಟ್ಟಿಯೋಗೊಡು
ರಾಜ ದ್ರುಪದನ ಮಗಲೆನಾಯೆರ್
ಈಯೆ ಬತ್ತನೆ ನಿನನ್ ತೂಪುನ ಬಾಗ್ಯೊ ಎಂಕಾಂಡ್ ||

12

ಮಾಮಿ ದಾಯೆಗ್ ಇಂಚ ಪನ್ನರ್
ಈರೆ ಜೋಕುಲು ದೂರೊದಾಕ್ಲೊ
ಬಾವನನಿಕ್ಲತ್ತೊ ದ್ರೌಪದಿ ಎಂಕ್ ತಂಗಡಿಯೆ ||
ಈ ಸರೀರೊದ ಪೆರಣೊದುಸುಲುನು
ಕಾಪುನಂಚೆನೆ ಈರೆ ಬಾಲ್ಡೆನ್
ಯಾನ್ ಕಾಪುವೆ ಪನ್ದ ಕ್ರಿಷ್ಟೆನೆ ಕೊರೈ ಬರವಸ್ನ್ ||

13

ದ್ರುಪದೆ ಮಂಗಲ ವಾದ್ಯೊನುರಿಪಯೆ
ಸಬೆನೆ ಸೇರ್ದ್ ಹರಿನ ಕೀರ್ತನೆ
ನಲಿಕೆ ನಲಿತ್ದ್ ಬಚ್ಚೆರೆತಲ ಅರಸು ಪರಿವಾರೊ ||
ಮುಗಲ್ ನುರ್ಕುದು ಸೂರೈ ಪಡ್ಡೊಯಿ
ಕಡಲ್ದಾಯೆರೆ ಪೋಪಿ ನಮನೆದ
ಕಿರಣೊದಂಚೆನೆ ಪಾಂಡು ಬಾಲೆಲು ಔಲು ತೋಜಿಯೆರ್ ||

14

ಎದುರು ಧರ್ಮಜೆ ಬೀಮಸೇನೆಲ
ಪಿರವು ಮಾದ್ರಿನ ಬಾಲೆಲಿರ್ದೆರ್
ಬಲತ್ ದೇವಕಿ ಕುಂತಿ ವಸುದೇವಾದಿ ಯಾದವೆರ್ ||
ಎಡತ್‌ಲರ್ಜನೆ ಬುಕ್ಕೊ ದ್ರೌಪದಿ
ದ್ರುಪದ ರಾಜೆಲ ರಾಣಿನೊಟ್ಟಿಗೆ
ನಡುಟುಲಾ ಸಿರಿಕ್ರಿಷ್ಟೆ ಪರಮಾನಂದೆ ಮೆರೆವೊಂಡೆ ||

15

ಪೊಲ್ಲದೋಲೆಗೊ ಮುಗಿದ್ ಮುರಹರೆ
ತನ್ನ ಕೂಟೊದ ಯಾದವೇರೆನ
ಒಟ್ಟುಗೇ ಪಿದಡ್‌ನಗ ದ್ರುಪದನೆ ತನ್ನ ಸೇರಿಗದ ||
ಬಗ್ಗೆರೆನ್ ಮಂತ್ರಿಲೆನ್ ಅರಮನೆ-
ಡಿತ್ತಿ ಪರಿವಾರೊಲೆನ್ ರಾಣಿನ
ಇಸ್ಪೊ ಸೇವೆದ ಪೊಣ್ಣಲೆನ್‌ಲಾ ಕಾರ್ ಪತ್ತಾಯೆ ||

|| ಪಾಂಡವೆರ್ ಹಸ್ತಿನಾವತಿಗ್ ಬತ್ತೆರ್ ||

ಕೌರವಾದಿಲೆ ಗೂಡಚಾರೆರ್
ಐವೆರಾ ಪಾಂಡವೆರ್ ಒತ್ತಿನ
ಕೈನ್ ಪತ್ತಾದ್ ದ್ರುಪದನರಮನೆಡುಲ್ಲೆರಿತ್ತೆಂದ್ ||
ಪಾರ್ ಬತ್ತಾದ್ ಪಂಡೆರಾ ದು-
ರೋದನಡ ಅಪಗಾಯೆ ಕೂಡ್ಲಯೆ
ರಾಜ ಚಾವಡಿಡೊಂಜಿ ಸಬೆನ್‌ಲ ಪೊರು ಕಂತ್‌ನಗ ||

1

ಅಜ್ಜ ಬೀಸ್ಮನ್ ಗುರುನು ಕೃಪೆರೆನ್
ಕರ್ಣ ಸಕುನಿನ್ ಮಂತ್ರಿ ವಿದುರನ್
ಮಲ್ಲ ಸೈರೊದ ಸಿಂದುರಾಜನ್ ಮೆಗಿಯನಾಕಲೆನ್ ||
ಬರ್ದಯೆನೆ ಸಬೆಕಾಯೆನಕಲೆಡ
ತನ್ಕ ತಿಕ್ಕನ ಗೂಡಚಾರೆರೆ
ಸುದ್ದಿ ಇವರೊನು ಬುಡ್ಡ ಬುಡ್ಡದ್ ಪಂಡೆ ತೆಲಿತೊಂದು ||

2

ಪಾಂಡವೆರ್ ಐವೆರ್‌ಲ ಒತ್ತಿನೆ
ಆಯಿನಗೆ ದ್ರೌಪದಿನ್ ನಂಬೈರೆ

ತೀರೊ ಸುದ್ದಿನ್ ದ್ರುಪದನರಮನೆಡಿತ್ತೆ ಉಲ್ಲೆರ್‌ಗೆ ||
ಆಡೆಗೇ ಆ ಕ್ರಿಷ್ಟೆ ಪೋತೆಗೆ
ಯಾದವೇರೆನ್ ಮಾತ ಲೆತೊನುದು
ದೇವಕೀ ವಸುದೇವನಾಕ್‌ಲ್ ಪೋತೆರೊಟ್ಟಿಗೆಗೆ ||

3

ಅಲ್ಪನೇ ದೃತರಾಸ್ತ್ರ ಪಂಡನೆ
ಎನ್ನ ಮೆಗ್ಗನ ಜೋಕುಲೆನ್ ಈ
ಕೆರೈರೆಗ್ ತೂಯತ್ತೊ ಅಕಲೆನ್ ಏರ್ ಬದ್‌ಕಯಿನೆ ||
ಕ್ರಿಷ್ಟೆ ದ್ರುಪದನ ಅರಮನೆಗಲಾ
ಎತ್ತೆ ಪನ್ನಗ ಪಾಂಡವೇರೆನ
ರಚ್ಚಣೆನ್ ಮಲ್ಪಂದೆ ಬುಡುವೆನೊ ಹಾಲ್ ಬುದ್ಧಿದಯೆ ||

4

ಈತ್ ಪನ್ನಗ ಕರ್ಣ ಸೌಬಲ-
ನಾಕ್‌ಲಪಗನೆ ಲಕ್ಕಾದುಂತುದು
ವಾಸುದೇವಗ್ ತೀರುನೆಂಚಿನ ಗುಡ್ಡೆ ಜಗ್ಗವೆನೊ ||
ಬೀಮ ಪಾರ್ತೆರ್ ದಾನೆ ಮಲ್ಲೆರ್
ಬಾನೊದೆರ್ಪೆರೊ ಬರಡ್ ಎಂಕ್ಲೆಡ
ಕಾದಿಯೆರೆ ದೇವಾದಿ ದೇವತೆಲೊಟ್ಟು ಸೇರೊಂದು ||

5

ಬಾರಿ ವೀರೆರ್ ನಿಕ್‌ಲ್ ಕೋಡೆನೆ
ಪಾರ್ಡ್ ಬತ್ತನೆ ದಾಯೆ ಅಕಲೆಗ್
ವಾಸುದೇವನ ಸಾಯೊ ಬೋಡೊಯ ನಿಕ್‌ಲೆನಾ ಎದುರು||
ಬೀಮ ಪಾರ್ತೆರೆ ಇತ್ತೆ ಯಾವುಚೊ
ತೂಯಿಜರೊ ನಿಕ್‌ಲಕಲೆ ಸಾಸೊನು
ದಾಯೆ ಕೊಚ್ಚರ್ ಬೂಟು ಬಾಯಿಡ್ ಪಂಡೆನಾ ಬೀಸ್ಮೆ ||

6

ಮುಕುಲೆ ಬಾಯಿದ ಬೂಟು ಉಪ್ಪಡ್
ಪಗೆನ್ ಸಾದಿಪುನವುಲ ಎಡ್ಡೆನೊ
ಸುರುಟು ಬುಳೆಯೆರೆ ಬುಡ್ಡ ತಪ್ಪುನು ಈಯೆ ನೆನೆತೊನುಲ||
ಅಕ್‌ಲ್ ದುಂಬೇ ಮಲ್ಲ ವೀರೆರ್
ಮುರಹರನ ಬಲೊ ಉಂಡು ಅಕಲೆಗ್
ಎದುರು ಉಂತುನ ಬೊಡ್ಡಿ ಪನ್ನನ ಕೇನ್ ದ್ರತರಾಸ್ತ್ರ||

7

ಆ ಯುದ್ಧಿಸ್ಪಿರನಾಡೆ ವಿದುರನ್
ಈಯೆ ಕಡಪುಡುದಕಲೆನೀಡೆಗ್

ಪ್ರೀತಿಡೇ ಬರ್ಪಾದ್ ರಾಜ್ಯೊನು ಪಾಲ್ ಮಲ್ಪುಲಯ||
ಆಳಿಯೆರೆ ಕೊರು ಅರೊನಕಲೆಗ್
ಈಶನೇಟಲ ನಿಕ್ಲ್ ಮಲ್ತನ
ದ್ರೋಹೊ ಮರಪದ್ ರಾಜಿ ಮಲ್ಪುವೆ ಪಂಡೆನಾ ಬೀಸ್ಮೆ ||

8

ಬೀಸ್ಮೆ ಪಾತೆರೊ ಕೇನ್ದಲಾ ದ್ರತ-
ರಾಸ್ಮೆ ಪಂಡೆನೆ ಈರೆ ಪಾತೆರೊ
ಕೇನ್ವೆರೆನ್ನವೆ ಜೋಕ್ಕು ಮಹ ದುರ್ಬುದ್ಧಿದಕಲಾದ್||
ರಾಜ್ಯೊನಕಲೆಗ್ ಪಾಲ್ ಮಲ್ತದ್
ಪಾಂಡು ಬಾಲ್ಗೆಗ್ ಕೊರ್ದೆ ವಿದುರೆನೆ
ಪೋದು ಲೆತೊನುದು ಬರಡ್ ಈಡೆಗ್ ಮೆಗ್ಯ ಜೋಕುಲೆನ್||

9

ಪನ್ನಗನೆ ಆ ಬೀಸ್ಮೆ ವಿದುರಗ್
ಮಲ್ತೆ ಪೋಯೆರೆಗಾಪುನಟ್ಟಣೆ
ಬುಕ್ಕೊ ಆಯಡ ಪಂಡೆ ಧರ್ಮಜನೀಯೆ ಒಪ್ಪಾದ್ ||
ಒಟ್ಟಿಗೆನೆ ಮಾತೆರೆನ್ ಈಡೆಗ್
ಎತ್ತಲಯ ಪನ್ನುನೆನ್ ಕೇಂಡ್
ಸಜ್ಜನೆರೆ ಕೈತಡೆಗ್ ಪೋಪುನವೆನ್ನ ಯೋಗೊಂದು ||

10

ದೂರೊ ಸಾದಿನ್ ಕಡತ್‌ದೆತ್ತೆನೆ
ರಾಜ ದ್ರುಪದನ ಊರು ವಿದುರೆನೆ
ತಾನ್ ಹಸ್ತಿನಪುರೊತ ಮಂತ್ರಿಯೆ ಪನ್ದ ಅರಮನೆದ||
ಬಾಕಿಲ್‌ನ್ ಕಾಪುನವೆ ಜವನೆರೆ-
ಡಾಯೆ ಪನ್ನಗ ಉಲಯಿ ಪೊಗ್ಗದ್
ಚಾವಡಿಡ್ ಕುಲ್ಲಯೆರಾಲಪಗನೆ ತೂದು ಪಾಂಡವೆರ್ ||

11

ಅರದ್ ಪತ್ಯೆರ್ ಪ್ರೀತಿ ಬಾವೊಡು
ಹಿರಿಯಯಗ್ ಕೊರ್ದುನವೆ ಮರ್ಮದಿ-
ಡಕ್ಲ್ ಒರಿಯೊರಿ ಹಸ್ತಿನಾವತಿಡಿತ್ತಿ ಹಿರಿಯಕಲೆ||
ಸುಕೊನು ಕಸ್ತೊನು ಕೇಂಡ್ ಕೇಂಡ್
ಕಡೆಕ್ ಧರ್ಮಜೆ ಪಂಡೆ ಎಂಕುಲು
ಅರಕದಿಲ್ಲೇ ಪೊತ್ತುದಾನಗ ಪಾರ್ಯೊನಲ್ಪಡ್||

12

ಕಾಡ್ ಸೇರ್‌ದ್ ತಿರ್ಗ್ ತಿರ್ಗ್
ಊರು ಜತ್‌ದ್ ಬೆರಣ ಜಾತಿವ

ಏಸೊ ಮಲ್ತದ್ ನಟ್ಟೆ ತಿಂದೊನೆ ಬಂಜಿ ದಿಂಜಯೆರೆ||
ದ್ರುಪದ ಮಗಲೆನ್ ಎಂಕುಲೈವೆರ್
ಮದಿಮೆ ಆಯ್ಕೆ ಮೂಲು ಉಂತುದು
ಸುಕೊಟು ದಿನೊ ನೂಕೊಂದು ಉಲ್ಲೊನೆ ಪಂಡ್‌ದಾಯನ್‌ಲ||

13

ಬುಡರೊಡುಂತದ್ ಬಾರಿ ಸಮ್ಮನೊ
ದೋಣಸ್ ಮಲ್ಪದ್ ರಾತ್ರ ಜೆಪುಡಯೆ
ವಿದುರೆ ತನ್ನವೆ ಅಮ್ಮನೊಟ್ಟಿಗೆ ಪುಟ್ಟನಾಯೆಂದ್ ||
ನಿದೆರ್‌ಜೆನೆ ಆ ವಿದುರೆ ರಾತ್ರಡ್
ಮನಸ್ ಮರ್ಗದ್ ಪಾಂಡವೇರೆನ
ಸಿತಿನ್ ಗ್ರೇಯ್‌ದ್ ದುಕ್ಕೊ ಮಲ್ತೊಂದಿತ್ತೆ ಆಸಿಗಡ್||

14

ಆನಿದಾ ಮನದಾನಿ ಕಾಂಡೆನೆ
ಪಾಂಡವೆರ್ ಒಟ್ಟಾದ್ ವಿದುರಡ
ದಾನೆ ಬತ್ತನೆ ಪನ್ದ ಕೇಂಡೆರ್ ಅಕಲೆಡೊರಿಯೊರಿಯೆ||
ದಾನೊ ದುಂಬುಡು ನಿಕ್‌ಲೆಗನ್ಯಯೊ
ಆಯಿನೆನ್ ಮರತೊಂದು ಬರೊಡುಗೆ
ಬೀಸ್ಮೆ ದ್ರತರಾಸ್ಮೆರಾಲ ಪಂಡ್‌ದ್ ಯಾನ್ ಬತ್ತದನೆ ||

15

ರಾಜಿಡೊಟ್ಟುಗು ಉಪ್ಪೆರಾಯಿಡ
ಬೇತೆ ಬೇತೆನೆ ಪಾಲ್ ಮಲ್ತದ್
ಆಕಲೇ ಕೊರ್ಪೆರ್‌ಗೆ ನಿಕ್‌ಲೆಗ್ ಅವ್ವೆ ಎಡ್ಡೆತ್ತೊ ||
ಅಜ್ಜ ಬೀಸ್ಮೆರ್ ಉಲ್ಲೆರಲ್ಪನೆ
ಕಲ್ಪಯಿನ ಗುರು ದ್ರೋಣೆರುಲ್ಲೆರ್
ಹಸ್ತಿನಾವತಿ ನಿಕ್‌ಲೆ ಹಕ್ತದವೈನ್ ಬುಡ್ಡುನೆನೊ||

16

ಧರ್ಮಜ್‌ಗಲಂದಾಪಿ ನಮುನೆಡ್
ಮೆಗ್ಯನಕಲೊಪ್ಪುನವೆ ರೀತಿಡ್
ಅಪ್ಪೆ ಕುಂತಿಗ್ ಮೆಚ್ಚುನಂಚಿನೆ ಪೋಣ್ಣ ದ್ರೌಪದಿಗ್ ||
ಇಸ್ಕೊ ಆಪುನ ಲೆಕೊನೆ ಪಂಡ್‌ದ್
ಒಪ್ಪಯೆನೆ ಆ ವಿದುರೆ ಮಾತೆರ್
ಬರೊ ಪೋಯಿಂದಕ್ಲ್ ಮಲ್ತೆರ್ ಪೋಪುನಟ್ಟಣೆನ್ ||

17

ಪಾಂಡವೆರ್ ದ್ರೌಪದಿನ್ ಲೆತೊನುದು
ಮಾಮಿ ಸಮ್ಮಲೆ ಕಾರ್ ಪತ್ತದ್

ತೇರ್‌ನೇರ್‌ದ್ ಅಪ್ಪೆನೊಟ್ಟುಗು ಕುಲೈರೊಟ್ಟಾದ್ ||
 ಕಾಣಿಗೆಗ್ ಬೋಡಾಯಿ ವಸ್ತನ್
 ರಾಜ ದ್ರುಪದನೆ ವಿದುರೆ ಬತ್ತನ್
 ತೇರ್‌ಡೇ ದಿಂಜಾದ್ ಪೋಲೆಂದಾಯೆ ಕಡಪುಡಿಯೆ ||

18

ತೇರ್ ಉಂತ್‌ನ ತೂದು ಅರಮನೆ-
 ದಾಕ್‌ಲೆದುರುಗು ಬನ್ನಗನೆ ಸರಿ
 ಪಾಂಡವೆರ್ ಮದಿಮಲೆನ ಒಟ್ಟಿಗೆ ಜತ್ತದುಂತಿಯೆರ್ ||
 ಬೀಸ್ಮನಾಜ್ಜೆಡ್ ಪೋಣ್ಣಲಾರತಿ
 ತೋಜಯೆರ್ ಕುಂಕುಮೊದ ಬೊಟ್ಟುನು
 ಪಾಡ್‌ದುಲಯಿಗ್ ಪೊಗ್ಗಯೆರ್ ಮಾತೆರ್ಲ ಸಂತೊಸುಡು ||

19

ಕನತಿ ಕಾಣಿಗೆ ಬೀಸ್ಮ ದ್ರುತರಾ-
 ಸೈರೆಗ್ ಗುರುದ್ರೋಣೆರೆಗ್ ಕೃಪೆರೆಗ್
 ಕೊರುದು ಕಾರ್‌ಗ್ ಅಡ್ಡೊ ಬೂರೈರ್ ಬತ್ತಿ ಪಾಂಡವೆರ್ ||
 ಮದಿಮಲೆನ್ ಕುಂತಿನಾಲ ಪೋಣ್ಣಲು
 ಉಲಯಿ ಕುಲ್ಲದ್ ಪೇರ್ ಕೊರೈರ್
 ಕುರುಡು ಕಣ್ಣೆಡೆ ನೀರ್‌ನರಿಪಯೆ ಅರಸು ದ್ರುತರಾಸೈ ||

20

ಬಾಲೆಲೆನ್ ಲೆಪುಡಾದ್ ಅಕ್‌ಲೆಡ್
 ರಾಜಿ ಮಲ್ಪಯೆ ನನಗ್ ನಿಕ್‌ಲೆನ್
 ಯಾನ್ ಪೋಯೆರೆ ಬುಡಯೆ ಪಂಡ್‌ದ್ ಕೊರೈ ಬರವಸೆನ್ ||
 ದ್ರೋಪದಿನಾಲಾ ಪರಡ್ ಪರಡ್‌ದ್
 ಆಲೆ ತರೆನೀಸೊಂದು ಪಂಡೆನೆ
 ಈಯೆ ಮರ್ಮಲ್ ದೀಪೊ ಬೆಳಗಲ ನಮ್ಮ ಅರಮನೆದ ||

21

ನಮೊನೆ ಪಾಂಚಾಲೆರೆನ ಪೊದ್ದೆರ್
 ಪನುಪುನೆಕ್ ಅಡ್ಡಿದ್ಡಿ ಸಲ್ಮತೊ
 ಇನಿಯೆ ಸಮ್ಮನೊ ನಮ್ಮ ಅರಮನೆಡಾವೊಡುಂದಪಗ ||
 ಮಲ್‌ಪಯೆನೆ ಗಮ್ಮತ್‌ದ ಗೌಜಿಡ್
 ಅಕ್‌ಲ್ ಮುಕುಲೆನ್ನಿನವೆ ಬೇಡೊನು
 ಮರತೆರೊಟ್ಟುಗು ನಲಿತೆರಾ ಕೌರವೆರ್ ಪಾಂಡವೆರ್ ||

22

ರಡ್ಡ್ ಕಡೆತಕ್‌ಲೊಟ್ಟುಗಾಯೆರ್
 ಪೆಟ್ಟ್ ಗುಟ್ಟುಲು ನ್ಯಾಯೊ ಲಡಯಿಲು

ಇದ್ದಿ ಅಕ್‌ಲೆನ ಉಲಯಿ ಒಸೊನೆ ಐನ್ ಕರಿದಾಂಡ್ ||
 ಎಡ್ಡೆಡಿತ್ತಾನ ಮುಕುಲು ಲಡಯಿನ್
 ಮಲ್ಪಿಯೆರೆ ಬಲ್ಲಿಂದ್‌ಲಾ ನೇ-
 ಲ್ಯಮ್ ರಾಜ್ಯೊನು ಪಾಲ್ ಮಲ್ಪುನ ಕನಟ್ ನಿದೆರೊಂಡೆ ||

|| ಹಸ್ತಿನಾವತಿ ಪಾಲಾಂಡ್ ||

ಬೀಸ್ಮಡನೆ ದ್ರುತರಾಸೈ ತೆರಿಪಯೆ
 ರಾಜ್ಯೊ ಪಾಲ್‌ನ್ ಮಲ್ಪಿ ಸಂಗತಿ
 ಆಯೆ ಆವುಂದೈಕ್ ಒಪ್ಪಿಗೆ ಕೊರೈ ಸಂತೊಸುಡು ||
 ದಾನೆ ಆಂಡಲ ನ್ಯಾಯೊ ಬತ್ತದ್
 ಪಾಂಡವೆರ್ ಪೋಯೆರ್‌ಡ ಅಕ್‌ಲೆಗ್
 ಸಾಯೊ ಕೊರ್ಪುನ ಜನೊಲ ತಿಕ್ತೆರ್ ಬುಕ್ಕೊ ತಾಂಟಯೆರ್ ||

1

ರಾಜ್ಯೊನೇ ಸರಿ ರಡ್ಡ್ ಪಾಲ್‌ನ್
 ಸೇರ್‌ನಾ ಬುದ್ಧಂತನಾಕ್‌ಲ್
 ಮಾತ ಮಲ್ತೆರ್ ಹೆಚ್ಚಿ ಕಮ್ಮಿನ್ ತೂದು ಸರಿಯಾದ್ ||
 ಪೇಂಟೆ ಪಟ್ಟಣೊ ಹಳ್ಳಿ ಬೈಲ್‌ನ್
 ಕಾಡ್ ಗುಡ್ಡೆನ್ ಕೋಟೆ ಕೊತ್ತಲೊ
 ನೀರ ಪರಿಪುನು ಸಾದಿ ಬೀದಿನ್ ಪೂರ ತೂವೊಂದು ||

2

ಧರ್ಮಜನ ಪಾಲ್ಗಿಂದ್ರ ಪ್ರಸ್ತೊನು
 ಹಸ್ತಿನಾವತಿ ಕೌರವೇರೆಗ್
 ಪನ್ನಿ ತೀರ್ಪುನು ಕೊರುದು ಮಲ್ತೆರ್ ಪಾಲ್ ಹಿರಿಯಕ್‌ಲ್ ||
 ತೆನ್ನಯಿದ ತರೆಮುಟ್ಟ ಮೂಡಯಿ
 ಬುಕ್ಕೊ ಬಡೆಕಯಿ ಸಿಮೊತ ಪರ್ವತೊ
 ಪಡ್ಡೊಯಿಡ್‌ಲಾ ಗಡಿತ ಉಲಯಿದ ಊರು ಪಾಲಾಂಡ್ ||

3

ಆನೆ ಕುದುರೆಲೆ ಸೇನೆ ಮಣಿಮಯೊ
 ತೇರ್ ದಂಡಿಗೆ ಬೊಳ್ಳಿ ಬಂಗರ್
 ಮಾಣಿಕೊದ ಪದ್ವೋಯಿ ಬದ್‌ಕ್‌ನ್ ಮುತ್ತು ರತ್ನೊಲೆನ್ ||
 ಪಾಲ್ ಮಲ್ತದ್ ಕೌರವಾದಿಲು
 ಪಾಂಡವೇರೆಡ ನನಗ್ ಲಡಯಿಲ
 ಆಯೆರೆಗ್ ಬಲ್ಲಿಂದ್ ಬೀಸ್ಮನೆ ಮಲ್ತೆ ಕಟ್ಟಲೆನ್ ||

4

ಬುಕ್ಕೊ ಮೂರ್ತೊನು ತೂದು ಪಿದಡ್‌ನ
ಪೊರುಡಾ ಅರಮನೆದ ಪೊಂಜೊವು
ಮಲ್ತರಕ್‌ಲೆಗ್ ಮಂಗಳಾರತಿ ಸಾಲ್ಡ್ ಕುಲ್ಲಾದ್ ||
ಕೊರ್ದ ಉಡಿಗಿರೆ ಕೈಟ್ ಪತೊನುದು
ಅಜ್ಜನಾ ನೇಲ್ಯಮ್ಮನಕ್‌ಲೆನ
ಬುಕ್ಕೊ ಮಲ್ಲಪ್ಪನವೆ ಕಾರ್‌ಗ್ ಬೂರು ಪಿದಡಿಯೆರ್ ||

5

ಅಕ್‌ಲೆನೊಟ್ಟುಗು ಬೀಸೈ ದ್ರತರಾ-
ಸೈನೆಲ ಕೌರವನಕ್‌ಲ್ ಸೈಂದವೆ
ಸಕುನಿ ಕರ್ಣೆನೆ ಗುರುಕುಲಸ್ವತ್ತಾಮೆರೆತ್ತಿಯೆರ್||
ಕೆಲವು ದಿನೊ ಅವುಲುಂತುದಾಕ್‌ಲ್
ಪೆರಪ ಬತ್ತೆರ್ ಹಸ್ತಿನಾವತಿ-
ದರಮನೆಗ್ ಮಾತೆರ್ಲ ಪಾಂಡವನಕ್‌ಲೆ ಬಂದುಗುಳು ||

6

ಊರುದೂರುದ ಮಾತ ಅರಸುಲು
ಬಾರಿ ಉಡಿಗಿರೆಡಸುರ ವೈರಿಲ
ಯಾದವೆರೆನೊಟ್ಟಿಗೆನೆ ಬತ್ತೆರ್ ಪಯಣೊ ಮಲ್ತೊಂದು||
ಇಂದ್ರ ಲೋಕೊದ ನಮನೆಡೇ ಸರಿ
ಇಂದ್ರ ಪ್ರಸ್ತಾನು ಇಸ್ವಕರ್ಮೆನೆ
ಸಿಂಗರೊಡು ಮಲ್ತದೆನೊ ಪಂಡೊಂದೆತ್ತಿಯೆರ್ ಮಾತ ||

7

ಬೂಮಿ ದೇವಿನ ಮುಂಡೊಡ್ತಾನ
ಸೋಬೆದಾ ಸಿರಿ ಬೊಟ್ಟು ದಂಚಿನೆ
ತೋಜುನೆನೆ ಈ ರಾಜ್ಯೊ ಪಂಡರ್ ತೂದು ತೆರಿನಕ್‌ಲ್||
ಸೂರ್ಯ ಬೀದಿಲು ಚಂದ್ರ ಬೀದಿಲು
ಕೇರಿ ಕೇರಿಡ್ ತೋಜುನೆತ್ತರೊ
ಮಾಳಿಯೊದ ಇಲ್ಲಗುಳು ಪೊರ್ಲುದ ಸಾರ್ಣೆಡರೆತನವೆ ||

8

ದೇವರೆನ ಮಂದಿರೊಗು ಬೊಳ್ಳಿದ
ಬಾಕಿಲ್‌ಗ್ ದಾರಂದೊ ಬಂಗರ್-
ಡಾದ್ ರತ್ನೊದ ಕೆತ್ತನೆಡ್ ಸರಿ ಮೆಣ್ಣಾದ್‌ತ್ತನವೆ ||
ಸಿವಗ್ ಬುಡ್ತನ ಬಾಣೊ ದಿಂಜಯಿ
ಮದನ ಮೂಡಿಗಿಂದಂಚ ತೋಜುನೆ
ನಗರೊಡ್ತಾನ ಮಾತ ಪೊರುಡ ಮಾಡೊ ಮಂದಿರೊಲು||

9

ನೇಮೊ ನಿಯಮೊಡು ಇಂದ್ರೆ ಸೊರ್ಗೊದ
ರಾಜ ಚಾವಡಿಗತ್ತುನಂಚಿನೆ
ಆ ಯುದ್ಧಿಸ್ಪಿರೆ ಕ್ರಿಷ್ಣ ದ್ರುಪದರೆ ಒಟ್ಟು ಸೇರೊಂದು ||
ಚಾವಡಿಗ್ ಎತ್ತಿಯೆನೆ ಪೀಟೊನು
ಏರ್‌ದಾನಗ ಬಿರ್ಡ್ ಪಂಡ್‌ದ್
ಮಾಗದರ್ ಪುಗರಿಯೆರ್ ಜಯೊ ಜಯೊ ಪಂಡೆರಾ ಸಬೆಟ್ ||

10

ಪುರಜನೊಲ ಪರಿಜನೊಲ ಕಾಣೆಗೆ-
ನರಸು ಸಿಮ್ಮಾಸೊನದ ಎದರುಡು
ಸರಿಟ್ ದೀಡ್‌ದ್ ಕೈನ್ ಮುಗಿಯೊಂದುಂತ್ಯೆರೇತೊ ಜನೊ ||
ಕುದುರೆಲಾನೆಲೆ ಸೇನೆ ತೇರುಲು
ಎದುರು ಬಾಕಿಲ್‌ಡುಂತ್‌ದಿತ್ತನ
ದಿಸೆಟ್ ಪೊಗೈರೆ ಜಾಗೆ ತಿಕ್ಕಜಿ ರಾಜ ಚಾವಡಿಗ್||

11

ವಾಸುದೇವೆನೆ ಬಾವನಕ್‌ಲೆಡ
ಪ್ರೀತಿಡೇ ಪಾತೆರ್ಡ್ ಮೆಗಿದಿನ
ಮಾಮಿ ಕುಂತಿನ್ ತನ್ನ ಕೈತಲ್ ಕುಲ್ಲವೊಂದಪಗ||
ಕೌರವಾದಿಲು ಮಚ್ಚರಿಲು ನಿಜೊ-
ಟಾಕ್‌ಲೆಡ ಜಾಗ್‌ತೆಡುಪುಲೆ
ಸೂತ ಕೈತಲ್ ಚಳಿಕ್ ತಕ್ಕನೆ ಕುಲ್ಲನವು ಎಡ್ಡೆ||

12

ಈತ್ ಪಂಡ್‌ದ್ ಪಿದಡ್‌ದಾನಗ
ರಾಜ ದ್ರುಪದಲ ಬರ್ಪೆ ಪಂಡ್‌ದ್
ಮಾತೆರೆನ್ ಪಿದಡ್ವಾಯೆ ಮರ್ಮಯನಕ್‌ಲೆ ಒಪ್ಪಿಗ್‌ಡ್||
ಧರ್ಮಜೆನೆ ತನ ರಾಜ್ಯೊ ಬಾರೊನು
ಮೆಗ್ಗನಕ್‌ಲೆನ ಸಾಯೊಡೇ ಸಿರಿ-
ಕ್ರಿಷ್ಣನಾ ದಯೊಟಾಯೆ ನ್ಯಾಯೊಡು ಮಲ್ತೆ ಪೊರ್ಲಾದ್ ||

13

ಕಳವು ವಂಚನೆ ಮೋಸೊ ಟಕ್ಕಡ್
ದಿನೊನು ಕಳೆಪುನ ಜನೊಕುಲಿದೈರ್
ಕೆಲಸೊ ಕಾರ್ಯೊಡು ಪ್ರಜೆಕುಲೆಪೊಲ ಏಕೀಣಿಲು ನಿಜೊನೆ ||
ಹವಿಸ್‌ನುಂಡಿನ ದೇವ ದೇವತೆ-
ನಕ್‌ಲ್ ಬರ್ಸೊನು ಕಾಲೊ ಕಾಲೊಗು
ಸರಿಟ್ ಜಪುಡದ್ ಬೂಮಿಡೇತ್‌ಲ ಆಂಡ್ ಬುಲೆಬಾಗ್ಯೊ ||

14

ದಾನೊ ಧರ್ಮೊಗು ಕೈನ್ ನೀರುನ
ಬ್ರಾಣೆರಿದೈರ್ ಇಂದ್ರ ಪ್ರಸ್ತೊಡು
ಮಾತೆರೆಗ್ ಮಲ್ಲತಿಗೆ ಧರ್ಮಜೆ ರಾಜ್ಯೊನಾಳ್ನೆಟ್ ||
ವೀರ ಸಗರನ ದುಂದು ಮಾರನ
ಆ ನಳನ ನೃಗ ನವುಸೆ ಬರತನ
ಬಾರಿ ಪುದರ್ದ ಸತ್ಯೊದಾ ಹರಿಸ್ವಂದ್ರನಾ ಲೆಕೊನೆ ||

15

ಆದಿ ಯುಗೊಟುಲ ಧರ್ಮೊ ಉಂತ್ನೆ
ನಾಲ್ಕಾರ್ಡ್ ಮಗ್ಗರ್ ಯುಗೊಟೇ
ಮೂಜಿ ಕಾರ್ಡ್ ದೋಪರೊಡು ಸರಿ ರಡ್ಡ್ ಕಾರ್ಡ್ಂದ್ ||
ಜ್ಞಾನಿ ಯೋಗಿಲು ಪನ್ನೆರೆ ನಿಜೊ
ಆಂಡ ಧರ್ಮಜೆ ರಾಜ್ಯೊನಾಳ್ನೆಟ್
ನಾಲ್ ಕಾರ್ಡೆ ರಾಜ್ಯೊದುಲಯಿಡ್ ಧರ್ಮೊನಿಲೆ ಊರ್ಡ್ ||

16

ಒಂಜಿ ದಿನೊಟಾಸ್ತಾನೊ ಚಾವಡಿ
ದಿಂಜಿದಿತ್ತಾನ ಸಬೆಟ್ ಧರ್ಮಜೆ
ದುಂಬುದಂಚಿನೆ ಮೆಗ್ಗನಕ್ಲೆನ ಒಟ್ಟುಗಾಸನೊಡು||
ಕುಲ್ಲುದುಪ್ಪುನಗಪಗ ಹರಿನವೆ
ಕೀರ್ದನೆದ ಪದೊ ಕೇನ್ನಗಾಕ್ಲ್
ನಿಲ್ಕ ತೂನಗ ದೇವ ರುಸಿ ನಾರದರ್ ಬರ್ಪೆದರ್ ||

17

ತೂದು ಪಾಂಡವನಕ್ಲ್ ಎದುರುಗು
ಪೋದು ಕಾರ್ಗ್ ಅಡ್ಡೊ ಬೂರೈರ್
ರಾಜ ಚಾವಡಿಡುಲಯಿ ಪೊಗ್ಗದ್ ಕುಲ್ಲಯೆರ್ ಸಬೆಟ್ ||
ಮಾತೆರ್ಲ ಸರಿಟಡ್ಡೊ ಬೂರೈರ್
ಪಾದೊ ಪೂಜೆನ್ ಮಲ್ತದಾರೆನ್
ಆಸನೊಡು ಕುಲ್ಲಾದ್ ಕೊರೈರ್ ಪೇರ್ ಪರೈರ್ಗ್ ||

18

ನಿನಡ ಗುಟ್ಟುದ ಒಂಜಿ ಸಂಗತಿ
ಪನಿಯೆರೆಗ್ ಬತ್ತನೆನೆ ಧರ್ಮಜೆ
ಸಬೆನ್ ಅಗಪದ್ ಉಲಯಿ ಕುಲ್ಲುಗೊ ಪಂಡೆರಾ ಮುನಿಯೆ ||
ಸಬೆತಕ್ಲ್ ಮಾತೆರ್ಲ ಪೋಯೆರ್
ರುಸಿಕ್ ಕೈ ಮುಗಿಯೊಂದು ಧರ್ಮಜೆ
ಕೈತಲ್ಡ್ ಉಂತ್ನಗ ಪಂಡರ್ ಮೋನೆ ತೂವೊಂದು ||

19

ಕೇನ್ ಧರ್ಮಜೆ ನಿನ್ನ ಏಗಿತೊ
ಏರೆಗುಂಡಿನಿ ರಾಜ್ಯೊನಾಳುನ
ರಾಜೆರೆಗ್ ಪನ್ ಬೀಮ ಪಾರ್ತರ್ ನಿಕ್ಕ್ ಮೆಗ್ಗಲು ||
ಆ ಸಿವನ ವರೊಟಾದ್ಲೈವೆರ್
ದ್ರೋಪದಿಗ್ ಕಂಡನಿಲು ಆಯರ್
ಮೇಲ್ ಲೋಕೊದ ಸಿರಿಕುಲೆನ ಲೆಕೊ ಉಲ್ಲಲಾಲ್ನಿಜೊನೆ ||

20

ಪೊಣ್ಣಲೆಗ್ ಬೋಡಾದ್ ಜನೊಕುಲು
ಮಣ್ಣೆಗ್ಲ ಬೂಮಿದವೆ ಬದ್ಕಗ್
ತುಚ್ಚೊನುನ ಕತೆ ಕೇನ್ದಜರೊ ನಿಕ್ಲಿತ್ತೆ ಪನ್ನೆನ್ ||
ದುಸ್ಸೆರೇ ಸುಂದೋಪ ಸುಂದರೆ-
ರೆನ್ನಿನಾ ಮೆಗಿ ಪಲಯನಾಕ್ಲ್
ಪೊಣ್ಣನಾಸೆಡ್ ಲಡಯಿ ಮಲ್ತದ್ ಸೈತ್ತೆರಕ್ಲಕಲೆ ||

21

ಪೊಣ್ಣನಾ ಕಾರಣೊಡು ನಿಕ್ಲೆಗ್
ನಿಸ್ಪರೊಡು ಲಡಯಾಂಡ ಲೋಕೊಡು
ಮಲ್ಲ ನಾಲಿಸ್ ಕೀರ್ತಿ ಗೌರವೊಗಾವು ಮಹ ಕೊರತೆ ||
ರಾಗೊ ಲೋಬೊಡು ಆಸೆ ಮಲ್ತದ್
ದ್ರೋಪದಿಗ್ ಬೋಡಾದ್ ಕಾಳಗೊ
ಆಪುನವು ಎಡ್ಡೆತ್ತ ನಿಕ್ಲೆಗ್ ಕೇನಿ ಪನ್ನುನೆನ್ ||

22

ನೆನೆಪು ದೀವೊನಿ ಒಂಜಿ ಒಸೊಡು
ಒರಿಯಗಾ ದ್ರೌಪದಿಯೆ ಒದಗೊಡು
ಮಗ್ಗರ್ ಒಸೊಗು ಬೇತೆ ಒರೈಗ್ ಇಂಚ ಮಗ್ಗೊಂದು ||
ಬುಡೆದಿಯಾದೇ ಒದಗೊಡೈವರೆ-
ಗಯಿನ್ ಒಸೊಡು ಒರಿಯಗೊರೈಗ್
ಬುಡೆದಿ ಒಂಚೊಂಚೊಸೊ ಪನ್ನಿ ನಿಗಂಟ್ಡಿತ್ತೊನೊಡು ||

23

ಒರಿಯ ಸರ್ತಿಡ್ ಕೋಣೆಡಾಯೆನೆ
ಬುಡೆದಿನೊಟ್ಟುಗು ಇತ್ತಿ ಸಮಯೊಡು
ನನೊರಿ ಪೊಗೈಡ ಪಾಪೊ ಕಳೆಯೆರೆ ಸೀರ್ತೊ ಯಾತ್ರೇನ್ಲ ||
ಒರುಸೊ ಒಂಚೆಟ್ ಮಲ್ತ ಮುಗಿಪೊಡು
ಪರಿಯರೊಗು ಬೋಡಾದ್ ಪನ್ನಗ
ಮುನಿನ ಪಾತೆರೊಗಕ್ಲ್ ಒಪೈರ್ ಬಗ್ಗಿ ಬಾವನೆಡ್ ||

24

ನಾರದೆರ್ ಧರ್ಮಜ್ ಆಸೀ-
ವಾರ್ದೊ ಮಲ್ತ್‌ದ್ ಬಾನೊಗೇರೈರ್
ಆದಿ ನಾರಾಯಣನ ಕೀರ್ತನೆ ಬಾಯ್ ಪಂಡೊಂದು ||
ದ್ರೋಪದಿಡಲಾ ಸುದ್ದಿ ಪಂಡೆರ್
ಈವೊಡೇ ಸುರುಕಣ್ಣ ಧರ್ಮಜ್-
ಗಾವೊಡೇ ಬುಡೆದಿಂದ್ ನಾಲ್ವೆರ್ ಒಪ್ಪೊಟ್ಟಾದ್ ||

|| ಅರ್ಜುನನ ಸೀರ್ತೊ ಯಾತ್ರೆ ||

ಒಂಜಿ ದಿನೊ ನಡು ರಾತ್ರೆ ಸಮಯೊಡು
ದಿಂಜ ಬೆರಣೆರ್ ಪಾರ್ ಬತ್ತೆರ್
ಇಂದ್ರ ಪ್ರಸ್ತೊದ ರಾಜದಾನಿಗ್ ಬೊಬ್ಬೆ ಹಾಕೊಂದು ||
ಬುಲ್ತುದರಬಯಿ ಕೊರ್ಪು ಪಂಡೆರ್
ಅರ್ಜುನಡನೇ ಅಗ್ರಹಾರೊಗು
ನುರುಪೆರ್ ಕಳುವೆರ್‌ಲ ಇಲ್ಲದ್ ಮಾಡ್ ರಟ್ಟಾದ್ ||

1

ಕಾಪೊಡೆಂಕ್ಲೆನ ಇಲ್ಲ ಬದ್‌ಕ್‌ನ್
ಪಾರ್ತ ಈಯೇ ಪನ್ದ ಬುಲ್ತುನ
ಬ್ರಾಣೆರೆಗ್ ಸರಿ ದೈರೊ ಪಂಡೆದ್ ಬಿಲ್ಲ ಬಾಣೊಲೆನ್ ||
ತಾನ್ ಗೆತೊನಿಯೆರೆಂದ್ ಪಲಯನ
ಕೋಣೆದುಲಯಿಗ್ ಪೊಗ್ಗದಾನಗ
ದ್ರೋಪದಿನ ಒಟ್ಟಿಗೆನೆ ಮಂಚವುಡಿತ್ತಿ ಧರ್ಮಜನ್ ||

2

ತೂದುಲಾನಗ ನಾರದಾ ಮುನಿ-
ಯಾನಿ ಪನ್ತನ ಪಾತೆರೊಡು ತನ್-
ಕಾಂಡ್ ಪಾಪೊತು ಪನ್ದ ಮನಸ್‌ಡ್ ಎತೆನ್ ಮಲ್ತೊಂಡೆ ||
ಬ್ರಾಣೆರೆನ್ ಕಾಪ್ಪೆಂದ್ ಕೊರ್ತನ
ಬಾಸೆ ತೀರ್ಪೆರೆ ಪಿದಡ್‌ನೆಂಕೇ
ದೋಸೊ ಆಯ್ಕೆ ಪರಿಯರೊನು ಯಾನೆಂಚ ಮಲ್ಪುನೆನೊ ||

3

ಬೆರಣೆರೆನ ರಚ್ಚಣೆನ್ ಮಲ್ತೆರೆ
ಪಿರವು ಬೂರೈಡ ಬರ್ಪಿ ದೋಸೊಗು
ಪರಿಯರೊನೆ ಇದ್ಯತ್ತೊ ಸಾಸ್ತೊಡು ಚೆತ್ತಿ ಜಾತಿಲೆಗ್ ||

ಬುಡೆದಿನೊಟ್ಟಿಗೆ ಇತ್ತನಣ್ಣನ
ಅದೆಕ್ ಪೊಗ್ಗನ ಪಾಪೊ ಪರಿಯಾ-
ರೊಗುಲ ಸಾದಿಯೆ ಉಂಡು ಸೀರ್ತೊನು ಮೀದ್ ಸುದ್ದಾಂಡ ||

4

ಬ್ರಾಣೆರೆನ ಕಸ್ತೊಲೆನ್ ಇತ್ತೆನೆ
ಯಾನ್ ಪರಿಯಾರೊಲೆನ್ ಮಲ್ತ್‌ದ್
ಆಯಿ ಬುಕ್ಕೊನೆ ಸೀರ್ತೊ ಯಾತ್ರೆಗ್ ಪೋಪೆ ಪಂಡೊಂದು ||
ಆಯುದೊನು ಪತ್ತೊಂದು ಪಲಯಡ
ನಾರದೆರ್ ಪಂಡಿಂಚಿ ಪಾಪೊತು-
ಲಾಯಿನೆನ್ ಪರಿಯರಿಪಿ ಪುಣ್ಯೊದ ಯೋಗೊ ಎಂಕಾಂಡ್ ||

5

ಪಿದಡ್‌ದಾಯೆನೆ ಕಳುವೆರೆನ ತರೆ
ಕಡ್‌ತ್ ರಟ್ಟದ್ ಅಗ್ರಹಾರೊದ
ಬದ್‌ಕ್‌ನೊತ್ತಾದ್ ಕೊರಿಯೆ ಬೆರಣೆರೆ ಸೊತ್ತು ಮಾತೆನ್‌ಲ ||
ಅಕ್‌ಲೆನಾಸೀರ್ವಾದೊ ಕೀರ್ತಿಡ
ಪುದರ್ ಪಡೆಯೆನೆ ಇಂದ್ರಪ್ರಸ್ತೊಡು
ಜನೊಕುಲೆನ ಬಾಯಿಡ್ ಕೇಂಡೆನೆ ಎಡ್ಡೆ ಪಾತೆರೊನು ||

6

ಪಾಪೊದಾ ಪರಿಯರೊಗು ಪಿದಡಿಯೆ
ಮಾತೆರೆಡ ಪಂಡೊಂದು ಪಾರ್ತೆನೆ
ಸಾದಿ ನಡತ್‌ದ್ ಎತ್ತೆ ಗಂಗೆದ ನೀರ್ಡ್ ಮೀಯೆರೆಗ್ ||
ಬೀಸ್ಮೆರೆನ್ ಪೆದಿಯಪ್ಪೆ ಪಾಪಿಲೆ
ಪಾಪೊ ಪರಿಯಾರೊದವೆ ಪರಿಪುಗು
ತಾನ್ ಕೈ ಮುಗಿಯೊಂದು ಮುರ್ಕನ ಸರ್ತಿ ಮೂಜಾಂಡ್ ||

7

ಬುಕ್ಕೊ ಲಕ್ಶ್ಮದ್ ಚಂಡಿನೊಚ್ಚಿಯೆ
ಅಲ್ಪದಾ ಸಿವಲಿಂಗೊಗಾಯೆನೆ
ಸುತ್ತು ಬತ್ತಾದ್ ಮರತ ಮುದೆಲ್‌ಡ್ ಚೆತ್ತೆ ಬಚ್ಚಿಲ್‌ಗ್ ||
ಆದಿ ಸೇಸನ ಮಗಲ್ ಆಯಿನ
ಆ ಉಲೂಪಿಯೆ ಬೂಮಿಡೊರೈಲ
ನಾಗ ಸರ್ಪೊನೆ ಆದ್ ತಿರ್ಗನಗಿಂಬ್ಯನೇ ತೂದು ||

8

ತನ್‌ಕ್ ಕಂಡನಿ ಮಲ್ತೊಡುಂದುದು
ನಿದೆರ್‌ನಾಯನ್ ಮಾಯೊ ವಿದ್ಯೆಡ್

ಕೊನೊದು ಪಾತಾಳೊದವೆ ಅರಮನೆದುಲಯಿ ಜೆಪುಡಯಲ್||

ಮೆನಿತ್‌ದಾಯಡ ತನ್ನ ಸಂಗತಿ
ತೆರಿಪದಾನಗ ಪೊರ್ಲುದಾಲೆನ್
ಬುಡಿಯೆರಾಯಿಜಿ ಸೇಸ ಮಗಲೆನ್ ಮದಿಮೆ ಆವೊಂಡೆ||

9

ಆಲೆನೊಟ್ಟುಗು ಕೆಲವು ದಿನೊ ಸಂ-
ಸಾರೊ ಸುಕೊ ಪಡೆವೊಂದು ಇತ್ತೆನೆ
ಆಲ್ ಪೆದ್ಯಲ್ ಆಣ್ ಬಾಲೆನ್ ತಿಂಗೊಳಾವಂದೆ||
ನರಮನಿಯೆರೆಗ್ ನಾಗಲೋಕೊದ
ಬುಡೆದಿಯಾಂಡನೆ ಮುಟ್ಟಿ ಸಾತ್‌ಗ್
ಪೆದ್‌ಪೆರ್‌ಂದ್‌ ತೆರಿಜೆರಾಕ್‌ಲ್ ಬಾಲೆ ಆಂಡತ್ತೊ ||

10

ಮಗೆ ಇರಾವಂತೆನ್ನಿ ಪುದರ್‌ಡ್
ಬಲತೊನಡ್ ಪಂಡೊಂದು ಪಾರ್ತೆನೆ
ಬುಡೆದಿ ಬಾಲೆನ್ ಉಂತದವುಲೇ ಸೇರ್‌ದ್ ಬೂಲೋಕೊ||
ಬಡಕಯಿದ ಸೀರ್ತೊಲೆಡ್ ಮುರ್ಕುದು
ಸರಿಟ್ ಮೂಡಯಿ ತಿರ್ಗೈ ಕಡಲ್‌ದ
ಬರಿಯೆ ತೆನ್ನಯಿಗಾದ್ ಬತ್ತೆನೆ ಪುಣ್ಯೊ ಜಾಗೆಲೆಗ್||

11

ಪಂಚ ಗೋದಾವರಿದ ಸೀರ್ತೊಡು
ದುಂಬು ಮೀಯೊಂದಾಯೆ ಬತ್ತೆನೆ
ತುಂಗಬದ್ದೆನ್ ಕಡತ್‌ದೆತ್ತಿಯೆ ಕಾಂಚಿ ಪಟ್ಟಣೊಗು||
ಆ ನಗರೊಡ್‌ತ್ತನವೆ ಪೊರ್ಲುದ
ದೇವ ಮಂದಿರೊ ತೂದು ಸೀರ್ತೊನು
ಮೀದ್ ಕಡಲ್‌ದ ಬರಿಕ್ ಬತ್ತದ್ ತೂಯೆನದ್ಬುತೊನು||

12

ತ್ರೇತೆದಾ ಕಪಿ ವೀರನಾಕ್‌ಲೆ
ಸಾಸೊ ಸತ್ತೊದ ಗುರ್ತೊಡ್‌ತ್ತದ್
ದಾನವೆರೆ ಕುಲೊ ನಿಂಗಿ ರಾವುದ ರೂಪೊ ಸಂಕೊದವೆ||
ಆ ದನುಸ್ಕೋಡ್‌ಲ ಮೀದೇ
ಪೂಜೆ ಸಂದಯೆ ಸಿವಗ್ ಬಗ್ಗಿಡ್
ರಾಮೆಲಾ ಸಿವ ಪೂಜೆ ಮಲ್ತನ ಕ್ಷೇತ್ರೊ ಮೈಮೆದವೆ ||

13

ಅಲ್ಪಡ್‌ ಪಡ್ಡೊಯಿ ಕಡಲ್‌ದ
ದಿಕ್‌ಗೇ ತಿರ್ಗನಗ ಆಯನ
ಕಣ್ಣಾಗಂಜಿನವೈನ್ ಕೆದುಕುಲೆಡಾಯೆ ಮೀನಗನೆ||
ಬತ್ತದೇ ನಿಂಗೈರೆಗ್ ತೂಯಿನ
ಮಲ್ಲ ಮುದಲೆಲೆನಾಯೆ ಮಿತ್ತಗ್
ಒಯ್ತ್ ದಕ್ಕನಗವ್ವೆ ಸಿರಿಕುಲು ಆದ್ ಕೈ ಮುಗಿಯೊ||

14

ಅಲ್ತ ಮಣಿಪುರೊ ಪನ್ನಿ ರಾಜ್ಯೊನೆ
ಪೊಣ್ಣಲೆನ ಅಡ್‌ಲೆಡ್‌ತ್ತನ
ಪೊರ್ಲುದಾ ಪಟ್ಟಣೊನು ಸೇರಿಯೆ ಪನ್ನಿ ಸಂಗತಿನ್ ||
ರಾಣಿ ಚಿತ್ರಾಂಗದನೆ ಕೇಂಡ್‌ದ್
ಆಯನೇ ತರ್ಪಾದ್ ಮದಿಮೆನೆ
ಆದ್ ಸಂತೊಸುಡಿತ್ತೆರಾಕ್‌ಲ್ ಕೆಲವು ದಿನೊ ಮಾತ್ತೊ||

15

ಆಲೆಗಾಪಗ ಗರ್ಬೊ ಉಂತುದು
ಆನಗಾಯೆನೆ ಅಲ್ತ ಪಿದಡ್‌ದ್
ಪೋದು ಎತ್ತೆನನಂತ ಸಯನೊಗು ಬಗ್ಗಿ ಬಾವನೆಡ್||
ಅಲ್ಪ ಇತ್ತನ ಸೀರ್ತೊ ಮೀಯೆನೆ
ವಿಷ್ಟು ಪಾದೊಗು ಪೂಜೆ ಸಂದದ್
ಅಲ್ತಡ್‌ದ್ ದುಂಬೊತ್ತೆನಾಕಣಿ ಸೀರ್ತೊ ಮೀಯೆರೆಗ್||

16

ಪರಸುರಾಮೆನೆ ಕುಡರಿ ದಕ್ಕದ್
ಒದಗಯಿನ ತುಳುನಾಡ್‌ಡೊರೈಲ
ತಿರ್ಗ್ ತೂಯೆನೆ ದೈವೊ ದೇವೆರೆ ಪುನ್ನೊ ಕ್ಷೇತ್ರೊಲೆನ್||
ಬೆಂದ್ರ್ ಸೀರ್ತೊಡು ಮೀದ್ ತುಳುವೆರೆ
ಸಂಬ್ಬುಮೊದ ಮಕೆ ಸೀರ್ತೊ ಉಬರ್‌ದ
ಸಂಗಮೊಡು ಮುರ್ಕೊಂದುಲಾ ಗೋಕರ್ಣೊಗೆತ್ತಿಯೆನೆ||

17

ಬೇಸ್ಯ ತಿಂಗೊಳು ಪತ್ತನಾಜೆಲ
ಆಂಡ್ ಬಾನೊಡು ಮುಗಲ್ ಪರ್ಬುದು
ಗಾಳಿ ಬೀಜಿದ್ ಮೆಂಚಿ ದಕ್ಕದ್ ಸೆಡಿಲ್‌ದಬ್ಬರೊನೆ ||
ಕೇಂಡ್‌ದಾನಗ ಮೈರ್ ಪಕ್ಕಿಲು
ಕಾಡ್‌ಡ್‌ದ್ ಜತ್ತೊಂದು ನಲಿಪುನ
ತೂದು ಮರೈಲೊ ಸುರುತ ಬರ್ಸೊಗು ನೆನೆದ್ ಚಂಡಾಯೆ ||

|| ಪಾರ್ತನ ಸನ್ನೇಸಿ ಏಸೊ ||

ಎನ್ನೊ ತಿಂಗೊಳು ಆಂಡ್ ಪಿದಡ್ಡ್
 ಒರೊ ಬರ್ತಿಗ್ ನಾಲ್ ತಿಂಗೊಳು
 ಕ್ರಿಷ್ಟನಾ ದೋರಕೆಡ್ ಉಂತುವೆ ಪನ್ದ್ ಪಿದಡಿಯೆನೆ ||
 ಗುರೊ ತಿಕ್ಕರೆ ಬಲ್ಲಿ ಪಂಡ್ಡ್
 ಸನ್ನೆಸಿನ ಏಸೊಡುಲ ದ್ವಾರಕೆ-
 ಗೆತ್ತೆನಲ್ಪದ ನಿತ್ಯೊ ಪರ್ದಾನ್ ಕೊರ್ಪಿ ಮರತಾಡೆ ||

1

ಈ ಮರತ ಪರ್ದಾನ್ ತಿಂದ್ಡ್
 ನಾಲ್ ತಿಂಗೊಳು ನೂಕ್ಕೆ ಪಂಡ್ಡ್
 ಪಾರ್ತೆ ಉಂತಿಯೆನಲ್ಪದಾ ಸಿರಿ ಬನೊತ ಮರತಡಿಟ್||
 ಗಾಳಿ ಬರ್ಸೊಲ ಬೂರ್ನಗಾಯೆನೆ
 ಮಾಟೆದುಲಯಿಡ್ ನೂರ್ಡ್ ಕುಲ್ಲಿಯೆ
 ವಾಸುದೇವನ ಕ್ರಿಷ್ಟ ಸ್ವಾಮಿನ ದ್ಯಾನೊ ಮಲ್ತೊಂದು ||

2

ಆ ಮುಕುಂದೆನೆ ಸತ್ಯಬಾಮೆಡ
 ಪಾತೆರೊಂದೇ ಉಪ್ಪಿ ಸಮಯೊಡು
 ಪಾರ್ತೆ ಬರ್ಸೊಗು ನನೆದ್ ನಡ್ಗನ ತೆರಿಡ್ ತೆಲಿಪುನಗ||
 ಬಾಮೆ ತೂದುಲ ದಾಯೆ ತೆಲಿತ್ನೆ
 ಸ್ವಾಮಿ ಪನ್ಲೆಂದಾಲ್ ಕೇನ್ನಗ
 ಆ ಮುರಾರಿಯೆ ಪನ್ನೆನಾಲೆಡ ಗುಟ್ಟು ಬುಡಡಂದ್ ||

3

ಮಾಮಿ ಕುಂತೀ ದೇವಿನಾ ಮಗೆ
 ವೀರ ಪಾರ್ತೆನೆ ನಮನ ಪೂತವೆ
 ತೋಟೊದುಲಯಿಡ್ ಗಾಳಿ ಬರ್ಸೊಗು ನನೆದ್ ಕುಲ್ಲೊಂದೆ||
 ಈಯವಸ್ತೆಡ್ ಕೈತರೊಟ್ಟಿಯೆ
 ಜಾರ್ಡ್ ನೆಯಿತವೆ ಬರೊಣಿದುಲಯಿಗ್
 ಬೂರಿ ಲೆಕ್ಕಾಂಡ್ಂದ್ ಪನ್ನಗ ಬಾಮೆಗರ್ತಾಯ್ತಿ||

4

ಅರೊ ಆಯಿಜೆ ಸರಿಟ್ ಪನ್ನೆಯೆ
 ಬುಡ್ಡೆದನ್ನಡ ಪನ್ನಗನೆ ಸಿರಿ-
 ಕ್ರಿಷ್ಟ ಪಂಡೆನೆ ಯಾನ್ ಪೋದಾಯಡನೆ ಪಾತೆರ್ಡ್||
 ಲೆತ್ತೊನುಂದೇ ಬರ್ಪೆ ಈಡೆಗ್
 ನಮ್ಮ ಪೋಣ್ಣ ಸುಬದ್ದೆನಾಯಗ್
 ಕೊರ್ದು ಮದಿಮೆನ್ ಮಲ್ಪಿ ಗೊಬ್ಬನು ತೂಲ ಪಂಡೊಂಡೆ ||

5

ದುಸ್ಸ ದುರೋದನಗ್ ಮೆಗಿದಿನ
 ಕೊರ್ದುನಟ್ಟಣೆಡುಲ್ಲೆ ಅಣ್ಣೆನೆ
 ತಪ್ಪಯಿಜಿಡನೆ ಮದಿಮೆ ಮಲ್ತದ್ ಕೊರ್ದೆ ಕಂಡಿತೊನೆ||
 ಪೋಣ್ಣಲೆನ ಬಾಯ್ತುಲಯಿ ಒರಿಯಂ-
 ದತ್ತೊ ಗುಟ್ಟುದ ಇಸಯೊ ಪಂಡ್ರಿಯೆ
 ನಿನ್ನಡನೆ ಜಾಗ್ತೆ ಪಂಡಡ ಕೆಲಸೊ ಹಾಲಾವು ||

6

ಮುರವಿರೋದಿಯೆ ಪಾರ್ತೆ ಇತ್ತ್ನ
 ಬನೊತ ಕೈತಡೆ ಬತ್ತದಾಯಡ
 ಗುರುತೊ ತಿಕ್ಕಾಜೆ ಸ್ವಾಮಿ ಪನ್ನಗ ಪಾರ್ತೆ ತೆಲಿತೊಂದು ||
 ಕುಸಲ್ದಾಯೆಗ್ ಬಾವ ಯಾನೇ
 ಚಳಿಟ್ ನಡ್ಗುವೆ ಪನ್ನಗಾ ಹರಿ
 ನಿನ್ ಕುಲ್ಲವೆ ಸೂತ ಕೈತಲ್ ಚಳಿನ್ ಬುಡ್ಡೆಯೆರೆ||

7

ಅಣ್ಣೆನಾ ಬಲರಾಮೆ ಬತ್ತದ್
 ನಿನ್ನವೇ ಅರಮನೆಗ್ ಬರ್ಯೆರೆ
 ಒತ್ತಯೊನು ಮಲ್ತೆಡನೆ ಈಯೇ ಬರೊಡು ಆಡೆಗೆನೆ||
 ಮಲ್ಲ ಸನ್ಯಾಸಿಂದ್ ಆಯೆನೆ
 ಒಪ್ಪಿಯೆಡ ನಿನ್ನನ್ಲ ಬೋಡಯಿ-
 ನಲ್ಪ ಕುಲ್ಲದ್ ಪಾದೊ ಪೂಜೆನ್ ಬಗ್ಗಿಡೇ ಮಲ್ಪಿ||

8

ಈತ್ ಪಂಡ್ಡ್ ಪೋಯಿ ಕ್ರಿಷ್ಟನೆ
 ದ್ವಾರಕೆಡ ಮಹ ಯೋಗೊಡತ್ತೆನೆ
 ಯೋಗಿ ಒರಿ ಬತ್ತನವು ಅರಸುನ ಬಾಗ್ಯೊಡ್ವಾಪರೊನೆ||
 ಕೇರಿ ಕೇರಿಡ್ ಸುದ್ದಿ ಲಕ್ಕದ್
 ತಾನ್ ತೆರಿಯಂದ್ನವೆ ರೀತಿಡ್
 ಮಾಯಗಾರೆನೆ ಮುರವಿರೋದಿಯೆ ಇತ್ತೆ ತಿರ್ಗೊಂದು||

9

ಸುದ್ದಿನೇ ಬಲರಾಮೆ ಕೇಂಡ್ಡ್
 ಪೋಣ್ಣಲೆಡ ಸಿರಿ ಕಲಸೊ ಕನ್ನಟಿ
 ಪತ್ತವೊಂದೇ ಬತ್ತ ತೂಯೆನೆ ಟಕ್ಕ ಸನ್ನೆಸಿನೊ||
 ಅಡ್ಲೊ ಬೂರೈನೆ ಆಯನೊಟ್ಟಿಗೆ
 ಬತ್ತನಕಲ್ಲೆ ನೀಟೊ ಬೂರೈರ್
 ಪುಸ್ಸೊ ಮಾಲೆನ್ ಪಾಡ್ಡ್ ಆರತಿ ಬೆಳಗದುಂತಿಯೆರ್||

10

ಪಾದೊ ಕಾಣೆಗೆ ದೀಡ್ಡ್ ಯೋಗಿನ
ಕಾರ್‌ಗಡ್ಡೊನೆ ಬೂರುಲಾ ಬಲ-
ರಾಮೆ ಪಂಡೆನೆ ಈರೆನಾಸೀರ್ವಾದೊಡಂಕ್‌ಲೆನ ||
ಪಾಪೊಲೆನ್ ಪರಿಯಾರೊ ಮಲ್ಲೆರೆ-
ಗಾದ್ ಅರಮನೆಗೀರ್ ಬತ್ತದ್
ಯಾದವೆರೆ ಕುಲೊ ಕುಟುಮೊನುದ್ದರೊ ಮಲ್ಪಿ ಮಹಸ್ವಾಮಿ ||

11

ಯೋಗಿಲೆಂಕುಲು ತಪಸ್‌ಡುಪ್ಪುನೆ
ಕಾಡ್‌ಡೇ ಅತ್ತಂದೆ ಅರಮನೆ-
ಡೇಪೊಲಾ ಉಂತಯೊನೆ ಎಂಕ್‌ಲೆ ನಿಸ್ವೆ ಹಾಲಾವು ||
ಪೋಯಿ ಜಲ್ಲೊದ ಕರ್ಮೊದಾ ಪಲೊ
ಈ ಜಲುಮೊಡನುಬವಿಪಿ ಕಾರ್ಯೊಡು
ಆವುಸೊನು ಮುಗಿತೊನುವೆ ಪಂಡೆನೆ ಟಕ್ಕ್ ಸನ್ನೇಸಿ||

12

ಈರ್ ಪನ್ನುನೆ ಸಮೊನೆ ಆಂಡಲ
ನಾಲ್ ತಿಂಗೊಳು ನನದ ಮರ್ಯಲೊ
ಗಾಳಿ ಬರ್ಸೊಡು ನನೆದ್ ಉಂತೆರೆ ಕಸ್ವೊ ಆವಂದೊ||
ಈರೆ ತಪಸ್‌ಗ್ ಯೋಗೊ ದ್ಯಾನೊಗು
ಆಪುನವೆ ಸರಿ ಜಾಗೆಡೀರೆನ್
ಯಾನ್ ಕುಲ್ಲದ್ ಸೇವೆಗಾಪುನ ಜನೊನು ಉಂತಾವೆ||

13

ಅರಸುನೊತ್ತಯೊಗಾದ್ ಒಪ್ಪುನೆ
ಪನ್‌ಪಿ ಗ್ರೇಯಿಕೆ ಪುಟ್ಟದರ್ಜುನೆ
ಪಿದಡಿಯೆನೆ ಅರಮನೆಗ್ ಬಲರಾಮನವೆ ದಂಡಿಗೇಡ್||
ಪಿರವು ದುಂಬುಡು ಕಲಸೊ ಕನ್ನಟಿ
ಕಯಿಟ್ ಪತ್ತನ ಪೋಣ್ಣು ಪೊಂಜೊವು
ಬೆರಣೆರೆನ ಮಹ ವೇದೊ ಗೋಸೊಡು ಪೊಗೈರರಮನೆಗ್||

14

ಪೊಂಜೊವೆಗ್ ಸನ್ನೇಸಿನಕ್‌ಲೆಡ
ದಿಂಜ ಬಗ್ತಿಯೆ ಉಪ್ಪುನೆಂದ್‌ದ್
ಪೊಂಜೊವಿತ್ತನ ಜಾಗೆಡಾಯಗ್ ಪೀಟೊ ದೀಡೊಂದು||
ಆಂಜೊವೆನ ಮಹರಗಳೆ ಕಿರಿ ಕಿರಿ

ಎಂಚಿನವುಲಾ ಮೂಲು ಆವಂ-

ದ್‌ಂದ್ ಪಂಡ್‌ದ್ ನಿತ್ಯೊ ಸೇವೆಗ್ ಜನೊನು ಉಂತಯೆರೆ ||

15

ಏರ್ ಆವುಂದಾಯೆ ಗೆರೆತ್‌ದ್
ಬೇಕೊ ಮದಿಮೆನೆ ಅದ್ ಪೋಪುನ
ಪ್ರೀತಿದಾ ತಂಗಡಿಗ್ ಜೀವನೊಡೆಡ್ಡೆ ಆಯೆರೆಗ್ ||
ಆಲೆನೇ ಉಂತಾಯೆ ಸೇವೆಗ್
ಆ ಸುಬದ್ರೆಲ ಪಲಯ ಪಾತೆರೊ
ಕೇನ್ದ ಉಂತನ ತೆರಿದ್ ಕ್ರಿಷ್ಣೆನೆ ಬತ್ತೆ ಅಣ್ಣನಡೆ ||

16

ಅಣ್ಣೆ ಇಂಚಿನ ಮರ್ಲ್ ಕೆಲಸೊನು
ಮಲ್ತನೆನೆ ದಾಯೆಗ್‌ಯ ಮೆಗಿದಿನ್
ಪರ್ಯ ಸನ್ನೇಸಿನವೆ ಚಾಕಿರಿಗುಂತಯಿನೆ ದಾಯೆ||
ನಮ್ಮ ಮರ್ಯಾದಿನ್‌ಲ ಮಾರ್ಯನೆ
ಎಲ್ಲೆ ಮದಿಮೆನೆ ಆಪಿ ಪೋಣ್ಣಗ್
ಮಲ್ಲ ಕೊರತೆನ್ ಮಲ್ತ ಆಲೆನ್ ಏರ್ ಆವೆರ್‌ಯ ||

17

ದಾನೆ ಪನ್ನಯ ಕ್ರಿಷ್ಣ ಯೋಗಿನ
ಈಯೆ ಪರ್ಕುಂದಿತ್ತೆ ಪಂಡನ
ನಾಲಯಿಡ್ ಪುರಿಯಾವು ಎಂಕೇ ದಾಲ ತೆರಿಯಂದೊ||
ಏಪೊ ತೂಂಡಲ ಈಯೆ ಉಪ್ಪುನೆ
ಗೋಪಿಲೆನ ಒಟ್ಟಿಗೆನೆ ನಿನ್ನವೆ
ಹಾಲ್ ಬುದ್ಧಿಡ್ ನೆರಡ ಯೋಗಿನ್ ಆ ಮಹಾತ್ಮನ್‌ಲ ||

18

ತೆರಿನಯೆನೆ ಈಯಂದ್ ನಮ್ಮವೆ
ಮೆಗಿದಿನ್‌ಲ ಆ ಕಳುವೆ ರಟ್ಟದ್
ಕೊನೊದು ಪೋಯೆಡ ದಾನೆ ಮಲ್ಪುವ ಒರಿಯೊ ಮರ್ಯಾದಿ||
ಪನುಪುನೆನ್ ಕೇನೊಂದು ಬಲರಾ-
ಮಗ್‌ಲ ಕೋಪೊನು ತಡೆಯೆರಾಯಿಜಿ
ನಡಪು ಮುಲ್ಲಡಿತ್ತೆ ಪಂಡ್‌ದ್ ಬೊಬ್ಬೆ ಹಾಕಿಯೆನೆ||

19

ಕಣ್ಣ್ ಕಟ್ಟೆದ ಗೊಬ್ಬುಡಾ ಸಿರಿ-
ಕ್ರಿಷ್ಣ ಪಲಯನ್ ಮಂಗೆ ಮಲ್ಪುನ
ಬುಕ್ಕೊ ಮೆಗಿದಿನ ಮದಿಮೆದಟ್ಟನೆ ತಾನ್ ನೆನೆತೊಂದು||

ಅಣ್ಣ ನಿನ್ನವೆ ಮರ್ಲ್ ಬುದ್ಧಿಡ್
ಹೆಚ್ಚಿ ಕಮ್ಮಿಯೆ ಆಂಡ ಎನ್ನಡ
ಪನ್ನುವು ಬೊಡ್ಡಿಂದ್ ಪಿದಡಿಯೆ ಮುಗುರು ತೆಲಿತೊಂದು ||

|| ಸುಬದ್ರೆನ ಮದಿಮೆ ||

ಕ್ರಿಷ್ಟೆ ಗುಟ್ಟುಡುಲಾ ಸುಬದ್ರೆಡ
ಅಣ್ಣೆ ನಿನ್ನನ್ ಮದಿಮೆ ಮಲ್ತ್ದ್
ದುಸ್ಪ ದುರೋದನಗ್ ಕೊರ್ಪುನ ಅಟ್ಟಣೆಡ್ ಉಲ್ಲೆ ||
ಇತ್ತೆ ಸನ್ನೇಸ್ಯಾದ್ ಉಪ್ಪುನ
ಅರ್ಜುನೆನೆ ನಮ ಮಾಮಿನಾ ಮಗೆ
ನಿನ್ನನಾಯಗ್ ಮದಿಮೆ ಮಲ್ಪುವೆ ಈಯೆ ನಂಬೊನುಲ ||

1

ಈತ್ ಪಂಡ್ನ ಕೇನ್ದಲಾಯನ
ಕಾರ್ ಪತ್ಯಲ್ ಎನನ್ ದುಸ್ಪಗ್
ದಾರೆ ಮಯ್ತ್ದ್ ಕೊಂಡ್ ಯಾನೇ ಜೂವೊ ದೆತ್ತೊನುವೆ ||
ತಾನ್ ಮೆಗಿದಿನ್ ಒಪ್ಪುಸಾದ್ಲ
ಪಾರ್ತಡನೆ ಪಾತೆರ್ದ್ ಮದಿಮೆದ
ಸಾದಿದಾ ಚಿಂತನೆನ್ ಮಲ್ತೊಂದಿತ್ತೆನಾ ಕ್ರಿಷ್ಟೆ||

2

ಆ ಸುಬದ್ರೆನೆ ನಿತ್ಯೊ ಮಲ್ಪುನ
ಸೇವೆ ಬುಡಿಯಲ್ ಆಯ ಕೈತಲೆ
ಪಾತೆರಂದೆನೆ ಕುಲ್ಲುದಿತ್ತಲ್ ಮೋನೆ ತೂವೊಂದು ||
ಪಾರ್ತಗ್ಲ ಈ ಪೊರ್ಡುಲಾಲೆನ
ಮೋನೆ ತೂನಗ ಟಕ್ಕ ಜಪೊ ತಪೊ
ಪೂರ ಮರತ್ದ್ ಆಲೆ ಪಾತೆರಡ್ಂದ್ ಕುಲ್ಲೊಂಡೆ ||

3

ಆಯೆ ಪಾತೆರೊಡುಂದು ಆಲೆ
ಆಲ್ ಪಾತೆರೊಡುಂದು ಆಯೆಲ
ಕಾಮೊದಾ ಜರೊಟಿರ್ದೆರೆಗ್ಲಾ ಬೆಗರ್ ಅರಿದಾಂಡ್ ||
ಏರ್ದ ತೂವೆರ್ ಪನ್ದ ಜಪಸರೊ
ಬೇಕೊ ಬೇಕೊನೆ ತಿರ್ಗದಾನಗ
ಆಲೆ ತಿಗಲೆಗ್ ಕೈಯೆ ತಾಂಟ್ನಗಾಯೆ ಕೈನೊಯ್ತೆ||

4

ಒಯ್ತಿ ಕೈನ್ಲ ಗಟ್ಟಿ ಪತ್ಯಲ್
ಇರ್ದೆರ್ಲ ಸರಿ ಮೋನೆ ಮೋನೆನ್
ದಿಸ್ಪಿ ದೆಪ್ಪಂದವುಲು ತೂಯೆರ್ ಮನಸ್ಸೊಂಜಾದ್ ||
ಕಣ್ಣ ಕಟ್ಟೆದ ಜಪೊನು ಮಲ್ತ್ದ್
ಪೊಣ್ಣನಾಸೆಡ್ ಪಾರ್ತೆ ದಿನೊ ದಿನೊ
ಮರೈಲೊನೆ ಕರಿದಾಂಡ್ ಲೆಕ್ಕೊಗು ನಾಲ್ ತಿಂಗೊಳುದ||

5

ಒಂಜಿ ದಿನೊ ಸುಬೊಗಳಿಗೆಡಿರ್ಲಡ್
ತಂಗಡಿಗ್ ಸಿರಿಕ್ರಿಷ್ಟೆ ಪಾರ್ತನ್
ಕಂಡನಿಯ ಸ್ತಾನೊಡುಲ ಕುಲ್ಲಯೆ ಮದಿಮೆದಾ ಕ್ರಮೊಟು ||
ಅಪ್ಪೆ ದೇವಕಿ, ಉಗ್ರಸೇನನ
ಅಮ್ಮೆ ಆ ವಸುದೇವನೆದುರುಡು
ಗುಟ್ಟುಡಾಂಡೀ ಮದಿಮೆ ಬಲರಾಮಗ್ಲ ಗೊಂತಾಯ್ತಿ ||

6

ಮದಿಮಲೆನ್ ಮದಿಮಯನ ಒಟ್ಟಿಗೆ
ರತೊಟು ಕುಲ್ಲದ್ ಇರ್ದೆ ಕಡಮಡು-
ದಕ್ಲ್ ಗೊಂತಿದ್ಯಂದಿ ನಮುನೆಡ್ ಇತ್ತೆರಾಪಗನೆ ||
ಬೊಲ್ಪು ಆಂಡ್ಂದರಮನೆಡ್ಲಾ
ಜೆತ್ತದಿತ್ತನ ಚಾಕ್ರಿದಾಕ್ಲ್
ಲಕ್ಕಿಯೆರ್ ನೆಲ ಗಟ್ಟಿಯೆರೆ ಸನ್ನೇಸಿ ಕೋಣೆದವೆ ||

7

ತೂನಗನೆ ಸನ್ನೇಸಿ ಇದ್ದೆನೆ
ರಾಣಿ ವಾಸೊಡು ಆ ಸುಬದ್ರೆಲ
ತೋಜುಜೆರ್ ಪಂಡೊಂದು ನಾಡ್ಯೆರ್ ಸುತ್ತಮುತ್ತಡೆನೆ ||
ಓಲುಲಾ ತೋಜಂದೆ ಪಂಡೆರ್
ಮಾತೆರೆಡ ಈ ಸುದ್ದಿನಾ ಬಲ-
ರಾಮ ಕೇಂಡ್ಡ್ ಕೋಪೊಡೇ ತನ ಪರುನು ಕಡೆವೊಂಡೆ ||

8

ಪೊಣ್ಣ ರಟ್ಟವೆ ಪರ್ಕು ಸನ್ನೇಸಿ
ಕ್ರಿಷ್ಟೆ ಪಂಡ್ನ ಸತ್ಯೊ ಆಂಡ್ಲ
ಸೈನ್ಯೊದಾಕ್ಲ್ ಬರಡ್ ಪಂಡ್ಡ್ ಲೆತ್ತೆ ದಳಪತಿನೆ ||
ನಮ್ಮ ತಂಗಡಿ ನೀಯೆ ಕಳೆಯನೆ
ಮರೈದಿಲ ಪೋಂಡತ್ತೊ ಸೈನ್ಯೊನು
ಲೆಪ್ಪುನೆನೆ ದಾಯೆಗ್ಲಯ ಪಂಡೆನೆ ಕ್ರಿಷ್ಟೆ ಪಲಯಡೆನೆ ||

9

ಮೆಗಿಯ ಪಾತೆರೊ ಕೇನ್ದ ಬಲರಾ-
ಮಗ್ಲ ಕೋಪೊನು ತಡೆಯೆರಾಯಿಜಿ
ಅಡಪಿ ನಾಯೆರ್‌ದಂಚಿನಾಯುದೊ ಬುಕ್ಕೊ ಬಿರು ಪಗರಿ||
ಕಯಿಟ್ ಗೆತೊನುದು ಪಾರ್ಯೆ ರಬಸ್‌ಡ್
ಹದೊಟು ಪೋಪುನ ತೇರ್‌ದೆದುರುಗು
ಪಗರಿ ರಟ್ಟಯೆ ಕಳ್ಳ ಓಡೆಗ್ ಪಾರ್ವ ಪಂಡೊಂದು ||

10

ಪಾರ್ತೆ ತಿರ್ಗ್‌ದ್ ತೂದು ಎದುರುಗು
ಬಾಣೊ ಒಂಚೆನ್ ರಾಪದಾನಗ
ಯಾದವೆರೆ ಮದ ಸೇನೆ ಎತ್ತ್‌ದ್‌ಲಾಂಡ್ ಆಡೆಗೆನೆ ||
ಯೋಗಿಯೇ ತಾನ್‌ಂದ್ ಪಂಡ್‌ನ
ನಾಲಯಿನ್ ಕೊಯ್ಯಂದೆ ಬುಡಿಯೆಡ
ದೇವಕಿನ ಆಜೊಂದು ನಾಯೆರ್‌ಡಾಕ್ಯೆ ಬಲರಾಮೆ ||

11

ಪೆಟ್ತ್ ತಪ್ಪದ್ ಪಾರ್ತೆ ಪಗರಿನ್
ದೆಪ್ಪುನಗ ಸಿರಿಕ್ರಿಷ್ಟೆ ಬತ್ತ್‌ದ್
ಅಡ್ಲೊ ಉಂತುದು ಪಲಯನ್‌ಲ ಆ ಬರಿಟ್ ಉಂತಾದ್||
ಗುಟ್ಟುಡೇ ನಿಜೊ ಪಂಡೆ ಕೋಪೊನು
ಬುಡ್ಲ ಈ ಸರಿ ತೂಲ ಆಯೆನೆ
ನಮ್ಮ ಮಾಮಿನ ಮಗೆನೆ ಅರ್ಜುನೆನತ್ತೊ ತೂವೊನುಲ||

12

ಮೆಗಿದಿ ಬಾವನ ಬುಡೆದಿಯಾಯ್ಕೆಟ್
ಕೊರತೆ ಎಂಚಿನ ಪನ್‌ಗೆ ನಮೊ ನನ
ಪಿರನೆ ಪೋಪುನವೆಡ್ಲೆ ಪನ್ನಗ ತರೆಕ್ ಹಾಕೊಂದು||
ಕುರುಕುಲೇಸಗ್ ಕೊರ್ಪು ಮೆಗಿದಿನ
ಮದಿಮೆ ಗಡ್ಡೆಡೆ ಮಲ್ಪೊಡುಂದುದು
ನೆನೆತ್‌ನವೆ ಹಾಲಾಂಡೆ ಪಂಡೆನೆ ಅರಸು ಬಲರಾಮೆ||

13

ಕೌರವಗ್ ದಾನೆಂದ್ ತೆರಿಪವೆ
ವಾಸುದೇವೆನೆ ಆದ್ ಗೊಬ್ಬನೆ
ಮಾನೊ ದೆತ್ತನೆ ಕ್ರಿಷ್ಟ ಪಂಡ್‌ದ್ ತಿಗಲೆಗಾಕೊಂಡೆ ||
ಮಾತೆರ್‌ಲ ತರೆನಡಿಕ್ ಪಾಡ್‌ದ್
ದ್ವಾರಕೆಗ್ ಪಿದಡಿಯೆರ್ ಪಾರ್ತೆನೆ
ತೇರ್ ನಡಪಯೆನಿಂದ್ರ ಪ್ರಸ್ತೊಗು ಬುಡೆದಿನೊಟ್ಟಿಗೆನೆ||

14

ರಾಜದಾನಿಗ್ ತೇರ್‌ನೆತ್ತದ್
ಸಾದಿದಾ ಬರಿಟಿತ್ತಿ ಇಲ್ಲ್‌ದ
ಮಾಡ್‌ಡೆಟುಂತಾದ್ ಜಪುಡಯೆನಾ ಸುಬದ್ರೆನ್‌ಲ||
ಈಯೆ ಅರಮನೆದೆದುರು ಇತ್ತ್‌ನ
ಬೀದಿಡೆನೆ ನಡತೊಂದು ಪೋಲಯ
ತೂಯಿನಾಕ್‌ಲ್ ನಿನನ್ ಮರ್ಯೆಡುಲಯಿ ಪೊಗ್ಗವೆರ್||

15

ಅಲ್ಲ ದ್ರೌಪದಿ ನಿನಡ ಕೇನ್ವಲ್
ಒಲ್ಲದಾಲ್‌ಂದಪಗ ಈ ಪನ್
ಗೊಲ್ಲೆದಿಯೆ ತಾನೀಡೆ ತಿರ್ಗೆರೆ ಬತ್ತ್‌ನಾಲ್‌ಂದ್||
ನಿನ್ನನೇ ಸಂಸಯೊಡು ತೂನಗ
ಎತ್ತೆನಾಡೆಗ್ ಯಾನ್ ಪಂಡ್‌ದ್
ಮುತ್ತೊ ಕೊರ್ಡಾಲ್‌ನಲ ಕಡಪುಡುದಾಯೆ ಪಿರವುಂತ್ಯೆ||

16

ಸಾದಿ ಬೀದಿಡೆ ಅರಮನೆದ ಎದು-
ರಾಲ್ ತಿರ್ಗೊಂದುಪ್ಪುನಗನೇ
ಮೇಲ್ ಮಾಳಿಯೊಡಿತ್ತಿ ಪೊಂಚೊವು ತೂಯೆರಿಂಬಲೆನ್ ||
ದ್ರೋಪದಿಡ ಪನ್ನಗನೆ ಲೆಪುಡದ್
ಪ್ರೀತಿಡೇ ಕುಲ್ಲಾದ್ ಕೇಂಡಲ್
ಏರ್ ಈ ಒಲ್ತಾಲ್ ಪನ್ ಪನ್ ಎನಡ ಪೊರ್ಲೆದಿಯೆ||

17

ಗೊಲ್ಲೆರೆನ ಜಾತಿಡಲ್ ಗೋಕುಲೊ-
ಡಿತ್ತನಾಲೇ ಯಾನ್ ಮುಲ್ಲದ
ಪೊರ್ಪುದರಮನೆದೆದುರು ಬೀದಿಡೆ ಪೋಪೆ ನಡತೊಂದು||
ಪನ್ನಗನೆ ಸಂಸಯೊಡು ಕೇನ್ವಲ್
ಸತ್ಯೊ ಪನ್ ಈ ಸಿರಿಯೊ ನಾಗೆರೆ
ಕನ್ನಿಕೆನೊ ಕಳು ಪನ್ನ ಗೊಲ್ಲೆದಿ ಪೊಣ್ಣು ಈಯತ್ತ್||

18

ಪಿದಯಿಡ್‌ದಲಾ ಕೊಂಬು ವಾದ್ಯೊಲೆ
ಸೊರೊನು ಕೇನ್ವಗ ನಿಲ್ಕ ತೂಯಲ್
ಮುನಿನ ಏಸೊಡು ಬರ್ಪುನರ್ಜುನನಪಗ ದ್ರೌಪದಿಯೆ||
ಅರಿಯಣೊದ ಆರತಿನ್ ಬೆಳಗದ್
ಉಲಯಿ ಕುಲ್ಲದ್ ಪೇರ್ ಕೊರ್ಯಲ್
ಮೆಗಿದಿಗ್ಲ ಈ ಕೊರ್ಲ ಪನ್ನಗ ಆ ಸುಬದ್ರೆನ್‌ಲ ||

19

ತೂದು ಕೇಂಡಲ್ ಆಲೆ ಸಂಗತಿ
ವಾಸುದೇವನ ಮೆಗಿದಿ ಎಂಕಲ
ಮೋಕೆದಾ ತಂಗಡಿಯೆ ಆಯ್ತು ಎನ್ನ ಬಾಗ್ಯೊತ್ತೊ||
ಪೇರ್ ಪರ್ಪದ್ ಒತ್ತ ಕುಲ್ಲದ್
ಆರತಿನ ಬೆಳಗನಗ ಪೋಣ್ಣಲು
ರಾಗೊ ಒಯ್ತರ್ ನರ ಸುಬದ್ರೆಗ್ ಮಂಗಳಾರತಿದ||

20

ಅಪ್ಪೆ ಕಾರ್ನ್ ಬುಡೆದಿನೊಟ್ಟುಗು
ಪತ್ಯೆನರ್ಪನೆ ಪಲಯ ಮಗಲೆನ
ತರ್ಕ್ ಪತ್ತದ್ ಕೊರೊಲಾಸೀವಾದೊ ಮರ್ಮಲೆಗ್||
ಅಣ್ಣನಾಕಲೆ ಕಾರ್ ಪತ್ತದ್
ತನ್ನ ಯಾತ್ರೆಡ್ಲಾಯಿನನುಬವೊ
ಕ್ರಿಷ್ಟನೇ ತಂಗಡಿನ ಕೊರೊನೆ ಪನ್ದ ತೆರಿಪಾಯೆ ||

21

ಮಾತೆರೆಗ್ ಸಂತೋಸು ಮದಿಮನೆ
ಆದ್ ಬತ್ತನ ಪಾರ್ತ ಮೋನೆನ
ತೂಯೆರೆಗ್ ಸೇರಿಯೆರ್ ಪ್ರಜೆಕುಲು ಮಾತೆರರಮನೆಡ್||
ಚಾವಡಿಡ್ ಕುಲ್ಲಾದ್ ಅಕ್ಲೆಗ್
ಸೀತೊ ಯಾತ್ರೆನ್ ಮಲ್ತನರ್ಪನ
ಬೇಟಿ ಮಲ್ಪಯೆ ಧರ್ಮನಂದನೆ ದಿಂಜ ಸಂತೊಸುಡು ||

|| ಬ್ರಾಣ ಏಸೊದ ಅಗ್ನಿ ಪಾರ್ತನೆದುರುಂತ್ಯೆ ||

ಆ ಸುಬದ್ರಾರ್ಪನೆರ್ ಸುಕೊ ಸಂ-
ತೋಸುಡೇ ಐನೊಸೊ ಕರಿನಗ
ಆಣ್ ಬಾಲೆನೆ ಆಂಡ್ ಪೊರ್ಪದ ಪುಣ್ಯೊವಂತೆರೆಗ್||
ದೇವತೆಲೆ ದುಂದುಬಿದ ಸೊರೊನೇ
ಬಾನೊಡೊರೊಲ ದಿಂಜಿದಾನಗ
ಜಾತಗೊನು ದೋಯಿಸೆರ್ ಬರೆಯೆರ್ ಪಲೊನು ಪಂಡೊಂದು||

1

ಕಲಿತನೊನೆ ನಿಲೆ ಊರ್ಡ್ ರಟ್ಟಿದ
ಬಲೊಕು ಮೇರುವೆ ಕಟ್ಪದಾಂಡ್ಲ

ಜಯೊ ಸಿರಿನ ಕೊದಿ ಪೋಪಿ ಕಾಲೊನೆ ಊರು ತೆರಿದಾಂಡ್||
ಧರ್ಮಜ್ ಸಂತೋಸು ಬೀಮನ
ಅಬ್ಬರೊದ ಸರಿ ತೆಲಿಕೆ ಪಾರ್ತನ
ಗತ್ತದಾಡಂಬರೊನೆ ಮಾದ್ರಿನ ಚೋಕ್ಲೆ ನಲಿಪಾಟೊ ||

2

ಧರ್ಮಜ್ ಬೀಮಗ್ಲ ಪಾರ್ತಗ್
ಬುಕ್ಕೊಲಾ ಸಹದೇವ ನಕುಲೆರೆ-
ಗಲ್ಲ ಜೋಕುಲು ಪುಟ್ಟುದೊನೆ ದ್ರೌಪದಿಗ್ ಒರ್ಸೊರ್ಸೊ||
ಆಕ್ಲೆಡ್ ಸುತ ಸೋಮೆ ಪೊರ್ದುದ
ವೀರ ಸಿರಿ ಪ್ರತಿವಿಂದ್ಯ ನಾ ಸುತ-
ಕೀರ್ತಿಯೇ ಸುತ ಸೇನೆ ಕಡೆತಯೆನೇ ಸತಾನೀಕೆ ||

3

ಪಾಂಡವೆರ್ ತೆರಿಪಯೆರ್ ಸುದ್ದಿನ್
ಪ್ರೀತಿದಾ ಪೊದ್ದೆರೆಗ್ಲಾಪಗ
ಯಾದವೆರ್ ಸಿರಿಕ್ರಿಷ್ಟ ದೇವಕಿ ಬುಕ್ಕೊ ಬಲರಾಮೆ||
ಮಾತ ಬತ್ತೆರ್ ಇಂದ್ರ ಪ್ರಸ್ತೊಗು
ಆಕ್ಲೆನ್ ಎದೊಂದು ಧರ್ಮಜೆ
ಬಾರಿ ಸಮ್ಮನೊ ಮಲ್ತ್ ಕುಲ್ಲಯೊ ತನ್ನ ಅರಮನೆಡ್||

4

ತತ್ತೊ ಸಾಸ್ತೊಲು ನಾಡ್ ನಾಡ್ ದ್
ತಿಕ್ಕಂದಿತ್ತನ ಸತ್ಯೊ ತಾನೇ
ಕ್ರಿಷ್ಟಯಾದಾಲ ಬತ್ತನಾಡೆಗ್ ಬಗ್ಗೆ ಬಂದುಲೆಡೆ ||
ಧರ್ಮನಂದನಗವುಲು ತರೆನ್ಲ
ಬಗ್ಗದಾನಗ ತೂಯಿನಾಕ್ಲ್
ಸತ್ಯೊ ಬಗ್ಗನೆ ಧರ್ಮೊ ನೀತಿಗೊ ಬಗ್ಗಿ ಬಾವನೆಗೊ||

5

ನೆಕ್ಕ್ ತೀರ್ಪನು ಬ್ರಹ್ಮ ದೇವೆರೆ
ಕೊರ್ದಿ ಏಗಿತೊದಾರ್ ಕ್ರಿಷ್ಟನ
ಗೊಬ್ಬ ದುಂಬುದ ಬಾಲ ಲೀಲೆದ ಪನ್ದಲಾಚಿರೊಡು||
ಬಗ್ಗಿಡೇ ತೂವೊಂದು ಇತ್ತೆರ್
ಕ್ರಿಷ್ಟನಾ ಕಾರ್ಪತ್ಯೆ ಧರ್ಮಜೆ
ತರ್ಕ್ ಪತ್ತದ್ ಕೇಂಡನಾಯಡ ನಿನ್ನನಾಟಗೊನು||

6

ದಾಯೆ ತೋಜಯ ಪಂಡನಾಪಗ
ನಾಲ್ ಪುರುಸಾರ್ತೊಲೆಡ್ ಧರ್ಮೊನೆ
ಮೇಲ್ ಐನ್ಲ ಸರಿಟ್ ಪಾಲಿಪುನಾಯೆ ಈಯತ್ತೊ||

ಬಾವೆ ಪ್ರಾಯೊಡು ಮಲ್ಲೆ ಹಿರಿಯಯೆ
ಯಾನ್ ಕಿರಿಯಯೆ ಪನ್ನ ಪತ್ತನೆ
ಪೋಯಿ ಉಲಯಿಂದಾಯೆ ಮಾಮಿನ ಕಾರ್ ಪತ್ತಿಯೆನೆ||

7

ಮೆಗಿದಿಯಲ್ಲೆನ್ ತೂದು ಪಾತೆರ್-
ದಕ್ಲೆನವೆ ಬಾಲೆಲೆಗ್ ಕನತ್ನ
ಉಡಿಗಿರೆನ್ ಕೊರ್ದವೆನ್ ತರ್ಕ್ದ ಮುತ್ತೊ ಕೊರ್ದಾಯೆ||
ಪಿದಯಿ ಚಾವಡಿಡಿತ್ತಿ ಪೀಟೊಡು
ಮುರವಿರೋಧಿಯೆ ಕುಲ್ಯೆ ಪೊಲ್ಲುಡು
ಎಡತ್ ಬಲತ್ಡ್ ಪಾಂಡು ಬಾಲೆಲು ಉಂತುದುಪ್ಪುನಗ ||

8

ಪೇರ್ ಕಡಲ್ದ ನಡುವೊ ಬಾನೊದ
ಜಾಗೆನೋ ವೈಕುಂಟೊ ಪೀಟೊನೊ
ಯೋಗಿ ರುಸಿಕುಲೆನಾತ್ಮೊ ಹೃದಯೊದ ದಿವ್ಯೊ ಮಂದಿರೊನೊ
ಮಾತ ಸಚರಾಚರೊದ ಜೀವೊದ
ಚೇತನೊದ ಸರಿ ನಿಲೆನೊ ಪನ್ನುನ
ಏರ್ ತೆರಿವೆರ್ ಕ್ರಿಷ್ಟೆ ಕುಲ್ಲದ್ ಇತ್ತಿ ಚಾವಡಿನೆ ||

9

ಕೆಲವು ದಿನೊ ಸಂತೊಸುಡು ಬಿನ್ನೆರ್
ಅರಮನೆಡ್ ದಿನೊ ಕಳೆದ್ ಮಾತೆರ್
ಪಿದಡುನಟ್ಟನೆ ಮಲ್ತದಾಕ್ಲ್ ಪೋಯೆರಲ್ಲಡ್ಡ್||
ಮುರಹರನೆ ಪೋವಂದೆ ಪಾರ್ತನ್
ಲೆತೊನುದೇಪೊಲ ಇಂದ್ರ ಪ್ರಸ್ತೊಡು
ತಿರುಗೊಂದಿತ್ತೆನೆ ಊರು ಕಾಡ್ನ್ ಪೂರ ತೂವೊಂದು||

10

ಒಂಜಿ ದಿನೊ ಮುಕುಲಿರ್ದೊಟ್ಟುಗು
ದಿಂಜ ತಿರ್ಗದ್ ಬಚ್ಚಿದಾನಗ
ಉಂತಯೆರ್ ಅಕ್ಲೇರಿ ತೇರ್ನ್ ಮರತ ಮುದೆಲ್ಡ್ಲ ||
ದೊಂಬುಡಕ್ಲೆಗ್ ಬಾಚೆಲಾಯ್ಚೆ
ದೊಂಡೆದಾ ಪಸೆ ಆಜಿದಾನಗ
ಗುಂಡಿಡೊಂಜೆಟ್ ದಿಂಜ ನೀರ್ನ್ ತೂದು ಶ್ರೀ ಕ್ರಿಷ್ಟೆ||

11

ಯಾನ್ ಮೀಯೆರೆ ಪೋಪೆ ಆತ್ಮೆಟ
ಈಯೆ ಉಂತಲ ಮೂಲು ಪಂಡ್ಡ್
ಪಾರ್ತನವುಲೇ ಬುಡುದು ಪೋಯೆನೆ ನೀರ್ ಕಿರೆತಾಡೆ||

ಆತ್ ಪೊರ್ತುಗು ದಿವ್ಯೊ ತೇಜಿದ
ಬ್ರಾಣೆ ಒರಿ ಬತ್ತನಯೆನರ್ದುನ
ತೇರ್ದಾ ಕೈತಲ್ಡ್ ಉಂತಿಯೆ ತೆಮ್ಮೊ ಲತ್ತೊಂದು ||

12

ಬತ್ತದುಂತನ ಬೆರಣ ಗುರ್ತೊನೆ
ಅರ್ದುನಗ್ ಆವಂದೆ ಕೈ ಮುಗಿ-
ದಲ್ಪ ಉಂತಿಯೆ ಬ್ರಾಣೆನೆದುರುಡು ಬಗ್ಗಿ ಬಾವನೆಡ್ ||
ವೇದೊ ಮಂತ್ರೊನು ಪನ್ನಲಾಸೀ-
ವಾರ್ದೊ ಮಲ್ತನ ಕ್ರಮೊನು ತೂನಗ
ಏಗಿತೊಡು ಬ್ರಮ್ಮೆಂದ್ ತೆರಿಯೆನೆ ಪಾರ್ತೆ ಗುಣವಂತೆ ||

13

ದಾನೆ ಕಾರ್ಯೊಡು ಬತ್ತರೀಡೆಗ್
ಸೇವೆ ಮಲ್ಪದ್ ಎನ್ನ ಜಲ್ಮೊನು
ಸಾರ್ತಕೊನು ಮಲ್ಪೆರೆಗ್ ಬತ್ತರೊ ಸ್ವಾಮಿ ಪನ್ಲೆನಡೆ||
ಪಾರ್ತ ಕೇನ್ಲ ಎಂಕ್ ಬಂಜಿನ್
ಪೂರ್ತಿ ದಿಂಜವುನಾಸೆ ಮಾತ್ಸೊನೆ
ಸೀರ್ತೊ ಯಾತ್ರಲ ದೇವ ಕಾರ್ಯೊಲ ಅವ್ವೆ ಆದುಂಡು||

14

ಟಕ್ಕ್ ಬ್ರಾಣೆನೆ ಪನ್ನಿ ಪಾತೆರೊ-
ಡಿತ್ತಿ ಗುಟ್ಟುನು ತೆರಿಜೆನರ್ದುನೆ
ಕೊರ್ದೆ ಈರೆಗ್ ಎಂಚಿನಾವೊಡು ಕೇನ್ಲೆ ಪನ್ನುನವೆ||
ಗಟ್ಟಿದಾ ಸೊರೊ ಕೇನ್ಲೆ ಕ್ರಿಷ್ಟೆನೆ
ಬತ್ತದಾಡೆಗ್ ಪಂಡೆ ಬ್ರಾಣಗ್
ಕೊರ್ದಿ ಬಾಸೆನ್ ಪಂಡನಯ ಈ ಬೆರಣೆ ಟಕ್ಕ್ದಯೆ ||

15

ಸರಿಟ್ ತೂವೊನು ಅಗ್ಗಿ ದೇವನ
ಬಡವುನಂತವಿ ಕೆಲಸೊ ತೀರೊಯಿ
ಸುರೆರೆ ಬನೊ ಕಾಂಡವೊನು ಕೇನ್ಲೆನೆ ಬಂಜಿ ದಿಂಜಯೆರೆ||
ಕೊರುವೆ ಪಂಡ್ಡ್ ಬಾಸೆ ಪಾಡ್ಡ್
ಸುರಪಡನೆ ಕಾದುನವೆ ಕಸ್ತೊನು
ತಿಗಲೆಗೊಯ್ತದ್ ಪಾಡ್ಯ ಪಂಡ್ಡ್ ಕ್ರಿಷ್ಟೆ ತೆಲಿತೊಂಡೆ ||

16

ಕಸ್ತೊ ಎಂಚಿನ ಬಾವ ಇಂದ್ರನ್
ಗೆಲ್ತದಾಯನ ಅಡಿಗಿದಾಯಗ್

ಇತ್ತೆ ಅಡ್‌ದೇ ಕೊರ್ದೆ ಕಾಂಡವ ಬನೊನು ಕಂಡಿತೊನೆ||
ಎನ್ನ ಪೌರುಸೊ ತೂಲಯಾನೇ
ಕೊರ್ದು ಬಾಸೆನ್ ತೀರ್ದೆ ನಿಚ್ಚಯೊ
ನಿನ್ನವೇ ದಯೊಟೆಂಕ್ ಅಲ್ಮನೊ ಇದ್ದಿ ಸಿರಿ ಕ್ರಿಷ್ಟ||

17

ವೀರ ಪಾರ್ತನ ಸೌರೊದಾ ನುಡಿ
ಕೇಂಡ್‌ದಗ್ಗಿಯೆ ಪನ್ನೆ ಮೆಚ್ಚಿದ್
ಆಣ್ ಈಯೇ ಪಂಡ್‌ದಾಯನ ಗಿರ್ದೆ ಮಾರಪುನು||
ತೇರ್ ಕುದುರೆಲು ಬಿಲ್ಲ ಬಾಣೊಲು
ಮಾತ ರಟ್ಟೆನ ತೂನಗಾಚಿರೊ
ಪಾರ್ತಗವೆನ್‌ಲ ಕೊರ್ದು ಎನ್ನವೆ ಬಂಜಿದಿಂಜಾಲ ||

18

ಅಗ್ಗಿ ಕ್ರಿಷ್ಟಾಜುರ್ನೆರೆ ಎದುರುಡು
ಇರ್ದೆರೆಗ್ ರತೊ ಬೇತೆ ಬೇತೆನೆ
ಬಿಲ್ಲ ಬಾಣೊನು ದೀಡ್ಯೆನೇ ಕೌಮೋದಕೀ ಗದನ್ ||
ಬೊಳ್ಳಿ ಕುದುರೆಲೆ ತೇರ್‌ನೊಯ್ಪರೆ
ಕಟ್ಟಿಯೆರ್ ಕೊಡಿ ಮರಕ್ ಮಂಗನ್
ದಿನ್ಸದಾ ಗರುಡನ್‌ಲ ನೇಲ್ತೆರ್ ಬಾವ ಬಾವಲ್ಲ||

|| ಇಂದ್ರನ ಸೋಲು ||

ಹರಿಯೆ ಉರಿತ್‌ನ ಪಾಂಚ ಜನ್ಮೊದ
ಸೊರೊಕು ಸೊರೊನೇ ಕೊರ್ದುಲರ್ಜುನೆ
ಉರಿತನಾಯನ ಸಂಕೊ ಗಟ್ಟಿಡೆ ಮಲ್ಲ ಗರ್ಜನೆಡ್||
ಪಗರಿ ರಾಪಯೆ ಮಿತ್ತಗಪಗನೆ
ಸುರೆರೆ ಲೋಕೊದ ಬನೊಟು ಸೂತವೆ
ಕಿಟಿಯೆ ರಟ್ಟುನ ತೂದು ಕಾಪುನ ಬಟೆರ್ ಪಾರಿಯೆರ್||

1

ಸೂತ ಏರಿಡ್ ರಾಪಿ ಪಕ್ಕಿಲು
ಬೂರೊ ಬೆಯ್ತಾದ್ ಗಂದೊ ಚಂದನೊ
ಸೂಟು ಪೊತ್ತುದು ಪುಗೆನೆ ಅಲಸನ್‌ಗಾಂಡ್ ಕಮ್ಮೆನೊನೆ||
ಪಾರ್ತಡನೆ ಸುರಲೋಕೊದಗ್ಗಿಯೆ
ಪಾರುವೊನೆ ಮರಿ ಕಂದಡಿಲು ಅವ
ರಾಪಿ ಪಕ್ಕಿಲು ಮುಗೊರ್ ಮಾತಲ ಬುಡಡ ಕೊರೊಡೆಂಕ್ ||

2

ಯಾನ್ ನಿನ್ನವೆ ಆಸೆ ಪೂರ್ತಿಗ್
ಮಾತ ಕೊರ್ದೆನೆ ನಿನ್ನ ಬಂಜಿಗ್
ಬಾಣೊ ರಾಪದ್ ಆ ಸುರೇಸನ ಬನೊನು ಕಂಡಿತೊನೆ||
ಈತ್ ಪಂಡ್‌ದ್ ಮಂತ್ರ ಬಾಣೊನು
ರಾಪದಾನಗ ಏಳ್ ನಾಲಯಿ
ನೀರ್‌ದೇ ಸೂ ಲಕ್ಕದಾಂಡ್‌ಲ ಪೊತ್ತುದಲೊಂದು ||

3

ಪೊತ್ತುದರ್ಲನ ಬನೊನು ದಿವಿಚೆರ್
ಮುಟ್ಟ ಬರೈರೆ ಪೋಡಿದಾಕ್‌ಲ್
ಕ್ರಿಷ್ಟನರ್ಜುನೆ ಮಲ್ತಿ ಲೂಟಿನ್ ಪೋದು ಪನಿಯೆರೆಗ್||
ಪಾರಿಯೆರ್ ಇಂದ್ರಡನೆ ಪನ್ನಗ
ಸಾರೊ ಕಣ್ಣೆಡೆ ಕಿಟಿನ್ ರಟ್ಟಿದ್
ಏರ್ ಮಲ್ತನೆ ಪನ್‌ಲೆ ಪನ್ನಗ ಪನ್ನೆರಕ್‌ಲೊಟ್ಟು ||

4

ನಿನ್ನ ಮಗೆನೇ ಪಾರ್ತೆ ಅಗ್ಗಿಯೆ
ನಿನ್ನಯೆನೆ ಹರಿ ನಿನ್ನ ದೇವರ್
ನಿನ್ನಕ್‌ಲೆ ಮಾತೆರ್ಲ ನಿನ್ನವೆ ಬನೊನು ಪೊತ್ತವೆರ್||
ಎನ್ನಕ್‌ಲೆ ಎಂಕಿಂಚ ಮಲ್ತೆರೊ
ಅಗ್ಗಿ ನಿಂಗ್ವೆನೊ ನಮ್ಮ ಕಾಂಡವೊ
ಪನ್ನಿ ಪೊರ್ದುದ ಬನೊನು ಕಸ್ವೊದ ಕಾಲೊ ಗತಿಯತ್ತೊ ||

5

ನರೆರೆಗಿಂಚಿನ ಸಗ್ಗಿ ಬತ್ತನೆ
ಹರಿನ ದಿಸೆಟೀ ಆದ್ ಉಪ್ಪೊಡು
ಮುಕುಲೆ ಪುನೆಪೆರ್ ಪನ್ನ ಯಾನ್‌ಲ ದಾಯೆ ಪೋಡಿಯೊಡು||
ಬರಡ್ ಸೇನೆಲು ಅಂತ್ರೊ ಕಾಲೊದ
ಮುಗಲ್ ದಿಂಜಡ್ ಕ್ರಿಷ್ಟ ಪಾರ್ತೆರೆ
ಗರುವೊನುಂತವೆ ಪನ್ನ ಪಿದಡಿಯೆ ಸಚಿನ ಕೋಣೆಡ್‌ದ್||

6

ಬಾನೊಡೊರೆಲ ಮುಗಲ್‌ದಿಂಜಿದ್
ಗಾಳಿ ಬೀಜಿನಗಾಂಡ್ ಮೆಂಚಿದ
ಕೋಲು ಜಗ ಜಗ ಸೆಡಿಲ್ ಹಾಕ್‌ದ್ ಬರ್ಸೊ ಸುರುವಾಂಡ್||
ಆನೆ ಸೊಂಡಿಲ್‌ದಾತ್ ತೋರೊದ
ದಾರೆ ನೀರ್‌ದ ಬರ್ಸೊ ಬೂರುದು
ಕಾಂಡವೊನೆ ಸರಿ ಮುರ್ಕ್‌ದಾಂಡ್‌ಲ ನೀರ್ ಎಕೊಂದು||

7

ಮಾತ ಸಾಗರೊನೊಂಜೆ ಉಸುಲುಡು
ಆವಿ ಲಕ್ಕದ್ ಮಿತ್ತ್ ದೇಪುನ
ರಾಸಿ ಮುಗಲ್‌ಡ್ ಬೂರಿ ಬಸೊಡು ಬೊಲ್ಲೊ ಏದಾಂಡ್
ತೂಲ ಅರುಜನ ಇಂದ್ರೆ ಬಸೊಡ
ದಾರೆ ಜಪುಡದ್ ಎನನ್ ತೆಕ್ಕವೆ
ಯಾನ್ ತಿನ್ನುನೆ ಎಂಚ ಪಂಡನೆ ಅಗ್ಗಿ ಬೇಜರೊಡು||

8

ಬರೊ ಗಡ್ಡೊನೆ ಮಲ್ತೆ ಪಗರಿಡ್
ರಟ್ಟಯೆನೆ ಮುಗಲ್‌ನ್‌ಲ ಬಾಣೊಡು
ಸುತ್ತಲಾ ಸುಳಿಗಾಳಿ ಬೀಜಿದ್ ಸೂವೆ ಅಲೊಂಡು||
ಪೊತ್ತನಗ ದೂರೊಡ್ಡು ತೂಯಿನ
ಸೊರೊದರಸುಗು ಬೆಚ್ಚ ಏರ್‌ದ್
ತರ್ರಯೆನೆ ಐರಾವತೊನುಲಾ ತಾನೆ ಪೋಪೆಂದ್||

9

ಆತ್ ಪೊರ್ತುಗು ಸುರೆರೆ ಸೇನೆಡ್
ಬಾನೊ ದಿಂಜಿದ್ ಆಂಡ್ ಸುರಪನ್
ತೂದು ಕ್ರಿಷ್ಣಾರ್ಜುನರೆ ಪಾರ್ವೆರ್ ಪಂಡೆರೊರಿಯೊರಿಯೆ||
ಬಾಣೊ ಬುಡಿಯೆರ್ ಪಾರ್ತ ಕ್ರಿಷ್ಣರೆ
ಮೇಲ್ ತಾಗಂದ್‌ನವೆ ರೀತಿಡ್
ಆಯುದೊಡು ರಟ್ಟಾದ್ ಅಕ್‌ಲೆಗ್ ಪೆರಪ ಹಾಕಿಯೆರ್||

10

ಪಾರ್ತೆ ರಾಪಯಿ ಪಗರಿ ತಾಗ್‌ದ್
ಏತೊ ವೀರೆರ್ ಪಾರ್ಡ್ ಪೋಯೆರ್
ದೇವರಾಜೆನೆ ಉಂತಿ ಉಂತಿಂದೇತೊ ಪನ್ನಗಲ||
ಕೇಂಡ್‌ಜೆರ್ ಆ ಪಾರ್ತ ಕ್ರಿಷ್ಣರೆ
ವೀರಗರ್ಜನೆಡಕಲೆ ತಿಗಲೆಡ್
ಆಂಡ್ ಬಜಿಲೆಡ್ವನವೆ ಸೌದೊಲ್ಲ ಏರ್ ಉಂತುವೆರ್||

11

ಪಾರುನಕ್‌ಲೆಗ್ ದೈರೊ ಪಂಡ್‌ದ್
ದೇವರಾಜೆನೆ ಎತ್ತೆನಾಯನ
ಆನೆನೇರ್‌ದ್ ತನನ್ ಪುಗರುನ ಸೂತೆರೊಟ್ಟಿಗೆನೆ||
ಆನೆ ಬನ್ನಗ ಪಾರ್ತ ಕ್ರಿಷ್ಣರೆ
ದಾನೆ ಮಲ್ಪರ್ ತೀರೊ ನಿಕ್‌ಲೆಗ್
ಪಾರುನೆಡ್ವನೆ ಪಂಡೆರೇತ್‌ಲ ಸೂತ ಮಾಗದೆರ್||

12

ತೆಲಿತ್‌ದಾ ಸಿರಿ ಕ್ರಿಷ್ಣೆನಿಂದ್ರಡ
ರುಸಿಕುಲೆನ ಮುಡ ನುರ್ಕನಾಯೆನೆ
ಲಡಯಿದಾ ಕಳತಾಡೆ ಬತ್ತನ ಎಂಕ್ಲು ಪೊಣ್ಣಲಯ||
ಕೆಲೆತ್‌ನಯೆ ಕೋರ್ಯಾದ್ ಇತ್ತೆನೆ
ಬಲಿಪಿ ಕುದ್ದೆನೆ ಆಲ ಪನ್ನಗ
ಬಿರುನು ದೆರ್ತ್‌ದ್ ಬಾಣೊ ಬುಡಿಯೆನೆ ಪಾರ್ತ ಕ್ರಿಷ್ಣರೆಗ್ ||

13

ಆತ್ ಪೊರ್ತುಗು ಬ್ರಮ್ಮ ದೇವೆರ್
ಬಾನೊ ಸಾದಿಡೆ ಬತ್ತೆರಾಡೆಗ್
ಆ ಸುರೆಂದ್ರೆನೆ ಅಡ್ಡೊ ಬೂರಿಯೆ ಸಿಪ್ಪಿ ಕರ್ತೂಗುಲ ||
ಏರ್‌ಪಂಡ್‌ದ್ ಗೆರೆತ ಮುಕುಲೆನ್
ತೂದು ಸಸರೊನೆ ಮಲ್ಪುವನ ಸುರ-
ಪಾಲ ನರನಾರಾಯಣೆರ್ ಈ ಕ್ರಿಷ್ಣ ಪಾರ್ತೆರ್‌ಯ ||

14

ಬ್ರಮ್ಮ ದೇವೆರ್ ಲಡಯಿನುಂತದ್
ಸತ್ಯ ಲೋಕೊಗು ಪೋದುಲಾನಗ
ತಿರ್ರಯೆನೆ ಐರಾವತೊನು ಪಿರ ತನ್ನ ಅರಮನೆಗ್||
ಅಗ್ಗಿ ದೇವಗ್ ಕೊರ್ರ ಬಾಸೆನ್
ಅರುನೆನೆ ತೀರಾಯೆರಾದೇ
ಅಚ್ಚಯೊದ ಪಗರಿಲೆನ್ ರಟ್ಟಯೆ ಕಾಂಡವಾ ಬನೊಕು ||

|| ಕಾಂಡವ ಬನೊ ಅಗ್ಗಿ ಬಂಜಿದುಲಯಿ||

ಅಗ್ಗಿಯರ್‌ದ್ ನಿಂಗ್‌ದೇತೋ
ಕುಕ್ಕು ಪೆಲ ಪಾಲಾಸೊನತ್ತೊಸು
ಬಿಲ್ವಪತ್ತೆನ್ ಗೋಳಿ ಸಂಪಯಿ ಲಿಂಬೆ ಗುಗ್ಗುಲೊನು||
ಚಿಕ್ಕು ಪೇರೊಲು ಮಾಪಲೊದ ದಯಿ
ಕೈಪುರೊನುಲಾ ಕಂಚಿ ಪುಳಿತವೆ
ಎಲ್ಯ ಮಲ್ಲೆನ್ ಪೂರ ನಿಂಗ್‌ದ್ ಕಂಗ್ ತಾರೆಲೆನ್||

1

ಚಂದ್ರಕಾಂತಿದ ಕಲ್ಲ ಕಟ್ಟಿದ
ಮಂಟಮೆಡ್ ಪೊದಿದಿತ್ತಿ ಪೊರ್ಲುದ

ರಂಗ್ ರಂಗ್ಡ್ ಪರ್ಬಿ ಬೂರುಲೆ ನಿಂಗ್‌ದಾಂಡ್ಯೆನ್ ||
ಮಂದಿರೊಲೆ ಮಾಳಿಯೊದ ಗೋಡೆಡ್
ಸುಂದುದಿತ್ತನ ಬಣ್ಣೊದಿರೆಕುಲು
ಬಂಜಿದುಲಯಿಗ್ ಆಂಡ್ ಅಗ್ನಿನ ಪೈರ್ ಪಚ್ಚೆಗುಳು ||

2

ಪೊರ್ಲು ಬನೊ ಸಿರಿ ಪನ್ನಿ ಪೊಣ್ಣೆನ್
ಅಗ್ನಿ ಕಾಮುಕೆನೊಯ್ತ ಮದನನ
ಗೊಬ್ಬು ಗೊಬ್ಬಿಯೆ ಪನ್ದ ಕ್ರಿಷ್ಟನೆ ರಂಗ್ ಮಲ್ಪುನಗ ||
ಸಿಮ್ಮ ಸಾರ್ವಲೊಗುಳು ಆನೆಲು
ಮಲ್ಲ ಪಂಜಿಲು ಕರಡಿ ಪಿಲಿಕುಲು
ಕೆಮ್ಮ ಜಿಂಕೆಲು ಕಾಟಿ ಕಡವೊಲು ಪೊತ್ಯೊ ಮುಜುಮಂಗ್ ||

3

ಕುಪ್ಪುಳುಲ ಮೈರುಗುಳು ಕೋಗಿಲೆ
ಕಕ್ಕೆ ಪುದಕುಲು ಜಕ್ಕ ಪಕ್ಕಿಲು
ಕೊಟ್ಟು ಕಡಲೆ ಗುಮ್ಮೆ ಮುಲ್ಕುನ ಪಕ್ಕಿ ಕುಕ್ಕುಸುಲು ||
ಕುಂಡಕೋರಿಲು ಮೀನ ಕೊಲ್ಲಿಲು
ಕೊಂಗುರ್ ಟಿಂಟಿರಿ ಕೊಂಚ್ಚೆ ಗಿಡಿಕುಲು
ಎಂದಲೆಲು ಗುರ್ಬಿಗುಳು ಬೂರಿಯೊ ಅಗ್ನಿಯರ್ಲನಗ ||

4

ಸೂತ ಕಾವುಗು ಕಿರೆಟ್ ಇತ್ತನ
ನೀರ್ ಕೊದಿತ್‌ದಾಲಾನಗಪಗನೆ
ಮೀನುಗುಳು ಸೈತ್ತ್‌ದ ಮಲಂಕನೆ ಇತ್ತೊ ನೀಂದೊಂದು ||
ತಾಮರೆದ ಬೂರ್ಕಂಡೆ ಬೆಯ್ತದ್
ಆಂಡ್ ಸುತ್ತಲ ನೀಲ ಕಲ್ಲಡ್
ನಾಲ್ ದಿಕ್ಕ್ಡೆ ಕಟ್ಟಿ ಕಟ್ಟಿಲು ಮಾತ ಮಜಿಯಾಯೊ ||

5

ಪುದೆಲ್ ಪೊತ್ತುದು ಉಲಯಿ ಬಜವುಗು
ಕಿಟಿಯೆ ರಟ್ಟೆದ್ ಮರತ ಸುತ್ತಲ
ಗುಮುಲುದಾಂಡ್‌ಲ ಸೂವು ಅಪಗನೆ ಪುಗನೆ ದಿಂಜೊಂದು ||
ಸುರೆರೆ ಲೋಕೊಗು ಆಂಡ್ ಕತ್ತಲೆ
ಕಬಿದ್ ಬಾನೊಡು ಸೂರ್ಯ ಚಂದ್ರೆರ್
ಮೇಣಕುನಾ ದಾರಗೆಲು ದೆಂಗಿಯೊ ಪುಗತ ಕತ್ತಲೆಡ್ ||

6

ವಿತಳ ಲೋಕೊಗು ಗರುಡೆ ನುರ್ಕುವೆ
ಪನ್‌ಪಿ ಪೋಡಿಗಿ ಆದ್ ತಕ್ಕಕೆ

ಮಗನ್ ಬನೊಟುಂತಾದೆ ದುಂಬುಡು ಇಂದ್ರನೊಪ್ಪಿಗ್ಡೆ ||
ಬುಕ್ಕೊ ಆಯನ ಕುಟುಮೊ ದಿಂಜಿದ್
ಅಸ್ತ ಸೇನಡ್ಡಾದ್ ಸಂತೆತಿ
ಉರಿಯಾದೇ ಬನೊಟು ಸುತ್ತಲ ಇತ್ತೆರಲ್ಲ ||

7

ಈ ಮಹಾಬನೊ ಅಗ್ನಿಗರ್ಪಿತೊ
ಆದ್ ಇತ್ತನ ಜೀವೊ ರಾಸಿನ
ಪೂರನಿಂಗ್‌ದ್ ಮಿತ್ತಗಲೆಸುನ ಸೂವೆ ತಿಗೊಂದು ||
ಪುಂಚೊದುಲಯಿಗ್ ಸರ್ಪ ಜಾತಿನ
ನಿಂಗಿಯೆರೆ ಬೋಡಾದ್ ಪೊಗ್ಗುದು
ದಿಂಜಿದಾನಗ ಸೈತ್ತೊ ಮರಿಕುಲು ಸೂಟು ಬೆಯ್ತೊಂದು ||

8

ಅಸ್ತ ಸೇನೆನೆ ಸೂನು ತಪ್ಪದ್
ಮಿತ್ತ ಬಾನೊಡೆ ರಾದ್ ಪೋನಗ
ಅಗ್ನಿ ಆಯನ್ ತೂದು ಪಾರ್ತಡ ಪಂಡೆ ತೂಲಂದ್ ||
ಎನ್ನ ಬಾಯಿದ ಮುದ್ದೆ ರಟ್ಟನೆ-
ನಿತ್ತೆ ಒಯ್ತದ್ ಪಾಡ್ಲ ಬಂಜಿಗ್
ಪನ್ನಗನೆ ಆ ಪಾರ್ತೆ ಬಿಲ್ಲ್‌ಗ್ ಬಾಣೊ ಕೊಲ್ಪಾಯೆ ||

9

ಬಾಣೊ ರಟ್ಟೆದ್ ಆಯ್ನು ಸಾತ್‌ಗ್
ಬೀಲೊ ಸೈರೊಲ ತುಂಡು ರಟ್ಟೆದ್
ಬೂರ್ಡ್ ಅಗ್ನಿಗ್ ಅಸ್ತ ಸೇನಡ ಒರಿನೆ ಜಿಡೆಮಾತ್ತೊ ||
ಜಾಲಿ ಕಟ್ಟಿದ ಮಿತ್ತದಾ ಜಿಡೆ-
ಟಾಯ ಜೂವೊನೆ ಒರಿದ್ ಪಂಡೆನೆ
ಪಾರ್ತ ಮರಪಡ ನೆಂಪು ದೀಡೊನು ಪಗನ್ ಸಂದಾವೆ

10

ರಾದ್ ಪೋದಾಯೆನೆಲ ಕರ್ಣನ
ಮೂಡಿಗ್ಡೆ ಸೇರೊಂದು ದೆಂಗ್‌ದ್
ಏರೆಗಲ ತೆರಿಯಂದೆ ಇತ್ತೆನೆ ಗಾಳಿ ನಿಂಗೊಂದು ||
ಪೂರ ಪೊತ್ತುದು ಮಂದ ಪಾಲನ
ನಾಲ್ ಬಾಲೆಲು ಆಯಿ ಪಕ್ಕಿಲು
ಮಾತ್ತೊ ಒರಿಯೊನೆ ಮುನಿನ ಸಂತಾನೊಗುಳು ಆಯೆನೆಟ್ ||

11

ಬನೊಟೆ ಇತ್ತನ ಅಸುರ ಸಿಲ್ಪಿಯೆ
ಮಯೆನೆ ಪಾರ್ತನ್ ಪುಗರ್ ಪುಗರ್‌ದ್

ತನನ್ ಬದ್‌ಕವೊಡುಂದು ಕಾರ್‌ಗ್ ಅಡ್ಲೊ ಬುರಿಯೆನೆ||
ನಾಲ್ ಪಕ್ಕಿಲು ಆ ಮಯಾಸುರೆ
ಮಾತ್ರೊ ಬದ್‌ಕ್‌ನೆ ಕಾಂಡವೊದ ಬನೊ
ಪೂರ ಪೊತ್ತುದು ಆನಗನೆ ದೇವೇಂದ್ರ ಬತ್ತನಯೆ||

12

ತನ್ನ ಪ್ರೀತಿದ ಮಗನ ಸಾಸೊನು
ಮೆಚ್ಚಿದಾಯೆನೆ ಸೂರ್ಯ ತೇಜಿದ
ರತ್ತೊದಾ ಮಣಿ ಕಿರಿಟೊ ಕೊರ್ದುಲ ಹರಿಗ್ ಪುಡ್ಯಾಡ್||
ತನ್ನ ಸ್ತಾನೊನು ಸೇರೈ ಕಾಂಡವೊ
ಪೊತ್ತಯೆನೆ ಕ್ರಿಷ್ಟೆತ್ತೊ ಪನ್ನುನ
ತತ್ತೊ ಚಿಂತನೆ ಮಲ್ಲೆ ಗುರುಕುಲೆಡಾಯೆ ಕೇನೊಂದು||

13

ಕ್ರಿಷ್ಟ ಪಾರ್ತೆರ್ ಇಂದ್ರಪಸ್ಸೊಗು
ಬತ್ತನಾಕ್‌ಲ್ ಧರ್ಮಜಾದಿಲೆ-
ಡಲ್ಪ ಪಂಡೆರ್ ಕಾಂಡವಾ ಬನೊ ಪೊತ್ತಯಿನ ಕತೆನ್||
ಮಾತೆರೆಗ್ ಈ ಕತೆನ್ ಕೇಂಡೆದ್
ಆಚಿರೊನೆ ಆದಕ್‌ಲ್ ಕ್ರಿಷ್ಟಡ
ದಾಯೆ ಪೊತ್ತಯಿನೆಂದ್ ಕೇಂಡೆರ್ ಬಗ್ಗಿ ಬಾವನೆಡ್||

14

ಮಲ್ಲತಿಗೆದ್ಯೊಬವೊಡು ಅಂತೊನೆ
ಪನ್ನಿ ಸಂಗತಿ ಲೋಕೊ ಲೋಕೊಗು
ಪಿನ್ನಯೆರೆ ಬೋಡಾದ್ ಪಂಡೆನೆ ಧರ್ಮನಂದನಡ||
ಅಲ್ಲಡೆದ್ ಸಿರಿ ಕ್ರಿಷ್ಟೆ ಪಿದಡಿಯೆ
ತನ್ನ ಮಾಮಿನ ಕಾರ್ ಪತ್ತೆದ್
ಬುಕ್ಕೊ ತಂಗಡಿ ಬಾವನಕ್‌ಲೆಡ ಬರೈ ಪಂಡೊಂದು||

ಸಾರದೆನ ದಯೊಟೇನ್ ಬರೆಯಿನ
ಆದಿ ಪವೊನೆ ಪೂರ್ತಿ ಆಯ್ಕೆಟ್
ನಾಲ್ ಸಂದಿಡ್ ಒಂಬೊರ್‌ನೂದೆತ ಮಿತ್ತೆಡೇಲ್ ಪದೊ||
ಬಾಮಿನೀ ತುಳು ಸಡ್ವದಿಡ್ ನಿಜೊ-
ಟಾ ಕುಮಾರವ್ಯಾಸ ಭಾರತೊ-
ದಾದರೊಡು ಬುಕ್ಕೆನ್ನ ಚಿಂತನೆಡೇನ್ ಬರೆಯಿನೆನೆ||

ತುಳು ಕೆಲಿಂಜ ಭಾರತೊ

ಸಬಾ ಪರ್ವ- ಸುರುತ ಸಂದಿ

ಪಾಂಡವೆರೆಗ್ ಮಾಯಾಸುರನ ಕಾಣಿಗೆ

ವಾಸುದೇವನೆ ಇಂದ್ರಪ್ರಸ್ತೊದ
ತೇರ್‌ನೇರ್‌ದ್ ಕುಲ್ಲೆನಾಪಗ
ಸಾರತಿಯೆ ತಾನಾದ್ ಕುಲ್ಲೆನೆ ಧರ್ಮನಂದನೆನೆ ||
ಬೀಮೆ ಬೊಳ್ಳುಡೆ ಬುಡ್ಡದಾನಗ
ಚಾಮರೊನು ಬೀಜಾಯನರ್ದನೆ
ಪೂಲು ಬಚ್ಚಿರೆ ತಂಚಿ ಪತೊನುದು ಮಾದ್ರಿ ಬಾಲೆಗುಳು ||

1

ತೇರ್‌ದ್ ಪಿರವುಡೆ ಉಂತ್‌ದಿತ್ತೆರ್
ನಾಲ್ ರಂಗೊದ ಸೇನೆದೊಡಕರ
ನಾಕಲೆನ ಒಟ್ಟಿಗೆನೆ ದಾಮ್ಯೆರ್ ಮಾತ ಪರಿವಾರೊ ||
ಮೋನೆ ಬಾಡದ್ ಉಂತ್‌ನಾಪಗ
ವಾಸುದೇವನೆ ಕೈನ್ ದೇರ್ತ್‌ದ್
ಮಾತೆರೆಗ್ ಅನು ಕೊರ್ದು ಪಿದಡಿಯೆ ಬಾರಿ ಬೇಜರೊಡು ||

2

ಅರೊ ಸಾದಿಗ್ ತೇರ್‌ನೆತ್ತದ್
ಧರ್ಮನಂದನೆ ಪೆರಪ ಬನ್ನಗ
ಬತ್ತರಾಯನ ಒಟ್ಟುಗಿತ್ತನ ಮಾತ ಪರಿವಾರೊ ||
ಕ್ರಿಷ್ಟೆ ದ್ವಾರಕೆ ಸೇರ್‌ದಾನಗ
ರಕ್ಕಸೆರೆ ಮಹ ಸಿಲ್ವಿಯಾಯಿನ
ಮಲ್ಲ ಕಾರ್ನಿಕೊದಾಯೆ ಮಯೆನೇ ಅಡ್ಡೊ ಬೂರೊಂಡೆ ||

3

ಕಾಂಡವೊನು ಪೊತ್ತಾನಗರ್ಜನೆ
ಪ್ರಾಣೊ ಕಾತ್‌ದೆ ಎನ್ನ ಪಂಡ್‌ದ್
ಪಾಂಡವೆರೆಗೆನ್ನೊಂಜಿ ಕಾಣಿಗೆ ಕೊರೊಡು ಪನ್ನುನವೆ ||
ಆಸೆಡೇನೇ ಒಂಜಿ ಮಂಟಪೊ
ಪೂರ್ತಿ ಮಲ್ತದೆ ಐನ್ ಕೊಂಡೊದು
ಆಕ್‌ಲೆಗ್ ಕೊರ್ಪುನೆನ್ ತೂಯೆರೆ ಅರಿಕೆ ಮಲ್ತೊಂಡೆ ||

4

ಕ್ರಿಷ್ಟೆಲಾ ತೂದ್ಯೆನ್ ಪುಗರಿಯೆ
ಪತ್ತ್ ಸಾವಿರೊ ಮಾರ್ಪು ಉದೊದ
ಸುತ್ತ ಜಾಗೆಡ್ ಮಣಿತ ಕಲ್ಲೆಲೆ ಕೆತ್ತ್ ಕುಲ್ಲಯಿನ ||
ಪದ್ಮರಾಗೊದ ಗೋಡೆ, ಸುತ್ತಲ
ಮುತ್ತು ರತ್ನೊಲೆ ಜಲ್ಲಿ ಜಾರಿಡ್
ಸೊರ್ದುದಾನೆದ ಲೆಕೊನೆ ತೋಜುನ ಅರಸು ಮಂಟಮೆನ್ ||

5

ಬಾರಿ ತೆರಣೊದ ಎನ್ನೊ ಸಾವಿರೊ
ವೀರ ರಕ್ಕಸನಕ್‌ಲ್ ತುಂಬುದು
ರಾಜ ಚಾವಡಿಮಲಯಿಡುಂತದ್ ಧರ್ಮನಂದನನ ||
ಕಾರ್‌ಗಡ್ಡೊನೆ ಬೂರ್ದುಲಾ ಮಯೆ
ತಾನ್ ಕನತ್‌ನ ಕಾಣಿಗೆನ್ ತೂ-
ದೀರ್ ಕೈಕೊನೊಡುಂದು ಪಂಡೆನೆ ಬಗ್ಗಿ ಬಾವನೆಡ್ ||

6

ಬುಕ್ಕೊ ಬೀಮಗ್‌ಲಡ್ಡೊ ಬೂರುದು
ಮಲ್ಲ ಗದೆ ಕೊರ್ದಾದ್ ಪಾರ್ತಗ್
ಕೊರೈ ವಿಜಯೊದ ಸಂಕೊ ಪುದರ್ದ ದೇವದತ್ತೊನುಲ ||
ಪೊರ್ದುದಾ ಮಂಟಪೊನು ಧರ್ಮಜೆ
ಸುತ್ತ ತಿರ್ಗದ್ ತೂಯೆ ರಕ್ಕಸ
ಸಿಲ್ವಿನಾ ಕೈ ಚಲಕ್‌ನೇತ್‌ಲ ಪುಗರ್ ಪುಗರೊಂದು ||

7

ಆ ಮಯಗ್ ರಕ್ಕಸೆರೆ ಕೂಟೊಗು
ಬಾರಿ ಸಮ್ಮನೊ ಮಲ್ತದೇತ್‌ಲ
ರಾಜ ಮರ್ಯಾದಿವೆ ಉಡಿಗರೆ ಕೊರ್ದು ಕಡಪುಡಿಯೆ ||
ಏರಿಯೆರೆ ಮಂಟಮೆನ್ ಮೂರ್ತೊನು
ತೂದು ಸಾಮಂತೆರೆಗ್ ಓಲೆನ್
ಊರುಗೊರೆಲ ಕಡಪುಡಿಯೆನೇ ಪೊದ್ದೆರಿಪ್ಪೆರೆಗ್ ||

8

ಆ ಮಹಾ ಉಚ್ಚಯೊನೆ ಏಳ್ವಿನೊ
ಬಾರಿ ಸಂಬ್ರಮೊ ಗೌಜಿಡಾಂಡ್ಲ
ಏಳ್ವೊ ಗಳಿಗೆನ್ ತೂದು ಮಂಟಪೊದುಲಯಿ ಪೊಗ್ಗಿಯೆರ್ ||
ಸಿಮ್ಮೊ ಪೀಟೊಡು ಅರಸು ಕುಲ್ಲಿಯೆ
ದತ್ತ ಬಲತ್ತ್ಡ ಮೆಗ್ಯನಾಕ್ಲ್
ಕುಲ್ಲಿಯೆರ್ ಸಾಮಂತೆರೆದುರುಡು ಮಾತ ಪರಿವಾರೊ ||

9

ಬರಿಟ್ ದ್ರೌಪದಿ ಆ ಸುಬದ್ದನೆ
ಕಡೆಟ್ ಏತ್ಲ ಪೊಣ್ಣುಲಿತ್ತೆರ್
ಆಕ್ಲೆ ಪೊರ್ಲುಡು ಕಣ್ಣ ಕಾಂತಿಡ್ ಸಿರಿನ ಸಿಂಗಾರೊ ||
ರಂಗ್ ರಂಗ್‌ದ ರತ್ನೊಲೆಡ್ ಸರಿ
ಮಂಟಮೆದ ಸುತ್ತುಡುಲ ಕಣ್ಣೆದ
ಮಂಚಿ ರಟ್ಟುನ ಪೊರ್ಲು ಪನಿಯೆರೆ ತೀರ್ಪೊ ಕವಿಜನೊಕು ||

10

ವಾದ್ಯೊ ಮೇಳೊಲು ನಮನೆ ನಮನೆದ
ಬೀಣೆ ತಂಬುರಿ ತಾಳೊ ಮದ್ದೊಳಿ
ಗಾಯನೊಗು ಸರಿ ಸರಿತ ಹಿಮ್ಮೇಳೊಗುಳು ಬಗೆ ಬಗೆತ ||
ನಾಟ್ಯೊಗಾರೆರ್ ನಟನೆದಾಕ್ಲ್
ಗಾನೊ ಗಂದರ್ವೆರ್ ಸೇರ್‌ದ್
ದೇವಲೋಕೊದ ಸಬಿತ ನಮನೆಡೆ ಆಂಡ್‌ಲಾಸ್ತಾನೊ ||

11

ಬ್ರಾಣೆರೆಗ್‌ಲಾ ದಾನೊದರ್ಮೊನು
ಕೇಂಡ್ ಕೇಂಡ್‌ದ್ ಕೊರೈತೆಲ್
ಮಾತೆರೆಗ್ ಸಂತೋಸು ಆಪುನ ಲೆಕೊನೆ ಬೋಡಯಿನ ||
ಊರುಡೊರೈಲ ಧರ್ಮರಾಜನ
ಕೀರ್ತಿನೆತೆಲ್ ಪುಗರುನಾಕ್ಲೆ
ದೂರುನಾಕ್ಲ್ ಏರ್ಲ ಇದೈರ್ ನಾಲ್ ವರ್ಣೊಲೆಡ್ ||

|| ನಾರದೇರ್ ಆಸ್ತಾನೊಗೆತ್ತೈರ್ ||

ಪಾಂಡು ರಾಜಗ್ ಪುಟ್ಟೆನಾಕ್ಲ್
ಪಾಂಡವೆರ್ ಅತ್ತೆಂದ್ ಕೌರವ
ನಾಕ್ಲೆಪೊಲ ಪನ್ನೆರ್‌ಂದ್‌ದ್ ನಾರದಾ ರುಸಿಯೆ ||

ರಾಜಸೂಯೊದ ಯಾಗೊ ಮಲ್ಪದ್
ಪಾಂಡವೇರೆಡ ಪಾಂಡು ರಾಜಗ್
ಸ್ತಾನೊ ಸೊರ್ಗೊಡು ತಿಕ್ಕುನಂಚಿನೆ ಮಲ್ಪೊಡ್‌ಂದ್‌ದ್‌ಲ ||

1

ಪಾಂಡು ಬಾಲೆಲು ಪನ್ನಿ ಹಕ್ಕದ
ಸ್ತಾಪನೆನ್ ಮಲ್ಪುನವೆ ಯಾಗೊನು
ತಾನೆ ಮಲ್ಪವೊಡುಂದು ಬತ್ತೆರ್ ಅರಸುನರಮನೆಗ್ ||
ಬೀಣೆದಾ ಸೊರೊ ಕೇನ್ದ್ ಧರ್ಮಜೆ
ನಾರದೇರೆನೆದುಕೊಂದು ಕುಲ್ಲಯೆ
ಪೀಟೊಡೇ ಪೊಸ ಮಂಟಮೆಡ್ ಸಬಿತುಳಯಿ ಕೈಮುಗಿದ್

2

ರಾಣಿ ದ್ರೌಪದಿನೊಟ್ಟುಗಾಯೆನೆ
ಪಾದೊ ಪೂಜೆನ್ ಮಲ್ತೆ ಕಾಣೆಗೆ
ದೀಡ್ಡ್ ಕಾರ್‌ಗ್ ಅಡ್ಡೊ ಬೂರಿಯೆ ಬಗ್ಗಿ ಬಾವನೆಡ್ ||
ಕೇನ್ ಧರ್ಮಜ ನಿನ್ನ ಯೇಗಿತೊ
ಏರೆಗುಂಡಿನಿ ಮಯನ ಮಂಟಪೊ
ಕಾಣೆಗೆದ ಸೊತ್ತಾದ್ ತಿಕ್ಕನ ನಿನ್ನ ಬಾಗ್ಯತ್ತೊ ||

3

ನಿನ್ನವೇ ಮೆಗಿ ಬೀಮ ಸೇನನ
ಸಗ್ಗಿ ಏರೆಗ್ ಉಂಡು ಪಾರ್ತೆನೆ
ಪತ್ತ ಪುದರ್‌ಡ್ ಕೀರ್ತಿ ಪಡೆಯಿನ ವೀರಗೇರೆದುರು ||
ಸತ್ತೊ ಸಾಸಿಲು ಮಾದ್ರಿ ಜೋಕುಲು
ಉತ್ತಮೆರ್ ನಿನ ಪೊದ್ದೆರಿಷ್ಟೆರ್
ಸತ್ತೊ ಧರ್ಮೊಡು ರಾಜ್ಯೊನಾಳುನ ರಾಜರುಸಿ ಈಯೆ ||

4

ನಿನ್ನ ರಾಜ್ಯೊಡು ಕಾಲ ಕಾಲೊಡು
ಬರೊ ಬೂರುದು ಬುಳಿತ ಬಾಗ್ಯೊಡು
ಉನ್ನುನೆಕ್ ತಿನ್ನುನೆಕ್ ಬಡತನೊ ಇದ್ದಿ ಜನೊಕುಲೆಗ್ ||
ಮಿತ್ತ ಲೋಕೊದ ಅನಿಮಿಸಾದಿಲು
ಯಜ್ಞೊ ಯಾಗೊದ ಹವಿಸ್‌ನುಂಡುದು
ಕುಸಿಟೆ ಉಲ್ಲೆರ್ ನಿನ್ನನೇಪೊಲ ಪುಗರ್ ಪುಗರೊಂದು ||

5

ಸುರೆರೆ ಲೋಕೊಡು ನಿನ್ನ ಪುದರ್‌ನ್
ಪುಗರುನೆನ್ ಕೇನೊಂದು ತಿರ್ಗಿಯೆ
ಅವುಲು ಇತ್ತೆರ್ ದುಂಬುದಾಕ್ಲ್ ಸ್ತಾನೊ ಪಡವೊಂದು ||

ನೈಗನ್ ಬರತನ್ ದುಂದುಮಾರನ್
ಸಗರ ನವುಸನ್ ಕಾರ್ತಿವೀರ್ಯನ್
ನಳನ್ ಜನಕನ್ ರಾಜ ದಸರತನೇನ್ ತೂಯೆತ್ತೊ ||

6

ಆ ಯಯಾತೀನ್ ಕುರುನು ಹಸ್ತೀನ್
ತೂದುಲಾನಗ ನಿನ್ನ ಅಮ್ಮನ್
ಪಾಂಡುರಾಜನ್ ಯಾನ್ ನಾಡಿಯೆನೋಲು ಉಲ್ಲೆಂದ್ ||
ಸೂರ್ಯ ಲೋಕೊಡು ಇದ್ಯೆ ವಿಷ್ಣುನ
ಲೋಕೊಡುಲ ತಿಕ್ಕಜೆನೆ ಸತ್ಯೊದ
ಲೋಕೊ ಬ್ರಹ್ಮನ ಅವುಲುಲಾ ಇದ್ಯೆತ್ತೊ ನಿನ್ನಮ್ಮೆ ||

7

ಅಮ್ಮೆರೆಗ್‌ಲಾ ಮಿತ್ತ ಲೋಕೊಡು
ಮಲ್ಲ ಸ್ತಾನೊನೆ ಇದ್ಯೊ ಸ್ವಾಮಿಯೆ
ನೆಕ್ಕ ಕಾರಣೊ ದಾನೆ ಪಂಡ್‌ದ್ ಕೇನ್ನಗಾ ರುಸಿಯೆ ||
ಸೈತ್ತಿ ಸುದ್ದಿನ್ ಕೇನ್ದ ಬೀಸೈನೆ
ನಿನ್ನ ಅಮ್ಮನ ಸಾವು ಮಲ್ಲದ್
ದುಕ್ಕೊದಾ ಜೋಕುಲೆನ್ ಬುಡೆದಿನ್ ಬುಡುದು ಬೆರಣೆರೆಡ ||

8

ಸೈತ್ತನಾಯಗ್ ಪಿಂಡೊ ಪಾಡುನ
ಹಕ್ಕ ಜೋಕುಲೆಗತ್ತೊ ಧರ್ಮಜ
ಮಲ್ಲಿ ಸಾವುಡು ಸುದ್ಯೊ ಆಯಿನೆ ಮಾತ್ತೊ ಸಾವಲೆರ್ ||
ಸಾಪೊ ತಿಕ್ಕದ್ ಸೈತ್ತನಾಯಗ್
ಯಾಗೊ ಮಲ್ಲದ್ ಪಿಂಡೊ ಪಾಡೊಡು
ಏರ್‌ಲಾ ಪಂಡ್‌ಜೆರೊ ನಿನ್ನಡ ತೆರಿನ ಜ್ಞಾನಿಗುಳು ||

9

ಆಯ ಪ್ರೇತೊಗು ಮೋಕ್ಷೊ ಆತ್‌ಜಿ
ಆತ್ಮೊ ಸಾಂತಿಡ್ ಸ್ತಾನೊ ತಿಕ್ಕಜಿ
ನೇಕ್ ನಿಕ್‌ಲೇ ಜೋಕುಲಾಯ್‌ಟ್ ಮಲ್ಲಿ ಸಾದನೆನ್ ||
ರಾಜ ಸೂಯೊದ ಯಾಗೊ ಮಲ್ತ್‌ದ್
ಪಾಂಡು ರಾಜಗ್ ಸೊರ್ಗೊ ಲೋಕೊಡು
ಸ್ತಾನೊ ಕೊರ್ಪಲೆ ನಿಕ್‌ಲ್ ಬಾಲೆಲು ಪಂಚ ಪಾಂಡವೆರ್ ||

10

ರುಸಿನ ಪಾತೆರೊ ಕೇನ್ದ ಧರ್ಮಜೆ
ತಿಗಲೆಗೇ ಹಾಕೊಂದು ಬುಲ್ಲೆನೆ
ಕುರುನ ವಂಸೊದ ಕೀರ್ತಿದಾರೆಗ್ ಸೊರ್ಗೊ ಇದ್ಯೆತ್ತೊ ||

ಇನಿಯೆ ನಿಷ್ಠೆಯೊ ಮಲ್ಲೆ ಈರೆನ
ಎದುರುಡೇ ನಿಜೊ ರಾಜ ಸೂಯೊನು
ಮಲ್‌ಪವುನ ರುತೊ ಪತ್ನಿ ಪಂಡ್‌ದ್ ಕಾರ್ಗ್ ಬೂರೊಂಡೆ ||

11

ನಿನ್ನ ಪಾತೆರೊ ಕೇನ್ದ ಸಂತೊಸು
ಇತ್ತೆನೇ ಆಂಡೆಂಕ್ ಪಂಡ್‌ದ್
ಬಗ್ಗಿದಾ ಪದೊನೊಂಜಿ ಪಂಡೆರ್ ಧರ್ಮಜನ ಸಬೆಟ್ ||
ಇಸ್ಪೊ ಸಿದ್ಧಿಯೆ ಆವಡ್‌ಂದ್‌ದ್
ಮಲ್ತದಾಸೀರ್ವಾದೊನಾ ಮುನಿ-
ಯಲ್ತ್ ಪೋಯೆರ್ ಆದಿ ನಾರಾಯಣನ್ ಪುಗರೊಂದು ||

12

ಪಾಂಡು ರಾಜಗ್ ಮೋಕ್ಷೊ ತಿಕ್ಕರೆ-
ಗಾಂಡ್ ಸಾದಿಯೆ ಚೈದ್ಯ ಮಾಗದ-
ನಾಕ್‌ಲೆನ ನೀರ್ದಂದೈರೆಗ್‌ಲಾ ಸಾದಿಯಾಂಡಿತ್ತೆ ||
ನಾರದೆರ್ ಹರಿ ಮಲ್ಲಿ ಕಾರ್ಯೊಗು
ತಾನೆ ಸಕಯೊನು ಕೊರ್ಪುನಾ ರುಸಿ
ಆರ್ ತಿಗ್ಗೇರ್ ಮೂಜಿ ಲೋಕೊನು ಮೂಜಿ ಗಳಿಗಡೆಲ ||

| ಯಾಗೊ ಮಲ್ಪುನ ನಿಷ್ಠೆಯೊ |

ಮುನಿಯೆ ಪಿದಡ್‌ದ್ ಪೋಯಿ ಸಾತ್‌ಗ್
ಅರಸು ಧರ್ಮಜೆ ಮೆಗಿಯನಕ್‌ಲೆನ್
ಪೆರದನಿನ್ ಬೋಡಿತ್ತಿ ಪರಿವಾರೊಲೆನ್ ಕೂಡ್ಲಾದ್ ||
ಕುರುಕುಲೊತ ಸಿಮ್ಮಾಸೊನೊನು ಎಂ-
ಕ್‌ಲೆನ ಅಮ್ಮೆರ್ ಏರ್‌ನಾರೆಗ್
ಸುರೆರೆ ಲೋಕೊಡು ಸ್ತಾನೊ ಇದ್ದಿಗೆ ನರಕೊಡುಲ್ಲೆರೆಗೆ ||

1

ನಾರದಾ ರುಸಿ ಪಂಡೆರೆನ್ನಡ
ರಾಜ ಸೂಯೊದ ಯಾಗೊ ಮಲ್ಲದ್
ಪಾಂಡುರಾಜನ ಆತ್ಮೊ ಸಾಂತಿಗ್ ಸಾದಿ ಮಲ್ಪಿಂದ್ ||
ಯಾನ್ ಮಲ್ಲವೆ ಪಂಡ್‌ದಪಗನೆ
ಆರೆನೆದುರುಡೆ ರುತೊನು ಕೈಕೊಂ-
ದೇನ್ ನಿಕ್‌ಲೆಡ ಕೇನ್ವೆ ಸಕಯೊನು ಯಾಗೊ ಮಲ್ಪಯೆರೆ ||

2

ರಾಜಸೂಯೊದ ಯಾಗೊ ಮಲ್ತೆರೆ
ರಾಜನಕ್‌ಲೆನ್ ಗೆಲ್ತದಾದೇ
ಕಾಣೆಗೆನ್ ಕೈ ಪತ್ತುನಾಕ್‌ಲ್ ಏರ್ ಪನೊಡಿತ್ತೆ ||
ಬೀಮೆ ಲಕ್ಹೆದ್ ಪಂಡೆ ಕುರುಕುಲೊ
ವೀರಗೇ ಇನಿ ಸೊಗೊ ಲೋಕೊಡು
ಸ್ತಾನೊ ಇದ್ದಿಡ ಬಾಲೆಲಾಯಿನ ನಂಕ್ ಬಿಲೆ ಉಂಡೊ ||

3

ಅಣ್ಣ ಬುಡು ಬುಡು ಚಿಂತೆ ಯಾಗೊದ
ಅಟ್ಟಣೆನ್ ಮಲ್ವಾಲ ಯಾನೇ
ಎನ್ನೊ ದಿಕ್ಕದ ರಾಜ ರಾಜೆರೆ ಸೊರ್ಕುನುಂತಾದ್ ||
ಕಪ್ಪೊ ಕಾಣೆಗೆನಕ್‌ಲೆ ತರೆಟೇ
ಕಟ್ಟ ಕಟ್ಟೆದ್ ತುಂಬದತ್ತವೆ
ಪನ್ನಗರ್ಜನೆ ಲಕ್ಹೆದುಂತಿಯೆ ಕೇನೊಡಣ್ಣೆಂದ್ ||

4

ನಮನ್ ಈತ್ಲೆಟ ಕಾತ್‌ನಯೆ ಸಿರಿ
ಹರಿಯೆ ಕ್ರಿಷ್ಟೆನೆ ಅತ್ತೊ ಆಯನ್
ಬರ್‌ಪದೀಡೆಗ್ ಕೇನ್ನೊ ಮಲ್ಪುನ ಯಾಗೊ ಎಂಚಂದ್ ||
ಅಮಸರೊಡು ಕೈಕೊಂದು ಕಸ್ಸೊಡು
ತಿಕ್‌ದ್ ಬೂರೊಡ ಪನ್ನುನೇರೆಡ
ತೆರಿಪವುನ ಎಡ್ಡೆತ್ತೊ ಪಂಡೆನೆ ತನ್ನ ಪಲಯಡನೆ ||

5

ಪಾರ್ತೆ ಪಂಡ್‌ನ ಪಾತೆರೊನೆ ಸರಿ
ಬಾರೆದಂಡ್‌ಗ್ ಉಪ್ಪು ಒಯ್ತನ
ರೀತಿಡಾಂಡ್‌ಲ ಧರ್ಮನಂದನ ಮನಸ್‌ಗಾಪಗನೆ ||
ದೂತೆ ಆಯಿನ ಇಂದ್ರ ಸೇನನ್
ದ್ವಾರಕೆಗ್ ಕಡಪುಡಿಯೆ ದೇವೆರೆ
ಕಾಣೆಗೆಗ್ ಬೋಡಾಯಿ ಸನ್ನಯೊ ದಿಂಜ ಕೊರ್ಪಯಡ ||

6

ದೇವ ದೇವನ್ ಈಡೆ ಬರೈರೆ
ಪಾಂಡವೆರ್ ಕಡಪುಡನೆ ಪಂಡ್‌ದ್
ಕಾರ್‌ಗಡ್ಡೊನೆ ಬೂರುಲರಿಕೆನ್ ಮಲ್ತ್ ಪನ್‌ಲಂದ್ ||
ರಾಜ ದೂತಗ್ ದೇವದರ್ಸನೊ-
ಗಾಪುನಾ ಕುಂಟಂಗಿ ಕೊರ್ಪದ್
ತೇರ್‌ಡೇ ಕಡಪುಡಿಯೆ ದೂತನ್ ದ್ವಾರಕಾಪುರೊಕು ||

7

ಕಡಲ ಮಂಜಿಡ್ ಇಂದ್ರ ಸೇನೆನೆ
ಕಡತ್ ಬತ್ತೆನೆ ದ್ವಾರಕೆಗ್ ಸಿರಿ
ಹರಿನ ದರ್ಸನೊ ಬಾಗ್ಯೊ ಪಂಡ್‌ದ್ ಎತ್ತೆನರಮನೆಗ್ ||
ಗುರುತೊ ಪನ್ನಗ ಚಾಕ್ರಿದಾಕ್‌ಲ್
ಮುರಹರನ ಎದುರುಂತಯೆರ್ ಹರಿ
ಹರಿಯೆ ಕಾಪುಲ ಪನ್ದ ಕಾಣೆಗೆ ದೀಡ್ಡ್ ಬೂರೊಂಡೆ ||

8

ಲಕ್ಹೆ ಲಕ್ಹೆಯೆ ಇಂದ್ರ ಸೇನೆನೆ
ಧರ್ಮಜನ ಗುಣೊ ನಿಕ್ಹೆ ಸೇರ್‌ದ್
ಇತ್ತನೆಟ್ ಈ ದೂತೆ ಸಾದಾರ್ನೋದಾಯೆನೇ ಅತ್ತೆ ||
ಮಸ್ತ್ ಕಾಣೆಗೆ ದೀಡ್ಡ್ ಕಾರ್‌ಗ್
ಅಡ್ಡೊ ಬೂರ್‌ನ ನಿನನ್ ತೂನಗ
ಎಡೆ ಕಾರ್ಯೊಗು ಈಯೆ ಬತ್ತನೆ ಪನ್ದ ನೆನೆತೊಂಡೆ ||

9

ಅರಸು ಧರ್ಮಜೆ ಈರೆನಾಡೆಗ್
ಲೆತೊನುದೇ ಬರೊಡುಂದು ಎನ್ನನ್
ಕಡಪುಡನೆ ಪನ್ನಗನೆ ಕ್ರಿಷ್ಟಗ್ ದಾಯೆಗ್‌ಂದಾಯ್ತಿ ||
ಮುರನಿ ತಂಗಡಿ ಪೆದ್ದಿ ಬಾಲೆಗ್
ಪುದರ್ ದೀಪುನವೆಡ್ಡೆ ಕಾರ್ಯೊಗು
ಬುಡೆದಿಯಲ್ಲೆನ ಒಟ್ಟುಗೇನೇ ಪೋಯಿನಾಯೆತ್ತೊ ||

10

ಈತ್ ಬೇಕೊನೆ ಎನನ್ ಲೆಪುಡವಿ
ಕಾರಣೊನೆ ದಾಯ್ತಂದ್ ಪನುವನ
ಏರ್ ಬತ್ತೆರ್ ಆಡೆಗಾಕ್‌ಲ್ ಪಂಡೆರೆಂಚಿನೆನ್ ||
ನಾರದೆರ್ ಅರಸುಲೆಡ ದಾಯ್ತನೊ
ಪಾತೆರ್‌ದ್ ಎನನೀಡೆ ಕಡಪುಡಿ
ಸಾತ್‌ಗೇನೇ ಬತ್ತೆ ಪನ್ನಗ ಕ್ರಿಷ್ಟಗರ್ತಾಂಡ್ ||

11

ಮಾಗದಗ್ ಸಿಸುಪಾಲನಕ್‌ಲೆಗ್
ಕಾಲೊ ಬತ್ತೆದ್ ಆಂಡ್ ಇತ್ತೆನೆ
ನಾರದಾರುಸಿ ಮಲ್ತಿ ಕುಸಲ್‌ಡ್ ಪನ್ದ ಮುರಹರೆನೆ ||
ಯಾನ್ ಪಿದಡುವೆ ಉಲಯಿ ಪೋಲಯ
ಬಾಜೆಲ್‌ಗ್ ಬೋಡಯಿನ ಕೇನ್‌ಲ
ಬಾವನಕ್‌ಲೆನ್ ತೂಪಿ ಯೋಗೊನೆ ಎಂಕ್ ಆಂಡ್‌ಂದ್ ||

12

ದ್ವಾರಕೆದ ರಚ್ಚಣೆಗ್ಲಾ ಬಲ -
ರಾಮನೇ ಉಂತಾದ್ ಉದ್ಧವ
ಸಾತ್ಯಕೇಲೆಡ ಪನ್ದ ಪಿದಡ್‌ನಗಿಂದ್ರ ಸೇನನ್‌ಲ ||
ತಾನ್ ಲೆತೊನುದು ಕಡಲ್‌ದಾಯೆರೆ
ದಾರುಕನ ಒಟ್ಟುಗೆನೆ ಮಂಜಿಡ್
ಮೂವೆರೊಟ್ಟುಗು ಕಡತ್ ಕುಲೈರ್ ಹರಿನ ತೇರುಲಯಿ ||

13

ಸಾರತಿಯೆ ಕುದುರೆಲೆನ್ ದೇರಿಯೆ
ರಾಜ ಬೀದಿಡೆ ತೇರ್ ಬನ್ನಗ
ಪಾರ್ ಬತ್ತೆರ್ ರುಸಿಕುಲೆದುರುಗು ಹರಿನ್ ಕೊಂಡಾಡ್ಡ್ ||
ದೇವ ಕ್ರಿಷ್ಣನೆ ಬಗ್ಗೆರೆಗ್ ನಿಜೊ
ದಾಸೆನೇ ಆವೊಂದು ಪಾಂಡವ-
ನಾಕಲೆನ ಬಾಕಿಲ್‌ಗ್ ಬರ್ಪೆನೆ ಪಂಡೆರಕ್‌ಲೊಟ್ಟು ||

14

ಪರಿ ಜನೊಲ ಪುರ ಜನೊಲ ಕೂಡೈರ್
ಹರಿನ ರತೊ ಬರ್ಪುನೆನ್ ತೂಯೆರೆ
ಬೆರಣೆರೆತ್ತೈರ್ ವೇದೊ ಮಂತ್ರೊಡು ಹರಿನ್ ಕೊಂಡಾಡ್ಡ್ ||
ಕಯಿಟ್ ಪೂ ಪುಸ್ತೊಲೆನ್ ಪತೊನುದು
ನಿರೆಕರೆತ ಪೊಂಜೊವುಲು ಎತ್ತೈರ್
ನರಕ ಬಂದನೊಡಿತ್ತಿ ಪೊಣ್ಣಲೆ ಗತಿತ ದೈವೊಂದು ||

|| ಯಾಗೊ ಮಲ್ಪೆರೆ ಕ್ರಿಷ್ಣನೊಪ್ಪಿಗೆ ||

ಕ್ರಿಷ್ಣನಾ ರತೊ ಇಂದ್ರ ಪ್ರಸ್ತೊಗು
ಎತ್ತಾದಾನಗ ಕಲಸೊ ಕನ್ನಟೆ
ಪತ್ತಿ ಪೊಂಜೊವೆನೊಟ್ಟು ಪಾಂಡವನಕ್‌ಲ್ ಮಾತೆರ್ಲ ||
ಎದೊನುಂದಾಯನ್‌ಲ ಉಲಯಿಡ್
ಕುಲ್ಲಯೆರ್ ಸಿರಿ ಪಾದೊ ಪೂಜೆನ್
ಮಲ್ಪೆ ಧರ್ಮಜೆ ದ್ರುಪದ ಮಗಲೆನ್ ಒಟ್ಟುಗುಂತಾದ್ ||

1

ಬಾವನಕ್‌ಲೆನ ಮೋನೆ ತೂನಗ
ಬಾಡ್‌ದುಂಡುಲ ಪನ್ದ ಕ್ರಿಷ್ಣನೆ
ಮಾತೆರೆನ್ ಕೈತಲ್‌ಡ್ ಕುಲ್ಲದ್ ಕೇಂಡೆ ಅಕ್‌ಲೆಡನೆ ||

ದಾಯೆ ಲೆಪುಡಯೆರೆನ್ನನೀಡೆಗ್
ದಾನವೆರೆ ಪೋಡಿಗೊಗೊ ಕೌರವ-
ನಾಕಲೆನ ಸೀಂತಿರಿಗೊ ಪನಿ ಪನಿ ಬಾವನಕ್‌ಲೆನಡ ||

2

ಹರಿಯೆ ನಿನ್ನವೆ ದಯೊಟು ದಾನವ -
ನಕ್‌ಲೆ ಪೋಡಿಗಿ ಕೌರವಾದಿಲೆ
ದುರುಳತನೊ ನಡಪಂದ್ ಪನ್ನುನ ದೈರೊ ಉಂಡತ್ತೊ ||
ಸುರೆರೆ ಲೋಕೊಡು ಎಂಕ್ಲೆ ಅಮ್ಮೆರೆ-
ಗಿನಿಲ ಸ್ತಾನೊನೆ ತಿಕ್ಕಜಿಂದ್‌ದ್
ಸುರಮುನಿಯೆ ನಾರದೆರ್ ಪಂಡೆರ್ ಪನ್ದ ಧರ್ಮಜೆನೆ ||

3

ಕಣ್ಣೆಡೆನೆ ನೀರರಿಪದಾನಗ
ಐಕ್ಕ್ ಮಲ್ಪುನೆ ದಾನೆ ಪಂಡ್‌ದ್
ನಿಕ್ಕ್ ಮುನಿ ತೆರಿಪದೆರೊ ಪನ್‌ಪನ್ ಪಂಡೆನಾ ಹರಿಯೆ ||
ಮಲ್ಪವೊಡು ಮಹರಾಜಸೂಯೊದ
ಯಚ್ಚೊ ಪಂಡ್‌ದ್ ಮುನಿಯೆ ಪನ್ನಗ
ಅಮ್ಮೆರೆಗ್ ಸುರಲೋಕೊ ಒದಗಯೆರಾದ್ ಒತ್ತೊಂಡೆ ||

4

ವೀರೆರೆಂಕುಲು ಬಾಲೈವೆರ್
ಆರೆಗಿತ್ತದ್ ಸೊರ್ಗೊ ಲೋಕೊಡು
ಸ್ತಾನೊ ಕೊರ್ಪಯೆರಾಯ್ ಪನ್ನುನೆ ಮಲ್ಲನಾಲೀಸ್ ||
ದೇವ ದೇವೆರೆ ದೈವೊ ಈಯೇ
ರಾಜಸೂಯೊದ ಯಾಗೊ ನಡಪದ್
ಮಾನೊ ಕಾಪೊಡು ಪನ್ದಲೈವೆರ್ ಅಡ್ಡೊ ಬೂರಿಯೆರ್ ||

5

ಸಿವಸಿವಾ ನಾರದೆರ್ ಬೀಜಿನ
ಬಲೆಕ್ ಬೂರೈನೆ ಧರ್ಮನಂದನ
ಅರಸುನಕ್‌ಲೇರಿತ್ತೆ ಕೊರ್ದೆರ್ ಕಪ್ಪೊ ಕಾಣಿಗೇನ್ ||
ಪಡೆಯೆರಕ್‌ಲೆಡ ಲಡಯಿ ಮಲ್ತದ್
ಗೆಲುಪುನವೆ ಕಸ್ಪತ್ತೊ ಯಾಗೊನು
ನಡಪವುನೆ ಎಂಚೇನ್ ಗೆಲ್ಪವಿ ವೀರೆರುಲ್ಲೆರೊಯ ||

6

ಪಿದಯಿದಾ ಪಗೆ ಉಲಯಿದಾ ಪುಗೆ
ತಡವುನೆಂಚಯ ಕೌರವಾದಿಲು
ಸಕುನಿ ಕರ್ಣಲ ಸೀಂತ್ರಿಗೊಬ್ಬೆರ್ ಅಕ್‌ಲ್ ನಿನ್ನಕ್‌ಲೆ ||

ಮಗದ ದೇಸೊದ ಅರಸು ಕಂಸನ
ಕಡತಯೆನೆ ಮಾಗದೆನೆ ಎನ್ನಡ
ಪರುನು ಕಡವೊಂದುಲ್ಲೆ ತಿಕ್ಕುವೆ ಏಪೊ ಪಂಡೊಂದು ||

7

ಮಾಮ ಕಂಸನ ಬುಡೆದಿನಾಕ್ಲ್
ಮಾಗದನ ಜೋಕುಲುಯ ಯಾನೇ
ಆನಿ ಕಂಸನ್ ಕೆರ್ನಸಾತ್‌ಗ್ ಎನನ್ ಕೆರೈಗ್ ||
ಬಾರಿ ಸೇನೆನ್ ಕೂಡ್ಲವೊಂದೇ
ಏತ್‌ಲಾ ದಿನೊ ಕಾದ್‌ದೆನ್ನನ್
ಸೋಲ್ಪದೇ ಬೆರಿಪತ್ಯನಾಪಗ ಪಾರೈ ತಿಕ್ಕಂದೆ ||

8

ಪಾರ್ ಪಾರ್‌ದ್ ಗುಡ್ಡೆ ಮಿತರಿಯೆ
ಸೂನು ಕೊಯೆನೆ ಸುತ್ತ ಗುಡ್ಡೆಗ್
ಯಾನ್ ಲಾಗಿಯೆನಲ್ತ್ ಕಡಲ್‌ದ ನಡುತ ದೀವಿಗ್‌ಯ ||
ಆಡೆಗೇ ಯದುಕುಲೊನು ತರ್ಪದ್
ದೀವಿ ದ್ವಾರಕೆ ಪನ್ನಿ ಪುದರ್‌ಡ್
ರಾಜದಾನಿನ್ ಮಲ್ತೆ ಅಣ್ಣನ ಸಾಯೊಡೇನಪಗ ||

9

ಕಡಲ್‌ದಾ ನಡುಟತ್ನನೆನ್ನನ್
ಕೆರಿಯೆರೆಗ್ ತೀರಂದೆ ಕಾಪುವೆ
ನಿಕ್‌ಲೆನೊಟ್ಟುಗು ಯಾನ್ ಇತ್ತೆಡ ಎನನ್ ದೀಡುವೆನೊ ||
ದುರುಳೆರೇತ್‌ಲ ಊರುಡುಲ್ಲೆರ್
ಮಗದ ಚೈದೈರ್ ಅಕ್‌ಲೆಗೆಜಮನಿ-
ನಕ್‌ಲ್ ಪಂಡ್‌ನ ಲೆಕೊನೆ ಲಾಗ್ಯನ ಮೂರ್ಕಜಾತಿಲುಯ

10

ನಿಕ್‌ಲೆನಮ್ಮಗ್ ಸ್ತಾನೊ ಸೊರ್ಗೊಡು
ಒದಗವುನ ಮಹ ಯಾಗೊ ಮಲ್ಪುನ
ಗೊಡವೆ ಬೊಡ್ಡಿಂದೇನ್ ಪನ್ನುನೆ ಎಂಚ ಪನ್‌ಬಾವ ||
ಎನನ್ ಬುಡುದೇ ಮಲ್ಪಿ ಯಾಗೊನು
ನಿಕ್‌ಲೆಗನ್ನಡ ಪ್ರೀತಿ ಉಂಡುಡ
ಬದ್‌ಕಿಯೆರೆ ಬುಡಿ ಪನ್ನಗನೆ ಆ ಬೀಮೆ ಲಕ್‌ದುಂತ್ಯೆ ||

11

ಮಾಗದೆನೊ ನಿನ ವೈರಿ ಕ್ರಿಷ್ಣಾ
ಯಾಗೊ ನಡಪಯೆರಾಯೆ ಬುಡಯೆನೊ
ಯಾನ್ ತೂವೆನೆ ಆಯ ಪೌರುಸೊ ಏತ್ ಉಂಡುಂದು ||

ತೂಲ ಈ ಗದೆಟಾಯ ಮಂಡೆನ್
ನೋತು ನೋತುದೆ ಪೊಡಿಯೆ ರಟ್ಟವಿ
ಮೀಸೆ ಇತ್ತ್‌ನ ಆಣ್ ಯಾನೇ ನಿಕ್ಕ ತೆರಿಯಂದೊ ||

12

ದಾಯೆಗೀ ಗಾಂಡೀವೊ ಲೋಕೊಡು
ಯಾನ್ ಪಡೆಯಿನ ಪತ್ತ್ ಪುದರುಲು
ನೀರ್ಡ್ ದೀಡ್‌ನ ಹೋಮೊದಂಚೆನೆ ಆಂಡೆ ಶ್ರೀ ಕ್ರಿಷ್ಣ ||
ಸ್ತಾನೊ ಸೊರ್ಗೊಡು ಎಂಕ್ಲೆ ಅಮ್ಮೆರೆ
ಗಾಯಿಜಿಡ ಬದ್‌ಕೊಲಿಯೊ ಬಾಲೆಲು
ಆಯಿನೆಂಕುಲು ಪಂಡ್‌ದರ್ಜುನೆ ತಿಗಲೆಗಾಕೊಂಡೆ ||

13

ಅಣ್ಣ ಈ ರುಸಿಕುಲೆನ್ ಕೂಡ್ಲಲ
ಸನ್ನಯೊದ ಕಾಣಿಗೇನ್ ಯಾನೇ
ಎನ್ನೊ ದಿಕ್ಕದ ಅರಸುನಾಕ್‌ಲೆ ತರೆಟ್ ತುಂಬಾವೆ ||
ಕ್ರಿಷ್ಣ ಸ್ವಾಮಿನ್ ಎದುರು ಉಂತದ್
ಯಜ್ಞೋನೀ ಸುರುಮಲ್ಪು ಪನ್ನಗ
ಇರ್ದೆರೆನ ಪಾತೆರೊಗು ಮೆಚ್ಚಿಯೆನಾದಿ ನಾರಯಿಣೆ ||

14

ರಾಜ ಮನೆತನೊದಾಣ್ಣೆ ಸುಬವೊದ
ಪಾತೆರೊನು ಕೇನ್ದಂಕ್ ಸಂತೊಸು
ಆಂಡ್ ಧರ್ಮಜ ಬೀಮೆ ಪಾರ್ತೆರೆ ಪೌರುಸೊದ ನುಡಿಟ್ ||
ಈಯೆ ಯಾಗೊದ ರುತೊನು ಕೈಕೊನು
ಯಾನ್ ಮುಕುಲೆನ್ ಇನಿಯೆ ಲೆತೊನುದು
ಪೋಪೆ ಸುರುತವೆ ಮಲ್ಲ ವಿಜಯೊದ ಸಿದ್ಧಿ ಸಾದನೆಗ್ ||

15

ಮಗದ ರಾಜನ್ ದುಂಬು ದೆತ್ತೊಡ
ಎದುರು ಉಂತುವೆರೆರ್ ಯಾಗೊನೆ
ನಡಪನೆಕ್ ಅಡ್ಡಿದ್ ಕಡಪುಡು ಬೀಮೆ ಪಾರ್ತೆರೆನ್ ||
ಮುರಹರನ ಪಾತೆರೊಗು ಧರ್ಮಜೆ
ಮೆಗಿಯನಕ್‌ಲೆನ್ ಕಾತೊನುಲ ಹರಿ
ಪರಮ ಪುರುಸೆನೆ ಪನ್ದ ಕಾರ್‌ಗ್ ಅಡ್ಡೊ ಬೂರೊಂಡೆ ||

|| ಕ್ರಿಷ್ಣ ಭೀಮಾರ್ಜುನೇರ್ ಮಗದರಾಜ್ಯೊಗು ಪಿದಡಿಯೆರ್ ||

ಮೂರ್ತೊ ತೂದೇ ಕ್ರಿಷ್ಣನೊಟ್ಟಿಗೆ
ಬೀಮ ಪಾರ್ತೆರ್ ಪಿದಡ್‌ದುಂತ್ಯೆರ್
ನಾಲ್ ರಂಗೊದ ಸೇನೆದಕಲೆನ್ ಲೆತ್ತೆರಕಲಾಡೆ ||
ದ್ರೋಪದಿಯೆ ಆರತಿನ ಬೆಳಗದ
ವೀರೆರೆಗ್ ಜಯೊ ಸಿರಿತ ಬೊಟ್ಟುನು
ಪಾಡಿಯಲ್ ಕುಂಕುಮೊಡು ಮುಂಡೊಗು ಕಂಡನೀಯೆರೆನ ||

1

ಕ್ರಿಷ್ಣನೊತ್ತುಗು ಬೀಮ ಪಾರ್ತೆರ್
ಕುಲ್ಲಿಯೆರ್ ತೇರುಲಯಿ ಪಿರವುಡೆ
ಬತ್ತೆರಾ ಸೈನಿಕೆರ್ ಕಾರ್ಡೆಟಾನೆ ಕುದುರೆಲೆಡ್ ||
ಸುತ್ತ ಸೇರ್‌ನ ಜನೊಕುಲೊಟ್ಟುಗು
ಪುರೊನಕಲೆನ ಮೇಲ್ಗ್ ದಕ್ಕದ್
ಗೆಲ್ಲವುನ ಸಿರಿಪರಿಗ್ ಗೋವಿಂದಾನು ಗೋವಿಂದ ||

2

ಕೊಂಬು ವಾದ್ಯೊ ನಗಾರಿ ಬೇರಿಯ
ದುಂಬುಡುಂತುದು ಗೌಜಿ ಲಕ್ಕಯೊ
ಸಂಬ್ರಮೊಡುಲಾ ಸೇನೆ ಪಿದಡ್‌ನಗಾಂಡ್ ಜಯೊಗೋಸೊ ||
ದಂಡ್ ಪೋವಡ್ ಮಗದ ರಾಜ್ಯೊಗು
ಪಂಡ್‌ನಾ ಸಿರಿಕ್ರಿಷ್ಣನಾಚ್ಚೆಡ್
ಇಂದ್ರಪ್ರಸ್ತೊನು ಕರಿದ್ ಎತ್ತೆರ್ ಗಂಗದಾಡೆಗೆನೆ ||

3

ಪುಣ್ಯೊ ಸೀರ್ತೊದ ಗಂಗದಾಯೆರೆ
ಜಳ್ಳೊದೋಡೊಡು ಕಡತೆರಾಕಲ್
ಅಲ್ಪಡ್‌ ಮೂಡಾಯಿ ತಿರ್ಗದ್ ಮಗದೊಗೆತ್ತಿಯೆರ್ ||
ಪೊರ್ದುಕಂಟ್‌ದ ರಾಜ ಬೀದಿಯ
ದತ್ತ್ ಬಲಶಡ್ ಮಾಡೊ ಮಂದಿರೊ
ಸುತ್ತ ಬೈಲ್‌ಡ್ ಬುಳೆನೆ ದಿಂಜಿನ ರಾಜ್ಯೊ ಮಾಗದನ ||

4

ಮೂಜಿ ಗಿರಿಕುಲೆ ಇಡೆಟ್ ಕಲ್ಲದ
ಕೋಟೆ ಕಟ್ಟದ್ ನಡುಟು ಪೊರ್ದು
ರಾಜದಾನಿದ ಪುದರ್ ಗಿರಿವ್ರಜೊ ಪನ್ನಿ ಪಟ್ಟಣೊನೆ ||

ಸೇನೆನಾ ಕೋಟೆದವೆ ಪಿದಯಿಡ್
ಕಾತ್‌ದುಂತ್ಯೆರೆ ಪನ್ದ ಕ್ರಿಷ್ಣಲ
ಬೀಮ ಪಾರ್ತೆರ್ ಒಟ್ಟು ಕೋಟೆನ್ ಜರಿತ್ ಪಾಡಿಯೆರ್ ||

5

ನೂಲು ಪಾಡ್‌ನ ಬ್ರಹ್ಮಚಾರಿಲೆ
ಏಸೊ ಮಲ್ತದ್ ಮೂವೆರೊಟ್ಟುಗು
ಏರಿಯೆರ್ ಅಲ್ಪದವೆ ಗುಡ್ಡೆದ ತರೆಕ್ ಬಡತೊಂದು ||
ತೂನಗನೆ ಅವುಲೊಂಜಿ ಬೈರವ
ಮಾಡೊದೆದುರುಡು ದೋಲು ಕಣ್ಣೆಗ್
ತೋಜಿನೆಟ್ ಸಿರಿಕ್ರಿಷ್ಣ ಪಂಡೆನೆ ಐನ ಕತೆ ಮಾತ ||

6

ತೂಲೆ ಬೀಮಾರ್ಜುನೇರೆ ದೋಲುನು
ಮಾಗದೆನೆ ಸಿವ ತಪಸ್ ಮಲ್ತದ್
ತಾನ್ ಸಯ್ಯೆರೆ ಬಲ್ಲಿ ಪನ್ನುನ ವರೊನು ಕೊರೊಡುಂದು ||
ಕೇನ್ನಗಾ ಲಯ ಕರ್ತು ತೆಲಿತ್‌ದ್
ಆಯಗಿಂದೆನ್ ಕೊರ್ದು ಪಂಡೆನೆ
ಸಾಧನೆಡ್ ನರ ಮೇದೊ ಯಾಗೊನು ಮಲ್ತು ಬೈರವನ್ ||

7

ಮೆಚ್ಚದೀಯೇ ವರೊನು ಪಡೆಲಯಿ
ಪತ್ತಿಯೆರೆ ಜವನೆರೆನ್ ಪೋನಗ
ಬೊಟ್ಟುದೀ ಜಯ ದೋಲು ಪಿದಡ್‌ಲ ಅಪಗ ತಿಕ್ಕುವೆರ್ ||
ಒರೊ ಒಂಚೆತ ಉಲಯಿ ನೂದೆತ
ಮಿತ್ತಾಡೊಂಜಾನಗನೆ ಜವನೆರ್
ತಿಕ್ಕಿಸಾತ್‌ಗ್ ಯಾಗೊ ಮಲ್ಪದ್ ತರೆನ್ ಕಡ್ಪಾಲ ||

8

ದೋಲುನೀ ಬೈರವನ ಗುಡಿಟೆ
ನೆಲ್ತದುಂತಲ ಇಂದೆನೆರೆಲ
ಹಾಕ್‌ದೇ ಪೊಡಿ ಮಲ್ತೆರಡ ನಿನ ಮರಣೊ ಕಂಡಿತೊನೆ ||
ಆ ಸದಾಸಿವೆ ಕೊರ್ದು ದೋಲುನು
ಮಾಯಕಾಯೆನೆ ಮಗದೆ ನಿತ್ಯೊಲ
ದೋಲು ಬೊಟ್ಟುದು ಪೋದು ಲಡಯಿಡ್ ಗೆಲೆನರಸುಲೆನ್ ||

9

ನೂದು ಜವನೆರ್ ತಿಕ್‌ದೆರಾಯಗ್
ಬಾಕಿ ಒರೈನ್ ನಾಡ್ಡೆ ಎನ್ನನೆ

ಏಪೊ ತಿಕ್ಕುವೆ ಪನ್ದ ಆಸೆಡ್ ಕಾತ್ ಕುಲ್ಗದೆನೆ ||
 ಮೂವೆರ್ಲ ನಮೊ ಹಾಕ್‌ದಿಂದೆನ್
 ಬೇಕೊ ಪೊಡಿ ರಟ್ಟಾಗೊ ಪನ್ನಗ
 ಬೀಮ ಪಾರ್ತೆರ್ ದೋಲುಗಾಕ್ಯೆರ್ ಕ್ರಿಷ್ಟನೊಟ್ಟಿಗೆನೆ ||

10

ದೋಲು ಪೊಡಿಯಾನಗನೆ ಲಕ್ಕನ
 ಬಾರಿ ಗೌಜಿದ ಸೊರೊಟು ಬೂಮಿದ
 ಮಾಡೊಮಂದಿರೊ ಬೂರು ಪೊಡಿ ಪೊಡಿಯಾಂಡ್‌ಲಾಪಗನೆ |
 ಆನಿ ಪಬೊದಮಾಸೆ ಆಯ್ಕೆಟ್
 ತಾನ್‌ಲಾ ಕೈಕೊಂದಿ ಯಾಗೊದ
 ಕಾರ್ಯಾಲೆಡ್ ಬೆರಣೆರೆಗ್ ದಾನೊನು ಕೊರ್ಪವೆದೆ ಮಗದೆ ||

11

ಅಪಗ ಈ ಸೊರೊ ಕೇನ್ಲಾಯನ
 ತಿಗಲೆ ನಡ್ಗದ್ ಸ್ವಾಮಿ ಬೈರವ
 ಗುಡಿಟ್ ಕಟ್ಟೆನ ದೋಲು ಪೊಡಿಯಾಂಡ್‌ಂದ್ ಗೆರೆತೊಂಡೆ ||
 ಪೊರುತು ಕಂತ್‌ಲಾಂಡ್ ಕತ್ತಲೆ
 ಕಬಿದ್ ಹೋಮೊದಕುಂಡೊದುಲಯಿದ
 ಬೊಲುಪು ಬೆಳಗದ್ ಉಲಯಿ ನಂದಾ ದೀಪೊದೀಡಿಯೆರ್ ||

|| ಬೈರವನ ಗುಡಿಡ್ ಮಾಗದನಾಡೆ ಬತ್ತೆರ್ ||

ರಾತ್ರೊಡಾ ಮಾಗದನ ಯಜ್ಞೊದ
 ಸಾಲೆಡೇ ಬೆರಣೆರೆಗ್ ದಾನೊನು
 ಕೇಂಡ್‌ಕೇಂಡ್‌ ಕೊರ್ಪಿ ಗೌಜಿಡ್‌ಲಾ ಜರಾಸಂದೆ ||
 ದೋಲು ಪುಡಯಿನ ಸೋಲುಡೆನ್ನವೆ
 ಆವುಸೊಗು ಕಡೆಯಾಂಡೆ ಪಂಡ್‌ದ್
 ತಾನ್ ತನ್ನನ್ ಮರತ್‌ದುಪ್ಪನಗಪಗ ಎತ್ತಿಯೆರ್ ||

1

ಮೂಜಿ ಬೆರಣೆರೆ ಬ್ರಹ್ಮಚಾರಿಲು
 ಯಾಗೊ ಸಾಲೆದ ಪಿರವುದಾ ಕುರು -
 ಬಾಕಿಲ್‌ಡೆ ಬರ್ಪುನೆನ್ ತೂದೇ ಲಕ್ಕಿ ಮಾಗದೆನೆ ||
 ತಾನ್ ಕೈ ಮುಗಿದಕ್‌ಲೆನುಲಯಿಗ್
 ಬಾರಿ ಬಗ್ಗಿಡ್ ಲೆತೊನುದಾಯೆನೆ
 ಪೀಟೊ ದೀಡಿಯೆ ಮೂವೆರೆಗ್‌ಲಾ ಪೂಜೆ ಸಂದಯೆರೆ ||

2

ಬಿನ್ನ ಪೂಜೆನ್ ಮಲ್ತನೇನ್‌ಲ
 ದಿಷ್ಟಿ ದೆತ್ತದ್ ತೂಯ್ಜಿರಾಕ್‌ಲ್
 ಅಚ್ಚಿರೊಡು ತೂದಕ್‌ಲೆ ಮೋನೆನ್ ತೂದು ಗೆರೆತೊಂಡೆ ||
 ಇಸ್ಪೊದಾಕ್‌ಲ್ ಅತ್ತ ಮುಕುಲೇ
 ಎನ್ನ ಸತ್ತುಲು ಈಡೆ ಗುಟ್ಟುಡು
 ಬತ್ತನಾಕ್‌ಲ್ ಪಿರವುದಾ ಕುರುಬಾಕಿಲ್‌ಡೆ ಈಡೆ ||

3

ತೂಪಿ ದೇಕಿಡ್ ಬಾರಿ ಸತ್ತೊದ
 ವೀರನಾಕ್‌ಲ್ ತಿಗಲೆ ರಟ್ಟೆನ್
 ತೂನಗನೆ ಸರಿ ಗಟ್ಟಿ ಮುಟ್ಟುದ ಜವನೆರೇ ಮುಕುಲು ||
 ಕಾಳೊಗೊಗು ಇನಿ ಬತ್ತನಾಕ್‌ಲೊ
 ಆ ಸದಾಸಿವೆ ಹರಿನ್ ಬ್ರಹ್ಮನ್
 ಕೂಟೊನುಂದೇ ಏಸೊ ತಪ್ಪದ್ ಬತ್ತನೆನೊ ದಾನೊ ||

4

ಎನಡ ಕಾದ್ಯೆರೆ ಏರ್ ಬರ್ವೆರ್
 ಕುರುಕುಲೊದ ಕೌರವೆರ್ ಪ್ರೀತಿದ
 ಜವನೆರಾಕ್‌ಲ್ ಪಾಂಡವೆರ್ ಬರಯೆರ್‌ಲ ಕಂಡಿತೊನೆ ||
 ತರೆನ್ ದೀಡ್‌ದ್ ಜೆಪ್ಪಯೆರ್ ನಿಚೊ
 ಮಗದ ರಾಜ್ಯೊದ ದಿಕ್ಕಿಗೇ ಯದು
 ಕುಲೊತ ವೀರೆರ್ ಕಳುವ ಕ್ರಿಷ್ಟನೊ ಈಡೆ ಬರ್ಪುನಯೆ ||

5

ಏರ್‌ಲಾವಡ್ ಕೇನ್ನೆ ಪಂಡ್‌ದ್
 ಈ ನಡೀರ್‌ಲ್‌ಡ್ ದಾಯೆ ಬತ್ತೆರ್
 ಈಡೆಗೇ ಕುರುಬಾಕಿಲ್‌ಡೆ ಪನಿ ಏರ್ ನಿಕ್‌ಲ್‌ಂದ್ ||
 ಈಯೆ ಎಂಕ್ಲೆನ ವೈರಿಯಾಯ್ಕೆಟ್
 ಯಾಗೊ ಮಂಟಪೊಗಿಂಚ ಪೊಗ್ಗನೆ
 ಕಾಳಗೊನು ಕೇನಿಯೆರೆ ಬತ್ತದೊ ಪಂಡೆನಾ ಕ್ರಿಷ್ಟೆ ||

6

ನಿಕ್‌ಲೆ ಪೊಣ್ಣಲೆನೊಯ್ತನಾಯೆನೊ
 ಗಡಿನ ನುಕುರು ಬತ್ತನಾಯೆನೊ
 ಪಗೆನೆ ಎಂಚಿನ ಬೇಕೊ ಪನಿ ಪನಿ ಪಂಡೆ ಮಾಗದೆನೆ ||
 ಈಯೆ ನರಮೇದೊನುಲ ಮಲ್ಲವ
 ರಾಜ ಧರ್ಮೊನು ಮೀರ್ಡ್ ಅರಸುಲೆ
 ಬಾಲೆಲೆನ್ ತರೆ ಕಡ್ಡಯೆರೆನೇ ಪತ್ರ್ ಪಾಡ್‌ದನೆ ||

7

ಆಕ್ಲೆನ್ ಬುಡ್ಡಯೆರೆ ಬತ್ತದೊ
ಈತ್ ಪನ್ನಗ ನಿಕ್ಲೆನಮ್ಮೊ
ಬಾವೆ ಸಮ್ಮಲೆ ಪೈಕಿಡೇರ್ಂದೆನಡ ಪಂಡರ್ಡ ||
ಯಾನ್ ನಿಕ್ಲೆಗ್ ಬುಡುದು ಕೊರ್ವೆನೆ
ಬಾಯಿಡೇ ಕಳು ಪನ್ನುನಾಕ್ಲೊ
ಏರ್ ಪಂಡ್ಡ್ ಸತ್ಯೊ ಪನಿ ನಿಕ್ಲೆನವೆ ಪರಿಚಯೊನು ||

8

ಲೋಕೊದಾ ಸುಕೊದುಕ್ಕೊ ಮಾತೆನ್
ಕೇನುನಾಕ್ಲ್ ಎಂಕ್ಲು ಬಂದ್ಡ್
ದೀಡ್ನಕ್ಲೆನ್ ಬುಡ್ಡುಜಡ ನಿನನೆಂಕ್ಲು ದೀಡಯೊನೆ ||
ನಾಲಯಿಡ್ ಬತ್ತಿಲೆಕೊ ಪಂಡ್ಡ್
ಪ್ರಾಣೊ ಕಳೆವೊನುವರ್ಯ ದಾಯೆಗ್
ಏರ್ ನಿಕ್ಲೆಂದೆನಡ ಪಂಡರ್ಡೆಡ್ಡೆ ಪನ್ನಗನೆ ||

9

ನಿನ್ನಡೆಂಕುಲು ಏರ್ ಪಂಡ್ಡ್
ಸತ್ಯೊ ಪಂಡೆಡ ದಾನೆ ಮಲ್ಪುವ
ಕ್ರಿಷ್ಟೆಯಾನೇ ಬೀಮ ಇಂಬೈನೆ ಬಾರಿ ಬಲೊತಯೆನೆ ||
ಅರ್ಜುನನ್ ಈ ತೂಲ ಎಂಕ್ಲೆಡ
ಯುದ್ಧೊ ಮಲ್ತೆರೆಗಾಪುನಾಯನ್
ಒರೈನೊತ್ತೊನು ಪಂಡ್ಡಾನಗ ತೆಲಿಕೆ ತೆಲಿತೊಂದು ||

10

ಅಟ್ಟಸ್ನ್ ಕೊರ್ಡಪಗ ತೆಲಿತ್ದ್
ಕಣ್ಣ್ ಮರೆಲ್ದ್ಲಾಂಡ್ ಮಾಗದೆ
ಬುಕ್ಕೊಲಾ ತೆಲಿಪುನಗ ಉಬ್ಬಿಸೊಡುಸುಲು ಮಿತ್ತಾಂಡ್ ||
ಪೆಟ್ಟ್ ತಿಂದ್ಡ್ ಗುಡ್ಡೆಲಾಗಿಡ್
ತಪ್ಪಯಿನ ಓ ಕಳುವೆ ತಿಕ್ಕನೆ
ನೆತ್ತೆರ್ನ್ ಕಕ್ಕಾವೆ ಪಂಡ್ಡ್ ಕೊರೈನಾರ್ಬಟೆನ್ ||

11

ನಿನ್ನ ತರೆತವೆ ನೆತ್ತೆರ್ಡ್ ಯಾ -
ನೆನ್ನ ಜೋಕುಲೆ ಬಂಜಿದಾ ಸೂ
ತೆಕ್ಕವೆನೆ ಪಂಡೊಂದು ಹಾಕೈರೆ ಕೈನ್ ದೇರ್ಪುನಗ ||
ಮರ್ದ ಮಾಗದ ಪರ್ಮ ಬಿರಿತ್ಜೊ
ಒಯ್ತದನ ಈ ಬಂಗಿ ಉಂತುಲ
ಒರೈಡೆಂಕ್ಲೆನ ಪೈಕಿದಾಯಡ ಲಡಯಿ ಮಲ್ತೆರೆಗ್ ||

12

ಯಾನ್ ಒರೈನೆ ನಿಕ್ಲ್ ಮೂವೆರ್
ಕಾಳಗೊಗು ಎದುರುಂತಿ ಪನ್ನಗ
ಬೀಮೆ ಮಾಗದ ಮೋನೆ ತೂದೇ ಪನ್ನೆ ಕೋಪಿತ್ದ್ ||
ದಾಯೆಗೇ ಬಗುಳುನೆಯ ಪೊಕ್ಕಡೆ
ಬಾಯಿದಾ ಬಡಿಯರೊನು ಬುಡು ಬುಡು
ವೀರತನೊಟೇ ಲಡಯಿ ಮಲ್ತೆರೆ ನಿಕ್ಕ್ ಮನಸುಂಡೊ ||

13

ಕ್ರಿಷ್ಟೆನೋ ಯಾನಾವೊ ಪಾರ್ತೆನೊ
ನಿನ್ನೆದುರು ಕಾದೈರೆಗ್ ಮೂವೆರೆ -
ಡೊರೈನೀ ಒತ್ತೊನುಲ ಪನ್ನಗ ತೆಲಿತ್ದೇ ಪನ್ನೆ ||
ಕಳ್ಳೆ ಕ್ರಿಷ್ಟೆನೆ ಕೈಕ್ ತಿಕ್ಕಯೆ
ಎಲ್ಯಯೆನೆ ಈ ಪಾರ್ತೆ ನಿನ್ನಡ
ಮಲ್ತೆ ಲಡಯಿನ್ ಆಂಡ ಸಯ್ಯಡೆ ನಿಕ್ಲ್ ಜೋಕುಲಯ ||

14

ಸೈಪುನೇರ್ಂದಿತ್ತೆ ತೂವಡ್
ಮುಲ್ಪ ಸೇರ್ನ ಜನೊಕುಲುಂದುದು
ನಿಸ್ತೆಯೊನು ಮಲ್ಪುನಗ ಬೊಲ್ಪಾಂಡಪಗ ಮೂಡಯಿಡ್ ||
ಬೂಮಿ ಪುತ್ರನೆ ಬರ್ಪುನಾ ದಿನೊ
ಪಾಡ್ಯೊದಾ ತಿತಿತಾನಿ ಮಾಗದೆ
ಕಾಳಗೊಗು ತಯರಾಯೆ ಬೀಮಡ ಕ್ರಿಷ್ಟನೆದುರೆದುರು ||

|| ಭೀಮ ಮಾಗದೆರೆ ಯುದ್ಧೊ ||

ಆ ಜರಾಸಂದೆನ್ನಿ ಪುದರ್ಡ್
ಬಾರಿದರ್ಪುದ ಮಗದ ರಾಜೆನೆ
ಸಾವು ಲೆಪ್ಪುನೆ ತನ್ಕ್ ಪಂಡ್ಡ್ ಗ್ರೇಯ್ತನಾ ಪರಬೆ ||
ಬೇರಿ ಪುಡಯಿನ ಲಚ್ಚಣೊಡು ಇನಿ
ವಾಸುದೇವೆನೆ ಎದುರು ಬತ್ತದ್
ಕಾಳಗೊಗು ಎದುರಾಯೆ ಪನ್ನಗ ಇದ್ದಿ ಅಲ್ಮಾನೊ ||

1

ಲೋಕೊ ರಕ್ಷಕೆ ಕ್ರಿಷ್ಟೆ ಪಂಡ್ಡ್
ಯಾನ್ ತೆರಿನಯೆ ಆಂಡ ಕಂಸನ
ಪ್ರಾಣೊ ದೆತ್ತದ್ ಎನ್ನ ಜೋಕುಲೆ ಬೊಟ್ಟುನುರ್ದನಯೆ ||
ಈತೆ ಪಗೆ ಆಯಡನೆ ಇದ್ದಿಡ

ಮೋಕೆ ತೋಜವಿ ಪುಳ್ಳಿ ಆಯನ
ರೂಪು ರೂಪುಡು ಧರ್ಮ ಯುದ್ಧನು ಮಲ್ತೆ ಬೀಮಡನೆ ||

2

ಬರೋಣಿ ಬರೋಣಿಡ್ ಗಂದೊ ಕಸ್ತುರಿ
ಮೆಯಿಕ್ ಪೂಜ್ಯರೆ ಕೊರೈ ಬೀಮಗ್
ಪೊಸತ್ ಕುಂಟುನು ಅಂಗಿ ಚಲ್ಲಣೊ ಬಿಲ್ಲ ಬಾಣೊಲೆನ್ ||
ಗದೆನ್ ಕಡ್ಲೊನು ಬಿಂಡಿವಾಳೊನು
ನಮುನೆ ನಮುನೆಡ್ ಪತ್ತುನಾಯುದೊ
ಎದುರು ದೀಡ್ಡ್ ಕೇಂಡೆನಾಯಡ ಬೋಡೊ ಚದುರಂಗೊ ||

3

ನಿನ್ನ ಸೇನೆದ ಸಾಯೊ ಬೊಡ್ಡಿಯ
ಎನ್ನಡುಂಡುಲ ಕೋಟೆದಾಪೆಕ್
ಬರ್ದೆರಾಕ್ ನಮ್ಮ ಕಾಳಗೊ ಆಪಿ ಕಳತಾಡೆ ||
ಯುದ್ಧೊ ಮಲ್ತೆರೆ ಪಿದಯಿದಂಗಣೊ
ಎಡ್ಡೆ ಪಂಡ್ಡ್ ಅವುಲು ಉಂತ್ಯೆರ್
ರಡ್ಡ್ ಕಡತಲ ಸೇನೆದಾಕ್ ತೂಯೆರೆತ್ತಿಯೆರ್ ||

4

ಪಾರ್ತ ಕ್ರಿಷ್ಟೆರ್ ಬುಕ್ಕೊ ಬೆರಣೆರ್
ನೋಟಕೆರ್ ಆವೊಂದು ಉಂತ್ಯೆರ್
ಮಾಗದೆನೆ ರಣೊ ಬೂಳ್ಳೊ ಬೀಮಗ್ ಕೊರೈನರಿಯಣೊಡು
ಪಾಂಡುರಾಜಕುಮಾರ ಎನ್ನನ್
ಈಯೆ ಗೆಲ್ತೆಡ್ ಚತ್ತಿ ಜಾತಿದ
ಕೀರ್ತಿನೊರಿಪುಲ ಪನ್ನ ಪ್ರೀತಿಡ್ ತರೆಕ್ ಕೈದೀಡ್ಯೆ ||

5

ಕಾದುನೆಂಚನೆಟತ್ತೆ ಮಾಗದ
ಬಾಣೊ ಬಿಲ್ಲೊಡೊ ಗದೆಟ್ ಕಡ್ಲೊಡೊ
ವೀರತನೊತವೆ ಮಲ್ಲ ಯುದ್ಧೊಡು ಬೀಮೆ ಕೇನ್ನಗನೆ ||
ಸಾರೊ ಆನೆಲೆ ತೆರಣೊದಾಯೆನೆ
ಈಯೆ ಪನ್ನುನ ಸುದ್ದಿ ಕೇನ್ದೆ
ಕಾದೆನ್ನಡ ಮಲ್ಲ ಯುದ್ಧೊಡು ಎಂಕ್ ತೋಜಲಯ ||

6

ಆಪೇಕೀಪೆಕ್ ಉಂತುದಾಕ್ಲ್
ತೋಳು ತಿಗಲೆಗ್ ತುಡೆಕ್ ರಟ್ಟಿಗ್
ಹಾಕೊನುಂದೇ ಮಲೆದ್ ತೂಯೆರ್ ಒರೈನೊರೈನಲ ||

ಲಾಗೊನುಂದೇ ಮೇಲ್ಗ್ ಬೂರೈರ್
ನೂಕು ನೂಕೈರ್ ತಿರ್ಗ್ ತಿರ್ಗ್ಡ್-
ಲಾಯ್ಲಿ ನೂಕೈರೆ ದಂಡೆ ಪಾಡ್ಡ್ ತೂಯೆರುಂತಯೆರೆ ||

7

ಪತ್ತಾಗೇ ತಿಕ್ಕಂದೆ ಹೆಜ್ಜೆನ್
ದೆಪ್ಪುನಗ ಜಾರುವೆರ್ ಪತ್ತೆರೆ
ಒರೈನೊರೈನೆ ಸರಿ ಮೊರಂಪುನು ಊರು ಪುಣೆವೊಂದು ||
ತಿರ್ಗ್ ತಿರ್ಗ್ಡ್ ಮಲೆದ್ ನಾಲಿನ
ಪತ್ತದಮಪುನಗಪಗ ತಪ್ಪದ್
ಪತ್ತ ಪತ್ತೆರೆ ತಿಕ್ಕಚೆನೆ ಒರಿಯಾಂಡಲಾಕ್ಲೆಡ್ ||

8

ನಾಲಿನಮತನ ಪತ್ತ ಬುಡ್ಡದ್
ತೋಳುದಾ ಕತ್ತೆರಿದ್ ಬಿಗಿತದ್
ಬೀಜಿದೇ ರಟ್ಟಯೆರೆ ತೂಯೆರ್ ಮಲ್ಲೆರಿರ್ದೆರ್ಲ ||
ಪತ್ತೆರಾಕ್ ಮಂಗ ಪತ್ತಡ್
ತೀರ್ಲಿ ಪಂಡ್ಡ್ ನಾಗ ಪತ್ತಡ್
ಬಗ್ಗೆಯೆರೆ ತೂನಗನೆ ಆಯಿಜಿ ಅಕ್ಲೆಡೇರೆಗ್ಲ ||

9

ಬೆಗರ್ ಅರಿನೆಟ್ ಮಣ್ಣೆ ಬೊದುಲುದು
ಸರುತೊ ಉಂತ್ಯೆರೆ ತೀರ್ಲಿ ಜಾರುನ
ನೆಲಟ್ ಬೂರೈರ್ ಲಕ್ಕುದುಂತ್ಯೆರ್ ಕಾಳಗೊದ ಕಳಟ್ ||
ಉಸುಲು ಮೂಂಕುಡೆ ಬುಡುದು ಕರ್ಪುರೊ
ಅಗಿದ್ ಉಬಿನೀರ್ನಿಂಗ್ಡಾಕ್ಲ್
ಪೆರಪ ಪುಣೆಯೆರ್ ತೊಟ್ಟು ಪತ್ತೆರೆ ಬೀಮ ಮಾಗದೆರ್ ||

10

ಇರ್ಲೆ ನಿದೆಲ ಪಗೆಲ್ ಬಡವುಲ
ಇದ್ದಿಯಕಲೆನ ತೋಳು ಸತ್ತೊನೆ
ಕಮ್ಮಿಯಾಯಿಜಿ ಬಾರಿ ಸೊರೈಡು ಕೋಪೊ ಏರುನೆಟ್ ||
ದೆರಿ ಕೈ ನಡ್ಗಂದ್ ಪತ್ತನ
ಪತ್ತ ಸಡಿಲಾವಂದ್ ಮನಸ್ಡ್
ಪುಕ್ಕತನೊ ಸುಳಿಯಂದ್ ಇರೈರೆಗ್ಕಲೆ ಸಾದನೆಡ್ ||

11

ಇರ್ಲೆ ಪಗೆಲ್ಡ್ ಕಾದಾದಾನಗ
ಪುಣ್ಣಮೆದ ದುಂಬಾನಿ ರಾತ್ರಡ್
ಸತ್ತೊ ಕುಂದುದು ಆಂಡ್ ಮಾಗದ ತೆರಣೊ ಕಮ್ಯಾಂಡ್

ರಟ್ಟಿಡೇ ಬಲೊ ಇದ್ದಿ ದೈರೊನೆ
ಕಮ್ಮಿಯಾಂಡಲ ನಾಲಗೆದ ಪಸೆ
ರಟ್ಟಿದಾನಗ ಗೆಲ್ಲುನಾಸೆನೆ ಜಾರ್‌ದಾಂಡಯಗ್ ||

12

ತಿಗಲೆ ನಡ್ಗದ್ ಕಣ್ಣೆ ಕಬೆರ್‌ದ್
ಲಡಯಿ ಮಲ್ಪುನ ಸೌರೈಯ್ಯ ಕುಂದುದು
ಉಸುಲು ಬುಡ್ಡುನ ಸಿತಿನ್ ತೂದೇ ಬೀಮಗಾ ಕ್ರಿಷ್ಟೆ ||
ಮನಸ್‌ಡೀಯೇ ವಾಯುದೇವನ್
ನೆನೆತ್‌ದಿಂಬ್ಯನ್ ಕೆರ್ದ ಪಂಡ್‌ದ್
ಕಯಿತ ಬಾಸೆಡ್ ಕೊರೈ ಸೂಚನೆ ಆಯಗರ್ತಾಂಡ್ ||

13

ವಾಯುದೇವನ ದ್ಯಾನೊಡಿತ್ತಾನ
ಬೀಮಸೇನನ್ ತೂದು ಮಾಗದ
ಓಂಗ್‌ದೇ ಪಿರವುಡೆನೆ ಬತ್ತದ್ ಅಮತ್ ಪತ್ತಿಯೆನೆ ||
ಬೀಮೆ ಕುಡ್ತುದು ರಟ್ಟಿದಾನಗ
ಆಕಸೊಡು ಸರಿ ತಿರ್ಗ್ ತಿರ್ಗ್‌ದ್
ಬೂರೈ ತಿರ್ಗ್ ಮಗದ ರಾಜೆನೆ ಆ ಜರಾಸಂದೆ ||

14

ರಡ್ಡ್ ಕಾರನ್ ಆಪೆಕೀಪೆಕ್
ಒಯ್ತ ಬಿಚ್ಚೆಯೆ ಬೀಮೆ ಮಗದನ
ಗಟ್ಟಿ ಸೈರೊನು ಮಿತ್ತ ದಕ್ಕದ್ ತೂಯೆನುಂತೊಂದು ||
ಅಚ್ಚಿರೊನೆ ಆಂಡಪಗ ಆಯಗ್
ಬಿಚ್ಚಿನವೆ ಬಾಗೊಗುಳು ಕೂಡುದು
ಲಕ್ಕದುಂತೈನೆ ವೀರ ಮಾಗದ ಎಂಚಿನಾವುಸೊನೊ ||

15

ಲಕ್ಕನಾಯನ್ ಪಿರಲ ತಿಗ್ಗದ್
ದಕ್ಕೆ ಬೀಮೆನೆ ಅಪಗಲಾ ಅವು
ಒಟ್ಟು ಕೂಡ್ಕಗ ಲಕ್ಕದುಂತುವೆ ಕೊರ್ದುಲಾರ್ಬಟೆನ್ ||
ಸರಿ ಸರಿಡ್ ತಿಗ್‌ತ್ ದಕ್ಕನ
ದುಸ್ಪ ಮಾಗದ ಸೈರೊ ಕೂಡುದು
ಬನ್ನಗನೆ ಕಂಗಾಲ್ ಆಯಿನ ಬೀಮಗಾ ಕ್ರಿಷ್ಟೆ ||

16

ಕಯಿತವಂಗಯಿ ಕಂತ ಮುಟ್ಟಿನೆ
ಮಲ್‌ತ್ ತೋಜಯಿ ಸಾತ್‌ಗಾಯೆನೆ
ಅರದ್ ಪತ್ತದ್ ಮಾಗದನ್ ಸರಿ ತಿಗ್‌ತ್‌ದಾ ಕ್ರಿಷ್ಟೆ ||

ಸರಿಟ್ ತೋಜಯಿ ನಮುನೆಡೈನಾಲ
ಅಡಕ್‌ದಾನಗ ಬಾನೊಡೇ ಅವು
ತಿರ್‌ಗ್‌ದೇ ನೂತೆನ್ನೊ ಸುತ್ತುಲ ಆದ್ ಬೂಂಡರ್‌ಪಗ ||

17

ಬೂರೈ ಬಾಗೊಲು ಒಟ್ಟು ಕೂಡುಜಿ
ಮಾಗದನವೇ ಪೆರಣೊ ರಟ್ಟದ್
ಆನಗನೆ ದೇವತೆಲು ಬೀಮನ್ ಪುಗರ್ ಪುಗರೊಂದು ||
ಪೂತ ಬರ್ಸೊನು ಜಪುಡದಾಕ್‌ಲ್
ದೇವ ದುಂದುಬಿ ಸೊರೊನು ಲಕ್ಕದ್
ಆದಿ ನಾರಾಯಿಣನ ಕಾರ್ನಿಕೊನೇತೊ ಪುಗರಿಯೆರ್ ||

18

ಬುಡೆದಿನಾಕ್‌ಲ್ ಮಗನ ಒಟ್ಟಿಗೆ
ಪುಣತ ಕೈತಲ್ ಬುಲೈರೇತಲ
ಅರಮನೆದ ಪರಿವಾರೊ ಮಾತೆರ್ ಮುರೈಯ್ಯ ದೀಡಿಯೆರ್ |
ಮತಿಯೆ ತತ್ತನ ಲೆಕೊನೆ ಮೌನೊಡು
ಪುಣನ್ ತೂದೇ ಕುಲ್ಲನಕ್‌ಲೆನ್
ಮುರಹರನೆ ಸಮದಾನೊ ಮಲ್ತದ್ ದುಕ್ಕೊನುಂತಾಯೆ ||

19

ಉಲಯಿ ಪೊಗ್ಗುದು ಬಂದ್‌ಡಿತ್ತಾನ
ಅರಸು ಚೋಕುಲೆನಾಯೆ ಬುಡ್ಡದ್
ನಿಕ್‌ಲ್ ನನ ಬದ್‌ಕೊನುಲೆ ಪಂಡ್‌ದ್ ಕ್ರಿಷ್ಟೆ ಕಡಪುಡಿಯೆ
ಮಾಗದನ ಪುಣ ಪೊತ್ತನಗ ಆ-
ಯನವೆ ಬುಡೆದಿಲು ಕಾಟೊಗೆರೈರ್
ಪುಣತ ಒಟ್ಟಿಗೆ ಬೊಣ್ಣೊ ಆಯೆರ್ ಚಾತ್ರಿಯಾಣಿಗುಳು ||

20

ಸಾವು ಸೂತಗೊ ಕರಿದ್‌ಲಾ ಸಹ-
ದೇವೆ ಪನ್ನುನ ಅರಸು ಮಗನೇ
ರಾಜ ಸಿಮ್ಮಾಸನೊಡು ಕುಲ್ಲದ್ ಪಟ್ಟೊ ಕಟ್ಟಿಯೆನೆ ||
ಪ್ರಾಯೊದಾ ಮಂತ್ರಿಲೆಡ ಕೇಂಡ್‌ದ್
ಆಡಳಿತ ಮಲ್ಪಿಯೆರೆ ಬೋಡಯಿ
ಮಾರ್ಬಲೊನು ಚದುರಂಗೊ ಸೇನೆನ್ ದೀಡ್ಡ್ ಹರಿಕ್ರಿಷ್ಟೆ ||

21

ಮಾತೆರೆಗ್‌ಲಾ ಬುದ್ಧಿ ಪಂಡ್‌ದ್
ತಾನ್ ಬೀಮಾರ್ಜನೆರೆ ಒಟ್ಟಿಗೆ
ಮಾಗದನ ತೇರ್‌ಡೆನೆ ಕುಲ್ಲದು ಪಿದಡ್‌ದುಂತುನಗ ||

ರಾಜನಾ ಮಗನೊಟ್ಟು ಜನೊಕುಲು
ನೀಟೊ ಬೂರುದು ಕ್ರಿಷ್ಟ ಸ್ವಾಮಿನ್
ಏತ್‌ಲಾ ಪುಗರಿಯೆರ್ ಜಯೊ ಜಯೊ ಜಯೊನೆ ಪಂಡೊಂದು ||

|| ಇಂದ್ರಪ್ರಸ್ತೊಗು ವೇದವ್ಯಾಸೇತ್ತಿಯೆರ್ ||

ಮಾಗದನ ರಾಜ್ಯೊಡುದು ಕ್ರಿಷ್ಟನೆ
ಬೀಮ ಪಾರ್ತೆರೆನೊಟ್ಟು ಬನ್ನಗ
ಆರತಿನ ಬೆಳಗಾದ್ ಅರಮನೆದುಲಯಿ ಪೊಗ್ಗಯೆರ್ ||
ರಾಜೆನಾ ಧರ್ಮಜೆನೆ ಕಾರ್ಗ್
ನೀಟೊ ಬೂರುದು ಪಂಡೆ ಕ್ರಿಷ್ಟನ್
ಏತ್‌ಲಾ ಪುಗರೊಂದು ಬಗ್ಗೆರೆಗೀಯೆ ದಾಸೆಂದ್ ||

1
ಮಗದ ರಾಜ್ಯೊಗು ಪೋಯಿ ಸಂಗತಿ
ಅವುಲು ಮಲ್ತನ ಏಸೊ ಬೈರವ
ಗುಡಿತ ದೋಲುನು ಪೊಡಿಯೆ ರಟ್ಟದ್ ಆಯನರಮನೆಗ್ ||
ಪಿರವುದಾ ಕುರು ಬಾಕಿಲ್‌ಡೆ ಎಂ-
ಕುಲುಲ ಪೊಗ್ಗದು ಬೀಮನೆದುರುಗು
ಲಡಯಿಗಾಯನ್ ಉಂತದಪಗನೆ ಕೆರ್ಡ್ ಪಾಡೆನೆನ್ ||

2
ಬುಕ್ಕೊ ಬಂದ್‌ಡ್ ಇತ್ತನಕಲೆನ್
ಬುಡ್ಡಯಿನ ಕತೆ ಮಾತ ಪಂಡ್‌ಡ್
ಯಜ್ಞೊ ನಡಪೆರೆ ನನಗ್ ತೊಂದರೆ ಇದ್ದಿ ಕಂಡಿತೊನೆ ||
ಧರ್ಮನಂದನ ಮನಸ್‌ಗೇತ್‌ಲ
ದೈಯ್ಯೊ ಪಂಡ್‌ಡ್ ನನದ ಕಾರ್ಯೊನು
ಮಲ್ಪಿಯೆರೆ ರುಸಿಕುಲೆನ್ ತರ್ಪಲ ಬದರಿಕಾಸ್ತಮೊದ ||

3
ಊರುದೂರುದ ಅರಸುನಕಲೆಗ್
ಓಲೆನುಡಿಗಿರೆ ಕೊರ್ದು ಬರ್ಪಲ
ದಾಯವಾದಿಲು ಬರಡ್ ಯಾಗೊಗು ಕೊರ್ದ ಹೇಳಿಕೆನ್ ||
ಯಾನ್ ಬೋಡನಗಪಗ ಬರ್ಪನೆ
ಪೋಪೆ ಪಂಡ್‌ಡ್ ಪಿಡಡ್‌ನಾಪಗ
ತೇರ್ದ್ ಕುಲ್ಲದ್ ಕಡಪುಡಿಯೆರಾ ಕೃಷ್ಣನಾಕುಲುಲ ||

4
ಆತ್ ಪೊರ್ತುಗು ವೇದವ್ಯಾಸೆರ್
ಆಡೆಗೆತ್ತನ ತೂದು ಧರ್ಮಜೆ
ಕಾರ್‌ಗಡ್ಡೊನೆ ಬೂರು ಉಲಯಿಗ್ ಬತ್ತೆ ಲೆತೊನುಂದು ||
ರಾಜ ಚಾವಡಿದುಲಯಿ ಕುಲ್ಲದ್
ಆ ಮಹಾಮುನಿ ಪಾದೊ ಪೂಜೆನ್
ರಾಣಿ ದ್ರೌಪದಿನೊಟ್ಟು ಮಲ್ತದ್ ಕೈನ್ ಮುಗಿಯೊಂದು ||

5
ಅಮೆರೆಗ್ ಇನಿ ಮುಟ್ಟು ಸೊರ್ಗೊಡು
ಕುಲ್ಲುನಾ ಏಗಿತೊನೆ ಇದ್ದಿಗಿ
ಐಕ್ಯ ಎಂಕುಲು ರಾಜಸೂಯೊದ ಯಜ್ಞೊ ಮಲ್ಪೊಡಿಗಿ ||
ನಾರದಾ ರುಸಿ ಪನ್ನಗೆಂಕಲ
ಆಪುಜಿಂದ್‌ದ್ ಪನಿಯೆರಾಯಿಜಿ
ಯಾಗೊ ಮಲ್ಪುನ ರುತೊನು ಕೈಕೊಂದೇನ್ ಮುನಿದೇವಾ ||

6
ರಾಜ ರಾಜೆರೆ ಕಯಿತ ಕಪ್ಪೊನು
ಕಾಣೆಗೆದ ಕ್ರಮೊಟಿಂಕ್ ಕನಯೆರೆ
ತೀರುನವೆ ಕಸ್ಪೊಂದು ಪೋಡಿಗಿ ಉಂಡು ಮುನಿದೇವಾ ||
ಏರ್ ಬಗ್ಗೆರ್ ಅರಸುನಾಕ್‌ಲ್
ಕಾಣೆಗೆನ್ ಕೊರ್ದೆರ್‌ಡ ಯುದ್ಧೊನೆ
ಆವೊಡವು ಗೆಲ್ಪೆರೆಗ್ ಸಾದ್ಯೊನೋ ಚಿತ್ರಿ ರಾಜೆರೆನ್ ||

7
ಗೆಲ್ಪಜಿಡ ಊರ್ದಕ್‌ಲ್ ತೆಲಿಪೆರೆ-
ಗೆಡ್ಡೆ ಸಾದಿಯೆ ಆಂಡ್ ಪನ್ನಗ
ಅರುನೆನೆ ಲಕ್‌ದುಂತ್ಯೆ ವ್ಯಾಸೆರೆ ಕಾರ್ಗ್ ಪುಡ್ಯಾಡ್ ||
ಅಣ್ಣ ಈ ಮಹ ರುಸಿನ ಎದುರುಡು
ಬುಲ್ಪುನೆನ್ ಬುಡು ಯಾನ್ ನಿನ್ನವೆ
ಮೆಗೈನಾದುಪ್ಪುನಗ ಪೋಡಿಗಿ ದಾನೆ ನಿಕ್ಕಿತ್ತೆ ||

8
ದೇಸೊ ದೇಸೊದ ರಾಜನಕಲೆನ್
ಯಾನೆ ಗೆಲ್ತದ್ ಕಪ್ಪೊ ಕಾಣೆಗೆ-
ನಾಕಲೆನವೇ ತರೆಟ್ ತುಂಬದ್ ಈಡೆ ತರ್ಪಾವೆ ||
ಯಾನ್ ತತ್ತೆಡ ಎನ್ನಗಾಂಡಿವೊ
ದಾಜೊ ಪಂಡ್‌ಡ್ ಕೈತ ಉಂಗಿಲೊ
ಜಾರದಾಯಡ ಕೊರೈ ಮುಡಿಪುಗು ಉಂದೆ ಪಂಡೊಂದು ||

9

ವೇದವ್ಯಾಸೇರೇಗಾಯ ಪಾತೆರೊ
ಕೇನ್ನಗನೆ ಸಂತೋಸು ಆದಾಲ
ಬಾರಿ ಪುಗರ್‌ದ್ ಚತ್ರಿ ವಂಸೊದ ಕೀರ್ತಿ ಗೌರವೊಗು||
ಪಾತ್ರೆಯಾಯಿನ ಪಾರ್ತ ಪಾತೆರೊ
ಸಾರ್ತಕೊನೆ ಆಂಡ್‌ಂದ್ ಧರ್ಮಜ-
ಡಾರ್ ಪಂಡರ್ ಈಯೆ ಪೋಡ್ಯಡ ಯಾಗೊ ಮಲ್ಪೆರೆಗ್||

10

ನಾಲ್ ರಂಗೊದ ಸೇನೆದಕಲೆನ್
ನಾಲ್ ಪಾಲ್‌ನ್ ಮಲ್ತದೀಯೇ
ನಾಲ್ ಮೆಗ್ಯಲ್ಲೆನವೆ ವಸೊಕುಲ ಕೊರ್ದು ಕಡಪುಡುಲ||
ಮೂಡಯಿಗ್ ರಣಬೀಮೆ ಬಡೆಕಯಿ
ಪಾರ್ತೆನೇ ತೆನ್ನಯಿಗ್‌ಲಾ ಸಹ-
ದೇವೆ ಪಡ್ಡೊಯಿ ನಕುಲೆ ಪೋವಡ್ ನಾಲ್ ದಿಕ್ಕಲೆಗ್||

11

ಲಗೊಡೆಡೆದ ಗ್ರಹೊತ ದಿಸ್ವಿಡ್
ಮಲ್ಲ ರಾಸಿಡ್ ಯೋಗೊ ಕರಣೊಡು
ನಿತ್ಯೆದಾ ನಚ್ಚತ್ತೊ ಕೂಡುದು ಬರ್ಪಿ ಸುಬಗಲಿಗಿ||
ಇತ್ತೆನೇ ಎಡ್ಡೆಂದ್ ವ್ಯಾಸೆರ್
ಪನ್ನಗನೆ ನಾಲ್ವನೊಲ ಸೇನೆದ ಸನ್ನಯೊಡು
ವ್ಯಾಸೆರೆನ ಪಾದೊಗು ಬಗ್ಗಿ ಬಾವನೆಡ್||

12

ಅಡ್ಲೊ ಬೂರುದು ಅಪ್ಪೆ ಕುಂತಿನ
ಒಪ್ಪಿಗದ ಪಾತೆರೊಗು ಕಾರ್‌ನ್
ಪತ್ತೆದಾ ಧರ್ಮಜ್ ಪುಡ್ಯಾಡೊಂದು ಪಿದಡ್‌ನಗ||
ದೇವಿ ದ್ರೌಪದಿ ಮಂಗಳಾರತಿ
ನಾಲ್ವೆರೆಗ್‌ಲಾ ಮಲ್ತದಕಲೆನ
ಮೋನೆ ಮುಂಡೊಗು ಬೊಟ್ಟು ಪಾಡ್ಯಲ್ ಪೊರ್ಲು ಕುಂಕುಮೊದ||

13

ಬೇರಿ ವಾದ್ಯೊನಗಾರಿದಾ ಸೊರೊ
ಟಾಕಲೇ ಪಿದಡ್‌ನಗ ಸೂತೆರ್
ಮಾಗದೆರ್ ಮಾತೆರ್ಲ ಜಯೊ ಜಯೊ ಪನ್ನ ಪುಗರಿಯೆರ್ ||
ನಾಲ್ ದಿಕ್ಕಗ್ ಮೋನೆ ಪಾಡ್‌ದ್
ನಾಲ್ವೆರೆನಲಾ ಸೇನೆ ಪಿದಡ್‌ದ್
ಪೋಪುನೆನ್ ತೂವೊಂದು ವ್ಯಾಸೆರ್ ಪಿದಡ್‌ದುಂತಿಯೆರ್ ||

14

ಧರ್ಮನಂದನ ನಿನ್ನ ಯಾಗೊನೆ
ಪೊರ್ಲು ನಡಪಡ್ ಯಾನ್ ಇತ್ತೆನೆ
ಬರ್ದೆ ಪಂಡ್‌ದ್ ಪಿದಡ್‌ದುಂತನಗಪಗ ಮಾತೆರ್‌ಲ||
ಅಡ್ಲೊ ಬೂರೈರ್ ಬಗ್ಗಿ ಬಾವೊಡು
ಕ್ರಿಷ್ಟೆ ನಿಕ್‌ಲೆನ್ ಕಾಪ್ಪೆನೇಪೊಲ
ಸುದೊ ಬಗ್ಗಿಡ್ ಉಪ್ಪುಲೆಂದ್‌ದ್ ಪೋಯೆರಲ್ಲಡ್‌ದ್||

|| ಅರ್ಜುನನ ಸೈನ್ಯೊ ಬಡೆಕಾಯಿಗ್ ||

ಸಾಲ್ವ ದೇಸೊಗು ಸೇನೆ ಎತ್ತನ-
ಗಾಪಗನೆ ಅರ್ಜುನಗ್ ಬಗ್ಗದ್
ಕಾಣಿಗನ್ ಕೊರ್ನೇನ್ ದೆತೊನುದು ಪಾರ್ತೆ ದುಂಬೊತ್ತೆ||
ವೀರ ಕಟದೇವನ್‌ಲ ಗೆಲ್ತದ್-
ಲಾದ್ ಕಪ್ಪೊನು ಪಡೆದ್ ಪೋನಗ
ನಾಲ್ ರಂಗೊದ ಸೇನೆಡೆದುರುಗುಲಾ ದ್ಯುಮತ್ತೇನೆ||

1

ಬತ್ತನಾಯನ್ ಗೆಲ್ತದಾದ್‌ಲ
ಬುಕ್ಕೊ ವೀರ ಸುನಾಜಿ ಸೋಲೆನೆ
ಅಲ್ತ ಪಿದಡ್‌ದ್ ಕಪ್ಪೊನೇ ಪ್ರತಿವಂದ್ಯೆ ಕೊರ್ನೇನ್||
ಎತ್ತಯೆನೆತನ ರಾಜ್ಯೊಗಾಪಗ
ತಿಕ್ಕನೆನೆ ಪ್ರಾಗ್ಜ್ಯೋತಿ ಪಟ್ಟಣೊ
ಅಲ್ವ ಯುದ್ಧೊನೆ ಆಂಡ್ ನರಕನ ಚೀನ ಬೋಟಕರ್||

2

ಅರ್ಜುನಡ ಸೋಲ್ತೊಂದು ಪನ್ನಗ
ಬತ್ತೆ ನರಕನ ಮಗೆನೆಲಾ ಬಗ-
ದತ್ತೆ ಆನೆದ ಮೇಲ್ದ ಕುಲ್ಲುದು ಬಾರಿ ಕಾರ್ಬರ್‌ಡ್||
ಇರ್ದೆರೆಗ್‌ಲಾ ಆಂಡ್ ಯುದ್ಧೊನೆ
ಬಿಲ್ಲ್ ದೆರ್‌ದ್ ಬಾಣೊ ಬುಡಿಯೆನೆ
ಮಲ್ಲ ಸೌರೊಡು ನರಕನಾ ಮಗೆ ಆಯನ್‌ಲ ಪಾರ್ತೆ||

3

ತುಂಡು ರಟ್ಟದ್ ತನಡ ಇತ್ತನ
ಮಂತ್ರೊ ಬಾಣೊನು ಬುಡುದು ತೂನಗ

ಎಂಚಿನದ್ಬುತೊ ಆಂಡೊ ಸಿವ ಸಿವ ಸೋಲು ಆಂಡೆಂದ್||
ಅರುನ್ನೆನೆ ಏರ್ಂದ್ ತೆರಿಯಂ-
ದಲ್ವನೇ ಕೇನ್ನಗನೆ ಪಂಡನ್
ಸತ್ಯೋನೇ ತೆರಿಯೊಂದು ಪಾರ್ತಡ ಪಂಡೆ ಬಗದತ್ತೆ||

4

ದೇವರಾಜನ ಮಗನೊ ಈಯೇ
ಆಯಡೆಂಕ್ಲ ದುಂಬುಡುದೆ ನಿಜೊ
ಪ್ರೀತಿ ಇತ್ತನೆಟೀಯೆ ಎನ್ನವೆ ಕಪ್ಪೊ ಕಾಣಿಗೇನ್||
ರಾಜಸೂಯೊದ ಯಾಗೊಗಾದೇ
ಯಾನ್ ಕೊಪುನೆನೀಯೆ ದೆತೊನುದು
ಪ್ರೀಯೊಡೆನ್ನರಮನೆಗ್ ಬರೊಡುಂದಾಯೆ ಪಂಡೊಂದು ||

5

ಒಂಜಿ ತಿಂಗೊಳು ಅಲ್ಪ ಉಂತ್ಯೆನೆ
ದಿಂಜ ಸಮನೊ ಆಂಡ್ ಪಾರ್ತಗ್
ಸಂಬ್ರಮೊಡು ಸನ್ನಯೊದ ಕಾಣಿಗೇ ಕೊರೈ ಬಗದತ್ತೆ||
ಅಲ್ತಡ್ ಪಿದಡಿಯೆನೆ ಬತ್ತದ್
ಎತ್ತೆನೇ ಸರಿ ಮೂಡು ಸೀಮೆದ
ಒತ್ತುಗಿತ್ತನ ರಾಜ್ಯೊ ಪರ್ವತ ಪ್ರಾಂತ್ಯೊ ಸೇರೊಂಡೆ||

6

ಗಿರಿಜನೊತ ಮಾರಾಜೆ ಕಪ್ಪೊನು
ಕೊರಿಯೆ ದುಂಬುಗು ಬತ್ತ ಬತ್ತದ್
ಗರುವೊದಾ ಗಾವಿಲೆರೆ ಗಯ್ಯಾಳೆಲೆನ್ ಗೆಲ್ತೊಂದು||
ಪರುವತೊದ ತಿರ್ತಿತ್ತಿ ಬೇಡೆರೆ
ಕುಲೊನು ಲಗಡಿಯೆ ದೆತ್ತೆನಲ್ವದ
ನಗರೊಡಿತ್ತನ ಕಳುವನಕಾಲೆನ್ ಕೆರ್ಡ್ ಪಾಡಿಯೆನೆ ||

7

ದಸ್ಯುನಕಾಲೆನ್ ದುಂಬು ಸೋಲ್ವದ್
ಬುಕ್ಕೊ ಕಾಸ್ತೀರೆರೆನ್ ಗೆಲ್ತದ್
ಪತ್ತ ಮಂಡಲೊದರಸು ಲೋಹಿತ ತರೆನ್ ರಟ್ಟಾದ್||
ಕಪ್ಪೊ ತುಂಬದಲಾ ತ್ರಿಗರ್ತೆರೆ
ಗರೊನುಂತದ ರೋಚಮಾನಡ
ಕಪ್ಪೊ ತುಂಬದ ಬುಕ್ಕೊ ಚಿತ್ರಾಯುದನ್ ಸೋಲ್ವಾಯೆ||

8

ಪೂಣೆರೆನ್ ವಂಗೆರೆನ್ ಗೆಲ್ತದ್
ವೀರ ನೇಪಾಳೆರೆನ್ ಸೋಲ್ವದ್

ಪಾರಸೀಕೆ ಕಿರಾತೆ ಬರ್ಬರೆ ಪಾರಿ ಯಾತ್ರೇರೆನ್||
ಆ ಹಿಮಾಲಯೊ ಗಿರಿತ ಬರಿಟೀ
ಮೂರ್ಕ ಜಾತಿ ಕಿರಾತೆರಿತ್ತನ
ನಾಡ್ ನಾಡ್ ಕೆರೈ ಕಾಡ್ ಜನೊಕುಲಾಕ್ಲೆನ್ ||

9

ಗಿರಿತ ಮಾಟೆಡ್ ಸೇರ್ಡ್ ಇತ್ತನ
ಕಳುವೆರಾಯ್ ಪುಳಿಂದ ಕೂಟೊನು
ಕೆರ್ಡ್ ಬದ್ಕನ್ ಗಂಟ್ ಕಟ್ಟೆಯೆ ಪಾರ್ತೆ ವೀರೆರೆಡ||
ಗಿರಿನ್ ಜತ್ತದ್ ಬತ್ತದಾ ಕಿಂ-
ಪುರುಸೆರುಪ್ಪುನ ಕಾಡ್ ಸೇರೈರ್
ಅವುಲು ಇತ್ತೆರ್ ಯಕ್ಷ ಕಿನ್ನೆರಾಣ್ ಪೊಣ್ಣುಗುಳು||

10

ಅಲ್ತ ಪಿದಡ್ ಹೇಮ ಕೂಟೊದ
ಪರ್ದತೊಗು ಬಡತೊಂದು ಅಲ್ವದ
ಕಲ್ ಮಿತರ್ಡ್ ಹಿಮೊತ ಪರ್ವತೊ ಮಾತ ನಾಡೊಂದು||
ಅಲ್ಪ ಗಂದವೇರೆ ಸೊರೈನು
ಅರುನ್ನೆನೆ ಉಂತಾದ್ ಬತ್ತೆರ್
ತಿರ್ದದಾ ಹರಿ ಬೂಮಿದಾಡೆಗ್ ಮಾತೆರೊಟ್ಟಾದ್||

11

ಅವುಲು ನೀರ್ದ ಬರಿಟ್ ದುಸ್ತೆರ್
ಬುಡರೊ ಮಲ್ತದ್ ಇತ್ತನಕಾಲೆನ್
ಕೆರ್ಡ್ ಬಡಕಯಿ ದಿಕ್ಕಡಿತ್ತನ ನಿಸದ ಪರ್ವತೊಗು||
ಬಡತನಾಕ್ ಅಲ್ಪದಾನವ
ನಕಾಲೆ ತರೆ ರಟ್ಟಾದ್ ಬದ್ಕನ್
ಒಯಿತ್ ಕನತೆರ್ ತಿಕ್ಕನೆನ್ ಸರಿ ರೂಡಿ ಮಲ್ತೊಂದು||

12

ಅಲ್ತಡ್ ಸರಿ ತಿರ್ದ ಜತ್ತದ್
ಬತ್ತೆರಾಕ್ ಕನಕ ಗಿರಿತಡೆ
ಅಲ್ಪ ಸುರೆರೆನ್ ಗೆಲ್ತ ದೆತ್ತೈರ್ ಗಂದ ಮಾದನೊಗು||
ಅವ್ವೆ ಪರ್ವತೊದುಲಯಿ ಸುತ್ತುಡು
ಇತ್ತಿ ಯಕ್ಷೆರೆ ಮಾತ ಸಂಪೊತು||
ಒಯ್ತನಾಕ್ಲೆ ಬತ್ತ ಬತ್ತೆರ್ ಮಂದರಾಚಲೊಗು||

13

ಕಡಲ್ ತುಳಿತನ ಮಂತ್ ಉಂದೇ
ಗಿರಿಯೆ ಪಂಡ್ ಸುತ್ತ ನಾಡ್ಯಗ
ಸುರೆರ್ ತಿಗೊಂದಿತ್ತೆರಾಲೇ ಗಿರಿನ್ ಕಾತೊಂದು ||
ನರೆನೆ ಬತ್ತನೆ ಪಂಡ್‌ದಾಕ್‌ಲ್
ಕೊರಿಯೆರೇತ್‌ಲ ಬೊಳ್ಳಿ ಬಂಗರ್
ಅವೆನ್ ದೆತೊನುದು ದಸ್ಯು ನಕಲೆನ್ ನಾಡ್ಯೆ ಪರ್ವತೊಡು||

14

ಸಕೆರ್ ಕದ್ಯೋತೆರಾಲ ಬೆಂಗರ್
ಪನ್‌ಪಿ ಜಾತಿದ ದಸ್ಯುನಾಕ್‌ಲ್
ತರೆನ್ ಬಗ್ಗದ್ ಇತ್ತಿ ಬದ್‌ಕ್‌ನ್ ಕೊರ್ದು ಬದ್‌ಕಿಯೆರ್||
ಗಿರಿಕುಲೆಡ್ ಮೇಲಾಯಿ ಕೀರ್ತಿ
ಗಿರಿಯೆ ಪುದರ್‌ದ ಮಾಲ್ಯವಂತೊದ
ಉಲಯಿ ಪೊಗ್ಗುದು ಸುತ್ತನಾಡ್‌ದ ಬತ್ತೆರಲ್ಪಡ್‌ದ||

15

ಸ್ವೇತ ಪರ್ವತೊಡ್‌ತ್ತಿ ಪೊಣ್ಣುಲು
ಪಾರ್ತೆ ಇಂದ್ರನ ಮಗೆನೆ ಪಂಡ್‌ದ್
ಏತ್‌ಲಾ ಪುಗರೊಂದು ಕೊರೈರ್ ರತ್ತೊ ಮಾಲೆಲೆನ್||
ಸೇನೆ ಬಡೆಕಯಿ ಕುರುನ ರಾಜ್ಯೊಗು
ಪೋಯಿ ಸಾತ್‌ಗ್ ಅಲ್ಪದರಸುಲ
ಬಾರಿ ಸಮ್ಮನೊ ಮಲ್ತ್ ಕೊರೈನೆ ಕಪ್ಪೊ ಕಾಣಿಗೇನ್||

16

ಬಡೆಕಯಿದ ರಾಜ್ಯೊಲೆನ್ ಪರ್ವತೊ
ಗಿರಿಕುಲೆನ್ ಸುತ್ತೊಂದು ಕಾಣಿಗೇ
ಪಡೆದ್ ಪಿದಡಿಯೆ ಪಾರ್ತೆ ತಿರ್ಗ್‌ದ್ ಇಂದ್ರ ಪ್ರಸ್ತೊಗುಲ ||
ಬೆರಿಯೆ ಬತ್ತನ ಸೇನೆದಕ್‌ಲೆನ್
ಕಡಪುಡುದು ಗಾಡಿಲೆಡ್ ದಿಂಜಯಿ
ಒಡವೆಲೆನ್ ಅರಮನೆದ ಉಲಯಿಗ್ ಸಾಗದಾನಗನೆ||

17

ಧರ್ಮನಂದನೆ ಎದುರು ಬತ್ತನೆ
ಪೊಣ್ಣುಲಾರತಿ ಪತ್ಯೆರಾಯಗ್
ಎತ್ತಯಿನ ಕಾಣಿಗೇನ್ ಬಂಡರೊದುಲಯಿ ದೀಪಾಯೆ||
ಬುಕ್ಕೊ ಪಲಯಡ ಪಂಡೆನರ್ದನೆ
ಒಲ್ಲೊತ್ತ ರಾಜೆರೆನ್ ಗೆಲ್ತ್‌ದ್
ಕಪ್ಪೊ ಕಾಣಿಗೇ ಕನತ್‌ನೆನ್ ಸರಿ ಇವರೊ ಇವರಾದ್ ||

|| ಭೀಮ ಮೂಡಯಿ ರಾಜ್ಯೊ ತಿರ್ಗಿಯೆ||

ಬೀಮ ಸೇನನ ದಂಡ್ ಪಿದಡ್‌ದ್
ಮೂಡಯಿಗ್ ಎತ್ತನಗ ಅಲ್ಪದ
ರಾಜ ರಾಜೆರ್ ಸುದ್ದಿ ಕೇಂಡ್‌ದ್ ಅಡ್ಲೊ ಬೂರಿಯೆರ್||
ಆಕಲೆನ ಕಾಣಿಗೇನ್ ಪತೊನುದು
ರೋಚಮಾನನ್ ಪತ್ತಾದಂತಯೆ
ಆಯ ಕಪ್ಪೊನು ಪಡೆದ್ ಬತ್ತನೆ ಚೇದಿ ನಗರೊಗುಲ||

1

ಗಾಂಡ್ ಗೌಜಿಡ್ ಬತ್ತಿ ಬೀಮನ್
ಚೇದಿ ದೇಸೊದ ರಾಜೆನೇ ಸಿಸು-
ಪಾಲೆ ಬತ್ತದ್ ಎದ್ಯೊನುಂದೇ ಕೊರೈ ಕಾಣಿಗೇನ್||
ಮೂಡಯಿದ ಸಾಮುದ್ರ ಸೇನನ್
ಸೋಲ್ಪದಾಪಗ ಇಂದ್ರ ಸೇನಗ್
ಬೀಮೆ ಬುಡಿಯೆನೆ ಪಗರಿನಾಪಗ ಸೋಲುನೊತ್ತೊಂಡೆ ||

2

ಅಲ್ಪ ವಂಗನ್ ಸೋಲ್ಪದಾದ್‌ಲ
ಬತ್ತೆ ಕಡಲ್‌ದ ಬರಿಕ್ ಲೋಹಿತೆ
ಪನ್ನಿ ರಾಜೆನೆ ಕಡಲ ಕುದುರುಡು ಇತ್ತೆ ಕಾರ್ಬರ್‌ಡ್||
ಅಲ್ಪದಾ ಮೊಗವೀರನಾಕ್‌ಲ್
ಇತ್ತೆರಾಯನ ದಂಡ್ ಸೇರ್‌ದ್
ಸತ್ತೊಡಾಕ್‌ಲ್ ಬೀಮನೆದುರುಡು ಸೊಲ್ತೆರಕ್‌ಲೊಟ್ಟು||

3

ಪಂಚಗೌಳಿವೆರಾಂದ್ರೆ ಮಾತೆರ್
ವಂಚನೆನೆ ಮಲ್ಪಂದೆ ಕಪ್ಪೊನು
ದಿಂಜ ಕೊರೈರ್ ಬೀಮ ಸಗ್ತಿಗ್ ಮಾತ ಪೋಡ್ಯೊಂದು||
ಮೇಲ್ ಕೋಟೆಡ್ ಇತ್ತಿ ಪರ್ವತೊ
ನಾಡ್ ಪತ್ತದ್ ಅಲ್ಪದಕ್‌ಲೆಡ
ಕಾಣಿಗೇನ್ ಪಡೆವೊಂದು ಗೆಲೆನೆ ಕಡಲ ರಾಜೆರೆನ್ ||

4

ಬುಕ್ಕೊ ಬೋಟಕೆರೂರುಡ್‌ತ್ತೆನ್
ದಸ್ಯುಲೆನ್ ಗೆಲ್ಲೊಂದು ಬನ್ನಗ
ತಿಕ್ಕಿ ಯವನೆ ಕರೂಸೆರೆನ್ ಸರಿ ಗುದ್ದುದಾಕ್‌ಲೆಡ||

ಬೊಳ್ಳಿ ಬಂಗರ್ ಮುತ್ತು ರತ್ನೊಲು
ಇತ್ತ್ನೇನ್ ತುಂಬಾಯೆ ಗಾಡಿಡ್
ಎತ್ತಯಿನವೇತ್ಂದ್ ಪನಿಯೆರೆ ತೀರಿ ಏರೆಗ್ಲೆ ||

5

ಸೇನೆ ಸರ್ವೆಸೊನುಲ ಲೆತೊನುದು
ಮೂಡಯಿದ ಸೊತ್ತುಲೆನ್ ಗಾಡಿಡ್
ಬೀಮೆ ದಿಂಜದ್ ಊರುಗೆತ್ತಯೆ ದಿಂಜ ಸಂತೊಸುಡು||
ಏರ್ಲಾ ನನ ಇದೈರ್ಂದ್
ತಾನ್ ಪಿರ ತಿರ್ಗಾಯೆ ಸೇನೆನ್
ಬಾರಿ ಗೌಜಿದ ಜಯೊತ ಗೋಸಣೆಡಿದ್ರ ಪ್ರಸ್ತೊಗುಲ||

6

ಬತ್ತಿ ಸುದ್ದಿನ್ ಕೇನ್ನ್ ಧರ್ಮೆ
ಎದೊನ್ನೀಯೆರೆ ಬತ್ತೆ ಪೊಂಜೊವು
ಪತ್ತೆರಾರತಿ ಬೀಮೆ ಸೇನೆನ್ ಪನ್ನ್ ಸೋಬಾನೆ||
ದಿಗ್ಗಿಜಯೊಡಾ ವಾಯು ಪುತ್ರನೆ
ಮಲ್ಲಿ ಸಾದನೆನೇತೋ ಪುಗರ್ಂದ್
ಕಪ್ಪೊ ಕಾಣಿಗೆ ತಿಕ್ಕನೇನ್ಲ ರಾಸಿ ಪಾಡಿಯೆರ್ ||

|| ಸಹದೇವೆ ತೆನ್ನಾಯಿ ರಾಜ್ಯೊಗು ಪೋಯೆ||

ಸೇನೆ ತೆನ್ನಯಿಗತ್ತೆದಲ್ಲದ
ರಾಜನಕ್ಲೆಡ ಯುದ್ಧೊ ಮಲ್ತ್ದ್
ಸೋಲ್ಪಯೆನೆ ಸಹದೇವೆ ಕೆಲವೆರ್ ರಾಜಿಗೊತ್ತಿಯೆರ್||
ಸೂರ ಸೇನೆನ್ ವೀರ ಮತ್ಸ್ಯನ್
ಬಾರಿ ಬಲೊತಯೆ ದಂತ ವಕ್ರನ್
ಪೂರ ಗೆಲ್ತ್ದ್ ಕಪ್ಪೊ ಕಾಣಿಗೆ ಪಡೆಯೆನಕ್ಲೆಡನೆ||

1

ಬುಕ್ಕೊ ಕುಂತೀ ಬೋಜ ಪುಳ್ಳಿನ್
ಲೆತ್ತದಾಯಡ ವಿಸಯೊ ಪನ್ನಗ
ಕೊರೈನೇತ್ಲ ಯಾಗೊಗಾಪುನ ಮಾತ ವಸ್ತುಲೆನ್||
ಅಲ್ತ್ ಜಂಬಕ ಮಗನ್ ಸೋಲ್ಪದ್
ಕಪ್ಪೊ ಪಡೆದಾವಂತಿ ದೇಸೊಡು
ತಿರ್ಗನಗವಿಂದಾನುವಿಂದೆರೆ ಗರ್ವೊನುಂತಾಯೆ ||

2

ಅರಸು ಬೀಸ್ಮಕೆ ವೀರಕುಂತಲ-
ನಕ್ಲ್ ಸೋಲ್ಪುದು ಕಪ್ಪೊ ಕೊರೈರ್
ಕಡತ್ ಬತ್ತೆರ್ ತುಂಗಬದ್ರೆನ್ ಪಂಪೆಗೆತ್ತಿಯೆರ್||
ಪಡೆನ್ ವೀರೂಪಾಕ್ಷ ದೇವೆರೆ
ನಿಲೆತ ಊರುಡು ಉಂತದಾಕ್ಲ್
ಗಿರಿವನೊತ ವೀರೆರೆನ್ ಕಿಸ್ಕಿಂದಡ್ಲ ತೂಯೆರೆಗ್ ||

3

ತಿರುಗನಾ ಸೇನೆದವೆ ಗೌಜಿದ
ಅಬ್ಬರೊನು ಕೇನೊಂದು ಮಂಗೆರ್
ಬತ್ತೆ ದೆತ್ತಿಯೊ ಮರತ ಗೆಲ್ಲ್ನ್ ಕೈಟ್ ಪತೊನುಂದು||
ಮುತ್ತಿಗೆನ್ ಪಾಡ್ಡನವೆ ಸೇನೆದ
ಸುತ್ತ ಸೇರ್ದುಗ ಬಾಣೊ ಬುಡಿಯೆರ್
ಗತ್ತದಾ ಸಹದೇವ ಸೈನ್ಯೊದ ವೀರೆರಕ್ಲೆಗ್ಲೆ ||

4

ವಾಲಿ ಸುಗ್ರೀವೆರೆನ ಕುಟುಮೊದ
ವಾನರೇರೆಡ ಏಳ್ ದಿನೊಟುಲ
ಕಾಳಗೊನೆ ನಡಪುನಗ ಕಪಿಕುಲೆ ನಾಯಕೆನೆ ಎದುರು||
ಸೀದ ಬತ್ತೆದ್ ಕೇಂಡೆನಾ ಸಹ-
ದೇವಡನೆ ನಿಕ್ಲೆರ್ ಪಂಡ್ಡ್
ಆಪಗಾಯೆನೆ ಪಂಡೆ ಪರಿಚಯೊ ಬತ್ತಿ ಕಾರ್ಯೊನುಲ||

5

ಅಪಗ ಬಗ್ಗಿಡ್ ಅಡ್ಲೊ ಬೂರೊನೆ
ಕಪಿಕುಲೊಟ್ಟಿಗೆ ಕಪ್ಪೊ ಕಾಣಿಗೆ
ಕೊರುದು ಕಡಪುಡಿ ಸಾತ್ಗೆತ್ತೆರ್ ಬುಕ್ಕೊ ತೆನ್ನಯಿಗ್||
ಕಡತೆರಾ ಕಾವೇರಿ ಸುದನ್ಲ
ಎದುರು ತಿಕ್ಕಿಮಹೀಸ್ಮತೀ ಪುರೊ
ಕಕ್ಲ್ ಮುತ್ತಿಗೆ ಪಾಡ್ಡ್ ಮಾರಾ ಮಾರಿಯಾಂಡೊಲು||

6

ನೀಲೆ ಪನ್ನುನ ಅರಸು ಅಗ್ಗಿನ
ಬಾಣೊ ಬುಡುದೇ ಸೂನು ಲಕ್ಕಯೆ
ಆಪಗನೆ ಸಹದೇವೆ ಮಂತ್ರೊದ ಬಾಣೊ ರಾಪನಗ||
ಬ್ರಾಣ ಏಸೊಡು ಅಗ್ಗಿ ಅಲ್ಲದ
ಸೂಳೆಲೆನ ಒಟ್ಟಿಗೆನೆ ಸೊರ್ಕುನ
ಮಾಯೊ ಬಿರಿನಗ ಅಗ್ಗಿನಾ ನಿಜೊ ರೂಪೊ ಗೊಂತಾಂಡ್

7

ನಿನ್ನ ರಾಜ್ಯೊಡು ಪೊಣ್ಣು ಪೊಂಜೊವು
ತನ್ನ ಸೈರೊದ ಸುಕೊನು ಆಣಲೆ-
ಡೊರೈಗಾಂಡಲ ಕೊರೈರಡ ಅಕಲೆನ್ನ ಬಂದುಲುಯ||
ಪನ್ದ ಅರಸುಗು ವರೊನು ಕೊರ್ದುಲ
ಅಗ್ನಿ ಮಾಯಕೊ ಆದ್ ಸೊಗೊಗು
ಎತ್ತಿಯೆನೆ ಬಾಣೊದವೆ ಸೂನುಲ ತೀರಿ ತೆಕ್ಕೆಯೆರೆ||

8

ಅಪಗನೇ ಸಹದೇವೆ ಅಗ್ನಿನ
ಜಪೊನು ಮಲ್ತದ್ ಪಂಡೆ ನಿನ್ನವೆ
ಕೆಲಸೊನೆಂಕುಲು ಮಲ್ಪುವೆ ಈ ಯಾಗೊ ಆದುಂಡು||
ಪನುಪುನೆನ್ ತೆರಿನಯೆನೆ ಈಯೇ
ಎದುರು ಉಂತ್ಯಡ ಎಂಚ ಮಲ್ಪುನೆ
ದಯೊನು ದೀಡ್ಡದ್ ಸಕಯೊ ಮಲ್ಪುಲ ಪನ್ದ ಕೈಮುಗಿಯೆ||

9

ತೆಕ್ಕದಾಂಡಲ ಅಗ್ನಿ ಅಪಗನೆ
ಕಪ್ಪೊ ಕಾಣಿಗೆ ಕೊಪೆ ಪಂಡ್ಡದ್
ಒತ್ತೊನುಂದೇ ಪೋಯೆ ನೀಲೆನೆ ತನ್ನ ಅರಮನೆಗ್ ||
ಅಲ್ತಡ್ಡದ್ ಸಯ್ಯಾದ್ರಿ ಪರ್ವತೊ-
ಡಿತ್ತಿ ಕಾಡ್ಡದ್ ಕಳುವನಕಲೆನ್
ಕೆರ್ದ ಕೊಂಕಣಿ ತುಳುತ ರಾಜ್ಯೊಡು ಬುಕ್ಕೊ ಕೇರಳಡ್||

10

ತಿಕ್ಕನಾ ಮುಡಿಯರಿನ್ ಕಂಬುದ
ಬೆಲ್ಲೊ ಸೀಯೊದ ನೆಯಿನ್ ತಾರಯಿ
ಪೆತ್ತದನೆ ನೆಯಿ ಕಾಪಿ ಏಲೆದ ಅರಿನ್ ಗಾಡಿಲೆಡ್||
ಒತ್ತುದೊತ್ತುದು ದಿಂಜಯೆರ್ ಸರಿ-
ಸೈನ್ಯೊದಾಕಲ್ ತೇರಲೆಡ್ ಸತ
ಯಜ್ಞೊ ಕಾರ್ಯೊಗು ಬೋಡು ಪಂಡ್ಡದ್ ಬಾರಿ ಜಾಗ್ರತೆಡ್||

11

ಬುಕ್ಕೊ ಬೀಮನ ಮಗೆ ಗಟೋದ್ಗಜೆ
ಇತ್ತಿ ಕಾಡ್ಗ್ ಬತ್ತದಾಯಗ್
ಸುದ್ದಿ ತೆರಿಪನಗಾಯೆ ಬತ್ತದ್ ಕಾರ್ ಪತ್ತಿಯೆನೆ||
ಎನ್ನ ಸಿದ್ಯಮ್ಮೇರ್ ದಾಯೆಗ್
ಬರೈರೆಗ್ ಲೆಪುಡಯರ್ ಪನ್ನಗ
ಇತ್ತೆನೇ ಈ ಕಡಲ್ ಕಡತ್ದ ಪೋಲ ಆಯೆರೆಗ್ ||

12

ಅಲ್ಪ ಲಂಕೆನೆ ಉಂಡುಲಕಲೆಡ
ಮರೈದಿಡ್ ಕಾಣಿಗೆನ್ ಕೊರೈರೆ
ಪನ್ನ ಇದ್ದಿಡ ಲಡಯಿಗುಂತೊಡು ಪನ್ದ ತೆರಿಪಾಲ||
ಉಂತ್ನೆಜ್ಜೆಡೆ ಆ ಗಟೋದ್ಗಜೆ
ಲಂಕೆಗತ್ತಿಯೆ ಮಾಯಕೊಡೆ ಸರಿ
ಮಂಗ ಮುಜುಕುಲು ರಕ್ಕಸೇರೆನ್ ಕೆರ್ಮ ಜಾಗೆಗ್ಲ ||

13

ರಾಜ ಬೀದಿಡೆ ನಡತ್ ಪೋನಗ
ದೂತೆರಾಯನ್ ತೂದು ಸಂಗತಿ
ಕೇನ್ದ ಅರಮನೆದುಲಯಿ ಪೊಗ್ಗದ್ ಮಿತ್ತ್ ಕುಲ್ಲಯೆರ್||
ರಾಜ ಚಾವಡಿಡಿತ್ತಿ ಮಣಿಕುಲೆ
ಮಾಲೆನೇಲುನ ತೂದು ವಜ್ರೊನು
ಗೋಡೆಡೇ ಕುಲ್ಲಾದ್ ಪಕಳೊನು ಇಡೆಟ್ ಒಪ್ಪಯಿನ ||

14

ಆ ವಿಬೀಸನ ಚಾವಡಿನ ಸರಿ
ಬೀಮನಾ ಮಗೆ ತೂದುಲಚ್ಚಿರೊ
ಆದ್ ಕುಲ್ಲಿಯೆ ತೂಯಿನಾಡೆಗೆ ತೂದು ಬೆಕ್ಕಸೊಡು||
ರಾವಣನ ಮೆಗಿ ಇಂಬ್ಯ ಮೋನೆನ್
ತೂನಗನೆ ರಕ್ಕಸೆರೆ ಜಾತಿಡ್
ಮೇಲ್ದಾಯೆನೆ ಪನ್ದ ಬಿನ್ನಗ್ ಮಲ್ತೆ ಸತ್ಕಾರೊ ||

15

ಪಾಂಡುರಾಜನ ಬಾಲೆಲೈವೆರ್
ವೀರೆರಾಕಲ್ ಧರ್ಮನಂದನೆ
ಬೀಮನರ್ದನೆ ನಕುಲ ಸಾದೇವೆಂದ್ ಪುದರಕಲೆ ||
ಚಂದ್ರ ವಂಸೊದ ಕುಟುಮೊದಾಕಲ್
ಇಂದ್ರ ಪ್ರಸ್ತೊಡು ರಾಜ್ಯೊನಾಳ್ವೆರ್
ಕುಂದು ಕೊರತೆನೆ ಇದ್ದಿಯಕಲೆನ ರಾಜ್ಯೊಡಿ ನಿ ಮುಟ್ಟು||

16

ರಾಜಸೂಯೊದ ಯಾಗೊ ಮಲ್ಪುನ
ಕಾರ್ಯೊಗಾ ಧರ್ಮಜೆನೆ ದೇಸೊದ
ರಾಜ ರಾಜೆರೆ ಕಪ್ಪೊ ಕಾನಿಗೆ ಪಡೆದ್ ಕೊಂಡ್ರಿಯೆರೆ ||
ನಾಲ್ ದಿಕ್ಕಿಗ್ ನಾಲ್ ಮೆಗ್ಗಿಯೆ-
ನಾಕ್ ಲೆನ್ ಕಡಪುಡುದೆ ವಿಜಯೊದ
ಸಿದ್ಧಿ ಸಾದನೆಗಕುಲು ಪಿದಡಿಯೆರಯಗ್ ಪುಡ್ಯಾಡ್ಡೆ ||

17

ಪಾರ್ತ್ ಬಡೆಕಯಿ ಬೀಮೆ ಮೂಡಯಿ
ಪೋದು ಕಪ್ಪೊನು ಪಡೆಯೆರಾಕ್ಲ್
ವೀರ ಸಾದೇವೆನೆಲ ತೆನ್ನಯಿಡಿತ್ತಿ ರಾಜೆರೆನ||
ಕಾಣಿಗೇನ್ ಪಡೆಯೆರೆನೆ ಬತ್ತದೆ
ಯಾನ್ ಬೀಮ ಕುಮಾರೆ ರಕ್ಕಸ
ಜಾತಿದಾಲೆ ಹಿಡಿಂಬೆ ಎನ್ನನ್ ಪೆದ್ದೆ ಸಾಂಕ್ನಲ್ ||

18

ಮರೈದಿಡ್ ಕಾಣಿಗೇನ್ ಕೊರೈರ್-
ಡೆಡ್ಡೆ ಇದ್ದಿಡ ಕಾದೊಡವು ನಿಜೊ
ಕೊರೈರೋ ಅತ್ತಿತ್ತೆ ಕಾದೈರೆ ಉಂತುವರೊ ಪನ್ಲೆ||
ದುಸ್ತೆರೆನ ಬಿದೆ ಮುತ್ತಯೆರೆನೇ
ಪುಟ್ಟನಯೆ ಸಿರಿ ಕ್ರಿಷ್ಟ ಅಕ್ಲೆನ್
ನಿತ್ಯೊ ಕಾಪುವೆ ಪನ್ನಗಸುರೆರೆ ಕಣ್ಣೆ ಕೆಂಪಾಂಡ್ ||

19

ಆದಿ ನಾರಾಯಣೆನೆ ರಾಮನ
ಕೀರ್ತಿಬತಾರೊನುಲ ಮಲ್ತೆದ್
ವಾಸುದೇವೆನೆ ಆದ್ ಪುಟ್ಟಿಯೆ ಇತ್ತೆದಾ ಯುಗೊಟು ||
ಆನಿ ಎನ್ನನ್ ಕಾತ್ನಾಯೆನೆ
ಪಾಂಡವೆರೆನಾ ಯಾಗೊ ರಚ್ಚಣೆ
ತಾನೆ ಮಲ್ಪುವೆ ಪನ್ದ ತೆರಿಪಯಿನಾ ಗಟೊದ್ಜಗ್ ||

20

ಆ ವಿಬೀಸಣೆ ಬಾರಿ ಸಮ್ಮನೊ
ತಾನೆ ಮಲ್ಪದ್ ಮುತ್ತು ರತ್ತೊದ
ರಾಸಿ ರಾಸಿನ್ ಎದುರು ದೊರಿಪಯೆ ಆಸೆ ಮಲ್ಪದೆ||
ಆನೆದಂತೊದ ಪಟ್ಟಿ ಪಕಳೊದ
ಮಾಲೆ ವಜೊದ ಮುಸ್ತಿ ಕುಲ್ಲಯಿ
ಕಡ್ಲೊ ಪುಣೆಪುನ ಬೀರೊ ದಕ್ಲೆಗ್ ಕವಚ ಸೀಸಕೊನು ||

21

ನಮುನೆ ನಮುನೆದ ಆಯುದೋಲೆನ್
ಎದುರು ದೀಡ್ ಪಟ್ಟಿದರುವೆಡ್
ಪೊದಿದ್ ಮಲ್ಪವೆ ರಾಸಿ ಪಾಡೈನೆ ಅರಸುಲಂಕೆದಯೆ ||
ಬಲಮುರಿತ ಸಂಕೊಲೆನ್ ಗಂದೊದ
ಕರಡಿಗಿಡ್ ಕಸ್ತುರಿನ್ ದಿಂಜದ್
ಪಿಲಿತ ಚರ್ಮೊನು ಜಿಂಕೆ ಕೊಂಬುನು ಅಟ್ಟಿ ದೀಪಯೆನೆ||

22

ಅರಮನೆದ ಪದ್ನಾಲ್ ಕಮ್ಮೊಲು
ಕಡೆಚಿಲ್ಡ್ ಬಂಗರ್ಡೆ ಮಲ್ತೆನ
ಅವೆನ್ ಪೊರ್ಪದ್ ಕೊರೈ ಯಾಗೊದ ಸಾಲೆಗಾವುಂದು||
ಅಸುರೆರೇತಲ ಬತ್ತೆರಾಡೆಗ್
ಕುಲಗಿರಿನ್ ತುಂಬೊಂದು ಪೋಪುನ
ಲೆಕೊನೆ ಪೋಯೆರ್ಲಾ ವಿಭೀಸಣ ಕಡೆತ ರಕ್ಕಸೆರ್||

23

ಆ ಗಟೊದ್ಜೆ ತುಂಬದೆತ್ತಯಿ
ಕಾಣಿಗೇದ ವಸ್ತಲೆನ್ಲಾ ಸಹ-
ದೇವೆ ಪಲಯಗ್ ತೋಜದಾನಗ ಆಂಡ್ ಸಂತೋಸು||
ರಾಜಸೂಯೊಗು ಆಪಿ ಸನ್ನಯೊ
ಬೇತೆ ಬೇತೆನೆ ದೀಡ್ಡ್ ಬಾಕಿಲ್
ಪಾಡಿಯೆರ್ ಬಂಡಾರೊದುಲಯಿದ ಬೀಗೊ ತಿಕ್ಕಾದ್||

24

ಜಯೊ ಜಯೊನೆ ಸಹದೇವಗ್ಂದ್
ಬೆಳಗಯೆರ್ ಆರತಿನ್ ಪೊಂಜೊವು
ಅರಮನೆಡ್ ಮಂಗಲೊದ ವಾದ್ಯೊಲೆ ಸೊರೊಲ ಕೇನ್ನಾಂಡ್ ||
ಅರಸು ಧರ್ಮಜೆ ರಾಜಸೂಯೊನು
ಮಲ್ಪಪವುನ ಬರವಸ್ಡ್ ನಕುಲನ್
ಕಡಪುಡಿಯೆ ಪಡ್ಲೊಯಿದ ರಾಜೆರೆ ಕಪ್ಪೊ ಪಡೆಯೆರೆಗ್ ||

|| ನಕುಲೆ ಪಡ್ಲೊಯಿಗತ್ತೆ ||

ನಕುಲ ಸೇನೆದ ಗೌಜಿದಬ್ಬರೊ-
ಡಪಗ ಬೂಮಿಯೆ ನಡ್ಗದಾನಗ
ಅರಸುನಾಕ್ಲ್ ದಾನೊ ಲಚ್ಚಣೊ ಹಾಲ್ ಆಂಡ್ಂದ್||
ನೆನೆತದುಪ್ಪುನಗಪಗ ನುಕ್ಕೈರ್
ಯವನ ರೋಹಿತನಕ್ಲೆ ರಾಜ್ಯೊಗು
ಅಕ್ಲೆ ಕಪ್ಪೊನು ಪಡೆದ್ ದುಂಬುಗು ಎತ್ತೈರಕ್ಲೊಟ್ಟು||

1

ಹೇಮಕನ್ ಸೈರಿಬನ್ ಸೋಲ್ಪದ್
ಆ ಕಳಿಂಗನ ಗವೊನುಂತದ್
ವೀರೆರಾ ಸಿಬಿನಕ್ಲೆ ಕುಟುಮೊದ ತರೆನ್ ತಗ್ಗಾದ್||
ರಾಜ್ಯೊನಕ್ಲೆಗೆ ಬುಡುದು ಸಂಪೊತು
ಮಾತ್ರೊ ಒಯ್ತದ್ ತನ್ನ ಸರಕ್ದ
ಗಾಡಿ ದಿಂಜಯೆ ವೀರ ತೇಜಿಡ್ ನಕುಲೆ ಸಂತೊಸುಡು||

2

ಚೇಕಿತಾನನ್ ಬರ್ಬರನ್ ತುರು-
ಕೇರೆ ಗರ್ವೊಗು ಮರ್ದ್ ತಾಗದ್
ವೀರೆನಾಯಿನ ಅರಸು ಬಾಹ್ಲಿಕೆ ಕೊರೈ ಕಾಣಿಗೇನ್||
ಚಾರಣೆರೆ ಕುರು ಸಾರಣೆರೆನಾ
ಪೂರ ಬದ್‌ಕ್‌ನ್ ಒಯ್ತ್ ದೆತ್ತದ್
ಮಾದ್ರ ದೇಸೊಗು ಪೋದು ಸಮ್ಲೆ ಕಾರ್ ಪತ್ತಿಯೆನೆ ||

3

ಅಲ್ಪಡ್‌ದ್ ತುಂಬಾಯೆ ಸನ್ನಯೊ
ಯಜ್ಞೋಗೇ ಆಪುನೆನ್ ಪಡ್ಲೊಯಿ
ಡಿತ್ತಿ ಕಡಲ್‌ದ ಬರಿಯೆ ಬಡೆಕಯಿ ಪೋದು ಮ್ಲೇಚ್ಚೆರೆನ್||
ಕೆರ್ದಲಕ್‌ಲೆನ ಬದ್‌ಕ್ ಮಾತೆನ್
ಕಟ್ಟ ಕಟ್ಟದ್ ಒಂಟೆ ಆನೆಲೆ
ಬುಕ್ಕೊ ಎರ್ದೆನ ಮೇಲ್ದ ದೀಡ್‌ದ್ ಊರು ಸಾಗಯೆನೆ ||

4

ಕೋಟಿ ಸಂಕ್ಯೆಡ್ ಮುರ್ಗೊ ಪಕ್ಕಿಲು
ಗೋಣ ಪಂಜಿಲು ಏಡ್ ಕುರಿಕುಲು
ವೀರ ನಕುಲನ ಸೇನೆದಾ ವಸೊ ತಿಕ್ಕೊ ಪಡ್ಲೊಯಿಡ್||
ಸೇನೆನಾಯೆನೆ ಪಿರವು ತಿರ್ಗದ್
ಊರು ಸೇರುಗೊ ಪಂಡಿಸಾತ್‌ಗ್
ಮಾತೆರಲ ಆವುಂದು ತಿರ್ಗಿರ್ ಇಂದ್ರ ಪ್ರಸ್ತೊಗುಲ||

5

ಬತ್ತನಾಯೆನೆ ಪಲಯ ಕಾರ್‌ಗ್
ಅಡ್ಲೊ ಬೂರಿಯೆ ಕನತಿ ಕಾಣಿಗೇ
ಧರ್ಮನಂದನೆ ತೂದು ಮೆಗ್ಯನ್ ದಿಂಜ ಪುಗರಿಯೆನೆ ||
ಸೈನ್ಯೊದಕ್‌ಲೆಗ್ ಕೊರೈನುಡಿಗಿರೆ
ಇಲ್ಲ ಬದ್‌ಕ್‌ನ್ ಪುಗರ್ ಪುಗರ್‌ದ್
ಸೈತ್ತನಕ್‌ಲೆಗ್ ಗೋರಿ ಕಟ್ಟೆರೆ ಪಂಡೆ ಮಂತ್ರಿಲೆಡ ||

6

ಅರಸು ಧರ್ಮಜಗಾಂಡ್ ಸಂತೊಸು
ತೆಲಿಕೆ ತೆಲಿತೆನೆ ಬೀಮೆ ಪಾರ್ತಗ್
ನಕುಲನಾ ಪಾರುಸೊನು ಪುಗರುನ ಸೌದೊ ತಿಕ್ಕಂದ್||
ತೆನ್‌ಕಯಿಡ್ ಸಹದೇವೆ ಕಾದ್‌ದ್
ಕನತ್‌ನಾತೇ ಕನತೆ ಪಂಡ್‌ದ್
ಪುಗರಿಯೆರ್ ಮಾತೆರ್ದ ನಕುಲನ ಕೀರ್ತಿ ಗೌರವೊನು||

7

ದಿಗ್ಗಿಜಯೊ ಮಲ್ತೊಂದು ನಾಲ್ವೆರ್
ಮೆಗ್ಯನಾಕ್‌ಲ್ ಕನತಿ ಸಂಪೊತು
ಒಟ್ಟು ಸೇರ್ದುಗ ದರ್ಮನಂದನನೈಸುರೊಗು ಸರಿತ||
ಮಲ್ಲತಿಗೆದಾಕ್‌ಲ್‌ಲ ಲೋಕೊಡು
ಇದ್ಯೆರೇರಲ ಪುಟ್ಟನರಸುಲು
ಪುಟ್ಟೆರೆನೆ ನನಗಿದ್ದಿ ಇಂಚಿನ ಐಸುರೊದ ಜನೊನೆ ||

ರಡ್ಡನೆದ ಸಂದಿ

|| ಯಾಗೊದಟ್ಟನೆ ||

ದ್ವಾಪರೊನೊ ಕೃತಯುಗೊನೊ ಪನ್ನುನ
ಏರೆಗಲ ತೆರಿಯಂದೆ ರಾಜ್ಯೊಡು
ನಾಲ್‌ಕಾರ್‌ಡ್ ಧರ್ಮೊದಾ ನಿಲೆ ಊರ್ಂಡ್ ಧರ್ಮಜನ||
ಆಡಳಿತಡಾಂಡ್‌ದ್ ಬಡೆಕಯಿ-
ರಾಜ್ಯೊನೇ ಕುರು ಬೂಮಿ ತೆನ್ನಯಿ
ಆ ವಿಬೀಸಣ ಲಂಕೆ ಮೂಡಯಿ ಕಡಲ್ ಪಡ್ಲೊಯಿ||

1

ನಾಲ್ ದಿಕ್ಕ್‌ಡ್ ಇತ್ತಿ ರಾಜ್ಯೊಲೆ
ರಾಜ ರಾಜೆರ್ ಮಾತೆರೊಪೈರ್
ಕಾಣಿಗೇನ್ ಧರ್ಮಜಗ್ ಕೊರ್ದೇ ಚಕ್ರವರ್ತಿಂದ್||
ಆ ಯುದ್ಧಿರನಾಚ್ಚೆ ಮೀರುನ
ಸಗ್ಗಿಯೇರೆಗ್ ಉಂಡು ಕ್ರಿಷ್ಣನ
ಪ್ರೀತಿದಾ ಬಗ್ಗೆರೆಗ್ ಇಂಚಿನ ಯೋಗೊ ಪೊಸತತ್ತ ||

2

ತಟ್ತ್ ಮಲ್ತೆರ್ ನೂದು ಯೋಜನೊ
ಉದ್ದಗೆಲೊ ಸರಿಯಾದ್ ನೆಲನ್‌ಲ
ಗಟ್ಟಿ ಮಲ್ತೆರ್ ಸುಣ್ಣೊ ಪೊಯ್ಯೆಡ್ ಅರೆದ್ ನಾಲ್ತುತ್ಲೆ||
ಅಟ್ಟಿ ಒಯ್ತೆರ್ ಬೇತೆ ಬೇತೆನೆ
ತಿಕ್ಕಿ ಕಾಣಿಗಡಾಯಿ ವಸ್ತೆಲೆ
ಮುತ್ತು ರತ್ನೊನು ಬೊಳ್ಳಿ ಬಂಗರ್ ಪಟ್ಟಿದರುವೆಲೆನ್||

3

ನೆಯಿನ್ ಎಣ್ಣೆನ್ ಸೀಯೊ ಮಾತೆನ್
ಮಯಿತ್ ದೀಡ್ಯೆರೆ ಗೂವೆಲ್‌ದಲೆಕೊ
ಮಲ್‌ಪಯೆರ್ ಸರಿ ಸುದ್ದೊ ನಿರ್ಮಲೊಡವೆನ್ ದೀಡಿಯೆರ್||
ಕಲಮೆದರಿತವೆ ಮುಡಿನ್ ಗೋದಿನ್
ಕಡಲೆ ದಿಂಜಯಿ ಗೋಣಿಲೆನ್ ಸರಿ
ಗೆಣಿಪಿಯೆರೆ ಜನೊ ಬೋಡು ಏತ್‌ಲ ಪನ್ದ ದೀಡಿಯೆರ್ ||

4

ಬೆಲ್ಲೊ ಸಕ್ಕರೆ ಮಂಡೆ ಮಂಡೆಡ್
ನಿಲ್ಕೆ ದಿಂಜದ್ ಸಾಲ್ಡ್ ದೀಡ್ಯೆರ್
ನಟ್ಟಿ ಕಾಯಿದ ರಾಸಿ ರಾಸಿನ್ ಅಟ್ಟಿ ಒಯ್ತೆರ್‌ಲ||
ಕಟ್ತ್ ಕಟ್ತ್‌ದ್ ಬಾರೆದಿರೆಕುಲೆ
ಲೆಕ್ಕೊ ಮಲ್ತೆರ್ ದೀಡ್ಯೆರಾಪೆಕ್
ಉಪ್ಪಡ್‌ಗ್ ಬೋಡುಂದು ಕುಕ್ಕುನು ರಾಸಿ ಪಾಡಿಯೆರ್ ||

5

ಪೋಲ ಅರುನ ಕ್ರಿಷ್ಣ ಸ್ವಾಮಿನ್
ಈಯೆ ಲೆತೊನುದು ಬರೊಡು ಯಾಗೊನೆ
ಆಯನಾ ದಯೊಟತ್ತೊ ನಡಪುನೆ ಪನ್ದ ಧರ್ಮಜೆನೆ||
ಪಾರ್ತಡನೆ ಪನ್ಪುನೆನ್ ಕೇಂಡ್‌ದ್
ತೇರ್‌ನೇರ್‌ದ್ ಪೋಡು ಎತ್ತಿಯೆ
ದ್ವಾರಕೆಗ್ ಸಿರಿಕ್ರಿಷ್ಣ ಮಂದಿರೊಡುಲಯಿ ಪೊಗ್ಗಿಯೆನೆ||

6

ಕ್ರಿಷ್ಣ ಸ್ವಾಮಿಗ್ ಮಲ್ತೆ ವಂದನೆ
ದಿಗ್ಗಿಜಯೊ ಮಲ್ತೊಂದು ಕನತ್‌ನ
ಕಪ್ಪೊ ಕಾಣಿಗಲೇತ್ ಪಂಡ್‌ದ್ ಇವರೊ ತೆರಿಪಾಯೆ||
ಯಜ್ಞೊ ಕಾರ್ಯೊನು ಈಯೆ ನಡಪದ್
ಕೊರೈರೆಗ್ ಬರೊಡುಂದು ಕಾರ್‌ಗ್
ಅಡ್ಲೊ ಬೂರಿಯೆ ಪಾರ್ತೆ ಹರಿನವೆ ಬಗ್ಗಿ ಬಾವನೆಡ್ ||

7

ಬರ್ದೆ ಪಂಡ್‌ದ್ ಪಿದಡ್‌ದಾಯನ
ಒಟ್ಟಿಗೇನೆ ಸಿರಿಕ್ರಿಷ್ಣ ಬತ್ತೆನ
ವರ್ಮಾನೊನು ಕೇನ್ದ್ ಧರ್ಮಜೆನೆದುರು ಬತ್ತೆನಯೆ||
ಪುಡ್ಯದಾಯಿನೆ ಹರಿನ ಕಾರ್‌ಗ್
ಸೋತ್ತೊ ಪಂಡ್‌ದ್ ಕೈನ್ ಮುಗಿನಗ
ಒಯ್ತೆದಾಯನ್ ಉಲಯಿ ಪೊಗ್ಗಿಯೆ ಬಗ್ಗಿ ಬಾಂದವೆನೆ ||

8

ಊರುದೂರುದ ರಾಜನಕ್‌ಲೆಗ್
ಓಲೆನುಡಿಗಿರೆ ಕೊರ್ಪು ಪನ್ಪಯೆ
ಆಸ್ರಮೊದ ರುಸಿಕುಲೆಗ್ ಪನಿಯೆರೆ ಮಂತ್ರಿನಾಕ್‌ಲೆನ್ ||
ಕಾಣಿಗೇನ್ ತುಂಬಾದ್ ಕಡಪುಡು-
ದಾದ್ ನಕುಲನ್ ಹಸ್ತಿನಾವತಿ
ರಾಜ್ಯೊದರಮನೆಡಿತ್ತಿ ಬಂದುಲೆಗ್ ||

9

ಅಜ್ಜ ಬೀಸ್ಮ್ ದ್ರೋಣ ಕೃಪೆರೆಗ್
ಕರ್ಲ ಸಕುನಿಗ್ ಮಾತ ಪನಿಯೆರೆ
ಧರ್ಮನಂದನೆ ತನ್ನ ಮೆಗಿಯನೆ ಆಡೆ ಕಡಪುಡಿಯೆ||
ಕ್ರಿಷ್ಣನೊಪ್ಪಿಗೆ ಪಡೆದ್ ಯಾಗೊಗು
ಒಲ್ಲ ಮಂಟಪೊ ಮಲ್ಪುನೆಂದ್‌ದ್
ಸಿಲ್ವಿ ದೋಯಿಸನಕ್‌ಲ್ ಜಾಗೆನ್ ತೂಯೆರಲ್ಲದವೆ||

10

ವಿಶ್ವ ಕರ್ಮನ ಮಯನ ಸೂತ್ತೊಡು
ಯಜ್ಞೊ ಸಾಲೆನ್ ಸಾಸ್ತ್ರೊ ರೀತಿಡ್
ಸರ್ದೊ ಲಚ್ಚಣೊಡಲ್ಪ ಕಟ್ಟಿಯೆ ಧರ್ಮನಂದನೆ||
ಪೋಣ್ಣಲೆಗ್ ಆಣುಲೆಗ್ ಎದುರುಡು
ಕುಲ್ಲಿಯೆರೆ ಸರಿ ಬೇತೆ ಬೇತೆನೆ
ರತ್ನೊ ಕಂಬೊಳಿ ಬುಡ್ಡದಿತ್ತೆನ ಜಾಗೆ ಮಲ್ಪಾದೆ||

11

ರತ್ನೊ ಮಾಲೆದ ಜಾಲಿ ನೇಲುನ
ಪೊರ್ಪುದಾ ಮುಕೊ ಮಂಟಮೆದ ಮೇ-
ಲ್ಡಿತ್ತಿ ಮಾಳಿಯೊ ನೀಲೊ ಕಲ್ಡ್ ಮುಚ್ಚಿದಿತ್ತೆನವೆ||
ಪಟ್ಟಣೊದ ಪಿದಯಿತ್ತಿ ಯಮುನೆದ
ಕಟ್ಟಪುಣಿತವೆ ಬರಿಟ್ ಬೆರಣೆರೆ-
ಗುಪ್ಪಿಯೆರೆ ಕಟ್ಟಿಯೆನೆ ಪೊರ್ಪುಡು ರತ್ನೊ ಮುಚ್ಚಿಗ್ಡೆ ||

12

ಸುರೆರೆ ಲೋಕೊದ ಸುಕೊತ ರಂಗ-
ಸ್ತಲನೊ ಬೋಗಾವತಿಯೊ ಪನ್ನುನ
ನಮುನೆಡಾಂಡ್ಲ ಯಾಗೊ ಸಾಲೆನೆ ಹರಿನ ದಯೊಟಿಂಚೆ||
ರುತೊನು ಪತ್ತನ ಧರ್ಮಂದನೆ
ತನನ್ ತಾನೇ ಮರತ್‌ದಿತ್ತನೆ
ಅಪಗಪಗ ಪಂಡೊನುವೆ ಕ್ರಿಷ್ಟನ ಮಯಿಮೆಡಾಂಡ್‌ಂದ್ ||

|| ಯಾಗೊದ ಸಂಬುರ್ಮ ||

ಓಲೆದೊಕ್ಕಣೆ ತೂದು ರುಸಿಕುಲು
ರಾಜನಾಕ್‌ಲ್ ಬೆರಣ ಸೂದ್ರೆ
ಮಾತೆರೆತ್ತೆರ್ ಇಂದ್ರಪ್ರಸ್ತೊದ ಯಾಗೊ ಮಂಟಮೊಗು ||
ತೇರ್‌ಡಾನೆಲೆ ಕುದುರೆ ಸವರಿಡ್
ಆಣ್ ಪೋಣ್ಣಲು ಬತ್ತನಕ್‌ಲೆನ್
ಯಾಗೊ ಮಂಟಮೆದುಲಯಿ ಕುಲ್ಲದ್ ಕೊರೈರಂಗದ್‌ನೆ ||

1

ಚೋಳೆ ಸಿಂಹಳೆ ಪಾಂಡ್ಯೆ ಕೇರಳೆ
ಮಾಳವಾಂದ್ರೆ ಕರೂಸೆ ಬರ್ಬರೆ
ಗೌಳೆ ಕೋಸಲೆ ಮಗದೆ ಕೇಕಯೆ ಹೂಣೆ ಸೌವೀರೆ||
ವೀರೆ ಚೋನಗೆ ಚೀನೆ ಕುರು ನೇ-
ಪಾಳೆ ಸಿಕಿ ಕಾಸ್ತೀರೆ ಬೋಟಕೆ-
ರಾದಿ ರಾಜೆರ್ ಬತ್ತೆರೊಟ್ಟುಗು ಅರಸು ಬಿರ್ಬಲೆಡ್ ||

2

ವೀರ ಬೂರಿಸ್ತವನೆ ಬಾಹ್ಲಿಕೆ
ಸೂರಸೇನೆ ಕಳಿಂಗನಾ ಗಾಂ-
ದಾರೆ ಸೌಬಲೆ ಸೋಮದತ್ತೆ ಸುಸೇನೆ ಬಗದತ್ತೆ||
ದೀರೆ ಪಾಂಡ್ರಕೆ ಏಕಲವ್ಯೆನೆ
ದಾನವೆರೆ ಗುಣೊತಾಯೆನೇ ಸಿಸು-
ಪಾಲೆ ಪೌರವೆ ದಂತವಕ್ತನೆ ಬತ್ತೆರೊಟ್ಟೊಟ್ಟು ||

3

ಬತ್ತೆನಾ ಬೀಸ್ಮಕೆನೆ ರುಗೈನೆ
ಚಿತ್ರತೆನೇ ಸಾಲ್ವೆ ರೋಹಿತಿ
ಎತ್ತಿಯೆನೆಲಾ ರೋಚಮಾನೆ ಸಮುದ್ರ ಸೇನೆನೆಲ||
ಮಿತ್ತ್ ಬಡೆಕಯಿ ಕುರುನ ದೇಸೊಗು

ಮುಟ್ಟ ಇತ್ತನ ಮಾತ ರಾಜೆರ್
ಒಟ್ಟು ಸೇರೈರ್ ಇಂದ್ರಪ್ರಸ್ತೊದ ಯಾಗೊ ಮಂದಿರೊಡು||

4

ದುಪದೆ ದ್ರುಪದ್ಯುಮ್ನರೆತ್ತೆರ್
ಸಿರಿಯುದಾಮನ್ಯುತ್ತಮೌಂಜಸೆ
ಹಿರಿಯೆರೆತ್ತೆರ್ ಪೊದ್ದೆರಿಷ್ಟೆರ್ ಬಂದು ಬಾಂದವೆರ್||
ಕೃಪೆ ಜಯದ್ರತೆ ಬೀಸ್ಮೆ ಮಾದ್ರಾ-
ದಿಪತಿ ಕರ್ಣೆನೆ ದ್ರೋಣೆರೊಟ್ಟುಗು
ಪಿಡಡಿಂಯೆನೆ ಕುರುರಾಯೆ ಕೌರವೆ ಬಲೊನು ಕೂಡೊಂದು

5

ಗುರುಮಗೆನೆ ಬುಕ್ಕಾ ಸುಸರ್ಮನೆ
ಅರಸು ಬ್ರಾಹ್ಮತೆ ಬೀಮರತೆನೇ
ಸಿರಿವಿಕರ್ಣೆನೆ ವೀರ ದುಸ್ಸಯೆ ಬಾನುದತ್ತೆನೆಲ||
ದೀರ್ಗಬುಜೆ ದುರ್ದರಸೆ ದುರ್ಜಯ-
ನೊಟ್ಟು ದುಸ್ಸಾಸನೆನೆ ಪಿದಡ್‌ದ್
ಎತ್ತೈನೇ ಚದುರಂಗೊ ಸೇನೆದ ಕೂಟೊದಬ್ಬರೊಡು||

6

ಅರಸು ಬಲೊ ಚದುರಂಗೊ ಬತ್ತನ
ತೆರಿದ್ ಧರ್ಮಜೆನೆದುರು ಬತ್ತದ್
ಉಲಯಿ ಕುಲ್ಲಯೆ ರಾಜ ಮರ್ಯದಿಡಕ್‌ಲೆನೊಟ್ಟಿಗೆನೆ||
ಹಿರಿಯ ಬೀಸ್ಮನ ಕಾರ್ ಪತ್ತದ್
ಕೃಪೆರೆಗೇ ಪುಡ್ಯಾಡ್ ದ್ರೋಣೆರೆ
ಪರಮ ಪಾದೊಗು ಅಡ್ಲೊ ಬೂರಿಯೆ ಉಲಯಿ ಕುಲ್ಲದ್ ||

7

ಕಣ್ಣೆ ಚೈಮುನಿ ಗಾರ್ಗ್ಯೆ ಸೌನಕೆ-
ರೆತ್ತಿಯೆರ್ ಬ್ರಗುಮುನಿ ವಸಿಷ್ಟೆರ್
ಬುಕ್ಕೊ ಬ್ರಾಹ್ಮಣೆರ್ ತಪಸ್‌ದ ಮುನಿ ಸುಮಂತಕೆರ್ ||
ಸನಕೆ ಸುಕೆ ಜಾಬಾಲಿ ತಿತ್ತಿರಿ
ರುಸಿಯೆ ಮಾರ್ಕಾಂಡೇಯೆ ಮುದ್ದಲ
ಮಗೆನೆ ರೋಮಸೆ ಪನ್ನಿ ತಪಸಿಲು ಸೈಬೈ ನಾರದೆರ್ ||

8

ಚವನೆ ಗೌತಮೆ ವೇಣು ಜಂಗನೆ
ಪರಸು ರಾಮೆನೆ ಆ ಸುಮಾಲಿಯೆ
ಪನುಪುನಾಕ್‌ಲ್ ರುಸಿಯೆ ಕೌಸಿಕಿ ಯಾಜ್ಞವಲ್ಕೈರ್‌ಲ||

ಗಾಳಿನಿಂಗುನ ಗಾಲವೆನೆ ಸಿತ
ಸೌಬಲೆರ್ ಮಾಂಡವೈರೆಂದ್
ಬಾರಿ ಪುದರ್‌ದ ಮುನಿಕುಲೆತ್ತೈರ್ ಆಂಗಿರಸೆರೊಟ್ಟು||

9

ದೇಸೊ ದೇಸೊಡು ಇತ್ತಿ ಜ್ಞಾನಿಲು
ಯೋಗಿನಾಕ್‌ಲ್ ಮಂತ್ರವಾದಿಲು
ದೋಯಿಸೆರ್ ಮಹ ತಂತ್ರಿನಾಕ್‌ಲ್ ಎತ್ತೈರಾಡೆಗೆನೆ||
ಪೇರ್‌ನೆಯಿ ಪಲೊವಸ್ತು ತುಂಬುದು
ಆಣ್ ಪೋಣ್ಣಲು ಸೇರ್‌ದೆತ್ತೈರ್
ಮಾತೆರೆನ್ ಎದೊಂದು ಕುಲ್ಲಯೆ ಧರ್ಮನಂದನೆನೆ ||

10

ಕುರುಡ ಕುಂಟೆರ್ ಚೊಟ್ಟಿ ಪೊಟ್ಟೆರ್
ಮರಿನ್ ನಲಿಪವಿ ಆಟಗಾರೆರ್
ಕೊರಜಿ ಕೊರಮೆರ್ ಮೈಂದ್ರ ಜಾಲೊದ ಗೊಬ್ಬದಾಕ್‌ಲೆಲ ||
ಕವಿ ಜನೊಲ ಪಂಡಿತೆರ್ ಸಾಸ್ತಿಲು
ಗವಯಿಗುಳು ಹರಿದಾಸನಾಕ್‌ಲ್
ನಲಿಕೆ ನಟನೆದ ನಾಟಕೊದ ನರಮನಿಯೆರೆತ್ತಿಯೆರ್ ||

11

ಯಾಗೊ ಸಾಲೆಡ್ ಬತ್ತನಾಕ್‌ಲೆ
ಏಗಿತೊಗು ತಕ್ಕಂದಿ ಪೀಟೊಲೆ
ದೀಡ್ಡ್ ಇತ್ತೆರ್ ಅಯಿಟ್ ಕುಲೈರ್ ಮಾತ ಸೇರ್‌ನಾಕ್‌ಲ್||
ಬಾಜೆಲ್‌ಗ್ ಪರೈರೆಗ್ ಬೊಂಡೊದ
ನೀರ್ ಕೊರೈರ್ ಜವನೆರಲ್ಲನೆ
ಸೇರ್‌ದಿತ್ತನ ಕೆಲಸೊದಾಕ್‌ಲ್ ಪ್ರೀತಿ ಗೌರವೊಡು||

|| ಬೀಸ್ಮನವೆ ಸುದರಿಕೆ ||

ಬೀಸ್ಮನಾಡೆಗ್ ಧರ್ಮನಂದನೆ
ಕಾರ್ ಪತ್ತೈರೆ ಬತ್ತನಾಯೆನೆ
ಆಯ ಜಕ್ಕಲೆಡಲ್ಪ ತನ್ನವೆ ತರೆನ್ ದೀಡೊಂದು||
ಬಾರಿ ಬುಲ್ಲುದು ಪಂಡೆ ಯಾಗೊನು
ಯಾನ್ ಸುದರಿಪುನೆಂಚ ಅಜ್ಜೆರೆ
ಈರ್ ತೆರಿನರ್ ದಾನೆ ಮಲ್ಲೊಡು ಎಂಕ್ ತೆರಿಯಂದ್ ||

1

ಪೋಡಿವನ ಮಗ ನಿನ್ನ ಸಾಯೊಗು
ದೇವಕೀ ಮಗೆ ಪೂತನಿನ ಯಮೆ
ವಾಸುದೇವನೆ ನಿನ್ನ ಒಟ್ಟಿಗೆ ದಿನೊಲ ಉಲ್ಲೆತ್ತೊ ||
ಈ ಚರಾಚರೊದಾತ್ಮೊಡಾಯೆನೆ
ತಾನ್ ನಿಲೆ ಊರೊಂದು ಉಪ್ಪುನ
ದೇವ ದೇವೆರೆ ದೈವೊ ಪಂಡ್‌ದ್ ನಿಕ್ಕೈ ತೆರಿಯಂದೊ||

2

ದೊಮ್ಮೆರೆನ್ ಲೆಪುಡಾಲ ಆರೆನ್
ಮೂಲು ಕುಲ್ಲಲ ಪನ್ನೆ ಬೀಸ್ಮನೆ
ದ್ರೋಣೆರೆಡ ಕೇನೊಂದು ಮಾತೆರೆ ಏಗಿತೊನು ತೂದು||
ರಾಜೆನಾ ದ್ರತರಾಸ್ತೈ ಬ್ರಾದ್ರತೆ
ಬಾಹ್ಲಿಕಾದಿಲು ಸೋಮದತ್ತೆಲ
ಯಾಗೊ ಮಂಟಪೊದಲಯಿ ಉಂತೊಡು ಮಲ್ಲ ಏಗಿತೆರ್||

3

ಸರವೊ ಸಾದನೊ ಕೊರೊಡು ದೊಮ್ಮೆರ್
ಅರಸುನಾಕ್‌ಲೆಗಾಪಿ ಸುದರಿಕೆ
ಪೆರದನಿಯೆ ಆದಿತ್ತಿ ಸಂಜಯೆ ಮಲ್ಪಿಯೆರೆಗಾವು||
ರುಸಿಕುಲೆನ ಸರಿ ಯೋಗೊ ಕ್ಷೇಮೊನು
ತೆರಿಯೊಡಾ ಸಹದೇವೆ ವಣಸ್‌ನ್
ಮಲ್‌ಪವುನ ಜವಬ್ಬಾರಿ ನಮ್ಮ ಯುಯುತ್ತು ವೊಯ್ಸೊನೊಡು||

4

ಬೆರಣೆರೆನ್ ಕುಲ್ಲಯೆರೆ ಸಾತ್ಯಕಿ
ಒಣಸ್ ಮಲ್ತನ ಮಡೆತ ಸುದೊನು
ಮಲ್‌ಪವುನ ಮಾಕೆಲಸೊ ನಮ್ಮ ವಿಕರ್ಣೆಗೆಡ್ಡೆಂದ್||
ಉಂಡ್‌ದಾಯಿನ ಬೆರಿಕ್ ಬಚ್ಚೆರೆ
ಗಂದೊ ಮಾಲ್ಯಾದಿಲೆನ್ ಕೊರ್ದುನ
ದಿಂಜದಮಸರೊದವ್ವೆ ಕಾರ್ಯೊನು ಮಲ್ಪೆ ದುಸ್ಸಾಸೆ ||

5

ಬೆರಣೆರೆಗ್ ದಕ್ಷಿಣೆನ್ ಕೊರೈರೆ
ಗುರುಮಗೆನೆ ಬೋಡಾಯಿ ರತ್ನೊನು
ಅಜತ್ ಕೊರೈರೆ ಕೃಪೆರ್ ಕುಲ್ಲೊಡು ಯಾಗೊ ಮಂಟಪೊಡು||
ನೆಯಿನ್ ಸೀಯೊನು ಎಣ್ಣೆ ಪೇರ್‌ನ್
ಪುನುಗು ಕಸ್ತುರಿ ಮಾತ ದ್ರವ್ಯೊನು
ಕೊರಿಯೆರೆಗ್ ಉಂತೊಡುಲ ವಿದುರೆನೆ ಪಂಡೆನಾ ಬೀಸ್ಮೆ||

6

ಉಣಿಯೆರೆಗ್ ಸೂದ್ರಾದಿ ಪ್ರಜೆಕುಲು
ಅರಮನೆಗ್ ಬತ್ತೆರ್ಡ ಅಕಲೆಗ್
ಪೊರುಲುಡುನ್ವದ್ ಪೂಲು ಬಚ್ಚೆರೆ ಪೊಸತ್ ಕುಂಟುಲೆನ್ ||
ಕೊರುದು ಸಮ್ಮನಿಪೆರೆಗ್ ಐವೆರ್
ಜನೊಕುಲೆಡ್‌ಲಾ ಇಂದ್ರ ಸೇನನ
ಕಡೆತ ರುಗ್ಗೆ ವಿಸೋಕೆ ಬುಕ್ಕೊ ಸಮೀರೆ ಪ್ರತಿಸೇನೆ ||

7

ಅರಸುನಕಲೆಗ್ ಅಲ್ಲ ಬೋಡುಡ
ರತೊನು ಕುದುರೆನ್ ಬಿಲ್ಲ ಬಾಣೊನು
ಕೊರುಪುನವೆ ಸರಿ ಮೇಂಟ್‌ಗಾರಿಕೆ ಕರ್ಣಗಾಂಡ್‌ಂದ್ ||
ಕೂಡ್‌ನಕಲೆನ ಯೇಗಿತೊಗು ಸರಿ-
ಯಾದ್ ವಸ್ತನ್ ಕೊರ್ಪಯೆರೆನೇ
ಮಾದ್ರ ಬೂಪತಿ ಉಂತೊಡುಂದುದು ತೀರ್ಪು ಬೀಸ್ಮನವೆ ||

8

ರತ್ನೊ ಬಂಗರ್ ಪಟ್ಟೆ ಕುಂಟುಲು
ಉಪ್ಪೊಡಾ ಕೌರವಡ ನಕುಲೆನೆ
ಬತ್ತಾನಕಲೆಡ ಪ್ರೀತಿ ಬಾವೊಡು ಪಾತೆರುನವೆಡ್ ||
ಕೂಡಿ ರಾಜೆರೆನೊಟ್ಟು ಬತ್ತಾನ
ಸೇನೆದಾರೈಕೆನ್‌ಲ ದ್ರುಪದನೆ
ಬಾರಿ ಪ್ರೀತಿಡ್ ಮಲ್ಪೊಡುಂದುದು ಪಂಡೆನಾಯಡನೆ ||

9

ಅಡಿಗಿ ಮಲ್ಪುನ ಪಾಕೊ ಸಾಲೆಗ್
ಅರಿನ್ ಸಂಬರೊ ಸಾರೊ ಗೋಣಿಡ್
ನಿಲಿಕೆ ದಿಂಜಯಿನೇನ್ ಆನೆಲು ಕನತೊ ಒಯ್ತೊಂದು ||
ಕಟರೊ ದಿಂಜದ್ ಬೊಳ್ಳಿದೋಡೊಗು
ನೆಯಿನ್ ಪೇರ್‌ನ್ ದಾರೆ ಪತ್ತಾದ್
ಮಯಿಪುನಗ ಅಬ್ಬಿದವೆ ನಮನೆಡ್ ತೋಜಿದಾಂಡವುಲು

10

ಯಚ್ಚೊ ಕುಂಡೊನೆ ಆಂಡ್ ಉಲಯಿದ
ಸುತ್ತುಡಲ್ವನೆ ದರ್ಬೆ ಕಟ್ಟೊನ್
ಅಟ್ಟಿ ಒಯ್ತಾದ್ ದೀಡ್ ಪುದೆಕುಲೆಡಜತ್‌ದಿತ್ತನವೆ ||
ಎಡ್ಲೆ ವಸ್ತುಲೆ ಯಾಗೊಗಾಪುನ
ಪೆಜ್ಜಿ ಪೆಜ್ಜಿದ್ ಕೆಲಸೊದಾಕ್‌ಲ್
ಅಲ್ಪನೇ ದೀಡಿಯೆರ್ ಬೋಡನಗವೆನ್ ದೆತೊನಿಯೆರೆ ||

11

ವೇದ ವ್ಯಾಸೆರ್ ಲೆಪುಡಯೆರ್ ಮುನಿ
ಯೋಗಿನಕಲೆನ್ ಮಾತ ಯಾಗೊದ
ಕಾರ್ಯೋಗುಂತಯೆರಾರ್ ಪಂಡ್‌ದ್ ಯಾಜ್ಞವಲ್ಕ್ಯೆರೆನ್ ||
ಆ ಸುಮಿತ್ರಾಂಗೀರಸೆರ್ ಸರಿ
ಟಾರೆನೊತ್ತುಗು ಮಂತ್ರೊ ಪನಿಯೆರೆ
ಸೇರ್‌ದುಂತೈರ್ ಗಾಗ್ಯೆ ಸೌನಕೇರ್ಗಿಂಡೈ ಪತ್ತಿಯೆರ್ ||

12

ವೇದ ವ್ಯಾಸೆರ್ ಯಾಗೊ ಮಲ್ಪುನ
ಯೋಗಿ ರುತ್ವಿಜೆರೊಟ್ಟುಗುಂತೈರ್
ನಾರದೆರ್ ಸೌಂಡಿಲೈರುಂತೈರ್ ಮುನಿಕುಲೊಟ್ಟಿಗೆನೆ ||
ಬ್ರಾಣೆರೊಟ್ಟುಗುಲಾ ಯುದಿಸ್ಪಿರೆ
ಯಾಗೊ ಸುರು ಮಲ್ಪಯೆರೆ ಬಗ್ಗಿಡ್
ವಾಸುದೇವಡ ಪನಿಯೆರೆಗ್ ಕೈ ಮುಗಿದ್ ಉಂತೊಂಡೆ ||

|| ಧರ್ಮಜೆ ಯಾಗೊ ದೀಕ್ಷಿತನಾಯೆ ||

ಹರಿಯೆ ನಿನ್ನವೆ ಕರುಣೆಡೆಂಕುಲು
ಅರಸುಲೆನವೇ ಕಪ್ಪೊ ಕಾಣಿಗಿ
ಪಡೆಯೊ ಸನ್ನಯೊ ಮಾತ ಯಾಗೊಗು ಬೋಡು ಬೋಡಯಿನ ||
ನಿನ್ನ ದಯೊಟೇ ಈತ್‌ಲಾಯಿನೆ
ಯಚ್ಚೊ ಕಾರ್ಯೋಗು ಈಯೆ ದೀಕ್ಷಿತೆ
ಮುಲ್ಪ ಆದೆಂಕಲೆನ ಕಸ್ತೊನು ಪೂರ ಪರಿಯರಿಪು ||

1

ಕಾರ್ಗ್ ಬೂರುದು ಪನ್‌ಪಿ ಧರ್ಮಜೆ-
ನಾಯೆ ದೆರ್ತದ್ ಲಕ್ಕದುಂತಯೆ
ಪ್ರೀತಿ ಬಾವೊಡು ಬೆರಿನ್ ಪೂಜಿದ್ ಪಂಡೆ ಸಿರಿಕ್ರಿಷ್ಟೆ ||
ಇಂದ್ರಪ್ರಸ್ತೊಡು ನಡಪಿಯಾಗೊಗು
ಚಂದ್ರಕುಲೊ ಬೆಳಗವುನ ಸೂರ್ಯ್
ಕುಂದೆಲುಂಡೊಯೆ ನಿನ್ನ ಕೀರ್ತಿಗ್ ದೀಕ್ಷಿಗೀ ಉಂತು ||

2

ವಾಸುದೇವನ ಪಾತೆರೊನು ಸರಿ
ಕೇಂಡ್‌ದಾ ದರ್ಮಜೆನೆ ಬೇಸೈದ
ಪೂವೆದುತ್ತರೊ ದಾರಗೆಡ್ ಸರಿಟೆಡ್ಡೆ ಯೋಗೊಡುಲ||
ಯಾಗೊ ದೀಕ್ಷೆಗ್ ಪುನೊ ಸೀತೊಡು
ಮೀದ್ ಸುದೊಡು ಪುಲ್ಯ ಕಾಂಡೆನೆ
ಬಾರಿ ಬಗ್ಗಿಡ್ ಅಪ್ಪೆನಜ್ಜನ ಕಾರ್ ಪತ್ತಿಯೆನೆ ||

3

ಬೊಲ್ನೆಯಿನ್ ಮೇಲ್ಗೊರ್ಮ ಪೂಜೆದ್
ಕ್ರಿಷ್ಣಮುಗೊದ ಚರ್ಮೊ ತುತ್ತುದು
ಧರ್ಮರಾಜೆನೆ ಉರೆತ ಕೊಂಬುನು ಕೈಟ್ ಊರೊಂದು ||
ಸಾಗರೊದ ಸಿರೆತಂಚಿ ಗೌಜಿಡ್
ವೇದೊ ಮಂತ್ರೊದ ಸೊರೊನೆ ಲಕ್ಯನ
ಜಾಗೆ ಯಜ್ಞೊದ ಕುಂಡೊದಾಡೆಗ್ ಬತ್ತ ದೀಕ್ಷಿತೆನೆ ||

4

ಪಿದಯಿ ಸುತ್ತುಡು ರಾಜ ರಾಜೆರ್
ಅಕಲೆ ಏಗಿತೊಗಿತ್ತಿ ಪೀಟೊಡು
ಯಜನೊ ಮಂಟಮೆದುಲಯಿ ಕುಲ್ಯೆರ್ ಗತ್ತಾಗರಿಕೆಡ್ ||
ಪರಮ ರುಸಿಕುಲೆ ವೇದೊ ಗೋಸೊಲ
ಅರಸುನಕಲೆನ ರಾಜಸೂಯೊದ
ವಿಸಯೊ ಚರ್ಚೆಲ ಕೂಡ್ಡು ಬೊಬ್ಬೆನೆ ಬಾನೊಗೇಂಡ್‌ವುಲು||

5

ಯಜ್ಞೊ ಕುಂಡೊದ ಸುತ್ತ ಮಂಡಲೊ
ಬುಡ್ಡದವುಲೇ ಮುಗೊ ಚರ್ಮೊನು
ತುತ್ತಿರುಸಿಕುಲು ಕುಲ್ದು ಓಂ ತತ್ಸತ್ ಪಂಡೊಂದು||
ಯಜ್ಞೊ ಕಣಕ್‌ನ್ ಅಟ್ಟಿ ಒಯ್ತದ್
ಮೈತ್ತೆರ್‌ಲ ನೆಯಿ ವೇದೊ ಮಂತ್ರೊಡು
ಅಗ್ನಿ ನಾರಾಯಣನ ಒಸಯೊಗು ಕೈನ್ ಮುಗಿಯೊಂದು||

6

ದ್ರವ್ಯೊನಾವುತಿ ಮಲ್ತೆರಾಕ್‌ಲ್
ದಿವ್ಯೊ ಮಂತ್ರೊನು ಪಂಡೊನುಂದೇ
ಅರ್ಪಣೆನ್ ಅರ್ಪಿತೆರ್ ದೇವತೆನಕಲೆ ಇಸ್ಪೊದೆನ್||
ಅಗ್ನಿ ಕುಂಡೊಡು ಅರ್ಲ್‌ದರ್ಲ್‌ದ್
ಪೊತ್ತುದೇಲ್ಯಾಲಗೆಲು ದೆಂಗ್‌ದ್
ಸುತ್ತ ಸಾವಿರೊ ಆಂಡ್ ಧಗ ಧಗ ದ್ರವ್ಯೊ ನಿಂಗ್‌ನೆಟ್||

7

ಹವಿಸ್‌ಗರ್ಪಣೆ ಮಲ್ತಿ ಕಮ್ಮೆನೊ
ಪುಗೆನೆ ಎತ್ತದ್‌ಲಾಂಡ್ ಸೊರೊದ
ಸುರೆರೆ ಲೋಕೊಗು ಸತ್ಯೊ ಲೋಕೊಗು ಅಲಸ್‌ದಲಸೊಂದು||
ಸುರೆರ್ ಬತ್ತನ ಹವಿಸ್ ನಿಂಗ್‌ದ್
ಬುಡಿಯೆರಾರಿಗೆ ಬಂಜಿದಿಂಜಿದ್
ಅಕಲೆ ಸಂತೊಸು ತೆಲಿಕೆನಲಿಕೆನ್ ಎಂಚ ಪನ್ನುನೆನೊ ||

8

ಬೆರಣೆರೆನ್ ಸರಿ ಪಂತ್ಯೆ ಪಾಡ್‌ದ್
ಉಣುಪಯೆರ್ ಉಂಡ್‌ನವೆ ಜನೊಕುಲೆ
ಇವರೊ ಲೆಕ್ಕೊಗು ತಿಕ್ಕಿಜಲ್ಪನೆ ಬಲಸ್‌ನಾಕ್‌ಲೆಗ್ ||
ಅರಸುಲೆಗ್ ಸಾಮಂತನಕಲೆಗ್
ಪ್ರಜೆಕುಲೆಗ್ ಮಾತೆರೆಗ್ ಬಲ್ಮಣೊ-
ದೊಣಸ್ ಮಲ್ಪದ್ ಪೂಲು ಬಚ್ಚಿರೆ ಕೊರೈರಾಕ್‌ಲೆಗ್ ||

9

ಏಳ್ ದಿನೊ ಸರಿಯಾದ್ ನಡತ್‌ನ
ಯಾಗೊ ಯಜ್ಞೊದ ತೇಜಿಡೇ ಪದ್-
ನಾಲ್ ಲೋಕೊದ ಜೀವೊ ಚೇತನೊಗಾಂಡ್ ಮಾ ಬೊಲ್ಪು||
ದೇವಲೋಕೊಡು ಪಾಂಡು ಕುಲ್ಲ್‌ನ
ಪೀಟೊದಾಡೆಗ್ ಬರೈರೆಗ್ ಸತ
ದೇವತೇಲೆಗ್ ಇದ್ದಿ ಪುರ್ಸೊತು ಹವಿಸ್ ನಿಂಗುನೆಟ್ ||

10

ಹವಿಸ್ ಬನ್ನಗ ಎಂಕ್ ಎಂಕ್-
ದಕ್‌ಲ್ ನುಕ್ಯೆರೆ ಬಲ್ಲಿ ಪಂಡ್‌ದ್
ಸುರಪೆ ರಂಬೆನ್ ಉರ್ವಸಿನ್ ಸರಿ ಪಟ್ಟಿರುಂತಾದೆ ||
ಅಕ್‌ಲ್ ತೆಲಿತ್‌ದ್ ಕೊರ್ಪಿ ಪಾಲ್‌ಗ್
ಲಡಯಿ ಮಲ್ತೆರ್ ನೂಕು ನುಕ್ಯೆರ್
ಸಬೆಟ್ ಮಾತೆರ್ ಆ ಸುರೇಸನ ಕಡೆತ ಸುಮನಸೆರ್ ||

11

ದೇವ ಲೋಕೊಡು ನವುಸೆ ನಳ ನೃಗೆ
ವೀರ ದಸರತೆ ಮಾತ ಸೇರೈರ್
ಬೂಮಿ ಲೋಕೊಡು ಇಂಚಿ ಯಾಗೊನು ಮಲ್ಪುನಯೆ ಏರ್||
ಓಹೊ ಪಾಂಡುನ ಮಗೆನೊ ಸೈ ಸೈ
ಆಯೆನೇ ಯಮ ಧರ್ಮರಾಯನ
ಮಾತ ಗುಣೊ ಪಡೆವೊಂದು ಪುಟ್ಟೆನ ಚಂದ್ರ ವಂಸೊದಯೆ ||

12

ದಾನೆ ಪನ್ನುನೆ ಯಾಗೊ ಪೂರ್ತಿ
ಆರೊಟದ ಅಬಿಸೇಕೊಲಾನಗ
ದೋಲು ಬೊಟ್ಟೆರ್ ಮಿತ್ತ ಲೋಕೊಡು ದೇವ ದೇವತೆಲು||
ಬಾನೊಡೊರೆಲ ಸುರೆರೆ ಪುಂಡು ಎ-
ಮಾನೊನೇರ್‌ದ್ ಬರತ ಬೂಮಿಡ್
ಆಪಿ ಯಾಗೊದ ಪೊರ್ಡು ತೂವೊಂದಿತ್ತೆರಕ್‌ಲೊಟ್ಟು ||

13

ಮುತ್ತು ರತ್ನೊನು ಬೊಳ್ಳಿ ಬಂಗರ್
ಪೆತ್ತ ಕಂಜಿನ್ ಪಟ್ಟಿ ಸೀರೆನ್
ಕೊರ್ಪಿ ಕೈಕೇ ಕೊರೈ ಧರ್ಮಜಿನಲ್ಪ ಕೈಯೇರ್‌ದ್ ||
ತರೆ ಪುದೆಟ್ ತುಂಬೈರ್‌ಲ ಪುಗಲ್‌ಡ್
ನಿಲಿಕೆ ಮಾರಪು ದೀಡ್ಡ್ ಸಿಸೈರೆ
ತರೆಟ್ ತುಂಬಯೆರೇತೊ ಬ್ರಾಣೆರ್ ದಾನೊ ತಿಕ್ಕನೆನ್||

14

ಏತೊ ಕಲ್ಪೊಗು ದುಂಬುಡಿತ್ತನ
ರೋಮಸೆರ್ ಮಾರ್ಕಾಂಡ ರುಸಿಕುಲು
ರಾಜ ಸೂಯೊದ ಯಾಗೊ ನಡಪಯಿ ಅರಸುಲೇರ್‌ಂದ್||
ರಾಜ ರಾಜೆರ್ ಇತ್ತೆರ್‌ಡ ಪನೊ-
ಡಾಕ್‌ಲ್‌ಂದ್‌ದ್ ನಾರದಾ ಮುನಿ
ತಾನ್ ಮಲ್ತನ ಯೋಜನೆನೆ ಸರಿ ತೆರಿಪಯಿರ್ ಸಬೆಕ್||

|| ಅಗ್ರ ಪೂಜೆ ||

ಆ ಸಬೆಟ್ ಸೇರ್‌ದಿತ್ತಿ ರಾಜೆರೆ
ಯೋಗಿ ರುಸಿಕುಲೆ ನಡುಟು ಉಂತುದು||
ರಾಜೆ ಧರ್ಮಜಿ ಅಜ್ಜ ಬೀಸ್ಮನ ಮೋನೆ ತೂವೊಂದು ||
ಮೂಲು ಸೇರ್‌ನ ಮಾತ ಅರಸುಲು
ಏಗಿತೊಡು ಸಿವಲೆಕೊನೆ ಉಲ್ಲೆರ್
ಏರೆನೇನಿ ಅಗ್ರಪೂಜೆಗ್ ಕುಲ್ಲವೊಡು ಪನ್‌ಲೆ ||

1

ದಾರೆಗೆಲೆ ನಡುಟೇರ್ ಮಲ್ಲಯೆ
ದೇವತೆಲೆ ಸೇವೆನ್‌ಲ ಕೈಕೊನು-
ನಾಯೆ ಸಿವೆನೇ ಅತ್ತೊ ಸೊರ್ಗೊಡು ಮಲ್ಲ ಸ್ತಾನೊದಯೆ ||
ದೇವರಾಜೆನೆ ಅತ್ತೊ ಬಗ್ಗೆರೆ

ದಾಸೆ ಆಯಿನ ವಾಸುದೇವೆನೆ
ಲೋಕೊ ಲೋಕೊಡು ಪರಮ ಪೂಜ್ಯೆನೆ ನಿಕ್ಕ ತೆರಿಯಂದೊ ||

2

ಗಿರಿಕುಲೆಡ್ ಹೇಮಾದ್ರಿ ಪೇರ್‌ದ
ಕಡಲ್ ಸಾಗರೋಲೇಡ್ ಮಲ್ಲೆನೆ
ಸುರನರೋರಗ ಜಾತಿಲೆಡ್ ನಾರಾಯಣೆನೆ ಮೇಲ್||
ರಾಜಸೂಯೊದ ಅಗ್ರ ಪೂಜೆಗ್
ವಾಸುದೇವನ ಕಾರ್ ದೆಕ್ಕದ್
ಸೀರ್ತೊ ಪಟ್ಟಾಲ ಸಬೆಕ್ ಪಂಡೆನೆ ಬೀಸ್ಮೆ ಧರ್ಮಜಡ ||

3

ರುಸಿಕುಲೆಗ್ ಬ್ರಾಣೆರೆಗ್ ಬೀಸ್ಮೆನೆ
ತೆರಿಪಯಿನವೀ ತತ್ತೊ ಸಾಸ್ತ್ರೊಲ
ಕೊಸಿಯೆ ಆಯ್ಕೆಟ್ ತಾತಿ ಬೊಟ್ಟೆರ್ ಸಬೆಟ್ ಮಾರ್ತೆಲ್||
ತರ್‌ಪಯೆನೆ ನವ ರತ್ನೊ ಪೀಟೊನು
ಅಯಿನ ಮೇಲ್‌ಡ್ ಒಳೆವುನಾಸಿಗೆ
ಬುಡುಪದಲ್ಪನೆ ಸಬೆತ ನಡುಟುಲ ಪೂರ್ಣುಡಂತಯೆನೆ ||

4

ಬಗ್ಗಿಡೇ ಸಹದೇವಡಪಗನೆ
ಧರ್ಮನಂದನೆ ಪಂಡೆ ಕ್ರಿಷ್ಣನ್
ಎಲ್ಯ ಮೆಗಿ ಈ ಕುಲ್ಲಲಯ ಸಿರಿ ಪೀಟೊಡೇರ್‌ದ್ ||
ದುಸ್ಪೆರೆನ ಬಿದೆ ಮುತ್ತಯೆರೆನೇ
ಪೊರ್ಡುದಬತಾರೊದಯೆ ಪಂಡ್‌ದ್
ಉತ್ತಮನೆ ಸಹದೇವೆ ಪುಗರ್‌ದ್ ಕಾರ್ ಪತ್ತಿಯೆನೆ ||

5

ಬಲತ ಕೈಟಾ ಕ್ರಿಷ್ಣ ಸ್ವಾಮಿನ್
ಪತೊನುದಾಯೆನೆ ಅಗ್ರ ಪೂಜೆಗ್
ಸಬೆಟ್ ದೀಡ್‌ದಿ ಪೀಟೊಗೇರ್‌ಸಯೆ ಸೋತ್ತೊ ಪಂಡೊಂದು ||
ಕಾರ್‌ದೆಕ್ಕನ ನೀರ್ ಗಂಗೆದ
ಸೀರ್ತೊ ಪಂಡ್‌ದ್ ಸಬೆತ ಮೇಲ್‌ಗ್
ಪೂರ ತಲಿತೆನೆ ಮಾದ್ರಿನಾ ಮಗೆ ಮೆಗಿಯೆ ನಾಲ್ಪೆರೆನ್||

6

ಸಿರಿಯರಸು ಗೋವಿಂದ ಜಯೊ ಜಯೊ
ಪರಮ ಪಾವನ ಮೂರ್ತಿ ಜಯೊ ಜಯೊ
ಮುನಿಕುಲೆನ ಜಯೊ ಗೋಸೊ ಸೊರ್ಗೊಗು ಎತ್ತದಾಂಡಪಗ||
ಸಬೆತಕ್‌ಲ್ ಪಂಡೆರ್‌ಲ ಧರ್ಮಜೆ

ಮಲ್ತನವೆ ಈ ಯಾಗೊ ಸಾರ್ತಕೊ
ಪಡೆಯಿನ್ತೆ ಈ ಬರತ ಬೂಮಿಡ್ ಆಂಡ್ ಸೌಬಾಗ್ಯೊ||

7

ಬ್ರಾಣೆರೆನ ಗೌಜೊಂಜಿ ಕಡೆಟ್ಲ
ಪಾಂಡವೆರೆ ಸಂತೋಸುಲಾಪೆಕ್
ಕೊರವಾದಿಲೆ ನಂಜಿ ಮಚ್ಚೆರೊ ಪುರಿತ ಪಾತೆರೊಲು||
ಕೂಡಿ ರಾಜೆರ್ ಒರೈಗೊರೈಡ
ರಾಜ ಸೂಯೊನು ಪುಗರುನಾ ಸೊರೊ
ಮಾತ ಒಂಜೇ ಕಡೆಟ್ ಲಕ್ಕಡ್ ಆಂಡ್ ಮಾಗೌಜಿ ||

8

ಕೆಲವೆರಾ ಪಾಂಡವೆರೆ ಪ್ರೀತಿಡ್
ಕೆಲವೆರಾ ಸಿರಿಕ್ರಿಷ್ಟ ಮೈಮೆಡ್
ಕೆಲವೆರಾ ಮಹ ಯಾಗೊ ಮಲ್ಪಯಿ ದರ್ಮಂದನನ||
ಬಿರ್ಸತಿಗೆ ನೆನೆತೊಂದು ಏರ್ಲ
ಮನಿತ್‌ಚೆರ್‌ಲಾ ಸಬೆಟ್ ಬಿಮ್ಮೊನು
ಮೆದ್‌ಕವಂದೆನೆ ಕುಲ್ಲದಿತ್ತೆರ್ ಅರಸುನಕ್‌ಲೊಟ್ಟು ||

9

ಚೇದಿ ದೇಸೊದ ರಾಜೆನಾ ಸಿಸು-
ಪಾಲ ರೋಮೊನೆ ಕೊಕ್ಕೆ ಏರ್‌ದ್
ಕೋಪೊಡಾಯನ ಕಣ್ಣೆ ಕೆಂಪಾಂಡಪಗ ಲಕ್‌ದುಂತ್ಯೆ ||
ತಾನ್ ತನ್ನವೆ ನೌಂಡು ತುಚ್ಚಿದ್
ತೂಯೆ ಸುತ್ತಲ ಕುಲ್ದಿ ರಾಜೆರೆ
ಮೋನೆ ತೂದೇ ಉಂತ್‌ನಾಪಗ ಏರ್ಲ ಮನಿತ್‌ಚೆರ್ ||

|| ಸಿಸುಪಾಲನ ಅಬ್ಬರೊದ ನೆರಡೆ ||

ದಾನೆಯಾ ಸಹದೇವ ದೇಸೊದ
ಮಾನಿತೆರೆ ಮರ್ಯಾದಿದವೆ ಸಬೆ-
ಟೀಯೆ ನಂದನ ಮಗನ್ ಪೀಟೊಡು ಕುಲ್ಲಯಿನೆ ದಾಯೆ ||
ಯಾಗೊ ಕಿರ್ಯೆನ್ ಹಾಲ್ ಮಲ್ತನೆ
ಏರ್ಲ ಇದೈರೊ ಪನ್ನುನಾಕ್‌ಲ್
ಮಾನೊ ದೆತ್ತನೆ ಸಬೆಟ್ ಎಂಕ್ಲೆನ ಜೋಕುಲಾಟಿಗಡೆ||

1

ಮೂಲು ಕೂಡ್ಲೆನ ರಾಜ ರಾಜೆರ್
ವೀರ ಚತ್ತಿಯ ವಂಸೊದಾಕ್‌ಲ್

ಮಾನಿತೆರ್ ನಿಜೊ ಎರೈ ಮೇಪುನಗಾಯಗೊಯ ಪೀಟೊ||
ದೇವತೆಲೆ ಸರಿ ತೂಕೊಡಿತ್ತೆನ್
ರಾಜ ರುಸಿಕುಲು ಕುಲ್ಲದುಪ್ಪುನ
ಯಾಗೊ ಸಾಲೆಡ್ ಗೊಲ್ಲಗೊಯ ಇನಿ ಅಗ್ಗ ಪೂಜೆಗುಳು||

2

ಬೀಸ್ಮೆ ನಿಕ್ಕೇ ದಾಯೆಗಾತ್‌ನೆ
ಈತ್ ಪಿರಯೊನೆ ನಿನ್ನ ಕುಟುಮೊದ
ಜೋಕುಲತ್ತೊಯ ಪಾಂಡು ಬಾಲೆಲು ಬುದ್ಧಿ ಕಲ್ಪದನ||
ಅರಸು ವಂಸೊದ ರಾಜನಕ್‌ಲೆನ
ನಡುಟು ಪೂಜೆಗ್ ಕುಲ್ಲನಾಯೆನೊ
ಕಳುವೆನಾ ವಸುದೇವ ಮಗನೋ ಕ್ರಿಷ್ಟ ಪನ್ ಪನ್‌ಲ ||

3

ಸಿವನ ಕೈತಲ್ ಬ್ರಮ್ಮ ದೇವನ
ಸಮೊಟು ಇಂದ್ರನ ಒತ್ತು ಕುಲ್ಲನ
ಅರಸುಲುಲ್ಲೆರ್ ಮೂಲು ಯಾದವೆರಾಣಗೋ ಪೂಜೆ ||
ಮರಿಯದಿನ್ ಮುದಿ ಮರ್ಲ ಕಳೆಯನೆ
ನಡತಿ ಯಜ್ಞೊನು ಹಾಲ್ ಮಲ್ತನೆ
ಸುರೆರೆ ಲೋಕೊಡು ಸಾನ್ ನಿನ್ನನ್ ದೂರಯೆರೊ ಪರಬ ||

4

ವೇದೊ ಸಾರೊನು ಧರ್ಮೊ ನೀತಿನ
ಪೂರ ತೆರಿನಯೆ ಬೀಸ್ಮೆ ಪನ್ನುನ
ಕೀರ್ತಿಗೇ ಮಜಿಯಾಂಡೆ ಗೋಪನ್ ಪೀಟೊಗೇರ್ನಾದ್ ||
ಪೀಟೊ ಕೊರ್ಪನೆ ಹಿರಿಯೆರೆಗ್ ಸರಿ
ಆಂಡ ದ್ರುಪದಗ್ ಕೊರೈಲಿತ್ತೆಂ-
ಡಾಯೆ ಕ್ರಿಷ್ಟನ ಅಮ್ಮೆ ವಸುದೇವಡ್‌ದ್ ಮಲ್ಲೆತ್ತೊ ||

5

ಗುರುಕುಲೆಂದ್‌ದ್ ಕೊರ್ಪನಾಂಡನೆ
ಕೃಪೆರ್ ದ್ರೋಣೆರ್ ಅರಸುನಕ್‌ಲೆಗ್
ಕಲ್‌ಪಯೀನಕ್‌ಲತ್ತೊ ಅಕ್‌ಲೆಗೆ ಪೀಟೊ ಕೊರೊಡಾಂಡ್ ||
ಪರಮ ರುಸಿಯಾ ವೇದ ವ್ಯಾಸೆರ್
ಸಿವಗ್ ಸರಿಸಮೊತಾರ್ ಆರೆಗ್
ಮರಿಯದಿಡ್ ಇನಿ ಕೊರುತ್ತವರ್ಡನೆ ಏರ್ ಕೇನುವೆರ್ ||

6

ವೀರೆರೆಗ್ ಕೊರೊಡಾಂಡ ಅಸ್ವ-
ತ್ತಾಮೆರಿತ್ತೆರ್ ಬಾಣೊ ಬುಡ್ಡುನ

ವೀರೆನೇ ಸರಿ ಏಕಲವೈನೆ ಕುಲ್ಲುದುಲ್ಲೆತ್ತೊ||
ಬಾರಿ ಪುದರ್‌ದ ಕುರು ಪರಂಪರೆ-
ದಾಯೆ ಬಾಪ್ಪಿಕೆನಿತ್ತೆ ಕ್ರಿಷ್ಟೆನೊ
ಕಾಳಗೊಡು ಮಹವೀರೆ ಬಲಿಪುನ ಪುಕ್ಕೆ ಕಳ ಬುಡುದು||

7

ಮಾನೊಗೇ ಮರ್ಯಾದಿ ಕೊಪುನೆ
ಆಂಡಲಾ ಬಗದತ್ತೆ ಇತ್ತನೆ
ಸೌಬಲನ ಮಗೆ ಸಕುನಿ ಸೈಂದವೆರನೈರೋ ಪನ್‌ಲ ||
ಮಾಗದನ ಮಗೆ ದಂತವಕ್ರಲ
ಮಾನಿತೆರ್ ಇರ್ವೆರ್‌ಲ ಇತ್ತೆರ್
ಗೋಪಿನಕಲೆನ ಮಿಂಡೆ ಕ್ರಿಷ್ಟೆನೆ ಮಲ್ಲ ಮಾನಿತೆನೊ ||

8

ಮಲ್ಲ ರಾಜೆರ್ ಸಾಲ್ವೆ ಮಾಳವೆ
ರುಗೈ ಬೀಸ್ಮಕೆ ಸಲ್ಯ ಬೂಪತಿ
ಕುಲ್ಲದಿತ್ತನ ರಾಜ ಸೂಯೊದ ಸಬೆತ ನಡುನಡುಟು||
ಗುಡ್ಡೆಡೇ ಕೈ ಕಂಜಿ ಮೇಶನ
ಗೊಲ್ಲೆರಾಣಿಗ್ ಪೀಟೊ ಕೊರ್ದಯ
ಮರ್ದ ಪನ್ ಈ ಬೀಸ್ಮದಾಯೆಗ್ ಕ್ರಿಷ್ಟೆ ಮಲ್ಲೆಂದೊ ||

9

ವೀರ ಬೂರಿ ಸ್ರವನೆ ನಿಕ್‌ಲೆಗ್
ಕೋಪೊದಾಯೆನೊ ಸೋಮದತ್ತನೆ
ದಾಲ ಯಾರಂದ್‌ಂದ್ ಕ್ರಿಷ್ಟಿಗ್ ಪೀಟೊ ಕೊನೆನೊಯ||
ರಾಜ ಸೂಯೊದ ಕಾರ್ಯಗುಂದುದು
ಮಾನವಂತೆರ್ ಬತ್‌ನೆಂಕುಲು
ಸೂಳೆ ಮೇಳೊದ ಕ್ರಿಷ್ಟಿ ಪೂಜೆನ್ ತೂಯೆರಾಂಡತ್ತೊ ||

10

ಸ್ನಾತಕೆನೊ ಅತ್ತಿಂಬೈ ತಪಸಿಯೊ
ರಾಜೆನೋ ಆಚಾರ್ಯನೋ ಗುರು
ಏತೆಕಲ ಅತ್ತಿಂಬೈ ಮರ್ಯಾದಿ ಮಾನೊ ಕೆಟ್ಟನಯೆ||
ಪ್ರೀತಿದಾಯೆನೆ ನಿಕ್‌ಲೆಗಂದ್‌ಡ
ಬೇತೆ ಲೆತ್ತದ್ ಮಲ್ಲಿ ಸಮ್ಮನೊ
ರಾಜ ರಾಜೆರೆ ಎದುರು ಪೀಟೊಗು ಏರ್ಸಯಿನ ಸಮೊನೊ ||

11

ಧರ್ಮಜೆನೆ ಈ ಕೇನ್ ಎಂಕುಲು
ಮರ್ಯಾದಿಗ್ ಬೋಡಾದ್ ಕಾಣೆಗೆ
ಕೊರ್ರೊ ಅತ್ತಂದಿತ್ತೆ ನಿಕ್‌ಲೆಗೆ ಸೋಲ್ತು ಕೊರೈನೊಯ ||

ಟಕ್ಕ ಚೌಳಿದ ಮಾಯಗಾರನ್
ಇತ್ತೆ ಪೀಟೊಗು ಏರ್ವದೆಂಕಲೆ
ಮರ್ಯಾದಿನ್ ಕಳೆಯತ್ತೊ ಚಂದ್ರನ ವಂಸೊದಾಣಾದ್ ||

12

ಆಯಿನಾವಡ್ ಧರ್ಮನಂದನೆ
ಮೂಡೆ ಆಯನ ಅಜ್ಜೆಯಾಯಿನ
ಬೀಸ್ಮನೇ ಮುದಿ ಮರ್ದದಯೆ ನಿಚೊ ಗ್ರೇಯ್ಕೆ ಇದ್ಯಂದೆ||
ರಾಜ ರಾಜೆರೆ ಎದುರು ನಿನ್ನನ್
ಪೀಟೊ ಗೇರೈರೆ ಪಂಡೆರ್‌ಡ ಈ
ಸೀದ ಬರ್ಪುನ ಸಮೊನೊ ಕ್ರಿಷ್ಟಿ ಯೋಗೊ ನಿಕ್ಕುಂಡೊ ||

13

ರುಸಿಕುಲೆಗ್ ಮರ್ಯಾದಿ ಎಂಚಿನ
ಒನಸ್ ದಚ್ಚಣೆಗಾದ್ ಬೆರಣೆರ್
ಕಯಿನ್ ನೀರೈರ್ ಏರೆಗೆಂಚಿನ ಆಂಡ ದಾನೆಂದ್||
ಅರಸುನಾಕ್‌ಲ್ ರಾಜಸೂಯೊದ
ಮರಿಯದಿನ್ ಕಾತೊಂದು ಕುಲ್ಲುದಿ
ಸಬೆಟ್ ಈ ಸಿರಿ ಪೀಟೊನೇರ್‌ನೆ ತಪ್ಪು ಗೋಪಾಲ||

14

ಕುರುಡೆರೂರುಡು ದರಿನ ಕನ್ನಟಿ
ಪೊರುಲು ಮಾಣಿಕೊ ಆಯಿನಂಚೆನೆ
ಕುರುಬೆರಂಚೆನೆ ನಿನನ್ ಪಾಂಡವನಕ್‌ಲ್ ದೈವೊಂದು||
ಪುಗರ್‌ನಗ ಈ ನಿನ್ನ ಏಗಿತೊ
ತೆರಿಯೊನಂದೆನೆ ಕುಲ್ಯ ಪೀಟೊಡು
ಕುಲೊಟು ಯಾದವೆ ಕಸುಬು ಗೋವಳೆ ಕಳುವೆ ಕಾಳಗೊಡು ||

15

ನೆರ್ದುನೆನ್ ಕೇನೊಂದು ಯಾದವೆ-
ರಲ್ಲ ಲಕ್ಕದ್ ಪತ್ಯೆರಾಯುದೊ
ಕೆರ್ಮೊ ಇಂಬ್ಯನ್ ಮಾಸೊ ಪಾಡುಗೊ ನಾಯಿ ಕುದೈರೆಗ್||
ಸಾಂಬೆನಾ ಕೃತವರ್ಮನಾಕ್‌ಲ್
ಗಾಂಡ್‌ಗೌಜಿಡ್ ಲಕ್ಕದುಂತ್ಯೆರ್
ಪಾಂಡವೆರೆನಾ ಯಾಗೊ ಸಾಲೆಡ್ ಆಂಡ್ ಗಡಿಬಿಡಿಯೆ ||

16

ರುಸಿಕುಲೆಗ್ ಪೋಡ್ಯಾದ್ ಪಾರೈರ್
ಬೆರಣೆರೆಗ್ ದಾನೆಂದ್ ತೆರಿಯಂ-
ದಕ್‌ಲ್ ಉಂತ್‌ನ ಉಂತಿಲೆಕೊನೇ ಇತ್ತೆರಲ್ಲ||

ಬುಡಡೆ ಚೈದ್ಯನ್ ಕೆರ್ಡ್ ಪಾಡ್ಲೆ
ಬೆರಿತ ಸೂಂಟಾನೊಯ್ನಿ ಪನ್ನಗ
ನಡುಕುಲಾಗಿಯೆ ಬೀಸೈ ಕೈನ್ಲ ದೇರ್ತ್ ದೇರ್ತೊಂದು||

17

ಮಾತೆರೆನ ಗಡಿಬಿಡಿನ್ ಉಂತಯೆ
ಯಾದವೆರ್ ಸಮದಾನೊಡುಂತ್ಯೆರ್
ಆಪಗನೆ ಸಾದೇವೆ ಬತ್ತಾದ್ ಚೈದ್ಯ ಕೈತಲ್ಡಾ||
ದಾಯೆಗ್‌ಯೆ ಸಿಸುಪಾಲ ಲಡಯಿಗ್
ಸಾದಿ ಮಲ್ಪುವ ನೆರ್‌ದ್ ಕ್ರಿಷ್ಟನೆ
ಮಾನ್ಯೆರೆಡ್ ಮಾನಿತೆನೆ ಪೂಜೆಗ್ ಯೋಗೈ ಅಧಿ ದೈವೊ ||

18

ಅಜ್ಜೆ ಬೀಸೈರ್ ಲೋಕೊ ಲೋಕೊಡು
ತತ್ತೊ ಸಾಸ್ತೊನು ತೆರಿನರತ್ತೊಯೆ
ಅಣ್ಣೆ ಧರ್ಮಜೆ ಮಲ್ಪುವನ ಈ ಯಜ್ಞೊ ಕಾರ್ನಿಕೊದ||
ಕ್ರಿಷ್ಟೆ ದೇವೆರೆ ದೈವೊ ಪಂಡ್‌ದ್
ಮಲ್ಲ ಪೀಟೊಡು ಕುಲ್ಲಯಿನೆ ಈ
ಕುಲ್ಲು ಮನಿಪಂದಿತ್ತೆ ಯಾಗೊದ ಕಾರ್ಯೊ ನಡಪಡ್‌ಯೆ ||

19

ಏರ್ ಪಂಡಲ ಕ್ರಿಷ್ಟ ಪೂಜೆನ್
ಯಾನ್ ಒಪ್ಪಯೆ ಪನ್ನ ಬೂಮಿನ್
ಕಾರ್‌ಡೊದ್ದುದು ಲಕ್ಕಾದುಂತಿಯೆ ವೀರ ಸಿಸುಪಾಲೆ||
ಈ ಅದರ್ಮೊದ ಮೂರ್ಕ ರಕ್ಕಸೆ
ದಾಯೆ ಲಾಗಿವ ದೈರೊ ಉಂಡುಡ
ಕಾಳಗೊಗು ಎದುರಾಲ ಪಂಡ್‌ದ್ ಉಂತ್ಯೆ ಸಾದೇವೆ ||

20

ದರ್ಮದಾಸ್‌ಡ್ ಕುಲ್ಲದಿತ್ತನ
ಧರ್ಮನಂದನೆ ದಿಡ್ಡ ಲಕ್ಕಾದ್
ನಮ್ಮ ಲೇಸ್‌ಗ್ ಬತ್ತನಕಲೆಡ ಲಡಯಿ ಮಲ್ಪುನೆನೊ ||
ಪಂಡ್‌ದಾ ಸಿಸುಪಾಲ ಕೈತಲ್
ಉಂತುದೇ ಸಮದಾನೊಡಾಯಗ್
ದಂಡೊ ಮಲ್ಪುಡ ಎಂಕ್ಲೆ ಕಾರ್ಯೊನು ಲಡಯಿಗುಂತೊಂದು ||

21

ಮೂಲು ಸೇರ್‌ನ ಮಲ್ಲ ರುಸಿಕುಲು
ದಾಲ ತೆರಿಯಂದಿತ್ತನಾಕ್‌ಲೊ

ವಾಸುದೇವನ ಮೈಮೆ ಪಂಡ್‌ದ್ ಕುಂಟುಡೊಯ್ತೊಂದು||
ಆಯೆ ಕುಲ್ಲನ ಪೀಟೊದಾಡೆಗ್
ಪ್ರೀತಿಡೇ ಪಾತೆರ್‌ದ್ ಕನತೆನೆ
ದಾನವೆರೆ ನಿಜೊ ಸುಬವೊದಾಯನ್ ಚೇದಿದದಿಪತಿನ್ ||

|| ಸಬೆಟ್ ಸಿರಿಕ್ರಿಷ್ಟ ಮಹಿಮೆನ್ ಪಂಡೆನಾ ಬೀಸೈ ||

ಧರ್ಮನಂದನೆ ಭೀಸೈನಾಡೆಗ್
ಪೋದುಲಪಗನೆ ಪಂಡೆನಜ್ಜೆರೆ
ಚೈದ್ಯ ಮನಸ್‌ಗ್ ಕ್ರಿಷ್ಟೆ ಏರ್‌ಂದಿತ್ತೆ ತೆರಿಪಾದ್||
ನಮ್ಮ ಯಜ್ಞೊದ ಕಾರ್ಯೊ ಮಾತಲ
ಪೊರ್ಲು ನಡಪವೊಡುಂದು ಮೆಲ್ಲೊಡು
ಪನ್ನಗನೆ ಲಕ್‌ದುಂತ್ಯೆ ರುಸಿಕುಲೆ ಮೋನೆ ತೂವೊಂದು ||

1

ಹರಿನ ಪಾದೊಗು ಅಡ್ಡೊ ಬೂರುದು
ಮುನಿಕುಲೆಗ್ ಕೈ ಮುಗಿದ್ ಕೂಡ್‌ದನ
ಸಬೆಕ್ ವಂದನೆ ಮಲ್ತೊನುಂದೇ ಆದಿ ನಾರಯಿಣೆ||
ಸಿಸ್ತಿ ಸಿತಿ ಲಯೊ ಪನ್ನಿ ಲೀಲೆದ
ಗೊಬ್ಬು ಗೊಬ್ಬುನ ಕತೆನ್ ಪನಿಯೆರೆ
ಒಪ್ಪಿಗ್‌ನ್ ಕೇನೊಂದು ಬೀಸೈನೆ ದ್ಯಾನೊ ಮಲ್ತೊಂಡೆ ||

2

ಆ ರಚೋ ಗುಣೊಡ್ಡಾದ್ ಬ್ರಹ್ಮನೆ
ತಾಮಸೊಡು ನಿಜೊ ಸಿವೆನೆ ಸತ್ತೊಡು
ಆದಿ ನಾರಾಯಿಣೆನೆ ಗುಣೊಕುಲೆಡೊರೈ ಜಗನ್ಮಯೆನೆ||
ಸೀದ ಕಣ್ಣೆಡ್ ನಂಕ್ ತೋಜಯೆ
ಗೇನೊ ದಿಸ್ತಿಗ್ ಮಾತ್ತೊ ತೋಜುವೆ
ಮಾಮಯಿಮೆ ಅವ್ಯಯೆನೆ ಸರ್ವಾತ್ಮಕೆನೆ ಪರಿಪೂರ್ಣೆ||

3

ನೀರ್ಡ್ ನುರೆ ತೋಜುನವೆ ಸಾಸಿತೊ
ಏಪೊಗುಲ ಅತ್ತವ್ವೆ ಮಾಯಕೊ
ಆಪುನವೆ ಈ ಲೋಕೊ ವಿಷ್ಣುನ ಜ್ಞಾನೊದಾ ನೀರ್ಡ್ ||
ನುರೆತ ಲೆಕ್ಕೊನೆ ಇಸ್ಸೊ ಪುಟ್ಟುದು

ಅರಿಪುನವು ತೋಜಂದ್ ಮಾಯೊದ
ಪರೆನೆ ಇಸ್ಪೊದ ಜೀವೊರಾಸಿಗ್ ಮುಚ್ಚಿದಿತ್ತನೆಟ್ ||

4

ಮರ್ಲ್ ವಿಸಯೊದ ಸುಕೊತ ಬೋಗೊಡು
ಮುರ್ಕನಕ್ಲೇ ಈ ನಿರಾಮಯೆ
ಅಚ್ಚುತೆನೆ ಪರತತ್ತೊಮಯೆನೇ ತಾನ್ ತಾನಾದ್ ||
ಮೆರೆದ್ ತೋಜುನ ಈ ಮುಕುಂದನ್
ಮರತ್‌ದಾಕ್‌ಲ್ ಕರ್ಮೊ ಗುಂಡಿಡ್
ತಿಕ್‌ದ್ ಬೂರ್ದೆರ್ ಮಾಯೊ ಮೋಹೊಗು ಮರ್ಲ್ ಕಟ್ಟೊಂದು ||

5

ಎನ್ನೆಡ್ಡಿಯೊ ಎಣ್ಣೆ ಕಣಕ್‌ಡ್
ಅಗ್ನಿ ಪುಟ್ಟವೆರತ್ತೊ ಅಂಚಿನೆ
ವಿಷ್ಟು ಚೈತನ್ಯಾತ್ಮೆ ಪನ್ನುನ ದಾನೆ ತೆರಿಯಂದೆ||
ಸೂತ್ತೊದಾರನ ಕೈಚಲಾಕ್‌ಡ್
ಏಸೊದಾ ಬೊಂಬೆಲುಲ ನಲಿಪುನ
ರೀತಿಡೇ ಈ ಇಸ್ಪೊಡಿತ್ತನ ಜೀವಿಲೆನ ನಲಿಕೆ ||

6

ಅಚ್ಚುತೆನೆ ಇಂಬೈತ್ತ ಪಂಡ್‌ದ್
ನೆರೈಡನೆ ಸಿಸುಪಾಲೆ ಕ್ರಿಷ್ಟನ
ಮಲ್ಲ ಮೈಮೆಗ್ ಕುಂದಲಾಯೆರೆ ಉಂಡೊ ಏಪೊಗುಲ||
ಮಿತ್ತ ಬಾನೊಗು ತೂದು ಇಂಬೈನೆ
ಉಬೈಡನೆ ಆಕಾಸೊ ಸುದೊಗು
ಬ್ರಮ್ಮ ಕಲಸೊನೆ ಬೋಡೊ ಪನ್ನೆಯೆ ತೆರಿನ ಸಬೆತಕ್‌ಲ್ ||

7

ನೀರ್ಡ್ ನಿರೇಲ್‌ಲ ಪಂದಿ ಸಾತ್‌ಗ್
ಸೂರೈ ಮಂಡಲೊ ಪಂದ್ಯೊ ಕರಿಪುಗೆ
ಬಾನೊಗಲೆಸ್‌ದ್ ಆಂಡ ಮಿತ್ತದ ಬಾನೊ ಕಪ್ಪಾವೊ||
ದೂಳು ಲಕ್ಕ್‌ದ್ ದಿಂಜಿ ಗಾಳಿನ
ಏರ್ ದೆಕ್ಟರ್ ಹರಿಯೆ ನರಮನಿ
ಆದ್ ಪುಟ್ಟೆಡ ಕೊರತೆ ಎಂಚಿನ ಉಂಡು ದೂರೈರೆಗ್ ||

8

ಮೂಜಿ ಕಾಲೊನು ಮೀರ್‌ದಿತ್ತನ
ಕ್ಯಾತಿದಾಯೆನೆ ನಿಜೊತ ಪುರುಸೆನೆ
ಆಯಿನಾ ಚಿನ್ನಯೆನೆ ಮಾಯೊಗು ಪಿದಯಿಡಿತ್ತನಯೆ ||
ಜ್ಞಾನೊ ಚೇತನೊ ಇಸ್ಪೊ ಸಗ್ಗಿಲು

ಮೂಜಿ ಗುಣೊ ಒಂಜಾದ್ ಪುಟ್ಟೆನ
ಪಾವನಾತ್ಮೊದ ಮೂರ್ತಿ ಕ್ರಿಷ್ಟೆನೆ ಹರಿ ನಿರಂಜನೆನೆ||

9

ಯಜ್ಞೊದದಿಪತಿಯಾದ್ ಇಂಬೈನೆ
ಯಜ್ಞೊ ಪುರುಸೆನೆ ಆಯಿನಾ ಹರಿ
ಯಜ್ಞೊ ಸಾದನೊ ಮಾತ ಮಂತ್ರೊಲ ಇಂಬೈ ಕಾಲಾತ್ಮೆ ||
ಯಜ್ಞೊಲಿಂಬೈನೆ ಕರ್ಮೊಲಿಂಬೈನೆ
ಯಜ್ಞೊಗುಲ ಯಜಮಾನಿ ಇಂಬೈನೆ
ಯಜ್ಞೊ ಪಲೊ ಪರಿಪೂರ್ಣೆನಿಂಬೈನೆ ದೇವಕೀ ಮಗೆನೆ ||

10

ಮೋನೆಡೇ ಬ್ರಾಣೆರ್‌ಲ ರಟ್ಟೆಡ್
ವೀರ ಚತ್ತಿಲು ಮಾತ ವೈಸೈರ್
ತೋರೊ ತುಡೆಟೇ ಸೂದ್ರ ಜಾತಿಲು ಪಾದೊ ಪದೊಲೆಡ್ ||
ಮಾಯಗಾರನ ಉಸುಲುಡಿಂಧೈನೆ
ಸೂರೈ ಕಣ್ಣೆಡ್ ದೇವ ದೇವತೆ-
ನಾಕ್‌ಲೇ ಪುಟ್ಟೆರ್‌ಲ ಮೋನೆಡ್ ಈ ಮುಕುಂದನವೆ ||

11

ಬಾನೊ ಇಂಬೈನ ಕಮಲ ಪೂವೊಲು
ಕೇನುನಾ ಕೆಬಿ ಎನ್ನೊ ದಿಕ್ಕುಲು
ಪಾದೊನೇ ಪಾತಾಳೊ ಮಿತ್ತ ಕಿರೀಟೊ ದ್ರುವ ಲೋಕೊ ||
ದೇವ ದೇವತೆಲೊಟ್ಟುಗಿಂಬೈನೆ
ರೋಮೊ ರೋಮೊದ ಗುರಿಟ್ ದೆಂಗ್‌ದ್
ಸೇರ್‌ದುಲ್ಲೆರ್ ಪನ್ನಿ ಸಂಗತಿನೇರ್ ತೆರಿನಕ್‌ಲ್ ||

12

ನಾಸೊ ಆಪುನೆ ಲೋಕೊ ಪ್ರಲಯೊದ
ನೀರ್ಡ್ ನೀರೇ ಸೂಟು ಸೂವೇ
ಗಾಳಿ ಗಾಳಿಡ್ ಪೂರ ಅರಿಪುನೆ ದಾಲ ಒರಿಯಂದ್||
ಬಾನೊ ಪುಲಯೊದ ಸಾಂತಿಡೊರಿಪುನೆ
ಮಾಯೆ ದೆಂಗ್‌ದ್ ಕುಲ್ಲಲಾಪಗ
ಪಾದೊಡೀ ಮಯಿಮನವೆ ಮಾತ್ಸೆನ್ ಏರ್ ತೆರಿನಕ್‌ಲ್ ||

13

ಹರಿನ ಅಂಗಾಂಗೊಲೆಡ್ ವೇದೊಲು
ಉಸುಲುಡುಪ್ಪುನೆ ಕೋಟಿ ಸೀರ್ತೊಲು
ಚರಣೊ ಕಮಲೊದ ಎಸಲ್‌ದುಲಯಿದ ಸೀಯೊ ನೆಯ್ಯಾದ್ ||
ಪಾವನೊಡು ಪಾವನೆನೆ ಜೀವಿಗ್

ಜೂವೊ ಮುರ್ತ್ಯುಗು ಮುರ್ತ್ಯು ಈ ಹರಿ
ಈತ್ ಸಂಗತಿನತೊ ಮಲ್ತನ ನರಮನಿಯೆರೇರ್ ||

14

ಇಸ್ವೊ ಸಿಸ್ವಿದ ಸಿಲ್ವಿ ಇಂಬೈನೆ
ಇಸ್ವೊ ದುರ್ಕುಗು ಮಂತ್ರವಾದಿಯೆ
ಇಸ್ವೊ ಕಣಕ್ಡ್ ಅಗ್ನಿ ಕಾರ್ಯೊದ ಬ್ರಹ್ಮಚಾರಿ ನಿಜೊ ||
ಇಸ್ವೊ ನಾಟಗೊ ಸೂತ್ರಾದಾರಿಯೆ
ಇಸ್ವೊ ದಚ್ಚಿರೊ ಮೈಂದ್ರ ಜಾಲಿದ
ಇಸ್ವೊ ಚೇತನೊದಾಯೆ ಕ್ರಿಷ್ಣನ ರೂಪೊಡುಲ್ಲೆತ್ತೊ ||

15

ವೇದೊ ಸಾಸ್ವೊ ಪುರಾಣೊ ಮಾತೆನ್
ಪಾಲ್ ಮಲ್ತದ್ ಅತೊಗೇ ಸರಿ
ಬೇತೆ ಬೇತೆನೆ ಮಲ್ಪಿರಾದೇ ರುಸಿ ಪರಾಸೆರೆರೆ||
ಮಗೇನೆ ವೇದವ್ಯಾಸೆರ್ಂದ್
ಪುದರ್ಡೇ ಅಬತಾರೊ ಮಲ್ತನ
ಮಯಿಮೆ ಕ್ರಿಷ್ಣೆನೆ ಪನ್ದ ತೆರಿವೆನೊ ದುಸ್ವ ಸಿಸುಪಾಲೆ ||

16

ರೂಪು ಇದ್ಯಂದ್ನಯೆ ಸಗುಣೊದ
ರೂಪೊಡೇ ಕುಲ್ಲ್ದಾನ ಕ್ರಿಷ್ಣೆನೆ
ಸಾರೊ ಪುದರ್ಡ ರೂಪೊ ತೋಜಯಿ ಮಾಯಗಾರೆನೆಲ ||
ದಾಯೆ ಕುರುಡಗ್ ಕನ್ನಟಿಯೆ ಸರಿ-
ತಾಯುದೊಲು ಕೈಚೊಟ್ಟುದಾಯಗ್
ದಾಯೆ ಮೂರ್ಕಗ್ ನೀತಿ ಧರ್ಮೊದ ಸಾರೊ ಸಾಹಿತ್ಯೊ ||

17

ಹರಿನ್ ನೆರ್ಪುನ ಚೈದ್ಯ ರಾಜಗ್
ಕೊರೊಡು ಕಲಿಗಂಗಸರೊ ಮಾತ್ರೊನೆ
ದುರುಳೆ ದುಸ್ಪೆನೆ ಪನ್ದ ದೂರಿಯೆ ಬೀಸ್ಮನಾಯನ್ ||
ಎನುಮೊ ಅಬತರೊ ಮಲ್ತದೀತ್ನಿಟ
ನಮುನೆ ನಮುನೆಡ್ ದುಸ್ವ ಜಾತಿದ
ಬಿದೆನ್ ಮುತ್ತಯಿನೇರ್ ಪಂಡ್ಡ್ ಇಂಬೈ ತೆರಿತ್ ಜೆನೆ ||

18

ಪೂತನಿನ್ ಸಕಟಾಸುರನ್ ಬಕ
ದೇನುಕಾಸುರೆರೆನ್ನಿ ರಕ್ತಸ-
ನಾಕಲೆನ್ ಕೆರ್ದಾಡ್ ಕಂಸನ ನಾಲಿನೊತ್ತನಯೆ ||

ಕಾಲಯಮೆ ಮುರ ನರಕೆ ಪೌಂಡ್ರಕೆ-
ರೇತ್ ದುಸ್ಪೆರ್ ಸೈತ್ತೆರಿಂಬ್ಯಡ
ಮೂರ್ಕನೇ ಸಿಸುಪಾಲೆನೊರಿವೆನೊ ಗ್ರೇಯ್ವಿ ಸಬೆತಕ್ ||

19

ಕೂಡಿ ರಾಜೆರ್ ಮಾತ ರುಸಿಕುಲು
ಕೇನೊಡೆನ್ನವೆ ಪಾತೆರೊನು ಸರಿ
ಈ ಮಹಾಶೈನೆ ಕ್ರಿಷ್ಣೆ ಎಂಕ್ಲೆಗಮ್ಮೆ ಗುರು ನಿಜೊನೆ ||
ಈತ್ ಪನ್ನಗ ಮಲ್ಲಿಗೆದವೇ
ಪೂತ ಬರ್ಸೊನೆ ಬೂರ್ದಾಂಡ್ಲ
ಪೀಟೊಡಿತ್ತನ ಮಲ್ಲ ಮಹಿಮನ ತರೆಕ್ ಮಿತ್ತಡ್ಡ್ ||

ಸಿಸುಪಾಲೆ ಕ್ರಿಷ್ಣನ್ ದೂರುವೆ

ಸಬೆಟ್ ಬೀಸ್ಮನ ಪಾತೆರೊನೆ ಸರಿ
ಇಸೊತ ನಮುನೆಡ್ ದುಸ್ವರಾಜೆರೆ
ತರೆಕ್ ಏರ್ಡ್ ನೊಂಡು ತುಚೈರ್ ಮಾತೆರೊಟ್ಟಾದ್ ||
ಪಗೇನ್ ಸಾದಿಪೆರಾದ್ ಕೋಪೊಡು
ಒರಿಯಗೊರೈಡ ಪನ್ದ ಕೂಟೊನು
ಪುರಿಟ್ ಮಚ್ಚರೊಡಕ್ಲ್ ಮಲ್ತೆರ್ ಲಡಯಿ ಮಲ್ಪೆರೆಗ್ ||

1

ಮಾತೆರ್ಲ ಸಿಸುಪಾಲನೊಟ್ಟುಗು
ಸೇರ್ಡ್ ನುಕ್ಯೆರ್ ಲಡಯಿದಾಸೆಡ್
ಆಪಗನೆಲಾ ಚೈದ್ಯ ಪನ್ನೆನೆ ನಿಕ್ಲ್ ನುಕೊಡ್ಡಿ ||
ಯಾನ್ ಒರೈನೆ ಯಜ್ಞೊ ಕುಂಡೊದ
ಸೂಟು ಪೊತ್ತದ್ ಕೆರ್ದ ಕ್ರಿಷ್ಣನ್
ವೀರ ತೇಜಿಡ್ ಬೊಬ್ಬೆ ಹಾಕಿಯೆ ಸಬೆತ ನಡು ನಡುಟು ||

2

ತೂದುಲಿಂದೆನ್ ಬೀಮ ಪಾರ್ತೆರ್
ಯಾದವೆರ್ ಪಾಂಚಾಲನಾಕ್ಲ್
ಸೇನೆ ಸನ್ನೆಯೊ ಮಲ್ತದುಂತ್ಯೆರ್ ಸಬೆತ ಆಪೆಕ್ಡ್ ||
ತೂಯೆನಾ ಧರ್ಮಜೆನೆ ಪೋಡಿದ್
ಬೀಸ್ಮನಾ ಕೈತಡೆಗ್ ಬತ್ತದ್
ಈರೆನಾ ದಯೊಟಿಂಕ್ಲು ಮಲ್ತನ ಮಾತ ಹಾಲಾಂಡೆ ||

3

ಅಜ್ಜ ತೂಲೆಯೆ ಲಡಯಿಗೇ ಮುಕು-
ಲಿತ್ತೆ ನುಕ್ಲೆರ್ ಹರಿನ್ ನೆರೆರ್
ಯಜ್ಞೋ ನಾಸೊಗು ತಯರ್‌ಡುಲ್ಲೆರ್ ದುಸ್ಪೆರೊಟ್ಟಾದ್ ||
ದಾನೆ ಮಲ್ಪೊಡು ಯಾನ್ ಪನ್ನುನ
ಸಾದಿ ತೋಜುಜಿ ಎಂಕ್ ಪಂಡ್‌ದ್
ಬಾರಿ ಬುಲೆನೆ ಬೀಸ್ಮನೆದುರುಡು ಧರ್ಮನಂದನೆ ||

4

ಪೋಡಿಯಡ ಓ ಧರ್ಮನಂದನ
ಸೂರ್ಯ ಕಿರಣೊನು ಚಂಡಿ ಮಲ್ಪೆರೆ
ತೀರೊ ಮೈಂದ್‌ಗ್ ಗಿಳಿತ ಕಿನ್ನಿಲು ಗಿಡನ್ ಗಿಡರುವೊನೊ ||
ನಾಯಿಲೊಟ್ಟುಗು ಸೇರ್‌ದ್ ಸಿಮ್ಮೊನು
ಕಾಡ್‌ದುಲಯಿಡ್ ಪತ್ತ್ ತಿನುವೊನೊ
ಈಯೆ ತೆರಿನಯೆ ಹರಿನ ಮಯಿಮೆನ್ ದಾಯೆ ಪೋಡುನೆಯೆ ||

5

ಬೆರಮ ಸಿಸ್ವಿದ ಸಿತಿನ್ ಮಲ್ತನ
ಮಹಿಮೆದಾ ಮಂದರೊನು ತಾಂಗ್‌ನ
ಹರಿಗ್ ಅರಸುಲೆ ನಾಸೊಗಂಚಿನ ಬೋಡು ಬುಜಸತ್ತೊ ||
ಕಡಲ್ ಪೋಡಿವೊ ಗಾಳಿ ಬರ್ಸೊಗು
ಪನ್‌ಲ ಧರ್ಮಜ ಚೈದ್ಯರಾಜನ್
ಜಗತ್‌ದೊಡೆಯೆನೆ ಗಣ್ಯೊ ಮಲ್ಪೊನೊ ಈ ಜನಾರ್ದನೆನೆ ||

6

ದಾನೆ ಪಂಡ ಸಿಕಂಡಿ ಎನ್ನನ್
ದೂರುವನ ನೆರ್‌ನೆರ್‌ದ್ ಕ್ರಿಷ್ಟನ್
ಗೋಕುಲೊದ ಪೋಣ್ಣಲೆನ ಮಿಂಡನ್ ಏತ್ ಪುಗರುನೆಯೆ ||
ಏಸಿಗೇಡ್ ಎಡ್ಡೆನ್‌ಲ ಮಯ್‌ದಿ
ಪೋಯಿ ಕುಟುಮೊದ ಮಾನೊ ಕತ್ತಲೆ
ದೌಲು ಬೊಲ್ಪುನು ಪುಗರುನೆಂಚಿನೆ ಈಯೆ ಪುಗರುವನ ||

7

ಕಳುವೆ ಕ್ರಿಷ್ಟನೆ ದುಂಬು ಪೂತನಿ
ಮಿರೆನ್ ಜುಂಬುದು ಕೆರೆ ಎಲೈಡ್
ಸಕಟ ದೇನುಕನಕಲೆ ಜೂವೊನು ದೆತ್ತಿ ಗಟ್ಟಿಗನೆ ||
ಪೆರ್‌ಮರಿತ ಬಂಜಿಗಲ ನೂರುದು
ಪಿದಡ್‌ದೈನೇ ಕೆರ್‌ನ ಯಾದವ
ಕುಲೊ ಪಟಿಂಗನ ಪೌರುಸೊನು ಈ ಕೇನ್ ಮುದಿ ಮರ್ದ ||

8

ಗಾಳಿ ಬೀಜಿನ ಅಸುರ ಮರ್ದನೆ
ಬೋರಿ ಕಂಜಿನ್ ಕೆರ್‌ನ ವೀರೆನೆ
ನಾಗ ಸರ್ಪನ ಜಿಡೆಟ್ ನಲಿತನ ಕೊರಜಿ ವಿದ್ಯೆದಯೆ ||
ಗೋಪ ಜಾತಿದ ಕುರುಡೆರೂರುಡು
ಕೋಸು ಕಣ್ಣಾದ ಜನೊನೆ ಮಲ್ಲೆಗೆ
ಗೋಕುಲೊಡು ಮಹ ಸೇರ್ ಕ್ರಿಷ್ಟನೆ ಪಂಡೆನಾ ಚೈದ್ಯೆ ||

9

ಏಲ್ ದಿನೊ ಕರಿನೇಟ ಮಾಟೆಡ್
ನೂರ್ದು ಬರ್ಸೊನು ಕಳೆಯಿನಾಯನ
ಕಾರ್ಬರ್‌ನ್ ಪನ್ನೆರಯ ಗಿರಿತವೆ ಕೊಡೆನ್ ಪತ್ಯೆಂದ್ ||
ಯಜ್ಞೋ ಇಂದ್ರಗ್ ಊರುದಾಕಲ್
ಮಲ್ಪುನೆನೆ ಉಂತಾದ್ ಗುಡ್ಡೆದ
ಯಜ್ಞೋ ಮಲ್ಪಯಿ ಬಿಸೆ ಇಂಬೈನೆ ಕೇನ್ ಪನ್ನುನೆನ್ ||

10

ಮಡ್ಯೊಲಗ್ ಹಾಕ್‌ದಲ ಕಂಸನ
ಕುರೈಲ್‌ದ ಕುಂಟಂಗಿ ಒಯ್ತದ್
ದೆತ್ತನಯೆ ಬೆರಿ ಬಗ್ಗಿ ಪರಬುನು ಪೊರ್ಲು ಮಲ್ತನಯೆ ||
ಮುಸ್ವಿಕೆರ್ ಚಾಣೂರೆರೆನ್ ಸರಿ
ಜಟ್ಟಿ ಕಾಳಗೊಡಕಲೆ ಜೂವೊನು
ದೆತ್ತ ನಾಯೆನೆ ತನ್ನ ಸಮ್ಮಲೆ ನಾಲಿನೊತ್ತನಯೆ ||

11

ಕಾಲಯವ ಪೋಡಿಗೇಡ್ ಪಾರ್‌ನ
ಸಾದಿಡಿನ್‌ಕಲ ಪಂತಿ ಕೊಡ್ತಿಜಿ
ಪಾರ್ ಪಾರ್‌ದ್ ರುಸಿಟ ಕೆರ್ದಯೆ ದೆಂಗ್‌ದುಂತೊಂದು ||
ಮಾಗದನ್ ಕೆರ್ಪಾಯಿ ಕುಸೆಲ್‌ನ್
ಯಾನ್ ನೆನೆಪುನಗಿತ್ತಲಾ ಎನ
ರೋಮೊ ಕೊಕ್ಕೇರುನೆನ್ ತೂಲಯ ಬೀಸ್ಮ ಮುದಿ ಪರಬ ||

12

ಚೈದ್ಯೆ ನೆರ್ಪುನ ಕೇನ್ದ ಬೀಮಗ್
ಮಲ್ಲ ಕೋಪೊನೆ ಏರ್‌ದ್ ಕಣ್ಣೊಡೆ
ರಟ್ಟಿದಾನಗ ಕಿಟಿಯೆ ಸೊಂಟೊದ ಕಚ್ಚಿ ಬಿಗಿತೊಂಡೆ ||
ಸೈನ್ಯೊದಕಲೆಡ ಪಂಡೆ ಗೌಜಿಡ್
ಯುದ್ಧೋಗೇ ತಯರಾಲೆ ಪನ್ನಗ
ಬಿರೈರಾ ಸಾತ್ಯಕಿಯೆ ಸಾಂಬೆಲ ತಯರ್‌ಡುಂತಿಯೆರ್ ||

13

ಲಕ್ಯೆರಾಲ ಪಾಂಚಾಲೆ ಕೇಕಯೆ
ಪನ್ನಿ ವೀರೆರ್ ಬೀಮನೊಟ್ಟಿಗೆ
ಮಲ್ಲಗದೆ ಬೀಚೊಂದು ಪಿದಡ್‌ನ ಬೀಮನಬ್ಬರೊನು ||
ಬೀಸ್ಮೆ ತೂದಾಯನಡೆ ಬತ್ತ್‌ದ್
ಆಯ ಗದನೇ ಒಯ್ತ್ ದೆತ್ತನೆ
ದಾನೆ ಮಲ್ಪುವ ಬೀಮ ಲಡಯಿಗ್ ಈಯೆ ಪಿದಡ್‌ನೊ ||

14

ನಾಲ್ ಸಾಗರೊ ನಡುತ ರಾಚೆರ್
ಸೇರ್‌ದುಲ್ಲೆರ್ ನಿಕ್‌ಲ್ ಮಲ್ಪವಿ
ಯಾಗೊಗುಂದುದು ಇತ್ತೆ ಲಡಯಿಗ್ ಈಯೆ ಉಂತುನೆನೊ||
ಹಾಲ್ ಮಲ್ಪುನ ಎಡ್ಡೆ ಕೆಲಸೊನು
ಬೀಮ ನಿನ್ನವೆ ಕೋಪೊಡಿತ್ತನೆ
ದಾನೆ ಪಂಡ್‌ದ್ ಗ್ರೇಯ್ತು ಮನಿಪಂದಿತ್ತೆ ಕುಲ್ಲುಲಯ ||

15

ಬೀಸ್ಮೆ ಬುಡು ಬುಡು ಬರಡ್ ಎದುರುಗು
ಬೀಮ ಸೇನನ ತರೆನ್ ಕಡ್‌ದ್
ಹೋಮೊ ಮಲ್ಪುವೆ ಯಜ್ಜ ಕುಂಡೊಗು ಪನ್ದ್ ಸಿಸುಪಾಲೆ ||
ಆಯ ಕರ್ಲನ್ ಒಯ್ತದಿತ್ತನೆ
ಮಾಲೆ ಪಾಡುವೆ ಜಯೊತ ಸಿರಿಕೇ
ಆನಿ ದಕ್ಷನ ತರೆನ್ ಕಡ್‌ನ ವೀರ ಬದ್ರಲೆಕೊ ||

16

ಅಜ್ಜ ಎನ್ನನ್ ಬುಡ್ಲೆ ಪಂಡ್‌ದ್
ಇತ್ತೆ ಕೊರೆಪುನ ನಾಯ್ ಬಾಯಿಗ್
ಕತ್ತಿ ತಲ್ಲುವೆ ಪನ್ದ್ ನುರ್ಕಿಯೆ ಬೀಮೆ ಏವುರೊಡು ||
ಮರ್ಲ ದಾಯೆಗ್ ಲಾಗೊದೆಪ್ಪುವ
ಇತ್ತೆ ಗಡಿಬಿಡಿಯಾಂಡ ನಮ್ಮವೆ
ಯಜ್ಜೊಡಾಯಿನ ಹವಿಸ್ ಸಂದುವ ಎಂಚ ಪನ್ ಬೀಮ ||

17

ನಿಕ್ಕ್ ಸಿಸುಪಾಲನ್‌ಲ ಕೆರೈರೆ
ಕಸ್ಸೊ ಸಾದ್ಯೊನೆ ಆಯ ಜಲ್ಲೊಡು
ಬತ್ತ್‌ದಾಯಿನ ಒಂಜಿ ಸಂಗತಿ ಉಂಡು ಅಯಿಡ್ಲಾದ್ ||
ಕ್ರಿಷ್ಟನೇ ಕೆರುನಯೆ ಆಯನ್
ನೆಕ್ಕ್ ಕಾರಣೊ ಇತ್ತನೆನ್ ಯಾ-
ನಿತ್ತೆ ಪನ್ನುನ ಕೇನ್ ಪಂಡ್‌ದ್ ಬೀಸ್ಮೆ ಕತೆ ಪನ್ನೆ ||

|| ಬೀಸ್ಮೆ ಸಿಸುಪಾಲೆ ಪುಟ್ವೊನ ಕತೆನ್ ಪನ್ನೆ ||

ಸುರುತ ಜಲ್ಲೊಡು ಕನಕ ಕಸ್ಸಿಪು
ಇರುವೊಡು ರಾವಣೆನೆ ಇತ್ತೆದ
ಜಲುಮೊಡಿಂಬೈನೆ ಪುಟ್ಟಿ ಚೇದಿದ ಅರಸು ಮಗೆ ಆದ್ ||
ಪೆದ್‌ನ ಬಾಲೆಗ್ ಕಣ್ಣೆ ಮುಂಡೊಡು
ಕಯಿಕುಲಿತ್ತೊನೆ ನಾಲ್ ಇಂಬೈಗ್
ಜನುಮೊ ಆಯಿನ ಸಾತ್‌ಗರಬಯಿ ಕೊರ್ದು ಬುಲ್ಬೆದೆನೆ ||

1

ಬಾಲೆದರಬಯಿ ಕೇನ್ದ ಜನೊಕುಲು
ಊರುಗೇ ಗಂಡಾಂತ್ರೊ ಪನ್ನಗ
ನಾರದಾ ರುಸಿ ತೂದು ಬಾಲೆನ್ ಪಂಡೆರಪ್ಪೆಡನೆ ||
ಏರ್ ಈ ಬಾಲೆನ್‌ಲ ಪತ್ತೆನ-
ಗಾಪಗನೆ ಈ ಕಣ್ಣೆ ಕೈಕುಲು
ಮಾಜಿಯೊಡ ಆಯಿನೆಲ ಇಂಬೈನ್ ಕೆರ್ಪುನಯೆ ಪನ್ದ್ ||

2

ನಾರದೆರ್ ಅಲ್ಪಡ್‌ದ್ ಪೋಯೆರ್
ಈ ವಿಚಿತ್ರೊದ ಬಾಲೆ ಎಂಚಿನ
ತೂವೊಡುಂದುದು ಊರುದೂರುದ ಅರಸುನಾಕ್‌ಲೆ ||
ತೂದು ಬಾಲೆನ್ ಪತ್ತೆದಾನಗ
ಮಾಜಿಜಿಲ ಬಾಲೆದವೆ ಮುಂಡೊಡು
ತೋಜಿನಾ ಉರಿಗಣ್ಣೆ ಕೈಕುಲು ನಾಲ್ ಇತ್ತೆನವೆ ||

3

ಬಾಲೆದಪ್ಪೆನೆ ನಮ್ಮ ಕ್ರಿಷ್ಟಗ್
ಮಾಮಿ ಆಲೇ ಪೆದ್‌ನ ಬಾಲೆನ್
ತೂವೊಡುಂದುದು ಬತ್ತೆನೇ ದಮಗೋಸನರಮನೆಗ್ ||
ತನ್ನ ಮರ್ಮಯ ಕೈಕ್ ಇಂಬೈನ
ಅಪ್ಪೆ ಕೊರ್ನಗ ನಾಲ್ ಕೈಕುಲು
ಕಣ್ಣೆಲಾ ಮಾಜಿನೆನ್ ತೂನಗ ಬಾರಿ ಪೋಡಿಗೆಡ್ ||

4

ಮರ್ಮಯನ ಕಾರ್ಗಡ್ಲೊ ಬೂರೈಲ್
ಎನ್ನ ಬಾಲೆನ್ ಒರಿಪುನರಿಪುನ
ನಿನ್ನವೇ ಕೊಸಿ ಪನ್ದ್ ಬುಲ್ಬಲ್ ಕ್ರಿಷ್ಟನೆದುರೆದುರು ||

ಮಾಮಿ ಈರೆನ ಮಗನ ತಪ್ಪನು
ನೂದು ಆಯ್ಕೆಟಯಾನ್ ತಡವೆಂ-
ದಾಯೆ ದ್ವಾರಕೆದೂರು ಪೋಯೆನೆ ಅಸುರ ಮರ್ದನೆನೆ ||

5

ಬೀಮ ಕೇನ್ಲ ಇಂಬ್ಯ ಮರಣೊಗು
ಏರ್ ಕಾರಣೊ ಈಯೊ ಕ್ರಿಷ್ಟೆನೊ
ಬೀಸ್ಮೆ ಪನ್ನುನ ಕೇನ್ಲಾ ಸಿಸುಪಾಲೆ ಕೋಪೊಡುಲ ||
ದಾನೆ ಪಂಡಯ ಜಬ್ಬ ಎನ್ನನ್
ಗೋವಳಿನೊ ಕೆರ್ಪುನಯೆ ಇಂಬ್ಯಡ
ಯಾನೆ ಸೈಪುನ ಜನನೊ ಸಿವ ಸಿವ ಓ ಮಹಾದೇವ ||

6

ಇತ್ತೆ ಬೀಮನ ಜೀವೊ ಕಾಪುನ
ಸಕ್ತಿ ಏರೆಗ್ ಉಂಡು ನಿಕ್ಕೋ
ಅತ್ತ ಕ್ರಿಷ್ಟಗೊ ಪನ್ನ ಕುರುಕುಲೊ ಲಗಡಿ ದೆತ್ತನಯ ||
ಗೊಲ್ಲ ಗೋಪೆರೆ ಕತೆ ಪುರಾಣೊನ್
ಬುಡ್ಡ ಬುಡ್ಡದ್ ಪನ್ದ ಕ್ರಿಷ್ಟನ್
ಮಲ್ಲ ದೈವೊನೆ ಪನ್ದ ತೆರಿಪಯ ರಾಜ ರಾಜೆರೆಗ್ ||

7

ಮಲ್ಲ ಯಾಗೊನೆ ಉಂದು ನೆಕ್ಕಲ
ಅಗ್ಗ ಪೂಜೆಗ್ ಕ್ರಿಷ್ಟೆ ಪುಗರುನ
ಬಟ್ಟೆ ಈ ಮುದಿ ಬೀಸ್ಮೆ ಕೂಡ್ಯೆರ್ ಟಕ್ಕ ಸನ್ನೆಸಿಲು ||
ಪೊಯ್ಯೆದೂರುಗು ಒಂಟೆ ರಾಜೆನೆ
ಕಕ್ಕೆ ಕುದ್ದೆರ್ ಮಂತ್ರಿಯಾಯಿನ
ಲೆಕ್ಕೊ ಪಾಂಡುನ ಜೋಕ್ಕು ಮಲ್ತನ ಯಾಗೊ ಆಂಡಿತ್ತೆ ||

8

ಧರ್ಮ ಸಾಸ್ತೊನು ಪನ್ನ ಏತ್ಲ
ಪೋಣ್ಣ ಅಂಬೆನ್ ರಟ್ಟಯಿನ ನಿಜೊ
ಗುಟ್ಟುಡಿಯೇ ನಟ್ಟ ತಿರ್ಗಯ ಮದಿಮೆ ಆವಂದೆ ||
ಮೀನ್ದ ಬೋಂಟೆಗ್ ಕೊಂಗು ಪಕ್ಕಿಲು
ನೀರ್ದ ಬರಿಟೇ ಒಂಟೆ ಕಾರ್ಡ್
ತಾಂಗ್‌ದುಂತ್‌ನ ತೂದು ಪಕ್ಕಿಲು ಮಾತ ಪುಗರಿಯೊನೆ ||

9

ತಪಸ್ ಮಲ್ಪುನೆ ಕೊಂಗು ಪಂಡ್‌ದ್
ನಿಲ್‌ಕ್ ತೂನಗ ತಿಕ್ಕಿ ಮೀನ್‌ನ್

ಕೊಡತ್ ನಿಂಗುನ ತೂದು ಪಕ್ಕಿಲು ರಾಯೊನಲ್ಪಡ್‌ದ್ ||
ಅರಸುನಕ್‌ಲೆಗ್ ನಿನ್ನ ಕೊಂಗುಡ
ಸುಬವೊ ತೆರಿಯಂದಿತ್ತೆ ಸೇರ್‌ದ್
ಮುಲುಪ ಯಾನೇ ನಿನ್ನ ಸುಬವೊನು ಸಬೆಕ್ ತೆರಿಪಾವೆ ||

10

ಏತೊ ಕಾಲೊದ ಪರಬೆ ಬ್ರಮ್ಮಾ-
ಚಾರಿ ಸಾಸ್ತೊನು ಕಲ್ತನಾಯೆನೆ
ಗೋಪೆರಾಣನ್ ಪುಗರ್ ಪುಗರ್‌ದ್ ರಾಜ ರಾಜೆರೆನ ||
ಮಾನೊ ಮರ್ಯದಿ ಪೂರ ಕಳೆಯಿನ
ಮೂಜಿ ಕಾಸ್‌ದ ನಾಯಿ ಪಂಡ್‌ದ್
ಬೀಸ್ಮನೇತ್‌ಲ ನೆರ್‌ದ್ ಚೈದೈನೆ ಮೀಸೆ ನೀಸೊಂಡೆ ||

11

ಹಿರಿಯೆರೆನ್ ತೂವೊಂದು ಪೀಟೊನು
ಕೊರಿಯೆರೆಗ್ ಸಹದೇವಡಿತ್ತೆನೆ
ಪನಿಯೆರೆಗ್ ನಿನ ನಾಲಯಿಡ್ ಪುರಿಯಾದ್ ಕುರಿದುಂಡೊ ||
ಮುನಿಕುಲುಲ್ಲೆರ್ ಮೂಲು ಜೈಮುನಿ
ಬ್ರಗು ಪರಾಸೆರ್‌ವೇದ ವ್ಯಾಸೆರ್
ಅಕ್‌ಲೆಡಿತ್ತನ ಏಗಿತೊನು ತೂಯಿಜನೆ ಮುದಿ ಮರ್ದ ||

12

ಕುರುಕುಲೇಸ್ವರೆ ಪನ್ನ ಕೌರವೆ
ಒಯಿಟ್ ಕಮ್ಮಿಯ ಅರಸು ಬಾಹ್ಲಿಕೆ
ಕೃಪೆರ್ ದ್ರೋಣೆರ್ ಗುರುಕುಲತ್ತೊಯ ಪೂಜೆ ಕೈಕೊಂದು |
ತರೆಕ್ ಕೈ ದೀಡಯೆರೊ ಗುರುಮಗೆ
ಸಿವನ ಸಗ್ತಿನ ಪಡೆಯಿನಾಯೆನೆ
ಅದಿರತನ ಸಾಂಕನೊದ ಮಗೆನೇ ದಾನೊ ಸೂರೆತ್ತೊ ||

13

ಕುಲೊಟು ಸೌರೊಡು ಸೀಲೊದಾ ಗುಣೊ
ಕುಲೆಡ್ ಪುದರ್‌ಡ್ ಸುದ್ದೊದಾಚಾ-
ರೊದವೆ ರಾಜೆರ್ ಮಾತ ಕಲೆಕುಲೆ ಸಾಸ್ತೊ ಸಂಗತಿನೆ ||
ತೆರಿನಕ್‌ಲ್ ಕುಲ್ಲೊಂದು ಇತ್ತನ
ಸಬೆಟ್ ಸೂಳೆಲೆ ಮೇಳೊದಾಯನ್
ಪುಗರುನಯೆ ನಿಜೊ ಸಾಪೊ ತಿಕ್ಕನ ಗಂಗೆ ಮಗೆನತ್ತೊ ||

14

ತನ್ನ ಅಪ್ಪೆನ್ ದೂರು ನೆರ್ಪುನ
ದುಸ್ಸನಾ ಪಾತೆರೊಡು ಬೀಸ್ಮನ

ನೆತ್ತಿಗೇರ್‌ದ್ ಕೋಪೊಡಾಪಗ ಪಂಡೆ ನಡಪುಂದು ||
 ಕ್ರಿಷ್ಟ ಮಯಿಮೆನ್ ಕೇನೈರಾಯ್ಡಿಡ
 ನಿನ್ನಕ್‌ಲ್ ಮಾತೆಲ್ ಪಿದಡ್‌ಲೆ
 ಬೊಬ್ಬೆ ಹಾಕ್ಯರ್‌ಡೇನ್ ಮುಲ್ಲಡಿತ್ತೆ ನೂಕುವೆನೆ ||

15

ದುಸ್ವನೊಟ್ಟುಗು ಸೇರ್ನ್ ರಾಚೆರ್
 ಬುದ್ಧಿ ಹೀನೆರ್ ಮಾತೆ ಲಕ್ಕಡ್
 ಬೊಬ್ಬೆ ಪಾಡ್ಯರ್ ಕಡಲ ಮೋದೊದಲೆಕೊನೆ ಒರಿಯೊರಿಯೆ
 ಯಜ್ಞೊ ಕುಂಡೊಗು ನೀರ್‌ನೆರ್‌ಕಲೆ
 ಬೀಸ್ಮನಾಲಿನ್ ತುಂಡು ಮಲ್ಲುಲೆ
 ನೆತ್ತೆರ್‌ನ್ ಒಡ್ಡಾಲೆ ಮಾಸೊನು ತಿನಡ್ ಸಾಕಿನಿಲು ||

16

ಬಾಯಿ ಬಡಿಯರೊಡಿತ್ತೆ ನಿಕ್‌ಲೆನ
 ಸಾದನೆಲು ಆಯ್ವಿಡನೆ ಬೀದಿದ
 ನಾಯಿ ಕೊರತೆನ ಲೆಕೊನೆ ಪಂಡ್‌ದ್ ಬೀಸ್ಮೆನುದುರುಂತ್ಯೆ ||
 ಆದಿ ನಾರಾಯಣೆನೆ ಪಂಡ್‌ದ್
 ಸ್ವಾಮಿ ಕ್ರಿಷ್ಟನ ಪಾದೊ ಪೂಜೆಗ್
 ಪೀಟೊಗೇರ್‌ಸಯೆರೆನೆ ಪಂಡ್‌ನೆ ಪೋಲೆ ಆಯ್ವಿಡನೆ ||

17

ಎನಡ ತೂವೊಡು ಪನ್ನಿನಾಸೆನೆ
 ನಿಕ್‌ಲೆಗುಂಡುಡ ಪತ್ತಿ ಆಯುದೊ
 ಮುರಹರನ್ ನೆರ್ಯೆಡ ರಟ್ಟವೆ ತರೆನ್ ಕಂಡಿತೊನೆ ||
 ನಿನ್ನ ಪಿರಯೊದ ಗೂಮೆ ಸೂರೈನ
 ಬೊಲ್ವು ತೂಪುನೆ ಎಂಚ ಉಂತುಲ
 ಕ್ರಿಷ್ಟನೊಟ್ಟುಗು ನಿನ್ನನ್‌ಲ ಸೂಕೇನ್ ಪಾಡುವೆನೆ ||

18

ಜಪ್ಪುಲಯ ಪೀಟೊಡುದು ಕ್ರಿಷ್ಟೊ
 ಒಯ್ತ್ ಪಾಡುವೆ ನಿನ್ನನಿತ್ತೆನೆ
 ಯಜ್ಞೊ ಕುಂಡೊಗು ಹೋಮೊ ಮಲ್ತ್‌ದ್ ಬುಕ್ಕೊ ಬೀಸ್ಮೆನ್‌ಲ ||
 ಕೆರ್ಡ್ ಪಾಂಡುನ ಬಾಲೆಲೆನ ತರೆ
 ರಟ್ಟವೆನೆ ಪಂಡೊಂದು ಚೈದೈನೆ
 ಅಟ್ಟಸ್‌ಡ್ ದೊಂಪೊಡುದು ಪಿದಡ್‌ದ್ ಲೆತ್ತೆ ರಾಚೆರೆನ್ ||

19

ಎನ್ನಕ್‌ಲೆ ಬಲೆ ಪಿದಯಿ ವೈರಿಲೆ
 ಬೆಚ್ಚ ನೆತ್ತೆರ್ ಪರ್ಡ್ ನಲಿಪುನೆ-

ನಿತ್ತೆ ತೋಜವೆ ಸಾಕಿನೀ ಗಣೊಕುಲೆನ ಸಂತೊಸುನು ||
 ಲೆಪ್ಪುಲೆಯ ಗೋವಳನ್ ಲೋಕೊದ
 ರಚ್ಚಕನ್ ಪಾಂಡವೆರೆ ದೈವೊನು
 ಲೆಪ್ಪಿ ಲೆಪ್ಪಿಂದಾಯೆ ನುರ್ಕಿಯೆ ಲಡಯಿದಮಸರೊಡು ||

20

ಯಾದವೆರ್ ತಯರಾದ್ ಉಂತ್ಯೆರ್
 ಬೀಮನಾಚ್ಚೆಡ್ ನಾಲ್ ರಂಗೊದ
 ಸೇನೆ ತಯರ್‌ಡ್ ಬತ್ತದಾಂಡ್‌ಲ ಗೌಜಿ ಲಕ್ಕಾದ್ ||
 ಪಾರ್ತೆಲಾಗಿಯೆ ಮಾದ್ರಿ ಜೋಕುಲು
 ಬಾಣೊಲೆನ್ ಮೂಡಿಗೇಡ್ ದಿಂಜದ್
 ಕಾಳಗೊಗು ಪಿದಡ್‌ನಗ ಧರ್ಮಜೆ ತೂಯೆ ಸಿರಿಹರಿನ್ ||

|| ಸಿಸುಪಾಲ ವದೆ ||

ಧರ್ಮನಂದನ ದೈರೊ ಮಲ್ಲೊನು
 ಕುಲ್ಲುಲೆಯ ಯಾದವೆರ್ ಮನಿಪಡೆ
 ಯುದ್ಧೊದಾತುರೊ ಬುಡ್ಲೆ ಗಡಿಬಿಡಿ ಬೊಡ್ಡಿ ಪಾಂಡವೆರೆ ||
 ದುಸ್ವ ಸಿಕ್ಕೆದ ಬರ್ಮುಡೇ ಸಿರಿ-
 ಕ್ರಿಷ್ಟೆ ಪೀಟೊನು ಬುಡುದು ಜತ್ತೆನೆ
 ಅಡ್ಲೊ ಬೂರೈರ್ ಮುನಿಕುಲಾಯಗ್ ಜಯೊ ಜಯೊಂದುದುಲ ||

1

ಆನಿ ಈ ಸಿಸುಪಾಲನಪ್ಪೆಡ
 ನೂದು ತಪ್ಪುಲೆ ಮಾಪಿ ಮಲ್ಲುವೆ
 ಈರೆ ಮಗನವೆ ಪಂಡ್‌ದೇನ್‌ಲ ಬಾಸೆ ಕೊರೈಟ್ ||
 ಈತ್ ನೆರಡೆನ್ ಕೇನ್ನಗೆಂಕಲ
 ದಾಲ ಪಗೆ ತೋಜಂದೆ ಉಪ್ಪುನ-
 ಗೇನ್ ತಡೆಯೆರೆ ತೀರಂದಿತ್ತನ ರಡ್ಡ್ ತಪ್ಪುಲೆನ್ ||

2

ಮಾಪಿ ಮಲ್ಲೆರೆ ಆವಂದಿತ್ತನ
 ಯಾಗೊನುಂತವೆ ಪಂಡ್‌ನೊಂಜಿಲ
 ಪಾಂಡು ಬಾಲ್ಗೆನ್ ಕೆರೈ ಪಂಡ್‌ನ ತಪ್ಪು ಬುಕ್ಕೊಂಜಿ||
 ರಡ್ಡ್ ತಪ್ಪುಲೆಗೇನ್ ಕ್ಷಮೆನೇ
 ಕೊರೈನಯೆ ಅತ್ತಂದ್ ಮುನಿಕುಲೆ-
 ಗಲ್ಲ ದೈರೊನು ಪಂಡೊನುಂದೇ ಕ್ರಿಷ್ಟೆ ತಯರಾಯೆ ||

3

ದತ್ತ ಬಲತ್‌ಡ್ ಯಾದವೆರ್ ಸರಿ-
ಟಲ್ಟ ಉಂತ್ಯೆರ್ ಪಾಂಡು ಬಾಲೆಲು
ಬಿಲ್ಲ್ ಬಾಣೊನು ಪತ್ತದುಂತ್ಯೆರ್ ಲಡಯಿದಬ್ಬರೊಡು ||
ದುಸ್ಪ ರಾಜೆರೆ ಕೂಟೊ ಸೇನೆದ
ಅಬ್ಬರೊನು ತೂನಗನೆ ತಿಗಲೆಡ್
ಸೌದೊ ಲಕ್ಯೆರೆಗಾಂಡ್ ಪೋಡಿಗಡಕ್‌ಲ್ ನಡ್ಡಿಯೆರ್ ||

4

ಕುರುಡ ಮಗೆ ಪಾರಿಯೆನೆ ಪಾಂಡವ-
ನಕ್‌ಲ್ ಬಂದುಲು ಪಂಡೊನುಂದೇ
ಒರಿನ ವೀರೆರ್ ಕೌರವನ್ ನಾಡೊಂದು ಪಿದಡಿಯೆರ್ ||
ಕಲಿ ಜಯದ್ರತೆ ಮಾದ್ರ ಪತಿ ಸೌ-
ಬಲೆ ಕಳಿಂಗೆ ಕರೂಸೆ ಮಾತೆರ್
ಪೆರಪ ತಿಗ್ಗೈರ್ ಬಾಕಿ ಬಗದತ್ತಾದಿ ನಾಯಕೆರ್ ||

5

ಜಾರಿಯೆರ್ ಮಾತೆರ್ಲ ಪುಕ್ಕೆರ್
ಜಾರೊನಡ್ ಯಾನುಲ್ಲೆ ಪೋಡ್ಯೆಯೆ
ಈ ಕಳುವನೆದುರುಂತ್ಯೆರೆಗ್ ಯಾನೊರಿಯೆ ಯಾವಂದೊ |
ಬಾಣೊರಾಪಯೆ ಚೈದ್ಯೆ ಕ್ರಿಷ್ಣಗ್
ಆ ಮುರಾಂತಕೆ ತುಂಡು ರಟ್ಟಿಯೆ
ತಾನ್‌ಲಾ ಒಂಜಸ್ತೊ ಬುಡಿಯೆನೆ ಚೈದ್ಯಗಾಪಗನೆ ||

6

ಕ್ರಿಷ್ಣೆ ಬುಡ್ಡೆನ್ ಚೈದ್ಯೆ ತಲ್ಲುವೆ
ಚೈದ್ಯೆ ಬುಡ್ಡೆನ್ ಕ್ರಿಷ್ಣೆ ತಲ್ಲುವೆ
ಬುಡ್ಡುನವು ತಲ್ಲುನವು ಏತಲ್ ಸರ್ತಿ ಆಂಡಪಗ||
ಕ್ರಿಷ್ಣೆ ಸೋಲೆನೆ ಪನ್ದ ಚೈದ್ಯೆನ
ಒಟ್ಟುಗಿತ್ತನವಕ್‌ಲ್ ಪನ್ನಗ
ಚೈದ್ಯೆ ಸೋಲೆನೆ ಪನ್ದ ಯಾದವನಕ್‌ಲೆ ಮಹ ಬೊಬ್ಬೆ ||

7

ರಾವಣೆನೆ ಆದಿತ್ತನಾಯೆನೆ
ಮೂಜನೆದ ಈ ಜಲೊ ಪಡೆಯಿನ
ವೀರೆನೇ ಸಿಸುಪಾಲೆ ಪಂಡ್‌ಡ್ ದೇವ ದೇವತೆಲು ||
ವಾಸುದೇವನೆ ಲಡಯಿ ಮಲ್ಲುನ
ತೂಯೆರೆಗ್ ಸಾಲಾದ್ ಉಂತ್ಯೆರ್
ಬಾನೊಡೊರೆಲ ಆಕ್‌ಲಾಕ್‌ಲೆನಾ ವಿಮಾನೊಲೆಡ್ ||

8

ಕ್ರಿಷ್ಣ ಸಿಸುಪಾಲೆರೆನ ಯುದ್ಡೊಡು
ಲಕ್ಯೆನೆನೆ ಸೂ ಬೂಮಿಡಾಪಗ
ದಿಕ್ಕ್ ದಿಕ್ಕ್‌ಡ್ ಪುಗೆನೆ ದಿಂಜಿದ್ ಬಾನೊ ಕಪ್ಪಾಂಡ್ ||
ಮೂಡ್ಡು ತೋಜಿಯೊ ದೂಮ ಕೇತುಲು
ನುಕ್ಯೆ ಸೂರ್ಯನ ಮಂಡಲೊಗುಲಾ
ದುಸ್ಪೆ ಆಯಿನ ರಾವು ನಿಂಗೈರೆ ಎಂಚಿನದ್ಬುತೊನೊ||

9

ನಡ್‌ಗದಾಂಡ್‌ಲ ಬೂಮಿಯಾಪಗ
ತೆಡಿಲ್ ಮುಟ್ಟುದು ಪಗೆಲ್ ದಾರೆಗೆ
ನೆಲಕ್ ಬೂರಿಯೊ ನೆತ್ತೆರ್‌ದವೇ ಬರ್ಸೊ ಬೂದಾರ್‌ಡ್ ||
ತೆಗ್‌ಲ್‌ದಿತ್ತನ ಮರನೆ ನುಂಗುದು
ಸಯಿತಿ ಮರನೇ ತೆಗ್‌ಲ್‌ದಾಂಡ್‌ಲ
ಕಿರೆತ ನೀರಾಜೊಂದು ಆಜಿನ ಕಿರೆನೆ ತಮೆಲ್‌ನಗ ||

10

ಆ ಯುದ್ಧಿರೆ ಪೋಡಿಯೊಂದೇ
ನಾರದೆರೆ ಕೈತಡೆಗ್ ಪೋದುಲ
ಕೇನುವೆನೆ ಈ ಪ್ರಕೃತಿ ಅಡಿಮೇಲಾಪುನೆನೆ ದಾಯೆ ||
ವೀರ ಚೈದ್ಯಾದಿಗುಳು ಸೈಪ್ಪುನ
ಸೂಚನೆನ್ ಹರಿ ಇಂಚಿ ಗೊಬ್ಬುಡು
ತೋಜವುನೆ ನಂಕ್‌ಂದ್ ಪಂಡರ್ ನಾರದಾಮುನಿಯೆ ||

11

ನಮುನೆ ನಮುನೆದ ಬಾಣೊ ಬುಡ್ಡುನ
ತಲಿಪುನವು ನೆರುನವು ತೇರ್‌ನ್
ಪೊಡಿಯೆ ರಟ್ಟವಿ ಬಿರುತ ವಿದ್ಯೆಡ್ ಮೇಲ್ ಮೇಲಾದ್ ||
ಆ ದುರಾತ್ಮನ್ ಕೆರಿ ಮನಸ್‌ಡ್
ವಾಸುದೇವನೆ ಪತ್ತದುಂತಿಯೆ
ಬಾರಿ ಸಗ್ಗಿದ ಮೂಜಿ ಮೂರ್ತಿಲೆನಾತೊ ಚಕ್ರೊನುಲ ||

12

ಚಕ್ರೊಗಪ್ಪಣೆ ಕೊರ್ದುಲಾನಗ
ಸೂರ್ಯ ಪ್ರಬೆಟೇ ಆ ಸುದರ್ಸನೊ
ತಿರ್ಗ್ ತಿರ್ಗ್‌ಡ್ ಬನ್ನಗಾಪಗ ಊರೆ ಬೊಲ್ಪಾಂಡ್ ||
ಕಣ್ಣ ಮೆಂಚಿಲ ರಟ್ಟುನಂಚಿನೆ
ಬತ್ತದಾ ಸಿಸುಪಾಲ ನಾಲಿನೆ
ಕಡ್ ರಟ್ಟದ್ ಕ್ರಿಷ್ಣ ಸ್ವಾಮಿನ ಕೈಟ್ ಉಂತ್‌ನವೆ ||

13

ಪೊರ್ಲು ತೂಯೆರ್ ದೇವ ದೇವತೆ-
ಲಲ್ ಬಾನೊಡು ಉಂತ್‌ನಾಕ್‌ಲ್
ಪುಸ್ತೊದಾ ಸಿರಿ ಬಸೊ ಜಪುಡಯೆರಪಗ ಹರಿತರೆಕ್ ||
ಚೈದ್ಯ ಕಡೆತಕ್‌ಲೊಟ್ಟು ಬುಲ್ತೆರ್
ಕ್ರಿಷ್ಟ ಕೈ ತಡೆ ಪಾಂಡವೆರ್‌ಲಾ
ಬತ್ತಾದುಂತ್ಯೆರ್ ಹರಿನ ಕೀರ್ತನೆನೇತೊ ಮಲ್ತೊಂದು ||

14

ಮುರೊಡುನ ಸಿಸುಪಾಲ ಬಾಲೆಲು
ಕ್ರಿಷ್ಟ ಕಾರ್‌ಗ್ ಬೂರು ಬುಲ್ತೆರ್
ಚೈದ್ಯ ಪುಣ ಪೊತ್ತಾವಿ ಕಾರ್ಯೊನು ಮಲ್ಪದಕ್‌ಲೆಡನೆ||
ಚತ್ತಿ ಜಾತಿದ ಅರಸುಲೇಪೊಲ
ರಕ್ತಸೆರೆ ಸುಬವೊಲೆನ್ ಬುಡಿಯೆರ್-
ಡೆಡ್ಡೆ ಪಂಡ್‌ದ್ ತೆರಿಪಯೆನೆ ಸಿರಿ ಕ್ರಿಷ್ಟೆ ಮುರಹರನೆ ||

|| ರಾಜಸೂಯೊದ ಪೂರ್ಣಾವುತಿ ||

ಲಡಯಿ ಗಡಿಬಿಡಿ ಮಾತ ಉಂತುದು
ಅರಸುನಾಕ್‌ಲ್ ಯಾಗೊ ಸಾಲೆದ
ಉಲಯಿ ಕುಲೈರ್ ಯಚ್ಚೊ ಕಾರ್ಯೊಲು ಮಾತ ಸುರುವಾಂಡ್ ||
ವೇದೊ ಮಂತ್ರೊಡು ಯಚ್ಚೊಗಾವುತಿ-
ವೇದೊ ವಂದ್ಯನ ಎದುರು ಮಲ್ತೆರ್
ವೇದವ್ಯಾಸೆರ್ ಮಾತ ರುಸಿಕುಲು ಸುತ್ತ ಕುಲ್ಲೊಂದು ||

1

ದಾರೆ ಕಟ್ಟದ್ ನೆಯಿನ್ ಕುಂಡೊಗು
ವೇದೊ ಮಂತ್ರೊಡು ಮಯ್ಯುನಾಪಗ
ಸೂವು ಲಕ್ಶದ್ ಪುಗನೆ ಅಲಸ್‌ದ್ ಸಬೆನೆ ತೋಜಂದ್||
ಸಾಸ್ತೊ ರೀತಿದ ಪೂರ್ಣೊದಾವುತಿ
ಆನಗನೆ ಮಹ ಮಂತ್ರೊ ಗೌಜಿಲ
ಓಮೊದಗ್ಗಿದ ಪುಗಲ ದಿಂಜಿದ್ ಆಂಡ್ ಊರೊರೆ ||

2

ಯಾಗೊ ಪೂರ್ತಿದ ಪುಣ್ಯೊ ಸೀರ್ತೊಡು
ಮೀಪುನರಸುನ ಒಟ್ಟುಗೇತೆಲ್
ರಾಜೆರೋಕುಳಿ ಗೊಬ್ಬು ಗೊಬ್ಬುದು ಮಾತ ಬಚ್ಚಿಯೆರ್||

ಆಕ್‌ಲಾಕ್‌ಲೆ ಜಾತಿದಮೊಗು
ಬೇತೆ ಬೇತೆನೆ ಪಂತ್ಯೆ ಪಾಡ್ಯೆರ್
ಮಾತೆರುಣಿಯೆರೆ ಲಕ್ಕೊಡುಂದುದು ಸಂಕೊನುರಿಪಯೆರ್ ||

3

ಒಣಸ್‌ದಡಿಗೇದ ರಾಸಿ ತೂನಗ
ಪರುವತೊದ ಲೆಕೊ ತೋಜಿದೊಂಜೇ
ಗಳಿಗಡವು ಮಾಯಕೊನೆ ನೆಯಿತವೆ ಸಾಗರಾಂಡವುಲು||
ನಿಲ್‌ಕ್ ತೂನಗ ಆಜಿದುಪ್ಪುನೆ
ಪೆರಪ ದಿಂಜುನೆ ನಿಮಿಸೊ ಕರಿನಗ
ಅರಸು ಧರ್ಮಜೆ ಒಣಸ್ ಮಲ್ಪಯೆ ಸೇರ್ನ್ ಮಾತೆರೆನ್ ||

4

ಏತ್ ಜನೊಕುಲು ಉಂಡೆರಂದ್‌ದ್
ಮಾತೆರೆನ್ ಸರಿ ಲೆಕ್ಕೊ ಮಲ್ತೆರೆ
ತೀರ್‌ಜಿಂದ್‌ದ್ ಕೋಟಿ ಸಂಕ್ಯೆಡ್ ಪಂಡೆರಂದಾಜಿ ||
ಮಾತೆರೆಗ್ ಕೈ ಮುಗಿದ್ ಮುನಿಕುಲೆ
ಕಾರ್‌ಪತ್ತದ್ ಪಂಡೆ ಧರ್ಮಜೆ
ದಾನೆ ಆಂಡಲ ತಪ್ಪು ಆಯ್ಕೆನ್ ಮಾಪಿ ಮಲ್ಪಿಂದ್ ||

5

ತನ್‌ಕ್ ತೆರಿಲೆಕೊ ಮನ್ನಿತೊಂದೇ
ರುಸಿಕುಲೆಗ್ ಬ್ರಾಣೆರೆಗ್ ಉಡಿಗಿರೆ
ಕೊರಿಯೆ ಬಂಗರ್ ಮುತ್ತು ರತ್ನೊನು ಬೊರಿಪಿ ಗೋವುಲೆನ್||
ಮುನಿಕುಲಾಸ್ರಮೊದಾಡೆ ಬೆರಣೆರ್
ಪಿದಡಿಯೆರ್ ಸರಿ ವೇದೊ ಮಂತ್ರೊಡು
ಅರಸುಗಾಸೀರ್ವಾದೊ ಮಲ್ತದ್ ಬಾರಿ ಪುಗರೊಂದು ||

6

ಅರಸುನಕುಲೆನ್ ರಾಜ ಮರ್ಮದಿ-
ಡಕ್‌ಲೆ ಸೇನೆಗ್ ಸಾನ್ ಮಲ್ತದ್
ಕಡಪುಡಿಯೆ ಮಾತೆರೆನ್ ಪ್ರೀತಿಡ್ ಪೊರ್ಲು ಪಾತೆರ್‌ದ್ ||
ಪಿದಡ್‌ನಗ ಮಾತೆರ್‌ಲ ಪಾಂಡುನ
ಮಗನೆ ಆದೇ ಮಲ್ಪೊಡಾಯಿನ
ಕೆಲಸೊ ಮಲ್ಪಯೆ ಪನ್ದ ಪುಗರ್‌ದ್ ಪೋಯೆರಕ್‌ಲೊಟ್ಟು ||

7

ಧರ್ಮಜನ ಮೆಗ್ಯಲ್ಲು ಬತ್ತನ
ಪೊದ್ದೆರೆನ್ ಬಂದುಲೆನ್ ಇಸ್ಪೆರ್

ಮಿತ್ರನಕ್‌ಲೆನ್ ಪೂರ ಕಡಪುಡುದಕ್‌ಲ್ ಅರಮನೆಗ್ ||

ಬತ್ತನಾಕ್‌ಲ್ ಪಲಯನೊಟ್ಟಿಗೆ

ಕ್ರಿಷ್ಣ ಕೈತಲ್ ಉಂತ್ಯೆರಾಡೆಗ್

ಎತ್ತಿಯೆರ್ ದ್ರೌಪದಿನ ಒಟ್ಟಿಗೆ ಕುಂತಿ ಸೌಬದ್ರೆ ||

8

ರಾಜ ಸೂಯೊದ ಯಾಗೊ ಮಲ್ಪದ್

ಪಾಂಡು ರಾಜಗ್ ಸೊರ್ಗೊಡೇ ಸರಿ

ಸ್ತಾನೊ ತಿಕ್ಕುನ ಸಾದಿಮಲ್ತರ್ ಬಾಲೆಲೈವೆರ್‌ಲ ||

ವಾಸುದೇವನೆ ಪುಗರ್‌ನಾಪಗ

ಮಾತೆರ್‌ಲ ಕಾರ್ಗಡ್ಡೊ ಬೂರುದು

ದೇವ ನಿನ್ನವೆ ದಯೊಟು ಆಯಿನೆ ಇಂಚಿ ಮಹಕಾರ್ಯೊ |

9

ಚೈದ್ಯ ಮಾಗದನಕ್‌ಲ್ ಇರ್ಲೆರ್

ದುಸ್ಪೆರೇ ಈ ಯಾಗೊ ನಡೆಪೆರೆ

ಬುಡ್ಡುನಕ್‌ಲತ್ತಂದ್ ಅಕ್‌ಲೆನ ಪುಗೇನ್ ರಾಪಾಯ ||

ಪನ್ನಗನೆ ದ್ರೌಪದಿಲ ಪಂಡಲ್

ಎಲ್ಯ ಬಾಲೆನ್ ಕಾಪೈರೆಂದ್‌ದ್

ವಜ್ರೊ ಕಮ್ಮೊಡು ಮೂಡ್ಡು ಬತ್ತನ ಹರಿಯೆ ನರಸಿಂಗ್ ||

10

ಮೆಗಿದಿ ಮೋನೆನೆ ತೂದು ಕ್ರಿಷ್ಣನೆ

ಪನ್‌ಪೆನಾಲೆಡ ಪ್ರೀತಿ ಬಾವೊಡು

ಪತಿರುತೊತ ಪೊಂಚೊವೆಗ್ ಈ ಗುರು ಕೇನ್ ಮಗಲೆಂದ್ ||

ಸಿರಿಯೆ ದಿಂಜುನ ಬೊಕ್ಕೊ ಆಜುನ

ಸುಬವೊ ಉಂಡುಂದೀಯೆ ತೆರಿಯೊನು

ನೆನೆಪು ದೀಡ್‌ದ್ ಸಿರಿಕ್ ಬೋಡದ್ ಮನಸ್ ಮಾರೊಡ್ಡಿ

11

ಈಶ್ ಪಂಡ್‌ದ್ ಪಾರ್ತ ಬಾಲೆನ್

ತೂದು ದವುಡೆಗ್ ಮುತ್ತೊ ಕೊರ್ದುಲ

ಆ ಸುಬದ್ರೆಡ ಪೋಪೆ ಪಂಡ್‌ದ್ ಕುಂತಿ ದೇವಿನವೆ ||

ಕಾರ್ ಪತ್ತದ್ ಪಾಂಡು ಬಾಲ್ಲೆಡ

ಏತ್‌ಲಾ ಜಾಗ್‌ತೆಡುಪ್ಪಲೆ

ಯಾನ್ ಬೋಡನಗೆತ್ತೆನೆಂದ್‌ದ್ ಪಿದಡ್‌ದುಂತ್‌ನಗ ||

12

ಆ ವಿದೂರತೆ ಸಾಂಬೆನುದ್ದವೆ

ಕಾಮೆ ಸಾತ್ಯಕಿ ದಾರುಕೆಲ ಪಿದ-

ಡ್ಡಾದ್ ತೇರ್‌ದ ಸುತ್ತ ಉಂತ್‌ನಗಪಗ ಸುರುವಾಂಡ್ ||

ವಾದ್ಯೊಡೇ ಸಿರಿ ಹರಿನ ಸುಗಿತೊಲು

ವಾಸುದೇವನೆ ತೇರ್‌ನೇರ್‌ಗ

ಪಾಂಡವೆರ್ ಪಿರವುಡೆನೆ ಪೋಯೆರ್ ಕೈನ್ ಮುಗಿಯೊಂದು ||

13

ಅರಮನೆಗ್ ಪಿರ ಬತ್ತದಾಕ್‌ಲ್

ಅಸುರ ವೈರಿಯೆ ಪೋಯ್ತೆ ಪಂಡ್‌ದ್

ಎಸನೊಡುಪ್ಪುನ ತೂದು ವ್ಯಾಸೆರ್ ಧರ್ಮನಂದನಡ ||

ಹರಿಯೆ ನಿನ್ನನ್ ಮಲ್ತೆ ರಚ್ಚಣೆ

ನೆನೆಪು ದೀವೊನು ವೇದೊ ನೀತಿ

ನಡತೆನೇಪೊಲ ಬುಡಡ ಪಂಡ್‌ದ್ ಪೋಯೆರಲ್ಪಡ್‌ದ್ ||

14

ಕೌರವಾದಿಲು ಪಿದಡ್‌ದುಂತ್ಯೆರ್

ನಾಲ್ ದಿನೊ ಉಂತಿಂದ್ ಒತ್ತಯೊ

ಡೇತೊ ಪನ್ನಗ ನನೊರೊ ಬರ್ಪೊಂದಕ್‌ಲ್ ಪಿದಡಿಯೆರ್ |

ಮಾಯೊಕೊದ ಮಯ ಮಂಟಪೊನು ಸರಿ

ತೂವೊನುಂದೇ ಪಿದಡಿ ಕೌರವ-

ರಾಯೆ ಬಿಂಗಿರಿಯಾದ್ ಕಣ್ಣೆಗ್ ತೋಜಿನಡಿ ಮೇಲ್ ||

15

ನೀರ್ ನೆಲನೇ ನೆಲಲ ನೀರೇ

ಗೋಡೆ ಬಾಕಿಲ್ ಬಾಕಿಲ್‌ಲ ಸರಿ-

ಯಾದ್‌ಲಾಂಜಿನೆ ಗೋಡೆದಂಚಿನೆ ಪರಿತ ಮಚ್ಚರೊಡು ||

ತಾಂಟೈ ಗೋಡೆಗ್ ಬೂರೈ ನೀರ್‌ಗ್

ತೂದು ಪೊಣ್ಣುಲು ತಾತಿ ಬೊಟ್ಟಿರ್

ಪಾಪೊ ಕುರುಡನ ಮಗಕ್ ತೋಜುಜೆ ಪನ್ನ ತೆಲಿತೊಂದು ||

16

ಪರಡ್ ಪರಡ್‌ದ್ ಪಿದಯಿ ಗೆತ್ತದ್

ಮೆಗಿಯನಕ್‌ಲೆನ ಒಟ್ಟು ಸೇರಿಯೆ

ತಿಗಲೆ ಪೊತ್ತುನ ಸೂತ ಏರಿಡ್ ಬತ್ತೆನರಮನೆಗ್ ||

ಕಾಲ ಪಾಸೊದ ಉರು ಕಾಯಿನ

ಕೌರವಗ್‌ಲಾ ಪಾಂಡು ಬಾಲ್ಲೆಡ

ಬಾರಿ ಪಗೆ ಉಂಡಾಂಡ್ ಮನಸ್‌ಡ್ ಪೋಪಿ ಕಾಲೊದವೆ ||

ಮೂಜನೆದ ಸಂದಿ

|| ಸಕುನಿ ತಂತ್ರೊ ||

ಹಸ್ತಿನಾವತಿಗರಸು ಕೌರವೆ
ಬನ್ನಗನೆ ತನ ತರೆಕ್ ಮುಸುಕುನು
ದುಕ್ಕೊಡೇ ಪಾಡೊಂದು ಎತ್ತೆನೆ ಇರ್ಲೆಡರಮನೆಗ್ ||
ಬತ್ತಾನರಸುಗು ಪೋಣ್ಣಲಾರತಿ
ಪತ್ತಾನಕಲೆಗ್ ಎಡ್ಡೆ ಪಾತೆರೊ
ಪನ್ನುನಕಲೆಗ್ ಕಣ್ಣ್ ಮಗ್ತರದಾಯೆ ಪೊಗ್ಗಿಯೆನೆ ||

1

ಸೀದ ಬತ್ತದ್ ಮಂಚಮೊಡು ಗುಡಿ
ಪಾಡ್ಡ್ ಜೆತ್ತೆನೆ ಇಂದ್ರಪ್ರಸ್ತೊಡು
ಆಯಿನವೆ ತನ ಮಾನೊ ಬಂಗೊನು ಪೂರ ನೆನೆತೊಂದು ||
ಬಾನುಮತಿ ಬನ್ನಗಲ ಮುಸುಕುನು
ಪಾಡ್ಡೆನ್ ದೆಪ್ಪಂದೆ ಕಂಕಣೆ
ಬೂರೊನುಂದೇ ಉಸುಲು ಬುಡ್ಡೆದ ಸೇಂಕ್ ಸೇಂಕೊಂದು ||

2

ಇರ್ಲ್ ಬೊಲ್ವಾಂಡಪಗ ಸಂಕೊನು
ಪೋಣ್ಣಲುರಿತ್ದ ಉದಯೊ ರಾಗೊನು
ಪನ್ನಗಲ ಜೆತ್ತನಯೆ ಲಕ್ಕಜೆನಪಗ ಬಾನುಮತಿ ||
ಮೆನ್ರಿಜಲ್ ಪೋಡ್ಕೊಂದು ಕಾಂಡೆನೆ
ಅಗ್ಯೊ ಸೂರ್ಯ್ಗ್ ಕೊಪುನಬ್ಬೆಪೊ
ಇತ್ತನಾಯೆನೆ ದಾನೆ ಲಕ್ಕಜೆ ಪನ್ನಿ ಯೆತೆಟಾಲ್ ||

3

ರಾಜಸೂಯೊಗು ಪೋದು ಮನಸ್ಗ್
ಬೇನೆ ಆಯ್ಕೆಟ್ ಕೌರವೇಸ್ವರ
ಬಾರಿ ದುಕ್ಕೊಡು ಜೆತ್ತದೆಂದ್ ತೆರಿಜಿ ಏರೆಗ್ಲ ||
ದ್ರೋಣ ಬೀಸ್ಮೆರ್ ಬತ್ತೆರಾಡೆಗ್
ಆಂಡಲಾ ಪಾತೆರ್ಜೆ ಲಕ್ಕಜೆ
ಮಾತ ಪಿದಯಿಡೆ ನಿಲ್ಕ ತೂಯೆರ್ ಉಲಯಿ ಪೊಗ್ಗಿಚೆರ್ ||

4

ಬಾನುಮತಿನೊಟ್ಟಿಗೆನೆ ಇತ್ತಾನ
ರಾಣಿ ವಾಸೊದ ಪೋಣ್ಣ ಪೊಂಚೊವು

ಮಾತೆರ್ಲ ಬುಲ್ಕೊಂದು ಕುಲ್ಕೆರ್ ಉನ್ನು ನೀರ್ಪುಡುದು ||
ಕೇರಿ ಕೇರಿಡ್ ಸುದ್ದಿ ಕೇಂಡ್‌ನ
ದಾಲ ಕಸುಬಿದ್ಯಾಂದಿ ಜವನೆರ್
ಬೀಲೊ ಕಟ್ಟೆದ್ ಉದೊ ಮಲ್ತೆರ್ ಸುದ್ದಿನಕ್‌ಲೊಟ್ಟು ||

5

ಪೀಡೆ ಮುರ್ಚೆನೆ ಪನ್ದ ಕೆಲವೆರ್
ತೂತುಜೆಂಕುಲೊ ಪನ್ದ ಕೆಲವೆರ್
ರೋಗೊಡಿಂಚನೆ ಪನ್ದ ಕೆಲವೆರ್ ಇಂಚ ಆಯಿನೆಟ್ ||
ಪ್ರಾಣೊ ಪೋಯೆರೆ ಯಾವು ಇಜ್ಜಿಡ
ವಾತೊ ರೋಗೊಡು ಪುಡೆವೆ ಸೈರೊದ
ಓರೆ ಕೋರೆನೆ ಆಯೆರೆಗ್ ಇಡೆ ಪಂಡೆರೊರಿಯೊರಿಯೆ ||

6

ಮಾತ ಮಂತ್ರಿಲು ಸೇನೆದೊಡಕರ-
ನಾಕ್‌ಲೆಗ್ ಬೇಜಾರೊ ಚಿಂತೆಡ್
ರಾಜಗಿಂಚಾಂಡತ್ತೊ ಪಂಡ್‌ದ್ ದುಕ್ಕೊಡುಪ್ಪನೆನ್ ||
ತೂದು ಕೇಂಡ್‌ದ್ ಸಕುನಿ ಕೌರವ
ರಾಯೆ ಜೆತ್ತನ ಕೋಣೆದುಲಯಿಗ್
ಪೋಯೆರೆಗ್ ಚಾಕಿರಿದ ಜನೊಕುಲೆಡಾಯೆ ತೆರಿಪಾಯೆ ||

7

ಸಕುನಿ ಸಮ್ಮಲೆ ಬತ್ತೆರರಸುಲೆ
ಉಲಯಿ ಬರೊಲಿಯೊ ಪನ್ದ ಕೇಂಡೆರ್
ಕೆಲಸೊದಾಕ್‌ಲ್ ಪನ್ನಗಪಗನೆ ಪಂಡೆ ಬರೈರೆಗ್ ||
ಉಲಯಿ ಪೊಗ್ಗುದು ಕೇಂಡೆನಾಯಡ
ಕುರುಕುಲೇಸಗ್ ದಾಯ್ತ ಕಾಯಿಲೆ
ಮನಸ್‌ಗೋ ನಿನ ಸೈರೊಗೋ ಪನ್ ಗುಟ್ಟು ಮಲ್ಪಂದೆ ||

8

ಓಲುಲಾಂಡಲ ಪೋಣ್ಣ ವಿಸಯೊಡು
ಮಾನೊಗೇ ಪೆಟ್ಟಾಂಡೊ ಕೌರವ
ಜೋಕುಲಾಟಿಗೆ ಬೊಡ್ಡಿ ಪನ್ ಪನ್ ಆಯಿ ಸಂಗತಿನೆ ||
ಮಾಮ ದಾಯೆಗ್ ಇಂಚ ಕೇನ್ವರ್
ರೋಗೊ ಎಂಚಿನ ಎಂಕ್ ಪೋಣ್ಣಲೆ-
ಡೇನ್ ಸೂರ್ಕನ ಕತೆನ್ ಕೇನ್ವರೊ ಈರ್ ಇನಿ ಮುಟ್ಟು ||

9

ಅರಸು ನಿನ್ನವೆ ತಿಗಲೆದುಲಯಿಡ್
ಉರಿಯೆ ಲಕ್ಕರೆ ದಾನೆ ಕಾರಣೊ
ಎನಡ ಪಂಡ್‌ಜಡೇನ್ ಬುಡಯೆನೆ ಪಾಡ್ಲೆ ನಿನ್ನಾಚೊ||
ಯಮನ ಮಗೆನಾ ಧರ್ಮನಂದನ
ಬಿರ್‌ಸತಿಗೆದ್ಯೊಬವೊದ ಸೂವೇ
ತಿಗಲೆಡಲ್‌ದ್ ಪೊತ್ತುದುಪ್ಪನಗೀರ್ ಪಾತೆರಡೆ||

10

ದಾನೆ ಪನ್ಪಯಿ ಅರಸು ಕೌರವ
ಪಾಂಡು ಬಾಲ್ಸಿನ ವೈಬವೊದ ಸೂ
ದಾಯ್ತು ಕಾರಣೊ ಪೊತ್ತುದಲ್ಯೆರೆ ಆ ವಿಚಿತ್ರೊನುಲ ||
ಊರುಡೂರುಡು ಧರ್ಮನಂದನೆ
ಬಾರಿ ಪುದರ್‌ದ ಚಕ್ರವರ್ತಿಯೆ
ಬೀಮ ಪಾರ್ತೆರ್ ವೀರರಂದ್‌ದ್ ಊರ್ಗೆ ತೆರಿದುಂಡು ||

11

ಹಕ್ಕಡಕ್‌ಲೆನ ರಾಜ್ಯೊನಾಳ್ವೆರ್
ನಿಕ್ಕ ಪುರಿಗಂಟೆಂಚಿನವು ಪನ್
ನಿನ್ನ ನಂಜಿದ ಹಾಲ್ ಬುದ್ದಿನ್ ಅಕ್‌ಲ್ ತೆರಿಯಯೆರ್||
ಮಲ್ಲ ಮಾನ್ಯತೆ ಪಡೆದ್ ಲೋಕೊಡು
ಎಡ್ಲೆ ಪುದರ್‌ನ್ ಪಡೆಯಿನಕ್‌ಲೆಡ
ಮಚ್ಚರೊಡು ಮರ್ಗುವನ ಸಿವ ಸಿವ ಪಂಡೆನಾ ಸಕುನಿ ||

12

ಪಾತೆರಡೆ ಈರ್‌ಂದ್ ಪಂಡಲ
ಪಾತೆರೊಂದೇ ಎನ್ನ ಬಂಜಿದ
ಸೂನು ಅರ್ಲದ್ ಕೆರ್ಪರೆನ್ನನ್ ಪೋಲೆ ಮಾಮಣ್ಣ ||
ಈತ್ ಪನಿಯೆರೆಗಾದ್ ಬತ್ತರೊ
ನೀರ್ ಕಣ್ಣೆಡೆ ಜಪುಡದಾಯೆನೆ
ಬಾರಿ ದುಕ್ಕೊಡು ಸೇಂಕ್ ಸೇಂಕ್‌ದ್ ಬುಲೆ ಕೌರವೆನೆ ||

13

ಸಕುನಿ ಕೌರವನರದ್ ಪತ್ತದ್
ಪುಗೆಲ್‌ಡಿತ್ತಾನ ಸಾಲ್ಡ್ ಆಯನ
ದವುಡೆಡರಿನವೆ ಕಣ್ಣ ನೀರ್‌ನ್ ಉರ್ದುದೇ ಪನ್ನೆ ||
ಬುಲುಪುನೆನೆ ಬುಡು ಕುರುಕುಲೇಸ್ವರ
ನಿನನ್ ಗೆಲ್ಪದ್ ನಿನ್ನ ವೈರಿಲೆ
ಪುದರ್ ಮಾಜದ್ ಇಂದ್ರಪ್ರಸ್ತೊನು ನಿನ್ನ ವಸೊ ಮಲ್ಲೆ ||

14

ದಾಯೆಗೀರಿಂಚಿನಡ ಪನ್ಪರ್
ಬೀಮ ಪಾರ್ತೆರ್ ವೀರರತ್ತೊಯೆ
ವಾಸುದೇವೆನೆ ಅಕ್‌ಲೆನೇಪೊಲ ಕಾಪ್ಪೆ ಕಂಡಿತೊನೆ ||
ನಾಚಿ ಕೆಟ್ವೆದ್ ಯಾನ್ ಬದ್‌ಕಯೆ
ಜೂವೊ ದೆತೊನುದು ಸೊರ್ಗೊ ಸೇರುವೆ
ಆಕ್‌ಲಾಂಡಲ ಸುಕೊಟು ಉಪ್ಪಡ್ ಪಂಡೆ ಸೌಬಲಡ||

15

ಯಾನೆ ಅಕ್‌ಲೆನ್ ಗೆಲ್ಪೆ ಸುಲಬೊಡು
ಈಯೆ ಪೋಡ್ಯುನ ಬೊಡ್ಡಿ ಧರ್ಮಜೆ
ನ್ಯಾಯೊ ಧರ್ಮೊದ ಮೂರ್ತಿ ಆಂಡಲ ಜುಗರಿದಾ ಮರ್ದೆ ||
ಆಯನೇನೇ ಗೆಲ್ಪುನೆಂಚಂ-
ದಾಯೆ ತೆರಿಯಯೆ ಮಲ್ಲ ಬೋದಲೆ
ಯಾನ್ ಜುಗರಿದ್ ಮಲ್ಲ ಬಿಸೆನೆ ಪಗಡೆ ಗೊಬ್ಬುನೆಟ್ ||

16

ಮೋಸೊ ಮಲ್ತದ್ ಪಗಡೆದಾಟೊಡು
ಮಾತ ಬದ್‌ಕನ್ ಗೆಲ್ತ್ ಕೊರ್ಪವೆ
ಲೋಕೊಡೆನ್ನಂಚಿನವೆ ಗೊಬ್ಬುದ ಜನೊಕುಲೇರುಂಡು ||
ಕೀರ್ತಿಯಪಕೀರ್ತಿಗಾಲ ಪೋಡ್ಯಡ
ರಾಜಕಾರಣೊ ಮಲ್ಲೆ ಬೀಸ್ಮೆರೆ
ಪಾತೆರೊನು ಈ ಕೇನುನೆನ್ ಬುಡು ಪನ್ದ ತರೆ ಪೂಜ್ಯೆ ||

17

ಎನ್ನವೇ ಮಾನಾಪಮಾನೊಲು
ಈರ್ನ ಮಾಮಣ್ಣಂದ್ ಗ್ರೇಯ್ತದ್
ಗೆಲ್ಪುನಾ ಬಿಸ್‌ತಿಗೆ ತೋಜಲೆ ಪನ್ದ ಕಾರ್ಪತ್ಯೆ ||
ಪನ್ನುನವು ಬೊಡ್ಡೀರ್ ಏರ್ಡಲ
ಗುಟ್ಟುಡುಪ್ಪಡ್ ವಿದುರ ಬೀಸ್ಮೆರ್
ಪೊಟ್ಟು ಕಾನೂನ್ದಕ್‌ಲ್ ಅಮ್ಮೆರೆಡೀರ್ ತೆರಿಪಾಲೆ ||

18

ನಿನ್ನ ಅಮ್ಮಡ ಈಯೆ ಪನ್ನುನ
ಎಡ್ಲೆ ಆಯೆನೆ ಪಾಂಡವೇರೆನ್
ತರವೆನೆ ಗೊಬ್ಬಿಯೆರೆ ಜುಗರಿನ್ ಯಾನೆ ಗೊಬ್ಬುನಯೆ ||
ಅತ್ತ್ ಈರೇ ಪೋದು ಅಮ್ಮೆರೆ-
ಡಿತ್ತೆ ಪಂಡರ್‌ಡಾಂಡ ಆರೇ
ತರವೆರ್ ಪಾಂಡವೆರೆನೀಡೆಗ್ ಬುಕ್ಕೊ ಯಾನ್ಪನುವೆ ||

19

ಅವುಲ ಅಂದಂದಾಯೆ ಬತ್ತನೆ
ಜುಗರಿ ಗೊಬ್ಬುದ ಮೋಸೊಗಾರನೆ
ಕುರುಡ ದ್ರತರಾಸ್ತಡನೆ ಗುಟ್ಟುಡು ತೂದು ಪಾತೆರಿಯೆ ||
ನಿನ್ನ ಮಗೆ ಕೌರವೆನೆ ದುಕ್ಕೊಡು
ಮಲ್ಲ ಎಸನೊಡು ಉಪ್ಪಿ ಸಂಗತಿ
ನಿಕ್ಕ ತೆರಿದ್ಜೊ ಪನ್ದ ಬೇಜರೊ ಮಲ್ತಿನಾ ಸಕುನಿ ||

|| ದ್ರತರಾಸ್ತಡ ಕೌರವೆ ಪಂಡೊನುವೆ ||

ದಾನೆ ಆಂಡೆಯ ಸಕುನಿ ಎನ ಮಗೆ
ದಾಯೆ ಬುಲ್ವುವೆ ಎಂಚಿನೆಕ್ ಪನ್
ಆಯಗಂಚಿನ ಕಸ್ತೊ ಆಂಡಂದಿತ್ತೆ ಪನ್ಲೆನಡ ||
ಈಯೆ ಕೇನ್ಲ ನಿನ್ನ ಮಗಟನೆ
ಯಾನ್ ಪಂಡೆಡ ನಂಬಯನೆ ಈ
ಆಯೆನೇ ಸರಿಯಾದ್ ಪನ್ಪೆನೆ ಆಯಿ ಸಂಗತಿನೆ ||

1

ತರ್ಮಯೆನೆ ಕೌರವನ್ ಗುಟ್ಟುಡು
ತನ್ನ ಕೋಣೆಗ್ ಬಾವ ಸಕುನಿನ
ಒಟ್ಟು ಬುಡೆದಿನ್ ಕುಲ್ಲವೊಂದೇ ಲೆತ್ತೆ ಮಗನಾಯೆ ||
ಬರತ ವಂಸೊದ ಬೊಲ್ಪು ಬಲಮಗ
ಕುರುಕುಲೊದ ಸಿರಿ ದೀಪೊ ಬಲ ಮಗ
ಹಿರಿಯ ಮಗೆ ಈ ಎನ್ನ ಕೈತಡೆ ಬತ್ತ್ ಕುಲ್ಲು ಮಗ ||

2

ಆಯೆನೇ ಸರಿ ತರ್ಕ್ ಪತ್ತಾದ್
ದಾನೆ ಮಗ ನಿಕ್ಕಾಂಡ್ ದುಕ್ಕೊಡು
ರಾಜ ಚಾವಡಿದಾಡೆ ಪೋಪುಜ ದಾಯ್ತ ಕಾರಣೊಡು||
ಬಾನುಮತಿಡಲ ಮನಿಪುಜಗೆ ಈ
ತೂಪುಜಗೆ ಮಂತ್ರಿಲೆನ್ ರಾಜ್ಯೊಡು
ಆಡಳಿತೆ ಕೈಬುಡುದು ಉನ್ನುಜ ತಿನ್ನುಜಗೆ ದಾಯೆ ||

3

ಯಾನ್ ಪನ್ನುನೆ ಎಂಚ ಧರ್ಮೊದ
ಗೂಡುದುಲಯಿಡ್ ಸೇರ್ದುಲ್ಲರ್
ಈರ್ ಪಂಡೆಡ ಎನನ್ ಪನುವರ್ ನಂಜಿದಾಯೆಂದ್ ||
ಎನ್ನ ಬಾಳುವೆನಿತ್ತೆ ತೂನಗ

ಕನ್ನಟದ ಗಂಟ್ಂದ್ ತೋಜುನೆ
ದುಕ್ಕೊನೆನ್ನವೆ ದಾಯೆ ಕೇನ್ವರ್ ಪನ್ದ ಬುಲ್ತೊಂಡೆ ||

4

ಯೋಗಿಲೆನ ಏಗಿತೊನೆ ಈರೆನ
ರಾಜ್ಯೊದಾಸೆದ ಮದೊನೆ ಎನ್ನವು
ಆಸೆ ಇದ್ಯಂದ್ನವೆ ಯೋಗೊನೆ ಈರೆನಾದುಂಡು ||
ರಾಗೊ ದ್ವೇಸೊಡು ಮುರುನಾಯೆನೆ
ಯಾನ್ ಎನ್ನವೆ ಮನಸ್ಡಿತ್ತನ
ಬೇನೆ ಪಂಡೆಡ ಈರ್ ಕೇನ್ವರೊ ಎನ್ನ ಗೆರಚಾರೊ ||

5

ದಾಯೆ ಮಗ ಕರಕರೆನ್ ಮಲ್ವುವ
ಆಸೆ ಎಂಚಿನ ಮನಸ್ದಾ ಪನ್
ಊನೊ ದಾಯ್ತಾಂಡಿತ್ತೆ ಪನಿಯೆರೆಗಾಯಿ ಸಂಗತಿನೆ ||
ದಾನೆ ಪನೊಡಮೆರೆಡ ಪಾಂಡವ-
ನಾಕ್ಲೆನ ಒಟ್ಟಿಗೆನೆ ಕ್ರಿಷ್ಟೆಲ
ಸೇರ್ನೆಟ್ ಸಿರಿ ಸೊರ್ಕು ಏರ್ದೆನ್ ಪನುಪುನೆಂಚೇನ್ ||

6

ಅಕ್ಲೆನೋಲೆಗೊ ಸಬೆಟ್ ಮುಂಡೊಗು
ಗಡಿಯೆ ತಾಗ್ನ ನೆತ್ತರುದ್ಯೆರೆ
ಪರತ್ ಸೀರೆನ್ ಕೊರ್ರು ನೀರ್ಗ್ ಬೂರ್ನುಗಾಪಗನೆ ||
ತೆಲಿತೆರಲ್ಪದ ಸೂಳೆ ಜಾತಿಲು
ಅಯಿನ್ ನೆನೆತ್ದ್ ಯಾನ್ ಬೇಜರೊ-
ಡರಸುತನೊ ದಾಯೆಂದ್ ಬುಲ್ವುನೆ ಮಾನೊ ಪೋಯಿನೆಕ್ ||

7

ನೆಕ್ಕ ಕಾರಣೊ ದಾಯ್ತ ಮುಂಡೊಗು
ಗಡಿಯೆ ತಾಗ್ನೆ ಎಂಚ ಪನ್ಮಗ
ಪನ್ನಗನೆ ಮಯೆ ಕೊರ್ತಿ ಮಂಟಪೊನೀರ್ ತೆರಿತ್ಜರೊ||
ಧರ್ಮನಂದನೆ ಮೆಗ್ಯನಕ್ಲೆನ್
ಬುಕ್ಕೊ ಪ್ರಜೆ ಪರಿವಾರೊ ಮಾತೆನ್
ಒಟ್ಟು ಕೂಡ್ಲದ್ ಮಲ್ತೆ ಓಲೆಗೊ ಬಾರಿ ವೈಬವೊಡು||

8

ಪ್ರೀತಿ ಬಾವೊಡು ಆ ಯುದ್ಧಿರೆ
ಓಲಗೊಗು ಬರೊಡುಂದು ಎನ್ನನ್
ಆಡೆ ಲೆಪುಡಯೆ ವೈಬವೊದ ಸಬೆ ತೂಪಯೆರೆಗಾದ್ ||

ಆ ಮಹಾ ಸಬೆ ಮಯನ ಮಂಟಪೊ-
ಡಾಯಿನೆಟ್ ಸರಿಟುಲಯಿ ರತ್ನೊಲೆ
ತೇಜಿಡೆನ್ನವೆ ಕಣ್ಣೆ ಕಂತ್‌ದ್ ಸಾದಿ ತೋಜಂದೆ ||

9

ಉದ್ದಗಲೊ ತೆರಿಯಂದೆ ತೂನಗ
ಅಲ್ಪನೇ ಕಿರೆ ಒಂಜಿ ಬಾಗೊಡು
ಬುಕ್ಕೊ ಆಪೆಕ್ ಬೊಲ್ಲೆನೊದ ನೆಲ ಚಂದ್ರಕಾಂತಿದವೆ ||
ಪೊಗ್ಗದಾನಗ ಮಣಿತ ಕಾಂತಿಡ್
ಕಣ್ಣೆ ಬುಡಿಯೆರೆ ಆಯ್ಲಿ ಪೊದಕೆಲ್
ಮೆದ್ಕನಗ ಮುಚ್ಚುನೆಟ್ ಕಣ್ಣೆಗ್ ದಾಲ ಆಂಜಿಜಿಯೆ ||

10

ಪರಡ್ ಪರಡ್‌ದ್ ದುಂಬು ಪೋನಗ
ನಡುತ ಗೋಡೆನೆ ತಾಂಟ್‌ದೆನ್ನವೆ
ದರಿನ ಮುಂಡೊಡು ನೆತ್ತರರಿನಗ ಪಿರವು ತಿರ್ಗಿಯೆನೆ||
ಕಿರೆನೆ ಕಡಲ್‌ದ ಲೆಕೊನೆ ತೋಜಿಡ್
ನಿಲೆನೆ ತಿಕ್ಕಂದಿತ್ತಿ ಗುಂಡಿಗ್
ಒಯಿತ್ ಪಾಡ್‌ನ ಲೆಕೊನೆ ಬೂರಿಯೆ ದಾನೆ ಪನಡೇನ್ ||

11

ನೆಲನೆ ನೀರ್‌ದ ಲೆಕೊನೆ ನೀರೇ
ನೆಲತ ನಮುನೆಡೆ ದತ್ತ ಬಲತ್‌ಡ್
ಬರಿಟ್ ಗೋಡೆನೆ ನಡುಟು ಕಮೊಲು ಗೋಡೆ ನಡುನಡುಟು ||
ದಿಕ್ಕ ತತ್ತ್‌ದ್ ಸೋಲೆ ಬುದ್ಧಿದ
ಸತ್ನೊ ಕುಂದುದು ಮನಸ್ ಪೋಡಿಡ್
ಕಣ್ಣೆಗಾಂಜಿಜಿ ಎಂಚಿನವುಲಾ ದುಕ್ಕೊ ತಡೆವಂದೆ ||

12

ನೀಲೊ ಕಲ್ಲದ ನೆಲನ್ ಗೆರೆತೆನೆ
ನೀರ್‌ದಾ ಕಿರೆ ಪನ್ದ ಕಡಪೆರೆ
ಕಾರ್ ದೀಡ್ಕುಗ ಕುಂಟು ದೆರ್ಪುನಗಪಗ ದ್ರೌಪದಿಯೆ ||
ಕುರುಡನಾ ಮಗೆ ಕುರುಡೆ ಪಂಡ್‌ದ್
ತೆಲಿತಲಾಪಗ ತಾತಿ ಬೊಟ್ಟುದು
ಕೆಲವು ಪೋಣ್ಣಲು ಲಾಲಿ ಮಲ್ತೆರ್ ಕುರುಡೆ ಕುರುಡೆಂದ್ ||

13

ನಾಚಿಗಡ್ ಪಿರ ಪಿದಡ್‌ದವುಲೇ
ಸೀದ ಸಾದಿಡ್ ತೂಯೆ ನೀರ್‌ದ
ನೀಲಿರಂಗ್‌ಡ್ ಇತ್ತಿಕಿರೆನ್‌ಲ ಉಂದು ನೆಲ ಪನ್ದ ||

ಕಾರ್ ದೀಡ್ಕುಗ ಬೂರೈ ನೀರ್‌ಗ್
ನೀರ್ ಬತ್ತದ್ ಸೊಂಟೊದಾಡೆಗ್
ಪೂರ ಚಂಡ್ಯಾದೇನ್ ಬಡತಿಯೆ ಮಿತ್ತ ನಾಚಿಗಡ್||

14

ಅಲ್ಪನೇ ಓ... ಪನ್ದ ತೆಲಿತೆರ್
ಪೋಣ್ಣಲಾಪಗ ಆ ಯುದಿಸ್ಪಿರೆ
ಕೊರ್ ಕುಂಟುನು ಮಿತ್ತ ಮಿತ್ತರ್‌ದ್ ಸರಿಟ್ ತುತ್ನೊಂಡೆ ||
ಎನ್ನ ಮಯ್‌ದಿ ಪೋದುಲಾನಗ
ದುಕ್ಕೊ ಬತ್ತದ್ ದಾನೆ ಮಲ್ಪುನೆ
ಪನ್ನಿ ಗ್ರೇಯಿಕೆ ಬತ್ತಜಮ್ಮೆರೆ ಕೇನಿ ನನವುಂಡು ||

15

ಗೋಡೆಡಿತ್ತನ ಬಾಕಿಲೆಂಕೇ
ಆಂಜಿನಗ ಯಾನೈನ್ ಕಡತ್‌ದ್
ಪೋಪೆ ಪಂಡ್‌ದ್ ನುಕ್ಕೈ ಚಿತ್ತೊಂದೆಂಕ್ ತೆರಿಯಂದೆ||
ದಾನೆ ಪನ್ನುನೆ ಮುಂಡೊ ಪುಡಯಿನ
ಸಾತ್‌ಗಲ್ಪನೆ ತೆಲಿಪಿ ಪೋಣ್ಣಲು
ತಾತಿ ಬೊಟ್ಟೆರ್ ಬೀಮ ಪಾರ್ತೆರ್ ರಂಗ್ ಮಲ್ತೆರ್‌ಲ ||

16

ಮುಂಡೊ ಪುಡಯಿನ ಬೇನೆ ಪೋಣ್ಣಲು
ರಂಗ್ ಮಲ್ತನ ನಾಚಿಗಡ್ ಯಾ-
ನ್ದುಂಬು ಪೋನಗ ಅವುಲೆ ತೂಯೆನೆ ಬಾಕಿಲಿತ್ತನೆನ್ ||
ಎಕಡ್ ಆಯಿನ ಯಾವು ಪಂಡ್‌ದ್
ಬುಡಿಯೆ ಕಣ್ಣೆಗ್ ತೋಜಿ ಬಾಕಿಲ್
ಪರಡ್ ಪರಡ್‌ದ್ ಗೋಡೆ ಸುತ್ತಲ ಪಿದಯಿಗತ್ತೊಂಡೆ ||

17

ಆ ಯುದಿಸ್ಪಿರೆ ತೆಲಿಪುನಕ್‌ಲೆನ್
ಗೌಜಿ ಮಲ್ತೆನೊ ಆಂಡ ಎಂಕ್‌ಲ
ಆಯಿನಪಮಾನೊಗುಲ ಪಂಡೆನೊ ಒಂಜಿ ಸಮದಾನೊ? ||
ಪಾಂಡು ಬಾಲ್ಲೆನ ಬೊಡ್ಡಿ ದ್ರೌಪದಿ
ಏತ್‌ಲಾ ತೆಲಿತೊಂದು ಇತ್ತಲ್
ಬೀಮ ಪಾರ್ತೆರೆ ಹಂಕರೊದ ಪಾತೆರೊನು ತಡೆವಂದೆ ||

18

ಬತ್ತನಾಯೆನೆ ಮಲ್ಲ ಕೋಪೊದ
ಅಗ್ಗಿ ಸೂವೇ ಲಕ್ಕದಮ್ಮೆರೆ
ನೆಕ್ಕ ಬಡ್ಡಿಗ್ ಬಡ್ಡಿ ಕೂಡ್‌ದ್ ಕೊರೊಡು ಪನ್ನುನವೆ ||

ಇಸೊನು ಕಕ್ಯದ್ ಬತ್ತೆ ಕೊಡಿಪೆರೆ
ಕೊಡಿತ್‌ದೈನವೆ ಪಲೊನು ತಿಂದ್‌ದ್
ಸಯಿಪೆ ಇಜ್ಜಿಡ ಸೂಕು ಬೂರುವೆ ಅಗ್ನಿ ನಿಂಗೊನಡ್ ||

19

ಆ ಯುದ್ಧಿಸ್ಪಿರೆ ಬುಕ್ಕೊ ಈರ್‌ಲ
ಬಾರಿ ಪ್ರೀತಿಡ್ ಉಪ್ಪಿ ಅಪ್ಪೆಗ್
ಆಯೆರೆಗ್ ಸಂತೋಸು ದುಸ್ವಾಸನನ್ ಕುಲ್ಲಾಲೆ ||
ಪೀಟೊಡಿರೇ ಎಂಕ್ ಸೊಗೊಡು
ಸ್ತಾನೊ ಉಂಡ್‌ಗೆ ಪನ್ನೆರ್‌ಗೆ ನಿಜೊ
ದೋಯಿಸೇರ್‌ಲ ಅಕ್‌ಲೆ ಪಾತೆರೊ ಸತ್ಯೊ ಆವೊನಡ್ ||

20

ಕೇಂಡ್‌ನಾ ಕೌರವನ ಪಾತೆರೊ-
ಡೇತೊ ಮುರೆಡಿಯೆ ಕುರುಡ ರಾಜೆನೆ
ಆಹ ಮಗನವೆ ಬುದ್ಧಿ ನಂಜಿದ ಪೊದಿಕೆಯಾಂಡತ್ತೊ ||
ಕೇನ್ ಮಗ ಧರ್ಮಜಡ ಮುನಿಪನ
ಆಯೆ ಸತ್ಯೊದ ರಾಜರುಸಿ ನಿಜೊ
ರಾಜೆರೆಡ್ ಮಹ ಚಕ್ರವರ್ತಿಯೆ ಸಿವ ಮಹಾದೇವ ||

21

ಪಾಂಡು ಕಾಸಾ ಮೆಗಿಯೆ ಆಯನ
ಬಾಲೆಲೆಡ ಈ ಬೇದೊ ಗ್ರೇಯ್ಪನ
ರಾಜ್ಯೊಗ್‌ಕ್‌ಲೆಲ ಹಕ್ಯದಕ್‌ಲೇ ಅತ್ತೊ ಪನ್ ಪನ್‌ಲ ||
ಆಕ್‌ಲೆನ ಸೌಬಾಗ್ಯೊ ನಿಕ್ಕೇ
ತೂಯೆರೆಗ್ ಆಪುಜಿಲ ಪಂಡ್‌ದ್
ಲೋಕೊ ನಿನ್ನನ್ ದೂರುವೆರ್ ನಿಜೊ ಬಂಡೆ ಪಂಡೊಂದು ||

22

ಅಂದ್ ಅಮ್ಮೆರೆ ಈರೆ ಮನಸ್‌ಗ್
ಬಂಡೆ ಆಯಿನ ಯಾನ್ ದಾಯೆಗ್
ದಿಂಜ ಸುಕೊ ಪಡೆವೊಂದು ಉಪ್ಪುಲೆ ಪಾಂಡವೆರೆನೊಟ್ಟು |
ಅಪ್ಪೆ ಕೇನ್‌ಲೆ ಅಮ್ಮೆರೆಗ್ ನಿಜೊ
ಇಸ್ಪೊದಾ ಮಗೆ ಧರ್ಮನಂದನೆ
ಬುಕ್ಕೊ ಬೀಮಾರ್ಜುನೆರ್ ಮಾದ್ರಿನ ಜೋಕುಲಿರ್ದೆರ್‌ಲ ||

23

ಪ್ರೀತಿದಾ ಕೊಂಡಟೊದ ಜೋಕುಲು
ಆಕ್‌ಲೆಗೆ ಕೊರಿ ಹಸ್ತಿನಾವತಿ

ರಾಜ್ಯೊನಿತ್ತೆನೆ ಅಕ್‌ಲೆ ಆಳಡ್ ದಾಯೆಗಂಕುಲುಲ||
ನೂದು ಬಾಲೆಲು ಚೆರಿಗೆ ಬರ್ತಿಗೊ
ಪೋಪೊ ಮುಲ್ಲಡ್ಡಿತ್ತೆ ಪಂಡ್‌ದ್
ಕೋಣೆಡ್‌ದ್ ಪಿದಡೊಂದು ಜಗಲಿಡ್ ಉಂತ್ಯೆ ಚಲೊಗಾರೆ ||

24

ಬುಲ್ಲಾ ಗಾಂದಾರಿ ಕುರುಡನ
ಪೊಟ್ಟು ಕಣ್ಣೆಡೆ ನೀರ್ ಅರಿನಗ
ಲೆಪ್ಪುಲಯೆ ನಿನ ಮಗನ್ ಕುಟುಮೊದ ಲಗಡಿದಾಯನ್‌ಲ ||
ಪನ್ನಗಾಲೇ ಸಕುನಿ ಮೋನೆನ್
ಅಲ್ಲ ತೂನಗ ಪಿದಯಿ ಬತ್ತದ್
ಗುಟ್ಟುಡೇ ಪಾತೆರ್‌ದ್ ಉಲಯಿಗ್ ಕನತೆ ಕೌರವನ್ ||

|| ಕೌರವನ ಯೋಜನೆಗ್ ದ್ರತರಾಷ್ಟ್ರನೊಪ್ಪಿಯೆ ||

ದಾನೆ ಏಚನೆ ಮಲ್ತ ಮಗ ಈ
ಪಾಂಡವೆರೆ ರಾಜ್ಯೊನುಲ ಒಯ್ಪೆರೆ
ಸಾದಿ ಎಂಚಿನ ಉಂಡು ಸುಲಬೊದ ಕಾರ್ಯೊಗತಿ ಪನ್‌ಲ |
ಸಾಮದಾನೊಡೊ ಬೇದೊ ದಂಡೊಡು
ನಾಲ್ ನಮುನೆಡ್ ಒಯ್ಪ್ ಗ್ರೇಯ್‌ದ
ಈಯೆ ಪನ್ ಪನ್ ಮನಸ್‌ಡಿತ್ತಾನೆಂದ್ ದ್ರತರಾಷ್ಟ್ರೆ ||

1

ಇಸೊನು ಕೊರ್ದಯ ಓರಿಯೆರಾಕ್‌ಲ್
ಅರಕ್ ದಿಲ್ಲೆಗ್ ಸೂನು ಕೊರ್ದೇ
ಕೆರೊಡು ಪಂಡ್‌ದ್ ತೂಯ ಒರೈರ್ ನಿನ್ನ ಕಾರ್ಬರ್‌ಡ್||
ಕುಸೆಲ್ ಕ್ರಿತ್ತಿಮೊ ಮಲ್ತದಾಂಡಲ
ಕೆರಿಯೆರಾಯಿಜಿ ಪಾಂಡು ಬಾಲೆಲು
ಬದ್‌ಕ್‌ದುಲ್ಲೆರ್ ನನಗ್ ಎಂಚಿನ ಉಂಡು ಗಾತಕೊಲು ||

2

ಈರ್ ಒಪ್ಪರ್‌ಡೆಂಕ್ಲ ಅಕ್‌ಲೆನ್
ಸೋಲ್ಪುವನೆ ನಿಜೊ ಪಗಡೆ ಗೊಬ್ಬುಡು
ಈರ್ ತರ್ಪಲೆ ಅಕ್‌ಲೆನೀಡೆಗ್ ಪ್ರೀತಿ ಬಾವನೆಡ್||
ಬಿರೆರೆಂಕುಲು ಪಗಡೆಗೊಬ್ಬುದು

ಧರ್ಮನಂದನಗೆಂಕ್ಲೆ ಸೀಂತಿರಿ-
ದರ್ಮನೇ ತೆರಿಯಂದ್ ಸುಲಬೊಡು ಗೆಲ್ವೊ ಕಂಡಿತೊನೆ ||

3

ಈಯೆ ಪಂಡ್‌ನ ಸಾದಿ ಆವುಯ
ಯಾನ್ ತರ್ಪವೆ ಪಾಂಡವೇರೆನ್
ಈಡೆ ವಿದುರಡ ಪಂಡ್‌ದಕ್‌ಲೆನ್ ಬೇಕೊ ಬರ್ಪಾವೆ ||
ಮೋಸೊ ಆಯಡ ಇದ್ದಿ ಕಂಡಿತೊ
ತೂಕೊ ನಿಕ್‌ಲೆನ ಏಗಿತೊನು ನನ-
ಗೀಯೆ ಚಿಂತೆನ್ ಬುಡ್ಲ ಪಂಡೆನೆ ಮಗನ ಮೋಕೆದಯೆ ||

4

ವಿದುರ ಕೆಬಿಕೇ ಸುದ್ದಿ ಪಾಡ್ಯರ್-
ಡಪಗ ಕಾರ್ಯೊನು ಹಾಲ್ ಮಲ್ಟೆನೆ
ಮನಸ್ ಇದ್ದಿಡ ಬೊಡ್ಡಿ ರಾಜ್ಯೊನು ಕೊರ್ಲೆ ಧರ್ಮಜ್ಗ್ ||
ಕುರುಡ ಬಾಲೆಲು ನೂದು ಆಂಡಲ
ಗತಿಯೆ ಇದ್ದಿಂದಿತ್ತೆ ತೆರಿಯಡ್
ಜನೊಕುಲುಂದುದು ಪಂಡೆ ಕೌರವೆ ಪೋಪ ಮುಲ್ತುಂದು ||

5

ಪಾರಮಾರ್ತೊ ವಿಚಾರೊ ವಿದುರಗ್
ಪೂರ ಸಂಗತಿ ತೆರಿವು ಆಯಗ್
ಬೇತೆ ಏರುಂಡಿತ್ತೆ ಸರಿ ಸಮೊತಕ್‌ಲ್ ಪನ್‌ಲೆನಡ ||
ಆಯೆ ಪಂಡ್‌ನ ಪಾತೆರೊನು ಸರಿ
ಕೇಂಡ್‌ದಾ ಧರ್ಮಜೆನೆ ನಂಬುವೆ
ಈಡೆ ಲೆತೊನುದೆ ಬರುವೆ ಮನಿಪಡ ನಿಕ್ಕ್ ತೆರಿಯಂದ್ ||

6

ಇತ್ತೆ ವಿದುರನ್ ಆಡೆ ಪೋಯೆರೆ
ಪನ್ನೆ ಆಯೆನೆ ಪೋದು ಪಂಡೆಡ
ಧರ್ಮನಂದನೆ ಒಪ್ಪೆ ಬೀಮಾರ್ಜುನೆರ್ ಮೀರಯೆರ್ ||
ಸುದೊ ಮನಸ್‌ದ ಬುದ್ಧಿದಾಕ್‌ಲ್
ಬರ್ವೊಡೆಗ್ ಬೊಡ್ಡಿ ಗಡಿಬಿಡಿ
ನಿನ್ನ ಮನಸ್‌ದ ಆಸೆ ತೀರೈರೆ ದಾಲ ಅಡ್ಡಿ ||

7

ಈರ್ ಎಂಕ್‌ಲೆ ಪ್ರೀತಿದಮ್ಮೆರ್
ಆಂಡ ಅಕ್‌ಲೆನ್ ಕೊರ್ಲೆ ತರ್ಪದ್
ಆಸೆ ಬುಕ್ಕೊಂಜುಂಡು ಈರೆಡ ಪನ್ನೆ ಇತ್ತೆನೆಲ ||

ದ್ರೋಪತಿನ ಜುಟ್ಟೊತ್ ಪತ್ತಾದ್
ಆಲೆನೆಂಕ್‌ಲೆ ಚಾಕ್ರಿದಕ್‌ಲೆನ
ಸಾಲ್ಡ್ ಕುಲ್ಲಯಿನಾನಿ ಎನ್ನವೆ ದುಕ್ಕೊ ಪರಿಯಾರೊ ||

8

ಆವು ಪೋಲಂದಾಯನಲ್ಪಡ್-
ದಾ ಕುರುಡೆ ಕಡಪುಡುದು ಮನಸ್‌ಡ್
ಬಾರಿ ಚಿಂತೆಡ್ ದುಕ್ಕೊ ಮಲ್ಟೆನೆ ಮೂರ್ಕ ಮಗನಮ್ಮೆ ||
ತಾನ್ ಗೆಲ್ಪುನ ಆಸೆಡೇ ಮಗೆ
ದೋಸೊ ಗ್ರೇಯ್ವುಜೆ ಪಿರವು ಬರ್ಪುನ
ಈಯೆ ಪನ್ ಗಾಂದಾರಿ ಎಂಚಿನ ಸಾದಿ ನೆಕ್ಕುಂಡು ||

9

ಅಕ್‌ಲ್ ಕುಸೆಲ್‌ದ ಮೋಸೊ ಪಂಡ್‌ದ್
ತೆರಿಯಯೆರ್ ನಿಜೊ ಈಡೆ ಬತ್ತದ್
ತರೆನ್ ಕಡ್ವೆರೆ ಕಟ್ಟೊನಾ ಕುರಿ ತಪ್ಪು ತಿನ್ನಿಲೆಕೊ ||
ಎದುರು ಉಂತ್ವೆರ್ ನಂಕ್ ಬರ್ಪುನೆ
ಪಿರವುಗೇ ಅಪಕೀರ್ತಿ ಅತ್ತೊಯ
ಸಿವಸಿವಾ ಪಂಡೊಂದು ಮರ್ಗಿಯೆ ರಾಜೆ ದ್ರತರಾಸ್ತ್ರಿ ||

10

ಬೊಡ್ಡಿ ಪನ್ನುನೆ ಎಂಚ ಎನ್ನನ್
ಬುಡ್ವೆರೀ ನೂತೊಂಜಿ ಬಾಲೆಲು
ಒಪ್ಪಿಯಡ ಪಾಂಡವೆರೆ ಬಲೊಟೆಂಚ ಬದುಕುವೆರೊ ||
ಕೆರ್ವೆರತ್ತೊಯ ನಮ್ಮ ಬಾಲ್ಟೆನ್
ಮಲ್ಪುನೆಂಚಿನ ಪನ್‌ಲ ಪಂಡ್‌ದ್
ಕಣ್ಣೆಡೆನೆ ನೀರ್ವುಡದಾಯೆನೆ ದಿಂಜ ಬುಲ್ಪುನಗ ||

11

ದಾಯೆಗೀರೆಗ್ ಚಿಂತೆ ಎಂಚಲ
ಹಾಲ್ ಉಂತುದುಲಾಂಡ್ ರಾಜಿಡ್
ತೀರ್ನಯೆರೆಗಾವೊಂದು ತೂಲೆಯೆ ರಡ್ಡ್ ಕಡೆನಿತ್ತೆ ||
ಈರ್ ನಮ್ಮಾಕ್‌ಲೆನ್ ಬುಡಡೆಯೆ
ಪಾಂಡು ಬಾಲ್ಟೆನ್ ದೂರೊ ಮಲ್ಪುಲೆ
ಮಾರಿ ಸೂಟೆನ್ ಬೀಜಿಯಲ್ ಗಾಂದಾರಿ ಕಂಡನಿಗ್ ||

12

ಪನ್ನುನವು ಈ ಅಂದ್ ಆಪುನ
ಇತ್ತೆನೇ ಆವೊನಡ್ ಬಾಲೆಲೆ

ಎಡ್ಡೆಗಾದೇ ಕೆಲಸೊ ಮಲ್ಪುವೆ ಪಿರವು ತೂವಂದೆ ||
 ಸಿಲ್ವಿನಕ್‌ಲೆನ್ ಸಬೆತ ಕಟ್ಟೊಣೊ
 ಕಟ್ಟಯೆರೆ ಲೆಪುಡಾಯೆ ಕೆಲಸೊದ
 ಅಚ್ಚಿ ಗಟ್ಟನ್ ತೆರಿನ ಬುದ್ಯಂತೆರೆನ್ ತರ್ಪಾಯೆ ||

13

ರಾಜ ಬಂಡಾರೊಡುಲ ಇತ್ತನ
 ಏತೊ ವಸ್ತುಲೆ ಕೊರೈನಕ್‌ಲೆಡ
 ಸಾರೊ ಕಮ್ಮೊಗು ಕಲ್ಲ ಮರ ಬೋಡಿತ್ತನೆನ್ ಕೊರಿಯೆ ||
 ನಾಲ್ ಸುತ್ತದ ಗೋಡೆ ಗೋಡೆಗ್
 ಜಾಲಿ ಚೌರಿಲ ಮುತ್ತು ರತ್ತೊದ
 ತೂನಗಚ್ಚಿರೊ ಆಪಿ ನಮುನೆಡ್ ಆಂಡ್ ಕಟ್ಟೋಣೊ ||

14

ಜುಗರಿ ಮಂಡೊದ ಸಬೆಕ್ ಕಟ್ಟನ
 ಪೊರುಲು ಮಂದಿರೊ ಧರ್ಮೊ ಸಬೆತವೆ
 ನಮುನೆಡಾಂಡ್‌ಲ ಮಾತ ಬತ್ತರ್ ತೂಯೆರೆಂದೈನ್ ||
 ಅರಸು ದ್ರತರಾಸ್ತ್ರನೆಲ ವಿದುರನ್
 ಅದೆಕ್ ಗುಟ್ಟುಡು ಲೆಪುಡದಾಯೆಡ
 ಪನ್‌ಪೆ ತನ್ನವೆ ಕೇಡ್ ಬುದ್ಧಿದ ಇಸೊತ ಏಚನೆನ್ ||

|| ವಿದುರೆ ಇಂದ್ರಪ್ರಸ್ತೊಗು ಪೋಯೆ ||

ವಿದುರ ತೂಲಯ ಸಬೆತ ಕಟ್ಟೋಣೊ
 ಮೆಗಿಯ ಬಾಲೆಲೆಗುಂದು ಒಪ್ಪುವೊ
 ಅರಸು ಜೋಕುಲು ಪಗೆಡೆ ಗೊಬ್ಬೆರೆ ಏಗ್ಯೊನೋ ಪನ್‌ಲ ||
 ಮಗನ ಒಟ್ಟುಗು ಪಾಂಡವೆರ್ ಸರಿ
 ಸರಿಟ್ ಸಂತೊಸುಡಿತ್ತೊನುಂದೇ
 ಕುಸಲ್ ಪಗಡೆನ್ ಗೊಬ್ಬಡಾಕ್‌ಲ್ ಈಡೆ ಬತ್ತೊಂದು ||

1

ಅಕ್‌ಲೆ ವೈಬವೊನಕ್‌ಲೆ ಯಾಗೊದ
 ಬರಮುನೆಂಕುಲು ಇಂದ್ರಪ್ರಸ್ತೊಡು
 ತೆರಿದ್ ಸಂತೊಸುಲಾದ್ ಪಾಂಡುನ ಜೋಕುಲೆನ್ ಯಾನ್ ||
 ನಿನನ್ ಕಡಪುಡುದೀಡೆ ಲೆತೊನುದು
 ಬರಿಯೆರೆಗ್ ನಿನಡೇನ್ ಪನ್ನುನೆ
 ಕುಸಲ್‌ಡಾಕ್‌ಲ್ ಪಗಡೆ ಗೊಬ್ಬುದು ಮೂಲು ಉಂತೊನಡ್ ||

2

ಪಾತೆರೊನೆ ಕುರ್ತೆಲ್‌ದ ನಾತೊನೆ
 ಪೋಡಿಗೆದ ಬಯೊಟಿತ್ತೆ ಮುರುದುದು
 ಮಾರಿ ಮುಸುಕುನು ದೆಪ್ಪಿ ಬುದ್ಧಿನ್ ಏರ್ ಕಲ್ಪಯೆರ್ ||
 ಮೋಸೊದಾ ಬಲೆ ನಿನ್ನ ಮಗನವೆ
 ಈಯೆ ತಿಕ್ಕೆದ್ ಬೂರೈ ಸಿವ ಸಿವ
 ಏರ್ ಪಂಡನೆ ಜುಗರಿ ಕುಸಲ್‌ದ ಗೊಬ್ಬು ಪಗಡೆದವೆ ||

3

ಈಯೆ ಬೀಮಾರ್ಜುನೆರೆ ಸುದ್ದಿಗ್
 ಪೋಪುನವು ಮರತ್ತೊ ಗ್ರೇಯಿಪು
 ಹಾಲ್ ಮಲ್ತನೆ ಹಸ್ತಿನಾವತಿಡಿತ್ತಿ ಸಂಪೊತುನು ||
 ಮಾತ ವೈಬವೊ ಮಣ್ಣೊ ಪಾಲೆ
 ಆವು ನಿಸ್ಸಯೊ ಏರ್ ಪರ್ಕೆರ್
 ಪಾಡೈರಿಂಚಿನ ಇಸೊತ ಬಿತ್ತನ್ ಪನ್‌ಲ ದ್ರತರಾಸ್ತ್ರ ||

4

ದಾಲ ಪೋಡ್ಯಡ ವಿದುರ ನೆಟ್ಟಲ
 ಮೋಸೊ ದಾಯ್ತಲ ಇದ್ದಿ ನಂಬುಲ
 ಬೀಮ ಪಾತೆರ್ ಸುದ್ದಿ ದಾಯೆಗ್ ಅಕ್‌ಲ್ ಎನ್ನಕ್‌ಲ್ ||
 ಪೊರುಲುದಾ ಈ ಮಂಟಪೊಡು ಸರಿ-
 ಟಕ್‌ಲ್ ಒಟ್ಟುಗು ಸೇರ್ದ್ ಪಗಡೆನ್
 ಕುಸಲ್‌ಗಾದೇ ಗೊಬ್ಬೆರ್‌ಡ ಪನ್ ದಾನೆ ದೋಸೊಂದು ||

5

ಗೊಬ್ಬುನೆನೆ ಸುರು ಕುಸಲ್‌ಗಾಂಡಲ
 ಬುಕ್ಕೊ ಗಾತಿಯೆ ಆವು ಜುಗರಿಡ್
 ಮರೊಗೇ ಕಂತ್‌ನವೆ ಸಪಳೊನು ಪತ್ತಾದುಂತವನ ||
 ನೆಟ್ಟ ವಂಸೊನು ಕುಟ್ಟಿ ಕೊರ್ಪುನ
 ಇದ್ದಿ ಪನ್ನನ ಪಗಡೆ ಗೊಬ್ಬುನ
 ನಿಕ್ಕಾ ಎಡ್ಡೆಂದಾಂಡ ಪೋವನೆ ಯಾನ್ ಅಕ್‌ಲ್‌ಡೆ ||

6

ಪಾಂಡವೆರ್ ಬರಡೀಡೆ ಅಕ್‌ಲೆನ್
 ಯಾನ್ ಪ್ರೀತಿಡ್ ಮಲ್ಪಿ ಸಮ್ಮನೊ
 ಈಯೆ ತೂವನೆ ನಿನ್ನ ಕಣ್ಣೆಡ್ ದಾಯೆ ಅಲ್ಮಾನೊ ||
 ಆಕ್‌ಲೆಡ ಗೊಬ್ಬೊಂದು ಎನ್ನವೆ
 ಜೋಕುಲೆಗ್ ಲಡಯಾವು ಪನ್ನುನೆ
 ಗ್ರೇಯ್ಪುನವೆ ಬೊಡ್ಡಿತ್ತೆ ಅಕ್‌ಲೆನ್ ಲೆತೊನುದೀ ಬರೊಡು ||

7

ವಿದುರೆ ಗುರು ಬೀಸ್ಮೆರೆಡ ಸಂಗತಿ
ತೆರಿಪದಾನಗ ಅಕ್ಲ್ ಪಂಡೆರ್
ಕುಟುಮೊದವೆ ಅಪಮುರ್ತ್ಯು ಇಂಚಿನ ಕೆಲಸೊ ಮಲ್ಪುವನೆ ||
ಕುರುಡೆನೇ ಕುರುವಂಸೊ ತೆಗ್ಲೆನ್
ಕಿನಿಕಿಯೆರೆನೀ ಮನಸ್ ಮಲ್ತೆನೆ
ತರೆಟ್ ಬರೆಯಿನೆನಿರೆಟ್ ಪೂಜ್ಯೆರೆ ತೀರೊ ಪನ್ ವಿದುರ ||

8

ಆಯಿಲೆಕ್ಕಾವಡ್‌ಯ ಅಕ್ಲೆನ್
ಈಡೆ ಲೆತೊನುದು ಬಲಯ ಪನ್ನಗ
ಯೋಗಿಲೆಗ್ ಸಮನಾಯಿ ವಿದುರೆನೆ ಇಂದ್ರ ಪ್ರಸ್ತೊಗುಲ ||
ತೇರ್‌ಡೇ ಕುಲ್ಲೊಂದು ಪೋಯೆನೆ
ಪಾಂಡವೆರ್ ತೂದಾಯನುಲಯಿಗ್
ಪ್ರೀತಿ ಬಗ್ಗಿಡ್ ಕನತ್ ಕುಲ್ಲದ್ ಮಲ್ತೆರುಪಚಾರೊ ||

9

ಅಜ್ಜೆ ನೇಲ್ಯಮ್‌ರಾಲ ಗುರುಕುಲು
ಕರೈ ಸೌಬಲೆ ಕೌರವೇಂದ್ರೆಲ
ಬುಕ್ಕೊಲಾಯನ ಮೆಗ್ಯನಾಕ್‌ಲ್ ದೇವಿ ಗಾಂದಾರಿ||
ಸೌಕ್ಕೊಡುಲ್ಲೆರೊ ಬಾನುಮತಿಲಾ
ಮೆಗ್ಗಿನಕ್‌ಲಾಲೆನವೆ ಮಂತ್ರಿಲು
ಸೈನ್ಯೊದದಿಕಾರಿಗುಳು ಪ್ರಜೆ ಪರಿವಾರೊ ಮಾತೆರ್‌ಲ ||

10

ಪೂರ ಸೌಕ್ಕೊನೆ ಪನ್ದ ಕನತ್‌ನ
ಕಾಣಿಗೇನ್ ಧರ್ಮಜಗ್ ಕೊರೈನೆ
ಬಾರಿ ಸಂಗತಿ ಮಾತ ಕೇಂಡ್‌ದ್ ಒಣಸ್ ಮಲ್ಪಯೆರ್||
ಮಾತೆರೆಡ ಪಾತೆರ್‌ದ್ ವಿದುರೆನೆ
ಚೋಕುಲೆನ್ ತೂದಾಯೆ ಸಂತೊಸು
ಡೇತೊ ಪುಗರ್‌ದ್ ರಾತ್ರೆ ನಿದೆರಿಯೆ ಬತ್ತಿ ಬಚ್ಚೆಲ್‌ಡ್ ||

11

ಆನಿದಾ ಮನದಾನಿ ಕಾಂಡೆನೆ
ಮಾತೆರೆನ್ ಕುಲ್ಲಾದ್ ನಿಕ್ಲೆನ್
ಪ್ರೀತಿಡೇ ಲೆತೊನುದು ಬರೈರೆ ಪನ್ತೆ ದ್ರತರಾಸ್ತೆ||
ರಾಜ ಸೂಯೊಡು ಆಯ್ ಬಚ್ಚೆಲ್
ಪೂರ ಅರಪಯೆರಾದ್ ಕುಸಲ್‌ಡ್
ಜೂಜಿ ಗೊಬ್ಬುದು ಆಯ ಬಾಲೆಲೆನೊಟ್ಟುಗುಪ್ಪೆರೆಗ್ ||

12

ಎನನ್ ಕಡಪುಡುದಾಯೆ ಪನ್ನೆನೆ
ನಿಕ್‌ಲ್ ಬತ್ತೆರ್‌ಡೆಡ್ ಬಂದುಲೆ-
ನಪಗ ತೂವೊಲಿ ವೈರಿನಕ್‌ಲೆಗ್‌ಲಾವು ಪೋಡಿಗನೆ ||
ಮೆಗಿಪಲಯ ಚೋಕುಲೆನ ಪ್ರೀತಿದ
ಪುದರ್ ಕೀರ್ತಿಯೆ ದಿಂಜು ದುಂಬುದ
ದಿಲಿಪೆ ದಸರತೆ ದುಂದುಮಾರೆರ್ ಪಡೆಯಿನಂಚಾವು ||

13

ನಿಕ್‌ಲೆನಾ ನೇಲ್ಯಮ್ ಪಂಡನೆ
ಗುರುಕೃಪೆರ್ ಬೀಸ್ಮೆರೆಗ್ ಮನಸ್‌ಡ್
ಸರಿಯೆ ತೋಜಂದಕ್‌ಲ್ ಪಂಡೆರ್ ಬೊಡ್ಡಿ ಬೊಡ್ಡಿಂದ್||
ಸಕುನಿ ಕರ್ಣೆಲ ಮನಿತ್‌ಚೆರ್ ನಿಜೊ
ನಿಕ್‌ಲ್ ಮಾತೆರ್ ಬರೊಡು ಹಸ್ತಿನ
ಪುರೊಕು ಪಂಡೆನೆ ಪಾಂಡವೆರೆಡ ವಿದುರೆನೊತ್ತಯೊಡು ||

14

ಬರೊಡು ಪನ್ತನೆ ಎಂಕ್ಲೆನಮ್‌ರೆ
ಪಲಯೆನೇ ನೇಲ್ಯಮ್‌ರತ್ತೊಯೆ
ಮೆಗಿಯೆ ಚೋಕುಲು ಪನ್ದ ಆರೆಗ್ ಪ್ರೀತಿ ಎಂಕ್‌ಲೆಡ್||
ಸಾಪೊನೋ ಅತ್ತವುಲು ವರೊನೋ
ಆವು ತಿಕ್ಕಡ್ ಎಂಕ್ಲು ಆಡೆಗ್
ಪೋಪುನವೆ ಎಡ್ಡೆಂದ್ ಒಪ್ಪಿಯೆ ಧರ್ಮನಂದನೆನೆ ||

15

ಪಗಡೆ ಗೊಬ್ಬುನ ಬೋಂಟಿ ದೇರುನ
ಅಮಲ್‌ದೆಪ್ಪುನ ಪೊಣ್ಣು ಮರ್ಲೆಲ
ಪಣವುದಾಸೆಲ ನ್ಯಾಯೊ ಕೇನುನ ಬುಕ್ಕೊ ಪೌರುಸೊಲ||
ಸುರುಕು ಎಡ್ಡೆನೆ ಏಳ್ ಎಸನೊಲು
ಕಡೆಕ್ ಹಾಲೇ ಆಪುನೆಂದ್‌ದ್
ವಿದುರೆ ಜಾಗ್ರತೆ ಪಂಡೆ ಏತೆಲ ಧರ್ಮನಂದನೆಗ್ ||

16

ದುಸ್ಪೆರಾ ಕೌರವೆರ್ ಸಕುನಿಯೆ
ಮಲ್ಪುನಯೆ ಸೀಂತ್ರಿನ್‌ಲ ಸೈಂದವೆ
ದುಸ್ಯಲೆನ ಕಂಡನಿಯೆಗಾತಕೆ ಕರ್ಣೆ ದುರ್ಜನೆನೆ ||
ಬೀಸ್ಮೆದ್ರೋಣೆರ್ ರಾಜ ತಂತ್ರೊದ
ಉರುಡೇ ತಿಕ್‌ದಕ್‌ಲ್ ಬೂರ್ದೆರ್
ನಿನ್ನ ನೇಲ್ಯಮ್‌ನವೆ ಕಣ್ಣೆದ ನೀರ್ ಮುದಲೆದವೆ ||

17

ಕರ್ಣಿ ಕೌರವೆ ಸಕುನಿ ಮಾತೆರೆ
ಗುಟ್ಟು ಲೋಕೊಗೆ ತೆರಿವು ಆಂಡಲ
ಇತ್ತೆ ನೇಲ್ಯಮೈರೆನ ಕೈತಡೆ ಪೋಪುನೆಡ್ಡೆತ್ತೊ ||
ನಿಕಲೆ ಮಂತ್ರಿಲೆಡಿತ್ತೆ ಕೇಂಡ್‌ದ್
ಮೆಗಿಯನಕ್‌ಲೆನ್ ಒಪ್ಪುಸಾದ್‌ಲ
ಪಿದಡುನೆಡ್ಡೆನೆ ಪಂಡೆ ವಿದುರೆನೆ ಧರ್ಮನಂದನಡ ||

18

ಕೇನಿ ಬೀಮಾರ್ಜನೆರ್ ನಿಕಲೆಗ್
ಪೋಪುನವು ಸಲ್ಮತನೊ ದುಸ್ಪೆರೆ
ಕೋಟಿದುಲಯಿಗ್ ಬೀಸ್ಮದ್ರೋಣೆರ್ ಉಲ್ಲೆರಾಂಡಕ್‌ಲ್ ||
ಮೋಸೊ ಕಪಟೊಗು ತಿಕ್‌ದ್ ಬೂರ್ದೆರ್
ಆ ಪಟಿಂಗೆರೆ ಕೂಟೊ ಲಡಯಿಗ್
ಸಾದಿ ಮಲ್ತೆರಡಲ್ಪ ಯುದ್ಧೊನು ಮಲ್ಪುನವು ಸಮನೊ ||

19

ಅಣ್ಣ ಸೈರೊದ ನಿರೆಲ್‌ಗೇಪೊಲ
ಚೇಸ್ತೆ ಬೇತೆನೆ ಆವೊ ಎಂಕ್‌ಲೆ-
ಗಿತ್ತೆ ನಿನ್ನನೆ ತೂದು ನಡಪುನ ಮಾತ್ರೊ ಸ್ವಾಸಂತ್ರೊ ||
ನಿನ್ನ ಕಸ್ಪೊನೆ ಎಂಕ್ಲೆ ಕಸ್ಪೊಲ
ನಿನ್ನ ಸುಕೊನೇ ಎಂಕ್ಲೆ ಸುಕೊಲಾ
ನಿನ್ನ ಸಂತೊಸು ಎಂಕ್ಲೆ ಸಂತೊಸು ಪಂಡೆನಾ ಬೀಮೆ ||

20

ಲೆಪುಡವುನೆ ನೇಲ್ಯಮೈ ನಮ್ಮನ್
ಕವುರವೆರ್ ಅನ್ಯಾಯೊಗಾರೆರ್
ನಮನ್ ಸೋಲ್ಪಯಿರಿತ್ತೆ ತೀರುವೊ ಆ ಪಟಿಂಗೆರೆಗ್ ||
ನಿಕಲ್ ಒಡವುಟ್ಟುಗುಳು ಎನ್ನವೆ
ಹಿರಿಯೆರೇ ಲೆಪುಡಾಯಿನಾಡೆಗ್
ಪಿದಡುನವೆ ಎಡ್ಡೆಂದ್ ನಿಸ್ಸಯೊ ಮಲ್ತೆ ಪೋಪುನೆನ್ ||

|| ಪಾಂಡವೆರ್ ಹಸ್ತಿನಾವತಿಗೆತ್ತೆರ್ ||

ಇರ್ಲ್ ಕರಿದ್‌ಲ ಬೊಲ್ಪು ಆನಗ
ಎಡ್ಡೆ ಮೂರ್ತೊನು ತೂದು ಪಿದಡುನ
ಅಟ್ಟಣೆನ್ ಪಾಂಡವೆರ್ ಮಲ್ತೆರ್ ಒಟ್ಟು ಸೇರೊಂದು ||

ಮಂತ್ರಿ ಸಾಮಂತೆರೆಡ ಜಾಗ್‌ತೆ
ಪಂಡ್‌ದಾದ್‌ಲ ಮಾತೆರೊಟ್ಟುಗು
ಇಂದ್ರಪ್ರಸ್ತೊನು ಬುಡುದು ಪಿದಡ್‌ನಗಾಂಡ್ ರಣಬೇರಿ ||

1

ಆನೆ ಸೇನೆದ ಬಲೊಟು ಪಿದಡ್‌ನ
ಗಾಂಡ್ ಗೌಜಿಡ್ ಬೀಮ ಪಾರ್ತೆರ್
ತೇರ್‌ದೆಡತ್‌ಡ್ ಬಲತ್ ಬೀಜೈರ್ ಚೌರಿಡಿರ್ದೆರ್‌ಲ ||
ಸೇನೆದುಂಬುಡು ಅಯಿನ ಎದುರುಡು
ಬಾಲೆಲುಂತ್ಯೆರ್ ನಕುಲೆ ಸೈನ್ಯೊನು
ಸಾಲ್‌ಡುಂತಯೆ ಆಯ ಪಿರವೂಡು ಉಂತ್ಯೆ ಸಹದೇವೆ ||

2

ರಡ್ಡ್ ಕಡೆಟ್‌ಲ ಸಾಲ್ ಸಾಲ್‌ಡೆ
ಬನ್ನಗನೆ ಸರಿ ರಾಣಿ ವಾಸೊದ
ಪೋಣ್ಣಲೆನ ದಂಡಿಗನೆ ಬತ್ತನ ಪೂರ್ಲು ತೂಪುನವೆ ||
ತುತ್ತಿ ಸೀರೆದ ಮಲ್ಲತಿಗೆಡ್‌ಲ
ಪದ್ವೊಯಿದ ಐಸುರೊಡು ಬಾರ್‌ದ್
ಕಟ್ಟಿ ಕುಜಲ್‌ದ ಗತ್ತಡೋರೆದ ನೋಟೊ ತೂವೊಂದು ||

3

ಕಮ್ಮೆನೊನೆ ಸೈರೊಡ್ಡು ಪಿದಡ್‌ನ
ಪೋಣ್ಣಲೇತೋ ದಂಡಿಗದ ಸರಿ
ಸುತ್ತಡಿತ್ತೆರ್ ದ್ರೌಪದಿನವೇ ಮೋನೆ ತೂವೊಂದು ||
ಬೇರಿ ವಾದ್ಯೊ ನಗಾರಿ ಮಾತಲ
ಬಾರಿ ಗೌಜಿಡ್ ಕೇನ್‌ಲಾನಗ
ಸಾಗ್‌ದಾಂಡ್‌ಲ ಪಯಣೊ ದುಂಬುಗು ಪೋದು ಎತ್ತನೆನೆ ||

4

ಹಸ್ತಿನಾವತಿ ರಾಜ್ಯೊದುಲಯಿಗ್
ಬತ್ತಿ ಸಾತ್‌ಗ್ ತೋಜಿ ಸಕುನೊನು
ಗಣ್ಯೊ ಮಲ್ತೆಜೆರಕ್‌ಲ್ ವಿದಿಯೇ ಕಣ್ಣ್ ಕಟ್ಟಿಯಿನೆ ||
ಸೂತ ಪುಗೆ ಅಲೆಸೊಂದು ತೋಜಿದ್
ಸೇನೆ ರಚ್ಚಾ ಪಚ್ಚೆ ಆಂಡ್‌ಲ
ಕೀರಿ ಕುಟ್ಟಿಯೊ ಆನೆಲಾಪಗ ತೇರ್ ತಾರ್ದಾಂಡ್ ||

5

ಕಕ್ಕೆ ಕುರುಕುಲು ರಾಯೊನೆಡತ್‌ಗ್
ಪಳ್ಳೆ ಕುದೈರ್ ಬಾಂಗ್ ಪತ್ತಿಯೊ
ಸರ್ದೆ ಜಿಡೆದತ್ತನೆನ್ ತೂಯೆರ್ ಒಟ್ಟುಗಿತ್ತೆನವೆ ||

ಮಲ್ಲ ದೋಯಿಸೆರಪಗ ಪಂಡೆರ್
ನಿಕ್ಕೆಗೆಡ್ಡೆನೆ ಅತ್ತ ಪೆರಪನೆ
ತಿರುನ್ನವು ಎಡ್ಡೆಂದ್ ಸಕುನೊನು ತೂದು ಪನ್ನಗನೆ ||

6

ದಾಯೆ ಪಿರ ಪೋಪುನೆನೆ ಏರೆನ
ನಾಲಿ ದೈವೊದ ಉರುಗುಂದುದು
ಪೂರ ನಿಷ್ಟಯೊ ದುಂಬೆ ಆದುಂಡುಂದು ಧರ್ಮಜೆನೆ||
ಲೆಪುಡಯಿನೆ ನೇಲ್ಯಮೈರೆಂಕುಲು
ಸಕುನೊಲೆನ್ ನಂಬೊಂದು ಪಿರ ಪೋ-
ಪುನೆನೆ ಸರಿಯತ್ತಂದ್ ಪಂಡ್ ಪಂದ್ ಗೌಜಿ ಲಕ್ಕಾಯೆ ||

7

ಹಸ್ತಿನಾವತಿದುಲಯಿ ಬತ್ತನ
ಸುದ್ದಿ ತೆರಿಪನಗಲ್ಲ ಕೌರವೆ
ಕಟ್ಟದೆನೆ ಗುಡಿ ಮುಕುಲೆಗುಂತ್ಯೆರೆ ಬಾರಿ ಸಂತೊಸುಡು ||
ಅಲ್ಲ ಬೀಸ್ಮೆಲ ಗುರುಕುಲಿರ್ದೆರ್
ಕರ್ಣೆ ಸೈಂದವೆ ಮಾತ ಸೇರ್ ಪಂದ್
ಎದೊನುಂದೇ ಕೊಂಬು ವಾದ್ಯೊಡು ಉಲಯಿ ಬರ್ಪಯೆರ್

8

ಸೇನೆ ಪಿದಯಿದ ಅಂಗಣೊಡು ಸರಿ
ಸಾಲ್ಡುಂತುದು ಪಾಂಡು ಬಾಲೆಲು
ರಾಜ ಮರ್ದಿದುಲಯಿ ಬನ್ನಗ ವಾದ್ಯೊ ಸುರುವಾಂಡ್ ||
ಆರತಿನ ಬೆಳಗಯೆರ್ ಪೋಣ್ಣಲು
ವೇದೊ ಮಂತ್ರೊ ಸುಲೇಕೊ ಗೌಜಿಡ್
ದ್ರೋಣ ಗೌತಮನಕ್ ಪಂಡ್ ಪಂದ್ ಉಲಯಿ ಪೊಗ್ಗಯೆರ್

9

ಪೊಗ್ಗನಗ ಆರತಿನ ಪತ್ಯೆರ್
ಮುತ್ತು ದೇಸೆನ್ ಪಾಡ್ಡೆ ಮುಂಡೊಗು
ಬೊಟ್ಟು ಪಾಡ್ಯೆರ್ ಪೋಣ್ಣಗುಳು ಸೋಬಾನೆ ಪಂಡೊಂದು ||
ಪೊಗ್ಗನಾಕ್ ಉಲಯಿ ಪೀಟೊಡು
ಕುಲ್ಲದಿತ್ತನ ಕುರುಡ ರಾಜನ
ಕಾರ್ಪತ್ತಂದ್ ಕನತಿ ಕಾಣಿಗೆ ಮಾತ ದೀಡಿಯೆರ್ ||

10

ಕುರುನ ಕುಟುಮೊದ ಬೊಟ್ಟು ಬಲಮಗ
ಬರತ ವಂಸೊದ ಕಡಲ ಚಂದ್ರನೆ

ಬಲ ಬಲಂದ್ ತರ್ಕಪತ್ತಿಯೆ ಧರ್ಮಂದನನ್ ||
ಬಲಯ ಓ ರಣ ಬೀಮ ವೈರಿಲೆ
ಕನೊತ ಸಿಮ್ಮೊನೆ ಪಾರ್ತೆ ಬಲಮಗ
ನಕುಲಸಾದೇವೆರ್ಲ ಬಲೆ ಬಲೆ ಪನ್ನ ತರ್ಕೊಂಡೆ ||

11

ಕುರುಡೆ ಪರಡ್ ಅರದ್ ಪತ್ತನ-
ಗಪಗ ಸಂತೊಸುಲಾದ್ ಮಾತೆರೆ
ಮನಸ್ಡಿತ್ತನ ತಾಪೊ ರಟ್ಟೆದ್ ಮೋನೆ ಗೆಲುವಾಂಡ್ ||
ದ್ರೋಪದಿನ್ ಜೋಕುಲೆನ್ ಪ್ರೀತಿದ
ಪಾತೆರೊಡು ಬೆರಿ ನೀಸೈ ದೀಡ್ಡನ
ಕಾಣಿಗೆನ್ ಕೈಕೊಂದುಲಕ್ಲೆನ ತರೆಕ್ ಕೈದೀಡೈ ||

12

ಮಾತೆರ್ಲ ಗಾಂದಾರಿ ದೇವಿನ್
ತೂಲೆ ಪಂಡ್ ಪಂದ್ಲಾಡೆ ಕಡಪುಡಿ
ಸಾತ್ಗೆತ್ತೆರ್ ಮಾತ ಗಾಂದರಿ ದೇವಿನರಮನೆಗ್ ||
ಬತ್ತದಾಲೆಗ್ ಕೊರ್ದು ಕಾಣಿಗೆ
ಅಡ್ಡೊ ಬೂರ್ದಗ ಮಂಗಳಾರತಿ
ಕೊರ್ದಯಲ್ ಪೊಂಜೊವೆಡ ಮಂಜನೆ ಸೇಲೆ ಮಾಡಾದ್ ||

13

ರಾಣಿ ದ್ರೌಪದಿ ಬಾನುಮತಿನಲ
ಆಲೆ ಬಾಲ್ಟೆನ್ ಮರ್ಮಲಲ್ಲೆನ್
ಮಾತ ಮೈತ್ತನನಕ್ಲೆ ಜೋಕುಲು ಬುಡೆದಿನಾಕ್ಲೆನ್ ||
ತೂದು ಕನತ್ನ ಉಡಿಗಿರೆನ್ ಸರಿ
ಮಾತೆರೆಗ್ ಕೊರ್ದಾದ್ ಕುಸಲ್ ಪಂದ್
ಪಾತೆರೊಂದೇ ಉಲಯಿ ತಿರ್ಗೈರ್ ಕುಂತಿನೊಟ್ಟಿಗೆನೆ ||

14

ಧರ್ಮಜೆನೆ ಕೌರವನ ಕೈ ತಡೆ
ಬನ್ನಗನೆ ಕಾರ್ವತ್ತೆ ಕುಂತಿಗ್
ಅಡ್ಡೊ ಬೂರಿಯೆ ಬಾರಿ ಬಕ್ತಿಡ್ ಪೋರ್ಲು ಪಾತೆರ್ ಪಂದ್ ||
ಮುರ್ದೊ ಬೂರ್ಡ್ಡಯೆ ನಿನ್ನ ಬಲೆಕೇ
ಕೆರುನ್ನಟ್ಟನೆ ಮಲ್ಲು ಇತ್ತೆನೆ
ದುಸ್ಸ ಕೌರವ ಕೆಬಿಕ್ ಸಕುನಿಯೆ ಪಂಡೆ ಗುಟ್ಟುಡುಲ ||

15

ದುರುಳ ಬುದ್ಧಿದ ಇಸೊನು ತೆರಿವೆರೊ
ನಡತೆಡೆಡೆದ ಜನೊಕುಲೇಪೊಲ

ಅಕ್ಲೆ ಪಾತೆರೊ ಒನಪುಗೊಯ್ಯರೊಗೇತೊ ಮರ್ಲಾದ್ ||
 ಮುಕುಲು ಸಂಪಯಿ ಮರತ ಸುತ್ತಲ
 ತಿರುಗುನವೆ ತುಂಬಲೆನ ನಮುನೆಡ್
 ಅರಮನೆಡ್ ತಿರುಗೊಂದು ಇತ್ತೆರ್ ಪಾಂಡು ಬಾಲೆಗುಳು ||

16

ಊರ್ದ ಪ್ರಜೆಕುಲು ಬತ್ತೆರಾಡೆಗ್
 ಕಾಣೆಗೆನ್ ಕೊರೈಲ ಮುಕುಲೆಡ
 ಪ್ರೀತಿಡೇ ಕೌರವೆರ್ ಇತ್ತೆರ್ ಮಂತ್ರಿ ಪರಿವಾರೊ ||
 ರಾಜ ಕಾರಣೊದಕ್ಲ್ ಕವಿಜನೊ
 ಗಾಯಕೆರ್ ನಟ ನಟನೆದಾಕ್ಲ್
 ಕೂಡೈರೇತಲ ಧರ್ಮನಂದನೆ ಕುಲ್ಲದಿತ್ತನಡೆ ||

17

ಆ ದಿನೊನು ಪೊರ್ಲುಡುಲ ನೂಕೈರ್
 ಬಾರಿ ಸಂತೊಸುದೊಣಸ್ ತೆನಸ್ಡ್
 ಮಾತೆರೊಟ್ಟಿಗೆ ಸೇರ್ದ ಕುಸಲ್ಡ್ ಸುದ್ದಿ ಲಕ್ಕಾದ್ ||
 ಇರ್ಲ್ ನಿರ್ದೆಡ್ ಅರಸು ಧರ್ಮಜೆ
 ತನ್ನ ಅರಮನೆ ಮಗ್ಗರ್ನೆತ ಕನ
 ಕಟ್ಟನಗ ಎಚ್ಚರಿಗೆಡಾಯೆನೆ ಚಿಂತೆ ಮಲ್ತೊಂಡೆ ||

18

ಪುಲ್ಯ ಕಾಂಡೆನೆ ಲಕ್ಕದಪಗನೆ
 ಕರೊ ಕಿರ್ಯೆನ್ ತೀರ್ದಾನಗ
 ತನ್ನ ಆತ್ಮೊಗು ಕನತ ಪಗರಿಯೆ ಕಂತ್‌ದಾಯಿನೆನ್ ||
 ಲೆತ್ತಾದಾ ದೌಮೈರೆಡ ಪನ್ನಗ
 ಐಕ್ಯ ಸಾಂತಿದ ಹೋಮೊನೇನೇ
 ಮಲ್ಪೆ ದೈರೊಡು ಉಂತು ಪನ್ನಗ ಧರ್ಮನಂದನೆನೆ ||

19

ಸಾಂತಿ ಎಂಚಿನ ಇರ್ಲ್ ಕನಟ್ಲ
 ನಾರದಾರುಸಿ ಬತ್ತ ಪಂಡೆರ್
 ರಾಜ್ಯೊದೈಸುರೊ ಮಾತ ಎಂಕ್ಲೆನ ನಾಸೊ ಆವುಂದು ||
 ಈತ್ ಪಂಡೆನ ಕನೊನೆ ಬೂರುದು
 ಯಾನ್ ಗಡಿಬಿಡಿಯಾದ್ ಚಿಂತೆಡ್
 ಸೋಲ್ತುದುಲ್ಲೆನೆ ಎನ್ನ ಹಣೆಬರೊ ದಾನೆ ಪನಡೇನ್ ||

|| ಪಾಂಡವೆರ್ ಜೂಜಾಟದ ಸಬಾ ಮಂಟಪೊ ತೂಯೆರ್ ||

ಆತ್ ಪೊರುಗು ಅರಸು ಕಡಪುಡಿ
 ದೂತೆರಾಡೆಗ್ ಬತ್ತ ಪಂಡೆರ್
 ಸ್ವಾಮಿ ಬರೊಡುಗೆ ಈರ್ಲಾ ದ್ರತರಾಸ್ತ್ರರಮನೆಗ್ ||
 ಕೇಂಡಾದಾ ಧರ್ಮಜೆನೆ ಪಿದಡಿಯೆ
 ಬೀಮಪಾರ್ತೆರ್‌ನಕುಲ ಸಾದೇ -
 ವಾದಿನಕ್‌ಲೆನ್ ಮಂತ್ರಿಲೆನ್ ಪರಿವಾರೊಲೆನ್ ಕೂಡ್ತು ||

1

ಬತ್ತದಾ ದ್ರತರಾಸ್ತ್ರ ಕಾರ್ಗ್
 ಅಡ್ಲೊ ಬೂರ್‌ನ ಧರ್ಮನಂದನ
 ನಲ್ಲ ಬಲಮಗ ಪನ್ನ ಕುಲ್ಲಯೆ ತನ್ನ ಮಂಚವುಡು ||
 ದತ್ತ ಬಲತ್‌ಡ್ ಬೀಮ ಪಾರ್ತೆರ್
 ಬುಕ್ಕೊಲಾ ಸಹದೇವ ನಕುಲೆರ್
 ಕುಲ್ಲಿಯೆರ್ ಸರಿ ಕುರುಡೆ ನಂಜಿದ ಬುರ್ಡೆ ಪುಡಪಾಯೆ ||

2

ದುಸ್ಸ ಬುದ್ಧಿದ ಅರಸು ಕೌರವೆ
 ಕರ್ಣ ಸಕುನಿನ್ ಸಿಂದು ರಾಜನ್
 ತರ್ದದಕ್‌ಲೆಡ ಡೋಂಗಿ ಮೋಸೊದ ಜುಗರಿ ಮಂಡೊಗುಲ ||
 ಪರಕೆ ಪಂಡೆರ್ ಈಡ್ ಕಟ್ಟೆರ್
 ಗಣಪ ಯಕ್ಷಿಗ್ ಕಾಳಿ ದುರ್ಗ್
 ಬಲಿನ್ ಆವರೊ ನಾನ ನಮುನೆಡ್ ಮಾತ ಕೊರ್ದಾದ್ ||

3

ಜೂಜಿ ಗೆಲ್ವುನ ಮಂತ್ರೊ ಸಿದ್ಧಿಡ್
 ಮಾತೆರೆನ ಸರಿ ಕಣ್ಣ್ ಕಟ್ಟಿವಿ
 ಕಾರ್ನಿಕೊದ ವಸಿಕರೊತ ಉರ್ಕುನು ತಯರ್ ಮಲ್ಪಾಯೆ ||
 ಸತ್ಯೊ ಹೃದಯೊದ ಪಾಂಡು ಬಾಲೆಲು
 ದುಸ್ಸ ಕೌರವೆ ಇಂಚ ಮಲ್ತನ
 ಗೊಬ್ಬು ತೆರಿಜೆರ್ ಆಯೆ ಬತ್ತದ್ ಪನ್ನೆ ಅಮ್ಮಡನೆ ||

4

ಕೇನಿ ಅಮ್ಮೆರೆ ಮಯನ ಮಂಟಪೊ
 ದೇವ ಸಗ್ಗಿಡ್ ಆಯ್ ನಮ್ಮವು
 ಊರ್ದ ನರಮಾನಿಯೆರ್ ಮಲ್ತನ ಐಕ್ಯ ಸರಿಯಾವೊ ||

ಮೂಲು ಈರೆನ ಆಜ್ಞೆಡಾಯಿನ
ಜೂಜಿದಾ ಸಬೆಕ್ಂದ್ ಮಲ್ವಯಿ-
ನೇನ್ ತೂವೊಡು ಈರೆನೊಟ್ಟುಗು ನಮ್ಮ ಪಾಂಡವೆರ್ ||

5

ಆ ಸಬಾ ಮಂಟಪೊನು ತೂವೊಡೆ
ಊರುದಾ ಸಿಲ್ವಿಲೆನ ಕೆಲಸೊನು
ದೇವ ಮಾನವ ಬೇದೊ ಎಂಚಿನ ಸಿಲ್ವಿನಾಕ್ಲೆಡ್ ||
ಆ ಯುದ್ಧಿಸ್ವಿರೆ ಲಕ್ಶದಂತಿಯೆ
ರಾಜೆನಾ ದ್ರತರಾಸ್ತ್ರನೊಟ್ಟುಗು
ಮಾತ ಬತ್ತೆರ್ ಸಬೆತ ಮಂಟಪೊದುಲಯಿ ತೂಯೆರೆಗ್ ||

6

ನೀಲೊ ಕಲ್ಲ್ವನ್ ಮುಚ್ಚಿನಾ ನೆಲ
ಗೋಡೆ ವೈಡೂರೊಲೆನ್ ಕುಲ್ಲದ್
ನಾಲ್ ಮೆಯಿ ಮೆಂಚೊಂದು ಪಳ ಪಳ ಜಗ್ಗ ಜಗ ಜಗೊನೆ ||
ಜಾತಿ ಮುತ್ತುನು ನಡುಟು ಕುಲ್ಲದ್
ದಾರಗದ ಲೆಕೊ ಪೊರ್ಲು ಕಿರಣೊಲ
ಬೂರು ತೋಜುನ ಪ್ರಬೆನ್ ಪನಿಯೆರೆ ಏರೆಗರ್ತಾವು ||

7

ರತ್ನೊ ಜಾಲಿನ್ ಜಪುಡುದಿತ್ತೆರ್
ಪಚ್ಚೆ ಕಲ್ಲ್ವನ್ ಪಾಗರೊಗು ಸರಿ
ಕಟ್ಟೆನೇಟ್ಲ ನೆಗತ್ ತೋಜುನೆ ಪೊರ್ಲು ಮಂದಿರೊನೆ ||
ಆ ನೆಲಕ್ ಮುಚ್ಚಿದ್ವಾನ ಕಲ್ಲುಲು
ನೀಲೊ ರಂಗ್ಡ್ ಇತ್ತಾನೆಕ್ ಸರಿ-
ಯಾದ್ ಕೆಂಪುದ ಕಿರಣೊ ಬೂರ್ನಗ ಕಣ್ಣ್ ಕಂತುನವೆ ||

8

ಅಲ್ವ ಪೊರ್ಲದ ಪೂತ ಬಿತ್ತಲ್
ಸುತ್ತ ತಿರ್ಗುನ ಸಾದಿದವುಲೇ
ಇತ್ತಾನಾ ಕಿರೆತುಲಯಿ ಹಂಸೊಲು ಮಿತ್ತ್ ಗಿಳಿಮೈರೆ ||
ಗೊಬ್ಬನೆನ್ ತೂದಕ್ಲ್ ಪಂಡೆರ್
ಪೊರ್ಲಡುಂದುಲ ಮಯನ ಮಂಟಪೊ-
ಗಿತ್ತೆ ಸರಿಯಾದುಂಡು ಇಂದೆನ್ ಮಲ್ತನಕ್ಲೆರ್ ||

9

ಅಪಗ ಕೌರವೆ ಪಂಡೆನಕ್ಲೆಡ್
ನೆಲನ್ ನೀರ್ಂದವುಲು ನೀರ್ನ್
ನೆಲನೆ ಗೋಡೆನ್ ಬಾಕಿಲ್ಂದ್ ದ್ಧರ್ಮನಂದನೆ ||

ಪರಡಿಯೆರೆ ಬಲ್ಲಿಂದ್ ಮಲ್ವಯೆ
ನೆಲನ್ ನೆಲನೇ ನೀರ್ ನೀರೇ
ಸರಿಟ್ ತಿರ್ಗೊಲಿ ಗೋಡೆ ಗೋಡೆನೆ ಪನ್ದ ತೆಲಿತೊಂಡೆ ||

10

ಸಿಲ್ವಿ ಕೆಲಸೊಡು ರತ್ನೊ ಮುಚ್ಚಿನ
ಪೊರ್ಲು ಮಂಟಪೊನಿನಿಯೆ ತೂಪುನೆ
ಮಲ್ತೆರೆಂಚನೊ ಏರ್ ಮಲ್ತೆರೊ ಸಿವ ಸಿವಾ ಪನ್ದ ||
ಉದ್ದಗಲೊ ಕೂಡ್ಲಾದ್ ಆಯೊದ
ಲಚ್ಚಣೊಡು ಸರಿ ಉಂಡು ಮಲ್ತನ
ಸಿಲ್ವಿ ಸಾಸ್ತೊಡು ಕೊರತೆ ತೋಜುಜಿ ಪಂಡೆ ಧರ್ಮಜೆನೆ ||

11

ದ್ರೋಣೆ ಬೀಸ್ಮೆಲ ಕರ್ಣೆ ಸೈಂದವೆ
ವೀರೆನಸ್ವತ್ತಾಮೆ ನಾ ನರ
ಕಾಸುರನ ಮಗೆ ಬತ್ತೆ ಬಾಹ್ಲಿಕೆ ಚೈದ್ಯ ಮಾಗದೆರ್ ||
ಕೋಸಲೆನೆ ಸಂವೀರೆರೆತ್ತೆರ್
ಊರುದೂರುದ ಅರಸುನಾಕ್ಲ್
ಓಲೆಗೊಗು ಕೂಡೆನೆಟ್ ಗಡ್ಡೆಡೆ ಆಂಡಲಾ ಸಬೆನೆ ||

12

ತೆರಕಯಿದ ಜಾಗೆಲೆಡ್ ಕುಲ್ಯೆರ್
ಸಬಿಕೆರಲ್ವನೆ ನಿಲಿಕೆ ದಿಂಚೈರ್
ಜುಗರಿ ಮಂಟಪೊದುಲಯಿ ಲೆಕ್ಕೊಗು ಮೀರ್ದಾಂಡವುಲು ||
ಪಿದಯಿ ರತಿಕೆರ್ ರಾವುತೆರ್ ಸರಿ
ಸರಿಟ್ ಕಾರ್ಡೆತಕ್ಲ್ ಉಂತ್ಯೆರ್
ಸುರಪನೋಲೆಗೊ ಚಾವಡಿದ ಲೆಕೊ ಆಂಡಲಾ ಸಬೆನೆ ||

13

ಜೂಜಿ ಗೊಬ್ಬುಲು ಒಂಜಿ ದಿಕ್ಕಡ್
ಆಪೆಕ್ಡ್ ಸರಿ ಗದ್ಯೊ ಪದ್ಯೊಲು
ಈಪೆ ದಿಕ್ಕಡ್ ಸೂಳೆ ಮೇಳೊದ ನಾಟ್ಯೊ ಸಂಗೀತೊ ||
ಎದುರು ಕಡೆಟೀ ತರ್ಕೊ ಚರ್ಚೆಲು
ನಡುಟು ಎತ್ತರೊ ಕೌರವೇಂದ್ರನ
ಬರುಮುಡೆದುರುಡು ಪಗಡೆ ಮಂಡೊಡು ಕಾಯಿನುಂತದೆರ್

14

ಪಗಡೆ ಗೊಬೈರೆ ಬಿಸೆ ಧರ್ಮಜೆ
ಬರಡ್ ಬರ್ಪೆಡ ಗೊಬೈರಿತ್ತೆನೆ

ಸಬೆಟ್ ಕುಸಲ್ಡ್ ಗೊಬ್ಬುಗೊಂದ್ಲ ಪಂಡೆನಾ ಸಕುನಿ ||
 ಕುಸಲ್ಡೇರ್ಲ ಪಗಡೆ ಗೊಬ್ಬೆರೆ
 ಬರುಪುಜೆನೊ ಆ ಜನೊನೆ ಮುಗೊಗು
 ಸಮಾನೆ ಪನ್ನೆರ್ ತೆರಿನ ಜನೊಕುಲು ಸಕುನಿ ಪನ್ನಗನೆ ||

15

ಬರ್ಟನೆಕ್ ಅಡ್ಡಿದ್ಡಿ ಬರೊಲಿಯ
 ಎಡ್ಡೆ ಜನೊಕುಲೆಡಾಂಡ ಮಾತೊನೆ
 ಗೊಬ್ಬಿಯೆರೆ ಬರುವೇನ್ ವಂಚನೆಡಕ್ಲ್ ನಿಕ್ಲತ್ತೊ ||
 ಕುಟಿಲೆರಡ ಸೇರುವೆರೊ ಸತ್ಯೊದ
 ಗುಣೊತ ಜನೊಕುಲು ಯೋಗಿಲೇಪೊಲ
 ನಡತೆ ಹಾಲ್ದ ಜನೊಟ ಕೂಡ್ಡೆರೊ ಪಂಡೆ ಧರ್ಮಚೆನೆ ||

16

ಎಡ್ಡೆ ಗುಣೊತಕ್ಲಿತ್ತೆ ನಿಕ್ಲಲೇ
 ಮಲ್ಲ ಕುಟಿಲೆರ್ ಎಂಕ್ಲ ಯೋಗಿಲು
 ಇತ್ತೆ ನಿಕ್ಲಲೇ ರಾಗೊ ದ್ವೇಸೊಡು ಎಂಕುಲುಲ್ಲೊತ್ತೊ ||
 ನಿಕ್ಲಲ್ ಎಂಕುಲು ಪನ್ನಿ ಬೇದೊನು
 ಬುಡುದು ನಮೊ ನಮೊ ಒಂಜೆ ಪನ್ನುನ
 ನಡತೆಡುಪ್ಪುಗೊ ಮೂಲು ಪಂಡ್ಡ್ ತೆಲಿತೆ ಕುರುರಾಯೆ ||

17

ಅವ್ವೆ ಎಡ್ಡೆನೆ ಬಂದುಲೇಪೊಲ
 ಒಟ್ಟುಗೊಂಜೇ ಪನ್ದ ನೆನೆಪೊಡು
 ಗೊಬ್ಬುನವು ಎಡ್ಡೆತ್ತ ಪಗಡೆನ್ ಕೇನ್ ಕುರುರಾಜ ||
 ಪೊಣ್ಣ ಮರ್ದಾಲ ಹಾಲ್ ಸೀಲೊದ
 ಬುದ್ಧಿ ಕೆಟ್ಟೆನ ಜನೊಟ ದೋಸ್ತಿನ
 ಮಲ್ಪುನವು ಮರ್ದದಿಗ್ ಕೊರತೆನೆ ಪಂಡೆ ಧರ್ಮಚೆನೆ ||

18

ಜೂಜಿ ಗೊಬ್ಬುನ ಹಾಲ್ ಪಂಡ್ಡ್
 ಸಾಸ್ತೊದಾಕ್ಲ್ ನೀತಿ ಪನ್ನೆರ್
 ಯೋಗಿಲೆಗ್ ಅತ್ತಂದೆ ಪುಕ್ಕೇರ್ ಆಯಿನರಸುಲೆಗ್ ||
 ಬೋಂಟೆ ಪಗಡೆಲ ಪೊಣ್ಣ ಮರ್ದಾಲ
 ರಾಜನಕ್ಲೆಗ್ ಉಪ್ಪೊಡಾಯಿನ
 ಏರೆಗಿದ್ದಿಯೊ ಅಕ್ಲ್ ಮುಗೊಗು ಪಂಡೆನಾ ಸಕುನಿ ||

19

ಕೇನ್ ಧರ್ಮಜ ಲಡಯಿ ಜೂಜಿಗ್
 ಏರ್ ಲೆಪ್ಪೆರೊ ಅಕ್ಲೆನೆದುರುಗು

ಏವುರೊಡು ಬರ್ಪುನಯೆ ಚತ್ರಿಯೆ ನಿಕ್ಲ ತೆರಿಯಂದೊ ||
 ಜೂಜಿ ಗೊಬ್ಬೆರೆ ಲೆಪ್ಪೊ ಎಂಕುಲು
 ರಾಜ ಧರ್ಮೊನು ಒರಿಪುಲಯ ಈ
 ಆಪುಜಿಡ ಪೋಲಂದ್ ಪಂಡೆನೆ ಮೋನೆ ಪುಳಿಯಾದ್ ||

20

ರಾಜ ಧರ್ಮೊನೆ ಅಂದ್ ಕಪಟೊದ
 ಜೂಜು ಧರ್ಮೊದ ಮಗನೊ ಪುಳ್ಳಿಯೊ
 ದಾವು ಎಂಚಿನ ನಿಕ್ಲಲೆ ಡೋಂಗಿದ ಜುಗರಿ ಗೊಬ್ಬುಗುಲ |
 ರಾಜ ಮರ್ಮಾದಿವೆ ಪಂತೊದ
 ಜೂಜು ಉಂಡುಡ ಬಲೆಯೆ ಗೊಬ್ಬೆರೆ
 ಯಾನ್ ಜಾರುವೆನೆಂದ್ ಗೆರೆಪಡೆ ದೇವೆರೆನ ಆಜೊ ||

21

ಧರ್ಮನಂದನೆ ಪಾಡಿ ಪಂತೊನೆ
 ಸರ್ದೊ ನಾಸೊದ ಬಿತ್ತ ದುಂಬುದ
 ಕರ್ಮೊದಾ ಪಲೊ ಪಗರಿದಂಚೆನೆ ಕಂತ್‌ದಾಂಡತ್ತೊ ||
 ಧರ್ಮೊ ಸಾರೊ ವಿಚಾರೊ ಮಾತೆನ್
 ಪನ್ನುನಾಯೆನೆ ಆದ್ ಜುಗರಿಗ್
 ತನ್ನ ಮನಸ್‌ನ್ ಮಾರ್ಯೆ ಪನ್ನಗ ವಿದಿನ ಕೈಗುಣೊನೆ ||

22

ದತ್ತಕಣ್ಣಲ ದ್ರುಪದ ಮಗಲೆನ
 ರಟ್ಟಾದಾನಗ ಬೀಮೆ ಪಾರ್ತೆರೆ
 ಕಣ್ಣ ಬುಜೊ ಸರಿಯಾದ್ ಅದರ್‌ದಲಾಂಡ್ ಅವಸಕುನೊ ||
 ಬೀಸ್ಮ ದ್ರೋಣೆರೆ ಮೋನೆ ಕಂದ್‌ದ
 ಲಾಂಡ್ ದುಕ್ಕೊಡು ಕೌರವಾದಿಲು
 ಬಾರಿ ಸಂತೊಸು ಪಡೆದ್ ಸಕುನಿನ್ ದಿಂಜ ಪುಗರಿಯೆರ್ ||

23

ಜುಗರಿ ಗೊಬ್ಬುನ ಆಸೆ ಕೀರ್ತಿದ
 ಮನಸ್‌ದೊಟ್ಟಿಗೆ ಸೇರ್ದ್ ಬುದ್ಧಿದ
 ರಸೊನೆ ಆಜಿದ್ ರಾಗೊದಗ್ಗಿಡ್ ಪೊತ್ತದಾನಗನೆ ||
 ಜ್ಞಾನೊ ಮೋನೆನ್ ತಿರ್ಗದುಂತದ್ -
 ಲಾಂಡ್ ಲೆಜ್ಜಿಗ್ ಸೋಲು ಬತ್ತದ್
 ಬಾಗ್ಯೊ ಲಚ್ಚಿಮಿ ಸೋಲು ಸೂಚನೆ ತಿಕ್ಕದಾಂಡಪಗ ||

|| ಪಗಡೆ ಗೊಬ್ಬಿಯೆರ್ ||

ವಿದಿನ ಬರವುದ ಬಲೊಟು ಧರ್ಮಜೆ
ಸಕುನಿ ಒಡ್ಡನ ಬಲೆಕ್ ಬೂರಿಯೆ
ಜುಗರಿ ಮಂಡೊದ ಗದ್ದಿಗಡ್ ಸರಿ ಕುಲೈನಟ್ಟಿಯಿಡ್ ||
ಬಲತ್ ಬೀಮಾರ್ಜುನೆರ್ ದತ್ತಾಡ್
ಕುರುಡ ರಾಜೆನೆ ಎದುರು ಕೌರವೆ
ಸಕುನಿ ಸೈಂದವೆ ಕರ್ಣೆ ಮಾತೆರ್ ಕುಲೈರೊಟ್ಟಾದ್ ||

1

ಜೂಜಿದಾ ಕಳ ಮಲ್ಲಿ ಪಲಯಿನ್
ದೀಡ್ ಪಗಡೆದ ಕಾಯಿನುಂತದ್
ದಾವುಗೆಂಚಿನ ಕೇನ್ದ ಕಾಯಿನ್ ಸಕುನಿ ಕುರ್ಕಾಯೆ ||
ಕಾಯಿನಾಡದ್ ಕಳಕ್ ಪಾಡೈನೆ
ಸಾಲ್ಡುಂತದ್ ಪಂಡೆನಾಪಗ
ಕೌರವೆರೆ ಗೆಲೈಂದ್ ಬೊಟ್ಟಿಯೆ ತುಡೆಕ್ ತೆಲಿತೊಂದು ||

2

ಗೊಬ್ಬು ಸುರುವಾಪುನೆಕ್ ದುಂಬೇ
ದಾಯೆ ಬೊಬ್ಬೆನ್ ಪಾಡ್ ಜಯೊ ಸಿರಿ
ಬೂಟು ಬೊಬ್ಬೆಗ್ ಒಲಿವಲೋ ಪನ್ ಪಂಡೆ ಧರ್ಮಜೆನೆ ||
ಗೊಬ್ಬುವಡ ಈ ಎನ್ನ ಕೈನೇ
ಪತ್ತಾದೇ ಸೈ ಪನ್ದ ಬೊಟ್ಟುಲ
ಧರ್ಮನಂದನ ಪನ್ದ ನೀರಿಯೆ ಕೈನ್ಲಾ ಸಕುನಿ ||

3

ಎನ್ನ ಕಡೆಡ್ ಸಕುನಿ ಸಮ್ಲೆ
ಗೊಬ್ಬುವೆರ್ ನನ ನಿನ್ನವೆಂಚಿನ
ಪನ್ನ ಪಂತೊಗು ದಾವು ದೀಡೈರೆ ಕೇಂಡೆ ಕುರುರಾಯೆ ||
ಈಯೆ ಆವಡ್ ನಿನ್ನ ಸಮ್ಲೆ
ಆಂಡಲಾವಡ್ ಬರಡ್ ಪಂಡ್
ಸೋಲು ಕಣ್ಣೆಗ್ ಕಟ್ಟಿ ಧರ್ಮಜೆ ಗೊಬ್ಬೆ ಸಕುನಿಡನೆ ||

4

ಪುತ್ತೊಳಿಡ್ ಕಟ್ಟಿಯಿನ ರತ್ತೊಲು
ಎನ್ನ ದಾವುಗು ಪಂಡೆ ಧರ್ಮಜೆ
ಎನ್ನವುಲ ಸೈ ಪಂಡೆ ಕೌರವೆ ದಾವುನೊಡ್ಡಾದ್ ||
ಆ ಯುದ್ಧಿರೆ ಸಕುನಿನೊಟ್ಟುಗು

ಕಾಯಿ ತಿರ್ಗದ್ ಸರ್ತಿ ಸರ್ತಿಡ್
ಜೂಜು ತರೆಕಡರ್ನವೆ ಬೆಚ್ಚಡ್ ಬೊಂಡು ತೆಲ್ಪಾಂಡ್ ||

5

ಕಾಯಿ ರಾಪನಗೆಂಕ್ ನಿಕ್ಕಂ-
ದಾಯಿ ಬೊಬ್ಬೆಡ್ ಮಲ್ಲ ಗೌಜಿಯೆ
ಆದ್ ಪಗಡೆದ ಕಾಯಿದಾಸೊರೊ ಕೇನ್ದ ಕಿಣಿ ಕಿಣಿಯೆ ||
ಕಳತ ಪಂತ್ಯೆಡ್ ಕಾಯಿನುಂತನ
ಗವುಲೆ ದಾಳೊದ ಕಾಯಿ ರಟ್ಟಾದ್
ಅರಸು ಮೋನೆನೆ ಮಸ್ಕದಾಯ್ನಿನ್ ಎಂಚ ಪನ್ನುನೆನೊ ||

6

ಆ ಸಕುನಿ ಕೇಂಡನವೆ ದಾವುನು
ದೀಡೈ ಧರ್ಮಜೆ ಕೌರವನ ವಸೊ
ಆಯಿನೆನ್ ತೂನಗನೆ ಕೃತ್ತಿಮೊ ಪನ್ದ ಗೊಂತಾಯ್ತಿ ||
ಪಗಡೆ ಪಲಯಿನ್ ಗೆಲೈ ಕೌರವೆ
ನನಗ್ ಎಂಚಿನ ದಾವು ನಿನ್ನವು
ಪನ್ಲ ಧರ್ಮಜ ಆಣ್ ಮಗೆ ಈ ಪಂಡೆನಾ ಸಕುನಿ ||

7

ರಡ್ಡ್ ಸಾವಿರೊ ಬಂಗರ್ದ ರತೊ
ಐಕ್ ಕಟ್ಟುನ ಕುದುರೆ ಮಾತಲ
ಎನ್ನೊ ಸಾವಿರೊ ದೀಪೆ ಪಂಡೆನೆ ಧರ್ಮನಂದನೆನೆ ||
ಸಕುನಿ ಸೈ ಪಂಡೊಂದು ಕಾಯಿನ್
ಪದರ್ದಪಗನೆ ಸಾಲ್ಡುಂತದ್
ಜುಗರಿ ಮಂಡೊನು ತೂನಗಾಂಡಲ ಗೇಲ್ ದುರ್ಜನೆರೆ ||

8

ಅರಸು ಸೋಲ್ತನೆ ನಿಕ್ಕ ಆಂಡೊಯ
ಜುಗರಿಡೇ ಮಹ ಪೋಡಿ ದೈರೊಡು
ನನಲ ಉಂತ್ವನ ಪನ್ಲ ಬೊಡ್ಡಿಡ ಲಕ್ಕ ಮುಲ್ಲಡ್ಡ್ ||
ಪೋಡ್ಯುನಾಯೆನೊ ಯಾನ್ ಜೂಜುಗು
ವೀರ ಚತ್ತಿಲೆ ಜಾತಿದಾಯೆನೆ
ಸಾರೊ ಆನೆಲೆ ಒಡ್ಡದಪಗನೆ ದಾವುನೇರ್ಸಾಯೆ ||

9

ಆನೆಲೆಂಕ್ಲೆಗೆ ಸೇರ್ಂಡ್ ಪಂಡ್
ಆ ದುರಾತ್ತೆನೆ ಬೊಬ್ಬೆ ಪಾಡಿಯೆ
ಆಯೆ ಮಲ್ತನ ಮೋಸೊ ಕಪಟೊನು ತೆರಿಜೆ ಧರ್ಮಜೆನೆ ||

ಸೋಲು ಅರಸುಲೆಗಾಂಡೆ ಆನೆಲು
ಪೂರ ಪೋಯೊನೆ ನನಗ್ ಎಂಚಿನ
ದಾವು ಪಂಡ್‌ದ್ ಸಕುನಿ ತೆಲಿತೆನೆ ಮೋನೆ ತೂವೊಂದು ||

10

ದ್ರೋಪದಿನ ಚಾಕಿರಿದ ಪೊಣ್ಣಲೆ -
ನೆನ್ ಒಡ್ಡವೆ ಪನ್ನಗಾಪಗ
ಆಕ್‌ಲೆನ ಪದ್ವೊಯಿನ್ ದೀವೊಡು ಪಂಡೆನಾ ಸಕುನಿ ||
ಆಂಡ್ ಪಂಡ್‌ದ್ ಒಪ್ಪೆ ಧರ್ಮಜೆ
ದಾನೆ ಪ್ರೇಜನೊ ದಾಳೊ ಬೂರಾಜಿ
ಆಯ ಕಡೆಕ್‌ಲ ಸಕುನಿ ಕೇಂಡೆನೆ ದಾವುನನವುಂಡೊ ||

11

ಚಾಕಿರಿದ ಪೊಣ್ಣಲೆನ್ ಕಳೆಯನೆ
ಗೇಲ್ ಎಂಕ್‌ಲೆಗಾಂಡ್ ಮನಸ್‌ಡ್
ಪೋಡಿ ಉಂಡುಡ ಲಕ್ಕು ಗೊಬ್ಬುನು ಕೈದ್ ಮಲ್ಪುಗೊಯ ||
ದಾನೆ ಸೌಬಲ ಎಂಕ್ಲು ಪಾಂಡುನ
ಬಾಲೆಲತ್ತೊಯ ಎಂಕ್ಲೆ ಕಾರ್ಬರ್
ನಾಲ್ ಸಾಗರೊದುಲಯಿ ಬಡೆಕಯಿ ಕುರುನ ಸೀಮೆದಡೆ ||

12

ನಲ್ಲೊ ಸಾವಿರೊ ಕುದುರೆಲೊಟ್ಟಿಗೆ
ಇತ್ತಿ ರಾವುತನಕ್‌ಲೆನೊಡ್ಡವೆ
ಪನ್ನಗನೆ ಆ ಸಕುನಿ ತೆಲಿತ್‌ದ್ ಪನ್ನೆ ಧರ್ಮಜಡ ||
ಬಿರ್ದೆನೇ ಈ ಅರಸು ಜಾತಿಡ್
ಪನ್ನ ದಾಳೊದ ಕಾಯಿನಾಡಯೆ
ತಿರ್ದ ಪಾಡ್ಕುಗ ಸೋಲು ಧರ್ಮಜಗಾಂಡ್‌ಲಾಪಗನೆ ||

13

ಮಾಯೊಡಂಚಿನ ಮಂತ್ರೊ ತಂತ್ರೊಡು
ದಾಳೊ ನಡಪವೆ ಸಕುನಿ ಪನ್ನುನ
ಏರೆಗ್‌ಲ ತೆರಿಯಂದ್‌ನಂಚಿನೆ ಸೋಲು ಧರ್ಮಜಗ್ ||
ಒವ್ವೆ ವಸ್ತನ್ ಒಡ್ಡಯೆಡಲಾ
ಆಯೆ ಗೆಲ್‌ದ್ ಉಲಯಿ ಪಾಡುವೆ
ಮೋಸೊ ತಂತ್ರೊದ ವಿದ್ಯೆನಾಯನ ನಾಡುನಕ್‌ಲೇರ್ ||

14

ಸೋಲ್ತಿ ಸಾತ್‌ಗ್ ಸಕುನಿ ಕೇನುವೆ
ಆಟೊನುಂತಗೊ ಪನ್ನಲಾಯಡ

ಆಪಗನೆ ಧರ್ಮಜಗ್ ಸೋಲುದ ಗರ್ವೊ ಏರ್ಮಗನೆ ||
ತೇರ್ ಕುದುರೆಲೆ ಆನೆ ಸೇನೆನ್
ದಾವು ದೀಡುವೆ ಸಕುನಿ ಉಲಯಿಗ್
ಪಾಡ್ಡ್ ಧರ್ಮಜನಲ್ಪ ತಮಸ್‌ನ್ ಮಲ್ತದಾಪಗನೆ ||

15

ದಾವು ದೀಲಯ ಧರ್ಮನಂದನ
ವಾಸು ದೇವೆನೆ ನಿನನ್ ಕಾಪುವೆ
ರಾಯ ಕೌರವಗಿದ್ದಿ ದೇವೆರೆ ಸಾಯೊ ನಿಕ್ಕತ್ತೊ ||
ಪಾಲ್ಡ್ ತಿಕ್ಕನ ರತೊನು ಸೈನೊನು
ದೀಡಿಯೆನೆ ಸರಿ ಧರ್ಮನಂದನೆ
ದಾಳೊ ನಡಪನಗಾಂಡ್ ಕೌರವ ಕಡೆಕ್ ಮಹಗೇಲ್ ||

16

ಈತ್ ರತೊಕುಲು ಆನೆ ಕುದುರೆಲು
ಪಾದಚಾರಿಲು ಮಾತ ಮುಗಿನೆಟ್
ಲಾಯೊಡಿತ್ತನ ಆನೆ ಕುದುರೆಲೆ ಕಿನ್ನಿಲೆನ್ ದೀಡ್ಡ್ ||
ಗೊಬ್ಬಿಯೆನೆ ಆ ಧರ್ಮನಂದನೆ
ಪುಣ್ಯೊದಾ ಪಲೊ ಕೌರವಗ್ ಇನಿ
ತಿಕ್ಕನೇನೆ ಪಂಡೊಂದು ಸಕುನಿಯೆ ಬೊಬ್ಬೆ ಪಾಡಿಯೆನೆ ||

|| ವಿದುರೆ ಗೌಜಿ ಲಕ್ಕಾಯೆ ||

ಪಗಡೆ ನನ ಯಾರಂದೊ ಗೊಬ್ಬೊಡು
ಪನುಪುನಕ್‌ಲೇರುಂಡು ಉಂತಲೆ
ಸಕುನಿ ಏರೆಂಚಿನಯೆ ಪನ್ನುನ ಸಬೆಕ್ ತೆರಿಯಂದೊ ||
ಬರತ ವಂಸೊದ ಚಕ್ರವರ್ತಿಡ
ಪಗಡೆ ಗೊಬ್ಬುದು ಚೇಸ್ತೆ ಮಲ್ಪುನ
ಸರಿಯೊ ಪನಡ್‌ಗೆ ಮುಲ್ಪು ಸೇರ್‌ನ ರಾಜ ರಾಜೆರ್‌ಲ ||

1

ಆ ಪುರೂರವೆ ನವುಸೆ ಬೂಮಿದ
ಅರಸುಲಾ ದುಸ್ಯಂತೆ ಕುರು ಸಂ-
ವರಣೆ ಬುಕ್ಕೊ ಯಯಾತಿ ಪನ್ನುನ ಮಹ ಪರಂಪರೆದ ||
ಬರತ ಕುಲೊ ಬೆಳಗಯೆರ್ ವಂಸೊದ
ಬರಮು ಕೀರ್ತಿಗ್ ಮೇರ್ವೆ ಕಟ್ಟನ
ಯಮನ ಮಗೇನೇ ಸೋಲ್ಪದಿತ್ತನೆ ಸಕುನಿಲಾಗಿವೆನೆ ||

2

ಜೂಜಿ ಗೊಬ್ಬದ್ ಸೋಲ್ವಯೆನೆ ನಿಜೊ
ಮೂರ್ಕೆ ಪಂಡ್‌ದ್ ಕೌರವನ್ ಸರಿ
ತೂದು ಪಂಡೆನೆ ವಿದುರೆ ಕೋಪೊಡು ಕೇನ್ ಪನ್ನುನೆನ್ ||
ಗೇಲ್ ಬತ್ತಜಿ ಪಾಂಡವೇರೆಗ್
ಮೇಲ್ ಕೈಯಾದುಲ್ಲ ಈಯೆ
ಸೋಲು ಅಕ್‌ಲೆನ ನಿಕ್ಕ್ ಯಮನವೆ ಸಾಲೊ ತೆರಿಯೊನುಲ ||

3

ಗೆಲ್ತೆನೈಸುರೊ ನಿಕ್ಕ್ ದಕ್ಕುವೊ
ಸೋಲ್ತಿ ಪಾಂಡವೆರಿತ್ತೆ ಜಾರ್ವೆರೊ
ನಿಕ್ಕ್ ಅಕ್‌ಲೆನ ಮಲ್ಲ ಸಾಮರ್ತಿಗೆಲು ತೆರಿಯಂದೊ ||
ಓ ಸುಯೋದನ ಇಸೊತ ಚೇಪೆನೆ
ಕಾಪುನೆನೊ ಕೆಪುನೆನೊ ಪಂಡ್‌ದ್
ತೂಯೆರೆಗ್ ಪೊರ್ತಿದ್ದಿ ಗೊಬ್ಬನು ಕೈದ್ ಮಲ್ತಾಲ ||

4

ಗೆಲ್ತಿ ದರ್ಪದ ಹಂಕರೊನು ಬುಡು
ದುಸ್ಸೆ ಸಕುನಿಯೆ ಮುಲ್ಲು ಪೋವಡ್
ಇತ್ತೆ ನಿನ್ನವೆ ಬಂದುಲೆಡ ಈ ರಾಜಿಡಿತ್ತೊನುಲ ||
ಬೂಮಿನಾಳ್‌ಲ ಚಕ್ರವರ್ತಿಯೆ
ಆದ್ ಬಾಳೈರೆ ನಿಕ್ಕ್ ಉಪ್ಪುನ
ಸಾದಿ ಉಂದೇ ವಂಸೊನೊರಿಪುಲ ಪಂಡೆನಾ ವಿದುರೆ ||

5

ದುಸ್ಸೆ ಪನೊಲಿಯೊ ನಿನನ್ ಈಯೆ
ಕಲ್ತಾನಾಯೆನೆ ದ್ರೋಣ ಕೃಪೆರೆಡ
ಎಡ್ಡೆ ಪನ್ನುನೆ ಎಂಚ ನಿನ್ನನ್ ಬುದ್ಡಿ ಹೀನೆತ್ತೊ ||
ಈತ್ ಪನ್ನುನ ಕೇನ್ದ ಕೌರವೆ
ಕೋಪೊಡಾ ವಿದುರಡನೆ ನಿನ್ನಡ
ಕೇಂಡ್‌ನೇರಾಯ ಎಂಕ್ ಪನ್ನುನ ಹಕ್ಕು ನಿಕ್ಕುಂಡೊ ||

6

ಈಯೆ ಮಹಗುಣವಂತೆ ಸಕುನಿಯೆ
ದ್ರೋಹಿ ಅಂದಾಯ ಇತ್ತೆ ನಿಕ್ಕ್‌ಲ
ದಾನೆ ಆವೊಡು ಪೋಲ ಮುಲ್ಲಡ್ಡಿತ್ತೆ ಮರ್ಯದಿಡ್ ||
ಸತ್ಯೊ ಧರ್ಮನು ನ್ಯಾಯೊ ನೀತಿನ್
ಗ್ರೇಯ್ಪುನೆನ್ ಇನಿ ಬುಡ್ಡೊ ಕಂಡಿತೊ
ನಿಕ್ಕ್ ಎಂಕ್‌ಲೆ ಸುದ್ಡಿ ಬೊಡ್ಡಿಯ ನಡಪು ಮುಲ್ಲಡ್ಡ್ ||

7

ಗುರುಕುಲುಲ್ಲೆರ್ ಬೀಸೈರುಲ್ಲೆರ್
ಕೃಪೆರ್ ಮನಿಪುಚಿರಿತ್ತೆ ಅಮ್ಮರ್
ಉಸುಲು ದೆಪ್ಪಂದಿತ್ತೆ ಕುಲ್ಲನ ಈಯೆ ತೂಯಿಜನ ||
ಹಿರಿಯೆರಾಯಿನ ಮುಕುಲು ಹೆಡ್ಡೆರೊ
ವಿದುರ ಪನ್‌ಲಯ ಈಯೆ ಬಗ್‌ಲ್‌ದ್
ಕಜವು ಮಲ್ಲಡ ಪೋಲ ಪಂಡ್‌ದ್ ನೆರೈ ಕುರುರಾಯೆ ||

8

ಮುಕುಲು ಮಲ್ತನ ರಾಜಸೂಯೊನು
ಕೆಡಗಯೆರೆನೇ ಚೈದೈ ಬಿರ್ಸಡ್
ಪುಣೆಯಿನಾಯನ ತರೆನ್ ರಟ್ಟದೆ ಕ್ರಿಷ್ಣೆ ಆ ಸಬೆಟ್ ||
ಇನಿಯೆ ಕುಸಲ್‌ಡ್ ಗೊಬ್ಬನೆಂಕ್‌ಲೆ
ಮನಸ್‌ಗೇ ಇಸೊ ಬತ್ತ ಪಾಡುನ
ವಿದುರ ತರೆ ರಟ್ಟವುನ ಜನೊ ಮೂಲೆರ್ಲ ಇದೈತ್ತೊ ||

9

ಎಡ್ಡೆ ಪಾತೆರೊ ಪಂಡ ಕೇನುಜ
ನಿನ್ನನ್‌ಲ ಈ ಸೈಂದವನ್ ನಿನ
ಮೆಗೈನಕ್‌ಲೆನ್ ಸಕುನಿ ಕರ್ಣನ್ ಲಡಯಿದಾ ಕಳಟ್ ||
ಬೀಮ ಪಾರ್ತೆರೆ ಬಾಣೊದುರ್ದುಗು
ಆದಿ ನಾರಾಯಿಣೆನೆ ಕೊಲ್ಪವೆ
ದಾಲ ಪೋಡೈಡ ಕಾತ್‌ದುಂತುಲ ಪಂಡೆನಾ ವಿದುರೆ ||

|| ಪಗಡೆ ಗೊಬ್ಬು ಪಿರ ಜೋರಾಂಡ್ ||

ಸಾದು ವಿದುರನ್ ಗೌಜಿ ಮಲ್ತದ್-
ಲಾಯೆ ದುರ್ರೋದನೆನೆ ಸಕುನಿನ್
ತೂದು ಕಣ್ಣಡ್ ಸನ್ನೆ ಮಲ್ತೆನೆ ಗೊಬ್ಬು ನಡಪಯೆರೆ ||
ಲಕ್ಕು ಧರ್ಮ ಪಾಪೊ ಸೋಲ್ತನೆ
ನಿನ್ನ ಸೊತ್ತುಲು ಮಾತ ಪೋಯೊ
ಬದೈರೆಗ್ ಬೋಡಾದ್ ಕೌರವ ಹಂಗ್‌ಡಿತ್ತೊನುಲ ||

1

ಜೂಜುನುಂತಗೊ ಮಂಡೊ ದೆಪ್ಪುವೆ
ಮೋನೆ ನಿನ್ನವೆ ಕಂದ್‌ದುಂಡುಯ
ಬೀಮ ಪಾರ್ತೆರೆ ಕೋಪೊಡಾ ಪೌರುಸೊನೆ ನಡಪಂದ್ ||
ದಾವು ದೀಡೈರೆ ಸಾದ್ಯೊ ಇದ್ದಿಡ

ರಾಜ ಧರ್ಮೊಗು ಸರಿಯೊ ಗೊಬ್ಬನ
ಪೋಲ ಪಂಡ್‌ದ್ ರಂಗ್ ಮಲ್ತ್‌ದ್ ತೆಲಿತೆನಾ ಸಕುನಿ ||

2

ಸಕುನಿ ದಾಯೆಗ್ ರಂಗ್ ಮಲ್ಪುವ
ಬದ್‌ಕ್ ಈತೆಟೆ ಮುಗಿದ್ ಆಂಡೊಯ
ಬಡವೆರತ್ತಾಯ ಉಂಡು ಬಂಡರೊಡೇತೊ ಸಂಪೊತ್ತು ||
ಜುಗರಿ ಮಂಡೊನು ಬುಡುಪಲಯ ಇನಿ
ನಿನಡ ಸೋಲ್ಪೆನೊ ಕಾಯಿನಜಪುಲ
ಪಣವುದೀಡುವೆನೊಂಜಿ ಕೋಟಿಯೆ ರೇಕೆಗೇನಿತ್ತೆ ||

3

ದೂದು ಕಟ್ಟಿಯೆ ಕೋಟಿ ಕೋಟಿನ್
ನಾಲ್ ಏನೆನ್ ಕಳೆಯೆ ಧರ್ಮಜೆ
ಪೂರ ಗೆಲ್ತ್‌ದ್ ಉಲಯಿ ಪಾಡ್ಯೆನೆ ಗೊಬ್ಬುದಾ ಸಕುನಿ ||
ದಾವು ದೀಡಿಯೆ ದುಂಬು ಪೋಯಿನ
ವಾಜಿ ಏಳೆನೊಂಜೊ ಪಾಲ್‌ನ್
ದೀಡ್ಡ್ ಸೋಲ್ಪೆನೆ ಗೊಬ್ಬು ಗೊಬ್ಬುದು ಧರ್ಮನಂದನೆನೆ ||

4

ಗೆಣ್ತಾದಾ ಪಣವುಲೆನ್ ಅಂದಜಿ
ಮಲ್ಪಿಯೆರೆ ತೀರಂದೆ ಸಕುನಿಯೆ
ಮಲ್ಲವರ್ಬುದೊ ಸಂಕೆ ಪಂಡೆನೆ ತನ್ನ ಅರ್ವದಡ ||
ಗುಣೊಟು ಮಲ್ಲಯೆ ಈಯೆ ಧರ್ಮಜ
ಪಣವು ಕೂಡ್ಲಲ ದಾವು ದೀಡ್ಯೆರೆ
ಸಕುನಿ ಪನ್ನಗ ಧರ್ಮನಂದನೆ ಪನ್ನ ತೆಲಿತೊಂದು ||

5

ದಾಳೊ ನಡಪಲ ಸಂಕೆಡರ್ಬುದೊ
ರೇಕೆ ರೇಕೆಗ್ ಪಣವು ದೀವೆನೆ
ಆಡದಾಡದ್ ಕಾಯಿನುಂತಲ ಗೊಬ್ಬು ರೈಸಡ್‌ಯ ||
ಈತ್ ಪನ್ನಗ ಸಕುನಿ ತಂತ್ರೊಡು
ಮಾತ ಪಣವುನು ಉಳಯಿ ಪಾಡ್ಯೆನೆ
ಕಾಲಿ ಆಂಡ್‌ಲ ಇಂದ್ರಪ್ರಸ್ತೊದ ಬದ್‌ಕ್ ಬಂಡಾರೊ ||

6

ದೀಡ್ ದೀಡ್‌ದ್ ರತ್ನೊ ಬಂಗರ್
ಮಾತ ಕೌರವಗಾಂಡ್ ರಾಣಿನ
ಪೋಂಡು ಪದೊಯಿ ಸಕುನಿ ತಂತ್ರೊಡು ಅರಸುನಬ್ಬರೊಡು ||

ನಕುಲ ಸಹದೇವಾರ್ಜುನೆರೆ ಸಿರಿ-
ಮಣಿ ಕಿರೀಟೊನು ಕೆಬಿತ ಕುಂಡಲೊ
ಪದಕೊ ಮಾಲೆನ್ ಮಾತ ದೀಡ್ಯೆನೆ ಜುಗರಿ ಮಂಡೊಡುಲ ||

7

ಮಾತೆನ್‌ಲ ಗೆಲ್ತೊಂದು ಸಕುನಿಯೆ
ಸೋಲ್ಪೆನೇ ಈ ನಿನ್ನ ಸಂಪೊತ್ತು
ಕೀರ್ತಿ ಕೊದೊಲು ಆಂಡೆ ಸಿವ ಸಿವ ಪಂಡೆ ತೆಲಿತೊಂದು ||
ನಿಕ್ಕಾ ಗೊಬ್ಬೆರೆ ಆಸೆ ಉಂಡುಡ
ಬೊಲ್ಲೆ ಇದ್ಯಂದ್‌ನಯಡೇನೇ
ಗೊಬ್ಬಯೆನೆ ಪಂಡೊಂದು ಲಕ್ಕಿಯೆ ಕುಂಟು ಕುಡ್ತೊಂದು ||

8

ಮುಚ್ಚಿಲಯ ನಿನ ಬಾಯಿ ಗರ್ವೊದ
ಬಿತ್ತನರಿಪೆರೆ ತೀರು ನಿನ್ನವೆ
ದುಸ್ಸ ಬುದ್ಧಿಗ್ ಕೋಟಿ ಕಟ್ಟೆದೆ ಅಂತರಂಗೊದವೆ ||
ಸೋಲ್ಪೆ ಪಂಡ್‌ದ್ ರಂಗ್ ಮಲ್ಪುಡ
ಯಾನ್ ಎನ್ನವೆ ಜೀವೊದುಸುಲುನು
ಈ ಜುಗಾರಿದ ಪಲಯಿಗೊಡ್ಡವೆ ಮೆಗಿಯ ನಕುಲನ್‌ಲ ||

9

ದಾವುಗೀಯೆ ಮೆಗಿಯನೊಡ್ಡಯ
ಡೇನ್ ಪೋಡಿವೆ ಪನ್ನ ಗ್ರೇಯ್ಪುಡ
ಕಾಯಿ ರಾಪಲ ಈಯೆ ಪಂಡ್‌ದ್ ಮಂಡೊ ಸರಿ ಮಲ್ತೆ ||
ದಾನ್ನೊ ದುಂಬುದ ಜಲ್ಮೊಡಿತ್ತನ್
ಬಾರಿ ಪುಣ್ಯೊಡ್ಡಾದ್ ಸಕುನಿಯೆ
ಮಾದ್ರಿ ಮಗನ್‌ಲ ಗೆಲ್ತ್‌ದರಬಯಿ ಕೊರೈನಾರ್ಬಟೆಡ್ ||

10

ಅರಸು ಸೋಲ್ಪೆನೆ ನಿನ್ನ ನಕುಲನ್
ನನಗ್ ಏರೆನ್ ದೀಪ ದಾವುಗು
ಪನ್ ಪನ್‌ಲ ಪನ್‌ಲಂದ್ ಒತ್ತಯೊ ಮಲ್ಪುನಾಪಗನೆ ||
ಮೆಗಿಯನಾ ಸಹದೇವನೊಡ್ಡುದು
ಪೆರಪ ಒಯ್ಪೆನೆ ಮಾತ ಬದ್‌ಕ್‌ನ್
ಜುಗರಿಡಾಯಿನ ಸೋಲು ಕಣ್ಣೆಗ್ ಕಟ್ಟೆನಂಜಾದ್ ||

11

ಎಲ್ಯ ಮೆಗ್ಯನ್ ಧರ್ಮನಂದನೆ
ಒಡ್ಡಯೆನೆ ಪಂಡೊಂದು ಸಕುನಿಯೆ

ಇತ್ತೆ ಸೋಲ್ವವೆ ಪನ್ದ ದಾಳೊನು ಕೈಟ್ ತಿರ್ಗಾಯೆ ||
 ದಾನೆ ಪನ್ನುನೆ ಸತ್ಯವಂತೆರ್
 ಮೋಸಗಾರರೆ ಎದುರು ಗೆಲ್ಲರೆ
 ಸಾದ್ಯೋನೇ ಇದ್ಯತ್ತೊ ಸಹದೇವನ್‌ಲ ಕಳೆವೊಂಡೆ ||

12

ಬೇದೊ ಮಂತ್ರೊಡು ಸುಬಲ ಮಗನೇ
 ಸೋಲ್ವವೆನೆ ಎಂಕಲೆನ್ ಗ್ರಾಸ್ತೆರ್
 ತೂಲೆ ಪಂಡ್‌ದ್ ಧರ್ಮನಂದನೆ ತರೆಕ್ ಹಾಕೊಂಡೆ ||
 ಲೋಕೊದಪವಾದೊಲೆಗ್ ಪೋಡ್ಡುನ
 ತಾನ್ ಬುಡುದೇ ಜುಗರಿ ಮರ್ಲ್ಡ್
 ಪಾರ್ತನ್‌ಲ ಒಡ್ಡಾಯೆ ಮಂಡೊಗು ಸನಿನ ಕಾರ್ಬರ್ಡ್ ||

13

ಓ ಧನಂಜಯ ನಿನ್ನನಿತ್ತೆನೆ
 ದೂದುಗೊಡ್ಡವೆ ಈ ಯುದ್ಧಿಸ್ವಿರೆ
 ಸೋಲ್ತದಾನಗ ನಿನನ್ ಕೌರವಗಾಯೆ ಮಾರಿಲೆಕೊ ||
 ನಿಕ್‌ಲ್ ಬೀಮಾರ್ಜನೆರ್ ಒಪ್ಪಡೆ
 ಸಕುನಿ ಪಂಡ್‌ದ್ ಬಾಯಿ ಬುಡ್ಡಗ
 ಅಕ್‌ಲ್ ನೆರೈರ್ ಸುಬಲ ಮಗನಲ ಗೌಜಿ ಲಕ್ಕಾದ್ ||

14

ಬೇತೆ ಬೇತೆನೆ ಸೈರೊ ಆಂಡಲ
 ದಾನೆ ಆಂಡಾಯೆ ಧರ್ಮ ಪುತ್ರನ
 ಜೂವೊದುಲಯಿಡ್ ಎಂಕ್ಲೆನಾತೊನೆ ಉಂಡು ತೆರಿಯೊನುಲ ||
 ಈ ಕುಯುಕ್ತಿದ ಮೋಸೊ ಗೊಬ್ಬುದು
 ಸೋಲ್ವಯಿನ ಮಹ ಗರ್ವೊಡೆಂಕ್ಲೆಡ
 ಪಾತೆರಡ ಜಾಗ್‌ರ್ತೆ ಪಂಡ್‌ದ್ ಪೋಡಿ ಕಟ್ಟಯೆರ್ ||

15

ಕಳ್ಳಗೊಬ್ಬುನು ನಾಡ್ಡೆ ಪತ್ತೆರೆ
 ಸತ್ಯವಂತೆರೆಗೆಂಚ ತೀರುನೆ
 ಅರ್ಜುನನ ಕಂಟೆಲ್‌ಗ್ ಮೋಸೊದ ಉರ್ಲು ಬೂರ್ದಾಂಡ್ |
 ಸೊಲ್ತರರಸುಲೆ ನನಗ್ ಗೊಬ್ಬುದ
 ಅಗ್ನಿಕುಂಡೊಗು ಎಂಚಿನರ್ಪಿತೊ
 ಪನ್ನಗಾಯೆನೆ ಬೀಮನೊಡ್ಡಯೆ ಜುಗರಿದಾ ಕಳಕ್ ||

16

ದಾಳೊಡುದು ರಟ್ಟೆನವೆ ಪಗಡೆದ
 ಕಾಯಿ ತಿರ್ಗಾದ್ ಏರೆ ಪುಡೆಕಲ
 ಬೂರಂದಿತ್ತನ ತೂದು ಪಂಡೆರ್ ಗೆಲ್ಲೆ ಧರ್ಮಜೆನೆ ||
 ಅರೊಡ್ಡೆ ಗಳೆಗಡ್ ಕಾಯಿ ತಿರ್ಗಾದ್
 ತಿರ್ಗ್ ತಿರ್ಗ್ ಬೂರ್ಡ್ ಸೌಬಲ
 ನಲ್ಲಗೆಲ್ಲಯಿ ಸಾತ್‌ಗಾ ಕೌರವೆರ್ ಲಾಗಿಯೆರ್ ||

17

ದಾನೆ ಪನ್ನುನೆ ಸಕುನಿ ಗೆಲ್ಲೆನೆ
 ಆ ಯುದ್ಧಿಸ್ವಿರನಾಸೆ ನೀರ್ಡ್
 ದೀಡಿ ಹೋಮೊದಲೆಕೊನೆ ಚಂದ್ರನ್ ರಾವು ನಿಂಗಿಲೆಕೊ ||
 ಗೂಡ್‌ಡೇ ಬೂರ್ಡಿತ್ತಿ ಪಿಲಿತವೆ
 ಗಾದೆದಂಚೆನೆ ದುಂಬುದಾಸೆನೆ
 ದಾಲ ತೋಜಂದಾಯೆ ತನ್ನನ್ ತಾನೆ ಒಡ್ಡಯೆನೆ ||

18

ಮೆಗಿಯನಕ್‌ಲೆನ್ ಕಳೆಯೆ ನಿನ್ನವೆ
 ಜುಗರಿದಾ ಮಹ ಮರ್ಲ್ ಬಿರಿಶೆಚೊ
 ನಿನನ್ ಗೆಲ್ವವೆ ಪನ್ನಗನೆ ಸರಿ ಗೌಜಿಲಕ್ಕಾದ್ ||
 ತನನ್ ಒಡ್ಡಯೆ ಧರ್ಮನಂದನೆ
 ಸಕುನಿ ಮೋಸೊದ ಬಲೆಕ್ ತಿಕ್ಕಾದ್
 ನಿಮಿಸೊ ಮಾತ್ರೊಡು ಸೋಲೆ ತೂಯಿನ ಜನೊಕು ಬೆಕ್ಕಸೊನೆ ||

19

ನನಗ್ ಎಂಚಿನ ದಾವು ದೀಪರ್
 ಪನ್‌ಲೆ ಅರಸುಲೆ ಜುಗರಿ ಮಂಡೊನು
 ಮಡಿಪುಗೊನೊ ಪನಿಕರಿನ ನೀರ್‌ಗ್ ಕಟ್ಟ ದಾಯೆಗ್‌ಯೆ ||
 ಸುಬಲನಾ ಮಗೆ ಬಗ್‌ಳಡಯೆ ನನ
 ಜುಗರಿ ಮಂಡೊದ ಪಲಯಿಗಿತ್ತೆನೆ
 ಬುಡೆದಿ ದ್ರೌಪದಿನೇನ್ ಒಡ್ಡವೆ ಪಂಡೆ ಧರ್ಮಜೆನೆ ||

20

ಪಗಡೆ ಗೊಬ್ಬುದ ಕಳಕ್ ಒಡ್ಡಯೆ
 ಮದನ ಗೊಬ್ಬುದ ಮಂತ್ರದೇವತೆ
 ಲೆಕೊನೆ ಮೆರೆಯಿನ ದ್ರುಪದ ಮಗಲೆನ್ ರಾಣಿ ದ್ರೌಪದಿನ್ ||

ದೀಡಿ ಕಾಯಿನ್ ಸಾಲ್ಡುಂತದ್
ಸೋಲು ಚಿತ್ರೊನು ಬರೆಯೆ ಧರ್ಮಜ್-
ನಾಸೆ ಮನಸ್‌ದ ಗೋಡೆಡಪಗನೆ ಸಕುನಿ ತಂತೊಡುಲ ||

21

ಅರಸು ಬಿಂಗಿರಿಯಾಯೆ ಮನಸ್‌ಡ್
ಮರುಕೊ ದಿಂಜಿದ್ ಮತಿಕ್ ಮಣ್ಣೆಲ
ಒರೆಸ್‌ದಾನಗ ಲೆಜ್ಜಿ ನಾಚಿಗಲಾಂಡ್ ಧರ್ಮಜ್ ||
ದಿಸೆನೆ ಪೊತ್ತುದು ಪೋಂಡು ರಾಜ್ಯೊದ
ಸಿರಿನ ಸಿರಿಮುಡಿ ಜಾರ್‌ದಾಂಡ್‌ಲ
ಬೆಗರ್ ಪೀಂಕ್‌ದ್ ಮೋನೆ ಕಂದ್‌ದ್ ಕಣ್ಣ್ ಕತ್ತಲೆನೆ ||

22

ತಮಸ್ ಮಲ್ಪುನ ವೈರಿಲೆನ ಸರಿ
ಕಯಿತ ಸನ್ನೆಲು ಕಣ್ಣಿ ನೋಟೊಲು
ನೆರ್‌ದ್ ತೆಲಿಪುನ ಮೋನೆ ತೂಪುನ ಕಣ್ಣಿಲೇತಾಯೋ ||
ಗತ್ತಡೇ ಕುಲ್ಲೊಂದು ಇತ್ತೆರ್

ಕರೈ ದುಸ್ವಾಸನೆರ್ ಸೈಂದವೆ-
ರಲ್ಪ ಮೀಸೆನ್ ತಿರ್ರವೊಂದೇ ಬಾರಿ ಸಂತೊಸುಡು ||

23

ಕಳವಳೊಡು ಕುರುವಂಸೊ ನಾಸೊದ
ದಿನೊನೆ ಬತ್ತನ ತೂದು ದುಕ್ಕೊಡು
ತರೆಕ್ ಕೈ ದೀಡೊಂದು ಗುರು ಬೀಸ್ಮಾದಿ ಹಿರಿಯಕ್‌ಲ್ ||
ಪನಿಯೆರೆನೆ ತೀರಂದೆ ಮೌನೊಡು
ದವುಡೆಗರಿನವೆ ಕಣ್ಣಿ ನೀರ್‌ನ್
ಒರೆಸೊನುಂದೇ ಕುಲ್ಲದಿತ್ತೆರ್ ಸೇಂಕೆ ದೆತ್ತೊಂದು ||

24

ಬಿರೆಲ್ ಮೂಂಕುಡು ದೀಡ್ಡ್ ತರೆನ್‌ಲ
ಅಡಿಕ್ ಪಾಡ್‌ದ್ ಬೀಮ ಪಾರ್ತೆರ್
ಕಪಟೊ ಗೊಬ್ಬುದ ಮಾಟೊಗಾಕ್‌ಲ್ ಕೋಪೊಡಿತ್ತೊಂದು
ಈಪೆಕ್‌ಡ್ ಸಂತೊಸುಡು ತೆಲಿಪೆರೆ
ಆಯಿಜಿಂದ್‌ದ್ ಕುರುಡರಾಜೆನೆ
ಬಾರಿ ಚಿಂತೆಡ್ ಕುಲ್ಲದಿತ್ತೆನೆ ನಂಜಿದಾ ಬುರುಡೆ ||

ನಾಲನೆ ಸಂದಿ

1 | ವಿದುರನ ಗೌಜಿ ||

ಧರ್ಮಜನ ಬಿಂಗಿರಿನ್ ಬೀಮನ
ಅರ್ದುನನ ಸೈಸೊನುನ ಗುಣೊನುಲ
ದುಸ್ಪ ದುರ್ರೋದನನ ಚೇಸ್ಪೆನ್ ಸಕುನಿನಬತರೊನು ||
ಅಲ್ಪ ಇತ್ತನ ಮಾತರಾಜೆರ್
ಕಣ್ಣೆಡೆನೆ ತೂದಕಲೆ ಮನಸ್‌ಡ್
ದುಕ್ಕೊ ಏರ್‌ದ್ ಬ್ರಹ್ಮ ವಿಷ್ಣುನು ಸಿವನ್ ದೂರಿಯೆರ್ ||

1

ನ್ಯಾಯೊಡೇ ಈ ಪಗಡೆ ಗೊಬ್ಬುದು
ಪೂರ ಸೋಲ್ತುದು ಮೆಗ್ಯನಕ್‌ಲೆನ್
ದೀಡ್ಡ್ ಸೋಲ್ತನೆ ನಿಕ್‌ಲೆ ಬುಡೆದಿನ್ ಸಾನ್ ಕಳೆವೊಂಡ ||
ಆಂಡ ಎಂಕುಲು ದಾಲ ಮಲ್ಪಯೊ

ರಾಜೆ ದುರ್ರೋದನೆನೆ ಪಂಡನ್
ಕೇನ್ದ ನಡಪುಲೆ ಪನ್ದ ಸಕುನಿಯೆ ತೂಯೆ ಧರ್ಮಜನ್ ||

2

ಯಾನ್ ಗೆಲ್ತ್‌ದ್ ಕೊರೈ ಕೌರವ
ಮಾತ ಬದ್‌ಕ್‌ನ್ ಇಂದ್ರ ಪ್ರಸ್ತೊದ
ವೀರನಕ್‌ಲೆನ್ ಅಕ್‌ಲೆ ಬುಡೆದಿನ್ ರಾಣಿ ದ್ರೌಪದಿನ್ ||
ಈಯೆ ಅಕ್‌ಲೆನ್ ಎಂಚಿ ಕೆಲಸೊಗು
ನೇಮಕೊನು ಮಲ್ಪುನೆನೆ ಪಂಡ್‌ದ್
ಪೂರ ತೆರಿಪಲ ಪಂಡೆ ಸಕುನಿಯೆ ಆ ಸುಯೋದನಡ ||

3

ವಿದುರ ದ್ರೌಪದಿನಾಡೆ ಪೋಲಯ
ಪನ್‌ಲ ಬರೈರೆ ಆಲೆನೀಡೆಗ್
ಮುಲುಪ ಯಾನೇ ಕೇನ್ವೆನಾಲೆಡ ಆಸೆ ಎಂಚಿನವು ||

ಚಾಕಿರಿಗ್ ಉಂತುವಲೊ ಅತ್ತಡ
ರಾಣಿ ವಾಸೊದ ಸುಕೊಕು ಬರ್ದಲೊ
ಆಲೆಡನೆ ಕೇನಿಯೆರೆ ಪಂಡೆನೆ ಮೂರ್ಕೆ ಕೌರವೆನೆ ||

4

ತೆಡಿಲ್ ಕಟ್ಟೆರೊ ಸೇಕೊ ಕೊರೈರೆ
ಸಿವನ ಕಣ್ಣೆದಲೆಕೊನೆ ಪೊತ್ತವಿ
ಕೆಲಸೊ ದಾಯೆಗ್ ಮರ್ದ್ ಉಂಡೊಯ ನಿಕ್ಕು ಮಾರಾಜ ||
ಕಾಲ ರುದ್ರನ ಕಡೆತ ನಾಟೊದ
ಕಾರ್‌ದಡಿಕೇ ಬೂರ್ದು ಪೊಡಿ ಪೊಡಿ
ಯಾಪುನಂದಜಿ ಪನ್ದ್ ಕಣ್ಣೆಡೆ ನೀರ್ ಜಪುಡಾಯೆ ||

5

ಇಸೊತ ನೀರ್‌ಡ್ ಮೀಂದ್ ಪನ್ನನ
ಯಮನ ದಾಡೆಗ್ ಕಟ್ಟೆದ್ಜಲ್
ನಿಕ್‌ಲ್ ಒಚ್ಚೆರೊ ಮರಿತ ಜಿಡೆಕೇ ಕೈನ್ ಪಾಡುವರೊ ||
ದ್ರುಪದ ಮಗಲೆನ್ ಪಾಂಡು ಬಾಲೆಲೆ
ಬುಡೆದಿ ಯಜ್ಞೊದ ಕುಂಡೊದಗ್ಗಿಡ್
ಪಿದಯಿ ಬತ್ತನ ಬಾಲೆ ಬಲತ್‌ದ್ ಪೊಣ್ಣು ಆಯಿನಲ್ ||

6

ಬಡೆಕಯಿದ ಕುರು ಬೂಮಿದರಸುಲೆ -
ನಕ್‌ಲ್ ಗೆಲ್‌ದ್ ಮೂಡು ಸೀಮೆದ
ಒಡೆಯನಕ್‌ಲೆಡ ಕಪ್ಪೊ ತುಂಬದ್ ಬುಕ್ಕೊ ಪಡ್ಲೊಯಿದ ||
ಯವನ ವೀರೆರೆ ಗರ್ವೊನುಂತದ್
ತೆನ್‌ಕಯಿದ ಮಹ ಲಂಕೆದರಸುನು
ಗೆಲ್‌ತನಕ್‌ಲೆನ ಬುಡೆದಿಯೋ ನಿನ ಚಾಕ್ರಿಗುಂತುನಲ್ ||

7

ಮೀನ್ದ ಯಂತ್ರೊನು ಗೆಲ್ವೆರಾವಂ-
ದೇತೋ ರಾಜೆರ್ ಚೈದ್ಯ ಮಾಗದೆ
ರೇರೆಗ್‌ಲ ಆವಂದೆ ಗೆಲ್ತನೆ ಏರ್ ಗೊಂತಿದ್ಯೊ ||
ಆಯನಾ ಕೈ ಪತ್ತಿ ಬುಡೆದಿಯೊ
ಚಾಕ್ರಿ ಗಾಪುನ ಪೊಂಜೊವೋ ಪನ್
ಜಾತಿ ಮೂರ್ಕೆರೆ ಲೆಕೊನೆ ಪನ್ನನೆ ಸಿವ ಮಹಾದೇವ ||

8

ಆ ಹಿಡಿಂಬನ್ ಬಕನ್ ಕೆರ್ನಯೆ
ಮಾಗದನ್ ಸರಿ ತಿಗ್‌ತ್ ಪಾಡ್ನಯೆ
ಬೀಮೆ ಪಂಡ್‌ದ್ ನಿಕ್ಕು ತೆರಿತ್‌ಜೊ ಮರ್ದ ಪನ್‌ಲೆನಡ ||

ಆಯ ಬುಡೆದಿನ್ ಈಯೆ ಕೇನುವ
ರಾಣಿ ವಾಸೊದ ಸುಕೊಕು ಸಿವ ಸಿವ
ಮಾರಿದೆದುರುಡು ಬೋಂಟೆ ದೇರೈರೆ ಪಿದಡುವನ ಮೂರ್ಕೆ ||

9

ಇನಿಯೆ ಸೋಲ್ಪಯ ಪಗಡೆ ಗೊಬ್ಬದ್
ನನಗ್ ಆಪುನೆ ಕಾಳಗೊದ ಕಳ
ಅಯಿಟ್ ನಿನ್ನವೆ ತರೆತ ಬರವುನು ಉರ್ದು ದೆಪ್ಪುವೆರ್ ||
ಪಿರವು ಬರ್ಪುನ ಗೇಲ್‌ಗುಂದೇ
ಪಗಡೆ ಗೊಬ್ಬದ ಸೋಲು ತೆರಿಯೊನು
ನನಗ್‌ಲಾಂಡಲ ಬದುಕುನಾಸೆಡ್ ಮಲ್ತು ರಾಜಟಿಗೆ ||

|| ಪ್ರಾತಿಕಾಮಿಯೆ ದ್ರೌಪದಿಡ ಸೋಲ್ತನೆ ಪನ್ನೆ ||

ವಿದುರೆ ಪಾಂಡವನಕ್‌ಲೆನೇಪೊಲೊ
ಪುಗರುನಾಯೆನೆ ಪ್ರಾತಿಕಾಮಿಯೆ
ಇಡೆಗ್ ದ್ರೌಪದಿನೀಯೆ ಲೆತೊನುದು ಬರೊಡು ಪನ್ನಗನೆ ||
ಪಿದಡಿಯೆನೆ ಕೈ ಮುಗಿದ್ ಸೇವಕೆ
ಅರಮನೆದವೇ ರಾಣಿ ವಾಸೊಗು
ಉಲಯಿ ಬರೊಲಿಯೊ ಪನ್ದ್ ಕೇಂಡೆನೆ ಕಾಪುನಾಕ್‌ಲೆಡ ||

1

ದೂತಿನಕ್‌ಲೀ ಸುದ್ದಿ ಪನ್ನಗ
ರಾಣಿ ದ್ರೌಪದಿ ಉಲಯಿ ಲೆಪುಡದ್
ಆಯನೇ ಕುಲ್ಲಾದ್ ಕೇಂಡಲ್ ಬತ್ತಿ ಸಂಗತಿನೆ ||
ಮಾತ ಸಗ್ಗಿಲು ಸೇರ್‌ದಿತ್ತನ
ದೇವಿಯಂಬಿಕೆ ಲೆಕೊನೆ ಮಂತ್ರೊದ
ದೇವತೆನೊ ಪನ್ನಿಂಚಿ ನಮುನೆಡ್ ಇತ್ತನಾಲೆಡನೆ ||

2

ಅಪ್ಪೆ ಕೈಮುಗಿದೇನ್ ಪನ್ನೆನೆ
ಧರ್ಮರಾಯೆರ್ ಪಗಡೆಗೊಬ್ಬುದು
ಸರ್ದೊ ಬದ್‌ಕ್‌ನ್ ಕಳೆಯೆರಾರೇ ಸೋಲ್ತದಾಪಗನೆ ||
ಗೆಲ್ತನಯೆ ಕೌರವೆನೆ ರಾಜ್ಯೊನು
ಬುಕ್ಕೊ ಬದ್‌ಕ್‌ನ್ ಮೆಗೈನಕ್‌ಲೆನ್
ದುಸ್ಸೆನಾಯೆನೆ ಉಳಯಿ ಪಾಡಿಯೆ ದಾನೆ ಪನೊಡೇನ್ ||

3

ಆರ್ ತನ್ನನೆ ತಾನ್ ಸೋಲ್ತುದು
ಈರೆನ್ಲ ಆ ಜುಗರಿ ಮಂಡೊಗು
ದಾವುದೀಡ್ಡ್ ಕಳೆಯೆರಮ್ ಪನ್ದ ಬುಲ್ತೊಂಡೆ ||
ದೂತೆ ಪಂಡ್ನ ಸುದ್ದಿ ಕೇಂಡ್ಡ್
ರಾಣಿ ದ್ರೌಪದಿ ಬುಕ್ಕೊ ಒಟ್ಟುಗು
ಸೇರಿ ಪೊಣ್ಣಲೆ ಮೋನೆ ಕಮಲೊನೆ ಬಾಡ್‌ದಾಂಡವುಲು

4

ಪ್ರಾತಿಕಾಮಿಯ ಪನ್ಲ ಅರಸುಲು
ಜೂಜಿ ಗೊಬ್ಬೆರೊ ಸೋಲು ಪಡೆಯೆರೊ
ಮೋಸೊಗಾರೆರ್ ಸಕುನಿ ಕೌರವನಕ್ಲ್ ಸೋಲ್ಪಯೆರೊ ||
ದೂದುಗಂಚಿನ ಮಾತ ಒಡ್ಡೆರ್
ಸೋಲ್ತೆರಾರೆಂಚಿನೆನ್ ಪನ್ಲಯೆ
ಓ ಸದಾಸಿವ ಎನ್ನ ಕಂಡನಿ ಪಗಡೆ ಗೊಬ್ಬನೆನೊ ||

5

ವ್ಯಾಸ ನಾರದೆರಾನಿ ಪನ್ನವೆ
ಆಂಡೆ ರಾಜ್ಯೊದ ಸಿರಿಕ್ ಬುಡುಗಡೆ
ದಾನೆ ಪನ್ನುನೆ ಇಂದ್ರಪ್ರಸ್ತೊನೆ ಮುರ್ಕುಡಾಂಡತ್ತೊ ||
ಪೋವಡವು ಎಂಚಿನೆನ್ ಕಳೆಯೆರ್
ಆರ್ ಎನ್ನನ್ ಎಂಚ ಒಡ್ಡೆರ್
ಪ್ರಾತಿಕಾಮಿಯ ಪನ್ಲ ಪಂಡ್ಡ್ ಮಲ್ತಲೊತ್ತಾಯೊ ||

6

ಪಣವು ದೀಡ್ಡ್ ದುಂಬು ಸೋಲ್ತೆರ್
ಪೆರಪ ಬಂಗರ್ ರತ್ನೊ ದೀಡ್ಡೆರ್
ಅವುಲ ಅಕ್ಲೆಗ್ ಆಯಿ ಸಾತ್‌ಗ್ ಆನೆ ಕುದುರೆಲೆನ್ ||
ರತೊನು ಸೇನೆನ್ ಈರೆ ಚಾಕಿರಿ
ಕೆಲಸೊದಾ ಪೊಣ್ಣಲೆನ್ ಕಳೆಯೆರ್
ಅಪಗ ತನ್ನವೆ ನಾಲ್ ಮೆಗ್ಗಲ್ಲೆನ್ಲ ಕೈಬುಡುದು ||

7

ಪೆರಪ ತನ್ನನ್ ತಾನೆ ಒಡ್ಡೆರ್
ಕಳೆಯೆರೀರೆನ್ ಬುಕ್ಕೊ ದುಸ್ತೆರ್
ಸಕುನಿ ಕೌರವನಕ್ಲ್ ಗೆಲ್ತೆರ್ ಪನ್ದ ಬುಲ್ತೊಂಡೆ ||
ಪನಿಯೆರೆಗ್ ಈ ಪೋಡ್ಡೆಯ ಸರಿ
ಪನ್ಲ ಅರಸುಲು ದುಂಬು ಸೋಲ್ತುದು
ತನನ್ ತಾನೇ ಕಳೆದ್ ಎನ್ನನ್ ಬುಕ್ಕೊ ಕಳೆಯಿನೆನೊ ||

8

ಆರ್ ತನ್ನನ್ ತಾನೆ ಸೋಲ್ತುದು
ಆಯಿ ಬುಕ್ಕೊನೆ ಈರೆನೊಡ್ಡೆದ್
ಸೋಲ್ತೆರರಸುಲು ಅಪ್ಪೆ ಈರೇ ಆಡೆಗತ್ತೊಡಿಗಿ ||
ಆಹ ಇಂಚನೊ ದಾನೊ ದೈವೊದ
ಆಟೊ ನಡಪುನೆ ಯಾನ್ ಆಡೆಗ್
ಸೀದ ಬರ್ವೆನೆ ಆಂಡ ಈಯೇ ದುಂಬು ಪೋದವುಲು ||

9

ತಾನ್ ತನ್ನನ್ ಸೋಲ್ತಿ ಬುಕ್ಕೊನೆ
ಸ್ವಾಮಿ ಎನ್ನನ್ ಎಂಚ ಒಡ್ಡೆರ್
ಜ್ಞಾನಿಲಿತ್ತನ್ ಸಬೆಟ್ ಉತ್ತರೊ ಕೊರ್ಪೆರ್ಡ ಯಾನ್ ||
ಆಡೆ ಬರ್ವೆಂದೀಯೆ ಪನ್ಮಗ
ಪೋಲ ಪಂಡ್ಡ್ ಪಿರನೆ ಕಡಪುಡ್
ನಾಪಗನೆ ಸಬೆಗತ್ತೆ ಚಾಕ್ರಿದ ಪ್ರಾತಿಕಾಮಿಕನೆ ||

10

ಸ್ವಾಮಿ ಅರಸುಲೆ ದೇವಿ ಪಂಡ್ನ
ಪಾತೆರೊನು ಸರಿ ಕೇನಿ ಧರ್ಮಜೆ
ತಾನ್ ಸೋಲ್ತುದು ಬುಕ್ಕೊ ರಾಣಿನ್ ಎಂಚ ಒಡ್ಡೆಯೆರ್ ||
ಈ ಸಬೆಟ್ ಕುಲ್ಲಾದ್ನ ಹಿರಿಯೆರ್
ಯಾನ್ ಒಪ್ಪುನ ಲೆಕೊನೆ ಉತ್ತರೊ-
ನಾಕ್ಲೇ ಕೊರ್ಪೆರ್ಡ ಬರುವೆಂದಾರ್ ಪಂಡೆರ್ಯೆ ||

11

ರಾಜೆ ಸೋಲ್ತುದು ಕಳೆಯಿ ಸೊತ್ತುನು
ಕೇನುನೆಂಕುಲು ನ್ಯಾಯೊ ಚಾಕಿರಿ
ಗಾಲೆನೇ ಉಂತವೊಡು ಲೆಪ್ಪುಲ ಪನ್ನಗೀ ಕಳುವೆ ||
ಬೀಮೆ ಗೌಜಿನ್ ಮಲ್ತೆ ಪಂಡ್ಡ್
ಪೋಡಿಡಿಂಬೈನೆ ಬಗುಳುನೆಂಚಿನ
ಕೂಲಿ ದೆಪ್ಪೊಡು ನಿನ್ನವಿತ್ತೆನೆ ನಡಪು ಮುಲ್ಪಡ್ಡೆ ||

12

ಮೆಗ್ಗ ಈಯೇ ಪೋಲ ಆಲೆನ್
ಒಯ್ತ ದೀಡೆಗ್ ಕನಲ ಐವೆರ್
ಇತ್ತೆ ನಮ್ಮನ್ ದಾನೆ ಮಲ್ತೆರ್ ಸೋಲ್ತನಕ್ಲಾದ್ ||
ಕರ್ಮೊದಾಪಲೊ ತಿನುವೆರಾಕ್ಲೆ
ಧರ್ಮೊ ಬುಡ್ಡುಜೊ ನಮೋಲ ಪೋಲಯೆ
ಸೊರ್ಪುಡೆಮೆನ್ ಲೆತೊನು ದೀಡೆಗ್ ಬೇಕೊ ಬಲ ಮೆಗಿಯ ||

|| ದುಸ್ವಾಸನೆ ದ್ರೌಪದಿನ್ ಸಬೆಕ್ಕೊತೊಂದು ಪೋಪೆ ||

ಸೂತ ಏರಿಗ್ ಬೀಜಿ ಗಾಳಿಯೊ
ಆ ಸುಯೋದನೆ ಪಂಡಿಸಾತ್‌ಗ್
ಪಾರುನಾ ದುಸ್ವಾಸೆ ತೋಜಿಯೆ ತೂಪುನಾಕ್‌ಲೆಗ್ ||
ರಾಣಿ ವಾಸೊದ ಉಳಯಿ ಬಾಕಿಲ್
ಕಾಪುನಾ ಪೋಣ್ಣಲೆಗ್ ಒದ್ದುದು
ನೂಕುದುಲಯಿಗ್ ಪೋಗ್ಯೆ ರಾವುದ ಲೆಕೊನೆ ಮಹಮೂರ್ಕೆ

1

ಬತ್ತನಾಯೆನೆ ಉಂತ್ಯೆ ದ್ರೌಪದಿ
ಕುಲ್ಲದಿತ್ತನ ಎದುರು ನಿನ್ನವು
ಮಲ್ಲತಿಗೆಯಾವಿತ್ತ ಜಪ್ಪುಲ ಕುಲ್ಲಿ ಪೀಟೊಡುದು ||
ತೊತ್ತು ಚಾಕಿರಿಗುಂತೊಡೀಯೆ
ಇತ್ತೆ ಬಲ ಈ ಅರಸು ಚಾವಡಿ-
ದಲ್ವ ನಿಕ್ಕೆಂಚಿನವೆ ಕಸುಬುಂದಣ್ಣೆ ತೆರಿಪಾವೆ ||

2

ಕೌರವನ ಮೆಗಿ ಈಯೆ ಎಂಕಲ್
ಮೈತ್ತನೆತ್ತೊಯ ಎನ್ನ ಕಂಡನಿ
ಸೋಲ್ತೆರ್ಡ ದಾನ್ಯಾಂಡ್ ಎನ್ನವೆ ಪ್ರಸ್ನೆಗುತ್ತರೊನು ||
ಕೊರಡ್ ಮಗ ಈ ಪನ್‌ಲ ಯಾನೇ
ಪಿದಯಿದಾಲಾದುಲ್ಲೆ ಅರಸುನ
ಸಬೆಕ್ ಬರ್ಪುನೆ ಎಂಚ ಪನ್ನಗ ರಟ್ಟೆ ಕೋಪೊಡುಲ ||

3

ನಿನ್ನ ಪ್ರಸ್ನೆಗ್ ಏರ್ ಉತ್ತರೊ
ಕೊರ್ದುನಾಕ್‌ಲ್ ನಡಪುಲಾಡೆಗ್
ಅಲ್ವ ನಿನ್ನವು ಉಲಯಿ ಪಿದಯಿದ ಗೊಬ್ಬು ತೋಚಾಲ ||
ಪನ್‌ಲಾಲೆನ ಜುಟ್ಟುಗೇ ಕೈ-
ಪತ್ತದೊಯ್ತೆನೆ ಮೂರ್ಕೆ ತನ್ನವೆ
ಮುರ್ತ್ಯು ದೇವತೆ ಜುಟ್ಟು ಪಂಡ್‌ದ್ ಆಯೆ ನೆನೆಪಂದೆ ||

4

ರಾಜಸೂಯೊದ ಯಾಗೊ ಪೂರ್ತಿಡ್
ಆ ಮಹಾಮನು ಮುನಿಕುಲೆನ ಸಿರಿ
ವೇದೊ ಮಂತ್ರೊದ ಪುಣ್ಯೊ ಸೀರ್ತೊಡು ಚಂಡಿ ಆಯಿನವೆ

ದ್ರೋಪದಿನ ಸಿರಿ ಮುಡಿಕ್ ಕೈನೇ
ಪಾಡ್ ಒಯ್ಪುನ ತೂದು ಪೋಣ್ಣಲು
ಏತೊ ಬುಲ್ತೆರ್ ತರೆಕ್ ಕೈ ಹಾಕೊಂದು ಮುರ್ರೊಡುದು ||

5

ಮುತ್ತು ಬಗ್ಗೆಲೆಡಿತ್ತಿ ಮುತ್ತೆಸಿ
ರತ್ನೊ ಮಣಿಕುಲು ರಟ್ಟೊ ರಚ್ಚಾ-
ಪಚ್ಚೆಯಾದೇ ಕೆಬಿತ ವಜ್ರೊದ ಓಲೆ ತುಂಡಾಂಡ್ ||
ಒಯ್ತೊನುಂದೇ ಪೋನಗಾಯೆನೆ
ಪೋಣ್ಣಲರಬಯಿ ಕೊರ್ದು ಪಿರವುಡೆ
ಬನ್ನಗ್‌ಲೆಗ್ ತೊರಿತ್‌ದಡಿಕೇ ಪಾಡ್ ದುಂಬೊತ್ಯೆ ||

6

ಪೋಡಿಗದ ದಿಸ್ವಿಡ್‌ಲ ಬುಲ್ಲೊಂ-
ದಾಲೆನವೆ ಸಿರಿ ಕುಜಲ್ ಬಿರ್ಕ್‌ದ್
ಕಾರ್ಗ್ ತಿಕ್ಕನ ಸೀರೆ ಮಣ್ಣಾಡ್ ಮುರ್ಕ್ಕದಿತ್ತನವೆ ||
ಕಂಗಿ ಮೋನೆಡ್ ದುಸ್ವ ಕೈಟೇ
ತಿಕ್‌ದಿ ಸೈರೊನು ಒಯ್ತದೊಯ್ತದ್
ಸಬೆಕ್ ಬನ್ನಗ ಮಾತ ಕಣ್ಣಾಗ್ ಕೈನ್ ಪತ್ತಿಯೆರ್ ||

7

ಹಾ ವಿದಿಯೆ ಪಾಂಡವೆರೆ ಪಟ್ಟೊದ
ರಾಣಿಗಿಂಚಿನ ಯೋಗೊ ಯಜ್ಞೊದ
ಸೀರ್ತೊ ಮೀಯಿನ ಸೈರೊಗೆಂಚಿನ ಸಿಕ್ಕೆ ಮಹದೇವ ||
ಬಾಗ್ಯೊ ದೇವತೆಯಾದ್ ಮೆರೆಯಿನ
ಯಾಗೊದಗ್ಗಿಡ್ ಪುಟುದು ಬತ್ತನ
ದ್ರೋಪದಿಗ್ ಇಂಚಾಂಡೆ ಸಿವ ಸಿವ ಪಂಡೆರಾ ಸಬೆಟ್ ||

8

ಕೆಲವೆರಿತ್ತೆರ್ ದುಕ್ಕೊ ಮಲ್ತದ್
ಸಬೆಟ್ ದುರ್ರೊದನೆನೆ ಪೀಟೊಡು
ಕಪಟೊ ತಂತ್ರೊದ ಸಕುನಿ ಕರ್ಣೆ ಜಯದ್ರತಾದಿಗುಳು ||
ಮುಕುಲು ಸಂತೊಸುಡಿತ್ತೆರಾಪಗ
ದವುಡೆಡರಿನವೆ ಕಣ್ಣ ನೀರ್‌ನ್
ಉರುದೊನುಂದೇ ಕುಲ್ಲದಿತ್ತೆರ್ ಕೆಲವುದಕ್‌ಲಲ್ವ ||

9

ಈತ್‌ಲಾಯಿನ ಸುದ್ದಿ ಪಸೆರ್‌ದ್
ಆಂಡ್ ಹಸ್ತಿನಪುರೊಟು ಸೇರೈರ್
ಬೀದಿ ಬೀದಿಡ್ ಜನೊಕುಲೇತೋ ಎಂಚಿನಾಂಡ್‌ಂದ್ ||

ಆ ಸುಬದ್ರೆನ ಮಗನೆ ದ್ರೌಪದಿ
ಬಾಲೆಲ್ಯೆವೆರ್ ಮಂತ್ರಿ ಪ್ರಜೆ ಪರಿ
ವಾರೊ ಮಾತೆರ್ ಕೇನ್ದ ತೆರಿಯೆರ್ ಪಾಂಡವೆರೆ ಸೋಲು ||

10

ಪಿದಯಿ ಸುತ್ತಾಡು ಸೇನೆನುಂತದ್
ಅರಮನೆನ್ ಪೊಡಿ ರಟ್ಟಗೊಂದುದು
ತಯರ್‌ಲಾನಗ ಕೌರವೇರೆನ ಸೈನ್ಯೊ ಎದುರಾಂಡ್ ||
ಸಬೆಟ್ ಪೊಣ್ಣನ್ ದುಸ್ಸ ಕೌರವೆ
ಮೆಗಿಯ ಕೈಡ್‌ದ್ ಬುಡ್ಡದಾಪಗ
ಸರಿ ಪೆದಂಬುಡು ಪನ್ನೆ ಹಂಕರೊಡಾಯೆ ಮಿತಿ ಮೀರ್ದ್ ||

11

ದೂದು ದಾವುಗು ನಿನ್ನನೊಡ್ಡದ್
ಸೋಲ್ತೆ ನಿನ್ನವೆ ಕಂಡನಿಯೆ ಇನಿ
ಈಯೆ ಉಂತ್ತದೆ ಎಂಕ್ಲೆ ಪೊಣ್ಣಲೆ ಚಾಕ್ರಿ ಮಲ್ಪಿಯೆರೆ ||
ಮಾರ್‌ನಾಯೆನೆ ಮಲ್ಲ ಕಂಡನಿ
ಬಾಕಿ ಎಲ್ಯವೆ ಕಂಡನೀಯೆರ್
ನಾಲ್ ಜನೊಕುಲ ಪಾತೆರುನ ಇನಿ ಹಕ್ಕು ಇದ್ಯತ್ತೊ ||

|| ದ್ರೌಪದಿ ಸಬೆಟ್ ನ್ಯಾಯೊ ಕೇನ್ದಲ್ ||

ಸಬೆಕ್ ಕೈ ಮುಗಿಯೊಂದು ದ್ರೌಪದಿ
ನಿಕ್‌ಲ್ ಮಾತೆರ್ ನ್ಯಾಯೊವಂತೆರ್
ಎನನ್ ಬಾಯಿಡ್ ಜೋರುದಾಲ್‌ಂದೇರ್ಲ ದೂರೊಡ್ಡಿ ||
ಹಿರಿಯೆರುಲ್ಲರ್ ಧರ್ಮೊ ಸಾಸ್ತೊನು
ತೆರಿನಕ್‌ಲ್ ಮಾತೆರ್ಲ ಎನ್ನನ್
ಅರಸು ಸೋಲ್ತನ ಬುಕ್ಕೊ ದೂದುಗು ಒಡ್ಡವುನ ಸಮೊನೊ ||

1

ಪನ್‌ಲೆ ತೆರಿನಕ್‌ಲಿತ್ತೆ ಉತ್ತರೊ
ಕೊರುದು ಧರ್ಮೊದ ಗುಟ್ಟು ತೆರಿಪಲೆ
ಸಬೆನ್ ತೂದೇ ಪನ್ನಗಾಪಗ ಕರ್ಣೆ ಲಕ್‌ದುಂತ್ಯೆ ||
ಮೆಗಿಪಲಯನಕ್‌ಲೈನ್ ಜನೊಕುಲೆ
ಬುಡೆದಿ ಪಂಡ್‌ದ್ ಸೊರ್ಕುನಾಲೆಗ್
ದಗ್‌ಡಿಗಂಚಿನ ನ್ಯಾಯೊ ನಡಪುಲ ಕೆಲಸೊದಾಡೆಗ್‌ಲ ||

2

ಆವು ಪೋಲದೆ ಪೊಣ್ಣು ದ್ರೌಪದಿ
ದಾಸಿ ಕೆಲಸೊಗು ಈಯೆ ಪನ್ನಲ್
ದಾಯೆಗೆತೆ ನಿಕ್ಕಿತ್ತೆ ರಾಣಿನ ಪೊರ್ಲುದರಮನೆಡ್ ||
ಏತೊ ಪೊಣ್ಣಲು ಉಲ್ಲೊ ಅಕ್‌ಲೆನ
ಸೇರಿಗೆಡ್ ಈ ಸುಕೊಟು ಮೆರೆಲದೆ
ಸೀರೆ ಪದ್ವೊಯಿ ತಿಕ್ಕು ನಿಕ್ಕಲ ಪಂಡೆನಾ ಸಕುನಿ ||

3

ಪದ್ವೊಯಿಗ್ ಈ ಮಣ್ಣಾ ಪಾಡಲ್
ಇತ್ತೆ ಮೋಲೆನ ಪ್ರಸ್ನೆಗುತ್ತರೊ
ಕೊರೈರೆಗ್ ಏರಾಂಡ ಯೇಚನೆ ಮಲ್ತೆರೋ ಪನ್‌ಲ ||
ಮುಲ್ಪ ಬೊಡ್ಡಂದ್‌ನವೆ ಪಂಡ್‌ದ್
ಧರ್ಮೊ ಮೀರುನ ಕೆಲಸೊ ನ್ಯಾಯೊನೊ
ಮರ್ಮದಿಯೆ ಇದ್ಯತ್ತೊ ನಿಕ್‌ಲೆಗ್ ಪಂಡೆನಾ ಬೀಸೈ ||

4

ಬದ್‌ಕ್ ಪೋವಡ್ ಮಾನೊ ಸಿರ್ಕಡ್
ಪೆರಣೊ ರಟ್ಟಡ್ ಸೈರೊಡಿತ್ತೆನೆ
ಬುಡಯೆ ಧರ್ಮೊನು ಪನ್ನಿ ನಮುನೆಡ್ ಧರ್ಮನಂದನೆನೆ ||
ಆಯಿನೆಕ್ ಮಗ್‌ರುಂತುದೆನೊ ಪನ್
ಆಯ ಬೆರಿ ಪುಟ್ಟ್‌ದ್‌ನ ವೀರೆರ್
ಬೀಮ ಪಾರ್ತೆರ್ ಮನಿಪುಜೆರ್ ಈ ದಾಯೆ ಬಗುಳುನೆಯೆ ||

5

ಸೋಲ್ತೆ ಬುಕ್ಕುಕ್‌ಲೆನ್ನ ವಸೊ ಅ-
ನ್ಯಾಯೊ ಮಲ್ಪಯೊ ನಿಕ್‌ಲ್ ಪೊಕ್ಕಡೆ
ದೂರ್ದು ನೆರೈರಡೇನ್ ಕೇನಯೆ ಪೋಡಿ ಎಂಕಿದ್ಡಿ ||
ಸೇರಡೀ ದ್ರೌಪದಿಯೆ ಕೆಲಸೊಗು
ಚಾಕಿರಿದ ಪೊಣ್ಣಲೆನ ಒಟ್ಟುಗು
ಯಾರು ಉಂತಲೆ ನಿಕ್‌ಲೆ ಪಾತೆರೊ ಪಂಡೆ ಕೌರವೆನೆ ||

6

ಈತ್ ಪಾತೆರೊ ಕೇನ್ದ ಬೀಮಗ್
ಕೋಪೊ ಏರ್‌ದ್ ಪಂಡೆನಾ ಸಹ
ದೇವಡಿತ್ತೆನೆ ಕನಲ ಸೂನೇ ಆ ಯುದ್ಧಿಸ್ಪಿರನ ||
ಕಯಿನ್ ಪೊತ್ತವೆ ಸಬೆತ ಎದುರುಡೆ
ಬುಡೆದಿನಡವುನು ದೀಡ್ಡ್ ಗೊಬೈನೆ
ಪಗಡೆ ಮಲ್ಲೆನೆ ಪನ್ನಗರ್ಜನೆ ಪನ್ನೆ ಸಮದಾನೊ ||

7

ಅಣ್ಣ ಈ ಸಮದಾನೊ ಮಲ್ಪುಲ
ಇತ್ತೆ ಗುರು ಸಮೊ ನಂಕ್ ಪಲಯೆನೆ
ಸೊತ್ತು ಮಾತಲ ಪೋಯಿನತ್ತಂದಿತ್ತೆ ದ್ರಾಪದಿಲ ||
ನಮ್ಮ ಅಣ್ಣಿಗ್ ಸಮೊನೆ ಗ್ರೇಯಿಪು
ಧರ್ಮನಂದನೆ ಜೀವೊ ಬಾವೊದ
ಗಟ್ಟಿದರ್ಕಟ್ ನಂಕ್ ಇತ್ತೆನೆ ಬೇತೆ ಏರುಂಡು ||

8

ಪೆರಣೊ ಪೋವಡ್ ಎನ್ನವಿತ್ತೆನೆ
ಸರುವೊ ನಾಸೊನೆ ಆಂಡ ದಾನೆಯ
ತಡವೆರೇರ್ಯ ಪಾರ್ತದಾಯೆಗ್ ಮರ್ಲ್ ಪಾತೆರುವ ||
ಬುಡೆದಿನೇ ಒಡ್ಡುನೆನೊ ಜುಗರಿಗ್
ನಮನವೇ ಕೈ ಪತ್ತನಾಲೆಗ್
ಕೊರುಪುನೆನೊ ಈ ಸಿಕ್ಕಿ ಎನ್ನವೆ ಕೈನ್ ಪೊತ್ತಾವೆ ||

9

ಈಯವಸ್ತೆನ್ ಮಲ್ತಿ ಕೌರವ
ನಾಯಿಲೆನ ಎಲು ತೋಡ್ಗು ದಕ್ಕಿರೆ
ಆವಂದಿತ್ತಾನವೆನ್ನ ಕೈಕುಲೆನೇನೆ ಕಳೆವೊನುವೆ ||
ಸೂಕು ಪಾಡ್ಡ್ ಬೊಣ್ಣೊ ಮಲ್ಪುವೆ
ಸೂರ್ಯ ಚಂದ್ರರ್ ಇತ್ತಾನೇಟಲ
ಸಾಸಿತೊನೊ ಈ ಸೈರೊ ಪಂಡ್ಡ್ ಬೀಮೆ ನುರ್ಕಿಯೆನೆ ||

10

ಅಯ್ಯೊ ಎನ್ನವೆ ಕಂಡನೀಯೆರ್
ಕುಲ್ಲದೇರ್ ಮನಿಪಂದೆ ಎನ್ನನ್
ಮುರ್ತ್ಯು ಬಾಯಿಗ್ ನೂಕುವೆರೊ ನನ ದಾನೆ ಮನಿಪುಜೆರ್ ||
ಸೊರ್ದಯೊನೆ ಇದ್ಯತ್ತೊ ನಿಕ್ಲೆಗ್
ಮುಲ್ಪ ಉಲ್ಲೆರ್ ದ್ರೋಣ ಬೀಸೈರ್
ಎನ್ನ ಪ್ರಸ್ನೆಗ್ ಕೊರ್ದೆ ಉತ್ತರೊ ಪಂಡಲಾ ಪೊಣ್ಣು ||

11

ತೆರಿದ್ ಮೌನೊನೊ ಅತ್ತ ಬುಲ್ಪಡ್
ಪನ್‌ಪಿ ಸಸರೊನೊ ಕಡ್ಡ್ ಪನಿಯೆರೆ
ತಿಗಲೆದುಲಯಿಡ್ ಪೋಡಿಗೇನೊ ಪನಿ ಕೂಡಿ ಸಬೆತಕ್ಲ್ ||
ನಿಕ್ಲೆ ಕಣ್ಣಿಗ್ ತೋಜುಜೋ ಸರಿ
ಬುಲುಪಿ ಪೊಣ್ಣನ ಮೋನೆ ಬುಲ್ಪುನ
ಸೂರೊನೆ ಕೇನುಜೊ ಕೆಬಿಕ್ ಪಂಡೆನೆ ಆ ವಿಕರ್ಣೆನೆಲ ||

12

ಸುಳ್ಳು ಪಾತೆರೊ ಪೊಣ್ಣ ಮರ್ಲ್ದ
ದುಸ್ಸ ಪೌರುಸೊದೆಸನೊದಾಕ್ಲ್
ಧರ್ಮೊ ಸಾಸ್ತೊದ ತತ್ತೊ ನಿಚ್ಚಯೊ ಮಲ್ಪಯೆರ್ ನಿಜೊನೆ ||
ಅಜ್ಜ ಬೀಸೈರ್ ಈರ್ ಸಾಸ್ತೊನು
ಧರ್ಮೊ ನೀತಿನ ತೆರಿನರಾದ್ಲ
ಕುಲ್ಲದೇರ್ ಮನಿಪಂದೆ ದಾಯೆಗ್ ಪನ್‌ಲೆ ಈರಜ್ಜ ||

13

ತಾನ್ ತನ್ನನ್ ಸೋಲ್ತದಾನಗ
ಆಯೆ ಬುಡೆದಿಗ್ ಬೇತೆ ಆಯೆನೆ
ತಾನೆ ಸೋಲ್ತನ ದುಂಬು ಮಾತ್ತೊನೆ ಆಲ್ ಆಯನಲ್ ||
ಅನ್ಯೆ ಅನ್ಯೆದಿನಲ್ಪ ಸೋಲ್ತನೆ
ತನ್ನವೆಂದ್ ಎಂಚ ಪನ್ನನೆ
ಒಪ್ಪುನಾಯೆನೆ ಕಂತ್ರಿ ಸಕುನಿಂದಾ ವಿಕರ್ಣೆನೆಲ ||

14

ಕೋಪೊಡೇ ಪಂಡ್‌ನೆಕ್ ಲಕ್ವದ್
ಆಪಗನೆ ಸರಿ ಕರ್ಣೆ ಪಿಸ್‌ರಡ್
ಲಾ ವಿಕರ್ಣಿಗ್ ಪಂಡೆ ಕೌರವ ಮೆಗಿಯೆ ಆಯಿನೆಟ್ ||
ಕೂಲಿತಾಲ್ಪಂದಿತ್ತೆ ಬುಡಿಯೆನೆ
ಬೀಸೈ ಗುರು ಮಾತೆರ್ದ ಮನಿಪುಜೆ
ರೀಯೆ ಧರ್ಮೊದ ಗುಟ್ಟು ಪನಿಯೆರೆ ತೀರುನಾಯೆನೆನೊ ||

15

ಒಂಜಿ ಆಣಿಗ್ ದಿಂಜ ಬುಡೆದಿಲು
ಉಂಡು ರೂಡಿಡ್ ಇತ್ತೆ ಮುಕುಲೆಗ್
ಒಂಜಿ ಬುಡೆದಿಗ್ ದಿಂಜ ಕಂಡನಿ ಧರ್ಮೊ ಮೀರ್ದತ್ತೊ ||
ಲೋಕೊ ರೂಡಿಡ ಕೆರಮೊ ತತ್ತನ
ಪಾಂಡವೆರೆನಾ ಕರ್ಮೊ ಕುರ್ತಲ್
ದಾಯೆ ಪುಟ್ಟಿ ವಿಕರ್ಣಿ ಕುಟುಮೊಡು ಪೋಲ ಮುಲ್ಪಡ್ಡ್ ||

16

ಕೇನ್ ಕರ್ಣನ ನುಡಿವಿಕರ್ಣೆನೆ
ಬಾರಿ ಪಂಡಿತೆ ದಿಂಜ ಬಗುಳುವ
ಮೂಜಿ ಕಾಸ್‌ದ ನಾಯಿ ದಾಯೆಗ್ ಪುಟ್ಟಿ ಮೆಗಿಯಾದ್ |
ಎಡ್ಡೆ ಹಾಲ್‌ನ್ ತೆರಿಯಂದಿತ್ತಾನ
ಹೆಡ್ಡೆ ಪಂಡೆಡ ಏರ್ ಕೇನುವೆ
ಕರ್ಣ ಆಯೆನೆ ಕುಲ್ಲಡಲ್ಪನೆ ಪಂಡೆ ಕೌರವೆನೆ ||

17

ಮಾಲೆ ಪದಕೊ ಕಿರೀಟೊ ಕುಂಡಲೊ
ಮಾತ ನಮ್ಮವು ಅಕ್ಲೆಡ್ಡಿನ
ದೀವಡ್ಯೆನೇ ಮೂಲು ದೆತ್ತಾದ್ ಪನ್ನ ಅಕ್ಲೆಡನೆ ||
ಚಾಕ್ರಿದಾಲೆಗ್ ಸೀರೆ ಪದ್ವೊಯಿ
ದಾಯೆ ದೆಪ್ಪುಲ ಈಯೆ ಪಂಡಾದ್
ಮೂರ್ಕ ದುಸ್ವಾಸನೆಗ್ ಅಪ್ಪಣೆ ಕೊರೈ ಕುರುರಾಯೆ ||

18

ದೆತ್ತದೈವೆರ್ ಮಾಲೆ ಪದಕೊನು
ದಕ್ಡೆದಲ್ಲನೆ ತುತ್ತನೈತೊನು
ಬಿಚ್ಚದಾಕ್ಲ್ ಬೇತೆ ಕುಂಟುನು ತುತ್ತೈರೊಂಜೊಂಜಿ ||
ಮೋನೆ ಪುಗೆ ಕಿಟಿ ಕಣ್ಣೆ ಕೆಂಪುದ
ಮೀಸೆ ಪಂಜಿದ ಉಬ್ಬೊ ಗುಜ್ಜರೆ
ಮೂರ್ಕ ದುಸ್ವಾಸನೆ ದ್ರಾಪದಿ ಪೊದಕೆನೈತ್ತನೆಲ ||

|| ದ್ರಾಪದಿ ಕ್ರಿಷ್ಣನ ಪ್ರಾರ್ಥನೆ ಮಲ್ತಲ್ ||

ಮೋನೆನಡಿಕೇ ಪಾಡ್ಡ ಕಣ್ಣೆಡೆ
ನೀರ್ ಜಪುಡದ್ ಅಯ್ಯೊ ಇಂಚಿನ
ಹಾಲ್ ಕೆಲಸೊನು ದಾಯೆ ಮಲ್ಪೆರೊ ಮೂರ್ಕನಕಲಿತ್ತೆ |
ಏತ್ಲಾ ಬುಲೊಂದು ಇತ್ತನ
ದ್ರೋಪದಿನ್ ತೂವೊಂದು ಕಣ್ಣೆಡೆ
ನೀರ್ ಜಪುಡದ್ ಬೀಸೈ ಗುರುಕೃಪೆ ವಿದುರೆರಿತ್ತೆರಾಲ ||

1

ಕುಲೊ ಪಟಿಂಗನೆ ದುಸ್ಸೆ ದುಸ್ವಾ-
ಸನೆನೆ ಪೊದಕೆನ್ ಒಯ್ಪುನಾಪಗ
ಮಿರೆನ್ ಮುಚ್ಚಿದ್ ಪತ್ಯಲಲ್ಲನೆ ದಿಂಜ ಪೋಡ್ಯೊಂದು||
ಕಣ್ಣೆಡೆನೆ ಸರಿ ನೀರ್ ಜಪುಡದ್
ಬುಲ್ಲು ಬುಲ್ಲುದು ತೂಯಲಲ್ಲನೆ
ಇತ್ತಿ ಧರ್ಮಜ ಬೀಮ ಪಾರ್ತೆರೆ ಮಾದ್ರಿ ಜೋಕುಲೆನ್ ||

2

ಅಕ್ಲೆ ಮೋನೆಡ್ ಸಾರೊ ತೋಜಿಜಿ
ಪಲಯನುಲಯಿಡ್ ಮಾತ ಉಲ್ಲೆರ್

ಮನಿಪುಜೆರ್ ಪಂಡೊಂದು ಬೀಸೈನ್ ದ್ರೋಣ ಕೃಪೆರೆನವೆ
ಮೋನೆ ತೂದೇ ಅಜ್ಜ ಬೀಸೈರೆ
ದ್ರೋಣ ಗುರುಕುಲೆ ಸೆರಗ್ ಬುಡ್ಬಲೆ
ಮಾನೊ ಕಾಪುಲೆ ಎನ್ನ ಹಾಹಾ ಪನ್ದ ಮುರೆಡಿಯಲ್ ||

3

ಕೂರೆ ಹಾ ದುಸ್ವಾಸನೆನೆ ಗಾಂ-
ದಾರಿ ಮಾಮಿಯೆ ಪೊದಕೆನೊಯ್ಪುವೆ
ಯಾನ್ ಈರೆನ ಮರ್ಮಲತ್ತೊಯೆ ಮೆಗಿದಿ ಬಾನುಮತಿ ||
ವೀರ ಸೈಂದವ ಬುಡೆದಿ ರಾಜಕು -
ಮಾರಿ ಮೈತಿದಿಯಪ್ಪೆ ಬಲ ಬಲ
ನೂಕ್ಕೆ ನರಕೊಗು ದುಸ್ಸೆ ಎನ್ನನ್ ಬುಡ್ಬಯೆರೆ ಬಲೆಯೆ ||

4

ಅರಮನೆಡ್ ಸೇರ್ದಿತ್ತಿ ಪೊಂಚೊವೆ
ನಿಕಲೆ ಪಾತೆರೊ ಕೇನ್ಪೆ ಪನ್ನೆಯೆ
ಮೆಗಿದಿ ನಿಕಲೆನ ಪಂಡೆನ್ನವೆ ಮಾನೊ ಕಾಪುಲೆಯೆ ||
ಕುರುಪತಿಗ್ ಪನಿ ಸರಣು ಯಾನೇ
ಎನನ್ ರಚ್ಚಣೆ ಮಲ್ಲಿ ನಿಕಲೆನ
ಮನಸ್ ಕಲ್ಲಾತನೆನೆ ದಾಯೆಗ್ ಪಾರ್ ಬಲೆ ಈಡೆ ||

5

ರಾಜ ರಾಜೆರೆ ಅರಸು ಮಂತ್ರಿಲೆ
ಕೂಡಿ ಪರಿವಾರೊಲೆನ ವೀರೆರೆ
ನ್ಯಾಯೊನೋ ಪನಿ ದುಸ್ಸೆ ಮಲ್ಪುನ ಈ ಪಟಿಂಗತನೊ ||
ಸೀರೆನೊಯ್ಪುವೆನಯ್ಯೊ ಕೆಟ್ಟಿನೆ
ಏರ್ಲಾ ಬುಡ್ಬಯೆರೆಗಿದೈರೆ
ದಾನೆ ಮಲ್ಪೆರೆ ತೀರು ಎಂಕೇ ಸಿವ ಮಹಾದೇವ ||

6

ಎನ್ನ ಕಂಡನಿನಕ್ಲ್ ಎನ್ನನ್
ಒತ್ತೆ ದೀಡ್ಡದ್ ಧರ್ಮೊ ಕಿರಯೊಗು
ದೆತ್ತನಕಲಾದಿತ್ತೆ ಮನಿಪಂದುಲ್ಲೆರೀ ಸಬೆಟ್ ||
ಅಜ್ಜೆ ಬೀಸೈರ್ ಬುಕ್ಕೊ ಗುರುಕುಲು
ಎಡ್ಡೆ ಮಲ್ಪಯೊ ಏರೆಗಲ ನನ
ಪನ್ನಿ ನಮುನೆಡ್ ಕುಲ್ಲುದುಲ್ಲೆರ್ ದಾನೆ ಮಲ್ಪೆನ್ ||

7

ಮಾಮಿ ಸಮ್ಮಲೆಗಕ್ಲೆ ಮಗನವೆ
ಮೋಕೆಡಾಕ್ಲ್ ಕೊಸಿಟ್ ಉಲ್ಲೆರ್

ಯಾನ್ ಸೈಪ್ಪುನವೆಡ್ಡೆ ಮಾನೊನು ಕಾಪೈರಾವಂದೆ ||
ದಾಯೆ ಬದುಕುನೆ ಆಕ್‌ಲಾಕ್‌ಲೆ
ಮಾನೊ ಒರೈಡ್ ಯಾನ್ ದೂರುನೆ
ದಾಯೆ ಸಿರಿ ಹರಿ ಕೃಷ್ಣ ಕಾಪುಲ ನಿನ್ನ ತಂಗಡೆನ್ ||

8

ಬಾವನಕ್‌ಲೆನ ಮರ್ಲ್ ಬುದ್ಧಿಡ್
ಸಾವು ನಿಸ್ಸೆಯೊ ಎಂಕ್ ಮುರಹರ
ಕಾಪುಲೆನ್ನವೆ ಮಾನೊ ಲಕ್ಷ್ಮೀ ರಮಣ ಗೋವಿಂದ ||
ಸೀರೆನೊಯ್ತೆರ್‌ಡೇನ್ ಬದ್‌ಕಯೆ
ಜೂವೊನೊಯ್ತುನ ಯಮನ ಲೆಕ್ಕೊನೆ
ಮಾನೊ ಮದೆಪೆರೆಗಿತ್ತಿ ಕುಂಟುನು ಒಯ್ಪೆ ಸರ್ವೇಸಾ ||

9

ಈಯೆ ಗತಿ ಹೀನೆರೆಗ್ ಗತಿ ಗೋ -
ಪಾಲ ವೈರಿಲೆ ಬಾದೆದಕ್‌ಲೆಗ್
ಬಾರಿ ದುರ್ಬಲೊದಾಕ್‌ಲೆಗ್‌ಲಾ ಪರಮ ಬಂದು ನಿಜೊ ||
ಪೋಣ್ಣು ಪೆರಣೊನು ಮಾನೊಗಾದೇ
ದೆತ್ತೊನುನ ಸಿತಿ ಈ ಸುಯೋದನ
ದುಸ್ಸ ಕೂಟೊದ ಸಬೆಟ್ ಕೇನುನ ವೀರೆರೇರುಂಡು ||

10

ವೇದೊಸಾಸ್ತೊನು ಕಂಡ್‌ನಾಯನ್
ಮೀನ್‌ದಬತಾರಾದ್ ಕೆರೈನೆ
ಏಮೆಯಾದ್‌ಲ ಬೆರಿಟ್ ತಾಂಗಿಯ ಮಂದರಾದ್ರಿನಾಲ ||
ಕೋರೆದಾಡೆದ ಪಂಚಿಯಾದೇ
ಈ ವಸುಂದರೆನೀಯೆ ಮಿತ್ತೆಗ್
ದೇರ್ತದುಂತಯಿ ಬೂಮಿದೇವಿನ ಸ್ವಾಮಿ ಕಂಡನಿಯೆ ||

11

ಬಾಲೆನ್‌ಲ ಕಾಪೈರೆಗ್ ಕಮ್ಮೊಡು
ಮೂಡ್‌ನಾ ನರ ಹರಿಯೆ ಕಾಪುಲ
ಮೂಜಿ ಮೊಟ್ಟುದ ನೆಲನ್ ಕೇಂಡ್‌ದ್ ಬಲಿನ್ ಪಾತಳೊಗು ||
ನೂಕ್‌ನಾಯೆನೆ ಕಾಪು ಬಾರ್ಗವೆ -
ಯಾದ್ ಚತ್ತಿಲೆ ತರೆನ್ ರಟ್ಟಯಿ
ರೇಣುಕೆನ ಮಗೆ ಎನನ್ ಬುಡ್ಡನ ಕುಡರಿ ಪತ್ತನಯ ||

12

ಅಮ್ಮನವೆ ಪಾತೆರೊನು ನಡಪವಿ
ತರೊಡೇ ತನ ಪಟ್ಟೊ ಬುಡುದುಲ

ದುಸ್ಪೆರೆನ್ ಕೆರೈರೆಗ್ ಕಾಡ್‌ಗ್ ಪೋಯಿ ಮಾಮಹಿಮ ||
ರಾವಣಾಸುರ ತರೆನ್ ರಟ್ಟದ್
ಬೂಮಿ ಬಾರೊನು ತಗ್ಗಯಿನ ಸಿರಿ
ದೇವಿ ಸೀತೆನ ಸ್ವಾಮಿ ಕಾಪುಲ ರಾಮ ರಗುರಾಮ ||

13

ದೇವಕೀ ಮಗೆ ಪೂತನಿಗ್ ಯಮೆ
ದೇವ ದೇವೆರೆ ದೈವೊ ಶ್ರೀ ಹರಿ
ಮಾಮ ಕಂಸನ್ ಕೆರೈ ಮಹಿಮೆನೆ ಕಾಪು ಸಿರಿಕ್ರಿಷ್ಣ ||
ನರಕ ದಾನವೆ ಪತ್ರ್‌ಪಾಡ್‌ನ
ಪಿರಯೊ ಬತ್ತನ ಪೋಣ್ಣಲೆನ್ ಅಲ್
ಪಡ್‌ದ್ ಬುಡ್ಡಯಿನಾಯೆ ಎನ್ನವೆ ಸೆರಗ್ ಬುಡ್ಡಾಲ ||

14

ವರುಣೆ ಕಂಡ್‌ನ ಸತ್ತ ಜಿತುನವೆ
ಮಗನ್ ನಾಡ್‌ದ್ ಕೊರೈ ಮಹಿಮೆನೆ
ಎನನ್ ಕಾಪುಲ ದುಸ್ಸ ಕೈಡ್‌ದ್ ಇತ್ತೆ ಬುಡ್ಡಾದ್ ||
ತೊರಿತ್‌ನಾಯಗ್ ಏರ್ ಒಲಿತೆರ್
ನೆರ್‌ತ್‌ನಾಯಗ್ ಏರ್ ಪದವಿನ್
ಕೊರ್‌ನಕ್‌ಲ್ ಪನ್ ಈಯೆ ಅತ್ತಂದಿತ್ತೆ ಬೇತೇರ್ ||

15

ತಮೆರ್ ಇದ್ಯಂದ್‌ನವೆ ಬಾಲ್ಗೆಗ್
ತಮೆರ್ ಈ ಗೋವಿಂದ ಕಾಪುಲ
ಎನನ್ ಮಡೆ ಇರೆ ದಕ್ಕುನಂಚಿನೆ ಎನ್ನ ಕಂಡನಿಲು ||
ಬಿರ್‌ಸೆರಾಕ್‌ಲೆ ದಕ್ಕಿಯೆರ್ ಶ್ರೀ
ಹರಿಯೆ ಗತಿ ಏರುಂಡು ಎಂಕಲ
ಪರಮ ಪುರುಸೆನೆ ಕಾಪುಲೆನ್ನನ್ ಆದಿ ನಾರಯಿಣ ||

16

ಕೆಮ್ಮ ಬೋಂಟೆದ ಬಲೆಕ್ ಬೂರ್‌ನ
ಲೆಕ್ಕೊ ತಿಕ್ಕದ್ ಬೂರೈ ಕಾಡ್‌ಡ್
ಅಪ್ಪೆ ದಕ್ಕನ ಬಾಲೆ ಯಾನೇ ಆಯೆ ಸಿರಿ ರಮಣ ||
ಕಕ್ಕೆಲೊಟ್ಟುಗು ಸೇರ್‌ದ್ ಕೋಗಿಲೆ
ಕಿನ್ನಿನೆ ಕೆರ್ಪಿಂಚಿ ನಮುನೆಡ್
ಕೆರೈರೆನ್ನನ್ ಕಾಪು ಸಿರಿ ಹರಿ ಕ್ರಿಷ್ಣೆ ಗೋಪಾಲ ||

17

ಅಯ್ಯೊ ಹಂಸೊದ ಕಿನ್ನಿನೊಯ್ತುನ
ಬೊಲ್ಲು ಕೊಂಗುನು ಗಿಡಪು ಗಿಳಿತವೆ

ಮೇಲ್ ಬೂರ್ಡ್‌ನ ಗಿಡನ್ ಕೆರೈ ನಿಕ್ಕ ದಾಸಿನೊನೊ ||
 ನಿನ್ನ ನಾಮೊದ ಪೊರ್ಲುದುಚ್ಚರೊ
 ದುಸ್ಸ ಗ್ರಹೊಕುಲೆ ಬಾದೆ ತಪೈರೆ-
 ಗೆಡ್ಡೆ ಪನ್ನೆರ್ ಕ್ರಿಷ್ಣ ಮುರಹರ ಕಾಪು ಮಾಮಯಿಮ ||

18

ಏರೆಡೇನಿನಿ ಮುರೈ ದೀವೊಡು
 ಪ್ರೇತೊ ಎನನೇ ಪತ್ತದಾನಗ
 ಪ್ರೀತಿದಾ ಕಂಡನಿಲು ಮನಿಪುಚೆರತ್ತೊ ಗೋವಿಂದ ||
 ಯಾನೆ ನಿನ್ನಡ ಕರುಣೆ ನಟ್ಟುವೆ
 ಈಯೆ ದೀನೆರೆ ದುಕ್ಕೊ ರಟ್ಟವು-
 ನಾಯೆ ದೀನೆದಿ ದುಕ್ಕೊದಾಲೇ ಯಾನ್ ಆದಲ್ಲೆ ||

19

ನಂದ ಗೋಪನ ಮಗಕ್ ಜಯೊ ಜಯೊ
 ಸಿಂದು ಸಯನಗ್ ಜಯೊನೆ ಜಯೊ ಜಯೊ
 ಸುಂದರಾಂಗಗ್ ಕ್ರಿಷ್ಣ ಮೂರ್ತಿಗ್ ಜಯೊನೆ ಜಯೊ ಜಯೊನೆ ||
 ಸೈಪನೇ ಹಾಲಾಪನೇ ಗೋ-
 ಪಾಲ ಕರುಣೆಡ್ ತೂಲ ಎನ್ನನ್
 ಬಾಗ್ಯೊ ಹೀನೆದಿ ಬುಲ್ಲು ಬುಲ್ಲುದು ಕಣ್ಣ್ ಮುಚ್ಚಿಯಲ್ ||

|| ದ್ರೌಪದಿ ಸೀರೆಗಚ್ಚಯೊ ವರೊನು ಕೊರೈ ಶ್ರೀಕ್ರಿಷ್ಣೆ ||

ಆತ್ ಪೂರ್ತುಗು ಕ್ರಿಷ್ಣೆ ರುಗ್ಗಿಣಿ
 ಪ್ರೀತಿದಾಲೇ ಸತ್ಯಬಾಮನ
 ಸೇರಿಗೆಡ್ ಸಂತೋಸುಡಿತ್ತನೆ ಚೆನ್ನೆ ಗೊಬ್ಬೊಂದು||
 ದ್ರೋಪದಿಯೆ ಬುಲ್ಲುನೆನ್ ಕೇಂಡ್
 ಪಾಂಡು ಬಾಲೆಲೆ ಮಾತ ಐಸುರೊ
 ಪೋಂಡೆ ಆಹಾ ಪನ್ದ ದುಕ್ಕೊಡು ಪನ್ನೆ ರುಕುಮಿಣಿಡ ||

1

ದುಸ್ಸೆ ದುರೈದನೆನೆ ದ್ರೌಪದಿ
 ತುತ್ತಿ ಸೀರೆನ್ ಒಯ್ಪುವೆನೆ ತನ
 ಮೆಗ್ಗಡನೆ ಸಬೆತೆದುರುಡಾಲೇ ಬಾರಿ ಬುಲ್ಲುವಲ್ ||
 ಕ್ರಿಷ್ಣ ಕಾಪುಲ ಮಾನೊನೊರಿತ್
 ಪನ್ದ ಬುಲ್ಲುನ ಮೆಗಿದಿಗಾಯೆನೆ
 ಅಚ್ಚಯೊದ ವರೊ ಕೊರೈ ಸೀರೆಗ್ ಆದಿ ನಾರಯಿಣೆ ||

2

ಕ್ರಿಷ್ಣ ದೇವೆರೆ ಬಗ್ಗಿಂಚಿನ
 ಮಲ್ಲ ಮೈಮೆನೊ ತೂಯಿನಕಲೆಗ್
 ಅಲ್ಲ ಆಯಿನ ಬಾರಿ ಅಚ್ಚಿರೊ ದಾನೆ ಪನ್ನುನೆನೊ ||
 ಮಾತ ಜನೊ ಸಬೆಟಿತ್ತನಾಕ್ಲ್
 ವಾಸುದೇವನ ಮಯಿಮೆ ಪುಗರ್ದ್
 ತೂನಗಲ್ಲನೆ ಒಯ್ತನಾತ್ಲ ಸೀರೆ ಮುಗಿಯಂದ್ ||

3

ಒಯ್ತದೊಯ್ತದ್ ರಾಸಿ ಪಾಡ್
 ದುಸ್ಸನಾ ಬಲೊ ರಟ್ಟಿ ಬಚ್ಚಿದ್
 ಅಳ್ಳೆಡುಬ್ಬೆಸೊ ಆದ್ ಉಸುಲೇ ಮಿತ್ತತ್ತಿರ್ತಾಂಡ್ ||
 ಒಯ್ತುನುಸುಲುದ ಸೊರೊನೆ ಕೇನ್ನಗ
 ಗರ್ರ್ಸಡ್ ಮರಕ್ಕೊನಗಾಪುನ
 ಗರ್ರಂದ್ ಕೇಂನ್ಡ್ ಕುಲ್ಲನ ಮಾತ ಸಬಿಕೆರೆಗ್ ||

4

ದ್ರೋಪದಿಯೆ ಮಹ ಪುಣ್ಯೊವಂತೆದಿ
 ಆಲೆ ಮಾನೊಗು ಕುಂದೆಲಾವೋ
 ಪಾಂಡು ಬಾಲ್ಗ್ ಸೋಲು ಆಯೆರೆಗಿದ್ಡಿ ಕಂಡಿತೊನೆ ||
 ಆ ಮುಕುಂದನ ದಿವ್ಯೊನಾಮೊದ
 ಮಾಯೊ ಮಯಿಮೆಗ್ ಸಾಕ್ಷಿ ಉಂದೇ
 ಸಾದು ಸಜ್ಜನೆರಲ್ಲ ಪಂಡೆರ್ ಬಗ್ಗಿ ಬಾವನೆಡ್ ||

5

ಅಯ್ಯೊ ದೈವೊದ ಪ್ರೇಮೊದಿಂಜಿನ
 ಪೊಣ್ಣೆಂಚಿನ ಲೂಟಿ ನರಮನಿ
 ಗೆಲ್ಲುನೆಂಚವು ಆಲೆ ಮರೈದಿ ಕಾತೆ ಗೋವಿಂದೆ ||
 ಅನ್ಯಯೊನು ಇನಿ ಮಲ್ತನಾಕ್ಲ್
 ದುಸ್ಸ ಕೌರವೆರತ್ತೊ ಅಕ್ಲೆನ್
 ಕೆರ್ದುನಕಲೇ ಬೀಮ ಪಾರ್ತೆರ್ ಲಡಯಿದಾ ಕಳಟ್ ||

6

ಅಚ್ಚಿರೊಡು ಸರಿ ಬೆಕ್ಕಸಾದೇ
 ಕಣ್ಣೊದಾ ಸಂತೊಸುದ ನೀರ್ನ್
 ಉರ್ದು ಉರ್ದುದು ತೆಲಿಕೆ ತೆಲಿತ್ದ ರೋಮೊ ಕೊಕ್ಕೆರ್ದ್
 ದುಕ್ಕೊಡೇತ್ಲ ಕಂದಿ ಮೋನೆಗ್
 ಗೆಲೆ ಆಂಡಲ ಅವುಲು ಬೀಸ್ಮಗ್
 ಸಜ್ಜನೆರೆಗ್ ದ್ರೋಣ ಕೃಪೆರೆಗ್ ವಿದುರೆ ಮಾತೆರೆಗ್ ||

7

ಓ ಸುಯೋದನ ದ್ರೌಪದಿಗ್ ಇನಿ
ಈಯೆ ಮಲ್ತನ ಅನ್ಯಯೋಗು ನಿಜೊ
ದೇವೆರೆನ ದಯೋಚಾಲೆ ಮರ್ಯದಿ ಒರಿನ ತೂಯತ್ತೊ ||
ಆಲೆ ಸುದ್ದಿನ್ ನನಗ್ ದೆಪ್ಪಡ
ಪಾಂಡು ಬಾಲ್ಟೆಡ ನಿಕ್ಕ್ ತೀರುನ
ತೂದು ಮಲ್ಪುನವೆಡ್ ಪಂಡನೆ ವಿದುರೆ ಕೌರವಗ್ ||

8

ದೈವ್ಲೊ ಈ ದ್ರೌಪದಿಗ್ ಸೀರೆನ್
ಕೊರ್ಪುನವು ಅಂದಾಂಡ ಅ್ಯಕೇ
ಬುಡ್ಡಯೆರೆ ಸಾದ್ಯೊಂಡೊ ಪಂಡ್ ಪಂಡ್ ತೂವೊಡಿಂಬಲೆನ್ ||
ಒಯಿರಿನಕಲೆನ್ ಪುಗರ್ ಪುಗರ್ ಪುಗರ್
ಪಿರವು ನೇಲುನ ಪುಕ್ಕೆ ಪೋಲಯ
ನಿನಡ ಕೇಂಡ್ ಯಾನ್ ಬದ್ಕೊಡ ನಡಪು ಮುಲ್ಪಡ್ ||

9

ನೀತಿ ಪನ್ನುನ ಮರ್ದೆ ವಿದುರನ
ಪಾತೆರೊಗು ಕೆಬಿ ಕೊರ್ವೆರೆಯ
ಬಾರಿ ಕರ್ಸನೊದಾಲ್ ಉಪ್ಪಡ್ ಬೇಲೆದಕಲೊಟ್ಟು ||
ದಾನೊ ಮಂತ್ರೊದ ಮಾಯೊಡಿಂಬಲೆ
ಮಾನೊ ಒರಿನೆಯ ಕರ್ಣ ಕಡಪುಡು
ರಾಸಿ ಬೂರ್ವೆ ಸೀರೆ ತುಂಬಲ ಕಟ್ಟ್ ಕಟ್ಟಾದ್ ||

10

ನಮನ ಮರ್ಯದಿ ಪೂರದೆತ್ತನ
ಕುದುರೆ ಇಂಬಲ್ ಮದಿಮೆದವುಲೇ
ಸಬೆಟ್ ದಂಟ್ ದ್ ಬೂರ್ವೆಗನ್ನನ್ ರಂಗ್ ಮಲ್ತದಲ್ ||
ದಾನೊ ದುಂಬುದ ಪುಣ್ಯೊಡಂಕಲೆ
ಗೇಲ್ಡಿಂಬಲ್ ಕೈಕ್ ತಿಕ್ಕಲ್
ಚಾಕ್ರಿಗುಂತಡ್ ಮಿಂಡೆರೊಟ್ಟುಗು ಕೊಸಿಟ್ ಸೊರ್ಕೊಂದು ||

11

ಈ ಪಟಿಂಗನ ಎದುರು ಉಂತುದು
ಪಾತೆರಯೆ ಯಾನಜ್ಜ ಪನಾಲೆಯೆ
ನೀತಿಯೋ ಮುಕುಲೆನವು ಯಾನೇ ಎಂಚ ಸೋಲ್ತನೆಯೆ ||
ಎನ್ನ ಕಂಡನಿ ದುಂಬು ಸೋಲ್ತುದು
ಬುಕ್ಕೊ ಎನ್ನನ್ ಪಗಡೆಗೊಡ್ಡುನ
ಹಕ್ಕಿ ಇದ್ದಿಂತ್ತಿ ಪನಿಯೆರೆ ದಾಯೆ ಜಾರುವರ್ ||

12

ಅಪಗ ಕೌರವೆ ಪನ್ನೆ ಗೌಜಿಡ್
ನಿನನ್ ಸೋಲ್ಪಯಿನೆಂಚ ಪಂಡ್ ಪಂಡ್
ಪನಡ್ ಧರ್ಮಜೆ ನಿನ್ನ ಕಂಡನಿ ಬಾರಿ ಸತ್ಯೊದಯೆ ||
ಅರಸು ಇಂಬಲೆಡೆಂಚಿನವು ಪಾ-
ತೆರುನೆ ಈಯೇ ಪಾಂಡು ಬಾಲೆಲು
ನಮಡ ಸೋಲ್ತುದು ಪಾತೆರುನೆ ಇನಿ ಎಂಚ ಈ ಸಬೆಟ್ ||

13

ಸೊರ್ಕಾನೆರ್ಮನ್ ನಮ್ಮ ಮೇಳೊದ
ಪೋಣ್ಣಲೊಡಪನೆ ಬುಡ್ಡ ಮೇವಡ್
ದುಸ್ಸೆ ಕರ್ಣನೆ ಲಕ್ಕದುಂತುದು ಪಂಡೆ ಕೌರವಡ ||
ಕರ್ಣ ಪಾತೆರೊ ಕೇನ್ಡ್ ಕೋಪೊಡು
ಎನ್ನ ಕಂಡನಿ ಬೀಮೆ ಯುದ್ಧೊಡು
ನಿಕ್ಷೆ ನೆತ್ತರ್ ಪರುವೆ ನೆನೆತೊನು ಪಂಡಲಾ ಪೋಣ್ಣ ||

14

ಸಮೆರ್ ಇದ್ಯಂದಾನವೆ ದ್ರುಪದನ
ಮಗಲ್ ದ್ರೌಪದಿ ದಗ್ಡ ಪಂಡ್ ಪಂಡ್
ತೆರಿದಲಿಂಬಲೆ ಬಾಯ್ಗ ಕೋಲುನು ಪಾಡ್ಯ ದಾಯೆಗಯೆ ||
ಬೀಮೆ ಕೆರ್ದೆನೊ ಎನನ್ ಪಂಡ್ ಪಂಡ್
ತೋಜಯೆನೆ ತುಡೆ ಬೊಟ್ಟೊನುಂದೇ
ಬೀಮೆ ಮೋನೆನೆ ತೂದು ಕೌರವೆ ಪಂಡೆ ಹಂಕರೊಡು ||

15

ಬೀಮೆ ಗದೆ ದೆರೊಂದು ಅಕಲೆನ್
ತೂದು ಮೆಯಿ ಕುರ್ಕಾಯೆನಪಗನೆ
ರೋಮೊ ಕೊಕ್ಕೆರ್ದಾಯ ಕಣ್ಣೆಡೆ ಕಿಟಿಯೆ ರಟ್ಟನೆನ್ ||
ಧರ್ಮನಂದನೆ ತೂದು ಕೈತವೆ
ಸನ್ನೆಡೇ ಬೀಮಗಲ ತೆರಿಪಯೆ
ಬೊಡ್ಡಿ ಪಂಡ್ ಪಂಡ್ ಅಪಗ ಪಾರ್ತೆಲ ಪನ್ನಿನಾಯಡನೆ ||

16

ಅಣ್ಣ ತಡೆವೊನು ಕೋಪೋನೀಯೆ
ಪೊರ್ತು ಸರಿಯತ್ತಿತ್ತೆ ಲಡಯಿಗ್
ದುಸ್ಸೆರಾಕ್ ಮಲ್ತೊನಡ್ ಇನಿ ಕಾಲೊ ಅಕಲೆನವೆ ||
ಅಣ್ಣನವೆ ಧರ್ಮೊಜಿ ಒರಿಯಡ್
ಬುಕ್ಕೊ ತೂವೊನುಗೊಂದು ಪಂಡ್ ಪಂಡ್
ಅರ್ಜುನೆನೆ ಸಮದಾನೊ ಮಲ್ತದ್ ಕೇನ್ಡೆ ಸಬಿಕೆರೆಡ ||

17

ಕೇನಿ ಸಬಿಕೆರ್ ಸಮನೆ ಮಲ್ಲೆಂ-
ದೇನ್ ಗೆರೆತ್‌ದ್ ಮೋಕೆ ದೀತ್‌ಜಿ
ದ್ರೋಪದಿಡ ಇನಿ ಪೋಡಿಗಿಡೊ ಪನಿ ಇಂಬ್ಯೆ ವಾಲೆಕ್ಕೊ ||
ಆಲ್ ಕೇಂಡ್‌ನ ಪ್ರಸ್ನೆಗುತ್ತರೊ
ಎರ್ ಕೊರ್ವರ್ ಕೌರವೇರೆಗ್
ದಾಸಿಯಾಪುನೆ ಎಂಚ ಪಂಡ್‌ದ್ ಕೇಂಡೆನಾ ಸಬೆಟ್ ||

18

ಧರ್ಮೊ ಸಾಸ್ತೊ ವಿಚಾರೊ ಮಾತಲ
ಕಲ್ತಿ ಪಂಡಿತೆರುಲ್ಲೆರೆತ್‌ಲ
ಕುಲ್ಲೊನುಂದೇ ಸಬೆಟ್ ತೂಲಯ ಪಾರ್ತ ಕಣ್ಣಡುದು ||
ಎಡ್ಡೆ ಪಾತೆರೊಡೊಪ್ಪು ಸೋಲ್ತನ
ಸೊತ್ತು ದ್ರೌಪದಿ ಪನ್ನುನೆನ್ ಸರಿ
ಇತ್ತೆ ಆಲೆನ್ ಬುಡ್ಡವುನ ಪಟು ಬಟೆರ್ ಉಲ್ಲೆರೊಯ ||

19

ನೂಕಲಯ ಪೋಣ್ಣಾಲ ದಾಸಿಲೆ
ಮೇಳೊ ಕೂಟೊಗು ಮುಕುಲೆಡೆಂಚಿನ
ಕೇನುವಯ ಈ ಬೊಡ್ಡಿ ಕುಲ್ಲುಲ ಮೋನೆ ತೂವಂದೆ ||
ಪೋಲಿಲೆನ್ ಮುಲ್ಪಡ್ಡ್ ಗಿಡಪುಲ
ರಾಜ ಸಬೆಟ್‌ಕಲಿತ್ತೆ ದಾಯೆಗ್
ವೀರ ಕರ್ಣೆನೆ ಪಂಡೆ ಕೋಪೊಡು ಕೌರವೇಸ್ವರಡ ||

|| ಬೀಮಾರ್ಜನೆರ್ ಆಚೊ ಪಾಡ್ವೆರ್ ||

ಕರ್ಣೆ ಪಂಡ್‌ನ ಪಾತೆರೊನು ಸರಿ
ಮೆಚ್ಚಿದಾ ಕೌರವೆನೆ ಲೆತ್‌ದ್
ತನ್ನ ಮೆಗಿ ದುಸ್ವಾಸಡಪಗನೆ ಪನ್ನೆ ಕೋಪೊಡುಲ ||
ಲೆಪ್ಪು ಲೆಪ್ಪುಲ ದೂತನಕಲೆನ್
ಒಯ್ತೊನುಂದೇ ಪೋವಡಾಕ್‌ಲ್
ಪೋಣ್ಣಲೆನ ಒಟ್ಟಿಗೆನೆ ಕೆಲಸೊಗು ಇತ್ತೆ ಉಂತವಡ್ ||

1

ನಾಯಿಲೆನ ನಡುಟಿತ್ತಿ ಕೆಮ್ಮೆಗ್
ಸಾದಿ ಬದ್‌ಕೆರೆಗುಂಡೊ ಅಂಚಿನೆ
ಆಂಡ್ ದ್ರೌಪದಿಗಲ್ಲ ಬದುಕುನ ಸಾದಿ ತೋಜಂದೆ ||

ಈಯವಸ್ತೆನ್ ಪನ್ನುನೇರೆಡ
ಆ ದುಸ್ವಾಸನೆ ಒಯ್ತುನಾಪಗ
ಪಾಪೊ ಪೋಣ್ಣಗ್ ಇಂಚಿ ವಿದಿಯೋ ಪಂಡೆರಾ ಸಬೆಟ್ ||

2

ಅಜ್ಜ ಬೀಸ್ಮೆರೆ ಕೃಪೆರೆ ಗುರುಕುಲೆ
ಒಯ್ತುನಾಯನ ಕೈಡ್ಡ್ ಬುಡ್ಡಲೆ
ಮೈತ್ತ್‌ನಡ ಪನ್ ಬಾನುಮತಿಯೇ ಎನನ್ ಕೆರೈರೆಗ್ ||
ಬುಲ್ಲೊನುಂದೇ ಪುಡೆರ್ ಪುಡೆರ್‌ದ್
ಬುಡ್ಡಯೆರೆ ಪುಣೆದಾಲ್ ತೀರ್‌ಜಿ
ಬುಕ್ಕೊಲಾ ಮುರೊಡುದು ಪನ್ನಲ್ ಸಬೆನ್ ತೂವೊಂದು ||

3

ಮಾಮ ಈರೆನ ಕಣ್ಣಗಿತ್ತೆನೆ
ದಾಲ ತೋಜುಜಿ ಆಂಡ ಕೆಬಿಕಲ
ಕೇನುಚೊಯೆಯಾನಿತ್ತೆ ಬುಲ್ಲುನ ಸೊರೊನೆ ಅರಬಯಿದ ||
ಮಾಮಿ ಈರೆಗ್ ಮರೊ ಮರ್ಮಲೆ
ಮಾನೊ ಪೋಪುನ ಸಬೆಟ್ ತೂಯೆರೆ
ಎರ್ದ ಮನಿಪುಚೆರಿತ್ತೆ ಸೈತ್ತರೊ ಪನ್ನ್ ಬುಲ್ಲುವಲ್ ||

4

ಬೂಮಿದೇವಿಯೆ ಎನನ್ ಬುಡ್ಡಲ
ದೇವಿಸಿರಿ ಪಾರ್ವತಿಯೆ ಸಾರದೆ
ಆದಿ ಸಗ್ತಿಲು ಧರ್ಮೊ ನೀತಿದಲಾಂಡ ಕಾಪುಲೆಯೆ ||
ಸತಿಯಹಲೈನೆ ಅದಿತಿ ದೇವಿಯೆ
ಸಿರಿಯರುಂದತಿ ಆದಿ ಮಾಯೆಲ
ಕನಿಕರೊಡು ಬುಡ್ಡಾದ್ ಬದ್‌ಕಲೆ ಪನ್ನ್ ಮುರೆಡಿಯಲ್ ||

5

ಯಾನ್ ಮರ್ಮಲ್ ಯಮಗ್ ಇಂದ್ರಗ್
ವಾಯುದೇವಗ್ ಬುಕ್ಕೊ ಅಸ್ವನಿ-
ದೇವನಕಲೆಗ್ ಆಂಡ ಎನ್ನಡ ಕರುಣೆ ದೀಡುಜರೊ ||
ಸ್ವಾಮಿ ನಿಕ್‌ಲೆನ ಮೈಮೆ ಸಗ್ತಿನ್
ತೋಜದೆನ್ನನ್ ಕಾಪಿ ಪಂಡ್‌ದ್
ಆಕಸೊಗು ತೂವೊಂದು ಬುಲ್ಲಲ್ ದ್ರುಪದನಾ ಮಗಲ್ ||

6

ಬುಲ್ಲು ಬುಲ್ಲುದು ದಾಯೆ ಬಚ್ಚವ
ಅಪ್ಪೆ ನಿನ್ನವೆ ಕಂಡನ್ಯಲ್ಲುಲ

ಇತ್ತೆ ಮನಿಪುಜೆರತ್ತೊ ಮೂಜನ್ನಕ್ಲ್ ದಾನುವೆರ್ ||
ನಿನ್ನ ನ್ಯಾಯೊನೆ ಅಂದ್ ಆಂಡಲ
ದೈವ್ಲೊದೊಲೈದ ಆಯೊ ತತ್ತದ್
ಸೆಟ್ಟವಡ ನಿನ ದೈರೊನೀಯೇ ಪಂಡೆನಾ ವಿದುರೆ ||

7

ದಾಯೆ ಬುಲ್ವದೆ ನಿನ್ನ ಕಂಡನಿ-
ನಾಕ್ಲೆನ್ನನ್ ದಾನೆ ಮಲ್ತೆರ್
ಸೋಲ್ತದೆನ್ನಡ ದೈರೊ ಉಂಡೊಯ ಪನ್ದ ಕೌರವೆನೆ ||
ಆಯ ತುಡೆಕೇ ಬೊಟ್ಟೆನಾಪಗ
ಆಲ್ ಕೋಪೊಡು ನಿನ್ನ ತುಡೆ ತುಂ-
ಡಾದ್ ಸೈತ್ತದೆ ಪೋಲ ಪಂಡ್ಡಾದ್ ಸಾಪೊ ಕೊರ್ನಗನೆ ||

8

ಕಡಲ್‌ದುಲಯಿಡೆ ಲಕ್ಕಿ ಸೂತವೆ
ಲೆಕೊನೆ ಮುಗಲ್‌ನ್ ಉಡೆದ್ ಲಕ್ಕುನ
ತೆಡಿಲ್‌ದಂಚಿನೆ ಬೀಮೆ ಲಕ್ಕಿಯೆ ಸಬೆತ ನಡುಟವುಲು ||
ಈ ಪಟಿಂಗನ ಬೆಚ್ಚನೆತ್ತೆರ್-
ನೇನ್ ಪರುವೆನೆ ಗದೆಟ್ ತುಡೆಕೇ
ಹಾಕ್ ದಿಂಬ್ಯನ್ ಕೆರ್ದೆ ಪಂಡ್ಡಾದ್ ಗದೆನ್ ಬೀಜಾಯೆ ||

9

ಸಬೆಕ್ ಪೋಡಿಗಿ ಆಂಡ್ ಕೌರವ
ತಿಗಲೆ ನಡ್ಡಾದ್ ಕೂಡಿ ಜನ ಸಾ-
ಗರೊನೆ ಅಡಿ ಮೇಲಾಂಡ್ ಪೋಡಿದ್ ನಡ್ಡೆ ದ್ರತರಾಸ್ತೆ||
ಮುಗುರು ತೆಲಿತೆರ್ ಅವುಲು ಬೀಸೈಲ
ವಿದುರ ದ್ರೋಣೆರ್ ಕೃಪೆರ್ ಮಾತೆರ್
ಕುಜಲ್ ಬಿರ್ಕ್‌ದ್ ಇತ್ತಿ ದ್ರೌಪದಿಗಾಂಡ್ ಸಂತೋಸು ||

10

ಲಕ್ಕಿ ಬೀಮನ್ ತೂದು ದ್ರೌಪದಿ-
ನಲ್ಲ ಬುಡುದೇ ಪಾರೈ ಕಂಬುದ
ಬಿತ್ತಲ್‌ಡ್ ಇತ್ತನವೆ ಕುದ್ಡನೆ ಲೆಕೊನೆ ದುಸ್ವಾಸೆ ||
ದುಸ್ವ ಕೌರವ ಪಿರವುಡುಂತಿಯೆ
ಬುಲ್ವಡಯ ದ್ರೌಪದಿಯೆ ನಿನ್ನನ್
ಬುಡ್ಡವೆನೆ ಎನ್ನಣ್ಣನಪ್ಪಣೆ ಮೀರ್ಡ್ ಈ ಬೀಮೆ ||

11

ಕರ್ಣ ತರೆತವೆ ಓಡುಡಿಂಬ್ಯನ
ನೆತ್ತೆರ್‌ನ್ ದಿಂಜಾದ್ ಕೌರವ

ಸೊರ್ಕಿ ಮಾಸೊನು ಕ್ರೊದ್ ಕ್ರೊದೇ ಪಾಡ್ಡ್ ಬುಕ್ಕೇನ್ ||
ಕರ್ಯೊನು ಸಕುನಿನವೆ ಸೇರ್‌ದ್
ಎನ್ನ ಕೋಪೊದ ಸೂಟು ಬೈಪ್ಪದ್
ಇತ್ತೆ ಪಾಡುವೆನಗೆಲ್ ಸಾಕಿನಿ ಡಾಕಿನಾಕ್‌ಲೆಗ್ ||

12

ಅಣ್ಣನಾ ನಿಜೊ ಪುಕ್ಕ ಧರ್ಮೊನು
ಕೇನ್ವೆರೇರ್‌ಯ ಕುರುಡೆ ಈ ಮುದಿ-
ಮರ್ದೆ ಪಾಡ್ಡನ ಇಸೊನೆ ಪಲಯನ ತರೆಕ್ ಏರ್‌ದಾಯ್ ||
ಕಸ್ತೊ ಇಂಚಿನ ಮೋಸೊ ತಂತ್ರೊದ
ಟಕ್ಕ ನಾಯಿಲೆನಿತ್ತೆ ನಿಂಗುವೆ
ಪನ್ದ ದ್ರೌಪದಿ ಕುಜಲ್‌ನೀಸ್‌ದ್ ಪಂಡೆ ಸಮದಾನೊ ||

13

ಜತ್ತ ಬತ್ತನೆ ಸಬೆತ ಮಂಟಪೊ-
ಡಿತ್ತನರ್ಜುನೆ ಧರ್ಮನಂದನ
ಗಲ್ಪ ತೊಂದರೆ ಬರುವು ಪಂಡ್ಡಾದ್ ಎಡ್ಡೆ ಗುಣೊತಾಯೆ ||
ಅಣ್ಣ ಬೀಮೆನೆ ಉಂತು ಗಡಿಬಿಡಿ
ಮಲ್ವಡಯ ಈ ವೈರಿ ನಾಸೊಗು
ಪೊರ್ತು ಇತ್ತೆನೆ ಅತ್ತ ಪಂಡ್ಡಾದ್ ಪತ್ತದುಂತಾಯೆ ||

14

ಯಾನ್ ಕೇನಯೆ ಮೆಗಿಯ ಕುರುಕುಲೊ-
ದಾಕ್‌ಲೆನ್ ಗದೆಟಿತ್ತೆ ಹಾಕ್‌ದ್
ನೂದೆನ್‌ಲ ಪೊಡಿ ಪೊಡಿಯೆ ರಟ್ಟದ್ ಕೌರವನ ತುಡೆನ್ ||
ಈ ಗದೆಟೆ ಸರಿ ತುಂಡು ಮಲ್ತದ್
ನಾಯಿ ದುಸ್ವಾಸನನ ನೆತ್ತೆರ್-
ನೇನ್ ಪರ್ವಿಡ ಎಂಕ್ ಸೊರ್‌ದಯೊ ಇದ್ದಿ ಪಂಡೊಂದು ||

15

ಬೂಮಿ ನೀರ್ನೂ ಗಾಳಿ ತೆರಿಯೊನಿ
ವಾಯುಲಗ್ಗಿ ಕುಬೇರೆ ನಿರುತಿಯೆ
ಮಾತ ದಿಕ್ಕದ ಪಾಲಕೆರ್ ಸರಿ ಕೇನಿ ಪಂಡೆನೆನ್ ||
ಮೇಲ್ ಲೋಕೊದ ಸುರೆರ್ ಬೂಮಿದ
ರಾಜ ರಾಜೆರ್ ಉರಗ ಜಾತಿಲು
ಸೂರ್ಯ ಚಂದ್ರೆರ್ ಕೇನ್ದ ತೆರಿಯೊನಿ ಬಾಸೆ ಪಾಡೆನೆನ್ ||

16

ಬೀಮೆ ಪಂಡನ ಆಜೊ ಕುರುಕುಲೊ-
ದಾಕ್ಲೆನ ತಿಗಲೆನ್‌ಲ ನಡ್ಗದ
ಆನಗನೆ ಕೇನಿಂದ್ ಲಕ್ಕಿಯೆ ಪಾರ್ತೆ ಮಹವೀರೆ ||
ಬಾಣೊದುರ್ಲುಡು ಕರ್ಣ ಕಂಟೆಲ್
ಕಾಯ್ತಿಜಿಡ ಯಾನಿತ್ತೆ ಸೊರ್ಗೊದ
ದೇವರೆಗ್ ತತ್ತನಯೆ ಪನ್ನಗ ಸಬೆನೆ ಬೆಪ್ಪಾಂಡ್ ||

17

ಹಸ್ತಿನಾವತಿದಲ್ಪ ಬೂಮಿಯೆ
ನಡ್ಗದಾನಗ ನೆತ್ತೆರ್‌ದವೇ
ಬರೊ ಬೂರುದು ಬೊದುಲುದಾಂಡ್‌ಲ ಮಣ್ಣೆ ಕೆಂಪಾದ್ ||
ಪಲ್ಲ್ ಕುದ್ದೆರ್ ಬಾಂಗ್ ಪತ್ತಿಯೊ
ಕೊಟ್ಟು ಕಡ್ಲೆ ಪಕ್ಕಿ ಬುಲ್‌ದ್
ದುಸ್ಸ ಸಕುನೊನೆ ತೋಜಿದಾಂಡ್‌ಲ ಬೀಸ್ಮ ವಿದುರೆರೆಗ್ ||

18

ಆಯುದೊಲೆ ಬಾಯಿಡ್‌ದ್ ಕಿಟಿಕುಲು
ದೂರೊ ರಟ್ಟಿಯೊ ಪಟ್ಟೊದಾನೆಗ್
ನೀರ್ ಕಣ್ಣೆಡೆ ಅರಿದ್ ಬಾನೊಡು ದೂಮ ಕೇತುಗುಳು ||
ಮೂಡಿಯೊನೆ ಆಕಸೊಡು ಪಗೆಲ್‌ಡೆ
ದೇವಸ್ತಾನೊಡು ಮುಗುಳಿ ರಟ್ಟೆದ್-
ಲಾಂಡ್ ಅದ್ಬುತೊ ದಾಲ ಒರಿಪುನವಿದ್ಡಿ ಲಚ್ಚಣೊಡು ||

19

ದಿಕ್ಕ ದಿಕ್ಕಡೆ ಕೇಂನ್ದ್ ಹಾ ಹಾ
ಪನ್ನಿ ಸೊರೊ ಲಕ್ಕೊಂದು ಸೂರ್ಯನ
ಬೊಲ್ಪು ಕಿರಣೊದ ಬಿಂಬೊರಾವುನ ಬಾಯಿದುಲಯಾಂಡ್ ||
ಕತ್ತಲೆನೆ ಕಬಿದಾಂಡ್ ಬಾನೊಡು
ಮೆಣ್ಣುನಾ ದಾರಗೆಲು ಮಾಜಿಯೊ
ಅಲ್ಪದಾ ಸಬೆತಕ್‌ಲ್ ಗಾಬರಿಯಾದ್ ಪೋಡಿಯೆರ್ ||

|| ದ್ರತರಾಸ್ತ್ರ ದ್ರೌಪದಿಡ ಮಾಪಿ ನಟ್ಟಿಯೆ ||

ಅಯ್ಯೊ ಬೂತೊದ ಬಾದೆನೇ ಇನಿ
ಪೊತ್ತಯೆರೆ ಉಂಡಾಯ್ತೊನೋ ಈ
ಪೊಣ್ಣ ಬುಲ್ಪುನು ಕೇನ್ದ್ ದೇವತೆಲಿಂಚ ಮಲ್ತನೆನೊ ||

ಮಚ್ಚರೊಡು ನಿನ ಜೋಕ್ಲೆನಕ್‌ಲೆಡ
ಗೊಬ್ಬಯನೆ ದ್ರತರಾಸ್ತ್ರ ಬಲ ಬಲ
ಮಲ್ಪು ಈ ಸಮದಾನೊ ಪಂಡೆನೆ ಬೀಸ್ಮೆನೊತ್ತಯೊಡು ||

1

ಆ ಮಹಾ ಪತಿರುತೊತ ಪೊಣ್ಣಡ
ಕೇನ್ ಈ ಸಮೆ ಯಜ್ಞೊ ಕುಂಡೊಡು
ಬಾಲೆಯಾದೇ ಪುಟ್ಟಿ ದ್ರೌಪದಿ ಎಂಚಿನಾಲ್‌ಂದ್ ||
ಈಯೆ ತೆರಿತ್‌ಜ ನಿನ್ನ ಸಂತೆತಿ
ನಾಸೊ ಆವುಯ ಬೇಕೊ ಕೇನ್‌ಲ
ಮಾಪಿ ಪಂಡ್‌ದ್ ವಿದುರ ಗುರುಕೃಪನಕ್‌ಲ್ ಒಟ್ಟಾದ್ ||

2

ದುಕ್ಕೊ ದಿಂಜಿದ್ ಕುರುಡೆ ಬತ್ತೆನೆ
ಪತ್ತದಾ ದ್ರೌಪದಿನ್ ಪರಡ್‌ದ್
ಬುಡ್ಲ ಕೋಪೊನು ಮಗಲೆ ಸಮ್ಮಲೆ ಯಾನ್ ನಟ್ಟೊನುವೆ |
ದುಸ್ಸೆರಾಕ್‌ಲ್ ಮಲ್ತಿ ಲೂಟಿನ್
ಇತ್ತೆ ಮರಪುಲ ಈಯೆ ಎಂಕಿನಿ
ದುಸ್ಸಲೆಗ್ ಸಮೊ ಪನ್ದ ಕಣ್ಣೆಡೆ ನೀರ್ ಜಪುಡಾಯೆ ||

3

ಮರ್‌ಮಲ್‌ಲ ಮಗಲಂದ್ ಈರೆನ
ಮಗನ ಕಣ್ಣೆಗ್ ಕಾಲ ಕೂಟೊದ
ಮಗಲೊ ಮರ್ಮಲೊ ಅತ್ತ ಮೈತ್ತಿದಿ ಅಂದೊ ಕೇನ್‌ಲೆಯೆ ||
ಮಗನೆ ಮಲ್ತನ ಬಾರಿ ಅನ್ಯಾ-
ಯೊಗುಲ ಪೋಡ್ಯರೊ ಅತ್ತ ದರೊಡು
ನಿಲೆನ್ ಪಾಂಡವೆರಿತ್ತೆ ತತ್ತಜೆರ್‌ಂದ್ ಪೋಡ್ಯರೊಯೆ ||

4

ಧರ್ಮೊ ನಿಕ್‌ಲೆನವಪ್ಪೆ ಕರ್ಮೊನೆ
ಎನ್ನಕ್‌ಲ್ ಮಲ್ತನವೆ ಕೆಲಸೊಲು
ನಿರ್ಮಲೆರ್ ನಿಕ್‌ಲೆಂಕ್ಲ ಪಾಪೊದ ಹೃದಯೊ ಕುರ್ತೆಲೆರ್ ||
ಬುದ್ಧಿ ಹೀನೆರೆ ಹಾಲ್ ಕೆಲಸೊನು
ಎನ್ನನೇ ತೂದಿಯೆ ಮರಪುಲ
ಧರ್ಮೊಲೆಡ್ ಮೇಲಾಯಿ ಸಮೆನೇ ಕೊರ್ದು ಬದ್‌ಕಾಲ ||

5

ಅಪ್ಪೆ ಕೇನ್‌ಲ ವರೊನು ಯಾನಿನಿ
ಅನ್ಯಯೊಡು ನಿಕ್‌ಲೆನ್‌ಲ ಕಸ್ಸೊಗು

ತಿಕ್ಕಯಿನೆ ಈ ಮರಪು ಮಲ್ತನ ಸರೊ ಅನ್ಯಾಯೊ ||
ಮಲ್ತಿನನ್ಯಾಯೊಡುಲ ಎಂಕ್ಲೆನ್
ನಿನ್ನಕ್ಲ್ ಕೆರ್ನಗನೆ ಕಾಪುನ
ಬಿರ್ದೆ ರುಲ್ಲೆರೊ ಸತ್ಯೊವಂತೆರೆಗೆದುರು ಉಂತ್ಯೆರೆಗ್ ||

6

ಕೊರ್ದೊ ವರೊ ಮಾಮ ಈರೇ
ಎನ್ನ ಕಂಡನಿಯೆರೆನ್ ಬುಡ್ಡಲೆ
ಪನ್ನಗಾಯೆನೆ ಕೊರೈ ಪಂಡ್ ಪೇನ್ ನನ ಈಯೇ ||
ಐವ್ವೆರೆಗ್ಲಾ ಅಕ್ಲ್ ಪತ್ತುನ
ಬಿಲ್ಲ ಬಾಣೊನು ಆಯುದೋಲೆನ್
ಕೊರ್ದೆ ತೇರ್ನ್ ಆನೆ ಕುದುರೆಲೆ ಪನ್ನಗಾ ಕುರುಡೆ ||

7

ರಡ್ಡ ವರೊಕುಲು ಸಂದ್‌ದಾಂಡ್‌ಲ
ನಿಕ್ಕ ಬೋಡಯಿನೇನ್ ಕೇನ್‌ಲ
ಎನ್ನ ಪ್ರೀತಿದ ಮಗಲೆ ಪನ್ನಗ ಪನ್ನಲಾಯಡನೆ||
ವೈಸೈರೆಗ್ ವರೊ ಒಂಜಿ ರಾಣಿಗ್
ರಡ್ಡ ರಾಜಗ್ ಮೂಜಿ ಬ್ರಾಣಿಗ್
ಹಕ್ಕ ಕೇನ್ನೆರೆ ಉಂಡು ನೂದೆನ್ ಪಂಡಲಾ ದೇವಿ ||

8

ಬಾರಿ ದಿಂಜಗ್ ಆಸೆ ಮಲ್ಪುನ
ನಾಸೋಗೇ ಸರಿ ಮಾಮ ದಿಂಜದ
ಆಸೆ ದಾಯೆಗ್ ಒಂತೆ ಯಾರುಯೆ ಈರ್ ಕೊರೈರಡ ||
ಕೊರೈ ಕಮ್ಮಿಯೆ ಆಂಡ್ ಕಳೆಯಿನ
ಬದ್ಕ ಬಾಗ್ಯೊನು ಪಡೆದ್ ಧರ್ಮಜೆ
ಮೆಗ್ಯನಕ್‌ಲೆಗ್ ಕೊರಡ್ ಆಸೀರ್ವಾದೊ ಪೋನಗನೆ ||

9

ಬಾರಿ ಬಿರ್ಸೆದಿ ಆಯ ದ್ರಾಪದಿ
ಪಾಂಡವೆರ್ ಕಳೆಯಿನೆನ್ ಮಾತಲ
ಈಯೆ ಪಿರ ಒಯ್ತತ್ತೊ ನಿನ್ನನ್ ಏರ್ದ ಪುಗರೊಡುಯ ||
ಸೈತ್ತಿ ಮರನೇ ತೆಗ್‌ಲದಾಂಡ್‌ಯ
ದುಕ್ಕೊದುನ್ನುನು ಬೈಯ್ಪುದುನಿಯೆರೆ
ಕೊಪ್ಪರಿಗೆನ್ನೊತ್ತೊಂಡ ಪಂಡ್‌ದ್ ಕರ್ಣೆ ಪುರಿಕಾರೈ ||

10

ಗೂಡುದುಲಯಿಗ್ ಬೂರೈ ಪಿಲಿಕುಲೆ-
ನೀಯೆ ಬುಡ್ಡಯ ಕರೆಟ್ ಪತ್ತದ್
ಪಾಡಿ ಮರಿಕುಲೆನಿತ್ತೆ ಬುಡಿಯೆನೆ ಊರು ತಿರ್ಗೆರೆಗ್ ||
ಮೀನ್ದ ದೊಂಡೆಗ್ ತಿಕ್ಕಿ ಗಾಳೊನು
ಬಾಯಿ ಬುಡ್ಡದ್ ದೆತ್ತದವೆನ್‌ಲ
ನೀರ್ಗ್ ಬುಡಿಯೆನೆ ಲೋಕೊ ನಿನ್ನನ್ ನನಗ್ ಪುಗರೊಡುಯ ||

11

ಕರ್ದ ಪಾತೆರೊ ಕೇನ್ದ ಬೀಮನ
ನೆತ್ತಿಗೇರ್‌ದ್ ಕೋಪೊಡಪಗನೆ
ಕಣ್ಣ ಮಗ್ತರಾದಯನ್ ತೂನಗ ಧರ್ಮನಂದನೆನೆ ||
ಬುಡ್ಡ ಕೋಪೊನು ಮೆಗಿಯ ಕರ್ಣೆನೆ
ಬುದ್ಧಿದಾಂತಿನ ಮಂಗೆ ಆಯಡ
ನಮೊದಾಯೆಗ್ ಕೋಪೊ ಮಲ್ಪುನೆ ಕುಲ್ಲು ಕುಲ್ಲುಂದೆ ||

12

ಈಡೆ ಬಲೆ ಮೆಗ್ಯಲ್ಲು ಮಾತೆರ್
ದೋಪದಿಲ ಬಲ ಪನ್ದ ಲೆತ್ತದ್
ರಾಜ ದ್ರತರಾಸ್ತ್ರನವೆ ಕಾರ್ನ್ ಪತ್ತೆರೊಟ್ಟಾದ್ ||
ಈರ್ ಹಿರಿಯೆರ್ ದೈವೊ ಗುರು ಸಮೊ
ಏಪೊಲಾ ನೇಲ್ಯಮೈರೆನ್ ನನ
ಬಾಲೆಲೆಂಕುಲು ಮರಪಯೊನೆ ಪನ್ನಗನೆ ದ್ರತರಾಸ್ತ್ರ ||

13

ಜೋಕುಲೆಂಕಕ್‌ಲತ್ತ ನಿಕ್‌ಲೇ
ಜೋಕುಲೈವೆರ್ ಎಂಕ್ ಮಗ ಇನಿ
ಜೋಕುಲಾಟಿಗೆ ಆಂಡ್ ಸಕುನಿನ ಮಂತ್ರೊ ತಂತ್ರೊಲೆಡ್ ||
ಆಯಿನೆನ್ ಈ ಪೂರ ಮರತ್‌ದ್
ಕೇನ್ನೆ ನಿನ್ನಡ ಸೈಸೊಡುಂದುದು
ಯಾನ್ ಪನ್ನುನೆ ಸತ್ಯೊ ಪಂಡ್‌ದ್ ತರ್ಕ್ ಪತ್ತಿಯೆನೆ ||

14

ಮಲ್ಲ ಯಾಗೊನೆ ರಾಜ ಸೂಯೊದ
ಕಿರೈ ಮಲ್ಪದ್ ಪಾಂಡು ಸೋಗೊಡು
ಕುಲ್ಲಿಯೆರೆ ಸರಿಸ್ತಾನೊ ಕೊರ್ಪಯಿನಕ್‌ಲ್ ನಿಕ್‌ಲತ್ತೊ ||
ಎನನ್ ನಿಕ್‌ಲೇ ಬುಡಿಯೆರ್‌ಡ ಈ
ಪರಬೆ ಸೋಗೊಡು ಸ್ತಾನೊ ಪಡೆಯೆರೆ
ಪುನೆಪುನಕ್‌ಲೇರ್‌ಂದ್ ಪನ್ ಮಗ ಈಯೆ ಗತಿ ಎಂಕ್ ||

15

ಪೋದು ರಾಜ್ಯೊನು ಪೊರ್ಲುಡಾಳ್ಲ
ಜೋಕುಲೆನ್ನವೆ ಮಲ್ತನನ್ಯೊ
ಪೂರ ಮರತ್‌ದ್ ಸುಕೊಟು ಬದ್‌ಕ್‌ಲ ಧರ್ಮೊ ಕಾತೊಂದು ||
ಮಾತೆರೆಗ್ ಪೊಸ ದುತ್ತುದೈತೊನು
ಪ್ರೀತಿದೇ ಕೊರ್ಪಾದ್ ಕರ್ಪುರೊ
ಬೂಳ್ಳೊ ಪೋಯೆರೆ ಕೊರೈ ಪಾಸಡಿಡಕ್‌ಲೆನೊಟ್ಟಿಗೆನೆ ||

16

ಅಕ್‌ಲ್ ಗಾಂದಾರಿನ್‌ಲ ತೂಯೆರೆ
ಉಲಯಿ ಪೊಗ್ಗನ ತೂದು ಪಂಡಲ್
ನಿಕ್‌ಲ್ ಮರಪುಲೆ ಎನ್ನ ಜೋಕುಲು ಮಲ್ತಿ ತಪ್ಪುಲೆನ್||
ಮಗಲೆ ದ್ರೌಪದಿ ನಿಕ್ಕ ಕಸ್ತೊನು
ಕೊರುನಯೆನೆ ಎನ ಮಗನೆ ಯಾನೇ
ಕೊರ್‌ನೆ ಪಂಡ್‌ದ್ ಪನ್ನೆ ನಿನ್ನಡ ಪನ್ದ ಬುಲ್ಪುನಗ ||

17

ಮಾಮಿ ಬುಲ್ಪುಡೆ ವಿದಿಯೆ ಮಲ್ತನ
ದೊಸೊಡೆಂಕ್ಲೆಗ್ ಕಸ್ತೊ ತಿಕ್ಕನೆ
ಏರ್‌ಲಾ ಹೊಣೆಯತ್ತ ಬದ್‌ಕಿಯೊ ದೇವೆರೆನ ದಯೊಟು ||
ಏರೊ ಮಲ್ತನೆ ಪನ್ನುನೇಪೊಲ
ಹಾಲ್ ಎಂಕ್ಲೆನ ಕರ್ಮೊಡಾಪುನೆ
ನೇರ್ ತಪ್ಪವುನೆಂದ್ ದ್ರೌಪದಿ ಕಾರ್ ಪತ್ತಿಯಲ್ ||

18

ಪಿದಡಿಯೆರ್ ಮಾತೆರ್ದ ಒಟ್ಟುಗು
ಪಿರವು ದುಂಬುಡು ಬರ್ಪಿ ಪರಿವಾ-
ರೊಲೆನ ಗೌಜಿಡ್ ಕೊಂಬು ವಾದ್ಯೊಲೆ ಮೇಳೊದೊಟ್ಟಿಗೆನೆ ||
ಚತ್ತೊ ಚಾಮರೊ ತೇಜಿಡಕ್‌ಲೆನ
ಒಟ್ಟಿಗೆನೆ ಸರಿ ನಾಲ್ ರಂಗೊಡು
ಇತ್ತಿ ವೀರೆರ್ ಗಾಂಡ್ ಗೌಜಿಡ್ ಅಲ್ ಪಿದಡಿಯೆರ್ ||

19

ದುಸ್ತೆರೊಡ್ಡನ ಬಲೆನ್ ತಪ್ಪಯೊ
ತತ್ತ್‌ದಾಂಡಲ ಸತ್ಯೊ ಬುಡ್ಡುಜೊ
ಮರೈದಿನ್ ಒರಿತೊಂದು ಸಜ್ಜನೆರ್‌ಂದ್ ಪನ್ನಾಯೊ||
ಮುರ್ಕ್ಕೊನ ಕಳವಳೊಡ ಕಡಲ್‌ಡ್
ಪುಣ್ಯೊಡೆಂಕ್ಲೆನೆ ಪೆರಪ ಬರೈರೆ
ಕ್ರಿಷ್ಟೆ ಕರುಣೆಡ್ ಸಾದಿ ತೋಜಯೆ ಪಂಡೆ ಧರ್ಮಜೆನೆ ||

|| ಕೌರವೆ ತನ್ನ ಅಮ್ಮನ್ ದೂರುವೆ ||

ಧರ್ಮಜೆನೆ ಪಿರ ಸಾದೈ ಬನ್ನಗ
ತನ್ನ ಜೋಕ್ಲೆಡ ಮಾತ ಸೇನೆಡ
ಸುದ್ದಿ ಪಂಡನೆ ನಡತಿ ಸಂಗತಿ ಇವರೊ ಇವರಾದ್ ||
ದ್ರೋಪದಿಗ್ ಆಯಿನವೆ ಕಸ್ತೊನು
ಜೂಜು ಗೊಬ್ಬುದು ಸೋಲು ಆಯ್ತೆನ್
ಮಾತ ಪನ್ನಗ ಪರುನು ಕಡೆಯೆರ್ ಸೇನೆಡಕ್‌ಲೊಟ್ಟು ||

1

ಸೂರ್ಯ ಉದಯೊಡು ಕೌರವೇಂದ್ರೆನೆ
ರಾಜ ಚಾವಡಿಡುಲಯಿ ಲೆಪುಡಯೆ
ಮಾಮ ಸಕುನಿನ್ ಕರ್ಣ ದುಸ್ವಾಸನೆರೆ ಕೂಟೊನುಲ ||
ಪಾಂಡು ಬಾಲ್ಗಿನ್ ಅಪ್ಪೆಲಮ್ಮೆಲ
ಕೂಡ್ಡು ಮನ್ನಿತೆದಕ್‌ಲೆನಿಯೇ
ಊರ್ಕ್ಕು ಕಡಪುಡುದಾಂಡ್ ಪಂಡನೆ ದುಸ್ತೆ ದುಸ್ವಾಸೆ||

2

ಬೀಮ ಪಾರ್ತೆರ್ ನೌಂಡು ತುಚ್ಚಿದ್
ಸಾದಿಡೇ ಪಿರ ಮಗ್‌ರ್‌ದುಂತುದು
ಪೋಪುನೆನ್ ಯಾನ್ತಾಯೆ ಪಂಡನೆ ಸಕುನಿ ಕೌರವಡ||
ಆನೆದಾ ಪಗೆಟಿತ್ತಿ ಸಿಮ್ಮೊಗು
ಗಾಯೊ ತಾಗ್‌ನ ಕಾಡ ಪಂಜಿಗ್
ಬೇನೆ ಆಯಿನ ಮರಿಕ್ ಸೈರೊನು ಕೊರೈ ಮಾರಾಜ ||

3

ದ್ರೋಪದಿನವೇ ಜುಟ್ಟುನೊಯ್ಪುಯಿ
ಆಲ್ ಪಟ್ಟೊದ ರಾಣಿ ಪನ್ನುನ
ಈಯೆ ಗ್ಲೆಯ್ಪುನ ಬುಡುದು ಮಾನೊನು ದೆಪ್ಪೆರೆಗ್ ತೂಯ
ಆಲೆ ದೈವೊದ ಬಲೈಡಾಪಗ
ಸೀರೆ ಸಡಿಲ್‌ಜಿ ಮಾನೊ ಪೋಯಿಜಿ
ಮಾನೊ ನಿನ್ನವೆ ಪೋಯ್ತೆ ಪಂಡ್‌ದ್ ಕರ್ಣೆ ಹಂಗ್‌ಸಯೆ |

4

ಅಮ್ಮೆ ಕೊರೈರ್ ವರೊನು ಅಕ್‌ಲೆಗ್
ತಪ್ಪವುನೆ ಎಂಚಂದ್ ಪನ್ನೆಗೆ
ಮರ್ದ ಅರೆತನೆ ಯಾನ್‌ಲಕ್‌ಲೆನ ದರ್ಪುನುಂತಯೆರೆ ||
ಎನ್ನ ಸೋಲುನು ಎಂಚ ಪನ್ನುನೆ
ಅಮ್ಮೆರೇ ಕೆಡ್‌ಸಯೆರ್ ಕಜ್ಜೊನು
ಪನ್ದ ದುಕ್ಕೊಡು ಸೇಂಕ್ ಸೇಂಕ್‌ದ್ ಬುಲ್ತೆ ಕೌರವೆನೆ ||

5

ಮಲ್ತ್ಜಡ ಸಾದನೆನ್ ಜಯೊ ಸಿರಿ
ತಿಕ್ಕುನೆಂಚವು ಸುಯ್ಲ ದೆತ್ತ್ದ್
ಕುಲ್ಯಡಪಜಯೊ ವೈರಿನಾಕ್ಲ್ ಸೊರ್ಕುವೆರ್ ನಿಜೊನೆ||
ನೆಕ್ಕ್ ಬೋಡಯಿ ಸರಿ ನಿಮುರ್ತಿನ್
ನಿನ್ನ ಅಪ್ಪೆಡ ಕೇನ್ದ ಮಲ್ಪುಲ
ಬುಕ್ಕೊ ನಿನ್ನಮ್ಮಡಲ ಕೇನ್ಲ ಪಂಡನಾ ಸಕುನಿ||

6

ಆಂಡ್ ಪಂಡ್ ಪಂದ್ ನಾಲ್ಟಿಂಗಿರ್
ಸೇರ್ದ್ ಬತ್ತೆರ್ ಕುರುಡೆ ಕುಲ್ಲ್ನ
ಕೋಣೆದುಲಯಿಗ್ ದುಕ್ಕೊ ದುಮ್ಮಾನೊಡುಲ ಸೇಂಕೊಂದು ||
ಆಡೆ ಬತ್ತೆದ್ ಕುಲ್ಲ್ದಲ್ಪನೆ
ದೂತನ್ಲ ಕಡಪುಡುದು ತರ್ಪಯೆ
ದೇವಿ ಗಾಂದಾರಿನ್ಲ ಕೌರವೆ ಅರಸು ಕೈತಡೆಗ್ ||

7

ಅಕ್ಲೆನೀರೇ ಬುಡ್ಡದಕ್ಲೆನ
ಕಳೆಯಿ ಸೊತ್ತುಲೆ ಕೊರ್ದು ಮೋಕೆಡ್
ಕಡಪುಡುನ ತೂದೆಂಕ್ ಸಂತೊಸು ಆದ್ ಪಂಡೊನುವೆ||
ಅಕ್ಲ್ ನಿಕ್ಲೆಗ್ ಪರಮ ಬಗ್ಗೆರ್
ಮೆಗಿಯ ಬಾಲೆಲು ಪನ್ನಿ ಬೇದೊನು
ಬುಡಿಯರಮ್ಮರೆ ಈರ್ ಎಡ್ಡೆನೆ ಆಂಡ್ ಮಲ್ತನವು ||

8

ದೂರೊ ಎಂಕುಲು ಆಯೊ ದ್ರಾಪದಿ
ಸೀರೆನೊಯ್ಪಯೊ ಪಗಡೆ ಗೊಬ್ಬದ್
ಸೋಲ್ವದಕ್ಲೆನ ಸೊತ್ತು ಮಾತೆನ್ ಮಲ್ತೊ ಸ್ವಾದೀನೊ ||
ಈರ್ ಪ್ರೀತಿಡ್ ಕೊರ್ರಕಲೆನ
ಪೋಯಿ ಸೊತ್ತುನು ಮಾತ ಕರುಣೆಡ್
ದಾಲ ತಪ್ಪುಲ ಅತ್ತ್ ಕೊರ್ರವು ಹಿರಿಯೆರಾಯಿನರ್ ||

9

ಅಪ್ಪೆ ಈರೇ ಕೊರ್ರೆ ಎಂಕ್ಲೆ-
ಗಪ್ಪಣೆನ್ ಪೋಯೆರೆಗ್ ವೈರಿಲೆ-
ಡಿತ್ತೆ ತರೆ ತಗ್ಗಾದ್ ಬದ್ಕುಜೊ ಪೋಪೊ ಊರುಡುದು||
ಅಮ್ಮೆರಕ್ಲೆನ್ ಪ್ರೀತಿ ಕರುಣೆಡ್
ರಚ್ಚಣೆನ್ ಮಲ್ತನರ್ ಅಕ್ಲೆನ
ಒಟ್ಟುಗೇನೆ ಸುಕೊಟುಪ್ಪಿ ಪಂಡ್ ಕಾರ್ ಪತ್ತಿಯೆನೆ ||

10

ದಾಯೆ ಮನಿಪುಜ ನಿನ್ನ ಬಾಲೆಲೆ
ಹಾಲ್ ಗ್ರಾಚಾರೊದವೆ ಪಾತೆರೊ
ಕೇನುಜೊಯ ಅಕ್ಲೆತ್ತೆ ಪನ್ನುನ ಇಸಮೊ ಸಂಗತಿಲು||
ರಾಜ್ಯೊದಾ ಸಿರಿ ಕುಲೊನು ಕುಟುಮೊನು
ಮಾತ ವೈಬವೊ ಹಸ್ತಿನಾವತಿ
ಊರುನಿತ್ತೆನೆ ಮುರ್ಕವೆನೆ ಕಡಲ್ಗಲ ನಿನ್ನ ಮಗೆ ||

11

ಅರೊ ರಾಜ್ಯೊಗು ಹಕ್ಕ್ದಾಕ್ಲ್
ಸತ್ತೊ ಸಾಸೊಡು ಬಿಸೆರಾಕ್ಲ್
ಸತ್ತೊದಾಚಾರೊಲೆಡ್ ಉಲ್ಲೆರ್ ಉಂಡೊ ಅಲ್ಮಾನೊ ||
ಪ್ರೀತಿದಾಕ್ಲ್ ಈರೆಗಕ್ಲೆ
ಮೋಸೊಗಾರೆರ್ ಎಂಕ್ಲು ಉಂತುಜೊ
ಪೋಪೊ ಪಂಡ್ ಕುರುಡ ಕಾರ್ಗ್ ಬೂರು ಪಿದಡಿಯೆನೆ ||

12

ದುಸ್ಸ ಬುದ್ಧಿದ ಮನಸ್ ಕರದಲ
ಪೊಟ್ಟು ಕಣ್ಣೆಡೆ ನೀರ್ ಜಪುಡದ್
ಪನ್ನೆ ಬುಡೆದಿಡ ಲೆಪ್ಪು ನಿನ್ನವೆ ಪೋಕಲೊದ ಮಗನ್ ||
ಒಯ್ತ ಕನತೆರ್ ಕರ್ಣ ಸಕುನಿಲು
ಬುಲ್ಪುನಾಯನ್ ತರ್ಕ್ ಪತ್ತೆದ್
ಪನ್ನೆನಾ ದ್ರತರಾಸ್ತೆ ನಿನ್ನನ್ ಬುಡುದು ಬದುಕುವೆನೊ ||

13

ದಾನೆ ಮಲ್ತ್ದ್ ಸೋಲ್ಪವನ ಪನ್
ನಾಡ್ ಕುಸೆಲ್ನ್ ಪನ್ನ ಎನ್ನಡ
ಹಾಳ್ ಎಣ್ಯಡ ದೈವೊ ತಂತೊಡು ಪೂರ ಮಣ್ಣಾವು ||
ಏಚನೆನ್ ಪನ್ ಪನ್ಲ ಇತ್ತೆನೆ
ಈಯೆ ಜೂವೊದ ಗಂಟ್ ಎನ್ನವೆ
ಯಾನ್ ಏಪೊಲ ಬುಡಯೆ ನಿನ್ನನ್ ಪಂಡೆ ದ್ರತರಾಸ್ತೆ ||

14

ಬೇನೆ ಆಯಿನ ಮನಸ್ ದಾಕ್ಲ್
ಪ್ರೀತಿಡೊಟ್ಟುಗು ಆವಯೆರ್ ನಿಜೊ
ದಾನೆ ಆಂಡಲ ಮಲ್ದೆಂಕ್ಲೆನ ಲಗಡಿ ದೆಪ್ಪೆಯೆ ||
ಪೂರ ರಾಜ್ಯೊನು ಅಕ್ಲ್ ಅತ್ತೆದ
ಯಾನೆ ಆಳೊಡು ಪಾಲ್ಡಾಳುನ
ಹಾಲ್ ಏಪೊಲ ಬರ್ಪುನೆನೆ ನಿಜೊ ಪಂಡೆ ಕೌರವೆನೆ ||

15

ಮದಿಮೆ ಆಯಿನ ಪೊಣ್ಣು ದ್ರೌಪದಿ-
ನಕ್ಲ್ ಬುಡಿಯೆರೋ ಐನ್ ಜನೊಕುಲ
ಬುಡೆದಿ ಆಯಲ್ ಇತ್ತೆ ರಾಜ್ಯೊನು ಬುಡುವೆರೋಪನ್ಲೆ ||
ಈರ್ ಎಂಕ್ಲೆನ್ ಬುಡ್ಡು ಅಕ್ಲೆಡ
ಪ್ರೀತಿಡುಪ್ಪುಲೆ ಅತ್ತಾಡೆಂಕ್ಲೆನ್
ಸೇರ್‌ದುಪ್ಪುಲೆ ಬುಡ್ಡೆ ಅಕ್ಲೆನ್ ಪಂಡೆ ಕೌರವನೆ ||

16

ಬೀಮ ಸೇನನ ಬಾಯ್ಲಿ ಬೊಬ್ಬೆನ್
ಪಾರ್ತೆ ಪೌರುಸೊ ಕೊಚ್ಚಿನೆನ್ ಸಹ-
ದೇವ ಬಾಸೆನ್ ಮಾತ ಮಣ್ಣಾದ ಅಡಿಕ್ ಪಾಡಿಯೆರೆ ||
ಸಾದಿ ಉಪ್ಪುನೆ ಒಂಜೆ ಅಕ್ಲೆನ್
ಕಾಡ್ ಗಿಡರುನ ತಂತ್ರೊ ಎನ್ನಡ
ಏತಲಾ ಉಂಡಿತ್ತೆ ಈರೆನ ಮನಸ್‌ಗಂದಾಂಡ ||

17

ಮರ್ಲ್ ಪಾತೆರೊ ದಾಯೆ ಮಗ ಈ
ನಿನ್ನ ಎಡ್ಡೆಗ್ ಮಲ್ಪುನೆಂಕಲ
ಮಲ್ಲ ಸಮದಾನತ್ತೊ ಅಕ್ಲೆನ ಪೊರು ಎಂಕಾವೊ ||
ನಮ್ಮ ವೈರಿಲು ಅಕ್ಲ್ ಕಂಡಿತೊ
ದೈವೊ ಸಕಯೊನು ಅಕ್ಲೆಗೇಪೊಲ
ಕೊರುಪ್ಪನೆನ್ ಯಾನಿತ್ತೆ ಪನ್ನಗ ತಪ್ಪು ನಾಡ್ಡತ್ತೊ ||

18

ಅಕ್ಲೆನೀಡೆಗ್ ಲೆಪುಡಿ ಪಗಡೆನ್
ಒರೊನೆ ಗೊಬ್ಬುದು ಸೋಲ್ಪದಕ್ಲೆನ್
ಗಿಡರೊಡುಯೆ ಪದ್‌ರಾಡ್ ವರ್ಸೊನು ಕಾಡ್ಡೆ ಕಳೆಯೆರೆಗ್ ||
ಅಯಿಡ್‌ದಲ ಬುಕ್ಕೊಂಜಿ ಒರ್ಸೊನು
ಗುರುತೊ ತಪ್ಪದ್ ಊರುಡುಂತೊಡು
ಅಕ್ಲೆ ಗುರ್ತೊನು ಪತ್ಯೊಡೆಂಕುಲು ಪೆರಪ ಕಾಡ್‌ಗಲ ||

19

ಕಡಪುಡುನವೇ ಸೆರ್ತ್ ಪಾಡ್‌ದ್
ಪಗಡೆಗೊಬ್ಬುವೊ ಈರೆ ಮನಸ್‌ಗ
ಸಮೊನೆ ಪಂಡ್‌ದ್ ಆಂಡ ಕಡಪುಡಿ ಜನೊನು ಅಕ್ಲೆನಡೆ ||
ಪನುವರ್‌ಡ ಬೊಡ್ಡಿಂತ್ ಎಂಕುಲು
ಪಿದಡುವೊನೆ ಮುಲ್ಪಡ್ಡ್ ಪನ್ನಗ
ನಿಕ್‌ಲೆನೇನ್‌ಲ ಬುಡುವೆನೋ ಮಗ ಜನೊನು ಕಡಪುಡುವೆ ||

|| ದ್ರತರಾಸ್ತ್ರ ಪಾಂಡವೆರೆನ್ ಪಿರ ಬರ್ಪಾಯೆ ||

ಪ್ರಾತಿಕಾಮಿಕ ಈ ಯುದ್ಧಿರ-
ನಾಡೆ ಪೋದೇ ಪನ್‌ಲ ಆಯಡ
ಈಡೆಗೇ ಪಿರ ಬರೊಡು ಪನ್ತೆರ್ ನಿನ್ನ ನೇಲ್ಯಮ್ಮೆ ||
ಪ್ರೀತಿಡೇ ಲೆಪುಡವುನೆ ಪಂಡ್‌ದ್
ಈಯೆ ಸಮದಾನೊನುಲ ಮಲ್ತದ್
ಈಡೆ ಲೆತೊನುದು ಬಲಯ ಇತ್ತೆನೆ ಪೋಲ ಮುಲ್ಪಡ್ಡ್ ||

1

ಸುದ್ದಿ ಕೇಂಡ್‌ದ್ ವಿದುರ ಬೀಸ್ಮೆರ್
ಬರೈರೆಗ್ ಪಿರ ಪಂಡನೋ ಹಾ
ತನ್ನ ಬಾಲ್ವೆನ್ ಯಮನ ಬಾಯಿಗ್ ನೂಕೈನಾ ಕುರುಡೆ ||
ಸರೈ ಜಿತ್ತನ ಪೆಟ್ಟಿನೇ ಸರಿ
ಮುಚ್ಚಿದಿತ್ತನ ಬಾಯಿ ದೆತ್ತೆನೊ
ಅಚ್ಚಿರೊಡು ಅಕ್ಲೆಲಕ್ಲ್ ಪಾತೆರ್ದಲಯಿ ಪೊಗ್ಗಿಯೆರ್ ||

2

ನೂದು ಜೋಕುಲೆನೀಯೆ ಕೆರ್ಪನ
ಸಾದಿ ನಾಡೆನೆ ದಾಯೆ ನಿನ್ನವೆ
ಬಾಲೆಲೆಗ್ ಇನಿ ಬರ್ಪುನಪಜಯೊ ದಾಲ ತೆರಿಯಂದ್ ||
ಜೋಕುಲೆನ ಸಾವ್ತುದು ಸೈವಲ್
ಆಕ್ಲೆನ್ ಪೆದಿಯಪ್ಪೆ ನಿಕ್ಲೆಲ
ದಾಲ ತೆರಿಯಂದಿತ್ತೆ ಪಂಡ್‌ದ್ ಬೀಸ್ಮೆ ಮರಿಯೆನೆ ||

3

ಮುಕುಲೆಗೇ ತೆರಿಯಂದ್‌ನಂಚೆನೆ
ಇರ್‌ಳೆಡೇ ಕಡಪುಡುನ ದೂತೆನೆ
ಅಕ್ಲೆ ಪಾಳಯೊದಾಡೆಗ್‌ತ್ತಿಯೆ ಪ್ರಾತಿಕಾಮಿಕೆನೆ ||
ಅರಸು ಮನದನಿ ಪಿದಡುನಟ್ಟನೆ
ಮಲುಪುನಗ ದೂತೆರೆಡ ತೆರಿಪಯೆ
ಬುಡರೊದಾ ಬಾಕಿಲ್‌ಡ್ ಉಂತುದು ತಾನ್ ಬತ್ತನೆನ್ ||

4

ಉಳಯಿ ಲೆಪುಡನಗಪಗ ಧರೈಜ-
ನೆದುರುಗಡ್ಡೊನೆ ಬೂರು ಪಂಡೆನೆ
ನಿಕ್‌ಲ್ ಬರೊಡಿಗ್ ಪೆರಪ ಹಸ್ತಿನ ಪುರೊಕು ತಿರ್ಗೊಂದು ||

ಅರಸುಲೆನ್ನನ್ ಕಡಪುಡನೆ ಇನಿ
ಮುರನಿ ಪಗಡೆನ್ ಗೊಬ್ಬುದಾಯಿನ
ಪಿಸ್ ಕೋಪೊನು ಮರಪಯೆರ್ ನಿಜೊ ಪನ್ದ ಅರಸುಗುಳು ||

5

ಇತ್ತೆರಾಜಿಡ್ ಇತ್ತೆರಡಲಾ
ಬುಕ್ಕೊ ನಿಸ್ತುರೊ ಆಯೆರೆಗ್ ನನ
ಬಲ್ಲಿ ಪಂಡ್ ಪಂದ್ ಇರ್ವೆರಸುಲು ಒಟ್ಟು ಸೇರೊಂದು ||
ಸುದೊ ಮನಸ್ ಪನ್ದ ನನೊರೊ ಪಗಡೆನ್
ಗೊಬ್ಬಿಯೆರೆ ಬರೊಡುಂದು ಪನ್ದೆರ್
ಹಸ್ತಿನಾವತಿದರಸು ದ್ರತರಾಸ್ತೆರಲ ಎನ್ನಡನೆ ||

6

ನನೊರೊ ಗೊಬ್ಬೆರೆ ತರ್ಪಲೆಂದ್ ಪಂದ್
ಕುರುಡ ಮನಸ್ ಪನ್ದ ಕೌರವೆನೆ ಇನಿ
ತಿರ್ಗಯೆನೊ ಪನ್ ಅತ್ತ ಆಯನ ಅಪ್ಪೆ ಪಂಡನೆನೊ ||
ಪೆರಪ ತರ್ಪವುನಕ್ಲೆ ಮೂರ್ಕೆರೊ
ತೆರಿಡ್ ಪೋಪುನವಕ್ಲೆ ಬಂಡೆರೊ
ಪನ್ಲ ಈ ತೆರಿಯೊಂದು ಪಂಡನೆ ಬೀಮನಾಯಡನೆ ||

7

ನಮ್ಮ ನೇಲ್ಯಮ್ತೆರಲ ಕಡಪುಡಿ
ಬುಕ್ಕೊ ಸಂಸಯೊದಾಯೆ ಬೀಮೆನೆ
ತಪ್ಪು ಪಾತೆರೊ ಪನಡ ಮುನಿವೆರೊ ಅಪ್ಪೆ ಗಾಂದಾರಿ ||
ಮುಪ್ಪು ಬನ್ನಗ ಅಪ್ಪೆಲಮ್ತೆಲ
ತಪ್ಪುವೆರ್ ನಿಜೊ ಆಂಡ ನಮ್ಮವೆ
ಅಮ್ಮೆರೆನ ಪಲಯೆಂಚ ತಪ್ಪೆರ್ ಪಂಡೆ ಧರ್ಮಜೆನೆ ||

8

ದುಸ್ತೆರಾ ಕೌರವೆರ್ ಅಕ್ಲೆಗ್
ಕರ್ಣ ಸಕುನಿಲು ಸಾಯೊಗುಲ್ಲೆರ್
ಮಲ್ಲ ಮಾಯೊದ ತಂತ್ರಗಾರೆರ್ ಎಂಚ ನಂಬುನೆನೊ ||
ತೆರಿಡ್ ನಡಪುಜೆನಿತ್ತೆ ಕುರುಡನೆ
ಬುಡೆದಿ ಪಾತೆರೊ ಕೇನ್ದ ನಡಪುವೆ
ಮನಸ್ ಸುದೊನೆ ಇದ್ದಿ ಆಯನ ಪಂಡೆನಾ ಬೀಮೆ ||

9

ಪನ್ನುನೆನ್ ಈ ಕೇನ್ ಧರ್ಮಜ
ಕರ್ಣ ಸಕುನಿಲು ಪಂಡಿ ಪಾತೆರೊ
ಮಿಕ್ಕೊರಾಪುಜಿ ಕುರುಡ ರಾಜಗ್ ಆಯ ಬುಡೆದಿಗ್ಲ ||

ದುಸ್ತೆರೆನ್ ನಂಬಡೆಯ ಪೋಯರ್-
ಡಲ್ ಪಗಡೆನ್ ಗೊಬ್ಬುದಾನಗ
ನಿಸ್ತುರೊಡು ಕೇಡಾವು ಕಂಡಿತ ಪಂಡೆರಾದೊಮೇ ||

10

ಲಡಯಿಗ್ಲ ಜೂಜಿಗ್ಲ ಲೆಪುನಗ-
ಲಪಗ ಪೋಪುನ ರಾಜ ಧರ್ಮಜೆ
ಬುಡಯೆ ಧರ್ಮಜೆ ಯಾನ್ ತೆರಿನರ್ ಎಂಕ್ಲೆ ನೇಲ್ಯಮ್ತೆ ||
ಸಾಸ್ತೊ ನೀತಿನ ತೆರಿತೆರೇತ್ಲ
ಪೋಯಿನೆಟ್ ಗಂಡಾಂತ್ಲೊ ಆಂಡಲ
ಪೋಡ್ಯನಯೆ ಯಾನತ್ತ ಸೈಸುವೆ ಪಂಡೆ ಧರ್ಮಜೆನೆ ||

11

ಪೆರಪ ಪರಿವಾರೊಲೆನ್ ತಿರ್ಗದ್
ಗಜನಗರೊದರಮನೆಗ್ ಪೊಗೈರ್
ಕುರುಡೆನಕ್ಲೆಡ ಪಂಡೆ ಪ್ರೀತಿದ ನಟನೆ ತೋಜಾದ್ ||
ಮನಸ್ ಡಿತ್ತನ ಬೇನೆ ಮಾಜ್ಜೆರೆ
ಕುಸಲ್ಡೇ ನಿಕ್ಲೊಟ್ಟು ಗೊಬ್ಬುದು
ಕೆಲವು ದಿನೊ ಮೂಲುಂತೊಡುಂದುದು ಯಾನ್ ತರ್ಪಯಿನೆ ||

12

ಪಾಂಡವೆರೆ ಬೆರಿ ಪೂಜಿದಕ್ಲೆನ
ಏತ್ಲಾ ಪುಗರೊಂದು ಬತ್ತನ
ಬಾರಿ ಎಡ್ಡೆನೆ ಆಂಡ ಸಂತೊಸುಡುಪ್ಪಿ ಕೆಲವು ದಿನೊ ||
ಬಾಯಿ ಸಮ್ಮನೊ ಕುರುಡೆ ಮಲ್ತನ
ಮೋಸೊದಾ ಬಲೆ ಪನ್ದ ತೆರಿಜೆರ್
ಪಾಂಡು ಬಾಲೆಲು ನಂಬುದಕ್ಲೆನ್ ಅವುಲೆ ಉಂತಿಯೆರ್ ||

|| ಪೆರಪ ಪಗಡೆನ್ ಗೊಬ್ಬಿಯೆರ್ ||

ಸರೊ ಲೋಕೊ ವಿನಾಸೊ ಮಲ್ಪುನ
ದೈವೊದಡಿಗದ ಪಾಕೊಗಿತ್ತೆನೆ
ಧರ್ಮಜನ ತಿರೊ ಬುದ್ಧಿ ನೆಸೆಲ್ ನ ಪಾಡ್ಡೊಂಡತ್ಲೊ ||
ಆ ಯುದ್ಧಿರೆ ಸಬೆಕ್ ಬನ್ನಗ
ಮಾತ ಲಕ್ಶ್ಮದ್ ಉಂತ್ಯೆರಾಲೆ
ಜೂಜಿ ಗೊಬ್ಬೆರೆ ಸಕುನಿ ಕುಲ್ಲಿಯೆ ಕೌರವೆರೆ ಕಡೆಟ್ ||

1

ಸಬೆಟ್ ಮಾತೆರ್ ಕುಲೈರಲ್ಲನೆ
ಜನೊಲ ದಿಂಚಿದ್ ಆಂಡ್ ಧರ್ಮಜ
ಮನಸ್ ಜೂಜಿದ ಮುಸುಕುದುಲಯಿಡ್ ಕಬ್ಬುದುಂತನಗ ||
ಪಗಡೆರೇಕೆದ ಮಣೆನ್ ದೀಡೈರ್
ಎದುರೆದುರು ಕುಲ್ಲಿಯೆರ್ ಗೊಬೈರೆ
ಸಕುನಿ ಧರ್ಮಜನಕ್ಲ್ ಕಾಯಿನ್ ಸಾಲ್ದ ದೀಡಿಯೆರ್ ||

2

ಎನ್ನೆದಾತಲ ಪೋಡಿ ಮನಸ್ಡ್
ಧರ್ಮಜ್ ಆವಂದೆ ಮಾಯೊಡು
ಮರ್ಲ್ ಕಟ್ವೆಡ್ ಕಣ್ಣಾಗಂಜಿಜಿ ಬೇತೆ ಎಂಚಿನಲ ||
ದುಸ್ಪ ಕಪಟೊದ ಜನೊಟ ಪಗಡೆನ್
ಗೊಬ್ಬುವೆನೆ ಧರ್ಮಜೆನೆ ಪಂಡ್ಡ್
ಸಜ್ಜನೆರ್ ಸೇರೊಂದು ಚಿಂತೆಡ್ ಕುಲೈರಲ್ಲ ||

3

ದಾಳೊ ರಟ್ಟದ್ ಕಾಯಿನುರ್ಲಯೆ-
ನಾ ಸಕುನಿ ಧರ್ಮಜನ್ ಪುಗರ್ಡ್
ದಾವು ದೀತ್‌ಚೊ ಕುಸಲ್‌ದವೆ ನಿಜೊ ಗೊಬ್ಬು ಪಂಡೊಂದು
ನನಗ್ ಒಂಜೇ ಸರ್ತಿ ಗೊಬ್ಬನೆ
ಜುಗರಿದಾಕ್‌ಲೆ ಲೆಕೊನೆ ದಾಯೆಗ್
ನಮೊ ನಮೊನೆ ಗೊಬ್ಬೊನುಗೊ ದಾವುನು ದೀಡ್ ಒರೊ ಮಾತ್ರೊ ||

4

ಅರಸು ಕೇನ್‌ಲ ನಿನ್ನ ರಾಜ್ಯೊನು
ಕುರುಪತಿಯೆ ಆಯನವೆ ದೇಸೊನು
ಇರುವೆರ್‌ಲ ಒಡ್ಡಾದ್ ಸೋಲ್ತನ ನಿಕ್‌ಲೆ ಪೈಕಿದಯೆ ||
ಕಾಡ್‌ಡುಂತೊಡುಲಾಯೆನೇ ಪದ್-
ರಾಡ್ ಒರ್ಸೊದ ಮುಟ್ಟದವದಿನ್
ಪೂರ ಕರಿತ್‌ದ ಊರುಡುಂತೊಡು ಗುರ್ತೊ ತಪ್ಪಾದ್ ||

5

ಒರೊ ಒಂಜೆನ್ ಊರು ಕರಿಪುನ
ಗುರೊ ತಿಕ್ಕನ ಸಾತ್‌ಗಾಯೆನೆ
ಬುಕ್ಕೊ ಪೋವೊಡು ಕಾಡ್ಗ ಪದರಾಡೊರ್ಸೊ ತಪ್ಪಂದೆ ||
ನೆಕ್ಕ ತತ್ತನವಾಯಿಗೇಸ್ತರೆ
ಕೊರೈ ಸಿಕ್ಕೆನ್ ಧರ್ಮೊ ಬುಡುವೆರೊ
ಚತ್ರಿಯೆರ್ ಪಂಡೊಂದು ಸಕುನಿಯೆ ದಾವು ನಿಸ್ಸಯಿತೆ ||

6

ಜುಗರಿಗುಂತುಲ ರಾಜೆ ಪೋಡೈಡ
ಪಗಡೆ ಗೊಬ್ಬದ ರಸೊತಮುರ್ತೊನು
ಬಿರೆಲ್‌ಡೇ ಮಡೆ ಮಲ್ಪುನೆಡ್ಡೆನೊ ಅರಸು ಈಯತ್ತೊ ||
ಸಸರೊದಾ ಗೊಬ್ಬತ್ತ ಎನ್ನಪು
ಜುಗರಿ ಕಳಕ್‌ಲ ಬರಡ್ ಬ್ರಮೈನೆ
ಎನನ್ ಗೆಲೈರೆ ಬಲ್ಲಿ ಪಂಡನೆ ಸಕುನಿ ಬಿಸರ್ತಿಗೆ ||

7

ದ್ರೋಣ ಕೃಪೆರ್‌ಲ ವಿದುರೆ ಬಾಹ್ಲಿಕೆ
ಬೀಸೈಲಾ ಗಾಂದಾರಿ ಕುಂತೀ-
ದೇವಿ ಬೂರಿಸ್ರವೆ ಯುಯುತ್ತು ವಿಕರ್ಣೆ ಸೃಂಜಯೆರ್ ||
ಬೀಮ ಪಾರ್ತರ್ ಮಾದ್ರಿ ಜೋಕುಲು
ದ್ರೋಪದಿಲ ಇಸಮೊಂದು ಪಂಡ್ಡ್
ಕೋಪೊಡಿತ್ತೆರ್ ಧರ್ಮಜ್ ಸರಿ ಪನಿಯೆರಾವಂದೆ ||

8

ಹಾಲ್ ಬುದ್ಧಿದ ತಂತ್ರೊ ಸಕುನಿನ
ಕೇನ್ಡ್ ಧರ್ಮಜೆ ಒಪೈ ಪಗಡೆದ
ಕಾಯಿ ತಿರ್ಗ್‌ದ್ ತಿರ್ತ್ ಪಾಡ್‌ಗ ದಾನೆ ಪನ್ನುನೆನೊ||
ದ್ರುಪದ ಮಗಲೆನ ದತ್ತ ಕಣ್ಣೆಲ
ಅರಸುನೆಡತವೆ ಬುಜೊನೆ ರಟ್ವೆಡ್
ತೆರಿಪಯೊನೆ ನಿಜೊ ಸೋಲುಲಾಯಿನ ಧರ್ಮನಂದನಗ್ ||

9

ಗೊಬ್ಬುದಾಂಡಯೆ ನಿನ್ನಗೊಬ್ಬುಡು
ಮಲ್ತನೆನೆ ಈ ದಾಯ್ತ ಕೌರವೆ
ಗೆಲೈ ಗೆಲೈನೆ ಗೆಲೈ ಪಂಡ್ಡ್ ಸಕುನಿಲಾಗಿಯೆನೆ ||
ಧರ್ಮನಂದನ ಸೋಲ್ತ ಕಾಡ್‌ಗ್
ಇತ್ತೆನೇ ಈ ಪಿದಡ್ ಪಂಡ್ಡ್
ಬೊಬ್ಬೆ ಹಾಕುನ ತೂದು ದರ್ಮಜಗಾಂಡ್ ಮಹದುಕ್ಕೊ ||

10

ರಟ್ವೆದಾಯನ ದೊಂಡೆದಾಪಸೆ
ದಿಸ್ವಿಲಪಗನೆ ಮೈಂದ್ ಕಟ್ವೆಡ್
ಅಲ್ಪದಾಯ್ತಲ ತೋಜಿಚಾಯಗ್ ದುಕ್ಕೊ ಉರ್ಕರ್‌ದ್ ||
ಸತ್ಯೊ ಮೀರೈರೆ ಮನಸ್ ಒಪ್ಪುಜಿ
ಕರೊ ಹಾಲ್‌ದ ಉರ್ಲು ನಾಲಿನೆ
ಸುತ್ತು ಪಾಡ್‌ದ್ ಬುದ್ಧಿ ಅಡಿ ಮೇಲಾಂಡ್ ಧರ್ಮಜ್ ||

11

ಬೀಮ ಪಾರ್ತೆರ್ ಒರೈನೊರೈನ್
ತೂದು ದುಕ್ಕೊದ ಸುಯ್ಲ ದೆತ್ತದ್
ದೀಡ್‌ದಂಗೈ ಮಂಡಿಗೈ ಸರಿ ಕುಲ್ಲುದುಪ್ಪನಗ್ ||
ತೂಯರೊ ಕುರುಡರಸು ಮಾಮನ್
ಕಾಡ್ ಪೋಯಿರೆ ತೂತೆರೋ ದಿನೊ
ಪಾಪೊ ನೇಲ್ಯಮೈರಲ ಪಂಡೆರೊ ಪನ್ದ ದ್ರೌಪದಿಯೆ ||

12

ಕೋಡೆ ಆಯಿನ ಕಸ್ಬೊ ಇದ್ಯೊಡೊ
ಪೋಯಿ ನಮೊ ಊರುಡುದು ಕಾಡ್‌ಗ್
ಆಯಿನಾವಡ್ ಅಲ್ಪ ಆಂಡಲ ನಮೊನೆ ಬದ್‌ಕೊನುಗೊ ||
ದ್ರೋಪದಿನ್ ಸಮದಾನೊ ಮಲ್ತದ್
ಬೀಮ ಪಾರ್ತೆರ್ ಪಂಡೆರಾಲೆಡ
ಈಯೆ ಕಾಪುಲ ಎಂಕ್ಲ ಪಾಡ್‌ನ ಬಾಸೆ ತೂಯಿರೆಗ್ ||

|| ಪಾಂಡವೆರ್ ಕಾಡ್‌ಗ್ ಪಿದಡಿಯೆರ್ ||

ಕಡ್ ದಕ್ಕೈರ್ ರತ್ನೊ ಬಂಗರ್
ದುತ್ತುದೈತೊನು ಬಿಚ್ಚದುಂತ್ತೈರ್
ಕ್ರಿಷ್ಣ ಮುರ್ಗೊದ ಚರ್ಮೊ ತುತ್ತೈರ್ ಬುಡುದು ಪಚ್ಚಡೆನ್ |
ಮುತ್ತು ರತ್ನೊದ ಮಾಲೆನರಸುನ
ಪಟ್ಟೊದಾ ಮಹರಾಣಿ ಸಬೆಕೇ
ದಕ್ಕೈದುಂತ್ಯಲ್ ಮೌನೊ ಮುದ್ರೆಡ್ ರೂಪೊ ಗೌರವೊಡು||

1

ಯಾರ್ಲೊ ನಂಕಲ ಕೌರವೇರನ
ಓಲೆಗೊಡು ಪಲೊ ತಿಕ್ಕನವು ನನ
ಪೋಯಿ ನೇಲ್ಯಮೈರಡ ಒಪ್ಪಿಗೆ ಪಡೆದ್ ಕಾಡ್ಪುಲಯಿ ||
ಬಾರಿ ಮೋಕೆದ ಅಪ್ಪೆನೇ ಗಾಂ-
ದಾರಿ ದೇವಿನ ಕಾರ್ ಪತ್ತೆಗೊ
ಬೀಮ ಪಾರ್ತೆರ್ ಪಂಡ್‌ದಣ್ಣಡ ಬುಲೈರಾಪಗನೆ ||

2

ಮಾತ ಬತ್ತದ್ ಕುರುಡ ರಾಜನ
ಕಾರ್‌ಗಡ್ಡೊನೊ ಬೂರ್ದು ಪಂಡೆರ್
ಈರ್ ಎಂಕ್ಲೆಗ್ ಕಾಡ್ ಪೋಯಿರೆ ಕೊರೈ ಅಪ್ಪಣೆನ್ ||

ಆಯೆ ಕಣ್ಣೆಡೆ ನೀರ್ ಜಪುಡದ್
ಯಾನ್ ಬದುಕುಜೆ ಪನ್ದ ಬುಲೈನೆ
ಏಪೊ ತೂವೆನೊ ನಿಕ್‌ಲೆನೆಂದ್‌ದ್ ಪನ್ದ ಗಾಂದಾರಿ ||

3

ಟಕ್ಕ ಬುಲ್ಲುಗು ನೀರ್ ಕಣ್ಣೆಡೆ
ಜಪ್ಪುನವೆ ಆಚಿರೊನೆ ಪಂಡ್‌ದ್
ಪೋಣ್ಣ ದ್ರೌಪದಿ ಮಾಮಿ ಕೈತಲ್ ಉಂತ್‌ನಾಪಗನೆ ||
ಕಸ್ಬೊ ಬರೈರೆಗಾಂಡೆ ಸಿವ ಸಿವ
ಮರ್ಮಲೆಗ್ ಇನಿ ತೀರೈವ್ವ ನಿಕ್‌ಲೆನ
ಒಟ್ಟಿಗೇ ಬರೈರೆಗ್ ಪಂಡ್‌ದ್ ಕುಂತಿ ಬುಲೈಂದು ||

4

ತರೆಕ್ ತಿಗಲೆಗ್ ಹಾಕೊನುಂದೇ
ಪುಡೆರ್ ಪುಡೆರ್‌ದ್ ಕುಂತಿ ಬುಲ್ಲುನ
ಸಿತ್ತಿನ್ ತೂಯಿನ ದೌಮೈರಾಲೆಗ್ ಪನ್ದ ಸಮದಾನೊ ||
ಅಕ್‌ಲ್ ಪದಿಮೂಜೊಸೊರ್ ಕರಿದ್‌ಲ
ಪೆರಪ ಬತ್ತದ್ ಊರುನಾಳ್ವೆರ್
ಕಡಪುಡಕಲೆನ್ ಈಯೆ ಬುಲ್ಲಡ ನನೊಗು ಎಡ್ಡೆಂಡು ||

5

ಕಾಡ ಸಿರಿನವೆ ಪೊರ್ರು ರೂಪೊನೆ
ಪೂವು ಪಂದ್‌ರುಲು ದಿಂಜಿನಾ ಮರ
ಕೇದಯಿದ ಉಗುರಾಲೆ ಕೂಲಿಲು ಬೊಲ್ಪು ದಾಡಿಮೊನೆ||
ತಾಮರೆದ ಕಣ್ಣುಗುಳು ಕುಜಲ್‌ಲ
ಕಾಡಿಗಿದ ಕರಿಕಪ್ಪು ತುಂಬಿಲು
ದ್ರೋಪದಿಗ್ ಸಕಿಯಾಯಲೆಂದ್‌ದ್ ದೌಮೈ ತೆರಿಪಯೆರ್ ||

6

ಹಸ್ತಿನಾವತಿದರಮನೆನ್ ಬುಡು-
ದಲ್ ಬನ್ನಗ ಬೀಸ್ಮ ದ್ರೋಣೆರ್
ಒಟ್ಟು ಬತ್ತೆರ್ ವಿದುರ ಗೌತಮನಕುಲು ಸೇರೊಂದು ||
ಅಪ್ಪೆ ಕುಂತಿನ್ ವಿದುರನೊಟ್ಟುಗು
ಧರ್ಮನಂದನೆ ಕಡಪುಡಿಯೆನೇ
ದುಕ್ಕೊ ಮಲ್ತದ್ ಕಾರ್ ಪತ್ತೆನಗಾಲೆಗುಸುಲಿದ್ಡಿ ||

7

ಕೇರಿ ಕೇರಿಡ್ ಇಲ್ಲ ಮಾಡ್‌ಡ್
ಕೋಟೆದಗರ್‌ಡ್ ಮರತ ಗೆಲ್ಲಡ್
ತಾರೆ ಕಂಗ್‌ದ ಕುಬೆಟ್ ಉಂತುದು ತೂದು ಬುಲ್ಲುನವೆ ||
ಮಾತ ಜನೊಕುಲೆ ತಿರ್ಗ್ ತಿರ್ಗ್‌ದ್

ತೂದು ಪಾಂಡವನಕ್ಲ್ ಮೋನೆನ್
ಬಾಡವೊಂದೇ ಪೋಯೆರಾಕ್ಲ್ ಪೆರಣೊ ಪೋಯಿಲೆಕೊ ||

8

ಬಿರ್ಚಿ ಕುಜಲ್ಡ್ ನಾರ್ ಪೊದೆತ್ಡ್
ಚರ್ಮೊ ತುತ್ತುದು ಆಯುದೋಲೆನ್
ಪತ್ತೊನುಂದೇ ಆಯ್ನು ಸೋಲುಗು ತಿಗಲೆ ಪೊತ್ತುನವೆ ||
ಉಸುಲು ಸೇಂಕೆಡ್ ಮೋನೆ ಕೋಪೊದ
ಉರಿಟ್ ಕೆಂಪಾವೊಂದು ನಡಪುನ
ಅರಸು ಕುಟುಮೊದ ಐವೆರೆನ್ ಸರಿ ತೂಯೆರೇತೊ ಜನೊ ||

9

ಎದುರುದಾಯೆನೆ ಪಾರ್ತೆ ಆಯನ
ಪಿರವು ಧರ್ಮಚಿ ಬುಕ್ಕೊ ಮಾದಿನ
ಅಮರ್ ಜೋಕುಲು ಅಕ್ಲೆ ಪಿರವುಡು ದೇವಿ ದ್ರೌಪದಿಯೆ ||
ಬೆರಿಯೆ ಬರ್ಪೆನೆ ಬೀಮೆ ಪಂಡ್ಡ್
ಒರಿಯಗೊರ್ಯ್ಗ್ ತೋಜವೊಂದೇ
ಜನೊಕುಲಿತ್ತೆರ್ ಸಾದಿದಾ ಬರಿ ಬರಿಟ್ ತೂವೊಂದು ||

10

ಸಿವಗ್ ಸಮೊ ಸಮೊ ಹರಿಗ್ ಕಮ್ಮಿಯೊ
ಬೆರಮನಂಚೆನೆ ಇಂದ್ರ ತೇಜಿಡ್
ಮೆರೆಯಿನಕ್ಲೆಗ್ ಇಂಚಿ ಕರ್ಮೊನೊ ವಿದಿನ ಬರವತ್ತೊ ||
ಮುಕುಲೆಗಿಂಚೆನೆ ಆಂಡ ಕೌರವ
ಕುಲೊತ ಪುರಿಕುಲು ಲೆಕ್ಕೊಗಾವೆರೊ
ವಿದಿನ ಕಣ್ಣ್ಡ್ ನೆತ್ತೆರುಂಡೋ ಪಂಡೆರೇತೊ ಜನೊ ||

11

ಕೇಂಡೆನಾ ಅಬಿಮನ್ಯು ಸುದ್ದಿನ್
ಮಾತ ಬಾಲೆಲು ಸಚಿವನಾಕ್ಲ್
ಆಪ್ತ ಮಂತ್ರಿಲು ಅರಸು ಸಾಮಂತೆರಾಲ ತೆರಿಯೊಂದು ||
ಪಾರ್ ಬತ್ತ್ಡ್ ಕಾರ್ಗಡ್ಡೊನೆ
ಬೂರ್ನಗಾಪಗ ಅರಸು ಕಣ್ಣ್ಡೆ
ದಾರೆ ದಾರೆನೆ ನೀರ್ ಜತ್ತ್ಡ್ ಚಂಡಿ ಚಂಡ್ಯಾಂಡ್ ||

12

ಲೆಪುಡದಾ ಪರಿವಾರೊದಕ್ಲೆಡ
ಪನ್ ಪೆ ನಿಕ್ಲೆಗ್ ಅರಸು ಕೌರವ
ಕುದುರೆ ಗಜ ರತೊ ಮಾತ ಸೊತ್ತುಲು ಕಟರೊ ಕೊಪ್ಪಿಯೊ ||

ಸರಕ್ ಸರ್ವೆಸೊನುಲ ಕೌರವ
ಅರಮನೆಗ್ ಸಾಗಲೆಯ ಎಂಕುಲು
ನನಗ್ ಕಾಡ್ನ್ ಆಳ್ವೊ ಪಂಡೆನೆ ಧರ್ಮನಂದನೆ ||

13

ಆನೆಲೆನ್ ಕೌರವೆರೆ ಕಡೆತವೆ
ಮಾವುತೆರೆಗೊಪ್ಪಾದ್ ತೇರ್ಲೆ
ಸೂತೆರೆನ ವಸೊ ಕೊರ್ದು ಬಾಕಿದ ಸರಕ್ ಸಾಮಾನ್ ||
ಆ ದುರ್ರೋದನ ಕಡೆತ ಚಾಕಿರಿ-
ದಾಕ್ಲೆನ ಸ್ವಾದೀನೊಗೊಪ್ಪದ್
ಕಾಡ್ಗಾನಿಯೆ ಪಂಚ ಪಾಂಡವೆರೊಟ್ಟು ಪಿದಡಿಯೆರ್ ||

14

ಹಸ್ತಿನಾವತಿರಸು ಮಂತ್ರಿಲು
ಪೊಗ್ಗುದಿಂದ್ರಪ್ರಸ್ತೊದರಮನೆ
ಗಲ್ಲ ಕೌರವ ಮುದ್ರೆನೊತ್ತುದು ಪೋಯೆರಲ್ಪಡ್ಡ್ ||
ಸುದ್ದಿ ಕೇಂಡ್ ಮಂತ್ರಿನಕ್ಲೆನ್
ಸಮ್ಮನಿತೆ ಕೌರವೆನೆ ಪಾಂಡವೆ-
ರಲ್ಪಡ್ಡ್ ಪೋಯಿನೆನ್ ಕೇಂಡ್ ಬಾರಿ ಸಂತೊಸುಡು

15

ರಾಜ ಮಾರ್ಗೊಡೆ ಪಾಂಡು ಬಾಲೆಲು
ಕಾಡ್ದಾಡೆಗ್ ನಡತ್ ಪೋನಗ
ಆ ದುಸ್ವಾಸನೆನಲ್ಪ ತೋಜಯೆ ಮಲ್ಲ ಬಿಸ್ತಿಗೆ ||
ಕಾಡ್ಡೇ ಪುಟ್ಟೆನವೆ ಕಾಟಿಲು
ಊರುಡಿತ್ತೊನೆ ಪುಲತ ಪಂತಿನ್
ಮೇದ್ ಪೋಪೊನೆ ಪೆರಪ ಕಾಡ್ಗ್ ಪನ್ದ ತೆಲಿತೊಂದು ||

16

ಆಕ್ಲೆನ ಪಿರವುಡೆನೆ ಬನ್ನಗ
ಬೀಮೆ ತಿರ್ಗ್ಡ್ ತೂಯೆ ಕೋಪೊಡು
ಆತ್ ಪೊರ್ತುಗು ಧರ್ಮನಂದನೆ ಬೊಡ್ಡಿ ಬೊಡ್ಡಿಂತ್ ||
ತಾನ್ ಕೈ ಸನ್ನೆಡ್ಲ ತೆರಿಪನ-
ಗಾಯೆಗದೆ ಕಿಡ್ಲಿಡ್ ದೀಡ್ಡ್
ಸೀದಡಕ್ಲೆನ ಪಿರವೆ ಬತ್ತೆನೆ ಅಡಿಕ್ ತೂವೊಂದು ||

17

ನಗರೊ ಕಡತ್ ಬತ್ತನಾಕ್ಲ್
ಸುರನದಿತ ಬರಿಟುಂತ್ಯೆರಪಗನೆ

ಪಿರವು ಕಡಪುಡಿಯೆರ್ಲ ಒಟ್ಟಿಗೆ ಬತ್ನಾಕ್ಲೆನ್ ||
 ಗುರುಜನೊಕು ಕೈಮುಗಿದ್ ಬೀಸ್ಮನ
 ಪರಮ ಪಾದೊಗು ಅಡ್ಲೊ ಬೂರುದು
 ವಿದುರಡನೆ ಅಪ್ಪೆನವೆ ಕ್ಷೇಮೊನು ತೂವೊಡೀರ್ಂದ್ ||

18

ಮಾತೆರೆಡ ಬಪೊಂದು ಕುಲ್ಯೆರ್
 ಓಡೊಡಾಕ್ಲ್ ಗಂಗೆ ಕಡತ್ದ್
 ಆಯೆರೆಗ್ ಎತ್ನನೆನ್ ತೂಯೆರ್ ಮಾತ ನಿಲ್ಕೊಂದು ||
 ಮೋನೆ ಬಾಡದ್ ಪೆರಪ ಬತ್ತೆರ್

ಬೀಸ್ಮ ವಿದುರೆರ್ ದ್ರೋಣ ಕೃಪೆರ್ಲ
 ರಾಜೆನಾ ದ್ರತರಾಸ್ತ್ರ ವಿದುರಡ ಕೇಂಡೆನ್ನೆವೆರೆನ್ ||

19

ಬಾರಿ ದುಕ್ಕೊಡು ಬೀಮೆಯರುನ್ನೆ
 ಆ ನಕುಲ ಸಾದೇವನಾಕ್ಲ್
 ದ್ರೋಪದಿನ್ ನಡುಟುಂತದಾಕ್ಲ್ ಪಲಯ ಪಿರವುಡನೆ ||
 ಪೋಯೆರ್ಯ ಪುಣ್ಯಾತ್ಮೆರಕ್ಲೆನ್
 ಆದಿ ನಾರಾಯಣೆನೆ ಕರುಣೆಡ್
 ಕಾಪೊಡೆಂದ್ ವಿದುರೆ ಕಣ್ಣೆಡೆ ನೀರ್ ಜಪುಡಾಯೆ ||

ಶ್ರೀ ಅನಂತಕೋಡಿ ಸುಬ್ರಾಯ ದೇವರೆ ನಿರ್ಪೊಡು;
 ಪರಿವಾರೊದೈವೊಲೆನ ಬೆರಿ ಸಾಯೊಡು
 ಕೆಲಿಂಜ ದೂರುಡು ನಿಲೆಯಾಯಿನ
 ಅಪ್ಪೆ ಸಿರಿ ಉಳ್ಳಾಲ್ದಿನ ದಯೊಟು;
 ತುಳು ಕೆಲಿಂಜ ಭಾರತೊದ
 ಸಬಾ ಪರ್ವೊ
 ಪೂರ್ತಿಯಾಂಡ್

ತುಳು ಕೆಲಿಂಜ ಬಾರತೊ

ಅರಣ್ಯ ಪರ್ವ - ಸುರುತ ಸಂದಿ

|| ಪಾಂಡವೆರೆಗ್ ಸೂರ್ಯನ ಅಚ್ಚಯೊ ಪಾತ್ರೊ ||

ಗುರುಜನೊನು ಪರಿಜನೊನು ಮಾತಲ
ಕಡಪುಡುದು ಆ ಪುಣ್ಯೊ ಗಂಗೇನ್
ಕಡತ್‌ದಾಯೆರೆ ಪೋದು ಪಾಂಡವನಕ್‌ಲ್ ಉಂತೊಂದು ||
ಸುದೇನ್ ಕಡತ್‌ದ್ ಪಾರ್ಡ್ ಬರ್ಪುನ
ಬೆರಣೆರೆನ್ ಮುನಿಕುಲೆನ್ ತೂಯೆರೆ
ಪರಹರಾ ಪಂಡೊಂದು ಧರ್ಮಜೆ ತರೆಕ್ ಹಾಕೊಂಡೆ ||

1

ರಾಜ್ಯೊ ಕಳೆಯಿ ದರಿದ್ರೆಂಕುಲು
ದಾಯೆಗಂಕ್‌ಲೆನಾಡೆ ಬರ್ಪರ್
ಯಾನ್ ಮುಕುಲೆನ್ ಎಂಚ ಸಮ್ಮನಿಪೆಂದ್ ಬುಲೊಂಡೆ ||
ಬೀಮೆನಕ್‌ಲೆನ್ ತೂದು ಪಂಡೆನೆ
ಕಾಡ್‌ಡುಪ್ಪುನೆ ಎಂಕ್ಲೆ ನಿಕ್‌ಲೆನ್
ಸಾಂಕಿಯೆರೆ ತೀರಂದಿ ಬಡವೆರ್ ಬರಡೆ ನಿಕ್‌ಲೊಟ್ಟು ||

2

ಯೋಗಿ ರುಸಿಕುಲು ಮಾತ ಬೆರಣೆರ್
ಕೇನೊಡೆನ್ನವೆ ಪಾತೆರೊನು ಇನಿ
ಪ್ರೀತಿಡೇ ಪಿರ ಪೋಲೆ ಪನ್ನಗ ಅಕ್‌ಲ್‌ಲಾಯಡನೆ ||
ರಾಜ್ಯೊನಾಳುನ ಅರಸು ಎಂಕ್ಲೆನ
ಕಾಡ್‌ಡುಪ್ಪುಡ್ ಗಮಿಟ್ ಸೇರಡ್
ಆಯೆನೇ ಗತಿ ಎಂಕ್ಲೆ ಬರ್ಪುನೆನೀಯೆ ತಲಿಪೊಡ್ಡಿ ||

3

ಪನ್ನುನೆನ್ ಕೇನೊಂದು ಧರ್ಮಜ
ಕಣ್ಣಾಡೆನೆ ನೀರರಿದ್ ಪನ್ನೆನೆ
ಎನ್ನ ವಿದಿಯೆ ಮುಕುಲೆಗೆಂಚಿನ ಪನುವೆ ಸಮದಾನೊ ||
ಪ್ರೀತಿಡೆನ್ನವೆ ಒಟ್ಟು ಬರ್ಪುನ
ಯೋಗಿಲೆನ್ ಬ್ರಾಣೆರೆನ್ ಉನ್ನಡ್
ಯಾನ್ ಸಾಂಕುನೆ ಎಂಚ ಪಂಡ್‌ದ್ ದುಕ್ಕೊ ಮಲೊಂಡೆ ||

4

ದಾಯೆ ಚಿಂತೆನ್ ಮಲ್ಪು ಧರ್ಮಜ
ಯೋಗಿ ರುಸಿಕುಲೆ ಬರ್ಪುನೆತ್ತೊಯಿ

ಆಕ್‌ಲೇಪೊಲ ಸುಕೊಕು ಕಸ್ವೊಗು ಹಿಗ್ಗ್ ತಗ್ಗುವೆರೊ
ಸೂರ್ಯದೇವನ್ ಜಪಿಪು ಅಕ್‌ಲೆನ್
ಸಾಂಕಿಯೆರೆ ಬೋಡಾಯಿ ಸಿದ್ಧಿಯೆ
ಆಪುನೆಕ್ ಅಡ್ಡಿ ಪಂಡರ್ ದೌಮ್ಯರಾಯಡನೆ ||

5

ಯೋಗಿ ದೌಮ್ಯರ್ ಪಂಡಿ ಪಾತೆರೊ
ಕೇನ್ಲೊ ಧರ್ಮಜೆನೆ ಸುದೊಡು
ಸೂರ್ಯ ಮಂಡಲೊ ತೂದು ಸಚರಾಚರೊದ ಚೇತನೊನು
ನೀರ್ ಗಾಳಿಗ್ ಮಾಯೊಡಾದಾ-
ರಾದ್ ಬೊಲ್ಪುನು ಕೊರ್ಪಿ ದೇವನ್
ಬಾರಿ ಬಗ್ಗಿಡ್ ಜಪೊನು ಮಲ್ತೆನೆ ಬಾನೊದರಸುನವೆ ||

6

ಅರಸು ಮಲ್ತನ ಜಪೊಕು ಮೆಚ್ಚಿದ್
ಪಗೆಲ್‌ದರಸುಲ ಒಲಿದ್ ಕೊರ್ಪೆನೆ
ಒನಸ್ ತೆನಸ್‌ನ್ ಕೇಂಡಿ ಸಾತ್‌ಗ್ ಕೊರ್ಪಿ ಕೊಪ್ಪರಿಯೊ ||
ದಿನೊಲ ಬೋಡಯಿ ತೆನಸ್ ನಿನ್ನವೆ
ಬುಡೆದಿ ನೆಟ್ಟನೆ ಕೇನ್ಲೆ ಬಲಸಡ್
ಉಣಿಯೆರೆಗ್ ತಿನಿಯೆರೆಗ್ ಬೋಡಯಿನಾತ್ ತಿಕ್ಕುಂದು ||

7

ಪನ್ನ ಸೂರ್ಯೆನೆ ಮಾಯಕಾಯೆನೆ
ಧರ್ಮಜೆನೆ ದೌಮ್ಯರೆನ ಕಾರ್‌ಗ್
ಅಡ್ಡೊ ಬೂರುದು ಸೂರ್ಯೆ ಕೊರ್ನವೆ ಅಚ್ಚಯೊದ ಪಾತ್ರೊ ||
ಮೆಣ್ಣುನೆನ್ ಆರೆಡನೆ ತೋಜಡ್
ತನ್ನ ಬುಡೆದಿಡ ಪಂಡೆ ತಿಕ್ಕನ
ಅಚ್ಚಯೊದ ಪಾತ್ರೊದವೆ ಮಯಿಮೆನ್ ಇವರೊ ಇವರಾದ್ ||

8

ಪೊರು ಪೊರುಗು ಉಂಡೆರೊಟ್ಟಿಗೆ
ಇತ್ತಿ ರುಸಿಕುಲು ಒನಸ್ ಬಲ್ಮಣೊ
ಮಲ್ಪುಯಲ್ ದ್ರೌಪದಿಯೆ ಅಚ್ಚಯೊ ಪಾತ್ರೆಡನೆ ಕೇನ್ಲೆ ||
ಬ್ರಹ್ಮ ಸಬೆಕೋಣಸಾಯಿ ಬುಕ್ಕೊನೆ
ಧರ್ಮಜಾದಿಲು ಉನ್ನೆದರ್‌ಲಾ
ನಿರ್ದಲಾತ್ಕೆ ಉಂಡುದಾನಗ ದಾಲ ಒರಿಯಂದ್ ||

9

ಮುನಿಕುಲಿಂಚೆನೆ ದಿನೊಲ ಉಂಡುದು
ಜಪೊನು ಮಲ್ತೊಂದಿತ್ತೆರಾಲೇ
ಅಪಗರುಸಿ ಮೈತ್ರೇಯೆ ಪೋಯೆನೆ ಹಸ್ತಿನಾವತಿಗ್ ||
ಉಲಯಿ ಬತ್ತನ ಮುನಿನ್ ಕೌರವೆ
ಮರಿಯದಿಡ್ ಕುಲ್ಲಾದ್ ಕೇಂಡೆನೆ
ತಪಸ್‌ಡಿತ್ತನರೀರ್ ದಾಯೆಗ್ ಬತ್ತರೀಡೆಂದ್ ||

10

ಆದ್ ಪೋಯಿನ ಆಂಡ್ ಪಾಂಡವ-
ನಾಕಲೆನ್ ಪಿರ ಲೆಪುಡದೀಯೇ
ರಾಜ್ಯೊ ಸರ್ವೆಸೊನುಲ ಕೊರೈಡ್ ನಿಕ್ಕಿ ಎಡ್ಡೆಂಡು ||
ಬೀಮ ಪಾರ್ತೆರೆ ಪಗೆನ್ ಬುಡಿಯಡ
ಈಯೆ ಬದ್ಕುವ ನಿಕ್ಕಿ ದೇವರೆ
ಸಾಯೊ ತಿಕ್ಕುಯ ಪನ್ನಗಾ ಕೌರವೆನೆ ಪಿಸ್‌ರೇರ್ಡ್ ||

11

ಪಗೆತಕಲೆ ಕೈ ಕೇನ್ ಕೊರ್ವೆನೊ
ಪಗಡೆ ಗೊಬ್ಬುದು ತಿಕ್ಕಿ ರಾಜ್ಯೊನು
ಮುನಿಕುಲೆಗ್ ಈ ರಾಜಕೀಯೊದ ಸುದ್ದಿ ದಾಯೆಗ್‌ಯೆ |
ಬಡವೆರಾ ಪಾಂಡವರೆ ಸುದ್ದಿನ್
ಬುಡುದು ನಡಪುಲೆ ಪನ್ನ ತನ್ನವೆ
ತುಡೆಕ್ ಬೊಟ್ಟುದು ಮಲ್ತೆ ಗರ್ಜನೆನಾ ದುರೈದನೆನೆ ||

12

ನಿನ್ನವೀ ತುಡೆ ತುಂಡು ರಟ್ಟಡ್
ಮಲ್ಲ ಸಗ್ಗಿದ ಬೀಮ ಗದೇಟೆ
ಪನ್ನ ಸಾಪೊನು ಕೊರ್ನ ಕೇಂಡ್ ಬುಲ್ತೆ ದ್ರತರಾಸ್ತೆ ||
ಎನ್ನ ಮಗನಲ ಕಾಪೈರಾದೇ
ಕೊರೈ ಪಿರಿ ಸಾಪೊನುಲ ಪಂಡ್‌ದ್
ಬುಲ್ತಿ ಕುರುಡಡ ಪಂಡೆನಾ ರುಸಿ ಯೋಗಿ ಮೈತ್ರೇಯೆ ||

13

ಕೊರೈ ಸಾಪೊಗು ಪಿರಿಯೆ ಇದ್ದಿಯು
ನಿನ್ನ ಮಗೆ ಮಹ ಮೂರ್ಕಿ ಆಯಗ್
ಬುದ್ದಿ ಬರ್ಪನೆ ಸಯೈರಾನಗ ಪನ್ನ ಪಿದಡಿಯೆನೆ ||
ಅಯ್ಯೊ ರುಸಿನವೆ ಸಾಪೊ ತಿಕ್ಕಾದ್
ಸಯೈ ನೆನ್ನವೆ ಮಗೆನೆ ಪಂಡ್‌ದ್
ಬುಲ್ತು ಬುಲ್ತುದು ಕಂಗಲಾಯ್ನ ತೂದುಲಾ ವಿದುರೆ ||

14

ಪೋಡಿಯಡ ದ್ರತರಾಸ್ತೆ ರುಸಿನವೆ
ಸಾಪೊ ಮಾಜೈರೆ ಸಾದಿ ಉಂಡುಯ
ಪಾಂಡು ಬಾಲ್ಗೆ ಕೊರ್ಲಲೆತ್ತಾದ್ ಅಕಲೆ ರಾಜ್ಯೊನುಲ ||

ವಾಸುದೇವನ ದಯೊಟು ನಿನ್ನವೆ
ಜೋಕುಲೆನ ಗೆರಚಾರೊ ಪರಿಯರೊ
ಆವು ಪನ್ನಗ ಕೋಪೊ ಏರ್‌ದ್ ನೆರೈ ದ್ರತರಾಸ್ತೆ ||

15

ಕುರುಡ ಬಾಯಿದ ನೆರಡೆ ಕೇಂಡ್‌ದ್
ವಿದುರೆ ಕಾಮ್ಯಕೊ ಪನ್ನಿ ಕಾಡ್‌ಗ್
ಸರೊನೆ ನಡತ್‌ದ್ ಪೋದು ಪಾಂಡವೆರೊಟ್ಟುಗಿತ್ತೊಂದು||
ಅಕಲೆ ಸುಕೊ ದುಕ್ಕೊಲೆನ್ ಕೇಂಡ್‌ದ್
ಮನಸ್‌ಗೇತ್‌ಲ ಸಾಂತಿ ತಿಕ್ಕನ
ಗಪಗ ಕುರುಡಗ್ ವಿದುರೆ ಪೋಯಿನ ದುಕ್ಕೊ ತಡೆವಂದೆ |

16

ಜನೊನು ಕಡಪುಡುನಪಗ ಬತ್ತನ
ವಿದುರಡನೆ ಸರಿ ಕೇಂಡೆ ಪಾಂಡವ-
ನಕಲೆ ಸುದ್ದಿನ್ ಎಂಚ ಉಲ್ಲೆರ್ ಓಲು ಪನ್‌ಲಂದ್ ||
ಕುರುಡು ಕಣ್ಣೆಡೆ ನೀರ್ ಜಪುಡದ್
ಪರಬೆ ಕೇನ್ನಗ ಅಕಲ್ ಕಾಮ್ಯಕೊ
ಪನ್‌ಪಿ ಕಾಡ್‌ಡ್ ಇರೆತ ಪುರೆಟ್ಟುಲ್ಲೆರ್‌ಯ ಸಂತೊಸುಡು ||

17

ಸೂರಿಯನ ಜಪೊ ಮಲ್ತದಕಲೆಗ್
ಬಾರಿ ಲಚ್ಚಣೊದೊಂಜಿ ಅಚ್ಚಯೊ
ಪಾತ್ಸೊ ತಿಕ್ಕಾದ್ ಒನಸ್ ತೆನಸ್‌ಗ್ ದಾಲ ಕಮ್ಮಿದ್ದಿ||
ಸಾರೊ ಬ್ರಾಣೆರ್ ರುಸಿಕುಲೇತ್‌ಲ
ಆಕಲೆನ ಒಟ್ಟಿಗೆನೆ ಉಲ್ಲೆರ್
ಸಾದು ಸಜ್ಜನೆರೆಗಲ ಕಸ್ತೊನೆ ಉಂಡೊ ಬದ್‌ಕಿಯೆರೆ ||

18

ಆ ಬಕಾಸುರ ಪಲಯೆನೇ ಕೆ-
ಮ್ಮೀರೆ ಪನ್ನುನ ದುಸ್ಪ ರಕ್ಕಸೆ
ಯೋಗಿಲೆನ್ ರುಸಿಕುಲೆನ್ ನಿಂಗೈರೆ ಬರ್ಪನೆನ್ ತೂದು
ಬೀಮಸೇನೆನೆ ಗುದ್ದು ಗುದ್ದುದು
ಆಯನಾ ಪುಣಪಾಡೈ ಕಾಡ್‌ಡ್
ದಾನವೆರೆ ಪೋಡಿಗನೆ ರುಸಿಕುಲೆಗಿದ್ದಿ ಪನ್ನಯೆರ್ ||

19

ತನ್ನ ಮೆಗಿಯನ ಬಾಲ್ಗೆಗಿಂಚಿನ
ಕಸ್ತೊ ಆಂಡೊಯ ವಿದುರ ಪಂಡ್‌ದ್
ದುಕ್ಕೊ ಮಲ್ಪುನ ಕಂಡನೀಯನ್ ತೂದು ಗಾಂದಾರಿ ||
ಪಗಡೆ ಗೊಬ್ಬುದು ರಾಜ್ಯೊ ಕಳೆಯೆರ್
ಅಕಲ್ ಸೊರ್ಕುದು ಮಲ್ತೆ ದಾಯ್ಕಿಕ್
ನಮೊನೆ ಮರುನೆ ದಾಯೆ ಪಂಡ್‌ದ್ ನಂಜಿ ಕಾರಿಯಲ್ ||

|| ಸಿರಿಕ್ರಿಷ್ಟೆ ಪಾಂಡವೆರೆನಾಡೆಗ್ ಬತ್ತೆ ||

ಪಾಂಡವೆರ್ ಜೂಜಾಟೊ ಗೊಬ್ಬುದು
ರಾಜ್ಯೊ ಸರ್ವೆಸೊಲೆನ್ ಕಳೆಯೆರ್
ಕಾಡ್‌ಡುಲ್ಲೆರ್ ಪನ್ನಿ ಸುದ್ದಿಯೆ ಆಂಡ್ ದ್ವಾರಕಿಡ್ ||
ವಾಸುದೇವೆನೆ ದುಕ್ಕೊ ಎಸನೊದ
ನಾಟಗೊನು ತೋಜಾದ್ ಪಾಂಡವ-
ನಾಕ್‌ಲೆನ್ ತೂಯೆರೆಗ್ ಪಿದಡಿಯೆ ಚಿಂತೆ ಮಲ್ತೊಂದು ||

1

ಹರಿನ ಚಿಂತೆನ್ ಅರ್ತೊ ಮಲ್ತೆರೆ
ತೆರಿನಕ್‌ಲ್ ಏರುಂಡು ಆಯನ
ಕೆಲಸೊ ಬೂಮಿದ ದಿನ್ನೊ ತಗ್ಗವಿ ಕ್ರಿಷ್ಟನಬತಾರೊ ||
ಅಸುರ ವರ್ಗೊನು ಲಗಡಿದೆತ್ತಾದ್
ಕುರುಕುಲೊನು ತಾಂಟಾದ್ ಕೌರವ-
ನಕ್‌ಲೆ ವಂಸೊನು ಪಾಂಡವೇರೆಡ ಮಣ್ಣ್ ಮುಕ್ಕಯೆರೆ ||

2

ಬಾರಿ ದುಕ್ಕೊಡು ಪಿದಡ್‌ನಾಪಗ-
ಯಾದವೆರ್ ಮಾತೆರ್ಲ ಸೇರೈರ್
ರೆಂಜಿಡೇ ಕುಲ್ಲೊಂದು ಪೊಂಜೊವು ಮಾತ ಪಿದಡಿಯೆರ್ ||
ಮಾತೆರೆನ್ ಕೂಟೊಂದು ಮುರಹರೆ
ಪಾಂಡವೆರ್ ಸೇರ್‌ನವೆ ಕಾಡ್‌ಗ್
ಸೀದ ಎತ್ತೆನೆ ಕಾಮ್ಯೊಕೊದ ಬನೊ ನಾಡ್ ನಾಡೊಂದು ||

3

ಬತ್ತನಕ್‌ಲೆನ್ ತೂದು ಸಂತೊಸು-
ಡೆದ್ಲೊನುಂದೇ ಪಾಂಡು ಬಾಲೆಲು
ಮಲ್ಲ ಗೋಳಿದ ಮರತ ಮುದೆಲ್‌ಡ್ ಸಾಲ್ಡ್ ಕುಲ್ಲಯೆರ್ ||
ಸುದ್ದಿ ಕೇಂಡ್‌ದ್ ದ್ರುಪದೆ ಕೇಕಯೆ
ದುಸ್ಪ ಕೇತುಲ ಕುಂತಿಬೋಜನ
ಒಟ್ಟುಗೆತ್ತೈರ್ ಸೋಮಕಾದಿಲು ಕಾಮ್ಯೊಕಾ ಬನೊಕು ||

4

ಹಿರಿಯೆರೆಗ್ ಕಿರಿಯೆರೆಗ್ ಸಮೊ ಸಮೊ-
ತಕ್‌ಲೆಗಿತ್ತನ ಸರಿತ ಮರ್ದದಿ
ಕೊರುದು ಕ್ರಿಷ್ಟನ ಕಾರ್‌ಗಡ್ಲೊನೆ ಬೂರೈ ಧರ್ಮಜೆನೆ ||
ಮೆಗಿಯನಾಕ್‌ಲ್‌ಲಡ್ಲೊ ಬೂರೈರ್
ಬೆರಣೆರ್‌ಲ ರುಸಿ ಯೋಗಿನಾಕ್‌ಲ್
ಹರಿನ್ ಕೊಂಡಾಡೊಂದು ಬೂರೈರ್ ನೀಟೊ ಕಾರ್‌ಗಡ್ಲೊ ||

5

ದ್ರೋಪದಿಯೆ ಪಾರ್ಬತ್ ಬೂರೈಲ್
ಕಾರ್‌ದವುಲೇ ಕ್ರಿಷ್ಟ ಪಾದೊನು
ತೀರ ಚಂಡಿಯೆ ಮಲ್ತಲಪಗನೆ ಕಣ್ಣ ನೀರ್ದಾಲ್ ||
ಸೀರೆನೊಯ್ಪುನಗಪಗ ಕಾತನೆ
ಗೋವು ಕಂಜಿನ್ ಕಾಪುನಂಚಿನೆ
ಆದಿ ನಾರಾಯಣೆನೆ ಬಗ್ಗಿಗ್ ಒಲಿದ್ ಗೋವಿಂದ ||

6

ವೇದೊಲೆಗ್ ತೋಜಂದ್‌ನಾಯೆನೆ
ಯೋಗಿಲೆಗ್ ತಿಕ್ಕಂದ್‌ನಾಯೆನೆ
ಈಯೆ ಪತಿರುತೆನಕ್‌ಲೆಗೊದಗುನ ಮಾಯಗಾರೆನೆಲ ||
ಜ್ಞಾನಿಲೆನ ಸುತಿ ನಿನ್ನ ಕೆಬಿಕೇ
ನಾಟ್‌ಜಿಡಲಾ ಎನ್ನ ಮುರೈನೆ
ಕೇನ್ಡ್ ಮಾನೊನು ಕಾತ ಹರಿ ಗೋವಿಂದ ಮಾಮೈಮ ||

7

ಅಯಿನ್ ಜನೊ ಕಂಡನಿಲು ದರ್ಮೊದ
ನಿಲೆಕ್ ಪೋಡಿದ್ ಕುಲೈರಲ್ಲನೆ
ಹಿರಿಯೆರಜ್ಜೆನೆ ಗುರುಕುಲಿತ್ತೆರ್ ಎರ್ಲ ಮನಿತೆಜೆರ್ ||
ಗತಿಯೆ ಹೀನೆದಿ ಆಯಿನಾಲೆಗ್
ಹರಿಯೆ ಗತಿ ಗೋವಿಂದ ಪನ್ನಗ
ಒಲಿದ್ ಮಾನೊನು ಕಾತ್‌ನಾಯೆನೆ ಈಯೆ ಎನ ದೈವೊ ||

8

ಮೆಗಿದಿಲಕ್ಕಲ ಲಕ್ಕಲಪ್ಪೇ
ಬುಲುಪಡಂದ್‌ದ್ ಲಕ್ಕದುಂತದ್
ಮೆಯಿತ ದೂಳುನು ಕುಡ್ತು ರಟ್ಟದ್ ಕಣ್ಣ್ ಪೂಜಿಯೆನೆ ||
ಅವುಲು ಇತ್ತನ ಕ್ರಿಷ್ಟ ಪರಿವಾ-
ರೊದವೆ ಕಣ್ಣೆಡ್ ನೀರ್ ಜತ್ತಾದ್
ದ್ರುಪದ ಮಗಲೆನ ಸಿತಿನ್ ತೂದೇ ಬುಲೈರೇತೊ ಜನೊ ||

9

ಕುಜಲ್ ಸೂಡಿನ ಕಟ್ಟ್ ಸೀರೆನ್
ಸರಿಟ್ ತುತ್ತೊನು ಮಗಲೆ ದುಕ್ಕೊನು
ಮರಪು ನನ ಕೌರವೆರೆ ನಾಸೊನೆ ಆಂಡ್ ಗ್ರೇಯ್ತೊನುಲ ||
ಮಾರಿನಾಕ್‌ಲ್ ತಿಗಲೆಗೊಯ್ತಾದ್
ಪಾಡ್‌ನಕ್‌ಲಿನಿ ಬದುಕುವೆರೊ ಪನ್
ಕಾಡ್‌ಡುಂತುನ ಅವದಿ ಮುಗಿಯದ್ ಬುಕ್ಕೊ ತೂವೊನುಲ ||

10

ಕುಜಲ್ ಕಟ್ಟುನೆ ಎಂಚ ಪನ್ನುನ
ಇಸಯೊ ನಿಕ್ಕೇ ತೆರಿವು ಕ್ರಿಷ್ಟಾ
ದುರುಳ ದುಸ್ಸಾಸನನ ನೆತ್ತೆರ್‌ಡೆನ್ನವೀ ಕುಜಲ್ ||

ಬೊದುಲುದಾಂಡನೆ ಬಾರ್ಡ್ ಕಟ್ಟಿರೆ
ಸರಿಟ್ ತಿಕ್ಕುನೆ ಪನ್ದ್ ಕಾಪುವೆ
ಅಯಿನ್ ಒದಗಲ ಕ್ರಿಷ್ಟ ಪಂಡ್ ತೆಲಿತಲಾಪಗನೆ ||

11

ಅವುಲ ಸರಿ ದುರೋದನಾದಿಲು
ಒರಿಯಯೆರ್ ಕಂಡಿತೊನೆ ಬೀಮನ
ಗದೆಕ್ ಗಣ್ಯೊನೊ ಪಾರ್ತ ಬಾಣೊಗು ಎದುರು ಉಂತುವೆರೊ ||
ದುರುಳನಾ ನೆತ್ತೆರ್ಡ್ ನಿನ್ನವೆ
ಕುಜಲ್ ಮುರ್ಕದ್ ಕಟ್ಟವೆನೆ ನನ
ಮರುಗುನೆನ್ ಬುಡು ನಿನ್ನ ಬಾಸೆನ್ ಯಾನ್ ನಡಪಾವೆ ||

12

ಸಕುನಿ ಮಲ್ತನ ಮೋಸೊ ಕಪಟೊದ
ಪಗಡೆ ಗೊಬ್ಬುದು ನಿಕ್ಲೆಗಿಂಚಿನ
ಗತಿಯೆ ಆಯಿನೆ ಯಾನ್ ಇದ್ಯಂದಿಂಚಿ ಆಂಡತ್ತೊ ||
ಮಾತ ಜೂವೊಲೆ ಚಿತ್ತೊ ಸಾಕಿದ
ದೇವೆರಿಯೇ ಅಲ್ಪ ಇದ್ಯನೊ
ಯಾನ್ ಇದ್ಯಂದಾಂಡ್ ಪನ್ಪುನ ಪೂರ ಸುಳ್ಳತ್ತೊ ||

13

ದೋಪದಿನ ಪಾತೆರೊಗು ಮುರಹರೆ
ದೇವಿ ಯಾನೇ ತೆರಿಡ್ ಇತ್ತೆಡ
ಪಾಂಡವೆರ್ ಸೋಲ್ವಿಯೆರೆ ಬುಡ್ಡೆನೊ ಅಪ್ಪೆನಾಜಂದ್ ||
ಯಾನ್ ನಿಕ್ಲೆನ ರಾಜಸೂಯೊದ
ಯಾಗೊದಾಡೆಗ್ ಬತ್ತನಾಪಗ
ಸಾಲ್ವೆ ಮುತ್ತಿಗೆ ಪಾಡ್ಯೆನಂಕ್ಲೆನ ದ್ವಾರಕಾಪುರೊಕು ||

14

ಕೋಟಿ ಮಲ್ಲವೆ ದೋರಕಿದ ನಿಜೊ
ಕಾಪಿಯೆರೆ ಯಾದವೆರ್ ಇತ್ತೆರ್
ಸಾತ್ಯಕಿಲ ಬಲರಾಮೆ ಮನ್ಮತನಕ್ಲ್ ರಕ್ತಸಡ ||
ಕಾದ್ದಾನಗ ದುಸ್ಪ ಸಾಲ್ಪನ
ಸೇನೆ ಪಾರ್ಡ್ ಪೋಂಡು ಜಯೊ ಸಿರಿ
ಮಾಲೆ ಪಾಡ್ಯಲ್ ರಾಮಕಾಮಾದಿಲೆನ ಕಂಟೆಲ್ಗ್ ||

15

ಯಾನ್ ನಿಕ್ಲೆನ ರಾಜಸೂಯೊದ
ಕಾರ್ಯೊ ಮುಗಿತ್ದ ಪೋನಗಾಲೆ
ಮಾತೆರಲ ರಕ್ತಸನ ದಾಳಿನ ಪನ್ದ್ ಇವರಿತೆರ್ ||
ದ್ವಾರಕೆಗ್ ಮುತ್ತಿಗೆನ್ ಪಾಡ್ನ
ಸಾಲ್ಪನಕ್ಲೆನ ಬಿದೆನ್ ಮುತ್ತದ್
ಆನಗನೆ ಜೂಜಾಟೊ ಗೊಬ್ಬೆರ್ ಹಸ್ತಿನಾವತಿಡ್ ||

16

ಮಾಯೊ ಮಯಿಮೆದ ಊರು ಸಾಲ್ಪನ
ಸಾದಿ ಬೀದಿಲ ಓಲು ಪಂಡ್ಡ್
ಏರೆಗ್ಲ ತೆರಿಯಂದಿ ಜಾಗೆಡ್ ಯಾದವೆರೆ ಸೇನೆ ||
ಕಾದ್ನಗ ಯಾನವುಲೆ ಕೆಡಗಿಯೆ
ದೋಪದಿಯೆ ನಿನ್ನಕ್ಲ್ ಪಗಡೆಡ್
ಸೋಲ್ಪನವೆ ಗೊಂತಾಯ್ವಿ ಪನ್ನಗ ಆಲ್ ತೆಲಿತೊಂದು ||

17

ಮಗನ್ ಕೆರ್ನಗ ಯಮನ ದೂತೆರೆ
ಉಸುಲುನಮತ್ನೆ ಕೈತಲಿತ್ತೆದೊ
ಮುನಿಕುಮಾರನ ಬುಲ್ಬು ಕೇಂಡ್ನೆ ಮುಟ್ಟಡಿತ್ತೊಂದೊ ||
ದೂರೊ ಮುಟ್ಟದ ಸುದ್ದಿ ನಿಕ್ಲೆಲ
ದಾಯೆ ಬಗ್ಗೆರೆ ಮುಟ್ಟದಾಯೆನೆ
ಯಾನ್ ನಂಬ್ಬೆನೊ ನಿನ್ನ ಕುಸೆಲ್ದ ಪಾತೆರೊನು ಕ್ರಿಷ್ಟ ||

18

ಆಂಡ್ ನಂಬುಲ ಮೆಗಿದಿ ನಿನ್ನವೆ
ಆಜೊ ಬಾಸೆನ್ ಯಾನ್ ತೀರವೆ
ಕಾಡ್ಡುಪ್ಪುನ ಅವದಿ ಕರಿಯಡ್ ಒರ್ಸೊ ಪದಿಮೂಜಿ ||
ವಾಯುದೇವನ ಮಗಟ ಕೌರವ
ನಾಯಿಲೆನ ಪುಣ ಪಾಡ್ವೆನೆ ನನ-
ಗೀಯೆ ಚಿಂತೆನ್ ಬುಡ್ಲ ಪಂಡ್ಡ್ ಮಲ್ತೆ ಸಮದಾನೊ ||

19

ಬಾವನಕ್ಲೆಗ್ ದೈರೊ ಪಂಡ್ಡ್-
ಲಾಸುಬದ್ದೆನ್ ಬುಕ್ಕೊ ಆಲೆನ
ಬಾಲೆನಬಿಮನ್ಯುನುಲ ಲೆತೊನುದು ದ್ರುಪದರಾಯಡನೆ ||
ದೋಪದಿನ ಜೋಕುಲೆನ್ ನಿನ್ನವೆ
ರಾಜ್ಯೊದರಮನೆಡುಂತಲಯ ನನ
ವಾಸುದೇವೆನೆ ಪಂಡ್ಡಾಪಗ ಪಿದಡ್ಡುಂತಿಯೆನೆ ||

|| ಕಣ್ಣೆರಾಸ್ರಮೊದ ಜಂಬೂ ಪಲೊನು ಬೀಮಸೇನೆ
ಕೊಡ್ ಕನತೆ ||

ಧರ್ಮನಂದನೆ ಒಟ್ಟುಗಿತ್ತೆನ
ಮೆಗ್ಗನಕ್ಲೆನ್ ಬುಕ್ಕೊ ಮುನಿಕುಲೆ-
ನೊಟ್ಟು ಕೂಡುದು ಕಾಡ್ ತಿಗ್ಗಿರೆ ಪೋಯೆ ಸಂತೊಸುಡು ||
ಗುಡ್ಡೆ ಮಿತ್ತರ್ಡ್ ಕಣಿಕ್ ಜತ್ತೆದ್
ಬಲ್ಲೆನುಕುಡು ಕಲ್ಲ್ನೇರ್ಡ್
ಬನ್ನಗನೆ ಪಿಲಿ ಸಿಮೊ ಆನೆಲೆ ಮಾತ ತೂದಕ್ಲ್ ||

1

ಬತ್ತ್ ಬತ್ತ್ದ್ ಒಂಜಿ ಜಾಗೆಡ್
ಪೊರ್ನು ಕಾಡ್‌ದ ನಡುಟು ಪಕ್ಕಿಲು
ಮುರ್ದೊ ಜಾತಿಲು ಅರಳಿ ಪೂತವೆ ನಡುಟು ತುಂಬಿಗುಳು||
ನಮನೆ ನಮನೆದ ಪರ್ದ್ ಕಾಯಿದ
ಮರಕುಲಿತ್ತ್ದ್ ಮಾತ ಸೇರ್‌ದ್
ಪೊರುಲು ಪೊರುಲಾದಿತ್ತ್ನೇನ್ ಸರಿ ತೂಯೆರಕ್‌ಲೊಟ್ಟು ||

2

ಪೊರ್ನುದತ್ತೊಸು ಲಿಂಬೆ ಪಾದರಿ
ಕುಕ್ಕು ಪೆಲ ಪಾಲಾಸೊ ಗುಗ್ಗುಳೊ
ಅರಿ ಗೋಳಿದ ಮರನೆ ಸಂಪಯಿ ಜಂಬು ನೇರೋಳು||
ಬೂಮಿಡಿತ್ತ್ನ ಮಾತ ಮರಕುಲೆ
ಜಾತಿ ಸೇರ್‌ದ್ ಎಡ್ಡೆ ತೋಜುನ
ಕಾಡ್‌ದುಲಯಿಗ್ ಮಾತ ಬತ್ತೆರ್ ಅರಸು ಪರಿವಾರೊ ||

3

ತೆಲಿನ ನೀರ್‌ದ ಕಿರೆತ ನಡುಟುಲ
ಅರಳಿ ತಾಮರೆದರಸುನೆದುರುಡು
ಪುಗರಿಕೆಡ್ ಗಿಳಿಕೋಗಿಲೆಲೆ ತುಂಬಿಲೆನ ಗಾಯನೊಡು ||
ಮಯಿರ್ ನಲಿಕೆದ ನಾಟ್ಯೊ ರಂಗೊಡು
ಮೆರೆಪಿ ಪೊರ್ನುದ ನೋಟೊ ತೂನಗ
ಸಿರಿ ರಮಣನರಮನೆದ ಲೆಕೋನೇ ತೋಜಿದಾನಗನೆ ||

4

ದರ್ಮನಂದನೆ ಕಿರೆತದಂಡೆಡ್
ಕುಲ್ದದಪಗನೆ ಪಂಡೆ ಬೀಮಡ
ನಮ್ಮೊ ಮೂಲೇ ಸೌಕ್ಯೊ ಸಂತೊಸುಡುಪ್ಪುಗೊನೊ ಮೆಗಿಯಿ ||
ಎಡ್ಡೆ ಆಂಡಂದಪಗ ಬೀಮನೆ
ತಪ್ಪು ತೌರುದು ಗೆಲ್ಲನಾರುದು
ಕಟ್ಟಿನೇ ಗುಡಿ ಮಾತೆರುಂತ್ಯೆರೆಗಾಪುನಾ ಪುರೆನ್ ||

5

ಯೋಗಿಲೆನ ಸಂಗಾತೊಡಿತ್ತ್ದ್
ಕಾಡನಿರೆಲ್‌ಡ್ ಚೆತ್ತನಿದೆರ್‌ದ್
ಮೀದ್ ಸುದ್ದೊದ ನೀರ್ಡ್ ಅಚ್ಚಯೊ ಪಾತ್ರೊದೊಣಸ್‌ನಲ ||
ಏಳ್ಯೊ ಕಾಲೊಡು ಮಲ್ದಾದ್‌ಲ
ಸಾಸ್ತೊ ಸುತಿ ವೇದೊಲೆನ ಸಾರೊನು
ಕೇನ್ದ್ ಸುಕೊ ಸಂತೋಸುಡಿತ್ತೆನೆ ಅರಸು ಧರ್ಮಜೆನೆ ||

6

ಬೀಮಸೇನೆನೆ ಬೋಂಟಿ ದೇರುನ
ಆತುರೊಡುಲಾ ಕಾಡ್‌ಡಿತ್ತ್ನ
ಬೋಂಟಿಗಾರೆರೆನೊಟ್ಟು ಸೇರ್‌ದ್ ಪೊಗೈ ಕಾಡ್ಡುಲಯಿ ||

ಆನೆ ಪಿಲಿ ಪಂಜಿಗುಳು ಕರಡಿಲು
ಸಾರ್‌ದೊಲು ಸಿಮ್ಮೊಲುಲ ಪಾರಿಯೊ
ಮಾತ ದಿಕ್ಕುಗ್ ಬೀಮ ಸೇನನ ಗರ್ಜನೆದ ಸೊರೊಕು ||

7

ಕೆರ್ದ ಪಾಡಿಯೆ ಕಾಡ್ಡ ಸಿಮ್ಮೊನು
ತಿಗ್ಗ್ ದಕ್ಕಿಯೆ ಆನೆಲೆನ್ ಸರಿ
ಬುಕ್ಕೊ ಪಿಲಿ ಸಾರ್‌ದೊ ಮಾತೆನ್ ಕೆರಿಯೆ ಕಾಡ್ಡುಲಯಿ ||
ಪೆರ್ಮಿನ್ ತಿಗ್‌ತೊಂಡೆ ಪಂಜಿಗ್
ಇತ್ತಿದಾಡೆಡ್ ಪತ್ತ್ ತಿರ್ಗಯೆ-
ನಲ್ಲ ಪಾದೆಗ್ ಹಾಕ್ ಹಾಕ್‌ದ್ ಕೆರೈನಬ್ಬರೊಡು ||

8

ಸಯಿತಿ ಮುರ್ಗೊನು ಬೋಂಟಿದಕಲೆಗ್
ಕೊರಿಯೆ ತಿನಿಯೆರೆ ಅಕ್‌ಲ್ ಮಾಸೊನು
ಬೆಯಿಪದವುಲೇ ಪಾಲ್ ಕಟ್ಟೆದ್ ತಿಂದೆರೊಟ್ಟಿಗನೆ ||
ಅವುಲು ದೂರೊಡು ತೂಯೆ ಮರಕುಲೆ
ನಡುಟು ಇತ್ತ್ನ ಬಾರಿ ಮಲ್ಲವೆ
ಮರತ ಗುರ್ತೊನು ಪತ್ಯೆ ಜಂಬೂ ಪಲೊತ ಮರಪನ್ದ ||

9

ಆ ಮರಟ್ ಪಂದೊಂಜಿ ಮಲ್ಲೆಡ್
ಆನೆದಾತ್‌ಲ ಇತ್ತ್ನೇನ್ ತೂ-
ದಾಯೆ ಬಾಯಿಡೆ ನೀರ್ ಜಪುಡಯೆ ಕ್ಯೊದ್ ಕೊನೊಯೆರೆಗ್ ||
ಗದೆನ್ ಕಿಡ್ಡಿಲ್‌ದಡಿಟ್ ದೀಡ್‌ದ್
ಮರಕ್ ಮಿತ್ತರ್‌ದ್ ತರೆಕ್ ಎತ್ತೆನೆ
ಕೊಯಿದ್ ಜಪುಡಯೆ ಪರ್ದನಾಪಗ ಗಾಯೊ ಆವಂದೆ ||

10

ಪುಗೆಲ್‌ಡೇ ದೀವೊಂದು ಪರ್ದನ್
ಕನತ್‌ದಾಯೆನೆ ಧರ್ಮನಂದನ-
ನೆದುರು ದೀಡ್ಡೆನ್ ತೂದುಲಾಚಿರೊಡಾಯೆ ಪಂಡೊನುವೆ ||
ಸಿವಾ ಸಿವಾ ಉಂದೆಂಚಿ ಪಲೊನೋ
ಮೆಗಿಯನಕಲೇ ತೂಲೆ ಪಂಡ್‌ದ್
ಅಕಲೆನಾಡೆಗ್ ಲೆತ್ತನಾಪಗ ತೂದು ಸಾದೇವೆ ||

11

ಕಣ್ಣ ರುಸಿ ಪನ್ನುನರೆ ಮರಟ್‌ಲ
ಇತ್ತಿ ಪರ್ದನ್ ಕ್ಯೊದ್ ಕನತ್‌ನೆ
ಅಣ್ಣೆ ಬೀಮನೆ ಮುನಿನ ಮೈಮೆನ್ ದಾಲ ತೆರಿಯಂದೆ ||
ಬ್ರಮ್ಮ ವಿಷ್ಣುಗು ಸಿವಗ್ ಇಂದ್ರಗ್
ತನ್ನ ತಪಸ್‌ದ ಸಗ್ಗಿಡಾರೇ
ಕೊರೈರೆಗ್ ತೀರ್ನಾರ್ ಸಾಪೊನು ನಮನ್ ಬುಡಯೆರ್‌ಲ ||

12

ಗೇನೊ ದಿಸ್ವಿಡ್ ತೂಪುನಾ ಸಹ-
ದೇವೆ ಬುಕ್ಕೊಲ ಪನ್ನೆ ಈ ಪಲೊ
ಆಪುನೆನೆ ಮರಟೊಂಜೆ ಒರ್ಸೊಡು ಒಂಜಿ ತಿಕ್ಕುನವು ||
ಆ ರುಸಿಯೆ ಕೈ ನೀರ್ದ್ ಬಗ್ಗಿದ
ಯೋಗೊಡುಪ್ಪುನಗಪಗ ಕೈಕೇ
ಬೂರುದಾನಗ ಐನ್ ಪಟ್ವೆದ್ ತಿನುವೆರಾಸ್ರಮೊಡು||

13

ಇತ್ತೆ ದೇವೆರೆ ದ್ಯಾನೊಡಿತ್ತದ್
ಕಣ್ಣೆ ಬುಡ್ಡಗ ಪಂದ್ ತೂಯೆರೆ
ತಿಕ್ಕಜಿಡ ನಮೊ ಪೊತ್ತುದರ್ಲುವೊ ಪನ್ನಿ ಪಾತೆರೊನು||
ಧರ್ಮನಂದನೆ ಕೇನ್ದ ಪೋಡಿಯೆ
ಮೆಗ್ಗನಕಲೆನ್ ಕೂಡ್ಡು ಮರತಡೆ
ಬತ್ತನಾಯೆನೆ ತೂಯೆ ಬಾನೊಗು ತಾಂಟಿ ಮರನೊಲು ||

14

ಪೋಡಿಗಡೆಲಾ ಧರ್ಮನಂದನೆ
ಮಾತರುಸಿಕುಲೆ ಮೋನೆ ತೂವೊಂ-
ದಾಯೆ ಪನ್ನೆನೆ ಎಂಕ್ಲೆ ಪಾಪೊದ ಪಲೊಟು ತೋಜಿನೆನ್ ||
ಬೀಮೆ ಕೊಯ್ಯೆನೆ ಕಣ್ಣೆರೆಂಕ್ಲೆಗ್
ಸಾಪೊ ಕೊರ್ದೆರೆ ಪನ್ದ ಬುಲ್ಪುನ
ರಾಜ ಧರ್ಮಜಗಲ್ಪ ದೊಮ್ಮೆರ್ ಸಾದಿ ತೋಜಯೆರ್ ||

15

ನಿಕ್ಲೆನೇಪೊಲ ಕಾಪುನಾಯೆನೆ
ಮುರಹರೆನೆ ಪರಮಾತ್ಮೆ ಆಯನ
ಜಪೊನು ಮಲ್ಪುಲ ಬೇಕೊ ಸಮಯೊನು ಕಳೆವಡಯ ನನಲ ||
ಮುನಿನ ಪಾತೆರೊ ಕೇನ್ದ ಧರ್ಮಜೆ
ಪರಮ ಪಾವನ ಮೂರ್ತಿ ಸಿರಿಹರಿ
ಕರುಣೆಡೀಯೇ ಮಲ್ಪುರಚ್ಚನೆ ಹರಿಯೆ ಗೋವಿಂದ ||

16

ಆನಿ ದ್ರಾಪದಿ ಮಾನೊ ಕಾತ್ನ
ಈಯೆ ಎಂಕ್ಲೆನ ಪೆರಣೊ ಕಾಪುಲ
ಸ್ವಾಮಿ ಪಂದ್ ಬಗ್ಗಿ ಬಾವೊಡು ಜಪೊನು ಮಲ್ತೊಂಡೆ ||
ಆತೆನಾ ಸಮಯೊಡುಲ ಕ್ರಿಷ್ಟೆನೆ
ಬಾಮೆನೊಟ್ಟುಗ್ ಕುಸಲ್ಡುಪ್ಪುನ-
ಗಾಪಗನೆ ತನ ಗೇನೊ ದಿಸ್ವಿಗ್ ತೆರಿದ್ ಧರ್ಮಜನ ||

17

ಜಪೊಕು ಒಲಿಯೊಂದಾಯೆ ಪಿದಡ್ಡದ್
ಮನೊತ ವೇಗೊಡು ಬತ್ತದುಂತಿಯೆ

ಕರುಣಸಾಗರ ಮೂರ್ತಿ ಹರಿಗೋವಿಂದೆ ಶ್ರೀ ಕ್ರಿಷ್ಟೆ ||
ನೆನೆತಿ ಸಾತ್‌ಗ್ ಬತ್ತೆನೇ ನರ-
ಹರಿಯೆ ಕರುಣಾಕರೆನೆ ಪಂದ್ಡದ್
ಮುರಹರನ ಕಾರ್ಗಡ್ಡು ಬೂರೈರ್ ಪಾಂಡು ನಂದನೆರ್ ||

18

ಲಕ್ಕದುಂತಯೆ ಕ್ರಿಷ್ಟೆ ಧರ್ಮಜ-
ನಲ್ಲ ಬೀಮನ್ ಪಾರ್ತ ನಕುಲನ್
ಬುಕ್ಕೊಲಾ ಸಹದೇವ ದ್ರಾಪದಿ ಮಾತ ಮುನಿಕುಲೆನ್ ||
ಮುಗುರು ತೆಲಿಕೆಡ್ ಬೆರಣೆರೆನ್ ದೌ
ಮೈರೆನ್ ರುಸಿಕುಲೆನಾಯೆ ತೂದುಲ
ಎದುರುಡಿತ್ತಾನ ಮಲ್ಲ ಜಂಬೂ ಪಲೊನು ತೂವೊಂಡೆ ||

19

ಕಾಲೊ ಕಸ್ತೊನೆ ಆಂಡೆ ಬೀಮನ
ಜೋಕುಲಾಟಿಗಿಡಿತ್ತೆ ಕಣ್ಣೆರೆ
ಸಾಪೊಡಲ್‌ದ್ ಪೊತ್ಯೆರಾಂಡೇ ನಿಕ್‌ಲ್ ಮಾತೆರ್ಲ ||
ಈ ಪಲೊನು ಸರಿಟ್ಟಿನ ತೊಟ್ಟುಗು
ಸೀದ ಕೊಲ್ಪುವಿ ಕುಸೆಲ್ ಉಂಡುಯೆ
ಪಾಂಡವೆರ್ ಪನಿ ನಿಕ್‌ಲ್ ನಿಕ್‌ಲೆನ ಧರ್ಮದಾಚಾರೊ ||

|| ಶ್ರೀ ಕ್ರಿಷ್ಟೆ ಜಂಬೂ ಪಲೊನು ಐನ ತೊಟ್ಟುಗೇ ತಿಕ್ಕವುನ ಕೆಣಿ ಮಲ್ತೆ ||

ಧರ್ಮನಂದನೆ ಕ್ರಿಷ್ಟ ಪಾತೆರೊ-
ಡಲ್ಪ ಎದುರುಡು ಪಲೊನು ದೀಡ್‌ದ್
ತನ್ನ ಕೈ ಮುಗಿಯೊಂದು ಪನ್ನೆನೆ ಮಲ್ಲ ಗೋಸಣೆಡ್ ||
ಎನ್ನೊ ದಿಕ್ಕಲೆ ಪಾಲಕೆರ್ಲಾ
ಮಿತ್ತಡಿತ್ತಾನ ಸೂರ್ಯ ಚಂದ್ರೆರ್
ರಕ್ಕಸೆರೆ ನಿಜೊ ವೈರಿ ಕ್ರಿಷ್ಟೆನೆ ಕೇನಿ ಪನ್ನುನೆನ್ ||

1

ಪರೆರೆ ಬುಡೆದಿಯೆ ಅಪ್ಪೆ ಅನ್ನೆರೆ
ಬದ್‌ಕ್ ಮಣ್ಣೆಗ್ ಸಮಾನೆ ಲೋಕೊದ
ನಮುನೆ ನಮುನೆದ ಜೀವೊರಾಸಿಲೆ ಬೇನೆಗನ್ನಾತ್ಮೊ ||
ಮರುಗುನವೆ ನಿಜೊ ಸತ್ಯೊ ಎನ್ನವೆ
ಪನ್‌ಪಿ ಸೊರೊಕಾ ಪಂದ್ ಮಿತ್ತಗ್
ಸರೊನೆ ಏರ್‌ನ ತೂದು ಕ್ರಿಷ್ಟೆನೆ ಪಂಡೆ ಬೀಮಡಲ ||

2

ಜೂವೊ ಇತ್ತೆನೆ ಪೋಂಡಲಾ ಎನ
ಮಾನೊ ಮಲ್ಲೆನೆ ಎಂಕ್ ಪೆರಣೊನೆ
ದಾಲ ಸಾಸಿತೊ ಅತ್ತ ಆತ್ಮೊದ ಮಾನೊ ಸಾಸಿತೊನೆ ||
ಈತ್ ಪನ್ನಗ ಪಲೊನೆ ಮಿತ್ತಗ್
ಏರುನೆನ್ ತೂವೊಂದು ಮಾತೆರ್
ಆಚಿರಾಯೆರ್ ಅಪಗ ಪಾರ್ತಗ್ ಹರಿಯೆ ಕಣ್ಣೊತ್ತೆ ||

3

ಒಣಸದಾಸೆನೆ ಬೆರಣ ಜಾತಿಗ್
ತೆಗಲೆ ಪಂತಿದ ಆಸೆ ಕೈಕಂ-
ಜಿಲೆಗ್ ಪತಿರುತೊತಕಲ್ ಕಂಡನಿ ಮೋನೆ ತೂನಗನೆ ||
ಆಪುನವೆ ಸಂತೋಸುದಂಚಿನೆ
ಕಾಳಗೊದ ಕಳ ತೂನಗಂಕೇ
ಆವು ಪಂಡ್ ಪನ್ನಗರ್ಜನೆ ಪಂದ್ ಮಿತ್ತೇಂಡ್ ||

4

ಧರ್ಮೊನುಲ ಗೆಲ್ಲೆರೆಗದರ್ಮೊಗು
ಸತ್ಯೋನೇ ಗೆಲ್ಲೆರೆಗ್ ಸುಳ್ಳುಗು
ಗೆಲ್ಲಿಯೆರೆ ಸಾದ್ಯೊಂಡೊ ಸಮೆನ್ಲ ಕೋಪೋಗೇಪೊಗುಲ ||
ಕರ್ಮೊ ಕುರೆ ದೆಕ್ಕುನವೆ ಕ್ರಿಷ್ಟನ್
ದುಸ್ಪ ರಕ್ಕಸೆರೆಂಚಿ ಗೆಲ್ಪುನೆ
ಪನ್ದ ನಕುಲೆನೆ ಮಿತ್ತ ತೂನಗ ಪಂದ್ ಏಂಡವುಲು ||

5

ಸತ್ಯೊ ಜ್ಞಾನೊನೆ ಅಪ್ಪೆನಮ್ಮೆಲ
ಧರ್ಮೊ ಬೆರಿಪುಟ್ಲನಯೆ ದಯೆನೇ
ಮಿತ್ತೆ ಸಾಂತಿಯೆ ಬುಡೆದಿ ಸಮೆತಯೆ ಮಗನೆ ಬಂದುಗುಳು ||
ಆಜಿ ಮಾತೊನೆ ಪನ್ದಲಾ ಸಹ-
ದೇವೆ ತೂನಗ ಪಂದ್ ಮಿತ್ತಗ್
ಏಂಡ್ ಕ್ರಿಷ್ಟನೆ ದ್ರೋಪದಿನವೇ ಮೋನೆ ತೂನಗನೆ ||

6

ಪೊಣ್ಣ ಕಣ್ಣೆಗ್ ಪೊರ್ಲುಧಾಣುಲು
ಅಮ್ಮೆ ಆವಡ್ ಪಲೆಯೆ ಆವಡ್
ಅತ್ತ ಮಗನೇ ತೋಜಿನಾಪಗ ಕಾಮೊ ಕೆದುರುನೆನೆ ||
ಪನ್ನಿ ಪಾತೆರೊ ಕೇನ್ದಲಾನಗ
ತಿರ್ತ್ ಜಾರ್ ಪಂದ್ ಉಂತ್
ಕ್ರಿಷ್ಟೆ ತೂದೇ ಪಂಡನಾಲೆಡ ಸತ್ಯೊ ಪನ್ಲಂದ್ ||

7

ಸಿವನ ವರೊಟ್ಟಿನೆಂಕ್ ಕಂಡನಿ-
ನಕ್ಲ್ ಆಯೆರ್ ಎನ್ನ ಮನಸ್ಗ್

ನನೊರಿ ಸೇರ್ ಪಂದ್ ಆಜಿ ಆಯ್ವು ಸತ್ಯೊ ಪನ್ನೇನ್ ||
ಪೊಣ್ಣ ಪೊಂಜೊವು ಬೇತೆ ಆಣಡ
ಮರ್ಲ್ಯಯಲ್ ಅಂದಾಂಡ ಆಲೆಗ್
ಮರ್ಮದಿಯೆ ಇದ್ಯತ್ತೊ ಪನ್ನಗ ಪಂದ್ ಏರ್ವಾಂಡ್ ||

8

ತೊಟ್ಟುಡೇ ನೇಲೊಂದು ಇತ್ತನ
ಕಣ್ಣೆರೆನ ಮರಟಿತ್ತಿ ಪಂದ್ ಪನ್
ದೊಮ್ಮೆರ್ಲ ತೂವೊಂದು ಪಂಡೆರ್ ಧರ್ಮನಂದನಡ ||
ನಿಕ್ಕ ಕ್ರಿಷ್ಟನೆ ಸಾಯೊಗುಲ್ಲೆನೆ
ಪನ್ದ ಸಂತೊಸುಡಾರ್ ಮಾದವ-
ಗಡ್ಡೊ ಬೂರೈರ್ ಮಾತೆರೊಟ್ಟುಗು ಬತ್ತೆರಾಸ್ರಮೊಗು ||

9

ಕಣ್ಣ ಮುನಿ ಕಣ್ಣುಡುದು ಸಿವನವೆ
ಬಗ್ಗಿಡಂಗೈ ಪತ್ತನಾಪಗ
ಮಲ್ಲ ಮೈಮೆದ ಪಂದ್ ಕೈಕೇ ಬೂರ್ವಲಾಂಡಪಗ ||
ಗೇನೊ ದಿಸ್ಪಿಡ್ ಕ್ರಿಷ್ಟ ಮಯಿಮೆನ್
ಪೂರ ತೆರಿಯೊಂದಾರ್ ಬತ್ತೆರ್
ಬೂರಿ ಪಂದ್ ಪುಗೇಲ್ ಗೇರ್ವದ್ ಅಕ್ಲೆ ಕೈತಡೆಗ್ ||

10

ಆ ಮುನಿಯೆ ಕನತ್ನವೆ ಪಂದ್ ಪನ್
ಸ್ವಾಮಿ ಕ್ರಿಷ್ಟನ ಎದುರು ದೀಡ್ ಪಂದ್
ಕಾರ್ಗಡ್ಡೊನೆ ಬೂರ್ವ ಪಂಡೆರ್ ಎನ್ನ ಕಾಣೆಗೆನ್ ||
ಮದನನಮ್ಮೆನೆ ಗೆತೊನು ಪಂದ್ ಪನ್
ಸುತಿನ ಮಲ್ಪುನ ರುಸಿನ್ ಲಕ್ಕದ್
ಮುಗುರು ತೆಲಿಕೆಡ್ ಪಂಡೆ ಧರ್ಮಜ ಮೋನೆ ತೂವೊಂದು ||

11

ಈ ಪಲೊನು ಮೂರ್ಧಿಯೆ ಪಟ್ಟೆಲ
ಮಾತೆರೆಗ್ ಪನ್ನಗನೆ ಧರ್ಮಜೆ
ಮೂರ್ಧ ರುಸಿಕುಲೆ ಕೈಕ್ ಬೆರಣೆರೆಗಲ್ಲ ಪಟ್ಟಿಯೆನೆ||
ದ್ರೋಪದಿಗ್ ತನ ಮೆಗ್ಯನಕ್ಲೆಗ್
ಪೂರ ಕೂರ್ವಲ ಕ್ರಿಷ್ಟ ಸ್ವಾಮಿಗ್
ತಾನ್ ಲಿಪಿತೊ ಮಲ್ತದೊರಿನವೆ ಒಂಜಿ ತುಂಡುನುಲ ||

12

ತಾನೆ ತಿಂದ್ ಈ ಪಲಾರೊನು
ಯೋಗಿ ರುಸಿ ಮಲ್ಪುಯೆರ್ ಪಂದ್ ಪನ್
ಏತೆಲಾ ಪುಗರಿಯೆನೆ ಕಣ್ಣೆರ್ ಪೋಪೆ ಪಂಡೊಂದು ||
ವಾಸುದೇವಗ್ ಅಡ್ಡೊ ಬೂರುದು
ಆಸ್ರಮೊಗು ಪೋನಗನೆ ಧರ್ಮಜೆ
ಕಾರ್ ಪತ್ತಿಯೆನೆಂಕ್ ತಪ್ಪುಗು ಮಾಪಿ ಕೊರ್ಲೆಂದ್ ||

13

ಹರಿಯೆ ಪ್ರೀತಿಡ್ ಬಾವನಕಲೆನ
ಮಯಿನ್ ಪೂಜಿದ್ ದ್ರುಪದ ಮಗಲೆಗ್
ಮುನಿಕುಲೆಗ್ ಮಾತೆರೆಗ್ ದೈರೊದ ಪಾತೆರೊನು ಪನ್ದ್||
ನಿಕಲೆಗ್ಡೆನೆ ಆವಡ್‌ಂದ್‌ದ್
ಪಿಡಿಯೆನೆ ದ್ವಾರಕೆಗ್ ಬಗ್ಗೆರೆ
ಬೆರಿಯೆ ಕಾತೊಂದುಪ್ಪಿ ಸ್ವಾಮಿಯೆ ಕ್ರಿಷ್ಟೆ ಪರಮಾತ್ಮೆ ||

14

ನೆನೆತಿ ಸಾತ್‌ಗ್ ದಾರುಕನ ರತೊ
ತಯರ್‌ಡುಂತ್‌ನ ತೂದು ಪಾಂಡವ-
ನಕ್‌ಲ್ ಎಡತ್‌ಡ್ ಬಲತ್ ಪಿರವುಡೆ ರುಸಿಕುಲೊಟ್ಟಾದ್ ||
ವಾಸುದೇವನ್ ಕಡಪುಡುದುಲಾ
ಮಾತೆರೊಟ್ಟಿಗೆ ಒಂತೆ ಸಾದಿಗ್
ಪೋದು ಪಿರ ತಿರ್ಗಿಯೆರ್ ನಾರಾಯಿಣನ್ ಪುಗರೊಂದು ||

|| ಪಾಂಡವೆರೆ ಕೈತಡೆಗ್ ವೇದ ವ್ಯಾಸೆರ್ ಬತ್ತೆರ್ ||

ಕಾಮ್ಯಕೊದ ಬನೊಟಿತ್ತಿ ಪಾಂಡವ-
ನಾಕ್‌ಲೇತ್‌ಲ ಕಸ್ತೊನುಂಡುದು
ಕಾಡ್ಡ್ ತಿರ್ಗಿದ್ ದಿನೊನು ಕಳೆಯೆರ್ ಕಾರ್ಡ್ ಬಚ್ಚೆಲ್‌ಡ್ ||
ದ್ರೋಪದಿಲ ಅಕ್‌ಲೊಟ್ಟುಗಿತ್ತನ
ಯೋಗಿ ರುಸಿ ಬ್ರಾಣೆರ್‌ಲ ಕಾಡ್‌ಡ್
ನೀರ್ಡ್ ಬರಿಟೀ ನಿತ್ಯ ಕರ್ಮೊನು ಪೂರ ಮಲ್ಪೆದೆರ್ ||

1

ಮೂಲು ಇತ್ತನ ಪಲೊತ ವಸ್ತುಲು
ಪೂರ ಮುಗಿದ್‌ಲ ಆಂಡ್ ನಮೊ ನನ
ಬೇತೆ ಕಾಡ್‌ಗ್ ಪೋಪುನೆಡ್ಡೆಂದಕ್‌ಲ್ ಗ್ರೇಯಿತೆರ್ ||
ಆ ಯುದ್ಧಿಸ್ಪಿರೆ ಪಂಡೆ ಪಾರ್ತಡ್
ಯೋಗಿಲೆನ್ ಬ್ರಾಣೆರೆನ್ ಲೆತೊನುದು
ಪೋಯಿ ನಮೊ ಬೇತೊಂಜಿ ಕಾಡ್‌ಗ್ ಪನ್ದ್ ಪಿಡಿಯೆರ್ ||

2

ಅಕ್‌ಲ್ ಮಾತೆರ್ ದೈತೊ ಬನೊ ಪ-
ನ್ನುನವೆ ಕಾಡ್‌ಗ್ ಬತ್ತೆದುಂತ್ಯೆರ್
ಅರಸು ಧರ್ಮಜೆ ಗುಟ್ಟುಡೊರ್ಮನ್ ಹಸ್ತಿನಾವತಿಗ್ ||
ಕಡಪುಡ್‌ನ ಆ ದೂತೆ ಬತ್ತೆದ್
ಕುರುಪತಿನ ದರ್ಬಾರ್ ಮಾತೆನ್
ಇವರೊ ಇವರಾದಾಲೆ ಪನ್ನಗ ಬೀಮೆನಬ್ಬರೊಡು ||

3

ಕುರುಡ ಬಾಲೆಲೆ ಮಂಡೆ ದರೆರೆ
ಒದಗುನವೆ ಈ ತಂದೆಲ್‌ಂದ್‌ದ್

ಗದನ್ ತಿರ್ಗಿದ್ ಪಂಡೆ ದ್ರೌಪದಿ ಮೋನೆ ತೂವೊಂದು ||
ಕಾಡ್ಡ್ ಬೊಬ್ಬೆನ್ ಏರ್‌ಕೇನ್ವೆರ್
ಬೀಮೆ ದಾಯೆಗ್ ಗೌಜಿ ಲಕ್ಕವ
ಕಾಪುನೆನೆ ನಮ ಸತ್ಯೊ ನಮ್ಮನ್ ಪಂಡೆ ಧರ್ಮಜೆನೆ ||

4

ಧರ್ಮನಂದನೆ ಬೀಮನುಂತದ್
ಪನ್ನೆ ದ್ರೋಪದಿಡಪಗ ನಿನ್ನವೆ
ದುಕ್ಕೊಡಲುನ ಬಂಜಿ ಸೂಟೀ ದುಸ್ಪ ಕೌರವೆರ್ ||
ಬಸ್ತೊ ಆವೆರ್ ಕಣ್ಣ ನೀರ್‌ದ
ಒಯ್ಯಾಡ್‌ಕಲೆನ ಮಾತ ಐಸುರೊ
ಬೊಲ್ಲೊಗೇ ಪೋವುಂದು ಪಂಡೆನೆ ದವುಡೆನೀಸೊಂದು ||

5

ಆತ್ ಪೊರ್ತುಗು ದಿವ್ಯೊ ತೇಜಿಡ್
ಬ್ರಾಣೆರೆನ ಸಿರಿ ಕಂಟನಾಲಿಯೊ
ದೇವ ಬ್ರಹ್ಮನ ಮೋನೆನೋ ಹರಿ ಕಣ್ಣ ಮೆಣ್ಣನೆನೊ ||
ನೂದು ಯಾಗೊಲೆನೊಂಜಿ ರೂಪೊನೊ
ಸಾಸ್ತೊ ಕೋಟಿದ ಸಿರಿನ ಭವನೊನೊ
ಆಡೆಗ್‌ತ್ತನೆ ಪನ್ನಿ ನಮುನೆಡ್ ವ್ಯಾಸ ಮುನಿರಾಯೆ ||

6

ಬತ್ತನೆನ್ ತೂವೊಂದು ಮುನಿಕುಲು
ಧರ್ಮಜನ್ ಕೂಟೊಂದು ಎದುರುಗು
ಬತ್ತದಾರೆನ ಪಾದೊಗಡೊನೆ ಬೂರು ಮತ್ತೆರ್ ||
ಪ್ರೀತಿ ಬಾವೊದ ಕಣ್ಣ ನೀರ್‌ಡ್
ರೋಮೊ ಕೊಕ್ಕೆರ್‌ದಕ್‌ಲ್ ಬಗ್ಗಿಡ್
ದೇವ ಮುನಿ ವ್ಯಾಸೆರೆನ್ ಕೊನೆತೆರ್ ವೇದೊ ಗೋಸಣೆಡ್ ||

7

ಮಾತ ರುಸಿಕುಲು ಪುದರ್ ಗೋತ್ತೊನು
ಆರೆಡನೆ ಪಂಡೊಂದು ಬಗ್ಗಿಡ್
ಪಾದೊ ಪೂಜೆನ್ ಮಲ್ತನೆನ್ ಕೈಕೊಂಡೆರಾ ಮುನಿಯೆ ||
ಕಾರ್ಗ್ ಬೂರ್ಡೆ ಬುಲ್ವಿ ದ್ರೌಪದಿ
ಮೋನೆ ತೂದುಲ ಪಂಡೆರಾಲೆಡ
ಬೇಕೊ ನಿನ್ನವೆ ಇಸ್ತೊ ಸಿದ್ಧಿಯೆ ಆವು ಮಗಲೆಂದ್ ||

8

ಇರೆತ ಮಾಡ್‌ದ ಬುಡರೊಗಾರೆನ್
ಉಲಯಿ ಪೊಗ್ಗದಾಲಾ ಪಲಾಸೊದ
ಇರೆಟ್ ನೀರ್‌ನ್ ಕಾರ್ ದೆಕ್ಕೆರೆ ಕೊರೈ ಧರ್ಮಜೆನೆ ||
ಪೀಟೊ ಮಲ್ತೆನೆ ದರ್ಬೆನಾಸ್‌ದ್
ಆರೆನ್ನೆಟೀ ಕುಲ್ಲದಾಯೆನೆ
ಯಾನ್ ಬಡೆಪತ್‌ಡಿತ್ತೆ ಮಲ್ಪುನ ಪೂಜೆ ಕೈಕೊನುಲೆ ||

9

ಪನ್ನಗನೆ ಈ ಕೊರ್ನ ನೀರೇ
ಸರೊ ಸೀರ್ತೊನೆ ಆಂಡ್ ಧರ್ಮಜ
ದರ್ಬೆದವೆ ಈ ಪೀಟೊ ನಿಕ್ಕೇ ರಾಜ್ಯೊ ಸ್ತಿರೊ ಮಲ್ತು ||
ಅರಸು ಕೇನ್ ಕೆಲಿಂಜಿ ಮಲ್ತನ
ನೆಯಿನ್ ಬುಕ್ಕೊರಿದೆಪ್ಪುನಂಚಿನೆ
ಕುರುಪತಿನ ಸೌಬಾಗ್ಯೊ ಮಾತಲ ಪೋವು ಪರಜನೊಕು ||

10

ಜೂವೊ ಪೋವಡ್ ಮೆಗ್ಯನಾಕ್‌ಲ್
ಕಾದಡೆನ್ನಡ ಬುಡೆದಿ ಕೋಪೊಡು
ಪೋವಡಿತ್ತೆನೆ ಆವಡೆಂಕ್ಲೆನ ರಾಜ್ಯೊ ಕೌರವಗ್ ||
ಪೋಪುನಾಪುನ ಗೊಡವೆ ಎಂಕ್‌ಲ
ದಾಲ ಇದ್ದಿಂದಿತ್ತೆ ಎನ್ನವೆ
ನೀತಿ ಹಾಲಾವಂದ್‌ನಂಚಿನೆ ಈರ್ ಕಾತೊನೊಡು ||

11

ನಿನ್ನ ಸತ್ಯೊಗು ಬರ್ವೊ ಕುಂದೆಲ್
ಒರೊ ಪದಿಮೂಜವದಿ ಕರಿನಗ
ನಿಕ್ಲೆನಾ ಪಗೆತಕ್‌ಲೆಗಾವುಯ ಬುಕ್ಕೊ ಯಮ ಲೋಕೊ||
ಮರ್ದೆರಾಕ್‌ಲ್ ರಾಜ್ಯೊದಾಸೆಡ್
ಕಸ್ಲೊ ಕಡೊಕೊರ್ನೆತ್ತೊ ನಿಕ್‌ಲೆಗ್
ಬಡ್ಡಿ ಕೂಡ್ಲದ್ ಸಾಲೊ ಸಂದಲೆ ಪಂಡೆರಾ ಮುನಿಯೆ ||

12

ಸ್ವಾಮಿ ಮುಕುಲೆಗ್ ಕಸ್ಲೊ ಎಂಚಿನ
ವಾಸುದೇವೆನೆ ಸಮಯೊಗೊದಗುವೆ
ಈರ್ ಉಲ್ಲರ್ ಆಪಗಾಪಗ ಸಾದಿತೋಜಯೆರೆ ||
ಪಾಂಡು ಬಾಲ್ಗೆಗ್ ನಿಕ್‌ಲೆನಿರ್ದೆರೆ
ಪ್ರೀತಿಡೆಂಚಿನ ಕಸ್ಲೊ ಪಂಡರ್
ಆ ವಿಬಾಂಡಕೆ ಸೌನಕಾದಿಲು ವೇದವ್ಯಾಸೆರೆಡ ||

13

ದ್ರುಪದ ಮಗಲೆನ ಕೆಬಿಟ್ ದೈರೊದ
ಅಣುನು ಕೊರ್ದುಲ ಆಲೆ ಕಣ್ಣೊದ
ಒಸರ್‌ನಾಜದ್ ಧರ್ಮನಂದನನುಲಯಿ ಲೆತ್ತೊಂದು ||
ಕೆಬಿಟ್ ಪಂಡರ್ ಗುಟ್ಟುಡೇ ಸರಿ
ಸಿವನ್ ಮೆಚ್ಚವಿ ಮಂತ್ರೊದುಚ್ಚರೊ
ಸರಿಯೊದಂಗೊದ ಮುದ್ರೆ ಮಾತಲ ತೆರಿಪದಾಯಡನೆ ||

14

ಅರಸುಲೆನವೇ ದುಕ್ಕೊ ನಾಸೊಗು
ಪಗತ ಬಲೊ ಪೊಡಿಮಲ್ತೆರುಂದೇ
ಪರಮ ಮಂತ್ರೊನೆ ನಿಕ್ಕ್ ಪುರುಸಾರ್ತೊದವೆ ಸಾದನೆಗ್
ಈ ಪವಿತ್ರೊದ ಮಂತ್ರೊನೀಯೇ
ಪಾರ್ತಗೇ ಕಲ್ಪುಲ ಗುಟ್ಟುಡು
ಯೋಗೋ ಸಿದ್ಧಿಗ್ ನಿಕ್‌ಲೆಗುಂದೇ ಮಲ್ಲವಾದಾರೊ ||

15

ಪಾರ್ತೆ ಪೋವಡ್ ಇಂದ್ರ ಕೀಲಕೊ-
ದಾಡೆ ಈ ಮಂತ್ರೊನುಲ ಜಪಿತ್‌ದ್
ಆ ಸದಾಸಿವ ತಪಸ್ ಮಲ್ತದ್ ಆಯನೊಲಿಸವಡ್ ||
ಈಯೆ ಪಗೆಕುಲೆನಿತ್ತೆ ದೂರುದು
ದಾನೆ ಪ್ರೇಜನೊ ಪನ್ನ ವಿಸ್ಲೊಡು
ಆದಿ ಸಗ್ತಿಯೆ ಸಿವನೆ ಆಯೆನೆ ಕರುಣೆ ದೀಡುವೆಯೆ ||

16

ಪಾಂಡವೆರೆನವೆ ತರೆಕ್ ಕೈದೀ-
ಡ್ವಾರ್ ದ್ರೌಪದಿನಪಗ ಲೆತ್ತ್‌ದ್
ಈಯೆ ಬೇಜರೊ ಬುಡ್ಲ ನಿಕ್ಕೇ ಎಡ್ಲೆ ಕಾಲೊಂಡು ||
ಆಲೆ ತರೆನೀಸೊಂದು ಪಂಡ್‌ದ್
ಬ್ರಾಣೆರೆನ್ ರುಸಿಕುಲೆನ್ ಮನ್ನಿತ್-
ದಾಪಗನೆ ಪಿದಡಿಯೆರ್ ವ್ಯಾಸೆರ್ ತನ್ನವಾಸ್ತಮೊಗು ||

ರಡ್ಡನೆ ಸಂದಿ

|| ಅರ್ಜುನೆ ತಪಸ್‌ಗ್ ಪೋಯೆ ||

1

ವೇದ ವ್ಯಾಸೆರ್ ಪೋಯಿ ಸಾತ್‌ಗ್
ಪಾರ್ತನೇ ಕೈ ತಡೆಗ್ ಲೆತ್ತ್‌ದ್
ಆ ಮುನಿನ ಸಿರಿ ಮಂತ್ರೊ ಕಲ್ಪಯೆ ಧರ್ಮನಂದನೆನೆ ||
ಪೋಲ ಈ ಕೈಲಾಸೊ ಬರಿತವೆ
ಕಾಡ್‌ದಾ ನಡುಟಿಂದ್ರ ಕೀಲಕೊ-
ದಾಡೆ ಸಿವನವೆ ತಪಸ್ ಮಲ್ತೆರೆಗಾಪಿ ಜಾಗೆದಡೆ ||

ಅವುಲು ತಪಸ್‌ನ್ ಮಲ್ತು ಪರತಿನ
ಪರವನೇ ಸಾಸ್ಲೊಲೆನ ಬಾಯಿಗ್
ಪನಿಯೆರೆಗ್ ತಿರಂದ್‌ನಾಯನನಾದಿ ದೈವೊನುಲ ||
ಬ್ರಹ್ಮೆರಿಂದ್ರೆರೆ ಸಗ್ತಿ ಗಣ್ಯೊನೊ
ಪನ್ನುನಕ್‌ಲೆನ ಗರ್ವೊನುಂತವಿ
ಬಗ್ಗೆರೆನ್ನಕ್‌ಲ್‌ಂದ್ ಪನ್ನುನ ದೇವ ಸಂಕರನ್ ||

2

ನಿನ್ನ ತಪಸ್‌ನ್ ಚಂದ್ರಸೇಕರೆ
ಮೆಚ್ಚಿದೊಲಿಯಡ್ ಮಂತ್ರೊ ಬಾಣೊಲೆ
ಸಿದ್ದಿಯಾವಡ್ ನಿಕ್ಕ್ ಸಿವನವೆ ಕರುಣೆ ತಿಕ್ಕೊನಡ್ ||
ತಪಸ್‌ನುಂತಯೆರಾದ್ ಬರ್ವರ್
ಸುರೆರೆ ಸೂಳೆಲು ಮರ್ದಡಕಲೆಡ
ಮನಸ್ ಗಟ್ಟಿಡ್ ಕಾಮ ವೈರಿನ ಪಾದೊ ನೆನೆತೊನುಲ ||

3

ತಪಸ್ ಮಲ್ತೆರೆ ಪೋಡ್ಯಡಯ ಈ
ಸಿವನ ಸಿದ್ದಿದ ಮಂತ್ರೊ ಮರಪಡ
ಹರಿನ್ ಹೃದಯೊಡು ತಪ್ಪವಡ ನನ ಪೋಲ ಬನೊತಾಡೆ ||
ಆ ಸದಾಸಿವೆ ನಿಕ್ಕ್ ಕರುಣೆಡ್
ಪಾಸುಪತೊ ಬಾಣೊನುಲ ಕೊರ್ನಗ
ವಾಯು ಅಗ್ನಿಯೆ ವರುಣೆ ಇಂದ್ರೆಲ ಪನಡ್ ಮಂಗಲೊನು ||

4

ಆಯೆ ಪಂಡ್‌ನ ಮಾತ ಕೇಂಡ್‌ದ್
ಪಾರ್ತೆ ಕಾರ್‌ಗ್ ಅಡ್ಲೊ ಬೂರಿಯೆ
ಬೀಮನವೆ ಕಾರ್ಪತ್ಯೆ ಮಾದ್ರಿನ ಬಾಲೆಲಿರ್ದೆರೆನ ||
ಮೋನೆ ಮುಂಡೊಗು ಮುತ್ರೊ ಕೊರ್ದುಲ
ಯೋಗಿ ಬೆರಣೆರೆ ಎಡ್ಲೆ ಪಾತೆರೊ
ಕೇನ್ದ ಮಂತ್ರೊದ ಅರಿನ್ ತರೆಟೇ ಬಗ್ಗಿಡುಂತಾಯೆ ||

5

ದೋಪದಿಡ ಪನ್ನಗನೆ ಪನ್ನಲ್
ಈರ್ ನೆನಪಡೆ ಸೈರೊದಾ ಸುಕೊ
ಮೋಸೊಗಾರರೆ ಸಿರಿನ್ ನೆನೆಪುಲೆ ಪಲಯ ಪಾತೆರೊನು ||
ಯಾನ್ ಪಡೆಯಿನ ಕಸ್ತೊ ನೆನೆಪುಲೆ
ವೇದವ್ಯಾಸೆರೆ ಮಂತ್ರೊ ನೆನೆತ್‌ದ್
ಆ ಸಿವನ ಸಿರಿ ಪಾದೊ ತೂಲೆಯೆ ಪಂಡಲಾ ದೇವಿ ||

6

ಹರನ ತಪಸ್‌ದ ಸಿದ್ದಿಡೇನೇ
ಪಡೆವೆ ಪಾಸುಪತಾಸ್ತೊ ಮಾತೆನ್
ಪರಮ ಸಗ್ಗಿದ ಬಾಣೊ ಕೇನುವೆನಾ ಸದಾಸಿವಡ್||
ಆಯೆ ಕೊರ್ನವೆ ದಿವ್ಯೊ ಬಾಣೊಲೆ-
ಡೇನ್ ಕೆರ್ದೆನೆ ನಾಯಿಲಕಲೆನ್
ಈಯೆ ನಂಬುಲ ಪನ್ದ್ ದ್ರಾಪದಿ ಕುಜಲ್‌ನೀಸಿಯೆನೆ ||

7

ಮೂಡಿಗನ್ ತಿಕ್ಕಾದ್ ಪುಗೆಲ್‌ಡ್
ನೆಲ್ಪದುಂತದ್ ಕೈಟ್ ಬಿಲ್ಲ್‌ನ್
ಬಾಣೊ ಪತ್ತ್‌ದ್ ಚರ್ಮೊದೈತ್ತೊಡು ಪಿದಡುನಟ್ಟಣೆಡ್ ||

ದುಕ್ಕೊ ಸಂತೊಸು ರಡ್ಡ್ ಬಾವೊದ
ದಿಸ್ವಿಡಾಯೆನೆ ಪಿದಡ್‌ದುಂತಿಯೆ
ಸತ್ಯೊ ಗುಣೊ ಸೌಬಾಗ್ಯೊದಾ ಮಣಿ ಪಾರ್ತೆ ತಪಸ್‌ಗ್‌ಲ ||

8

ಉದಿತಿ ಸೂರ್ಯನ್ ತೂದು ಪಿದಡ್‌ನ-
ಗಪಗ ದತ್ತದ ಬರಿಟ್ ಬುಲ್ಪುನ
ಸಕುನೊ ಪಕ್ಕಿಲೆ ಸೊರೊನು ಕೇಂಡ್‌ದ್ ಪಾರ್ತೆ ಪೋನಗನೆ ||
ಕುಪುಳು ಸೇಲೆದ ನಡಕೆ ತೋಜದ್
ತರೆನ್ ಆಡದ್ ಜಿಂಕೆ ಎದುರುಡು
ಪುದನೆ ಕುಟ್ಟುನು ಪಾಡ್ಡ್ ನಾಯಿಲು ಕೊರೆತೊನೆಡತ್‌ಡ್‌ದ್ ||

9

ನಲಿಪಿ ಮೈರ್‌ನ್ ತೂದು ಸಕುನೊದ
ಪಲೊಟು ಕಾರ್ಯೊದ ಸಿದ್ದಿ ಕಂಡಿತೊ
ಒಲಿವೆನೀಸ್ವರೆ ಪನ್ದ್ ಪಾರ್ತೆನೆ ಸಂತೊಸಾವೊಂದು ||
ತಪಸ್ ಎನ್ನವು ಪೂರ್ತಿಯಾಂಡನೆ
ಪಗೆತಕಲೆ ಪೋಕಲೊನೆ ಮಾತಲ
ಸಿವನ ಇಚ್ಚೆನೆ ಪನ್ದ್ ನಡತೆನೆ ದುಂಬು ದುಂಬಾದ್ ||

10

ಬತ್ತ ಬತ್ತದ್ ಕರಿಯೆ ಬಾರತೊ
ಮಿತ್ತದವೆ ಸಿಮೊ ಗುಡ್ಡೆಗತ್ತಿಯೆ
ಅಲ್ಲ ಚಳಿ ಚಳಿಯಾಂಡ್‌ಲಾಯಗ್ ದುಂಬು ನಡತೊಂಡೆ ||
ಅಲ್ತಲಾ ಹರಿ ಬೂಮಿ ಕಡತ್‌ದ್
ಪೊರ್ಲ್ಲದವೆ ನಿಜೊ ಇಂದ್ರ ಕೀಲಕೊ
ಪನ್ನಿ ಕಾಡ್‌ಗ್ ಪಾರ್ತೆ ಸೇರ್‌ದ್ ಸುತ್ತ ತೂವೊಂಡೆ ||

11

ಕೋಗಿಲೆಲೆ ಸೊರೊ ಗಿಳಿಕುಲೆನ ನುಡಿ
ಬಾರಿ ರೆಂಕೆನ್ ಹಂಸೊ ಪಕ್ಕಿಲು
ಆಡವುನವೇ ಸವ್ವೊ ಮೈರುಲೆ ಬುಲ್ಪು ಕೆಬಿದಿಂಜ||
ಕುಟ್ಟು ಪಾಡುನ ಪುದಕುಲಿತ್ತೊನೆ
ಪುಸ್ತೊ ಪುಸ್ತೊಗು ರಾಪಿ ತುಂಬಿಲು
ಕಣ್ಣೆಗಾಂಜಿನಗಾಯೆ ಕಾಡ್‌ದ ಸಿರಿಕ್ ಮರ್ದಾಯೆ ||

12

ರಸೊನು ಕೊರ್ಪುನ ರುಚಿತ ಪಂದ್‌ರುಲು
ಮರಟ್ ದಿಂಜಿದ್ ಕುಕ್ಕು ಪೇರೊಳು
ತುಳುವ ಪೆಲಕಯಿ ಜಂಬು ನೇರೊಳು ಮಾತ ತೂವೊಂಡೆ ||
ಮರಕುಲೆನ ಪುಂಡುಡುದು ಬೂರ್‌ನ
ನಿರೆಲ್ ಸಂಪಾದಿತ್ತಿ ಜಾಗೆಡ್
ತಪಸ್ ಮಲ್ತ್‌ದ್ ಕಾರ್ಯೊ ಸಿದ್ದಿಯೆ ಆವು ಗ್ರೇಯ್ವುನಗ ||

13

ಮೂಲು ಉಂತುಲ ತಪಸ್‌ಗುಂದೇ
ಆಪಿ ಜಾಗೆನೆ ಎನ್ನೊ ಅಂಗೊದ
ಯೋಗೊಸಾದನೆ ಮಲ್ತದಾ ಸಿವ ರೂಪೊ ತೂಯೆರೆಗ್ |
ಏತೊ ರುಸಿಕುಲು ಬತ್ತದೀಡೆಗ್
ಈಸ್ವರನ್ ಮೆಚ್ಚಾದ್ ಪೋತೆರ್
ಈಯೆ ಮೆಚ್ಚಲ ಸಿವನ್ ಪಂಡೆರ್ ಬಾನೊದಾ ಸೊರೊಟು ||

14

ಬಾನೊಡಾಯಿನ ಸೊರೊನು ಕೇಂಡ್‌ದ್
ಆವು ತಪಸ್‌ಗ್ ಉಂದೆ ಜಾಗೆನೆ
ತಾನ್ ನೆನೆತ್‌ದ್ ಮಲ್ತೆ ನಿಚ್ಚೆಯೊ ತಪಸ್ ಮಲ್ತೆರೆಗ್ ||
ಆನಿದಾ ಮನದಾನಿ ಪುಲ್ಕಡ್
ಮೀದ್ ಮೆಯಿಮನೊ ಸುದ್ಲೊ ಮಲ್ತದ್
ಸೂರ್ಯಗರ್ಭೊನು ಕೊರ್ದು ಸುರೆರೆಗ್ ತಾನ್ ಕೈ ಮುಗಿಯೆ ||

15

ಮುಗುರು ಕಣ್ಣದ ನೋಟೊ ಮಿತ್ತಗ್
ದೆರ್ತ್ ಪತ್ತನ ತೋಳು ಕೈಕುಲೆ
ಮುಗಿದ್‌ಲಾ ಕೊಡಿ ಕಾರ್ಡ್ ಉಂತುದು ಬಿಮ್ಮೊ ಪಂದಾದ್ ||
ಬೆರಿಟ್ ಬಾಣೊದ ಚೀಲೊ ಸೊಂಟೊಡು
ತಳುವರ್ನ್ ತಿಕ್ಕಾದ್‌ಲಾಯೆನೆ
ಪುಗಲ್‌ಡಾಯುದೊ ದೀಡ್ಡ್ ತಪಸ್‌ನ್ ಮಲ್ತೆ ಸಾದನೆಡ್ ||

16

ಅಪಗ ಇಂದ್ರನೆ ಪಾರ್ತನೆದುರುಗು
ಬೆರಣ ಏಸೊಡು ಬತ್ತದಾಡೆಗ್
ಗುರುತೊ ತಿಕ್ಕಂದ್‌ನವೆ ನಮುನೆಡ್ ಪನ್ನೆನಾಯಡನೆ ||
ಮುತ್ತು ಬಂಗರ್ ಮಾಲೆ ಪದ್ಲೊಯಿ
ಚರ್ಮೊ ನಾರ್‌ದ ಕುಂಟು ತುತ್ತುದ
ಪುಸ್ಸು ಮಾಲೆನೆ ಕಾಡ್ಡ ಪಾದರಿ ಪೂತ ದಾಯೆಗ್‌ಯ ||

17

ಜಪೊಕು ಬಾಣೊದ ಸೇರಿಗಂಚಯ
ಸಮೆಕ್ ಕಡ್ಲೊನೆ ಬೋಡೊ ಒಟ್ಟುಗು
ಬಸ್‌ಮೊ ಪಾಡ್‌ನ ಸೈರೊಗಂಚಿನ ಸೇವೆ ಸೀಸಕೊದ ||
ಕೆರಮೊಡೆಂಚಿನ ತಪಸ್ ನಿನ್ನವು
ಪನ್‌ಯ ದಾಯ್ತವು ಸಿದ್ಧಿ ಎನ್ನಡ
ಮುನಿಯೊ ತಪಸಿಯೊ ಅತ್ತ ಏರ್‌ಂದೆಂಕ್ ತೆರಿಯಂದ್ ||

18

ಪಾರ್ತೆ ಕಣ್ಣನ್ ಬುಡುದು ಪನ್ನೆನೆ
ಈರ್ ಎಂಚಿನ ಗ್ರೇಯ್ತುರಾಂಡಲ

ಯಾನ್ ಹೃದಯೊಡು ಸಿವನ್ ಉಂತದ್ ತಪಸ್ ಮಲ್ಪುನೆಯೆ
ತೂಪುನಕಲೆಗ್ ಎನ್ನ ರೂಪೊಡು
ದಾನೆ ದಾನೆನೆ ತೋಜಡೆನ್ನವೆ
ಸಾದನೆನ್ ಯಾನ್ಪುಡಯೆ ಪನ್ನಗ ಇಂದ್ರೆ ಮೆಚ್ಚಿಯೆನೆ ||

19

ತನ್ನವೇ ನಿಜೊ ರೂಪೊ ತೋಜದ್
ನಿನ್ನ ಸಾದನೆಗೇನ್ ಮೆಚ್ಚಿಯೆ
ನಿಕ್ಕ ಒಲಿಯಡ್ ಆ ಸದಾಸಿವೆ ನಿನ್ನವಾಸೆನ್‌ಲ ||
ಪೂರ ತೀರ್ತದ್ ಪಗೆನ್ ಗೆಲ್ಪುಲ
ಈಯೆ ಪಂಡ್‌ದ್ ಮಗನ ತರೆನೇ
ಈಸ್‌ದಾಯೆನೆ ಪೋಯೆ ಪುಸ್ತಕೊ ಏರ್‌ದ್ ಮಿತ್ತಾರ್ಕು ||

|| ಅರ್ಜುನನ ತಪಸ್ ಜೋರಾಂಡ್ ||

ದೇವರಾಜೆನೆ ಪೋಯಿ ಬುಕ್ಕೊನೆ
ಪಾರ್ತಗಾಂಡ್‌ಲ ತಪಸ್‌ದಾ ಹಟೊ-
ಯೋಗೊಡಪಗನೆ ಐನ್ ಇಂದ್ರಿಯೊ ಬಿಗಿತ್‌ದುಂತಾಯೆ ||
ಮಾತ ವಿದ್ಯೆದ ಸಾರೊ ಸತ್ತೊದ
ಆಲಯಾದಿಪೆ ಆಯ್ನ ಮಹಿಮನ್
ದೂರ್ಜಟಿನ್ ಈಸ್ವರನ್ ಪಾರ್ವತಿ ವರನ್ ಸಂಕರನ್ ||

1

ಮಾತ ಸಗ್ಗಿದ ಸ್ವಾಮಿಯಾಯಿನ
ಆ ಸದಾಸಿವ ತತ್ವೊ ಚಿನ್ನಯ
ರೂಪೆನಾಯಿನ ಸಿವನ್ ಚಿಂತನೆ ಮಲ್ತೆ ತಪಸ್‌ಡ್‌ಲ ||
ಮೂಜಿ ದಿನೊಕೊರೊ ಸರಿ ಪಲಾರೊನು-
ಲಾಯೆ ಮಲ್ತೆನೆ ಒಂಜಿ ತಿಂಗೊಳು
ಆಜಿ ದಿನೊಕೊರೊ ಮಲ್ತೆ ರಡ್ಡನೆ ತಿಂಗೊಳುಡುಲಾಯೆ ||

2

ಬೇರ್ ಗರ್ತ್‌ದ್ ತಿಂದೆನೇ ಪದ್
ರಾಡ್ ದಿನೊಕೊರೊ ಬುಕ್ಕೊ ಬಜವುನು-
ಲಾಯೆ ತಿಂದ್‌ದ್ ನಾಲ್ ತಿಂಗೊಳು ತಪಸ್‌ಡಿತ್ತೊಂಡೆ ||
ಗಾಳಿ ತಿಂದ್‌ದ್ ಬುಕ್ಕೊ ಸಿವನವೆ
ಪಾದೊ ಬಗ್ಗಿನ್ ಮಲ್ತೆನಾಯಗ್
ದಾಲ ಆಯಿಜಿ ಬಡವು ಬಾಜೆಲ್ ತಪಸ್‌ದಾ ಹಟೊಟು ||

3

ಯಮೊ ನಿಯಮೊಡೇವುರೊಡು ಬಚ್ಚೆಲ್
ಬಡವು ಮರತ್‌ದ್ ನಂಬಿ ದೈವೊನೆ

ಸಿವನೆ ಆಯನ ಪಾದೊ ಕಮಲೊನು ತೂಪುನಾಸೆಡ್ಲ
ಮರ್ಲ್‌ದಿಂದ್ರಿಯೊನಮತ್ ಪತ್ತದ್
ನೆನೆತ್‌ದಾ ಸಂಕರನ್ ಬಾವೊಡು
ಸರಿ ಸಮಾದಿಡ್ ಇತ್ತೆ ಪಿದಯಿದ ಗೋಚರೊನು ಬುಡುದು ||

4

ಜಾಗರೊಡು ಜಾಗ್ರತೆಡ್ ಇಂದ್ರಿಯೊ
ಲಾಗೊನುಂತಯೆ ಸೊಪ್ಪೊಡಾಯೆನೆ
ಬಾರಿ ಬಗ್ಗಿದ ಬ್ರಮೆಟ್ ಬೂರಿಯೆ ಯೋಗೊ ನಿದ್ದೆವೆ ||
ಬಾಲೆದಾ ಸಿಸು ನಿದ್ದೆ ಮನಸ್‌ಗ್
ತಾಗುನವೆ ವಾಸನೆದ ಬಿತ್ತನ್
ಪೂರ ಮುತ್ತದ್ ಸಿವನ್ ಬಗ್ಗಿಡ್ ದ್ಯಾನೊ ಮಲ್ತೊಂಡೆ ||

5

ತಾನೆ ಸಿವನೋ ಅತ್ತ ಸಿವನವೆ
ದ್ಯಾನೊದಾಯೆನೊ ಪನ್ನಿ ನಮುನೆದ
ಬಾವೊ ರಡ್ಡೆತ ಗುರ್ತೊ ಆತ್ಮೋಗುಲಾಂಡ್ ಆಯನವೆ ||
ದ್ಯಾನೊನೋ ಅತ್ತುಂದು ದೈರೊನೊ
ದ್ಯಾನೊ ಮಲ್ಲುನ ಕರ್ತು ಏನೆನೊ
ದಾಲ ತಿರುಮುರು ಆಯ್ಚಿ ಚಿತ್ತೊದ ಸುದೊಡರ್ಜುನಗ್ |

6

ಮೇಲ್ ಮೇಲ್‌ಡ್ ಮಲ್ಲಿ ತಪಸ್‌ದ
ಸೂತ ಏರಿಯೆ ಮಿತ್ತಗತ್ತದ್
ಸೂರ್ಯ ಚಂದ್ರೆರೆ ಕಿರಣೊ ಕಾಯಿದ್ ಬೆಚ್ಚ ಆಂಡಪಗ ||
ಗಾಳಿ ಬೀಜಿದ್ ದೂಳು ರಟ್ಟೆನ್-
ವಾಂಡ್ ಬೆಚ್ಚನೆ ಮಿತ್ತ ತಿರ್ಗುನ
ಬಾನೊದಾ ಮುಗಲಾಂಡ್ ಕಾಯಿದ ಕಪ್ಪು ಕತ್ತಲೆನೆ ||

7

ಪಾರ್ತ ತಪಸ್‌ದ ಸೂತ ಏರಿಯೆ
ಬೇತೆ ರುಸಿಕುಲೆಗಲ್ಲ ತಾಗ್‌ದ್
ಆಕಲೆನ ನಿಜೊ ಯೋಗೊ ಸಿದ್ಧಿಗ್‌ಲಾಂಡ್ ಅವಸಕುನೊ ||
ಜಪೊಕು ಕುಲ್ಲನಗಕ್‌ಲ್ ಬೆಗರ್ಯೆರ್
ಸರಿ ಸಮಾದಿದ ದ್ಯಾನೊಡುಂತ್ಯೆರ್
ಅಕಲೆಗಾಪಗ ಸಾರೊ ಸತ್ತೊ ವಿಚಾರೊ ನೆಂಪಾಯ್ಚಿ ||

8

ತೆರಿನ ಸಾಸ್ತೊದ ಸಾದಿ ತತ್ತದ್
ಸರಿ ವಿವೇಕೊದ ಸಿತ್ತಿಯೆ ಅಡಿ ಮೇ-
ಲ್‌ಡೆಲ ಉಂತುದು ಸಿವನ ರೂಪೊನೆ ಮನಸ್‌ಗಾಂಜಂದೆ ||
ಸಾಪೊ ಕೊರೈರೆ ಪೋಡಿ ಅಕಲೆಗ್

ಯಾನ್ ತಾನೆಂದೆನ್ನಿ ಹಂಕರೊ
ಏರ್‌ನಾ ಜನ್ನೈರೊದಾಕ್‌ಲ್ ಮುನಿಯೆರೊಟ್ಟಾದ್ ||

9

ಪುರಿತ ಮಚ್ಚರೊದಕ್‌ಲ್ ಕೆಲವೆರ್
ಎದುರು ಪಿರವುಡು ಪಾತೆರೊಂದುಲ
ಕೆಲವೆರಿತ್ತೆರ್ ನಂಕ್‌ದಾಯೆಗ್ ಪನ್ನಿ ಬಾವನೆಡ್ ||
ನಮನ ಜಾಗೆಡ್ ಇಂಬ್ಯಗಂಚಿನ
ಕೆಲಸೊ ಪೋವಡ್ ಮುಲ್ಲು ಪಂಡ್‌ದ್
ಕೆಲವೆರಂದಜಿ ಮಲ್ತೆರಾಯನ್ ಅಲ್ತಗಿಡರಿಯೆರೆ ||

10

ಜಿಡೆನೆ ಬಿಚ್ಚಿದ್ ಜಪೊತ ಮಾಲೆನೆ
ಕಡಿಡ್ ಕೈತವೆ ಸಿರಿ ಕಮಂಡಲೊ
ದರಿದ್‌ಲಕ್‌ಲೆನ ತುತ್ತಿ ಕ್ರಿಷ್ಣಾಜಿನೊನೆ ಪರಿದಾಂಡ್ ||
ಕೋಪೊಡಾ ಮುನಿಕುಲೆನ ಮೇಲ್‌ಗ್
ಪೂಜಿ ಬಸ್ಮೊನೆ ಮಾಜಿದಾಂಡ್‌ಲ
ಸೀದ ಬತ್ತೆರ್ ಮಿತ್ತ ಮಿತ್ತರ್‌ದ್ ಆ ಸಿವಾಲಯೊಗು ||

11

ಬತ್ತನಾಕ್‌ಲ್ ಮಂದಿರೊದ ಎದು-
ರಡ್ಡೊ ಬೂರೈರ್ ಮಾತ ರುಸಿಕುಲು
ಅಲ್ಲ ಕಾಪುನ ಸಿವನ ಗಣೊಕುಲು ಪಂಡೆರೀಸ್ವರಡ ||
ಇಸಯೊ ಕೇನೈರೆ ಲೆಪ್ಪುಡಯಿನವೆ
ಹರನ ರೂಪೊನು ತೂದು ಮುನಿಕುಲು
ಹರಹರಾ ಪಂಡೊಂದು ಅಲ್ಲನೆ ಅಡ್ಡೊ ಬೂರಿಯೆರ್ ||

12

ಲಕ್ಕು ಲಕ್ಕುಲೆ ನಿಕ್‌ಲ್ ಕುಲ್ಲುಲೆ
ಬತ್ತನೆನ್ ದಾಯೆಂದ್ ಪನ್ನೆಯೆ
ಪನ್ನಗಾ ಮುನಿಕೂಟೊ ಲಕ್ಕುಡ್ ಕೈನ್ ಮುಂಡೊಡುಲ ||
ದೀಡ್ಡ್ ಹಿರಿಯೆರ್ ಈರ್ ಸರಿ ಪನಿ
ಈರ್ ಪನಿ ಈರ್‌ಂದ್ ಚಿರ್ಚೆಡ್
ಆಕಲಾಕ್‌ಲೆ ಪೈಕಿಡೊರೈನೆ ಪನ್‌ಪೆನಾ ಸಿವಡ ||

13

ನೀಲ ಕಂಟಿ ಸದಾಸಿವನೆ ಸಿರಿ
ಪಾರ್ವತೀಸೆನೆ ಚಂದ್ರ ಸೇಕರೆ
ಕಾಲ ರುದ್ರನೆ ಇತ್ತೆ ಕೇನೊಡು ಎಂಕ್ಲೆನರಿಕೆಲೆನ್ ||
ದೂರು ಕೇಂಡ್‌ದ್ ಕಾಪೊಡೆಂಕ್ಲೆನ್
ಓ ಸದಾಸಿವ ಬಡವೆರೆಂಕುಲು
ಆದಿ ಮೂರುತಿ ನಿನ್ನ ತಪಸ್‌ಗ್‌ಲಾಂಡ್ ಗಂಡಾಂತ್ಯೊ ||

14

ಸಾಂತಿಯೇ ಇಲ್ಲಾದ್ ನಿನ್ನವೆ
ದ್ಯಾನೋನೇ ಮನೆ ವಾರ್ತೆ ಎಂಕ್ಲೆಗ್
ವೇದೊ ವೇದೊಂಗೊದವೆ ಗುಟ್ಟುನು ತೆರಿಪುನವೆ ಕಸುಬು ||
ಆಸೆ ಬುಡ್ಡುನ ಸುಕೊನೆ ಎಂಕ್ಲೆನ
ಮಾಯೊ ಮುಸುಕುನು ದೆಪ್ಪಿ ಕೆಲಸೊನೆ
ಯೋಗಿಲೆಗ್ ಕರ್ತವ್ಯೊ ವೈದಿಕೊ ಧರ್ಮೊ ನೀತಿಲೆಡ್ ||

15

ಸ್ವಾಮಿ ಎಂಕ್ಲೆನ ತಪಸ್ ಪೊತ್ತುದು-
ಲಾಂಡ್ ಮಲ್ತಿ ಸಮಾದಿ ಜಪತಪೊ
ಪೂರ ಪುಗೆ ದಿಂಜೊಂದು ನಾಸೊನೆ ಆಂಡ್ ಮಾದೇವ ||
ತಪೊತ ಬೂಮಿಯೆ ನುಂಗುದಾಂಡ್ಲ
ಅವುಲು ಇತ್ತ್ನ ಬೂರು ಮರದಯಿ
ಸರಿ ಕರೆಂಚಿದ್ಲಾಂಡ್ ಒರೈನ ತಪಸ್‌ದಗ್ಗಿಡ್ಲ ||

16

ರಾಜೆನೋ ಅತ್ತಾಯೆ ರಾಜನ
ರಾವುತೆನೊ ತೆರಿಯಂದ್ ತೂನಗ
ಯೋಗಿ ರುಸಿಕ್‌ಲ ದಾಯೆಗಾಯುದೊ ಎಂಕ್ಲೆಗರ್ತಾಯ್ತಿ ||
ಬಿರು ಪಗರಿ ಕೈಟುಂಡು ದರ್ಬೆದ
ಬಿರೆಲ್‌ಗುಂಗಿಲೊ ದೀತೆ ಜಿಡೆನೇ
ತರೆಟ್ ತೋಜುನ ರುಸಿ ವಿಚಿತ್ರೊದ ಉಲ್ಲೆ ಅವುಲಿತ್ತೆ ||

17

ಪಂಡೊಡಂಕುಲು ಪುರಿಟ್ ಪನ್ನುನೆ
ಪಂಡ್‌ದಂಕ್ಲೆನ್ ದೂರ್ದ ದೇವಾ
ಪಂಡ್‌ಜಿಡ ತಡೆಯೆರೆನೆ ಆಪುಜಿ ಸೂತ ಏರಿನ್‌ಲ ||
ಎಂಕ್ಲು ಮಲ್ಪುನ ನಿತ್ಯೊ ಕರ್ಮೊಗು
ತೊಂದರೆನೆ ಆಯಿನೆನ್ ಸ್ವಾಮಿಯೆ
ಉಂತದಂಕ್ಲೆನ್ ಕಾಪೊಡುಂದುದು ಅಡ್ಲೊ ಬೂರಿಯೆನೆ ||

18

ಬುಕ್ಕೊ ಎಂಕ್ಲೆನ ಮನೊತ ಮಚ್ಚರೊ
ಪನ್ದ ದೂರುನ ಬೊಡ್ಡಿ ತಪೊ ಬನೊ
ಅಧ್ವನಿತ್ತೆನೆ ಆಯ ತಪಸ್‌ದ ಸಗ್ಗಿ ಏದ್ರೊಲು ||
ತಪಸ್‌ಗಂಕ್ಲೆಗ್ ಬೇತೆ ಜಾಗೆನ್
ಕರುಣೆಡೀಯೇ ತೋಜವೊಡು ಸಿವ
ಪರಮ ಪಾವನ ಮೂರ್ತಿ ಇದ್ದಿಡ ಪೋವಡಲ್ತಾಯೆ ||

19

ಮುಕುಲೆ ಪಾತೆರೊ ಕೇನ್ದ ಸರ್ವೆ-
ಸ್ವರೇನೆ ಗೇನೊದ ದಿಸ್ಪಿಡಾಪಗ

ತೆರಿಯೆನರ್ಜನೆ ತನ್‌ಕ್ ಮುಟ್ಟದ ಬಗ್ಗೆ ಆಯಿನಯೆ ||
ಮುಗುರು ತೆಲಿಕೆಡ್ ಪಂಡೆನಕ್‌ಲೆಡ
ನಿಕ್‌ಲೆ ತಪಸ್‌ಗ್ ದೋಸೊ ಮಲ್ತೆರೆ
ಜಪೊನು ಮಲ್ಪುನೆ ಅತ್ತ್ ಆಯನ ಆಸೆ ಬೇತೊಂಜಿ ||

20

ಪೋಲೆ ನಿಕ್‌ಲಾಸ್ತಮೊಗು ಆಯನ್
ಪೋಯೆರೆಗ್ ಯಾನ್ವನ್ನೆ ನಿಕ್‌ಲೆಗ್
ದಾಲ ತೊಂದರೆ ಆಯೆ ಮಲ್ಪಯೆ ಪಂಡ್‌ದಣು ಕೊರೈ ||
ಮುನಿಕುಲೆನ್ ಕಡಪುಡುದು ನಂದೀ-
ಸ್ವರನ್ ಲೆತ್ತ್‌ದ್ ಪನ್‌ಲ ಬರೈರೆ
ಗಣೊಕುಲೆನ್ ಬೋಂಟೆಗ್‌ಲ ತಯರಾದೆನ್ನ ಒಟ್ಟಿಗೆನೆ ||

|| ಸಿವನ ಬೋಂಟೆ ||

ಸಿವನೆ ಬೋಂಟೆಗ್ ಪಿದಡುನಟ್ಟನೆ
ತೆರಿದ್ ಸಿವಗಣೊ ಮಾತ ಡಂಗುರೊ
ಸೊರೊನು ಲಕ್ಕಯೊ ಮೂಜಿ ಲೋಕೊಗು ಕೇಂಡ್‌ದಾಂಡಪಗ ||
ಪರಮ ಕರುಣಾನಿದಿಯೆ ಬಗ್ತನ
ತಿಗಲೆ ತಂಕೊನು ತೂವೊಡುಂದೇ
ಸಬರ ಏಸೊಡು ತಯರ್‌ಡುಂತಿಯೆ ಪಾರ್ವತಿನ ಸ್ವಾಮಿ ||

1

ಸರ್ಪ ಮಾಲೆನ್ ದೆತ್ತದಾಯೆನೆ
ಪಚ್ಚೆದಂಗಿನ್ ಪಾಡೈ ಪೀಲಿಡ್
ಸುತ್ತ ಪೊಲ್ಲನ ಚಲ್ಲಣೊನು ಸರಿ ಕಾರ್ಗ್ ತಿಕ್ಕಾಯೆ ||
ತರೆತ ಜಿಡೆ ಸುತ್ತುಗುಲ ತೆಗ್‌ಲೆದ
ಇರೆನ್ ಕಟ್ಟ್‌ದ್‌ಲಾ ಕಿರಾತನ
ನಮುನೆಡಾಯೆನೆ ಬಿಲ್ಲ ಬಾಣೊನು ಕೈಟ್ ಪತ್ತೊಂಡೆ ||

2

ದೇವ ದೇವನ ರೂಪೊ ತೂದೇ
ದೇವಿನಾಕ್‌ಲ್ ಗಣಪೆ ಗುಹೆರೊಲ
ಈ ಕುಸಾಲ್‌ಗ್ ಸೇರ್‌ದ್ ಮಲ್ತೆರ್ ಅಕ್‌ಲೆಲಾ ಏಸೊ ||
ವೀರೆ ನಂದೀಸ್ವರೇನೆ ವೀರಕೆ
ದೇವಲಕೆ ರೇಣುಕೆ ಮಹೋದರೆ
ವೀರಬದ್ರೆಲ ಮಲ್ಲ ಸಿಕಿಮುಕೆ ಸಬರೆರಾಯೆರೊಲ ||

3

ಏಳ್ ಮಾತ್ರೆಕೆನಕ್‌ಲ್ ಸಿರಿಕುಲು
ವೇದೊ ಸಾಸ್ತೊದ ದೇವಿನಾಕ್‌ಲ್

ಮಾತ ದಿಕ್ತದ ದೇವಿಯೆರ್ ವಿದ್ಯಾದಿ ಸಗ್ತಿಗುಳು ||
ನಾಗ ಕನ್ನಿಕೆನಕ್ಲ್ ಮಂತ್ರೊದ
ದೇವಿ ವಿದ್ಯಾದರಿಲು ಸೇರ್ದ್
ಮಾತ ಸಬರಿಯೆರಾದ್ ಉಂತ್ಯೆರ್ ಉಮೆನ ಕೈತಲ್ಡ್ ||

4

ರಾಗೊ ರಸೊ ಸಂಗೀತೊ ಕಲೆಕುಲೆ
ದೇವಿನಕ್ಲ್‌ಲ ಚಂಡಿ ಜಯೆ ಕಾ-
ತ್ಯಾಯಿನಿಯೆ ಪನ್ನಿಂಚಿ ಸಿರಿಕುಲು ಸಬರಿನಕ್ಲಾದ್ ||
ಕೀರ್ತಿ ಕಾಮಿನಿ ಸಿದ್ಧಿ ದಾಯಕಿ
ರಾಗೊ ದೇವತೆ ಸುತಿ ಸರಸ್ವತಿ
ಮಾತ ಸೇರ್ದ್ ಸುತ್ತೊಂತ್ಯೆರ್ ದೇವಿ ಪಾರ್ವತಿನ ||

5

ಕಾಳಿ ಕಾತ್ಯಾಯಿನಿಲ ಯೋಗಿನಿ-
ನಾಕ್‌ಲಲ್ಪನೆ ಯಜ್ಞೋದೇವಿಲು
ಮಾತ ಸಬರಿಯೆರಾದ್ ಉಂತ್ಯೆರ್ ಚಂಡಿ ಚಾಮುಂಡಿ ||
ಸಾಕಿನೀ ಗಣೊಡಾಕಿನಿಯೆ ಸರಿ
ಜೋಲಿನಿಲ ಮಾಲಿನಿಡ ಸೇರ್ದ್
ಪಾರ್ ಬತ್ತೆರ್ ಸಬರಿ ಏಸೊಡು ಮಾಸೊ ತಿನಿಯೆರೆಗ್ ||

6

ಬಗ್ಗಯಿನ ಹದೊ ಬಿರುನು ಪತ್ತಾದ್
ಮಲ್ಲ ತಂದೆಲ್ ಪುದೆಲ್‌ಗಾಕುನ
ದತ್ತೊನುದು ನಾಯಿಲೆನ್ ಸಂಕೊಲೆಡಕ್ಲ್ ಪತೊನುದುಲ ||
ಮಲ್ಲ ಕಣ್ಣದ ಬಲೆನ್ ಮಯಣೊಡು
ಮುರ್ದದಂಟ್‌ಡ್ ಮಲ್ತಿ ಕೋಲ್ಪಲೆ
ಪತ್ತೊನುದೇ ಬತ್ತದತ್ತೆರ್ ಬೋಂಟಿ ದೇರಿಯೆರೆ ||

7

ಸುತಿ ಪುರಾಣೊದ ತರ್ಕೊ ಸಾಸ್ತ್ರೊದ
ಗತಿಕ್ ಓಂಗುನ ಮಂತ್ರೊ ದಿಂಜಿನ
ಜಪೊಟು ಯಜ್ಞಾದಿಲೆನ ಕಾರ್ಯೊದ ಬಲೆನ್ ಪತ್ತೊಂದು ||
ಮತೊತ ಕಣ್ಣನ್ ಕರ್ಮೊ ಸಾದನೆ
ಪನ್‌ಪಿ ಕೋಲ್ಗುಂಡುಲೆನ ಯೋಗೊದ
ಸಿತ ಬಾಣೊನು ಪತ್ತಿ ಸಬರೆರ್ ಸಿವನ ಕೈತಲ್ಡ್ ||

8

ಕೆಬಿಟ್ ಕೇನ್‌ದ್ ಮನಸ್‌ಡೊಪ್ಪುನ
ಬಲೆನ್‌ಲಾ ಮಹ ಯಜ್ಞೊ ದೀಕ್ಷಿದ
ಪಗರಿ ದಾನೊದ ಪರಿತ ಬಾಣೊನು ಪತ್ತದುಂತಿಯೆರ್ ||
ಬಗ್ಗಿಡೊಂಬೊದ ನಮುನೆ ಬೋಂಟಿಡ್

ದುಸ್ತ ಮುರ್ಗೊಲೆ ಮಾತ ಕೆರೈರೆ
ಎತ್ತೊಡೆಗ್ ಸಿವನ ಗಣೊಕುಲು ಇಂದ್ರ ಕೀಲಕೊಗು ||

9

ಸೋಂಕ್‌ದಾನಗ ಪಾರ್ಯೊ ಓಡೆಗೊ
ಆಜಿ ನಮುನೆದ ವೈರಿ ಮುರ್ಗೊಲು
ಪಾತಕೊನೆ ಪನ್ನುನವೆ ಆನೆಲು ಬಲೆಕ್ ಬೂರಿಯೊನೆ ||
ದ್ರೋಹೊ ಮಚ್ಚರೊ ಪನ್ನಿ ಪಂಜಿಲು
ಬೂರೊ ತತ್ತೊದ ಬಲೆಕ್ ಸಿವನವೆ
ಬೋಂಟಿಡಾಯಿನ ಗೇಲ್ ಎಂಚಿನ ಪನೊಡು ತೆರಿನಕ್ಲ್ ||

10

ಜಯೊ ಜಯೊನೆ ಪಂಡೊಂದು ಪುಗರಿಯೊ
ಸುತಿತ ಸಾಸ್ತ್ರೊಲು ಮಾತ ಕಣ್ಣೆಗ್
ಸಿವನ ತತ್ತೊನೆ ರೂಪೊ ರೂಪಾದಾಲೆ ತೋಜಿನಗ||
ಜನನೊ ಮರಣೊನೆ ಪನ್ನಿ ಕಡಲ್‌ದ
ಸುಳಿನ್ ಆಜದ್ ಬಗ್ಗೆರೆನ ನಿಜೊ
ಬಯೊನು ಬುಡ್ಡವಿ ಸೊರೊನೆ ಕೇಂಡ್‌ದಲಾಂಡ್ ಅವುಲೊರೈ ||

11

ಕೇನ್ನಗನೆ ಮೆಯಿರೋಮೊ ನಿಗ್‌ರದ್
ಆಂಡ್‌ಲಾ ಕೈಲಾಸ ವಾಸಿನ
ಲೀಲೆ ತನ್ನವೆ ಬಗ್ಗುಗಾಯನ ರೂಪೊ ತೋಜವುನ ||
ಬೋಂಟಿದಾಕ್‌ಲ್ ಮಾತ ಸೇರ್ದ್
ಕಾಡ್‌ಡೊರೈಲ ದಿಂಜಿದಾಯೆರ್
ಆ ಕಿರಾತೆರೆ ಕೂಟೊದಬ್ಬರೊನೆಂಚ ಪನ್ನುನೆನೊ ||

12

ಅಲ್ಪನೇ ಮೂಕೆಂದ್ ಪುದರ್‌ದ
ರಕ್ಕಸೆನೆ ಒರಿ ಇಂದ್ರ ಕೀಲಕೊ
ಪರ್ದತೊಡು ತಿರ್ಗೊಂದು ಇತ್ತೆನೆ ಪೋಡಿ ಇದ್ಯಂದೆ ||
ಸಬರನಕ್‌ಲೆನ ಬೊಬ್ಬೆ ಕಾಡ್‌ಡ್
ಪ್ರಲಯೊ ಕಾಲೊದ ಕಡಲ್‌ದಂಚಿನೆ
ಕಳ ಕಳಂದ್‌ದ್ ಕೇನ್ನಗಾ ರಕ್ಕಸೆನೆ ಕೆಬಿಕೊರೈ ||

13

ಮುಕುಲೆನಿತ್ತೆನೆ ತಿನೊಡು ಪಂಡ್‌ದ್
ಎದುರು ಬತ್ತೆನೆ ಪಂಜಿಯಾದ್‌ಲ
ಸಬರನಕ್‌ಲೆಗ್ ತಾಡ್ಯೆ ದಾಡೆಡ್ ಕುಡ್ತು ರಟ್ಟಾಯೆ ||
ಸಪಳೊ ಬರ್ಚಿಡ್ ಕುತ್ ಕೆರ್ಲೆಂ-
ದಕ್‌ಲ್ ಬೊಬ್ಬೆನೆ ಪಾಡ್ಡ್ ಬತ್ತೆರ್
ಎದುರುಗಾ ಪಂಜಿನೆಲ ಕೆರೈರೆ ತಯರ್‌ಡುಂತಿಯೆರ್ ||

14

ಉದಿಪಿ ಸೂರ್ಯನ್ ನಿಂಗಿರಾವುದ
ಲೆಕೊನೆ ದಾಡೆನ್ ಆಡದಾಡದ
ಸಯಿರೊ ನೀಲಾಚಲೊದ ನಮುನೆಡ್ ಕಪ್ಪು ಕಪ್ಪಾದ್ ||
ಅವುಡುರುಂಕುಂದಲ್ಪ ಮುರುಡು
ಬುಲದ್ ಕೆಂಪುದ ಕಣ್ಣೆಡಲ್ಪನೆ
ಎಡತ್ ಬಲತ್ ಇತ್ತಿ ಸಿವನವೆ ಕೂಟೊ ತೂನಗನೆ ||

15

ಬೂತೊ ಗಣೊಕುಲು ಬೊಬ್ಬೆ ಪಾಡ್ಯರ್
ಈಟಿ ಬರ್ಚೆಡ್ ಕುತ್ಯೆರೈಕೇ
ಬೋಂಟಿ ನಾಯಿಲು ಕೊರೆತ್ ಕೊರೆತ್ ಮೇಲ್ಗ್ ಬೂರಿಯೊನೆ ||
ಆಪಗನೆ ನುಕೊಂದು ದಾಡೆಡ್
ತಾಡ್ಡ್ ಗಾಯೊನು ಸಬರ ವರ್ಗೊಗು
ತೀರ ಮಲ್ತ್ ಪೊಡಿಯೆ ರಟ್ಟನಗಪಗ ಮಹದೇವೆ ||

16

ಬಿರುನು ದೆರ್ತ್ ಬಾಣೊ ಕೊಲ್ಪದ್
ಕೆಬಿತ ಕಂಡೆಗ್ ನಾರ್ನೊಯ್ತದ್
ಬುಡಿಯೆ ಪಗರಿನ್ ಮೂಕದಾನವ ಸೈರೊ ತೂವೊಂದು ||
ಬರೊಟು ಬತ್ತನ ಬಾಣೊ ಪಂಜಿದ
ಕಯಿಪರೆಗ್ ತಾಗ್ನಗ ಕುಡ್ತುದು
ನರನ ಕೈತಡೆ ಪಾರ್ಡ್ ಬತ್ತದ್ ಕೊಂಡುಲರಬಯಿನ್ ||

17

ಪೆಟ್ತ್ ತಾಗ್ನ ಕಾಡ ಪಂಜಿಯೆ
ಮುರುದರಬಯಿ ಕೊರ್ದು ತಪಸ್ಡ್
ಇತ್ತಿ ರುಸಿಕುಲೆ ಮೇಲ್ಗ್ ಬೂರುದು ತಾಡ್‌ದಾಂಡಪಗ ||
ನೆತ್ತೆರರಿನಗ ಬೇನೆ ತಡೆಯೆರೆ
ತೀರಿ ಮುನಿಕುಲೆಗಪಗ ಬುಲ್ತುದು
ಬೊಬ್ಬೆ ಪಾಡ್ಯನ್ ಕೇನ್ದ ಪಾರ್ತೆನೆ ಕಣ್ಣೆ ಬುಡುದುಂತ್ಯೆ ||

18

ಪಾರ್‌ದೆದುರುಗು ಬರ್ಪಿ ಪಂಜಿನ್
ತೂದು ಗಾಂಡಿವೊ ದೆರ್ತ್ ಪತ್ತದ್
ನೋಟೊ ತೂದೇ ಬಾಣೊ ಬುಡಿಯೆನೆ ಕಾಡ ವರ್ಗಲಗ್ ||
ತಾಗಿ ಪೆಟ್ತ್ ಪಂಜಿ ಪುಡೆರ್‌ದ್
ಬೂರು ಕೈಕಾರ್‌ಲೆನ್ ಹಾಕ್‌ದ್
ಬೂಂಡ್ ಪಾರ್ತನ ಎದುರು ಪಾದೆದ ಗುಡ್ಡೆ ಬೂರಿಲೆಕೊ ||

|| ಅರುನನ ಸತ್ವೊ ಪರೀಕ್ಷೆ ||

ಬತ್ತದಾಪಗ ಸಿವನೆ ತಾನೇ
ಕೆರೈ ಪಂಜಿನ್ ತುಂಬುಲೆಂದ್‌ದ್
ಪನ್ನಗರ್ಜನೆ ಪಂಡೆಯಾನ್‌ಯ ಕೆರ್ನೆ ಪೊ ಮುಲ್ತು ||
ಸೈತ್ತಿ ಪಂಜಿದ ಪುಣತ ಆಸೆಡ್
ಯುದ್ಡೊ ಸುರುವಾಂಡವುಲು ಸಿವನವೆ
ಗುರೊ ಪಾರ್ತಗ್ ಸರಿಟ್ ತೆರಿಯಂದಾಯೆ ಕಾದಿಯೆನೆ ||

1

ಸಬರ ಕೇನ್‌ಲ ಎನ್ನ ಬಾಣೊದ
ಬಲೆಕ್ ಮುರ್ಗಾವಡಯ ಕಾಡ್‌ದ
ಕುದುಕ ಪಂಜಿಲೆ ಮೇರ್‌ಗಾಕ್‌ಲ ಬೋಂಟಿದಾಯೆಂದ್ ||
ಪನ್ನಿ ಗರ್ವೊಗು ಯಾನ್ ಪೋಡ್ಯಯೆ
ನಿನ್ನ ಕೂಟೊಗು ಏರ್ ಯಜಮನಿ
ಲೆಪ್ಪುಲಾಯೆನ್ ಎದುರು ಉಂತಡ್ ಪನ್ನೆ ಬಿರುದೆರ್ತೆ ||

2

ಈತ್ ಪನ್ನಗ ಸಿವನೆ ಬಗ್ಗನ
ಸಾಸೊ ದೈರೊನು ತನ್ನ ಪರತಿಗ್
ತೋಜದಾಯೆನೆ ಪನ್ನೆ ಪಾರ್ತಡ ಮುಗುರು ತೆಲಿತೊಂದು ||
ದಾಯೆ ತಮ್ಮಡಿ ನಿಕ್ಕ ತಪಸ್‌ಗ್
ಬಾಣೊ ಬಿಲ್ಲಲ ಕೈಟ್ ಸೊಂಟೊಡು
ಆ ಕಟಾರಿನ್ ದಾಯೆ ತಿಕ್ಕದ ತಪಸ್ ಎಂಚಿನೆಕ್ ||

3

ದಾಯೆಗ್‌ಯ ನಿಕ್ಕೆನ್ನ ತಪಸ್‌ದ
ರೀತಿ ನೀತಿದ ಸುದ್ದಿ ಕಾಡ್‌ದ
ಬೋಂಟಿದಾಯೆಗ್ ಮುರ್ಗೊ ಪಜಿ ಪಜಿ ತಿನ್ನುನಾಯೆಗ್‌ಲ ||
ಲೆಪ್ಪು ನಿನ್ನೆಜಮಾನಿ ಬರಡ್‌ಯ
ಎನ್ನಡನೆ ಈ ಎಂಚ ಕಾದುವ
ಪನ್ನೆ ಕಪಟೊದ ಸಬರಡಾಯೆನೆ ಗೌಜಿ ಲಕ್ಕಾಯೆ ||

4

ಈರ್ ತೆರಿನರ್ ಸಾಸ್ತೊ ಮಾತೆನ್
ಕಾಡ್‌ಡೆಂಕುಲು ಬೋಂಟಿ ದೇರೈರೆ
ಮಾತ್ರೊ ತೆರಿನಕ್‌ಲಿತ್ತೆ ಎಂಕ್ಲೆನ ಜಾತಿ ಸುಬವತ್ತೊ ||
ಈರ್ ಸೌರೊಡು ಮಲ್ಲೆ ಈರೆಡ
ಕಾದುನಕ್‌ಲಿತ್ತಿತ್ತೆ ಎಂಕುಲು
ಆಂಡ ತಪಸ್‌ಗ್ ದಾಯೆಗಾಯುದೊ ಎಂಕ್ ಸಂಸಯೊನೆ ||

5

ತಮಸ್ ಮಲ್ಪಡ ಸಬರ ಜಾಗ್ರತೆ
ಪಗರಿಡಲ ಪುಗರ್ದಲ ತಪಸ್ಡ
ಸಿವನ್ ಮೆಚ್ಚವೆ ಯಾನ್ ನಿನ್ನಡ ದಾಯೆ ಪನ್ನುನೆಯೆ ||
ತರೆಟ್ ಜಿಡೆ ಮೆಯಿಟೊಮೆ ಪೂಜಿನ
ಬಸ್‌ಮೊದಾಯನ ಮುಗೊರ್ ಚರ್ಮೊನು
ಪೊದೆತನಾಯನ ಬಗ್ಗರೆಂಕುಲು ಸಬರ ಕೇನ್‌ಲಯೆ ||

6

ಲೋಕೊದೆಡ್ಡೆಗ್‌ಲಾದ್ ಬೆನ್ನುನ
ಈರೆ ತಪಸ್‌ದ ಸುದ್ದಿ ಎಂಕ್‌ಲ
ದಾಯೆ ಸಿವನೇ ರೂಪು ರೂಪಾದಿತ್ತೆ ಬತ್ತೆಡಲ ||
ಯಾನ್ ಬೋಂಟೆಡ್ ಕೆರ್ನ ಪಂಜಿನ್
ಜೂವೊ ಪೋಂಡಲ ಬುಡಯೆ ಪಂಡ್‌ದ್
ಪಾರ್ತ ಮನಸ್‌ದ ಕೋಪೊದಗ್ಗಿನ್ ಹರೆನೆ ನೆಯಿಮಯ್ತೆ ||

7

ಪಪ್ಪು ತಿನ್ನುನ ಪಿಲಿಯೊ ಬೋಂಟೆಡ್
ಪೆಟ್ಲೆಯಿನ ಪಂಜ್ಯೊ ಕುಲುಮೆಡ್
ಕಾಯ್ ಕೆಂಪಾದಿತ್ತಿ ಕರ್ನೊದ ಕಿಟಿಯೆ ರಟ್ಟುನೆನೊ ||
ಅರುನನ ಉಸುಲುಡುಲ ಪುಗೆಟೀ
ಕಣ್ಣೊದ ಕಿಟಿ ರಟ್ಟುನಗ ಬಿರು
ದೆರ್ತ ಪತ್ತಾದ್ ಬಾಣೊ ಕೊಲ್ಪಯೆ ನೊಂಡು ತುಚ್ಚೊಂದು ||

8

ಆ ಕಿರಾತನ ಕೆಬಿತ ಕಂಡೆಗ್
ನೋಟೊ ಪತ್ತಾದ್ ಒಂಜಿ ಬುಡಿಯೆನೆ
ಬಾಣೊ ಐನವೆ ಬೆರಿಕ್ ಬುಕ್ಕೊಲ ಒಂಜಿ ಕೊಲ್ಪಾಯೆ ||
ಅಯಿನ ಪಿರವುಡು ಒಂಜಿ ಒಂಜಿತ
ಪಿರವುಡೊಂಜೆನ್ ಬುಡ್ಡುಗಾಯನ
ಪಗರಿಲೆನ ಮುಸುಕಾಂಡ್ ಸಿವನವೆ ಮೆಯಿಕ್‌ಲರ್ಜನನ ||

9

ದಾನೆ ಪನ್ನುನೆ ಪಾರ್ತ ಬಾಣೊದ
ಏರ್ತೆ ರಬಸ್‌ನ್ ತೂದು ಪಾರ್ವತಿ
ಬಾರಿ ಅಚ್ಚಿರೊಡಾಲ್ ಪನ್ನಲ್ ಸಿವಡ ಬೆಕ್ಕೊಡು ||
ಸೂರ್ಯ ಮಂಡಲೊ ಕಬಿಡ್ ಕತ್ತಲೆ
ಆಂಡಲಪಗನೆ ಬೊಲ್ಪು ಬೆಳಗುನೆ
ಪಾರ್ತ ಬಾಣೊಡೆ ಆಪುನೆಂದ್ ಪಂಡಲಾಪಗನೆ ||

10

ಪರ್ದತೊಗು ಇನಿ ಮೈಂದ್ ಮುಸ್ಕುದು
ನಡ್ಡಯೆರೆ ಸರಿ ತೀವೊ ಇಸೊನುಲ
ನಕ್ಕು ತೂಯೊಡ ಒರಿಯೆರುಂಡೊ ಕೆಲೆಂಜಿ ರಾವೊಂದು ||

ಕಡಲ್‌ನರ್ಲವಿ ಸೂನು ತೆಕ್ಕವೊ
ಇರ್ಲ್ ಬೂರ್‌ನ ಮೈಂದ್‌ದಾ ಪನಿ
ಕಮಲ ದಂಡ್‌ಡ್ ಆನೆ ಕಟ್ಟಿರೆ ಸಾದ್ಯೊ ಇದ್ಯತ್ತೊ ||

11

ಸಿವನ್ ಪಾರ್ತಗ್ ಗೆಲ್ವೆರೆಗ್ ಇನಿ
ಲಡಯಿ ಮಲ್ತಾದ್ ತೀರೊ ಪಂಡ್‌ದ್
ಗುಹ ಗಣಪೆರೊಟ್ಟಾದ್ ಲಕ್ಕಿರ್ ಬೂತೊಗಣೊ ಮಾತ |
ಮುಕುಲೆನಬ್ಬರೊ ತೂದು ಸಿವನೇ
ಪನ್‌ಪೆನಾಪಗ ಎಂಕ್ ನಿಕ್‌ಲೆನ
ಲೆಕೊನೆ ಇತ್ತನ ಬಗ್ಗೆ ಪಾರ್ತನೆ ಮೇಲ್ ಬೂರೊಡ್ಡಿ ||

12

ನರನ ಮೇಲ್‌ಗ್ ಒಂಜಿ ಪರಿತೆದ
ಪಗರಿ ರಾಪಯೆ ಸಿವನೆ ಐನ್‌ಲ
ಎದುರುದಸ್ತೊನು ಬುಡುದುಲಪಗನೆ ತುಂಡುರಟ್ಟಾಯೆ ||
ಪೆರಪ ಮಂತ್ರೊದ ಬಾಣೊ ಬುಡ್ಡೆನ್
ಸಿವನೆ ರಟ್ಟದ್ ಬುಕ್ಕೊ ಬುಡಿಯೆನೆ
ಪಗರಿನೀಸ್ವರೆ ಪಾರ್ತೆ ಪೊಡಿ ಪೊಡಿ ಮಲ್ತೆನಾಪಗನೆ ||

13

ಬಾಣೊ ಬುಡ್ಡುನ ಸತ್ತೊ ಸಾಸೊಡು
ಬಾರಿ ಗಟ್ಟಿಗೆ ಸಬರೆ ಪಂಡ್‌ದ್
ತಾನ್ ಮನಸ್‌ಡ್ ಪುಗರ್‌ದಾಯನ್ ಪಾರ್ತೆನೆದುರಾದ್
ಪೊಸತ್ ಪರಿತೆದ ಬಾಣೊ ದೆತ್ತೆನೆ
ಅಪಗನೇ ಕಿಟಿ ರಟ್ಟದೈನೇ
ಬುಡಿಯೆ ಒಂಜಿತ ಪಿರವುಡೊಂಜೆನ್ ಸ್ವೇತವಾಹನೆನೆ ||

14

ಈಡ್ ಪತ್ತಾದ್ ಬುಡ್ಡು ಬಾಣೊಲು
ಗಾಂಡಿವೊನು ನಡ್ಡಾದ್ ಪಿದಡ್‌ದ್
ಆ ಮಹೇಸನ ಮೇಲ್ ಕಂತಿಯೊ ಎಂಚಿನದ್ಪುತೊನೊ ||
ಬಾಣೊ ಕಂತ್‌ನ ಬೇನೆ ತಡೆದಲ
ಪಾರ್ತ ಸೌರೊನು ಸಿವನೆ ಮೆಚ್ಚಿಯೆ
ಆ ಧನಂಜಯೆನಪಗ ಮೂಡಿಗೇ ಕಾಲಿ ಮಲ್ತೊಂಡೆ ||

15

ಈ ಕಿರಾತೆರೆ ಕೂಟೊಡೊರೈನೆ
ವೀರೆ ಸೈ ಸೈ ಎನ್ನ ಎದುರುಗು
ದೇವ ದಾನವೆರೆಲ್ಲ ಉಂತಯೆರಿತ್ತೆ ಈ ಉಂತ್ಯ ||
ಎನನ್ ಗೆಲ್ತಾದ್ ಪುದರ್ ಪಡೆಲಯೆ
ಸಬರ ಪಂಡ್‌ದ್ ದಿವ್ಯೊ ಬಾಣೊನು
ಬಿರುಕು ಕೊಲ್ಪದ್ ಬುಡಿಯೆ ಪಾರ್ತೆನೆ ಚಂದ್ರ ಸೇಕರಗ್ ||

16

ಏತ್ ಮಂತ್ರೊದ ಬಾಣೊ ರಾಪದ್
ಆಂಡಲಾ ಸಿವೆ ನಿಂಗೈ ಮಾತೆನ್
ಸಾದನೆಡ್ ಬುಕ್ಕೊಂಜಿ ಬುಡ್ಡೆನ್ ತುಂಡು ರಟ್ಟನಗ್ ||
ಈತ್ ಬಿಸೆನೆ ಏರ್ ಪನ್ನುನ
ಗ್ರೇಯ್ ಪಾರ್ತಗ್ ಆಯ್ವಿಲಾಯೆನೆ
ವೀರ ಚಿತ್ರಲೆ ಜಾತಿ ಸುಬವೊಡು ಪುದರ್ ಪಡೆಯಿನಯೆ ||

17

ತನ್ ಕಾಂಡವ ಬನೊನು ಪೊತ್ತದ್
ತಿಕ್ಕನಚ್ಚೆಯೊ ಬಾಣೊ ಪೂರಲ
ಲೆಕ್ಕೊಗೇ ಇದ್ಯಂದಿ ನಮನೆನೆ ಆಂಡೆ ಪಂಡೊಂದು ||
ಎನ್ನ ತಪಸ್ಗ್ ಈ ಸನೀಸ್ವರೆ
ಅಡ್ಲೊ ಬತ್ತೆನೆ ಅಯ್ಯೊ ಸಿವ ಸಿವ
ಪನ್ದ ಬಿಲ್ಲೆಡೆ ಹಾಕೈನರುನೆ ಆ ಸರ್ವೆಸ್ವರಗ್ ||

18

ಪೆಟ್ತ್ ತಾಗ್ನ ಬರೊಟು ಗಾಯೊಡೆ
ನೆತ್ತೆರಿಪುನ ತೂದು ಗರ್ವೊಡು
ಬುಕ್ಕೊ ಬುಕ್ಕೊಲ ನೋತನಾಡೆಗೆ ನೋತೆನಾ ಪಾರ್ತೆ ||
ಎಲ್ಯ ತೆಲಿಕೆಡ್ ಕೂಲಿ ಬುಡುದೇ
ಬಿಲ್ಲೆನೊಯ್ತದ್ ಸಿವೆನೆ ಪಾರ್ತನ್
ತನ್ನ ಎದುರುಡು ಬೋಳು ಕೈಟೇ ಉಂತದಾನಗನೆ ||

19

ಆಯುದೊಲು ಮುಗಿದಾದ್ಲರ್ಜನೆ
ನಾಲ್ ಗುದೈನೆ ಬೆರಿಕ್ ಸಬರನ
ಈಯೆ ಸೈತ್ತದ್ ಮಣ್ಣ್ ಮುಕ್ಕುಲ ಪಂಡ್‌ದಾಪಗನೆ ||
ಏತ್ ಪುಣೆಯೆಡ ದಾನೆ ಪಾರ್ತನ
ಬೇಳೆ ಬೆಯ್ತಜಿ ಸಿವನ ಎದುರುಡು
ತಾನ್ ಸೈರೊದ ಆಸೆ ಬುಡುದೇ ಮರ್ಲ್ ಕಟ್ಟಿಯೆನೆ ||

|| ಪಾರ್ತನ ಮಲ್ಲ ಯುದ್ಧೊ ||

ಮರತ ಗೆಲ್ಲೆಡ್ ಗುಂಡು ಕಲ್ಲೆಡ್
ಬೊಡಿಯೆನರುನೆ ಹಾಕ್ ಹಾಕ್‌ದ್
ಮೆದ್‌ಕಯೆರೆ ಸರಿ ತೀರ್ತಿ ಮೈತ್ಯುಂಜಯನ ಕಾರ್ಬರ್‌ಡ್ ||
ಅಡರ್ ಗೆಲ್ಲೆನ್ ಒಯ್ತ ದಕ್ಕದ್
ಕಯಿತ ಕಲ್ಲೆನ್ ರಟ್ಟದಾಯಡ
ಪನ್‌ಪೆ ತಮ್ಮಡಿ ಕನಲ ಆಯುದೊ ನಿನಡ ನನ ಉಂಡೊ ||

1

ಆಯುದೊಲು ದಾಯೆಗ್‌ಯ ನಿನ್ನಡ
ಕಾದಿಯೆರೆ ಬುಜೊ ಸತ್ತೊ ಇದ್ಯೊಯ
ಈಯೆ ಬಲ ಎದುರುಂತು ಪಂಡ್‌ದ್ ಪುಂಡಿ ಬಿಗಿತೊಂಡೆ ||
ಎನ್ನ ಬುಜೊ ಸಗ್ಗಿದವೆ ಪೆಟ್ತ್‌ಡ್
ನಿನ್ನ ಜೂವೊನು ಎಂಚ ಕಾಪುವ
ಪನ್ದ ಬುಜೊ ರಟ್ಟಾದ್ ಎದುರುಗು ಬತ್ತೆನಾ ಪಾರ್ತೆ ||

2

ತೂಯರೋ ಸುತಿ ಸಾಸ್ತೊ ದೇವಿಲು
ತೂಯರೋ ಗುಹ ಗಣಪ ಮುಕ್ಕೈರ್
ತೂಯರೋ ಈ ಪಾರ್ತೆ ಎನ್ನಡ ಯುದ್ಧೊ ಮಲ್ಲುನೆನ್
ನಾಲ್ ತಿಂಗೊಳು ಬಜವು ತಿಂದ್‌ದ್-
ಲಾದ್ ಗಾಳಿಡೆ ಬದ್‌ಕನಾಯೆನೆ
ಕಾದ್‌ದೆದುರುಂತನೆನ್ ತೂಯರೋ ಪಂಡೆನಾ ಸಿವೆನೆ ||

3

ಆಯುದೊಲು ಮುಗಿದಾದ್ ಪೋಡೈನೊ
ವೀರ ತೇಜಿಯೆ ಕಮ್ಮಿಯಾತ್‌ಜಿ
ಆಯ ಬುಜೊ ಸಗ್ಗಿಲ ಕೊರತೆನೆ ಉಂಡೊ ಪನ್‌ಲೆನಡ ||
ತೂಲ ಪಾರ್ವತಿ ಬುಜೊನು ರಟ್ಟಿವಿ
ಪಾರ್ತನೊರೊ ತೂವೊಂದು ಗ್ರೇಯ್ವುಲ
ಈತ್ ಸಾಮರ್ತಿಕೆಲು ಏರೆಗ್ ಉಂಡು ಚಿತ್ರಲೆಡ್ ||

4

ಅನಿದಾ ನಾರಾಯಣನ ಜತೆ-
ತಾಯೆನೇ ನರೆ ಇಂಬೈ ಹರಿನವೆ
ಕೂಟೊದಾಯೆನೆ ಆದ್ ಎನ್ನವೆ ಬಗ್ಗೆ ತೆರಿಯೊನುಲ ||
ಪಾಸು ಪತೊ ಬಾಣೊನುಲ ಎನ್ನಡ
ಕೇನ್ದ ಪಡೆಯೆರೆ ತಪಸ್ ಮಲ್ತದ್
ರಾಗೊ ದ್ವೇಸೊನು ಬುಡುದು ಇಂದ್ರಿಯೊ ಬಿಗಿತ್ ಪತ್ತನಯೆ ||

5

ಬಾಣೊ ಪತ್ತೆರೆಗಿಂಬೈ ಎಗೈನೊ
ತೂಲ ದೇವಿಯೆ ನನಲ ಪಾರ್ತನ
ಸೂರ ಸಾಸೊನು ಮಾತ ಪಂಡ್‌ದ್ ಆಯಗೆದುರಾಯೆ ||
ಇರ್ದೆರ್‌ಲ ಕೈ ಕೈನ್ ಪತ್ತೈರ್
ಮಲ್ಲ ಯುದ್ಧೊದ ಪತ್ತ ಪತ್ತೆರೆ
ಉಡೈರೇತೋ ಪೊರ್ತು ಓಂಗುದು ಓಂಗ್‌ದಾಕ್‌ಲೆಲ ||

6

ಪತ್ತಿ ಪತ್ತನ್ ಬುಡ್ವುನ ಸರಿ
ಬುಡ್ವನಗ ಅಯಿನಮತ್ ಪತ್ತದ್

ಉರುದುಡಾರ್ಡಾಟಿಗೇನೆ ಜೋರುಡು ಆಂಡ್ ಪುರೇಲೊಂದು ||
ಇಂಬ್ಯ ಪತ್ನ್ ಆಯೆ ಬುಡ್ವವೆ
ಇಂಬ್ಯಲಾ ಆಯನೆನ್ ಬುಡ್ವವೆ
ಇಂಚ ಏತೋ ಪೂರ್ತು ನೂಕ್ಯೆರ್ ವೀರೆರಿರ್ದೆರ್ಲ ||

7

ಪತ್ತ್ ಪತ್ತುನ ಪತ್ತ್ ಬುಡ್ವವಿ
ಮಲ್ಲ ರಬಸ್ಡ್ ಬೂರ್ಡ್ ಪುಡೆರ್ಡ್
ಬುಕ್ಕೊ ಲಕ್ಕೊ ಪತ್ತ್ ಪತ್ತೆರ್ ಪುಡೆರ್ ಪುಡೆರೊಂದು ||
ಪಿರಲ ಬೂರ್ದೆರ್ ಬೂರ್ದು ಪುರೇಲ್ತೆರ್
ತೆರಣೊ ದೈರೊಡು ಸತ್ತೊ ಸಾಸೊಡು
ತನ್ಕ್ ಸಮೊ ಸಮೊ ಪಾರ್ತ ಪಂಡ್ಡ್ ಸಿವೆನೆ ನೆನೆತೊಂಡೆ ||

8

ಎನ್ನ ಪತ್ತ್ಗ್ ತಿಕ್ಕುಜನೆ ನಿನ-
ನಿತ್ತೆ ಕೆರ್ದೆನೆ ಪಂಡ್ಡ್‌ದಜುನೆ
ಗುದ್ದು ಗುದ್ದೆನೆ ಪುಂಡಿ ಬಿಗಿತ್‌ದ್ ತಿಗಲೆಗೀಸ್ವರನ ||
ಗುದ್ದು ಗುದ್ದಡ ದಾನೆ ಕೈಕುಲೆ-
ನೆನ್ನವಿನಿ ಯಾನಡವು ದೀತ್‌ಜಿ
ಪನ್ದಲಾ ಸಿವೆ ಪಾರ್ತ ತಿಗಲೆಗ್ ಒಂಜಿ ಗುದ್ದೆನೆಲ ||

9

ಪಿರವು ತಿಗ್ಡ್ ಹಾಕೈನೀಸ್ವರ
ತಿಗಲೆಗೊಂಜೇ ಪೆಟ್ಟು ಪಾಡ್ಕಿಗ
ಪೆರಪ ಹಾಕಿಯೆ ಪಾರ್ತ ತಿಗಲೆಗ್ ಸಬರ ಏಸೊದಯೆ ||
ಆಯಗಿಂಬ್ಯನೆ ಇಂಬ್ಯನಾಯಗ್
ಹಾಕ್ ಹಾಕ್‌ದ್ ತರೆಕ್ ತಿಗಲೆಗ್
ಮಾತ ಗಾಯೊನೆ ಆಂಡ್ ಬಂಜಿಡ್ ಬೆರಿಟ್ ಸರಿಯಾದ್ ||

10

ತ್ರಾಣೊ ಎಂಚಿನವಪ್ಪ ಇಂಬ್ಯಡ
ಗಾಳಿ ನಿಂಗ್‌ದ್ ಬದ್‌ಕ್ ನಾಯಗ್
ಬಾರಿ ಗಟ್ಟಿಗೆ ವೀರೆ ಸೈ ಸೈ ಮೂಜಿ ಲೋಕೊಡುಲ||
ಯಾನ್ ತೂತ್‌ಜಿ ವೀರನಿಂಚಿನ
ದಾಯೆ ಮಚ್ಚೆರೊ ಗುಣೊಕು ಪಾರ್ವತಿ
ತೂಲ ಪಂಡ್‌ದ್ ಪುಗರ್ ದಾಯನ್ ಶಿವೆನೆ ತೆಲಿತೊಂಡೆ ||

11

ಯಾನ್ ಮೆಚ್ಚಿಯೆ ನಿಕ್ಕ ಎನ್ನಡ
ದೇವ ದಾನವನಕ್‌ಲ್ ಕಾದ್ದೆರೊ
ಈಯೆ ಕಾದಯೆ ಈತ್‌ನೇಟಲ ಬಾರಿ ಬಿಸೆತ್ತೊ ||
ಏರ್ ಈ ಪನ್ ಸೂರೈನೋ ದೇ-

ವೇಂದ್ರೆನೋ ಸಿವ ಮಗೇನೊ ಹರಿಯೋ
ಆ ಸದಾಸಿವೆನಂದೊ ಪಂಡ್‌ದ್ ಗೆಬ್ಬು ಗೆತ್ತಾಯೆ ||

12

ಬೂರಿ ಪೆಟ್ಟೆನ್ ಕೈಟ್ ಪೂಜೆಕ್‌ದ್
ಕಾರ್ಡ್ ತೊರಿತೆನೆ ನರ ಮುಸುಂಟುಗು
ಮೂಂಕು ಬಾಯಿಡೆ ಜತ್ತದಾಂಡ್‌ಲ ದಾರೆ ನೆತ್ತೆರ್‌ದ ||
ಪಾರ್ತ ಪೆಟ್ಟೆದ ಬೇನೆಗೇನೇ
ಜೋರ್ದು ತೊರಿತೆನೆ ಅಯ್ಯೊ ಹಾ ಹಾ
ದಾನೆ ಮಲ್ಲುನೆ ಪನ್ದ ಸಿವೆನೇ ದಿಂಜ ಮರ್ಗಿಯೆನೆ ||

13

ಪಾರ್ತ ಗರ್ವೊದ ಗಿರಿಯೆ ಜರಿದ್‌ಲ
ಆಂಡ್ ಸಗ್ಗಿದ ಬುಲೆಕ್ ಕುಂದೆಲ್
ಮಾತ ಇಂದ್ರಿಯೊ ಬಚ್ಚಿದಾಪಗ ಬುದ್ಧಿ ಮಂದಾಂಡ್ ||
ಬೆಗರ್ ನೆತ್ತೆರ್ ದಾರೆ ದಾರೆಡ್
ಅರಿದ್‌ಲಾನಗ ದಾನೆ ಮಲ್ಲುನೆ
ಪನ್‌ಪಿ ಏಚನೆ ಆಯ್ಲಿಲಾಯಗ್ ದುಕ್ಕೊ ಉರ್ಕರ್‌ದ್ ||

14

ಏರೆ ರುತೊ ಬಂಗೊನುಲ ಮಲ್ಲೆನೊ
ವಾವ ದೈವೊಲೆ ಪಗೇನ್ ಕಟ್ಟೆನೊ
ಓಲು ಸಿವ ಬಗ್ಗೆರೆಗ್ ಏನನ್ಯಾಯೊ ಮಲ್ತೆದನೊ ||
ಹಿರಿಯೆರೆರೆನ್ ನೆರ್ದೆನೋ ಸಿರಿ
ಹರಿನ್ ದೂರ್ದೆನೊ ಧರ್ಮಾನಾಸೊನು
ಕರಿನ ಜಲ್ಲೊಡು ಏನ್ ಮಲ್ತೆನೆಟಿಂಚಿ ಸೋಲಾಯ್ತೆ ||

15

ಸಬರೆನಿಂಬ್ಯೆನೊ ಯಾನ್ ಪಾರ್ತೆನೊ
ಪನ್‌ಪಿ ಸಂಸಯೊ ಎಂಕ್ ತೂನಗ
ಸಬರೆ ಏತೆಕ್‌ಲತ್ತ ಇಂಬ್ಯೆನೆ ವೀರನರೆನತ್ತೊ ||
ಸಬರ ಪಾರ್ತೆರ್ ತಿಗ್ಡ್ ಮುಗೊನೆ
ಮುಲುಪ ತೋಜುನೆ ಎನ್ನ ಕಣ್ಣೆಗ್
ನಡುತ ಪಾಂಡವೆ ಕುಂತಿನಾ ಮಗೆ ಯಾನೊ ಸಂಸಯೊನೆ ||

16

ಪಂಜಿ ದಾಯೆಗ್ ಮಾಸೊ ತಿನ್ನೆನೊ
ಬೋಂಟಿಗಾರಡ ಲಡಯಿದಾಯೆಗ್
ಎಂಕ್ ತೂನಗ ಸಬರೆ ಮರ್ಯಾದಿ ಕಳೆಯೆ ಇನಿ ಎನ್ನ ||
ಆ ಸದಾಸಿವೆ ದಯೆನ್ ದೀಡ್ಡೆನೊ
ಆಯ ಬಗ್ಗಿನ್ ಕಮ್ಮಿ ಮಲ್ಲೆನೊ
ಬಾಗ್ಯೊ ಹೀನೆನೆ ಯಾನ್ ಪಂಡ್‌ದ್ ದುಕ್ಕೊ ಮಲ್ಲೊಂಡೆ ||

17

ಪೊಕ್ಕಡೇನೇ ಚಿಂತೆ ಮಲ್ತಾದ್
ಕುಲ್ದಿತ್ತೆಡ ದಾನೆ ಪ್ರೇಜನೊ
ಇತ್ತೆನೇ ಸಿವ ಸರಣೆಯಾದೇ ಗೆಲ್ವೆನಿಂಬ್ಯನಾಲ ||
ಗಣ್ಯೊ ಮಲ್ಪಂದೇನ್ ಕಾದಾದ್
ಬುಕ್ಕೊ ಒಂಜೇ ಗಳಿಗೆಡಿಂಬ್ಯನ್
ಮಣ್ಣ್ ಮುಕ್ಕವೆ ಪನ್ದ ಮನಸ್ಡ್ ಮಲ್ತೆ ನಿಚ್ಚೆಯೊನು ||

|| ಸಗ್ಗಿಡಾಯಿಜಿ ಪನ್ದಲರ್ಜುನೆ ಬಗ್ಗಿಡೇ ತೂಪೆ ||

ರೂಪು ಇದ್ಯಂದ್ನಯ ರೂಪೊನು
ಪೂಜೆಗಾದೇ ಮಲ್ತೆ ಪೊಯ್ಯೆಡ್
ಆ ಸದಾಸಿವಲಿಂಗೊ ಮಂತ್ರೊದ ವಿಧಿ ವಿದಾನೊಲೆಡ್ ||
ಕೇಪುಲುದ ಪೂ ಬುಕ್ಕೊ ಕಾಡಾದ್
ಪುಸ್ಪೊಡರ್ಚನೆ ಮಲ್ತೆ ದಾಯೆನೆ
ಪೂಜೆ ಸಂದಯೆ ಸಿವನ ಸರ್ವೇಸ್ವರನ ಬಗ್ಗಿಡ್ಲ ||

1

ಅಯಿನ್ ಅಚ್ಚರೊಡಿತ್ತಿ ಸಿವನವೆ
ಜಪೊನು ಮಲ್ತಾದ್ ಲಿಂಗೊಗಾಯೆನೆ
ಸರಿಟ್ ಸುತ್ತನು ಬತ್ತದಡ್ಲೊನೆ ಬೂರೈ ಬಗ್ಗಿಡ್ಲ ||
ಸುರೆರೆ ದಿವಿಜೆರೆ ದೇವರೀಯೇ
ಗಿರಿಜೆನರಸುಲ ಬಗ್ಗಿ ಬಾಂದವೆ
ಕರುಣೆ ದೀಡೊಡು ದೇವ ದೇವೊತ್ತಮೆನೆ ಸರ್ವೇಸಾ ||

2

ಸಬರ ಬಲ ಬಲ ನಿನ್ನ ಪೆರಣೊನೆ
ಉಲಯಿಗಾಂಡ್ನಯ ಎನ್ನ ಪುಂಡಿಡ
ಸಿವನ ಬಲೊ ಉಂಡಂಕ್ ನಿನ್ನವೆ ಜೂವೊ ಪುಂಟುವೆನೆ ||
ಮಿಸ್ಕುಡಿತ್ತೆನೆ ನಿನ್ನ ನಾಲಿನ್
ಕುದ್ದೆ ಪೀಂಟದ್ ಕೆರೈ ಉಂತುಲ
ಪನ್ದಲರ್ಜುನೆ ಮಾರ ಮಾರಿಗ್ ಉಂತನಾಪಗನೆ ||

3

ತೂಯೆ ಪಾರ್ತೆನೆ ಕಣ್ಣೆ ಬುಡುದೇ
ಆ ಕಿರಾತನ ತರಟ್ ಪುಸ್ಪೊದ
ಮಾಲೆನಾಯೆನೆ ಪೂಜೆ ಮಲ್ತಾದ್ ಲಿಂಗೊ ಗರ್ಪಿತನ ||
ತಿರ್ಗ್ ದೀಪೆಕ್ ತೂಯೆ ಲಿಂಗೊಡು
ಪುಸ್ಪೊ ಇದ್ಯಂದ್ನನ ತೂದುಲ
ಅಚ್ಚಿರೊಡು ನಿಜೊ ಬಿಂಗಿರಿಯೆ ಆದಾಯೆ ಸಾದನೆಡ್ ||

4

ಆವಡವು ಪಂಡೊಂದು ಲಿಂಗೊನು
ವೇದೊ ಮಂತ್ರೊಡು ಸುದ್ದೊ ಮಲ್ತಾದ್
ಪೂಜೆ ಮಲ್ತೆನೆ ಒಂಬೊ ನಮನೆದ ಬಗ್ಗಿ ಬಾವನೆಡ್ ||
ದುಂಬು ಮಲ್ತನ ಲೆಕೊನೆ ಪುಸ್ಪೊನು
ಲಿಂಗೊಗರ್ಪಿತೊ ಮಲ್ತೆ ಸೋತ್ತೊನು
ಪಂಡೊನುಂದೇ ಸುತ್ತು ಬತ್ತಾದ್ ಬುಕ್ಕೊ ಎದುರುಂತ್ಯೆ ||

5

ತೂನಗುಂತುದು ಸಬರನಾಪಗ
ಆಯನೆತ್ತಿಡ್ ತಾನ್ ಲಿಂಗೊದ
ಪೂಜೆಗರ್ಪಿತೊ ಮಲ್ತಿ ಪುಸ್ಪೊನು ತೂದು ಬೆಕ್ಕಸೊಡು ||
ಆಚಿರೊಡು ಬಿಂಗಿರಿಯೆ ಆದ್ಲ
ಪೋಡಿಗಡ್ ನಡ್ಗೊಂದು ಪಾರ್ತೆನೆ
ತಾನ್ ಕಣ್ಣೆನ್ ಬುಲದ್ ಮುಚ್ಚಿಯೆ ಮಲ್ಲ ಇಸ್ಕೆಯೊಡು ||

6

ರೂಪು ರೂಪಾದಿತ್ತೆ ಸಿವನೇ
ಲೋಕೊ ಪದನಾಲೆನ್ಲ ರಚ್ಚಣೆ-
ಗಾಪುನಾಯೆನೆ ಸಬರ ರೂಪೊಡು ಎನನ್ ಕಾಪೈರೆಗ್ ||
ತಾನೆ ಬತ್ತನೆ ಪನ್ದ ತೆರಿಯೆನೊ
ಪಾಸೊ ಪತ್ತನ ಪಿತ್ತೊ ನೆತ್ತಿಗ್
ಏರ್ದ್ ಇಂಚಾಂಡತ್ತೊ ಸಿವ ಸಿವ ಪನ್ದ ಬುಲೊಂಡೆ ||

7

ಬಗ್ಗಿಡಾಯನ ಹೃದಯೊ ದಿಂಜಿದ್
ಕಣ್ಣೆಗೇ ಪೋಡ್ಯಾಂಡ್ ತೂಯೆರೆ
ಇಸ್ಪೊನಾತನ ದರ್ಸನೊಡು ಸರಿ ರೋಮೊ ಕೊಕ್ಕೆರ್ದ್ ||
ಜತ್ತದಾಯನ ನೀರ್ ಕಣ್ಣೆಡೆ
ಹೆಡ್ಡೆ ಆಯಿನ ಪೋಡಿ ಮನಸ್ಡ್
ಆತ್ಮೊಗಾನಂದಾಂಡ್ ಸಿವನವೆ ರೂಪು ತೂಯಿನೆಟ್ ||

8

ಬುಡಿಯೆನೇತೊ ಬಾಣೊನಿಂಬ್ಯನ
ಸಯಿರೊ ಸೋಂಕಂದವುಲ ರಚ್ಚಣೆ
ತೆರಿಯೆನೋ ಯಾನೈನ್ ನಿಂಗ್ನ ಪಗರಿ ಏತಾವು ||
ಸಬರೆ ಇಸ್ಕೆಯೊನೆಂಚ ಮಲ್ಪುನೆ
ತೆರಿಜಿ ಎನ್ನವೆ ಜಾಡ್ಯೊ ಬುದ್ಧಿಡ್
ಕರಿನ ಜಲ್ಲೊದ ಸೋಂಕು ಕಣ್ಣೆಗ್ ಅಡ್ಲೊ ಬತ್ತನೆನೊ ||

9

ಏರೆನ್ಲ ಜಪೊಯ್ಚೊ ಕಾರ್ಯೊಡು
ಪೂಜೆ ಮಲ್ತಾದ್ ಪದವಿ ಪಡೆವೆರೊ

ಏರೆನ್‌ಲ ಸನಕಾದಿ ರುಸಿಕುಲು ಸೇವೆ ಮಲ್ಪುವೆರೊ ||
ಆಯೆನೇ ಓಂಕಾರೊ ಸವ್ವೊಡು
ಸೂಸಿಮೊದ ಬೊಟ್ಟಾದ್ ಉಪ್ಪುನ
ಸ್ವಾಮಿ ಆಯಡ ಯುದ್ಧೊ ಮಲ್ತೆನೆ ಸಿವ ಮಹಾದೇವ ||

10

ಲೋಕೊಡೇರೆನ ಮಾಯೊ ಇಸ್ವೊದ
ಏರ್‌ಕರ್ತುಲ ಸೂರ್ಯ ಚಂದ್ರರ್
ಬಾನೊದಾರೆಗ್ ಗ್ರಹತರಾಸಿಲೆಗೇರ್ ಯಜಮಾನಿ ||
ಏರೆತೇಜಿಡ್ ಲೋಕೊ ರಚ್ಚಣೆ
ಆಪುನೆನೊ ಕಡೆಗಾಲೊ ನಾಸೊದ
ಕಾರ್ಯೊ ಏರೆನ ಪನ್ನ್ ತೆರಿಯಂದೇನ್ ಕಾದಿಯೆನೆ ||

11

ಜೀವೊ ರಾಸಿದ ಚಿತ್ತೊ ಸಾಕಿಯೆ
ಈ ಚರಾಚರ ದಿವ್ಯೊ ಚೇತನೊ-
ಗೇರ್ ಈ ಕ್ಷೇತ್ರಜ್ಞಾನಂತರ್ಯಾಮಿ ಪರಸಿವೆನೆ ||
ಮಾತೆರಾತ್ತೊಡು ಏರ್ ಉಪ್ಪುನೆ
ಆಯೆನೇ ಪರಮಾತ್ಮನೀಸ್ವರೆ
ಆಯಡನೆ ಕಾದನೆನೊ ಸಿವ ಸಿವದಾನೆ ಪನಡೇನ್ ||

12

ಆ ಅಕಾರೊ ಉಕಾರೊ ಬುಕ್ಕೊ ಮ-
ಕಾರೊ ಸೇರ್‌ದ್ ಒಂಜೆ ಅಚ್ಚರೊ-
ಡಾಯೆ ಪರಿ ಪೂರ್ಣಾದ್ ದಿಂಜಿದ್ ರೂಪೊಡಚ್ಚಿಯೆನೆ
ಏರ್ ಪಾತೆರುನಾಯೆ ಮನೊಡು
ಏರ್ ಉಪ್ಪುನೆ ಪಾತೆರೊಗು ನಿಚೊ
ಏರ್ ಕಡಿಯಣೊ ಆಯಗೇನೇ ಸರಿಟ್ ನೆರೈತ್ತೊ ||

13

ರೂಪೊ ಇದ್ಯಂದ್‌ನಯನೆದುರುಡು
ಬಾರಿ ಬಿರ್ಸದ ಮಲ್ಲಯುದ್ಧೊನೆ
ಜೂವೊ ದೆಪ್ಪೆರೆ ಬಾಣೊ ಮೃತ್ಯುಂಜಯಗ್ ಬುಡಿಯೆತ್ತೊ ||
ನೆರ್‌ದ್ ಮಸ್ತಿರಿ ಮಲ್ತೆ ಯುದ್ಧೊಡು
ಪರಮ ಸಾಸ್ತ್ರೊಲು ಪುಗರುನಾಯನ್
ಲಡಯಿಡಿಂಚನೆ ಎನ್ನ ಸಮಕ್ಕೆ ಸಿವ ಮಹಾದೇವ ||

14

ರಡ್ಡ್ ಕಣ್ಣೊದ ಎಂಕ್ ಇಸ್ವೊದ
ಕಣ್ಣೊದಾಯಡ ಲಡಯಿ ಬುಜೊಕುಲು
ರಡ್ಡ್ ಎಂಕೇ ಇಸ್ವೊ ಬುಜೊತಾಯಡನೆ ಸಂಗ್ರಾಮೊ ||
ಬೂಮಿಯೇ ಕಾರಾದ್ ತರೆ ನಿಚೊ

ಆಕಸೊನೆ ಕಣ್ಣುಗುಳು ತೇಜಿದ
ಸೂರ್ಯ ಚಂದ್ರರ್ ಮೆಯಿಟ್ ಗಣೊಕುಲು ಕೈಕುಲೇತ್‌ಂದ್ ||

15

ಪನಿಯೆರೆಗ್ ತೀರಂದಿ ರೂಪೊನೆ
ಮುನಿಕುಲೆಗ್ ತೋಜುನವೆ ಮಾತ್ತೊನೆ
ನೆನೆಪುನಗ ಪೋಡ್ಯಾವೊಡಂಚಿನ ಇಸ್ವೊ ರೂಪೊಡನೆ ||
ಸಿಪ್ಪಿ ಸಿತಿ ಲಯೊ ಪನ್ನಿ ಗೊಬ್ಬುಡು
ಉಪ್ಪುನಾಯೆನೆ ಜೀವೊರಾಸಿಲೆ
ಕಸ್ವೊ ಸುಕೊ ತೆರಿಯೊಂದು ಉಪ್ಪುನ ಸಿವಡ ಕಾದಿಯೆನೆ

16

ಮೂಜಿ ಮೂರ್ತಿಲು ಸೇರ್‌ದೇರೆನ
ಪಾದೊ ಪೂಜೆನ್ ಮಲ್ಪುವೆರೊ ನಿಚೊ
ಆ ಮಹಾ ಸಗ್ಗಿದವೆ ರೂಪೊನೆ ಪೋಣ್ಣು ಆವೊಂದು ||
ಏರೆ ಪಾದೊಗು ತರೆನ್ ಬಗ್ಗದ್
ಸೇವೆಡುಲ್ಲೊ ಅಂಚಿ ಮಹಿಮಡ
ಕಾಳಗೊಗು ಎದುರುಂತ್ಯೆ ಹಾ ಹಾ ಪಾಪಿ ಯಾನಾಯೆ |

|| ಸಿವನ ನಿಚೊ ರೂಪೊ ||

ಪಾರ್ತನಾ ಮನಸಿಂಚಿ ಬೆಯ್ಪುನ
ತೂದು ಸಬರನ ಏಸೊ ಮೆಲ್ಲಡೆ
ಜಾರ್ ಜಾರ್‌ದ್ ಆಂಡ್ ಚಿನ್ಮಯ ರೂಪೊ ಸಾದ್ಯಸ್ವೊ ||
ವೀರ ಪಾರ್ತನ ಎದುರುಡುಂತ್‌ನ
ತೂದು ತೂಯೆನೆ ದಿಪ್ಪಿ ದೆಪ್ಪಂ-
ದಾಯೆ ಮರಕಟೊಂದು ಉಂತ್ಯೆನೆ ಕೈನ್ ಮುಗಿಯೊಂದು ||

1

ಪಾರ್ತ ಪುಣ್ಯೊಡು ಸನಕ ಸೌನಕ-
ನಾಕ್‌ಲೆಗ್ ಸಾದ್ಯರೆಗ್ ಗೋಚರೊ
ಆವಂದಿತ್ತನ ದಿವ್ಯೊ ರೂಪೊಡು ಉಂತ್ಯೆನಾ ಸಿವೆನೆ ||
ಮೇಲ್ ಲೋಕೊದ ದೇವ ದೇವತೆ-
ನಾಕ್‌ಲೆಲ ಆಕಾಸೊಡುಂತುಡು
ತೂಯೆರಾಸಿವ ರೂಪೊ ಬಗ್ಗಿಡ್ ಸೋತ್ತೊ ಪಂಡೊಂದು||

2

ಚಂದ್ರ ಕಿರಣೊದ ಎರಕೊದಂಚಿನ
ಕಾಂತಿ ಸೈರೊಡು ಪಿಲಿತ ಚರ್ಮೊಡು
ಕೆಂಪು ರಂಗ್‌ದ ಕುಜಲ್‌ದಾ ಜಿಡೆಟಿತ್ತೆ ಚಂದ್ರನೆಲ ||
ಸರೊ ಮಾಲೆಡ್ ಬಸ್ಸೊ ಪೂಜಿದ್

ರಚ್ಚಣೆದ ಬರವಸ್‌ನ್ ಕೊರ್ಪುನ
ದಿವ್ಯೊ ಕೈಕುಲು ಇಸೊನು ನಿಂಗ್‌ನ ಮಜೊನೆ ಕಂಟೆಲ್‌ಡ್ ||

3

ದೇಹೊ ಕುಂಕುಮೊ ರಂಗ್‌ಡಿತ್ತ್‌ದ್
ಆನೆದಾ ಬೆರಿ ಚರ್ಮೊ ತುತ್ತುದು
ಸಾಲ್ ಕೂಲಿದ ಪ್ರಬೆಟ್ ತೆಲಿಕೆದ ಮೋನೆ ತಾಮರೆದ ||
ಸೂಲೊ ಪತ್ತ್‌ನ ಕೈಟ್ ಅಚ್ಚೊದ
ಮಾಲೆ ಪತ್ತ್‌ದ್ ಉಂತ್‌ದಿತ್ತ್‌ನ
ವಾಮ ದೇವನ ಮೋನೆದಾ ಸಿವೆ ಪಾರ್ತನೆದುರಾದ್ ||

4

ಕುಡರಿ ಡಮರ್‌ನ್ ಕಡ್ಲೊ ಕೇಟಕೊ
ಬಿರುಪಗರಿ ಸೂಲೊನುಲ ಕೈಟೇ
ನರಕಪಾಲೊನು ಪತ್ತ್‌ದುಂತಿಯೆ ಮೆಯಿತ ಸಿಂಗರೊಡು ||
ಬೆರಮ ದೇವೆರ್ ವಿಷ್ಟು ರುದ್ರೆರ್
ಸಿವೆನೆ ಈಸ್ವರೆ ಪನ್ನಿ ಪುದರ್‌ದ
ಅಯಿನ್ ಮೋನೆಡ್ ಐನ್ ಬ್ರಹ್ಮೊದ ರೂಪೊಡುಂತಿಯೆನೆ ||

5

ಸುತಿ ಸರಸ್ವತಿನಕ್‌ಲ್ ದೇವಿಲು
ಗಣಪ ಗುಹನಾಕ್‌ಲ್‌ಲ ಬೂತೊಲು
ಸಬರ ಯೇಸೊನು ಬುಡುದು ಸಿವನವೆ ಸುತ್ತಡುಂತೈರ್ ||
ದೇವಿ ಪಾರ್ವತಿ ಮುಗುರು ತೆಲಿಕೆಡ್
ಓರೆ ಕಣ್ಣೆಡ್ ತೂವೊನುಂದೇ
ಆ ಸರ್ವೇಸ್ವರನೆಡತ್‌ಡುಂತೈರ್ ಮುಂಡ ಮಾಲಿನಿಯೆ ||

6

ಸನಕ ನಾರದೆ ಬ್ರಗು ಪರಾಸರ
ಮಗೆನೆಲಾ ಬರದ್ವಾಜಿ ಗೌತಮೆ
ಮುನಿವಸಿಸ್ಪನೆ ಸನಕನಂದನೆ ಕಣ್ಣೆರುಪಮನ್ಯು||
ಮಾತೆರ್‌ಲ ಆ ಕಾಡ್‌ಗೆತ್ತೈರ್
ಪಾರ್ತಗಾಂಡ್‌ಲ ಸಿದ್ಧಿ ಎಂಕ್ಲೆಗ್
ಬಾರಿ ಸಂತೊಸು ಪನ್ನೆ ಈಸ್ವರಗಡ್ಲೊ ಬೂರಿಯೆರ್ ||

7

ಜಯೊ ಜಯೊನೆ ಜಯೊ ಪನ್ನೆ ರುಸಿಕುಲು
ಸರುವೊ ಅಕ್ಷರೊ ತತ್ತೊ ದರ್ಸನೊ
ಇನಿಯೆ ಆಂಡ್‌ಂದಕ್‌ಲ್ ಮಂತ್ರೊಡು ಪೂಜೆ ಸಂದಯೆರ್ ||
ಜಲುಮೊ ಜಲ್ಮಾಂತರೊದ ಪುಣ್ಯೊಡು
ಸಿವನ ದರ್ಸನೊ ಪಾರ್ತಗಾಯಿನೆ
ಪನ್‌ಪಿ ಬೇರಿದ ಸವ್ವೊ ಲಕ್ಕಯೆರಪಗ ದೇವತೆಲು ||

8

ತೂಯಿನಾಡೆಗೆ ತೂದುಲಜುನೆ
ನೀರ್ ಜಪುಡಯೆ ತನ್ನ ಕಣ್ಣೆಡ್
ರೋಮೊ ಕೊಕ್ಕೆರ್‌ದಾಂಡ್ ಬ್ರಹ್ಮೊದ ರೂಪೊ ತೂನಗನೆ
ದೇವಿನಾಕ್‌ಲ್ ಗಣಪ ಮುಕ್ತೈರ್
ವೀರ ಬದ್ರೆಲ ಬೂತ ಗಣೊಕುಲು
ಸೇರ್‌ದಿತ್ತ್‌ನ ತೂದುಲಾಚಿರೊಡಾಯೆ ಕಂಗಾಲ್ ||

9

ಆಯ ಮನಸ್‌ಡ್‌ಲಾದ್ ಸಂತೊಸು
ದಾನೆ ಮಲ್ತುನೆ ಪನ್ನೆ ಬಿಂಗಿರಿ-
ಯಾಯಿ ಬುದ್ಧಿನ್ ಗಟ್ಟಿ ಮಲ್ತ್‌ದ್ ದೈರೊಡುಂತುನಗ ||
ಪೂಜೆ ಮಲ್ತುನೆ ಅಡ್ಲೊ ಬೂರುನೆ
ಸೋತ್ತೊ ಪನ್ನನೆ ಎಂಚ ಪಂಡ್‌ದ್
ಪಾರ್ತ ಬುದ್ಧಿಗ್ ಒವುಲ ತೋಜಿಜಿ ನೀಟೊ ಬೂರೊಂಡೆ ||

10

ಮಾಪಿ ಮಲ್ತೊಡು ಎನನ್ ಲಡಯಿದ
ಮೋಕೆದಾಯನ್, ಮೋಹೊ ಗುಂಡಿಗ್
ಬೂರ್‌ನಾಯನ್ ಸಿವೆನೆ ಸರ್ವೇಸ್ವರೆನೆ ಗಾತಕನ್ ||
ದುಸ್ಸ ದುರ್ನೀತಿದವೆ ಸಾಸ್ತೊನು
ಕಲ್ತನಾಯನ್ ಮೂರ್ಕ ಬುದ್ಧಿದ
ಹೆಡ್ಡೆಯಾಯಿನ ಎನ್ನನೀಯೇ ಕಾಪು ಮಾಮಯಿಮ ||

11

ಯಾನ್ ಮತಿ ಕೆಟ್ಟೆನವೆ ಕುರಿ ನರ-
ಮಾನಿ ತೂದುಲ ತೆರಿಯಂದಿತ್ತ್‌ನ
ಮೂರ್ಕೆ ಬುದ್ಧಿದ ಮೂಂಕು ಮಾರ್‌ನ ಎಬಗೆ ಆಯಿನಯೆ ||
ನೀತಿ ಹೀನೆನೆ ನಡತೆ ಬುಡ್ಡಯೆ
ಮಾಪಿ ಮಲ್ತ್‌ದ್ ಎನ್ನ ತಪ್ಪುನು
ಕಾಪೊಡುಂದುದು ಅಡ್ಲೊ ಬೂರುದು ಸಿವನ ಸುತಿ ಮಲ್ತೆ ||

12

ದೇವ ದೇವೆನೆ ಬಗ್ಗೆ ರಕ್ತಕೆ
ಜೀವೊ ಕೋಟಿದ ಬಾವೊಗೀಯೇ
ಆಂಡ ಬಾವೊಗು ದೂರೊ ಸಿವ ಸಿವ ದೇವ ಮಾದೇವ ||
ದೇವ ದೇವತೆನಕ್‌ಲೆ ವಂದನೆ
ನೇಪೊಲಾ ಕೈಕೊನುನ ದೇವನೆ
ಕಾಲ ರೂಪೆನೆ ದುಸ್ಸನಾಸೊದ ಕಾಲ ಬೈರವೆನೆ ||

13

ರೂಪೊ ಇದ್ಯಂದ್‌ನಯೆ ಸುಪೊಡು
ರೂಪೊ ಸುಂದರೊ ತೋಜುನಾಯಿನೆ

ಬೂಮಿಯಾಕಾಸೊಗುಲ ಮುಟ್ಟುನ ಇಸ್ಲೊ ರೂಪೊದಯೆ ||
ರೂಪೊ ರಸೊ ಗಂದೊದವೆ ವಿಸಯೊದ
ರೂಪೊ ಮಾಜಿದ್ ರೂಪೊಡುದು ಮೇ-
ಲಾದ್ ತೋಜುನ ರೂಪೊದಾಯೆನೆ ಎಂಕ್ ಗತಿ ಇತ್ತೆ ||

14

ಮಾಯೊ ಮಯಿಮೆನೆ ಮಾಯೊಗಾರನೆ
ಮಾಯೊ ಬುಡ್ಡಯೆ ಮಾಯೊ ರೂಪೆನೆ
ಮಾಯೊನಾದೀನೊಡುಲ ದೀಡ್ಡ್ ಲೋಕೊ ನಡಪವುನ ||
ಪರಮಹಂಸೆ ಪರಾತ್ಮೆ ಪರಮೇ-
ಸ್ವರೆನೆ ಈ ಪರ ಬ್ರಹ್ಮೆ ಪರಸಿವೆ
ಪರಮ ತತ್ವೊಸೊರೂಪೆ ನಿನ್ನನ್ ತೂಯೆ ಮಹದೇವ ||

15

ಲಿಂಗಮಯೆ ಲಿಂಗೊಡುಲ ಇದ್ದೆನೆ
ಲಿಂಗ ಲಿಂಗಾತ್ಮಕೆ ಸದಾಸಿವ
ಲಿಂಗ ನಿರ್ಮಲೊ ಲಿಂಗ ಕರುಣಾಕರನೆ ಮಾಲಿಂಗೆ ||
ಲಿಂಗ ಚಿನುಮಯ ಲಿಂಗ ಚೇತನೊ
ಲಿಂಗ ದುರ್ಗಿನ ಲಿಂಗ ಸಾದುಲೆ
ಪಂಚಲಿಂಗನೆ ಕಾಪೊಡೆನ್ನನ್ ಪನ್ದ್ ಬುಲ್ತೊಂಡೆ ||

|| ಪಾರ್ತಗ್ ಸಿವಾನುಗ್ರಹೊ ||

ಆತ್ ಪೊರ್ತುಗು ಸಿವೆನೆ ಕೈತಡೆ
ಸೀದ ಬತ್ತೆದ್ ಆಯನಾಪಗ
ದೇರ್ತ್ ಲಕ್ಶ್ಮದ್ ಪ್ರೀತಿ ಬಾವೊಡು ತರ್ಕ್ ಪತ್ತಿಯೆನೆ||
ಆಹ ಮಗ ಈ ತಪಸ್ ಮಲ್ತದ್
ಬಾರಿ ಕಂಗಾಲಾಯ ಪಂಡ್ಡದ್
ಆ ಸದಾಸಿವೆ ಕರುಣೆಡಾಯನ ಸೈರೊನೀಸಿಯೆನೆ ||

1

ಬೆರಿನ್ ಪೂಜಿದ್ ಪನ್ನಿನಾಯಡ
ಎನಡ ಈ ಇನಿ ಮಲ್ತದಾಯಿನ
ಲಡಯಿ ಮಾತಲ ಎಂಕ್ ಸಂದ್ನ ಪೂಜೆ ಆಂಡಂದ್ ||
ಯಾನ್ ಗ್ಲೆಯುನೆ ಬುಡ್ಡ ಸಂಸಯೊ
ಪೋಡಿ ಮಾತೆನ್ ಗುಹನ ಗಣಪನ
ಆಜೊ ಪಾಡ್ಡ ಪನ್ನೆ ಮಗ ಈ ಎಂಕ್ ನಿಜೊ ಬಗ್ಗೆ ||

2

ಕರಿನ ಜಲ್ಲೊಡು ಈಯೆ ನಾರಾ-
ಯಿಣನ ಅಂಸೊನೆ ಮಲ್ಲ ರುಸಿ ನಿಜೊ
ಎನನ್ ತಪಸ್ಡ್ ಈಯೆ ಮೆಚ್ಚಯೆ ದಾಯೆ ಪೋಡ್ಡುನೆಯೆ ||

ನಿನ್ನವಾಸೆದ ವರೊನು ಕೇನ್ಲ
ಪನ್ದ್ ಕೊರೈನೆ ಬಾಣೊ ಬಿಲ್ಲನ್
ಕಡ್ಲೊ ಮಾತೆನ್ ಪ್ರೀತಿಡಾ ಸಿವೆ ವೀರೆನರ್ಜುನಗ್||

3

ನನಗ್ ಎಂಚಿನ ಬೋಡು ಕೇನ್ಲ
ಕೊರುವೆ ಯಾನೇ ಪನ್ನಗರ್ಜುನೆ
ತಪಸ್ಗೊಲಿನವೆ ದೇವ ಕೇನುವೆನೆಂಕ್ ಬೋಡಯಿನ ||
ಪಾಸುಪತೊ ಬಾಣೊನುಲ ಬ್ರಹ್ಮನ
ಆ ಸ್ತಿರಾಸ್ತೊನು ಕೊರೊಡು ಕರುಣೆಡ್-
ಲಾಯೆ ಪಂಡ್ಡದ್ ಅಡ್ಲೊ ಬೂರಿಯೆ ಸಿವನ ಪಾದೊಲೆಗ್ ||

4

ಕೇಂಡ್ನೆನ್ ಕೊರ್ಪುನೆಕ್ ಅಡ್ಲಿನ್
ಯಾನ್ ಮಲ್ಪಿನೊ ಲೋಕೊ ನಡ್ಲವಿ
ಪಾಸುಪತೊ ನನ ಬೊಮ್ಮ ಸರೊ ಮಾತೆನ್ಲ ಕೊರ್ಪೆನ್ ||
ಸುರನರೋರಗೊಡೇರ್ಲಾಂಡಲ
ಎದುರು ಉಂತ್ಯೆರ್ಡಾಂಡ ಅಕ್ಲೆನ
ಪೆರಣೊ ಪುಂಟುನ ಬಾಣೊನಿಂದೆನ್ ಗೆತೊನು ಕೈ ನೀರ್ಡ್ ||

5

ಮೀದ್ ಸುದ್ಲೊಡು ಚಂಡಿ ಕುಂಟುಡೆ
ಪೂಜೆ ಸಂದಯೆ ಸಿವನ ಬಗ್ಗಿಡ್
ಕಾರ್ಗಡ್ಲೊನೆ ಬೂರ್ದು ಉಂತಿಯೆ ಪಾರ್ತ ನಡ್ಗೊಂದು ||
ಬಾಣೊ ಬುಡ್ಡುನ ಕೈದ್ ಮಲ್ಪುನ
ಮಾತ ಮಂತ್ರೊನು ಕಲ್ಪದಾಯಗ್
ಪಾಸುಪತೊ ಮಹ ಬಾಣೊ ಕೊರೈನೆ ಸಿವೆನೆ ಸಂತೊಸುಡು ||

6

ದಿಕ್ಕೊಡೊರೆಲ ಜಯೊತ ಗೋಸನೆ
ಕೇನ್ದ್ ಬಾನೊಡು ದಿಂಜಿದಾಂಡಲ
ಪುಸ್ಸೊದಾ ಸಿರಿ ಬರ್ಸೊದೂರ್ಜುಟಿ ಕಾರ್ಗ್ ಬೂರ್ಡಾಂಡ್ ||
ಪಾರ್ತ ಮನಸ್ದ ಪೋಡಿ ಪೋದುಲ
ಆಸೆ ಕೈಕೂಡ್ನೆಟ್ ಸಂತೊಸು-
ಡಾಯ ಸೊರ್ಡಯೊ ಸೇರ್ಡ್ ಹೃದಯೊದ ಸುದ್ಲೊ ಬಾವನೆಗ್ ||

7

ಸುರ ಮುನೀಸೆರೆ ವೇದೊ ಮಂತ್ರೊದ
ಸೊರೊನೆ ತುಂಬುರ ನಾರದಾದಿಲೆ
ಸುತಿಯೆ ಕೇನ್ಲಗ ಗರುಡ ಗಂದರ್ವೆರೆನ ಪಾರ್ಡನೊನೆ ||
ಲೋಕೊ ಧರ್ಮೊದ ಅರ್ತೊ ಕಾಮೊಡು
ಮೋಕ್ಷೊ ಪದವಿನ್ ಪಡೆಪಿ ಸಾದನೆ
ಕಾಳಗೊಡು ಈ ಮಲ್ಪು ಪಂಡ್ಡದ್ ಲೆತ್ತೆ ಪಾರ್ವತಿನೆ ||

8

ದೇವಿ ಈಯೇ ಪಾರ್ತನುದ್ದರೊ-
ಗಾಪಿ ವರೊಕೊಲಂದ್ ಪನ್ನಗ
ಬ್ರಾಹ್ಮಿ ವೈಷ್ಣವಿ ದುರ್ಗ ಕಾಳಿಯೆ ಚಂಡಿ ಚಾಮುಂಡಿ ||
ಆದಿ ಸಗ್ತಿಯೆ ಸಿರಿ ಸರಸ್ವತಿ
ಲಾದ್ ಒಂಜೇ ರೂಪೊ ತೋಜವಿ
ಓ ಸರ್ವೇಸ್ವರಿ ನಿನ್ನ ಪಾದೊಗು ಅಡ್ಲೊ ಬೂರೊನುವೆ ||

9

ಪದ್ಮನಾಬನ ಬಾವೆ ಬಲಮಗ
ನಿಕ್ಕ್ ಎದುರಾಪುನವೆ ಪಗೆಕುಲೆ
ಕುತ್ತಿ ಮುತ್ತವಿ ಸಗ್ತಿ ಇತ್ತನ ಅಂಜನಾಸ್ತ್ರೊನುಲ ||
ಕೊರೈ ಮಗ ನಿಕ್ಕತ್ತೆ ಪ್ರೀತಿಡ್
ಪನ್ದ ಬಾಣೊನು ಕೈಟ್ ಪತ್ತದ್
ಅರುಣನ ಸಿರಿ ಮೋನೆ ತೂದೇ ಪನ್ನಲಾ ದೇವಿ ||

10

ನೂದು ಸಾವಿರೊ ಲಚ್ಚೊ ಕೋಟಿಯೆ
ಆದ್ ವೈರಿಲು ನಿನ್ನ ಎದುರುಗು
ಕಾದಿಯೆರೆ ಉಂತ್ಯೆರಡಲಕಲೆನ್ ನಿಂಗು ಈ ಪಗರಿ ||
ಬುಕ್ಕೊ ನಿನ್ನಡ ಕೇನುವಪ್ಪಣೆ
ಮಲ್ಲೊಡಂಚಿನ ಕಾರ್ಯೊ ಪಂಡ್
ಅಸ್ತ್ರೊದಾ ನಿಜೊ ಮಾಯೊ ಮಂತ್ರೊನು ಪನ್ದ ಕಲ್ಪಯಲ್ ||

11

ಗಣಪತಿನ ಸಣ್ಣುಕನ ಕಾರ್ಗ್
ತರೆನ್ ತಾಂಟದ್ ಸುತಿನ ಮಲ್ಪುನ
ನರನ ಬಗ್ಗಿ ಅಕ್ಲ್ ಮೆಚ್ಚಿದ್ ತರ್ಕ್ ಪತ್ತಿಯೆರ್ ||
ದಿವ್ಯೊ ಮಂತ್ರೊನು ಕಲ್ಪದಾಯಗ್
ಮಲ್ಲವಸ್ತ್ರೊನು ಕೊರುದು ಪಂಡರ್
ಗೆಲ್ತದೀಯೇ ಕೀರ್ತಿ ಪಡಲಯ ಮೂಜಿ ಲೋಕೊಲೆಡ್ ||

12

ನಿಕ್ಲೆ ಕತೆನೇ ವೇದೊಲಾವಡ್
ನಿಕ್ಲೆ ಚರಿತೆನೆ ಪುಣ್ಯೊ ಆವಡ್
ನಿಕ್ಲೆ ಕತೆ ಕೇನ್ನಕ್ಲೆ ಪಾಪೊಲು ಪೂರ ಪರಿಯಾರೊ ||
ನಿಕ್ಲೆನೇರ್ಲ ದೂರೈರಡ ನಿಜೊ-
ಟಕ್ಲ್ ಪಾಪಿಲು ಪುಣ್ಯೊ ಹೀನೆರ್
ಹರೆನೆ ಪಂಡ್ ಪಾರ್ತಗಬಯೊನು ಕೊರ್ಪು ಕಡಪುಡಿಯೆ ||

13

ದೇವಿಯಂಬಿಕೆ ಗುಹನ ಗಣಪನ
ಕಾರ್ ಪತ್ತದ್ ಪಿದಡಿ ಪಾರ್ತಗ್-
ಲಾಂಡ್ ಸಂತೊಸು ಅಕ್ಲೆ ಮಯಿಮೆನ್ ನೆನೆತ್ ನೆನೆಪುನಗ ||
ದೇವ ದೇವೆನೆ ಪೋಯೆನಾ ಕೈ-
ಲಾಸೊ ಪರ್ವತೊದಾಡೆಗಪಗನೆ
ಆದಿ ನಾರಾಯಣನ ಬಾವನ ಗುಣೊನು ಪುಗರೊಂದು ||

ಮೂಜನೆ ಸಂದಿ

|| ದೇವಾದಿ ದೇವತೆಲು ಅರ್ಜುನನ್ ತೂಯೆರ್ ||

ಆ ಸರ್ವೇಸ್ವರೆ ಬೊಳ್ಳಿ ಗುಡ್ಡೆಗ್
ಪೋದುಲಾನಗ ಇಂದ್ರಕೀಲೊಡು
ಪಾರ್ತ ಮನಸ್ಗ್ ಆಂಡ್ ದೇವೆರ್ ಪೋಯ್ನು ಬೇಜಾರೊ ||
ಬಾರಿ ದುಕ್ಕೊಡು ಬಾಣೊ ತಿಕ್ಕನ
ಲಾಬೊ ಮರತ್ದ್ ಸಿವನ ಸೇವೆದ
ಬಾಗ್ಯೊ ತತ್ತದ್ ಪೋಂಡೆ ಪಂಡ್ ತಾನ್ ಮರ್ಗಿಯೆನೆ

1

ಕನಟ್ ತಿಕ್ಕನ ಐಸುರೊನೊ ಸಿಸು
ಕಯಿತ ರತ್ನೊನೊ ಹರಿನ ಮಾಲೆನೊ
ತಪಸ್ಸಡೆನ್ನವೆ ಬೆಮೆನೆ ತತ್ತದ್ ಇಂಚ ಆಯಿನೊ ||
ಸಿವೆನೆ ಎನ ಕಣ್ಣೆಲೆಗ್ ತೋಜಿದ್

ಪಗರಿ ಕೇನ್ನೆನ್ ಕೊರ್ಪು ಪೋಯೆನೆ
ನಿಜೊನೆ ಅಂದಂದಾಂಡ ಎನ್ನವೆ ಬಾಗ್ಯೊ ಮಲ್ಲೆತ್ತೊ ||

2

ಅವ್ವೆ ಪೊರ್ತುಡು ಬತ್ತೆರಾಡೆಗ್
ಎನ್ನೊ ದಿಕ್ಕದ ಪಾಲಕೆರಲಾ
ಯಚ್ಚರಚ್ಚೆರ್ ಗರುಡಗಂದವೇರ್ ಮಾತೆರಲ ||
ಸುರೆರ್ ಕೆನ್ನರನಕ್ಲೆಲಾ ಕಿಂ-
ಪುರುಸನಾಕ್ಲೆ ಇಂದ್ರಕೀಲಕೊ-
ದುಲಯಿಗತ್ತೆರ್ ಇಂದ್ರನೊಟ್ಟಿಗೆ ಮಗೆ ಜಯಂತೆನೆಲ ||

3

ಸಾಲ್ ಸಾಲ್ಡೆ ಪತ್ತಿ ಬೊಲ್ಗುಡೆ
ರಾಪಿ ಚೌರಿಲು ಚಿತ್ರ ಸೇನನ

ಕೂಟೊದಕಲೆನ ಕೊಂಬು ವಾದ್ಯೊಡು ತಾಳೊ ತಂಬುರಿಡ್ ||
ಜಯೊ ಜಯೊನೆ ಪಂಡೊಂದು ಬನ್ನಗ
ನೆಲನೆ ಅದ್‌ರ್‌ದ್‌ಲಾಂಡ್ ಗೌಜಿಡ್
ಸುಮನಸೆರ್ ಬರ್ಪುನೆನ್ ತೂಯೆನೆ ಪಾರ್ತನಾಚಿರೊಡು ||

4

ಬತ್ತನಕಲೆನ್ ಆಕ್‌ಲಾಕಲೆ
ಮರ್ಯದಿಡ್ ಮನ್ನಿತ್‌ದ್ ಪಾರ್ತನ
ಜಿಷ್ಟು ಕೈತಲ್ ಉಂತ್ಯೆ ಸುರೆರೆಗ್ ಆಂಡ್ ಸಂತೋಸು ||
ದೂರ್ಜಟಿನ ಮಹ ಬಾಣೊ ಪಡೆಯನೆ
ಈಯೆ ನಿಕ್ಕಲ ಕಮ್ಮಿ ಎಂಚಿನ
ಮೂಜಿ ಲೋಕೊದ ವೀರೆ ಆಯನೆ ಪಂಡೆ ದೇವೇಂದ್ರೆ ||

5

ಆ ಮಹಾಸ್ತೊದ ಒಟ್ಟುಗನ್ನವೆ
ಪ್ರೀತಿದುಡಿಗಿರೆ ಗೆತೊನು ಪಂಡ್‌ದ್
ಬಾರಿ ಸಗ್ಗಿದ ಇಂದ್ರ ಸೌಂಜ್ಜಕೊ ಪನ್ನಿ ಬಾಣೊನುಲ ||
ದೇವರಾಜೆನೆ ಕೊರ್ನಸಾತ್‌ಗ್
ತಾಮಸೊದ ಸನ್ನೋಹನಾಸ್ತೊನು
ವರುಣೆ ದನಪತಿ ಮಾತ ದಿಕ್ಕಾಲಕೆರ್ ಕೊರ್ಯೆರ್ ||

6

ಓ ಧನಂಜಯ ನಿಕ್ಕ ಎಂಕ್ಲೆನ
ಬಾಣೊದಾಯೆಗ್ ನಿನ್ನ ತಪಸ್‌ಗ್
ಆ ಸದಾಸಿವೆನೊಲಿದ್ ಕೊರ್ನವೆ ಪಗರಿ ಉಂಡತ್ತೊ ||
ನನಗ್ ನಿನ್ನವೆ ರಾಜ್ಯೊ ಆವುಯ
ಸಿರಿನವರಮನೆ ಈಯೆ ದುಂಬುದ
ನರರುಸಿಯೆ ಆದಿತ್ತನಾಯೆನೆ ಪನ್ದ್ ದೇವೇಂದ್ರೆ ||

7

ತಪಸ್ ಮಲ್ತನ ಸೈರೊ ಬಚ್ಚಿಲ್-
ನರಪಯೆರೆ ಈ ಸೊರ್ಗೊ ಲೋಕೊಡು
ಕೆಲವು ದಿನೊ ಉಂತುಲಯ ಮಾತಲಿ ರತೊನು ಕೊಂಡ್ರುವೆನೆ ||
ನೂದು ಯಾಗೊದ ಪುಣ್ಯೊದಾಪಲೊ-
ನೀಯೆ ತೂವೊಡು ಎಂಚಿನಂದ್‌ದ್
ದೇವ ಲೋಕೊಡು ಇತ್ತಿ ಸಂಪೊತು ಪಂಡೆನಾ ಇಂದ್ರೆ ||

8

ಬಾರಿ ಸಂತೋಸು ಎಂಕ್ ಬರೈರೆ
ನೂದು ಯಾಗೊದ ಪಲೊನೆ ತಿಕ್ಕನ
ಲೋಕೊ ಸೊರ್ಗೊನೆ ಐನ್ ತೂಪುನ ಯೋಗೊ ಮಲ್ಲೆತ್ತೊ ||
ದಾನೊ ಈರೆನ ಕರುಣೆಡೆಂಕೆ
ಜೂವೊ ಜೂವೊಡೆ ಸೊರ್ಗೊ ತೂಪುನ
ಯೋಗೊ ಒದಗ್‌ನೆ ಪನ್ದ್ ಇಂದ್ರನ ಕಾರ್ಗ್ ಬೂರೊಂಡೆ ||

9

ಮಾತ ದಿಕ್ಕಾಲಕೆರ್ ಇಂದ್ರೆಲ
ಮಾಯೊಕಾದೇ ಪೋಯೆರಾಡೆಗ್
ಮಾತಲಿಯೆ ರತೊ ತಿತ್ತ್ ಬಾನೊಡೆ ಜಪುಡುವುನ ತೂಯೆ ||
ಜಾಲಿ ಮಣಿಕುಲು ಒಂಬೊ ರತ್ತೊಲೆ
ತೇಜಿದಾ ರತೊ ಬಂಗರ್‌ದ ನಿಜೊ-
ವಾದ್ ಮೆಂಚಿದ್ ಗಾಳಿಗೈನ ಪತಾಕೆ ರಾವೊಂದು ||

10

ಬೊಲ್ಲು ಕುದುರೆಲೆ ಇಂದ್ರತೇರ್‌ಗ್
ಕಟ್ಟೆದಿತ್ತನ ಪೂರ್ಲು ಚತ್ತೊಗು
ಪಟ್ಟೆ ಬೊಲ್ಲೆನೊದವೆನ್ ಮುಚ್ಚಿದ್ ಸಾಲ್ ಸಾಲಾದ್ ||
ತೂನಗಂಚಿನವುಂದು ಪನಿಯೆರೆ
ಏರೆಗ್‌ಲ ತೆರಿಯಂದ್ ಸುರಗಿರಿ
ರಾದ್ ಜಪುನೆ ಅತ್ತ ತೋಜುನೆ ಚಂದ್ರ ಮಂಡಲೊನೊ ||

11

ದಾನೆಯಾಚಿರೊ ಮೇಲ್ ಮೇಲ್‌ಡೆ
ತೋಜುನೆನೆ ಪೊಸ ಪೊಸತ್ ಕಣ್ಣೆಗ್
ಯಾನ್ ಮಲ್ತನ ಪುಣ್ಯೊ ಪಂಡ್‌ದ್ ಪಾರ್ತನೆದುರುಂತ್ಯೆ ||
ಈಯೆನಯ ಕಲಿ ಪಾರ್ತ ಪನ್ನುನ
ಮೂಜಿ ಲೋಕೊದ ವೀರೆ ಪಂಡ್‌ದ್
ಮಾತಲಿಯೆ ರತೊನಾಯನೆದುರುಡು ಕೇಂಡೆ ಉಂತಾದ್ ||

12

ಲಕ್ಕ ಪಲುಗುಣ ರತೊಟು ಕುಲ್ಲುದು
ಮಿತ್ತ ಲೋಕೊಗು ಪೋಯಿ ನಿನ್ನವೆ
ಪುಣ್ಯೊದಾ ಮರ ತೆಗ್‌ಲ್‌ದಾಂಡ್‌ಯ ದಾನೆ ಪನಡೇನ್ ||
ಎಡ್ಡೆ ಕರ್ಮೊನು ಬೂಮಿ ಲೋಕೊಡು
ಮಲ್ತನಾಕಲೆಗಿಂಚಿ ಯೇಗಿತೊ
ಬರುವುಂತೊಯ ದೇವ ಲೋಕೊನೆ ನಿನ್ನವುಂದಾಂಡ್ ||

13

ಅಸ್ತಮೇದೊನು ರಾಜ ಸೂಯೊನು
ಮಲ್ತನಾಕ್‌ಲ್ ಏರ್ಲ ಈತ್ಲೆಟ
ಸೊರೊ ಲೋಕೊನು ತೂಪಿ ಬಾಗ್ಯೊನು ಪಡೆತ್‌ಚೆರ್ ನಿಜೊನೆ ||
ಪುಣ್ಯೊದಮರಾವತಿಯೆ ಎಂಚಿನ
ಎನ್ನ ಯೇಗಿತೊ ಯಾರೊ ತೂಯೆರೆ
ಬತ್ತನೆನೆ ಈ ಬಾಗ್ಯೊ ಸಿವನವೆ ತಪಸ್ ಮಲ್ತನೆಚ್ ||

14

ಕಾರ್ ತೇರ್‌ಗ್ ದೀಡ್ಡ್ ಪಲುಗುಣೆ
ಕಾಡ್‌ಗೇ ಕೈ ಮುಗಿದ್ ಪನ್ನೆನೆ

ಯೋಗಿ ಮುನಿಕುಲು ಬೂರುದಯಿಮರ ಮುಗೊ ಪಕ್ತಿಗುಳು ||
ಮಾತ ಕಡಪುಡಿ ಎನನ್ ಸೊಗೊಗು
ಪೋದು ಬರ್ಪೆನೆ ಯಾನ್ ಪಂಡ್‌ದ್
ತೇರ್‌ನೇರಿಯೆ ಅಪಗ ಮಾತಲಿ ಹಾಕೈ ಕುದುರೆಲೆಗ್ ||

|| ಪಾರ್ತೆ ಸೊಗೊ ಲೋಕೊಗೆತ್ಯೆ ||

ಬೂಮಿಯಾಕಾಸೊದವೆ ಸೊತ್ತುನು
ಪೂರ ಪಾರ್ತೆಗ್ ಸರಿಟ್ ತೋಜದ್
ಮಾತಲಿಯೆ ಸರಿ ರತೊನು ತಿರ್ಗದ್ ಸೊಗೊಗೆತ್ತಾಯೆ
ಬೂಮಿ ಲೋಕೊಡು ಯಜ್ಞೊ ಯಾಗೊನು
ದಾನ ಧರ್ಮೊನು ಪುಣ್ಯೊ ಕೆಲಸೊನು
ಪೂರ ಮಲ್ತದ್ ಸೊಗೊ ಸೇರ್‌ನವಕಲೆನೀ ತೂಲ ||

1

ಪ್ರಾಣಿ ದಯೆಟಿತ್ತನಯೆ ಇಂಬೈನೆ
ಆಯೆ ಸತ್ಯೊದ ನಡತೆದಾಯೆನೆ
ಈಪೆದಯೆ ಸಜ್ಜನೆ ಸೀರ್ತೊದ ಯಾತ್ರ ಮಲ್ತನಯೆ ||
ಆಪೆಕ್‌ಡ್ ಉಪ್ಪುನಯೆ ಮಚ್ಚರೊ
ಮಾನೊ ಹೀನೊದ ಕೆಲಸೊ ಬುಡ್ಡಯೆ
ಪಾರ್ತೆ ತೂವೊನು ಅಪ್ಪೆನಮ್ಮನ್ ಸಾಂಕ್‌ನಾಯನ್‌ಲ ||

2

ಇಂಬೈ ಇಂದ್ರಿಯೊ ಗೆಲ್ತನಾಯೆನೆ
ಇಂಬೈ ವೇದೊದ ಅರ್ತೊ ತೆರಿನಯೆ
ಇಂಬೈ ಬಡವೆರೆ ಸೇವೆ ಮಲ್ತನ ಪುಣ್ಯವಂತೆನೆಲ ||
ಇಂಬೈ ಕಾಮೊನು ಗೆಲ್ತನಾಯೆನೆ
ಇಂಬೈ ದೈರೊದ ಮಾನಿ ನಿರ್ಮಲೆ-
ನಿಂಬೈ ಗುಣೊತಯೆ ರಾಗೊ ದ್ವೇಷೊನು ಬುಡ್ಡ ನರಮಾನಿ ||

3

ಸ್ವಾಮಿ ಕಾರ್ಯೊಡು ಜೂವೊ ಕೊರೈಯೆ
ಕಾಳಗೊಡು ನಿಜೊ ವೀರ ಸೊಗೊಗು
ಸೇರ್‌ನಯೆ ಗೋದಾನೊ ಕನ್ಯಾ ದಾನೊ ಮಲ್ತನಯೆ ||
ಬೇತೆ ಬೇತೆನೆ ಕುಲ್ಲುದುಲ್ಲೆರ್
ಈಯೆ ತೂವೊನು ಪಾರ್ತೆ ಪಂಡ್‌ದ್
ಮಾತಲಿಯೆ ತೋಜಾಯೆ ಸೊಗೊದ ಪುಣ್ಯವಂತೆರೆನ್ ||

4

ಮಿತ್ತ ಮಿತ್ತಗ್ ತೂಲ ದಾರಗೆ
ಮೆಣ್ಣುನಂಚನೆ ರಾಜ ಸೂಯೊದ
ಯಜ್ಞೊ ಕುದುರೆದ ಯಾಗೊ ಮಲ್ತನವಕಲೆ ಪುಸ್ತಕೊನು ||

ಕಾಳಗೊಡು ಎದುರಾದ್ ಕತ್ತಿದ
ಗಾಯೊಡೇ ನೆತ್ತೆದ್ದ ಸೀರ್ತೊಡು
ಮೀಯಿನಾಕ್‌ಲ್ ಆ ವಿಮಾನೊಡು ಕುಲ್ಲೆದರ್ ತೂಲ ||

5

ತೂಲ ಬರತೆನೆ ದೂರೊಡುಲ ಸರಿ
ತೋಜಿನಯೆ ಹರಿಷ್ಟಂದ್ರೆ ನಳೆ ನೈಗೆ
ಆಪೆಕ್‌ಡ್ ಪುರು ಕುತ್ರೆ ಮರುತೆನೆ ತೂಲ ಕುಲ್ಲೆದನ್ ||
ಆಯೆ ನವುಸೆನೆ ದುಂದು ಮಾರೆನೆ
ಆ ದಿಲೀಪೆನೆ ವೀರ ದಸರತೆ
ಪಾರ್ತೆ ತೂಲಯ ರಗುನು ನಿನ್ನವೆ ಹಿರಿಯನಾಕ್‌ಲೆನ್ ||

6

ರಾಜ ರಾಜೆರೆ ಪುಣ್ಯೊ ಕಾರ್ಯೊಡು
ಸ್ತಾನೊ ಪಡೆಯೆರೆ ಪೊರ್ದು ಬೂಮಿಯೆ
ಆಂಡ್ ಭಾರತೊ ಅಂದ್ ನಿಷ್ಟಯೊ ಮೂಲು ತೂನಗನೆ ||
ದಾನೊ ಧರ್ಮೊನು ಯಜ್ಞೊ ತಪಸ್‌ನ್
ಮಲ್ತನಾಕ್‌ಲೆಗಿತ್ತಿ ಸ್ತಾನೊನು
ಬೇತೆ ಬೇತೆನೆ ತೂಲ ಪಂಡೆನೆ ಇಂದ್ರ ಸಾರತಿಯೆ ||

7

ದೂರೊಡುಲ ಬೊಳ್ಳಿದವೆ ಗುಡ್ಡೆನ್
ತೂಯಿನಂಚನೆ ತೋಜುನವೆ ಸುರ-
ಪಾಲನೈರಾವತೊನೆ ತೂಲಯ ಪಾರ್ತೆ ಕಣ್ಣುಡುದು ||
ಅವುಲು ಜಗಜಗ ಪ್ರಬೆಟ್ ತೋಜುನ
ಸುರೆರೆನಮರಾವತಿಯೆ ನಿಜೊ
ನಿನನ್ ಲೆತೊನುದು ಉಲಯಿ ಪೊಗ್ಗವೆ ಪೋಯಿ ಆಡೆಗೆನೆ ||

8

ಪೊರ್ದುದವೆ ಅಮರಾವತಿದ ನಿಜೊ
ಪಟ್ಟಣೊಗು ಸರಿ ಪೊಗೈ ಪಾರ್ತೆನ
ಪುಣ್ಯೊಗೇ ಈಡತ್ತ್ ನಳ ನವುಸಾದಿ ರಾಯೆರೆನ ||
ಕಮ್ಮೆನೊನೆ ಗಮಲೊಂದು ಮೆಂಚುನ
ಬಣ್ಣೊಲಾವಣ್ಣೊಡುಲ ತೋಜುನ
ಅಪ್ಪರೆರೆ ಕೇರಿನ್‌ಲ ಕಡತ್‌ದ್ ಬತ್ತೆನರುತ್ತೆನೆನೆ ||

9

ತೇರ್‌ಡ್‌ದ್ ಜತ್ತೊಂದು ಉಲಯಿಗ್
ಪಾರ್ತೆ ಪೊಗ್ಗನ ತೂದು ಇಂದ್ರೆನೆ
ಪ್ರೀತಿಡಾಯನ್ ಅರದ್ ಪತ್ತದ್ ತರ್ಕ್ ಪತ್ತೊಂಡೆ ||
ತರ್ಕ್‌ನಯೆ ಒಯ್ತೊಂದು ಬತ್ತದ್
ತನ್ನ ಸಿಮ್ಮಾಸನೊಡು ಕುಲ್ಲಯೆ
ಒತ್ತುಡಾಯೆಲ ಕುಲೈ ತನ್ನವೆ ಮಗನ ಕೈತಲ್‌ಡ್ ||

10

ತಿರ್ತ್ ಲೋಕೊದ ಜನೊಕುಲುಪ್ಪನೆ
ಪುರಿತ ಲೆಕೊ ನಮ ಸೊಗೊ ಲೋಕೊಗು
ಪೊಸಬೆ ಬತ್ತನೆ ಏರ್ ತೂವೊಡು ಪಂಡ್‌ದಾ ಸುರೆರ್ ||
ವಸುಕುಲಾದಿತ್ಯೇರ್ ಬುಜಗರ್
ಗರುಡ ಗಂದರ್ವಾದಿ ಸುಮನಸ-
ನಕ್‌ಲ್ ಮಾತೆರ್ ಬತ್ತೆರಾಡೆಗ್ ನರನ ತೂಯೆರೆಗ್ ||

11

ಆನಿದುಚ್ಚೆಯೊ ಪನ್ನುನೆಂಚಿನ
ದೇವತೆಲು ಸರಿ ಕೂಡ್‌ನಾ ಸಬೆ
ದೂಜಿ ಊರೈರೆಗಿದ್ದಿ ಜಾಗೆನೆ ಇಂದ್ರನೋಲೆಗೊಡು ||
ನೂಕಿ ಬಾಕಿಲ್ ಪಾಡಿ ಉಲಯಿಗ್
ಏರೆನ್‌ಲ ಬರೈರೆಗ್ ಬುಡಡೆಯೆ
ದೇವ ದೂತೆರ್ ಬೊಬ್ಬೆ ಪಾಡ್‌ಗ ಪಿದಯಿಡುಂತಿಯೆರ್ ||

12

ಬಾಕಿಲ್‌ನ್ ದೆಪ್ಪಲೆಯೆ ಎಂಕ್ಲೆನ್
ಪೋಯೆರೆಗ್ ಬುಡ್ಲೆಂದ್ ಸುರಪನ
ಸೂಳೆನಾಕ್‌ಲ್ ಬತ್ತಿ ಪೊರ್ಲುನು ಪನ್ನುನೆಂಚಿನೆನ್ ||
ಸುಳಿತ ಕುಜಲ್‌ದ ಎಸಲ್ ಕಣ್ಣಾದ
ದವುಡೆ ಮೆಣ್ಣುನ ಪೊರ್ಲುದೈತ್ತೊದ
ಬುಗೊರಿ ಮಿರೆತವೆ ಪೊಣ್ಣುಲೇಶಲ ಬತ್ತೆರೊಟ್ಟಾದ್ ||

13

ಕಸ್ತುರಿದ ಬರೋಣಿದವೆ ಬಾಯಿನ
ರಟ್ಟಯಿನ ಲೆಕೊ ಸಬೆತ ಬಾಕಿಲ್
ದೆತ್ತಾದಾನಗ ಉಲಯಿ ಬತ್ತೆರ್ ಮೆಯಿತ ಕಮ್ಮೆನೊಡು ||
ಸುಬ್ಬ ತೇಜಿದ ಮೋನೆದಾಕ್‌ಲ್
ಕಣ್ಣೋಡೋರೆನೆ ತೂವೊನುಂದುಲ
ಅರೊ ಮುಸುಕುನು ಪಾಡ್ಡ್ ಬತ್ತೆರ್ ಮಾತ ಅಪ್ಪರೆಲು ||

14

ಊರ್ವಸಿನ ಒಟ್ಟಿಗೆನೆ ರಂಬೆಲ
ಆ ತಿಲೋತ್ತಮೆನೊಟ್ಟಿಗೆನೆ ಗೌ-
ರೀಸ್ವರಿ ವರೂತಿನಿ ಪೂರ್ವಜಿತಿ ಸುಲೇಕೆ ಚಿತ್ರರತಿ ||
ಸುರಬಿ ಗಂದಿನಿ ಚಾರುಮುಕೆ ಮೇ-
ನಕಿನ ಒಟ್ಟುಗು ಆ ಸುಲೋಚನೆ
ಸುರಸೆ ಪನ್ನುನ ಪೊರ್ಲುದಾಕ್‌ಲ್ ಬತ್ತೆರೊಟ್ಟಾದ್ ||

15

ದಾನೆ ಪನ್ನುನೆ ದೇವರಾಜನ
ಓಲೆಗೊದ ಸಿರಿ ದಿವ್ಯೊ ವಾದ್ಯೊಡು
ಗಾನೊ ನಾಟ್ಯೊಡು ರಾಗೊ ರಂಗಿತೊಡೇತೊ ವೈಬವೊಡು ||

ಪೊರ್ಲು ಪೊಣ್ಣುಲೆ ನಾಟ್ಯೊ ಸಿಂಗರೊ
ಪಜ್ಜೆ ದೆಪ್ಪುನ ಸೈರೊ ಪಂದುನ
ಗತ್ತ ಮೋಹೊಗು ಮನಸ್ ತಾಗುನ ತೂಕೊ ಬಾವೊಡುಲ ||

16

ರಸೂತ ಕೂಡಿಗೊಡೊಂಬೊ ನಮುನೆಡ್
ಬೆಸಿಗೆ ಬಾವೊದ ಆದ್ ಕೈಕುಲೆ
ಅಬಿನಯೊಗು ಸರಿಯಾದ್ ದಿಸ್ಪಿದ ನೋಟೊ ತಿರ್ಗನೆನೆ ||
ತಾಳೊಗುಲ ಸರಿಯಾದ್ ವಾದ್ಯೊನೆ
ವಾದ್ಯೊಲೆಗ್ ಸರಿಯಾದ್ ಗಾಯನೊ
ಗಾಯನೊಗು ಸರಿಯಾದ್ ನಾಟ್ಯೊನೆ ಆಂಡ್ ಸುರ ಸಬೆಟ್ ||

17

ಈ ವಿಚಿತ್ರೊದ ನಾಟ್ಯೊ ಗಾಯನೊ
ತೂದು ಪಾರ್ತನೆ ನಲಿಪುನಕ್‌ಲೆನ
ಮೋನೆ ತೂದೇ ತಾನ್ ಮನಸ್‌ಡ್ ದಾನೊ ನೆನೆತೊಂಡೆ ||
ಏತೊ ತರೆ ಮಾರ್‌ಗಲ ದುಂಬುಡು
ಆದ್ ಪೋಯಿನವೆನ್ನ ಹಿರಿಯಯ
ಪ್ರೀತಿದೇ ಕೈ ಪತ್ತಾನಜ್ಜಿಯೆ ಪನ್ದ ತೋಜುನಲ್ ||

18

ಊರ್ವಸಿಯೆ ಆದುಪ್ಪೊಡುಂಬಲೆ
ಏತ್ ಪಿರಯೊನೆ ಆಂಡಲಾ ಇನಿ
ತೋಜುವಲ್ ಮುಪ್ಪೊರ್ಸೊದಂಚಿನೆ ಸಿವ ಮಹಾದೇವ
ದೇವತೆಲು ನಿಜೊ ಪರಬೆರಾಯೆರೆ
ಏಪೊಗುಲ ಇದ್ದಿಂದ್ ಪನ್ನುನ
ಪಾತೆರೊನೆ ಸತ್ತೊಂದು ತೋಜುನೆ ಎಂಕ್ ನಿಜವಾದ್ ||

19

ದಿಂಜ ಉಡಿಗಿರೆ ಕೊರೈ ಸುರಪತಿ
ರಂಬೆ ಊರ್ವಸಿನಕ್‌ಲೆ ಕೂಟೊಗು
ಸಂತೊಸಾದ್‌ಲ ಬಾರಿ ಮೆಚ್ಚಿಯೆನಕ್‌ಲೆನಬಿನಯೊಗು ||
ದೇವ ಸಿರಿಕುಲು ಸುಮನಸಾದಿಲು
ಪೋಯೆರಾಕ್‌ಲೆ ಬುಡರೊದಾಡೆಗ್
ಓಲೆಗೊನೆ ಕೈದಾಂಡ್‌ಲಾರತಿ ಬೊಲ್ಪು ತಿರ್ಗಯೆರ್ ||

|| ಊರ್ವಸಿ ಪಾರ್ತೆ ಚಿತ್ತನಾಡೆಗ್ ಬತ್ತಲ್ ||

ಪಾರ್ತನಾಪಗ ಬೇತೆ ಅರಮನೆ-
ದಾಡೆ ಜಿಪ್ಪೆರೆ ಕಡಪುಡಿಯೆನಾ
ದೇವರಾಜನೆ ಇರ್ಲೆ ಲೆತ್ತಾದ್ ಚಿತ್ರ ಸೇನಡನೆ ||
ಓಲೆಗೊಡು ಊರ್ವಸಿನ್ ಅರ್ದನೆ

ತೂದು ಮನಸ್‌ಡ್ ಮರ್ಲಾತೆನೆ
ಈಯೆ ಕಡಪುಡು ಆಯೆ ಜೆತ್ತನ ಕೋಣೆಗಾಲೆನ್‌ಲ ||

1

ಚಿತ್ರ ಸೇನೆನೆ ಬತ್ತದಾಲೆನ
ಪೊರ್ಲು ಮಂದಿರೊದವುಲು ಉಂತುದು
ಲೆತ್ತೆ ಊರ್ವಸಿನಾಯೆ ಬಾಕಿಲ್‌ದೆಪ್ಪು ಪಂಡೊಂದು ||
ಲೆತ್ತನಾಯನ ಸೊರೊತ ಗುರ್ತೊನೆ
ತಿಕ್ಕದಾಲೆ ಬಾಕಿಲೊಂದದ್
ಕುಲ್ಲಯಲ್ ತೆಲಿತೊಂದು ಪರ್ಯೆಕೊರ್ದು ಪಾನಕೊನು ||

2

ಕಮ್ಮೆನೊದ ಕಸ್ತೂರಿ ಗಂದೊನು
ಕರ್ಪುರೊನು ದೀಡ್ಡೆದುರು ಕೇಂಡಲ್
ಬತ್ತನೆನೆ ದಾಯೆಗ್‌ಯೆ ನಿಕ್ಕಲ ಕುಸಲ್ ಆವೊಡಯ ||
ಅತ್ತ ಮಾರಾಯೆದಿಯೆ ಅರಸುಲು
ಎನ್ನನೀಡೆಗ್ ಕಡಪುಡನೆ ನಿನ-
ಡಿತ್ತೆ ಗುಟ್ಟುದ ಒಂಜಿ ಸಂಗತಿ ಪನಿಯೆರಾದತ್ತೊ ||

3

ಕುಸಲ್ ಮಲ್ವನ ದಾನೆ ಅರಸುಲು
ನಿನನ್ ದಾಯೆಗ್ ಕಡಪುಡನೆ ಪನ್
ಎನಡ ಎಂಚಿನ ಕಾರ್ಯೊ ಆರೆಗ್ ಪನ್‌ಲ ಸರಿಯಾದ್ ||
ಮುಗುರು ತೆಲಿಕೆಡ್ ಚಿತ್ರ ಸೇನೆನೆ
ಪನಿಯೆರೆಗ್ ಪನಿ ನಾಚಿಗೇಡಲಾ
ಪನ್‌ಪೆನಂಗೈ ಬಾಯ್ಗ ಪತ್ತದ್ ಗುಟ್ಟುಡಾಲೆಡನೆ ||

4

ಆಯ ಮಗನರ್ಜನೆಗೆ ಈಯೆ
ಆಯೆ ಜೆತ್ತನ ಕೋನೆದುಲಯಿಗ್
ಪೋವೊಡುಗೆ ದಾಯೆಂದ್ ಪನೊಡಯ ನಿಕ್ಕಗೊಂತಿದ್ಯೊ ||
ಕಾಮೊದುರಿಟೀ ಬೆಯ್ತನಾಯನ್
ಈಯೆ ನಿನ ಮಿರೆಟೊತ್ತುದುರಿನ್‌ಲ
ಸಾಂತಿ ಮಲ್ಪುಲ ಪನ್ದೊ ಮೋನೆಗ್ ಮುತ್ತೊ ಕೊರ್ನಗನೆ ||

5

ಕೇಂಡನಾ ಪಾತೆರೊನು ಊರ್ವಸಿ-
ಗಾಂಡ್ ಕಿಡ್ಡಿಲ್ ನಾಚಿಗೇಡ್ ಮೆಯಿ
ರೋಮೊನಿಗ್‌ರ್ದ್ ಬೂಮಿ ಲೋಕೊದ ಅರಸು ಮಗನೊಟ್ಟು ||
ಮದನ ಲೀಲೆದ ಆಸೆಡಬಿಮಾ-
ನೊದವೆ ದೈರೊಡುಲಾದ್ ಸಂತೊಸು
ಮನಸ್ ತೂಕೊದ ನಿಲೆನೆ ತತ್ತದ್ ತರೆನ್ ತಗ್ಗಯಲ್ ||

6

ಬಾರತೊದ ಮಹವೀರೆ ಪುದರ್‌ದ
ಆಯೆ ನಿಕ್ಕಲ ತಿಕ್ಕೆ ನಿನ್ನವೆ
ಬಾಗ್ಯೊ ಪೋಲಯೆ ಅಪ್ಪರೆನ ಕಸುಬತ್ತೊ ಮರ್ಯದಿದ ||
ಸೋಲ್ತಡಾಯಡ ದಾನೆ ಆಯೆನೆ
ಕೀರ್ತಿಡೇ ನಳ ನವುಸನಾಕಲೆ
ಮೇಲ್‌ದಾಯೆನೆ ಪೋಲ ಪಂಡೆನೆ ಚಿತ್ರಸೇನೆನೆಲ ||

7

ಅರಸುನಪ್ಪಣೆ ಎಂಕ್ ಮರ್ಯದಿ
ಸಬಿತ ಸುದ್ದಿಲ ಈಯೆ ಪಂಡಾನ
ಪನ್‌ಲ ಸತ್ತೊನು ನೇಕ್ ನಿನ್ನವು ಕುಸೆಲ್ ಸೇರ್ದುಂಡೊ||
ಆಂಡ್ ಈ ಪೊಲಂದ್ ಮನಸ್‌ಡ್
ತಾನ್ ಸಂತೊಸುಡಾದ್ ಪಾರ್ತನ್
ಕೂಡಿಯೆರೆ ಪಿದಡುನವೆ ಅಟ್ಟನೆ ಮಲ್ತಲೂರ್ವಸಿಯೆ||

8

ಬೆಚ್ಚ ನೀರ್‌ಡ್ ಮೀದ್ ಸೈರೊಗು
ಕಮ್ಮೆನೊದ ದ್ರವ್ಯೊಲೆನ್ ಪೂಜಿದ್
ಪಟ್ಟೆ ಸೀರೆನ್ ತುತ್ತುದೇ ಪದ್ವೊಯಿ ದೀಡಿಯಲ್ ||
ಅಪಗ ಬತ್ತನ ಮೇಳೊದಾಕ್‌ಲ್
ಪರಿಮಲೊದ ಅತ್ತರನ್ ಪೂಜ್ಯರ್
ಮುಗುರು ಪೂ ತರೆ ನಿಲಿಕೆ ದೀಡ್ಯೆರ್ ಆಲೆ ಸಿರಿ ಮುಡಿಕ್ ||

9

ಕನ್ನಟೆಡ್ ಮುಂಡೊದವೆ ಬೊಟ್ಟುನು
ತಿದ್ವಾದೈತಾಯಿನೆನ್ ತೂನಗ
ಜವ್ವೊನೆನೆ ಏರ್ಪಿತ್ತಿ ಮದನನ ಆನೆ ಉಂತನೆನೊ ||
ಅತ್ತ ಮನ್ಮತ ಪರಿತೆದಸ್ತೊನೊ
ಕಮ್ಮೆನೊದ ಪುತ್ತೊಳಿಯೊ ಕಾಮುಕ
ಜವ್ವನೆರೆ ಬಾಗ್ಯೊದವೆ ಸುರ ಮರಟಿತ್ತಿ ರುಚಿ ಪಂದೊರ್ ||

10

ಲೋಕೊವಸಿಕರೊ ಮಲ್ಪಿ ಮಂತ್ರೊದ
ದೇವತೆನೊ ಮುನಿಕುಲೆನ ಮನಸ್‌ಡ್
ಸೀದ ಒಯ್ತನ ಮಂತ್ರವಾದೊನೊ ಅತ್ತ ಮಣಿಕೊನೊ ||
ಸೊರೊ ಸುಕೊತವೆ ರೂಪು ರೂಪೊನೊ
ಪೊರ್ಪುಲೆನ ಸರಿತೊಂಜೆ ರಾಸಿಯೊ
ಪನ್ನಿ ನಮುನೆಡ್ ಬತ್ತಲೂರ್ವಸಿಯಾಲೆ ದಂಡಿಗೇಡೆ ||

11

ಒಟ್ಟುಗಿತ್ತನ ಪೊಣ್ಣುಲೆನ ಮೆಯಿ
ಕಮ್ಮೆನೊಗು ಬತ್ತನವೆ ತುಂಬಿಲು

ಕಣ್ಣ ಮೆಂಚಿದ ಬೊಲ್ವು ಬೂರ್ದಗ ರಾದ್ ಪೋಯಲ್ತ್ ||
ಪತ್ತಿ ಕನ್ನಟಿ ಕಲಸೊದಾಕ್ಲ್
ಪೆಟ್ಟಿ ತುಂಬುನ ಕೆಲಸೊದಾಕ್ಲ್
ದತ್ತ ಬಲತ್ತ್ ಬತ್ತೆರೊಟ್ಟಿಗೆ ಸೇಲೆ ಮಾಡಾದ್ ||

12

ರಾಜಸೂಯೊದ ಅಸ್ತಮೇದೊದ
ಯಾಗೊದಕಲೆಡ್ ಸಾನ್ ಮೋಲೆನ
ಕಾರ್ದುಂಗುಸ್ತೊನುಲ ತೂಪುನ ಯೋಗೊದಕಲೆರ್ ||
ದಾನೆ ಪನ್ನುನೆ ಪಾರ್ತ ಪುಣ್ಯೊನು
ಆಯ ಮಂಚಮೊದಾಡೆ ಬರ್ಪಲೆ
ಊರ್ವಸಿಯೆ ಪಂಡೊಂದು ಪುಗರ್ಯೆರ್ ವಂದಿ ಮಾಗದೆರ್ ||

13

ಜನೊಮನೊತ ಸಂಕೊಲೆನೊ ಕಣ್ಣದ
ಪುರುಬು ಕಾಮನ ಬಿರುವೊ ಸೊಂಟೊಡು
ಮನುಮತಗ್ ಮಿಶರಿಯೆರೆ ಮುಟ್ಟಲೊ ಮೂಜಿ ಮಡಿಕೆಗುಳು ||
ಮದನ ಗೊಬ್ಬದ ಚೆಂಡೊ ಕಾಮುಕ
ಜನೊತ ಜೀವೊದ ಗಂಟ್ಲಾಯಿನ
ಪೊರುಲುದೂರ್ವಸಿ ಬತ್ತಲರ್ಜನೆ ಜೆತ್ತನರಮನೆಗ್ ||

14

ಬತ್ತಲೂರ್ವಸಿ ಮುಗಲ್ದಿಡೆಡ್
ರಟ್ಟಿ ಮೆಂಚಿದ ಲೆಕೊನೆ ದಂಡಿಗೆ
ಬುಡ್ಡು ಉಲಯಿಗ್ ಪೊಗ್ಯಲಾಲೆ ಪೊರ್ಲು ಮಂದಿರೊಗು ||
ಒಟ್ಟುಗಿತ್ತನ ಮೇಳೊದಾಕ್ಲ್
ಗಟ್ಟಿದಾ ಸೊರೊಟಪಗ ಪಂಡೆರ್
ಅಪ್ಪರಾ ದೇವಿಗ್ಲ ಜಯೊ ಜಯೊ ಮಂಗಲೊನೆ ಜಯೊನೆ ||

15

ರೂಪೊ ಗರ್ವೊದ ಪೊಣ್ಣು ಪೊಗ್ಯಲ್
ಆದಿ ಸೇಸನ ಮೆಯಿತ ಮೇಲ್ಡ್
ಕಾರ್ನೀರ್ದ್ ಜೆತ್ತಿ ಹರಿನವೆ ನಮುನೆಡರ್ಜನೆನೆ ||
ಜೆತ್ತದಿತ್ತನ ಕೋಣೆದುಲಯಿಗ್
ಬತ್ತನಾಲೆ ಒಟ್ಟುಗಿತ್ತನ
ಪೊಣ್ಣು ಪುಗಲ್ಗ್ ಕೈನ್ ದೀಡ್ ತೂಯಲಪ್ಪರೆನೆ ||

16

ಉದಿಪಿ ಚಂದ್ರನ ಬೊಲ್ವುದಂಚಿನ
ಪ್ರಬೆನೆ ಮೋನೆಡ್ ಮೆಯಿತ ಕಮ್ಮೆನೊ
ಅಲಸ್‌ದಾಂಡ್ಲ ಪಾರ್ತ ಜೆತ್ತನ ಕೋಣೆದುಲಯೊರ್ಮೆ ||
ಆಯ ನಿದ್ರೆನೆ ಬಿರಿದ್ ಮನಸ್‌ಡ್

ಪ್ರೀತಿದಾರಸೊ ಬಾವೊಲುರ್ಕರ್ -
ದಾಯೆ ಸುಕೊ ಬಾವನೆಡ್ ಕಣ್ಣನ್ ಬುಡಿಯೆ ಸಂತೊಸುಡು ||

|| ಅರುನಗ್ ಊರ್ವಸಿನ ಸಾಪೊ ||

ಸಿವ ಸಿವಾ ಈ ಗಾಟ್ ಕಮ್ಮೆನೊ
ಬರುಪುನೆನೆ ಒಲ್ವಡ್ ಪಂಡ್
ಸಯಿರೊ ಪೀಂಟಿದ್ ಕೈನ್ ಕುಡ್ಡುದು ಕುಲೈ ಲಕ್ಕೊಂದು||
ಪೊರುಲು ರತ್ತೊಲೆ ದಿವ್ಯೊ ಪದ್ವೊಯಿ
ಕಿರಣೊದುಲಯಿಡ್ ಸೋಬೆಡಿತ್ತನ
ಮದನ ಪಟ್ಟೊದ ಆನೆನೂರ್ವಸಿನಾಯೆ ತೂವೊಂಡೆ ||

1

ಹಾ ಮಹಾದೇವಿಯೆರ್ ಬತ್ತೆರ್
ದೇವರಾಜನ ಸಬೆಟ್ ನರ್ತನೊ
ನಾಟ್ಯೊಡೇ ರಂಜನೆನ್ ಮಲ್ತನ ಈ ಕಲಾದೇವಿ ||
ಎನ್ನ ಹಿರಿಯೆರ್ ಚಂದ್ರ ವಂಸೊದ
ಅಪ್ಪೆ ಬತ್ತೆರ್ ಈಡೆಗ್ಂದ್
ದಿಡ್ಕ ಲಕ್ಕೊದ್ ತಿರ್ತ್ ಜತ್ತೆನೆ ಮಂಚಮೊಡುದಾಯೆ ||

2

ದಾನೆ ಬತ್ತರ್ ಅಪ್ಪೆ ಕುಲ್ಲಲೆ
ಆ ಸುರೇಂದ್ರನ ಪೊಣ್ಣಲೆಂಕೆ
ಪೂಜ್ಯೆರತ್ತೊಯೆ ಈರ್ ಬತ್ತನ ಬಾರಿ ಸಂತೋಸು ||
ದಾನೆ ಆವೊಡು ಈರೆಗೆನ್ನಡ
ದಾಲ ಸಂಸಯೊ ಬೊಡ್ಡಿ ಪನಿಯೆರೆ
ಈರೆ ಸಂತಾನೊದವೆ ಸಿರಿ ಕೊಡಿಯತ್ತೊ ಯಾನಿರೆನ ||

3

ಆಚಿರಾಯಲ್ ಪಾರ್ತ ಪಾತೆರೊ
ಗಾಲ್ ಕಾಮನ ಸೂಟು ಬೆಯ್ತಲ್
ಆಯ ನಡತೆಗ್ ಮೆಚ್ಚಲಂಗಜಗಾಲ್ ಪೋಡಿಯಲ್ ||
ಕೋಪೊಡುಲ ನಡ್ಡಿಯಲ್ ನಾಚಿಗೆ
ಆದ್ ಪಿರ ಜಾರಿಯಲ್ ಮೇಲ್ಗ್
ಬೂರಿಯೆರೆ ನನ ದಾನೆ ಮಲ್ಪುನೆ ಪನ್ದ್ ಗ್ರೇಯಿತಲ್ ||

4

ದಾಯೆ ಪಂಡೆನೊ ಚಿತ್ರ ಸೇನೆನೆ
ಯಾನ್ ದಾಯೆಗ್ ಒಪ್ಪೆನೋ ಇನಿ
ಕಾಮ ಪನ್ನುನ ಮೂರ್ಕಗೇನ್ಲ ತಿಕ್ದ್ ಬೂರಿಯೆನೆ ||
ಲೋಕೊ ಮರ್ಜಿಡ್ ಇದೈ ಇಂಬ್ಯನ್

ದೇವಬ್ರಹ್ಮೆನೆ ಸಿಸ್ತಿ ಮಲ್ತೆನೆ
ಆಯೆನೇ ಮಹ ಪೆಂಗೆ ಪಂಡ್‌ದ್ ನೆರೈಲಾಲಜನ್ ||

5

ಇಂಬೈ ಬುದ್ಧಿಡ್ ಹೀನೆನೋ ಅ-
ತ್ತಿಂಬೈ ಆಣೇ ಅತ್ತೊ ಜಡೆನನೋ
ಬಂಡೆನೋ ನಿಚೊ ತಪಸ್‌ದಾಯೆನೋ ಸುಬವೊ ಎಂಚಿನವೊ ||
ತಪಸ್ ಮಲ್ತನ ದೇವ ದೈತ್ಯರೆ
ತರೆನ್ ಬಗ್ಗದಿ ಕಾರ್‌ಗೆನ್ನವೆ
ಇನಿಯೆ ಮರೈದಿ ಪೋಂಡೆ ಇಂಬ್ಯಡ ಪನ್ದ ಮರ್ಗಿಯಲ್ ||

6

ದಾನೆ ಪನ್ನಯ ಪಾರ್ತ ಇಂದ್ರನ
ಆಚ್ಚೆಡೇನೇ ಬತ್ತನೆತ್ತೊಯ
ಕಾಮ ಬಾಣೊನು ಕುತ್ತೈ ತಿಗಲೆಗ್ ಚಿತ್ರ ಸೇನೆಂಕ್ ||
ಒಲಿದ್ ಬತ್ತನ ಪೊಣ್ಣನೀಯೇ
ಸಮೊನೊ ದೂರೊಗು ನೂಕುನವು ಪನ್
ನಿನಡ ಆಣ್ಣೆನೆ ಇದ್ಯೊ ಪೊಣ್ಣಗ್ ಮರ್ಲ್ ಆಪುನವೆ ||

7

ಈರ್ ಈ ಪಾತೆರೊನು ಎನ್ನಡ
ದಾಯೆ ಪನ್ನರಲಪ್ಪೆ ಸಿವ ಸಿವ
ಕಾಮ ಬಾದೆಡ್ ಈರೆಗರ್ತಾಯಿಜಿಡ ಪನ್ನೇನ್ ||
ಆ ಸುರೇಸನ ಆಚ್ಚೆ ಉಪ್ಪಡ್
ಯಾನ್ ತಪ್ಪಯೆ ನೀತಿ ಧರ್ಮೊಗು
ಈರ್ ಎಂಕ್ಲೆನ ವಂಸೊ ಪುಟ್ಟೆರೆಗಪ್ಪೆ ಆಯಿನರ್ ||

8

ಈರ್ ದುಂಬುಡು ಬುಡೆದಿ ಆಯ್ತರ್
ಆ ಪುರೂರವಗೀರೆ ಬಂಜಿಡ್
ಆಯು ಪುಟ್ಟೆನೆ ಆಯಾಗಾಯನೆ ನವುಸೆ ಮಗೆನತ್ತೊ ||
ಆಕ್ಲೆನ ತರವಾಡ್‌ಡೆಂಕುಲು
ಪಾಂಡವರ್ ಆಯ್ಕಲ್ ಈರೆನ್
ಯಾನ್ ತೂವೊಡು ಎಂಚ ಪನ್ನೆಯೆ ಪಂಡೆನಾ ಪಾರ್ತ ||

9

ಜಾತಿ ಸಮ್ಬಂದೊಗುಲ ಸೂಳೆಲೆ
ಕೂಟೊಗುಲ ಒಂಜತ್ತ ನೀತಿಯೆ
ಕಾಮೋಗೇ ಕಣ್ಣೆದ್ದಿ ಪನ್ನನ ಈಯೆ ಕೇನ್ದಜನ ||
ದಾನೊ ಬಾರತೊ ಜನೊಟ ಎಂಕುಲು
ಸೇರಿ ಸಾತ್‌ಗ್ ಒರೊಕು ಅವ್ವೇ
ಮಾತೆರೆಗ್ ಸಮ್ಬಂದೊ ಆಂಡೊಯ ಪನ್ನನೆಂಚಿನೆನ್ ||

10

ಸುಕೊಕು ಅಜ್ಜಗ್ ಅಜ್ಜನಜ್ಜಗ್
ಪಲಯೆ ಸಮ್ಬಲೆ ಅಮ್ಮೆ ಮೆಗ್ಗುಗ್
ಪನ್‌ಪಿ ಸಮ್ಬಂದೊದವೆ ಕುಟುಮೊದ ಬಂದು ಜನೊಕುಲೆಗ್ ||
ಕಯಿತ ಆಯುದೊಡಕ್‌ಲೆ ವೈರಿಲೆ
ತರೆನ್ ಕಡ್ಡುನ ವೀರನಕ್‌ಲೆಗ್
ತಪಸ್ ಮಲ್ಪುನ ಯೋಗಿಲೆಗ್ ಸತ ಯಾನೆ ಬೋಡತ್ತೊ ||

11

ಮರಪೊಡೀಯೇ ದುಂಬು ಆಯಿನ
ಪೊದುತ ಸಮ್ಬಂದೊನುಲ ಪೊಣ್ಣುಲು
ಒಲಿದ್ ಬತ್ತೆರ್‌ಡಕ್‌ಲೆ ಇಚ್ಚೆನ್ ತೀರ್ರವಂದ್‌ನಯೆ ||
ಕುರಿಕ್ ಸರಿಸಮೊ ಮೂರ್ಕೆ ನಿಕ್ಕುಲ
ತೆರಿವು ಎಂಚಿನ ಪನ್ನಗಾಯೆನೆ
ಪನ್‌ಪೆ ಕೈಮುಗಿಯೊಂದು ಆಲೆನ ಮೋನೆ ತೂದಾಯೆ ||

12

ಸರಿರೊ ಎಂಕ್ಲೆನ ನರಮನಿನವೇ
ಆಯಿನ ಧರ್ಮೊಡೆ ನಡಪೊಡೆಂಕುಲು
ಕೆಲಸೊಡಾದೊನು ಮಲ್ತನೆಂಕುಲು ಸೈತ್ತದಾ ಲೋಕೊ ||
ಸುಕೊತ ಸೊರ್ಗೊಗು ಸೇರ್‌ಡ್‌ಲೆಂಕ್ಲೆಗ್
ವಿದಿಯೆ ತಪ್ಪಂದತ್ತೊ ಸಾಸ್ತೊಲು
ಸಯಿರೊ ಧರ್ಮೊನು ಇಂಚ ತೆರಿಪದೊ ಪಂಡೆನರ್ಜನೆನೆ ||

13

ನಿಕ್‌ಲ್ ಸಾಸ್ತೊದ ವಿದಿತಿ ನಡಪುನ
ಜನೊಕುಲುಂದುದು ಮೂಜಿ ಲೋಕೊಡು
ತೆರಿದ್ ಉಂಡುಯ ಪನೊಡೊ ಐನೇ ಯಾನ್ ನಿನಡಿತ್ತೆ ||
ಮೆಗಿಪಲಯನಿಕ್‌ಲೈವೆರೊಟ್ಟುಗು
ಮೆರೆದ್ ಸೊರ್ಕುಪರತ್ತೊ ಒರಿತ್ತಡ
ವಿದಿನ್ ಬುಡಯರ್ ಸಾಸ್ತೊ ನೀತಿದ ಹರ ಮಹಾದೇವ ||

14

ಅಪ್ಪೆ ಪಾತೆರೊಗಾದ್ ಎಂಕುಲು
ಐವ್ವೆರೊರಿನ್ ಮದಿಮೆ ಆಯಿನೆ
ನೆಟ್ಟ್ ಎಂಚಿನ ತಪ್ಪು ಎಂಕ್ಲೆನ ದಾಯೆ ದೂರುವರ್ ||
ತಪ್ಪಿಯೆರೆ ಸಾದ್ಯೊಂಡೊ ಅಪ್ಪೆನೆ
ಪನ್ನಿ ಪಾತೆರೊ ಯಾನ್ ಈರೆಡ
ಸೊರ್ಕಿಯೆಡ ಎನ್ನಂಚಿ ಮೂರ್ಕರ್ ಏರ್ ಪನ್‌ಲೆನಡ ||

15

ಅಪ್ಪೆ ಪಂಡೆನಕಾದ್ ಐವೆರ್
ಒರಿ ಪೊಣ್ಣನ್ ಮದಿಮೆ ಆಯರ್

ಅಮ್ಮೆ ಅತ್ತೊಯ ನಿಕ್ಕ್ ಇಂದ್ರೆನೆ ಆಯ ಪಾತೆರೊನು ||
ಮೀರ್ದನಯ ಈ ಎನನ್ ಸುರಪತಿ
ಈಡೆ ಕಡಪುಡುನೆತ್ತೊ ಕಾಮನ
ಬಾದೆನುಂತವಿ ಗುಟ್ಟು ತೆರಿವನೆ ಪಂಡಲಾ ಸೂಳೆ ||

16

ಎನ್ನವಸ್ತೆನ್ ಸರಿಟ್ ಬುಡ್ಡದ್
ಇತ್ತೆ ಪಂಡೆಡ ಸುರೆರೆ ಪೋಣ್ಣಲು
ಸೋರ್ಕುದಾಣುಲೆ ಮೇಲ್ಗ್ ಬೂರ್ದುಕುಲುಂದು ಈ ಪನುವ ||
ಸತ್ಯೊ ಪನ್ನುನೆ ಯಾನ್ ನಿನ್ನಡ
ಎನ್ನ ಕಣ್ಣೆಗ್ ಕಾಮೊದುರಿಯೇ
ಸುಡ್ಡುನೆಟ್ ಸರಿ ದಾಲ ತೋಜುಜಿ ಸೈರೊ ಮುಟ್ಟುಲಯ ||

17

ಎನಡ ಪುಣೆವಡೆ ಅಪ್ಪೆ ಈರೆಡೆ
ಪಿಸ್‌ರಡುತ್ತರೊ ಕೊರೈರಾಪುಜಿ
ಮನಸ್ ಗಟ್ಟಿಯೆ ಆಂಡ ಮದನನ ಬಾದೆ ತಾಗಂದ್ ||
ಈರೆ ಸಂತಾನೊದವೆ ಆಣನ್
ತೂಯೆರೆಗ್ ಬತ್ತರಡ ಇಂಚಿನ
ಹಾಲ್ ಪಾತೆರೊ ಸಮೊನೊ ಪನ್ನುನ ಪೋಲೆ ಮುಲ್ಪಡ್ ||

18

ಈತ್ ಪನ್ನಗ ಕೋಪೊ ನೆತ್ತಿಗ್
ಎರ್ದಾಲೆನ ಲೆಜ್ಜಿ ನಾಚಿಗೆ
ಮಾತ ಅಳಿದಾಲ ಸುಯ್ಯದೆಪ್ಪುನಗಾಂಡ್ ಬೆಚ ಬೆಚ್ಚ ||
ಆಸೆ ಜಾರ್‌ದ್ ಸೈರೊ ನಡ್ಗದ್
ಲಾಂಡ್ ಬೆಗರ್‌ದ್ ಕಣ್ಣೆದಾ ಕಿಟಿ
ಕೋಪೊಡೇ ರಟ್ಟಿಯೆನೆ ಪಿಸ್‌ರಡ್ ನೆರೈಲಾಯನಲ್ ||

19

ಥೂ ಪಟಿಂಗರೆ ಬಾವ ದುಸ್ತೆರೆ
ರಾಜೆ ವಂಚನೆದಕಲೆ ಸ್ವಾಮಿಯೆ
ಪೋಲಿಲೆನ ಗುರು ನೀಚ ಬಂಡೆನೆ ದಾನೆ ಬಗ್‌ಲೆನೆಯ ||
ಮರ್ದ ಯಾನೇರ್‌ಂದ್ ತೆರಿಯನ
ನಿನ್ನ ಯೋಗಿತೊನತೊ ಮಲ್ತನ
ಬುದ್ಧಿ ಹೀನೆನೆ ಮೂಜಿ ಕಾಸ್‌ದ ನಾಯಿ ನಿನ್ನಡೆಗ್ ||

20

ಆಸೆಡೇನೇ ಬತ್ತನೆಂದ್
ರೂಪೊ ಗರ್ವೊಡು ಕೊದಿನ್ ಪುಟ್ಟವಿ
ಮೂರ್ಕೆ ಮಿಂಡೆನೊ ಎಂಕ್ಲ ಸಸರೊನೊ ನಿನ್ನ ಹಂಕರೊನೊ ||
ಓ ಸಿಕಂಡಿಯೆ ಆಣ ಏಸೊನೆ

ದಾಯೆ ನಿಕ್ಕಲ ಪಂಡ್‌ದಾಲೇ
ಸಾಪೊ ಕೊರೈರೆಗಾದ್ ಕೈನೇ ನೆಲಕ್ ಹಾಕಿಯಲ್ ||

21

ನರಮನಿನ ರೂಪೊದವೆ ಮುರ್ಗೊನೆ
ತಿರ್‌ಗ್ ಈ ಬಾರತೊಡುಲರ್ದುನ
ನಿಜೊ ಸಿಕಂಡಿಯೆ ಆದ್ ಊರುಡು ಗುಟ್ಟುಡೊಂಜೊಸೊರ್ ||
ಹರಿಹರೆರೆ ಕೈತಡೆಗ್ ಪೋಯಡ
ಸುರಪತಿಡ ಪಂಡಡಲ ಸಾಪೊನು
ಪರಿಯರಿಪುನಕಲಿದ್ದಿ ಪಿರಿಯಾವಂದ್ ನಡಪುಂದು ||

22

ಮೋನೆ ತಿರ್‌ಗದ್ ಪೋಯಲಲ್ಪನೆ
ಪಾರ್ತೆ ಪೊಟ್ಟೆನೆ ಆಯೆ ಬಿರೆಲ್‌ನ್
ಮೂಂಕುಡೇ ದೀಡೊಂದು ಗ್ರೇಯಿತೆ ತನ್ನ ಹಣೆಬರೊನು ||
ಆಯಿನಾವಡ್ ದೇವಲೋಕೊದ
ಸೂಳೆಲಾಂಡಲ ಅಕಲೆ ಸಾಪೊನೆ
ಬೂಮಿ ಲೋಕೊದ ಜನೊಕು ತಟ್ಟುನೆ ಎನ್ನ ವಿದಿಯತ್ತೊ ||

23

ಒಂಜಿ ಒಸೊರ್ ಸಿಕಂಡಿಯಾದೇ
ಎಂಚ ಬದುಕುನೆ ಯಾನ್ ಊರುಡು
ಪಂಡ್‌ದಾಯೆನೆ ಇಂಚಿ ಜೀವನೊ ಸುಡಡ್ ಸೈಪ್ಪುನವೆ ||
ಸಾದಿ ಎಡ್ಡೆನೆ ದರ್ಮೊದುರುದ
ಜಾಗೆಡೆಂಕೇ ಸಾಪೊ ತಿಕ್ಕರೆ
ಬೇತೆ ಕಾರಣೊ ದಾಯ್ತ ಎನ್ನವೆ ಪಾಪೊದಾ ಪಲೊನೆ ||

24

ತಪಸ್ ಮಲ್ತದ್ ಸಿವನ ಬಾಣೊನು
ಪಡೆಯೆರೆನೆ ಎಂಕಾಂಡ್ ಧರ್ಮೊನೆ
ತಪಸ್ ಪಂಡ್‌ದ್ ಗ್ರೇಯ್ತನೆಂಕ್ ಸಿಕಂಡಿ ಜಲ್ಮಾಂಡ್ ||
ರಡ್ಡ್ ತಪಸ್‌ಲೆ ಪಲೊಕುಲಿಂಚನೆ
ತಿರ್‌ಗ್ ಮುರ್ಗಾದಿಂಚಿ ಆಯಿನೆ
ತನ್ನ ಕರ್ಮೊದ ಪಲೊನೆ ಪಂಡ್‌ದ್ ಪಾರ್ತೆ ಗೆರೆತೊಂಡೆ ||

25

ಕೋಪೊಡೂರ್ವಸಿ ಪೋಯಿನಾಲೇ
ಪಾರ್ತೆಗಾತಕೊ ಮಲ್ತೆ ಪಂಡ್‌ದ್
ತಾನೆ ಕೋಪೊಡು ಚಿತ್ರ ಸೇನಡ ಪನ್ನ ತೆರಿಪಯಲ್ ||
ಆಯೆ ಸುರಪತಿಡಪಗ ಪಂಡೆನೆ
ಸಾಪೊ ತಿಕ್ಕನ ಕೋಪೊಡರ್ದುನೆ
ದಾಲ ಮಲ್ತನೆ ಪನ್ನಗಿಂದ್ರೆನೆ ಬಾರಿ ಪೋಡೊಂದು ||

26

ಮಗನ್ ಸಮದಾನೊನುಲ ಮಲ್ತದ್
ನನಗ್ ಈ ಬನೊ ವಾಸೊ ಕರಿನಗ
ಒರುಸೊ ಒಂಜಿಲ ಊರುಡುಂತ್ಯೆರೆ ನಿಕ್ಯ ಉಪಕಾರೊ ||
ಆಯೆರೆಗ್ ವರೊ ಆಂಡ್ ಸಾಪೊನೆ
ಈಯೆ ಪೋಡ್ಯಡ ಪಂಡ್‌ದಾನಗ
ಪಾರ್ತೆ ಸಂತೊಸುಡಿತ್ತೆ ಸೊರೊಡು ಬಾರಿ ಮರ್ಯದಿಡ್ ||

27

ಮಗನ್ ಸಂತೊಸು ಮಲ್ತದಿಂದ್ರೆನೆ
ಸುರ ಸಬೆನ್ ಕೂಡ್ಲಾದ್ ಕೊರೈನೆ
ತನಡ ಇತ್ತನ ದಿವ್ಯೊ ಬಾಣೊನು ಮಂತ್ರೊ ಕಲ್ವಾದ್ ||
ಅವುಲೆ ಉಂತ್‌ನವೈನ್ ಒರ್ಸೊಡು
ಬರತ ವಿದೈನ್ ಮಾತ ಕಲ್ತೆನೆ
ಸುರೆರೆ ವೈರಿಲೆ ನಾಸೊ ಮಲ್ತದ್ ಕೀರ್ತಿ ಪಡೆವೊಂಡೆ ||

ನಾಲನೆ ಸಂದಿ

|| ಲೋಮಸಾ ರುಸಿ ಸೊರ್ಗೊಡುದು ಬತ್ತೆರ್ ||

ಪಾರ್ತೆನಮರಾವತಿಡ್ ಇಂದ್ರನ
ಸೇರಿಗೆಡ್ ಇತ್ತೊಂದು ಸೌಕ್ಯೊಡು
ನೂಕಿಯೆನೆ ದಿನೊ ವರ್ಸೊ ಲೆಕ್ಕೊಗು ಐನ್ ಕರಿದಾಂಡ್ ||
ಓಲು ಉಲ್ಲೆನೊ ಪಾರ್ತೆ ಎಂಕ್ಲೆನ್
ಪೂರ ಮರತೆನೊ ಪನ್ದ ಧರ್ಮಜೆ
ಬಾರಿ ಚಿಂತೆಡ್ ಇತ್ತೆ ಕಾಮ್ಯಕ ಬನೊಟು ಬೇಜರೊಡು ||

1

ಸುರಪೆ ಲೋಮಸೆ ಪನ್ನಿ ರುಸಿನ್‌ಲ
ಸುಕೊಟು ಅರ್ಜುನೆ ಉಪ್ಪಿ ಸಂಗತಿ
ಪನಿಯೆರೆಗ್ ಕಡಪುಡಿಯೆ ಧರ್ಮಜೆ ಇತ್ತನಾಡೆಗೆನೆ ||
ಆ ಮಹಾ ಮುನಿ ಬಾನೊ ಸಾದಿಡೆ
ಕಾಮ್ಯಕೊಗು ಜತ್ತನಯೆ ಕಾಡ್‌ಡ್
ಪಾಂಡವೆರೆನಾ ಪರ್ನ ಸಾಲೆಡ್ ತೂಯೆ ಧರ್ಮಜನ್ ||

2

ಧರ್ಮನಂದನೆ ಅರ್ಗೊ ವಾದ್ಯೊಡು
ಸಮ್ಮನಿತ್‌ದಲ ರುಸಿಟ ಕೇಂಡೆನೆ
ಮಿತ್ತ ಲೋಕೊದರೀರ್ ಬತ್ತನ ಕಾರ್ಯೊ ಎಂಚಿನವು ||
ಪಾರ್ತೆನಮರಾವತಿಡ್ ಸೌಕ್ಯೊಡು
ಸೇರ್ದ್ ಕುಸಲ್‌ಡ್ ಉಪ್ಪಿ ಸಂಗತಿ
ಪೂರ ಬುಡ್ಡದ್ ಇವರೊ ಇವರೊಡು ಪಂಡೆರಾ ಮುನಿಯೆ ||

3

ಮೆಗಿಯ ಸುಕೊ ಸುದ್ದಿಲೆನ್ ಕೇಂಡ್‌ದ್
ಪರಮ ಸಂತೊಸುಡಾಯೆ ಬುಡೆದಿಗ್
ನಕುಲಸಾದೇವೆರೆಗ್ ಬೀಮಗ್ ಪೂರ ತೆರಿಪಾಯೆ ||
ಮೂಲು ಕಾಡ್‌ಡ್ ತಿರ್ಗ್ ತಿರ್ಗ್‌ದ್

ಬಾರಿ ಬೇಜರೊ ಎಂಕ್ಲೆಗಿತ್ತೆನೆ
ಸೀರ್ತೊ ಯಾತ್ರೆಗ್ ಪೋಪುನಾಸೆನ್ ಪಂಡೆನಾ ಮುನಿಟಿ ||

4

ಸೀರ್ತೊ ಮೀಯೆರೆ ಪೋಪಿ ಜಾಗೆನ್
ಆ ಮುನಿಯೆ ತೆರಿಪಾದ್ ತಾನ್‌ಲ
ಆಡೆ ಬರ್ಪೆಂದಪಗ ಪನ್ನಗ ಧರ್ಮನಂದನೆನೆ ||
ಕಪಟೊ ಜೂಜಿಡ್ ಎಂಕ್ಲೆ ರಾಜ್ಯೊನು
ಉಳಯಿ ಪಾಡ್ಯೆನೆ ಕೌರವೆನೆ ನನ
ಮಲುಪುನೆಂಚಿನ ಪನ್ದ ತೆರಿಪುಜೆ ಪನ್ನಗಾರುಸಿಯೆ ||

5

ಬೇಜರೊನು ಬುಡು ಧರ್ಮನಂದನ
ಆ ನಿಸದ ಪುರೊತರಸು ನಳೆನೆಲ
ಜೂಜಿ ಗೊಬ್ಬುದು ತನ್ನ ರಾಜ್ಯೊನು ಕಳೆದ್ ಕೆಲವರ್ಸೊ ||
ಕಾಡ್‌ಡೇ ದಮಯಂತಿನೊಟ್ಟುಗು
ಬಾರಿ ಕಸ್ತೊನು ಅನುಬವಿತ್‌ದ್ ಬು-
ಕ್ಯಾಯೆ ಸುಕೊನೇ ಪಡೆದ್ ರಾಜ್ಯೊನು ಪೆರಪ ಪಡೆಯೊಂಡೆ ||

6

ಸನಿನ ಕಾರ್ಬರ್‌ಡಿಂಚಿ ಆಯಗ್
ಒದಗನೆನೆ ಕಸ್ತೊಂದು ತೆರಿಯೊನು
ನನಗ್ ನಿಕ್ಕಲ ಸುಕೊನೆ ತಿಕ್ಕಯಿ ಪಂಡೆರಾ ಮುನಿಯೆ ||
ಸೀರ್ತೊ ಯಾತ್ರೆಗ್ ಪಿದಡ್‌ದುಂತುನ-
ಗಾಪಗನೆ ರುಸಿ ಬೆರಣೆರೊಟ್ಟುಗು
ಮಾತ ಪಿದಡಿಯೆರಕಲೆ ಪಿರವುಡೆ ಸೀರ್ತೊ ಮೀಯೆರೆಗ್ ||

7

ಮೆಗಿಯನಾಕ್‌ಲೆನೊಟ್ಟು ದ್ರೌಪದಿ
ಪಿದಡಿಯಲ್ ಧರ್ಮಜೆನೆ ಪಾಳ್ಯೊನು
ಮುನಿಯೆ ಲೋಮಸೆರೊಟ್ಟು ನಡಪಯೆ ಕಾಡ್ಡ ಸಾದಿಡೆನೆ ||

ಅಕ್ಲ್ ಮಾತೆರ್ ಮುನಿಯಗ್ಸ್ತೆರೆ
ತಪಸ್‌ದಾ ಬನೊತಾಡೆ ಗೆತ್ತೆರ್
ರುಸಿನ ಮೈಮೆದ ಕತೆನ್ ಪಂಡೆರ್ ಲೋಮಸಾ ಮುನಿಯೆ ||

8

ಸಗರ ಬಾಲ್ಟೆನ ಕತೆನ್ ಆ ಬಗಿ
ರತೆನೆ ಗಂಗೆನ್ ಜಪುಡಯಿನೆನ್‌ಲ
ಇವರಿತ್‌ದ್ ವಾತಾಪಿ ಇಲ್ಲಲನಕ್‌ಲೆನೇ ಕರ್ನ ||
ರುಸಿಯಗ್ಸ್ತೆರೆ ಮೈಮೆ ತೆರಿಪದ್
ಅವುಲು ಸೀರ್ತೊನು ಮೀದ್ ಮಾತೆರ್
ಸುರನದಿನ್ ಕಡತೊಂದು ಎತ್ತೆರ್ ಪರಸುರಾಮೆರಡೆ ||

9

ಅಲ್ಲದಾ ಕತೆ ತೆರಿದ್ ಸೀರ್ತೊಡು
ಮುರು ದೆತ್ತೆರ್ ಮಿತ್ತ್ ಬಡೆಕಯಿ
ಡಿತ್ತಿ ಸೀರ್ತೊಡು ಮೀದ್‌ಲಾನಗ ಯಾದವಾದಿಗುಳು ||
ತಿಕ್ನನಾಪಗ ಬಾರಿ ಸಂತೊಸು
ಧರ್ಮನಂದನಗಾಂಡ್ ಅಲ್ಲದ
ಮಲ್ಲ ಮಯಿಮೆನ್ ಪಂಡೆರಾ ಲೋಮಸೆರ್ ಇವರಾದ್ ||

10

ಗಯನ ಕತೆನ್‌ಲ ಚವನ ರುಸಿನಾ
ಮದಿಮೆದಾ ಕತೆ ಬುಕ್ಕೊ ಮಾಂದಾ-
ತನವೆ ಚರಿತೆನ್ ಮರುತನಾಚಾರೊದವೆ ನೀತಿಲೆನ್ ||
ಸಿಬಿನ ಧರ್ಮೊದ ಸಾರೊ ಬುಡ್ಡದ್
ವರುಣಗಿಂದ್ರಗ್ ತನ್ನ ಮಾಸೊನು
ಕೊಯಿದ್ ಕೊರ್ನವೆ ಕತೆನ್ ಕೇಂಡೆರ್ ಧರ್ಮಚಾದಿಗುಳು||

11

ಅಲ್ಲದ್‌ಲಾ ಗಂದ ಮಾದನೊ
ಪನ್ನಿ ಪರ್ವತೊದಾಡೆಗೆತ್ತದ್
ಪುಣ್ಯೊ ಸೀರ್ತೊಡು ಮೀದ್ ರಾತ್ರೆಡೆ ಅಲ್ತ್ ಪಿದಡಿಯೆರ್ ||
ಆತ್ ಪೊರ್ತುಗು ಗಾಳಿ ಬರ್ಸೊನೆ
ಹಾಕ್‌ದಾಕ್‌ಲ್ ಚಂಡಿಯಾಯೆರ್
ಸಾದಿ ನಡಪೆರೆ ತೀರ್ಪಿಯಕ್‌ಲೆಗ್ ಕಣ್ಣೆ ತೋಜಂದೆ ||

12

ಬೆದರ್ ಪುಂಡೆಲ್ ನೂರ್ದು ಪುದೆಲ್‌ನ್
ಕಯಿಟ್ ಬುಡ್ಡದ್ ಮೆಂಚಿ ರಚ್ಚೆನ
ಬೊಲುಪುಡಾಕ್‌ಲ್ ದುಂಬು ಗೆತ್ತೆರ್ ಚಂಡಿ ಚಂಡ್ಯಾದ್ ||
ಅಕ್‌ಲೆ ಪಿರವುಡೆ ಬತ್ತಿ ದ್ರೌಪದಿ
ಪಿರವೆ ಬೂರ್ಯಲ್ ಚಳಿಕ್ ನಡ್ಗದ್
ನಡತ್ ಬತ್ತಲ್ ಮೆಲ್ಲ ಮೆಲ್ಲಡ್ ಕಸ್ಸೊ ತಡೆವೊಂದು ||

13

ಕಾರ್ಗ್ ಮುಲ್ಲುಲ ಕಂತಿ ಬೇನೆಡ್
ಬಾನೊಡಾಕುನ ಮೆಂಚಿ ತೆಡಿಲ್‌ದ
ಪೋಡಿಡಾಲೆನ ಸೈರೊಡೊಸಯೊನೆ ಇದ್ದಿ ಲೆಪ್ಪೆರೆಗ್ ||
ಗಾಳಿ ಬೀಜಿದ್ ಪೊಲಿದ್ ಬೂರುನ
ಬಾರೆದಂಚನೆ ಬೂರ್ಯಲಲ್ಲನೆ
ಆಲೆಗಿಂಚಿದ ಗೋಚರೊನೆ ಸರಿ ಇದ್ದಿ ಬುಲ್ಬೆರೆಗ್ ||

14

ಆಪಗನೆ ಬೊಲ್ವಾದ್ ಬರ್ಸೊನೆ
ಬೂರುನವು ಕೈದಾದ್ ಪಿರವುಗು
ತೂನಗನೆ ದ್ರೌಪದಿನ್ ತೋಜಂದಕ್‌ಲ್ ಗಾಬಿರಿಡ್ ||
ನಾಡಿಯೆರೆ ಪಿರ ತಿರ್ಗದಾಪಗ
ಸಾದಿಡೆನೆ ಬನ್ನಗನೆ ತೂಯೆರ್
ಬೂರು ಇತ್ತನ ದ್ರುಪದ ಮಗಲೆನ್ ಆಲೆಗುಸುಲಿದ್ದಿ ||

15

ಧರ್ಮಚೆನೆ ತರ್ಕೊಂದು ಆಲೆನ್
ತನ್ನ ತುಡೆಟಾದರಿತ್‌ದಪಗನೆ
ರಚ್ಚಣೆದ ಮಹ ಮಂತ್ರೊ ಜಪಿತ್‌ದ್ ನೀರ್ ತಲಿಪುನಗ ||
ಮತಿಯೆ ಬತ್ತದ್ ಕಂಡನೈಲ್ಲೆನ್
ಸರಿಟ್ ತೂಯಲ್ ಕಣ್ಣೆ ಬುಲದೇ
ಅಪಗ ಮಾತೆರೆ ಮನಸ್‌ಗೇತ್‌ಲ ಆಂಡ್ ಸಂತೋಸು ||

16

ನಮ್ಮ ಒಟ್ಟುಗು ಇತ್ತಿ ರುಸಿಕುಲು
ಅಗ್ನಿ ಹೋತ್ತಿಲು ಆಪ್ತ ಜನೊಕುಲು
ಪುಣ್ಯೊ ಸೀರ್ತೊದ ಜಾಗೆ ಜಾಗೆಗ್ ನನಗ್ ಪೋಯೆರೆಗ್ ||
ಕಲ್ ಮುಲ್ಲುದ ಕಾಡ್ಡ ಸಾದಿಡೆ
ಕಸ್ಸೊನೇ ನಡತೊಂದು ಪೋಯೆರೆ
ಪನ್ನುನಾ ದ್ರೌಪದಿನ ಮೋನೆನ್ ತೂದು ಧರ್ಮಚೆನೆ ||

17

ಮಾಯಕೊಡು ಮಾತೆರೆನ್ ಕೊಂಡೊದು
ಪೋಯೆರೆಗ್ ಇನಿ ತೀರುನಾಯೆನೆ
ಬೀಮನಾ ಮಗೆ ನಾ ಗಟೋದ್ಗಜೆ ಬರೊಡು ಪಂಡೊಂದು ||
ನೆನೆತಿ ಸಾತ್‌ಗ್ ಬಾನೊ ಸಾದಿಡೆ
ಬರ್‌ಪಿ ಗೌಜಿನ್ ತೂದು ಮಾತೆರ್
ನಿಲ್‌ಕ್ ತೂನಗ ತಿರ್ತ್ ಜತ್ತದ್ ಅಡ್ಲೊ ಬೂರೊಂಡೆ ||

18

ದೈತ್ಯನೊಟ್ಟುಗು ಸೇರ್ದ್ ಬತ್ತನ
ರಕ್ಕಸೆರೆ ಪರಿವಾರೊ ಮಾತೆನ್
ಲೆಕ್ಕೊ ಮಲ್ಲೆರೆ ಬಲ್ಲಿ ಸೇರ್ನಗ ಆಂಡ್ ಕತ್ತಲೆನೆ ||
ಎನ್ನನೀರೇ ದಾಯೆ ನೆನೆತರ್
ಪನ್ನೆ ನೇಲ್ಯಮ್ಮೇರೆ ಪಂಡ್‌ದ್
ಧರ್ಮನಂದನ ಕಾರ್ಗ್ ಬೂರಿಯೆ ವೀರ ದಾನವೆನೆ ||

19

ಪುಣ್ಯೊ ಸೀರ್ತೊದ ಜಾಗೆಗಂಕುಲು
ಕಲ್ಲೆ ಮುಲ್ಲುದ ಸಾದಿ ನಡತ್‌ದ್
ಕಸ್ತೂಡೇ ಪೋವೊಂದು ಎತ್ತೆರೆ ಆಪುಜತ್ತೊ ಮಗ ||
ನಿನ್ನ ಪರಿವಾರೊದವೆ ವೀರರ್
ಉಲ್ಲೆರೇಶಲ ಅಕ್‌ಲ್ ಎಂಕ್ಲೆನ್
ಕುಲ್ಲದೆತ್ತವಡಕ್‌ಲೆ ಪುಗೆಲ್‌ಡ್ ಪನ್ನೆ ನೆನೆತೊಂಡೆ ||

20

ಆಂಡ್ ಪಂಡ್‌ದ್ ಪುಗೆಲ್‌ಗೇರ್ರಯೆ
ಬೀಮ ಧರ್ಮಜನಕ್‌ಲೆನಾಪಗ
ವೀರರಾ ಸಹದೇವನಕ್‌ಲೆನ್ ಬುಕ್ಕೊ ದ್ರಾಪದಿನ್ ||
ಒರಿನಕ್‌ಲೆನೇರ್ರಯೆರ್ ಆಯನ
ಕಡೆತ ರಕ್ಕಸನಕ್‌ಲ್ ಪುಗೆಲ್‌ಗ್
ಬರೊಟು ಬಾನೊಡೆ ರಾದ್ ಪೋಯೆರ್ ಮುಗಲ್ ರಾಪಿಲೆಕೊ ||

21

ಅಸುರನಾಕ್‌ಲೆ ಸೈರೊ ಮುಟ್ಟೆರೆ
ತನ್‌ಕ್ ಆವಂದ್‌ಂದ್ ಲೋಮಸ
ಮುನಿಯೆ ಮನೊವೇಗೊಡುಲ ಪೋಯೆರ್ ಕಣ್ಣೆ ಬುಲನಗನೆ ||
ಪೋಯಿನಾಕ್‌ಲ್ ಕಾಡ್ ಕಡತ್‌ದ್
ಯೋಗಿ ನರನಾರಾಯಣೆರೆ ಗಿರಿ-
ತಾಡೆ ಎತ್ತೆರ್ ಬಾರಿ ಸತ್ಯೊದ ಪುಣ್ಯೊ ಜಾಗೆದಡೆ ||

22

ಮಾತೆರಲ ಆ ಪುಣ್ಯೊ ಜಾಗೆನ್
ತೂದು ಜಪ್ಪುನಗಪಗ ಅಲ್ಲದ
ಯೋಗಿ ರುಸಿಕುಲು ತೂದು ಮುಕುಲೆನ್ ಬಾರಿ ಸಮ್ಮನಿದ್ ||
ಅಲ್ಲದುಂಬುಡು ಆಯಿ ಸಂಗತಿ
ಧರ್ಮನಂದನೆ ಕೇನ್ದ ತೆರಿಯೆನೆ
ಎನ್ನೊ ದಿನೊ ಅವುಲಿತ್ತೆರಾಕ್‌ಲ್ ಸೀರ್ತೊ ಮೀದಾದ್ ||

23

ಮುಕುಲು ನರನಾರಾಯಣಾಸ್ರಮೊ
ದವುಲು ಇತ್ತನೆ ಮಾತ ಸೀರ್ತೊಲೆ

ಕಿರೆಕ್ ಜತ್‌ದ್ ಮೀದ್ ಮೆಯಿಮನೊ ಸುದೊ ಮಲ್ಲೊಂದು ||
ಪರಮ ಧರ್ಮೊದ ಸಾರೊನಾ ಮುನಿ
ಜನೊಕುಲೆಡೆ ಕೇನೊಂದು ಅಲ್ಲದ
ಪೊರುಲು ಪೊರುಲಾದಿತ್ತಿ ಸಿಸ್ಸಿದ ಆ ವಿಚಿತ್ತೊಲೆನ್ ||

24

ಕಟ್ಟಿ ಕಟ್ಟೆನ ಕಿರೆಟ್ ತಾಮರೆ
ಪುಸ್ತೊಲವೆಕೇ ರಾಪಿ ತುಂಬಿಲು
ಮಿತ್ತ ಗಿಳಿ ಕೋಗಿಲೆಲು ಮರಕುಲೆ ಮೇಲ್ದ ಕುಲ್ಲೊಂದು ||
ಪೊರು ಸೊರೊ ಲಕ್ಕನಗ ಮೂಡಯಿ
ದಿಕ್ಕಡ್‌ದ್ ಕಮ್ಮನೊನೆ ಅಲಸ್‌ದ್
ಬನ್ನಗನೆ ದ್ರಾಪದಿಯೆ ತೆರಿಯಲ್ ಪುಸ್ತೊ ಉಂಡುಂದು ||

|| ಭೀಮ ಹನುಮೆರೆಗಾಂಡ್ ಸಮ್ಮಂದೊ ||

ಕಮ್ಮನೊದ ಪೂ ತನ್‌ಕ್ ಕೊಂಡೊಡು
ಪನ್ನೆ ಬೀಮನ್ ದ್ರಾಪದಿಯೆ ಕಿಬಿ
ಟೊತ್ತಯೊಡು ಪನ್ನಗನೆ ಪಿದಡಿಯೆ ಬೀಮನಮಸರೊಡು ||
ಗದನ್ ಬಿರುಪಗರಿಲೆನ್ ಪತೊನುದು
ಬೆರಿಕ್ ಮೂಡಿಗಿ ತಿಕ್ಕದಾಯೆನೆ
ಸಿವನ್ ನೆನೆತದ್ ಕಾಡ್‌ದುಲಯಿಡೆ ನಡತ್ ಪೋನಗನೆ ||

1

ಸಾದಿಡಿತ್ತನ ಗುಂಡು ಕಲ್ಲುಲು
ಓಡೆಗೋಡೆಗೊ ರಟ್ಟೊ ಮರಕುಲು
ಬೂರೊ ಸಾದಿಡ್ ಬೇರ್ ಪೊರಿದೇ ಕಾಡ್‌ಡಿತ್ತನವು ||
ಪಿಲಿ ಕರಡಿ ಕಾಡಾನೆ ಸಿಮ್ಮೊಲು
ಬಲಿತೊ ಇಂಬ್ಯನ ಬೊಬ್ಬೆ ಕೇಂಡ್‌ದ್
ಬನೊನೆ ಪೊಡಿ ಪೊಡಿಯಾಂಡ್ ಕಂಬುಗು ಆನೆ ಪೊಗ್ಗಿಲೆಕೊ ||

2

ಆ ಮಹಾ ಪರ್ವತೊದ ಮುದೆಲ್‌ಡ್
ರಾಮ ದ್ಯಾನೊಡು ಇತ್ತಿ ಹನುಮೆನೆ
ಕಾಡ್ಡ ಗೌಜಿಗ್ ಕಣ್ಣೆ ಬುಡಿಯೆನೆ ಯೋಗೊಡಿತ್ತನಯೆ ||
ಈತ್ ರಬಸ್‌ಡ್ ಬರ್ಪುನೇರೋ
ದಾನವೆನೊ ನರಮನಿಯೊ ತೂನಗ
ಬಾರಿ ತೆರಣೊದ ವೀರೆ ಗಟ್ಟಿಗೆ ರಾಮ ರಾಮಂದ್ ||

3

ಈ ಬರೊನು ತೂನಗನೆ ಎಂಕ್ಲೆನ
ಆನಿಡಾಯಿನ ರಬಸ್‌ದಂಚಿನೆ

ಏರ್ ಪಂಡ್‌ದ್ ಲಕ್ಕ್‌ದುಂತುದು ತೂಯೆ ಬರ್ಪನೆನ್ ||
ಮೆಲ್ಲ ಮರನೊಂಜೆನ್‌ಲ ಪೊರುಡು
ಕುಲೈ ಪತೊನುದು ಬೀಲೊ ಸಾದಿಗ್
ಅಡ್ಲೊ ದೀಡ್‌ದ್ ಬೀಮನುಂತದ್ ಪಾತೆರ್ಪಾಯೆನೆಲ ||

4

ದೂರೊ ಪೋಪುನೆ ಈಯೆ ದೈತ್ಯನೊ
ಕೇಚರೆನೊ ದೇವತೆನೊ ಅತ್ತೀ
ಬೂಮಿ ಲೋಕೊದ ನರಮನಿಯೊ ಪನ್ ಕೇಂಡೆನಾ ಹನುಮೆ ||
ಯಾನ್ ನರಮನಿ ಜಾತಿದಾಯೆನೆ
ದೂರೊಡುದು ಪುಸ್ಸೊದವೆ ಕಮ್ಮೆನೊ
ಮೂಂಕುಗಲಸುನ ತೆರಿದ್ ಬುಡೆದಿಗ್ ಕನತ್ ಕೊರ್ಪೆಂದ್ ||

5

ಪುಸ್ಸೊ ಕನಯೆರೆ ಪೋಪುನಾಯೆನೆ
ಪನ್ ದುಂಬುಗು ನುರ್ಕುನಾಪಗ
ಅಡ್ಲೊ ದೀಡೈನೆ ಹನುಮೆ ಬೀಲೊನು ಅಪಗನೇ ಬೀಮೆ ||
ಬೀಲೊನಾಪೆಕ್ ಗದೆಟ್ ನೂಕುನ-
ಗಾಪಗನೆ ಮೆದ್ಲಂದೆ ಇತ್ತನ
ವಾನರನ ಬೀಲೊಗುಲ ಹಾಕಿಯೆ ಗೌಜಿ ಲಕ್ಕಾದ್ ||

6

ಯಾನ್ ಒದೈಡ ಜರಿವು ಪರ್ವತೊ
ಬಾರಿ ತೆರಣೊದ ವೀರೆ ತೆರಿಯೊನು
ಸಾದಿ ಗಡ್ಲೊದ ಬೀಲೊ ದೆಪ್ಪುಯ ಎಡ್ಲೆ ಪಾತೆರೊಡು ||
ಈರ್ ಗಟ್ಟಿಗೆ ಬಲೊಟು ನಿಜೊನೇ
ಯಾನ್ ಮುದಿ ಮುದಿ ಮಂಗೆ ಎಂಕೇ
ತೀರುಜಿಯೆ ಪಂದಯೆರೆ ಬೀಲೊನು ಈರೆ ತೂಲೆಂದ್ ||

7

ಪನ್ನಗನೆ ಸೈ ಪನ್ದ ಬೀಮೆನೆ
ರಕ್ಕಸರೆ ಯಮಪಾಸೊದಂಚಿನೆ
ಇತ್ತಿ ಬೀಲೊನು ಅಮತ್ ಪತ್ತಾದ್ ನೂಕೈನಾಪೆಕ್ ||
ನೂಕು ನೂಕುದು ದೆರ್ತ್ ದೆರ್ತ್
ಏತ್ ಪುಣೆದಲ ಪಂದಜವು ನಿಜೊ
ಆಯನುಸುಲೇ ಮಿತ್ತಗೊಯ್ಪುನಗಾಂಡ್ ಉಬ್ಬೆಸೊನೆ ||

8

ಬಚ್ಚೆಲರಪೆಯೆರೆಗೊಂತೆ ಉಂತುದು
ಬುಕ್ಕೊ ಪುಣೆಯೆನೆ ದಾಲ ಪಂದಜಿ
ತನ್ನ ಸಗ್ಗಿನ ಪೂರ ಪಾಡ್‌ದ್ ನೂಕೈ ಸಾದನೆಡ್ ||
ಮೆದ್ಲಜವು ಬೀಮನವೆ ಸಗ್ಗಿಡ್

ತಿರ್ತ್ತ ಮಿತ್ತಾಂಡಾಯನುಸುಲೇ
ನಡ್ಗನಗ ಕೈಕಾರ್ ನಾಚಿಗಲಾಂಡ್ ಪನಿಯೆರೆಗ್ ||

9

ಕಾರ್ಯೊ ಕೆಟ್ಟಾದ್ ಪೋಂಡೆ ಹಾ ಹಾ
ಯಾನ್ ಸೋಲೈನೆ ಮುರ್ಗೊ ಜಾತಿಡ
ಪೋಂಡೆ ಮರೈದಿ ಸುಡಡ್ ಜಲೈನೆ ಪನ್ದ ಮರ್‌ಗೊಂಡೆ ||
ಆ ಸುರೇಂದ್ರನೊ ಇಂಬೈ ಮಂಗನ
ರೂಪೋಡೇ ಬತ್ತನಯೆ ಸಿವೆನೆನೊ
ರಾವಣಾದಿಲೆ ಸೊರ್ಕುನುಂತಯಿ ವೀರ ಕಪಿಬಟೆನೊ ||

10

ಯಾನ್ ಗದೆ ದೇರ್ತಿತ್ತೆ ಹಾಕೈಡ
ಬೀಲೊದಾ ಕೊಡಿ ರೋಮೊ ತಾಲುವೊ
ಬಾರಿ ಸಗ್ಗಿದಯೆಂದ್ ಪನಿಯೆರೆ ಉಂಡೊ ಅಲೈನೊ ||
ನರಮನಿನ ಈ ಸೈರೊ ಅಪಜಯೊ
ಸಿರಿನ ಬುಡರೊನೆ ಆಂಡ್ ಸಿವ ಸಿವ
ಕಪಿಕುಲೆಡ್ ಮಹವೀರೆ ಈ ಎರಂದ್ ಪನ್‌ಲೆನಡ ||

11

ಯಾನ್ ಮಂಗೆರೆ ಜಾತಿದಾಯೆನೆ
ಕಾಡ್‌ಡೇ ಪುಳಿಕಾಯಿ ತಿಂದ್‌ದ್
ಆವುಸೊನು ಕಳೆಯಿನಯೆ ಪೋಯೆರೆ ತೆರಣೊ ಎಂಕಿದ್ದಿ ||
ಈರ್ ತೂನಗ ಮಲ್ಲ ಯೋಗಿತೊ
ದಾರ್ ಈರೆನ ಕುಲೊನು ಪನುವರೊ
ದೇವತೆನೊ ನರಮಾನಿಯೋ ಪನಿ ಈರ್ ಎನ್ನಡನೆ ||

12

ಮಲ್ಲ ಕೀರ್ತಿದ ಚಂದ್ರ ವಂಸೊಡು
ಪುಟ್ಟನಾ ಪಾಂಡವೆರ್ ಎಂಕುಲು
ಧರ್ಮನಂದನೆ ಬೀಮೆನರ್ಜನೆ ನಕುಲ ಸಾದೇವೆ ||
ಪನ್ನನಕೈಲೈವೆರಲ ಸಕುನಿಡ
ಸೋಲ್ತನೆಟ್‌ಲಾ ಪಗಡೆ ಗೊಬ್ಬುಡು
ಸೆರ್ದಂದಂಚಿನೆ ರಾಜ್ಯೊ ದಾಯಾದಿಲೆಗ್ ಬುಡುಕೊರ್ದು ||

13

ಕಾಡ್‌ಡುಪೈರೆ ಬತ್ತೊ ಈಡೆಗ್
ಪೂತ ಕಮ್ಮೆನೊ ಎಂಕ್ಲೆ ಬುಡೆದಿಗ್
ನಾಟ್‌ನೆಟ್ ಆಲೈನ್ ಕನತ್‌ದ್ ಕೊರೊಡು ಪಂಡನೆಟ್ ||
ಪೂನು ನಾಡೊಂದೇನ್ ಬತ್ತನೆ
ಏರ್ ಈ ಪನ್ ಮಲ್ಲ ಕಾರ್ಣಿಕೊ-
ದಾಯೆ ನಿಸ್ಸಯೊ ಪನ್ದ ಬೀಮೆನೆ ಕೈನ್ ಮುಗಿಯೊಂಡೆ ||

14

ಯಾನ್ ದುಂಬುದ ಯುಗೊಟು ರಾಮನ
ಸೇವಕೆನೆ ಹನುಮಂತೆ ಪನ್ನುನ
ವಾನರೆನೆ ಅಂಜನೆಗ್ ಮಗನೇ ವಾಯು ದೇವರೆಗ್ ||
ಪುಟ್ಟನಯೆ ನಿನ್ನಡ್ ದುಂಬೇ
ಮೆಗ್ಗೆ ಈ ಎಂಕ್ಂದ್ ಪನ್ನುಗ
ಅಡ್ಲೊ ಬೂರಿಯೆ ಹನುಮ ಕಾರ್ಗ್ ಕುಂತಿ ಮಗ್ ಬೀಮೆ ||

15

ಕಾಸಿ ಯಾತ್ರೇಗ್ ಪೋಪುನಾಯಗ್
ಬಾಗಿರತಿ ಎದುರಾದ್ ಬತ್ತನ
ರೀತಿದೇ ಈ ಎಂಕ್ ತಿಕ್ಕಿಯ ಎನ್ನ ಬಾಗ್ಯೊತ್ತೊ ||
ಓಲು ಉಪ್ಪುನ ಪೂವೊ ಕಮ್ಮೆನೊ
ಈಡೆ ಬತ್ತನೆ ಎಂಚನೋ ನನ
ದಾನೊ ದೈವೊದ ಗಟನೆಡೀಯೇ ಎಂಕ್ ದಾತಾರೆ ||

16

ನಿನ್ನ ಮೋನೆನ್ ತೂದುಲಾನಗ
ಎನ್ನ ಬನೊವಾಸೊದವೆ ಕಸ್ತೊಲು
ಅರುನೆಲ ಇದ್ಯಂದ್ ನವೆ ಬೇಜಾರೊ ಪೋಂಡಿತ್ತೆ ||
ರಾಜ್ಯೊ ಪೋಯಿನ ದುಕ್ಕೊ ಪರಿಯರೊ
ಆಂಡ್ ನಿನ್ನವೆ ಕರುಣೆಡಿತ್ತೆನೆ
ಯಾನ್ ಪುಣ್ಯೊದ ಪಲೊನು ತಿನಿಯೆರೆ ಪಂಡೆನಾ ಬೀಮೆ ||

17

ರಡ್ಡ್ ಹಿರಿಯೆರ್ ಎಂಕ್ ಧರ್ಮಿ
ಬುಕ್ಕೊ ಈಯೇ ನಂಕ್ ವಾಯುವೆ
ಇರೆರೆಗ್ಲಾ ಅಮ್ಮೆ ಆಯ್ಕೆಟ್ ಎಂಕ್ ಸಂತೋಸು ||
ರಡ್ಡ್ ಗುರುಕುಲು ಬಾದರಾಯಣೆ
ಬುಕ್ಕೊ ರಡ್ಡನೆ ದಾಯೆ ಈಯೇ
ಪನ್ದ್ ಹನುಮನ್ ಏತೊ ಪುಗರಿಯೆ ಬೀಮೆ ಕೈ ಮುಗಿದ್ ||

18

ಬೀಮೆ ಪಾತೆರೊಗಾಯೆ ಮೆಚ್ಚಿದ್
ಈಯೆ ಎನಮೆಗಿ ಪಂಡ್ ದೆಂಕೇ
ಆಂಡ್ ಸಂತೋಸು ಚಂದ್ರವಂಸೊನು ನಿಕ್ಲ್ ಬೆಳಗಯರ್ ||
ಆವು ನಿಕ್ಲೆಗ್ ಜಯೊನೆ ಪಾರ್ತೆನೆ
ಬೇಕೊ ತೂಯೆರೆ ತಿಕ್ಕನೆಂಕಲ
ಬಾರಿ ಸಂತೋಸಾಂಡ್ ನಿಕ್ಲೆನ ಮಾತ ಪರಿಚಯೊಡು ||

19

ಪೋಡಿವೆನೆ ನಿನ್ನಡನೆ ಪನಿಯೆರೆ
ಯಾನ್ ನಿನ್ನವೆ ಮೆಗ್ಗೆ ಪನ್ನುನ
ಪ್ರೀತಿದೀಡ್ಡ್ ಎನ್ನ ಪಾತೆರೊ ನಡಪದೀ ಕೊರ್ಲ ||

ದುಂಬು ಕಡಲ್ನ್ ಲ್ಯಾತ್ ಕಡತ್ನ
ಲಂಕೆ ಪೊತ್ತಯಿ ಮಲ್ಲ ರೂಪೊನು
ಎಂಕ್ ತೂಪುನ ಆಸೆ ಏತ್ಲ ಉಂಡು ತೋಜವನ ||

20

ಆಂಡ್ ತೂಲಯ ಪಂಡ್ ದಾಯೆನೆ
ತಾನ್ ರಬಸ್ಡ್ ಬಲತ್ ದಾನಗ
ಬೀಲೊ ಮಲ್ಲೆನೆ ಆದ್ ಎತ್ತನೆ ಬಾನೊದೆತ್ತರೊಗು ||
ಬೂಮಿಯದ್ ರದ್ ನಡ್ ಗದಾಂಡ್ಲ
ಮಾತ ಗಿರಿ ಪರ್ವತೊಲು ಅದರ್ಯೊ
ಲೋಕೊ ಪೋಡ್ಯನ ಲೆಕೊನೆ ಕಾಡ್ಡ್ ಬಲತೆನಾ ಹನುಮೆ ||

21

ಆ ಮಹಾ ಮೇರ್ ದವೆ ಮುದೆಲ್ಡ್
ತೋಜುನಜ್ಜೇ ಬಿರುತ ನಮುನೆಡ್
ಆ ಸದಾಸಿವೆ ತನ್ನ ಮೂಜನೆ ಕಣ್ಣೆ ಬುಲಯಿಲೆಕೊ ||
ಮಿತ್ತ ಗೆತ್ತನ ಬೀಲೊನೊ ಸಿರಿ-
ಸೊರೊ ಲೋಕೊನು ಕಟ್ಟೆದೊಯ್ಪರೆ
ಒಡ್ಡೆಯೆನೊ ಮಹ ದಾರೊನೋ ಸಿವೆ ಪನ್ನಿ ನಮುನೆಡ್ಲ ||

22

ರೂಪೊ ತೂದೇ ಬೀಮೆ ನಡ್ಲಿಯೆ
ಪೋಡಿಗೇಡ್ ಕಣ ನೀರ್ ಜತ್ತದ್
ಆಂಡ್ ಲಾಯನ ಮೆಯಿಟ್ ಇರ್ಪೆನೊ ಅಪಗ ಕೈ ಮುಗಿದ್ ||
ಬಾಡ್ಡಿ ಮೋನೆಡ್ ಕೈನ್ ದೇರ್ತದ್
ತೂಯೆ ಕಣ್ಣೆನ್ ಬುಲದ್ ಮುಚ್ಚಿದ್
ಆ ಹನುಮ ಜಪೊ ಮಲ್ಲೆ ಸಿವ ಸಿವ ಪಂಡ್ ದಾಪಗನೆ ||

23

ಯಾರು ಓ ಹನುಮಂತ ಪೋಡಿಗ್-
ಡೇನ್ ನಡುಗುನ ತೂಲ ಬಲಪುನೆ
ನೀಯೆ ಉಂತಲ ಎಂಕ್ಲ ನರಮನಿ ಜಾತಿದಕ್ಲಾದ್ ||
ಪೋಡಿವೊನೆ ಈ ರೂಪೊ ತೂನಗ
ಈಯೆ ಉಂತಲ ನಿನ್ನ ಮಯಿಮೆದ
ರೂಪೊನೇ ಪಂಡೊಂದು ಕಾರ್ಗ್ ಅಡ್ಲೊ ಬೂರಿಯೆನೆ ||

24

ಪೋಡ್ಯಡಯ ಈ ನಿನ್ನ ಬಗ್ಗಿಗ್
ಯಾನ್ ಮೆಚ್ಚಿದೆ ಪನ್ದ್ ದುಂಬುದ
ರೂಪೊಡುಂತುದು ಕೇಂಡೆ ಎಂಚಿನ ಬೋಡು ನಿಕ್ಕ್ಂದ್ ||
ಈಯೆ ಪಾರ್ತನ ತೇರ್ಡೆ ಕೊಡಿಮರ
ನೇರ್ಡೆ ಉಂತೊಡು ಯುದ್ಲೊ ಆನಗ
ಈತ್ ಕೇನ್ನಗ ಆಂಡ್ ಪಂಡ್ ದ್ ಮಾಯೊಕಾಯೆನೆಲ ||

|| ಪೂನು ಕೊನಗ ಬೀಮಗ್ ಯಕ್ಷೆರೆಡೆ
ಲಡಯಾಂಡ್ ||

ಹನುಮೆ ಕಣ್ಣೆಗ್ ಮಾಯಕಾಯೆನೆ
ಅಪಗ ಬೀಮಗ್ ತಾನ್ ಬತ್ತನ
ಕೆಲಸೊದವೆ ನೆಂಪಾದ್ ಪುಸ್ಪೊನು ನಾಡ್ಡ ಕೊಂಡ್ರಿಯೆರೆ ||
ಪಿದಡ್‌ದಾಯೆನೆ ದೂರೊ ಕಾಡ್‌ಡೆ
ನಡತ್ ಪೋನಗ ಬುಡೆದಿ ಪಾತೆರೊ
ನಡಪಯೆರೆ ತೀರಂದೊ ಪಂಡ್‌ದ್ ಚಿಂತೆ ಮಲ್ತೊಂಡೆ ||

1

ದೂರೊಗೆತ್ತನಗಪಗ ಕಮ್ಮೆನೊ
ಮೂಂಕುಗೆಡ್ಡ್‌ಲಾಂಡ್ ತುಂಬಿಲು
ರಾಪುನೆನ್ ತೂನಗನೆ ಆಯಗ್ ಮಲ್ಲ ಕಿರೆ ಒಂಜಿ ||
ತೋಚಿನಗ ಸಂತೋಸುಲಾದೇ
ಆ ಕಿರೆತ ನಡುಟಿತ್ತದರಲನ್
ತಾಮರೆದ ಪೂ ಪುಂಡೆಲಿತ್ತನೆನಾಯೆ ತೂವೊಂಡೆ ||

2

ಕಮ್ಮೆನೊನೆ ತನ ಮೂಂಕುಗಲಸನ್-
ಗಲ್ಲ ಬೀಮಗ್ ನಡತಿ ಬಚ್ಚೆಲ್
ತಿರ್ಗನಗ ಉಂಡಾಯಿ ಬೇಜರೊ ಮಾತ ಕಮ್ಯಾಂಡ್ ||
ಎನ್ನ ಕಾರ್ಯೊನೆ ಆಪುನಂದಜಿ
ಇತ್ತೆನೇ ಆಂಡ್‌ಂದ್ ನೆನತ್‌ದ್
ಪುಸ್ಪೊ ಕೊಯ್ಯೆರೆ ಕಿರೆಕ್ ಜಪ್ಪುನ ತೂದು ಯಕ್ಷೆರೊಲ ||

3

ಲಕ್ಹದಾಕ್‌ಲ್ ಬೀಮನೆದುರುಗು
ಬತ್ತ ಪಂಡೆರ್ ಏರ್ ಈ ಪನ್
ಮಿತ್ತ ಲೋಕೊದ ಎಂಕ್ಲೆ ವೈರಿಯೊ ಅತ್ತ ಬೋಡಯಿನ||
ಮಿತ್ತೆನೋ ಪನ್ ಮೋನೆ ತೂನಗ
ಗರೊದಾಯೆನೆ ಪನ್ದ ತೆರಿವನೆ
ಪನ್ನ ದಾಯೆಗ್ ಬತ್ತನೆಂದ್‌ದ್ ಗೌಜಿ ಲಕ್ಕಯೆರ್ ||

4

ಕುರುಕುಲೊದ ಸೋದರೆರೊಲಯ್ಯೆರ್
ಅರಸು ಮನೆತನೊದಕ್‌ಲ್ ಎಂಕ್ಲೆನ
ಬುಡೆದಿಗಾಸೆನೆ ಆಂಡ್ ಕಮ್ಮೆನೊ ಕಮಲೊ ಪುಸ್ಪೊದವೆ ||
ಅಯಿನ್ ನಾಡೊಂದೀಡೆ ಬತ್ತನೆ
ನಿಕ್‌ಲ್ ಕಾಪುನ ಬಟೆರ್ ಉಲ್ಲರ್
ಪನ್‌ಪಿ ಸಂಗತಿ ತೆರಿಜಿ ಏರೆನವುಂದು ಈ ಕಿರೆನೆ ||

5

ಈತೆನೋ ತಪ್ಪತ್ತ ನಿನ್ನವು
ಕೇನ್‌ಯಚ್ಚೆರೆನರಸುಡೆನೆ ಈ
ಆ ಕುಬೇರೆನೆ ಕೊರ್ದೆ ಕಂಡಿತೊ ಬಾರಿ ಗುಣವಂತೆ ||
ಕಾಪುನವೆ ಈ ಕಿರೆತ ಪುಸ್ಪೊನು
ಏರಾಲಾ ಕೇನಂದೆ ಕೊಯ್ಯೆರೆ-
ಗಾವೊ ತೆರಿನಯೆನೀಯೆ ಕೇನ್‌ಲ ಯಕ್ಷರಾಜಡನೆ ||

6

ನಟ್ಟುನಕ್‌ಲೆಂಕುಲುಲ ಅತ್ತಯ
ಯುದೊ ಮಾತೊನೆ ನಟ್ಟುವೆಂಕುಲು
ಲೆಪ್ಪಿ ಈಡೆಗ್ ಆ ಕುಬೇರನ್ ಲಡಯಿ ಕೊರ್ದೆಗೆನೊ ||
ಎನ್ನ ಗದೆ ನಟ್ಟುನೆನೆ ನಿಕ್‌ಲೆನ
ಬೆಚ್ಚ ನೆತ್ತೆರ್ ತಿಗಲೆದುಲಯಿದ
ಕೊರ್ದರೊಕುಳಿ ಗೊಬ್ಬೆರೆಂದ್‌ದ್ ಗದನ್ ತೋಜಾಯೆ ||

7

ಯಚ್ಚರಚ್ಚೆರ್ ಮಾತ ಬಲೆ ಬಲೆ
ಬತ್ತನಾಯೆ ಪೆದಂಬೆ ಲಡಯಿಗ್
ಲೆಪ್ಪೆ ಪಿಲಿಕುಲೆ ಪುಂಡುಗೇಡ್‌ದ ಲೆಕೊನೆ ಮಾದೇವ ||
ನೋತುದೇ ತರೆದರಿ ಇಂಬ್ಯನ
ಬೂಟು ಬಿಸಾತಿಗೆಗ್ ಪೋಡ್ಯಡೆ
ಈಟಿ ಸಬಲೊಡು ಕಡ್ಲೊ ಮಾತೆಟ್ ಬೀಮಗಾಕಿಯೆರ್ ||

8

ನಾಚಿಗದ ಮುಳ್ಳೊಂಜಿ ಆನೆಗ್
ಗಾಯೊ ಮಲ್ತೆರೆಗುಂಡೊ ಯಚ್ಚೆರೆ
ಆಯುದೊಲೆ ಪೆಟ್ಟೇತ್ ಬೀಮಗ್ ತಾಗು ನೋತೆರ್‌ಡ||
ಎದುರು ಬತ್ತನ ಕಚರನಕ್‌ಲೆನ್
ಪೊಡಿಯೆ ರಟ್ಟದ್ ತನ್ನ ಸಗ್ಗಿದ
ಬಲೊನು ತೆರಿಪಯೆ ಬೀಮಸೇನೆನೆ ಕೇಚರಾದಿಲೆಗ್ ||

9

ಕಿರೆಟ್ ಇತ್ತನ ಹಂಸೊ ಪಕ್ಕಿಲು
ತಿರ್‌ಗಿಯೊನೆ ಸುತ್ತಾಲ ನೀರ್‌ಡ್
ಮಯಿರ್ ಮರಕುಲೆ ಮೇಲ್ಡ ಕುಲ್ಲಿಯೊ ನೀರ್ಡ್ ಮುರ್ಕನವೆ ||
ಕುಂಡ ಕೋರಿಲು ಮಿತ್ತ ಬತ್ತಜೊ
ದೆಂಗ್‌ದೇ ಕುಲ್ಲೊಂಡೊ ಕಮೊಲದ
ದಂಡಲೆನ ಆದರೊಡು ಬೀಮನ ಗೌಜಿದಬ್ಬರೊಡು ||

10

ಯಚ್ಚ ರಚ್ಚೆರ್ ಪಾರ್ಯೆರೇತ್‌ಲ
ಗುಯ್ಯೆಕೆರಲಾಯುದೊನು ದಕ್ಕೆರ್

ಕಿನ್ನರೆರೆ ಪರಿಸಿತಿನ್ ಪನ್ನುನೆ ದಾಯೆಗ್‌ಲೊಟ್ಟು ||
ಯುದ್ಧೊ ಮಲ್ತದ್ ಮಾನವೇರೆಡ
ಸೋಲೊನೇ ಪಂಡೊಂದು ನನ ನಮೊ
ಮಲ್ಪುನೆಂಚಿನ ಗೇಲ್ ಆಯಗೆ ಆಂಡೆ ಮಾದೇವ ||

11

ಗಾಯೊ ಪಡೆಯೆರ್ ಕೆಲವುದಾಕ್‌ಲ್
ಜೂವೊಗುಲ ತೊಂದರೆದ ಕಸ್ತೊನೆ
ಆಂಡ್ ಕೆಲವೆರ್ ತರೆನ್ ಬಿರ್ಕ್‌ಡ್‌ದಯಿಟೆ ಪಾರಿಯೆರ್ ||
ಆರೆಕಿನ್ ಪೆಟ್ಟಾಯಿನಕ್‌ಲೆಗ್
ಆ ಕುಬೇರನ ಕಡೆಟ್ ಮಲ್ತೆರ್
ಬೀಮೆ ಜಯೊ ಪಡೆದಯಿಟೆ ಜತ್ತನೆ ಕಿರೆತ ಪಾಗರೊಡೆ ||

12

ಮೋನೆ ಕೈ ಕಾರಲೆನ್ ದೆಕ್ಕದ್
ಬಾಯಿ ಮುಕ್ಕುಳಿತುಬಿಯೆ ನೀರ್‌ನ್
ಪೂತ ಕಮ್ತೊ ಮೂಂಕುಗೆಡ್ವನಗಾಯೆ ಸಂತೊಸುಡು
ನೀರ್‌ನೇತ್‌ಲ ಪರಿಯೆ ಬಂಜರೊ
ಬಾಜೆಲರತ್‌ದ್ ಪೋಂಡು ಸಂತೊಸು-
ಲಾದ್ ಪುಸ್ತೊನು ತೂದು ಮೆಚ್ಚಿಯೆನಯಿನ ಕಮ್ತೊನೊಗು ||

13

ಮೆಲ್ಲ ಪೂನುಲ ಕ್ರೊದ್ ಪತೊನುದು
ತನ್ನ ಗದೆ ಕಿಡ್ಡಿಲ್‌ಡ್ ದೀಡ್‌ದ್
ಕಲ್ ಕಟ್ಟನ ಕಿರೆತ ಕಟ್ಟೆಡ್ ಬೀಮೆ ಉಂತೊಂದು ||
ಲೆತ್ತ್ ಲೆತ್ತದ್ ಪಂಡೆನಕ್‌ಲೆಡ
ನಿಕ್ಲೆನಾಕಿರೆ ಮೂಲೆ ಉಂಡುಯ
ಪೊಕ್ಕಡೆನ್ನನ್ ದೂರಡೆಂದ್‌ದ್ ತಿಗ್ಗೈ ಬರೈರೆಗ್ ||

|| ಪಾರ್ತೆ ಸೊಗೊಡುದು ಪಿರಬತ್ತೆ ||

ಕಮ್ತೊದವೇ ಕಮಲ ಪುಸ್ತೊನು
ದೆತ್ತೊನುಂದಾ ಬೀಮೆ ಬನ್ನಗ
ಮಿತ್ತ ಬಾನೊಡುದೊಂಜಿ ಸೊರೊ ಸರಿ ಕೆಬಿಕ್ ಕೇಂಡಪಗ ||
ರಕ್ಕಸೆರ್ ಮುತ್ತಿಗೆನ್ ಪಾಡ್‌ದ್
ಪೊಣ್ಣನೊಯ್ತೆರ್ ತಲಿಪೆರಾಯಿಜಿ
ಧರ್ಮನಂದನೆ ನಕುಲ ಸಾದೇವೆರ್‌ಲ ಸೋಲೆರ್‌ಯ ||

1

ಅಲ್ಪದಾಸ್ಯಮೊ ದೂಸು ಮಲ್ತೆರ್
ಪನ್ನುನೆನ್ ಕೇನೊಂದು ಬೀಮೆನೆ

ಸಿಮ್ಮೊ ಗರ್ಜನೆ ಮಲ್ತೊನುಂದೇ ಪಾರೈನಾಡೆಗೆನೆ ||
ಆ ಜಟಾಸುರೆ ಪನ್ನುನಾಯಗ್
ಹಾಕ್ ಹಾಕ್‌ದೆ ಕೆರ್‌ದ್‌ಲಲ್ಲದ
ದಾನವೆರೆ ಸಂತಾನೊ ಮುತ್ತದ್ ಕನತೆ ಮಾತೆರೆನ್ ||

2

ದ್ರೋಪದಿಗ್ ಆ ಪೂನು ಕೊರ್‌ದ್‌ಲ ||
ಬಾರಿ ಸಂತೊಸುಡಿತ್ತನಾಕ್‌ಲ್
ಪಾರ್ತನವೆ ನೆಂಪಾದ್ ಬೇಜರೊಡಿತ್ತೆರಕ್‌ಲೊಟ್ಟು ||
ಮರತೆನೋ ಎಂಕ್‌ಲೆನ್ ಪಾರ್ತೆನೆ
ಮರಪಿಯೆರೆ ಸಾದ್ಯೊಂಡು ಅಲ್ಲದ
ಸುಕೊಟು ಮೆರೆನಗ ಪೆರಪ ಬರೈರೆ ಮನಸ್ ಆಯಿಜಡೊ ||

3

ಅಕ್‌ಲೆನೊಟ್ಟುಗು ಇತ್ತಿ ಮುನಿಕುಲು
ಬೆರಣೆರ್‌ಲ ಮಾತೆರ್‌ಲ ತೂಯೆರ್
ಸಕುನೊಡೆಡ್ಡೆನ್ ಬುಕ್ಕೊ ಮಲ್ತೆರ್ ದಿಂಜ ಸಮದಾನೊ ||
ಆಕಸೊಡು ಜಪ್ಪುನವೆ ಪೊರ್ಲು ವಿ -
ಮಾನೊ ತೂಯೆರ್ ಮಾತ ನಿಲ್ಕದ್
ತೂನಗನೆ ಜತ್ತೊಂದು ಬತ್ತೆನೆ ಪಾರ್ತೆ ಸಂತೊಸುಡು ||

4

ಬತ್ತನಾಯೆನೆ ಕಾರ್‌ಗಡ್ಡೊನೆ
ಬೂರೈ ಲೋಮಸ ದೊಮ್ಮರುಸಿಕುಲೇ-
ಗಲ್ಲ ಧರ್ಮಜ ಬೀಮೆ ಕಾರ್‌ಗಲಾಯೆ ಪುಡ್ಯಾಡ್ಡ್ ||
ಬುಕ್ಕೊಲಾ ಸಹದೇವ ನಕುಲೆರೆ
ನೆತ್ತಿ ಮೂಸುದು ದ್ರೋಪದಿನ ಕುಜ-
ಲೊತ್ತದೀಸಿಯೆ ಮುಗುರು ತೆಲಿಕೆಡ್ ಮೋನೆ ತೂವೊಂದು ||

5

ಮಾತಲಿಯೆ ತುಂಬೊಂದು ಬತ್ತನ
ಮಾರಪುನು ಬಿಚ್ಚಾದ್ ಅಯಿಟೇ
ಸೂರೈ ರಸ್ಮಿದಲೆಕೊನೆ ಮೇಣ್ಣನ ಮಾತ ಪದ್ವೊಯಿ ||
ದೆತ್ತದಾ ಧರ್ಮಜಗ್ ಬೀಮಗ್
ಕೊರೈ ಸಂತೊಸುಡಾಯೆ ನಕುಲನ್
ಬುಕ್ಕೊ ಸಾದೇವನ್‌ಲ ಸಿಂಗರೊ ಮಲ್ತೆ ತನ ಕೈಟ್ ||

6

ಮಾತಲಿನ್ ಆಡೆಗ್‌ಲ ಲೆತ್ತದ್
ಮಾತೆರೆಗ್ ಪರಿಚಯೊನು ಮಲ್ಪಯಿ
ಆ ಸುರೇಂದ್ರನ ತೇರ್ಡ ಪೊರ್ಲುನು ಮಾತ ಇವರಿಸಯೆ ||
ಯೋಗಿ ರುಸಿಕುಲು ಅರಸು ದರ್ಮಜೆ

ಮಾತಲಿಡ ಪಾತೆರ್‌ದ್ ಪ್ರೀತಿಡ್
ಬಾರಿ ಸಮ್ಮನೊ ಮಲ್ಲೆರವುಲೇ ಪರ್ವತಾಸ್ತಮೊಡು ||

7

ಕುಸಲ್‌ಡುಲ್ಲೆನೊ ಇಂದ್ರೆ ಆಯನ
ಸಿರಿಕುಲೆಗ್ ಸೌಕೊನೊ ರಕ್ಕಸ-
ನಕ್‌ಲೆ ಪೋಡಿಗ್ ಪೋದು ಸುಕೊಟೇ ಉಂಡೊ ಆ ಲೋಕೊ ||
ಎನ್ನೊ ದಿಕ್ಕದ ಪಾಲಕೆರಲಾ
ಕರೊಡುಲ್ಲೆರೊ ಆಕ್‌ಲಾಕಲೆ
ಧರ್ಮನಂದನೆ ಕೇಂಡೆನರ್ಜುನ ಮೋನೆ ತೂವೊಂದು ||

8

ತಪಸ್ ಮಲ್ತ್‌ದ್ ಆ ಸದಾಸಿವೆ
ಒಲಿಯೆನೋ ಸಿವ ಪಾದೊ ತೂಪುನ
ಪರಮ ಸಗ್ಗಿದ ಮಂತ್ರೊ ಸಿದ್ಧಿಯೆ ಆಂಡೊ ಪನ್‌ಮೆಗಿಯು ||
ನಿನ್ನ ಪುದರ್‌ದ ವಿಜಯೊ ಸವೊಗು
ಅರೊ ಪುಟ್ಟುವೊ ನಿನ್ನ ಕಾರ್ಯೊಡು
ನಮ್ಮ ವೈರಿಲೆ ಪುಗೆನ್ ತೂಪುನ ಯೋಗೊ ನಂಕಾವೊ ||

9

ಅಣ್ಣ ಕೇನ್‌ಲ ಎನ್ನ ತಪಸ್‌ಗ್
ಅಲ್ಪ ಸುರಪನ ಸಾಯೊ ತಿಕ್ಕದ್
ಮಲ್ಲ ಮಹಿಮನ್ ತೂಪಿ ಯೇಗಿತೊ ಅಂಡ್ ಎಂಕವುಲು ||
ದೂರ್ಜಟಿಯೆ ಒಲಿದೆಂಕ್ ಕೊರೈನೆ
ಪಾಸುಪತೊ ಬಾಣೊನುಲ ಪಾರ್ವತಿ
ದೇವಿಯಂಜನೊ ಬಾಣೊ ಕೊರೈಲ್ ಬಗ್ಗಿಗೊಲಿಯೊಂದು ||

10

ಹರನ ಕರುಣೆದ ಲಾಬೊ ಪಡೆಯಿನ
ಎನನ್ ಇಂದ್ರೆನೆ ಮಾತಲಿಡ ರತೊ
ಕೊರುದು ತರ್ಪಯೆನಾಯ ಲೋಕೊಗು ಬಾರಿ ಮರೈದಿಡ್ ||
ಅವುಲು ಸುಮನಸನಕ್‌ಲ್ ದಿಕ್ಕದ
ಅದಿಪತಿಲು ಮಾತೆಲ್ ಸಿರಿಕುಲು
ಸುರೆರ್ ಗಂದರ್ವೆರ್ ಕೊರ್ನವೆ ಮಲ್ಲ ಮರೈದಿ ||

11

ಅಣ್ಣ ನಿನ್ನವೆ ಪ್ರೀತಿಡೆಂಕೇ
ತಿಕ್ಕನಾಸೀರ್ವಾದೊಡೇನ್‌ಲ
ಕಣ್ಣಡೆನೆ ಆ ಸಿವನ್ ತೂಪುನ ಯೋಗೊ ಆಂಡಣ್ಣ ||
ಮಲ್ಲ ಬಾಣೊಲು ದೇವಿನಸ್ತ್ರೊಲು
ತಿಕ್ಕನತ್ತಂದಿತ್ತೆ ಸೊರ್ಗೊಡು
ನಮ್ಮ ಕುಟುಮೊಗು ತಿಕ್ಕಿ ಮರೈದಿ ಬಾರಿ ಮಲ್ಲೆತ್ತೊ ||

12

ಪಾರ್ತ ಪಾತೆರೊ ಕೇನ್ದ್ ಧರ್ಮಜೆ-
ನಾಪಗನೆ ಹಿಗ್ಗೊಂದು ಕಣ್ಣಡೆ
ನೀರ್ ಜಪುಡಯೆ ಸಂತೊಸುಡು ಸರಿ ತೂದುಲರ್ಜುನನ್ ||
ಆಯ ರಟ್ಟಿಡ್ ಪತ್ತದೊಯ್ತದ್
ಈಸ್‌ದಾಯನ ಬೆರಿನ್ ವಂಸೊದ
ಕೀರ್ತಿನೊರಿಪಯ ಪನ್ದ್ ಪ್ರೀತಿಡ್ ತರೆಕ್ ಕೈದೀಡೈ ||

13

ನನಗ್ ಪಗೆತಕ್‌ಲೆನವೆ ತರೆ ರ -
ಟ್ಟೆರೆಗ್ ಅಲ್ಮನೊ ದಾಲ ಇದ್ದಿಯು
ನಮನ ಬುಡೆದಿನ ಮಾನೊದತ್ತನ ಅಕ್‌ಲೆ ಪುಣ ನಾದು ||
ಸಿವನೆ ಕರುಣೆಡ್ ಕಣ್ಣ ಬುಲಯಿನ
ನಿಲೆನ್ ಗ್ರೇಯ್ವುನಗಿತ್ತೆ ನಂಕೇ
ದಯೆನೆ ನಾರಾಯಣನ ಪಂಡ್‌ದ್ ಯಾನ್ ನೆನೆತೊನುವೆ ||

14

ಈತ್ ಪನ್ನಗ ದ್ರೌಪದಿನ ಸಿರಿ-
ಮೋನೆಡರಲ್‌ದ್ ಆಂಡ್ ತೆಲಿಕೆನೆ
ಆಲೆ ತರೆತವೆ ಪುಸ್ಸೊ ಕಮ್ಮನೊ ಅಲಸ್‌ದಾಂಡವುಲು ||
ಯೋಗಿ ರುಸಿಕುಲು ಸಿವನ ಸೋತ್ತೊನು
ಬಾರಿ ಗೌಜಿಡ್ ಪಂಡೆರಾಪಗ
ಮೂಡಯಿಡ್ ಮೂಡೊಂದು ಬತ್ತನೆ ಚಂದ್ರನಾಕಸೊಡು ||

|| ಭೀಮನ ಬೋಂಟೆ ||

ಪಾರ್ತೆ ಸೊರ್ಗೊಡು ಕಾಲಕೇಯ ನಿ -
ವಾತ ಕವಚೆರೆಕೊಟೊನೇ ಯಮ
ನೂರು ನೂಕುದು ಸುರೆರೆ ಬಂದನೊ ಪೂರ ಬುಡ್ಡಯಿನ ||
ಮಾತ ಸಂಗತಿ ಪಂಡೆ ಮಾತಲಿ
ಬಾರಿ ಸಂತೋಸಾದ್ ರಾತ್ರೆಡ್
ಮಾತೆರ್‌ಲ ನಿದೆರಿಯೆರ್ ಸುಕೊತವೆ ಕನತ ಕೂರಿಗಿಡ್ ||

1

ಮೂಡಯಿಡ್ ಬೊಲ್ವಾನಗಾಕ್‌ಲ್
ಬೇಕೊ ಲಕ್ಕದ್ ಮೀಯೊನುಂದೇ
ಕಾಂಡೆ ಮಲ್ವುನ ಕರ್ಮೊಕಿಯೆನ್ ಪೂರತೀರ್ಪಯೆರ್ ||
ಪಾರ್ತೆ ಮೂಡಿಗಿಡಿತ್ತಿ ಸಿವನವೆ
ಪಾಸುಪತೊ ಬಾಣೊನುಲ ದೆತ್ತದ್
ಆಸ್ತಮೊದ ಚಾವಡಿಡ್ ದೀಡ್‌ದ್ ಪೂಜೆ ಸಂದಾಯೆ ||

2

ಧರ್ಮಜಾದಿಲು ಮಾತ ರುಸಿಕುಲು
ಅಡ್ಲೊ ಬೂರೈರ್ ಸಿವನ ಬಾಣೊಗು
ಬುಕ್ಕೊ ಲಕ್ಕದ್ ಪಂಡೆರಾಕ್‌ಲ್ ವೀರ ಪಲುಗುಣಡೆ ||
ಇತ್ತೆ ಎಂಕ್ಲೆಗ್ ದಿವ್ಯೊ ಪಗರಿದ
ಸಗ್ಗಿ ತೋಜವೊಡುಂದು ಪನ್ನಗ
ಅರುನೆನೆ ಗಾಂಡಿವೊನು ದೆರ್ತೆನೆ ದತ್ತ ಕೈಟಪಗ ||

3

ನಾರ್‌ದಾಳಿತೊ ತೂದು ಬಾಣೊನು
ಗಾಂಡಿವೊಗು ಕೊಲ್ಪನಗ ರಟ್ಟಿಯೊ
ಸೂತ ಕಿಟಿಕುಲು ಬಡಬ ಸಗ್ಗಿದ ಸುತ್ತ ಕಾಡ್ತುಲಯಿ ||
ಯೋಗಿಲೈನೇ ತೂದು ಪಂಡೆರ್
ಪಾತರ್‌ದನೆ ಬುಡಡಂದ್ ಬುಡಿಯಡ
ಕಾಡ್ ನಾಸೊನೆ ಆವು ಪೊತ್ತುದು ಊರು ಒರಿಯಂದ್ ||

4

ನರನ್ ಧರ್ಮಜೆ ಅರದ್ ಪತ್ತದ್
ನಿನಡ್‌ದೇ ಪಗೆತಕ್‌ಲೆ ಸಾವುನು
ನಮೊನೆ ತೂವೊಲಿ ಸಿವನ ಕರುಣೆಡ್ ತಿಕ್ಕಿ ಬಾಣೊಡುದು ||
ಸುರಪ ಸಾರತಿ ಮಾತಲಿಡ ಕಾ-
ಣೆಗೆನ್ ಇಂದ್ರಗ್ ಕೊರ್ದು ಕಡಪುಡು-
ನಪಗ ಬತ್ತದ್ ಅಡ್ಲೊ ಬೂರೈರ್ ಸಬರ ಜಾತಿಗುಳು ||

5

ನಿಕ್‌ಲ್ ಎಂಕುಲು ಇತ್ತಿ ಕಾಡ್‌ಗ್
ಬರೊಡು ಅಲ್ಪನೆ ಏತೊ ರುಸಿಕುಲು
ತಪಸ್ ಮಲ್ತೊಂದುಲ್ಲೆರಾಕ್‌ಲ್ ಎಂಕ್‌ಲೆನ್ ಈಡೆ ||
ಕಡಮಡ್‌ನೆ ಅಕ್‌ಲಿತ್ತೆ ಅಲ್ಪನೆ
ಕೆಲವು ರಕ್ಕಸನಕ್‌ಲ್ ಇತ್ತದ್
ಮುನಿಕುಲೆಗ್ ತೊಂದರೆನೆ ಆಂಡ್‌ಗೆ ತಪಸ್ ಮಲ್ತೆರೆಗ್ ||

6

ಆಂಡ್ ಬರೊಂದಕ್‌ಲ್ ಕಾಮ್ಯಕೊ
ಕಾಡ್‌ಬುಡಿಯೆರ್ ಅಲ್ತ್ ಬತ್ತದ್
ಕಾರ್ತಿಕೇಯನ ಆಸ್ತಮೊಡುಲಾ ಇತ್ತೆರೊಂಜೊಸೊ ||
ಅಲ್ಪಡ್‌ದ್ ಬ್ರಹ್ಮದಸ್ತನಾಸ್ತಮೊ
ಡಿತ್ತದಾಕ್‌ಲ್ ಸೀತೊ ಮೀಯೆರ್
ದುಸ್ಸು ರಕ್ಕಸನಕ್‌ಲೆನೇತಲ ಕೆರ್ಡ್ ಪಾಡಿಯೆರ್ ||

7

ಬೀಮಸೇನೆನೆ ಕಾಡ್‌ಡೊರೈನೆ
ಪೂರ ತಿರ್ಗದ್ ಬನ್ನಗಾಪಗ

ಕಾಡ ಸಬರೆರ್ ಅಡ್ಲೊ ಬೂರುದು ಪಂಡೆರಾಯಡನೆ ||
ಸ್ವಾಮಿ ಈರೇ ಒರಿಯ ತಿರ್ಗಡೆ
ಮೂಲು ಪಿಲಿಕುಲು ಕರಡಿ ಸಿಮ್ಮೊಲು
ಏತಲಾ ತಿರ್ಗೊಂದು ಪತ್ತದ್ ತಿನುವೊ ನರಮನಿನ್ ||

8

ಈರೆ ಸಾಯೊಗು ಎಂಕುಲುಲ್ಲೊನೆ
ಬೋಡನಗ ಲೆಪ್ಪಿದ್ ಪನ್ನಗ
ಬೀಮೆ ತೆಲಿತ್‌ದ್ ಪನ್ನೆ ಬೋಂಟೆಗ್ ನಿಕ್‌ಲ್ ಎನ್ನೊಟ್ಟು ||
ಮಾತೆರ್‌ಲ ಬಲೆ ಕಾಡ್‌ಡಿತ್ತನ
ಮಾತ ಮುರ್ಗೊಲೆ ನಾಸೊ ಮಲ್ಪುಗೊ
ಬೇಕೊ ಪಿದಡ್‌ಲೆ ಪನ್ನಗಾಕ್‌ಲ್ ಆವು ಬಪೊಂದು ||

9

ಪಚ್ಚೆದಂಗಿನ್ ಪಾಡಿ ಬೀರೆರ್
ಮಲ್ಲವಾಯುದೊ ಬಲೆನ್ ಕಡ್ಲೊನು
ಪತ್ತೊನುಂದೇ ನಾಯಿಲೆನ್ ಸಂಕೊಲೆಡ್ ಒಯ್ಯೊಂದು ||
ಬತ್ತನಾಕ್‌ಲ್ ಪಂಜಿ ತಾಡ್‌ನ
ಸಿಮ್ಮೊ ಪಂರ್ಕನ ಗಾಯೊದಾಕ್‌ಲ್
ಒತ್ತೆ ಕಣ್ಣೆದ ಬಿಸ್‌ನಾಕ್‌ಲ್ ಸಬರ ಜಾತಿಗುಳು ||

10

ಬೀಮ ಸೇನೆನೆ ಮಲ್ತಿ ಬೋಂಟೆದ
ಸಾದನೆಡ್ ಸೈತ್ತನವೆ ಮುರ್ಗೊಲು
ಏತ್ ಪಂಡ್‌ದ್ ಲೆಕ್ಕೊ ಮಲ್ತೆರೆ ತೀರ್ಚಿಯಾಕ್‌ಲೆಗ್ ||
ಆನೆಲೆನ್ ಸರಿಮಗ್ತ ಪಾಡಿಯೆ
ಸಾರ್ದುಲೊಲು ಸೈತ್ತದ್‌ಲ ಬೂರಿಯೊ
ಕಾಟಿ ಪಂಜಿಲು ಸಿಮ್ಮೊ ಕರಡಿಲು ಬುಕ್ಕೊ ಪಿಲಿ ಬಲಿಪೆ ||

11

ಪನ್ನನವೆ ಮುರ್ಗೊಲೆನ್ ಕೆರೈನೆ
ಒಟ್ಟುಗಿತ್ತನ ಬೋಂಟೆದಾಕ್‌ಲ್
ಕಟ್ಟಿಯೆರ್ ದಂತೊಲೆನ್ ಆನೆದ ಪಿಲಿತ ಚರ್ಮೊಲೆನ್ ||
ಪಟ್ಟೊನುಂದೇ ಮಾಸೊ ತುಂಬೈರ್
ವರಗಲೆರೆ ಜಿಂಕೆಲೆನ ಕಡಮದ
ಬುಕ್ಕೊ ಚೌರಿದ ಮುರೊ ಬೀಲೊನು ಕಡ್ತ ತುಂಬಿಯೆರ್ ||

12

ಆಪಗನೆ ಅವುಲೊಂಜಿ ಪಂಜಿಯೆ
ಪಾರುನೆನ್ ತೂವೊಂದು ಬೀಮೆನೆ
ಪಾರೈ ಪಿರವುಡೆ ಬೋಂಟೆದಾಕ್‌ಲ್ ಒರಿಯೆರವುಲೊಟ್ಟು ||
ಪಾರ್ ಪಾರ್‌ದ್ ನೂಂಡ್ ಮಲ್ಲವೆ

ಕಾಡ್‌ದುಲಯಿಗ್ ಬೀಮೆಲಾಡೆಗ್
ಪೋದು ನಾಡಿಯೆ ಪಂಜಿ ದೆಂಗ್‌ದ್ ಓಲು ಉಂಡುಂದು ||

13

ಮಲ್ಲ ಬಲ್ಲೆದ ಉಲಯಿ ನುಕುಡು
ಪಜ್ಜೆ ದೀಡ್ಯೆನೆ ಆಯ ಕಾರ್‌ನ್
ಸುತ್ತುಪಾಡ್‌ದ್ ಒಂಜಿ ಪೆರ್ಮರಿ ಅಮತ್ ಪತ್ತನಗ ||
ಬುಡ್ಡಯೆರೆ ಕಾರ್ನೆಯ್ತೆ ಆಯಿಜಿ
ತನ್ನ ತೆರಣೊನು ಪಾಡ್ಡ್ ಒಯ್ತೆನೆ
ಅರಕ್ಕಲ ಕಾಯೊಂದು ಗಟ್ಟಿಯೆ ಆಂಡ್ ಪೆರ್ಮರಿತ ||

14

ಕಾರ್‌ನೊಯ್ತದ್ ಬೂರ್ಡ್ ಪುಡೆರಿಯೆ
ಸಾದನೆಡ್ ತನ ಬಲೊನು ಪಾಡ್‌ದ್
ಏತ್ ಪುಣೆದಲ ಆಯ್ತೆ ಬೀಮೆಗ್ ಕಾರ್ನ್ ಬುಡ್ಡಯೆರೆ ||
ಉಸುಲು ಮಿತ್ತಗೆ ಆಂಡಲಾಯನ
ಸಯಿರೊದಾ ಬಸೊ ತತ್ತನಾಪಗ
ಒಸಯೊ ತತ್ತದ್ ಬೂರೈ ಪೆರ್ಮರಿ ಸುತ್ತು ಪಾಡ್ಡವುಲೆ ||

ನವುಸನಾ ಸಾಪ ಪರಿಯಾರೊ

ಬೋಂಟಿ ದೇರೈರೆ ಪೋಯಿ ಬೀಮೆನೆ
ದಾನೆ ಬತ್ತಜೆ ಪನ್ನೆ ಧರ್ಮಜೆ
ಬಾರಿ ಎಸನೊಡು ಉಪ್ಪುನಾಪಗ ದೊಮ್ಮೆರಾಯಡನೆ|
ದಾನೊ ತೊಂದರೆ ಆದ್ ಉಪ್ಪೊಡು
ಆಯಗಿನಿ ಪನ್ನಗನೆ ಪಿಡಿಯೆ
ಬೋಂಟಿ ದೇರ್‌ನ ಗುರೈ ಕಾಡ್‌ಡ್ ನಾಡ್ ನಾಡೊಂದು||

1

ಸಯ್ತಿ ಮುರೈಲೆ ತೂದು ನೆತ್ತೆರ್
ಜತ್ತದರಿನವೆ ಜಾಗೆ ನಾಡ್‌ದ್
ಎತ್ತೆನೇತೋ ದೂರ ಕಾಡ್‌ಡ್ ಧರ್ಮನಂದನೆ ||
ಅಲ್ಪ ಪುದೆಲ್‌ದ ಉಲಯಿ ನರಕುನ
ಉಬ್ಬೆಸೊದ ಸೊರೊ ಕೇನ್ಡ್ ನಿಲ್ಕಿಯೆ
ಕಣ್ಣೆ ಮುಚ್ಚಿದ್ ಬೂರೈ ಮೆಗಿಯನ್ ತೂದುಲಾಚಿರೊಡು.||

2

ಅಯ್ಯೊ ದೇವೆರೆ ಏತ್ ಕಸೊಲ್ಲು
ಬತ್ತದಾಂಡೆಂಕಲೆಗ್ ನನಲಾ
ಬುಡ್ಡು ಪೋತುಜೆ ದಾನೆ ಮಲ್ತೊಲಿ ಸಿವ ಮಹಾದೇವ ||
ದಾನೆ ಆಂಡಯೆ ಬೀಮೆ ಪನ್ ಮಗ

ದಾಯೆಗೀ ತಿಕ್ಕಿಯನೆ ಸರ್ಪಗ್
ಯಾನ್ ತೂಪುನೆ ಎಂಚ ನಿನ್ನನ್ ಇಂಚಿನಾ ಸಿತಿಟ್ ||

3

ಧರ್ಮನಂದನೆ ಪನ್ನಿ ಪಾತೆರೊ
ಪೆರ್ಮರಿಯೆ ಕೇನೊಂದು ಉರ್ದುನು
ಮಿತ್ತನಾಲಿದ ಸುತ್ತ ಕನತ್‌ದ್ ತರೆನ್ ಬೀಮನವೆ ||
ನೆತ್ತಿಡೇ ದೀಡೊಂದು ನಾಲಗೆ
ರಡ್ಡೆನ್‌ಲ ಸರಿ ಪಿದಯಿ ಪಾಡ್‌ದ್
ಕಣ್ಣೆ ಪಿಲಿ ಪಿಲಿ ಮಲ್ತೊನುಂದೇ ತೂಂಡ್ ಧರ್ಮಣನ್ ||

4

ಮೆಗಿಯೆ ದೋಸೊನು ಮಲ್ತೆನೋ ಪನ್
ಕಸುಬು ನಿನ್ನವು ಪೀಡೆ ಪರೆರೆಗ್
ಕೊರುಪನವ್ವೋ ಪನ್‌ಲ ಎಂಚಿನ ಲಾಬೊ ನಿಕ್ಕಿತ್ತೆ ||
ದನುಜೆನೋ ಗಂದರ್ವೆನೋ ಈ
ಮರಿತ ರೂಪೊಡು ಬತ್ತನಿಂದೆನೊ
ಎನಡ ಈ ಸರಿ ಸತ್ಯೊ ಪನ್ ಪಂಡೊಂಡೆ ಧರ್ಮಜೆನೆ ||

5

ಧರ್ಮಣನ ಪಾತೆರೊನು ಕೇಂಡ್‌ದ್
ಸರ್ಪ ನೀರ್‌ದ್ ಕಬರ್ ನಾಲಗೆ
ಪನ್ನಿನಾಯಡ ನಿಕ್ಕಿ ಇಂಚೆನೆ ದಾನೆ ಆವೊಡುಯ ||
ನಿನ್ನವೇ ಪುದರೆಂಚ ಪನ್ ಈ
ಚತ್ತಿಯೆನೊ ವೈಸೈನೊಯ ಸೂದ್ರೆನೊ
ಪನ್ನ ನಿನ್ನವೆ ಕುಲೊನು ದಾಯೆಗ್ ಕಾಡ್ ಬತ್ತನೆಯ ||

6

ಪಾಂಡು ಬಾಲೆಲು ಎಂಕುಲೈವೆರ್
ಯಾನ್ ಹಿರಿಯಯೆನೇ ಯುದಿಸ್ಪಿರೆ
ಬೀಮೆನಿಂಬೈನೆ ಪಾರ್ತೆ ನಕುಲೆಲ ಬುಕ್ಕೊ ಸಾದೇವೆ ||
ಮೆಗಿಯನಾಕ್‌ಲ್ ಚಂದ್ರ ವಂಸೊದ
ಕುಟುಮೊ ಎಂಕ್ಲೆನ ದಾಯವಾದಿಲು
ಕಪಟೊ ಜೂಜಿಡ್ ರಾಜ್ಯೊನುಲಯಿಗ್ ಪಾಡ್ಯೆರಕಲೊಟ್ಟು ||

7

ಸೆರ್‌ದಂಚೆನೆ ಕಾಡ್ ಬತ್ತೊನೆ
ಇತ್ತೆ ಮೆಗೈನ್ ಪತ್ತದುಲ್ಲನೆ
ಬುಡ್ಡು ಪ್ರೀತಿಡ್ ನಿಕ್ಕಿ ಎಡ್ಡೆನೊ ಪನ್‌ಲ ಪರಪೀಡೆ ||
ನಿನ್ನ ಪುದರಾನ್ ಕೇನ್ಡೆ ದುಂಬುಡು
ಧರ್ಮನಂದನೆ ಈಯೆ ಅತ್ತೊಯ
ಧರ್ಮೊ ಸೂಸಿಮೊನೇನ್ ಕೇನುವೆ ಈಯೆ ಪನುವನಯ

8

ಆಂಡ್ ಕೇನ್‌ಲ ಪನ್ನಗಾ ಮರಿ
ಬ್ರಾಣೆರೆನ ನಿಜೊ ಧರ್ಮೊ ಎಂಚಿನ
ಸೂಸಿಮೊಡು ಪನ್‌ಲೆನ್ನಗಾಯೆನೆ ಪನ್ನೆ ಪೆರ್‌ಮರಿಡೆ ||
ಕೇನ್‌ಲಯ ಮರಿ ಅಪ್ಪೆನಮ್ಮನ
ಆಚರೊಡು ಸರಿಸುದ್ಲೊ ಏಪೊಲ
ಕಾರ್ಯೊಡಗ್ಗಿನ್ ಉಂತವೊಂದೇ ಸತ್ಯೊದಾ ನಡತೆ ||

9

ಇತ್ತ್ನಯೆ ಸರಿ ಸಾಸ್ತೊನೋದುದು
ಪನ್ನನಯೆನೇ ಬ್ರಾಣೆ ಪಂಡ್‌ದ್
ಧರ್ಮಂದನೆ ಮರಿಕ್ ಪನ್ನಗ ಪೆರಪಲಾಯಡನೆ ||
ಸತ್ಯೊ ನಡತೆನೆ ಎಂಚಿನವು ಪನ್
ಪನ್ನಿ ಸಾಸ್ತೊಲು ದಾಯೆಗ್‌ಯ ನಿಜೊ
ಬ್ರಮ್ಮ ವಂಸೊದ ಗುಣೊನು ಪನುವನ ಪನ್ನಗಾ ರಾಜೆ ||

10

ಏರ್ ಇಂದ್ರಿಯೊ ಬಿಗಿತ್ ಪತ್ತಾದ್
ಮಾತ ಕಾರ್ಯೊನ್ ಮಲ್ತನಾಯೆನೆ
ಪ್ರಾಣಿ ದಯೆ ನಿಜೊ ಸತ್ಯೊ ನೀತಿದ ನಡತೆಡಿತ್ತೊಂದು ||
ಮೂಜಿ ಲೋಕೊಡು ಕೀರ್ತಿ ಪಡೆವೆನೆ
ವೇದೊ ಸಾಸ್ತೊನು ತೆರಿನ ಬ್ರಾಣೆನೆ
ಕೇನ್ ಈ ನನ ಪನ್ನೆ ಸತ್ಯೊದ ಮಯಿಮೆ ಪೆರ್‌ಮರಿಯೆ ||

11

ಸತ್ಯೊನೇ ಅಧ್ಯಾಯೊ ಸತ್ಯೊಡು
ನಿತ್ಯೊದಾ ಕರ್ಮೊಲೆನ ಆಚರೊ
ಸತ್ಯೊನೇ ಜಪೊ ಹೋಮೊ ಯಜ್ಞೊವಿದಾನೊ ಮಹತಪಸ್ ||
ಸತ್ಯೊದಾಯೆನೆ ಬ್ರಾಣೆ ಸೂದರೆ
ಡುತ್ತಮೆನೆ ನಿಜೊ ಸತ್ಯೊ ಬುಡ್ಡಯೆ
ಬ್ರಮ್ಮ ವಂಸೊದ ಜನೊನೆ ಆಂಡಲ ಸೂದ್ರಡ್‌ದ್ ಕಡೆನೆ ||

12

ವೀರೆ ಎರ್‌ಯ ಪುಕ್ಕತನೊತಯೆ
ಏರ್ ದುರ್ಬಲೆ ನಿತ್ಯೊದಾಚರೊ-
ನೇರ್ ತಪ್ಪವೆ ನಿಯಮೊ ನೀತಿಡ್ ಏರ್ ಉಪ್ಪೆ ಪನ್ ||
ಬೇತೆ ಪೋಣ್ಣಲೆ ಕಣ್ಣ ನೋಟೊಗು
ದೂರೊಡುಂತುವೆ ದೀರೆ ನಿತ್ಯೊದ
ಆಚರೊನು ಬುಡ್ಡಾಯೆ ಅನ್ನೆಯಗಾರೆ ನಿಜೊವಾದ್ ||

13

ಕೆಲವು ಧರ್ಮೊ ವಿಚಾರೊಡಿತ್ತಾನೆ
ವಿಸಯೊ ಕೇಂಡ್‌ದ್ ಸರ್ಪ ರೂಪೊದ

ನವುಸೆ ಸಂತೊಸು ಪಡೆದ್ ಪನ್ನೆನೆ ಧರ್ಮಂದನಡ ||

ಬೆರಣೆರೆನವೇ ಧರ್ಮೊರಚ್ಚಣೆ
ಅರಸುನಾಕ್‌ಲ್ ಮಲ್ತೆರ್‌ಡ ನಿಜೊ
ಟಕ್‌ಲೆ ಧರ್ಮೊನೆ ಒರಿವು ಅಂಚಿನೆ ನಿನ್ನ ಯೇಗಿತೊಡು ||

14

ಚತ್ತಿಲೆನ ನಿಜೊ ಧರ್ಮೊ ಉಂಡುಯ
ಬ್ರಮ್ಮ ಸಬೆನೇ ನಿನ್ನ ಒಟ್ಟುಗು
ಇತ್ತ್ನನೆನ್ ತೂನಗನೆ ಆಚರೊ ಇತ್ತೆ ಎಂಕಾಂಡ್ ||
ಬ್ರಾಣೆರೆಗ್ ಅನ್ಯಾಯೊ ಮಲ್ತನ
ದೋಸೊ ತಟ್ವೆನೆಟೀನ್ ಪೆರ್‌ಮರಿ
ಯಾದ್ ಪರೆರೆಗ್ ಹಿಂಸೆ ಕೊರ್ಪುನ ಕತೆನ್ ಪನ್ನೆನ್ ||

15

ನೂದು ಯಾಗೊನು ಮಲ್ತನಾಯಗ್
ದೇವ ಲೋಕೊದ ಪದವಿ ತಿಕ್ಕುಂ
ದೇನ್ ಮಲ್ತಯೆ ಯಾಗೊ ನೂದೆನ್ ಎಂಕ್ ದೇವೆಂದ್ ||
ಪೀಟೊ ಬುಡುದೇ ಕೊರ್ಪೆನಲ್ಪನೆ
ಯಾನ್ ಉಂತುದು ದೇವರಾಜೆನೆ
ಆದ್ ಸುಕೊ ಸಂತೋಸು ಪಡೆಯೆನೆ ಸೊರೊ ಲೋಕದವೆ ||

16

ಸುಕೊತ ಆಸೆದ ಮಿತ್ತಿಯೆ ತತ್ತಾದ್
ಸುರೆರೆ ಸೂಳೆಲೆಡೇನ್ ಸೊರ್ಕಿಯೆ
ಅವುಲ ಯಾರಂದೇನ್ ಇಂದ್ರನ ಬುಡೆದಿ ಸಚಿವೇವಿ ||
ಪೊರುಲುದಾಲ್‌ಂದಾಲೆ ಬಯಕೆನ್
ತೆರಿಪನಗನೇ ಕುಸೆಲ್ ಮಲ್ತಲ್
ಬೆರಮ ದೇವೆರೆ ಸ್ವಿಡಾಯಿನ ಮುನಿಕುಲೆಲ್ವೆರೆನ ||

17

ಪುಗಲ್‌ಡೇ ಪಲ್ಲೇಂಕಿ ತುಂಬದ್
ಅಯಿಟ್ ಕುಲ್ಲೊಂದೀಡೆ ಬರಡ್‌ಂ
ದಪಗ ಪಂಡ್‌ದ್ ಕಡಪುಡೀಯಲ್ ಯಾನ್ ಕುಸೆಲ್‌ಂದ್ ||
ನೆನೆತ್‌ಜಿಯ ಕಾಮೊದವೆ ಹಂಕರೊ
ತರೆಕ್ ಅಡರ್‌ದ್ ರುಸಿಕುಲೆಡೇನೇ
ಎನನ್ ತುಂಬಯೆ ಸಚಿನ್ ಪಡೆಪಿನ ಮರ್ಲ್ ಬುದ್ಧಿಡೆನೆ ||

18

ಏಳ್ ರುಸಿಕುಲು ಆ ಪಲ್ಲೇಂಕಿನ್
ಸಾಗನಗ ಎನಕಾರ್ ತಾಗ್‌ದ್
ಲಾಂಡ್ ಕೋಪೊಗು ಸಾದಿ ಆ ಮಹ ರುಸಿಯಗ್‌ಸ್ತೆರೆನ ||
ಆರ್ ಪೆರ್‌ಮರಿಯಾದ್ ಪುಟ್ಲೆಲ

ಮೂರ್ಕ ಪಂಡ್ ಪಾಪೊ ಕೊರೈರ್
ಯಾನ್‌ಲಾಪಗ ಪಾದೊಗಡ್ಡೊನೆ ಬೂರು ಬುಲೈಂಡೆ ||

19

ಅಪಗ ರುಸಿ ಕ್ಷಮೆ ಕೊರ್ದು ಪಂಡರ್
ಕುಟುಮೊದಾ ಕಿರಿಯಯಡ ಧರ್ಮೊದ
ನಿಲೆನ್ ಕೇಂಡಡ ಎನ್ನ ಸಾಪೊಗು ಅವ್ವ ಪರಿಯಾರೊ ||
ನಿನಡ ಧರ್ಮೊದ ತತ್ವೊ ಕೇನ್ನಗ
ಮರಿತ ರೂಪೊನೆ ಮಾಜಿದಾಂಡಯ
ನಿನಡ್‌ದೇನೇ ಸುದ್ಲೊ ಆಯಿನೆ ಸಾಪೊ ಮಾಜಿನೆಟ್ ||

20

ಬೀಮನೆಕಡೇ ಬುಡ್ಡೆ ಲೆತೊನುದು
ಪೋಲ ಪನ್ನಗ ಪಲಯ ಕಾರ್ಗ್
ಬೂರು ಬುಲೈನೆ ತನ್ನ ಸೋಲುದ ಸಿತ್ತಿನ್ ಪಂಡೊಂದು |
ನಮ್ಮ ವಂಸೊದ ನವುಸ ರಾಜನ
ಕಸ್ತೊ ಪರಿಯರೊ ಮಲ್ತನಾಕ್‌ಲ್
ನಮ್ಮೋನೇ ಆದಾಂಡ್ ಪಂಡ್ ಬತ್ತೆರಿರ್ವೆಲ ||

21

ಆಸ್ರಮೊಡು ರುಸಿಕುಲೆಗ್ ತೆರಿಪದ್
ಆನಗನೆ ಮಾತೆಲ್ ಬೀಮನ್
ಏತ್‌ಲಾ ಪುಗರೊಂದು ಆಯನ ಎತೆನ್ ಮಾಜಯೆರ್ ||
ಪಾರ್ತೆ ದ್ರೌಪದಿ ನಕುಲ ಸಹದೇ-
ವಾದಿಗುಳು ಸಂತೊಸುಡು ಪಿರ
ಕಾಮ್ಯಕೊಗೆ ಬತ್ತೊಂದು ಉಂತ್ಯೆರ್ ಸುಕೊಟು ಮಾತೆಲ್ ||

|| ಶ್ರೀ ಕ್ರಿಷ್ಣ ಪಾಂಡವರಿತ್ಯನಾಡೆಗ್ ಬತ್ತೆ ||

ಬಾವನಾಕ್‌ಲ್ ಎಂಚ ಉಲ್ಲೆರ್
ತೂವೊಡುಂದುದು ವಾಸುದೇವೆನೆ
ಕಾಮ್ಯಕಾ ಬನೊತಾಡೆ ಬತ್ತೆನೆ ಗರುಡನೇರೊಂದು ||
ಯೋಗಿಲೆಗ್ ಸುಬ ಸಕುನೊ ತೋಜಿನ
ಗಾಕ್‌ಲೇ ನಿಲೈಂದು ಬಾನೊಗು
ತೂನಗನೆ ಹರಿ ಜತ್ತಾದುಂತಿಯೆ ಬಾಮನೊಟ್ಟೆನೆ ||

1

ಮಾತೆರ್‌ಲ ಸರಿಟಡ್ಡೊ ಬೂರೈರ್
ವಾಸುದೇವೆನೆ ಲಕ್ಕದಾಕ್‌ಲೆ
ಮೋನೆ ತೂದೇ ಕೇಂಡೆ ಸುಕೊ ಸಂತೋಸು ಮಾತೆನ್‌ಲ
ದ್ರೋಪದಿನ ಸಿರಿ ದವುಡೆಡರಿನವೆ

ನೀರ್‌ನುರ್ದಾದ್ ಪೊರು ತೆಲಿಪಯೆ
ಕಾಡ್ ವಾಸೊದ ಅವದಿ ನೂಕುಲೆ ಬುಕ್ಕೊ ತೂವೊನುಗೊ ||

2

ಸಿವನ ಪಾಸುಪತಾಸ್ತೊ ಪಾರ್ತಗ್
ಒದಗನೆಟ್ ನಿಕ್‌ಲೆಗ್‌ಲ ಪೋಡಿಗ್
ನನಗ್ ಎಂಚಿನ ಪನ್ನಗಾಪಗ ಧರ್ಮನಂದನೆನೆ ||
ಹರನ ಪಗರಿಗ್ ಹರಿನ ಕರುಣೆದ
ಬಿರುವೆ ಎಂಕ್ಲೆಗ್ ತಿಕ್ಕುದುಂಡುಲ
ಪನುಪನೆಕ್ ಅಲ್ಮಾನೊ ಒಂತೆಲ ಇದ್ದಿ ಪಂಡೊಂಡೆ ||

3

ಕ್ರಿಷ್ಣ ಕಾಮ್ಯಕೊದಾಡೆ ಬತ್ತನ
ವರ್ಮಾನೊನು ತೆರಿದ್ ನಾರದೆ
ರೊಟ್ಟೆಗೆನೆ ಮಾರ್ಕಂಡೆರಾಡೆಗ್ ಸೇರ್‌ದೆತ್ತಿಯೆರ್ ||
ಕ್ರಿಷ್ಣ ಪಾದೊಗು ಅಡ್ಡೊ ಬೂರುದು
ಮುರ್ತ್ಯು ನಿಂಗ್‌ನಗಿನನ್ ಬದ್‌ಕಯಿ
ಪುಣ್ಯೊ ಪುರುಸೆನೆ ಪನ್ದ ಹರಿನವೆ ಗುಣೊನು ಪುಗರೊಂಡೆ ||

4

ಪಾಂಡವೆರೆ ತರೆ ಪೂಜಿದಕ್‌ಲೆಗ್
ವಾಸುದೇವನ ಮಯಿಮೆ ಮಾರ್ಕಂ-
ಡೇಯೆ ಪನಿಯೆರೆ ಕುಲೈ ಕೈತಲ್ ಪ್ರೀತಿ ಬಾವನೆಡ್ ||
ನಾಲ್ ಯುಗೊ ಮುಗಿದಾದ್ ಬೂಮಿಗ್
ಸಾಗರೊದ ನೀರೆರ್‌ಕದಾನಗ
ಸೂರೈ ಚಂದ್ರೆರ್ ಬಾನೊ ಮುರ್ಕುದುಲಾಂಡ್ ಕತ್ತಲೆನೆ ||

5

ಜೀವೊ ಜಂತುಲು ಪಕ್ಕಿ ಮುರ್ಗೊಲು
ಪೂರ ನಾಸೊನೆ ಆದ್ ಒರಿನಯೆ
ಯಾನ್ ಮಾತ್ತೊನೆ ಕಡಲ ನೀರ್‌ಡ್ ಮುರ್ಕು ಲಕ್ಕೊಂದು ||
ಬಾರಿ ಕಸ್ತೊಡು ಉಪ್ಪುನಾಪಗ
ದ್ಯಾನೊ ಮಲೈನೆ ಹರಿನ್ ನೀರ್‌ದ
ಮೇಲ್ಡ್ ಗೋಳಿದ ಇರೆಟ್ ಜೆತ್ತನ ಮಯಿಮನೇನ್ತಾಯೆ |

6

ಅಪಗ ಆಡೆಗ್ ನಾಲ್ ತರೆತಯೆ
ಕಡಲ ನೀರ್‌ಡ್ ಮೀಂದ್ ಮೀಂದ್‌ದ್
ಇರೆಟ್ ಜೆತ್ತನ ಮಯಿಮಡಾಯೆನೆ ಕೇಂಡೆ ಪರಿಚಯೊನು ||
ಹರಿಯೆ ತಾನ್‌ಂದೆನ್ನ ಬಂಜಿದ
ಉಲಯಿಡುಂಡುಯೆ ಕೋಟಿ ಬ್ರಹ್ಮಾಂ
ಡೊಗುಳು ಯಾನೇ ಮಲ್ಲೆ ರಚ್ಚನೆ ನಿಕ್ಕ ತೆರಿಯಂದೊ ||

7

ನಾಲ್ ತರೆತಯೆ ಯಾನ್ ಉಪ್ಪುನ
ಗೀಯೆ ರಚ್ಚಕೆನೆಂಚ ಆಪುನೆ
ದಾಯೆಗೀ ಕಳು ಪನ್ನ ಪಂಡ್‌ದ್ ಚರ್ಚೆ ಮಲ್ತೊಂದು ||
ನಾಲ್ ತರೆತಯೆ ಪಂಡೆ ಹರಿಡನೆ
ಯಾನ್ ಬ್ರಮ್ಮೆನೆ ಎನ್ನ ಬಂಜಿಡ್
ಏತ್ ಲೋಕೊಲು ಉಲ್ಲೊ ತೂಲಯ ಪನ್ನಗಾ ಹರಿಯೆ ||

8

ಬ್ರಹ್ಮ ಬಂಜಿಗ್ ನೂದು ತೂನಗ
ಮೇಣ್ಕನವೆ ಬಂಗಾರ್ ಮಾತ್ರೊನೆ
ಕಣ್ಣಾಗಂಜುನೆ ಬೇತೆ ದಾಯ್ತಲ ಇದ್ದಿ ಪಂಡೊಂದು ||
ಪಿದಯಿ ಬತ್ತದ್ ಎನ್ನ ಬಂಜಿಡ
ಉಲಯಿಡೆಂಚಿನ ಉಂಡು ತೂಲಯ
ಪನುಪುನೆನ್ ಕೇನೊಂದು ನೂರೈನೆ ಹರಿನ ಬಂಜಿಗ್‌ಲ ||

9

ಬಾರಿ ಆಚಿರೊ ಆಂಡ್ ಬ್ರಮ್ಮಿಗ್
ಕೋಟಿ ಬ್ರಮ್ಮಾಂಡೊಲೆನ್ ಸಾಗರೊ
ನೀರ್ ಪರ್ವತೊ ಕಾಡ್ ಗುಡ್ಡೆನ್ ಸೂರೈ ಚಂದ್ರೆನ್ ||
ಏತ್‌ಲಾ ತೂವೊಂಡೆ ಇಂದ್ರೆರ್
ದೇವತೆಲು ಬ್ರಮ್ಮಾದಿ ದೇವರ್
ಬೂತೊ ಗಣೊಕುಲು ಮಾತ ಏತ್‌ಲ ಇತ್ತನೆನ್ ತೂಯೆ ||

10

ತಿರ್ಗ್ ತಿರ್ಗ್‌ದ್ ತೂದು ಬ್ರಮ್ಮಿಗ್
ಪಿದಯಿ ಬರೈರೆ ತೀರ್ಪಿ ಸಾದಿಲು
ಒಯಿಟಿಲಾ ತೆರಿಯಂದೆ ಹರಿನವೆ ದ್ಯಾನೊ ಮಲ್ತೊಂಡೆ ||
ಹರಿಯೆ ತನ್ನವೆ ಕಮಲ ಪೂವೊಲು
ದುಲಯಿದಾ ದಂಡ್‌ಡೆನೆ ಸಾದಿನ್
ಕೊರಿಯೆನಾಪಗ ಮಿತ್ತ ಬತ್ತನ ಬ್ರಮ್ಮಿಗಾಂಡಪಗ ||

11

ಕಮಲೊದಾ ಮಗೆ ಪನ್ನಿ ಪುದರ್‌ಲ
ಪೊಸತ್ ಸಿಸ್ತಿಗ್ ಮನಸ್ ಮಲ್ತದ್
ಹರಿನ ಒಪ್ಪಿಗಡಾಯೆ ತೂಯೆನೆ ನಾಲ್ ದಿಕ್ಕಲೆಗ್ ||
ಸೂರೈ ಚಂದ್ರೆರ್ ದಾರಗೆಲು ಸರಿ
ಬಾನೊಡಾಯೆರ್ ಗಾಳಿ ಬೀಜಿದ್
ಸಾಗರೊದ ನೀರಾಜಿದಾಪಗ ಬೂಮಿ ಉಂಡಾಂಡ್ ||

12

ಮಾಯೆ ಹರಿನೇ ಸೇರ್‌ದಾನಗ
ಆಯನಾ ಗುಣೊ ಬೇದೊ ಮೂಜೆಟ್
ಮೂಜಿ ಮೂರ್ತಿಲು ಆದ್ ತೋಜೈರ್ ಎನ್ನ ಕಣ್ಣಲೆಗ್ ||

ಸಿಸ್ತಿ ಕರ್ತನೆ ಬ್ರಮ್ಮೆ ಪಾಲನ
ಕರು ವಿಷ್ಣುವೆ ಲಯೊಕು ಈಸ್ವರೆ
ಪನ್ನಲಾಕ್‌ಲ್ ಸಿಸ್ತಿ ಸಿತಿ ಲಯೊ ಮಲ್ತೆರೀತನೆಟ ||

13

ಸುರುತ ಕೃತಯುಗೊತರಸುನಾಕ್‌ಲ್
ಸುರೆರೆ ಬಂಜಿಗ್ ಯಜ್ಞೊ ಯಾಗೊದ
ಹವಿಸ್ ಕಡಪುಡುದಕ್‌ಲ್ ಧರ್ಮೊನು ನಾಲ್ ಕಾರ್‌ಲೆಡ್ ||
ಸರಿಟ್ ಉಂತದ್ ಸೂರೈ ಚಂದ್ರೆರೆ
ಕುಟುಮೊದಾಕ್‌ಲ್ ಮಗ್‌ರ್ ತ್ರೇತೆಡ್
ಕಡಮೆ ಮಲ್ತೆರ್ ಒಂಜಿಕಾರ್‌ನ್ ಬುಕ್ಕೊ ದ್ವಾಪರೊಡು ||

14

ರಡ್ಡ್ ಕಾರ್‌ಡೆ ಧರ್ಮೊನುಂತದ್
ಉಲ್ಲೆರಿತ್ತೆನೆ ದುಂದು ಮಾರನೆ
ಪನ್ನನಾಯೆನೆ ನಾಲ್ ಕಾರ್‌ಡ್ ಧರ್ಮೊನುಂತಾಯೆ ||
ನನಗ್ ಬರ್ಪುನ ಯುಗೊನೆ ಕಲ್ಪಿಗೊ
ಕಳವು ಸುಲಿಗಡ್ ಮೋಸೊ ವಂಚನೆ
ಅಮಲ್ ದೆತೊನುದು ಪೋಣ್ಣಲೆನವೇ ಮಾನೊ ದೆಪ್ಪೆರ್‌ಯ ||

15

ದ್ವಾಪರೊದ ಆಕೆರಿಗ್ ಈಯೆ
ರಾಜೆನತ್ತೊಯ ಧರ್ಮನಂದನ
ನಾಲ್‌ಕಾರ್‌ಡ್ ಧರ್ಮೊನುಂತಲ ನಿಕ್ಕ ಹರಿಯೊಲಿವೆ ||
ಈತ್ ಪಂಡ್‌ದ್ ಧರ್ಮ ವ್ಯಾದನ
ನೀತಿದಾ ಕತೆ ಪನ್ನ ಮಾರ್ಕಾಂ-
ಡೇಯ ರುಸಿ ನಾರದೆರೆ ಒಟ್ಟಿಗೆ ಪೋಯೆರಲ್ಪಡ್‌ದ್ ||

16

ಮೈತ್ತಿದಿನ್ ಸರಿ ತಮಸ್ ಮಲ್ತೆರೆ
ಸತ್ಯಬಾಮೆನೆ ಉಲಯಿ ಪೊಗ್ಗುದು
ಪನ್ನಲಾ ದ್ರೌಪದಿಡ ಐವೆರೆ ಬುಡೆದಿಗೊಂದನೆನ್ ||
ಮಲ್ತದೇನೇ ಕೇನ್ವೆ ನಿನ್ನಡ
ಐವ್ವೆರೆನ್ ಈ ಎಂಚ ಸುದರಿಪ
ಒರೈನೆಂಕೇ ತೀರುಜತ್ತೊಯ ಎನ್ನ ಹಣೆಬರೊಡು ||

17

ತೆಲಿತದಾ ದ್ರೌಪದಿಯೆ ಪನ್ನಲ್
ಎನಡ ಮಾತ್ರೊನೆ ಪ್ರೀತಿಡುಲ್ಲೆರ್
ಬಿರ್‌ಸೆರೈವೆರ್ ಕಂಡನ್ಯಲ್ಲುಲ ನಿನ್ನ ಕಂಡನಿಯೆ ||
ಏತ್ ಪೋಣ್ಣಲೆ ಮೇಳೊಡುಲ್ಲೆನೆ
ಆಯೆ ನಿನ್ನನ್ ಎಂಚ ಸುದರಿಪ
ಮಾಯೊಗಾರನೆ ಅತ್ತೊ ಪನ್‌ಪನ್ ಎನ್ನ ಮೈತ್ತಿದಿಯೆ ||

18

ಕಾಮೊ ಮೋಹೊಗು ತಿಕ್ದ್ ಬೂರುದು
 ಏವುರೊಡು ಇದ್ಯೆರ್ಯ ಐವೆರ್
 ಆಕ್ಲಾಕ್ಲೆ ಮನಸ್ ಮೆಚ್ಚೆದ್ ಮಲ್ಪೆ ಸಂಸಾರೊ ||
 ಪನ್ನಗನೆಲಾ ಸತ್ಯಬಾಮೆಗ್
 ಮೈತ್ತಿದಿನ್ ಸರಿ ತಮಸ್ ಮಲ್ತನ
 ತಪ್ಪು ಆಂಡ್‌ಂದಾಲ್ ಕೇಂಡಲ್ ಕ್ಷಮೆನ್ ದ್ರೌಪದಿಡ ||

19

ಹರಿನ ಬುಡೆದಿಗ್ ಕ್ಷಮೆನ್ ಕೊರ್ಪುನ
 ಸುಲಬನೋ ಪನ್ ನಿನ್ನ ಕಂಡನಿ
 ಎನನ್ ಮರಪರೆ ಬುಡಡ ಪಂಡ್‌ದ್ ದವುಡೆನೀಸಿಯಲ್ ||
 ಕ್ರಿಷ್ಟೆ ಪಿದಡ್‌ದ್ ಉಂತುನಾಪಗ
 ಧರ್ಮಜಾದಿಲು ಅಡ್ಲೊ ಬೂರೈರ್
 ಬ್ರಹ್ಮ ಸಬೆ ಮಾತೆರ್ಲ ಪಂಡೆರ್ ಹರಿಗ್ ಜಯೊ ಜಯೊನೆ ||

**|| ಪಾಂಡವೆರೆಗ್ ಸಾಪೊ ಕೊರೈರೆ ದೂರ್ವಾಸೆರೆನ್
 ಕೌರವೆ ಕಡಪುಡಿಯೆ ||**

ಹಸಿನಾವತಿಗೊಂಜಿದಿನೊ ಮಹ
 ಮಲ್ಲ ರುಸಿ ದೂರ್ವಾಸೆರೆತ್ತನ
 ಸುದ್ದಿ ಕೇಂಡ್‌ದ್ ಕೌರವೇಸ್ವರೆ ಪೊರ್ಪುಡೆದುಕೊಂಡೆ ||
 ಕುಲ್ಲದಾರೆನ್ ಪಾದೊ ಪೂಜೆನ್
 ಮಲ್ತೆ ಬುಡೆದಿನ ಒಟ್ಟುಗಾಯೆನೆ
 ಬಿನ್ನ ಪೂಜೆನ್ ರುಸಿಕ್ ಸಂದದ್ ಕೇಂಡೆ ಆರೆಡನೆ ||

1

ದಾನೆ ಬತ್ತರ್ ಸ್ವಾಮಿ ಈಡೆಗ್
 ಈರೆಗೆಂಚಿನ ಸೇವೆ ಎನ್ನವೆ
 ಆವೊಡುಂದುದು ಪನ್‌ಲೆ ಅಪಗನೆ ಯಾನ್ ತೀರ್ನಾವೆ ||
 ದಾಲ ಬೊಡ್ಡಿಯ ಎಂಕ್ ಅರಸುಲೆ
 ಬೋಜನೊದ ಕೊದಿಯಾಂಡ್ ಐಕೇ
 ಯಾನ್ ಬತ್ತನೆ ಬೇತೆ ದಾಯ್ತೆಕ್‌ಲತ್ತ ಮಾರಾಜ ||

2

ಐಕ್ ತೊಂದರೆ ದಾನೆ ಎಂಕ್‌ಲೆ
 ಧರ್ಮೊದರಮನೆಡೇತೊ ರುಸಿಕುಲು
 ಮಲ್ತೆದೊಣಸ್‌ನ್ ಸಂತೊಸುಡು ಸರಿ ಪೋತೆರಿನಿ ಮುಟ್ಟು ||
 ಕೊಟ್ಟುಡುಂಡುಲ ನೀರ್ ಮೀಯೆರೆ
 ಇತ್ತೆ ಮೀಯೊಂದೀರ್ ಬನ್ನಗ
 ಮಲ್ಪೆರೊಣಸ್‌ಗ್ ತಯರ್ ಪಂಡೆನೆ ಆ ದುರ್ರೋದನೆನೆ ||

3

ಬಣಸ್ ಬಲ್ಮಣೊ ಆದ್ ದೂರ್ವಾ
 ಸೆರೆಗ್ ಸಂತೋಸಾದ್ ಪಂಡೆರ್
 ಕುರುಕುಲೊದ ಮರೈದಿಡ್ ಎನ್ನನ್ ಪೊರ್ಪುಡುನ್ಪಾಯೆ ||
 ನಿನನ್ ಮೆಚ್ಚಿಯೆ ಯಾನ್ ಕೌರವ
 ವರೊನು ಕೇನ್‌ಲ ಪನ್ದಲಾಯನ
 ತರೆನ್ ಪೂಜೆದ್ ಉಂತ್ಯೆರಲ್ಪನೆ ಕೈನ್ ದೆರ್ತೊಂದು ||

4

ಕಾಮ್ಯಕೊಡು ದ್ರೌಪದಿಗ್ ತಿಕ್ಕನ
 ಸೂರೈ ಪಾತ್ರೊಡು ತಿಕ್ಕಿ ತನಸ್‌ನ್
 ಆಲೆಡನೆ ನಟ್ಟೊಂದು ತಿನ್ನೆರೆ ರುಸಿಕುಲೊಟ್ಟಾದ್ ||
 ಆಲ್ ಉಂಡುನ ಬುಕ್ಕೊ ಪಾತ್ರೊನೆ
 ಕಾಲಿಯಾಪುನೆಗೆಂದ್ ಪನ್ನೆರ್
 ಯೋಗಿಲೆನ ಮರೈದಿ ದೆತ್ತಲೆ ಸಿವ ಮಹಾದೇವ ||

5

ಈತ್ ಪನ್ನುನ ಕೇನ್ದ ದೂರ್ವಾ
 ಸೇರ್ ಕೋಪೊಡು ತುಲೈರಲ್ಪನೆ
 ಯಾನ್ ಆಲೆನ ಗರ್ವೊನುಂತವೆ ಪನ್ದ ಪಿದಡಿಯೆರ್ ||
 ದ್ರೋಪದಿಯೆ ಉಂಡೊಂದು ಪಾತ್ರೊನು
 ಕಾಲಿ ಮಲ್ತನ ಸಮಯೊ ತೂದೇ
 ಕಾಮ್ಯಕಾ ಬನೊಟಿತ್ತಿ ಪಾಂಡವೆರಾಸ್ರಮೊಗು ಪೋದು ||

6

ಎದುರು ಬಾಕಿಲ್‌ಡುಂತುನಾಪಗ
 ಮುನಿನ್ ಪಾಂಡವನಕ್‌ಲ್ ತೂಯೆರ್
 ಸಿವ ಸಿವಾ ಪಂಡೊಂದು ಕಾರ್‌ಗ್ ಅಡ್ಲೊ ಬೂರಿಯೆರ್ ||
 ಆರೆನೊಟ್ಟುಗು ಸಾರೊ ಬ್ರಾಣೆರ್
 ಸೇರ್‌ದಿತ್ತನ ತೂದು ದರ್ಮಜೆ
 ಬಾರಿ ಸಂತೋಸಾದ್ ಪಂಡೆನೆ ಎನ್ನ ಬಾಗ್ಲೊಂದು ||

7

ಪೊರ್ಪು ಮದ್ಯನ ಆಂಡ್ ಬಣಸ್‌ನ್
 ಮಲ್ಪಿಯೆರೆ ಮೀಲೆಂದ್ ಪನ್ನಗ
 ಒಟ್ಟಿಗೆನೆ ಮಾತೆರ್ಲ ಪೋಯೆರ್ ಯಮುನೆ ಸುದೆತಡೆಗ್ ||
 ಧರ್ಮಜೆನೆ ದ್ರೌಪದಿನ್ ಲೆತ್ತದ್
 ಪನ್ನಗಾಲೆಗ್ ಉಂಡುದಾಯಿನ
 ಪೊರ್ಪು ಪನ್ನುನ ತೆರಿದ್ ಬುಲೈನೆ ತರೆಕ್ ಹಾಕೊಂದು ||

8

ಮುನಿನ್ ಉಣಿಯೆರೆ ಮೀಲೆ ಪಂಡ್‌ದ್
 ಯಮುನೆಗೇನೇ ಕಡಪುಡುದು ನನ

ಒಣಸ್ ಇದ್ದಿಂದೆಂಚ ಪನ್ನುನೆ ಸಿವ ಮಹಾದೇವ ||
 ಸುರಪನೈಸುರೊ ಮಾತ ಪೊತ್ತದ್
 ಬಸುಮೊ ಮುಂಡೊಗು ಬೊಟ್ಟು ಪಾಡ್ಯರೆ
 ಸರಿಟ್ ತೀರುನ ರುಸಿಯೆ ದೂರ್ವಾಸೇರ್ ಎಂಕ್‌ಲೆನ್ ||

9

ಸಾಪೊ ಕೊರ್ದೇ ಲಗಡಿದೆಪ್ಪರೆ-
 ಗಾಂಡೆ ಪಂಡ್‌ದ್ ಬುಲ್ಬುನಾಪಗ
 ಯೋಗಿದೊಮ್ಮೆರ್ ಪಂಡೆರಾಯಡ ದಾಯೆ ಬುಲ್ಬುನೆಯೆ ||
 ವಾಸುದೇವನೆ ನಿಕ್‌ಲೆನೇಪೊಲ
 ಕಾಪುನಾಯೆನೆ ಆಯನಾ ಜಪೊ
 ಈಯೆ ಮಲ್ತಡ ನಿನ್ನ ಕಸ್ಪೊನೆ ಆವು ಪರಿಯಾರೊ ||

10

ಪರಿನವೇ ಜಪೊ ಮಲ್ತನಾಕ್‌ಲ್
 ಪರಮ ಪದವಿದ ಬಾಗ್ಯೊ ಪಡೆತೆರ್
 ಮನಸ್ ಮೆತ್ತೆನೊ ಆವು ಪೊಂಜೊವೆ ಬಂಜಿ ಬೆಯ್ಕೆರ್‌ದ ||
 ಜಪೊನು ಕೇನ್ನಗ ಸ್ವಾಮಿ ಕ್ರಿಷ್ಣನ್
 ನಿಕ್‌ಲೆ ಬುಡೆದಿಯೆ ಸ್ಮರಣೆ ಮಲ್ಪಡ್
 ಮುರಹರನ್ ಚಿನ್ಮಯನ್ ದೇವಕಿ ಮಗೆ ಮುರಾಂತಕನ್ ||

11

ಬ್ರಾಣೆರೆನ ಕಳವಳೊನು ಧರ್ಮಜ-
 ನಾಕ್‌ಲೆನ ಪೋಡಿಗಿದ ದುಕ್ಕೊನು
 ತೂದು ದ್ರೌಪದಿ ಪಿದಯಿ ಬತ್ತದ್ ಮಿತ್ತದಾಕಸೊಗು ||
 ಸೂರ್ಯನೇ ತೂವೊಂದು ದಿಸ್ಪಿನ್
 ಮೂಂಕುದಾ ಕೊಡಿಟುಂತದಾಲೇ
 ವಾಸುದೇವನ ದಿವ್ಯೊ ರೂಪೊನು ಮನಸ್‌ಡುಂತಾದ್ ||

12

ಸಿರಿ ರಮಣ ಗೋವಿಂದ ನರಹರಿ
 ಪರಮ ಪಾವನ ಮೂರ್ತಿ ಬಗ್ಗೆರೆ
 ಹೃದಯೊ ಮಂದಿರೊಡ್ಡಿ ಸ್ವಾಮಿಯೆ ಕ್ರಿಷ್ಣ ಪರಮಾತ್ಮ ||
 ಕರುಣಸಾಗರ ದೈತ್ಯ ಮರ್ದನ
 ಮುರ ವಿರೋದಿಯೆ ಮಾಮ ಕಂಸನ್
 ಕೆರ್‌ದ್ ಲೋಕೊಡು ದರ್ಮ ರಚ್ಚಣೆ ಮಲ್ತಿ ಮಾಮೈಮೆ ||

13

ಸಿವನ ಮುಂಡೊದ ಕಣ್ಣಡಲ್‌ದ್
 ಮದನೆ ಪೊತ್ತನಲೆಕೊನೆ ಎನ್ನವೆ
 ಕಯಿನ್ ಪತ್ತನ ಕಂಡನಿಯೆರ್ ಬಸ್ಸೊ ಆಪುನೆನ್ ||
 ತಲಿಪಿಯೆರೆ ಬೋಡಾದ್ ಎನ್ನವೆ
 ಕರಿಯಣಿನ್ ಈ ಒರಿಪಿಯೆರೆ ಬಲ
 ಪಲಯೆ ಮೆಗಿದಿಗ್ ಕಾತ್‌ಚೆಡ ಬುಕ್ಕೇರ್ ಕಾಪುವೆರ್ ||

14

ಆನಿ ಎನ್ನವೆ ಮಾನೊ ಪೋನಗ
 ಕಾತ್‌ನಯೆ ಈ ಅತ್ತೊ ಕ್ರಿಷ್ಣಾ
 ಬೇತೆ ಏರೆಡ ಪನೊಡು ಎನ್ನವೆ ದೇವೆರೀಯತ್ತೊ ||
 ನಿನ್ನ ಮಯಿಮೆದ ಕತೆನ್ ಪನಿಯೆರೆ
 ಗೆನ್ನ ಆವುಸೊ ಯಾವುಜಿಂದ್‌ದ್
 ಪನ್ನುನೆನೆ ಯಾನೀತ್ ಮಾತ್ತೊನೆ ಎನನ್ ಬದ್‌ಕಾಲ ||

15

ವೇದೊಲೆಗ್ ತಿಕ್ಕಂದ್‌ನಾಯೆನೆ
 ಯೋಗಿಲೆಗ್ ಒಲಿಯಂದ್‌ನಾಯೆನೆ
 ದ್ರೋಪದಿನವೇ ಬುಲ್ಬುಗೊಲಿಯೆನೆ ಸ್ವಾಮಿ ಸಿರಿಕ್ರಿಷ್ಣ ||
 ಬಾನೊಡುದು ಜತ್ತೊಂದು ಬರ್ಪುನ
 ದೇವಿ ವಿನತನ ಮಗನ ಬೆರಿಟೀ
 ಏರ್ಡ್ ಕುಲ್ಲನ ಸ್ವಾಮಿ ಕ್ರಿಷ್ಣನ್ ತೂದು ಪುಗರಿಯೆರ್ ||

16

ಅಡ್ಲೊ ಬೂರುನ ಪಾಂಡವೇರೆನ್
 ದೆರ್ ಲಕ್ಕದ್ ಮೆಗಿದಿ ದ್ರೌಪದಿ
 ಸರ್ಮೊ ಉಂತುದು ಜಪೊನು ಮಲ್ಪುನಗಾಲೆ ದವುಡೆನ್‌ಲ ||
 ತನ್ನ ಕೈಟೀ ಈಸ್‌ನಾಪಗ
 ಕಣ್ಣ್ ಬುಡಿಯಲ್ ದುಕ್ಕೊ ಮರತ್‌ದ್
 ಕ್ರಿಷ್ಣ ಕ್ರಿಷ್ಣಾ ಪಂಡ್‌ದಡ್ಲೊನೆ ಬೂರು ಪುಗರಿಯಲ್ ||

17

ಪುಗರಿಯೆರೆಗೀ ಸಮಯೊನೋ ಪನ್
 ಎನನ್ ದಾಯೆಗ್ ಈಡೆ ಬರ್ಪಯ
 ಸುತಿನ ಮಲ್ತದ್ ಮೆಗಿದಿ ಪನ್ ಪನ್ ಪನ್ನಗಾಲಪಗ ||
 ಸಿವನ ದೇಕಿಡ್ ಬತ್ತಿ ದೂರ್ವಾ-
 ಸೆರೆಗ್‌ಲಾ ಆರೆನವೆ ಪೈಕಿದ
 ಬೆರಣೆರೆಗ್‌ಲಾ ಒಣಸ್ ಮಲ್ಪೆರೆ ಪಂಡ್‌ದೆನ್ನಾರ್ ||

18

ಮೀಯೆರೆಗ್ ಕಡಪುಡುದು ಎನ್ನಡ
 ಆರ್ ಪನ್ನಗ ಅಕ್ಷಯೊದ ಸಿರಿ
 ಪಾತ್ರೊ ಕಾಲಿಯೆ ಆತ್‌ನೆನ್ ತೂದೇನ್ ಪೋಡಿಗಡ್ ||
 ಸಾಪೊ ಕೊರ್ವೆರೆ ಆ ದುರ್ವಾಸೇರ್
 ಈಯೆ ಕಾಪೊಡು ಎಂಕ್ಲೆನ್‌ದ್‌ದ್
 ಯಾನ್ ಬಗ್ಗಿಡ್ ಬಜನೆ ಮಲ್ತನೀಕಿಯೆ ಒಲಿಯತ್ತೊ ||

19

ನಿಕ್ಕ ಎನ್ನವೆ ಜಪೊನು ಮಲ್ಪುನ
 ಬಗ್ಗಿ ಮಾತ್ತೊನೆ ಎಂಕ್ ಬಡವುಡು
 ಕಣ್ಣ್ ತೋಜುಜಿ ಕೊರ್ಲ ದಾಯ್ತಲ ಬಂಜಿ ದಿಂಜಯೆರೆ ||

ನಿನ್ನ ಬಂಜಿಯೆ ಬಗ್ಗೆರೆನ ಜಪೊ
ಟತ್ತೊ ದಿಂಜುನೆ ಯಾನ್ ಕೊರೈಡ
ಇತ್ತೆ ದಿಂಜಂದತ್ತೊ ಬಂಜಿಡ್ ಇದ್ಯೊ ಬ್ರಮ್ಹಾಂಡೊ ||

20

ಕುಸಲ್ ಯಾವುದೆ ನಿನ್ನವಚ್ಚಿಯೊ
ಪೊಲುಸುದಾ ಪಾತ್ರೊನುಲ ಪೂಜಿಡ್
ಒರಿತನೆನ್ ಈ ಕೊರೈ ಪನ್ನಗ ತೂಯಲೈ ತುಲಯಿ ||
ಉನುಪು ತಿಕ್ಕನೆನಾಲ್ ಕನತ್‌ದ್
ಕೊರಿಯಲೈನೇ ತೆಲಿತದಾಯಡ
ಅಪಗ ಕ್ರಿಷ್ಟನೆ ತಿಂದದಾರಿಗೆ ಬುಡಿಯೆ ಸಂತೊಸುಡು ||

21

ಆತ್ ಪೊರ್ತುಗು ಮೀಡ್ ದೂರ್ವಾ
ಸೇರ್ ಒಟ್ಟಿಗೆ ಇತ್ತಿ ಬೆರಣೆರ್
ಮಾತ ಯಮುನೆದ ಪೊಯ್ಯೆಡುಂತ್ಯೆರ್ ಚಂಡಿನೊಚ್ಚೊಂದು ||
ಆರಿಗೆಡ್ ಮಾತೆರೆನ ಬಂಜಿಲ
ದೋಲುದಾ ಲೆಕೊ ಆಂಡ್ ದಿಂಜಿಡ್
ಅಪಗನೆ ಮುನಿ ಗೇನೊ ದಿಪ್ಪಿಡ್ ತೂನಗಾ ಕ್ರಿಷ್ಟೆ ||

22

ಪಾಂಡವೆರೆನಾ ಬುಡೆದಿ ರಕ್ಷಣೆ
ಗಾಡ್ ಬತ್ತನೆ ಪನ್ನ ತೆರಿಯೊಂ
ದಾರ್ ಬತ್ತೆರ್ ಪಾಂಡು ಬಾಲೆಲು ಇತ್ತನಾಸ್ತಮೊಗು ||
ಪಾಂಡವೆರೆನ ನಡುಟು ಕ್ರಿಷ್ಟನೆ
ಬಾರಿ ಪೊರೈಡ ಕುಲ್ಲುದಿತ್ತನ
ತೂದು ದೂರ್ವಾಸೆರ್ಲ ಕ್ರಿಷ್ಟನ್ ಸರಿಟ್ ಪುಗರಿಯೆರ್ ||

23

ಕ್ರಿಷ್ಟೆ ದೂರ್ವಾಸೆರೆನ್ ಕೈತಡೆ
ಲೆತ್ತದೇ ಕುಲ್ಲಾಯೆ ಪಾಂಡವೆ
ರಲ್ಲನೇ ಮುನಿ ಕಾರ್ಗ್ ಬೂರೈರ್ ಬುಕ್ಕೊ ದ್ರೌಪದಿಲ ||
ಅಡ್ಲೊ ಬೂರೈಗ ನಿನ್ನ ಪುದರ್‌ನ್
ಪೊಣ್ಣುಲೇಪೊಲ ಕಾಂಡೆ ಪಂಡ್‌ದ್
ಜಲೈ ಸಾರ್ತಕೊ ಮಲ್ಪಡ್‌ಂದ್ ಪಂಡೆರಾ ಮುನಿಯೆ ||

24

ನಿಕ್ಕ ಸಾಪೊನು ಕೊರೈರೆನ್ನನ್
ಟಕ್ಕಡೇ ಕಡಪುಡಿ ಕೌರವೆ
ನಿನ್ನ ಕಂಡನಿಕಲೆ ಬಾಣೊಡು ಸಯ್ವೆ ನಂಬೊನುಲ ||
ಅಲ್ಪಡ್‌ದ್ ಮುನಿಯಾರೆನಾಸ್ತಮೊ
ಗೆತ್ತಿಯೆರ್ ಸಿರಿಕ್ರಿಷ್ಟ ಮಯಿಮೆನ್
ಬುಕ್ಕೊ ಪಾಂಡವನಕಲೆ ಪುಣ್ಣೊನು ಪೂರ ಪುಗರೊಂದು ||

|| ಪಾಂಡವೆರೆದುರು ಮಲ್ಲತಿಗೆ ತೋಜಯೆರೆ ಕೌರವೆರ್
ಪಿದಡಿಯೆರ್ ||

ಕಾಮ್ಯಕೊಡು ಸಿರಿ ಕ್ರಿಷ್ಟೆ ಪಾಂಡವ -
ನಾಕಲೆಗ್ ಸರಿ ದೈರೊ ಪಂಡ್‌ದ್
ದ್ವಾರಕೆಗ್ ಪಿದಡೊಂದು ಪೋಯೆನೆ ಗರುಡನಾ ಬೆರಿಟ್ ||
ಆ ಮುಕುಂದೆನೆ ಪೋಯೆ ಪನ್ನನ
ಬೇಜರೊಡು ಪಾಂಡವೆರ್ ನಿತ್ಯೊಲ
ದ್ಯಾನೊಡೇ ಜಪೊ ಮಲ್ಪೆದರ್ ದ್ರೌಪದಿನ ಒಟ್ಟಿಗೆನೆ ||

1

ಬೆರಣೆ ಒರಿ ಬತ್ತನಯೆ ಕಾಮ್ಯಕೊ
ಬನೊಟು ಇತ್ತನ ಪಾಂಡು ಬಾಲ್ಟೆನ
ಸಿತಿನ್ ಪಜಿಕಳು ಪಂಡೆನೇ ದೃತ ರಾಸ್ತ ಬೂಪತಿಡ ||
ಉಣಿಯೆರೆಗ್ ಸಿತಿ ಇದ್ದಿಯಕಲೆಗ್
ಪರ್‌ದ್ ನೀರ್ದದುಕುವೆರ್ ಬೇರ್‌ನ್
ಗರ್‌ತ್ ದೆಕ್ಕದ್ ತಿನ್‌ಪೆರಾಕಲ್ ಕಾಡ್ ತಿಗೊಂದು ||

2

ದುಸ್ಪ ರಕ್ಕಸನಕಲ್ ತಿನಿಯೆರೆ
ಬರೈರಾಡೆಗ್ ಕಾಡ್ ಬದುಕುನೆ
ಕಸ್ಸೊ ಪಂಡ್‌ದ್ ದಿನೊಲ ಬುಲ್ಲುದು ಕಂಗಲಾತೆರ್‌ಯ ||
ಸುದ್ದಿ ಕೇಂಡ್‌ದ್ ಕುರುಡ ರಾಜೆನೆ
ಎನ್ನ ಮೆಗ್ಯನ ಬಾಲ್ಟೆಗೆಂಚಿನ
ದುರೈಸೆನೊ ಪಂಡೊಂದು ಬುಲ್ಟೆನೆ ತರೆಕ್ ಹಾಕೊಂದು ||

3

ದುಸ್ಪ ಜೋಕುಲು ಪಾಂಡು ಬಾಲ್ಟೆಗ್
ಅನ್ಯಯೊನು ಮಲ್ತೆರ್ ಪಂಡ್‌ದ್
ಬುಲ್ಲುನೆನ್ ತೂವೊಂದು ಕರ್ಣೆಲ ಸಕುನೊಟ್ಟಿಗೆನೆ ||
ತಾತಿ ಬೊಟ್ಟುದು ತೆಲಿತೆರೇತೋ
ಆ ಸುಯೋದನನಾಡೆ ಪೋಯೆರ್
ಬ್ರಾಣೆ ಪಂಡನ ಸುದ್ದಿಗೇತಲ ಬೀಲೊ ಕೂಡ್ಲಯೆರ್ ||

4

ಕಾಡ್ ಕಾಟಿಲು ತಿರುಗುವೊಗೆ ಸರಿ
ಮೇಯೆರೆಗ್ ತಿಕ್ಕಂದೆ ಒಟ್ಟಿಗೆ
ಸೇರ್‌ದಿತ್ತನ ಒಂಜಿ ಎರ್ಮೆಗ್ ನಿತ್ಯೊ ಸೊರ್ಕಲೊಡು ||
ಬೋಂಟೆ ದೇರೈರೆ ಪೋಯಿ ನಮೊಲಾ
ಕಾಮ್ಯಕೊಗು ಪನ್ನಗನೆ ಕೌರವೆ
ಬಾರಿ ಪುಗರಿಯೆ ಪಂಡನಕಲೆನ ಬೆರಿಕ್ ಬೊಟ್ಟೊಂದು ||

5

ಲೆಪುಡಯೆನೆ ತನ ಮೆಗಿಯನಾಡೆಗ್
ಅವುಲು ಸೇರೈರ್ ನಾಲ್ವಟಿಂಗರ್
ಅಕ್ಲ್ ಬೋಂಟೆಗ್ ಪೋಪಿ ನಿರ್ಣಯೊ ಮಲ್ಲೆರೊಟ್ಟಾದ್ ||
ಕೆಲವು ಸೊರ್ಕುದ ಪೋಣ್ಣಲೆನ್ಲಾ
ಜವನೆರೊಟ್ಟುಗು ಲೆತೊನುಗೊಂದುದು
ತೆರಿಪಯೆರ್ ಮಾತೆರೆಗ್ ಕಾಮ್ಯಕೊ ಬನೊಕು ಬರೈರೆಗ್ ||

6

ಕಾಡ ಪುಲ ಮೇಪುನವೆ ಎರೈನ್
ತೂದು ಬರೈರೆ ಪೋಪುನೆಂದ್
ರಾಜ ದ್ರತರಾಸ್ಪಡನೆ ಪನ್ನಗ ಬೀಸ್ಮ ವಿದುರೆರೆಗ್ ||
ದಾನೊ ಗುಟ್ಟುಂಡುಂದು ತೆರಿಯೆರ್
ನಾಲ್ವಟಿಂಗೆರೆ ಕೂಟೊ ಪೋಪುನ
ದಾಲ ಸರಿಯತ್ತಂದ್ ಪಂಡೆರ್ ಬುದ್ಧಿಯಾಕ್ಲೆಗ್ ||

7

ನಿಕ್ಲೆನೊಟ್ಟುಗು ಬರ್ಪುಜೆಂಕುಲು
ಅವುಲು ಇತ್ತನ ಬೀಮ ಪಾರ್ತೆರ್
ಪಗೆನ್ ಮೇಲ್ಗ್ ಒಯ್ತ ಪಾಡೊನಡೆಂದ್ ಪನ್ನಗನೆ ||
ಸಕುನಿ ಕರ್ಣೆರ್ ಕೆಬಿನ ಕೊರ್ಜೆರ್
ಪಿದಡುನಟ್ಟನೆ ಮಲ್ಲೆರಾಕ್ಲೆ
ರತೊಟು ಕಮ್ಮೆನೊ ಗಂದೊ ಕಸ್ತರಿ ಮೇಲ್ಗ್ ಪೂಜೊಂದು ||

8

ಕುಲ್ಲಿಯೆರ್ ಪೋಣ್ಣುಗುಳು ಸೊರ್ಕುದ
ಜವ್ವನೆರೆ ಒಟ್ಟಿಗೆನೆ ಪಿದಡ್ಡೆ
ಲೆಕ್ಕೊ ಮಲ್ಪುನಗಾಚಿರೊನೆ ಪೊಂಜೊವೆನ ಸೇರಿಗೆನ್ ||
ಆನೆ ಕುದುರೆಲೆ ಸವರಿಡೇಶಲ
ನೂದು ಮೆಗಿ ಪಲಯಲ್ಲೆನೊಟ್ಟುಗು
ವೀರನಾಕ್ಲೆ ಬತ್ತೆರಕ್ಲೆನ ಕೈತವಾಯುದೊಡು ||

9

ಬನ್ನಗನೆ ಮರಿಜಿಡೆನ್ ದೆತ್ತೆದ್
ಮಲ್ಲ ಮಾಟೆನ್ ನೂಂಡ್ ಕಕ್ಕೆಲು
ಮುಟ್ಟೊನುಂದೇ ರಾದ್ ಪೋಯೊನೆ ಆಪಕೀಪೆಕ್ಗ್ ||
ದುಸ್ಸ ಸಕುನೊನು ಗಣ್ಯೊ ಮಲ್ಲೆಜೆ
ರಲ್ಪ ತೂಯೆರ್ ಎರೈ ಮೇಪುನ
ಮಲ್ಲ ಪುಂಡುನು ಕಂಜಿ ಕೈಕಂಜಿಲೆನ್ ಮಾತೆನ್ಲ ||

10

ಮೇಪವುನ ಜೋಕುಲೆಗ್ ತಿನಿಯೆರೆ
ಗೇತಲಾ ಕೊರ್ಡ್ ಕಲ್ ಕಾಮ್ಯಕೊ

ಕಾಡ್‌ದುಲಯಿಗ್ ಪೊಗ್ಗುದಪಗನೆ ತಿರ್ಗ್ ತಿರ್ಗೊಂದು |
ನಾಡಿಯೆರ್ ಪಾಂಡವೆರ್ ಇತ್ತನ
ಆಸ್ತಮೊನು ಮಾತೆರ್ಲ ತೂದೇ
ಪಾಳ್ಯೊನುಂತದ್ ಬತ್ತೆರಾಕ್ಲೆ ಬುಡರೊ ಮಲ್ಲೆರೆಗ್ ||

|| ಕಾಡ್‌ದುಲಯಿಡ್ ಪೋಣ್ಣಲೆನ ಕಾರ್ಬರ್ ||

ಕಾಮ್ಯಕೊಡು ಪಾಂಡವೆರೆ ಆಸ್ತಮೊ -
ದಾಡೆ ಬತ್ತನ ಕೌರವಾದಿಲೆ
ಕೂಟೊ ಕಾಡ್‌ಡ್ ತಿರ್ಗದುಪ್ಪುನ ತೂದು ಮುನಿ ಜನೊಕು ||
ಏರ್ ಪಂಡ್‌ದ್ ತೆರಿಜಿಯಾಕ್ಲೆ
ಪಾಂಡು ಬಾಲ್ಟೆಡೆ ಕೇನ್ನಗಾಕ್ಲೆ
ಊರುಗರಸುಲು ಕೌರವಾದಿಲು ಕಾಡ್ ತಿರ್ಗುವೆರ್ ||

1

ಪನ್ನಗನೆ ಮುನಿಕುಲೆಗ್ ದೈರೊನೆ
ಬತ್ತದಾಕ್ಲೆ ನಿಶ್ಯೊ ಕರ್ಮೊನು
ಮಲ್ಲೊಂದಿತ್ತೆರ್ ವೇದೊ ಮಂತ್ರೊಡು ಅಗ್ನಿ ಕಾರ್ಯೊಲೆನ್ ||
ಅಲ್ಪ ಬುಡರೊಡು ಕೌರವಾದಿಲೆ
ಪೋಣ್ಣುಗುಳು ಸಿಂಗಾರೊ ಮಲ್ಲೆದ್
ಪೊರೈ ದೈತ್ತೊಡು ಸೀರೆ ಪದ್ವೊಯಿ ದೀಡ್‌ನೈಸುರೊಡು ||

2

ಪಿದಡಿಯೆರ್ ಬುಡರೊಡ್ಡು ಕಾಡ್‌ದ
ಪುದೆಲ್ ನುಕ್ಕೈರ್ ತೆಗ್ಲೆ ಕಿನ್ನೈರ್
ಅಯಿನ್ ದಕ್ಕೈರ್ ಒರ್ತಿ ಒರ್ತಿನ ಮೇಲ್ಗ್ ತೆಲಿತೊಂದು ||
ಮುನಿಕುಲೆನ ಆಸ್ತಮೊಗು ಬತ್ತೆದ್
ಉಲಯಿ ಪೊಗೈರ್ ಹೋಮೊಗಾಕ್ಲೆ
ಕಣಕ್ ದರ್ಬೆನ್ ಅಟ್ಟಿ ದೀಡ್ಡೆನ್ ಪಿದಯಿ ದಕ್ಕಿಯೆರ್ ||

3

ಯೋಗಿಲೆನ ಜನ್ನೈರೊ ಕಡ್ತೆರ್
ನಾರ್ಡ ಕುಂಟುನು ಒಯ್ತ ಬಿಚ್ಚೆದ್
ಕೋಮಣೊಗು ಕೈ ಪಾಡ್ಡ್ ಗಿರೈರ್ ಮಿರೆನ್ ತಾಂಟಯೆರ್ ||
ಆಕ್ಲೆನ್ ಮೇಲ್ಗೊಯ್ತ ಪಾಡ್‌ದ್
ಮೋನೆ ಮುಂಡೊಗು ಮುತ್ತು ಕೊರೈರ್
ಮಾಲೆ ಕಡ್ತೆರ್ ಗಡ್ಡೊ ನೊಯ್ತೆರ್ ಮಗ್ತ ಪಾಡಿಯೆರ್ ||

4

ಎಲ್ಯ ಮುನಿ ಜೋಕುಲೆನ ತರೆಕೇ
ಬೊಟ್ಟಿಯೆರ್ ಸರಿ ಚೆಂಡೆ ಬಿರೆಲ್ಡೆ
ಕಿನ್ನಿಯೆರ್ ಬುಲ್ಲಯೆರ್‌ಲಕ್ಲೆನ್ ಕುಲ್ಲ ಲಕ್ಕಯೆರ್ ||

ಒಲ್ಲು ಬತ್ತೊನೊ ಮಾರಿಲೀಡೆಗ್
ಪನ್ನ ಮುನಿಕುಲು ಪಾರ್ ಬತ್ತದ್
ಧರ್ಮನಂದನ ಕೆಬಿಟ್ ಪಂಡರ್ ದೂರು ನಾಚಿಕೆಡ್ ||

|| ಕೌರವನ್ ಚಿತ್ರ ಸೇನೆ
ಕಟ್ಟೊಂದುಪೋಯೆ ||

5

ನಿಕ್ಲ್ ಮನಿಪಡೆ ಎಂಕ್ಲೆನರಮನೆ -
ದಕ್ಲ್ ತಿಗ್ಗೆರೆ ಬತ್ತನಾಕ್ಲ್
ಪೆರಪ ಪೋವೆರ್ ಸಾಪೊ ಕೊವೆರ್ ಪನ್ನಿ ಪೋಡಿಗೆಡ್ ||
ಈತ್ ಪನ್ನಗ ನಂಬೈರಾಯಿಜಿ
ಯೋಗಿನಕ್ಲೆಗ್ಲಕ್ಲ್ ಬೀಮಡ
ದೂರು ಪನ್ನಗ ಗದೆನ್ ದೆರ್ತ್ ಪಿದಡ್ನಾಪಗನೆ ||

ಮಾತ ಪೋಣ್ಣಲು ಜವನೆರಾಣಲು
ಪಾರ್ ಬಲೆ ನೀರಾಟೊ ಗೊಬೈರೆ
ಕಾಮ್ಯಕೊದ ಕಿರೆತಾಡೆ ಪಂಡ್ ದ್ ಲೆತ್ತೆ ಕೌರವನೆ ||
ಆಯ ಲೆಪ್ಪುಗು ಓಕೊನುಂದೇ
ಬಾರಿ ಸೇಲೆದ ಪೋಣ್ಣಲಾಪಗ
ಆಣುಲೆನ ಒಟ್ಟಿಗೆನೆ ಬತ್ತೆರ್ ಪಾರ್ ದ್ ಬೂರೊಂದು ||

6

ಧರ್ಮಜೆನೆ ಸಮದಾನೊ ಮಲ್ತ್ದ
ಬತ್ತೆ ರುಸಿಕುಲೆನಾಸ್ರಮೊಗು ತಾ
ನಲ್ವ ಉಂತುದು ತೂಯೆ ಪೋಣ್ಣಲು ಮಲ್ತಿ ಲೂಟಿಲೆನ್ ||
ಬತ್ತನಾಯನ ಗುರ್ತೊ ತಿಕ್ಕದ್
ಪೋಣ್ಣಗುಳು ನಾಚಿಗೆಡ್ ಪಾರಿಯೊ
ನಲ್ತ್ ಬುಡರೊಗು ಬಾನುಮತಿಡನೆ ದೂರು ಪನಿಯೆರೆಗ್ ||

1
ಪೊದಕ್ ಜಾರ್ ದ್ ತುತ್ತಿ ಸೀರೆದ
ನೆರಿಯೆ ಗಿದ್ ರಾನೆನಪಗ ಕೈಟೇ
ಪೊದಿದ್ ಪೋಣ್ಣಲು ಪಾರ್ ಬನ್ನಗ ತೆಲಿತೆರಾಣುಗುಳು ||
ಅಯಿನ್ ಗಣ್ಯೊನೆ ಮಲ್ತ್ ಜೆರಾಲಾ
ಕುದುರೆಲಾಕ್ಲ್ ಕೌರವಾದಿಲೆ
ಸೊರುಕುಗಾಪುನ ಸುಕೊತ ಹಾಸಿಗಿಲತ್ತೊ ಮಾತೆರ್ಲ ||

7

ಏರ್ತೂಂಡಲ ದಾನೆ ನಿಕ್ಲೆಗ್
ಪೋಡಿ ಎಂಚಿನ ಸೋಲ್ತನಾಕ್ಲ್
ದಾನೆ ಮಲ್ಪೆರ್ ನಮನ್ ತಿಗ್ಗೆಲೆ ಕಾಮ್ಯಕಾ ಬನೊಟು ||
ಆಸ್ರಮೊದ ಪೊಂಜೊವೆಗ್ ನಿಕ್ಲೆನ
ರೂಪು ಸಿಂಗರೊದೈತ್ತೊ ತೋಜಲೆ
ಬಾನುಮತಿಯಕ್ಲೆಡನೆ ಪಂಡಲ್ ಕೌರವನ ರಾಣಿ ||

2
ಪಾರ್ ಬತ್ತದ್ ಮಾತ ಸೇರೈರ್
ಆ ಕುಬೇರನ ಮಗೆನೆ ಸೊರ್ಕುನ
ನೇಲ್ಯ ಕಿರೆತಾಡೆಗೆನೆ ಕೌರವನರಸು ಪರಿವಾರೊ ||
ಬೇಲಿ ಕಟ್ಟಿನ ತೂದು ಉಂತ್ಯೆರ್
ಕಾಪುನಕ್ಲೆಡ ಪಂಡರಾಪಗ
ಬಾಕಿಲ್ ದೆಪ್ಪಿಂದ್ ಪನ್ನಗ ಏರ್ ನಿಕ್ಲೆಂದ್ ||

8

ಮುನಿಕುಲೆನ ಕೈ ಪತ್ತನಾಕ್ಲೆ
ಎದುರೆದುರು ಉಂತೊಂದು ಸೀರೆದ
ನೆರಿನ್ ತೋಜದ್ ದೀಡಿ ಪದೊಯಿ ಗತ್ತದೈತೊಡುಲ ||
ಮದಿಮೆ ಆವೆರೊ ತೆರಿನ ಪೋಣ್ಣಲು
ರುಸಿಕುಲೆನ್ ಚಂಡಿರ್ಡ್ ಮೀಯೆರೆ
ದೊರಗ್ನಾರ್ ದ ಸೀರೆ ತುತ್ತುದು ಅಂಬಿ ಪೂಜಿಯೆರೆ ||

3
ಕೇಂಡಿ ಸಾತ್ ಗ್ ಪಂಡರೆಂಕುಲು
ಆನೆ ಪುರೊತವೆ ಅರಸು ಕೌರವ-
ನಾಕ್ಲೆನ ಕಡೆತಕ್ಲ್ ಮೀಯೆರೆಗೀಡೆ ಬತ್ತದೊನೆ ||
ಬೂಮಿ ಲೋಕೊದ ಜನೊಕು ಮೀಯೆರೆ
ಗಾಪುನಾಕಿರೆ ಅತ್ತ ಮಿತ್ತದ
ಲೋಕೊದಾಕ್ಲ್ ಮಾತ್ತೊ ಮೀಪುನ ಪೊರ್ಪುದಾ ಕಿರೆನೆ ||

9

ಪಾಂಡವೆರ್ ಐವೆರ್ಲ ಒರ್ತಿಗ್
ದಾಯೆ ಕಂಡನಿಯಲ್ಲು ಕಾಡ್ಡ್
ಆಸ್ರಮೊಡು ಚೆಪೈರೆಗೊ ಬಂಗರ್ ಸೀರೆ ದೆಪೈರೆಗೊ ||
ತೋಜುವಲ್ ಪಂಡೊಂದು ತೆಲಿತೆರ್
ತಾತಿ ಬೊಟ್ಟುದು ಅಪಗ ದೌಪದಿ
ಬಾಕಿಲ್ಡ ಉಂತೊಂದು ತೂನಗ ಪಾರೈರಲ್ಪಡ್ ದ್ ||

4
ಬತ್ತನಾಕ್ಲ್ ಏರ್ ಪಂಡ್ ದ್
ಅರೊ ಮಲ್ತ್ ದ್ ನಿಕ್ಲ್ ಪಾತೆರ್
ದಿತ್ತೆ ಬಾಕಿಲ್ ದೆಪ್ಪೆರೋ ಅತ್ತಿತ್ತೆ ತಲಿಪುವರೊ ||
ಗಟ್ಟಿದಾ ಬಾಕಿಲ್ ದೆರ್ತ್ ದ್
ರಟ್ಟಿಯೆರ್ ಮಾತೆರ್ಲ ನುರ್ಕುದು
ಪೊಗ್ಗನಗ ದನಿ ಚಿತ್ರ ಸೇನಡ ದೂರು ಪನ್ನಗನೆ ||

5

ಕೇಚರೆರೆ ಸೇನೆನ್‌ಲ ಲೆತ್ತದ್ -
ಲಾಯೆ ಪಂಡನೆ ನಮ್ಮ ಕಿರಕೇ
ಮೀಯೆರೆಗ್ ನರಮನಿಯ ಜಾತಿಲು ಬತ್ತ್ ನುರ್ಕುದೆರ್ ||
ಪೋಲೆ ನಿಕ್‌ಲಾಡೆಗ್‌ಲ ಪಂಡದ್
ವೀರ ಗಂದರ್ವೆರೆಡ ಪನ್ನಗ
ಆಯುದೊಲೆ ಪತ್ತೊಂದು ಬತ್ತೆರ್ ನೀರ್ದ ಕಿರೆತಾಡೆ ||

6

ಕರ್ದ ಸೌಬಲನಕ್‌ಲ್ ಹಾಕ್ಯೆರ್
ಬತ್ತಿ ಗಂದರ್ವೆರೆನ ಸೇನೆಗ್
ಬಿಲ್ಲ್‌ದರ್ತ್‌ದ್ ಬಾಣೊ ಬುಡಿಯೆರ್ ಕಚರ ಸೈನಿಕೆರ್ ||
ಮಿತ್ತ ಲೋಕೊದ ಸೈನ್ಯೊ ಆಂಡಲ
ಬಿರೆ ಕರ್ಣಗ್ ಎದುರೊ ಆಯೆನೆ
ಕಡ್ ರಟ್ಟಯೆ ಬತ್ತಿ ಬಾಣೊನು ಪಗರಿಡಾಕಿಯೆನೆ ||

7

ಕರ್ದ ಬಾಣೊದ ಪೆಟ್ತ್ ತಾಂಗೈರೆ
ಚಿತ್ರ ಸೇನನ ಪಡೆಕ್ ತೀರಾಜಿ
ನೆತ್ತೆರರಿಪದ್ ಪೋಯೆರಾಕ್‌ಲ್ ದನಿನ ಕೈತಡೆಗ್ ||
ನಮ್ಮ ಕಿರೆತಾಡೆಗ್‌ಲ ಬತ್ತದ್
ನುರ್ಕಾನಾಕ್‌ಲ್ ಕೌರವೆರೆ ಪಡೆ
ಪೆಟ್ತ್ ಹಾಕ್ಯೆರ್ ತಲಿಪೆರಾಯಿಜಿ ತೂಲೆ ಎಂಕ್‌ಲೆನ್ ||

8

ಕಾರ್ ಪೊಲಿತೆರ್ ಕಣ್ಣೆದತ್ತೆರ್
ದೇರ್ತಿ ಕೈನೇ ತುಂಡುಮಲ್ತೆರ್
ಏತ್ ಸಾದನೆ ಮಲ್ತದಾಂಡಲ ಗೆಲ್ವೆರಾಯಿತ್ತೊ ||
ಈತ್ ಪನ್ನಗ ಚಿತ್ರ ಸೇನೆನೆ
ಮೂಂಕುಗೇರ್ಪಯೆ ಬಿರೆಲ್‌ನಾಪಗ
ಪಾಪೊದಾ ಪಾಂಡವೆರೆ ರಾಜ್ಯೊನು ಉಳಯಿ ಪಾಡ್ಡಾಯೆ ||

9

ಕುರುಡನಾ ಮಗೆ ಈತ್ ಕಾರ್ಬರ್
ಮಲುಪುವೆಡ ನನ ದಾಯೆಗಂಕುಲು
ಬದುಕುನೆನೆ ಈ ಮಿತ್ತ ಲೋಕೊಡು ಪನ್ನ ಲಕ್‌ದುಂತ್ಯೆ ||
ಕುರುಕುಲೊನು ಪೊಡಿ ಪೊಡಿಯೆ ರಟ್ಟದ್
ಜುಗರಿ ಗೊಬ್ಬದು ಉಲಯಿ ಪಾಡ್ಡೆನ
ಗಜಪುರೊನು ಸ್ವಾದೀನೊ ಮಲ್ತದ್ ಎನ್ನ ಮೇಳೊದವೆ ||

10

ಅಪ್ಪೆರೆಲೆ ನಲಿಕೆದವೆ ಮಂಟಮೆ
ಕಟ್ಟವೆನೆ ಪಂಡೊಂದು ತೆರಿಪಯೆ

ಎನ್ನೊ ದಿಕ್ಕದ ಪಾಲಕೆರೆನಾ ಸೇನೆದಾಕ್‌ಲೆಗ್ ||
ಬತ್ತನಾಕ್‌ಲ್ ಕೈಟ್ ಆಯುದೊ
ಪತ್ತೊನುಂದೇ ಕಾಡ್ ಜತ್ತೆರ್
ಚಿತ್ರ ಸೇನಗ್ ಜಯೊನೆ ಜಯೊ ಜಯೊ ಪನ್ನಿ ಗೋಸಣೆಡ್ ||

11

ಬೊಬ್ಬೆ ಕೇಂಡ್‌ದ್ ಕೌರವಾದಿಲು
ಕರ್ದ ಸೌಬಲೆ ವೀರ ಸೈಂದವೆ
ದುಸ್ಸ ದುಸ್ವಾಸಾದಿ ವೀರೆರ್ ತಯರ್‌ಡುಂತಿಯೆರ್ ||
ಕಲ್ಪವೊಡು ಆ ಚಿತ್ರ ಸೇನಗ್
ಸೊರೊಡೇ ಸೂಳೆಲೆನ್ ನಲಿಪವಿ
ಮರೈದಿನ್ ಮಾರ್‌ಯುಗ್ ಪಂಡದ್ ಸೇರೈರೊಟ್ಟಾದ್ ||

12

ಮಿತ್ತಲೋಕೊದ ಸುರೆರ್ ಎಂಕುಲು
ಜತ್ತ ಮೀಪುನ ಕಿರೆನ್ ಕಳೆಂಕದ್
ಸೊರೈನಕ್‌ಲೆಗ್ ಬಾಣೊ ಬುಡುದೇ ನೆತ್ತೆರರಿಪಾದ್ ||
ಇತ್ತೆ ಎಂಕುಲು ಐಟಿ ಸೊರೈವೊ
ಪನ್ನ ಪಗರಿನ್ ರಟ್ಟಯೆನೆ ಆ
ಚಿತ್ರಸೇನೆನೆ ಅಪಗ ದುಸ್ವಾಸನಗ್ ಪಿಸ್‌ರೇರ್ದ್ ||

13

ಬಾಣೊ ಬುಡಿಯೆನೆ ಕಚರ ವೀರಗ್
ಬಾರಿ ಸೌರೈಡು ಕಡ್ ರಟ್ಟಯೆ
ಆ ಕುಬೇರನ ಮಗೆನೆ ಕೋಪೊಡುಲಪಗ ಪಿರ ಒಂಜಿ ||
ಕೌರವನ ಮಗಿ ಬುಡಿಯೆನ್ನೈನ್‌ಲ
ವೀರ ಕೇಚರೆ ತುಂಡು ಮಲ್ತದ್
ಸೌರೈಡಾಯನ ತಿಗಲೆಗಾಕಿಯೆ ಬೂರು ಸೈಲಂದ್ ||

14

ಕುರುಪತಿನ ಮಗಿ ತರೆನೆ ತಿರ್ಗದ್
ಕಳಟ್ ಬೂರ್‌ನ ತೂದು ಸೌಬಲೆ
ಎದುರು ಬತ್ತದ್ ಬಾಣೊರಾಪಯೆ ಎನ್ನೊ ದಿಕ್ಕಲೆನ ||
ಒಡೆಯನಾಕ್‌ಲೆ ಸೇನೆಗಪಗನೆ
ಪಗಡೆಗೊಬ್ಬದ ಕಂತ್ರಿ ಉಂತುಲ
ನಿನನ್ ದೀಡಯೆ ಪನ್ನ ಕೇಚರೆ ಬಾಣೊರಾಪಾಯೆ ||

15

ಚಿತ್ರಸೇನನ ಬಾಣೊ ತಾಗ್‌ದ್
ಕುತ್ತ ಕಂಡೆನೆ ರಟ್ಟೆ ಸೌಬಲೆ
ಬುಕ್ಕೊ ಸೈಂದವೆ ಕತ್ತಿದಾಯುದೊ ಪತ್ತದೆದುರಾಯೆ ||
ದುಸ್ಸಲೆನ ಕರೈಣಿನ್ ರಟ್ಟವೆ

ಪನ್ದಲಾ ಗಂದವೆ ಬಾಣೊನು
ಬುಡ್ಡು ತೂನಗ ಕಳಟ್ ನೆತ್ತೆರ್ ಕಕ್ಕೆ ಜಯದ್ರತೆಲ ||

16

ಬೀಮ ಪಾರ್ತೆರ್ ನಿಲ್ ತೂಯೆರ್
ಬೂರ್ಡು ಪುಡೆರುನ ವೀರನಕಲೆನ್
ತಾತಿ ಬೊಟ್ಟೊನಗಪಗ ಧರ್ಮಜೆ ಪನ್ನೆನಾಕಲೆಡ ||
ಪೋಲೆನಿಕಲಿರ್ದೆರಾಲ ಕುರುಪತಿ
ಸೇನೆ ಗೆಲ್ಲಲೆ ಪನ್ನಗಾಕ್ಲ್
ಜಾರಿಯೆರ್ ಅಲ್ಲಡ್ ಪಲಯನ ಕಣ್ಣ ತಪ್ಪಾದ್ ||

17

ಕಚರನಕಲೆಗ್ ಇಂಚಿ ಪೌರುಸೊ
ಬಲುತು ಬತ್ತನೆ ಪನ್ದ ಕರ್ಣೆನೆ
ಬಿರಿಪಗರಿ ಪತ್ತೊಂದು ಪಿದಡಿಯೆ ಲಡಯಿದಾ ಕಳಕ್ ||
ಪಿರವುಡೆನೆ ಕೌರವನ ಕಡತವೆ
ಬೀರ್ಸೆರೇಶಾಲ ಬತ್ತೆರಾಪಗ
ಪಗರಿ ಸೂಲೊ ಮುಸುಂಡಿ ಮುಂದ್ಗರೊ ಬಿಂಡಿವಾಲೊಲೆಡ್ ||

18

ಸೂಳೆಲೆನ್ ನಲಿಪಾವಿ ಕೋಮರ
ಏರೆನೆದುರುಡು ಲಡಯಿಗುಂತುದ
ವೀರ ಕರ್ಣೆನೆ ಯಾನ್ ಕೂರ್ಲಯ ಕಾರ್ ಪೀಂಕಣ್ಗ್ ||
ಕಾರ್ ನಿನ್ನವೆ ತರೆಕ್ ದೀತೆನೆ
ಆನಿ ಕೌರವೆ ಆಯೆ ತಿಂದ್ನ
ಬಾಯಿದುಬ್ಬುಡೆಗೀಯೆ ಕೈ ನೀರೊಂದು ಬದ್ಕಲಯ ||

19

ಪನ್ನುನೆನ್ ಕೇನೊಂದು ಕರ್ಣೆನೆ
ಸಗ್ಗಿಡಾಯುದೊ ಪತ್ತೆದುಂತುದು
ಮಿತ್ತ ಮಿತ್ತೆಗ್ ಬಾಣೊ ರಾಪಯೆ ಕಚರ ಸೈನ್ಯೊಲೆಗ್
ಬತ್ತಿ ಬಾಣೊಲೆ ತುಂಡು ಮಲ್ತದ್
ಚಿತ್ರಸೇನೆನೆ ಮೋಹನಾಸ್ತ್ರೊನು
ಬುಡ್ಡು ತೂನಗ ಕಳಟ್ ಬೂರ್ಯೆರ್ ಮಾತ ಪರಿವಾರೊ ||

20

ಬಾವೆರೆಗ್ ನೀರಾಟೊ ಗೊಬ್ಬುದು
ಬಾರಿ ಸಂತೊಸು ಮನಸ್‌ಗಾಯ್ಚಿಟ್
ಸಾಂತಿದಾ ಸುಕೊ ನಿದ್ರೆ ಪಂಡ್‌ದ್ ದ್ರುಪದ ಮಗಲವುಲು ||
ತೆಲಿಪುನಗ ಧರ್ಮಜಗ್ ಬೇಜರೊ
ಮನಸ್‌ಡಾಯಿನ ತೆರಿಡ್ ದ್ರೌಪದಿ
ತರೆನಡಿಕ್ ಪಾಡೊಂದು ಕುಲ್ಯಲ್ ಆತ್ಮೊ ಸಂತೊಸುಡು

21

ಸರ್ದ ಬಾಣೊನು ಬುಡುದು ಕೇಚರೆ
ದುಸ್ಪ ಕೌರವನೈಟ್ ಬಿಗಿತ್‌ದ್
ಒಯ್ ಕುಲ್ಲಯೆ ತನ್ನ ತೇರ್‌ದ ಉಲಯಿಡಾಪಗನೆ ||
ಬತ್ತಿ ಪೋಣ್ಣಲು ಬಾನುಮತಿಡನೆ
ಪನ್ನಗಾಲೆ ಪಾರ್ ಬತ್ತದ್
ಅಲ್ಲ ತೂಯಲ್ ತನ್ನ ಸ್ವಾಮಿನ್ ಕಚರ ತೇರುಲ್ಲಯಿ ||

|| ಕೌರವನ್ ಅರ್ಜುನೆ ಬುಡ್ಡಾಯೆ ||

ಚಿತ್ರ ಸೇನೆನೆ ತನ್ನ ತೇರ್‌ಡ್
ಕುಲ್ಲಯೆನೆ ಕೈ ಕಾರ್ ಕಟ್ಟದ್
ದುಸ್ಪ ಕೌರವನಪಗ ತೇರ್‌ನ್ ಮಿತ್ತೆರಾಪಾಯೆ ||
ಪೋಣ್ಣಗುಳು ಮಾತೆರ್ಲ ಬುಲ್ತೆರ್
ಬೊಬ್ಬೆ ಪಾಡ್‌ದ್ ತರೆಕ್ ಹಾಕೊಂ-
ದಲ್ಲ ಪನ್ನುನೆ ಏರೆಡೆಂದ್‌ದ್ ತೆರಿಜಿಯಾಕ್‌ಲೆಗ್ ||

1

ಬಾನುಮತಿ ಬುಲ್ತೊಂದು ಧರ್ಮಜ
ಕಾರ್‌ಗಡ್ಡೊನೆ ಬೂರ್ಡು ಪಂಡಲ್
ಬಾವೆರೇ ಈರೆನ್ನ ಕರ್ಮಣೆನೊರಿಪಿ ಪಂಡೊಂದು ||
ಬೇಜರೊಡು ಧರ್ಮಣೆನೆ ಲೆತ್ತದ್
ಬೀಮನಾಡೆಗ್ ಪಂಡೆ ಬುಡ್ಡಲ
ಆ ಸುಯೋದನನಿತ್ತೆ ನಮ್ಮವೆ ಕಾಸ ಮೆಗಿಯತ್ತೊ ||

2

ಕಾಸ ಮೆಗಿಯಗ್ ದ್ರೌಪದಿನವೇ
ಸೀರೆದಾಸೆನೆ ಆನಿ ಆತ್‌ಜೊ
ಈಯೆ ದಾಯೆಗ್ ಇಂಚ ಪನ್ನುನೆ ಪನ್ನಗಾಪಗನೆ ||
ಬಾರಿ ದುಂಬುದೆ ವಂಸೊ ಕುರುನವೆ
ಆ ಪುರೂರವೆ ನವುಸ ಬರತೆರ್
ಆಳದೇಶಲ ಕೀರ್ತಿ ಪಡೆಯಿನ ಕುಟುಮೊ ನಮ್ಮವುಯೆ ||

3

ಕೌರವನ್ ಇನಿ ಚಿತ್ರ ಸೇನೆನೆ
ತೇರ್‌ಡೊಯ್‌ದ್ ಕೊಂಡು ಪೋಯೆಡ
ನಾಲಿಸತ್ತೊಯೆ ನಮ್ಮ ಕುಟುಮೊಗು ನಿಕ್ಕೈ ತೆರಿಯಂದೊ ||
ಈಯೆ ಪಂಡಡ ಯಾನ್ ಕೇನಯೆ
ಆಯೆ ನಾಯಿಗ್ ಸಮೊನೆ ಎನ್ನಡ
ಕೋಮೊ ಮಲ್ಲುಡ ಮಲ್ಲು ಪಂಡ್‌ದ್ ಪೋಯೆನಾಪೆಕ್‌ಗ್ ||

4

ಪಾರ್ತ ಬಲಮಗ ಚಂದ್ರ ವಂಸೊದ
ಕೀರ್ತಿನೊರಿಪೆರೆಗಾದ್ ಕೌರವ-
ನೀಯೆ ಬುಡ್ಡಲ ಎನ್ನ ಮೆಗಿಯನ್ ಹಸ್ತಿನಾವತಿದ ||
ರಾಜ ರಾಜೆರೆ ತೇಜಿದಾಯನ್
ಬಾನುಮತಿನಾ ಕುಂಕುಮೊನು ಇನಿ
ಈಯೆ ಒರಿಪುನ ವೀರೆ ಪನ್ನಗ ಆ ಧನಂಜಯೆನೆ ||

5

ಅಣ್ಣ ನಿನ್ನವೆ ಆಜ್ಞೆ ಎಂಕೇ
ಪುಣೊದಾ ಪುರ್ಸಾದೊ ಪಂಡ್‌ದ್
ದಿನ್ನೊದಾ ಗಾಂಡಿವೊನು ಕುರ್ಕದ್ ಪೋಯೆನಬ್ಬರೊಡು ||
ಎಚ್ಚರಿಗೆ ಆಯ್ಕೆಲ್ ಪುಡೆರ್‌ದ್
ಲಕ್ಕದರ್ಜುನ ಪಿರವುಡೆನೆ ಸರಿ
ನುರ್ಕಿಯೆರ್ ಗಂದರ್ವನಕಾಲೆನ ಎದುರು ಕಾದಿಯೆರೆ ||

6

ಓಡೆ ಪೋಪಯ ಉಂತು ಉಂತುಲ
ತೇರ್‌ನೇ ಪೊಡಿ ಮಲ್ಪೆ ಪಂಡ್‌ದ್
ಪಾರ್ತೆ ಬಾಣೊನು ಬುಡುದು ತೇರ್‌ನ್ ಪಿರವು ಒಯ್ಪುನಗ ||
ಖೇಚರೆನೆ ಜತ್ತೊಂದು ಪಾರ್ತಗ್
ಬಾಣೊರಾಪಯೆ ಅಪಗಲರ್ಜುನೆ
ಬಾರಿ ಬಿರ್ಸದ ಪಗರಿಡಾಕಿಯೆ ಕಚರನಾ ಕಡೆಕ್ ||

7

ನರನ ಬಾಣೊಗು ಸಗ್ಗಿ ಎಂಚಿನ
ಬರೊಟು ಒಂಚೇ ಬಾಣೊ ಬುಡ್ಡೆಟ್
ಗೆಣೆಪಿಯೆರೆ ತೀರಂದಿ ನಮುನೆಡ್ ಆಂಡ್ ಬಾಣೊಲೆನ ||
ಪರಿತೆದೆಗ್ಗೆಲು ಚಿತ್ರ ಸೇನನ
ಕಡೆತ ವೀರೆರೆ ತಿಗಲೆಗಾಕಿಯೊ
ಮತಿಯೆ ತತ್ತದ್ ಬೂರೈರೇತ್‌ಲ ಕಚರ ಸೈನಿಕೆರ್ ||

8

ಎಡ್ಡೆ ಪಾತೆರೊಡಿತ್ತೆ ಬುಡ್ಡಯ
ಕಟ್ಟೊದೊಯ್ಪುನ ಕೌರವನ್ ಈ
ಇದ್ದಿಡನೆ ಪೊತ್ತಾವೆನೇ ಗಂದರ್ವ ಲೋಕೊನಿ ||
ನಿನ್ನ ಅಮ್ಮನೆ ಇಂದ್ರೆ ಅತ್ತೊಯ
ಪೊತ್ತಯಡ ಈ ಎಂಕ್ಲೆ ಲೋಕೊನು
ಪುಟ್ಟಿಯಿನವೇ ಅಮ್ಮಗೆದುರುಂತುವನ ಪನ್ ಪಾರ್ತ ||

9

ನಾಟ್ಯೊದಾಯನ ಗೊಬ್ಬುದಾ ನುಡಿ
ಪಾತೆರಡಯ ದಲಾಲಿ ಸೂಳೆಲೆ

ಕೌರವೇಸ್ವರನಿತ್ತೆ ಬುಡುಜಡ ನಿನ್ನ ಕರೊಯ್ವೆ ||
ಜೂಜಿ ಗೊಬ್ಬುದು ನಿಕ್‌ಲೆ ರಾಜ್ಯೊನು
ಸ್ವಾದಿನೊನು ಮಲ್ತೊಂದು ನಿಕ್‌ಲೆನ್
ಕಾಡ್‌ಗೇ ಗಿಡರ್ನಾಯನೀಯೆ ದಾಯೆ ಬುಡ್ಡವುನೆ ||

10

ನಿಕ್ಕ ಮರೊಯ ಕಾಡ್ ತಿರ್ಗದ್
ಪಿತ್ತೊ ನೆತ್ತಿಗ್ ಏರ್‌ದ್ ಇಂಚಿನ
ಬುದ್ಧಿ ಹೀನೆನೆ ಆದ್ ಮಲ್ಪುನ ಕೆಲಸೊನೀ ಪಾರ್ತ ||
ಬುಡ್ಡುಜನ ಪಂಡೊಂದುಲರ್ಜುನೆ
ಅಗ್ನಿಯೆಸ್ತೊನು ಬುಡುದು ತೇರ್‌ನ್
ಪೊತ್ತದಾದ್‌ಲ ಕೌರವೇಸ್ವರನಾಯೆ ಬುಡ್ಡಾಯೆ ||

11

ತೇರ್‌ಡ್‌ದ್ ಜತ್ತೊಂದು ಕೌರವೆ
ನಾಚಿಗಡ್ ತರೆನಡಿಕ್ ಪಾಡ್‌ದ್
ಪಾರ್ತನೆದುರುಂತ್‌ನಗ ಪನ್ನೆನೆ ಕಚರೆ ಕೈ ಮುಗಿದ್ ||
ಯಾನ್ ಸೋಲೆನೆ ನಮೊನೆ ಮೂವೆರ್
ಪೋಯಿ ಧರ್ಮಜನಾಡೆ ಪಂಡ್‌ದ್
ಸೀದ ಬತ್ತದ್ ಚಿತ್ರ ಸೇನೆನೆ ಪನ್ನೆ ಧರ್ಮಜಡ ||

12

ನಿನ್ನ ಮೆಗಿಯರ್ಜುನೆನೆ ಎನ್ನನ್
ಯುದ್ಧೊಡೇ ಸೋಲ್ಪಯೆನೆ ಕೌರವ-
ನಿತ್ತೆ ಬುಡಿಯೆನೆ ಗೆತೊನು ನಿನ್ನವೆ ವಸೊಕು ಮಹರಾಯ ||
ಪನ್ನೆಗಾಯನ ಬೆರಿನ್ ಬೊಟ್ಟುದು
ಮಿತ್ತ ಲೋಕೊಗು ಪೋಲ ಪಂಡ್‌ದ್
ಅಲ್ಪ ಪ್ರೀತಿಡ್ ಕಡಪುಡಿಯೆನಾ ಧರ್ಮನಂದನೆನೆ ||

13

ನಾಗ ಕಟ್ಟಡ್ ಕೌರವೇಸ್ವರೆ
ತೀರ ಕಂಗಾಲಾದ್ ಉಂತ್‌ನ
ತೂದುಲರ್ಕಟ್ ಬಿಚ್ಚಯೆರೆಗೇ ಧರ್ಮನಂದನೆನೆ ||
ಏಶಲಾ ಪುಣೆವೊಂದು ಲೆತ್ತೆನೆ
ಮಾತೆರೆನ್ ಆಡೆಗಲ ಖೇಚರೆ
ಸಾದನೆಡ್ ಕೌರವನ್ ಕಟ್ಟನ ಕಟ್ಟಿ ಗಿಚ್ಚಯೆರೆ ||

14

ಏರೆಗಲ ತೀರಂದೆ ಉಪ್ಪುನ
ಗಾಪಗನೆ ದ್ರೌಪದಿಯೆ ಬತ್ತದ್
ಬಾವೆರೆನ್ ಕಟ್ಟಯೆನೊ ಕೇಚರೆ ಕೆರೊಡು ಆಯನ್‌ಲ ||
ಪಾಂಡವೆರ್ ತೀರಂದ್‌ನಾಕ್‌ಲ್

ಏರ್ ಉಲ್ಲೆರೊ ಪನ್ದಲರ್ಕಟ್
ಚಾರನಗ ಗಂದರ್ವ ಕಟ್ಲೆಲ ಗಿರಿದ್‌ಲಾಂಡಪಗ ||

15

ಮೆಗಿಯ ದುಕ್ಕೊನು ಬುಡುದು ಪೋಲಯ
ಅರಮನೆಗ್ ಈ ನಿಕ್ಕು ಬತ್ತನ
ಅಪಸಕುನೊ ನಿಕ್ಕೊರ್ಯಗತ್ತಯ ನಂಕ್ ಮಾತೆರೆಗ್ ||
ನಮನ ಕುಟುಮೊಡು ಬೇದೊ ಎಂಚಿನ
ನೆನೆಪು ದೀವೊನು ಪನ್ದ ಧರ್ಮಚೆ
ಕುರುಪತಿನ ಸಮದಾನೊ ಮಲ್ಪನಗಾಡೆ ಬಾನುಮತಿ ||

16

ಪಾರ್ ಬತ್ತದ್ ಕಾರ್ ಪತ್ಯಲ್
ಬಾವೆರೀರೆ ಎನ್ನ ಕರ್ಣಿ
ತಾಲನೆನ್ ಉಂತಯೆರ್ ಪಂಡದ್ ಬುಲ್ತಲಾಪಗನೆ ||
ಯಾನ್ ಎನ್ನವೆ ಮೆಗ್ಯ ರಚ್ಚಣೆ
ಪಾರ್ತಡನೆ ಮಲ್ಪಯಿನ ಸಂಗತಿ
ಬಾರಿಮಲ್ಲವೆ ಅತ್ತ ಮಲ್ತನೆ ಎನ್ನ ಕರ್ತವ್ಯೊ ||

17

ಧರ್ಮನಂದನೆ ಬಾನುಮತಿಡನೆ
ಪನ್ನಗನೆ ಆ ಸಾಧ್ವಿ ಈಪೆಕ್
ತಿರ್ಗದುಂತುದು ತನ್ನ ಸ್ವಾಮಿಡ ಪನ್ನಲಾಪಗನೆ ||
ಈರೆನಾ ಸಿದ್ಧಮ್ಮ ಬಾಲ್ತೆನ್
ಕಾಡ್‌ಡದ್ ಲೆಪುಡಾದ್ ಅಕ್‌ಲೆನ
ರಾಜ್ಯೋನೇ ಬುಡುಕೊಲ್ಲೆ ಎಡ್ಡೆಡ್ ಹಟೊನು ಮಲ್ಪಡೆಯೆ ||

18

ನನಗ್ ಪದಿಮೂಜೊಸೊರ್ ಕರಿನಗ
ಅಕ್‌ಲೆ ಬತ್ತದ್ ನಮನ್ ಸೋಲ್ಪದ್
ಗೆತೊನುನೆಕ್ ದುಂಬೊತ್ತ ಕೊರ್ಕರಾಂಡ ಮಾತೆರಾಲ ||
ಪುಗರುವೆರ್ ಈರೆನ್‌ಲ ಕುಟುಮೊಡು
ಪಗೆನ್ ಕಟ್ಟುನ ಸಮೊನೊ ಗ್ರೇಯ್ಪಲೆ
ನಮನ್ ಬುಡಯೆರ್ ಅಕ್‌ಲ್ ಮರ್ದದಿ ಪೋಪಿ ಸಂಗತಿಡ್ ||

19

ಈತ್ ಪನ್ನಗ ಅಡಿಕ್ ತೂದೇ
ದಾಲ ಮನಿತ್‌ಚಿನಪಗ ಬತ್ತೆರ್
ಆಯನಾ ಕಡತಕ್‌ಲ್ ಸೌಬಲೆ ಕರ್ಣೆ ಮೆಗಿಯಲ್ಲು ||
ಪೋಯಿ ನಮೊ ಪಂಡೊಂದು ಪಿದಡದ್
ರಾಜದಾನಿಗ್ ಎತ್ತಿಸಾತ್‌ಗ್
ಮಾತೆರೆನ್ ಕಡಪುಡುದು ಕೌರವೆ ಗಂಗದವುಲುಂತ್ಯೆ ||

|| ಕೌರವೆ ಜೂವೊದತ್ತೊನಿಯೆರೆ ಉಪಾಸೊ ಮಲ್ತೆ ||

ರಾಯ ಕೌರವೆ ಚಿತ್ರ ಸೇನಡ
ಸೋಲ್ಪನಗ ಅರ್ದುನೆನೆ ಬುಡ್ಡದ್
ಜೂವೊ ಕಾತ್‌ನಟಾಯೆ ತನ್ನವೆ ಮಾನೊ ಪೋಂಡುಂದು ||
ದಾಯೆ ಬದ್ಕನೆ ಪನ್ದ ಸಯ್ಯೆರೆ
ಗಾದ್ ಗಂಗದ ಬರಿಟ್ ತಟ್ಪನ್
ಬಾರಿ ಸುದೊಡು ಅಂಬಿಯಡಿಪದ್ ಪೊರ್ಪು ಮಲ್ಪಾಯೆ |

1

ಸುತ್ತಲಾ ಕರ್ಬೊದವೆ ತಗಡದ್
ಗಟ್ಟಿ ಮದೆಪುನು ಮಲ್ಪದುಲಯಿಡ್
ದರ್ದೆ ಪದರ್‌ದ್ ಜೆಪ್ಪುನಾಸಿಗೆ ಸರಿಟ್ ಮಲ್ಪಾದ್ ||
ಸುದೊ ನೀರ್‌ಡ್ ಮೀದ್ ಏರಾಲ
ಪೊಗ್ಗೆರೆಗ್ ಬತ್ತೆರಡ ಬುಡಿಯೆರೆ
ಬಲ್ಲಿ ಪಂಡದ್ ಜೆತ್ತೆ ಪ್ರಣವೊದ ಮಂತ್ರೊ ಪಂಡೊಂದು ||

2

ಬಾನುಮತಿ ಈ ಸುದ್ದಿ ಕೇಂಡದ್
ಪಾರ್ ಬತ್ತಲ್ ಉಲಯಿ ಪೊಗ್ಗೆರೆ
ಚಾಕಿರಿದ ಜನೊ ಬಲ್ಲಿ ಪನ್ನಗ ಕಣ್ಣೆ ಮಗ್ತರ್‌ದ್ ||
ಸೀದ ನುರ್ಕುದು ಉಲಯಿ ಬತ್ತದ್
ಪಾಸೊಡೇ ಜೆತ್ತೊಂದು ತನ್ನವೆ
ಸ್ವಾಮಿ ಇತ್ತನ ತೂದು ಪಂಡಲ್ ಕೌರವೇಸ್ವರಡ ||

3

ಈತ್ ಕಸ್ತೊಡು ದಾಯೆ ಸಯ್ಯರ್
ಯಾನ್ ಕೊಂಡುಪೆ ಇಸೊನು ಐನೇ
ಈರ್ ಪರ್ಲೆಯೆ ಸುಕೊಟು ಸಯ್ಯೆರೆ ಇಂಚ ದಾಯೆಗ್‌ಯೆ ||
ಪಾಸೊ ಪತ್ತದ್ ನರಕ್ ನರಕ್‌ದ್
ಏರಾಲ ಸಯ್ಯೆರಡ ಅಕ್‌ಲೆಗ್
ಮೇಲ್ ಲೋಕೊಡು ಸ್ತಾನೊ ತಿಕ್ಕುವೊ ಪನ್ನಗಾಪಗನೆ ||

4

ಚಿತ್ರ ಸೇನೆನೆ ಕೊಂಡು ಪೋನಗ
ಬುಡ್ಡಯಿನೆ ಆ ಪಾರ್ತೆ ಕಟ್ಪನ್
ಅರ್ದಣ್‌ನ್ ಬಿಚ್ಚಯಿನೆ ದ್ರೌಪದಿ ಈಯೆ ತೂತ್‌ಜನ ||
ಅಕ್‌ಲೆ ಹಂಗದ ಸೈರೊ ದಾಯೆಗ್
ಇಸೊನು ಪರ್ದೆಡ ನರಕೊ ತಿಕ್ಕುನೆ
ಅಯಿನ್ ತಪ್ಪಯೆರೆನ್ ಇಂಚನೆ ಸೈಪುನೆಡ್ಡೆತ್ತೊ ||

5

ಈತ್ ಪಂಡೊಂದುಪ್ಪುನಗನೇ
ದೇವಿಗಾಂದಾರಿಗ್ಲ ಮಗನವೆ
ಪಾಸೊದಾ ನಿಜೊ ಸುದ್ದಿ ಕೇಂಡ್‌ದ್ ಬತ್ತಲಾಡೆಗೆನೆ ||
ದಾಯೆ ಮಗ ಈ ಪಾಸೊ ಪತ್ತ್‌ದ್
ಜೂವೊ ದೆತ್ತೊನಿಯೆರೆನೆ ಕಾರಣೊ
ದಾದ ಪನ್ನಗ ಅಪ್ಪೆ ಮೋನೆನ್ ತೂದು ಪಂಡೊನುವೆ ||

6

ಅಪ್ಪೆ ಎನ್ನನ್ ಪಾಂಡವೆರ್ ಇನಿ
ಬದ್ಧಯಿನೆ ದ್ರೌಪದಿನ ಬೀಮನ
ಅಟ್ಟಸ್‌ದ ಪಾತೆರೊನು ಕೇಂಡ್‌ದ್ ದಾಯೆ ಬದುಕುನೆನೊ ||
ಪುಟ್ಟ್‌ನಯೆ ಸಯ್ಯೆರೆಗ್ ಉಂಡೊರೊ
ಇತ್ತೆನೇ ಸೈಪ್ಪೆಂದ್ ಪಿದಡ್‌ದೆ
ಉಲ್ಲೆರೀರೆಗ್ ನೂದು ಜೋಕುಲು ಯಾನ್ ಸೈತ್ತೆಡಲ ||

7

ಆತ್ ಪೊರ್ತುಗು ಕುರುಡ ರಾಜೆನೆ
ಎರೆನವೊ ಆದರೊಡು ಬತ್ತೆನೆ
ದಾನೆ ಮಗ ಈ ಸೈಪ್ಪಿ ಕಾರ್ಯೊನು ದಾಯೆ ಮಲ್ಪುನೆಯೆ ||
ಯಾನ್ ಏರ್ನವೊ ಹಂಗ್‌ಡಿತ್ತೆನೆ
ಜೂವೊಡುಪ್ಪುನೆ ಇಂಚಿ ಸೈರೊನು
ದಾಯೆ ಸಾಂಕುನೆ ಕೇನಿ ಅಮ್ಮೆರೆ ಈರೆನದಿಕಾರೊ ||

8

ವೀರ ದುಸ್ವಾಸಗ್ಲ ಕೊರ್ದೇ
ಬಾರಿ ಸುಕೊ ಸೌಕರ್ಯೊಡುಪ್ಪುಲೆ
ಈತ್ ಪನ್ನಗ ಸಕುನಿ ಕರ್ಣೆಲ ಜಯದ್ರತಾದಿಗುಳು ||
ಪಾರ್ ಬತ್ತದ್ ಪಂಡೆರಾಕ್‌ಲ್
ರಾಯೆ ಕೌರವ ಕೊರ್ಲ ಅಪ್ಪಣೆ
ಮೇಲ್ ಲೋಕೊದ ಚಿತ್ರ ಸೇನೆನ್ ನಿನ್ನ ಕಾರ್ಡೆ ||

9

ಕಟ್ಟಿದೀಡೆಗ್ ಕನತ್‌ದಾಯನ
ಪೋಣ್ಣಲೆನ ತರೆ ಕುಜಲ್ ಗೀಸದ್
ನಿನ್ನ ಬುಡೆದಿನ ಚಾಕ್ರಿಗುಂತವೊ ಪೋಯಿ ಅರಮನೆಗ್ ||
ಮುಕುಲೆ ಪಾತೆರೊಗಾಯೆ ಉತ್ತರೊ
ಕೊರುಜೆನಾಪೆಕ್ ಮಗ್‌ರ್ ಜೆತ್ತದ್
ಪ್ರಣವ ಮಂತ್ರೊನು ಜೋರ್ದು ಪನ್ನಗ ಅಕ್‌ಲ್ ಜಾರಿಯೆರ್ ||

10

ದ್ರೋಣ ಬೀಸ್ಮೆರ್ ಸುದ್ದಿ ಕೇಂಡ್‌ದ್
ಪಾರ್ ಬತ್ತೆರ್ ವಿದುರನೊಟ್ಟಿಗೆ
ಏತ್‌ಲಾ ಲೆಪ್ಪುನಗ ಮನಿತ್‌ಜೆ ಬಾರಿ ಚಲಗಾರೆ ||
ಸಾಣೆತರೆಕ್‌ಲ ತನ್ನ ಚಲೊಕುಲ
ಓಲುಲಾ ಮರ್ದಿದ್ ಪಂಡ್‌ದ್
ಮೂವೆರ್‌ಲ ಅಲ್ಪಡ್‌ದ್ ಪೋಯೆರ್ ವಿದಿನ್ ನೆನೆತೊಂದು ||

11

ಇರ್ಲ್ ಮಾತೆರ್ ನಿದೆರ್‌ದುಪ್ಪುನ
ಪೊರುಡೇ ಸಮ ಸಪ್ತಕೆರಾಲಾ
ಬತ್ತದಾಯನ್ ಮಾಯಕೊಡು ತಿರ್‌ತ್ ಪಾತಳೊಕು ||
ಒಯ್ತ್ ಕೊಂಡೊದು ಪಂಡೆರಾಯಡ
ನಿನ್ನ ಬೆಗರ್‌ಗ್ ಎಂಕ್ಲೆ ನೆತ್ತೆರ್
ಜಪ್ಪದೇ ಪಾಂಡವೆರೆ ಕರ್ಲ್‌ನ್ ಒಯ್ತ್ ತಿನುವೊಂದು ||

12

ಏಳ್ ಜನೊ ರಕ್ಕಸೆರ್ ಆಜೊನು
ಪಾಡ್ ಪನ್ನಗ ದುಸ್ವ ಕೌರವ -
ಗಾಸೆದಾ ಕೊಡಿ ತೆಗ್‌ಲ್‌ದಾನಗ ನಂಬ್ಯನಾಕ್‌ಲೆನ್ ||
ಆಂಡ್ ಪಂಡ್‌ದ್ ಲೆತೊನುದಕ್‌ಲೆನ್
ರಾಯೆನರಮನೆಗೆತ್ತದಾನಗ
ಮೂಡಯಿಡ್ ಬೊಲ್ಪಾಂಡ್ ಚಿಲಿಪಿಲಿ ಕೇನ್ಡ್ ಪಕ್ಕಿಲೆನ ||

13

ಅರಸು ಬತ್ತನ ಸುದ್ದಿ ಅರಮನೆ -
ಡೊರುಮೆ ತೆರಿನಗ ಬಾನುಮತಿಗ್ಲ
ಪರಮ ಸಂತೋಸಾಂಡ್ ಅಪ್ಪೆಗ್ ಬುಕ್ಕೊ ಅಮ್ಮಗ್ಲ ||
ಮೆಗಿಯನಕ್‌ಲೆಗ್ ಕರ್ಣ ಸಕುನಿಗ್
ಮೆಗಿದಿ ಕಂಡನಿ ಸೈಂದವಗ್‌ಲಾ
ವಿದುರ ಬೀಸ್ಮೆರೆ ಮನಸ್ ಗೆಲೆನೊ ಆಂಡ್ ಮಾತೆರೆಗ್ ||

14

ರಾಯೆ ಕುರುಪತಿ ರಾಜ ಚಾವಡಿ -
ಡಾಯೆ ಕುಲ್ಲುದು ಗುರುನು ಕೃಪೆರೆನ್
ಬೀಸ್ಮೆ ದ್ರೋಣೆರೆನಾಡೆ ಲೆಪುಡಯೆ ಮಂತ್ರಿ ಪರಿವಾರೊ ||
ಏಳ್ವೆರಿದಾನವೆರ್ ಎಂಕೇ
ಜೂವೊ ಕೊರ್ಪುನ ಪ್ರೀತಿದಾಕ್‌ಲ್
ತೂಲೆ ಪಂಡ್‌ದ್ ಅಕ್‌ಲೆನಪಗನೆ ಬಾರಿ ಸಮ್ಮನಿತೆ ||

|| ಜಯದ್ರತನ ಮಾನಬಂಗೊ ||

ಪಾಂಡವೆರೆ ಬನವಾಸೊದವದಿಯೆ
ಪೂರ್ತಿಯಾಯೆರೆ ಮೂಜಿ ತಿಂಗೊಳು
ಬಾಕಿ ಉಂಡುಂದಕ್ಲ್ ಲೆಕ್ಕೊನು ಮಲ್ತದಿತ್ತೊಂದು ||
ಕಾಡ್ಡಿತ್ತೆರ್ ಮುನಿಕುಲೆನ ಸಹ -
ವಾಸೊಡಾಕ್ಲ್ ಅಪಗ ಬೋಂಟೆಗ್
ಪೋದು ಕಾಡ್ ದುಸ್ವ ಮುಗೊಲೆ ಕೆರೊಡು ಪಂಡೊಂದು ||

1

ಮುನಿಕುಲೆನ್ ಆಸ್ರಮೊಡು ಇತ್ತನ
ಬುಡದಿ ದ್ರಾಪದಿನಕ್ಲ್ ಕಾಪೊಡು
ಪನ್ ಪಿ ಪ್ರಾರ್ತನೆ ಮಲ್ತದಕ್ಲೆನ್ ಕಾರ್ ಪತ್ತಿಯೆರ್ ||
ಅಪಗ ಪಿದಡ್ಡ್ ಕಣ್ಣಾಗಂಜಿನ
ಕರಡಿ ಪಿಲಿ ಸಾರ್ದೂಲೊ ಮಾಶೆನ್
ಕೆರ್ಕೆರ್ದ್ ದುಂಬೊತ್ಯೆರಾಕ್ಲ್ ದೂರೊ ಕಾಡ್ಡಾಡೆ ||

2

ದುಸ್ಯಲೆನ ಕಂಡನಿಯೆ ಸೈಂದವೆ
ಪನ್ನುನಾಯೆನೆ ಸಿಂದು ದೇಸೊದ
ಚಕ್ರವರ್ತಿಯೆ ಮಹ ಪಟಿಂಗೆನೆ ಬಾವೆ ಕೌರವಗ್ ||
ಚಿತ್ರಸೇನಡ ಆಯ್ನ ಸೋಲನು
ದೆಪ್ಪಿಯೆರೆ ಪಾಂಡವೆರೆ ಗರ್ವೊನು
ರಟ್ಟಿಯೆರೆ ಪಿದಡಿಯೆನೆ ಸೇನೆನ್ ದಿಂಜ ಕೂಡ್ನಾಡ್ ||

3

ನಾಲ್ ರಂಗೊದ ಸೇನೆದಾಕ್ಲ್
ಸೇರ್ದೆತ್ಯೆರ್ ಕಾಮ್ಯಕೊಗುಲಾ
ಪಾಂಡವೆರೆನಾಸ್ರಮೊದ ಎದುರುಡೆ ಬುಡರೊಡುಂತಿಯೆರ್ ||
ಆ ಪಟಿಂಗ್ ಪೋಪಿಕಾಲೊದ
ಆಸೆ ಪುಟ್ಟನೆ ದ್ರೋಪದಿನವೇ
ಬಾರಿ ರತ್ನೊದ ಮಾಲೆ ಪದ್ವೊಯಿ ಸೀರೆ ರವಕೆಲೆನ್ ||

4

ಅಗರ್ ಚಂದನೊ ಗಂದೊ ಕಸ್ತೂರಿ
ಪರಿಮಲೊದ ದ್ರವ್ಯೊಲೆನ್ ಚಾಕಿರಿ
ದಕ್ಲೆಡನೆ ದ್ರಾಪದಿಗ್ ಕೊರ್ದುಲ ನಿಕ್ಲ್ ಪನೊಡುಂದು ||
ಅರಸುಲೆಗ್ ಗುಟ್ಟುದವೆ ಜಾಗಡ್
ತಿಕೊಡು ಪಂಡ್ಡ್ ಪನ್ನೆ ನಿಕ್ಲೆಗ್
ಕೊರುವೆ ಬೋಡಯಿನಾತ್ ಸಂಬಳೊ ಪೋಲೆ ಆಡೆಗನೆ ||

5

ಕೆಲಸೊದಾಕ್ಲ್ ಪುದೆನ್ ಕನತ್ದ್
ಎದುರುಡಾಸ್ರಮೊದುಲಯಿ ದೀಡ್ಡ್
ದುಪದ ಮಗಲೆನ ಕಾರ್ಗಡ್ಡೊನೆ ಬೂರು ತೋಜಯೆರ್ ||
ಕನತಿ ಪುದೆನಾಪಗನೆ ಅರಸುಲು
ಕಡಪುಡುದೇರೀ ಕಾಣೆಗೆನ್ ಈ
ರೆಗ್ಲ ಪಂಡ್ಡ್ ದೇವಿ ದ್ರಾಪದಿ ಮೋನೆ ತೂನಗನೆ ||

6

ಎನ್ನ ಕಂಡನಿನಕ್ಲೆ ಎದುರುಡೆ
ಅನ್ಯೆರೆನ ಕಾಣೆಗೆನ್ ಗೆತೊನುವೆ
ಇತ್ತೆ ಮೂಲಕಲಿದ್ಯೆರತ್ತೊ ಯಾನ್ ಮುಟ್ಟಯೆನೆ ||
ಅಮ್ಮ ಈರೆಗ್ ಸೈಂದವೇರೆನ
ಮಲ್ಲತಿಗೆ ಗೊಂತಿದ್ಯೊ ಆರೇ
ಪನ್ನೆರೆಂಕ್ಲೆಡ ಈರ್ ಗುಟ್ಟುಡು ತಿಕ್ಕೊಡಾರೆಗ್ಗೆ ||

7

ದತ್ತ ಕಾರ್ಡ್ ಪುದೆನ್ ರಟ್ಟದ್
ಗೆಬ್ಬುಗತ್ತವೆ ಪನ್ದ ಕೈನೇ
ದೆರ್ಪನಗ ಪಾರಿಯೆರ್ ಅರಸುಡ ದೂರು ಪನಿಯೆರೆಗ್ ||
ಆಳು ಹೋದರೆ ಹಾಳು ಪನ್ನುನ
ಗಾದೆ ಕನ್ನಡೊಡುಂಡು ಪಂಡ್ಡ್
ತಾನೆ ಪಿದಡಿಯೆ ಮಾಲೆ ಪದ್ವೊಯಿ ದಿಂಜ ದೀವೊಂದು ||

8

ಗಮಗಮಾಯ್ನನ ಕಮ್ಮೆನೊಗು ಸರಿ
ಸರಿರೊಗೊರೆಲ ಗಂದೊ ಕಸ್ತೂರಿ
ಪುನುಗು ಪೂಜಿದ್ ಗತ್ತ ದೈತ್ತೊಡು ಪೊಗೈನಾಸ್ರಮೊಗು
ಎನನ್ ತೂಲಯ ಏರ್ ಪಂಡ್ಡ್
ಬಯೊಟು ದರಿಪುನೆದಾಯೆ ದ್ರಾಪದಿ
ಅರಸು ಜಯದ್ರತೆ ಯಾನ್ ಕುರುಪತಿ ಬಾವೆ ತೆರಿಯೊನುಲ ||

9

ನಿನ್ನ ಪೋಡಿಗಿ ಎಂಕ್ ಇದ್ದಿಯ
ಮೈತ್ತಿದಿನ ಕಂಡನಿಯೆ ಆಯ್ಕೆಟ್
ಎನ್ನ ಪಲಯೆನೆ ಪನ್ನಿ ಬಾಮೊನೆ ಎಂಕ್ ಆದುಂಡು ||
ಬತ್ತನಾಯೆನೆ ಕುಲ್ಲು ಪಂಡ್ಡ್
ಪುಲ್ಲುದಾ ಪಜೆ ಬುಡ್ಡನಗನೇ
ಒಯ್ತನಾಲೆನ ಪೊದಕೆನಾಪಗ ಉಲಯಿ ಪಾರಿಯಲ್ ||

10

ಪಾರ್ನಾಲೆನ ಜುಟ್ಟುಡೊಯ್ತದ್
ನಾಲಿನಮತ್ದ್ ಪತ್ಯೆನಾಪಗ

ಬಾರಿ ಬುಲ್ತುದು ಬೊಬ್ಬೆ ಪಾಡ್ಯಲ್ ಬೀಮ ಪಾರ್ತೆರೆನ್ ||
 ಏತ್ಲಾ ಲೆತ್ತೊಂದು ಬುಲ್ತುನ
 ಕೇಂಡ್‌ದಾ ಪಿದಯಿತ್ತಿ ರುಸಿಕುಲು
 ಪಾರ್ ಬತ್ತೆರ್ ಮಂತ್ರೊ ಜಪಿತ್‌ದ್ ನೀರ್ ರಾಪಯೆರ್ ||

11

ದುಸ್ಸ ಸೈಂದವೆ ಆಲೆನ್ಯೊತ್‌ದ್
 ತನ್ನ ಕುದುರೆದ ಸಾರಟ್‌ಡ್ ಸರಿ
 ಗಟ್ಟಿಡೇ ಕುಲ್ಲನಗ ಮುನಿಕುಲು ಬೊಬ್ಬೆ ಪಾಡಿಯೆರ್ ||
 ಸಾರಟ್‌ದ ಕುದುರೆಲೆಗ್ ಚಾಟಿಡ್
 ಹಾಕ್‌ದಾಯೆನೆ ಗಿಡರ್‌ನಾಪಗ
 ಯೋಗಿಲೆನವೇ ಮುರೊ ಕೇಂಡ್‌ದ್ ಬತ್ತಿ ಪಾಂಡವೆರ್ ||

12

ತೂನಗನೆ ಸಾರಟ್‌ನ್ ಗಿಡರುನ
 ವೀರ ಸೈಂದವಗಪಗ ಬಾಣೊನು
 ರಾಪಯೆನೆ ಕಲಿ ಪಾರ್ತೆನಾಯನ ಪರಿತೆದಸ್ತೊಗುಳು ||
 ಸಾರಟ್‌ದ ಒಟ್ಟಿಗೆನೆ ಕಳುವನ್
 ಸೀದ ಒಯೊನೆ ಪಾರ್ತೆನಾಡೆಗ್
 ಬೀಮನಾಯನ ಜುಟ್ಟು ಪತ್ತೆದ್ ಗುದ್ದು ಗುದ್ದುನಗ ||

13

ಅಣ್ಣ ಬುಡು ಬುಡು ಕೆಡ್‌ಡಾಯನ್
 ನಮ್ಮ ಪಲಯನ ಎದುರು ಉಂತಗೊ
 ಧರ್ಮನಂದನೆ ಪಂಡ್‌ನಂಚಿನೆ ಕೇನ್ಯೊ ನಮೊ ಇತ್ತೆ ||
 ರಟ್ಟಿನೊತ್‌ದ್ ಕಟ್ಟಿದಾಯನ್
 ಒಯ್ತ್ ಕನತ್‌ದ್ ಪಲಯ ಕೈತಲ್
 ಕುಲ್ಲಯೆರ್ ಕಾರ್ಡವುಲು ಇಂಬ್ಯಗ್ ಸಿಕ್ಕೆ ಎಂಚಿನವು ||

14

ಕೇನ್ನಗನೆ ಆ ಧರ್ಮ ಮೂರ್ತಿಯೆ
 ಆಯ ಮೋನೆನ್ ತೂದು ರಟ್ಟಿದ
 ಬಾರಿ ಗಟ್ಟಿದ ಅರ್ಕಟ್‌ನ್ ಸರಿ ಬಿಚ್ಚಿದುಂತಾಯೆ ||
 ನಮನ ಮೆಗಿದಿನ ಕುಂಕುಮೊನು ಇನಿ
 ನಮೊನೆ ಪೂಜುನ ಸರಿಯೊ ಪನ್ನಗ
 ಮೆಗಿಯನಕೆಲೆಗ್ ದಾಲ ಸಮದಾನಾಯ್ಲಿ ಧರ್ಮಜಡ ||

15

ಅಪಗ ಧರ್ಮಜೆ ಕೈತಲಿತ್ತೆನ
 ಮುನಿಕುಲೆನವೇ ಮೋನೆ ತೂನಗ
 ಅಕ್‌ಲ್ ಪಂಡೆರ್ ಪಾಂಡವೇರೆಡ ಸಾಸ್ತೊ ಧರ್ಮೊಲೆನ್ ||
 ಅರಸುನವೆ ಮರಾಧಿ ದೆತ್ತೊಡ

ಸಯಿತಿ ಲೆಕ್ಕೊನೆ ಆಯೆನಾಯನ್
 ಕೆರ್‌ನ ನಮುನೆನೆ ಆಂಡ್ ನಿಕ್‌ಲೇ ದೆಪ್ಪಿ ಮರಾಧಿ ||

16

ಈತ್ ಪಂಡ್‌ನ ಕೇನ್ಯೊ ಬೀಮೆನೆ
 ಆಯನಾ ತಳ್ಳಾರ್ ಕೂಟಿಯೆ
 ಬಾಯಿ ಪರಿತೆನ್ ತೂದು ಸೈಂದವ ತರೆಕ್ ನೀರೈತ್ತೆ ||
 ಗೀಸ್‌ದಾಯನ ತರೆನ್ ಪೊರ್ದು
 ಬೋಳು ಮಂಡೆನೆ ಮಲ್ಲೆ ಬೆರಿಕೇ
 ನಾಲ್ ಗುದ್ದುದು ಪಾರ್ಲ ಪಂಡೆನೆ ಪಿರವು ತೂವಂದೆ ||

17

ಪಾರ್‌ನಾಯೆನೆ ತನ್ನ ಊರುಗು
 ಪೋಪುಜಿಂದ್‌ದ್ ಕಾಡ್ ಸೇರಿಯೆ
 ಆ ಸದಾಸಿವ ತಪಸ್ ಮಲ್ತೆದ್ ವರೊನು ಪಡೆದೇನ್ ||
 ಪಾಂಡವೆರೆ ಸಂತಾನೊ ಮುತ್ತವೆ
 ಯಾನ್ ಪಗೆ ಸಂದಾವೆ ಪಂಡ್‌ದ್
 ಜಾಗೆ ನಾಡ್‌ದ್ ಕುಲೈ ತಪಸ್‌ಗ್ ದುಸ್ಸ ಯೋಚನೆಡ್ ||

18

ನುಪ್ಪು ನೀರ್‌ನ್ ಬುಡುದು ಸೈಂದವೆ
 ಮಲ್ಲಿ ತಪಸ್‌ಗ್ ಸಿವೆನೆ ಒಲಿದಾ
 ದುಸ್ಸನೆದುರುಡು ಉಂತ್ಯೆ ಬಗ್ಗೆರೆ ಬಂದು ಆಯಿನಯೆ ||
 ನಿಕ್ಕೆ ಎಂಚಿನ ಬೋಡು ಪನ್ನಗ
 ಎನ್ನ ಪಗೆಕುಲು ಪಾಂಡವೇರೆನ್
 ಕೆರುನಾ ವರೊ ಕೊರ್ದೆ ಪಂಡ್‌ದ್ ಕಾರ್ಗ್ ಬೂರೊಂಡೆ ||

19

ಪಾಸು ಪತೊ ಅರ್ದುನಡ ಉಂಡುಯ
 ಆಯನೊರ್ದುನ್ ಮಾತ್ರೊ ಬುಡುದೇ
 ಬಾಕಿದಕ್‌ಲೆನ್ ಕೆರ್ಲ ಪಂಡ್‌ದ್ ಮಾಯಕಾವೊಂಡೆ ||
 ವರೊನು ಪಡೆಯಿನ ಸಿಂದುರಾಜೆನೆ
 ಅರಮನೆಗ್‌ಲಾ ಪೋಯೆ ಪಾಂಡವ
 ನಕ್‌ಲ್ ಇತ್ತೆರ್ ಆದಿ ನಾರಾಯಣನ್ ನೆನೆತೊಂದು ||

|| ಧರ್ಮನಂದನೆ ಯಕ್ಷಗುತ್ತರೊ ಕೊರೈ ||

ಪಾಂಡವೆರ್ ಮುನಿಕುಲೆನ ಒಟ್ಟಿಗೆ
 ಬಾರಿ ಸುಕೊ ಸಂತೋಸುಡುಪ್ಪುನ
 ಗಾಪಗನೆ ಆಸ್ತಮೊಡು ಇತ್ತೆನ ಹೋಮೊಗ್ಗಿನೆಲ ||
 ಪೊತ್ತವೆರೆ ಬೊಡಾಪಿ ಕೊದಂಟಿನ್

ತುಚ್ಚೊನುಂದೇ ಪೋಂಡು ಜಿಂಕೆನೆ
ಪನ್ದ ಮುನಿಕುಲೆ ಬುಡೆದಿನಾಕ್‌ಲ್ ದೂರು ಪನ್ನಗನೆ ||

1

ಮುನಿಕುಲೊಟ್ಟುಗು ಸೇರ್ವ್ ಧರ್ಮಜ -
ಡಪಗ ಪಂಡರ್ ಅಗ್ಗಿ ಪೊತ್ತವಿ
ಮರಕೊದಂಟಿನ್ ಜಿಂಕೆ ತುಚ್ಚಿದ್ ಕೊಂಡು ಪೋಂಡತ್ತೊ ||
ಹೋಮೊ ಮಲ್ಪುನೆ ಎಂಚ ಪಂಡರ್
ಬಾರಿ ಬೇಜರೊ ಮಲ್ತೆರಾಕ್‌ಲ್
ಯಾನ್ ಜಿಂಕೆನ್ ಪತ್ತ್ ಕೊಂಡ್ರುವೆ ನಿಕ್‌ಲೆನರಣೆನ್‌ಲ ||

2

ಪನ್ದ ಸಮದಾನೊನುಲ ಮಲ್ತದ್
ಮೆಗ್ಗನಕ್‌ಲೆನ್ ಕೂಟೊನುಂದೇ
ಬಿಲ್ಲ್ ಬಾಣೊನು ಈಟಿ ಬರ್ಚಿನ್ ಪೂರ ದೆತ್ತೊಂದು ||
ಮಲ್ಲ ಕಾಡ್‌ದ ನಡುಟೆ ತಿರ್ಗ್‌ದ್
ಬಚ್ಚೆರಾಕ್‌ಲ್ ಪುದೆಲ್ ನುಕ್ಯೆರ್
ಗುಡ್ಡೆ ಮಿತ್ರರ್‌ದ್ ನಾಡ್ ನಾಡ್‌ದ್ ದೂರೊಗ್‌ತ್ತಿಯೆರ್ ||

3

ಅವುಲು ಮರಕುಲೆ ನಡುಟು ದೆಂಗ್‌ದ್
ಅರಣಿನ್‌ಲೆ ತುಚ್ಚೊಂದು ಇತ್ತನ
ಉರೆನ್ ತೂದೇ ಸುತ್ತು ಪಾಡ್‌ದ್ ಪತ್ಯೆರೈನಕ್‌ಲ್ ||
ಅಯಿತ ಬಾಯಿಡ್ ತುಚ್ಚಿದಿತ್ತನ
ಮರತ ಕೊರಡ್‌ನ್ ಒಯ್ತ ದೆತ್ತದ್
ಮುನಿಕುಲೆಗ್ ಕೊರೈಗ್ ಪಿದಡ್‌ನಗ್‌ಲೆಗಾಂಡಪಗ ||

4

ಬಾಚೆಲ್‌ಡ್ ಸರಿ ದೊಂಡೆದಾ ಪಸೆ
ಆಜಿದಾನಗ ನೀರ್ ಪದೇರ್
ಪೋಪುನೆಂದ್‌ದ್ ಮರತ ಮುದೆಲ್‌ಡ್ ಕುಲೈರಕ್‌ಲೊಟ್ಟು ||
ನೀರ್ ನಾಡ್‌ದ್ ಕನಲ ಮಗ ಈ
ತಾಮರೆದ ಇರೆಟೊಂಜಿ ಚಿಲ್ಲಿನ್
ಈಯೆ ಕಟ್ತ್‌ದ್ ಬೇಕೊ ಬಲ ನಕುಲಂದ್ ಧರ್ಮಜೆನೆ ||

5

ಅಣ್ಣೆ ಪಂಡ್‌ನ ಕೇನ್ದ ನಕುಲೆನೆ
ಮಲ್ಲ ಕಾಡ್‌ಡೆ ನೀರ್‌ದಾ ಕಿರೆ
ಒಲ್ಲ ಉಂಡುಂದಾಯೆ ತಿರ್ಗ್‌ದ್ ನಾಡ್ಯೆ ಕಾಮ್ಯಕೊಡು ||
ತಿರ್ಗ್ ತಿರ್ಗ್‌ದ್ ಬಚ್ಚಿನಾಪಗ
ಪೊರ್ದುದಾ ಕಿರೆ ನೀರ್‌ದಿಂಜಿದ್
ಇತ್ತನನ್ ತೂದಾಯೆ ಜತ್ತದ್ ಮೋನೆ ದೆಕ್ಯೆನಗ ||

6

ಬಾನೊಡುದು ಸೊರೊ ಒಂಜಿ ಲಕ್ಕ್‌ದ್
ನೀರ್ ನೀ ಪರ್ದುನೆಕ್ ದುಂಬುಡು
ಯಾನ್ ಕೇಂಡ್‌ನ ಪ್ರಸ್ನೆಗುತ್ತರೊ ಕೊರ್ದು ಪರ್ ನಕುಲ ||
ಆಕಸೊದ ಪಾತೆರೊಗು ನಕುಲೆನೆ
ಬಾಚೆಲ್‌ಡ್ ತಡವಂದೆ ಗಣ್ಯೊನೆ
ತಾನ್ ಮಲ್ತಜೆ ನೀರ್ ಪರೈನೆ ಬಂಜಿ ದಿಂಜಿನೆಟ ||

7

ಅಪಗನೇ ತರೆ ತಿರ್ಗ್‌ದಾನಗ
ಕಿರೆತ ಮಿತ್ತ್‌ಗ್ ಬತ್ತ ದುಂತಿಯೆ
ತಿರ್ಗ್ ತಿರ್ಗ್‌ದ್ ಬೂರೈ ಸೈತ್ತದ್ ಪನ್ನುನೆಂಚಿನೆನ್ ||
ನಕುಲೆ ತೋಜುಜೆ ದಾನೆ ಪಂಡರ್
ಪಲಯೆ ಧರ್ಮಜಿನಾಯ ಮೆಗ್ಗನ್
ಕಡಪುಡಿಯೆ ಸಹದೇವನಾಪಗ ಪೋಯೆ ನಾಡೊಂದು ||

8

ನಾಡ್ ನಾಡ್‌ದ್ ಕಿರೆತ ಕೈತಡೆ
ಪಾರ್ ಬನ್ನಗ ತೂಯೆ ನಕುಲನ
ಬೂರ್ದು ಸೈತ್ತನ ಪುಣನ್‌ಲಾಪಗ ಬಾರಿ ಬೇಜರೊಡು ||
ನೀರ್‌ನೊಂತೆನೆ ಪರ್ವ್ ಪೋಪೆಂ
ದಾಯೆ ಜತ್ತೆನೆ ಕಿರೆಕ್ ಅಪಗನೆ
ಬಾನೊದಾ ಸೊರೊ ಕೇನ್ದ ಎನ್ನವೆ ಪ್ರಸ್ನೆಗುತ್ತರೊನು ||

9

ಕೊರ್ದು ಪರ್ ಪನ್ನಗನೆ ಗಣ್ಯೊನು
ಮಲ್ತಜೆನೆ ಸಹದೇವೆ ನೀರ್‌ನ್
ಪರೈ ಬಂಜರೊ ಮಿತ್ತ ಬತ್ತದ್ ಬೂರೈ ಸೈತ್ತೊಂದು ||
ಎಲ್ಯಯೆಲ ತೋಜುಜೆನೆ ಪಂಡರ್
ಅರ್ದುನನ್ ಕಡಪುಡಿಯೆ ಧರ್ಮಣೆ
ಬತ್ತ ತೂನಗ ಬೂರೈರಿರ್ದೆರ್ ಪುಣನೆ ಆವೊಂದು ||

10

ಎರ್ ಕೆರೈರೊ ಮೆಗ್ಗನಕ್‌ಲೆನ್
ಮೂಂಕುದುಸುಲುನು ತೂದುಲರ್ದುನೆ
ಜೂವೊನೇ ಇದ್ದಿಂದ್ ಪಂಡರ್ ನೀರ್‌ಗ್ ಜಪ್ಪುನಗ ||
ಪಾರ್ತ ಎನ್ನವೆ ಪ್ರಸ್ನೆಗುತ್ತರೊ
ಈಯೆ ಸರಿಕೊರ್ದದ್ ಪರ್ದಯ
ನೀರ್ ಬೋಡಯಿನಾತ್ ಪನ್ನುನ ಬಾನೊದಾ ಸೊರೊನು ||

11

ಕೇಂಡ್‌ದಾಯೆನೆ ಗಣ್ಯೊ ಮಲ್ತಜೆ
ಪಾಂಡವೆರೆ ನಡುತಾಯೆ ಪರೈನೆ

ನೀರ್‌ನಾಪಗ ತರೆನೆ ತಿರ್ಗದ್ ಬೂರೈ ಸೈತ್ತದ್‌ಲ ||
 ತೋಜುಜೆನೆ ಪಾತೆಂದ್ ಬೀಮನ್
 ನಾಡಿಯೆರೆ ಕಡಪುಡಿಯೆ ಧರ್ಮಜೆ
 ಪಾರ್ ಬತ್ತದ್ ತೂಯೆ ಮೂವೆರೆ ಪುಣನ್ ಆಚಿರೊಡು ||

12

ರಕ್ಕಸೆರೊ ದೇವತೆಲೊ ಯಕ್ಷೆರೊ
 ಮೆಗ್ಯನಾಕ್‌ಲೆ ಜೂವೊ ದೆತ್ತನೆ
 ಅತ್ತ ಯಮೆನೆನೊ ಆಯ ನಾಲಿನ್ ಪೊಜೆಕ್‌ದೇ ಬುಡುವೆ ||
 ಇತ್ತೆ ಬಾಜೆಲ್ ತಡೆಯೆರಾಪುಜೆ
 ಪನ್ದ ನೀರ್‌ಗ್ ಜಪ್ಪುನಾಪಗ
 ಮಿತ್ತಡ್‌ದ್ ಸೊರೊ ಒಂಜಿ ಎನ್ನವೆ ಪ್ರಸ್ನೆಗುತ್ತರೊನು ||

13

ಕೊರುದು ಈ ನೀರ್ದರ ಪನ್ನನ
 ಸೊರೊಕುಲಾ ಕೆಬಿ ಕೊರೈ ಬೀಮೆನೆ
 ಕಿರೆತ ನೀರ್‌ನ್ ಪರಿನಸಾತ್‌ಗ್ ತರೆನೆ ತಿರ್ಗನಗ ||
 ಮೆಗಿಯನಾಕ್‌ಲೆ ಪುಣತ ಕೈತಡೆ
 ಬಿಸರ್ ಬಿಸರ್‌ದ್ ಬತ್ತ ಬೂರೈನೆ
 ಉಸುಲು ದೆಂಗ್‌ದ್ ಸೈತ್ತನಾ ಪುಣ ಆಯೆನಾ ಬೀಮೆ ||

14

ಬೀಮೆಲಾ ಬತ್ತಜೆನೆ ಪಂಡ್‌ದ್
 ತಾನೆ ಪಿದಡಿಯೆ ಧರ್ಮನಂದನೆ
 ನಾಡಿಯೆರೆ ಮೆಗ್ಯಲ್ಲೆನಾಪಗ ಕಾಮ್ಯಕೊದ ಬನೊಟು ||
 ಬಾರಿ ದೂರೊಗು ಬತ್ತದಾನಗ
 ನೀರ್ದ ಕಿರೆ ತೋಜೆನೆನ್ ತೂದೇ
 ಆಚಿರೊಡು ಆಪೆಕ್‌ಡ್ ಬೂರುನ ತೂಯೆ ಪುಣಕುಲೆನ್ ||

15

ನಾಲ್ ಪುಣಕುಲೆ ಮೂಂಕುದುಸುಲುನು
 ತೂದು ಸೈತ್ತದೆರ್‌ಂದ್ ಮನಸ್‌ಡ್
 ಆದ್ ಬುಲೆನೆ ತರೆಕ್ ಕೈ ಹಾಕೊಂದು ಮುರೈಡಿಯೆ ||
 ಪ್ರೀತಿದಾ ಮೆಗ್ಯಲ್ಲು ಸೈತ್ತೆರೆ
 ಯಾನ್ ದಾಯೆಗ್ ಬದ್‌ಕೆದುಲ್ಲೆನೊ
 ದ್ರೋಪದಿಗ್ ಯಾನೆಂಚ ಪನ್ನನೆ ಸಿವ ಮಹಾದೇವ ||

16

ಕರ್ದ ಸಕುನಿಲು ಕೌರವಾದಿಲೆ
 ಗಿತ್ತೆ ತೆಲಿಪೆರೆಗಾಂಡ್ ಸಾದಿಯೆ
 ಕ್ರಿಷ್ಟೆ ದಾಯೆಗ್ ಇಂಚಿ ತೂಯಿಜೆ ಎನ್ನ ಗೆರಚಾರೊ ||
 ಪೆಟ್ತ್ ತಾಗ್‌ನ ಗಾಯೊ ತೋಜುಜೆ

ಪರೈರೋ ಇಸೊ ನಾಲ್ವೆರೊಟ್ಟುಗು
 ಜೆತ್ತದ್‌ನ ತೂನಗನೆ ಅಲ್ಮನೊ ಆಂಡ್ ಎಂಕಿತ್ತೆ ||

17

ಬಾಜೆಲ್‌ಡ್ ಎನ ದೊಂಡೆದಾ ಪಸೆ
 ಆಜೆನೆಟ್ ಯಾನೊಂತೆ ಕಿರೆತವೆ
 ನೀರ್ ಪರೊನುವೆ ಪನ್ದ ಜಪ್ಪುನಗಾಯ ಕೆಬಿಕೊಂಜಿ ||
 ಬಾನೊಡುದು ಸೊರೊ ಕೇಂಡ್‌ದಾನಗ
 ಆಯೆ ಮಿತ್ತಗ್ ತೂಯೆನಪಗನೆ
 ಈಯೆ ಕೇಂಡ್‌ನ ಪ್ರಸ್ನೆಗುತ್ತರೊ ಕೊರ್ದ ನೀರ್ದರಾಲ ||

18

ಪನ್ನನಾ ಸೊರೊ ಕೇಂಡಿ ಸಾತ್‌ಗ್
 ಪ್ರಸ್ನೆ ಕೇನಾಲ ಪನ್ದ ಧರ್ಮಜೆ
 ಮಿತ್ತ ತೂನಗ ಕೇಂಡ್‌ಲಾಯೆಗ್ ಪ್ರಸ್ನೆದಾ ಸೊರೊನೆ ||
 ಏರ್ ನಿಜೊ ಬ್ರಾಣೆನಲ ಚತ್ತಿಯೆ
 ನೇರ್ ವೈಸೈನೆ ಸೂದ್ರೆ ಪನ್ನನ
 ಜಾತಿ ವರ್ಣೊಡು ಏರ್ ಸರಿಯಾದಿತ್ತಿ ನರಮನಿಲು ||

19

ವೇದೊ ಸಾಸ್ತೊನು ತೆರಿದ್ ಊರುಡು
 ಮಾತೆರೆಗ್ ಪನ್ನನಯೆ ಬ್ರಾಣೆನೆ
 ರಾಜ್ಯೊ ಧರ್ಮೊಡು ಆಳುನಾಯೆನೆ ಚತ್ತಿಯೆನೆ ತೆರಿಲ ||
 ಬೇರೊ ವೈವಾಟ್‌ಲೆಡ್ ನಂಬುಗೆ
 ದಾಯೆ ವೈಸೈನೆ ತನ್ನ ಸೇವೆನ್
 ತೀರ್‌ನಾತ್‌ಲ ಸತ್ಯೊ ನಡತೆಡ್‌ಮಲ್ಪುನಯೆ ಸೂದ್ರೆ ||

20

ನಿಂದೈದಾಯೆನೆ ಏರ್ ಲೋಕೊಡು
 ವಂದೈ ಎರ್‌ಯ ಜೂವೊದಾ ಪುಣ
 ಪನ್ದ ಏರೆನ್ ಪನ್ನರಾಯ ಪನ್ ಇವರೊಡಿತ್ತೆನಡ ||
 ಪರೆರೆ ನಂದೆನ್ ಮಲ್ಪುನಾಯೆನೆ
 ನಿಜೊನೆ ಲೋಕೊಡು ನಂದೈ ವಂದೈನೆ
 ಕರಣೊ ಮೂಜೆಟ್ ನಡಪುನಯೆ ಪುಣ ನಟ್ಟ್ ತಿನ್ನುನಯೆ ||

21

ನರಕೊಗೇರ್‌ಯ ಪೋಪುನಯೆ ಪನ್
 ಮರ್‌ಲೆ ಪಂಡ್‌ದ್ ಏರೆನಿನಿ ಸರಿ
 ಪನೊಲಿ ಮರೈದಿ ಕೆಟ್ಟನಯೆನೇ ಊರುಡೇರ್ ಪನ್ ||
 ತನ್‌ಕ್ ಮಲ್ತನ ಮಲ್ಲ ಉಪಗಾ
 ರೊಲೆನ್ ಮರಪುನ ಜನೊನೆ ನರಕೊದ
 ಗುರಿಕ್ ಬೂರುವೆ ಮರ್ದೆ ಅಪ್ಪೆನ್ ದೂರುನಾಯೆನೆಲ ||

22

ಏರ್ಪನ್ ಪುರುಸೋತ್ತಮೆನೆ ನಿಜೊ
ವಾದ್ ಪಂಡ್‌ದ್ ಕೇನ್ನಗಾಪಗ
ಪ್ರಾಣೊಲೈನ್‌ಲ ಪತ್ತ್ ಇಂದ್ರಿಯೊ ಬುಕ್ಕೊ ಮನಸೊಂಜಿ ||
ಸೇರ್‌ದೇ ಪದ್‌ನಾಜಿ ಕಲೆಕುಲು
ಏರೆಡನೆ ಸರಿಯಾದ್ ಉಂಡೋ
ಆಯೆನೇ ಪುರುಸೋತ್ತಮೆನೆ ಕೇನ್‌ಂದ್ ಪನ್ನಗನೆ ||

23

ಯಾನ್ ಯಕ್ಷನೆ ನಿನ್ನ ಉತ್ತರೊ
ಡಾಂಡ್‌ಲಾ ಸಮದಾನೊ ಸೈತ್ತ್‌ದ್
ಬೂರ್ನ್ ನಿನ್ನವೆ ಮೆಗ್ಗನಕಲೆಡ್ ಬರ್ಯನೇನಿತ್ತೆ ||
ಜೂವೊ ಮಲ್ಪುವೆ ಪನ್ನ ಏರೆನ್
ಜೂವೊ ಮಲ್ಪೊಡು ಪನ್ನಗಾಪಗ
ಪ್ರೀತಿದಾ ಮೆಗಿ ನಕುಲೆ ಬದ್‌ಕಡ್ ಪಂಡೆ ಧರ್ಮಜೆನೆ ||

24

ನಕುಲನೇ ಬದ್‌ಕಾದ್ ಯಕ್ಷನೆ
ಪೆರಪ ಕೇಂಡೆನೆ ನನಲ ಒರ್ಯನ್
ಬದಕಯೆರೆ ಏರಾವು ಪನ್ನಗ ಮೆಗಿಯೆ ಸಹದೇವೆ ||
ಬದ್‌ಕೊನಡ್ ಪನ್ನನೆನ್ ಕೇಂಡ್‌ದ್
ಬಿರ್‌ಸೆರಾಯಿನ ಬೀಮ ಪಾರ್ತೆರ್
ಬದ್‌ಕೊಡುಂದುದು ದಾಯೆ ಕೇಂಡ್‌ಜ ಪನ್‌ಲ ಧರ್ಮಜೆನೆ ||

25

ಕಾಡ್‌ಡಮ್ಮೆರ್ ಸೈತ್ತಿ ಸಾತ್‌ಗ್
ಪ್ರೀತಿದಾ ಸಿದ್ಯಪ್ಪೆ ಮಾದ್ರಿಯೆ
ಕಾಪೊಡೀಯೇ ಎನ್ನ ಬಾಲ್ಗನ್ ಪನ್ನೆನ್ನಡನೆ ||
ಆರ್ ಅಮ್ಮೆರೆನೊಟ್ಟು ಪೊತ್ತೆರ್
ಯಾನ್ ಆರೆನ ಆಜ್ಜೆ ಮೀರಯೆ
ಆರೆ ಬಾಲೆಲು ಬದುಕೊಡುಂದುದು ಕೇಂಡೆ ಗಂದರ್ವ ||

26

ಈತ್ ಪನ್ನಗ ಯಕ್ಷ ರೂಪೊನೆ
ಮಾಜಿದಾ ಯಮ ರೂಪೊ ಬಾನೊಡು
ತೋಜಿದಾನಗ ಧರ್ಮನಂದನೆ ಉಂತ್ಯೆ ಕೈ ಮುಗಿದ್ ||
ಕೇನ್ ಮಗ ಈ ಧರ್ಮನಿಸ್ಸೆನೆ
ಕಾಪುವೆನೆ ಸಿರಿ ಕ್ರಿಷ್ಟೆ ನಿನ್ನನ್
ಪ್ರೀತಿದೇ ಪಂಡೊಂದು ಲಕ್ಕಯೆ ಬೀಮ ಪಾರ್ತೆರೆನ್ ||

27

ಇನಿಕ್ ಪದ್‌ರಾಡೊಸೊ ಕಾಡ್‌ಡ್
ಕರಿದ್ ಆಂಡ್‌ಯ ಧರ್ಮನಂದನೆ
ನನಗ್ ನೂಕುಲೆ ಒಂಜಿ ಒಸೊನು ಗುರ್ತೊ ತೆರಿಯಂದೆ ||
ನಿಕ್‌ಲೆಗ್‌ಡೆನೆ ಆವು ನಿಕ್‌ಲೆನ
ಕಳೆದ್ ಪೋಯಿನ ರಾಜ್ಯೊ ಮಾತಲ
ಪೆರಪ ತಿಕ್ಕುಂದಪಗ ಮಾಯಕೊ ಆಯೆ ಯಮರಾಯೆ ||

28

ಅರಣೆನಾ ಮುನಿಕುಲೆಗ್ ಕೊರ್ಪು
ನಡತಿ ಸಂಗತಿ ಪನ್ನ ರುಸಿಕುಲು
ಬೆರಣೆರ್‌ಲ ಮಾತೆರ್ಲ ಎಂಕ್ಲೆನ್ ಮುಲ್ತು ಕಡಪುಡುಲೆ ||
ನನದ ತಿರ್ಗಾಟೊಗುಲ ಪಂಡ್‌ದ್
ಅಕ್‌ಲೆನಾಸೀರ್ವಾದೊ ಗೆತೊನುದು
ಬಜನೆ ಮಲ್ತೆರ್ ಆದಿ ನಾರಾಯಣನ್ ಪಾಂಡವೆರ್ ||

ಶ್ರೀ ಅನಂತಕೋಡಿ ಸುಬ್ರಾಯ ದೇವೆರೆ ನಿರ್ಪೊಡು;
ಪರಿವಾರೊದೈವೊಲೆನ ಬೆರಿ ಸಾಯೊಡು
ಕೆಲಿಂಜ ದೂರುಡು ನಿಲೆಯಾಯಿನ
ಅಪ್ಪೆ ಸಿರಿ ಉಳ್ಳಾಲ್ದಿನ ದಯೊಟ್ಟು;
ತುಳು ಕೆಲಿಂಜ ಭಾರತೊದ ಅರಣ್ಯ ಪರ್ವೊ ಪೂರ್ತಿಯಾಂಡ್

ತುಳು ಕೆಲಿಂಜ ಬಾರತೊ

ವಿರಾಟ ಪರ್ವೊ

|| ಸುರುತ ಸಂದಿ ||

|| ಪಾಂಡವೆರ್ ವಿರಾಟ ನಗರೊಗು ಪೋಯೆರ್ ||

4

ಧರ್ಮನಂದನೆ ತನ್ನ ಒಟ್ಟುಗು
ಇತ್ತಾನಾ ಬೆರಣೆರೆನ್ ರುಸಿಕುಲೆ -
ನಲ್ಪನೇ ಮನ್ನಿತ್ತ್ ಕಾರ್ಗ್ ಬೂರು ಪುಡ್ಯಾಡ್ಡ್ ||
ಎನ್ನಕ್‌ಲೆನೊಟ್ಟಿಗೆನೆ ಇತ್ತಾದ್
ಒರೊ ಪದರಾಡೆನ್‌ಲ ನೂಕ್ಯರ್
ಕಸ್ತೊ ಸುಕೊಕೊಂಜಾದ್ ಕಾಡ್‌ಡ್ ಪ್ರೀತಿ ಬಾವನೆಡ್ ||

ಮರತ ನಿರೆಲ್‌ಡ್ ಕುಲ್ಲದಾಕ್‌ಲ್
ಎದುರು ತೋಜುನ ಆ ವಿರಾಟನ
ನಗರೊ ಪಂಡ್‌ಡ್ ಧರ್ಮನಂದನೆ ಪನ್ನೆನಾಕ್‌ಲೆಡ್ ||
ನನಗ್ ನಮೊ ಈ ನಗರೊಡುಪ್ಪೆರೆ
ಗುರುತೊ ತಪ್ಪದ್ ಅರಸುನಾಡೆಗ್
ಒರಿಯೊರಿಯೆ ಪೋದೊಲು ಬೆನಿಯೆರೆ ಕೆಲಸೊಗುಂತೊನುಗೊ ||

1

ನನಗ್ ಎಂಕುಲು ಊರುಡುಪ್ಪೊಡು
ಗುರುತೊ ತಪ್ಪದ್ ಒರುಸೊ ಒಂಜೆನ್
ಕರಿತ್‌ದಾಯಿನ ಬುಕ್ಕೊ ಎಂಕ್ಲೆನ ಗತಿಕ್ ಎಂಚಿನವೊ ||
ನಿಕ್‌ಲ್ ಕಡಪುಡೊಡೆಂಕ್ಲೆನಿತ್ತೆನೆ
ನಿರೆತ ಊರುಗು ಮಾನೊ ಮಾರ್‌ದ್
ಬದ್‌ಕಿಯೆರೆ ಬೋಡಾದ್ ಪಂಡ್‌ಡ್ ಬಾರಿ ಬುಲ್ತೊಂಡೆ ||

ಯಾನ್ ಪೂಜೆದ ಬ್ರಾಣ ಏಸೊನು
ಪಾಡ್ಡ್ ಕಂಕೆನೆ ಪನ್ನಿ ಪುದರ್‌ಡ್
ರಾಜನರಮನೆಡುಪ್ಪೆ ಪನ್ನಗ ಬೀಮೆ ಪಂಡೊನುವೆ ||
ಮಾಸೊದಡಿಗೇನ್ ಮಲ್ಪಿ ಪಾಕೊದ
ಸಾಸ್ತೊ ಕಲ್ತನ ವಲೆಲೆ ಪನ್ನುನ
ಏಸೊ ಮಲ್ತ್‌ದ್ ಕೆಲಸೊ ಕೇನುವೆ ಆ ವಿರಾಟಡನೆ ||

2

ದಾಯೆ ಬುಲ್ಪುವ ಧರ್ಮನಂದನ
ವಾಸುದೇವೆನೆ ಪಾಂಡವೆರೆನ
ಬಾವೆನತ್ತೊಯೆ ಕಾಪುನಾಯೆನೆ ಎಂಕ್ಲು ತೆರಿತ್‌ಜನೊ ||
ಆ ವಿರಾಟನ ರಾಜ್ಯೊ ತೆನ್ನಯಿ
ಪೋನಗನೆ ಉಂಡೊಲು ನಿಕ್‌ಲೆನ
ಜೀವನೊಗು ಅವುಲೆಡ್ಡೆ ಪಂಡ್‌ಡ್ ಬುಡಿಯೆರಕ್‌ಲೊಟ್ಟು ||

ಅರಸು ಮಗಲೆಗ್ ನಾಟ್ಯೊ ಕಲ್ಪವೆ
ಸುರೆರೆ ಸೂಳೆ ಸಿಕಂಡಿ ಸಾಪೊನು
ಕೊರುನೆಟೆಂಕಾಂಡಿತ್ತೆ ವರೊನೇ ಪಂಡೆನರ್ಜನೆನೆ ||
ನಕುಲ ಸಾದೇವೆರ್‌ಲ ಪಂಡೆರ್
ಕುದುರೆ ಎರ್ದೆನ್ ಮೇಪಿ ಕೆಲಸೊಗು
ತಯರ್ ಎಂಕುಲು ಪನ್ದ ರಾಜಡ ಕೆಲಸೊ ಕೇಂಡೊನುವೊ ||

3

ಕಾಮ್ಯಕೊಗು ಕೈ ಮುಗಿದ್ ರುಸಿಕುಲೆ
ಕಾರ್ ಪತ್ತಾದ್ ಪಾಂಡು ಬಾಲೆಲು
ದ್ರೋಪದಿನ ಒಟ್ಟಿಗೆನೆ ಪಿದಡ್‌ಡ್ ಪೋಯೆರಲ್ಪಡ್‌ಡ್ ||
ಕಾಡ್ ಕಡ್‌ತ್‌ದ್ ಪೋದುಲಾನಗ
ಗೋಳಿದಾಮರ ಒಂಜಿ ತೂಯೆರ್
ಸಾದಿ ನಡತ್‌ನ ಬಚ್ಚೆಲರಪಯೆರಲ್ಪ ಕುಲ್ಲಿಯೆರ್ ||

ತಾನ್ ರಾಣಿನ ಗೌಡಿ ಚಾಕಿರಿ-
ದಾಲ್ ಸೈರೇಂದ್ರಿಂದ್ ಪುದರ್‌ಡ್
ಕೇನ್ನೆ ಕೆಲಸೊನು ಪನ್ದ ದ್ರೋಪದಿ ತೆಲಿತಲಾಪಗನೆ ||
ಜೂಜಿ ಗೊಬ್ಬುದು ಮಾತ ಬದ್‌ಕ್‌ನ್
ಏರೆರೆಗ್ ಕೊರ್ದುಂಚಿ ಮೂರ್ಕನೆ
ಯಾನ್ ನಿಕ್‌ಲೆನ್ ಚಾಕ್ರಿಗುಂತವೆ ಅನ್ಯ ರಾಚೆರೆನ ||

7

8

ಕುರುನ ವಂಸೊಡು ಪುಟ್ವನಾಕ್ಲ್
ಮುಗೆರ ಜಾತಿದ ಅರಸುನರಮನೆ
ಕೆಲಸೊಗುಂತ್ಯೆರೆ ಆಂಡೆ ಪಂಡ್‌ದ್ ತರೆಕ್ ಹಾಕೊಂಡೆ ||
ಪಲಯೆನೆಂಕ್ಲೆಗ್ ಈಯೆ ಅಮ್ಮಗ್
ಸಮೋನೆ ನಿನ್ನವೆ ಕಸ್ತೊಗುಂಕುಲು
ಸರಿ ಸಮಾನೋನೆ ಪಂಡೆರಾಯಡ ನಾಲ್ವೆರೊಟ್ಟಿಗೆನೆ ||

9

ಧರ್ಮನಂದನೆ ಕಚ್ಚೆ ಪಾಡ್‌ದ್
ತುತ್ಯೆ ಚೋತ್ತೊನು ಪಗಡೆ ಚೀಲೊನು
ತಿಕ್ಕಯೆನೆ ಸೊಂಟೊಗುಲ ಗಂದೊನು ಪೂಜ್ಯೆ ಮೆಯಿನಿಲಿಕೆ ||
ಕಸ್ತುರಿದ ಸಿರಿ ಬೊಟ್ಟು ಮುಂಡೊಗು
ಒತ್ತುದಾಯೆನೆ ಬಸ್ತೊ ಪೂಜಿದ್
ಬತ್ತಾನೆನ್ ತೂಯ್ತುಕ್ಲ್ ಕಾರ್‌ಗ್ ಅಡ್ಲೊ ಬೂರಿಯೆರ್ ||

10

ರಾಜ ಚಾವಡಿದೆದುರು ಬಾಕಿಲ್
ಕಾಪುನಕಲೆಡ ಕೇನ್ದ ಉಲಯಿಗ್
ಸೀದ ಬತ್ತದ್ ಕೈನ್ ದೇರ್ತದ್ ಪಂಡೆ ಸುಬೊ ನುಡಿನ್ ||
ಯಾನ್ ಕಂಕಂದೆನ್ನಿ ಪೂಜೆದ
ಬ್ರಾಣೆ ಪಾಂಡವನಕಲೆನರಮನೆ
ಡೇಪೊಲಾ ಮನೆ ದೇವೆರೆಗ್ ಸರಿ ಪೂಜೆ ಮಲ್ತನಯೆ ||

11

ಇತ್ತೆ ರಾಜ್ಯೊನು ಕಳೆದಲಾಕ್ಲ್
ತಿರುಗವೆರ್ ಕಾಮ್ಯಕೊದ ಕಾಡ್‌ದ್
ಎನ್ನ ಕಸುಬುಗು ನಿಲೆನೆ ತತ್ತದ್ ಬಂಜಿ ದಿಂಜಯೆರೆ ||
ಉತ್ತಮೆರ್ ಏರುಲ್ಲೆರ್‌ಂದ್‌ದ್
ಬತ್ತೆ ಈಡೆಗ್ ಎಂಕ್ ಪೂಜೆನ್
ಮಲ್ಪಿಯೆರೆಗಾಪುನವೆ ಕೆಲಸೊನು ಕೊರ್ದ ಮಹರಾಜ ||

12

ಪಾಂಡವೆರೆಗಿಂಚಾಂಡೆ ಸಿವ ಸಿವ
ಆಂಡ್ ಈರೇ ಎಂಕ್ಲೆನರಮನೆ
ಡಾಪಿ ದೇವೆರೆ ಪೂಜೆಗುಂತುಲೆ ಪಂಡೆನಾ ರಾಜೆ ||
ಆನಿದಾ ಮನದಾನಿ ಬೀಮೆನೆ
ತಾನ್ ಪಾಂಡವೆರಡಿಗ್ ಬಟ್ಟೆನೆ
ಆಕ್‌ಲೆಗ್ ಬನವಾಸೊ ಆಯ್ತುಕ್ ಎಂಕ್ ಕಸುಬಿದ್ದಿ ||

13

ಯಾನ್ ಮಾಸೊದ ಅಡಿಗ್ ಮಲ್ಪುನ
ರೀತಿನೇ ಕಲ್ತನಯೆನೆಂಕ್ಲ
ಪ್ರೀತಿದೀಡ್‌ದ್ ಕೆಲಸೊಕೊರ್ವರೊ ಪನ್ನಗೊಪ್ಪಿಯೆನೆ ||

ಪಾರ್ತಲಾ ಮನದಾನಿ ಬತ್ತದ್
ಈರೆ ಮಗಲೆಗ್ ನಾಟ್ಯೊ ಕಲ್ಪವೆ
ತಾನ್ ಬ್ರಾನ್ನಲೆ ಪನ್ನ ಕೆಲಸೊಗು ಸೇರೈನರಮನೆಡ್ ||

14

ನಕುಲಸಾದೇವೆರ್‌ಲ ಬತ್ತದ್
ಕುದುರೆಲಾಯೊದ ಎರ್ದೆ ಕಿದೆತವೆ
ಜವಬುದಾರಿಡ್ ಉಂತ್ಯೆರಾಪಗ ರಾಣಿ ದ್ರೌಪದಿಲ ||
ಬೊಲುದು ಸೀರೆಡ್ ಕುಜಲ್ ಬುಡ್ತನ
ಕಮಲ ಮೋನೆದ ಪೊರ್ದುದೈಸುರೊ
ತೆಲಿಕೆಡೇ ಪಿದಡಿಯಲ್ ಅರಮನೆದೆದುರು ಬೀದಿಡೆನೆ ||

15

ಆಲೆ ಮೋನೆನ್ ತೂದು ತುಂಬಿಲು
ರಾದ್ ಬತ್ತೊನೆ ಕಮಲೊ ಪಂಡ್‌ದ್
ದೇರ್‌ನಗ ಜಾರ್‌ನವೆ ಪೊದಕೆಡ್ ತಿಗಲೆ ಮುಚ್ಚೊಂದು ||
ಆಪಗಾಪಗ ದತ್ತ ಬಲತ್‌ಗ್
ತೂದು ತೂವೊಂದಾಲ್ ಸೊರ್ಕುಡ
ಆನೆದಂಚೆನೆ ಬರ್ಪುನಾಲೆನ್ ತೂದು ಪೊಣ್ಣಲೆಗ್ ||

16

ದಾನೊ ಮನಸ್‌ಡ್ ಆದ್ ರಾಣಿಡ
ದೂರು ಪನ್ನಗ ಲೆಪುಡದಾಲೆನ್
ಪ್ರೀತಿಡೇ ಕುಲ್ಲಾದ್ ಕೇಂಡಲ್ ಏರ್ ಈ ಪನ್‌ಲ ||
ಯಾನ್ ದ್ರೌಪದಿ ಗೌಡಿ ಚಾಕಿರಿ-
ದಾಲ್ ಸೈರೇಂದ್ರಿಂದ್ ಎನ್ನನ್
ಪ್ರೀತಿಡೇ ಪನ್ನೆದಲ್ ಪಾಂಡವನಕಲೆ ಮಾರಾಣಿ ||

17

ಪಾಂಡವೆರ್ ಜೂಜಾಟೊ ಗೊಬ್ಬುದು
ರಾಜ್ಯೊ ಸರ್ವೆಸೊನುಲ ಕಳೆಯೆರ್
ಆಕ್‌ಲೆಗ್ ಬನವಾಸೊ ಆಯ್ತುಕ್ ಕಾಡ್ಗ ಪೋನಗನೆ ||
ದ್ರೋಪದಿಲ ಅಕ್‌ಲೆನವೆ ಒಟ್ಟುಗು
ಪೋಯಿನೆಟ್ ಕಸುಬಿದ್ದಿ ಎಂಕ್‌ಲ
ಯಾನ್ ಕೆಲಸೊಗು ಮೂಲು ಉಂತೊಡೊ ಪನ್ನೆ ಮಹರಾಣಿ ||

18

ಕರ್ಯಣಿಯೆ ಉಂಡತ್ತೊ ನಿನ್ನವೆ
ಪೊರ್ದು ಕಂಟಿಲ್‌ಡಿತ್ತೆ ಕಂಡನಿ
ಇದೈನೊಯ ನಿನ್ನನ್‌ಲ ಸಾಂಕ್ಯೆರೆ ದಾಯೆ ಬುಡುದುಲ್ಲೆ ||
ಉಲ್ಲೆರೈವೆರ್ ಕಂಡನೀಯೆರ್
ಮಿತ್ತ ಲೋಕೊದ ಗಂದರ್ವೆರ್‌ಲ
ತಿರ್ದ ಬರ್ದೆರ್ ಯಾನ್ ನೆನೆತನ ಸಾತ್‌ಗೊರಿಯೊರಿಯೆ ||

19

ದ್ರೋಪದಿಗೆ ಕಂಡನಿಲು ಐವೆರ್
ಆಲೆ ಚಾಕಿರಿದಾಲೆಗಲ ಸರಿ -
ಟಾಯಿನವೆ ಕಂಡನಿಲು ಐವೆರ್ ದಾನ್ನೊ ವಿದಿನಿಯಮೊ |
ಪಾಂಡವೆರೆ ಬುಡೆದಿಗಲ ಕಾಡ್‌ಗ್
ಪೋಪಿ ಕಾಲೊನೆ ಆಂಡ್ ಬಾಕಿದ
ಏರೆಗೆಂಚಿನ ಆವು ಉಂತುಲ ಮೂಲು ಎನ್ನೊಟ್ಟು ||

|| ಕೀಚಕೆ ದ್ರೋಪದಿನ್ ತೂಯೆ ||

ಆ ಸುದೇಸ್ಲೆನ ತರೆನ್ ಬಾರ್ವಲ್
ಸೂಡಿ ಕಟ್ಟಲ್ ಒರೊರೊ ನೆಯ್ವಲ್
ಪೂನು ಮುಡಿಪದ್ ಪಿರವು ಕನ್ನಟಿ ದೀಡ್ಡ್ ತೋಜವಲ್ ||
ಮೋನೆಗಂದೋ ಅತ್ತೊ ಪನ್ನುನ
ರೀತಿಡೇ ಮಂಜಲ್‌ನ್ ಉರ್ದುದು
ತಾಮರೆದ ಪೂತೆಸಲ್ ಕಣ್ಣೆಗ್ ಮಯಿನ್ ತಾಗವಲ್ ||

1

ಬೊಟ್ಟು ಮುಂಡೊಗು ಪಾಡ್ಡ್ ಕನ್ನಟಿ
ಪತ್ತದೆದುರುಡು ಉಂತುವಲ್ ನಿಜೊ
ಕಪ್ಪು ಚುಕ್ಕೆನ್ ದವುಡೆಗೊತ್ತಲ್ ದೇವಿ ದ್ರೋಪದಿಯೆ ||
ಒಪ್ಪೊಡೇ ಸಿಂಗಾರೊ ಮಲ್ಪುನ
ನಿತ್ಯೊ ಕೆಲಸೊನು ಮಲ್ಪಲೇಪೊಲ
ತನ್ನವೇ ಕರ್ಮೊಂದು ನೆನೆತ್‌ದ್ ಪಾಂಡವೆರೆ ಬುಡೆದಿ ||

2

ರಾಣಿ ಸೇವೆಡ್ ಸ್ವಾಭಿಮಾನೊನು
ತಾನ್ ಮರತ್‌ದ್ ಕಂಡನೀಯೆರೆ
ನೀತಿ ಧರ್ಮೊಗು ಕೊರತೆ ಬರೈರೆ ಬಲ್ಲಿ ಪಂಡೊಂದು ||
ದೇವೆರೆನ್ ನೆನೆತೊಂದು ಬಗ್ಗಿಡ್
ದ್ರೋಪದಿಯೆ ದಿನೊ ನೂಕುದಾನಗ
ಆಂಡ್ ತಿಂಗೊಳು ಸರಿಟ್ ಪತ್ತವಿರಾಟನರಮನೆಡ್ ||

3

ಆ ಸುದೇಸ್ಲೆನ ಮೆಗಿಯೆ ಕೀಚಕೆ
ಪೋಕಲೊದ ಕಾಮುಕೆನೆ ಅಕ್ಕಿನ
ರಾಣಿ ವಾಸೊಗು ಬತ್ತೆ ಗತ್ತಡ್ ಮೆಯಿತ ಸಿಂಗರೊಡು ||
ಬತ್ತನಾಯನ್ ಉಲಯಿ ಲೆಪುಡುದು
ಕುಲ್ಲಯಲ್ ಮಂಚವುಡು ಮೋಕೆಡ್
ಒತ್ತ ಕುಲ್ಲುದು ಕೇಂಡಲಾಯಡ ಮಾತ ಸುಕೊದುಕ್ಕೊ ||

4

ಪರೈರೆಗ್ ಪೇರೊರುದು ತಿನಿಯೆರೆ
ಎಡ್ಡೆ ತೆನಸ್‌ನ್ ಕೊರ್ದು ಕೇಂಡಲ್
ಬತ್ತನೆನೆ ಈ ದಾಯೆ ಪನ್ನಗ ತೆಲಿತೆ ಕೀಚಕೆನೆ ||
ಅಕ್ಕ ನಿನ್ನನ್ ತೂಪುನಾಸೆಡ್
ಬತ್ತೆ ಯಾನಕ್ಕಂದ್ ಪಂಡ್‌ದ್
ನಿಲ್ ತೂಯೆನೆ ಸುತ್ತ ಕುಲ್ಲುದು ಇತ್ತಿ ಪೋಣ್ಣಲೆನ್ ||

5

ಪೋಣ್ಣಲೆನ ನಡುಟೊರಿ ಕುಲ್ಲುದು
ಇತ್ತನಾಲೆನ್ ತೂಯೆ ತೂದೇ
ಕಣ್ಣೆ ದೆಪೈರೆಗಾಯ್ವಿಲಾಯಗ್ ತೂಯಿನಾಡೆಗೆನೆ ||
ಬುಕ್ಕೊಲಾ ಕುಲ್ಲೊಂದು ತೂಯೆನೆ
ತನ್ನ ತನೊನೇ ತಾನ್ ಮರತ್‌ದ್
ದುಸ್ಪ ಕೀಚಕೆ ಕಾಮೊದುರಿ ತಡೆವಂದೆ ಕುಲ್ಲೊಂಡೆ ||

6

ಏರ್ ಈ ಪೋಣ್ಣೊರಿ ಬಾನೊಡು
ದಾರಗೆಲೆ ನಡುಟಿತ್ತಿ ರೋಹಿಣಿ
ನಾತ್ ಪೊರ್ದುಡೆ ತೋಜುವಲ್ ಏರ್‌ಂದ್ ತೆರಿಯಂದೆ ||
ಸೋಲ್ತುದುಲ್ಲೆನೆ ಯಾನ್ ಅಕ್ಕಡ
ಕೇನಿಯೆರೆ ನಾಚಿಗಡ್‌ಲಾಪುಜಿ
ಯಾನ್ ಎನ್ನಾತೆಗೆನೆ ಗೆರೆಪುನಗತ್ತ ಮುಲ್ತಲ್ ||

7

ಸುರೆರೆ ಲೋಕೊದ ಪೋಣ್ಣೊ ಇಂಬಲ್
ಸಚಿಯೊ ರಂಬೆನೊ ಅತ್ತ ಊರ್ವಸಿ -
ನಕ್‌ಲೆ ಪೈಕಿಡ್ ಏರೊ ಪನ್ನುನ ಗುರ್ತೊ ಎಂಕಾಯ್ವೆ ||
ಸರಸತಿಯೊ ಪಾರ್ವತಿಯೊ ಲಚಿಮಿಯೊ
ರತಿಯೊ ನಾಗೆರೆ ಲೋಕೊದಾಲೋ
ಯತಿನ ತಿಗಲೆಗ್ ಕಂತಿ ಸಪಳೊನೊ ಪನ್ನುನೇರಿತ್ತೆ ||

8

ಮದನ ಗೊಬ್ಬುದ ಮಂತ್ರ ದೇವತೆ
ನಿಜೊ ಸುರೂಪೊಡು ಕುಲ್ಲೊದುಲ್ಲಲೊ
ಎನನ್ ತೂಯೆರೆಗಾದ್ ಬತ್ತಲೊ ದಾಯೆ ಮನಿಪುಜಲ್ ||
ತಿಗಲೆ ನಡ್‌ಗ್‌ದ್‌ಲಾಂಡ್ ಕಾಮೊದ
ಜರೊಟು ದುಸ್ಸನದೊಂಡೆದಾ ಪಸೆ
ಸರಿಟ್ ರಟ್ಟೆದ್ ಆನಗನೆ ಉಬಿ ನೀರ್‌ನಿಂಗೊಂಡೆ ||

9

ಬಾಕಿ ಪೋಣ್ಣಲು ತನನ್ ತೂದೇ
ಮೋನೆದೆಂಗವೆರ್‌ಂದ್ ಆಯೆನೆ
ನಾಚಿಗನ್ ಬುಡುದಪಗ ಪಲಿನವೆ ಕಾರ್‌ಪತ್ತಿಯೆನೆ ||

ಅಕ್ಕ ನಚ್ಚತ್ತೊಲೆನ ಪೈಕಿಡ್
ಮೇಣ್ಕನಾ ರೋಹಿಣಿದಲೆಕೊನೇ
ಕುಲ್ಲುದುಪ್ಪುನ ಪೋಣ್ಣ ಏರ್ಂದಕ್ಕ ಪನ್ಲೆನಡ ||

10

ನಿಕ್ಕ ದಕ್ಕುನ ಪೋಣ್ಣ ಅತ್ತವು
ಮಿತ್ತ ಲೋಕೊದ ಗಂದವೇರನ
ಇಸ್ಪೊದಾ ಪೋಣ್ಣಾಲ್ ಆಲೆನ ಕಂಡನೀಯೆರ್ಲ ||
ಗಟ್ಟಿಗೆರ್ ಬಲವಂತೆರಾಕಲ್
ನಿನ್ನ ಹಂಕರೊನುಂತವೆರ್ ನಿಜೊ
ಸುದ್ದಿ ಬುಡು ಆಲೆನವೆ ಪಂಡ್‌ದ್ ವಿಸಯೊ ತೆರಿಪಯಲ್ ||

11

ಪರೆರೆ ಬುಡೆದಿನ್ ಆಸೆ ಮಲ್ತೆನ
ನರಮನಿಲು ನಿಜೊ ನರಕೊ ಸೇರ್ದೆರ್
ಕುಟುಮೊಕುರ್ಲಿಯಾವು ಅಕಲೆನ ನಿಕ್ಕ ಪನ್ನೇನ್ ||
ನಮನ ಕುಟುಮೊಗು ಕೊರತೆ ಮಲ್ಪಡ
ಮೆಗಿಯ ಕೇನ್‌ಲ ನಿನ್ನ ಬಾವೆರ್
ಪುದರ್ ಪಡೆಯಿನ ಅರಸುಲತ್ತಯ ಆರ್‌ಕೋಪಿಪೆರ್ ||

12

ಊರ್ದ ಮಾರಿನ್ ತಿಗಲೆಗೊಯ್‌ದ್
ಪಾಡೊನಡ ಈ ಕೇನ್ ಪನ್ನುನ
ಪೋಲ ಇಲ್ಲಡೆ ಹಾಲ್ ಕೆಲಸೊಗು ಮನಸ್ ಮಲ್ಪಡಯ ||
ತಾನ್ ಪಲಿನವೆ ಬುದ್ದಿ ನೀತಿನ
ಕೇಂಡ್‌ನಾಯಗ್‌ಲಾಂಡ್ ಮನಸ್‌ಡ್
ಬೇಜರೊನೆ ಅಯ್ಯಾಯೆ ತೆರಿಪಾವಂದೆ ಪಿದಡಿಯೆನೆ ||

|| ಕೀಚಕೆ ದ್ರೌಪದಿಡ ಪಾತೆರುವೆ ||

ತನ್ನ ಇಲ್ಲಡೆ ಪೋದು ಕೀಚಕೆ
ಪೋಣ್ಣ ನೆಂಪುಡು ನಿದ್ರೆ ಮಲ್ತೆಜೆ
ಬೊಲ್ಪು ಆನಗ ಮೀದ್ ಪೂಜಿಯೆ ಮೆಯಿಕ್ ಕಸ್ತುರಿನ್ ||
ದುತ್ತು ದೈತ್ತೊದ ಗತ್ತಡಾಯೆನೆ
ಬತ್ತೆನರಮನೆದಾಡೆಗಪಗನೆ
ಮಿತ್ತಡ್‌ದ್ ಜತ್ತೊಂದು ಬರ್ಪುನ ದ್ರೌಪದಿನ್ ತೂಯೆ ||

1

ಒಟ್ಟುಗಿತ್ತೆನ ಚಾಕ್ರಿದಾಯನ್
ಅಲ್ಪಡ್‌ದ್ ಕಡಪುಡುದು ಒರೈನೆ
ಬತ್ತೆದುಂತಿಯೆ ದ್ರುಪದ ಮಗಲೆನ ಎದುರು ಮಹಮೂರ್ಕೆ ||

ದುಸ್ಸೆನೇ ಎದುರಾಯೆ ಪಂಡ್‌ದ್
ತನ್ನ ಮನಸ್‌ಡ್ ಸೂರ್ಯ ಮಂತ್ರೊನು
ಉಚ್ಚರಿತ್‌ದಾನಗನೆ ಪಾತೆರೊಗಾಯೆ ಸುರುಮಲ್ತೆ ||

2

ದಾನೆಯಾ ಸೈರೇಂದ್ರಿ ಮನಿಪುಜ
ಪಾತೆರುಗೊ ನಮೊ ನಮೊನೆ ನಿನ್ನನ್
ತೂದು ಎನ್ನವೆ ಮನಸ್‌ಗೇತ್‌ಲ ಆಸೆ ಉಂಡಾಂಡ್ ||
ಬಾರಿ ಪೊರ್ದುದ ನಿನ್ನ ರೂಪೊಗು
ಯಾನ್ ಮರ್ಲೆದೆ ಉಂತು ಉಂತುಲ
ಪ್ರೀತಿ ಮೋಕೆಡ್ ಪಾತೆರ್‌ಲ ಒರೊ ಪುತ್ಸೊಳಿದ ಬೊಂಬೆ ||

3

ಮೂರ್ಕದಾಯೆಗ್ ಇಂಚ ಬಗುಳುವ
ಪೋಕಲೊನೊ ನಿಕ್ಕಿತ್ತೆ ನಿನ್ನವೆ
ನಾಲಿನೊಡವ ಕತ್ತಿದಾಯುದೊಗೀಯೆ ತೆರಿಯೊನುಲ ||
ಯಾನ್ ತಿಕ್ಕುನ ಪೋಣ್ಣ ಅತ್ತಾಯೆ
ಪೋಲ ಎಡ್ಡೆಡ್ ನಿನ್ನ ಇಲ್ಲಡೆ
ದಾಯೆ ಸೈತ್‌ದ್ ನರಕೊ ಗುಂಡಿಗ್ ಬೂರ್ದ ಮಾರಾಯೆ ||

4

ಎನ್ನ ಮೆಯಿಕಾಯನೆನ್ ತೂಲಯ
ನಿನ್ನ ಸೈರೊದ ಸಂಪುಡೆನ್ನವೆ
ಪೊತ್ತುದರ್ಲುನ ಸೂನು ತೆಕ್ಕಲ ಮದನ ಗೊಬ್ಬುಲೆಡ್ ||
ಇತ್ತೆ ಎನ್ನವೆ ಪೆರಣೊ ಒರಿಪುಜಿ
ಬದ್ಧವುನ ದೇವತೆನೆ ಈಯೇ
ಇಸ್ಪೊಡೇ ಬದ್ಧಾಲ ಕೆರ್ಪುನ ಪಾಪಿ ಆವಡಯ ||

5

ಏರ್‌ಲಾಂಡಲ ಪರೆರೆ ಬುಡೆದಿನ್
ಆಸೆ ಮಲ್ತೆಡ ಆಯೆ ನರಕೊಗು
ಬೂರ್ದೆ ಕಂಡಿತೊ ಆಯಗೇ ಗತಿ ಇದ್ದಿ ತೆರಿಯೊನುಲ ||
ರಾವಣನ ಕತೆ ಕೇನ್‌ಜನ ಈ
ಆಯಗೇ ತರೆ ಪತ್ತೆ ಕೈಕುಲು
ಏತ್ ಇತ್ತೆದ್ ದಾನೆ ಪ್ರೇಜನೊ ಆಂಡ್ ಗ್ರೇಯ್ಪುಲಯ ||

6

ಪೆರಣೊ ಪೋವಡ್ ನರಕೊ ಸೇರಡ್
ಯಮನೆ ರೂಪಾದಿತ್ತೆ ಬರಡ್‌ಯ
ಬುಡಡ್ ಎನ್ನನ್ ಬುಡೆದಿ ಬಂದುಲು ಮಾತ ಪರಿವಾರೊ ||
ನಿನನ್ ಕೂಡುದೆ ಬದುಕೊಡುಂದುದು
ಬಯಕುನಾಯಡ ಕರುಣೆ ದೀಡ್‌ದ್
ಬದ್‌ಕಲಯ ಪಂಡೊಂದು ಕೀಚಕೆ ತಾನ್ ಕೈ ಮುಗಿಯೆ ||

7

ನಿಕ್ಕ ಪೋಕಲೊ ಸಾವು ಲೆಪ್ಪುವ
ಎನ್ನ ಕಂಡನಿಕಲ್ ಐವೆರ್
ಸುದ್ದಿ ಕೇಂಡ್ ಬರ್ವೇಡೆಗ್ ನಿನನ್ ಕೆರೈಗ್ ||
ಮಲ್ಲ ಬಿಸೆರ್ ಗಂದವೇರ್ಯ
ನಿನ್ನ ಮಾಸೊನು ನಾಯಿ ಕುಡ್ಕರೆ
ಗಿತ್ತೆ ತಿನ್ನವೆರಕ್ ನಡಪುಲ ಎಡ್ಡೆ ಪಾತೆರೊಡು ||

8

ಮಾರಿಗದುರಾದೇನ್ ಆಲೆನ
ಕೋರೆದಾಡೆನ್ ಒಯ್ತ್ ದಕ್ಕುವೆ
ವೀರ ಕೀಚಕೆಯೇರ್ ಪಂಡ್ ನಿಕೈ ತೆರಿಯಂದೊ ||
ಬಾರಿ ಪೊಲ್ಲದ ಪೋಣ್ಣ ನಿನ್ನವೆ
ನೇಲ್ಯ ಮಿರೆಟೆನ್ನನ್ ಒತ್ತುದು
ಕಾಮೊದುರಿ ತಗ್ಗಾಲ ತಿಗಲೆದ ಪಂಡೆನಾ ಮೂರ್ಕೆ ||

9

ಸಿವ ಸಿವಾ ಪಂಡೊಂದು ದ್ರೋಪದಿ
ಕೆಬಿಕ್ ಕೈ ಪತ್ತೊಂದು ನೆರೈಲ್
ಯಮನ ಪಾಸೊಗು ನಾಲಿನೊಡ್ವ ನಾಯಿ ಪೋ ಮುಲ್ತು ||
ನೆರುಪುನೆನ್ ಕೇನೊಂದು ಕೀಚಕೆ
ಪಿಸ್ ರ್ ಕೋಪೊಡು ಪತ್ತೈರಾಲೆನ್
ಕಯಿತಡೆಗ್ ಬನ್ನಗನೆ ತಪ್ಪದ್ ಪಾರೈಲಲ್ಲಡ್ ||

10

ಪಾರ್ಡ್ ಬತ್ತಲ್ ರಾಣಿನಾಡೆಗ್
ಈರೆ ಮೆಗಿ ಮಹ ಮೂರ್ಕೆ ಕಾಮುಕೆ
ಬಾರಿ ಪುಣೆವೊಂದುಲ್ಲೆ ಎನ್ನನ್ ಹಾಲ್ ಮಲ್ಪೆರೆಗ್ ||
ಸಾರ್ಡ್ ಪನ್ನುನೆ ಯಾನ್ ಈರೆಡ
ಮೂಲು ಚಾಕಿರಿಗುಂತುದೇನೇ
ಈರೆ ಮೆಗೈನ್ ಕೆರ್ಪಯೆನ್ನುನ ಬೊಡ್ಡಿ ಅಪವಾದೊ ||

11

ಪೋಡ್ಯಡಯ ಸೈರೆಂದ್ರಿ ನಿನ್ನನ್
ಹಾಲ್ ಮಲ್ಪೆರೆ ಬತ್ತನೇರೇ
ಆವಡೆಯ ಆಯನವೆ ತರೆನ್ಯಲ ಯಾನ್ ರಟ್ಟಾವೆ ||
ಆ ವಿರಾಟೆರ್ ಎನ್ನ ಕಂಡನಿ-
ಯಾದ್ ಉಪ್ಪುನಗನ್ನ ಚಾಕಿರಿ-
ದಾಲೆನವೆ ಮರೈದಿ ಪೋಯೆರೆ ಬುಡಯೆರೇಪೊಗುಲ ||

12

ಪನ್ನುನೆನ್ ಕೇನೊಂದುಲೈವೆರೆ
ಪೋಣ್ಣ ದ್ರೋಪದಿ ಪೋದುಲಾನಗ
ಬತ್ತೆ ಕೀಚಕೆ ಪಲಿನ ಕೈತಡೆ ಮೋನೆ ಬಾಡಾದ್ ||

ಬತ್ತನಾಯನ್ಲಾ ಸುದೇಸ್ಸೆನೆ
ಕುಲ್ಲದಾಯನ ಮೋನೆ ತೂನಗ
ಸತ್ಯೊ ಸಂಗತಿ ತೆರಿದ್ ನಡ್ಕೊಲ್ ಬಾರಿ ಪೋಡಿಗಡ್ ||

13

ಎನ್ನ ತಮೆರ್ದ ಕುಲೊನು ತೌರುನ
ದುಸ್ಪ ಯೋಚನೆಡುಲ್ಲೆ ಕೀಚಕೆ
ಪೋಣ್ಣ ಪತಿರುತೆನಾಲೆ ಸೀಲೊನು ಹಾಲ್ ಮಲ್ಪೆರೆಗ್ ||
ಅಟ್ಟಣೆನ್ ಮಲ್ತೊಂದು ಉಲ್ಲೆನೆ
ಕೆರೈರಾಲೆನ ಕಂಡನೀಯೆರ್
ಮಲ್ಲ ಪುದರ್ದ ಕೀಚಕಾದಿಲೆನಕಲ್ ದೀಡಯೆರ್ ||

14

ದಾನೆ ನೆನೆತದ ಮೆಗಿಯ ನಮ್ಮವೆ
ವೀರ ಕೀರ್ತಿದ ಪುದರ್ಗೀಯೆ
ದಾಯೆ ಮಣ್ಣಾನ್ ಪಾಡ್ವ ಮಗ ಪನ್ ಚಾಕ್ರಿಗುಂತನಲ್ ||
ಏರ್ ಪಂಡ್ ತೆರಿಜೊ ನಿಕ್ಕೇ
ವೀರ ಗಂದವೇರೆ ಬುಡದಿನ
ಆಸೆ ಮಲ್ತದ್ ಲಗಡಿ ದೆಪ್ಪನ ನಮ್ಮ ಕುಟುಮೊನುಲ ||

15

ಅಕ್ಕ ಆಲೆನ್ ತೂಯಿ ಬುಕ್ಕೊನೆ
ನುಪ್ಪು ಮೆಚ್ಚುಜಿ ಎಂಕ್ ಕಣ್ಣಿಗ್
ನಿದ್ರೆ ಬೂರುಜಿ ಸೈಪ್ಪಿ ಕಾಲೊನೆ ಬತ್ತದಾಂಡಕ್ಕ ||
ಬೊಡ್ಡಿ ಮಗ ನಿಕ್ಕೇನ್ ಬೇತೆನೆ
ಪೊಲ್ಲದಾ ಪೊಣ್ಣೊಂಜಿ ತೂದೇ
ಮಲ್ಪೆ ಮದಿಮೆನ್ ಬುಡ್ಡ ಆಲೆನ ಮೇಲ್ಯ ಯೇಚನೆನ್ ||

16

ಕೊರತೆ ಕುಟುಮೊಗು ಆವು ಕಂಡನಿ
ಬುಡುವೆರೆನ್ನನ್ ನಮ್ಮ ವಂಸೊನೆ
ಉರಿದ್ ಸೂಕರೊ ಆವು ನಿಚ್ಚಯೊ ಹಟೊನು ಬುಡ್ಡ ಮಗ ||
ಆತ್ಮೊನಾಲೆಗ್ ಮಾರ್ಡೆ ಕೋಡೆನೆ
ಜೂವೊ ಇದ್ಯಂದ್ ನವೆ ಉಜಿಡೆಗ್
ದಾಯೆಗಕ್ಕಾ ಬೇತೆ ಮದಿಮೆನೆ ಎನನ್ ಪೊತ್ತಾಲ ||

17

ನಿಕ್ಕ ಯಾನೊರಿ ಮೆಗಿಯೆ ಬೋಡುಂ
ದೆನ್ನಿ ಆಸೆನೆ ನಿನಡ ಉಂಡುಡ
ನಿನ್ನವೇ ಸೈರೆಂದ್ರಿನೊಪ್ಪಲ ಪ್ರೀತಿಡೆನ್ನಕ್ಕಾ ||
ಇದ್ದಿಡನೆ ಯಾನ್ವೈಪೆ ಇಸೊನೇ
ಪರ್ಡ್ ಅತ್ತಡ ಬಲ್ಲೆ ಗೆತೊನುವೆ
ಪನ್ನ ಪಲ್ಲಿನ ಕಾರ್ ಪತ್ತಿಯೆ ನೀಚ ಕಾಮುಕೆನೆ ||

18

ಮೆಗಿಯ ಮೋಕೆದ ಸೂಟು ಪೊತ್ತಯ
ಲಪಗ ಆಲೆನ ಪೊಣ್ಣ ಕನಿಕರೊ
ಕುಲೊನು ಕುರ್ಲಿ ಮಲ್ಪಿ ಯೇಚನೆ ಬತ್ತದಾಂಡಲೆಗ್ ||
ಕಡಪುಡುವೆ ಯಾನಲೆನ್ ನಿನ್ನವೆ
ಅಯಿಸುರೊದ ಇಲ್ಲಡೆಗ್ ಎಲ್ಲೆನೆ
ನನಗ್ ಚಿಂತೆನ್ ಬುಡ್ಲ ಪಂಡ್‌ದ್ ಕಡಪುಡಿಯಲಯನ್ ||

19

ಬತ್ತನಾಯೆನೆ ಎಂಚನೋ ಸರಿ
ಕತ್ತಲೆನೆ ಆಯಿನೆಟ ತಿರ್ಗ್‌ದ್
ಪೊರ್ತು ನೂಕಿಯೆ ಪೊಣ್ಣ ಮರ್ಲದ ಮನಸ್ ಬಿಂಗಿರಿಡ್ ||
ಜೆತ್ತನಾಯಗ್ ನಿದ್ರೆ ಬತ್ತಜಿ
ಬೆಚ್ಚಿ ಏರ್‌ದಾಲಾಂಡ್ ಸೈರೊನೆ
ತಿರ್ತನೆಲಚೇ ಬೂರ್ತು ಪುರೆಯೆ ಕಾಮೊದಾ ಜರೊಟು ||

20

ಲಕ್ಕ ದಾಯೆನೆ ಪಿದಯಿ ಬತ್ತದ್
ನಿಲ್ಕ ತೂಯೆನೆ ಮೂಡಯಿಗ್ ಸರಿ
ಪೊರ್ತು ಮೂಡೈರೆಗಾಂಡೊ ಪಂಡ್‌ದ್ ಮನಸ್‌ದೇವುರೊಡು ||
ಇರ್ಲ ನನಲಾ ಉಂಡೆ ಪಂಡ್‌ದ್
ಬತ್ತದುಲಯಿಡ್ ಬೊಲ್ಪು ಬೆಳಗಯೆ
ತನ್ನ ದುತ್ತದ ಅೃತೊ ಬುಡ್ಲದ್ ತೂಯೆನಾ ಮಲ್ಲೆ ||

21

ಆಲ್ ಬರ್ವಲೊ ದಾನೊ ಅಕ್ಕನೆ
ಪಾತೆರೊಗು ಒಪ್ಪುವಲೊ ಅತ್ತಡ
ಆಪುಜಿಂದ್‌ದ್ ಕೆಲಸೊ ಬುಡುವಲೊ ನಂಬುನೆಂಚೇನ್ ||
ಛೇಛಿ ಆವಂದಪ್ಪ ಬರ್ವಲ್
ರಾಣಿ ಪಾತೆರೊ ಮೀರಯಲ್ ನಿಜೊ
ಯಾನ್ ಬೇತೆನೆ ದಾಯೆ ನೆನೆಪುನೆ ಅಪಗ ಬೊಲ್ಪಾಂಡ್ ||

|| ರಾಣಿ ದ್ರೌಪದಿನ ಕೀಚಕನಾಡೆ ಕಡಪುಡಿಯಲ್ ||

ಪುಲ್ಯಕಾಂಡೆನೆ ಲಕ್ಕಿ ದ್ರೌಪದಿ
ಸುದೊ ನೀರ್‌ಡ್ ಮೀದ್ ಕ್ರಿಷ್ಣನ್
ಬಗ್ಗಿ ಬಾವೊಡು ನೆನೆತದಾದಾಲ ಸೂರ್ಯ ದೇವರೆಗ್ ||
ಅಗೊರ್ ಬುಡುದೇ ಕಂಡನೀಯೆರೆ
ದಿವ್ಯೊ ಪಾದೊನು ಮನಸ್‌ಡೆಣ್ಣಿದ್
ತನ್ನ ಕಸುಬುಗು ಪೋಯಲಾಪಗ ರಾಣಿ ಕೈತಡೆಗ್ ||

1

ಆ ಸುದೇಸ್ಲೆನೆ ತೂದುಲಾಲೆನ್
ಬಾರಿ ಪ್ರೀತಿಡ್ ಪಂಡಲಾಪಗ
ಈಯೆ ಕೀಚಕನಿಲ್ಲಡೆಗ್ ಪೋದಲ್ತ್ ಕಲಿ ಕನಲ ||
ಜಾಲ ಕೊರತಿಗ್ ಕಲಿನ್ ದೀಪುನ
ವಾರೊನೇ ಇನಿಯಂದ್ ಕುಜಿಲಿಡ್
ನೀರ್ ಸೆಡಿಯಂದ್‌ನವೆ ಕಲಿನೀ ಕನವೊಡಿತ್ತೆಂದ್ ||

2

ಪನುಪುನೆನ್ ಕೇನ್ನಗನೆ ಆಲೆಗ್
ಮನಸ್‌ಗೇತ್‌ಲ ದುಕ್ಕೊ ಆಯ್ನೇ
ತೆರಿಪವಂದೆನೆ ಪಂಡಲಾಪಗ ಅಲೆಗ್ ಕೈಮುಗಿದ್ ||
ಅಮ್ಮ ಈರೆನ ಮೆಗಿಯೆ ಕಾಮುಕೆ
ಪತ್ತೆರೆನ್ನನ್ ದುಂಬು ಬರುವೆನೆ
ಇತ್ತೆ ಯಾನಾಯನವೆ ಇಲ್ಲಡೆ ಪೋವೊಡೆನೆ ಪಣ್‌ಲೆ ||

3

ಆಯೆ ಪತ್ತೆರೆ ಬನ್ನಗೆನ್ನನ್
ಯಾನ್ ನೆನೆತನ ಸಾತ್‌ಗೆತ್ತೆರ್
ವೀರನಾಕ್‌ಲ್ ಎನ್ನ ಕಂಡನಿಲೈವೆರೊಟ್ಟಾದ್ ||
ಈರೆ ಚಾಕಿರಿಗುಂತುದೇನ್‌ಲ
ಈರೆ ಮೆಗ್ಯನೆ ಕೆರೈಯೆಂದ್‌ದ್
ಆಪುನಪಕೀರ್ತಿನ್‌ಲ ತಪ್ಪವೊಡಿರ್ ಮನಮಲ್ತ್ ||

4

ಯಾರು ಯಾರುದೆ ನಿನ್ನ ಸೊರ್ಕುಡ
ಪಾತೆರೊನು ಬುಡು ಅಂಚಿನಾಕ್‌ಲ್
ಆಂಡ ನಿನ್ನನ್ ದಾಯೆ ಚಾಕ್ರಿಗ್ ಉಂತದೇರ್ ಪನ್‌ಲ ||
ಪೋಪಡನೆ ಪೋಲಂದ್ ಇದ್ದಿಡ
ಜಾರ್ ಮುಲ್ಪಡಿತ್ತೆ ಕೆಲಸೊಗು
ಬೇತೆ ಪೋಣ್ಣಲು ತಿಕ್ಕರೆಂಕೇ ನಿನ್ನ ಹಂಗಿದ್ದಿ ||

5

ಯಾನ್ ಚಾಕ್ರಿದ ಕೆಲಸೊಗುಂತುದು
ರಾಣಿ ಪಂಡನ ಸೇವೆ ಮಲ್ತೆರೆ
ಆಪುಜಿಂದ್‌ದ್ ಪನ್ನುನವು ಸರಿಯತ್ತ ಪಂಡೊಂದು ||
ತಾನೆ ಪಿದಡ್‌ದ್ ಕಲಿತ ಕುಜಿಲಿನ
ನೇಲೊನುಂದೇ ಪಿದಡಿಯಲ್‌ಲಾ
ಪಾಂಡವೆರೆ ಮಹರಾಣಿ ಕಣ್ಣಡೆ ನೀರ್‌ನರಿಪಾದ್ ||

6

ದುರುಳೆ ಎನ್ನನ್ ಹಾಲ್ ಮಲ್ತೆರೆ
ಬರುವೆ ಕಂಡಿತೊ ಎನನ್ ಕಾಪುಲೆ

ಎನುಮೊ ದಿಕ್ಕದ ಪಾಲಕೇರ್ಲ ಪನ್ದ ಕೈ ಮುಗಿದ್ ||
 ಸರುತೊ ಉಂತುದು ಮಿತ್ತ್ ಬಾನೊಗು
 ನಿಲ್ಕ್ ತೂಯಲ್ ಸೂರ್ಯ ದೇವನ್
 ಎನನ್ ಕಾಪುಲ ಸ್ವಾಮಿ ಪಂಡ್ ಪಂದ್ ಬುಲ್ತಲಾಪಗನೆ ||

7

ಸೂರ್ಯ ಪೊಣ್ಣನ ಬುಲ್ತು ಕೇಂಡ್
 ಆಲೆ ರಚ್ಚಣೆಗಾದ್ ಮಾಯೊದ
 ರಾಕ್ಷಸನ್ ಕಡಪುಡಿಯೆ ಗುಟ್ಟುಡು ಏರ್ಲ ತೂಯಿಚೆರ್ ||
 ಆಯಿನಾವಡ್ ಪನ್ದ ನಡತಲ್
 ಕೀಚಕೆನೆ ನಿಲ್ಲೊಂದು ಸಾದಿಗ್
 ಕಾತ್ ದೇ ಕುಲ್ಲೊಂದು ಇತ್ತೆನೆ ಎದುರು ಮಂಟಮೆಡ್ ||

8

ದೂರೊಡುದು ಬರುನೆನ್ ತೂದೇ
 ಬಾರಿ ಸಂತೊಸುಡಾಯೆ ಉಂತುದು
 ನಾಲಿ ನೀರ್ ದ್ ನಿಲ್ಕ್ ತೂಯೆನೆ ಬರ್ಲಿ ದ್ರೋಪದಿನ್ ||
 ಮಾರನಾ ಮದೊತಾನೆ ತಪಸ್ ದ
 ಯೋಗಿನಾಕಲೆ ತಿಗಲೆ ಕಂತುನ
 ಬಾಣೊ ಬರುನ ಪೊರ್ಲು ತೂಪುನ ಬಾಗ್ಯೊ ಎಂಕಾಂಡ್ ||

9

ರತಿನ ಪೊರ್ಲುಗು ಮಣ್ಣ ಪಾಡಡ್
 ಸಚಿನ ದಿನ್ನ್ ಗ ಮಜಿಯೆ ಪೂಜಡ್
 ಸಿರಿನ್ ಸರಸತಿನಕಲೆ ಪೊರ್ಲುನು ಪುಗರುನಾಕಲೆನ ||
 ಉಸುಲು ಕಟ್ಟೆರೆ ದೊಂಡನಮಪೊಡು
 ಪುಗರೊಡೇರ್ಲ ಈ ಸೈರೇಂದ್ರಿನ್
 ಎನನ್ ಬದ್ ಕಯೆರಾದ್ ಬರುನ ಪೊರ್ಲುದಪ್ಪರೆನೆ ||

10

ಬತ್ತ ಬತ್ತದ್ ಇಲ್ಲ ಬಾಕಿಲ್-
 ಗೆತ್ತನಗ ಆ ಮೂರ್ಕನಾಲೆನ್
 ಬತ್ತನಾ ಓ ಎನ್ನ ಜೂವೊದ ಗಂಟ್ ಬಲ ಉಲಯಿ ||
 ನಿನ್ನ ನೆಂಪುಡು ಎಂಕ್ ರಾತ್ರನೆ
 ನಿದ್ರೆ ಬತ್ತಜಿ ನಿನ್ ದೇವೆರ್
 ತರ್ರಯಿನೆ ನಮ ಜತೆತ ಪೊರ್ಲುನು ತೂಪುನಾಸೆಡ್ಲ ||

11

ಉಲಯಿ ಮಂಚವುಗೀಯೆ ಬಲ ಬಲ
 ನಿನ್ ಪ್ರೀತಿಡ್ ತೊಟ್ಟು ಪತ್ತದ್
 ಮದನ ಗೊಬ್ಬದ ರುಚಿನ್ ತೆರಿಪವೆ ನಿನ್ ಮೆಚ್ಚಯೆರೆ ||
 ಪನುಪುನೆನ್ ಕೇನೊಂದು ಬಾಕಿಲ್

ದೆದುರು ಉಂತುದು ಪನ್ನಲಾಯಡ
 ಯಮನ ದೂತೆರ್ ಉಲಯಿಡುಲ್ಲೆರ್ ತೊಟ್ಟು ಪತ್ತೆರೆಗ್ ||

12

ಮೂಜಿಕಾಸ್ ದ ನಾಯಿ ಬಗುಳುನೆ
 ಏರೆಡೆಂದ್ ತೆರಿಡ್ ಕೊರೆಪುಲ
 ಮಾರಿಗೇ ಸಮ್ಮಾನೊ ಮಲ್ಲೆರ್ ನಿನ್ ಎನ್ನಕ್ಲ್ ||
 ಕಾಟೊಗೂರ್ದಲ್ ನಿನ್ ಪೊತ್ತಯೆ-
 ರಾದ್ ನಿನ್ನವೆ ಅಕ್ಕೆ ಎನ್ನಡ
 ಸೂಕರೊಗು ಕರ ಕೊರ್ತಲ್ಂದ್ ಕುಜಿಲಿ ತೋಜಯಲ್ ||

13

ತೊತ್ತು ಚಾಕಿರಿದಾಲೆಗೆಂಚಿನ
 ಗತ್ತ ಪಂಡ್ ಲಾಗೈ ಪತ್ತೆರೆ
 ಕೈತ್ತ ಕುಜಿಲಿನ್ ಮೋನೆಗಡಕ್ ದ ಪಾರ್ಯಲಲ್ಪಡ್ ||
 ಅಲ್ ಪಿರವುಡೆ ಪಾರ್ಡ್ ಆಲೆನ
 ಜುಟ್ಟು ಪತ್ತದ್ ಒಯ್ ಪಾಡಿಯೆ
 ದತ್ತ ಕಾರ್ಡ್ ತೊರಿಪುನಾಪಗ ಸೂರ್ಯ ಕಡಪುಡುನ ||

14

ಮಾಯಕೊದ ರಕ್ಕಸೆನೆ ಕಣ್ಣೆಗ್
 ಆಂಜಿಚೆನೆ ಪಿರವುಡೆನೆ ಬತ್ತದ್
 ಕಾರ್ಡ್ ಸೊಂಟೊಗು ತೊರಿಪುನಾಪಗ ಬೂರ್ಯೆ ಕೀಚಕೆನೆ ||
 ಬೂರ್ನಾಯೆನೆ ಪುರೆಲ್ ಪುರೆಲ್ ದ
 ಸೇರ್ಯೆನಿಲ್ಲದ ಉಲಯಿ ನರಕುನ
 ಕೇಂಡ್ ದಾನಗ ಬತ್ತೆರಾಡೆಗ್ ಚಾಕ್ರಿದಕ್ ಲೊಟ್ಟು ||

15

ಬೂರಿ ಪೆಟ್ಟೆಡ್ ಮುಂಡೊದರಿಂದ್ಲ
 ದಾರೆ ಕಟ್ಟೆದ್ ನೆತ್ತೆರಿನೆನ್
 ದ್ರೋಪದಿಯೆ ತನ ಸೀರೆಡುದ್ಯಲ್ ಮೆಲ್ಲ ಲಕ್ಕೊಂದು ||
 ಸೀರೆ ಸರಿ ಮಲ್ಲೊಂದು ತನ್ನನ್
 ತಾನ್ ದೂರೊಂದಾಲ್ ಪಿದಡ್ ದ
 ರಾಜ ಚಾವಡಿದುಲಯಿಗತ್ತಲ್ ನರಕ್ ನರಕೊಂದು ||

16

ಕಣ್ಣೆಡರಿಪುನ ನೀರ್ನುರ್ದುದು
 ಸುತ್ತ ತೂಯಲ್ ಸಬೆನ್ ಲಾಪಗ
 ಕುಲ್ಲದಿತ್ತೆರ್ ಮಾತ ಮಂತ್ರಿಲು ಸೇರ್ ಪರಿವಾರೊ ||
 ಸಿಮ್ಮೊ ಪೀಟೊಡು ಇತ್ತನರಸುನ
 ಒತ್ತುಡಿತ್ತಲ್ ರಾಣಿ ಕುಲ್ಲುದು
 ಅಲ್ಲನೇ ಕೈಮುಗಿದ್ ಉಂತುದು ಪನ್ನಲಾ ಸಬೆಟ್ ||

17

ಪೀಟೊದರಸುಲು ಮಾತ ಮಂತ್ರಿಲು
ನ್ಯಾಯೊ ಕೇನೊಡು ನಿಕ್‌ಲ್ ಎನ್ನವೆ
ಮಾನೊ ದೆಪೈರೆ ಬತ್ತಿ ಕೀಚಕೆ ಬುಟ್ಟುಡೊಯ್ತೊಂದು ||
ಕಾರ್ಡ್ ಒದ್ದುದು ಮಗ್ಗ ಪಾಡಿಯೆ
ತೂಲೆ ನೆತ್ತರ್ ಮುಂಡೊಡರಿಪುನೆ
ಚಾಕ್ರಿದಾಲೆಗ್ ಇಂಚಿನನ್ಯಾಯೊನುಲ ಮಲ್ತೊಲಿಯೊ ||

18

ಅರಸುಲಾವಡ್ ಮಂತ್ರಿಲಾವಡ್
ಸಬೆಟ್ ಏರ್‌ಲ ಮನಿತ್‌ಚೆರ್ ನಿಜೊ
ದುರುಳ ಕೀಚಕ ಪೋಡಿಯಕ್‌ಲೆನ ತಿಗಲೆಡ್‌ತನಿಟ್ ||
ಏರ್‌ಲಾ ಮನಿಪಂದೆ ಇತ್ತನ
ತೂದು ಪಂಡಲ್ ಕಂಕ ಬಟ್ಟೆಡ
ಈರ್‌ಲಾಂಡಲ ಪನ್ನೆ ಪನ್ನಗ ಆರ್ ಮನಿತ್‌ಚೆರ್ ||

19

ವಲಲ ಏಸೊಡು ಇತ್ತಿ ಬೀಮಗ್
ತಡೆಯೆರಾಯಿಜಿ ತೂದು ಮೋಲೆನ್
ಪಿದಯಿ ಬತ್ತಾದ್ ತೂಯೆನೆದುರುದ ಗೋಳಿದಾ ಮರನ್ ||
ಮೆಗಿಯನಬ್ಬರೊದತೊ ಕಂಕಗ್
ತೆರಿದ್ ಪಂಡನೆ ಧರ್ಮೊದಾ ಮರ
ಅಯಿನ್ ಕಡ್ಡುನ ಬೊಡ್ಡಿ ಕಣಕ್‌ಗ್ ಬೇತೆ ನಾಡ್ಲಂದೆ ||

20

ಅಯ್ಯೊ ದೇವರೆ ಎನ್ನ ಕಸ್ತೊನು
ಕಣ್ಣ್ ದೆರ್ತಾದ್ ತೂಪುನಾಕ್‌ಲ್
ಏರ್ಲ ಇದ್ದರೆ ಕಂಡನೀಯೆರ್ ಐವೆರಿತ್ತಾದ್‌ಲ ||
ನಟ್ಟ್ ತಿರ್ಗೆರೆ ಆಂಡೆ ಮಾನೊಗೆ
ಪೆಟ್ ಆಯಿನೆ ದುಂಬು ಕೌರವ -
ನಲ್ವ ಸೀರೆನ್ ಒಯ್ತರಾಪಗ ಕ್ರಿಷ್ಟ್ ಕಾತ್‌ನಯೆ ||

21

ಕಾಡ್‌ಡೇ ಸೈಂದವೆನೆ ಒಯ್ತುನ -
ಗಾಪಗನೆ ಬಲ ಬೀಮೆ ಕಾತ್‌ನೆ
ಮೂಜನೆದ ಈ ಸರ್ತಿ ಕಾಪುನ ವೀರೆರೆರಿತ್ತೆ ||
ಸಾಂತಿ ಧರ್ಮೊನೆ ಮೇಲ್ ಪನ್ಪುನ
ಪಾತೆರೊನು ಮೀರಯೆರ್ ಧರ್ಮಜ
ಪ್ರೀತಿದಾ ಮೆಗ್ಗುಲ್ಲ ನಾಲ್ವೆರ್ ಎಂಕ್ ಏರುಂಡು ||

22

ಆನಿ ಕಾತ್‌ನ ಕ್ರಿಷ್ಟ್ ಎನ್ನನ್
ಕಾತ್‌ಜೆಡ ಇನಿಯಾನ್ ಬದ್‌ಕಯೆ

ಸ್ವಾಮಿ ಹರಿ ಗೋವಿಂದ ಮುರಹರ ಕ್ರಿಷ್ಟ್ ಪರಮಾತ್ಮ ||
ಬಾಲೆಗೊಲಿನಯೆ ಆನೆಗೊಲಿನಯೆ
ಸೀರೆನಚ್ಚಯೊ ಮಲ್ತನಾಯೆನೆ
ಪ್ರೀತಿಡೆನ್ನನ್ ಕಣ್ಣ್ ದೆರ್ತಾದ್ ತೂಲ ನಾರಯಿಣ ||

23

ಹರಿನ ಪ್ರಾರ್ತನೆ ಮಲ್ತನಕ್‌ಲೆಗ್
ಗತಿಕ್ ತೊಂದರೆ ಬರ್ಪುಜಿಂದಾದ್
ತೆರಿಪಯಿನ ದ್ರೌಪದಿಗ್ ಮನಸ್‌ಡ್ ದೈರೊ ಉಂಡಾಂಡ್ ||
ಐವರೆಂಕ್‌ಲ ಕಂಡನೀಯೆರ್
ಉಲ್ಲೆರಾಂಡಲ ಬೀಮಗನ್ನಡ
ಮೆಚ್ಚಿಗದ ಮಹ ಪ್ರೀತಿ ಉಂಡುಂದೇನ್ ತೆರಿದುಲ್ಲೆ ||

24

ಬೀಮ ಸೇನಡ ಪಂಡದೆನ್ನವೆ
ಮಾನೊ ಕಾಪುವೆ ಪನ್ನೆ ಸಬೆಡಾದ್
ಸೀದ ಪಿದಯಿಗ್ ಬತ್ತನಾಲೆ ಪೊರು ಕಂತ್‌ನೆಟ ||
ಏರೆಗ್‌ಲ ತೆರಿಯಂದಿ ನಮುನೆಡ್
ರಾಣಿ ವಾಸೊಡೆ ಕೆಲಸೊಡಿತ್ತಲ್
ಆ ಸುದೇಸ್ಲೆಗ್ ದೈರೊ ಬತ್ತಜಿ ಮೋನೆ ತೂಯೆರೆಗ್ |

|| ದ್ರೌಪದಿ ಬೀಮಡ ದೂರು ಪನ್ನಲ್ ||

ಮಾತೆರುಂಡುದು ನಿದೆರ್‌ನಾಪಗ
ಸೀದ ಬತ್ತಲ್ ಅಟ್ಟಿಲಡ್ಡುನ
ಕೋಣೆದುಲಯಿಗ್ ಮಸ್‌ಕ್ ದೀಪೊದ ಬೊಲ್ವು ತೋಜಿನೆಟ್ ||
ಬಾರಿ ಮಲ್ಲವೆ ಅಡಿಗದಿಲ್ಲಡ್
ಸಾಲ್ ದೀತ್‌ನ ಕಲಮೆದರಿತವೆ
ಗೋಣೆದಟ್ಟಿನ್ ತೂದು ಬೆಕ್ಕಸೊ ಆನಗಾಪೆಕ್‌ಡ್ ||

1

ಮುಂಚಿ ಸಂಬಾರೊಲೆನ್ ಪೊಡಿ ಪೊಡಿ
ಮಲ್ತನೆನ್ ಕಟರೊಲೆಡ್ ದಿಂಜದ್
ಮುಚ್ಚಿದಿತ್ತೆರ್ ಬಾಯಿನೆಕ್ಕಲೆ ನೂರು ಪಂಡೊಂದು ||
ಚರ್ಮೊ ಜಾರಯಿನೇಡ್ ಕುರಿಕುಲೆ
ನೆತ್ತರಿಪುನ ಮಾಸೊ ನೇಲ್ತಾದ್
ಮಿತ್ತ ದೀತೆರ್ ಅಟ್ಟಿ ಒಯ್ತಾದ್ ಅಡ್ಡುನದೆತುಲಯಿ ||

2

ಮೇರ್ ಕೆಮ್ಮದ ಮಾಸೊ ಪಂಜಿದ
ಸೂಂಟಯಿನ್ ಜಾರಾದ್ ದೀತೆರ್

ಬೇತೆ ಬೇತೆನೆ ಗುರ್ತೊ ತಿಕ್ಕೆರೆಗಾದ್ ಪಾತ್ರೊಲೆಡ್ ||
 ಕೋರಿ ಪುದ ನವಿಲ್‌ಲೆನ್ ತೊಲ್ಲುದು
 ಕಾರ್ಡಕ್ಕ್ಡ್ ದೀತೆರಲ್ಲನೆ
 ಮೀನ್‌ಗುಪ್ಪುನು ಪಾಡ್ಡ್ ಮುಚ್ಚಿಡ್ ಮರತ ಮರಯಿಲೆಡ್ ||

3

ದೀತ್‌ನೆನ್ ತೂವೊಂದು ಅಡಿಗೆದ
 ಸಾಸ್ತೊ ಕಲ್ತನೆ ಬೀಮೆನೇಪೊನೊ
 ಬಾರಿ ಬಿಸೆನೆ ಎನ್ನ ಕಂಡನಿ ಅಡಿಗಿ ಮಲ್ಪಿಯೆರೆ ||
 ಮನಸ್‌ಡಾಲೇ ನೆನೆತ್ ನೆನೆತ್‌ದ್
 ಮುಗುರು ತೆಲಿಕೆಡ್ ನಾಡ್ಯಲಾಯನ್
 ಅವುಲು ಮೂಲೆಡ್ ಒಂಜಿ ಮಂಚವುಡಿತ್ತೆ ನಿದೆರೊಂದು ||

4

ಕೂರಿಗೆನ್ ಕೇನ್ದಾಲೆಗಿಂಚ್ಚೆನೆ
 ಬೀಮೆ ಪನ್ನುನ ಬರವಸ್‌ಡಾಲಾ
 ಪೋದು ಕೈತಡೆ ಮೋನೆ ಮುಸುಕುನು ಮೆಲ್ಲ ಜಾರಯಲ್ ||
 ಆಯ ದಾಡೆನ್ ಈಸ್‌ನಾಪಗ
 ಬೇಕೊ ಲಕ್ಕ್ಡ್ ಕುಲ್ಯೆ ನಿದ್ದೆದ
 ಪೂರ್ತಿ ಅಮಲ್‌ಲ ಬಿರಿದ್ ತೂಯೆನೆ ಬುಡೆದಿ ದ್ರೋಪದಿನ್ ||

5

ಮುಟ್ಟುಗೊಯ್ತಾದ್ ಮಂಚವುಡು ಸರಿ
 ಕುಲ್ಲದಾಲೆಗ್ ಮುತ್ತೊ ಕೊರೈನೆ
 ತರ್ಕ್ ಪತ್ತದ್ ಕುಜಲ್‌ನೀಸಿಯೆ ರಾಣಿ ದ್ರೋಪದಿನ ||
 ಇರ್ಲ್ ದಾಯೆಗ್ ಬತ್ತ ಈಡೆಗ್
 ಗುಟ್ಟುಡೆನಡನೆ ಪನ್ನ ಕೇನ್ವೆರ್
 ಮುಲ್ಲ ಜೆತ್ತನ ಮಾಸೊ ತಜಪುನ ಚಾಕ್ರಿದಾಕ್‌ಲಲ ||

6

ಕೋಡೆ ಕೀಚಕೆ ಎನ್ನ ಜುಟ್ಟುನು
 ಸಾದಿಡೊಯ್ತೆನೆ ಮಗ್ ಪಾಡ್‌ದ್
 ಕಾರ್ಡೊದ್ದಿಯೆನಪಗ ಎನ್ನವೆ ಮುಂಡೊ ಪುಡದಾಂಡ್ ||
 ಆಪಗನೆಲಾ ರಾಜ ಸಬೆಕೇ
 ಪೋದು ಬಿನ್ನೈತೊಂಡೆ ಏರ್‌ಲ
 ಮೋನೆ ತೂಯ್ಜಿರ್ ಎನ್ನ ಕಸ್ತೊನು ಕೇನ್ವೆರಾ ಸಬೆಟ್ ||

7

ದುಪದ ರಾಯನ ಮಗಲ್ ಯಾನೇ
 ನಿಕ್‌ಲೆನ್ನೆವೆರೆ ಕೈನ್ ಪತ್ತದ್
 ಗತಿಯೆ ಇದ್ಯಂದಾನವೆ ನಮುನೆಡ್ ಚಾಕ್ರಿಗುಂತೊಂಡೆ ||
 ಪತಿರುತೊನು ಕಾತೊಂದು ಉಪ್ಪೊಡು
 ಪನುಪುನಾಸೆಡ್ ನಿಕ್‌ಲೆನೊಟ್ಟುಗು
 ದಿನೊನು ದೆಪ್ಪುನ ಕಸ್ತೊ ಇತ್ತೆನೆ ಎಂಕ್ ಆಂಡತ್ತೊ ||

8

ಎನ್ನ ಕಂಡನಿನಕ್‌ಲೆ ಪೈಕಿಡ್
 ಬಿರ್ರೆನೇ ಬಲೊ ಬೀಮೆ ಪನ್ನುನ
 ಪೆರೈ ಪಡೆಯಿನ ಈರೆಡೇನ್‌ಲ ದೂರು ಪನಿಯೆರೆಗ್ ||
 ಬತ್ತನಾಲೆಗ್ ದಾನೆ ಪನ್ನರ್
 ಪನ್ನಗನೆ ಆ ಬೀಮೆನಾಲೆಡ
 ಪನ್ನೆ ಪಲಯನ ಧರ್ಮೊನಿಸ್ವೆಗ್ ಎಂಚ ಎದುರುಂತ್ತ್ ||

9

ಕೋಡೆ ಈ ಬುಲ್ಲುನಗ ಕೋಪೊಡು
 ಗೋಳಿದಾ ಮರನೇನ್ ತೂನಗ
 ಆಯೆ ಧರ್ಮೊದ ಸೂಸಿಮೊನು ಸರಿ ಎಂಕ್ ತೆರಿಪಾಯೆ ||
 ಸಾಂತಿ ಸಮದಾನೊಲೆನ್ ಪನ್ನುನ
 ಪ್ರೀತಿದಣ್ಣನ ಪಾತೆರೊನು ಇನಿ
 ಮೀರಿಯೆರೆ ಸಾದ್ಯೊಂಡೊ ಯಾನ್‌ಲ ಆಯ ಮೆಗಿಯಾದ್ ||

10

ಬುಡೆದಿ ಮಾನೊನು ಕಾಪೈರಾವಂ-
 ದಾನವೆ ನೀತಿಯೆ ಉಂಡೊ ಧರ್ಮೊಡು
 ಎನನ್ ಕೆರ್ಪರೊ ನಿಕ್‌ಲ್ ಐವೆರ್ ಕಂಡನಿಯೆರಾದ್ ||
 ಪನ್‌ಲ ಪಾರ್ತಡ ಆಯೆ ಬಿರ್ರೆನೆ
 ನಕುಲ ಸಾದೇವೆರ್‌ಲ ನಿನ್ನನ್
 ಬುಡಯೆರಾಕ್‌ಲ್ ಎನಡ ಮಾತ್ತೊನೆ ದಾಯೆ ಪನ್ನುನೆಯೆ ||

11

ಆ ದುರ್ಮೋದನ ಸಬೆಟ್ ನಿನ್ನವೆ
 ಸೀರೆನೊಯ್ಪುನಗೇನ್ ಲಕ್ಕಿಯೆ -
 ನಾಪಗನೆ ಎನ್ನಣ್ಣೆ ಪಂಡೆನೆ ಬೊಡ್ಡಿ ಬೊಡ್ಡಿಂದ್ ||
 ಆ ನಪುಂಸಕಗೇನ್ ಪುಟ್ತಾನೆ
 ದಾಯೆ ಮೆಗಿಯಾದ್‌ಂದ್ ತೆರಿಪುಜೆ
 ಮಾನೊ ಹೀನೆನೆ ಆದ್ ಬದ್‌ಕೊಂದುಲ್ಲೆ ಬೆಂದೊಂದು ||

12

ಈತ್ ಪನ್ನುನ ಕೇನ್ದ ದ್ರೋಪದಿ
 ನೀರ್ ಕಣ್ಣೆಡೆ ಅರಪದಪಗನೆ
 ಏತೊ ಬುಲ್ಲುದು ಸೇಂಕ್ ಸೇಂಕ್‌ದ್ ಪನ್ನಲಾಯಡನೆ ||
 ಏರೆ ರುತೊ ಬಂಗೊನುಲ ಮಲ್ತೆನೊ
 ಏರೆನಾ ಬುಡೆದಿಗ್‌ಲ ಅನ್ಯಯೊ
 ನೇನ್ ಮಲ್ತೆನೊ ಕರಿನ ಜಲ್ಲೊಡು ಇಂಚ ಆಯೆರೆಗ್ ||

13

ನಿಕ್‌ಲ್ ಐವೆರ್ ಎನ್ನನೊರ್ತಿನ
 ಮದಿಮೆ ಆಯರ್ ರಾಜ ಸೂಯೊದ

ರುತೊಟು ಚಂಡಿಯೆ ಆಯ್ನ ಕುಜಲ್ನ್ ಒಯ್ತೆ ದುಸ್ವಾಸೆ ||
ಜುಗರಿ ಗೊಬ್ಯರ್ ಕಾಡ್ ತಿರ್ಗ್ಯರ್
ಎನನ್ ಲೆತೊನುದು ಬತ್ತರೊಟ್ಟಿಗೆ
ದುರುಳ ಕೀಚಕಗನನ್ ಕೊರ್ಪುನ ನಿಕ್ಲೆನಂದಾಜಿ ||

14

ಬಾಗ್ಯವಂತೆನೆ ಬಾವೆ ಕೌರವೆ
ಮಾನೊ ಕೆಟ್ಲೆನ ನಿಕ್ಲೆ ರಾಜ್ಯೊನು
ಪೂರ ಒಯ್ತಾದ್ ಕಾಡ್ ಗಿಡರಿಯೆ ಬಿರೆ ನಿಜವಾದ್ ||
ಯಾನ್ ನಿಕ್ಲೆನ ಒಟ್ಟು ಬದುಕುಜಿ
ನಾಲಿಗುರ್ಲುನು ಪಾಡ್ಲೆನೊ ನನ
ಗೂವೆಲ್ಗ್ ಲಾಗಿವೆನೊ ಇಸೊನೇ ಪರ್ದ್ ಸೈಪ್ಪುನೆನೊ ||

15

ಈತ್ ಪನ್ನಗ ಬೀಮನಾಣ್ಕೆದ
ಸೂವೆ ಗುಮುಲುದುಲಾದ್ ಆಲೆನ್
ತಾನೆ ಒಯ್ತಾದ್ ಮುಟ್ಟ ಕುಲ್ಲದ್ ಕುಜಲ್ನೀಸೊಂದು ||
ಪ್ರೀತಿದಾ ಪುತ್ತೊಳಿಯೆ ಬುಲ್ಲಡ
ಕೀಚಕನ ಪುಗೆ ಗಾಳಿಗೇನೇ
ರಾಪವುನ ಈ ತೂಲ ಎನ್ನನ್ ಏರ್ ತಲಿಪೆರಾಯೆ ||

16

ಅಣ್ಣೆನೋ ಅತ್ತೆನ್ನ ಮೆಗೈನೆ
ಅರುನೆನೊ ಸಾದೇವ ನಕುಲೆರೊ
ಅತ್ತ ಕ್ರಿಷ್ಟೆನೊ ತಲಿಪುನಾಕ್ಲ್ ಯಾನ್ ತೂವೊನುವೆ ||
ದುಸ್ಪ ಕೀಚಕ ಕರ್ಲನೊಯ್ತಾದ್
ದಕ್ಕೆ ನಾಯಿಲು ತಿನಡ್ ಪಂಡಾದ್
ನೆತ್ತೆರಡ್ ಓಕುಳಿನ್ಗೊಬ್ಬೆರೆ ಯಾನ್ ತೀರಾಯೆ ||

17

ಆಯನೆಲ್ಲೆನೆ ಇರ್ಲ್ ನಾಟ್ಯೊದ
ಸಾಲೆಗೇ ಬರೈರೆಗ್ ಪಲ್ಲಯ
ಪೋಲ ಚಿಂತೆನ್ ಬುಡುದು ನಿರ್ದೆನ್ ಮಲ್ಪು ಮಂದಿರೊಡು ||
ಭೀಮನಾ ಪಾತೆರೊಡು ಉಬ್ಬುಡೆ
ದಾಲ ಇದ್ದಿಂದಾಲ್ ತೆರಿತ್ನ
ಜಾಣೆ ದ್ರೌಪದಿ ಸಂತೊಸುದ ಕಣನೀರ್ನರಿಪಯಲ್ ||

18

ಆಣ್ ಮಗೆ ಈರೆನ್ನ ಕಂಡನಿ -
ಯಾದ್ ಎನ್ನವೆ ಮಾನೊ ಕಾಪೈರೆ
ತೀರುನಾರ್ಂದೆಂಕ್ ದುಂಬೇ ಗೊಂತು ಉಂಡತ್ತೊ ||
ಯಾನ್ ಈರೆನ್ ಹಂಗ್ಸಾಯಿನ
ಪಾತೆರೊನು ಮನ್ನಿಪುಲೆ ಪಂಡಾದ್
ಕಾರ್ ಪತ್ಯಲ್ ಲಕ್ಕದರದೇ ತೊಟ್ಟು ಪತ್ತಿಯಲ್ ||

19

ದುಸ್ಪನೇ ಕೆರ್ದೀರ್ ವಂಸೊದ
ಮರೈದಿನ್ ಒರಿಪಿಂದ್ ಮೋನೆಗ್
ಮುತ್ತೊ ಕೊರೈಲ್ ಪೋಪೆ ಪಂಡಾದ್ ಪಿದಡ್‌ದುಂತಿಯಲ್ ||
ಏರೆಗ್ಲ ತೆರಿಯಂದಿಲೆಕ್ಕೊನೆ
ಜಾಗ್ತೆಡ್ ಈ ಪೋಲ ಪಂಡಾದ್
ಕೀಚಕನ ಯಮರಾಯೆ ನಿರ್ದೆಯೆ ತನ್ನ ಮಂಚವುಡು ||

|| ಬೀಮೆ ಕೀಚಕಾದಿಲೆನ್ ಕೆರಿಯೆ ||

ಕಾಂಡೆ ಲಕ್ಕಾದ್ ತನ್ನ ಕೆಲಸೊನು
ತೀರ್ದದಾ ದ್ರೋಪದಿಯೆ ಪಿದಡ್‌ದ
ಕೀಚಕನ ಇಲ್ಲಲ್ದ ಎದುರುಡೆ ನಡತ್ ಪೋನಗನೆ ||
ಆಲೆಡನೆ ಪಾತೆರೆರೆ ಪೋಡಿಡ್
ಕೋಡೆ ದಾನೋ ತಪ್ಪು ಎನ್ನಡ್ -
ದಾಯಿನೆಟ್ ಸರಿ ನಿರ್ದೆ ಬತ್ತೆಜಿ ರಾತ್ರ ಜಾಗರೊನೆ ||

1

ಯಮನ ಪಾಸೊದ ಉರ್ಲುಕಾಯಿನ -
ವಕಲೆಗೆಂಚಯ ನಿರ್ದೆ ಬರ್ಪುನೆ
ಪೊಲಿನ ಸೊಂಚೊನೆ ಸರ್ತೊ ಆಂಡೊಯ ಲಕ್ಕದುಂತಿಯನ ||
ಪಿಸ್‌ರ್ ಮಲ್ಪಡ ಪೊಣ್ಣೆ ನಿನ್ನನ್
ಒರೊನೆ ಆಂಡಲ ಕೂಡ್ಲ ಸೈತ್ತೆಡ
ಸುರೆರೆ ಲೋಕೊಡು ಸ್ತಾನೊ ಇದ್ದಿಡ ನರಕೊ ತಿಕ್ಕಡ್‌ಯ ||

2

ನಿನ್ನ ಆಸೆನ್ ತೀರ್ದವಡೊ ಬಲ
ಗುಟ್ಟುಡೇ ಇನಿ ಈ ನಡೀರ್ಲಡ್
ಸೊರೊ ಸುಕೊ ತಿಕ್ಕುನೆಕ್ ಅಡ್ಡಿಯೆ ಇದ್ದಿ ಗೊಂತಾಂಡೊ ||
ಮುಲ್ಲದಾ ನಾಟ್ಯೊದವೆ ಸಾಲೆಡ್
ತಿಕ್ಕಲಯ ಗೊಂತಾಂಡ ನಿನ್ನನ್
ಕೆರೈಯ ಕಂಡನಿಲು ಜಾಗ್ತೆ ನೆಂಪು ದೀವೊನುಲ ||

3

ರಾಣಿಗೇ ಮಾಸೊದವೆ ಕಜಿಪುನು
ತಾನ್ ಕೊಂಡ್ಪುವೆ ಪನ್ನಿ ನೆವನೊಡು
ಸೀದ ಬತ್ತಲ್ ವಲಲ ಭಟ್ಟೆನ್ ಕೇನ್ ಅಟ್ಟಿಲ್ದ ||
ಕೋಣೆದುಲಯಿಗ್ ಕಣ್ಣೆ ಮೆದ್ದದ್
ಆಯೆ ಬರ್ಪುನ ಸಮಯೊ ಪಂಡಲ್
ಈರ್ ರಾತ್ರೆಡೆ ಊರ್ದ ಪಂಜಿನ್ ಕೆರೈ ಗೋಂದೊಳುಗು ||

4

ಗಟ್ಟಿಡೇ ಪಂಡೊಂದು ಪೋನಗ
ನಿನ್ನ ಸೀರೆನ್ ಒಂಜಿ ಕನತ್‌ದ್
ಗುಟ್ಟುಡೇ ಕೊರ್ಲಂದ್ ಪಂಡೆನೆ ಬೀಮೆ ದ್ರೋಪದಿಡೆ ||
ಅಟ್ಟಿಲೊಣಸ್‌ಲ ಆದ್ ರಾತ್ರೇಡ್
ಚೆತ್ತೆರಲ್ಲದ ಮಾತ ಕೆಲಸೊಗು
ಇತ್ತನಾಕ್‌ಲ್ ಅಪಗ ಭೀಮೆನೆ ಮೀದ್ ಸುದ್ದಾಯೆ ||

5

ಮೆಯಿಕ್ ಗಂದೊನು ಪೂಜಿದಾಯೆನೆ
ಸರಿಟ್ ಕಚ್ಚೆನ್ ಬಿಗಿತ್ ಕಟ್ಟಿಯೆ
ಅಪಗ ದ್ರೋಪದಿ ಬತ್ತಾದುಂತುದು ಸೀರೆ ತುತ್ತಯಲ್ ||
ಕಯಿಕ್ ಬಳೆ ತಲ್ಯಯಲ್ ಮೋನೆಗ್
ಸರಿಟ್ ಮುತ್ತೊನು ಕೊರ್ಪು ಪ್ರೀತಿಡ್
ಪೊದಕೆದಾ ಗುಡಿ ಪಾಡ್ ಪೋಲೆಂದಾಲ್ ಕಡಪುಡುದು ||

6

ತಾನ್‌ಲಾ ಪಿರವುಡೆನೆ ಪೋಯಲ್
ನಾಟ್ಯೊ ಸಾಲೆದ ಬೆರ್ತೆಕ್‌ಡ್ ತನ್
ಕಾಪಿ ಜಾಗೆಡ್ ದೆಂಗ್‌ದುಂತ್ಯಲ್ ಲಡಯಿ ತೂಯೆರೆಗ್ ||
ಕೀಚಕೆನೆ ನಡುರಾತ್ರ ಸಮಯೊಡು
ಬಾರಿ ಪೊರ್ಲದ ದುತ್ತದೈತ್ತೊಡು
ಮೇಲ್ಗ್ ಕಮ್ಮೆನೊ ಗಂದೊ ಕಸ್ತರಿ ಮಾತ ಪೂಜೊಂಡೆ ||

7

ತೂರಿಡಿತ್ತನ ಕಲಿನ್ ದಿಂಜದ್
ಬಾಯಿ ನಾದುಂದಾಯೆ ಕರ್ಪುರೊ
ಪೂಲು ಬಚ್ಚಿರೆ ಅಗ್ಗಿದಗ್ಗಿದ್ ತಡ್ಯ ಕಡಪುನಗ ||
ಆಯ ಬಲತವೆ ಕಾರ್ಗದಂಟ್‌ನ
ಬೇನೆ ತಡೆದಾಲ ಮೊಟ್ಟು ಜತ್ತೆನೆ
ಅಪಗನೆ ಸರಿ ಬಾಂಗ್ ಪತ್ತಿಯೊ ಪಳ್ಳು ಕುದೈರಾಲ ||

8

ಆಕಸೊಡು ಸರಿ ದೂಮ ಕೇತುಲ
ಮೂಡೆನೆನ್‌ಲಾ ಗಣ್ಯೊ ಮಲ್ತಜೆ
ಪೋಕಲೊದ ಈ ಪೊಣ್ಣ ಮರ್ಲೆಗ್ ಎಂಚಿನರ್ತಾವು ||
ಗೂಮೆ ಮೂಲ್‌ನಗಾಯೆ ಎತ್ತಿಯೆ
ನಾಟ್ಯೊ ಸಾಲೆಗ್ ಉಲಯಿ ಪೊಗ್ಗುದು
ತೂನಗನೆ ಮಂಚವುಡು ಚೆತ್ತನ ಪೊಣ್ಣು ಸೈರೇಂದ್ರಿ ||

9

ಪನ್ನುನಾ ಬರವಸ್‌ಡ್ ನಿಲ್ಪಿಯೆ
ಮೆಣ್ಣುನೆಲೈದ ಬೊಲ್ಪುಡಾಯಗ್

ಕಣ್ಣೆಗಾಂಜಿದ್‌ಲಾಂಡ್ ಸೀರೆನ್ ಪೊದತ್ ಚೆತ್ತನಲ್ ||
ಪೊರ್ಲದಿಯೆ ಎನನೀಡೆ ಬರೈರೆ
ಪನ್‌ನಾಲೇ ಪನ್ದ ಕೈತಡೆ
ಮೆಲ್ಲ ಪೋದುಲ ಲೆತ್ತನಾಲೆನ್ ಲಕ್ಕ ಲಕ್ಕಂದ್ ||

10

ತೂಲ ಯಾನೇರ್‌ಂದ್ ಲಕ್ಕದ್
ಮೋಕೆಡೀಯೆ ಪಾತೆರೆನ್ನಡ
ಆತುರೊಡು ಬತ್ತನಯಗಿಂಚನೊ ನಿನ್ನವೆದೊನುನ ||
ರೀತಿಯೋ ಪನ್ ಒತ್ತ ಕುಲ್ಲುದು
ಪ್ರೀತಿಡೆನ್ನನ್ ತೊಟ್ಟು ಪತ್ತದ್
ಜೋಡಿ ಸರಿಯೊ ಪಂಡ್‌ದನ್ನನ್ ತೂಲ ಕಣ್ಣುಡುದು ||

11

ಮದನ ಗೊಬ್ಬುಡು ನಿನನ್ ಬೊಡಿಪದ್
ಬುಡುವೆ ಕಂಡಿತೊ ಎನ್ನ ಸೈರೊದ
ಸುಕೊನು ಪಡೆಯೆರೆ ಏತೊ ಪೊಣ್ಣಲು ಆಸೆಡುಲ್ಲೆರಾಯ ||
ನಮುನೆ ನಮುನೆದ ಗೊಬ್ಬು ತೋಜವೆ
ರತಿಡ ಮನ್ಮತೆ ಪುಣೆಪುನಂಚೆನೆ
ನಮೊನೆ ಸೊರೊದ ಸುಕೊನು ಮೂಲೇ ಪಡೆದ್ ಬದಕೊನುಗೊ ||

12

ಏವುರೊಡು ಆ ಮರ್ದೆ ಮೇಲ್‌ಗ್
ಬೂರುದಮತ್‌ದ್ ಪತ್ತನಾಯಗ್
ಭೀಮನಾ ಸೈರೊದವೆ ಗಟ್ಟಿಯೆ ಪನ್ದ ತೆರಿಯಂದೆ ||
ಆಚಿರೊಡು ಲಕ್‌ದುಂತುದಾಯೆನೆ
ದಾನೆ ಮೆದುಮೆಯಿ ಗಟ್ಟಿಯಾತ್‌ನೆ
ಮಾಯಕೊದ ಸೈರೊನೆಯ ನಿನ್ನವು ಪನ್ನಗನೆ ಬೀಮೆ ||

13

ಮೆತ್ತನೊನೆ ಗಟ್ಟಾದ್ ತೋಜನೆ
ಬೊಲ್ಪು ಇರ್ದಾದಿತ್ತೆ ಆಂಜುನೆ
ಮುರ್ತು ಬಾಯಿಗ್ ತಿಕ್ಕುನಾಯಗ್ ಮಾತ್ತೊ ಗೊಂತಾಂಡೊ ||
ಇತ್ತೆ ನಿನ್ನನ್ ತೊಟ್ಟು ಪತ್ತದ್
ಗೊಬ್ಬು ತೋಜವೆ ಯಮನ ಪಂಡ್‌ದ್
ಜುಟ್ಟುಡೊಯ್‌ದ್ ಬಗ್ಗದಾಯಗ್ ನಾಲ್ ಗುದ್ದಿಯೆನೆ ||

14

ಕೀಚಕೆಲ ಆ ಬೀಮಗೇ ಸರಿ
ತ್ರಾಣೊದಾಯೆನೆ ಸರೊ ಉಂತುದು
ನಾಲ್ ಗುದ್ದಿಯೆ ಬೆರಿಕ್ ಬೀಮನ ಅಕ್‌ಲ್ ಇರ್ದೆರಾಲ ||
ಏಶಲಾ ಗುದ್ದೊಂದು ಉಪ್ಪುನ
ತೂಯಲಾ ದ್ರೋಪದಿಯೆ ನಿಲ್ಕದ್
ಸಾಪೊ ಕೊರೈಲ್ ಕೀಚಕಗ್ ಈ ಮಣ್ಣೆ ಮುಕ್ಕುದು ||

15

ಇರ್ವೆರ್ಲ ಉರ್ಡಿಂಯೆರ್ ಪುರೆಲ್ದಾದ್
ತಿರ್ತ್ ನೆಲಟೀ ಬೂರ್ವು ಅಡಿಮೇ
ಲೊರ್ವನೊರ್ವನ್ ಪಾಡ್ಡ್ ಲಕ್ಶೆರ್ ಪತ್ತ್ ಪತ್ಯೆರೆಗ್ ||
ಮಲ್ಲ ಪತ್ತ್ನ್ ಪತ್ತ್ನಾಪಗ
ಬುಡ್ಡವೊಂದೇ ನಾಲಿನಮತ್ದಾದ್
ಪತ್ಯೆ ಕೀಚಕೆ ಬೀಮೆನಾಪಗ ಕೈನ್ ಬುಡ್ಡಾದ್ ||

16

ಮಾಗದಡಲಾ ಬಕ ಹಿಡಿಂಬಡ
ಸಾದನೆಡ್ ಮಲ್ತನವೆ ಲಡಯಿನ್
ತಾನ್ ಮಲ್ಲುನ ಬರವಸ್ಡಲಾ ಬೀಮೆ ತಯರಾಯೆ |
ಕೋಂಕನಾಲಿನ್ ಅಮತ್ಪತ್ತ್ದಾದ್
ಕೋಪೊಡೆಲ್ಲೆಗ್ ಗುದ್ಯೆ ತಿಗಲೆಗ್
ಕಾರ್ಡೊದ್ಯೆನೆ ಪತ್ತಿ ಪತ್ತ್ನ್ ಬುಡುಜೆ ಗುದ್ದನಗ ||

17

ದಮ್ಮ ಕಟ್ವೆದ್ ಬೂರ್ವೆ ಕೀಚಕೆ
ಬುಕ್ಕೊಲಾ ಸರಿ ದತ್ತ ಬಲತ್ದಾದ್
ಅಲ್ಲೆಲೆಗ್ ಗುದ್ದನಗ ನೆತ್ತೆರ್ ಕಕ್ಕಿನಾ ದುಸ್ಸೆ ||
ಕಣ್ಣೆ ಮರೆಲ್ದಲಾಂಡ್ ಆಯನ
ಒಯ್ಪರೆಗ್ ಸುರುವಾಂಡ್ ಸ್ವಾಸೊನೆ
ಸಯ್ಪುಜೆನೆ ಪಂಡೊಂದು ತಿಗಲೆಗ್ ಒದ್ಯೆ ರಣಬೀಮೆ ||

18

ಉಸುಲು ಉಂತುದುಲಾಂಡ್ ಆಯನ
ದುಪದ ಮಗಲಾಡೆಗಲ ಬತ್ತ್ದಾದ್
ಅರದ್ ಪತ್ಯೆಲ್ ಬೀಮೆನಾಪಗ ಪ್ರೀತಿ ಗೌರವೊಡು ||
ಪಿದಯಿ ಬತ್ತ್ದಾದ್ ನಿದೆರ್ದಿತ್ತನ
ಕೆಲಸೊದಕಲೆಡ ಪಂಡಲಲ್ಲನೆ
ಎನನ್ ಪತ್ಯೆರೆ ಬತ್ತ್ನಾಯನ್ ಕೆರೈನ್ನಕ್ಲ್ ||

19

ಚಾಕ್ರಿದಾಕ್ಲ್ ಪೋದುಪಂಡೆರ್
ಕೀಚಕನ ಮೆಗ್ಯೆಲ್ಲೆಡಪಗನೆ
ಪಾರ್ ಬತ್ತ್ದಾದ್ ಪಲಯ ಪುಣನ್ಲ ತೂದು ಬುಲ್ತೊಂದು ||
ಪೋನಗನೆ ದ್ರೌಪದಿನ್ ತೂಯೆರ್
ಮೋಲು ಕೆರ್ಪಯಿನೆಂದ್ ಆಲೆನ್
ಕಾಟೊಗೇ ಕೈಕಾರ್ ಕಟ್ವೆದ್ ಪಾಡ್ಡೊ ಪಂಡೊಂದು ||

20

ಪತ್ತ್ದಾಲೆನ್ ಒಯ್ತ್ ಕೊಂಡೊನ
ಗಲ್ಲ ಬುಲ್ತುದು ಬೊಬ್ಬೆ ಪಾಡ್ಯಲ್

ಬುಡ್ಡಲೆಯೆ ಕಂಡನಿಲು ಬತ್ತ್ದಾದ್ ಮಿತ್ತ ಲೋಕೊಡುದು ||
ಬುಲ್ತು ಕೇಂಡೆದ್ ಬೀಮೆ ಸೇನೆನೆ
ಗೆಲ್ವನೊಂಜೆನ್ ಕೈಟ್ ಪತೊನುದು
ಮಲ್ಲ ಸಾಸೊಡು ಹಾಕ್ ಹಾಕ್ದ್ ಮಾತ ಚೆಪುಡಯೆನೆ ||

21

ಲೆಕ್ಕೊಗೇ ನೂತ್ತೈನ್ ವೀರೆರ್
ಸೈತ್ತ್ ಬೂರ್ವೆರ್ ಕೀಚಕಾದಿಲು
ಬೊಲ್ತು ಬೊಲ್ವಾನಗನೆ ಪೋಯೆರ್ ಮೀದ್ ಇರ್ವೆರ್ಲ ||
ಸುದ್ದಿ ಅರಮನೆಗೆತ್ತದಾನಗ
ಬತ್ತೆರಾಡೆಗ್ ಮಾತ ಪಂಡೆರ್
ಮುತ್ತಯಲ್ ಸೈರೇಂದ್ರಿ ಕೀಚಕನಕ್ಲೆ ಸಂತಾನೊ ||

22

ಕಾಂಡೆ ಅಡಿಗದ ಕೋಣೆದುಲಯಿಡ್
ಬೀಮೆ ನಿತ್ಯೊದ ಕೆಲಸೊಡಿತ್ತನೆ
ಆಪಗನೆ ಆ ಪಾತ್ರೊ ದೆಕ್ಕುನ ಕೆಲಸೊದಕ್ಲೊಟ್ಟು ||
ಪಾರ್ಡ್ ಬತ್ತೆರ್ ವಲಲ ಭಟ್ಟೆಡ
ಕೀಚಕನ್ ಗಂದರ್ವೆ ಕೆರೈಗೆ
ನಾಟ್ಯೊಸಾಲೆಡ್ ರಾತ್ರೆ ಪನ್ನಗ ತರೆಕ್ ಹಾಕೊಂಡೆ ||

23

ಕಣ್ಣೆ ಕಟ್ವೆದ ಬೇಜರೊಡುಲಾ
ಅಯ್ಯೊ ಕೀಚಕೆ ಸೈತ್ತ್ ಪೋಯೆನೆ
ಕೆರೈಯಲೊ ಸೈರೇಂದ್ರಿ ನಂಬುನೆ ಎಂಚ ಪೋಣ್ಣಲೆನ್ ||
ನಿತ್ಯೊ ಕೆಲಸೊಡು ಇತ್ತ್ನಾಲೆನ್
ಬರೈಯಲ್ ಮಾರಾಣಿ ನಿನ್ನನ್
ಮುಲ್ಪ ಉಂತಯಿನೇಕ್ ಪೊರುಡೆ ಕೊರ್ವೆ ಪ್ರತಿಪಲೊನು ||

24

ಮುರ್ತ್ಯು ದೇವತೆಯಾದ್ ಕೆರೈಯ
ಎನ್ನವೇ ಮೆಗ್ಯೆಲ್ಲೆನೀಯೆ
ನಿಕ್ಕ ಎಂಚಿನ ದೋಸೊ ಮಲ್ತದೆ ಪನ್ನ ಸೈರೇಂದ್ರಿ ||
ಅಮ್ಮ ಈರೆನ ಮೆಗ್ಯೆ ಎನ್ನನ್
ಒಯ್ಪರೆಗ್ ಬತ್ತ್ನೆಟ್ ಆಯನ್
ಎನ್ನ ಕಂಡನಿ ಕೆರ್ನೆಟೆಂಚಿನ ತಪ್ಪು ಪನ್ಲೆಮ್ಮ ||

25

ಮೂಲು ಉಂತುನ ಬೊಡ್ಡಿ ಈಯೆ
ಪೋಲ ಮುಲ್ಪಡ್ಡಿತ್ತೆ ಎಡ್ಡೆಡ್
ವಿರಾಟೆರೆ ಜೂವೊನೊರಿಪುಲ ಪನ್ನಗಾಲಪಗ ||
ಯಾನ್ ನನ ಪದಿಮೂಜಿ ದಿನೊನೇ
ಪೂರ್ತಿ ಕಳೆದಲ ಪೋಪೆ ಈರೆಗ್
ದಾಲ ಅನ್ಯಯೊ ಮುಲ್ಪಯೆಂದ್ ಪನ್ನ ಉಂತಿಯಲ್ ||

ರಡ್ಡನೇ ಸಂದಿ

|| ಕೀಚಕೆ ಸೈತ್ತನ ಸುದ್ದಿ ಹಸ್ತಿನಾವತಿಡಾಂಡ್ ||

ರಾಜ ಚಾವಡಿಡರಸು ಕುರುಪತಿ
ರಾಜಕೀಯೊದ ಸುದ್ದಿಡುಪ್ಪುನ-
ಗಾಪಗನೆ ಪಾರ್ಬತ್ತೆರಾಡೆಗ್ ಸುದ್ದಿ ಪನಿಯೆರ್ಗ್ ||
ದೂರೊ ತೆನ್ನಯಿ ದೇಸೊ ತಿರ್ಗನ
ಗೂಡಚಾರೆರ್ ಅಡ್ಲೊ ಬೂರುದು
ಕೀಚಕನ್ ಕೆರೈನ್ ಪಂಡೆರ್ ಇವರೊ ಇವರಾದ್ ||

1

ಆ ವಿರಾಟನ ರಾಣಿ ಚಾಕಿರಿ-
ದಾಲೆನೊಯ್ಪರೆ ಪೋಯಿನಾಪಗ
ವೀರಗಂದವೇನೆ ಕೆರೈಗೆ ನಾಟ್ಯೊ ಸಾಲೆಡ್ಲ ||
ಕೇಂಡರೋ ಸಬೆತಕ್ಲ್ ಬೀಸ್ಮೆರ್
ದೋಣೆರಸ್ತತ್ತಾಮ ಕರ್ಣೆರ್
ಪಾಂಡವೆರ್ ತೆನ್ನಯಿ ವಿರಾಟನ ರಾಜ್ಯೊಡುಪ್ಪುನವೆ ||

2

ನಿಚ್ಚೆಯೊದ ಸರಿ ಸುದ್ದಿ ತಿಕ್ಕನೆ
ಇತ್ತೆ ಕೀಚಕನಲ್ಲ ಕೆರೈನ
ಗಟ್ಟಿಗೆನೆ ಏರ್ಂದ್ ತೆರಿಯರೊ ಭೀಮೆ ಕಂಡಿತೊನೆ ||
ಸಲೈಲಾ ಬಲರಾಮೆ ಕೀಚಕೆ
ಬುಕ್ಕೊ ಬೀಮೆಲ ನಾಲ್ವೆರೊಂಚೆ
ಮಟ್ಟವೆ ಬಲೊತಕ್ಲ್ ಪನ್ನುನ ಲೋಕೊ ತೆರಿದುಂಡು ||

3

ಕೀಚಕನ್ ಕೆರೈರೆಗ್ ಬೀಮೆಗ್
ಮಾತ್ರೊ ಸಾದ್ಯೊನೆ ಬೇತೆ ಏರೆಗ್
ತೀರು ಇಂಚಿನ ಸಾಸೊ ಮಲ್ಲೆರೆ ಪನ್ನೆ ತೆರಿನಕ್ಲ್ ||
ಪಾಂಡವೆರೆನಾ ಗುರ್ತೊ ಪತ್ತೆದ್
ಆಕ್ಲೆನ್ ಪಿರ ಕಾಡ್ ಪೋಯೆರೆ
ಬೂಳ್ಳೊನೇ ಕೊರುವೆಂದ್ ಪಂಡೆನೆ ಮೀಸೆನೀಸೊಂದು ||

4

ಧರ್ಮನಂದನೆ ಇತ್ತಿ ರಾಜ್ಯೊಡು
ಸರ್ರೊ ಸುಕೊ ಸಂಪೊತ್ತು ದಿಂಜಿದ್
ಉಪ್ಪುಸಾಜನೆ ಆ ವಿರಾಟನ ದಿಸೆನೆ ಮಲ್ಲೆತ್ತೊ ||
ಇತ್ತೆ ಅಕ್ಲೆನ ಅವದಿ ಪದಿಮೂ-
ಜೊರ್ರೊ ಮುಗಿದ್ಲ ಆಂಡ್ ಅಕ್ಲೆನ್
ಲೆತ್ತದೇ ಪಿರಕೊರ್ರ ರಾಜ್ಯೊನು ಪಂಡೆನಾ ಬೀಸ್ಮೆ ||

5

ಅವದಿ ಮುಗಿಯೆರೆ ನನಲ ಉಂಡುಯೆ
ದಿನೊನೆ ಪದಿ ಮೂಜಿಂದ್ ಪಂಡ್‌ದ್
ಅಯಿಕ್ ದುಂಬೈ ಅಕ್ಲೆ ಗುರ್ತೊನು ಪತ್ತೆದಾಕ್ಲೆನ್
ಪೆರಪ ಕಾಡ್‌ಗ್ ಕಡಪುಡುನವೇ
ಸರಿತ ಸಾದಿಯೆ ಪನ್ನೆ ಕರ್ಣೆನೆ
ಕುರುಪತಿಗ್ ತೆರಿಪಾನಗಾಪಗ ಆಯೆ ಒತ್ತೊಂಡೆ ||

6

ಗುಡ್ಡೆಡಿತ್ತನ ಎರು ಕಿದೆತಡೆ
ಬತ್ತೆಜಡೊ ಆ ಧರ್ಮನಂದನೆ
ನುಪ್ಪು ನೀರ್ನ್ ಮುಟ್ಟಿಯೆಂದ್‌ದ್ ಎಂಕ್ ಗೊಂತುಂಡು ||
ಮತ್ತೈ ನಗರೊದ ಎರು ಗುಡ್ಡೆಡ್
ಉಪ್ಪುನಗ ನಮೊ ಪೋದು ಅವೆನ್ಲ
ಒಟ್ಟುಗೇ ದೇರೊಂದು ಈಡೆಗ್ ಬನ್ನಗಾಪಗನೆ ||

7

ಆ ವಿರಾಟನ ಕಡೆಟ್ ಇತ್ತನ
ಪಾಂಡವೆರ್ ಬುಡ್ಡೆಯೆರೆ ಬರುವೆರೆ
ಆಪಗನೆ ಗುರ್ತಾದ್ ಅಕ್ಲೆನ್ ಕಾಡ್ ಕಡಪುಡುಗೊ ||
ಈತ್ ಪಂಡ್‌ದ್ ಕೌರವೇಸ್ವರೆ
ನಾಲ್ ನಮನೆದ ಸೇನೆದಕ್ಲೆಗ್
ಆಚ್ಚೆ ಕೊರೈ ವಿರಾಟ ನಗರೊಗು ನುಕ್ಕೈರಾಪಗನೆ ||

8

ಸಕುನಿ ಸೈಂದವೆ ಕರ್ಣೆ ಕೌರವ
ಮೆಗಿಯನಾಕ್ಲ್ ಮಾತ ಪಿದಡ್‌ದ್
ಕುದುರೆ ಆನೆನ್ ತೇರ್‌ನೇರ್‌ದ್ ಗಾಂಡ್ ಗೌಜಿಲೆಡ್ ||
ಎಡತ್ ಬಲತ್‌ಡ್ ಚತ್ತೊ ಚಾಮರೊ
ಕುರುಪತಿಗ್ ಪತ್ತೊಂದು ಬನ್ನಗ
ಗಜ ನಗರೊದಬ್ಬರೊದ ಗೌಜಿಯೆ ಗೌಜಿ ಉಂಡಾಂಡ್ ||

9

ಆ ಸುಸರ್ಮನ ಮೇಂಟ್‌ಗಾರಿಕೆ-
ಆಂಡ್‌ಲಾ ಅರೆವಾಸಿ ಸೇನೆಗ್
ಬಾಕಿದೆಕ್ ತ್ರೀಗರ್ತೆ ಪನ್ನುನ ವೀರೆನದಿಕಾರಿ ||
ದೋಣ ಬೀಸ್ಮೆರ್ ರಾಜ ಕಾರ್ಯೊಗು
ಏಪೊಲಾ ತಪ್ಪವೆರೊ ಅಕ್ಲೆಲ
ಸೇನೆದೊಟ್ಟುಗು ರತೊನು ಏರ್‌ದ್ ಬತ್ತೆರೊಟ್ಟಿಗೆನೆ ||

10

ಸಾರೊ ಸಾರೊನೆ ಎರು ಮೇಪುನ
ನೇಲ್ಯ ಪುಲತಾಡೆಗಲ ಬತ್ತದ್
ಆ ಸುಸರ್ಮನ್ ತೆನ್ನಯಿದ ಕಡೆಕೀಯೆ ನುರ್ಕವೊಡು ||
ಸೇನೆನ್ಲ ಪಂಡೊಂದು ಬಡೆಕಯಿ
ಗೇ ತ್ರಿಗರ್ತೆರ್ ಪೋವೊಡುಂದುದು
ವೀರ ತೇಜಿಡ್ ಕೌರವೇಸ್ವರೆ ಕೊರೈನಪ್ಪಣೆನ್ ||

11

ಅಪ್ಪಣೆನ್ ಕೇನೊಂದು ತೆನ್ನಯಿ
ದಿಕ್ಕದೆರೆ ಸುಸರ್ಮೆ ಸೇನೆದ
ಬಿರೈಡನೇ ಪಂಡೆನಾಪಗ ದೇರೆ ಕೊಂಡೋಯಿ ||
ಪನ್ನುನೆನ್ ಕೇನೊಂದು ಬೀರೆರ್
ಸುತ್ತು ಪಾಡ್ಡ್ ಎರೆನೊಟ್ಟುಗು
ಗುಡ್ಡೆಡ್ಡ್ ದೇರ್ನಗ ತಲಿತೆರ್ ಮೇಪುದಾಕ್ಲಲ್ ||

12

ತಲಿಪುನಕ್ಲೆಗ್ ಎಡೆನೊ ಹಾಕ್ದ್
ಎರುಲೆ ಪುಂಡುನು ದೇರ್ನಾಪಗ
ಬೊರಿಪಿ ಪೆತ್ತಲು ಬೋರಿ ಕಂಜಿಲು ಸಾರೊ ಸಂಕೆಲೆಡ್ ||
ತಿರ್ಗ್ ತಿರ್ಗ್ಡ್ ಕರೆಯೊನಂಬೇ
ಪನ್ಪಿ ಸೊರೊ ಲಕ್ಕಾದ್ ಮುಂದಲೆ
ದರಿನ ಮೇಪುದ ಗೋವಲೆರ್ ಪಾರೊಂದು ಅರಮನೆಗ್ ||

13

ಪೋದುಲಕ್ಲಲ್ ವಿರಾಟ ರಾಜಡ
ದೂರು ಪಂಡೆರ್ ನಾಲ್ ರಂಗೊದ
ಸೇನೆಡೇ ಕೌರವೆರ್ ಬತ್ತದ್ ನಮ್ಮ ಗುಡ್ಡೆಡ್ಡ್ ||
ಮೇಪುನೆರೆನ್ ಪತ್ತದಾಕ್ಲಲ್
ದೇರ್ನಗ ತಲಿತನೆಕ್ ಹಾಕ್ಯೆರ್
ತೂಲೆ ನೆತ್ತೆರ್ ಮೂಂಕು ಮೋನೆಡ್ ಸ್ವಾಮಿ ಅರಸುಗುಲೆ ||

14

ಕೀಚಕೆನೆ ಸೈತ್ತನವೆ ಸುದ್ದಿನ್
ಕೇಂಡ್ವಾ ಕೌರವೆರ್ ದೈರೊಡು
ಸೇನೆ ಕೂಡ್ಡದ್ ಬತ್ತದೆರ್ ನಿಜೊ ಆ ಪಟಂಗೇರಲ ||
ನಾಯಿಲೆಗ್ ಕಲ್ಪವೊಡು ಪಂಡ್ಡ್
ನಾಲ್ ರಂಗೊದ ದಂಡ್ ಕೂಡ್ನಯಿ
ನಾ ವಿರಾಟೆನೆ ತನ್ನ ಮೆಗೈಲೆನ್ಲ ಬರ್ಪಾದ್ ||

15

ವೀರ ತೇಜಿಡ್ ಕೊಂಬು ಕಹಳೆದ
ಗಾಂಡ್‌ಗೌಜಿಡ್ ಪಿದಡ್‌ನಾಪಗ

ಬೀಮ ಪಾರ್ತೆರೆ ಮೋನೆ ತೂದೇ ಧರ್ಮನಂದನೆ ||
ವ್ಯಾದೆ ನಮ್ಮವು ಒರುಸೊನೇ ಪದಿ-
ಮೂಜಿ ಕರಿಪುನ ದುಂಬು ನಮ್ಮನ್
ತೂದು ಗುರ್ತೊನು ಪತ್ಯೆರಾದೇ ಬತ್ತೆ ಕೌರವೆನೆ ||

16

ಗುರೈ ಪತ್ತಡ್ ದಾಲ ಮಲ್ಪಡ್
ಅಕ್ಕಿಗಿತ್ತೆನೆ ಬುದ್ಧಿ ಕಲ್ಪಗೊ
ಪನ್ನಗಾಕ್ಲ್ ಒಟ್ಟು ಬತ್ತೆರ್ ಪಲಯ ಪಿರವುಡೆನೆ ||
ಮತ್ಸ್ಯ ರಾಜನ ಸೈನ್ಯೊದೊಟ್ಟಿಗೆ
ಬತ್ತನಕ್ಲೇರ್‌ಂದ್ ತೂಯ್ವಿರ್
ಎರೈನೇ ದೇರೊಂದು ಪೋಪುನ ಸೇನೆನುಂತಾದ್ ||

17

ಗುಡ್ಡೆಡ್ಡ್ ಕಂಡೊಂದು ಎರೈನ್
ಒಟ್ಟುಗೇ ದೇರೊಂದು ಪೋಪುನ
ಗಟ್ಟಿಗೇರೊ ನಿಕ್ಲಿತ್ತೆ ಕಳುವೆರೊ ಉಂತಿ ಉಂತಿಂದ್ ||
ಹಸ್ತಿನಾವತಿದರಸುನಾಕ್ಲ್
ಲುಚ್ಚೆರೋ ಅತ್ತಿತ್ತೆ ಮರೈರೊ
ಪನ್ನುನವೆ ತೆರಿಯಂದ್ ಪಂಡ್ಡ್ ಮತ್ಸ್ಯ ಬೂಪಾಲೆ ||

18

ಆ ಸುಸರ್ಮಗ್ ಬಾಣೊ ರಾಪಯಿ
ಆನೆ ಕುದುರೆಡ್ ತೇರ್‌ನೇರ್‌ದ್
ವೀರನಾಕ್ಲ್ ಎದುರು ಉಂತ್ಯೆರ್ ಬಾಣೊ ರಟ್ಟಾದ್ ||
ಆಪೆಕೀಪೆಕ್‌ಡಿತ್ತಿ ಬೀರೆರ್
ಆಕ್ಲಾಕ್ಲೆ ಕೈದಲೆಡ್ ಸರಿ
ಕಾಳಗೊನು ಮಲ್ಪುನಗ ಮತ್ಸ್ಯನ್ ಆ ಸುಸರ್ಮಕೆನೆ ||

19

ಪತ್ತದೇ ಕೈಕಾರ್ ಕಟ್ಟೆಡ್
ತನ್ನ ತೇರ್‌ಡ್ ಕುಲ್ಲನಗನೇ
ಧರ್ಮನಂದನೆ ತೂದು ಬೀಮಡ ಪಂಡೆ ಬುಡ್ಡಯೆರೆ ||
ಅಲ್ಲನೇ ಇತ್ತನವೆ ಗೋಳಿದ
ಮಲ್ಲ ಗೆಲ್ಲನ್ ಕೈಟ್ ಪತ್ತದ್
ಎರೈ ಕಂಡುನು ಕೆರೈ ಪಂಡ್ಡ್ ಪಿದಡ್‌ದಾಪಗನೆ ||

20

ಆ ಸುಸರ್ಮನ್ ಮತಿಯೆ ತಪ್ಪದ್
ರಾಜನೇ ಬುಡ್ಡಾದ್ ಕೌರವ
ಸೇನೆದಕ್ಲೆಗೆ ಹಾಕ್‌ಹಾಕ್‌ದ್ ಅಲೈ ಗಿಡರಿಯೆನೆ ||
ಮಾತ ಎರೈನ ಬುಡ್ಡದಾಯೆನೆ
ರಾಜನೊಟ್ಟುಗು ಅರಮನೆಗಲಾ
ಸೇರಿಯೆರ್ ಜಯೊ ಜಯೊನೆ ಪಂಡ್ಡ್ ಅರಸು ಚಾವಡಿಡ್ ||

21

ನಿಕ್‌ಲ್ ಮೂವೆರ್ ಏರ್ ಪಂಡ್‌ದ್
ಸರಿಟ್ ತೆರಿಯಂದೇನ್ ಬೆನ್ನಯಿ
ನನಗ್ ನಿಕ್‌ಲೇ ಎನ್ನ ರಚ್ಚಣೆ ಮಲ್ಪಿ ಪಂಡೊಂದು ||
ಅಕ್‌ಲೆನೇತ್‌ಲ ಪುಗರ್ ಪುಗರ್‌ದ್
ಸಬೆಕ್ ತೆರಿಪಯೆ ಕಂಕ ವಲಲೆರ್
ಬುಡುಪಯೆರ್ ಇನಿ ಎನನ್ ಬದ್ಡದ್ ನಮನ್ ಗೆಲ್ಲಯೆರ್ ||

22

ರಾಚ್ಯೊ ನಿಕ್‌ಲೆನ ಪನ್ದ್ ನಿಕ್‌ಲೇ
ಆಳೊಡುಂದುದು ಪನ್ನಗಾಪಗ
ದೇಸೊ ಉಂದುಲ ಎಂಕ್ಲೆನಾಡಳ್ತೆದವೆ ಪನ್ನುನೆನ್ ||
ಕಾಲೊ ಬನ್ನಗ ನಿಕ್‌ಕ್ ತೆರಿಪವೆ
ಪ್ರೀತಿಡುಪ್ಪುಗೊ ನಮೋನೆ ಎಂಕುಲು
ಸೇವೆ ಮಲ್ತೊಂದುಪ್ಪೊ ಪಂಡೆನೆ ಧರ್ಮನಂದನೆನೆ ||

|| ಬ್ರಹ್ಮನಲೆ ಉತ್ತರಗ್ ಸಾರತಿ ಆಯೆ ||

ತೆನ್ನಯಿಡೆ ಸೋಲಾಂಡ ಬಡಕಯಿ -
ಡಿತ್ತೆ ಗೇಲ್‌ನ್ ಪಡೆವೊಡುಂದುದು
ಕರ್ಣ ಸೌಬಲ ಜಯದ್ರತಾದಿಲೆನೊಪ್ಪಿಗೇನ್ ಪಡೆದ್ ||
ದುಸ್ಸ ದುರ್ರೋದನೆ ತ್ರಿಗರ್ತಗ್
ಅಪ್ಪಣೆನ್ ಕೊರ್ನಗನೆ ಸೇನೆನ್
ನುರ್ದಯೆನೆ ಬಡಕಯಿಡ್ ಮೇಪುನ ಎರ್ದೆ ದೇರಿಯೆರೆ ||

1

ಏತೊ ಸಾವಿರೊ ಎರ್ದೆ ಮೇಪವಿ
ಗೋವಳೆರೆನ್‌ಲ ನೋತು ಕಿರೈರ್
ಮಾತ ಎರ್ದೆನ್ ಸುತ್ತು ಪಾಡ್‌ದ್ ಪುಂಡುಡುಂತಯೆರ್ ||
ಪಾರುನೊರಿ ಗೋವಳನ್ ಪತ್ತಾದ್
ಮೋನೆಗೇ ಸರಿ ಸುಣ್ಣೊ ಪೂಜಿದ್
ಪೋದು ಪನ್ ನಿನ್ನರಸುಡಿತ್ತೆನೆ ಬರಡ್ ಬುಡ್ಡಯೆರೆ ||

2

ದೊಣ್ಣೆ ಕಂಬೊಳಿ ದಕ್ಕದಾಯೆನೆ
ಬತ್ತೆನರಮನೆಗಪಗ ರಾಜೆನೆ
ಇದ್ಯೆ ಓಲೆಗೊಡುಂದು ಬತ್ತೆನೆ ಉತ್ತರನ ಸಬೆಕ್ ||
ಪೊರ್ದು ಪೊರ್ದುದ ಪೊಣ್ಣುಲಿತ್ತನ
ಮಲ್ಲ ಸಬೆತವೆ ಸಿಮ್ಮೊ ಪೀಟೊಡು
ಕುಲ್ಗದಿತ್ತನವರಸು ಮಗನವೆ ಕಾರ್ಗ್ ಪುಡ್ಯಾಡ್ಯೆ ||

3

ದಾನೆಯಾ ನಿನ ಮೋನೆಡೆಂಚಿನ
ಪೂಜಿದ್‌ನೆ ಪನ್ ದಾಯೆ ಬುಲ್ಲುವ
ಏರ್ ಹಾಕೈರ್ ಕಂಡ್ ಕುಟ್ಟಿಲು ಪಲ್ಲ ಎನ್ನಡನೆ ||
ಸ್ವಾಮಿ ನಮ್ಮವೆ ಎರ್ದು ಮೇಪುನ
ನೇಲ್ಯ ಬಡಕಯಿ ಗುಡ್ಡೆ ಜಾಗೆಗ್
ಸೇನೆ ಬತ್ತಾದ್ ನಮನ ಎರ್ದೆನ್ ಕೊಂಡು ಪೋಪೆರ್‌ಯೆ ||

4

ಹಸ್ತಿನಾವತಿದರಸು ಕೌರವೆ
ಕರ್ಣ ಸಕುನಿಲ ವೀರ ಸೈಂದವೆ -
ರೊಟ್ಟುಗೇ ಗುರು ಬೀಸ್ಮನಾಕ್‌ಲ್ ಇತ್ತೆರೊಟ್ಟಿಗನೆ ||
ಕೆರ್ಡ್ ಪಾಡ್ಯೆರ್ ಎಂಕ್ಲೆನೇತೋ
ಎರ್ದೆ ಬುಡ್ಡಯೆರೆಂದ್ ಪುಣೆನಗ
ಎನ್ನ ಮೋನೆಗ್ ಸುಣ್ಣೊ ಪೂಜಿದ್ ಪೆಟ್ಪ ಹಾಕಿಯೆರ್ ||

5

ನಿನ ಮುಸುಂಟುಗು ಹಾಕೊಡಿತ್ತೆನೆ
ಅಕ್‌ಲೆಗೇಯೆ ಪೋಡಿದೀಡೆಗ್
ಪನಿಯೆರೆಗ್ ಬತ್ತನೆನೊ ಕಂಡುಲೆ ಪುಣನ್ ಪಾಡಂದೆ ||
ಪನ್ನಗನೆ ಪೊಣ್ಣುಗುಳು ಪಂಡೆರ್
ಹಸ್ತಿನಾವತಿದರಸುನಕ್‌ಲೆಡ
ಯುದ್ಧೊ ಮಲ್ಪುನೆ ವೀರೆ ಈರತ್ತಂದೆ ಬೇತೇರ್ ||

6

ಈತ್ ಪನ್ನಗ ಮೀಸೆನೀಸ್‌ದ್
ಮಾತೆರೆನ್ ತೂವೊಂದು ಕೌರವೆ
ತಾನೆ ತಿಕ್‌ದ್ ಬೂರೈ ಎನ್ನವೆ ಕೈಕ್ ಮಹಮೂರ್ಕೆ ||
ಜೂಜಿ ಗೊಬ್ಬದ್ ಪಾಂಡವೇರೆನ
ರಾಚ್ಯೊನುಲಯಿಗ್ ಪಾಡಿ ಹಂಕರೊ
ಡಾಯೆ ಬತ್ತನೆ ಎಂಕ್ಲು ಸಸರೊನೆ ಪನ್ದ ನೆನೆತೊಂದು ||

7

ಹೆಡ್ಡೆಯಾಯಿನ ಧರ್ಮನಂದನ-
ನಲ್ಲ ಸೋಲ್ಪದ್ ಪಾಪೊ ದ್ರಾಪದಿ
ತುತ್ತಿ ಸೀರೆನ್ ಒಯ್ಪುಯಿನವೇ ದುಸ್ಸ ಕೌರವಗ್ ||
ಸಿಕ್ಲೆ ಕೊರೈರೆ ತೀರ್ಪಿ ಬೀಮಗ್
ನುಪ್ಪು ತಿಂದ್‌ದ್ ದಾಯೆ ಬದ್‌ಕದೆ
ಪೊಣ್ಣು ಕಂಡ್ಡೆನೆ ಪಾರ್ತೆ ಆಯಗ್ ತೀರುನೆಂಚಿನವು ||

8

ಏರೆ ದೈರೊಡು ಸೇನೆ ಕೂಡ್ಡಯೆ
ಬ್ರಾಣನವೊ ಮುದಿ ಪರಬನವ್ವೊ

ಏರ್ ಅಮ್ಮನೊ ಎಂಚಿ ಜಾತಿಯೊ ಪನ್ನಿ ಕರ್ಲನವೊ ||
ನೂದು ಬಾಲೆಲೆನಮ್ಮೆ ಕುರುಡೆನೆ
ಏತ್ ಕಲ್ವದೆ ಬುದ್ಧಿ ಆಯ್ಗ್
ಸಾದಿನಾಡಿಯೆ ಸೈಮಿನಿಗ್ ಇನಿ ಈಡೆ ಬತ್ತನಯೆ ||

9

ಯಮನ ಮೀಸೆಗ್ ಕೈನ್ ಪಾಡ್ಯನೊ
ಮರಿತ ಜಿಡೆಕೇ ಮುತ್ಸೊ ಕೊರೈನೊ
ಪಿಲಿತ ಮಾಟಿಗ್ ಏಡ್ ನೂರ್ನ ನಮುನೆಡಿತ್ತಾಯೆ ||
ಎನಡ ಪುಣೆಯೆರೆ ಬತ್ತೆ ಪನ್ನಗ
ಸನಿಯೆ ತಿರುಗನೆ ತರೇಲಾಯನ
ಬುಡೆದಿ ಕರ್ಯೆ ಕಡಿಡ್ ಪೋಯೆರೆಗಾಂಡೆ ಮಾದೇವ ||

10

ಕೋಡೆ ರಾತ್ರೇಡ್ ಅಮ್ಮರೊಟ್ಟುಗು
ಕಾಳಗೊಗು ಪೋಯಿನಯೆ ಎನ್ನವೆ
ಸಾರತಿಯೆ ಸೈತ್ತನೆಟ್ ಕೈಯೇ ಪೊಲಿನಲೆಕ್ಕೋನೆ ||
ಆದ್ ಪೋಯೆನೆ ದಾನೆ ಮಲ್ಪೊಲಿ
ಆ ದುರಾತ್ಮರೆ ಪುಗೆನ್ರಾಪದ್
ಆರ್ಯವರ್ತೊದ ಚಕ್ರವರ್ತಿಯೆ ಆದ್ ಮೆರೆತುವೆನೆ ||

11

ಸಾರತಿನ ಸಿವೆನೊದಗದುವೆಡನೆ
ಮಾರಿಗೇ ಸಮ್ಮಾನೊ ಮಲ್ತದ್
ಸಾಕಿನೀ ಗಣೊಕುಲೆನ ಬಂಜಿನ್ ದಿಂಜದುವೆ ಯಾನ್ ||
ಆಂಡ ಮಲ್ಪುನೆ ದಾನೆ ಕುರುಕುಲೊ
ನಾಸೊ ಮಲ್ತದ್ ಹಸ್ತಿನಾವತಿ
ನಾಳುನಾ ಸಿರಿ ಬಾಗ್ಯೋನೇ ಕೈ ತತ್ತದಾಂಡತ್ತೊ ||

12

ಪೋಣ್ಣಲೆನ ಸಬೆಟಿಂಬೈ ಕೊಚ್ಚುನ
ಅರುಣೆನೆ ತೆರಿಯೊಂದು ದ್ರಾಪದಿ-
ನಲ್ತ ಕೈ ಬಾಸೆಡ್ಲೆ ಲೆತ್ತದ್ ಪಂಡನಾಲೆಡನೆ ||
ಕಾಂಡವೊದ ಬನೊ ಪೊತ್ತನಗನೇ
ಪಾರ್ತನಾ ಸಾರತಿಯೆ ಬ್ರಾನ್ಸಲೆ
ಆದ್ ಇತ್ತೆಗೆ ಪನ್ದ ತೆರಿಪಲ ಬೂಟುದುತ್ತರಗ್ ||

13

ಉತ್ತರೆನ್ ಕೈತಡೆಗ್ ಲೆತ್ತದ್
ಗುಟ್ಟುಡೇ ಸೈರೇಂದ್ರಿ ಪನ್ನೆನ್
ಅಣ್ಣಡನೆ ಪಂಡೊಂದು ತೆರಿಪನಗಾಯೆ ಸಂತೊಸುಡು ||
ಅಪ್ಪೆ ಪೋಲದೆ ನಿಕ್ಕ ನಾಟ್ಯೊನು
ಕಲ್ಪವುನ ಗುರುನೀಡೆ ಲೆತೊನುದು
ಇತ್ತೆನೇ ಬಲ ಪನ್ದ ಕಡಪುಡುನಪಗ ಪಾರ್ದಾಲ್ ||

14

ಪೋಪಿ ಪೊರ್ದುನು ತೂದು ಜವನೆರ್
ಏರ್ಲಾ ಮರಾಪಿ ನಮುನೆದ
ರೂಪೊದಾ ಉತ್ತರೆನೆ ಬತ್ತಲ್ ಗುರುನ ಕೈತಡೆಗ್ ||
ದಾನೆ ಮಗ ಪಾರ್ಬತ್ತ ಈಡೆಗ್
ಬೇಕೊ ಪನ್ ಪನ್ನಗನೆ ಈರೇ
ಪಾರ್ತನಾ ಸಾರತಿಯೆ ದುಂಬುಡು ಆಯಿನಾರ್ಂದ್ ||

15

ನಮ್ಮವೇ ಸೈರೇಂದ್ರಿ ಎನ್ನಡ
ಪನ್ನ ವಿಸಯೊನು ಪಂಡನಣ್ಣಡ
ಇತ್ತೆನೇ ಈರ್ಪರೊಡು ಆಡೆಗ್ ಎನ್ನ ಒಟ್ಟಿಗೆನೆ ||
ಆಂಡ್ ಬರ್ದಂದಾಯೆ ಪಿದಡ್ಡದ್
ಆಲೆನೊಟ್ಟಿಗೆ ಉತ್ತರನ ಸಬೆ -
ತಾಡೆ ಪೋನಗ ಉಲಯಿ ಬರೈರೆ ಪಂಡೆ ಆಯಡನೆ ||

16

ದುಸ್ಸ ದುರ್ರೋದನೆನೆ ಸೈನ್ಯೊನು
ನುರ್ದದೆನೆ ನಮ ಎರ್ದೆ ಕಂಡೈರೆ
ಗುಡ್ಡೆಡೇ ಗೋವಳೆರೆನೇತ್ಲ ಕೆರ್ದ ಪಾಡ್‌ದೆಗೆ ||
ಎನ್ನ ಸಾರತಿ ಕೋಡೆ ಸೈತ್ತದೆ
ಇತ್ತೆ ಯಾನೇ ಕೆಡಗ್‌ದುಲ್ಲೆನೆ
ನಿಕ್ಕ ತೀರುವೊ ತೇರ್ ನಡಪಯೆರೆಂದ್ ಕೇನ್ನಗನೆ ||

17

ತೇರ್‌ದೇರುನ ಕೆಲಸೊ ಕಲ್ತದೆ
ಆಂಡ ಕೌರವನಕಾಲೆ ಕಡೆಟೇ
ಬೀಸ್ಮ ದ್ರೋಣೆರ್ ಕರ್ಣೆ ಸೈಂದವೆ ಮಾತೆರುಪ್ಪುನಗ ||
ಯಾನ್ ಸಾರತಿಯಾದ್ ಪೋಯೆಡ
ಆಕಲೆನ್ನನ್ ದುಂಬು ಕೆರ್ದೆರ್
ಈರ್ಲಾ ಬೊಡ್ಡಾಡೆ ಪೋಪುನ ನಮೋನೆ ಬದುಕೊನುಗೊ ||

18

ಯಾನ್ ತೇರ್‌ಡ್ ಉಪ್ಪುನಗನೇ
ದಾನೆ ಮಲ್ತೆರ್ ಬೀಸ್ಮ ದ್ರೋಣೆರ್
ಬಾಕಿದಾಕ್‌ಲ್ ಕೈದ್ ದಕ್ಕದ್ ಅಡ್ಲೊ ಬೂರುವೆರ್ ||
ಕೇನ್ ಈ ಸಬೆಟಿತ್ತೆ ಎನ್ನವೆ
ವೀರತನೊ ಏತುಂಡು ಪಂಡ್‌ದ್
ಮೀಸೆ ತಿರ್ಗನಗಾಯೆನೊಪ್ಪಿಯೆ ತೇರ್ ನಡಪಯೆರೆ ||

19

ದುತ್ತು ದೈತ್ತೊನು ಸಾರತಿಗ್ ಸರಿ
ಒಪ್ಪುನೆನ್ ತರ್ಪಾದ್ ಕೊರೈನ್

ಚಲ್ಲಣೊನು ತಿಕ್ಕಾಯೆ ತರೆಟೀ ತಿರ್ತ್ತ ಮಿತ್ತಾದ್ ||
 ಪೊಣ್ಣುಗುಳು ತೆಲಿಪುನಗ ನಾಚಿಗ -
 ಡಲ್ವ ಉಂತ್ಯೆನೆ ನಟನೆಡರ್ಪನೆ
 ಉತ್ತರೆನೆ ಸರಿ ತಿಕ್ಕದಾಯನ್ ಅಲ್ತ್ ಕಡಪುಡಿಯೆ ||

20

ಪೋಯಿನಯೆ ಕುದುರೆಲೆನ್ ತೇರ್ಗ್
 ನಾಡ್‌ದೊಡ್ಡದ್ ಕಟ್ಟಿ ಬಿರ್ಸದ
 ಜಾತಿಲೆನ್ ತೂದಾಯೆ ಉಂತಯೆನೆದುರು ಉತ್ತರನ ||
 ಕವಚೊ ಚಲ್ಲಣೊ ತಿಕ್ಕಯೆರೆ ಸರಿ
 ತೆರಿಯಂದಿತ್ತನ ಯಬಗೆ ಸಾರತಿ
 ನಮನ ಉತ್ತರಗಾವೊ ಪಂಡೆರ್ ಸಬೆತ ಪೊಣ್ಣುಗುಳು ||

21

ಆರತಿನ ಬೆಳಗಾದ್ ಪೊಣ್ಣುಲು
 ಕೌರವಾದಿಲೆ ಸೇನೆ ಗೆಲ್ತದ್
 ಕೀರ್ತಿದಾ ಸಿರಿ ಕೈನ್ ಪತ್ಯೆಡ ಮರಪಡೆಂಕ್‌ಲೆನ್ ||
 ಪ್ರೀತಿಡಾಯನ ಮುಂಡೊಗೊತ್ಯೆರ್
 ಗೇಲ್‌ದಾ ಕುಂಕುಮೊನು ಪೊಂಜೊವು
 ಬೇರಿ ವಾದ್ಯೊ ನಗಾರಿ ಗೌಜಿಡ್ ತೇರ್‌ನೇರೊಂಡೆ ||

|| ಪೋಡಿಗೇಡ್ ಉತ್ತರನ ಪೀ ಪೊಳದ್ಯಾಂಡ್ ||

ಪಾರ್ತೆ ಕುದುರೆಲೆ ಬಲ್ಲೆನೊಯ್ತದ್
 ಚಾಟಿಡಾಕಿಯೆ ಬೆರಿಕಲಾಪಗ
 ತೇರ್‌ನೊಯ್ತದ್ ಪಾರ್ಯೊ ಕುದುರೆಲು ಬಡೆಕಯಿದ ಪುಡೆಕ್ ||
 ಆಪೆಕ್‌ಡ್ ಕುರುಸೇನೆ ಎರ್ದೆನ್
 ಕಾತೊನುಂದೇ ಸುತ್ತ ಉಂತನ
 ತೂನಗಾಚಿರೊ ಆಂಡ್ ತೇರ್‌ಡ್ ಕುಲ್ಲೆನುತ್ತರಗ್ ||

1

ಚೆತ್ರೊ ಚಾಮರೊ ತೇಜಿ ಬೊಲ್ಲುಡೆ
 ಬುಡ್ಡದಿತ್ತನ ತೂಯೆ ಸಾಲ್‌ಡ್
 ಇತ್ತನಾನಲು ಕುದುರೆ ತೇರುಲು ಬುಕ್ಕೊ ಕಾಲ್ನಡೆನ್ ||
 ತೂದು ಸಿರೆಲಕ್ಕವುನ ಕಡಲ್‌ದ
 ರೀತಿಡುಪ್ಪುನ ಪಡೆನ್ ಕಣ್ಣೆಡ್
 ತೂಯೆರೆಗ್ ತೀರಂದೆ ಮೋನೆಗ್ ಕೈನ್ ಮುಚ್ಚೊಂಡೆ ||

2

ಕಡೆತ ಕಾಲೊಡು ಬೂಮಿ ಮುಕ್ಕೈರೆ
 ಕಡಲ್‌ದೇರ್ತೆನೊ ಅತ್ತ ಸೈಮಿನಿ
 ನಗರೊ ಮೂಲುಂಡಾಯಿನೆನೊ ಸರಿ ಪನುಪುನೇರಿತ್ತೆ ||

ಕಾಲಕೂಟೊದ ಇಸೊತ ಬೊಲ್ಲೊನೊ
 ಸಾಗರೊದ ಸೂವರ್ಣನೆನೋ ಮರಿ
 ಸೂಂಯ್ತೊನುಂದೇ ಬರ್ಪನಂಚಿನೆ ತೋಜಿದಾಂಡಯಗ್ ||

3

ಅಕ್‌ಲ್ ಪತ್ತನ ಕೈದಲೆಡ್ ಸರಿ
 ಕಿಟಿಯೆ ರಟ್ಟುನ ತೂದು ಉತ್ತರ
 ತಿಗಲೆ ನಡಗ್‌ದ್ ರೋಮೊ ಕೊಕ್ಕೆರ್‌ದಾಂಡ್ ಪೋಡಿಗೇಡ್ ||
 ಕಯಿತವಾಯುದೊ ತಿರ್ತ್ತ ರಟ್ಟೆದ್
 ರತೊತ ಪಲಯಿಗ್ ಬೂರೈನಾಪಗ
 ಪೆಜಿಯೆರೆಗ್ ತೀರಂದೆ ಕೈಕಾರಯನ ಕುಂಬರ್‌ದ್ ||

4

ಓ ಬ್ರಹ್ಮನ್ನಲೆ ತೇರ್‌ನುಂತಲ
 ತೂಲ ಆಪೆಕ್ ಉಂತುದುಲ್ಲೆರ್
 ಜೂವೊನೊಯ್ಪುನ ಯಮನ ದೂತೆರ್ ನಮನ್ ಕೆರ್ದೆರ್‌ಯ ||
 ತೇರ್ ತಿರ್ದಲ ಅರಮನೆಗ್ ನಮೊ
 ಪೋಯಿ ಮುಲ್ಲಡಿತ್ತೆ ಪನ್ನಗ
 ವೀರ ಪಾರ್ತೆನೆ ಮುಗುರು ತೆಲಿಕೆಡ್ ಪಂಡೆನಾಯಡನೆ ||

5

ಅರಸು ಮಗೆ ಈಯಾದ್ ಲಡಯಿಗ್
 ಪಿದಡೆನಯೆ ಪಿರ ಪೋಯಿ ಪನ್ನನ
 ನಿನನ್ ಪುಟ್ಟಯಿನಮ್ಮ ಕೀರ್ತಿನ ಮಣ್ಣೆ ಮುಕ್ಕವನ ||
 ಪಡೆನ್ ಗೆಲ್ತದ್ ಕೀರ್ತಿದಾ ಸಿರಿ
 ಪುದರ್ ಪಡೆಯೆರೆ ತೂಲ ಪಂಡ್‌ದ್
 ಕುದುರೆಲೆಗ್ ಸರಿ ಹಾಕ್‌ದಾಯೆನೆ ತೇರ್ ನಡಪಾಯೆ ||

6

ದಾಯೆ ಕೆರ್ದಯೆರೆನ್ನನೀಯೆ
 ತೂಪ ನಿನ್ನನ್ ಎನ್ನ ಅಮ್ಮೆರ್
 ಸಾಂಕ್‌ನೆತ ಉಪಕಾರೊ ಮರಪಡ ರತೊನು ತಿರ್ಗಾಲ ||
 ಯಾನ್ ಸೈತ್ತೆಡ ಎನ್ನವಪ್ಪೆನೆ
 ಈಯೆ ಕೆರ್ದಯಿನೆಂದ್ ದೂರ್ದಲ್
 ಪೋಯಿ ನಮೊ ಮುಲ್ಲಡ್ ಇತ್ತನೆ ಜೂವೊಡರಮನೆಗ್ ||

7

ಯುದ್ಧೋಗೇ ದುಂಬೊತ್ತನಾಯಗ್
 ಅಸ್ಸಮೇದೊದ ಪಲೊನೆ ಪಿರವುಗು
 ಪಜ್ಜೀಡ್ಡಯಗಾವು ನರಕೊದ ಗುಂಡಿ ಬೂರೈರೆಗ್ ||
 ಗೆಲ್ತನಾಯಗ್ ವೀರ ಸೊರ್ಗೊನೆ
 ತಿಕ್ಕು ಇಂದ್ರೆನೆ ಮಲ್ಲೆ ಸಮ್ಮನೊ
 ಅಪ್ಪೆರೆಲು ಸೇವೆಗಲ ಉಂತ್ವೆರ್ ಲಡಯಿಗುಂತುಲಯ ||

8

ಲಡಯಿ ಮಲ್ತದ್ ಅಸ್ವಮೇದೊದ
ಪಲೊನು ಪಡೆಪುನೆದಾಯೆಗಂಕುಲು
ಅರಮನೆಡೆ ಮಲ್ತಾವೊ ಯಾಗೊನು ಸೊಗೊದವೆ ಸುಕೊನು ||
ಪಡೆದ್ ಬದುಕುವೆ ಮೂಲೆ ಪೋಣ್ಣಲು
ಎನಡ ಉಲ್ಲೆರ್ ಎನ್ನ ಸೇವೆಗ್
ಸುರೆರೆ ಪೋಣ್ಣಲು ದಾಯೆ ಪೆದ್ದದ್ ಪಾರ್ದ್ ಪೋಯೆರೆಗೊ ||

9

ತೇರ್ ಪಿರ ತಿರಗಲ ಪನ್ನಗ
ಆ ವಿರಾಟನ ಮಗೆನೊ ಈಯೆ
ಎರೆಗಯ ಪುಟ್ವದನೆ ಅರಸುಲೆ ಸುಬವೊ ನಿಕ್ಕುಂಡೊ ||
ತೇರ್ಡೇ ಕುಲ್ಲಿತ್ತೆ ನಿನ್ನನ್
ಎರ್ ಕೆರ್ದೆರ್ ತೂಪೆ ಪಂಡ್‌ದ್
ಪಾರ್ತೆದುಂಬುಗು ರತೊನು ದೇರೈನೆ ಮಾರ್ಪು ಪದನೈನ್ ||

10

ಉತ್ತರೆನೆ ಅಂಚಿಂಚಿ ತೂದೇ
ಮೆಲ್ಲ ತೇರ್‌ದ ಪಿರವು ಬಾಕಿಲ್
ದೆತ್ತದಾಯೆನೆ ಬದ್‌ಕದಿತ್ತೆಡ ಪೆಜಿದ್ ತಿನುವೆಂದ್ ||
ತನ್ನ ಮುಂಡಾಸ್‌ನಲ ಬುಡುದೇ
ದಿಡ್ಕಲಾಗಿಡ್ ಪಾರ್‌ಗರ್ಜುನೆ
ನಿಲ್ಕ ತೂದೇ ಬೆರಿಯೆ ಪಾರ್‌ದ್ ಜುಟ್ಟುಡೊಯ್ತೊಂಡೆ |

11

ಪತ್ತನೆನ್ ತೂವೊಂದು ಕೌರವ
ಸೈನ್ಯೊದಾಕ್‌ಲ್ ತೂದು ತೆಲೆತರ್
ಪುಕ್ಕೆ ಒರಿ ಬಲಿಪುವೆನೆ ಪಿರವುಡೆ ಉಲ್ಲೆ ಬುಕ್ಕೊರಿಯೆ ||
ಅರ್ದುನನ ಲೆಕೊ ತೋಜುವೆನೆ ಸರಿ
ದಿಸ್ಪಿ ದೆತ್ತದ್ ತೂನಗಾಯೆನೆ
ಅತ್ತ ಆಯೆ ನಪುಂಸಕೆನೆ ನಿಜೊ ಲಂಗೊ ಪಾಡೊಂದೆ ||

12

ಜುಟ್ಟುಡೊಯ್ತುನ ಪಾರ್ತ ಕಾರ್‌ಗ್
ಅಡ್ಲೊ ಬೂರುದು ಪನ್ನೆನುತ್ತರೆ
ದಮ್ಮಯಾ ಬುಡು ಎನನ್ ಪೋಯೆರೆ ನಿಕ್ಕು ಬೋಡಯಿನ ||
ರತ್ನೊ ಪದ್ಲೊಯಿ ಮಾತ ಕೊರ್ದವೆ
ಅತ್ತ ಪೋಣ್ಣಲು ಬೋಡೊ ಪನ್‌ಪನ್
ಎನ್ನನಿತ್ತೆನೆ ಬುಡುದು ಬದ್‌ಕಲ ನಿನ್ನ ಮಗಲೆಕೊನೆ ||

13

ಪಾರಿಯಡ ನಿನ ನಾಲಿ ಕಡ್‌ದ್
ಪಾಡುವೆನೆ ಮೂಲಿತ್ತೆ ಈಯೆ

ಸಾರತಿಯೆ ಆದಿತ್ತೆ ತೇರ್‌ನ್ ದೇರ್ದ ಕಾಳೆಗೊಗು ||
ಯಾನೆ ಉಂತುವೆ ನಿಕ್ಕು ಪೋಡಿಗಿ
ದಾಲ ಇದ್ದಿಯ ತೇರ್ದ ಮುಕಿಟೀ
ಬೇಕೊ ಕುಲ್ಲುಲ ಪೋದು ನಮ್ಮವೆ ಎರ್ದೆ ಬುಡ್ಡಾಗೊ ||

14

ಕುದುರೆ ದೇರೈರೆ ಎದುರು ಕುಲೈಡ
ಅಕ್‌ಲೆಗೇನೇ ದುಂಬು ತೋಜುನೆ
ಪಿರವು ಕುಲ್ಲುದು ದೇರೈರಾವೊಂದೇನ್ ತೂವೊನುವೆ ||
ನಿನನ್ ಕೆರೈರೆ ಯಾನ್ ಬುಡ್ಡಯೆ
ಎದುರೆ ಕುಲ್ಲುದು ತೇರ್ ನಡಪಲ
ಪನುಪುನೆನ್ ಕೇನೊಂದು ದೈರೊಡು ಕುಲೈ ತೇರ್ದುಲಯಿ ||

15

ಬಾತ್‌ನಾಯಗ್ ಪೂತ್‌ನಾತಾ
ದಾರೊ ಆಂಡಂದಾಯೆ ತೇರ್‌ಡ್
ಬಾಟಿ ಪತ್ತದ್ ಕುಲ್ಲನಾಪಗ ಆಯಡರ್ಜುನೆನೆ ||
ಈಪೆಕ್‌ಡ್ ರತೊ ಪೋವಡಂದ್‌ದ್
ಈಂದದಾ ಮರತಾಡೆ ಎತ್ತಯೆ
ತೇರ್‌ನುಂತಲ ಪನ್ನಗುತ್ತರೆನಲ್ಲ ಉಂತಯೆನೆ ||

16

ಮಿತ್ತ ತೂಲಯ ಮರತ ಕುಬೆಟೀ
ಕಟ್ಟದೀಶನ ಕೈದಲೆನ್ ಈ
ಬಿಚ್ಚದರ್ಜುನನಾಯುದೋಲೆನ್ ಕೊರೊಡು ಪಂಡೊಂದು ||
ಬಗ್ಗಿಡೇ ಪಾರ್ತನೆನ್ ಮಲ್ತದ್
ತಿರ್ದ ಗೆತೊನುದು ಬಲಯ ಪನ್ನಗ
ಆ ವಿರಾಟನ ಮಗೆನೆ ಮೆಲ್ಲೊಡು ಮಿತ್ತ ನಿಕ್ಕಿಯೆನೆ ||

17

ಅಯ್ಯೋ ದೇವೆರೆ ಪುಣನ್ ನೇಲ್ತದ್
ಅಕ್ಕಡ್‌ದ್ ದೀತೆರಯ ಆಡೆಗ್
ಮಿತ್ತ ಮಿತರ್‌ದ್ ಪೋಯೆರೆಂಕೇ ಆಂಡ್ ಪೋಡಿಗಿನೆ ||
ಅತ್ತಯಾ ಅವು ಪುಣತ ನಮನೆಡೆ
ಕಟ್ಟದೀಶನ ಆಯುದೊಲು ನಿಜೊ
ಬಿಚ್ಚದಯಿನ್‌ಲ ಎನ್ನವಾಯುದೊ ಕೇನ್ದ ಕನ ಈಡೆ ||

18

ಮಿತ್ತ ಬಡತ್‌ದ್ ಮರತ ಕುಬೆಟಲ
ಕಟ್ಟದೀಶನನಾಯೆ ಬಿಚ್ಚನ-
ಗಲ್ಲ ಕೈದಲೆ ಬಾಯಿದಗ್ಗಿಯೆ ಗುಮುಳು ಗುಮುಳೊಂದು ||
ಇತ್ತನೆನ್ ತೂವೊಂದು ಪೋಡಿಡ್
ಲೆತ್ತ ಪಂಡನೆ ಓ ಬ್ರಹ್ಮನ್ನಲೆ
ಪೊತ್ತುದೇನೇ ಸೈಪ್ಪೆ ಬದ್‌ಕಲ ಪನ್ನಗರ್ಜುನೆನೆ ||

19

ದೇವತೇಲೆಗ್ ಕೈನ್ ಮುಗಿದೇ
ಪಾರ್ತನಾಯುದೊ ಕೊರ್ಲೆ ಪಂಡ್‌ದ್
ಕೇನ್‌ಲಯ ಈಯಪಗ ಗುಮುಳುನ ಅಗ್ಗಿ ತೆಕ್ಕುಂದು||
ಈಂದ್‌ದಾ ಮರಟಿತ್ತಿ ಉತ್ತರ-
ಗಾಯನೆ ಪನ್ನಗನೆ ಸುರೆರೆಗ್
ತಾನ್ ಕೈ ಮುಗಿಯೊಂದು ಪಾರ್ತನ ಕೈದ್‌ಲೆನ್ ಪಡೆಯೆ ||

20

ತಿರ್ತ್ ಜತ್ತ್‌ದ್ ಪಾರ್ತಗಲ್ಲನೆ
ಕೊರೈನಾಯುದೊ ಬಿಲ್ಲ್ ಬಾಣೊನು
ಬುಕ್ಕೊ ತೇರ್‌ನ್ ತಿರ್ಗದಾಕ್‌ಲ್ ಗುಡ್ಡೆಗ್‌ತ್ತಿಯೆರ್ ||
ದುಸ್ಸ ಕೌರವ ಸೇನೆಡಿತ್ತನ
ಅಜ್ಜ ಬೀಸೈನ್ ದ್ರೋಣ ಕೈಪೆರೆನ್
ಅಚ್ಚಿರೊಡು ತೂದಾಯೆ ಸಿವ ಸಿವ ಪನ್ದ್ ಎದುರುಂತ್ಯೆ |

|| ಕೌರವೆರ್ ದೇರೊಂದು ಪೋಪುನೆರೈನ್ ಪಾರ್ತೆ ಬುಡ್ಪಾಯೆ ||

ಉತ್ತರನೆ ಕುದುರೆಲೆನ್ ಉಂತದ್
ಹಸ್ತಿನಾವತಿವಕಲೆ ಸೈನ್ಯೊನು
ಕಣ್ಣೆದರ್ತ್‌ದ್ ತೂಯೆಗಾಪೆಕ್ ಉಂತದಿತ್ತನೆನ್ ||
ಚೆತ್ತೊ ಬುಡ್ಪದ್ ಆಯ್ನ ಕತ್ತಲೆ
ಕತ್ತಿದಾಯುದೊ ಬೀಜಿನಾಪಗ
ಬೊಲ್ವು ದಂಡ್‌ದ ನಡುಕು ಮೆಂಚಿದಲೆಕೊನೆ ಬೂಂಡೊಲು ||

1

ತೇರ್‌ನೇರ್‌ನ ವೀರನಕಲೆನ
ಸಾಲ್ ಬೇತೆನೆ ಆನೆ ಕುದುರೆಲೆ
ರಾಯ ರಾವುತನಕಲೆ ಸಾಲುಲು ತೋಜಿದಾಂಡಯಗ್ ||
ಬಾರಿ ಕಾರ್ಡೆತಕಲೆ ಕೈತವೆ
ಆಯುದೊಲೆ ಕಿಟಿ ರಟ್ಟನಾಪಗ
ತೂಯಿ ಕಣ್ಣೆದ ಮೆಂಚಿ ರಟ್ಟದ್ ಬೂರೈನುತ್ತರೆನೆ ||

2

ಬೂರುನಾಯಗ್ ಬೋದೊ ಇದ್ಯಂ-
ದಾಯಿನೆನ್ ನರೆ ತೂದು ಮೋನೆಗ್
ನೀರ್ ತಲಿತ್‌ದ್ ಕುಲ್ಲಯೆನೆ ಸರಿ ದೈರೊ ಪಂಡೊಂದು ||
ಬೀಸೈ ದ್ರೋಣೆರ್ ಅಗ್ಗಿ ತೇರ್‌ನ್
ತೂಯೆರಾಪಗ ಹನುಮಗರ್ಜನೆ
ಕೇಂಡ್‌ದಾಕ್‌ಲ್ ದೇವದತ್ತೊದ ಸೊರೊಕು ಕೆಬಿಕೊರ್ದು ||

3

ಪಾರ್ತೆನೇ ಬತ್ತನಯೆ ಪಂಡ್‌ದ್
ಆಯೆ ದೀಡಯೆ ನಮನ್ ಕಂಡಿತೊ
ಆ ಸುಯೋದನೆ ರಾಜಿಯಾವಡ್ ದ್ರೋಣೆ ಪನ್ನಗನೆ ||
ಆ ನರೆನೊ ವಾನರೆನೊ ಎಂಕ್ಲೆಡ
ಕಾದುನಾಕ್‌ಲ್ ಈರ್ ದಾಯೆಗ್
ಪೋಡಿವರ್ ಯಾನುಲ್ಲೆ ಪಂಡೆನೆ ಕರ್ಣೆನಬ್ಬರೊಡು ||

4

ನಿನ್ನ ಪೌರುಸೊ ದುಂಬು ತೂತೊನೆ
ಬಿಲ್ಲ್‌ದೆರೆರೆ ಪೋಯ ದುಪದನ
ಮಲ್ಲ ಸಬೆಟೇ ನಾಚಿ ಕೆಟ್ಟಿಯ ಇತ್ತೆ ಕೊಚ್ಚುವನ ||
ಚಿತ್ರ ಸೇನೆನೆ ಕೊಂಡು ಪೋನಗ
ಬುಡ್ಪಯನ ಕೌರವನ್ ನಿನ್ನವೆ
ಬಿರ್ರತಿಗೆ ಏಶ್‌ಂದ್ ಎಂಕುಲು ದಾಲ ತೆರಿಯಯನೊ ||

5

ಸಿವಡ ಕಾದ್‌ದ ಪಾರ್ತೆ ದ್ರೌಪದಿ
ಮದಿಮೆ ದೊಂಪೊಡು ಮೀನ್ದ ಯಂತೊನು
ಪೋಡಿಯೆ ರಟ್ಟದೆ ಕೌರವೇಸ್ವರನಾಯೆ ಬುಡ್ಪಾದೆ ||
ನರಗ್ ಎದುರುಂತುನಯೆ ಲೋಕೊಡು
ನರಮನಿಯ ಜಾತಿಲೆಡ್ ಇದೈರ್
ಸುರೆರೆ ಲೋಕೊಡು ಸಾನ್ ಕೀರ್ತಿನ್ ಪಡೆಯಿನಾಯೆತ್ತೊ ||

6

ಬ್ರಾಣೆರೆಗ್ ಉಣಿಯೆರೆಗ್ ಮಾತ್ತೊನೆ
ತೀರುನತ್ತಂದಿತ್ತೆ ಲಡಯಿದ
ಸೋಲು ಗೇಲ್‌ನ್ ಎಂಚ ತೆರಿವರ್ ದಾನೊ ದಕ್ಷಿಣೆಗ್ ||
ನೀರುವೆರ್ ಕೈ ಅರಸುನರಮನೆ
ಸೇರ್‌ದಾಕ್‌ಲ್ ಸಾಸ್ತೊ ಪಂಡ್‌ದ್
ಮಾತೆರೆನ್‌ಲಾ ಮಂಗ್ ಮಲ್ತ್‌ದ್ ಬಂಜಿ ದಿಂಜವೆರ್ ||

7

ಈಶ್ ಪನ್ನುನ ಕೇನ್ದಲಸ್ಸ
ತ್ತಾಮೆ ಕೋಪೊಡು ಪನ್ನೆ ಕರ್ಣಡ
ಸೂತಗಂಚಿನ ಗೊಂತು ಬ್ರಾಣೆರೆಡಿತ್ತಿ ಯೇಗಿತೊಲು ||
ಸಾಪೊಡೇ ಕೆರೈರ್‌ಯ ಅತ್ತ್‌ಡ
ಬಾಣೊಡುಲ ಕೆರ್ಪನವೆ ಏಗಿತೊ
ದಾಕ್‌ಲೆನ್ ಈ ದೂರ್ದ ನಿನ್ನವೆ ಜಾತಿ ಎಂಚಿನವು ||

8

ಕುಲೊನು ತೆರಿಪವು ನಾಲಯಿಯೆ ಸರಿ
ನಿನನ್ ಸಾಂಕ್‌ನೆ ದಾಯೆ ಕೌರವೆ

ಸಬರನಾಕ್‌ಲ್ ನಾಯಿ ಸಾಂಕ್‌ನ ಲೆಕೊನೆ ನಿನನಿತ್ತೆ ||
ಹತೆಹತೆಂದ್‌ ಮೇಲ್ಗ್ ಬೂರೈರೆ
ಉನುಪುಗುಂತದ್ ಸಾಂಕ್ಯೆನಾಯನ
ಸಲಿಗೇಡೆಂಕ್ಲೆಡ ನ್ಯಾಯೊ ಮಲ್ಪಡ ಕರ್ಣ ಜಾಗ್‌ರ್ತೆ ||

9

ದಾನೆಯಾ ಈ ಎನನ್ ಬೋಂಟೆದ
ನಾಯಿಗೇ ಸರಿ ಮಲ್ತ ನಿನ್ನವೆ
ಮಾಸೋನಲುಡುದು ಬುಡ್ಡವೆನೆ ಪಂಡೊಂದು ಲಕ್‌ದುಂತ್ಯೆ ||
ಯಾನ್ ನಿನ್ನವೆ ತರೆನ್ ಕಡ್ತಾದ್
ಬೂತೊಗೇಲ್‌ನ್ ಪಾಡ್ಲೆ ಪಂಡ್‌ಂದ್
ವೀರೆನಸ್ವತ್ತಾಮೆ ಕತ್ತಿನ್ ಬೀಜದುಂತೊಂಡೆ ||

10

ಆಪಗನೆ ಕುರುವೀರನಕ್‌ಲೆನ್
ರಾಜಿ ಮಲ್ತದ್ ಬುಡಿಯೆ ಪಾಂಡವ-
ನಾಕ್‌ಲೆನ ಅವದಿಗ್‌ಲ ದಿನೊ ಪದಿಮೂಜಿ ನನ ಉಂಡು ||
ಪಾರ್ತನಾ ಸರಿ ಗುರ್ತೊ ಪತ್ತಾದ್
ಕಾಡ್‌ಗಕ್‌ಲೆನ್ ಕಡಪುಡುಗೊ ನಮೊ
ದ್ರೋಣೆರ್‌ಲ ಮನಿಪಂದೆ ಕುಲ್ಲಲೆ ಪನ್ನಗನೆ ಬೀಸ್ಮೆ |

11

ನಾಲ್ ಒಸೊಗು ಒರೊನೆ ಹೆಚ್ಚಿಗೆ
ಆಪುನೆನೆ ದಿನೊ ಐನ್ ಅಂಚನೆ
ಈಯೆ ಮಲ್ಪುಲ ಲೆಕ್ಕೊ ಅವದಿಯೆ ಪೂರ್ತಿ ಆಂಡತ್ತೊ
ರಾಜಿಡಕ್‌ಲೆನ ರಾಜ್ಯೊ ಕೊರೆಯ
ಪ್ರೀತಿಡಿತ್ತರಾಂಡ ನಿಕ್‌ಲೆಗ್
ಏರ್‌ಲಾ ಎದುರತ್ತ ಕೌರವ ಪಾಂಡು ಜೋಕುಲೆಗ್ ||

12

ಅಕ್‌ಲೆಡೇನೇ ರಾಜಿಯಾವಯೆ
ಸರುವೊ ನಾಸೋನೆ ಆವಡೆನ್ನವೆ
ಕುಲೊನು ಮುತ್ತವಡಕ್‌ಲ್ ಪೋಡಿಗಿ ಇದ್ದಿ ಎಂಕಿತ್ತೆ ||
ಚಲೊಕು ಸಾಣೆದ ತರೆಕ್ ಮರ್ದನ್
ಕೊರುಪುನಾ ಪಂಡಿತರ್ ಇದ್ಯರ್
ನಿನನ್ ತಲಿಪುಜಿ ಯಾನ್ ಮಲ್ಪುಲ ಪಂಡೆನಾ ಬೀಸ್ಮೆ ||

13

ಸೈನ್ಯೊಲೆನ್ ಸರಿ ರಡ್ಡ್ ಪಾಲ್‌ನ್
ಮಲ್ತ್ ಕರ್ಣೆನೆ ಒಂಜಿ ಪಾಲ್‌ದ
ಸೈನ್ಯೊದೊಟ್ಟಿಗೆ ಎರ್ದೆನೂರುಗು ದೇರ್ದ ಕೌರವೆನೆ ||
ಬುಕ್ಕೊದಾಕ್‌ಲ್ ಸಕುನಿ ಸೈಂದವೆ -
ರೆನ್ನಿ ವೀರೆರ್ ನಾಲ್ ರಂಗೊದ
ಬಿರ್ದೆರೆನ್ ಪಾರ್ತನವೆ ಎದುರುಗು ಸರಿಟ್ ಉಂತವೊಡು ||

14

ಪನ್ನನವೆ ಎಡ್ಡೆಂದ್ ಕೌರವೆ
ಎರ್ದೆ ಪುಂಡುನು ದೇರೈ ದಂಡ್‌ದ
ಬಿರ್ದೆರೊಟ್ಟುಗು ಎಡತ ಸಾದಿಡೆ ಹಸ್ತಿನಾವತಿಗ್ ||
ಅರುಜನೆನೆ ತೂದೈನ್ ದತ್ತಗ್
ತಿರ್ದಲಯ ರತೊ ಪಂಡೆ ಉತ್ತರ-
ಗಲ್ಲನೇ ಪೋಪುನೆನ್ ತೂಯರ್ ಎದುರು ಕಡೆತಕ್‌ಲ್ ||

15

ಅಲಲ ಪಾರ್ತೆನೆ ಪಾರ್ಲೆ ಪಂಡ್‌ದ್
ಎದುರುಗಸ್ತೊನು ಬುಡುದು ತೂನಗ
ಪೊಡಿಯೆ ರಟ್ಟದ್ ಬತ್ತಿ ಬಾಣೊಲೆ ಪೆಟ್ಲೆ ತಡೆವಂದೆ ||
ಕೆಲವುದಾಕ್‌ಲ್ ಬೂರೈರಲ್ಲನೆ
ಕೆಲವುದಾಕ್‌ಲ್ ಪಾರೈರೋಡೆಗೊ
ಕೆಲವೆರೆನ್ ಮಗ್‌ತೊಂದು ಉಂತ್ಯೆನೆ ಕೌರವನ ಎದುರು ||

16

ಎರ್ದೆ ಕಂಡುನ ಕೆಲಸೊ ನಿಕ್ಕೊಯ
ಎಡ್ಡೆ ಪಾತೆರೊಡಿತ್ತೆ ಬುಡ್ಡಯ
ಮರೈದಿಡ್ ಪಂಡೊಂದು ಅಕ್ಕಯೊ ಬಾಣೊರಾಪಾಯೆ ||
ಅರುಜನೆನೆ ಬುಡುನೊಂಜಿ ಪಗರಿಯೆ
ರಟ್ಟನಗ ಪತ್ತಾಂಡ್ ಪೋನಗ
ಲೆಕ್ಕೊಗೇನೂದಾಂಡ್ ಸಾವಿರೊ ಲಕ್ಷೊ ಕೋಟ್ಯಾಂಡ್ ||

17

ಪಗರಿ ತಾಗ್‌ದ್ ಕೌರವೇಸ್ವರೆ
ಕಳಟ್ ಬೂರಿಯೆನಪಗ ಆಯನ
ಮೆಗಿಯನಾಕ್‌ಲ್ ಎದುರು ಬತ್ತದ್ ಬಾಣೊರಾಪಯೆರ್ ||
ಅಕ್‌ಲೆ ಬಾಣೊನು ತಲಿತ್‌ದರ್ಜನೆ
ಪಗರಿ ರಟ್ಟಯೆ ಮಾತೆರ್‌ಗಲಾ
ಮತಿಯೆ ತತ್ತದ್ ಬೂರು ಪುರೆಲ್‌ನ ತೂಯೆನರ್ದನೆನೆ ||

18

ಎರ್ದೆ ಪುಂಡುನು ಕಾಪುನಾಕ್‌ಲ್
ಏರ್ದೆ ಇದ್ಯರ್ ಪನ್ದ ಬಾಣೊಲೆ
ಡಲ್ಪ ಸಾದಿದ ಬರಿಕ್ ಬೇಲಿದ ಕೋಟಿ ಕಟ್ಟೊಂದು ||
ತಿಕ್ಕನೆರ್ದೆನ್ ದೇರೈನರಮನೆ-
ಗರ್ಜನೆನೆ ಅಪಗೆಲ್ಯ ಕಂಜಿಲೆ
ಪೆತ್ತಗುಳು ಪಾರ್ದೆತೊ ಕೆಂದೆಲ್ ದಿಂಜಿ ಪೇರ್‌ದವು ||

19

ಮಾತೆರೆಗ್ ಸಂತೋಸು ಉತ್ತರೆ
ಬ್ರಾನ್ನಲೆನ ಒಟ್ಟಿಗೆನೆ ತೇರ್‌ಡ್

ಪೋದು ಎರ್ದೆನ್ ಬುಡ್ಡಯೆಂದ್ ಸುದ್ದಿಯಾನಗನೆ ||
ಪಾರ್ತೆ ಗುಡ್ಡೆಗ್ ತೇರ್ ತಿರ್ದಲ
ಏರ್ ಉಲ್ಲೆರ್ ಪನ್ದ ತೂಯೆರೆ
ಪೋವೊಡುಂದುದು ಪನ್ನಗುತ್ತರೆ ತೇರ್ ತಿರ್ದಾಯೆ ||

20

ಗಾಂಡಿವೊದ ಜೇಂಕಾರೊ ಹನುಮನ
ವೀರಗರ್ಜನೆ ದೇವದತ್ತೊನು
ತಾನೆ ಉರಿತೊಂದೆತ್ತೆ ಪಾರ್ತೆನೆ ವೈರಿಲಿತ್ತನಡೆ ||
ಬೀಸ್ಮ ದ್ರೋಣೆರ್ ಅಸ್ವತ್ತಾಮನ
ಕೂಟೊಡೇ ಗುರು ಕೃಪೆರೆನುಂತದ
ತೇರ್ನೇರ್ದ್ ಕುಲ್ಲದಿತ್ತೆರ್ ಒಂಜಿ ಕಡೆಟೊಲು ||

21

ಕರ್ರೆ ಸೈಂದವೆ ಸಕುನಿನಾಕ್ಲೆ
ಬಿಲ್ಲೆ ಬಾಣೊನು ಕತ್ತಿ ಕಡ್ಲೊನು
ಪತ್ತಾದುಂತನ ತೂಯೆನರುನೆ ಸೈನ್ಯೊ ಸಾಗರೊನು ||
ಆನೆ ಕುದುರೆಲು ಕಾರ್ ನಡೆಕುಲು
ಸಾಲ್ಡುಂತನ ತೂದು ಲೆಕ್ಕೊಗು
ಮೀರ್ಡುಂಡುಂದಾಯೆ ನೆನೆತ್ದ ಪಂಡನುತ್ತರಡೆ ||

22

ಸಾರತಿಯೆ ತೂವೊನುಲ ವೈರಿಲೆ-
ನೇನ್ ಮಗ್ಗ್ಡ್ ಪಾಡ್ಲೆ ಪಂಡ್ಡ್
ಮೋಹನಾಸ್ತೊನು ಮೂಡಿಗೇಡ್ಡ್ ದೆತ್ತೆನರುನೆನೆ ||
ಬಾಣೊಗಾಪುನ ಮಂತ್ರೊ ಜಪಿತ್ದ್
ನಾರ್ನೊತ್ತಾದ್ ಬಿಲ್ಲೆಗೈನ್ಲ
ಬೇಕೊನೇ ಸರಿ ಕೊಲ್ಪದಾಪಗ ಬುಡಿಯೆ ವೈರಿಲೆಗ್ ||

23

ಬಾಣೊದಾ ಕಿಟಿ ರಟ್ಟದಪಗನೆ
ಮಾತೆರೆಗ್ ತಾಗ್ನಗ ಅಮಲ್ಡ್
ಬೂರೈರಲ್ಲನೆ ತೂಂಕು ತೂಂಕುದು ಆನೆ ಕುದುರೆಲುಲ ||
ಆ ವಿರಾಟ ಕುಮಾರಗಾಚಿರೊ
ಆದ್ ಪಾರ್ತನ ಮೋನೆ ತೂದೇ
ಏತಲಾ ಪುಗರೊಂದು ಪಂಡೆನೆ ಬಾರಿ ಬಿಸೆಂದ್ ||

24

ಬುಕ್ಕೊ ತೇರ್ನ್ ಈಂದ್‌ದಾಡೆಗ್
ಎತ್ತದಾಯನ ಬಿಲ್ಲೆ ಬಾಣೊನು
ಮಿತ್ತ ತಿಕ್ಕದ್ ದೀಡೈ ದುಂಬುದ ಲೆಕೊನೆ ಸರಿಯಾದ್ ||
ಯಾನ್ ತೇರ್ನ್ ದೇರೈ ಈಯೇ
ಕಾಳಗೊಡು ಗೆಲ್ತನಯೆ ಪಂಡ್ಡ್
ಸೀದ ಅರಮನೆದಾಡೆಗೆತ್ತಯೆ ಬ್ರಾನ್ನಲೆನೆ ರತೊನು ||

25

ಉತ್ತರೆನೆ ಗೆಲ್ತೊಂದು ಬತ್ತೆನೆ
ಪನ್ನಿ ಸಂತೊಸುಡಪಗ ಪೋಣ್ಣಲು
ಪತ್ತೈರಾರತಿ ಪದೊನು ಪಂಡ್ಡ್ ಬೊಟ್ಟು ಪಾಡಿಯೆರ್ ||
ಮತ್ಸ್ಯ ರಾಜಗ್ ಬಾರಿ ಸಂತೊಸು
ತನ್ನವೇ ಮಗೆ ಕೌರವಾದಿಲೆ
ಗೆಲ್ತನಯೆ ಪಂಡೊಂದು ರಾಣಿಡ ಕುಸಲ್ ಪಾತೆರ್ಯೆ ||

|| ವಿರಾಟರಾಯಗ್ ಪಾಂಡೆವೆರೆ ಗುರ್ತಾಂಡ್ ||

ಮಗೆನೆ ಗೆಲ್ತನ ಬಾರಿ ಸಂತೊಸು
ಡರಸು ಮತ್ಸ್ಯನೆ ಕಂಕ ಬಟ್ಟಿಡ
ಪಗಡೆ ಗೊಬ್ಬುಗೊ ಪನ್ದ ಲೆಪ್ಪುನಗಪಗ ಧರ್ಮಜೆನೆ ||
ಸಕುನಿನೆದುರುಡು ಧರ್ಮನಂದನೆ
ಕಳೆಯೆ ರಾಜ್ಯೊನು ಪಗಡೆಗೊಬ್ಬುದು
ನಮೋನೆ ಗೊಬ್ಬುನ ಬೊಡ್ಡಿ ಜುಗರಿದ ಮರ್ಲ್ ಎಡ್ಡೆತ್ತೆ ||

1

ದೂದುನೊಡ್ಡದ್ ಗೊಬ್ಬುನತ್ತಯೆ
ಕಾಳಗೊಡು ಮಗೆ ಗೆಲ್ತಿ ಸಂತೊಸು
ಡೇನ್ ಗೊಬೈರೆ ಲೆಪ್ಪುನೀರೆನ್ ಬೇಕೊ ಬಲೆ ಈಡೆ ||
ಆಂಡ್ ಪಂಡ್ಡ್ ಬನ್ನಗಪಗನೆ
ಜೂಜಿ ದಂಕಣೊ ಇತ್ತಿ ಪಲಯಿನ್
ದೀಡ್ಡ್ ಕುಲೈ ವಿರಾಟಿನಟ್ಟಿ ಪಾಡ್ಡ್ ಮಣೆತೆದುರು ||

2

ಇರೈರಲ ಸಂತೋಸುಡೊಟ್ಟಿಗೆ
ಗೊಬ್ಬುನಗನೆ ವಿರಾಟಿ ತೆಲಿತ್ದ್
ದುಸ್ಸ ಕೌರವನಕಲೆ ಸೇನೆನ್ ಪೊಡಿಯೆ ರಟ್ಟಾದ್ ||
ಗೆಲ್ತನುತ್ತರೆ ಪನ್ನಗಪಗನೆ
ಗೆಲ್ತನಯೆ ಬ್ರಾನ್ನಲೆನೆ ಉತ್ತರೆ
ಗೆಲ್ತಿಯೆರೆ ಸಾದ್ಯೊಂಡೊ ಪುಕ್ಕಗ್ ಕೌರವಾದಿಲೆನ್ ||

3

ಈತ್ ಪನ್ನುನ ಕೇನ್ದ ಕೋಪೊಡು
ರಾಜೆ ಪಗಡೆದ ಕಾಯಿಡಾಕಿಯೆ
ಆ ಯುದ್ಧಿರ ಮುಂಡೊಡಾಪಗ ನೆತ್ತೆರರಿನಗನೆ ||
ತಾನ್ ಕೈಟೇ ಅಮತ್ ಪತ್ತನ-
ಗಾಪಗನೆ ಸೈರೇಂದ್ರಿ ತನ್ನವೆ
ಸೀರೆದಾ ಕೊಡಿಟರಿನ ನೆತ್ತೆರ್ನೊಚ್ಚಿದುಂತಿಯಲ್ ||

4

ಉತ್ತರೇನೆ ಪಾರ್ತನ್‌ಲ ಲೆತೊನುದು
ಬತ್ತೆನಾಡೆಗ್ ಧರ್ಮನಂದನೆ
ನೆತ್ತೆರ್‌ಡ್ ಮುರ್ಕನೆನ್ ತೂದೇ ನೊಂಡು ತುಚ್ಚೊಂದು ||
ಅಣ್ಣಗಾಕ್‌ನೆ ಏರ್ ಆಯನ
ಕರ್ಲನೊಯ್‌ದ್ ದಕ್ಕೆ ನಾಯಿಗ್
ಪನ್‌ಲಾರ್‌ಬೆಟೆ ಕೊರ್ನ ಕೇಂಡ್‌ದ್ ಬೀಮೆ ಪಾರ್‌ಬತ್ತೆ |

5

ಯಮೆನೊ ರುದ್ರೆನೊ ಅತ್ತ ದೇವತೆ -
ನಕ್‌ಲೊ ಧರ್ಮಜಿತ್ತೆ ಹಾಕ್‌ನೆ
ಗರುವೊದಕ್‌ಲೆ ಮುಸುಂಟುನುದುರ್‌ವೆ ಹಾಸ್ ಪಾದೆಡ್‌ಲ ||
ಪನುಪನೆನ್ ಕೇನೊಂದು ಉತ್ತರೆ
ಅಕ್‌ಲೆ ಕಾರ್‌ಗ್ ಅಡ್ಲೊ ಬೂರುದು
ಅರಸು ಮತ್ಸ್ಯಡ ಪನ್ನೆನಮ್ಮೆರೆ ಮುಕುಲು ಪಾಂಡವೆರ್ ||

6

ಜೂಜಿ ಗೊಬ್ಬುದು ಸೋಲ್ತಿ ಸೆರ್‌ಡ್
ಕಾಡ್‌ಡೇ ಪದ್‌ರಾಡ್ ಒರ್ಸೊನು
ನೂಕ್‌ನಾಕ್‌ಲ್ ಒಂಜಿ ಒರ್ಸೊಡು ಗುರ್ತೊ ತಪ್ಪಾದ್ ||
ಮೂಲು ಉಂತ್ಯೆರ್ ಕಂಕ ಬಟ್ಟೆನ
ಏಸೊ ಪಾಡ್‌ದ್ ಧರ್ಮನಂದನೆ
ಬೀಮೆ ವಲಲೆನೆ ಪಾರ್ತೆ ಬ್ರಾನ್ಸಲೆ ನಂಕ್ ಗೊಂತಾಯ್ತಿ ||

7

ದ್ರೋಪದಿಯೆ ಸೈರೇಂದ್ರಿ ತೂಲೆಯೆ
ಆ ನಕುಲ ಸಾದೇವನಾಕ್‌ಲ್
ಮೇಪುಗುಂತುದು ಎರ್ರೆ ಮೇಪಯೆರಕ್‌ಲ್ ನಮ್ಮಾಲು ||
ಈತ್ ಪನ್ನಗ ತನ್ನ ಪೀಟೊಡು-
ದಾಯೆ ಲಕ್ಕ್‌ದ್ ಅಡ್ಲೊ ಬೂರಿಯೆ
ಕಾಪೊಡೆನ್ನನ್ ಪನ್ದ ಬಗ್ಗಿಡ್ ಧರ್ಮನಂದನಗ್ ||

8

ಅಕ್‌ಲೆಗೈವೆರೆಗಾಪಿ ಐತ್ತೊನು
ಕೊರುದು ಪಂಡೆ ವಿರಾಟೆ ರಾಣಿಡ
ನಮನ ಪುಣ್ಯೊಗು ಪಾಂಡು ಬಾಲೆಲು ದ್ರೋಪದಿನ್ ಕೂಡ್ತು ||
ಬತ್ತೆದುಲ್ಲೆರ್ ತೂಲ ಪನ್ನಗ
ಕೈತ್ತಡೆಗ್ ಪೋದಾಲ್ ದ್ರಾಪದಿ -
ನಲ್ತೆ ಲೆತೊನುದು ಪೋದು ಪಟ್ಟಿದ ಸೀರೆ ತುತ್ತಯಲ್

9

ಸಿಮ್ಮೊ ಪೀಟೊಡು ಧರ್ಮನಂದನ
ನೊತ್ತುಗಾಯನ ಮೆಗೈನಕ್‌ಲೆನ್

ಕುಲ್ಲದಪಗ ವಿರಾಟೆ ರಾಣಿಡ ಪಂಡೆ ದ್ರಾಪದಿನ್ ||
ಐತ್ತೊ ಮಲ್ತೆದ್ ಮುಕುಲೆನೊಟ್ಟುಗು
ಕುಲ್ಲದೀಯೇ ಪತ್ತೆಲಾರತಿ
ಪನ್ನಗನೆ ತಯರಾದ್ ಪೊರ್ಲೊಡು ರಾಣಿ ಬೆಳಗಯಲ್ ||

|| ಉತ್ತರೇನ ಮದಿಮೆದಟ್ಟಣೆ ||

ಮತ್ಸ್ಯ ನಗರೊಡು ಪಾಂಡು ಬಾಲ್ಗೆಗ್
ಸಮ್ಮನೊದ ಮಹಗೌಜಿಯಾನಗ
ಎತ್ತೆರಾಡೆಗ್ ಮಾತ ಪ್ರಜೆ ಪರಿವಾರೊ ಸೇರೊಂದು ||
ಕುಕ್ಕು ಪೇರೊಳು ಪಂದ್‌ ಬೊಂಡೊದ
ಮಲ್ಲ ಪುದೆ ತುಂಬೊಂದು ಬರ್ಪುನ
ಹಲ್ಲಿದಾ ಜನೊಕುಲೆನ ಲೆಕ್ಕೊನು ಮಲ್ಪುನೇರವುಲು ||

1

ನಾಲ್ ದಿನೊ ಕರಿದಾದ್ ಓಲೆಗೊ
ಚಾವಡಿಡ್ ಪಾಂಡವೆರೆನೊಟ್ಟುಗು
ಆ ವಿರಾಟೆನೆ ಕುಲ್ಲೊನುಂದೇ ಧರ್ಮನಂದನಡ ||
ಪಾರ್ತಗೆನ್ನವೆ ಮಗಲೆ ಮದಿಮೆನ್
ಈರ್ ಮಲ್ತೆದ್ ವಸು ಕುಟುಂಬೊದ
ಪ್ರೀತಿದಾ ಪೊದ್ದೆರ್‌ಲ ಆವೊಡು ಪನ್ದ ಕೈಮುಗಿಯೆ ||

2

ಧರ್ಮನಂದನೆ ಪಾರ್ತ ಮೋನೆನ್
ದಿಸ್ಸಿದೆತ್ತೆದ್ ತೂನಗಾಪಗ
ಉತ್ತರೆಗ್ ಒಂಜೊರ್ಸೊ ನಾಟೊದ ಸಾಸ್ತ್ರೊ ಕಲ್ಪನಗ ||
ಎನ್ನನಾಲೇ ಪೂಜ್ಯ ಬಾವೊಡು
ವಿದ್ಯೆ ಕಲ್ಪಯಿನಾರ್ ಪಂಡ್‌ದ್
ಬಗ್ಗಿಡೆತ್ತೆನ ಆಲ್ ಮಗಲೆಗ್ ಸಮೋನೆ ಆಂಡಣ್ಣ ||

3

ವಸು ಕುಟುಂಬೊದ ಪೊಣ್ಣು ನಮನವೆ
ಕುರುಕುಲೊತ ಸಿರಿ ದೀಪೊನರ್‌ಲದ್
ಬೆಳಗಯೆರೆನೇ ಕೊರಡ್ ಮಗಲೆನ್ ಎನ್ನವೇ ಮಗಕ್ ||
ನಿಜೊನೆ ಪಂಡನ ಪಾರ್ತ ಪಾತೆರೊ
ಕೊರುಪನಯ ಅಬಿಮನ್ಯುಗೇ ನಿನ
ಮಗಲೆನ್‌ಲ ಪನ್ನಗನೆ ಮತ್ಸ್ಯನೆ ಒಪ್ಪೆ ಸಂತೊಸುಡು ||

4

ಕ್ರಿಷ್ಣನೇ ಅಬಿಮನ್ಯು ಸಮ್ಮಲೆ
ರಕ್ಷಕೆನೆ ಆದುಲ್ಲೆನಾಯಡ

ನಮ್ಮವಾಸೆನ್ ದುಂಬುದೀಡ್ ಅರಿಕೆ ಮಲ್ತೊನುಗೊ ||
ಮುಲ್ಪಡ್ ಒರಿ ದೂತನಾಡೆಗ್
ಇತ್ತೆನೇ ಕಡಪುಡುದು ಸ್ಲಾಮಿನ್
ತರ್ದಿದೀಡೆಗ್ ನಮೋನೆ ಬದ್ಲೊದ ಕಾರ್ಯೊ ನಡಪಗನೊ ||

5

ಧರ್ಮನಂದನೆ ಪಂಡಿ ಪಾತೆರೊ -
ಗೊಪ್ಪುದಾ ವಸು ರಾಜೆ ಕ್ರಿಷ್ಣಗ್
ಬಗ್ಗಿದವೆ ಕಾಣಿಗೇನ್ ತುಂಬದ್ ದೂತನಾಕ್‌ಲೆಡ ||
ಬುಕ್ಕೊ ಧರ್ಮಜೆ ಕೊರ್ನ್ ಓಲೆನ್
ಕೊರ್ನ್ ಕಡಪುಡಿ ಸಾತ್‌ಗಾಕ್‌ಲ್
ಎತ್ತಿಯೆರ್ ದಿನೊ ಮೂಜಿ ನಡತ್‌ದ್ ದ್ವಾರಕಾ ಪುರೊಕು ||

6

ಕಾಪುನಕ್‌ಲೆನ ಒಪ್ಪಿಗಿಡ್‌ಲಾ
ವಾಸುದೇವನ ಮಂದಿರೊದ ಸಿರಿ
ಬಾಕಿಲ್‌ಡ್ ಉಂತನಗ ಕೇಂಡೆರ್ ಏರ್ ನಿಕ್‌ಲ್‌ಂದ್ ||
ಪಾಂಡವೆರ್ ಕಡಪುಡುನ ದೂತೆರ್
ಆ ವಿರಾಟನ ರಾಜ್ಯೊದಾಕ್‌ಲ್
ದೇವರೆನ ಬೇಟಿಗ್‌ಲ ಪನ್ನಗ ಉಲಯಿ ಪೊಗ್ಗಯೆರ್ ||

7

ಅಡ್ಲೊ ಬೂರೈರ್ ಸ್ಲಾಮಿ ಕ್ರಿಷ್ಣಗ್
ಪೆಟ್ಟಿಗದ ಕಾಣಿಗೇಲೆ ಬುಡ್ಡದ್
ಕೊರ್ನ್ ಪಂಡೆರ್ ಸ್ಲಾಮಿದೇವೆರ್ ಕಾಪೊಡೆಂಕ್‌ಲೆನ್ ||
ಮತ್ಸ್ಯರಾಜೆರೆ ದೂತೆರೆಂಕುಲು
ಅಲ್ಪ ಇತ್ತೆರ್ ಪಾಂಡವೆರ್ ನಿಜೊ
ಧರ್ಮನಂದನೆರೀರೆಗೋಲೆನ್ ಕೊರ್ತೆರೆಂಕ್‌ಲೆಡ ||

8

ದೂತೆಕೊರ್ನವೆ ಓಲೆದೊಕ್ಕಣೆ
ನೋದುದೇ ಸಿರಿಕ್ರಿಷ್ಣ ದೇವಕಿ
ದೇವಿಡಾ ವಸುದೇವ ಬಲರಾಮಾದಿ ಬಂದುಲೆಡ ||
ಪಾಂಡವೆರ್ ಪದಿ ಮೂಜಿ ಒರ್ಸೊದ
ಪೂರ್ತಿ ಅವದಿನ್ ಮುಗಿತದಿತ್ತೆನೆ
ಆ ವಿರಾಟನ ಸಿರಿಯರಂತಡೆಡುಲ್ಲೆರ್‌ಗೆ ಇತ್ತೆ ||

9

ನಮ್ಮವೇ ಅಬಿಮನ್ಯುಗಾಯನ
ಪೊರ್ಲುದಾ ಮಗಲೆನ್‌ಲ ಕೊರ್ಪೆಗಿ
ನಿಷ್ಠೆಯೊಗು ನಮೋ ಪೋಯೆರೆಗ್‌ಲಾ ಧರ್ಮನಂದನೆನೆ ||
ಬಗ್ಗಿಡೋಲೆನ್ ಬರೆತೆ ಮಾತೆರ್
ಮತ್ಸ್ಯ ನಗರೊಗು ಪೋಯೆರೆಂದ್‌ದ್
ಎಡ್ಡೆ ಮೂರ್ತೊನು ತೂದು ಪಿದಡುಗೊ ಪಂಡೆ ಸಿರಿಕ್ರಿಷ್ಣ ||

|| ಅಭಿಮನ್ಯುನ ಮದಿಮೆ ||

ಮತ್ಸ್ಯನಾ ಉಪಪ್ಲವ್ಯೊ ನಗರೊಡು
ಪೊರ್ಲುದಾ ಪೊಸತೊಂಜಿ ಅರಮನೆ
ಕಟ್ಟಿದಯಿಟೇ ಮಗಲೆ ಮದಿಮೆನ್ ಮಲ್ತೊಡುಂದಾಯೆ ||
ಲಕ್ಷ್ಮೊ ಜನೊ ಕುಲೈರೆಗ್ ಆಪುನ
ಕಲ್ಯಾಣೊದ ಸಿರಿ ಮಂಟಪೊನುಲಾ
ಕಟ್ಟಿಯೆನೆ ಸಬೆ ಮೆಚ್ಚುನಂಚೆನೆ ಬುದ್ಧಿವಂತೆರೆಡ ||

1

ವಾಸುದೇವನೆ ಬರ್ಪಿ ಸುದ್ದಿನ್
ಕೇಂಡ್‌ದಾಯೆನೆ ರಂಗ್ ರಂಗ್‌ದ
ಸಾರ್ಣೆ ಮಲ್ಪದ್ ಚೋರ್ಣೊ ಕಟ್ಟಯೆ ಆನೆ ಬಾಕಿಲ್‌ಗ್ ||
ಕೇರಿ ಕೇರಿಡ್ ಇತ್ತ್‌ನಿಲ್ಲದ
ಬಾಕಿಲ್‌ಡ್ ಸಿರಿ ಚೋರ್ಣೊ ಕಟ್ಟದ್
ದೇವೆರೆನ್ ಎದ್ಲೊನುನಟ್ಟಣೆ ಮಲ್ತೆ ಸರಿಯಾದ್ ||

2

ವಾಸ್ತು ಪೂಜೆನ್ ಮಲ್ಪದಯಿಟೇ
ಪಾಂಡವೆರೆನುಂತಯೆನೆ ಅಪಗನೆ
ರಾಜದೂತೆರ್ ಬತ್ತ್ ಪಂಡೆರ್ ಕ್ರಿಷ್ಣ ಬತ್ತೆಂದ್ ||
ಸಾಲ್‌ಡುಂತಯೆ ಕಲಸೊ ಕನ್ನಟಿ-
ದಾಕ್‌ಲೆನ್ ಸರಿ ವೇದೊ ಗೋಸೊಗು
ಬ್ರಾಣೆರೆನ್ ಉಂತಾದ್ ಸಾದಿಗ್ ನಿಲ್ತ್ ತೂನಗನೆ ||

3

ಕ್ರಿಷ್ಣನಾ ಪರಿವಾರೊ ಮಾತೆರ್
ಸತ್ಯಬಾಮಲ ದೇವಕಿನ ಕೈ
ಪತ್ತೊನುಂದೇ ಬನ್ನಗಿತ್ತಲ್ ದೇವಿ ರುಕ್ಮಿಣಿಲ ||
ಅಮ್ಮನೊಟ್ಟು ಸುಬದ್ರೆ ಎತ್ಯಲ್
ಉಗ್ರಸೇನೆಲ ಇತ್ತೆ ರೇವತಿ
ನೊಟ್ಟುಗೇ ಬಲರಾಮನುದ್ಧವೆ ಸಾತ್ಯಕಿಲು ಸೇರ್ದ್ ||

4

ದುಪದ ರಾಜೆನೆ ದೃಸ್ವದ್ಯುಮ್ಮೆಲ
ಅರಸು ಪರಿವಾರೊಲೆನ ಒಟ್ಟುಗು
ಅಕ್‌ಲಕ್‌ಲೆ ತೇರಲೆಡ್ ಕುದುರೆಲೆ ಮೇಲ್ಡ್ ಕುಲ್ಲೊಂದು ||
ಬರುಪುನೆನ್ ತೂವೊಂದು ಮತ್ಸ್ಯನೆ
ಎದುಕೊನುನ ಸಂಬ್ರಮೊಗು ವಾದ್ಯೊನು
ಉರಿಪದಾಪಗ ವೇದೊ ಗೋಸೊಡು ಉಲಯಿ ಪೊಗ್ಗಯೆನೆ ||

5

ಆ ಮಹಾಮಂದಿರೊದ ಉಲಯಿಡ್
ವಾಸುದೇವನ್ ಪೀಟೊಗೇರ್ನ್
ರಾಣಿನೊಟ್ಟುಗು ಆ ವಿರಾಟೆನೆ ಕಾಣೆಗನ್ ದೀಡ್ಡ್ ||
ಕಾರ್ಗಡ್ಡೊನೆ ಬೂರೈ ಮಾತೆರ್
ಸಾಲ್ಡೊರಿಯೊರಿ ಬೂರೈರಡ್ಡೊನೆ
ದೇವ ದೇವನ ಕಾರ್ಗಲಕ್‌ಲೆನ ಪುದರ್ ಪಂಡೊಂದು ||

6

ಚಾವಡಿಡ್ ಕುಲ್ಲಿಯೆರ್ ಒಟ್ಟುಗು
ಯಾದವೆರ್ ಪಾಂಡವೆರ್ ಪಾಂಚಾ
ಲೇರ್ ಬತ್ತನ ಮಾತ ಪರಿವಾರೊಗುಳು ಸೇರೊಂದು ||
ಆಪಗನೆ ಧರ್ಮಜೆನೆ ಲಕ್ಕದ್
ಶ್ರೀ ಮುಕುಂದನ ಕೈತಲುಂತುದು
ದೇವ ನಿನ್ನವೆ ದಯೊಟು ಎಂಕುಲು ಒರ್ಸೊ ಪದ್‌ರಾಡ್ ||

7

ಕಾಡ್ ತಿರ್ಗದ್ ಈ ವಿರಾಟನ
ರಾಜದಾನಿಡ್ ಒಂಜಿ ಒರ್ಸೊನು
ಬಾರಿ ಸುಕೊ ಸಂತೋಸುಡೆಂಕುಲು ಕರಿಯೊ ಸಿರಿ ಕ್ರಿಷ್ಣ ||
ಮೂಲು ಎಂಕ್ಲೆನ್ ಸಾಂಕಿ ಮತ್ತನ್ನ
ಪ್ರೀತಿದಾ ಉಪಕಾರೊನೆಂಕುಲು
ಏಪೊಲಾ ಮರಪಯೊನೆ ಪಂಡ್‌ದ್ ಸಬೆಟ್ ಪುಗರಿಯೆನೆ ||

8

ಅರಸು ಮತ್ತನ್ನ ಮಗಲ್ ಉತ್ತರೆ
ಪನ್‌ಪಿ ಪೊರ್ಲುದ ಪೊಣ್ಣನಿತ್ತೆನೆ
ಮದಿಮೆ ಮಲ್ತದ್ ನಮ್ಮ ಅಭಿಮನ್ಯುಗುಲ ಕೊರ್ಪೆಂದ್ ||
ಎನಡ ಪನ್ನಗ ಕ್ರಿಷ್ಣ ಸ್ವಾಮಿಡ
ಅರಿಕೆ ಮಲ್ತದ್ ಕೇನ್ನೊ ಪಂಡ್‌ದ್
ನಿಕಲೆನಿಡೆಗ್ ಬರ್ಪಯಿನೆ ಮಹದೇವ ಪರಮಾತ್ಮ ||

9

ಕುರುಕುಲೊಕು ವಸುಕುಲೊತ ಪೊಣ್ಣನ್
ಮದಿಮೆ ಮಲ್ತೊಲಿ ನಿಕ್ಲೆ ಪೊಣ್ಣನ್
ಅಕ್‌ಲೆ ಕುಲೊಕುಲ ಕೊರ್ಪುನವು ಸರಿಯತ್ತ ತೆರಿಯೊನುಲ ||
ದಿನೊತ ಮೂರ್ತೊನು ತೂದು ಮದಿಮೆನ್
ವಿದಿ ವಿದಾನೊಡು ಮಲ್ಪಿ ಪನ್ನಗ
ಇರುವೆರ್‌ಲ ನಿಚ್ಚಯೊದ ಬೂಳೊನು ಪತ್ಯೆರೊಟ್ಟಾದ್ ||

10

ದೋಯಿಸೆರೆಡನೆ ಮೂರ್ತೊ ಕೇಂಡ್‌ದ್
ಊರುದೂರುದ ಮಾತ ಬಂದುಲೆ

ಗೋಲೆ ಕಡಪುಡುದಾದ್ ಮದಿಮೆನ್ ಬಾರಿ ಸಂಬ್ರುಮೊಡು ||
ನಾಲ್ ದಿನೊ ಸರಿಯಾದ್ ವೈದಿಕೊ
ಸಾಸ್ತೊದಂಚೆನೆ ಮಲ್ತದೈನನೆ
ಓಕುಳಿದ ದಿನೊ ಪನ್ನ ಕುಸಲ್‌ಡ್ ರಂಗ್‌ದಾನೀರ್ಡ್ ||

11

ಮುಕ್ಕಿಯೆರೆ ಮಾತೆರ್ಲ ಕ್ರಿಷ್ಣನ್
ಬುಕ್ಕೊ ಬಲರಾಮನ್‌ಲ ಪಾಂಡವ
ರೈವೈರ್‌ಲ ಮುರ್ಯೆರ್ ಬಣ್ಣೊದ ನೀರ್ಡ್ ತೆಲಿತೊಂದು ||
ರುಕ್ಕೀಣಿನ್ ದ್ರೌಪದಿಲ ರಂಗ್‌ಡ್
ಮುರ್ಯಲ್ ಸರಿ ಸತ್ಯಬಾಮೆನ್
ಕ್ರಿಷ್ಣ ತಂಗಡಿಲಾ ಸುಬದ್ರೆನ್ ಚಂಡಿ ಮಲ್ತಲ್‌ಲ ||

12

ಬಾಕಿದಾಕ್‌ಲ್ ಆಣ್ ಪೊಣ್ಣಲು
ಆ ವಿರಾಟೆ ಸುದೇಷ್ಣೆನೊಟ್ಟಿಗೆ
ಮೀಯೆ ರಂಗ್‌ದ ನೀರ್ಡ್ ಮದೈದ ಬಾರಿ ಸಂತೊಸುಡು ||
ಮದಿಮಲೆನ್ ಒಯ್ಯೊಂದು ಮದಿಮಯೆ
ಕಿರೆಕಲಾಗಿಯೆ ರಂಗ್ ನೀರ್‌ದ
ನರನ ಸಿಸೈದಿ ನೀರ್ ಚೇತಲ್ ಮೋನೆಗಾಯನವೆ ||

13

ಸುದೊ ನೀರ್‌ಡ್ ಮೀದ್ ಚಂಡಿನ
ಒಚ್ಚಿಯೆರ್ ಮಾತೆರ್ಲ ಮದೈನ
ಪೊರ್ತುಗುಣಿಯೆರೆ ಕುಲೈರೊಟ್ಟುಗು ಪಂತೈ ಪಾಡ್‌ನೆಟ್ ||
ಬಲ್ಲಣೊದ ಒಣಸಾದ್ ಬತ್ತನ
ಬಿನ್ನರೆನ್ ಕಡಪುಡಿಯೆ ಮತ್ತೆನೆ
ಕ್ರಿಷ್ಣದ್ರುಪದರೆ ಕಡತ ಬಿನ್ನರೆ ಮಾತ್ರೊ ಉಂತಿಯೆರ್ ||

ಶ್ರೀ ಅನಂತಕೋಡಿ ಸುಬ್ರಾಯ ದೇವರೆ ನಿರ್ಪೊಡು;
ಪರಿವಾರೊದೈವೊಲೆನ ಬೆರಿ ಸಾಯೊಡು;
ಕೆಲಿಂಜ ದೂರುಡು ನಿಲೆಯಾಯಿನ ;
ಅಪ್ಪೆ ಸಿರಿ ಉಳ್ಳಾಲ್ದಿನ ದಯೊಟು;
ತುಳು ಕೆಲಿಂಜ ಭಾರತೊದ ವಿರಾಟ ಪರ್ವೊ
ಪೂರ್ತಿಯಾಂಡ್.

ತುಳು ಕೆಲಿಂಜ ಬಾರತೊ

ಉದ್ಯೋಗ ಪರ್ವ

ಸುರುತ ಸಂದಿ

ಪಾಂಡವೆರೆ ಆಲೋಚನೆದ ಸಬೆ

ಧರ್ಮ ನಂದನೆ ಕ್ರಿಷ್ಟ ಸ್ವಾಮಿನ್
ತನ್ನ ಸಮ್ಮಲೆ ದ್ರುಪದ ರಾಜನ್
ಬುಕ್ಕೊ ಇತ್ತೆದ ಪೊಸತ್ ಪೊದ್ದನ್ ಒಟ್ಟು ಕೂಡ್ಲಾದ್ ||
ಮೆಗೈನಕ್‌ಲೆನ್ ಕೈತಲುಂತದ್
ಹಸ್ತಿನಾವತಿ ಬುಡುದು ಎಂಕುಲು
ಸರೊ ಸೊತ್ತುಲೆ ಮಾತ ಕೌರವನಕ್‌ಲೆ ಸ್ವಾದಿನೊಗು ||

1

ಕೊರುದು ಪದ್‌ರಾಡೊಸೊ ಕಾಡ್‌ಡ್
ದಿನೊನು ಕಳೆದಾದಿತ್ತೆ ಮೂಲೆ
ಒರುಸೊ ಒಂಜೆನ್ ಕಳೆಯೊ ದುಂಬುಗು ಸಾದಿ ಎಂಚಿನವು ||
ನಿಕ್‌ಲ್ ಮಾತೆರ್ ಗ್ರೇಯ್‌ದಂಕ್ಲೆಗ್
ತೆರಿಪವೊಡು ಪನ್ನಗನೆ ಮಾತೆರ್
ಹರಿನ ಮೋನೆನ್ ತೂನಗಾಪಗ ಪನ್‌ಪೆ ಸಿರಿಕ್ರಿಷ್ಟೆ ||

2

ಜೂಜಿಗೊಬ್ಬುದು ಸೋಲ್ತನಾಕ್‌ಲ್
ಕಾಡ್ ಪದ್‌ರಾಡೊಸೊ ಪೋವೊಡು
ಊರುಡೊಂಚೆ ಒಸೊ ಉಪೊಡು ಗುರ್ತೊ ತಪ್ಪಾದ್ ||
ಈತೆ ಸೆರೊನ್ ಪಾಡ್ಲೆ ಕೌರವೆ
ಪಾಂಡವೆರ್ ಸೋಲ್ತದೆರ್ ಕಾಡ್‌ಗ್
ಆನಿಯೆ ಪೋಯ್‌ಕ್‌ಲ್ ಸೆರ್ಟನ್ ಪೂರ ಮುಗಿತದೆರ್ ||

3

ನನಗ್‌ಲಕ್‌ಲೆನ ಸೊತ್ತು ಮಾತೆನ್
ಪೆರಪ ಕೊರ್ದುನ ಧರ್ಮ ಕೌರವ-
ನಕ್‌ಲ್ ಲೆತ್ತಾದ್ ಕೊರೊಡು ಅವದಿಲ ತೀರ್‌ನಾಪಗನೆ ||
ಅಯಿನ ಸುದ್ದಿನ್ ಬುಡುದು ಎರ್ದೆನ್
ಬಲತ್‌ಕಾರೊಡು ಕೊಂಡು ಪೋಯೆರೆ
ಪಡೆನ್ ಕೂಡ್ಲಾದ್ ಬತ್ತೆರಾಕ್‌ಲ್ ಮುಕುಲು ಇತ್ತೆನಡೆ ||

4

ದಾನೆ ಪನ್ನರ್ ನಿಕ್‌ಲ್ ಪನ್ನಗ
ಬೀಮ ಪಾರ್ತೆರ್ ಲಕ್ಯದುಂತುದು

ಆ ದುರೊದನ ಕೈಡ್‌ದಂಕ್ಲೆನ ರಾಜ್ಯೊ ಸರ್ವೆಸೊ ||
ಪೋಯಿನೆನ್ ಪಡೆಯೆರೆಗ್ ಅಣ್ಣನ
ಪಾತೆರೊನುಲಾ ನೀತಿ ಧರ್ಮೊನು
ಮೀರುವೊನೆ ಪಂಡೊಂದು ಕ್ರಿಷ್ಟಗ್ ಅಡ್ಲೊ ಬೂರಿಯೆರ್ ||

5

ಪಗಡೆ ಗೊಬ್ಬುದು ಕಳೆಯಿ ರಾಜ್ಯೊನು
ಪೆರಪ ಕೇನುನ ಹಕ್ಕು ಅತ್ತೆಡ
ಲಡಯಿಗುಂತುನ ಕ್ರಮೊನೆ ಇದ್ದಿಯ ಕ್ರಿಷ್ಟ ತೆರಿಯೊನುಲ ||
ನಳೆನೆ ಪನ್ನುನ ನಿಸದ ರಾಜೆನೆ
ಜುಗರೆಡೆ ಸರ್ವೆಸೊ ಕಳೆದಲ
ಮಗ್‌ರ್ ಜೂಜಿನ್ ಗೊಬ್ಬುದಾಯೆನೆ ಪಡೆಯೆ ಕಳೆಯಿನೆನ್ ||

6

ಮುಕುಲುಲಾ ಪಿರ ಗೊಬ್ಬುದಕ್‌ಲೆಡ
ಗೆಲ್‌ತದೇ ಸರ್ವೆಸೊ ಪಡೆಪುನ
ಸರಿತ ನ್ಯಾಯೊನೆ ಕ್ರಿಷ್ಟ ಪಂಡ್‌ದ್ ಪೋಯೆ ಬಲರಾಮೆ ||
ನಮೊನೆ ಬತ್ತಾದ್ ಆಂಡ್ ಏಳ್ಳಿನೊ
ಇನಿಕ್ ರಕ್ತಸನಕ್‌ಲ್ ದ್ವಾರಕ
ಪುರೊಕು ನುಕ್ಯೆರೊ ದಾನೊ ಪಂಡ್‌ದ್ ಪೋಯೆ ಬಲಬದ್ರೆ ||

7

ದ್ರುಪದ ರಾಜೆನೆ ಪಂಡೆನಲ್ಲನೆ
ಪೆರಪ ದಾಯೆಗ್ ಪಗಡೆ ಗೊಬ್ಬುನೆ
ನಮಡ ಕೈಪೆನೆ ಇದ್ಯೊ ಯುದ್ಧೊಡೆ ತೂಕೊ ಕೌರವಡ ||
ಎನಡ ಇತ್ತೆನ ಸೇನೆ ಮಾತೆನ್
ಕೊರುದು ಜೋಕ್ಲೆನ್ ಲಡಯಿಗುಂತ್ಯೆರೆ
ಕಡಪುಡುವೆ ಪಂಡೊಂದು ಕ್ರಿಷ್ಟನ ಮೋನೆ ತೂವೊಂಡೆ ||

8

ಆ ವಿರಾಟೆಲ ಪಂಡೆ ಎನ್ನಲ
ನಾಲ್ ರಂಗೊದ ಸೇನೆ ತಯರ್‌ಡ್
ಕಾಳಗೊಗು ಕಡಪುಡುವೆ ಪಂಡ್‌ದ್ ಮೀಸೆ ತಿರ್ಗಾಯೆ ||
ಮಾತೆರೆನ ಪಾತೆರೊನು ಕೇಂಡ್‌ದ್
ವಾಸುದೇವೆನೆ ಪಂಡೆನಾಪಗ
ಸಾಮದಾನೊಡು ದುಂಬು ಕೇನುಗೊ ರಾಜ್ಯೊ ಕೌರವಡ ||

9

ಮರೈದಿಡ್ ಮೇಲಾಯಿನೊರೈನ್
ಹಸ್ತಿನಾವತಿದಾಡೆ ಕಡಮಡಿ
ಅಲ್ಲ ಕೇನಡ್ ರಾಜ ನೀತಿನ ಪನ್ಲಾಯಡನೆ ||
ಕೊರುಜಿಂದ್ ಪಂಡಿ ಬುಕ್ಕೊನೆ
ಐಕ್ಕ್ ಬೋಡಯಿ ಸಾದಿನಾಡುಗೊ
ಪನ್ಲ ಕ್ರಿಷ್ಟನೆ ಪಿದಡ್‌ದುಂತಿಯೆ ಊರುಗ್ ಪೋಯೆರೆಗ್ ||

10

ಮತ್ಯ ರಾಜೆನೆ ತನ್ನ ಮಮಯ-
ಗಲ್ವ ಕೊರೈನೆ ದಿಂಜ ಉಡಿಗಿರೆ
ಮುತ್ತುರತ್ತೊನು ಆನೆ ಕುದುರೆಲೆ ಸೇನೆ ಮಾರ್ಬಲೊನು ||
ಉತ್ತರೆನ ಕೈ ಪತ್ತದಾಯೆನೆ
ಕಣ್ಣಡೇ ನೀರರಿಪವೊಂದೇ
ಕೊರೈಗನೆ ಮಹರಾಣಿ ಬುಲ್ತಲ್ ಸೇಂಕ್ ಸೇಂಕೊಂದು ||

11

ಆ ಸುಬದ್ರೆಲ ಬುಕ್ಕೊ ದ್ರೊಪದಿ
ದೇವಕಿಲ ಸಮದಾನೊ ಪಂಡರ್
ಮಾತೆರೆನ್ ಕೂಡೊಂದು ತೇರ್‌ಡ್ ಕುಲೈ ಸಿರಿಕ್ರಿಷ್ಟೆ ||
ತೇರ್ ಪಿದಡ್‌ನಗಡೊ ಬೂರೈರ್
ಪಾಂಡವರ್ ಪಾಂಚಾಲನಾಕ್‌ಲ್
ಪೋಯೆರೆಗ್ ಪಿದಡ್‌ನಗ ಉಂತಯೆ ಧರ್ಮಂದನೆನೆ ||

12

ರಾಜಕೀಯೊಡು ಧರ್ಮೊ ಬೋಡುಂ-
ದಾಂಡ ಧರ್ಮೊಡು ರಾಜಕೀಯೊನು
ಏಪೊಲಾ ಮೆರೆಸವುನ ಸರಿಯತ್ತಂದ್ ಕೌರವಗ್ ||
ಏರ್ ತೆರಿಪವಿ ಜ್ಞಾನಿಲುಂದುದು
ಕೇನ್ನಗೆನೆ ಆ ದ್ರುಪದೆ ಪಂಡನೆ
ಕಾಸ್ಯಪರ್ ತೆರಿನಾರ್ ಧರ್ಮೊನುಲಾ ಪುರೋಯಿತೆರ್ ||

13

ಈತ್ ಪನ್ನಗ ಧರ್ಮಂದನೆ
ಕಾಸ್ಯಪೆರ್ ಕಾರ್ಗಡೊ ಬೂರುದು
ಈರ್ ಹಸ್ತಿನ ಪುರೊಕು ಪೋದಾ ಕೌರವೇಸ್ವರಡ ||
ಪಾಂಡವರೆನಾ ರಾಜ್ಯೊನಕ್‌ಲೆಗ್
ಸೀದೊಡೇ ಬುಡು ಕೊರೈ ಪಂಡ್‌ದ್
ರಾಜನೀತಿನ ದರ್ಮೊ ಸಾರೊನು ಪನ್ಲ ತೆರಿಪಾಲೆ ||

14

ನಿನ್ನ ಕಾರ್ಯೊಗು ಯಾನ್ ಪೋಪುನೆ-
ಕಡ್ಡಿ ಇದ್ದಿಯೆ ಆಂಡ ಕೌರವೆ

ಒತ್ತೆಜೆಡ ಈ ಎನನ್ ದೂರಡ ಪನ್ಲ ಪಿದಡಿಯೆರ್ ||
ಕಸ್ಯಪೆರ್ ಪಿದಡ್‌ನಗ ದ್ರುಪದೆಲ
ತನ್ನ ಪರಿವಾರೊಲೆನ್ ಕೂಡ್‌ದ್
ಅಲ್ಪಡ್‌ ಪಿದಡಿಯೆನೆ ಪಂಡ್‌ದ್ ಬರೈ ಬರೈಂದ್ ||

|| ಕಾಸ್ಯಪೆರ್ ಕೌರವನ ಆಸ್ತಾನೊಗೆತ್ತೆರ್ ||

ರಾಜ ಚಾವಡಿಡೊಂಜಿ ದಿನೊಟಾ
ರಾಜರಾಜೆನೆ ತಾನ್ ಪನ್ನುನ
ಬೂಟು ಬಿಸಾರ್‌ತಿಗೆದ ಕೌರವೆ ಸಬೆನ್ ಕೂಡ್‌ಯೆ ||
ಬೀಸ್ಮೆ ದ್ರೋಣೆರೆ ಅಸ್ವತ್ತಾಮೆರ್
ವೀರ ಸೈಂದವೆ ಕರ್ಣೆ ಸಕುನಿಲು
ನೂದು ಮೆಗೈಲೆನವೆ ಒಟ್ಟುಗು ಕುಲ್ಲುದುಪ್ಪುನಗ ||

1

ಮಾತೆರೆನ್ ಮನ್ನಿತ್ತೆರ್ ಮಾಗದ
ನಾಕ್‌ಲೆನ ಜಯೊ ಗೋಸೊ ಕೇಂಡ್‌ದ್
ಪೀಟೊನೇರ್‌ದ್ ಕುಲೈನಮ್ಮನ ಕಾರ್ಗ್ ಪುಡ್ಯಾಡ್ ||
ಪಾಂಡವೆರ್ ಪದಿಮೂಜಿ ಒಸೊನು
ಪೂರ್ತಿ ಕಳೆಯೆರೊ ಇದ್ಯೊ ಪಂಡ್‌ದ್
ತೂಯೆರೆಗ್ ನಮೊ ಪೋದು ಗುಡ್ಡೆದ ಎರೈ ಪತ್ತನಗ ||

2

ಆಡೆಗೇ ಬತ್ತನಯೆ ಪಾರ್ತೆನೆ
ಏಸೊಡಿತ್ತೆನೆ ನಿಜೊ ಸಿಕಂಡಿನ
ದಾಯೆಗವದಿಯೆ ತೀರ್‌ಜಿಂದ್‌ದ್ ಅತ್ತೊ ಪನ್‌ಲೆನಡ ||
ಆಯೆ ಯುದ್ಧೊದ ನೀತಿ ತತ್ತದ್
ಮಾತೆರೆನ ಮತಿ ತಪ್ಪುವನವೇ
ಬಾಣೊ ಬುಡುದೇ ಪೋಯೆ ಗೆಲ್ತೆದ್ ಧರ್ಮೊ ಮೀರ್‌ದತ್ತೊ ||

3

ವಿದುರೆ ಬೀಸ್ಮೆರೆ ಗುರುಕುಲೊಟ್ಟುಗು
ಪನುವೆರೆನ್ನಡ ಅಕ್‌ಲೆ ರಾಜ್ಯೊನು
ಬುಡುದು ಕೊರೊಡುಂದೇನ್ ಬುಡಯೆನೆ ಕೇನಿ ಸಬೆತಕ್‌ಲ್ ||
ಕುಟುಮೊದಾಕ್‌ಲ್ ಪನ್ನಿ ಬಾವನೆ
ಅಕ್‌ಲೆಗಿತ್ತಂಡ ಮತಿನ ತಪ್ಪವಿ
ಪಗರಿ ಬುಡುವೆರೊ ಎಂಕ್ ಅಕ್‌ಲೆಡ ಇದ್ದಿ ಕನಿಕರೊನೆ ||

4

ಆತ್ ಪೊರ್ತುಗು ರಾಜದೂತೆನೆ
ಕಾಸ್ಯಪೆರ್ ಬತ್ತನವೆ ಸುದ್ದಿನ

ರಾಜ ಸಬೆಟೇ ತೆರಿಪದಾನಗ ಲೆಪುಡದಾರೆನ್ಲ ||
 ಪೀಟೊಡೇ ಕುಲ್ಲಾದ್ ಪರೈರೆ
 ಆಸರ್ಗ್ ಬೋಡಾಯಿನೇನ್ಲ
 ಆಸ್ತನೊದ ಮರ್ಮಾದಿಡಾಯಿನೆ ಪೂರ ಕೊರ್ಪಾಯೆ ||

5

ಸ್ವಾಮಿ ಈರೆನ್ ಓಲೊ ತೂತ್‌ನ
 ಮೋನೆ ತೂನಗ ನೆಂಪು ಆಂಡಾಯೆ
 ಏರ್ ಪಂಡ್‌ದ್ ಗುರ್ತೊ ಆಯಿಜೆ ಎಂಕ್ ತೆರಿಪವರೊ ||
 ಯಾನ್ ದ್ರುಪದ ಪುರೋಯಿತೆನೆ ಎನ
 ನೀಯೆ ತೂತ್‌ನೆ ಆಯ ಮಗಲೆನ
 ಬಾರಿ ಗೌಜಿದ ಮದಿಮೆ ದೊಂಪೊಡು ಪುದರ್ ಕಾಸ್ಯಪೆಯು ||

6

ಎಡ್ಡೆನೇ ಆಂಡತ್ತೊ ಈರಿಡೆ
 ಬತ್ತನೆನೆ ದಾಯೆಂದ್ ಪನುವರೊ
 ಪನ್ದ ಕೇನ್ನಗ ತಾನ್ ಪಂಡೆರ್ ಬತ್ತಿ ಕಾರ್ಯೊನುಲ ||
 ಧರ್ಮನಂದನೆ ಎನನ್ ಈಡೆಗ್
 ನಿನ್ನಡನೆ ಜೂಜಾಟೊ ಗೊಬ್ಬುದು
 ಸೋಲ್ತಿ ರಾಜ್ಯೊನು ಪೆರಪ ಕೇನ್ನೆರೆ ಪನ್ದ ಕಡಪುಡುದೆ ||

7

ಪಗಡೆ ಗೊಬ್ಬುಡು ಸೋಲ್ತನಾಕ್‌ಲ್
 ಅವದಿ ಪದ್‌ರಾಡೊರ್ಸೊ ಕಾಡ್‌ಡ್
 ದಿನೊನು ನೂಕುದು ಒಂಜಿ ಒರ್ಸೊಡು ಊರುಡಿತ್ತೊಂದು ||
 ಗುರುತೊ ತಪ್ಪದ್ ಉಪ್ಪೊಡುಂದುದು
 ಸೆರ್‌ತದಂಚೆನೆ ಅಕ್‌ಲ್ ಅವದಿನ್
 ಕರಿತ್‌ದೆರ್ ಅಂಚಾದ್ ಅಕ್‌ಲೆನ ರಾಜ್ಯೊ ಬುಡುಕೊರ್ಲ ||

8

ಸ್ವಾಮಿ ಎಂಕುಲು ಚತ್ತಿ ಜಾತಿಲು
 ಸೋಲ್ತಿ ರಾಜ್ಯೊನು ಪೆರಪ ಪಡೆಯೆರೆ
 ಏತೆಕಲ ಆವಂದ್ ನಟ್ಟುನ ಕೆಲಸೊ ಎಂಕ್‌ಲೆಗ್ ||
 ರಾಜ್ಯೊ ಬೋಡುಂದಾಂಡ ಚತ್ತಿಲೆ
 ಜಾತಿ ರಿವಜಿದ ಕ್ರಮೊಟು ಎಂಕ್ಲೆನ್
 ಕಾಳಗೊಡು ಗೆಲ್ಲೊಂದು ಪಡೆವಡ್ ಪನ್ನೆ ಅಕ್‌ಲೆಡನೆ ||

9

ಆಂಡ್ ಪನ್ನೆಂದಾರ್ ಪಿದಡ್‌ದ್
 ದ್ರೋಣೆರೆನ ಇಲ್ಲಡೆಗ್ ಉಣಿಯೆರೆ
 ಪೋಯಿನಲ್ಲನೆ ಪಂಡೆರಾರೆಡ ಗರೊಡಿಡಾಚಾಯೆ ||
 ಪಾಂಡವೆರ್ ಜಾರಯೆರ್ ಲಡಯಿಗ್

ಆಕ್‌ಲೆಗ್ ನಿಜೊ ಸಾಯೊ ಮಲ್ಪುನ
 ವಾಸುದೇವನ್ ಆಯೆ ತಪ್ಪವೆ ಪನ್‌ಲೆ ಧರ್ಮಜಡ ||

10

ಕಾಸ್ಯಪೆರ್ ಉಪಪ್ಪವ್ಯೊ ನಗರೊಗು
 ಸೀದ ಬತ್ತದ್ ಪಾಂಡವೇರೆಡ
 ರಾಜ್ಯೊ ನಿಕ್‌ಲೆಗ್ ಬುಡುದು ಕೊರಯೆಗೆ ಕೌರವೇಸ್ವರೆನೆ ||
 ಸೋಲ್ತಿ ರಾಜ್ಯೊನು ಪೆರಪ ಪಡೆಯೆರೆ
 ಕಾಳಗೊಡು ಗೆಲ್ಲುನವೆ ಚತ್ತಿಲೆ
 ಗಾಪಿ ಸಾದಿಯೆ ಪಂಡೆ ಎನ್ನಡ ರಾಜ ಚಾವಡಿಡ್ ||

11

ಅಲ್‌ಪ ಚರ್ಚೆನ್ ಯಾನ್ ಮಲ್ತಜಿ
 ಚಲೊಕು ಮರ್ದಲ ಇದ್ದಿ ಪಂಡ್‌ದ್
 ಗುರುಕುಲೆನ ಇಲ್ಲಡೆಗ್ ಪೋಯೆನೆ ಉಣಿಯೆರೆಂದಾಡೆ ||
 ಅವುಲು ದ್ರೋಣೆರ್ ಪಂಡೆರೆನ್ನಡ
 ಲಡಯಿಗೇ ಪಾಂಡವೆರ್ ಜಾರ್ವೆರೊ
 ಮುರಹರನ್ ತನ್ನೊಸೊಕು ಮಲ್ತೆರೆ ಪೋವೆ ಕೌರವೆನೆ ||

12

ಪನ್ದ ಎನ್ನಡ ನಿಕ್‌ಲೆಗೈನೇ
 ಇತ್ತೆ ತೆರಿಪವೊಡುಂದು ಪನ್ನೆಟ್
 ಸತ್ಯೊ ಉಂಡುಯ ಧರ್ಮನಂದನ ಈಯೆ ತೆರಿಯೊನುಲ ||
 ಧರ್ಮಜೆನೆ ಅರುನಡ ಕ್ರಿಷ್ಣನ್
 ನಮ್ಮೆ ಕಡೆಕೇ ಉಂತಯೆರೆ ಈ
 ಇತ್ತೆನೇ ದ್ವಾರಕೆಗ್ ಪೋಲಯ ಪನ್ದ ಕಡಪುಡಿಯೆ ||

13

ಅರ್ಜುನೆನೆ ರತೊನೇರ್‌ದ್ ಪಿದಡ್‌ದ್
 ಕ್ರಿಷ್ಣ ಸ್ವಾಮಿನ್ ಮನಸ್‌ಡೇತ್‌ಲ
 ಬಗ್ಗಿ ಬಾವೊಡು ನೆನೆತ್ ನೆನೆತ್‌ದ್ ಕಡಲ ಬರಿತಾಡೆ ||
 ಎತ್ತಾನಯೆ ಕಡತೊಂದು ಮಂಜಿಡ್
 ಬತ್ತೆನೇ ದ್ವಾರಕೆಗ್ ಬಗ್ಗೆರೆ
 ಪುಣ್ಯೊ ಕ್ಷೇತ್ರೊಗು ಬೂಮಿದಾ ವೈಕುಂಟೊ ಮಂದಿರೊಗು ||

14

ವೇದೊ ಮಂತೊದ ಬ್ರಾಣೆರೆನ್ ಸರಿ
 ತೂದುಲಾ ಸಂಗೀತೊ ನಾಟ್ಯೊದ
 ಗೋಪಿಲೆನ ಒಟ್ಟಿಗೆನೆ ನಲಿಪುನ ಹಂಸೊ ಮೈರ್‌ಲೆನ್ ||
 ಸಾದಿ ಬೀದಿಡ್ ತೂನಗಾಯಗ್
 ದ್ವಾರಕೆನೆ ವೈಕುಂಟೊ ಪನ್ನುನ
 ಬಾವೊ ಉರ್ಕರ್‌ದಾಯೆ ಪೊಗೈನೆ ಕ್ರಿಷ್ಣ ಮಂದಿರೊಗು ||

|| ದೇವರೆನ ಸಾಯೊ ಬಗ್ಗೆರೆಗ್ ||

ಮುರಹರೆನೆ ಮದ್ಯನಡ್ ಉಂಡುದು
ಅಗಿದ್ ಬಚ್ಚೆರೆ ಪೂಲು ಕರ್ಪರೊ
ನಿದೆರಿಯೆನೆ ಮಂಚವುಡು ರುಕ್ಕಿಣಿ ಗಾಳಿ ಪಾಡಿಯಲ್ ||
ಕಾರ್ನೊತ್ಯಲ್ ಸತ್ಯ ಬಾಮೆನೆ
ಪಾರ್ತೆಪೊಗ್ಗನ ತೂದುಲಾಕ್ಲ್
ಮೆಲ್ಲೊನೇ ತೆಲಿತೊಂದು ಉಲಯಿಗ್ ಪೋಯೆರಲ್ಲಡ್ ||

1

ಅರುಣೆನೆ ಕೈಮುಗಿದ್ ಉಂತಿಯೆ
ಕ್ರಿಷ್ಟ ಕಾರ್ಡ ಮುದೆಲ್ಡಾಪಗ
ಎತ್ತಿಯೆನೆ ಕುರುರಾಜೆ ಮುರಹರೆ ಚೆತ್ತನಾಡೆಗೆನೆ ||
ಎನ್ನ ಸಂತಾನೊದಯೆ ಪಾರ್ತೆನೆ
ಎರೆ ಮೇಪುನ ಜಾತಿದಾಯನ
ಕಾರ್ಡ ಮುದೆಲ್ಡ್ ಬಗ್ಗಿಡುಂತುದೆ ಮಾನೊ ಕೆಟ್ಟನಯೆ ||

2

ಯಾನ್ ಕುರುಕುಲೊ ಚಕ್ರವರ್ತಿಯೆ
ಗೋವಳನ ಕಾರ್ಡವುಲು ಉಂತಯೆ
ಮೂಲು ಮಂಚವುಡೊಂತೆ ಜಾಗೆನೆ ಉಂಡು ತರೆತವುಲು ||
ಮೂಲೆ ಕುಲ್ಲುವೆ ಕ್ರಿಷ್ಟೆ ಲಕ್ಹಡ್
ತೂದು ಪಾತೆರ್ದೇಟ ಪಂಡ್ಡ್
ಕಾರ್ ಮೇಲ್ಡ್ ಕಾರ್ ಪಾಡ್ಡ್ ಕುಲೈ ಕುರುವೀರೆ ||

3

ಹರಿನ ನಿದೆನೆ ಬಿರಿದ್ ಲಕ್ಕಿಯೆ
ಸುರುಕು ಪಾರ್ತೆನ್ ತೂದು ತೆಲಿತ್ಡ್
ತಿರ್ಗ್ ತೂನಗ ಕೌರವೇಸ್ವರ ಮೋನೆ ತೂವೊಂದು ||
ಸಿವ ಸಿವಾ ನಿಕ್ಲೊಟ್ಟು ಬತ್ತಾನ
ಪರಮ ಸಂತೋಸಾಂಡ್ ಎಂಕೇ
ಮೆಗಿಪಲಯ ಜೋಕುಲೆನ ಎಡೆಪು ತೂಯೆರಾಂಡತ್ತೊ ||

4

ಕೋಲು ಕಡ್ಡ್ ರಡ್ಡ್ ಮೆಲ್ಲೊಲಿ
ನೀರ್ ಕಡ್ಡ್ ತುಂಡು ಮೆಲ್ಲೆರೆ
ಸಾಡ್ಯೊ ಇದ್ದಿಂದಿತ್ತೆ ನಿಕ್ಲೇ ಎಂಕ್ ತೆರಿಪಯರ್ ||
ಪಾಂಡವೆರ್ ಸಿದ್ಯಮ್ಮ ಜೋಕುಲು
ಕಾಸ ಮೆಗಿಪಲಯಲ್ಲ ಪನ್ಪುನ
ಪ್ರೀತಿ ಪುಟ್ಟೆನ ನಿನ್ನ ಗುಣೊಕುಲೆನೇನ್ ಪುಗರುವೆನೆ ||

5

ಅಸರ್ಗೇ ದಾಯ್ತಂದ್ ಕೇಂಡ್ಜೆ
ಕೋಪೊ ಮಲ್ಲಡ ಕೌರವೇಸ್ವರ
ಈಯೆ ಬತ್ತನೆ ಚಕ್ರವರ್ತಿಯೆ ಎನ್ನ ಬಾಕಿಲ್ಗ್ ||
ಈತ್ ಪನ್ನಗ ಕ್ರಿಷ್ಟ ನಿನ್ನವೆ
ಬಾಯಿದಾ ಸಮ್ಮನೊನೆ ದಾಯೆಗ್
ಯಾನ್ ನಿಕ್ಲೇಗ್ ದೂರೊದಾಯೆನೊ ಪಂಡೆ ಕೌರವೆನೆ ||

6

ಸೋಲ್ತಿ ರಾಜ್ಯೊನು ಪೆರಪ ಕೇನ್ವೆರ್
ಪಾಂಡವೆರ್ ಎನ್ನಡನೆ ಅಕ್ಲೇಗ್
ರಾಜಿಡೇನೇ ಕೊರಯೆ ಪಂಡ್ಡ್ ತೆರಿಪದಾಯಿನೆಟ್ ||
ಕಾಳಗೊಗು ತಯರಾಪೆರಾಕ್ಲ್
ಲೋಕೊ ನ್ಯಾಯೊದ ರಕ್ತಕೆನೆ ಈ
ಸಾಯೊನೆಂಕೇ ಕೊರೊಡು ಪಂಡ್ಡ್ ಕೇನ್ವೆ ಕೈಮುಗಿದ್ ||

7

ಸಿವ ಸಿವಾ ಉಂದೆಂಚಿ ಪಾತೆರೊ
ಲಡಯಿ ಮಲ್ಲರೊ ಒಂಜೆ ಕುಟುಮೊದ
ಪುದರ್ದಾಕ್ಲ್ ಹಸ್ತಿನಾವತಿರಸು ಸಂತಾನೊ ||
ನಿಕ್ಲೇ ನಿಕ್ಲೇ ಯುದ್ಧೊ ಮಲ್ತಡ್
ಕೆರುಪುನಟ್ಟನೆ ಪಾಪೊದಕ್ಲೇನ್
ಬರತ ವಂಸೊಡು ಇಂಚಿನಾತ್ಜೆ ಕೇನ್ ಈತ್ನೆಟ ||

8

ರಾಜಿಡುಪೊಡು ನಿಕ್ಲೇ ನಿಕ್ಲೇ
ಕಾಳಗೊನು ಮಲ್ಲಂದೆ ಇತ್ತರ್
ಡಾಂಡ ಎಂಕ್ಲೆಗ್ ಪೊದ್ದೆರೆಸ್ತೆರೆಗಾವು ಸಂತೋಸು ||
ಲೋಕೋಗೇ ಸುಕೊ ಸಾಂತಿ ತಿಕ್ಕೆರೆ
ಗಾವು ಇದ್ದಿಡ ಮಣ್ಣೊದಾ ಕರ
ಬೂರು ದರಿದಾಂಡ್ಯೆನ್ ಪಿರ ಸರಿ ಮೆಲ್ಲೊಲಿಯೊ ಪನ್ಲ ||

9

ಕ್ರಿಷ್ಟ ಈಯೇ ಧರ್ಮೊ ಸಾಸ್ತೊನು
ಪನ್ಪುನೆನ್ ಕೇನಿಯೆರೆ ಬತ್ತನೆ
ಅತ್ತ್ ಎಂಕ್ಲೆ ಯುದ್ಧೊ ಆಪುನೆಕಿದ್ದಿ ಅಲ್ಮಾನೊ ||
ನಿನ್ನ ಸಾಯೊನು ಕೊರ್ದು ಏರೆಗ್
ಪನ್ನ ಎನ್ನಡ ಪನ್ನಗಾಪಗ
ಅರುಣನ ಒಪ್ಪಿಗೊನೊ ಲಡಯಿಗ್ ಕೇಂಡೆ ಶ್ರೀ ಕ್ರಿಷ್ಟೆ ||

10

ಬಾರತೊದ ಕತೆ ವಿದಿಕ್ ಬರೆಯೆರೆ
ಪಾಂಡವೆರೆ ಕೌರವೆರೆ ನೆತ್ತೆರ್

ಬೋಡನಗ ಎನ ಅಡ್ಡಿಡಾಯೆಗ್ ಪನ್ನಗಾ ಹರಿಯೆ ||
ಯಾನೊರಿಯೆ ಕಾಳಗೊನು ಮಲ್ವೆರೆ
ದಾಲ ತೀರಂದ್‌ನಯೆ ಉಂತುವೆ
ವರೆನಾಂಡಲ ಒಂಜಿ ಕಡೆಕೇ ತೆರಿಯೊನಿರ್ದೆರಾಲ ||

11

ಅಣ್ಣ ಬಲರಾಮನವೆ ಒಟ್ಟಿಗೆ
ಇತ್ತಿ ಯಾದವ ಸೇನೆ ಮಾತಲ
ಒಪ್ಪಿಗಡೆ ಬುಕ್ಕೊಂಜಿ ಕಡೆಕೇ ನಿಕ್ಕ್ ಒವ್ವಾವು ||
ಅರುನನೆ ಎಲ್ಯಾಯೆ ನಿಕ್‌ಲೆಡ್
ಪನ್ನುನೆಡ್ಡೆನೆ ಆಯೆ ಕೌರವ
ತಪ್ಪು ಗ್ರೇಯ್ತಡ ಪನ್ನಗಾಪಗ ಪಾರ್ತೆ ಪಂಡೊನುವೆ ||

12

ಕಾಡ್‌ಡೇ ಪದ್‌ರಾಡ್ ಒಸೊರ್‌ದ
ಆವುಸೊನು ಕಳೆದೆಂಕ್ಲು ಬಚ್ಚಿನ
ದಾಲ ಗತಿ ಇದ್ಯಂದಿ ಬಡವರ್ ಯಾದವೆರೆ ಸೇನೆ ||
ಸಾಂಕಿಯೆರೆ ತೀರಂದ್‌ನಾಕ್‌ಲ್
ದೇವ ಈಯೇ ಎಂಕ್ಲೆ ಕಡೆಕೆಲ
ಸೇರೊಡುಂದುದು ಕೇನ್ವೆ ಪನ್ನಗ ಪನ್ನೆ ಕೌರವನೆ ||

13

ಮಾಯಗಾರೆನೆ ಈಯೆ ಕ್ರಿಷ್ಣಾ
ಕಾಳಗೊದ ಕಳೆಂಕ್ಲೆ ಎದುರುಡು
ಆಯುದೊನು ಪತ್ತೊಂದು ಲಡಯಿಗ್ ಉಂತಿಯೆರೆ ಬಲ್ಲಿ ||
ಆಂಡ್ ಕೌರವ ಎಂಕ್ ನಿಕ್‌ಲೆನ
ಸೇನೆದಾಕ್‌ಲ್ ಹಾಕ್‌ಜೇರ್ದನೆ
ಯಾನ್‌ಲಾಯುದೊ ಪತ್ತಯೆಂದ್‌ದ್ ಬಾಸೆ ಪಾಡೊಂಡೆ ||

14

ಗದೆಟ್ ಹಾಕುನ ವಿದ್ಯೆ ಕಲ್ಪಯಿ
ಗುರುಕುಲೇ ಬಲರಾಮ ಸ್ವಾಮಿಲು
ಒದಗಿಯೆರ್ ತನ್‌ಕ್‌ಂದ್ ಸಂತೊಸುಡಾಯೆ ಪಿದಡೊಂದು ||
ಯದುಕುಲೊತ ಮಹ ರಾಜ ಬೇಟೆಗ್
ಕುರುನ ಕುಟುಮೊದ ಚಕ್ರವರ್ತಿಯೆ
ಅರಮನೆಗ್ ಪೊಗ್ಗಿಯೆನೆ ದೂತೆರೆಡುಲಯಿ ತೆರಿಪಾದ್ ||

|| ಬಲರಾಮೆ ಕೌರವಗ್ ಬಾಸೆ ಕೊರೈ ||

ಯಾದವೆರೆ ಮಹರಾಜೆನಾ ಬಲ -
ರಾಮೆನೊಡ್ಡೊಲೊಗೊಡು ಕುಲ್ಲುದು
ರಾಜಕೀಯೊ ಸಮಾಜೊ ಧರ್ಮೊ ರೀತಿ ನೀತಿಲೆಡ್ ||

ಆದಿ ಯುಗೊ ಬ್ರಗುರಾಮಡ್‌ದ್ ಸರಿ
ಯಾದ್ ತ್ರೇತೆಡ್ ಆಂಡ್‌ಲಾ ರಗು
ರಾಮಡ್‌ದ್ ದ್ವಾಪರೊಡು ಬಲರಾಮಡ್ ಆಂಡ್‌ಂದ್ ||

1

ತೆರಿನ ಜ್ಞಾನಿಲು ಪನ್ನೆರೇಪೊಲ
ಯುಗೊ ಯುಗೊಟು ಶ್ರೀ ರಾಮ ತತ್ತೊವ್ವದ
ನಿಲೆನೆ ಸಾಸಿತೊ ತೆರಿಯೊನಿಂದ್‌ದ್ ಸಬೆಟ್ ಪನ್ನಗನೆ ||
ಕುರುಕುಲೊತ ಮಹರಾಜೆ ಕೌರವೆ
ಸಬೆಕ್ ಬರ್ಪೆನೆ ಪನ್ನ ಕಂಚುಕಿ-
ನಕ್‌ಲ್ ಪುಗರ್‌ದ್ ಉಲಯಿ ಕನತೆರ್ ರಾಜ ಮರೈದಿಡ್ ||

2

ಬಾವ ಬಲ ಬಲ ಕುಲ್ಲು ಕುಲ್ಲಯ
ಪೀಟೊನೇರ್‌ದ್ ಈಯೆ ಅರ್ತಿಡ
ಪೂವು ಆಯನೆ ಏತ್ ಸಮಯೊನೆ ಆಂಡ್ ತೂವಂದೆ
ಪಾಂಡವೆರೆನಾ ರಾಜ್ಯೊನುಲಯಿಗ್
ಪಾಡ್‌ಲಾ ಚಕ್ರಾದಿಪತ್ತೊಡು
ಆಳುನಾಯಗ್ ಉಂಡೊ ಪುರ್ಸೊತು ಈಡೆ ಬರೈರೆಗ್ ||

3

ಎನ್ನ ಬೇಜರೊನಿತ್ತೆ ಪಂಡೆಡ
ದುಕ್ಕೊ ಮಲ್ವರ್ ಯಾನ್ ಅಕ್‌ಲೆಗ್
ಕೊರೈ ಅವದಿಯೆ ಮುಗಿದ್ ಉಲ್ಲೆರ್ ಮತ್ಸ್ಯ ನಗರೊಡುಲ ||
ಇತ್ತೆ ಅಕ್‌ಲೆಗ್ ರಾಜ್ಯೊ ಕೊರೊಡುಗೆ
ಪನ್ನ ಕೇನ್ವಯೆ ಧರ್ಮನಂದನೆ
ಚತ್ತಿ ಜಾತಿದ ಧರ್ಮೊಡಾಕ್‌ಲ್ ರಾಜ್ಯೊ ಪಡೆಯೆರೆಗ್ ||

4

ಕಾಳಗೊಡು ಸೋಲ್ವಾದ್ ಎನ್ನನ್
ರಾಜ್ಯೊನಾಳಡ್ ಪೂರ್ತಿಯಕ್‌ಲೇ
ಸೀದಡೇನೇ ಕೊರಯೆ ಪಂಡ್‌ದ್ ಯಾನ್ ತೆರಿಪಾದೆ ||
ಪಾಂಡವೆರೆ ಕಡೆಟುಲ್ಲೆ ಕ್ರಿಷ್ಣೆಂ
ದಾಕ್‌ಲೆಗ್ ಮಹ ದೈರೊ ಬತ್ತದ್
ಕಾದಿಯೆರೆ ತಯರಾವೆರೆಂದ್‌ದ್ ಯಾನ್ ಗ್ರೇಯ್ತೊಂಡೆ ||

5

ಯಾನ್ ಕ್ರಿಷ್ಣನ ಸಾಯೊ ಕೇನ್ಯೆರೆ
ಪೋದು ಎತ್ತುನ ದುಂಬೆ ಅರುನ
ಆಡೆಗತ್ತದ್ ಕ್ರಿಷ್ಣನುಲಯಿಗ್ ಪಾಡ್ಲೆ ಸಾದನೆಡ್ ||
ಈರ್‌ಲಾ ಈರೆನವೆ ಯಾದವ
ಸೇನೆ ಮಾತಲ ಎಂಕ್ ಪಂಡ್‌ದ್
ವಾಸುದೇವನೆ ಪನ್ನೆಟೆಂಕೇ ಆಂಡ್ ಸಂತೊಸು ||

6

ಸ್ವಾಮಿಯೇ ಬಲ ಬದ್ಧ ದೇವೆರೆ
ಈರೆ ಎನ್ನನ್ ಗೆಲ್ಪದೆಂಕ್ಲೆನ
ಕೀರ್ತಿ ಈರೆಡ್ಲಾದ್ ಮೆರೆಯಿನೆ ಪನ್ದ್ ದೇವತೆಲು ||
ಮೇಲ್ ಲೋಕೊಡು ಸಾನ್ ಪುಗರುನ
ಕಾರ್ಯೋನೀರೇ ಮಲ್ತೊಡುಂದುದು
ಕಾರ್ಗಡ್ಲೊನೆ ಬೂರೈ ಕೌರವೆ ಕಾರ್ಯೊ ಜಾಣೆತ್ತೊ ||

7

ಲಕ್ಕ ಲಕ್ಕಲ ಕೌರವೇಸ್ವರ
ದುಕ್ಕೊ ಮಲ್ಪಡ ಕ್ರಿಷ್ಣನಕೆಲೆಗ್
ಇತ್ತೆಡಲ ಯಾನ್ಪುಡಯೆ ನಿನ್ನನ್ ಈಯೆ ನಂಬೊನುಲ |
ಅರುನನವೇ ಸಿಸೈ ಸಾತ್ಯಕಿ
ಉದ್ಧವೆಲ ನಿಜೊ ಬಗ್ಗೆ ಕ್ರಿಷ್ಣನ
ಇರ್ವೆರಲ ಆ ಕಡೆಕ್ ಪೋಯಿರಾಡೇನ್ ದೀಡುವೆನೊ ||

8

ಎನ್ನ ಮೆಗಿದಿನ್ ಕಂಡಿ ಕಳುವನ್
ಯುದ್ಧೋ ಪೊಡಿ ಮಲ್ತದಾಯನ
ಕರ್ಲನೈತ್ತಾದ್ ಪಗೆನ್ ಸಂದವೆ ದೈರೊ ಮಲ್ತೊನುಲ ||
ಕ್ರಿಷ್ಣೆ ಕುಸೆಲ್ಡ್ ಎನ್ನ ಮಗಲೆನ್
ನಿನ್ನ ಮಗೆ ಲಚ್ಚಣಗ್ ಮದಿಮೆನ್
ಮಲ್ಪನೆನ್ ತಪ್ಪಯಿನೆ ಅತ್ತಂದೇನ್ ಕೊರುವೆನೊ ||

9

ಪಾರ್ತನಾ ಮಗಕೆನ್ನ ಮಗಲೆನ್
ಯಾನ್ ಕೊರ್ಟೊನೊ ಎನ್ನ ಪಾತೆರೊ
ಪಾಂಡವೆರೆ ಪಗೆ ಸಂದಯೆರೆನೇ ಸಾದಿ ತೋಜಯಿನೆ ||
ದೇವೆರೆಂಕೇ ಪನ್ದಲಾಯಗ್
ಬಾಸೆ ಪಾಡ್ಡ್ ಎಲ್ಲೆ ಕಾಂಡೆನೆ
ಸೇನೆ ಕೂಡ್ಲದ್ ಬರ್ಪೆ ಹಸ್ತಿನ ಪುರೊಕು ಕಂಡಿತೊನೆ ||

|| ಶ್ರೀ ಕ್ರಿಷ್ಣ ಪಾರ್ತ ಸಾರತಿ ||

ಕೌರವೆನೆ ಸಂತೊಸುಡು ಪೋಪುನ
ತೂದು ಕ್ರಿಷ್ಣನೆ ಮುಗುರು ತೆಲಿಕೆಡ್
ಪಾರ್ತ ಮೋನೆನ್ ತೂದು ಪಂಡೆನೆ ಹೆಡ್ಲೆ ಆಯತ್ತೊ ||
ಕಾಳಗೊನು ಮಲ್ಪೆರೆಗ್ ಸಾಯ್ತೊನೆ
ದಾಲ ಇದ್ದಿಂದೇನ್ ಪಂಡ್ನ
ಕೇಂಡ್ಡಿಯೆ ಎನನ್ ದಾಯೆಗ್ ಕಡೆಕ್ ಒತ್ತೊಂಡ ||

1

ದುಸ್ಪೆರೆಡ ಈತ್ನೇಟ ಪೊಂಬುಡು
ಕಸೊ ಬತ್ತನ ಜೂವೊ ಎನ್ನವು
ಸಗ್ಗಿನೊಯ್ತಾದ್ ಈ ಸುದರ್ಸನೊ ಎಂಕ್ ಬಲೊ ಇದ್ದಿ ||
ಎನ್ನ ಪೋಣ್ಣಲು ಪೊರ್ತು ಪೊರ್ತುಗು
ಉನ್ಪವೆರ್ ತಿನ್ಪವೆರ್ ಅಂಚದ್
ಪೋಣ್ಣ ಕೋಟಿಂದೆನನ್ ಸಾಂಕ್ಷೆರ್ ರಂಗ್ ಮಲ್ತೊಂದು ||

2

ಅಣ್ಣೆನಾ ಬಲ ಬದ್ಧ ಸ್ವಾಮಿನ್
ಒತ್ತೊಂದೀಯೆ ಕೌರವೇರೆನ್
ಗೆಲ್ಪಿ ಸಾದಿನ್ ದಾಯೆ ತೂಯಿಜ ಬಾವ ಪನ್ಲೆನಡ ||
ಇತ್ತೆ ನಿಕ್ಲೆನ್ ಕೌರವಾದಿಲು
ಕೊಚ್ಚಿ ಕೊಚ್ಚಿದ್ ಪಾಡುನಟ್ಟನೆ
ಮಲ್ಪೆರಾಕ್ಲ್ ಎನ್ನ ಅಣ್ಣನ ಸಾಯೊ ಪಡೆವೊಂದು ||

3

ಈತ್ ಪನ್ನಗ ಪಾರ್ತ ಕ್ರಿಷ್ಣನ
ಮೋನೆಗೇ ತೂವೊಂದು ಧರ್ಮೊ
ನಾಸೊ ಮಲ್ಪುನ ದುಸ್ಪ ರಕ್ತಸನಕೆಲೆ ಸಂತಾನೊ ||
ಪೂರ ಮುತ್ತಯೆರಾದ್ ನಿನ್ನವೆ
ಪ್ರೇಮೊದಬತಾರೊಂದು ತೆರಿನಯೆ
ಯಾನ್ ಆಯ್ಕೆಟ್ ನಿನ್ ಎಂಕ್ಲೆ ಕಡೆಕ್ ಒತ್ತೊಂಡೆ ||

4

ವೇದೊ ಕಂಡ್ನ ತಮನ್ ಕೆರೈರೆ
ಮೀನ್ ಆಯ್ಕೆಯೆ ಬೂಮಿದುದ್ದರೊ
ಗಾದ್ ಪಂಜಿಯೆ ಬಾಲೆ ಬುಲ್ಪುನು ಕೇನ್ದ ನರಸಿಂಗಿ ||
ಆಯಿನಯೆ ವಾಮನೆನೆ ಆದ್ಲ
ಮೂಜಿ ಮೊಟ್ಟುದ ನೆಲನ್ ನಟ್ಟನೆ
ಆ ಮಹಾಬಲಿ ಚಕ್ರವರ್ತಿನ್ ನೂಕ್ಕ ಪಾತಲೊಗು ||

5

ಬಾರ್ಗವೆನೆ ಈಯತ್ತೊ ಚತ್ತಿಲೆ
ನಾಸೊದಾ ಬುಗುರಾಮೆ ಸೀತೆನ
ಪ್ರೀತಿದಾ ರಗುರಾಮೆ ನಿನ್ನವೆ ಏಳ್ ಅಬತಾರೊ ||
ಪೂರ್ತಿ ಮಲ್ತಾದ್ ಇತ್ತೆ ಕ್ರಿಷ್ಣನೆ
ಆದ್ ಕಂಸನ್ ಮುರನ್ ಪೊಂಡ್ರಕ
ಕಾಲಯವೆ ನರಕಾದಿ ರಕ್ತಸನಕೆಲೆ ಪುಣ ಪಾಡ್ಯೊ ||

6

ಮೆಗಿದಿನೆಂಕೇ ಕೊರೈ ದ್ರೌಪದಿ
ಬುಲುಪು ಕೇಂಡ್ಡ್ ಸೀರೆನಚ್ಚೆಯೊ

ಮಲ್ತ್‌ದೀಯೆ ಮಾನೊ ಕಾತ್‌ನ ಸ್ವಾಮಿ ಪರಮಾತ್ಮೆ ||
 ಚಿತ್ತೊ ಸಾಕ್ಷಿಯೆ ಈ ನಿರಂಜನೆ
 ಕುತ್ರಿ ಮುತ್ತವ ಕೌರವಾದಿಲೆ
 ಪನ್ನಿ ದೈರೊಡು ನಿನನ್ ಕೇಂಡ್‌ನೆ ಎಂಕ್ಲೆ ಕಡೆಕೇನ್ ||

7

ನಿನ್ನ ತಂಗಡಿಯಲ್ಲು ಇರ್ವರೆ
 ಕರ್ಯಣಿನ್ ಒರಿಪಿಯೆರೆಗೀಯೆ
 ಬಗ್ಗೆರೆನ ದಾಸಾನುದಾಸೆನೆ ಕೇನೊಡೆನ್ನರಿಕೆ ||
 ಎನ್ನವಗ್ಗಿನ ರತೊಕು ಸಾರತಿ
 ಮಲ್ಲ ಮಹಿಮೆನೆ ಈಯೆ ಆವೊಡು
 ಪನ್ದ ಕಾರ್‌ಗ್ ಅಡ್ಲೊ ಬೂರಿಯೆನಾ ಧನಂಜಯೆನೆ ||

8

ಬಲ್ಲ ಇದ್ಯಂದ್‌ನವೆ ಮುಡಿನೀ
 ಕಟ್ಟಿ ಎನ್ನನ್ ಉಲಯಿ ದಿಂಜದ್
 ನಿನ್ನ ಪ್ರಾರ್ತನೆಗೇನ್ ಒಪ್ಪುವೆ ಬಾವ ಕೇನಿಂಚಿ ||
 ಧರ್ಮಜಡ ಈ ಪನ್‌ಲ ಯುದ್ಲೊನು
 ಗೆಲ್ವದೇನೇ ಕೊರುವೆ ಕಂಡಿತೊ
 ನಿನ್ನ ದುರ್ಬಲೊ ಬುದ್ಧಿ ಬುಡುದೀ ಲಡಯಿ ಮಲ್ಪೊಡುಯೆ ||

9

ಎಲ್ಲೆನೇ ಬರ್ಪೇನ್ ಪೋಲಯಿ
 ನಿನ್ನ ಪಲಯಡ ಪನ್‌ಲ ಪೊದ್ದೆರ್
 ಇಸ್ವೆರೆಗ್ ತೆರಿಪಾಲ ಸುದ್ದಿನ್ ಪನ್ದಲಾ ಹರಿಯೆ ||
 ಅಣ್ಣೆನಕೆಲೆನ ಕಡೆಕ್ ಉಂತ್ಯೆಡ
 ಗೆಲ್ವಿಯೆರೆಗಾವಂದ್ ಮುಕುಲೆಗ್
 ಐಕ್ಯ ಬೋಡಾದೊಂಜಿ ಗೊಬ್ಬನು ಮಲ್ಪೆರೆಣ್ಣೊಂಡೆ ||

|| ಶ್ರೀ ಕ್ರಿಷ್ಣೆ ಬಲರಾಮನ್ ತಪ್ಪಾಯೆ ||

ಕಾಂಡೆನೇ ಬಲರಾಮೆ ಲಕ್ಯದ್
 ಯಾದವೆರೆ ಚದುರಂಗೊ ಸೇನೆಗ್
 ಆಜ್ಜೆ ಮಲ್ತ್‌ದ್ ಹಸ್ತಿನಾವತಿಗೆತ್ತಿಯೆರೆಗಾದ್ ||
 ಬೇರಿ ತಂಬಟಿ ಕೊಂಬು ವಾದ್ಯೊಡು
 ಬಾರಿ ಗೌಜಿಡ್ ಪಿದಡ್‌ದೆದುರುದ
 ಬೀದಿಡೇ ನಡತೊಂದು ಪೋಪುನ ತೂಯೆ ಸಿರಿ ಕ್ರಿಷ್ಣೆ ||

1

ಸಯ್ಯರಾಯಿನ ಒಂಜಿ ಪ್ರಾಯೊದ
 ಪೆತ್ತನಪಗನೆ ಸಿಸ್ಪಿ ಮಲ್ತ್‌ದ್

ಸೈನ್ಯೊದೆದುರುಗು ದೇರೈನಾ ಹರಿ ಮಾಯಗಾರೆತ್ತೊ ||
 ಎಡ್ಲೆ ಸಕುನೊನೆ ಪನ್ದ ಸೇನೆದ
 ಜವ್ವನೆರ್ ದೇರೈಗನೆ ಪೋಯಿಜಿ
 ಅಡ್ಲೊ ಉಂತುದು ಸಾದಿ ಬುಡುಜವು ತೇರ್ ನಡಪಯೆರೆ ||

2

ಆಪಗನೆ ಬಲರಾಮೆ ಬತ್ತ್‌ದ್
 ಮೇಲ್ ಬೆರಿನೀಸೊಂದು ಪೆತ್ತನ್
 ದೇರಿಯೆರೆ ಕೈ ಮುಟ್ಟಿ ಸಾತ್‌ಗ್ ಬೂರ್ದು ಪುಡೆರೊಂದು ||
 ಪ್ರಾಣೊ ಬುಡ್ಲೆನ್ ತೂದು ಗಾಬಿರಿ
 ಆದಲಾ ಬಲರಾಮೆ ನೀರ್‌ನ್
 ಬಾಯ್ಗೆ ಮಯ್ತೆನೆ ಹರ ಹರಾ ಪಂಡೊಂದು ಯದುರಾಚೆ ||

3

ಮುಟ್ಟಿ ಸಾತ್‌ಗ್ ಪೆರಣೊ ರಟ್ಟನ್
 ಪೆತ್ತನಾಯೆನೆ ತೂದು ಬುಲೆನೆ
 ಕೆರ್ಮ ಪಾತಕೊ ತುಂಬೈರಾಂಡೇ ಪನ್ದ ಮುರೊಡುನ ||
 ಬೊಬ್ಬೆ ಕೇಂಡ್‌ದ್ ಕ್ರಿಷ್ಣೆನಾಡೆಗ್
 ಬತ್ತ್ ತೂನಗ ಪಲಯೆ ಬುಲ್ಲುವೆ
 ಸೈತ್ತಿ ಪೆತ್ತದ ಪುಣತ ಕೈತಲ್ ತರೆಕ್ ಹಾಕೊಂದು ||

4

ಮನಸ್‌ಡೇ ತೆಲಿತೊಂದು ಪಂಡೆನೆ
 ಬುಲುಪಡಯೆ ಓ ಅಣ್ಣ ಪೆತ್ತನೆ
 ಪರಬು ಆಯಿನ ಸೈತ್ಯನೆಕ್ ಈ ದಾಯೆ ಮುರೊಡುವ ||
 ಮೆಗಿಯ ದಾನಂದೇನ್ ಪನ್ನುನೆ
 ಮೆಯಿನ್ ಮುಟ್ಟೆನ ಸಾತ್‌ಗುಂದೇ
 ಸಯಿತ್‌ನೆಟ್ ಎಂಕಿತ್ತೆ ಗೋವುನು ಕೆರ್ಮ ಪಾತಕೊನೆ ||

5

ಗೋವು ಪೂಜೆನ್ ಮಲ್ತಿ ಕೈಟೇ
 ಗೋವು ಸೈತ್ಯದ್ ಆಂಡೆ ಕ್ರಿಷ್ಣಾ
 ದಾನೆ ಮಲ್ಪೊಡು ಯಾನ್ ಕುಟುಮೊಗು ದೋಸೊ ಆವತ್ತೊ ||
 ಯಾದವೆರ್ ಕುರು ಬೂಮಿನಾಳ್ಳೆರೆ
 ಏಗೈರೇ ಅತ್ತ್‌ಂದ್ ದುಂಬುದ
 ಆ ಯಯಾತಿನ ಸಾಪೊ ಸುಳ್ಳಾಂಡಿತ್ತೆ ದ್ವಾರಕಿಡ್ ||

6

ರಾಜ್ಯೊ ಬಾರೊನು ಯಾನ್ ನಡಪದ್
 ಕೀರ್ತಿ ಪಡೆಯಿನ ಎಂಕ್ ತಿಕ್ಕ್‌ನೆ
 ಗೋವುನೇ ಕೆರಿ ಪಾಪೊ ಸಿವ ಸಿವ ಪನ್ದ ಬುಲ್ಲುನಗ ||
 ವಾಸುದೇವೆಲ ಕಣ್ಣೊ ಕಟ್ಟೆದ

ಸೋಕೊ ದುಕ್ಕೊನು ತೋಜದಾಯಡ
ಸಾಮದಾನೊಡು ಪನ್ನೆ ಅಣ್ಣೆನೆ ಕೇನ್ ಪನ್ನುನೆನ್ ||

7

ತೆರಿದ್ ಮಲ್ತನ ಪಾಪೊಗೇಪೊಲ
ಪರಿಯರೊನೆ ಇದ್ಯತ್ತೊ ಈಯೇ
ತೆರಿಯೊನಂದೆನೆ ತತ್ತ್ ಮೋಸೊಡು ಆಯಿನಪರಾದೊ ||
ಸರಿತ ಕರ್ಮೊನು ಮಲ್ತದ್ಯೆನೇ
ಪರಿಯರಿಪಿ ಸಾಸ್ತೊಂಡು ಕೇನ್ಲ
ಪಲಯೆ ಮಲ್ತನ ಪಾಪೊ ಮೆಗ್ಯಗ್ ತಾಗು ಪನ್ಪೆಣ್ಣ ||

8

ಬೂಮಿ ಲೋಕೊದ ಪುಣ್ಯೊ ಸೀರ್ತೊಡು
ಮೀದ್ ಮೆಯಿ ಮನೊ ಸುದೊ ಮಲ್ತದ್
ದೇವೆರೆಗ್ ಕಾಣೆಗನ್ ಮಲ್ತಡ ಪಾಪೊ ಪರಿಯಾರೊ ||
ಆಪುನೆಕ್ ಅಡ್ಡಿ ಇನಿಯೇ
ಪೋಲ ಮುಲ್ಪಡ್ಡಿತ್ತೆ ಅರಮನೆ
ಗೇನ್ ತೆರಿಪವೆ ಪನ್ನಗಾಪಗ ಪನ್ನೆ ಬಲರಾಮೆ ||

9

ಪಾಪೊ ದುರ್ರೋದನಗ್ ಸಾಯೊನು
ಯಾನೆ ಮಲ್ತುವೆ ಪನ್ನೆ ಪಿದಡ್ಡದ್
ಸೀರ್ತೊ ಯಾತ್ರೇಗ್ ಪೋಯೆರಾಯ್ಚ್ ಸೋಲ್ತೆ ಕೌರವೆನೆ ||
ಆಯ ಪಾಪೊದ ಪಲೊನೆ ನಿಕ್ಕೇ-
ರಿತಿದಾ ಗಂಡಾಂತ್ರೊ ಆಯಿನೆ
ಏರ್ ಸೈತ್ಂಡ ದಾನೆ ಸೂತಗೊ ನಂಕ್ ಇದ್ಯತ್ತೊ ||

10

ಮೆಗಿಯೆ ಪಂಡನ ಪಾತೆರೊಗು ಸರಿ
ಎದುರು ಉತ್ತರೊ ಕೊರೈರಾಯಿಜಿ
ಪಡೆಕ್ ಆಜ್ಜೆನ್ ಕೊರಿಯೆ ನಿಕ್ಲೆಗ್ ಬೊಡ್ಡಿ ಕಾಳಗೊನೆ ||
ಪೆರಪ ನಿಕ್ಲೆನೆ ಬುಡರೊಡುಂತುಲೆ
ನುರುಕುವೆರ್ ರಕ್ಕಸೆರ್ ಯಾನ್ಲ
ಅರಮನೆಟ್ ಇದ್ದಿಂದ್ ಕಾಪುಲೆ ಯಾನ್ ಬನ್ನೇಟ ||

11

ಈತ್ ಪಂಡದ್ ಸೀರ್ತೊಯಾತ್ರೇಗ್
ಪೋಪುನಾ ದುತ್ತೈತೊ ಮಲ್ತದ್
ಮೂಡಯಿಗ್ ಸರಿ ಮೋನೆ ಪಾಡ್ಡದ್ ಪೋಯೆ ಬಲರಾಮೆ ||
ಪಾರ್ತನೊಟ್ಟಿಗೆ ತಾನ್ ಪಿದಡ್ಡದ್
ಪೋಪುನಟ್ಟನೆಗಾದ್ ಕ್ರಿಷ್ಟನೆ
ದಾರುಕನ್ ಲೆತ್ತೊಂದು ಪಂಡನೆ ಪೋಪಿ ಸಂಗತಿನ ||

|| ಪಾಂಡವೆರೆ ರಕ್ಷಣೆಗ್ ಶ್ರೀ ಕ್ರಿಷ್ಟೆ ಪಿದಡಿಯೆ ||

ರಾಮ ರೂಪೊನು ಕ್ರಿಷ್ಟೆ ಹನುಮಗ್
ತೋಜದುಂತುದು ಪನ್ನನಾಯಡ
ಕಾಳಗೊಡು ಅರ್ದುನನ ತೇರ್ದ ಮಲ್ಲ ಕೊಡಿಮರಟ್ ||
ಈಯೆ ಕುಲ್ಲದು ಗೆಲ್ಲದಾಯನ್
ಲೋಕೊ ರಚ್ಚಣೆದೆನ್ನ ಕೆಲಸೊಗು
ಸಾಯೊ ಮಲ್ತೊಡು ಪನ್ನೆ ಒಪ್ಪದೆ ಆಂಜನೇಯನ್ಲ ||

1

ನೆನೆತಿ ಸಾತ್ಗ್ ಬರೆ ಪನ್ನನ
ಹನುಮನಪಗನೆ ನೆನೆತೆ ಕ್ರಿಷ್ಟೆನೆ
ಮಗ್ ತೂನಗ ಕಾರ್ಗಡ್ಡೊನೆ ಬೂರ್ದೆ ಹನುಮಂತೆ ||
ಲಡಯಿಗೇ ಕುರುಕಂಡೊ ಜಾಗೆ
ನರನ ತೇರ್ಗ್ ಯಾನ್ ಸಾರತಿ
ತನೊಟು ಪಿದಡುವೆ ಈಯೆ ಕೊಡಿಮರ ನೇರ್ಡ್ ಕುಲ್ಲೊನುಲ ||

2

ದಾರುಕೆನೆ ಕುದುರೆಲೆನ್ ಕಚ್ಚೆದ್
ತೇರ್ನೇ ಎದುರುಂತದಾನಗ
ಆಂಜನೇಯೆನೆ ಏರ್ಡ್ ಕುಲ್ಲಿಯೆ ತೇರ್ಡ್ ಕೊಡಿಮರಟ್ ||
ಚಾಟಿ ಪತ್ತದ್ ಕುಲೈ ಸಾರತಿ
ಪಾರ್ತೆ ತೇರ್ಗ್ ಸುತ್ತು ಬತ್ತದ್
ವಾಸುದೇವಗ್ ಮಲ್ತದೊಂದನೆ ರತೊಟು ಕುಲ್ಲೊಂಡೆ ||

3

ಬೇರಿ ವಾದ್ಯೊ ನಗಾರಿ ಬೊಬ್ಬೆಡ್
ಯಾದವೆರ್ ಜಯೊಗೋಸೊ ಮಲ್ತೆರ್
ತೇರ್ ಬೀದಿಡೆ ಬರ್ಪಿ ಪೊರ್ದುನು ತೂದು ಮಾತೆರ್ಲ ||
ಪೂತ ಮಾಲೆನ್ ದಕ್ಕೈಕೇ
ಆದಿ ನಾರಾಯಣಗ್ ಕ್ರಿಷ್ಟಗ್
ದೇವಕೀ ಮಗೆ ವಾಸುದೇವಗ್ ಜಯೊನೆ ಪಂಡೊಂದು ||

4

ಅರ್ದುನೆನೆ ದ್ವಾರಕೆಗ್ ಪೋಯ್ತೆಯೆ
ಬತ್ತಜೆನೆ ದಾನೆಂದ್ ಧರ್ಮಜೆ
ನಿಲ್ಕ ತೂವೊಂದಿತ್ತೆ ಸಾದಿಗ್ ಅಪಗ ತೇರ್ದವೆ ||
ಬರ್ದುನಾ ಸೊರೊ ಕೇಂಡಿಸಾತ್ಗ್
ಮೆಗ್ಯನಕೆಲೆನ್ ಕೂಡ್ಡು ಎದುರುಗು
ಬತ್ತನಾಯೆನೆ ಅಡ್ಡೊ ಬೂರಿಯೆ ಹರಿನ್ ಪುಗರೊಂದು ||

5

ಪಾಂಡವೆರ್ ಉಪಪ್ಪವೊಡ್ಡಿತ್ತನ
ಬಾರಿ ಪೊರ್ಲದ ಇಲ್ದೊಲಯಿಗ್
ವಾಸುದೇವನ್ ಕೈಟ್ ಪತ್ತದ್ ಕೊನೊದು ಕುಲ್ಲಯೆರ್ ||
ಆತ್ ಪೊರ್ತುಗು ಮತ್ಸ್ಯ ರಾಜಿನೆ
ಪಾರ್ ಬತ್ತದ್ ಕ್ರಿಷ್ಣ ಸ್ವಾಮಿನ
ಕಾರ್ಗಡ್ಲೊನೆ ಬೂರ್ರು ಪುಗರಿಯೆ ಕಾಪೊಡೆನನ್ಂದ್ ||

6

ಉತ್ತರೆನ್ ಅಬಿಮನ್ಯುಲೆತೊನುದು
ಬತ್ತನಯೆ ಕಾರ್ಗಡ್ಲೊ ಬೂರ್ಗ್
ಲಕ್ಕದುಂತದ್ ಪಂಡೆ ಕ್ರಿಷ್ಣನೆ ಉತ್ತರೆನ್ ತೊದು ||
ಪೆದ್ದೊಡೀಯೆ ಆಣ್ ಬಾಲೆನ್
ಪನ್ನಗನೆ ನಾಚಿಗಡ್ ಮೋನೆಗ್
ಮುಚ್ಚಿಯಲ್ ತನ ಸೆರಗ್ನಾಪಗ ಎತ್ತೆರಾಡೆಗನೆ ||

7

ಬೇಕೊ ಎಂಕುಲು ಇರ್ದೆರಜ್ಜಿಲು
ಆಪುನಾವರೊ ಕೊರ್ಲ ಪಂಡದ್
ಆ ಸುಬದ್ದನೆ ಪಂಡಲಣ್ಣಡ ತೊದು ದ್ರೌಪದಿನ್ ||
ಪೂವು ಕನತ್ನ ಇಲ್ಲದೆರ್ದೆಗ್
ಈಯೆ ಪಂತಿನ್ ಕನಪ ಪಂಡದ್
ಯೋಗಿ ರುಸಿಕುಲು ಪಂಡಿ ಪಾತೆರೊ ಸತ್ಯೊ ಆಂಡತ್ತೊ ||

8

ಪೀಟೊಡೇ ಕುಲ್ಲಾದ್ ಕ್ರಿಷ್ಣನ್
ಪಾದೊ ಪೂಜೆನ್ ಮಲ್ತ್ ಧರ್ಮಣೆ
ಜೀವಿಲೆನ ಸಂಸಾರೊ ಕಡಲ್ನ್ ಈಯೆ ಕಡಪವುನ ||
ನಾವಿಕೆನೆ ಕಪ್ಪಲ್ಗ್ ಪಾರ್ತನ
ಸಾರತಿಯೆ ಆವೊಂದು ಲಡಯಿದ
ಸಾಗರೊನು ಕಡಪಾಲ ಪಂಡದ್ ಅಡ್ಲೊ ಬೂರೊಂಡೆ ||

9

ಲೋಕೊಡಿತ್ತನ ದುಸ್ಸ ಸಗ್ಗಿಲೆ
ನಾಸೋಗೇ ಕೌರವೆರೆ ಬುದ್ಧಿಗ್
ಹಾಲ್ ಸಾದಿಯೆ ತೋಜಿನೆಂದ್ ಯಾನ್ ತೆರಿಯೊಂಡೆ ||
ಪಾಂಡವೆರೆನಾ ಸತ್ಯೊ ಧರ್ಮೊನು
ತೂಕೊ ಮಲ್ಪುನ ತೆರಸ್ಲಾ ಕುರು
ಕ್ಷೇತ್ರೊದಾ ಕಳ ಪನ್ದ ತೆರಿಯೊನಿ ಬಾವನಕೆಲೊಟ್ಟು ||

10

ಹರಿಯೆ ಪಂಡನ ಪಾತೆರೊದ ನಿಜೊ
ತಿರ್ಳ್ ಮಾತೆರೆಗರ್ತೊ ಆಯ್ಕೆಟ್

ಮುರ ವಿರೋದಿನ್ ಪುಗರ್ ಪುಗರ್ದ್ ಬಜನೆ ಮಲ್ತೊಂದು ||
ನಲಿಪುನಗ ದ್ರೌಪದಿಯೆ ಬತ್ತದ್
ಅರಿಯನೊಡು ಆರತಿನೆ ಬೆಳಗವಿ
ಪದೊನು ಪಂಡಲ್ ಕ್ರಿಷ್ಣ ಸ್ವಾಮಿನ್ ದಿಂಜ ಪುಗರೊಂದು ||

|| ಕೌರವನ ಸಬೆ ||

ದ್ವಾರಕೆಡ್ ಗೇಲಾಂಡ್ ಪಂಡದ್
ಆ ಸುಯೋದನೆ ಸಬೆಕ್ ಲೆಪುಡಯೆ
ಬೀಸ್ಮ ದ್ರೋಣೆರೆ ಕೃಪೆರ್ಲಸ್ವತ್ತಾಮೆರೆನ್ ಬುಕ್ಕೊ ||
ಬಾವೆ ಸೈಂದವೆ ಕರ್ಣ ಸಕುನಿಲು
ನೂದು ಜನೊ ಮೆಗ್ಗಲ್ಲು ಒಟ್ಟಿಗೆ
ಸೇರ್ದೆತ್ತೆರ್ ರಾಜನೋಲೆಗೊ ಚಾವಡಿಗ್ಲಪಗ ||

1

ಹಿರಿಯೆರೆಗ್ ಗುರುಕುಲೆಗ್ ವಂದನೆ
ಮಲ್ತದಾಯೆನೆ ಸಿಮ್ಮೊ ಪೀಟೊಡು
ಸರಿಟ್ ಕುಲ್ಲದು ಸಬೆನ್ ತೊದೇ ಬಾರಿ ಸಂತೊಸುಡು ||
ಕೋಡೆ ದ್ವಾರಕೆಗೇನ್ ಕ್ರಿಷ್ಣನ್
ಸಾಯೊ ಕೇನ್ಯೆರೆ ಪೋಯಿ ಸಂಗತಿ-
ಡಾಯಿಗೇಲ್ನ್ ಪನಿಯೆರೆಂದ್ ಸಬೆನ್ ಲೆಪುಡಯೆನೆ ||

2

ಯಾನ್ ಎತ್ತನ ದುಂಬೆ ಅರ್ಜುನೆ
ವಾಸುದೇವನ ಪಾದೊದವುಲೇ
ಬಾರಿ ಬಗ್ಗಿಡ್ ಉಂತುದಿತ್ತೆನೆ ಕೈನ್ ಮುಗಿಯೊಂದು ||
ಪೋಯಿನಯೆ ಮಂಚವುಡು ನಿದರ್ದ
ಕೂರಿಗೆನ್ ಒಯ್ಪದ್ನ ಕ್ರಿಷ್ಣನ್
ತೂದು ಕುಲ್ಲಿಯೆನಾಯ ತರೆತವೆ ಬರಿಟ್ ಮರ್ಯದಿಡ್ ||

3

ನಿದರ್ನಾಯೆನೆ ಆದ್ ಎಚ್ಚರೊ
ಇರುವೆರೆಡಲಾ ಬಾರಿ ಪುಗರ್ದ
ತನಡ ಎಂಚಿನ ಕಾರ್ಯಾಗಾತ್‌ರೊ ನಿಕ್ಲ್ ಬತ್ತದ್ನೆ ||
ಪನಲೆ ಪನ್ನಗ ಯಾನ್ ಪೋಯಿನ
ವಿಸಯೊ ಪಂಡದ್ ಸಾಯೊ ಕೇನ್ಯಗ
ನರನ ಮೋನೆನೆ ತೂನಗಾಯೆಲ ಪಂಡೆ ಎನಲೆಕೊನೆ ||

4

ತಾನ್ ಒರೈನೆ ಒಂಜಿ ಕಡಕೇ
ಯಾದವೆರೆ ಸೈನ್ಯೊಲೆನ ಒಟ್ಟುಗು

ಸೇರ್‌ದಣ್ಣೆನೆ ಬರ್ದೆನೇ ಬುಕ್ಕೊಂಜಿ ಕಡೆಕಾಯೆ ||
 ನೇಟ್ ಏರೆಗ್ ಒವ್ವು ಪಂಡ್‌ದ್
 ಕೇನ್ನಗನೆ ಆ ಪಾರ್ತೆ ಕ್ರಿಷ್ಣನ್
 ಬೇಕೊ ಒತ್ತೊಂದುಪ್ಪುನಗನೇ ಎಂಕ್ ಬಲರಾಮೆ ||

5

ಆಯನೊಟ್ಟುಗು ವೀರ ಯಾದವ
 ಸೇನೆಲೈವತ್ತಾಜಿ ಕೋಟಿಯೆ
 ಸೇರ್‌ದಾನಗ ಬಾರಿ ಸಂತೋಸುಡೇನ್ ಪಿದಡೊಂದು ||
 ಪ್ರೀತಿದಾ ಬಲರಾಮ ಸ್ವಾಮಿದ
 ಪಾತೆರ್‌ದ್ ಒಪ್ಪಾದ್ ಬತ್ತೆನೆ
 ಪಾಂಡವೆರೆ ಸಂತಾನೊ ದೀಡಯೆ ಪನ್ನಿ ಬರವಸ್‌ಡ್ ||

6

ಗುರುಕುಲೆಗ್ ಪಾತೆರೊನು ಕೇಂಡ್‌ದ್
 ತೆಲಿಕೆ ತಡೆಯೆರೆಗಾಯಿಲ್ಲಪಗನೆ
 ಸಬೆಟ್ ಪಂಡೆರ್ ಕೇನ್ ಕೌರವ ಯಾನ್ ಪನ್ನುನೆನ್ ||
 ಹರಿಯೆ ಪಾಂಡವನಕ್‌ಲೆ ರಚ್ಚಣೆ
 ಮಲುಪುನಾಯೆನೆ ಉಪ್ಪುನಗ ಈ
 ಗೆಲುಪುನೆಂಚಯ ಗ್ರೇಯ್ ತೂವೊನು ಜಯೊನೆ ತಿಕ್ಕಂದ್ ||

7

ರಾಜ್ಯೊನಕ್‌ಲೆಗ್ ಬುಡುದು ಕೊರೆಯ
 ಪಾಂಡವೆರೆಡ ಪ್ರೀತಿಡಿತ್ತಡ
 ಏರ್ ಬರ್ದೆರ್ ನಿನ್ನ ಎದುರುಗು ಊರುನಾಳ್‌ನಗ ||
 ದಾನೊ ಹಾಲ್‌ದ ಗಳಿಗಡಾಯಿನ
 ಕೋಪೊದಾ ಪಗೆ ಬುಡುದು ಬದ್‌ಕೆಲ
 ಸೋಲ್ಪುನೆನೆ ಈ ನನಗ್ ಲಡಯಿಗ್ ನೆಲಕರೊಕ್ಕಿಯಡ ||

8

ಪನ್ನುನೆನ್ ಕೇನೊಂದು ಕರ್ಣೆನೆ
 ಲಕ್ಕದುಂತುದು ಪಂಡೆ ಬೆರಣೆರ್
 ಉನ್ನುನೆನೆ ನಮ್ಮವುಲು ಅಕ್‌ಲೆನ ಪಕ್ಷೊ ಪಾಂಡವೆರೆ ||
 ನಿಕ್ಕ ಪೋಡಿಗೇ ಬೊಡ್ಡಿ ಯಾನೇ
 ಉಲ್ಲೆ ಅತ್ತೊಯ ಪಾಂಡು ಬಾಲ್ಗನ್
 ಕುಟ್ಟೆಪೈರೆ ಪನ್ನಗಾಪಗ ಲಕ್ಕಿ ಗುರುಮಗನೆ ||

9

ಸೂತನಾ ಮಗೆ ದಾಯೆ ಬಗುಳುವ
 ತೂತ್‌ಜೊನೊ ನಿನ ಮಲ್ಲ ಪೌರುಸೊ
 ಆನಿ ಅರಸುನು ಚಿತ್ರ ಸೇನೆನೆ ಕೊಂಡು ಪೋನಗನೆ ||
 ಏರ್ ಬುಡ್ಡಯಿನಾಯೆ ಪಾರ್ತೆನೊ

ಈಯೊ ಪನ್ ಪನ್ ಇತ್ತೆ ಕೊಚ್ಚುನೆ
 ದಾಯೆ ಪೋಣ್ಣಲು ಸಬೆಟ್ ಏರಲ ಕುಲ್ಲದಿದೈರಾಯ ||

10

ದರೊದೊಣಸ್‌ಗ್ ಪಾರ್ಡ್ ಪೋಪುನ
 ಪುಕ್ಕ ಜಾತಿದ ಬೆರಣ ಮಾರಣೆಗ್
 ಯುದ್ಧೊಡಾಪುನ ಸೋಲು ಗೇಲ್‌ದ ಸಿಪಿನ್ ಪಿನಿಯೆರೆಗ್ ||
 ತೀರೊ ಪನ್ನಗ ಕತ್ತಿ ದೆತ್ತದ್
 ಕಡ್ಡದೇ ಕೆರ್ದೆಂದ್ ಗುರುಮಗೆ
 ಲಕ್ಕನಗ ಕೌರವೆನೆ ಲಡಯಿನ್ ತಲಿತ್‌ದುಂತಾಯೆ ||

11

ಮಾಜಿ ಮಂತ್ರಿಯೆ ಆಯ್ ಸಂಜಯ-
 ನಾಪಗನೆ ಬರ್ದೆರೆಗ್ ಪಂಡ್‌ದ್
 ಪಾಂಡವೆರ್ ಇತ್ತನಡೆ ಇತ್ತೆನೆ ಪೋದುಪನೊಡಲ್ಪ ||
 ರಾಜ್ಯೊ ಬೋಡುಂದಾಂಡ ಎಂಕ್ಲೆಡ
 ಕಾದ್ದೇ ಕಾಳಗೊಡು ಗೆಲ್‌ದ್
 ಆಳೊಡುಂದುದು ಪನ್‌ಲ ಪನ್ನಗ ಪೋಯೆನಲ್ಪಡ್‌ದ್ ||

|| ಸಂಜಯೆ ಪಾಂಡವೆರೆಡ ಪಾತೆರ್ದೆ ||

ಪಾಂಡು ಬಾಲ್ಗನ್ ತೂಪುನಾಸೆಡ್
 ರಾಜನಪ್ಪಣೆ ಪಡೆದ್ ಸಂಜಯೆ
 ತೇರ್‌ಡೇ ಉಪಪ್ಪವ್ಯೊ ನಗರೊಗು ಎತ್ತೆ ಬಯ್ಯನಗ ||
 ಪಾಂಡವೆರ್ ತೂದಯನ್ ಪ್ರೀತಿಡ್
 ಪಾತೆರೊಂದೇ ಉಲಯಿ ಕುಲ್ಲದ್
 ಕೇಂಡೆರೇ ಸುಕೊ ದುಕ್ಕೊನಾಯನ ಕೊರ್ದು ಬಾಜೆಲ್‌ಗ್ ||

1

ಪೊರು ಕಂತ್‌ದ್ ಕತ್ತಲಾಯ್ಕೆಟ್
 ಎಲ್ಲೆ ಪಾತೆರೊಂದು ಆಯನ್
 ಉನ್ನದಾಸಿಗೆ ಪಾಡ್ ಜೆಪುಡಯೆರಕ್‌ಲೆ ಮಂದಿರೊಡು ||
 ಬೊಲ್ಪು ಆನಗ ಲಕ್ಕನಾಯಗ್
 ನಿತ್ಯೊ ಕರ್ಮೊನು ಮಲ್ಪೆರಾಪುನ
 ಅಟ್ಟಣೆನ್ ಹಿರಿಯಯಗ್ ಮಲ್ಪುನ ಲೆಕೊನೆ ಮಲ್ತೆರಲ ||

2

ಚಾವಡಿಡ್ ಕುಲ್ಲದ್ ಧರ್ಮಣೆ
 ಶ್ರೀ ಹರಿನ್ ಮೆಗೈಲ್ಲೆನೊಟ್ಟುಗು
 ಪೂಜೆ ಮಲ್ತದ್ ಆನಗಾಪಗ ಮಂತ್ರಿ ಸಂಜಯೆಲ ||
 ಪಾದೊ ಪೂಜೆನ್ ಮಲ್ತೆ ಕ್ರಿಷ್ಣನ

ಮಾತೆರಾಲ ಪಲೊಹಾರೊ ಮಲ್ಲೆರ್
ಆಪಗನೆ ದ್ರೊಪದಿಲ ಬತ್ತದ್ ಅಡ್ಲೊ ಬೂರಿಯಲ್ ||

3

ಅಜ್ಜೆ ಬೀಸ್ಮೆರ್ ಮಾತ ಗುರುಕುಲು
ಎನ್ನ ನೇಲ್ಯಮ್ಮರೆಗ್ ಸೌಕ್ಯೊನೊ
ಪನ್ದ ಕೇಂಡೆನೆ ಧರ್ಮನಂದನೆ ಮಂತ್ರಿ ಸಂಜಯಡ ||
ಕ್ರಿಷ್ಣಲಾ ಸಂಜಯಡ ಕೇಂಡೆನೆ
ದುಸ್ಸ ಕೌರವೆ ಪಗಡೆ ಗೊಬ್ಬದ್
ನಟ್ಟ ತಿರ್ಗಯೆ ಪಾಂಡವೇರೆನ್ ಸೌಕ್ಯೊಡುಲ್ಲನಯ ||

4

ಕೌರವನ ತುಡೆಗಟ್ಟಿ ಉಂಡೊಯೆ
ಸೈಂದವನ ತರಟಿತ್ತೆ ಕುಜಲಾಲ
ವ್ಯೊಪ್ಪೆರೆಗ್ ಎನ ಕೈಕ್ ತಿಕ್ಕುವೊ ಕೇಂಡೆನಾ ಬೀಮೆ ||
ವೀರ ಕರ್ಣನ ಅಬ್ಬರೊದ ನುಡಿ
ರಾಜ ಸಬೆಟೇ ನನಲ ಕೇನುವೊ
ಆನಿ ಮತ್ಸ್ಯನ ಎರ್ದೆ ಕಂಡ್ ಮತಿಯೆ ತತ್ತನೆಟ್ ||

5

ಪನ್ದಲರ್ದನೆ ಕೇಂಡೆನಾಪಗ
ಚಿತ್ರ ಸೇನೆನೆ ಕಟ್ಟದಿತ್ತಾನ
ಅರ್ದಟ್ ಬಾವೆರೆಗ್ ಬೇನೆನೆ ಇತ್ತೆ ಗುಣೊವುಂಡೊ ||
ಪೊಣ್ಣ ಮಾನೊನು ದೆತ್ತನಕಲೆಗ್
ತನ್ನ ಮಾನೊನು ಕಾಪೈರಾಯಿಜೆ
ಪನ್ನಿ ದುಕ್ಕೊನೆ ಉಂಡೊ ಕೇಂಡಲ್ ದ್ರುಪದ ಮಗಲಾಲ ||

6

ಸಕುನಿ ಗೊಬ್ಬನ ಪಗಡೆ ಕಾಯಿನ
ಗೇಣಿತ್ ದೀತೆನೊ ಪನ್ಲೆ ಪಂಡ್ ದ್
ನಕುಲ ಸಾದೇವೆರಲ ಕೇನ್ನಗ ಪಂಡೆ ಸಂಜಯೆನೆ ||
ನಿಕ್ಲ್ ಯುದ್ಲೊಡೆ ರಾಜ್ಯೊನಾಯಡ
ಪಡೆವೊಡುಂದುದು ಎನನ್ ಈಡೆಗ್
ಕಡಮಡುದೆ ಕೌರವೆನೆ ಪನ್ನಗ ಬೀಮೆನಬ್ಬರೊಡು ||

7

ಯಮನ ಲೋಕೊಡು ಜಾಗೆನಾಡ್ ದ್
ಬರಡ್ ಎನ್ನಡ ಲಡಯಿಗುತ್ತೆರೆ
ತುಡೆನ್ ಪೊಲಿತ್ ದ್ ದುಸ್ಸ ಕೌರವನಾಡೆ ಕಡಮಡುವೆ ||
ನರೆನೆ ಸಂಜಯಡಪಗ ಪಂಡೆನೆ
ಬರಡ್ ಕರ್ಣಾದಿಗುಳು ಎನ್ನಡ
ಕಳಟ್ ಕಾದೈರೆ ಪಂಡೆನಾಪಗ ಪನ್ನೆ ಧರ್ಮಜೆನೆ ||

8

ರಾಜಿ ಪಂಚಾತಿಗೆಗ್ ಕ್ರಿಷ್ಣನ್
ಯಾನ್ ಎಲ್ಲೆನೆ ಹಸ್ತಿನಾವತಿ-
ದಾಡೆ ಕಡಮಡುವೆಂದ್ ಪನ್ನಗ ಎಡ್ಲೆ ಆಂಡ್ಂದ್ ||
ತೇರ್ಡೇ ಕುಲ್ಲೊಂದು ಪಿದಡಿಯೆ
ಜ್ಞಾನಿ ಸಂಜಯೆ ಮಾತೆರೆಡಲಾ
ಪೋಪೆ ಪಂಡ್ ದ್ ಕ್ರಿಷ್ಣ ಕಾರ್ಗ್ ಅಡ್ಲೊ ಬೂರೊಂದು ||

9

ನನಗ್ ಆಪುನ ದುಸ್ಸ ಸೂಚನೆ
ತೆರಿಂದ್ ಸಂಜಯೆ ಬುಲ್ಲು ಬುಲ್ಲುದು
ರತೊಟು ಕುಲ್ಲುದು ಎತ್ತೆ ಬಯ್ಯಡ್ ಹಸ್ತಿನಾವತಿಗ್ ||
ಪರಬ ಮಂತ್ರಿಯೆ ಬತ್ತಿ ಸುದ್ದಿನ್
ತೆರಿಪದಾನಗ ಕೌರವೇಸ್ಸರೆ
ಇರ್ಲ್ಡೇ ಸಬೆ ಲೆತ್ತೆ ಚಾವಡಿಡುಲಯಿ ಮಾತೆರೆನ್ ||

10

ಲೆಪುಡಯೆನೆ ಸಂಜಯೆನ್ ಕೌರವೆ
ಪನ್ಲ ಧರ್ಮಜೆ ಪಂಡಿ ಸಂಗತಿ
ಅಪಗ ಬೀಸ್ಮಾದಿಲೆನ ಮೋನೆನ್ ತೂದು ಪಂಡೊನುವೆ ||
ಹರಿನ ಕರುಣೆಡ್ ಧರ್ಮನಂದನ
ಸಬೆತ ಪೊರ್ದುನು ಪೂರ ಪನಿಯೆರೆ
ತೆರಿಪುವೇರೆಗ್ ಎಂಕ್ ಸಾದ್ಯೊನೊ ಕೇನ್ ಮಾರಾಜ ||

11

ಕ್ರಿಷ್ಣನಕಲೆನ ಒಟ್ಟುಗುಲ್ಲೆನೆ
ಮತ್ಸ್ಯ ರಾಜನ ಸೇನೆ ದ್ರುಪದನ
ಮಲ್ಲ ದಂಡಲ ಸೇರ್ದುಂಡುಯ ಪಾಂಡವೆರೆ ಕಡೆಟ್ ||
ಅಕಲ್ ಒರಿಯೊರಿ ಪನ್ನಿ ಪಾತೆರೊ
ಕೆಬಿಟ್ ಕೇನ್ನಗ ನಿನ್ನ ಕಾರ್ಬರ್
ನಡಿಕ್ ಪಾಡ್ಡೆರ್ ಪನ್ನುನೆಕ್ ಇನಿ ಅಡಿ ಇದ್ಯತ್ತೊ ||

12

ಬೀಮೆನೇ ಗದೆ ತಿರ್ಗವೊಂದೇ
ಬಾರಿ ಗತ್ತಾಡ್ ಪಂಡೆ ಎನ್ನಡ
ಈಯೆ ಲಡಯಿಗ್ ಬನ್ನಗೆಮನವೆ ಲೋಕೊಡಿತ್ತಾನವೆ ||
ಜಾಗೆ ನಾಡ್ ದ್ ಬರೊಡುಗೆಂದ್ ದ್
ಬೂಮಿಯದುರುನ ಬೊಬ್ಬೆ ಹಾಕ್ ದ್
ಆಯೆ ಪನ್ನಗ ತಾತಿ ಬೊಟ್ಟೆರ್ ಕೂಡಿ ಸಬೆತಕ್ಲ್ ||

13

ಕರ್ದ ಜೀವೊಗು ಸಂಚಿಕಾರೊನು
ಕೊರ್ದೆ ಬಾಣೊಡು ಪನ್ದ ಪಾರ್ತೆನೆ

ಪನ್ನಗನ್ನವೆ ತಿಗಲೆ ನಡ್ಗಲ್‌ಲಾಂಡ್ ಕುರುವೀರ ||
 ಪೊಣ್ಣು ದ್ರಾಪದಿ ನಿನನ್ ಕೇಂಡಲ್
 ಚಿತ್ರ ಸೇನೆನೆ ಕಟ್ನರ್ಕಟ್
 ಬಿಚ್ಚನಗ ಆಯಿನವೆ ಬೇನೆನೆ ಇತ್ತೆ ಗುಣೊ ಆಂಡೊ ||

14

ಪಾಂಡವೇರೆನ್ ಕ್ರಿಷ್ಟೆ ಗೆಲ್ವವೆ
 ಈಯೆ ಪುಣೆಪುನ ಬೊಡ್ಡಿಯಕ್‌ಲೆನ
 ರಾಚ್ಯೊನೇ ಬುಡುಕೊರ್ದು ರಾಜಿಡ್ ನನಗ್ ಬದ್‌ಕೊನುಲ ||
 ಈತ್ ಪನ್ನಗ ಕುರುಕುಲೇಸ್ವರೆ
 ಕೋಪೊಡೇ ಲಾಗ್ಯೊಂದು ಪಂಡನೆ
 ನೂಕುಲೇ ಈ ನಾಯಿನಿತ್ತನೆ ಸಬೆಟ್ ಕೊರೆಪುನವೆ ||

15

ಬೊಬ್ಬೆ ಕೇಂಡ್‌ದ್ ಬತ್ತೆನಾಡೆಗ್
 ಕುರ್ದೆನಾ ದ್ರತರಾಸ್ತ್ರಿ ಪರಡ್‌ದ್
 ಬೊಡ್ಡಿ ಮಗ ಪಾಂಡವೆರೆ ಸುದ್ದಿಯೆ ಅಕ್‌ಲೆನಾ ಹರಿಯೆ ||
 ಗೆಲ್ವವೆನೆ ಈ ಕೊಲ್ಲ ರಾಚ್ಯೊನು
 ಕ್ರಿಷ್ಟನೆದುರುಡು ಏರ್ ಒರಿತರ್
 ದುಸ್ಪ ಕಂಸೆನೊ ಹಂಸ ಡಿಬಿಕರನಕ್‌ಲೊ ಪನ್‌ಲೆನಡ ||

16

ಅಮ್ಮೆ ಪಂಡ್‌ನ ಕೇನ್ದ್ ಕೌರವೆ
 ಲೆತ್ತನೇರಾಯೆ ಈರೆನೀಡೆಗ್
 ಕ್ರಿಷ್ಟ ಸಂಗತಿ ಎಂಕ್ ಏತ್‌ಲ ತೆರಿದ್ ಉಂಡಿತ್ತೆ ||
 ದುಸ್ಪೆರೆನ ಬಿದೆ ಮುತ್ತಯೆರೆನೇ
 ಪುಟ್ನೆಯೆನೇ ಅಂದ್ ಯಾನ್‌ಲ
 ದುಸ್ಪೆಯಾದೇ ಎದುರು ಉಂತುವೆ ಕೆರಡ್ ಎನನಿತ್ತೆ ||

17

ಮಗೆನೆ ಎನ್ನವೆ ಪಾತೆರೊಗು ಇನಿ
 ಮರಿಯದಿನ್ ಕೊರ್ಪುಜೆನೆ ಪನ್ನಗ
 ಬದುಕುನೆನೆ ದಾಯೆಂದ್ ವಿದುರನ್ ಲೆತ್ತೆ ಕೈತಡೆಗ್ ||
 ನಿದೆರ್‌ದಾಂಡಲ ಪೊರ್ತು ಪೋಪುಜೆ
 ವಿದುರ ಎಂಕೀ ದಾನೆ ಆಂಡಲ
 ಪನ್‌ಲ ಸಮದಾನೊದವೆ ಪಾತೆರೊ ಪಂಡನಾಯಡನೆ ||

|| ವಿದುರ ನೀತಿ ||

ಕೇನ್ ಕುರುಕುಲೊದರಸು ಪನ್ನನ
 ದಾಲ ಬಲೊ ಇದ್ಯಂದ್‌ನಾಯೆನೆ

ತ್ರಾಣೊದಾಯನ ಪಗೆನ್ ಕಟ್ಟಿಡ ನಿದ್ರೆ ಬೂರಂದ್ ||
 ಕಾಮುಕಗ್ ಸಂಪೊತ್ತು ಜುಗರಿಡ್
 ಪೋಯಿನಾಯಗ್ ಕಂಡು ಕಳುವಗ್
 ದೇವೆರೆನ ದಯೊ ಕಳೆಯಿನಾಯಗ್ ರಾತ್ರ ಜಾಗರೊನೆ ||

1

ಒಂಜೆಡ್‌ದ್ ರಡ್ಡಾವು ಮೂಜೆನ್
 ನಂಬೊನುಂದೇ ನಾಲ್ ಸಾದನೆ
 ಗಿಂಬು ಮಲ್ತ್‌ದ್ ಬುಡೊಡು ಐನೆನ್ ಆಜಿ ಏಳೆನ್‌ಲ ||
 ಒಂದಿಯೆರೆಗಾವಂದ್ ಎನ್ನೆನ್
 ಒಂಬೊನೇಪೊಲ ಬಲ್ಲಿ ಬುಡಿಯೆರೆ
 ಇಂಚ ಉಪ್ಪುನ ಪತ್ ತತ್ತೊಲು ನಂಕ್‌ಲಾವಂದ್ ||

2

ತನ್ನ ಚಿಂತೆನೆ ಒಂಜಿ ದೈವೊದ
 ಅಡ್ಡೊನೇ ಬುಕ್ಕೊಂಜಿ ಮನಸ್‌ಡ್
 ಕಸ್ತೊ ನೆನೆಪುನ ಮೂಜಿ ದೇವೆರೆ ನಿರ್ಪೊ ನಾಲ್ಕುಮುನೆ ||
 ಈತೆನ್‌ಲ ಮಿಕ್ಕೊಂದು ನೆನೆತ್‌ದ್
 ತಾನ್ ಮಲ್ತ್‌ನ ಕಾರ್ಯೊ ಗೆಲ್ತ್‌ನೆ
 ಆಂಡ ಆಯಗ್ ಬೇತೆ ದೈವೊನೆ ದಾಯೆಗರ್ತಾಂಡೊ ||

3

ಮರಿಯೆ ಕಿನ್ನಿಲೆನೇತೊ ಪುಟ್ಟದ್
 ನರಮನಿಲೆಗನ್ಯಾಯೊ ಮಲ್ತ್‌ನ
 ಲೆಕೊನೆ ಬಾಲ್ಟೆನ್ ನೂದು ಪಡೆದೀ ಬೂಮಿಗನ್ಯಾಯೊ ||
 ಮಲ್‌ತನೇ ಪಂಡೊಂದು ದೂರ್ದೆರ್
 ನಿನನ್ ಅರ್ದನೆ ಲೋಕೊಗೊರ್ದೆನೆ
 ಸರಿತಯೆನೆ ಪನ್ನೆರಾಯೆ ಬಾಕಿದ ನಾಯಿಲೆಂಚಿನೆಕ್ ||

4

ಪಾಪೊ ಕಾರ್ಯೊಡು ಮಲ್ಲಿ ಬದ್‌ಕನ್
 ಏತೊ ಜನೊ ತಿಂದೆರ್‌ಡಲಾ ಅವು
 ಏರೆಗಲ ತಾಗಂದ್ ಪಾಪೊದ ಪಲೊನು ತಿನಿಯೆರೆಗ್ ||
 ಆ ಪಲೊನು ಸರಿ ತಿನುವೆ ಪಾಪೊನು
 ತಾನ್ ಒರ್ದೆನೆ ಮಲ್ತ್‌ನಾಯೆನೆ
 ದಾಯೆಗೇರೆನ ಬದ್‌ಕನೊಯ್ಪುನ ಕೆಲಸೊ ಮಹರಾಜ ||

5

ಧರ್ಮೊ ಕಾರ್ಯೊಡು ಮಲ್ಲಿ ಬದ್‌ಕುಲು
 ಉರ್ದಿಯಾದೇ ಜೋಕ್ಕು ಬಾಲ್ಟೆಗ್
 ತಿಕ್ಕು ತಿನಿಯೆರೆಗಾಯ ಸಂತತಿ ಬಾಳ್‌ದಿತ್ತನೆಟ ||
 ತನ್ನ ಇಚ್ಚೆಡ್ ಪರಿಪುನಾ ಸುದೆ
 ರಡ್ಡ್ ಕಡೆಕ್‌ಲ ನೀರ್ ಕೊರ್ದುನ
 ಎಡ್ಡೆ ಗುಣೊತವೆ ನಮುನೆಡಿತ್ತನ ಪೊಣ್ಣುಲಿತ್ತೆರ್‌ಡ ||

6

ತಡ್ಯಡೇ ದೀಡ್ಡಿತ್ತಿ ತುಡರ್‌ದ
ಬೊಲ್ಪುದಂಚಿನೆ ರಡ್ಡ ಕಡೆಕ್‌ಲ
ಪುಣ್ಯೊದಾ ಸಕ್ವೀರ್ತಿ ಬರ್ಪುನೆ ಪನ್ದ ತೆರಿಯೊನುಲ ||
ದುಸ್ಪೆರೆಗ್ ಎಡ್ಡೆಂದ್‌ನಾಕ್‌ಲ್
ಪುಟ್ಟುನೆನೆ ಪೊಣ್ಣಲೆನ ಮನಸ್‌ದ
ಎಡ್ಡೆ ಗುಣೊಟೇ ಪನ್ದ ತೆರಿಪವೆರತ್ತೊ ತೆರಿನಕ್‌ಲ್ ||

7

ಲೋಕೊಡೇ ಸತ ಮೂರ್ಕೆರಿರ್ವೆರ್
ರಾವಣೆಲ ನಿನ ಮಗೆನೆ ಕೌರವೆ
ಆಯೆ ಪೊಣ್ಣನ್ ಕಂಡ್ಯೆ ಇಂಬ್ಯೆನೆ ಎರ್ದೆ ಕಂಡ್ಯೆರೆಗ್ ||
ಪೋಯಿನಯೆ ಸೋಲೊಂದು ಬತ್ತದ್
ಬೂಟು ಕೊಚ್ಚುವೆ ಮೂಲು ಅಕಲೆನ
ಸಾಸೋನೇ ತೆರಿಯೊಂದು ಮರ್ದೆರೆ ಲೆಕೊನೆ ನಿನ್ನ ಮಗೆ ||

8

ಸೈತ್ತೆರ್‌ಡಲಾ ಸೂರ್ಯ ಮಂಡಲೊ
ಸೇರ್ವೆರಿರ್ವೆರ್ ಒರಿಯೆನೇ ಮಹ
ಸನ್ನೆಸಿಯೆ ಆಯ್ನಾಯೆ ಬುಕ್ಕೊರಿ ಲಡಯಿದಾ ಕಳಟ್ ||
ಯುದ್ಡೊ ಮಲ್ತದ್ ಪ್ರಾಣೊ ಬುಡ್ಡಯೆ
ಚೆತ್ತಿಜಾತಿದ ವೀರನಾಯೆಲ
ಬುಕ್ಕೊ ಏರೆಗ್ ಇಂಚಿ ಏಗಿತೊ ತಿಕ್ಕು ದ್ರತರಾಸ್ತ ||

9

ಈ ಸಮಾಜೊಗು ದ್ರೋಹಿಲಿರ್ವೆರ್
ದಾಲ ಯೇಗಿತೊಡ್ಡಿಡಿಯಾಂಡಲ
ತಾನೆ ಒಯ್ಕಲ ಯಾರು ಪಂಡ್‌ದ್ ದುಂಬು ನುರುಕ್ಕನಯೆ ||
ಮಾತ ಗುಣೊಕುಲೆಡೇತೊ ಯೇಗಿತೊ
ದಾಯನೇ ಎತ್ತರೊದ ಸ್ತಾನೊಗು
ಏರಿಯೆರೆ ಪನ್ನಗನೆ ಜಾರುನ ಪುಕ್ಕೆ ಬುಕ್ಕೊರಿಯೆ ||

10

ಸೇನೆರೆಡ ಪಗೆ ಮಲ್ತನಾಯಗ್
ಬೂಮಿ ಬದ್‌ಕದ ಕೊರೆತೆ ಕಂಡಿತೊ
ರೋಗೊಗೇ ಸರಿ ಮರ್ಡ್ ಕೊರ್ಪುನ ವೈದ್ಯ ಜನೊಕುಲೆಡ ||
ತಾನ್ ಲಡಯಿನ್ ಮಲ್ತೆಡಾಯನ
ಸೀಕ್ ಸಂಕಡೊ ಗುಣೊನೆ ಆವಂ-
ದೇರ್‌ಲಾ ತೆರಿಯೊನೊಡು ಮುಕುಲೆಡ ಉಪ್ಪುನೆಂಚಂದ್ ||

10

ಸೊರೊಡೇ ಸುಕೊ ಪಡೆವೆರಿರ್ವೆರ್
ಒರೈ ರಾಜ್ಯೊನು ಆಳುನಾಯೆನೆ

ಮಲ್ಲಿ ತಪ್ಪುಗು ಕ್ಷಮೆನ್ ಕೊರೈಡ ತನ್ನ ಪ್ರಜೆಕುಲೆಗ್ ||
ಬುಕ್ಕೊರಿಯೆ ಮಹ ಬಡವೆನಾಂಡಲ
ಇತ್ತನೆನ್ ಕೊರ್ಪುನಯೆ ಪನ್ನುನ
ಪುಣ್ಯೊ ಕೀರ್ತಿನ್ ಪಡೆಯಿನಾಯೆನೆ ಅರಸು ಕೇನ್‌ಲಯ ||

11

ಬೂಮಿ ನಿಂಗುನೆ ಇರ್ದೆರೆನ್ ನಿಜೊ
ಕಾಳಗೊಡು ಪಿರ ಜಾರುನಾಯನ್
ತಾನ್ ಪಂಡಿತೆ ಆದ್‌ಲಾಯೆನೆ ಊರು ತಿರ್ಗಜೆಡ ||
ಅಪ್ಪೆನಮ್ಮನ್ ತನ್ನ ಬಾಲ್ವೆನ್
ರಚ್ಚಣೆನ್ ಸರಿ ಮಲ್ಪುನಂಚೆನೆ
ಮಲ್ಪೊಡರಸುಲ ಪ್ರಜೆಕುಲೆನ್ ಸರಿ ಪಂಡೆನಾ ವಿದುರೆ ||

12

ತನ್ನ ಸುಕೊ ಕಸ್ತೊಲೆಗ್ ಒದಗುನ
ಬಿನ್ನೆರೆನ್‌ಲಾ ದೂರೊ ಮಲ್ತದ್
ಟಕ್ಕಡೋಂಗಿಡ್ ದಿನೊನು ಕಳೆಪುನ ಮೋಸೊಗಾರೆರೆನ ||
ಒಟ್ಟುಗೇ ತಿಂದೊಂದು ಕುಸಲ್‌ಡ್
ಇತ್ತೆಡಾಯೆನೆ ತನನ್ ತಾನೇ
ಕೆರುನಯೆ ಅತ್ತಂದೆ ಬೇತೇರಯನ್ ಕೆರ್ದೆರ್‌ಯ ||

13

ಓಲು ರುಣೊ ಬಯೊ ನರಮನಿಲೆಗ್‌ಲ
ಓಲು ದೇವೆರೆ ಬಗ್ಗಿ ಸದ್ಗುಣೊ
ಓಲು ಉಂಡೋ ಅವುಲು ಬ್ರಾಣೆರೆ ತತ್ತೊ ಸೇರ್ದುಂಡು ||
ಓಲು ಪರಪೊಣ್ಣಲೆನ ಪೋಡಿಗಿ
ಓಲು ವಿಜ್ಞಾನೊಗುಳು ಇದ್ದಿಯೊ
ಅವುಲು ಗತಿ ಏರೆಗ್‌ಲ ಇದ್ದಿಂದಿತ್ತೆ ತೆರಿಯೊನೊಡು ||

14

ನಾಲ್ ಜನೊಕುಲೆಡೊಂಜಿ ಕಾರ್ಯೊನು
ತಾನ್ ಪಂಡೆಡ ಇರ್ದೆರೆಡನೇ
ಪೂರ್ತಿ ಒರಿಪುನೆ ಬುಕ್ಕೊ ಒರೈಡ ಮಾತ್ತೊ ಒರಿನವುಲ ||
ಪೂರ ಮರತ್‌ದ್ ತನಡ ಮಾತ್ತೊನೆ
ಏಪೊಗುಲ ಉಂಡುಂದು ತೆರಿನಯೆ
ತಾನೆ ಗ್ರೇಯ್‌ದ್ ಮಲ್ಪೊಡಾಯನ ಕಾರ್ಯೊನೇಪೊಗುಲ ||

15

ಅಪ್ಪೆ ಅಮ್ಮೆಲ ಆತ್ಮೊ ಗುರುಕುಲು
ಅಗ್ನಿ ಪನ್ನುನ ಐನ್ ಅಗ್ನಿಲು
ಪನ್ನುನೆನ್ ತೆರಿಯೊಂದು ಮಲ್ಪೊಡು ಸೇವೆನಾಕ್‌ಲೆನ ||
ಪಿತ್ತಲೆನ್ ದೇವೆರೆನ್ ಬತ್ತನ

ಬಿನ್ನೆರೆನ್ ಸರಿ ಸೇವೆ ಮಲ್ತೆಡ
ಪುಟ್ವೆನೆತ ಸಾರ್ತಕೊನೆ ಅಮ್ಮೆಗ್ ತಾನೆ ಮಗೆಯಾದ್ ||

16

ಸಿರಿತ ನಿಲೆ ಜವ್ವನೊದ ನಿಲೆಲಾ
ಸಯಿರೊ ಪೊರ್ಲುದ ನಿಲೆನೆ ಕೈದಾದ್
ನಿಲೆಲ ಉಪ್ಪುನೆ ಅರಸುತನೊನೇ ಇತ್ತ್ನೇಟಂದ್ ||
ತೆರಿದ್ ರಾಜ್ಯೊನು ಆಳ್ವೆ ಬಂದುಲೆ
ಗುಣೊನು ಮೆಚ್ಚಿದ್ ಧರ್ಮೊ ನೀತಿಡ್
ಅರಸುಲುಪ್ಪೊಡು ಪನ್ನಿ ತತ್ತೊನು ತೆರಿಯೊಡುತ್ತಮೆರ್ ||

17

ಕುಲೊತ ಮದೊ ಐಸುರೊದ ಮದೊ ಜ
ವ್ವನೊದ ಮದೊಲಾ ವಿದ್ಯೆದಾ ಮದೊ
ಮನಸ್ಸಾಡ್ತಾದ್ ಗುರುನು ಹಿರಿಯೆರೆನೇತೊ ಹಂಕರೊಡು ||
ನೆರ್ದ್ ಕೋಪೊಡು ಒರೈನಾಂಡಲ
ಮರಿಯದಿನ್ ಕಾತ್‌ಜೆಡ ನರಕೊದ
ಗುರಿಕ್ ಬೂರುವೆ ಚಕ್ರವರ್ತಿಯೆ ಆದ್ ಇತ್ತೆಡಲ ||

18

ತಾನ್ ಮದಿಮೆನೆ ಆಯಿ ಪೊಣ್ಣಡ
ಪ್ರೀತಿ ದೀಡಂದಾಯೆ ಬೇತೆನೆ
ಏರೊ ಪೊರ್ಲೆದಿ ಪನ್ದ ಮೆಚ್ಚುನ ನೀಚ ಕಾಮುಕೆನೆ ||
ದಾಲ ತೆರಿಯಂದ್‌ನಯೆ ಮಾತಲ
ತಾನೆ ತೆರಿನಯೆ ಪನ್ನಿ ನರಮನಿ
ತೀರ್ಲಿಡಲ ಕೈ ಪಾಡುನಾಯೆನೆ ಮೂಡೆ ತೆರಿಯೊನುಲ ||

19

ಸಾಂಕ್‌ನಾಯನ್ ದಿವೈಯ್ಯ ಮಂತ್ರೊನು
ತಾನೆ ಕಲ್ಪಯಿ ಗುರುನು ಲಡಯಿಡ್
ಪ್ರಾಣೊಕಾತ್‌ನ ಒಡೆಯನೇಪೊಲ ಕ್ಷಾಮಡಾಮರೊಡು ||
ನೀರ್ ನುಪ್ಪುನು ಕೊರ್ನಯನ್‌ಲಾ
ಏರ್ ಮರತ್‌ದ್ ಉಲ್ಲೆನಾಯನ
ಕೋಟಿ ಕುಲೊ ನರಕೊದವೆ ಗುಂಡಿಗ್ ಬೂರು ಮಹರಾಜ ||

20

ನೀತಿ ಸಾಸ್ತ್ರೊನು ಕಲ್ಪವಂದ್‌ದ್
ಆಚರೊದ ಗುರು ವೇದೊ ಧರ್ಮೊನು
ಏರೆಗ್‌ಲ ಸರಿ ಕಲ್ಪವಂದ್‌ನ ಯೋಗಿ ಮಹರಾಜೆ ||
ಆಯಿನಯೆ ಪ್ರಜೆಕುಲೆನ ರಕ್ಷಣೆ
ಯೋಗೊಕ್ಷೇಮೊನು ತೂಯಿಜೆಡಲಾ
ಕಾಡ್‌ಗೇ ಸೂಕೊರ್ಪನಾಯನ್ ಬುಡೊಡು ನಮೊ ಮಾತ ||

21

ಅತಿ ಬಲೊತ ವೀರೆರೆಡ ಲಡಯಿನ್
ಮಲುಪುನಾಯೆನೆ ದುಂಬುಡಾಯಿನ
ಗತಿನ್ ಮರತ್‌ದ್ ಲೋಕೊ ನೀತಿನ್ ಗಣ್ಯೊ ಮಲ್ಪಂದೆ ||
ತೆರಿನಕ್‌ಲೆ ಪಾತೆರೊನು ಮೀರ್‌ದ್
ನಡಪುನಯೆನೇ ತನ್ನ ಯೇಗಿತೊ
ತೆರಿಯಂದಿತ್ತ್‌ನ ರಾಜೆ ಮೂಡೆನೆ ಕೇನ್ ದ್ರತರಾಸ್ತ್ರ ||

22

ದಾನೊ ಇದ್ಯಂದ್‌ನವೆ ಐಸುರೊ
ಮಾನೊ ಇದ್ಯಂದ್‌ನವೆ ಬ್ರಾಣೆನೆ
ಜ್ಞಾನೊ ಇದ್ಯಂದ್‌ನವೆ ತಪಸ್‌ಲ ವೇದೊ ನೀತಿಲೆನ್ ||
ದಾಲ ತೆರಿಯಂದಿತ್ತಿ ಬೆರಣೆರ್
ಮಾನಿತೆರ್ ಕುಲ್ಲಂದೆ ಇತ್ತ್‌ನ
ರಾಜ ಚಾವಡಿಗಿದ್ದಿ ಲಚ್ಚಣೊ ಪನ್ದ ತೆರಿಯೊನುಲ ||

23

ಬಯ್ಯ ಪೊರ್ತುದ ದೊಂಬು ಮೀಯೆರೆ
ನಿರೈಲೊದ ತೆಲಿನೀರ್ ಪರೈರೆ
ಪೆತ್ತದಾನುರೆ ಪೇರ್ ಪಿರಯೊಡು ಎಲ್ಯ ಪೊಣ್ಣಡನೆ ||
ಮನ್ನತನ ಸುಕೊ ಗೊಬ್ಬು ಹೋಮೊದ
ಕಮ್ಮೆನೊದ ಪುಗೆ ತಾಗುನಾಯಗ್
ಉರ್ದಿಯಾಪುನೆ ಆಯನಾವುಸೊ ಕೇನ್ ಮಾರಾಜ ||

24

ಕುರೆತ ಕುಂಟುನು ತುತ್ತುನಾಯೆನೆ
ದಿನೊಲ ಕೂಲಿನ್ ದೆಕ್ಕಂದಿತ್ತ್‌ನ
ನರಮನಿಯೆ ದೇವೆರೆನ ಬಗ್ಗಿನ್ ಮಲ್ಪಂದಿತ್ತ್‌ನಯೆ ||
ಪೊರುತು ಮೂಡುನ ಕಂತುನಾಪಗ
ನಿದೆರುನಾಯೆನೆ ಬ್ರಮ್ಮೆ ಆಂಡಲ
ಸಿರಿನ್ ಕಳೆವೊಂದಾಯೆ ನಿತ್ಯೊ ದರಿದ್ರೆ ಕುರುರಾಜ ||

25

ಕುದುರೆಲೆನ ನಿಜೊ ಹೃದಯೊ ಬಡಿತೊನು
ಸೆಡಿಲ್‌ದಬ್ಬರೊ ಪೊಣ್ಣ ಮನಸ್‌ನ್
ಸಿರಿಯೆ ಪುರುಸೆರೆಗೊಲಿಪಿ ಕಾಲೊನು ತೆರಿಯೆರೆರೆಗ್‌ಲ ||
ನರಮನಿಯೆ ಜಾತಿಲೆಗ್ ತೀರುವೊ
ಬೆರಮ ದೇವಗ್ ಸಾನ್ ಆವಂ
ದಯಿನ್ ಪನಿಯೆರೆ ಕೇನ್ ಈ ದ್ರತರಾಸ್ತ್ರ ಮಹರಾಜ ||

26

ಅರಸು ಆಯ್ಕೆಯೆ ಮಂತ್ರಿ ಮಾರ್ಬಲೊ
ದಕ್‌ಲೆಡನೆ ಇಸ್ವಾಸೊಡಿತ್ತ್‌ದ್

ಪ್ರಜೆಕುಲೆನ್ ಬಾಲೆಲೆನ ಲೋಕೊನೇ ಸಾಂಕುನಾಯೆನಲ ||
 ಸುರೆರೆ ಲೋಕೊಡು ಪಡೆವೆ ಮಾನ್ಯತೆ
 ಕುಲೊತ ತರೆಕುಲು ಮಗರ್‌ದಾಂಡಲ
 ಪುದರ್ ಒರಿವಾಯನವೆ ವಂಸೊಡು ಜನೊಕುಲಿತ್ತನೆಟ ||

27

ವಿದ್ಯೆ ಇತ್ತನ ಜನೊನೆ ಮಾನ್ಯನೆ
 ಭಗ್ತಿದಾಯೆನೆ ನಿತ್ಯೊ ಸುಕೊತಯೆ
 ವಿದ್ಯೆನೇ ಇದ್ಯಂದಿ ನರಮನಿ ಪಸುಕುಲೆಗ್ ಸಮೊನೆ ||
 ಸುದೊದಾಯೆನೆ ಅಗ್ನಿ ಕಾಂತಾ
 ಸಮಿತೊಡು ಬರೆಪುನಯೆ ಕವಿ ನಿಜೊ
 ಬ್ರಹ್ಮ ಸೂತ್ರೊನು ಕಲ್ತನಾಯೆನೆ ಬ್ರಾಣೆ ನಿಜವಾದ್ ||

28

ಧರ್ಮನಂದನೆ ಸತ್ಯೊದಾಯೆನೆ
 ನಿತ್ಯೊ ನೆನೆಪೊಡು ಬೀಮ ಸೇನನ್
 ಅರ್ದುನೆನೆ ಸಿರಿ ಕ್ರಿಷ್ಣ ಬಗ್ಗೆನೆ ಮುಕುಲು ಮೂವರೆನ್ ||
 ಗೆಲ್ಪಿಯೆರೆ ಸಾದ್ಯೊಂಡೊ ಪನ್‌ಲಗ್
 ನಿನ್ನ ಬಾಲ್ಗೆ ಚಿತ್ರ ಸೇನಡ
 ಯುದ್ಯೊ ಮಲ್ತದ್ ಸೋಲ್ಪಿನಕಾಲೆಗ್ ಪಗೆನೆ ದಾಯೆಗ್‌ಯ ||

29

ಓಲು ಕ್ರಿಷ್ಣೆನೊ ಅವುಲು ಪಾರ್ತೆನೆ
 ಓಲು ಪಾರ್ತೆನೊ ಅವುಲು ಜಯೊ ಸಿರಿ
 ಏರ್ ಅಕ್‌ಲೆಗ್ ಎದುರು ಉಂತ್ಲೆರ್ ನೇನ್ ತೆರಿಯೊಂದು ||
 ದ್ರೋಪದಿನವೇ ಮದಿಮೆ ದೊಂಪೊಡು
 ಆ ವಿರಾಟನ ಎರ್ದೆ ಪತ್ತದ್
 ಸೋಲ್ಪೆನೇರಡ ಪನ್ದ ಕೌರವೆ ದಾಯೆ ಗೆರೆತೆಜೆನೊ ||

30

ತೆರಿನೆನೊಂತೆನೆ ಪಂಡೆ ನಿಕ್ಕೇ
 ನನಲ ಮನಸ್‌ಗ್ ತತ್ತೊ ತೆರಿಯೆರೆ
 ನೆನೆಪು ಮಲ್ಪುಲ ಸನತ್ ಸುಜಾತೆ ಪನ್ನಿ ಯೋಗಿಲೆನ್ ||
 ಮುಕುತಿಗಾಪುನ ಬ್ರಹ್ಮ ವಿದ್ಯೆನ್
 ತೆರಿಪವೆರ್ ಆರೀಡೆ ಬತ್ತದ್
 ವಿದುರೆ ಪಂಡನ ಕೇನ್ದ ಪ್ರಾರ್ತನೆ ಮಲ್ತೆ ದ್ರತರಾಸ್ತೆ ||

|| ಸನತ್ತುಮಾರೆರೆ ತತ್ತೊಪದೇಸೊ ||

ಕುರುನ ವಂಸೊದ ಅರಸು ಪ್ರಾರ್ತನೆ
 ಗೊಲಿದ್ ಬತ್ತೆರ್ ಸನತ್ತುಜಾತೆರ್

ಪನ್‌ಪಿ ಸಂಗತಿ ತೆರಿದ್ ಕಾರ್‌ಗ್ ಬೂರೈ ದ್ರತರಾಸ್ತೆ ||
 ಕುಟುಮೊ ಸಂಸಾರೊದವೆ ಚಿಂತೆಡ್
 ನಿದಾರೆ ಬೂರುಜಿ ಎಂಕ್ ಸ್ವಾಮಿಯೆ
 ಮನಸ್ ಸಿತಿಮಿತಿಡಿಡಿ ಪಂಡ್‌ದ್ ಬಾರಿ ಬುಲ್ಪುನಗ ||

1

ಬುಲ್ಪುಡಯ ದ್ರತರಾಸ್ತೆ ನಿಕ್ಕೇ
 ತತ್ತೊ ಬುಡ್ಡದ್ ಪನ್ನೆ ಲೋಕೊಡು
 ಇತ್ತಿ ಸಚರಾಚರೊಲೆ ಪೈಕಿಡ್ ಮೇಲ್ ಕೀಲ್‌ಂದ್ ||
 ಎತ್ತೈಸೊನು ತೂವೊಂದು ಕೊರಗುನ
 ಬೊಡ್ಡಿ ಮಾತಲ ಒಂಜೆ ಯೇಗಿತೊ
 ಡಿತ್ತನವು ಎಂಚಂದ್ ತೆರಿಪವೆ ಕೇನ್ ಕೆಬಿಕೊರುದು ||

2

ಆತ್ಮೊದಾ ಸಂಕಲ್ಪೊಡಾಯೆನೆ
 ಬಾನೊ ಬಾನೊಡುದಾಂಡ್ ಗಾಳಿಯೆ
 ಗಾಳಿಡ್‌ದ್ ಆಂಡಗ್ನಿ ಅಗ್ನಿಡ್‌ದಾಂಡ್ ಈ ಬುವನೊ ||
 ಬೂಮಿ ಆಯಿನೆ ಬುವನೊಡ್ಪಾಲ್
 ಬಾರಿ ಸತ್ತೊದ ಮರ್‌ದ್ ಬೂಮಿಡ್
 ಆಯಿನೆಟ್ ಜೋಡ್ಯಾಂಡ್ ಪ್ರಕೃತಿ ಪುರುಷ ಸಂಸರ್ಗೊ ||

3

ನಾನ ನಮುನೆದ ಜೀವೊರಾಸಿಲು
 ಕೋಟಿ ಸಂಕೆಡ್ ಪುಟ್ಟೊ ಸೈರೊದ
 ಕಾರ್ ಕೈಕುಲು ಕಣ್ಣ್ ಕೆಬಿಕುಲು ಮೂಂಕು ನಾಲಯಿಲ್
 ಸೂತ್ರೊಡೊಂಚೇ ನಮುನೆಡುಪ್ಪುನ
 ರೀತಿದಂಚಿನೆ ಮೇಲ್‌ಕೀಲ್‌ದ
 ಬಾವನೆನೆ ಇದ್ಯಂದೆ ಬದುಕುನ ತೂದು ತೆರಿಯೊನುಲ ||

4

ಪುಟ್ಟುದಿತ್ತನ ಕೋಟಿ ಜೀವಿಲು
 ಸೈಪೊ ನಾಸೊದ ಕಾಲೊ ಬನ್ನಗ
 ಸತ್ಯೊ ಮಾತ್ತೊನೆ ಒರಿಪುನವ್ವೇ ತೆರಿಲ ಪರಮಾತ್ಮೆ ||
 ಏತ್ ಮಲ್ಲೆನೊ ಏತ್ ಎಲೈನೊ
 ಏತ್ ಉದೊನೊ ಏತ್ ತೋರೊನೊ
 ಏರೆಗಲ ತೆರಿಯಂದ್ ದೇವೆರೆ ಸಗ್ತಿ ಎಂಚಂದ್ ||

5

ಕರ್ಮ ಜ್ಞಾನೊದ ಇಂದ್ರಿಯೋಲೆನ್
 ಬುಕ್ಕೊ ಮನಸ್‌ನ್ ಗಟ್ಟಿ ಮಲ್ತದ್
 ಪುಟ್ಟ ಸೈರೊಡು ಆವಂದಿತ್ತನ ಕೆಲಸೊ ಮಲ್ಪಂದೆ ||
 ಇತ್ತನಾಯಗ್ ಮಿತ್ತಸ್ತಾನೊನೆ

ತಿಕ್ಕುನೆಕ್ ಅಡ್ಡಿಡಿ ಹಾಲ್ನ್
ಮಲ್ತನಾಯೆನೆ ಬೂರ್ದೆ ನರಕೊದ ಗುಂಡಿಗೀ ತೆರಿಲ ||

6

ಪುಟ್ತ್ ಸೈತ್ತ್ದ್ ಸೈತ್ತ್ ಪುಟ್ಟುದು
ಜಲ್ಲೊ ಜಲ್ಲೊಡು ತಿರ್ಗ್ ತಿರ್ಗ್ದ್
ಕಟ್ಟ ಕಡೆಕೇ ಪುಟ್ಟೆ ನರಮನಿಯಾದ್ ತೆರಿಯೊನುಲ ||
ಎಡ್ಡೆ ಕಾರ್ಯೊನು ಮಲ್ತದಾಯೆನೆ
ಸೈತ್ತ್ಡಲ ಪಿರ ಪುಟ್ಟಿರಿದ್ಡಿಯ
ಅವ್ವೆ ಮೋಕ್ಷೊದ ಸ್ತಾನೊ ಸಾಸಿತೊ ತಿಕ್ಕು ಆಯ್ಗಾಯ ||

7

ಕತ್ತಲೆನೆ ಆನಗನೆ ಪಕ್ಕಿಲು
ಮಲ್ಲ ಮರ ಸೇರೊಂದು ಕುಲ್ಲೊಡ
ಇರ್ಲ್ ಬೊಲ್ವಾನಗನೆ ರಾವೊಂದವ್ವೆ ಪೋಪಿಲೆಕೊ ||
ಪುಟ್ತ್ನಾಕ್ಲ್ ಬೂಮಿದಾ ರುಣೊ
ಕರ್ಮೊ ಬಂದನೊ ಮುಗಿನ ಸಾತ್ಗ್
ಮುಲ್ತು ಪೋಪೆರ್ ಆಕ್ಲಾಕ್ಲೆ ಸ್ತಾನೊ ನಾಡೊಂದು ||

8

ರಾಚ್ಯೊಡೇ ಅನ್ಯಾಯೊ ನಡತ್ನೆ
ಆಂಡಲರಸುನ ತಪ್ಪು ಸಿಸ್ಯನ
ದೋಸೊ ಗುರುಕೇ ಬರ್ಪುನೆಂದ್ ತೆರಿಲ ದ್ರತರಾಸ್ತ್ರ ||
ಬುಡೆದಿ ಮಲ್ತುನ ತಪ್ಪು ಕಂಡನಿ
ಸಲಿಗೆ ಕೊನೆಟ್ ಆಪುನೆಂದ್
ತೆರಿಯೊನಂದನೆ ಲೋಕೊದಾಕ್ಲ್ ಸೋಲ್ತುದುಲ್ಲೆರಾಯ ||

9

ಜ್ಞಾನಿಲೆನ್ ಒಪ್ಪವೊಲಿ ಪಂಡ್
ಜ್ಞಾನಿಲೆನ್ ಒಪ್ಪಯೆರೆ ಸಾದ್ಯೊನೊ
ದಾಲ ತೆರಿಯಂದಿತ್ತಿ ನರಮನಿ ತಾನೆ ತೆರಿನಯೆನೆ ||
ಹೀನೊ ಬುದ್ಧಿಡ್ ಪಂಡೆಡಾಯನ್
ಎರೆಗ್ಲ ತಿದ್ದಿಯೆರೆ ಕಸ್ಸೊನೆ
ಜ್ಞಾನೊನೇ ಸರ್ವತ್ರ ಸಾದನೊ ಮೋಕ್ಷೊನೇರಿಯೆರೆ ||

10

ಏತೊ ಪ್ರಾಣಿಲು ಪುಟ್ಟುನೊಂಜೇ
ಬೂಮಿದಾ ಪಿಂಡೊಡುದು ಒಂಜೇ
ದೀಪೊಡುದು ಬೆಳಗವೊಲಿ ಏತ್ಲ ದೀಪೊಲೆನ್ ಕೇನ್ ||
ಆ ಪರಾಪರ ವಸ್ತೊಂಜೆಟ್
ಆಯಿನೆನೆ ಬ್ರಹ್ಮಾಂಡೊ ಕೋಟಿಲು
ಬೇತೆ ಒಯ್ಲಲ ಅತ್ತ್ ಸರ್ವೊಲ ವಿಷ್ಣುಮಯೊನೆತ್ತೊ ||

11

ಪಗೇನ್ ಸ್ನೇಹೊನು ಜ್ಞಾನೊ ವಿಜ್ಞಾ-
ನೊಲೆನ ಬೇದೊನು ಎಡ್ಡೆ ಹಾಲ್ದ
ವಿಸಯೊ ನೆನೆಪುನ ಬುಡುದು ಮನಸ್ದ ಗಟ್ಟಿ ನಿಸ್ವಯೊಡು ||
ದಾನೊದರ್ಪೊ ಪರೋಪಕಾರೊನು
ತಾನ್ ಮಲ್ತದ್ ಕರ್ಮೊ ಕಿಯೆಡ್
ಏರ್ ಉಲ್ಲೆರ್ ಅಕ್ಲೆ ಮಾನಿತೆರರಸು ಕೇನ್ಲಯ ||

12

ಮೂಜಿ ಕರಣೊಡು ಮೂಜಿ ಗುಣೊಟುಲ
ಮೂಜಿ ಕಾಲೊಡು ಮೂಜಿ ಲೋಕೊಡು
ಮೂಜಿತಾಪತ್ರಲೆನ ಲಚ್ಚಣೊ ಬೇದೊ ತೆರಿಯೊಂದು ||
ಮೂಜಿ ಮೂರ್ತಿಲೆ ಯೇಗಿತೊನು ಸರಿ-
ಯಾದ್ ಅರ್ತೊನೆ ಮಲ್ತನಾಯ್ಗ್
ಏರ್ಲಾ ಎದುರತ್ತ್ ಕುರು ಬೂಪಾಲ ತೆರಿಯೊನುಲ ||

13

ನಾಲ್ ವೇದೊಲೆ ನಾಲ್‌ಲಾಸ್ತಮೊ
ನಾಲ್ ವರ್ಣೊಲೆ ಬೇದೊ ನಾಲೆನ್
ಮೀರ್ನಾಯೆನೆ ನಾಲ್ ಕುಸೆಲ್ನ್ ಪೂರ ತೆರಿಯೊಂದು ||
ನಾಲ್ ಪುರುಸಾರ್ತೊಲೆನ್ ಮಲ್ತುನ
ಸಾದನೆದ ನರಮನಿಯೆ ಮೋಕ್ಷೊನು
ಏರುನಯೆ ನಿಜೊ ಕೇನ್ಲಯ ದ್ರತರಾಸ್ತ್ರ ಕೆಬಿಕೊರುದು ||

14

ಐನ್ ಬೂತೊಡ್ಡಾಯಿ ದೇಹೊಡು
ಐನ್ ಇಂದ್ರಿಯೊಲೈನ್ ಗೇನೊಲು
ಐನ್ ಒಟ್ಟುಗು ಒಂಜಿ ಮನಸ್ಲ ಸೇರ್ದ್‌ಪದ್‌ನಾಜಿ ||
ಐನ್ ತತ್ತೊಲೆನರ್ತೊ ಮಲ್ತದ್
ಐನ್ ಮೋನೆದ ಸಿವನ್ ನಂಬೈಡ
ಐನ್ ಸತ್ತೊಡೆ ಆವೆ ಪುರುಸೋತ್ತಮೆನೆ ನಿಜವಾದ್ ||

15

ಆಜಿ ರುತು ಬೇದೊಲೆನ್ ತೆರಿದೇ
ಜೀವನೊಡು ಆರೋಗ್ಯೊಡ್ಡಿತ್ತ್ದ್
ಆಜಿ ಸಾಸ್ತ್ರೊಲೆ ತತ್ತೊನೋದು ಪೂರ ತೆರಿಯೊಂದು ||
ತೋಜುನವೆ ಈ ಮಾಯೊ ಲೋಕೊಗು
ಮೀರ್‌ದಿತ್ತ್ನ ಪದವಿನೇರುನ
ಜೀವನೊದ ನಿಜೊ ಧರ್ಮೊ ಪನ್ನನ ಪೂರ ತೆರಿಯೊನೊಡು ||

16

ಕಡಲ್ ಮಾತ್ಯಕೆ ವಾರೊ ಕುಲಗಿರಿ
ಸರಿವಿಬಗ್ಗಿ ದ್ವೀಪೊ ಮರಿಕುಲು

ತಪಸ್ ಮಲ್ವುನ ರುಸಿಕುಲೇಳೇ ಏಳ್ ತೆರಿಯೊಂದು ||
ನಡಪುನಾಯೆನೆ ಜೀವನೊಡು ನಿಜೊ
ತೆರಿನ ನರಮನಿ ಪಡೆವೆ ಮೋಕ್ಷೊದ
ಪದವಿನೇ ದ್ರತರಾಸ್ತ್ರ ಕೇನ್‌ಲ ಯಾನ್ ಪನ್ನುನೆನ್ ||

17

ಎನ್ನೊ ದಿಕ್ಕದ ಪಾಲಕೇರೆನ
ಕರ್ಮಲೆನ್ ತೆರಿಯೊಂದು ಯೋಗೊದ
ಸಿದ್ಧಿಲೆನ್ನೆನ್ ಅರ್ತೊಮಲ್ತದ್ ಕರ್ಮೊ ಜ್ಞಾನೊಲೆನ ||
ಎನ್ನೊ ಇಂದ್ರಿಯೊ ಸಿತಿನ್ ತೆರಿದೇ
ಮಿಕ್ಕಿನೆಂಚಿನ ತನ್‌ಕ್ ಪಂಡ್‌ದ್
ನಿಸ್ವಯೊನು ಮಲ್ವುನವೆ ನರಮನಿಗಾಪಿ ನೀತಿಲಯ ||

18

ಸಿಸ್ತಿ ಕಾರ್ಯೊನು ಒಂಬೊ ಬ್ರಹ್ಮೆರ್
ಸರಿಡೊರಿಯೊರಿ ಮಲ್ವುನಾಕ್‌ಲ್
ಬಗ್ತಿ ಒಂಬೊನೆ ರಸೊಕುಲೊಂಬೊನೆ ಗ್ರಹೊಕುಲೊಂಬೊತ್ತೊ ||
ನಿತ್ಯೊ ಸಾಸಿತೊ ಒವ್ವು ಪಂಡ್‌ದ್
ಅರ್ಮೊ ಮಲ್ತದ್ ಬದುಕುನಾಯೆನೆ
ಸತ್ಯೊವಂತೆನೆ ಕೇನ್ ಕುರುಕುಲೊದರಸು ದ್ರತರಾಸ್ತ್ರ ||

19

ಲೋಕೊಡೇ ಸರಿ ಪತ್ತ್ ನಮುನೆಡ್
ಜೀವರಾಸಿಲು ಸಿಸ್ತಿಯಾಯ್ನಿನ್
ಆದಿ ನಾರಾಯಿಣೆನೆ ರಕ್ಷಣೆ ಮಲ್ತಿಯೆರೆಗಾದ್ ||
ಮಾತ ಜಾತಿಲೆಡೆಲೈ ಮಲ್ಲೆನ್
ತೂವೊನಂದೆನೆ ಮಾತೆತಾತ್ಮೊಡು
ಸೇರ್‌ದುಲ್ಲೆನೆ ಪನ್ದ ತೆರಿಯೊಂದೀಯೆ ಬದ್ಕೊನುಲ ||

20

ಸ್ವಾಮಿ ಈರೇ ಎನ್ನ ಮನಸ್‌ದ
ಮಾತ ಬೆರಮೆನ್ ಬುಡ್ಡದಿತ್ತೆನೆ
ಮೋಕ್ಷೊಗೇರುನ ಸಾದಿ ತೋಜದ್ ಆತ್ಮೊ ಪರಿಸುದ್ಲೊ ||
ಪೂರ ಮಲ್ತದ್ ಎನನ್ ಈ ಸಂ-
ಸಾರೊದಾ ಸುಳಿ ಗುಂಡಿಡ್‌ದ್ ಸರಿ
ದೇರ್ತ್ ಲಕ್ಕಯರತ್ತೊ ಈರೆಡ ಕೇನ್ನೆ ನನ ಒಂಜಿ ||

21

ಸೊರೊ ಎಂಚಿನ ನರಕೊ ಎಂಚಿನ
ಪನ್ದ ತೆರಿಪವೊಡುಂದು ಕೇನ್ನೆಗ
ಪನ್ನೆರಾ ಮುನಿ ಸೊಗೊ ನರಕೊದ ಸಿತಿನ್ ಇವರಾದ್ ||
ಎಡ್ಡೆ ಕಾರ್ಯೊನು ಮಲ್ತೊನುಂದೇ
ದೈವೊ ದೇವೆರೆ ಬಗ್ತಿಡ್‌ದ್
ಪುಣ್ಯವಂತೆನೆ ಪನ್ನುನವ್ವೇ ಸೊಗೊ ನರಮನಿಗ್ ||

22

ಪಾಪಿ ಪಾತಕಿ ಮಲ್ಲಗಾತಕೆ
ಮಾನ್ಯೊ ಕೆರ್ಮಯೆ ದುಸ್ಪೆ ದೂಸಕೆ
ಏರೆಗಲ ಆವಂದ್‌ನಾಯೆನೆ ನೀತಿ ಬುಡ್ಡಯೆನೆ ||
ಜಾತಿ ಧರ್ಮೊನು ಮೀರ್‌ದ್ ದೈವೊಲೆ
ದ್ರೋಹಿ ಯಾದಿತ್ತ್‌ನಯ ಜೀವನೊ
ಬಾರಿ ನರಕೊನೆ ಅರಸು ಕೇನ್‌ಲ ಯಾನ್ ಪನ್ನುನೆನ್ ||

23

ಜಲ್ಲೊಲೆಡ್ ನರಮನಿನ ಜಲ್ಲೊನೆ
ಮಲ್ಲೆ ಅವ್ವೇ ದೇಹೊ ಧರ್ಮೊನು
ಎಡ್ಡೆಡೇ ನಡಪವುನ ಸಾದನೆ ಮಲ್ಲ ಪುರುಸಾರ್ತೊ ||
ಧರ್ಮೊ ಸಾದನೆ ಮಲ್ತಿಯೆರೆನೆ
ಜಲ್ಲೊ ಪಡೆಯಿನ ದೇಹೊ ಪಂಡ್‌ದ್
ನಿತ್ಯೊ ಸೈರೊದ ಸಿತಿನ್ ಕಾಪೊಡು ಸುದ್ಲೊದಬ್ಬೆಸೊಡು ||

24

ಮೂರ್ಕೆ ಆಂಡಲ ತನ್ನ ಇಲ್ಲಲ್
ಪೂಜ್ಯೆ ರಾಜ್ಯೊಡು ರಾಜೆ ಗ್ರಾಮೊಡು
ಗ್ರಾಮೊದಾ ಗುರಿಕಾರೆ ಆಂಡಲ ಲೋಕೊ ಲೋಕೊಲೆಡ್ ||
ಸಾಸ್ತೊ ನೀತಿನ್ ಕಲ್ತನಾಯೆನೆ
ಮಾತೆರೆಗ್ ಸರಿ ಪನ್ನುನಯೆ ನಿಜೊ
ವಾದ್ ಪೂಜ್ಯೆನೆ ಐಕ್ಯೆ ಪನ್ನುನೆ ವಿದ್ಯೆ ಮೇಲ್‌ಂದ್ ||

25

ಬ್ರಾಣೆರೆನ ಚಿತ್ರಿಯೆರೆ ಕರ್ಮೊನು
ಪೂರ ತೆರಿಪದ್ ವೈಸ್ಯ ಸೂದ್ರೆರೆ
ಆಚರೊಲೆ ಇವರಾದ್ ಪಂಡೆರ್ ಸನತ್ತು ನಂದನೆರ್ ||
ಬೂಮಿಯಾಯಿನೆ ಎಂಚ ಪಂಡ್‌ದ್
ಏರ್ ರಕ್ಷಣೆ ಮಲ್ತೆರ್‌ಂದ್‌ದ್
ಪೂರ ದ್ರತರಾಸ್ತ್ರಗಲ ತೆರಿಪದ್ ಪಂಡೆರಾಪಗನೆ ||

26

ದನುಜ ಕುಲೊ ಸಂವಾರೊ ಮಲ್ತದ್
ನರಮನಿಗ್ ಸುಕೊ ಕೊರೈರಾದೇ
ಹರಿಯೆ ಪುಟ್ಟೊನೆ ಕ್ರಿಷ್ಣನಬತಾರಾದ್ ತೆರಿಯೊನುಲ ||
ಮುರಹರೆನೆ ನರಮನಿಯೊ ಪನ್‌ಲಗೆ
ಪರಮ ಪುರುಸೆನೆ ಬಗ್ತಿ ಬಾಂದವೆ
ಪನುಪುನೆಕ್ ಅಲ್ಮಾನೊ ಉಂಡೊಯ ಅರಸು ಪನ್‌ಲೆನಡ ||

27

ಪಾಂಡವೆರೆ ರಕ್ಷಣೆಗ್ ಬೋಡದ್
ಪಾರ್ತ ಸಾರತಿಯಾದ್ ಗೆಲ್ವವೆ

ಈತೆನ್‌ಲ ತೆರಿಯಂದೆ ಲಡಯಿಗ್ ನಿನ್ನ ಬಾಲೆಗುಳು ||
ದಾಯೆ ಉಂತ್ವೆರ್ ಜಯೊನೆ ತಿಕ್ಕುವೊ
ವಾಸುದೇವನ ಕಾರ್ ಪತ್ತ್‌ದ್
ಜೂವೊನೊರಿತೊನಡಕ್‌ಲ್ ಇದ್ದಿಡ ಮಣ್ಣೆ ಮುಕ್ಕುವೆರ್ ||

28

ಕಡಲ್‌ಲೆಡ್ ಪೇರ್ಕ್ಕಡಲ್ ಸೀರ್ತೊಡು
ಪರಮ ಪುಣ್ಯೊದ ಗಂಗೆ ಬಗ್ಗಿಡ್
ಹನುಮೆ ರುಸಿಕುಲೆ ಪೈಕಿಡೇ ನಿಜೊ ಬಾದರಾಯಣೆರ್ ||
ಅರಸುನಕ್‌ಲೆಡ್ ಧರ್ಮಾಯೆನೆ

ಹರಿಯೆ ದೈವೊಲೆ ಪೈಕಿ ಮೇಲ್‌ದ
ಪರಮ ಪಾವನ ಮೂರ್ತಿ ತೆರಿಯೊನುಲರಸು ದ್ರತರಾಸ್ತ್ರ ||

29

ಕುರುಡ ದ್ರತರಾಸ್ತ್ರಗ್‌ಲ ಮುನಿಕುಲೆ
ಅರಸು ತತ್ತೊ ವಿಚಾರೊ ತೆರಿಪದ್
ಹೃದಯೊ ಸುದೊನು ಮಲ್ತದಾನಗ ಸರಿಟ್ ಬೊಲ್ವಾಂಡ್ ||
ಮುನಿಯೆ ತನ್ನಾಸ್ತಮೊಗು ಪೋಯೆರ್
ಕುರುನ ಕುಟುಮೊದ ಅರಸು ನಾರಾ-
ಯಿಣನ್ ನೆನೆತೊಂದಿತ್ತೆ ಮನಸ್‌ದ ಸುದೊ ಬಾವನೆಡ್ ||

ರಡ್ಡನೆ ಸಂದಿ

|| ಧರ್ಮಜಿನೆ ಸಿರಿಕ್ರಿಷ್ಣಡ ಪಾತೆರುವೆ ||

ಧರ್ಮನಂದನೆ ಮೆಗ್ಗಿನಕ್‌ಲೆನ್
ಕೈತ್ತಲ್‌ಡ್ ಕುಲ್ಲಾದ್ ಕ್ರಿಷ್ಣಗ್
ಅಡ್ಲೊ ಬೂರುದು ಪನ್ನೆ ತನ್ನವೆ ಮನಸ್‌ಡಿತ್ತನೆನ್ ||
ಬೂಮಿ ಬದ್‌ಕ್‌ಗ್ ಬೋಡದೆಂಕುಲು
ಕೌರವೇರೆಡ ದಾಯೆ ಪುಣೆಪುನೆ
ಸಾಸಿತೊನೊ ಈ ಬದ್‌ಕ್ ಎಲ್ಲೆನೆ ನಾಸೊವಾಪುನವು ||

1

ಮೆಗಿಪಲಯನಕ್‌ಲೆನವೆ ಜೋಕುಲು
ಬದ್‌ಕ್‌ಗಾದೇ ಲಡಯಿ ಮಲ್ಪುನ
ಸರಿಯೊ ಸ್ವಾಮಿಯೆ ಪನ್‌ಲ ಎಂಕುಲು ಬಡವೆರಾವೊಂದು ||
ನನಲ ಇಪ್ಪುವೊ ಕಾಡ್ ಸೇರ್‌ದ್
ಸುಕೊಟು ಉಪ್ಪಡ್ ಕೌರವೇಸ್ವರೆ
ಲಡಯಿ ತಪ್ಪಲ ಕ್ರಿಷ್ಣ ಪಂಡ್‌ದ್ ಕಾರ್ ಪತ್ತಿಯೆನೆ ||

2

ಕಾಳಗೊಗು ತಯರಾದ್ ಎನ್ನವೆ
ಸಾಯೊ ಕೇನೈರೆ ನಿನ್ನ ಮೆಗ್ಗಿನ
ಈಯೆ ಕಡಪುಡುದೀಡೆ ತರ್ಪಯನಿತ್ತೆ ಪನ್ನುನೆನ್ ||
ಕೆಂಡ್‌ದೆಂಕೇ ಆಚಿರಾಂಡ್‌ಯ
ರಾಜಿಯೊ ಕಾಳಗೊನೊ ಕಂಡಿತೊ
ಈಯೆ ಪನ್‌ಲಯ ಧರ್ಮನಂದನ ಪನ್ದ ಕೇನ್ನಗನೆ ||

3

ಲಡಯಿಗೆನ್ನವೆ ಮನಸ್ ಒಪ್ಪುಜಿ
ಹಿತೊಟು ಕೊರ್ಪೆಡ ಕೊರಡ್ ಎಂಕ್‌ಲೆ-

ಗಯಿನ್ ಗೆರಮೊನು ಇದ್ದಿ ಪಂಡೆಡ ಕಾಡ್ ಬದ್‌ಕೊನುವೊ ||
ವಾರಣಾವತಿನಾ ಕುಸಸ್ತಲೊ
ಆಪೆಕ್‌ದ ವ್ಯಕ್‌ಸ್ತಲೊನು ಎಂಕ್‌ಲೆ
ರಾಜದಾನಿನ್ ಇಂದ್ರಪ್ರಸ್ತೊನವಂತಿ ನಗರೊನುಲ ||

4

ಕೇಂಡ್‌ದೀಯೇ ರಾಜಿ ಮಲ್ತದ್
ಕಾಳಗೊಡು ಆಪುನವೆ ಕಸ್ತೊನು
ಈಯೆ ತಪ್ಪದ್ ಎಂಕ್ಲೆ ವಂಸೊನು ಒರಿಪು ಮಹಮಹಿಮ ||
ಈತ್ ಪನ್ನಗ ಮುಗುರು ತೆಲಿಕೆಡ್
ಲಾಯ ಮೋನೆನ್ ತೂದು ಪನ್ನೆನೆ
ಆ ದಯಾನಿದಿ ದುಸ್ತನಾಸೊಗುಲಾದೆ ಪುಟ್ವನಯೆ ||

5

ದಾನೆ ಪನ್ನಯ ಧರ್ಮನಂದನ
ಜಾತಿಡೀಯೇ ಚತ್ತಿಯತ್ತೊಯ
ರಾಜಿಯಾವೆರೊ ಏರ್ಲ ಅನ್ಯಯೊ ಮಲ್ತನಾಕ್‌ಲೆಡ ||
ಇಸೊನು ಕೊರ್ವಯೆ ಇಲ್ಲ ಪೊತ್ತಯೆ
ಪಗಡೆ ಗೊಬ್ಬದ್ ರಾಜ್ಯೊನೊಯ್ವಯೆ
ಬುಡೆದಿ ಸೀರೆನ್ ನಿಕ್‌ಲೆ ಎದುರುಡೆ ಬಿಚ್ಚಯೆರೆ ತೂಯೆ ||

6

ಸೆರ್‌ದಂಚಿನೆ ಅವದಿ ಮುಗಿನಗ
ಕೊರ್ವನವೆ ಧರ್ಮತ್ತೊ ಆಂಡಲ
ಕೊರ್ವೊನೊಯ ರಾಜ್ಯೊನುಲ ನಿಕ್‌ಲೆಗ್ ದೂಜಿ ಊರ್ನಾತ್ ||
ರಾಜ್ಯೊನೇ ಕೊರಯೆಂದ್ ಆಯೆನೆ
ಕಾಸ್ತಪೇರೆಡ ಪಂಡಿ ಪಾತೆರೊ
ನೀಯೆ ಮರತ್‌ದ್ ರಾಜಿ ಮಲ್ತೆರೆಪನ್ನ ಎನ್ನಡನೆ ||

7

ಹಸ್ತಿನಾವತಿಗಿತ್ತೆ ಉಲ್ಲೆರ್
ಹಕ್ದಾಕ್‌ಲ್ ನಿನ್ನವೇ ಬೆರಿ
ಪುಟ್ನಾಕ್‌ಲ್ ಕೇನ್ವೆನಕ್‌ಲೆಡ ರಾಜಿಗೊಪ್ಪುವೆರೊ ||
ಪನ್ದ ಬೀಮನ ಮೋನೆ ತೂನಗ
ಪನ್ನೆ ಕ್ರಿಷ್ಟಡ ನಿನ್ನ ಮನಸ್‌ಗ್
ಒಪ್ಪಿಗೇನ ಆದಾಂಡ ಅಣ್ಣಗ್ ನೀತಿಯಂದ್‌ಡನೆ ||

8

ದುಸ್ಪ ಕೌರವೆ ರಾಜ್ಯೊ ಕೊರ್ಪೆಡ
ಎನ್ನ ಅಡ್ಡಿಯೆ ಇದ್ದಿ ಪನ್ನಗ
ನಿನ್ನ ಪಾತೆರೊದರ್ತೊ ಆಯಿಜಿ ಪನ್ದಲರ್ಪುನಡ |
ಪಾರ್ತ ನಿನ್ನಬಿಪ್ರಾಯೊ ತೆರಿಪಲ
ರಾಜಿಯೋ ಕಾಳಗೊನೊ ಪನ್ನಗ
ಯಾನ್ ಮೀರಯೆ ಅಣ್ಣನಕ್‌ಲೆನ ಸಾದಿ ಸಿರಿಕ್ರಿಷ್ಟ ||

9

ನಕುಲ ಸಹದೇವೆರೆಡ ಕೇನ್ನಗ
ಅಕ್‌ಲ್ ಪಂಡೆರ್ ರಾಜಿಯಾಪುನ
ಇಸಯೊ ಕನತವೆ ಗಂಟ್ ಪನ್ನಗ ಕ್ರಿಷ್ಟಗರ್ತಾಂಡ ||
ಮೆಗಿದಿಯಾಯಿನ ದ್ರುಪದರಾಯನ
ಮಗಲ್ ಏತ್‌ಲ ಕಸ್ತೊ ಪಡೆತಲ್
'ಕುಜಲ್ ಕಟ್ಟಂದಿತ್ತೆ ಉಲ್ಲಲ್ ಆಜೊ ಪಾಡೊಂದು ||

10

ಉಲಯಿಡಿತ್ತಾನ ಮೆಗಿದಿ ದ್ರೌಪದಿ
ಇಡೆಗ್ ಬರೊಡುಂದಪಗ ಲೆಪುಡಯೆ
ಪಿದಯಿ ಬನ್ನಗ ಬೀಮನೆದುರುಗು ತಿಕ್ಕನಾಪಗನೆ ||
ಹರಿಯೆ ದಾಯೆಗ್ ಲೆಪುಡಯಿನೆ ಪನಿ
ಕುಜಲ್ ಕಟ್ಟವುನಟ್ಟಣೆನೊ ಎನ
ಪಲಯೆನೆನ್ನವೆ ಮಾನೊನೊರಿಪೆನೊ ಪನ್‌ಲೆ ಈರೆನಡ ||

11

ಕೇನ್ ದ್ರೌಪದಿ ಅಣ್ಣೆ ಕ್ರಿಷ್ಟನ್
ರಾಜಿ ಮಲ್ಪಯೆರಾದ್ ಕೌರವ-
ನಾಡೆ ಇನಿ ಪೋಯೆರೆಗ್ ಪಂಡೆನೆ ಅಪಗ ಸಿರಿಕ್ರಿಷ್ಟೆ ||
ಮಾತೆರೆಡ ಕೇನ್ನಗನೆ ಎಂಕುಲು
ಆವು ಪಂಡ್‌ದ್ ಒಪ್ಪೊ ನಿನ್ನಡ
ಕೇನಿಯೆರೆ ಒರಿದುಂಡು ಪಂಡ್‌ದ್ ನಿನನ್ ಲೆಪುಡಯಿನೆ ||

12

ಈರ್‌ಲಾ ಒಪ್ಪೆರೊಯ ಕೌರವ
ಗೇನ್ ಒರಿಯೆ ವೋಯಿರಿಯೋ ಪನಿ

ಮಾನೊ ಕಾತ್‌ಜರತ್ತೊ ಐವೆರ್ ಎನ್ನ ಕಂಡನಿಲು ||
ಆನಿ ದುಸ್ವಾಸನೆನೆ ಸೀರೆನ್
ರಾಜ ಸಬೆಟೇ ಒಯ್ಪುನಾಪಗ
ಏರ್ ಕಾತ್‌ನೆ ಎನ್ನ ಮರ್ಯದಿ ಪೋಪಿ ಕಾಲೊಡುಲ ||

13

ದುಸ್ಪ ಕೌರವ ತುಡೆನ್ ಪೊಲ್ತುದು
ಕೆರೆ ದುಸ್ವಾಸನನ ಕರ್ಲನ್
ಒಯ್‌ದೇ ನಿನ ಕುಜಲ್ ಕಟ್ಟವೆ ಪಂಡ್‌ನಾರಿತ್ತೆ ||
ಕ್ರಿಷ್ಟೆ ರಾಜಿನ್ ಮಲ್ಪುವೆಂದ್‌ದ್
ಪನ್ನರತ್ತೊಯೆ ಎನಡ ಈರೆನ
ಬುದ್ಧಿಗಂಚಿನ ಮರ್ಲ್ ತಾಗ್‌ನೆ ಪನ್ನೆ ಇತ್ತೆನಡ ||

14

ಬಾಸೆ ಪಾಡ್‌ನೆ ಅಂದ್ ದ್ರೌಪದಿ
ಆಂಡ ಎನ್ನವೆ ಕಸ್ತೊ ನೆನೆಪುನ
ಗಾಂಡ್ ಬಾಸೆನ್ ತಿರ್ರಯೆರೆಗಿನಿ ದಾಲ ತೀರಂದ್ ||
ಕಾಡ್ ತಿರ್ಗ್‌ದ್ ಬರೆಲ್ ಬರೆಲ್‌ದ್
ರಾಕ್ಷಸೇರೆಡ ಲಡಯಿ ಮಲ್ತ್‌ದ್
ಕಾರ್ ಕೈಕುಲೆ ಬಲೊನೆ ಕುಂದೆಲ್ ಆಂಡ್ ಇತ್ತೆನ್ನ ||

15

ಗದೆನ್ ದೆರ್ಪೆರೆ ತೀರುಜತ್ತೊಯ
ಪಗತಕ್‌ಲೆಡೇನೆಂಚ ಕಾದುವೆ
ಬುಡದಿ ಮೋನೆನ್ ತೂದು ಪಂಡೆನೆ ಬೀಮೆನಾಪಗನೆ ||
ಎನಡ ಏರೆಗ್ ಪ್ರೀತಿ ಉಂಡುಯೆ
ಇರೆಗ್ ಮಾತ್ತೊನೆ ಅತ್ತೊ ಐವೆರ್
ಕಯಿನ್ ಪತ್ತಾನ ಕಂಡನೀಯೆರೆ ಪೈಕಿಡೀರೊರಿಯೆ ||

16

ದುಸ್ಪ ಕೀಚಕೆ ಒಯ್ಪುನಾಪಗ
ಕೆರ್‌ಲಾಯನ ಪುಣನ್ ಪಾಡ್ಯರ್
ಮಲ್ಲ ಸೈಂದವೆ ಕೊನೊದು ಪೋನಗ ಈರ್ ಬುಡ್ಡಯರ್
ಪನ್ನಗನೆ ಆ ಬೀಮೆನಾಲೆಡ
ಪನ್ನೆ ಬಾಕಿದ ನಾಲ್ವೆರುಲ್ಲೆರ್
ಪನ್ನ ಅಕ್‌ಲೆಡ ಎಂಕ್ ಕಂಡಿತೊ ದಾಲ ತೀರಂದ್ ||

17

ಆಣ್ಣೆದಯೆ ಬೀಮೆಂದ್ ಪುದರ್‌ಗ್
ಸೂವೆ ಬೂರಡ್ ಕೌರವೇಸ್ವರೆ
ಸೀರೆನೊಯ್ಪುನಗಪಗ ತೂಯರ್ ಕಣ್ಣೆ ಬುಲವೊಂದು ||
ದಾಯೆಗ್‌ಯೆ ಈ ಮೀಸೆ ಈರೆಗ್

ಗೀಸಲೆಯೆ ಯಾನೊರ್ತಿ ಕಾದ್ದೆ
ಬಾಸೆ ತೀರವೆ ಕುಜಲ್ ಕಟ್ಪೆದ್ ಕರ್ಲೆ ಮುಡಿತೊನುವೆ ||

18

ಎನ್ನ ಬಾಲೆಲು ಐವೆರುಲ್ಲೆರ್
ಬುಕ್ಕೊ ಪಾರ್ತನ ಮಗನೆ ಅಮ್ಮೆರೆ
ಸೈನ್ಯೊ ಉಂಡುಯೆ ಮೂಜಿ ಅಕ್ಷೋಯಿಣಿದ ಮಾರ್ಬಲೊನೆ ||
ಇತ್ತೆನೇ ಯಾನ್ವಿದಡ್ನಾಪಗ
ಕ್ರಿಷ್ಟೆ ಬೊಡ್ಡಿಂದನನ್ ತಲಿತೆಡ
ಮಿಕ್ಕದಾಯನ್ ಪೋವೆಲಡಯಿದ ಬೂಳ್ಳೊ ಕೊರ್ರೆಂಕ್ ||

19

ಈತ್ ಪನ್ನುನ ಕೇನ್ದ ಬೀಮನ
ಕೋಪೊ ನೆತ್ತಿಗ್ ಏರ್ದ್ ಕ್ರಿಷ್ಟಡ
ರಾಜಿಗೊಪ್ಪಯೆ ಯಾನ್ ಕಂಡಿತೊ ಕೌರವಾದಿಲೆಡ ||
ಪಾಡಿ ಬಾಸೆನ್ ತೀರುನಾಪಗ
ಏರ್ ಬರ್ರೆರ್ ಹರೆನೊ ಇಂದ್ರೆನೊ
ಮೂಜಿ ಲೋಕೊದ ವೀರೆ ಪಂಡೆನೆ ಮೀಸೆ ನೀಸೊಂದು ||

20

ದಾನೆ ಧರ್ಮಜ ಬೀಮ ಸೇನನ
ಪಾತೆರೊನೆ ಬದಲಾಂಡ್ ದ್ರೌಪದಿ
ಮೋನೆ ತೂಯಿನ ಸಾತ್‌ಗಾಯನ ತರೆನೆ ತಿರ್ಗನೆನೊ ||
ದಾನೆ ಮಲ್ತೊಡು ಪನ್‌ಲ ಎನ್ನಡ
ರಾಜಿಯೋ ಕಾಳಗನೊ ಪನ್ನುನ
ಈ ನಿಗಂಟ್‌ನ್ ಪನ್ನ ಕೆಸರ್‌ದ ಕಮ್ಮೊ ಆವೊಡ್ಡಿ ||

21

ದೇವ ಈ ಕೌರವಗ್ ನೀತಿನ
ಪೂರ ತೆರಿಪದ್‌ಲೈನ್ ಗ್ರಾಮೊನು
ಕೇನ್ದ ರಾಜಿನ್ ಮಲ್ಪುಲಾಯೆನೆ ತಾನ್ ಒಪ್ಪುಜೆಡ ||
ಬೀಮ ಪಾರ್ತರ್ ಪಂಡೆನಂಚೆನೆ
ಕಾಳಗೊನು ಒತ್ತೊನುಲ ಪನ್ನಗ
ವಸುದೇವನೆ ಧರ್ಮನಂದನನೇತೊ ಪುಗರೊಂಡೆ |

|| ಸಿರಿಕ್ರಿಷ್ಟೆ ಹಸ್ತಿನಾವತಿಗ್ ಪಿದಡಿಯೆ ||

ವಾಸುದೇವನ ಕಾರ್‌ಗಡ್ಡೊನೆ
ಬೂರು ದ್ರೌಪದಿ ಕಣ್ಣ ನೀರ್‌ಡ್
ಪಾದೊ ಚಂಡಿಯೆ ಮಲ್ಪುನಾಪಗ ಲಕ್ಕದಾಲೆನವೆ ||
ನೀರ್‌ದವುಡೆಡ್ ಅರಿನೆನುದಿಯೆ

ದಾನೆ ಆವೊಡು ಮೆಗಿದಿ ಪನ್ ಪನ್
ಯಾನ್ ನಿನ್ನವೆ ಬುಲ್ಪು ತೂವಯೆ ನಿಕ್ಕು ಗೊಂತಿದ್ಯೊ ||

1

ಕುಜಲ್ ಬುಡ್ತನ ತೂವೊಂದುಲ್ಲನೆ
ಎನಡ ಕೇನುವ ದಾನೆ ಆವೊಡು
ಪನ್‌ಪಿ ಪಾತೆರೊ ದಾಯೆಗಣ್ಣಾ ನಿಕ್ಕುಲಾ ಕುಸಲೊ ||
ಮೆಗಿದಿ ನಿನ್ನವೆ ಬಾಸೆ ತೀರವೆ
ಎನನ್ ಪೆದ್ದೆನ ಅಪ್ಪೆನಾಜೊನೆ
ತೆಲಿಪು ತೆಲಿಪುಲ ಪನ್‌ಲಾಲೆನ ದವುಡೆನೀಸಿಯೆನೆ ||

2

ದ್ರೌಪದಿನ್ ಸಮದಾನೊ ಮಲ್ತದ್
ಆ ಹರಿಯೆ ದಾರುಕನ್ ಲೆತ್ತದ್
ತೇರ್‌ಗೇ ಕುದುರೆಲೆನ್ ಒಡ್ಡಲ ಹಸ್ತಿನಾವತಿಗ್ ||
ಪೋಯೆರೆಗ್ ಪನ್ನಗನೆ ದಾರುಕೆ
ಬೇಕೊ ತೇರ್‌ಗ್ ಕುದುರೆನೊಡ್ಡನ-
ಗಾಪಗನೆ ಸಾತ್ಯಕಿಯೆ ಉಲಯಿಡ್ ದೀಡ್ಯನಾಯುದೊಲೆ ||

3

ಮಾತೆರೆಡ ಪೋಪೆಂದ್ ಪಂಡ್‌ದ್
ತೇರ್‌ನೇರ್‌ದ್ ಕುಲ್ಲನಾಪಗ
ಪಾಂಡವರ್ ಜಯೊ ಜಯೊನೆ ಪಂಡ್‌ದ್ ಅಡ್ಲೊ ಬೂರಿಯೆರ್ ||
ಗಾಳಿ ವೇಗೊಡು ತೇರ್ ಪೋಪುನ
ಗೇನೊ ದಿಪ್ಪಿಗ್ ತೆರಿನ ರುಸಿಕುಲು
ಪಾರ್ ಬತ್ತೆರ್ ಪರಸುರಾಮೆರ್ ಕಾಸ್ಯಪಾದಿಗುಳು ||

4

ಬತ್ತನಕಲೆನ್ ಪೂರ ತೇರ್‌ಡ್
ಕುಲ್ಲಯೆನೆ ಸಿರಿಕ್ರಿಷ್ಟೆನಕಲೆನ್
ಹಸ್ತಿನಾವತಿದಾಡೆ ಬರ್ರೆರೆ ಪಂಡೆ ಒತ್ತಯೊಡು ||
ಎತ್ತದಾಂಡಲ ತೇರ್ ನಗರೊದ
ಪಟ್ಟಣೊಗು ಕೊಡಿ ಮರತ ಗರುಡನ
ಗುರ್ದೊ ಪತ್ತದ್ ಸೇರೈರಲ್ಲದ ಜನೊಕುಲೊಟ್ಟಾದ್ ||

5

ಹರಿನ ಮಯಿಮೆದ ಪದೊನು ಪಂಡ್‌ದ್
ಬಜನೆ ಮಲ್ತೆರ್ ನಗರೊದಾಕಲ್
ಕುರುಕುಲೇಸೆನೆ ತೆರಿದ್ ತೆರಿಪಯೆ ಬೀಸ್ಮದ್ರೋಣೆರೆಗ್ ||
ಬರುವೆ ಕ್ರಿಷ್ಟೆನೆ ಎಂಕಲೆಂಕಲೆ
ಬುಡರೊಗೇ ಪಂಡೊಂದು ಮಾತೆರ್
ಎದುರು ಕೈಕೊನುದಡಿಗೆದಟ್ಟನೆ ದಿಂಜ ಮಲ್ಪಯೆರ್ ||

6

ಮಾಜಿ ಮಂತ್ರಿಯೆ ವಿದುರೆ ಬಗ್ಗಿಡ್
ಮೀದ್ ಸುದ್ದೊದ ಕುಂಟು ತುತ್ತುದು
ಪೂ ತೊಲಸಿ ಕ್ಯೊದೇತೊ ದೀಡ್‌ದ್ ತನ್ನ ಇಲ್ಲಲ್‌ದ್ ||
ಬಾಕಿಲ್‌ಡ್ ಕಾತೊಂದು ಶ್ರೀ ಹರಿ
ಈ ಬಡವನಿಲ್ಲಡೆಗ್ ಬರುವೆನೊ
ರಾಯ ಕೌರವನಾಡೆ ಪೋವೆನೊ ದಾನೊ ಪಂಡೊಂದು ||

7

ಬೇಜರೊಡು ಉಂತ್‌ನಯ ಕಣ್ಣೆಗ್
ಆಂಜಿದಾಂಡ್‌ಲ ತೇರ್ ಬರ್ಪುನ
ಬಾರಿ ಸಂತೊಸು ಬಗ್ಗಿಡಾಯೆನೆ ಹರಿನ್ ಪುಗರೊಂದು ||
ತಾತಿ ಬೊಟ್ಟುದು ಬಜನೆ ಮಲ್ತೆನೆ
ಸಾದಿ ಗಡ್ಡೊನೆ ಬೂರ್ಪು ಲಕ್ಕಿಯೆ
ಬಾವೊ ಬಗ್ಗಿದ ಮರ್ಲೆಡಾಯೆನೆ ನಲಿಕೆ ನಲಿತೊಂಡೆ

8

ವಿದುರೆ ಬಗ್ಗಿಡ್ ಮರ್ಲ್ ಕಟ್ಟುನ
ತೆರಿದ್ ಶ್ರೀ ಹರಿ ತೇರ್‌ನುಂತದ್
ತಿರ್ತ್ ಜತ್ತಾದ್ ವಿದುರ ರಟ್ಟೆಡ್ ಪತ್ತಾದುಂತಾಯೆ
ಹರಿನ್ ತೂಯೆನೆ ಕಣ್ಣೆ ದೆರ್ತ್‌ದ್
ತರೆಟ್ ಮಾಣಿಕೊ ಮುತ್ತು ರತ್ನೊದ
ಕಿರಿಟೊ ಮುಂಡೊದ ಬೊಟ್ಟು ಕಸ್ತೂರಿ ಕೈಟ್ ಸಿರಿ ಪುರಲ್ ||

9

ತಿಗಲೆಡೇ ಕೌಸ್ತುಬೊನೆ ಬಿರೆಲ್‌ಡ್
ಬಗೆ ಬಗೆತ ಉಂಗಿಲೊಲು ಕಂಟೆಲ್
ತೆಗಲೆದರೆ ಪೂ ದಿಂಜಿ ಮಾಲೆಡ್ ಪೂರ್ಣ ತೋಜೊಂದು ||
ಮೆಯಿಕ್ ಒಂಬುನ ಪಟ್ಟೆ ತುತ್ತುದು
ಸಿರಿನ ಬಿರೆಲ್‌ದ ಮುದ್ರೆ ಕುಂಕುಮೊ
ತಿಗಲೆಗೇ ಪೂಜಿದಿನಲಾಯಿನ್ ತೂಯೆನಾ ವಿದುರೆ ||

10

ಬೂಮಿ ಬಾರೊನು ತಗ್ಗಯೆರೆಗೇ
ಪ್ರೇಮೊದವತಾರೊಡುಲ ಬತ್ತಾದ್
ಪೂತನಿನ್ ಸಕಟಾಸುರಾದಿಲೆ ಮಾತ ಕೆರ್ದಾದ್ ||
ಮಾಮೆ ಆಂಡಲ ಕಂಸೆ ದುಸ್ಸೆನೆ
ಕಾಸ ಪಲಯೆನೆ ಮೂರ್ಕೆ ಪಾಂಡ್ರಕೆ
ಆಂಡಲಕಲೆನ ನಾಸೊ ಮಲ್ತನೆ ಸ್ವಾಮಿ ಪರಮಾತ್ಮ ||

11

ಎನ್ನ ಬಾಕಿಲ್‌ಗೀಯೆ ಬತ್ತನೆ
ನಿಕ್ಕ ಎಂಚಿನ ಕೊರ್ದೆ ಈಯೆ

ಲಚ್ಚಿಮಿನ ಕಂಡನಿಯೆ ಆಯ್ಕೆ ಪಣವು ಬೊಡ್ಡತ್ತೊ ||
ಪರೈಗ್ ಪೇರೊರೈನೋ ಈ
ಜೆತ್ತನಯೆ ಪೇರ್ದಡಲ್‌ಡತ್ತೊಯೆ
ಪೊಕ್ಕುಳುದ ಪೂತಯಗ್ ಪೂತವೆ ದಾಯೆ ಮಾಲೆಗುಳು ||

12

ದೇವ ದೇವಡ ಯಾನ್ ದಾಯ್ತೆನ್
ಕೇನುವೆನೊ ಪನಾಲೆನ್ನ ಕಣ್ಣೆಗ್
ತೋಜುನವು ನನ ಒರಿಯರಿದ್ಲಿಂದೆಂಕ್ ತೆರಿದುಂಡು ||
ಸಾಸಿತೊನೆ ಆದಿತ್ತಿ ನಿನ್ನವೆ
ನಾಮೊದುಚ್ಚರೊ ಮಲ್ಲಿ ಸಗ್ಗಿನ್
ನಾಲಯಿಗ್ ಕೊರ್ಲಂದ್ ನಟ್ಟುವೆ ಪನ್ದ ಪುಡ್ಯಾಡ್ಯೆ ||

13

ವಿದುರ ಬಾಯಿದ ಸಮ್ಮನೊಡು ಎನ
ಬಡವು ತಣಿಪುನೆ ಎಂಚ ಕೊರ್ಲಯೆ
ಉಲಯಿ ಕುಲ್ಲದ್ ದಾನೆ ಆಂಡಲ ಬಂಜಿ ದಿಂಜಯೆರೆ ||
ಪನುಪುನೆನ್ ಕೇನೊಂದು ಉಲಯಿಗ್
ಲೆತೊನುದಾಯನ್ ಕುಲ್ಲದಪಗನೆ
ಬುಡದಿನೇ ಕೈ ತಡೆಗ್ ಲೆತ್ತಾದ್ ಪನ್ನೆ ತೆಲಿತೊಂದು ||

14

ಕೋಟಿ ಬ್ರಹ್ಮಾಂಡೊಲೆನ್ ಬಂಜಿಡ್
ದೀಡನಾಯನ ಬಂಜಿಗಂಚಿನ
ಆವು ಪಂಡ್‌ದ್ ನಿಕ್ಕ ಗೊಂತುಂಡೊಂದು ಕೇನ್ನಗನೆ ||
ದೇವೆರೆಗ್ ಪೂ ಪರ್ವ್ ಸುದ್ದೊದ
ನೀರ್ ಕೊಂಡ್‌ಲ ಯಾವು ಬಗ್ಗಿಡ್
ಪೇರ್ ಕೊರೊಯೆ ಪಂಡ್‌ದಾಲೇ ಗಿಂಜ್ಯೆ ದಿಂಜಾದ್ ||

15

ಕೊರೈಲೊಂಜೇ ಕೊಂಡೆದಾತೆನ್
ಪರೈನೇ ಹರಿಯಯಿನ್ ತೃಪ್ಪಿಡ್
ಐಟ್ ಒರಿತ್‌ದ್ ಒಂಜಿ ಬೊಟ್ಟುನು ಅರಿತೆ ನೆಲಕವುಲೆ ||
ಉರೈದ್ ಪೇರ್‌ದಿಂಜಿದ್‌ಲ
ಎರೈದಾಂಡವು ಇಲ್ಲದುಲಯಿಡ್
ತಿರ್ತ್ತ ಜಾಲ್‌ಡ್ ಸಾದಿ ಬೀದಿಡ್ ಬೈಲ್ ಬೊಟ್ಟುಲೆಡ್ ||

16

ಪೇರ್ ಕಡಲ್‌ದ ವೈಲ್ ತೂಯೆರ್
ರಾಜದಾನಿದ ಮಾತ ಜನೊಕುಲು
ವಾಸುದೇವನ ಮಯಿಮೆ ಪಂಡ್‌ದ್ ಮಾತ ಪುಗರಿಯೆರ್ ||
ಮಾತೆರ್‌ಲ ಹರಿ ಬಜನೆ ಮಲ್ತೆರ್-

ಲಾಪಗನೆ ಪೇರ್ದಡಲ ಬೊಲ್ಲೊನೆ
ಆಜಿದಾಂಡಲ ಕ್ರಿಷ್ಟ ವಿದುರೆರ್ ತೂದು ತೆಲಿತೆರ್ಗೆ ||

17

ಉಲಯಿಡಿತ್ತನ ಮಾಮಿ ಕಾರ್ಗ್
ಪರಮ ಪುರುಸನೆ ಅಡ್ಲೊ ಬೂರುದು
ಸುಕೊಟು ಉಲ್ಲರೊ ಪನ್ದ ಕೇಂಡೆನೆ ಕುಂತಿದೇವಿಡನೆ ||
ನಿನನ್ ತೂಯಿನ ಎಂಕ್ ಎಂಚಿನ
ಎಸನೊ ಉಂಡುಯ ಕ್ರಿಷ್ಟ ನಿನ್ನವೆ
ಮನಸ್‌ಡೆಂಚಿನ ಉಂಡೊ ಐನೇ ಮಲ್ಪು ಸಂತೊಸುಡು ||

18

ಮಾಮಿ ಈರೆನ ಜೋಕ್ಲೆ ಕಸ್ಲೊನು
ಪೂರ ಪರಿಯರಿಪೆರೆಗ್ ಈಡೆಗ್
ಯಾನ್ ಬತ್ತನೆ ಪನ್ದ ವಿದುರನ್ ಲೆತ್ತನಾಡೆಗೆನೆ ||
ಈಯೆ ಅರಮನೆಗಿತ್ತೆ ಪೋಲಯ
ರಾಯ ಕೌರವನಾಡೆಗೇನೇ
ಪಾತೆರೆರೆ ಬರ್ಪೆಂದ್ ಪುರ್ಸೊತು ಕೇನ್ ಆಯಡನೆ ||

19

ವಿದುರೆ ಪೋದಾಯಡನೆ ಪನ್ನಗ
ಇನಿಯೆ ಪುರ್ಸೊತು ಇದ್ದಿ ಬರ್ಪೆಡ
ಬರಡ್ ಎಲ್ಲೆನೆ ಪಂಡಿ ಪಾತೆರೊ ಕೇನ್ದಲಾ ವಿದುರೆ ||
ಪರಿಡ ಬತ್ತದ್ ಪಂಡೆ ಆನಿದ
ದಿನೊನು ಕಳೆಯೆನೆ ಕ್ರಿಷ್ಟ ವಿದುರನ
ಪೊರುಲುದಿಲ್ಲಲ್ ಬಾರಿ ಸಮ್ಮನೊದೊಣಸ್ ಉಂಡೊಂದು ||

|| ಕೌರವನ ಸಬೆಕ್ ಎತ್ತೆನಾ ಕ್ರಿಷ್ಟ ||

ಕಾಂಡೆ ಲಕ್ಹದ್ ಕೌರವೇಸ್ವರೆ
ತಾನ್ ಮಲ್ಪುನ ನಿತ್ಯೊ ಕರ್ಮೊನು
ಪೂರ ತೀರ್ದದ್ ರಾಜ ಚಾವಡಿಗೇತ್ಯೆ ಸಂಬ್ರಮೊಡು ||
ಸೇರ್‌ದಿತ್ತನ ಮಂತ್ರಿ ಪ್ರಜೆ ಪರಿ-
ವಾರೊದಾಕ್‌ಲ್ ಕೌರವಗ್ ಜಯೊ
ಗೋಸೊ ಮಲ್ತೆರ್ ವಂದಿ ಮಾಗದನಕ್‌ಲ್ ಪುಗರಿಯೆರ್ ||

1

ಸಿಮ್ಮೊ ಪೀಟೊಡು ಕುಲ್ಲನಾಯೆನೆ
ಅಮ್ಮನಜ್ಜನ್ ಗುರುನು ಮಿತ್ರನ್
ಕುಲ್ಲಯೆನೆ ಲೆಪುಡಾದ್‌ಲಕ್‌ಲೆನ್ ಸರಿತ ಪೀಟೊಲೆಡ್ ||
ಬತ್ತಿ ಸಾಮಂತೆರ್‌ನ್ ಮರ್ಯದಿ

ಕೊರ್ಪು ಕುಲ್ಲಯೆ ಗಮಕ ಪಂಡಿತೆ
ರಲ್ಪು ಗಾಯನೊದಕ್‌ಲ್ ಬ್ರಾಣೆರ್ ಮಾತೆರೆತ್ತಿಯೆರ್ ||

2

ಸಬೆನ್ ತೂನಗ ಮೇಲ್ ಲೋಕೊದ
ಸುರಪನಾಸ್ತಾನೊದವೆ ನಮುನೆಡ್
ಕುರುಕುಲೇಸನ ಕಣ್ಣಾಗಂಚಿನಗಾಯೆ ಸಂತೊಸುಡು ||
ಪಾಂಡವೆರ್ ಇನಿ ಕ್ರಿಷ್ಟನೀಡೆಗ್
ರಾಜಿ ಪಂಚಾತಿಗೆಗ್ ಕಡಪುಡು-
ದೇರ್ ಪಂಡ್‌ದ್ ವಿದುರೆ ತೆರಿಪದೆ ಕೋಡೆ ಎನ್ನಡನೆ ||

3

ಎರ್ದೆಮೇಪುನ ಕುಟುಮೊದಾಯೊನೊ
ಮಲ್ಲವಂಸೊನು ರಾಜಿ ಮಲ್ಪುವು-
ನಿತ್ತೆ ಪನ್ನುನ ವಿಸಯೊ ಪಾಂಡವನಕ್‌ಲೆಗಿದ್ಯತ್ತೊ ||
ಕ್ರಿಷ್ಟ ಬತ್ತೆಡ ಸಬೆಟ್ ಮರ್ಯದಿ
ಕೊರ್ಪುನವು ಬೊಡ್ಡಿಂದ್ ಪನ್ನಗ
ಕರ್ಣ ಸಕುನಿಲು ತಾತಿ ಬೊಟ್ಟಿರ್ ಬಾರಿ ತೆಲಿತೊಂದು ||

4

ಆತ್ ಪೊರ್ತುಗು ಕ್ರಿಷ್ಟೆ ವಿದುರನ್
ಕೂಡೊನುಂದೇ ಸಬೆಕ್ ಪೊಗೈನೆ
ಮಾತೆರ್‌ಲ ಲಕ್‌ದುಂತ್ಯೆರಾಪಗ ಕೈನ್ ಮುಗಿಯೊಂದು ||
ಬೀಸ್ಮ ದೋಣೆರ್ ಅಡ್ಲೊ ಬೂರ್ಯೆರ್
ತಾತಿ ಬೊಟ್ಟೊನ ಕರ್ಣಲಾಪಗ
ಕಾರ್‌ಗಡ್ಡೊನೆ ಬೂರ್ಪು ಕಣ್ಣೆಡೆ ನೀರ್ ಜಪುಡಾಯೆ ||

5

ಬೂಟು ಬಿಸಾರ್‌ತಿಗೆದ ಕೌರವೆ
ಪೀಟೊಡೇ ಕಾರ್‌ಲೆಲ್ ಪಾಡ್‌ದ್
ಮೀಸೆಗ್‌ಲ ಕೈ ಪಾಡ್ಡ್ ಕುಲ್ಲಿಯೆ ನೊಂಡು ತುಚ್ಚೊಂದು ||
ಮಾನೊ ಕೆಟ್ಟೊನ ಮೂರ್ಕೆನಿಂಬ್ಯನ
ರಾಜ ಚಾವಡಿಡುಲಯಿ ಹಂಕರೊ
ಪೂರ ಉಂತವೆ ಪನ್ದ ಒತ್ತಿಯೆ ಕಾರ್ಡ ಉಂಗುಸ್ಸೊ ||

6

ದಾನೆ ಪನ್ನುನೆ ಸಿಮ್ಮೊ ಪೀಟೊನೆ
ಆಂಡಲಡಿಮೇಲಾದ್ ಮಗ್‌ರಾಯೆ
ವಾಸುದೇವನ ಕಾರ ಮುದೆಲ್‌ಡ್ ರಾಯ ಕೌರವೆನೆ ||
ತೂಯಿನಾ ಸಬೆ ಸಿವ ಸಿವಂದ್‌ದ್
ಬಾರಿ ಬೊಟ್ಟೆನೆ ಪಾಡ್‌ನಾಪಗ
ದೇವ ದೇವನೆ ಕೈತಲುಂತುದು ಪನ್ನೆನಾಪಗನೆ ||

7

ದಾನೆ ಆಂಡಾಯ ಬಾವ ನಿಕ್ಕೇ
ಯಾನ್ ಬತ್ತನ ತೂದು ಮನಸ್‌ಡ್
ಬಾರಿ ಸಂತೋಸಾದ್ ನಿನ್ನವೆ ತರೆನೆ ತಿರ್ಗನೆನೊ ||
ದೇವೆರ್‌ಂದ್ ಎನನ್ ನೆನೆತ್‌ದ್
ಬಾವೊ ಬಗ್ಗಿದ ಒಸಯೊಡಾಯ್ನೆನೊ
ದೇವೆರ್‌ತ್ತಾಯ ಯಾನ್ ಗೋವಳೆ ದೇವಕೀ ಮಗನೆ ||

8

ಬಾವಗೇ ಬಲೊ ನನಿಕೆ ಪಕ್ಕಿಗ್
ರಾಯೆರೆಗ್ ಬಲೊ ರೆಂಕೆ ಅಂಚೆನೆ
ಈಯೆ ತೆರಿಪಯನೆಂಕ್ ನಿನ್ನವೆ ರಾಜ ಸಬೆತುಲಯಿ ||
ಆಂಡ ಈ ಮರ್ಯಾದಿದಾಯೆನೆ
ರಾಚೆರೆಡ್ ಮಹ ಚಕ್ರವರ್ತಿಯೆ
ಕಾರ ಮುದೆಲ್‌ಡ್ ಬೂರುನೆನೊ ಪನ್ ಮೋನೆ ತೂವೊಂದು ||

9

ಪನ್ನುನೆನ್ ಕೇನೊಂದು ಕೌರವೆ
ಮೆಲ್ಲ ಲಕ್ಕದ್ ಕುಲೈ ಪೀಟೊನು
ಗಟ್ಟಿಡುಂತದ್ ನಾಚಿಗಡ್ ಸರಿ ಅಡಿಕ್ ತೂವೊಂದು ||
ತನ್ನ ಮೋನೆಗ್ ಮುಸುಕು ಪಾಡ್‌ದ್
ಕುಲ್ಲನಾಯನ್ ತೂದು ಕ್ರಿಷ್ಟೆನೆ
ಬುಕ್ಕೊಲಾ ಸರಿ ರಂಗ್‌ಮಲ್ತದ್ ಪನ್ನೆ ಸಬೆತುಲಯಿ ||

10

ಪೋಣ್ಣಲೆನ ಲೆಕೊ ದಾಯೆ ಮುಸುಕುನು
ಪಾಡ್ಡ್ ಕುಲ್ಲದ ಸಿಮ್ಮೊ ಪೀಟೊದ
ಮರ್ಯದಿನ್ ದೆಪ್ಪುವನ ಕೌರವ ರಾಜದರ್ಬಾರ್‌ದ ||
ಮಲ್ಲ ಗೌರವೊನಿತ್ತೆ ಈಯೇ
ಮಣ್ಣ್ ಮುಕ್ಕವ ದಾಯೆ ಪಾತೆರ್
ಪಜ್ಜೆ ತತ್ತದ್ ಆನೆ ಮಗುರುನ ನಿಕ್ಕು ಗೊಂತಿದ್ಯೊ ||

11

ಕ್ರಿಷ್ಟೆ ಮಲ್ಲುನ ತಮಸ್‌ಡಾಯಗ್
ಕಣ್ಣ್ ಕೆಂಪಾಂಡಲ್ಪ ಕೋಪೊಡು
ಮುಸ್ಕು ಪಾಡ್ನೆನ್ ದೆತ್ತದಕ್ಕದ್ ಕಣ್ಣ್ ಮಲೆವೊಂದು ||
ಆ ಪಟಿಂಗರೆ ಬಾವೆನತ್ತೊಯ
ಈಡೆ ಬತ್ತದ್ ನಿನ್ನ ಬುದ್ಧಿನ್
ತೋಜಯನೆ ಓ ಕಳುವ ಈಯೇ ಎಂಕ್ಲೆ ಪೊದ್ದೆಂದ್ ||

12

ಯಾನ್ ಸಮ್ಮನೊದಡಿಗ್ ಮಲ್ಲದೇ
ಈಡೆ ಬತ್ತಜ ಅಜ್ಜ ಬೀಸೆರೆ-

ನಾಡೆ ಪೋಯಿಜ ದ್ರೋಣೆರಿಲ್ಲಡೆ ಕಾರ್ ದೀಡ್‌ಜನೆ ||
ಚಾಕ್ರಿದಾಲೆನ ಮಗನ ಇಲ್ಲಡೆ
ಪೋದು ಎಂಕ್ಲೆನ ಮಾನೊ ದೆತ್ತನೆ
ಕೋಡೆ ಅವುಲೇ ನಿನ್ನ ಬಂಜೆನ್ ದಿಂಜದುಂತಿಯನೆ ||

13

ಗೋವಳೆರ್ ಚತ್ತಿಲೆನ ಅರಮನೆ
ಡೇರ್ ಉನ್ನೆರ್ ಅಂಚನೇ ಈ
ಚಾಕ್ರಿದಾಲೆನ ಮಗನ ಇಲ್ಲಲ್ ಬಂಜಿ ದಿಂಜಯಿನ ||
ರೀತಿ ತೂನಗ ತೆಲಿಕ್ ಉಪ್ಪುನು
ಪಾಡ್‌ನಂಚಿನೆ ಆಂಡ್ ರುಚಿ ರುಚಿ
ಪೇರ್‌ಗಾವೊಯ ಉಪ್ಪು ಈಯೇ ಬತ್ತದುಂಡಡನೆ ||

14

ಚಾಕ್ರಿದಾಲೆನ ಮಗನ ಇಲ್ಲಲ್
ಗೋವಳೆಗ್ ಒಣಸಾಂಡ್ ಪನ್ನಗ
ಕಾರ್ಯೊ ಕಸುಬುಡು ಒಂಜೆ ಆಯಿನ ಬಾರಿ ಪೊರ್ಲತ್ತೊ ||
ಆ ದುರ್ಯೋದನೆ ಪನ್ನಿ ಪಾತೆರೊ
ಕೇನ್ದ್ ವಿದುರಗ್ ಕೋಪೊನೆತ್ತಿಗ್
ಏರ್‌ದಾಯೆನೆ ಪಂಡೆ ಕೌರವ ಕೇನ್ ಪನ್ನುನೆನ್ ||

15

ಎನನ್ ಈಯೆ ಚಾಕ್ರಿದಾಲೆನ
ಮಗನೆ ಪಂಡ್‌ದ್ ರಂಗ್ ಮಲ್ತನೆ
ಹರಿನ್ ಏಶಾಲ ನೆರ್ಡ್ ದೂರೈನೆ ನಿನ್ನ ಅಪ್ಪೆನ್‌ಲ ||
ಸುರುಕು ಏಡ್‌ಗ್ ಮದಿಮೆ ಮಲ್ತದ್
ಪೆರಪ ಕುರುಡಗ್ ದಾರೆ ಮಯ್ತನೆ
ನಿನನ್ ಏಡ್‌ದ ಮಗನೆ ಪಂಡ್‌ದ್ ತಪ್ಪೊ ಲೆಪ್ಪುನವು ||

16

ಬೀಮೆ ನಿನ್ನವೆ ತುಡೆನ್ ಪೊಲಿಪುನ
ಬಾಸೆ ಪಾಡ್‌ದೇ ಆಂಡ ನಿನ್ನನ್
ಯಾನ್ ಒರಿಪೆರೆ ಬಾಣೊ ಕೊಲ್ಪವಿ ಬಿರುನು ದೀಡೊಂದೆ ||
ದಾಯೆ ನಿನ್ನನ್ ಯಾನ್ ಕಾಪುನೆ
ಏರ್‌ಲಾ ಕೆರಡ್‌ಂದ್ ಕೈತವೆ
ಬಾರಿ ಸಗ್ಗಿದ ಬಿರುನು ಪೊಲಿತ್‌ದ್ ದಕ್ಕೆನಾಪೆಕ್‌ಗ್ ||

17

ಸಬೆಟ್ ಗೌಜಿಯೆ ಆಂಡ್ ಕೌರವೆ
ಮನಿಪಡೆಂದ್‌ದ್ ವಿದುರೆ ಪೊಲ್ತನ
ಬಿರುನು ಈತೈಟ ಓಲು ಪತ್ತದೆ ಲಡಯಿದಾ ಕಳಟ್ ||
ಪಗರಿ ಕೊಲ್ಪಂದ್‌ನವೆ ಬಿರು ನಿಜೊ
ಬಯಿತ ಬೇಲೆಗ್ ಆಪಿ ಬೈತ್ತಡು
ಪನ್‌ಲ ದಾಯೆಗ್ ಬತ್ತ ಕ್ರಿಷ್ಟೆನೆ ಸಬೆತ ದುಂಬುಂತು ||

|| ರಾಜಿ ಪಂಚಾತಿಗೆ ||

5

ಮರಿತ ಜಿಡೆಟುಂತ್‌ನಯೆ ಕೌರವ-
ನೆದುರು ಉಂತ್‌ನ ತೂದು ಬೀಸ್ಮೆನೆ
ಸಿವ ಸಿವಾ ಪಂಡೊಂದು ಪೀಟೊನು ದೀಡ್ಯೆ ಕುಲೈರೆಗ್ ||
ಕುರುಕುಲೇಸ್ವರನೆದುರು ಉಂತ್‌ದೆ
ಪನ್‌ಪೆ ಬತ್ತೆನ ಕಾರ್ಯೊನಿಂಬ್ಯಗ್
ನಿಕ್‌ಲ್ ಮಾತೆರ್ ಕೇನೊಡೇನೇ ಪನ್ನಿ ಪಾತೆರೊನು ||

ಪಾಪಿ ಈ ಸಯ್ಯಡಯೆ ಬದುಕುನ
ಆಸೆ ಉಂಡುಡ ರಾಜಿಗೊಪ್ಪುಲ
ಆಯ್ವಿ ಪಂಡಡ ಪಾಂಡು ಬಾಲೆಲು ನಿನನ್ ದೀಡಯೆರ್ ||
ಬೀಮೆ ನಿನ್ನವೆ ತುಡೆನ್ ಪೊಲ್ತುದು
ಪಾಡ್ಲೆ ದುಸ್ವಾಸನನ ಕರ್ಲೆನ್
ನಾಯಿ ಕುದೈರೆ ಬಾಯ್ಗ್ ದಕ್ಕುವೆ ನೆಂಪು ದೀವೊನುಲ ||

6

1
ಜೂಜಿಗೊಬ್ಬುದು ರಾಜ್ಯೊ ಕಳೆಯಿನ
ಪಾಂಡವೆರ್ ಒತ್ತೊಂಡಿ ಸೆರ್ತೆದ
ರೀತಿಡಾಕ್‌ಲ್ ವರ್ಸೊ ಪದಿಮೂಜೆನ್‌ಲ ಕರಿದಾಂಡ್ ||
ಆಕ್‌ಲೆನ ಸರ್ವೆಸೊ ರಾಜ್ಯೊನು
ಈಯೆ ಬುಡುಕೊರು ನಿಕ್‌ಲ್ ನಿಕ್‌ಲೇ
ಕಾಳಗೊನು ಮಲ್ಪುವು ಸರಿಯತ್ತಂದ್ ಪನ್ನೇನ್ ||

ಕೊರು ವ್ರಕಸ್ತಲೊ ವಾರಣಾವತಿ
ಪೊರುಲುದಾವಂತಿನ್ ಕುಸಸ್ತಲೊ
ಅಕ್‌ಲೆಡಿತ್ತೆನ ಇಂದ್ರಪ್ರಸ್ತೊನು ಎಡ್ಲೆ ಪಾತೆರೊಡು ||
ಕೊರಿಯಡನೆ ಈ ಐನ್ ಗ್ರಾಮೊನು
ನಿಕ್‌ಲ್ ಬದುಕುನೆಕಡ್ಲಿ ಇದ್ದಿಯು
ಕುರುನ ಕುಟುಮೊನು ಒರಿಪಿ ಸಾದಿನ್ ತೂಲ ಮಾರಾಯ ||

7

2
ನಿಕ್‌ಲ್ ಮಲ್ತೆನ ಮಾತ ತಪ್ಪುಲೆ-
ನಕ್‌ಲ್ ಮರಪುನ ಸುಬವೊದಾಕ್‌ಲ್
ಮೆಗಿಪಲಯೆ ಬಾಲೆಗುಳು ಪ್ರೀತಿಡ್ ಉಲ್ಲರಂದಾಂಡ ||
ವೊಯಿರಿನಾಕ್‌ಲ್ ಕಣ್ಣೆದರ್ತೆದ್
ನಿಕ್‌ಲೆನೇರಲ ತೂವಯೆರ್ ನಿಜೊ
ಕೊರೊಡು ಅಕ್‌ಲೆನ ರಾಜ್ಯೊನೀಯೇ ಕೇನ್ ಕುರುವೀರ ||

ಎಡ್ಲೆ ಪಾತೆರೊಡಿತ್ತೆ ನಡಪುಲ
ಪೆಟ್ಟೆ ತಿನ್ನುನ ಬೊಡ್ಡಿ ಎನ್ನಡ
ಕಳ್ಳ ಎಂಚಿನ ಬೋಡು ಕೇಂಡ್‌ನ ಕೊರ್ಪುನಾಯೆನೊಯೆ ||
ಗ್ರಾಮೊ ಐನೆನ್ ಬುಡುದು ಒಂಚೆನ್
ಸಾನ್ ಕೊರ್ಡಯೆ ರಾಜಿಗೊತ್ತುದು
ಯಾನ್ ನಿನ್ನವೆ ಟಕ್ಕು ಗೊಬ್ಬುನು ಪೂರ ತೆರಿಯೊಂದೆ ||

8

3
ಜೂಜಿ ಗೊಬ್ಬುದು ಕಳೆಯಿ ರಾಜ್ಯೊನು
ಕೇನುನವೆ ಹಕ್ಕುಂಡೊ ಕೊರ್ಪುನ
ಪಾತೆರೊನು ಪನ್ನೆನೊಯೆ ಆನಿಯೆ ಕಾಡ್ಗ್ ಪೋನಗನೆ ||
ಯಾನ್ ಮಲ್ತೆನ ತಪ್ಪುನೊಪ್ಪುನು
ಕೇನುನಯೆ ಈಯತ್ತ ದ್ರಾಪದಿ
ದಾಯೆ ಕುಜಲ್‌ನ್ ಬುಡುದು ಉಲ್ಲಲ್ ನಿಕ್ಕು ಗೊಂತಿದ್ಯೊ ||

ಆಣೈದಕ್‌ಲೆನ್ ಲಗಡಿದೆಪ್ಪೆರೆ
ಆಪಗಾಪಗ ಪುಟ್ಟು ದುಂಬುಡು
ವಾಮನೆನೆ ಈಯಾದ್ ಬಲಿಟನೆ ನಟ್ಟನೆಂಚಿನೆನ್ ||
ಮೂಜಿ ಮೊಟ್ಟುದ ನೆಲನ್ ಕೇಂಡ್‌ದ್
ದಾನೆ ಮಲ್ತೆದ ಆಯನಾನಿಯೆ
ಈತ್ ತೆರಿನಯಡಿತ್ತೆ ಕೇನುವ ಐನ್ ಗ್ರಾಮೊಲೆನ್ ||

9

4
ರಾಜ್ಯೊ ಬೋಡುಂದಾಂಡಲಾಕ್‌ಲ್
ಕಾಳಗೊಡೆ ಗೆಲ್ಲೊಂದು ಪಡವೊಡು
ಕಾಸ್ಯಪೇರೆಡ ಪನ್ನೆ ಆನಿಯೆ ಪೆರಪ ಕೇನಿಯೆರೆ ||
ದಾಯೆಗೀಯೆ ಬತ್ತ ಕುಂತಿನ
ಜೋಕುಲೆಗ್ ಈ ಮಲ್ಲ ದೇವೆರ್
ಆಂಡ ಊರುಗೆ ದೇವೆರೊಯೆ ಪನ್ ಕ್ರಿಷ್ಣ ಎನ್ನಡನೆ ||

ಕೊರಯೆ ಕಂಡಿತೊ ನಿನನ್ ಪೋಯೆರೆ
ಬುಡಯೆ ಊರುನು ಲಗಡಿ ದೆಪ್ಪುವ
ಮೆಗಿಯ ದುಸ್ವಾಸನೆನೆ ಬಲ್ಲೆನ್ ಕನಲ ಕಟ್ಟೆರೆಗ್ ||
ಕಬೆಕ್ ಇಂಬ್ಯನ್ ಕಟ್ಟೆ ಪಾಡುಗೊ
ಬರಡ್ ಪಾಂಡವನಕ್‌ಲ್ ಬುಡ್ಡದ್
ಕೊನಯೆರೆಗ್ ಪಂಡೊಂದು ಲೆತ್ತೆನೆ ಮೂರ್ಕ ಮೆಗಿಯನ್‌ಲ ||

10

ದುಸ್ಪ ದುಸ್ವಾಸನೆನೆ ಚೆಪ್ಪುದ
ಬಲ್ಲೆ ಗೆತೊನುದು ಕ್ರಿಷ್ಣ ಕೈತಡೆ

ಕಟ್ಟಿಯೆರೆ ಪೋನಗನೆ ತೋಚ್ಚೆರ್ ಸಾರೊ ಕ್ರಿಷ್ಟೆರಾಲ ||
ಅಲ್ಪ ಕ್ರಿಷ್ಟೆನೆ ಮುಲ್ಪ ಕ್ರಿಷ್ಟೆನೆ
ಉಲ್ಲೆನುಲಯಿಡ್ ಪಿದಯಿಡುಲ್ಲೆನೆ
ಬಲ್ಪ ತೂಂಡಲ ಕ್ರಿಷ್ಟೆ ಕಟ್ಟುನೆ ಏರೆನ್‌ಂದಾಯೆ ||

11

ತರೆಟ್ ಬಿಂಗಿರಿಯಾದ್ ನಾಡಿಯೆ
ತಿರ್ಗ್ ತಿರ್ಗ್‌ದ್ ಪತ್ಯೆರಾಯಿಜಿ
ಉಸುಲು ಕಟ್ವೆದ್ ದಮ್ಮು ಬುಡಿಯೆರೆಗಾಯಗಾವಂದೆ ||
ನೆಲಕ್ ಪುರೆಲ್‌ದ್ ಬೂರೈನಾಯನ
ಮೆಗಿಯನಾಕ್‌ಲ್ ಉಲಯಿ ಜೆಪುಡದ್
ತಿಗಲೆನೊತ್ತುದು ಉಸುಲು ಬರ್ಪದ್ ಜೂವೊ ಬದ್‌ಕಯೆರ್ ||

12

ಹರಿನ ಮಯಿಮೆನ್ ತೂದುಲಲ್ಪನೆ
ವಿದುರೆ ಬೀಸೈರ್ ಕೃಪೆರ್ ದ್ರೋಣೆರ್
ಕಯಿನ್ ಮುಗಿಯೆರ್ ಕ್ರಿಷ್ಟ ಮೂರ್ತಿನ್ ದಿಂಜ ಪುಗರೊಂದು ||
ಕುರುಕುಲೇಸನ ಬುಡೆದಿ ಬುಲ್ಪಲ್
ಕುರುಡೆ ಗೌಜಿನ್ ಕೇನ್ದಲರಬಯಿ
ಕೊರುದು ಬೊಬ್ಬೆನ್ ಪಾಡ್ ಪಂಡೆನೆ ತನ್ನ ಮಗಟವುಲು ||

13

ಪಾಂಡು ಬಾಲ್ಟೆಗ್ ಅಕಲೆ ರಾಜ್ಯೊನು
ಈಯೆ ಬುಡು ಕೊರ್ಲಂದ್ ಬುಲ್ಪುದು
ಏಶಲಾ ಒತ್ತಾಯೊ ಮಲ್ಲೆನೆ ಹರಿಗ್ ಪೋಡ್ಯೊಂದು ||
ಆ ಸುಯೋದನೆ ಕ್ರಿಷ್ಟ ಕೈತಡೆ
ಪೋದು ಕೈ ಮುಗಿಯೊಂದು ಲೆತೊನುದು
ಪೀಟೊದಾಡೆಗ್ ಕನತ್ ಕುಲ್ಲಯೆ ಬಾರಿ ಮರೈದಿಡ್ ||

14

ಕ್ರಿಷ್ಟ ಕೇನ್‌ಲ ಆಪಗಾಪಗ
ಸೈಪ್ಪುನಾಯೆನೆ ಪೊಂಕೆ ಚತ್ತಿಲೆ
ಗರೊದಾಯೆನೆ ಸೈಪ್ಪುನೊರೊನೇ ಮೋಕ್ಷೋಗೇರ್‌ಯೆರೆ ||
ನಿಕ್ಕ ಪೋಡಿದ್ ಸೈಪ್ಪುನೆಕ್ ಯಾ-
ನಿತ್ತೆ ಜಾರಯೆ ನಿತ್ಯೊದಾ ಸುಕೊ
ಸಿದ್ಧಿಗಾದೇ ಎನ್ನ ಸಾದನೆ ನಿನಡ ಪನ್ನೇನ್ ||

15

ಕನಕ ಕಸ್ಸಿಪು ರಾವಣಾದಿಲು
ಪರಮ ಮೋಕ್ಷೊದ ಪದವಿನೇರೈರೆ
ನಿನಡ ಪಗಟೇ ಕಾದ್ ಕಾದ್‌ದ್ ಏರೈರಾಸ್ತಾನೊ ||
ಕುರುನ ಕುಟುಮೊಡು ಏರ್ ನಿನ್ನನ್
ಎದುರು ಪಾಡ್‌ದ್ ಮೋಕ್ಷೋಗೇರ್‌ದೇರ್
ಎನಡ ಮಾತೊನೆ ಅಂಚಿ ಏಗಿತೊ ಉಂಡು ಶ್ರೀ ಕ್ರಿಷ್ಟ ||

16

ಬರಡ್ ಎಲ್ಲೆನೆ ಪಾಂಡು ಬಾಲೆಲು
ಪಡೆನ್ ಕೂಡ್‌ದ್ ಕುರುನ ಕುಟುಮೊದ
ಲಡಯಿದಾ ಕಳ ಕ್ಷೇತ್ರೊ ಜಾಗೆಗ್ ಎನಡ ಕಾದಿಯೆರೆ ||
ಜಯೊನು ಪಡೆಯೆರ್‌ಡಕ್‌ಲ್ ಆಳ್ವೆರ್
ಅಪಜಯೊನು ಪಡೆಯೆರ್‌ಡ್ ಸೊರ್ಗೊದ
ಸುಕೊನು ಪಡೆವೆರ್ ಪತ್ತೆ ಲಡಯಿದ ಬೂಳ್ಳೊ ಬಟ್ಟಲ್‌ನ್ ||

17

ಜ್ಞಾನೊ ಮುದ್ರೆದ ಕೈಕ್ ಲಡಯಿದ
ಬೂಳ್ಳೊ ಕೊರ್ನಗ ಪಳ್ಳ ಕುದ್ದೆರ್
ಬಾಂಗ್ ಪತ್ತಿಯೊ ಬೀಸ್ಮ ಕಣ್ಣೆಡೆ ನೀರ್ ಅರಿದಾಂಡ್ ||
ವಾಸುದೇವೆನೆ ಮುಗುರು ತೆಲಿಕೆಡ್
ಕೌರವೇಸ್ವರೆ ಕೊರ್ನ್ ಬೂಳ್ಳೊನು
ತಾನ್ ಪತೊನುದು ಪನ್ನೆನಾ ಸಬೆಟಿತ್ತನಾಕ್‌ಲೆಗ್ ||

18

ಬೀಸ್ಮ ದ್ರೋಣೆರ್ ಕೃಪೆರ್ ಗುರುಕುಲು
ಮಾತೆರಲ ಕೇನಿತ್ತೆ ಪನ್ನುನ
ಯಾನ್ ಏಶಲ ಪಂಡೆ ನೀತಿನ್ ಕೌರವೇಸ್ವರಗ್ ||
ಆಂಡಲಾಯೆನೆ ಹಟೊನು ಬುಡ್ಡುಜೆ
ದಾನೆ ಮಲ್ಪುನೆ ಪನ್ನೆ ತೆರಿಪುಜಿ
ಬೂಳ್ಳೊ ಕೈಟೇ ಉಂಡು ಪೋಯೆರೆ ಮನಸ್ ಪಿರವಾಂಡ್ ||

19

ಪ್ರಾಯೊದಾಕ್‌ಲ್ ಬುದ್ಧಿವಂತೆರ್
ತೀರ್‌ನಾಶಲ ಪಂಡ್‌ದುಂತಲೆ
ಕಾಳಗೊನು ಈ ಬೂಳ್ಳೊ ತೀರ್ಮಾನೊಂದು ಗ್ರೇಯೊನಡೆ ||
ರಾಜಿ ಮಲ್ತರಡೇನ್ ಬೂಳ್ಳೊನು
ದೀವೆ ತಿರ್ತ್‌ಗ್ ಮಾನೊ ಮರೈದಿ
ದಾಲ ಲೆಗಿಪಂದೇನ್ ಪಂಡ್‌ದ್ ತೇರ್‌ನೇರೊಂಡೆ ||

|| ಕ್ರಿಷ್ಟನ ಕುಸೆಲ್ ||

ಹರಿಯೆ ತೇರ್‌ನ್ ಏರಿ ಸಾತ್‌ಗ್
ಜಯೊ ಜಯೊಂದುದು ಅಡ್ಲೊ ಬೂರೈರ್
ವಿದುರೆ ಬೀಸೈರ್ ದ್ರೋಣ ಗುರುಕುಲು ಮಾತ ಸಜ್ಜನೆರ್ ||
ಅಕಲೆ ಪಿರವುಡೆ ಕರ್ಣೆಲಾ ಸಿರಿ
ಹರಿನ ಸೋತೊನು ಪಂಡೊನುಂದೇ
ಪರಮ ಪುರುಸಗ್ ಅಡ್ಲೊ ಬೂರಿಯೆ ಸುದೊ ಬಾವನೆಡ್

1

ಬರ್ದೆ ಪಂಡ್‌ದ್ ಕೈತ್ತ ಸನ್ನೆಡ್
ಕ್ರಿಷ್ಟೆ ತೆರಿಪದ್ ತೇರ್ ದೇರ್‌ಲ
ಪನ್ದ್ ಸಾರತಿಗಪ್ಪಣೆನ್ ಕೊರುದಾದ್ ಪಿರತೂಯೆ ||
ಕರ್ದೆನೇ ಕೈ ಮುಗಿದ್ ಉಂತ್‌ನ
ಬಗ್ಗಿ ಬಾವೊಗು ಮೆಚ್ಚಿದಾಪಗ
ಲೆತ್ತೆ ಬಲ ಬಲ ಪನ್ದಲಾಯನ್ ತನ್ನ ಕೈ ತಡೆಗ್ ||

2

ತೇರ್‌ದುಲಯಿಗ್ ಒಯ್ತ್ ಕುಲ್ಲಯೆ
ತಾನ್ ಕುಲ್ಲೆನ್ ಪೀಟೊದೊತ್ತುಗು
ಯಾನ್ ಕುಲ್ಲಯೆ ಪನ್ದ್ ಕರ್ಣೆನೆ ಉಂತ್ಯೆ ಕೈ ಮುಗಿದ್ ||
ಸ್ವಾಮಿ ಜಾತಿಡ್ ಹೀನೆಯಾಯಿನ
ಸೂತೆ ನಿನ್ನವೆ ಸಮೊಕು ಕುಲ್ಲುನ
ಏಗಿತೊದ ನರಮನಿಯೊ ಪನ್‌ಪನ್ ದೇವ ಸಿರಿಕ್ರಿಷ್ಟ ||

3

ಕರ್ದ ಈ ಏರ್‌ಂದ್ ತೆರಿತ್‌ಜ
ಎನ್ನ ಬಾವೆನೆ ಪನ್ನಿ ಸಂಗತಿ
ನಿನ್ನ ಯೇಗಿತೊ ರಾಮಚಂದ್ರಗ್ ಸರಿಟ್ ಉಂಡತ್ತೊ ||
ಸಿಸ್ತಿ ಸಿತಿಲಯೊ ಕಾರ್ಯೊ ಪನ್ನುನ
ಗೊಬ್ಬು ಗೊಬೈರೆ ಏರೆನ್‌ಲ ಈ
ಪನ್ನ ಬಾವೆಂದೆಂಕ್ ತೆರಿದುಂಡತ್ತೊ ಶ್ರೀ ಹರಿಯೆ ||

4

ಪಲಿನ ಏಸೊಡು ಆನಿ ಚಂದ್ರಾ-
ವಳಿನ್ ಈಯೆ ಮಂಗೆ ಮಲ್ತದ್
ಮದಿಮೆ ಆಯಿನ ಲೆಕೊನೆ ಯಾನೇ ಬಾವೆ ಆಯಿನೆನೊ ||
ನಿಜೊನು ಪನೊಡೆಂಕಿತ್ತೆ ಪಂಡ್‌ದ್
ಮುರ ವಿರೋದಿನ ಕಾರ್ಗ್ ಬೂರಿಯೆ
ಅಪಗ ಕ್ರಿಷ್ಟೆನೆ ಮುಗುರು ತೆಲಿಕೆಡ್ ಪನ್ನೆ ಇವರಾದ್ ||

5

ಮಾಮಿ ಕುಂತಿಯೆ ಕುಂತಿ ಬೋಜನ
ಸಾಂಕನೊದ ಮಗಲಾದ್ ಎಲ್ಯೆಡ್
ಪ್ರೀತಿಡಿತ್ತಲ್ ಆಯನರಮನೆದುಲಯಿ ಬಲತೊಂದು ||
ಆಡೆ ದೂರ್ವಾಸೇರ್ ಪನ್ನುನ
ಬಾರಿ ಕೋಪೊದ ರುಸಿಯೆ ಬತ್ತನ
ರಾಜಕಾರಣೊಡರಸು ತೆರಿಚೆನೆ ಆರ್ ಬತ್ತನೆನ್ ||

6

ತನನ್ ಮರೈದಿಡೆದೊನಿಯೆರೆನೆ
ಅರಸು ಬತ್ತೆಚೆ ಪನ್ನಿ ಕೋಪೊಡು

ಪರುನು ಕಡೆವೊಂದುಪ್ಪುನೆನ್‌ಲಾ ಕುಂತಿ ತೂದಪಗ ||
ಉಲಯಿ ಕುಲ್ಲದ್ ಪಾದೊ ಪೂಜೆನ್
ಸರಿಟ್ ಮಲ್ತೆನ ತೂದು ದೂರ್ವಾ-
ಸೆರೆಗ್ ಸಂತೋಸಾದ್ ಕುಂತಿನ ತರೆಕ್ ಕೈದೀಡ್ ||

7

ದೇವತೆಲೆ ವಸಿಕರೊತ ಮಂತ್ರೊನು
ಆಲೆ ಕೆಬಿಟೇ ಪನ್ದ್ ಕಲ್ಪಯೆ-
ರಾರ್‌ಲಾಲೆಗ್ ಬುಕ್ಕೊ ಪಂಡೆರ್ ನೇನ್ ಕಲ್ಪೊನುಲ ||
ಬಾಲೆಲಾಪುನ ಯೋಗೊ ಪಡೆಪಿನ
ಸಾದಿ ಯಾವುಯ ನಿಕ್ಕ ಜೋಕುಲು
ಬೋಡನಗ ದೇವತೆಲೆ ಪೈಕಿಡ್ ಒರೈನೀಯಪಗ ||

8

ನೆನೆತ್‌ದೇ ಈ ಮಂತ್ರೊ ಜಪಿಪುಲ
ಅಪಗ ಬರ್ದೆನೆ ಆಯೆ ನಿನ್ನವೆ
ಮೆಯಿನ್ ಮುಟ್ಟೆನ ಸಾತ್‌ಗೀಯೆ ಪೆದ್ದ ಬಾಲೆನ್‌ಲ ||
ಕುಟುಮೊ ಸಂತಾನೊನುಲ ಒರಿಪುನ
ಪರಮ ಪುಣ್ಯೊನೆ ನಿಕ್ಕ ಪಂಡ್‌ದ್
ತಪಸ್ ಮಲ್ತೆರೆ ಪೋಯೆರಾರುಸಿ ತನ್ನವಾಸ್ರಮೊಗು ||

9

ಜೋಕುಲಾಟೆಗಡಾಲ್ ಗೊಬ್ಬುನ
ಬಾಲೆದಾಸೆಡ್ ಗಂಗೆದಾ ಬರಿ-
ತಡೆಗ್ ಒರೈಯೆ ಬತ್ತ ಮೀಯಲ್ ಪುಣ್ಯೊ ಸೀರ್ತೊಡುಲ ||
ಸೀರೆ ತುತ್ತುದು ಮಿತ್ತ ಬಾನೊಗು
ತೂದು ಸೂರೈನೆ ನೆನೆತ್‌ದಾಪಗ
ಆ ರುಸಿನ ಉಪದೇಸೊ ಮಂತ್ರೊನು ಜಪಿತ್‌ದುಂತಿಯಲ್ ||

10

ಆಪಗನೆ ರುಸಿ ಮಂತ್ರೊ ಸಗ್ಗಿಡ್
ಸೂರೈ ನಿಜೊರೂಪಾದ್ ಬತ್ತದ್
ಮಾಮಿನಾ ಮೆಯಿ ಮುಟ್ಟಿ ಸಾತ್‌ಗ್ ಆಣ್ ಬಾಲೆನ್‌ಲ ||
ತಾನ್ ಪೆದ್ದದ್ ದಾನೆ ಮಲ್ತುನೆ
ಬಾಲೆನೆಂಚೇನಿತ್ತೆ ಕೊಂಡೊವೆ
ಯಾನ್ ಪಂಡ್‌ದ್ ಚಿಂತೆ ಮಲ್ತಲ್ ಬಾರಿ ಬುಲ್ತೊಂದು ||

11

ದಾನೆ ಆವಡ್ ಪನ್ದ್ ಬಾಲೆನ್
ನೀರ್‌ಗೇ ಪಾಡಿಯಲ್ ಗಂಗೆನ್
ಪ್ರಾರ್ತನೆನ್ ಮಲ್ತೊಂದು ಇಂದೆನ್ ಈಯೆ ಬದ್‌ಕಾಲ ||
ಏಳ್ ಜೋಕುಲೆನಾಲ್ ನೀರ್‌ಗ್
ಪಾಡೆನಾ ಮಹ ಪಾಪಿಯಾಂಡಲ
ಬಾಲೆನೇ ಬದ್‌ಕವೊಡು ಪಂಡ್‌ದ್ ಪೊಯೈಗಡಕಿಯಲ್ ||

12

ಪೊಯ್ಯೆಡೇ ಪುರಲೊಂದು ಬುಲ್ಪುನ
ಪೊರುದವೆ ಬಾಲೆನ್‌ಲ ಅದಿರತೆ
ಪನ್ನಿ ಸೂತನೆ ಕೊನೊದು ಬುಡೆದಿಡ ಕೊರು ಸಾಂಕಾಯೆ ||
ಕರೈ ಪನ್ನುನ ಪುದರ್ ದೀಡಿಯೆ
ಎನ್ನ ಬಾವೆನೆ ಎಂಚ ಪಂಡ್‌ದ್
ನಿಕ್ಕ ತೆರಿದಾಂಡತ್ತೊ ಪನ್ನಗ ತಿಗಲೆಗಾಕೊಂಡೆ ||

13

ಕೆರೈನೇ ಓ ಕ್ರಿಷ್ಟ ಕೌರವ
ನೆನ್ನ ಸ್ವಾಮಿನ್ ಯಾನ್ ಪುಟ್ಟನ್
ಮಲ್ಲ ಕತನೀ ಪನ್ದ ಎನ್ನನ್ ಲಗಡಿದತ್ತತ್ತೊ ||
ಯುದೊದಾ ಸಿರಿ ಬೂಳ್ಳೊ ಪತ್ತ್‌ದ್
ಇತ್ತೆ ಪನಿಯೆರೆ ನಿಕ್ಕ ಪುರೊತ್ತು
ತಿಕ್ಕನೆನೊ ಹಾ ಪನ್ದ ಬುಲ್ತ್‌ದ್ ತರೆಕ್ ಹಾಕೊಂಡೆ ||

14

ಕಾದುವೆನೊ ಪಾಂಡವೆರ್ ಎನ್ನವೆ
ಕಾಸ ಮೆಗ್ಯಲ್ಲತ್ತೊ ಕಾದ್ಯರೆ
ಜಾರಿಯೆಡ ಎನ ಸ್ವಾಮಿಗಿನಿ ಗತಿ ಏರ್ಲ ಇದ್ಯತ್ತೊ ||
ಕೂಟೊ ಕೌರವನೊಟ್ಟು ಒಣ್ಣಾಲ
ಸ್ವಾಮಿಯಾಯನ ಒಟ್ಟು ನಿದೆರುನೆ
ರಾಜನೊಟ್ಟುಗೆ ಬೋಂಟಿ ಕುರುಕುಲ ವೀರನೊಟ್ಟುಗೆನೆ ||

15

ಜಾತಿ ಹೀನೆನೆ ಪನ್ದ ಎನ್ನನ್
ದೂರೊ ಮಲ್ತೆರ್ ಮಾತ ಆಂಡಲ
ಪ್ರೀತಿದೆನ್ನನ್ ಅಂಗ ರಾಜ್ಯೊನು ಕೊರ್ದು ಸಾಂಕ್‌ನಯೆ ||
ಆಪಿ ಕಾಲೊಗು ಯಾನ್ ಇದ್ದಿಯೆ
ದಾಯೆಗೀ ಜಲ್ಮೊಂದು ರತೊಡುದು
ಲಾಗಿನಗ ಸಿರಿ ಕ್ರಿಷ್ಟ ಒಯ್ತದ್ ಆಯನುಂತಾಯೆ ||

16

ಕರೈ ಕೇನ್‌ಲ ಪನ್ನೆ ಈಯೆ
ರಡ್ಡ ಕಡೆಕಲ ಹಿರಿಯಯನೆ ನಿಜೊ
ಕುರುಕುಲೊತ ಸಿರಿ ಸಿಮ್ಮೊ ಪೀಟೊನು ಏರಿಯಡ ನಿನ್ನ ||
ಎಡತ್‌ಡುಂತ್ತೆರ್ ಪಾಂಡು ಬಾಲೆಲು
ಬಲತ್ ಕೌರವೆರುಂತುವೆರ್ ನನ
ಎದುರು ಯಾದವನಕ್‌ಲ್ ಕುಲ್ಲುನ ಮಲ್ಲವಾಸ್ತಾನೊ ||

17

ಆಪುನೆನ್ ತಪ್ಪವಡ ಪನ್ನಗ
ದೇವ ನಿನ್ನವೆ ರಾಜಿ ಪಾತೆರೊ

ಆನಗನೆ ಕೌರವೆನೆ ಒತ್ತದ್ ಉಪ್ಪದಡ ಈಯೆ ||
ಯಾನ್ ಪುಟ್ಟನ್ ಕತೆನ್ ಪನ್ನನ್
ದಾಯೆ ಪಂಡ್‌ಜ ದುಂಬು ಎನ್ನಡ
ಈತಲಾ ತೆರಿನಯೆನೆ ಆದಲ್ ನಿನ್ನ ಕುಸೆಲತ್ತೊ ||

18

ಯಾನ್ ತೆರಿತ್‌ಜಿ ಈಯೆ ಪುಟ್ಟನ್
ಮಾತ ಸಂಗತಿ ಕೋಡೆ ವಿದುರೆನೆ
ಆಯನಿಲ್ಲಲ್ ಪಂಡೆ ಎನ್ನಡ ರಾತ್ರೆ ನಿದೆರ್‌ನಗ ||
ನೀತಿ ಪನ್ನುನ ವಿದುರೆ ಪಂಡೆನೊ
ಏಡ್‌ದಾ ಮಗೆ ಪನ್ನೆ ಕೌರವ
ಸ್ವಾಮಿನೇ ಏರೆರೆ ಅಮ್ಮೆನೆ ಏರ್ ಪಂಡೊಂದು ||

19

ಬರುವಯೆ ತಾನೇರೆ ಮಗೆನೇ
ಪನ್ನಿ ವಿಸಯೊನು ಗುಟ್ಟು ಮಲ್ತದೆ
ಮಲ್ಲರುಸಿ ವ್ಯಾಸೆರೆಗ್ ಕೊರತೆನೆ ಆವು ಪಂಡೊಂದೊ ||
ಎನ್ನ ಜಲ್ಮೊನು ಲಗಡಿದತ್ತನೆ
ಕ್ರಿಷ್ಟ ಕೇನ್‌ಲ ಯಾನ್ ಮಲ್ತನ
ನಿಚ್ಚೆಯೊನು ನಿನಡೇನ್ ಪನ್ನುನೆ ಮನಸ್‌ಡಿತ್ತನೆನ್ ||

20

ಲಡಯಿದಾ ಕಳಟೀನ್ ಕಾದುವೆ
ಕುರುಪತಿನ ರುಣೊಕಾದ್ ಪಾಂಡವ
ನಕ್‌ಲೆ ಜೂವೊನು ಒರಿಪೆ ನಂಬುಲ ದೇವ ಸಿರಿ ಕ್ರಿಷ್ಟ ||
ಕಡೆಕ್ ನಿನ್ನವೆ ಕಾರ ಮುದೆಲ್‌ಡ್
ಸಯಿರೊ ಸಾಕಿನಿ ಗಣೊಕು ಆತ್ಮೊನು
ಹರಿಯೆ ನಿನ್ನವೆ ಹೃದಯೊಗೊಪ್ಪವೆ ನಿನ್ನ ಸಂತೊಸುಗು ||

21

ಎನ್ನಡೆನೆ ಇಸ್ವಾಸೊ ಉಂಡುದ
ಇತ್ತೆ ನಮೊ ನಮೊ ಪಾತೆರಿನೆನ್‌ಲ
ಪನ್ನುನವು ಬೊಡ್ಡಿಂದ್ ಪಿದಡಿಯೆ ಹರಿಗ್ ಕೈ ಮುಗಿದ್ ||
ಕರೈನೇಕಿನಿತನೊನು ಮೆಚ್ಚಿದ್
ತನ್ನ ಸಾರತಿಡಪಗ ಪಂಡೆನೆ
ಚಿನ್ನಯಾತ್ಮಕೆ ರತೊನು ದೇರೈರೆ ಪಾಂಡವೆರೆನಾಡೆ ||

ಕುಂತಿ ಕರ್ಣನ್ ತೂಯಲ್

ಕರೈ ಅರಮನೆಗೆತ್ತೆನಾಪಗ
ಪೊರು ಕಂತ್‌ದ್ ಆಂಡ್ ಕತ್ತಲೆ
ನಿತ್ತೊ ಕರ್ಮೊನು ತೀರ್ದಾಯೆನೆ ಜಿತ್ತೆ ಮಂಚವುಡು ||

ಕಣ್ಣಡೆನೆ ನೀರರಿಪವೊಂದೇ
ದುಕ್ಕೊ ಮಲ್ಪುನ ತೂದು ಬುಡೆದಿಯೆ
ಕೈತ್ತಡೆಗ್ ಬತ್ತೊಂದು ಕೇಂಡಲ್ ದಾನೆ ಆಡ್ಂದ್ ||

1

ಆಲೆಡಲ ಪಂಡ್ಜೆನೆ ತಾನೇ
ಸೇಂಕ್ ಸೇಂಕೊಂದಿತ್ತೆ ರಾತ್ರಡ್
ದಾನೆ ಆಂಡಲ ನಿದ್ರೆ ಬತ್ತಜಿ ಕೋರಿ ಕೆಲೆತ್ನೆಟ ||
ಕಾಂಡೆ ಲಕ್ಕದ್ ಮೀಯೆರೆಂದ್
ಪೋಯೆ ಗಂಗದ ಬರಿಕ್ ಕುಂಟುನು
ಮಾತ್ದಾಯೆನೆ ನೀರ್ಗ್ ಜತ್ತದ್ ಮುಕ್ಕೈನೀರ್ಪುಲಯಿ ||

2

ಮೂಜಿ ಸರ್ತಿಯೆ ಮುರ್ಕದಾಪಗ
ದೇವೆರೆನ ಮಂತ್ರೊಲೆನ್ ಜಪಿತ್ದ್
ಆ ಸುದೆತ ಬರಿಟುಂತ್ಯೆ ಚಂಡಿನ್ ಕುಂಟುಡೊಚ್ಚೊಂದು ||
ಬಾನೋಗೇ ತೂವೊಂದು ಸೂರ್ಯನ
ಗಾಯತ್ರೀದವೆ ಮಂತ್ರೊ ಜಪಿಪುನ-
ಗಾಪನೆ ದೂರೊಡ್ಡು ಬರ್ಪುನ ತೂಯೆನೊರ್ತಿನಲ ||

3

ಕುಜಲ್ ನರೆತ್ನ ಬೊಲ್ಪು ಸೀರೆದ
ಅರೆಪರಬು ನಡತೊಂದು ಬರ್ಪುನ
ನಿಲ್ಕ್ ತೂನಗ ಕುಂತಿ ಬರ್ಪುನೆ ಪನ್ದ ತೆರಿಯೊಂಡೆ ||
ಪೆದ್ನ ಅಪ್ಪೆನ್ ತೂಪಿ ಯೋಗೊನು
ಒದಗಯಿನೆ ಸಿರಿಕ್ರಿಷ್ಟೆ ಪಂಡ್ಡ್
ನೆನೆತ್ದುಪ್ಪುನಗಪಗ ಎತ್ತಲ್ ಮಗನ ಕೈತಡೆಗ್ |

4

ನೀರ್ಡ್ಡ್ ಲಕ್ಕೊಂದು ಗಂಗಾ-
ದೇವಿ ಬತ್ತದ್ ಕರ್ಣ ಕೈತಲ್
ತಾನೆ ಉಂತುದು ಕುಂತಿಡಾಪಗ ಕೇನ್ ಮಗಲೆಂದ್ ||
ಈಯೆ ಪೆದ್ದನ ಬಾಲೆನೆನ್ನವೆ
ನೀರ್ಗ್ ಪಾಡಿಯ ಬದ್ಕಲಂದ್
ಯಾನ್ ಬದ್ಕಯಿ ಬಾಲೆ ಇಂಬೈನೆ ಕರ್ಣೆ ನಿನ ಮಗೆನೆ ||

5

ಈತ್ನೇಟಲ ಇಂಬೈ ಕುಜಲ್ಗ್
ಕೋರೆ ಆವಂದ್ನವೆ ರೀತಿಡ್
ತೂವೊಂದಿತ್ತೆನೆ ಈಯೆ ಗೆತೊನುಲ ನಿನ್ನ ಮಗನಿತ್ತೆ ||
ಯಾನ್ ಪೋಪೆಂದಾಲ್ ಗಂಗದ
ನೀರ್ಡೇ ಒಂಜಾಯಿನೆನ್ ಸರಿ
ತೂದುಲಾಚಿರೊ ಆಂಡ್ ಕುಂತಿಗ್ ಬುಕ್ಕೊ ಕರ್ಣಗ್ ||

6

ಆಪಗನೆ ಬಾನೊಡ್ಡು ಜತ್ತನ
ಸೂರ್ಯನವೆ ಸರಿ ಗುರ್ತೊ ಕರ್ಣಗ್
ಆವಂದುಪ್ಪುನಗಪಗ ಕುಂತಿಗ್ ಗುರ್ತೊ ಆಯಿನೆಟ್ ||
ತಾನ್ ತರೆ ತಗ್ಗಾದ್ ಉಂತ್ಯಲ್
ಬಾನೊದರಸುಲ ಪಂಡೆ ಕರ್ಣಡ
ಈಯೆ ಮಗೆ ಎನ್ನವುಯ ಸೂರ್ಯನೆ ಯಾನ್ ಗೊಂತಾಂಡೊ ||

7

ನಿನನ್ ಪೆದ್ದದ್ ನೀರ್ಗ್ ದಕ್ಕನ
ಬಿರ್ಸೆದಿಯೆ ಈ ಕುಂತಿ ಮೋಲೆಗ್
ಮದಿಮೆ ಆಯಿನ ಬುಕ್ಕೊ ಚೋಕುಲು ಮೂವೆರುಲ್ಲೆರ್ಯ ||
ಅಕ್ಲ್ ಜವನೆರ್ಲಾದ್ ಇತ್ತದ್
ಮದಿಮೆ ಆಪುನ ದುಂಬು ಪೆದ್ದನ
ಮಗನ್ ತೂಯೆರ್ಡಾವು ಗಂಡಾಂತುರೊನೆ ಪಂಡೊಂದು ||

8

ನಿನನ್ ದೆಪೈರೆ ಬತ್ತಲೀಡೆಗ್
ಕೊರಡ ಬಾಸೆನ್ ಅಪ್ಪೆ ಪಂಡ್ಡ್
ನೆನೆಪು ದೀವೊನು ಕರ್ಣ ಪನ್ನಗ ಕುಂತಿ ಪಿಸ್‌ರೆರ್ಡ್ ||
ನಡ್‌ಗೊನುಂದೇ ಪಂಡಲಾಯಡ
ರುಸಿನ ಮಂತ್ರೊನು ಎಲ್ಯ ಪಿರಯೊದ
ಮರ್ಲ್‌ಡೇನೇ ಜಪೊನು ಮಲ್ತನ ನಿಕ್ಕ ತೆರಿಯಂದೊ ||

9

ನಿಕ್ಕಲಾ ಮರುಂಡೊ ದಾಯೆಗ್
ಬತ್ತದೆನ್ನನ್ ಮುಟ್ಟಿನಪಗನೆ
ಪೆದ್ದನಾಲೆನ್ ತೂದು ಬಾನೊಗು ದಾಯೆ ಲಾಗಿನೆಯೆ ||
ನಿನ್ನ ಬಾಲೆದ ಮೋನೆ ತೂಯನ
ಎನ್ನವಸ್ತನ್ ಈಯೆ ಗ್ರೇಯ್ತನ
ಇತ್ತೆ ಕೊಚ್ಚುವ ಮಗನ ಎದುರುಡು ನಿನ್ನ ಮರ್ಯದಿನ್ ||

10

ರುಸಿನ ಮಂತ್ರೊದ ಸಗ್ಗಿಡತ್ತೊಯ
ನಿನನ್ ಮುಟ್ಟಿನೆ ಎನ್ನ ಬಾಲೆನೆ
ಬದ್ಕೊಡುಂದುದು ಅಲವುದಂಗಿನ್ ಕೊರೆ ಪುಟ್ಟಿನಗ ||
ಅಯಿನ್ ನಿನ್ನಜುರ್ನನ ಅಮ್ಮೆನೆ
ಬೆರಣ ಏಸೊಡು ನಟ್ಟಿನಾಯೆನೆ
ನಿನನೆ ಮೂಸಯೆನಿತ್ತೆ ಈಯೇ ಪರಬು ಆಯತ್ತೊ ||

11

ನಿನ್ನ ಬಾಲೆಲು ಕಾಡ್ಡ್ ಬರೆಲೆರೆ
ಬಲ್ಲಿ ಪಂಡ್ಡ್ ಕೊಪ್ಪರಿಯೊ ಯಾ-

ನತ್ತೊ ಕೊರ್ತೆನೆ ಇತ್ತೆ ದೂರುವ ಎನನ್ ಹಂಕರೊಡು ||
 ನಿನ್ನ ಕೆಲಸೊಗು ಉಲ್ಲೆ ಅತ್ತೊಯು
 ಮಿತ್ತಲೋಕೊದ ಅರಸು ರುಸಿನವೆ
 ಪೊಣ್ಣನೊಪ್ಪರೆ ಕೋರಿಯಾದೇ ಕೆಲೆತನಾಯೆತ್ತೊ ||

12

ಆಯೆ ಪಾಂಡುನ ಏಸೊ ಪಾಡ್‌ದ್
 ಪಾಂಡವೇರೆನ್ ಬದ್‌ಕವಡ್ ಪನ್
 ದಾಯೆ ಕರ್ಣನ್ ಲಗಡಿ ದೆಪ್ಪರೆ ತೂಪ ಪಂಡೊಂದು ||
 ಬಾರಿ ಸಗ್ಗಿದ ಬಾಣೊ ಒಂಜೆನ್
 ವೀರ ಕರ್ಣಗ್ ಕೊರ್ದು ಬಾನೊಗು
 ಏರಿಯೆನಲಾ ಸೂರೈ ಲೋಕೊದ ಬೊಲ್ಪು ಬೆಳಗಯೆರೆ ||

13

ತನ್ನ ಮಗನೆದುರೆದುರೆ ಮರ್ದದಿ
 ದತ್ತೆ ಸೂರೈನೆ ಪನ್ದ ಕುಂತಿಯೆ
 ದುಕ್ಕೊ ಮಲ್ತೊಂದುಪ್ಪುನಾಪಗ ಕರ್ಣ ಕೈತಡೆಗ್ ||
 ಬತ್ತದಾಲೆನ ಕಣ್ಣ ನೀರ್‌ನ್
 ಉರ್ದೈ ಕುಂಟುಡು ಅಪ್ಪೆ ಬುಲ್ಪಡೆ
 ನಮ್ಮ ಗ್ರಾಚಾರೊಲೆಡ್ ಆಪುನೆ ಇಂಚಿ ದುರೋಗೊ ||

14

ದಾಯೆ ಬತ್ತರ್ ಎನಡ ಈರೆಗ್
 ದಾನೆ ಆವೊಡು ಪನ್‌ಲೆ ಪನ್ನಗ
 ಬಾಲೆ ಈ ಕಾತೊನುಲ ನಿನ್ನವೆ ಮೆಗೈನಾಕ್‌ಲೆನ್ ||
 ಈರೆ ಜೋಕುಲು ಮಲ್ಲ ಬಿಸೆರ್
 ಯಾನ್ ಮರ್ದದಿ ಕೆಟ್ಟನಾಯೆನೆ
 ಕಾಪುನೆಂಚಂದೆಂಕ್ ತೆರಿಯಂದಪ್ಪೆ ಕೇನ್‌ಲೆಯೆ ||

15

ಸಯ್ಪುನಕ್‌ಲೆಗ್ ಸಯೈರೆಗ್‌ಲಾ
 ಕೆರ್ದುನಕ್‌ಲೆಗ್ ಕೆರೈರೆಗ್‌ಲಾ
 ನಿಚ್ಚೆಯೊದ ಸಿರಿ ಬೂಳ್ಳೊ ಪತೊನುದು ಪೋತೆ ಶ್ರೀ ಕ್ರಿಷ್ಣೆ ||
 ಸಾಂಕ್‌ನಾಯೆನೆ ಎನನ್ ಕೌರವೆ
 ಆಯಗಾದೇ ಯಾನ್ ಕಾದ್‌ದ್
 ಜೂವೊ ಬುಡಿಯೆರೆ ತಯರ್‌ಡುಲ್ಲೆನೆ ದಾನೆ ಮಲ್ಲೇನ್ ||

16

ನಿನ್ನವೇ ಮೆಗೈಲ್ಲೆನೀಯೇ
 ಕೆರ್ದನಯ ಮಗ ಕಾದ್‌ದಕ್‌ಲೆಡ
 ಬುಕ್ಕೊ ಕಾಪುನೆರೆರ್‌ಲಕ್‌ಲೆನ್ ಪನ್ದ ಬುಲ್ಪುನಗ ||
 ಕಣ್ಣದಾ ನೀರುರ್ದದಾಯೆನೆ
 ಅಪ್ಪೆ ಪೆದ್ದನರೀರ್ ಎನ್ನವೆ
 ಇಲ್ಲಡೆಗ್ ಬರೊಡಿತೆ ಈರೆನ ಪುಳ್ಳಿನಾಕ್‌ಲೆನ್ ||

17

ತೂದು ಮರ್ಮಲೆ ಕೈತ್ತ ಪೇರ್‌ನ್
 ಯಾರುನಾತ್‌ಲ ಪರ್ಡ್ ಎಂಕ್‌ಲೆ
 ಗಾಸಿರ್ವಾದೊನು ಕೊರ್ದ ಪಂಡ್‌ದ್ ಕೇನ್ನಗಾಲಪಗ ||
 ಈಯೆ ನಿನ್ನವೆ ಮೆಗೈನಕ್‌ಲೆನ್
 ತೂದು ಎನ್ನನ್ ಪನ್‌ಲ ಬರೈರೆ
 ಆಪಗನೆ ಬರುವೆಂದ್ ಪನ್ನಗ ಪನ್ನಿನಾ ಕರ್ಣೆ ||

18

ಬರೈರೆಗ್ ಮನಸಿದ್ಡಿ ಈರೆಗ್
 ಎಡ್ಡೆನೇ ಆಂಡತ್ತೊ ಪೆಚ್ಚೆರೆ
 ತಿಕ್ಕಿ ಬಾಲೆನೆ ಏರ್ನ್ ಪಂಡ್‌ದ್ ಗೊಂತು ಇದ್ಯಂದೆ ||
 ಎಣ್ಣೆ ಪೂಜಿದ್ ಬೆಂದ್ ಮೀಪದ್
 ತೊಟ್ಟಿಲ್‌ಡ್ ಜೆಪುಡಾದ್ ಮಾಣದ್
 ಒಚ್ಚಿದೆನ್ನನ್ ನಿದ್ರೆ ಮಲ್ಪದ್ ಬುಕ್ಕೊ ಉನ್ಪದ್ ||

19

ಸಾಂಕ್‌ನಾ ರಾದಕೈನೆದುರುಡು
 ಏರೆನ್‌ಲ ಅಪ್ಪೆಂದ್ ಲೆಪ್ಪಯೆ
 ಈರ್ ಪೆದ್ದದ್ ನೀರ್ಗ್ ಎನ್ನನ್ ದಕ್ಕನಾರತ್ತೊ ||
 ಸಾಂಕ್‌ನವೆ ಅಪ್ಪೆಮ್ಮನಕ್‌ಲೆನ
 ಪ್ರೀತಿದಾ ಕೌರವನ ಬಾಕಿಲ್-
 ಗೇನ್ ಪೋವೆನೆ ಬಾಕಿದಕ್‌ಲೆನ ಮೊಟ್ಟು ಮಿತರಯೆನೆ ||

20

ಪೆದ್ದನಾ ರುಣೊಕಿತ್ತೆ ಕೇನ್‌ಲೆ
 ಎನ್ನಡನೆ ಕೌರವಗ್ ದೋಸೊನೆ
 ಬರ್ದುನೆನ್ ಕೇಂಡ್ರೊಡ್ಡಿ ಪನ್ನಗ ಕುಂತಿ ಗ್ರೇಯ್ತೊಂದು ||
 ನಿಕ್ಕ ಸೂರೈನೆ ಕೊರ್ದ ಬಾಣೊನು
 ನಿನ್ನವೇ ಮೆಗೈಲ್ಲೆ ಮೇಲ್‌ಗ್
 ಬುಡ್ಡಡಾಮಗ ಪನ್ದ ಕಣ್ಣಡೆ ನೀರ್‌ನರಿಪಯಲ್ ||

21

ಆಂಡ್ ಈರೆನ ಬಾಲ್ಲೆ ಮೇಲ್‌ಗ್
 ಯಾನ್ ಬುಡ್ರಯೆ ಎನನ್ ಸಾಂಕ್‌ನ
 ಪ್ರೀತಿದಾ ರಾದಕೈನಾಜೊನೆ ಉಂಡು ನಂಬೊನುಲೆ ||
 ಈತ್ ಪನ್ನಗ ಸಂತೊಸಾದ್‌ಲ
 ಪೋಪೆ ಪಂಡ್‌ದ್ ಕುಂತಿ ಪೋಪುನ
 ತೂದು ವಿದಿನೇ ದೂರೈ ಕರ್ಣೆನೆ ಬಾರಿ ಬೇಜರೊಡು ||

22

ಯಾನೆ ಏರ್‌ಂದೆಂಕ್ ತೆರಿಯಂ-
 ದೇನ್ ಸೋಲ್ಪುದು ಇತ್ತೆ ತೆರಿದ್‌ಲ

ಸೋಲೈ ಪಂಡ್ ಕರ್ಣೆ ಪಿದಡಿಯೆ ತನ್ನ ಅರಮನೆಗ್ ||
ಬ್ರಾಣೆರೆನ್ ಬಡವೆರೆನ್ ಬರ್ಪದ್
ದಾನೊ ಧರ್ಮೊನು ಮಲ್ತನೇತ್
ಮಾತೆರೆಡಲಾ ಕೇಂಡೆನಾಸೀರ್ವಾದೊ ಕಲಿ ಕರ್ಣೆ ||

ಒಟ್ಟು ಮಲ್ತದ್ ಪನ್ನಗಾಪಗ ಆ ಯುದ್ಧಿರೆನೆ ||
ತನ್ನ ಕಡೆಕೇ ಬರ್ಪಿ ವೀರೆರೆ
ಕೈತ್ತಡೆಗ್ ಜನೊ ಕಡಮಡುದು ತನ
ಮಗ್ಗನಕಾಲೆಡ ಒಟ್ಟು ಮಲ್ತಯೆ ಲಡಯಿದಟ್ಟಣೆನ್ ||

ಶ್ರೀ ಕ್ರಿಷ್ಣನಪ್ಪಣೆಡ್ ಪಾಂಡವೆರ್ ಯುದ್ಧೊಗು ತಯರಾಯೆರ್

ಹರಿಯೆ ಬತ್ತನ ಸುದ್ದಿ ಕೇಂಡ್
ಎದುರು ಬತ್ತೆರ್ ಪಾಂಡು ಬಾಲೆಲು
ಜಯೊ ಜಯೊನೆ ಪಂಡೊಂದು ಮಾತೆರ್ ಅಡ್ಲೊ ಬೂರಿಯೆರ್ ||
ಉಲಯಿಗೇ ಉಪಪ್ಪವ್ಯೊ ನಗರೊದ
ಅರಮನೆಡ್ ಕುಲ್ಲಾದ್ ಕೇಂಡೆನೆ
ಹಿರಿಯೆರೆನ ಬಂದುಲೆನ ಸುಕೊದುಕ್ಕೊಲೆನ್ ಧರ್ಮಜೆನೆ ||

1

ರಾಜಿಗೊಪ್ಪೆನೊ ಕೌರವೇಸ್ವರೆ
ದಾನೆ ಆಂಡ್ಂದೆನಡ ತೆರಿಪಲ
ಪ್ರೀತಿಡೀಯೇ ಪನ್ನಗಾಪಗ ಮೋನೆ ಬಾಡಾದ್ ||
ಪಾಂಡವೆರೆ ಹಕ್ಕದವೆ ರಾಜ್ಯೊನು
ಈಯೆ ಕೊರ್ದಂದೇನ್ ಪನ್ನಗ
ಮಾನೊದೆತ್ತೆನೆ ಸಬೆಟ್ ಎನ್ನನ್ ನೆರ್ದ ಕೌರವೆನೆ ||

2

ಕಾಳಗೊದ ಸಿರಿ ಬೂಳ್ಳೊ ಕೊರೈನೆ
ಯಾನ್ ನಿಕಲೆಗ್ ಬೋಡದಾಡೆಗ್
ಪೋಯಿನೆಟ್ ಸರಿ ನೆರಡೆ ಕೇಂಡೆನೆ ಪಂಡೆನಾ ಕ್ರಿಷ್ಣೆ ||
ಆಪಗನೆ ಬೀಮಾರ್ಜನೆರ್ ನಿನ-
ನಾಯೆ ನೆರೈನೊ ಆಯ ಕರ್ಲನ್
ನಾಯಿಲೆಗ್ ತಿನ್ನಾವೊ ಪನ್ನಗ ಕ್ರಿಷ್ಣ ತೆಲಿತೊಂಡೆ ||

3

ಮಿತ್ತ್ ಬಾನೊಗು ತೊದು ಉಬ್ಬಿದ್
ಸುದ್ಲೊ ಕೆಟ್ಟಯೆರುಂಡೊ ನಿನ್ನನ್
ನೆರ್ದ ಕೌರವೆ ಏತ್ ದಿನೊ ಬದಕುವೆನೊ ತೆರಿಯಂದ್ ||
ಪನ್ದ ಧರ್ಮಜೆ ಎಂಕ್ ಬೋಡದ್
ಕೊರ್ದ ಕ್ಷಮೆ ಪಂಡೊಂದು ಕಾರ್ಗ್
ಅಡ್ಲೊ ಬೂರ್ನಗ ದೆರ್ತ್ ಲಕ್ಕಯೆ ಪ್ರೀತಿ ಬಾವನೆಡ್ ||

4

ಎಲ್ಲೆನೇ ಪಿದಡೋಡು ಕಾಳಗೊ
ಮಲ್ತುವೆ ಕಳತಾಡೆ ಸೈನ್ಯೊನು

5

ಆ ವಿರಾಟನ ಸೇನೆ ದ್ರುಪದನ
ಮೂಜಿ ಅಕ್ಷೋಣಿದವೆ ಬಲೊ ಸರಿ
ಟಾಯುದೊಲೆ ಕುದುರೆಲೆನ್ ತೇರ್ನ್ ಆನೆ ಕಾರ್ಡೊನು ||
ಸೇರೊನುಂದೇ ಬತ್ತೆರೊಟ್ಟಿಗೆ
ಪಾಂಡವೆರ್ ಮನ್ನಿತ್ದಲ್ಕಾಲೆನ್
ಪ್ರೀತಿ ಬಾವೊಡು ಸಾಲ್ಡುಂತದ್ ಮಾತ ಪಿದಡಿಯೆರ್ ||

6

ಎದುರು ಕಾಲ್ಡೊ ತೇರ್ ಪಿರವುಡು
ಅವೆನ ಬೆರಿಕೇ ರಾಯರಾವುತ-
ನಕಲ್ ಕುದುರೆಲೆ ಏರ್ದುಂತ್ಯೆರ್ ಕಡೆಟ್ ಆನೆಗುಳು ||
ಹರಿಯೆ ಧರ್ಮಜನೊಟ್ಟು ಆನೆದ
ಬೆರಿತ ಮೇಲ್ಡ್ ಕುಲ್ಲನಾಪಗ
ನರ ಪ್ರಕೋದರನಕಲ್ ಸೇನೆಗ್ ಸಾದಿ ತೋಜಯೆರೆ ||

7

ದತ್ತ್ ಬಲತ್ಡ್ ಉಂತ್ನಾಪಗ
ಎಲ್ಯಕ್ಲ್ ಮಾದ್ರಿನವೆ ಜೋಕುಲು
ಕ್ರಿಷ್ಣ ಧರ್ಮಜೆ ಕುಲ್ಲನಾನೆದ ಪಿರವುಡುಂತಿಯೆರ್ ||
ಪಾಟಕೆರೆ ಜಯಗೋಸಣೆಡ್ಲಾ
ವೀರೆರೆನ ಆರ್ಬಟೆಡ್ ತೇರ್ದ
ಕೀರಿ ಕುಟ್ಟುನ ಸೊರೊಟ್ಟು ಲೋಕೊಡು ಆಂಡ್ ಮಹಗಾಜಿ ||

8

ಬತ್ತೆರಾ ಕುರುಕಂಡೊ ಜಾಗೆಗ್
ಎತ್ತನಗ ಪಾಂಡವೆರೆ ಸಾಯೊಗು
ಬರ್ಪಿ ವೀರೆರೆ ದಂಡ್ ಸೇರ್ನ ತೂನಗಾಚಿರೊನೆ
ಆ ಯುದ್ಧಾಮನ್ಯುತ್ಪಮೌಂಜಸೆ
ಚೇಕಿತಾನೆನೆ ವೀರ ಸಾಹಣೆ
ಕಾಸಿರಾಜೆನೆ ಯವನೆ ತುರುಕೆನೆ ಬತ್ತೆರೊಟ್ಟಾದ್ ||

9

ಪಾಂಡ್ಯ ಸೋಮಕೆ ವೀರ ಸೃಂಜಯೆ
ಚೇದಿ ರಾಜೆನೆ ದ್ವಸ್ಪಕೇತುಲ
ಸೇರ್ದಾನಗ ಲೆಕ್ಕೊ ಮಲ್ತೆರ್ ಬತ್ತಿ ವೀರೆರೆನ್ ||
ಏಳ್ ಅಕ್ಷೋಯಿಣಿದ ಬಲೊನೇ
ಪಾಂಡವೆರೆಗಾಂಡಂದ್ ಪಂಡೆರ್
ಸೇನೆ ಉಂತ್ಯೆರೆ ಬುಡರೊ ಪಡ್ಲೊಯಿ ದಿಕ್ಕಾಂಡವುಲು ||

10

ಆ ಯುದ್ಧಿರ ಬುಡರೊ ಬೇತೆನೆ
ಆಂಡ್ ಬೀಮಾರ್ಜನೆರೆಗುಂತ್ಯೆರೆ
ಆಪೆಕೀಪೆಕ್‌ಡಾಂಡ್ ಪಿರವುಡು ಮಾದ್ರಿ ಜೋಕುಲೆಗ್ ||
ರಾಜ ದ್ರುಪದಗ್‌ಲಾ ವಿರಾಟಗ್
ಬೇತೆ ಬೇತೆನೆ ಆಂಡ್ ಕ್ರಿಷ್ಣಗ್
ಮೂಡಯಿಗ್ ಬಾಕಿಲ್‌ನ್ ದೀಡ್‌ದ್ ಪೊರ್ಲು ಮಲ್ಪಯೆರ್ ||

11

ಪಾಂಡವೆರೆ ಜೋಕುಲೆಗ್ ದ್ರುಪದನ
ಬಾಲೆಲೆಗ್ ಉತ್ತರಗ್ ಪೊರ್ಲು-
ವಾಂಡ್ ಸುತ್ತಲ ಸೇರ್ನ್ ವೀರರೆಗಾಂಡ್ ಬುಡರೊಗುಳು ||
ತೇರ್ದ ಕೊಟ್ಟು ಆನೆ ಕುದುರೆಲೆ
ಲಾಯೊಗುಳು ಸೇವಕೆರೆ ಬುಡರೊಲು
ಏತೊ ಆಂಡ್‌ಲ ಸೂರ್ಯ ಚಂದ್ರೆರೆ ಬೀದಿಲುಂಡಾಂಡ್ ||

12

ರಾಜ ಚಾವಡಿ ಆನೆ ಬಾಕಿಲ್ -
ಆಂಡ್ ಮಲ್ತದ್‌ಲೈನ ಒತ್ತುಗು
ಆಯುದೊಲೆ ಕೋಣೆಲೆನ್ ಮಲ್ತೆರ್ ನಮನೆ ನಮನೆದವೆ ||
ಕಾಳಗೊಡು ಪೆಟ್ಟಾಯಿನಕೆಲೆನ
ಆರೆಕಿನ್ ಮಲ್ತೆರೆಗ್ ಬೇತೆನೆ
ಜಾಗೆಡೇ ಕಟ್ಟಯೆರ್‌ಲನುಬವೊದಕೆಲೆ ಒಪ್ಪಿಗ್‌ಡ್ ||

13

ವೈದ್ಯರೆನ್ ಮಂತ್ರಾದಿನಕೆಲೆನ್
ತರ್ಪದುಂತಯೆರಲ್ಲ ಗಾಯೊಗು
ಕಟ್ಟಯೆರೆಗಾಪುನವೆ ಕುಂಟುನು ಎಣ್ಣೆ ಮರ್ದ್‌ಲೆನ್ ||
ಬಸ್ಮೊ ಕುಂಕುಮೊ ತಪ್ಪು ಬೇರ್‌ನ್
ಮಲ್ಲ ಪಾತ್ರೊಲೆಡವುಲು ದಿಂಜದ್
ಇತ್ತ್‌ನೆನ್ ತೂವೊಂದು ಧರ್ಮಗಾಂಡ್ ಸಮದಾನೊ ||

14

ಆನಿಯೇ ಸಬೆ ಕೂಡ್ಲದಲ್ಲನೆ
ಕೇಂಡೆ ಧರ್ಮಜೆ ಸೇನೆದೊಡಕರೆ
ಏರ್ ಪನ್ನೆಂದಕ್ಕೆ ಮೋನೆನ್ ತೂದು ಸಂತೊಸುಡು ||
ಮಾತೆರ್‌ಲ ಒರಿಯೊರಿಯ ಪುದರ್‌ನ್
ಬೇತೆ ಬೇತೆನೆ ಪನ್ನಗಾಪಗ
ಆದಿ ನಾರಾಯಣೆನೆ ಪಂಡೆನೆ ದ್ವಸ್ಪದ್ಯುಮ್ಮೆಂದ್ ||

15

ಕ್ರಿಷ್ಣೆ ಪಂಡ್‌ನ ಕೇನ್ದ್ ಧರ್ಮಜೆ
ದ್ವಸ್ಪದ್ಯುಮ್ಮೆನ್ ಪೀಟೊ ದೀಡ್‌ದ್
ಕುಲ್ಲದಾಪಗ ಸಿಮ್ಮೊ ಮೋನೆದ ಮುಂಡೊ ಪಟ್ಟಿನ್‌ಲ ||
ಪೊರ್ಲು ದೀಡ್‌ದ್ ವೇದೊ ಮಂತ್ರೊನು
ಪನ್ನಯೆನೆ ಬ್ರಾಣೆರೆಡ ಪೋಣ್ಣುಲು
ಪತ್ಯೆರಾರತಿ ಬೊಟ್ಟು ಪಾಡ್ಯೆರ್ ಕೈನ್ ಮುಗಿಯೊಂದು ||

16

ಸೇನೆದೊಡಕರೆ ಪಂಡಿ ಪಾತೆರೊ
ಮೀರಿಯೆರೆ ಆವಂದ್ ಪಂಡ್‌ದ್
ಹಾಕಯೆನೆ ಡಂಗುರೊನು ಸಿಬಿರೊದ ಉಲಯಿಡಾಪಗನೆ ||
ಕಾಳಗೊಡು ಇನಿ ನಮನ್ ಗೆಲ್ಪವೆ
ಆದಿ ನಾರಾಯಣೆನೆ ಆಯಿನ
ದೇವಕೀ ಮಗೆ ಕ್ರಿಷ್ಣೆ ಪಂಡ್‌ದ್ ಡಂಗುರಾಕಾಯೆ ||

ಸಿರಿ ಮದನಂತಕೋಡಿ ಸುಬ್ರಾಯ ದೇವೆರೆ ನಿರ್ಪೊಡು;
ಪರಿವಾರೊದೈವೊಲೆನ ಬೆರಿ ಸಾಯೊಡು;
ಕೆಲಿಂಜ ದೂರುಡು ನಿಲೆಯಾಯಿನ ಅಪ್ಪೆ;
ಸಿರಿ ಉಳ್ಳಾಲ್ತಿನ ದಯೊಟು;
ಉದ್ಯೋಗೊ ಪರ್ವೊ
ಪೂರ್ತಿಯಾಂಡ್.

ತುಳು- ಕೆಲಿಂಜ ಭಾರತೊ

ಭೀಷ್ಮ ಪವೊರ್

ಸಾರದೆನ್ ನೆನೆತೊಂದು ಸಿರಿ ಮದ -
 ಊರ್ದ ಮಹಗಣಪತೀನ್ ನಂಬುದು,
 ಕಾರಣೇಕೆರ್ ಮೂಜಿ ಮೂರ್ತಿಲೆಗರಿಕೆ ಮಲ್ತೊಂದು ||
 ಊರುದುಳ್ಳಾಲ್ದೀನ ಬಗ್ಗಿಡ್ |
 ಭಾರತೊದ ಕುರುಕಂಡೊ ಲಡಯಿನ್|
 ಏರೆಗ್ಲ ಅರ್ತಾಪಿ ನಮುನೆಡ್ ಬರೆಯೆ ತುಳುಟೇನ್ ||

- ಸೀತಾರಾಮ ಆಳ್ವ
 ಕೆಲಿಂಜಿ

ಸುರುತ ಸಂದಿ ||

|| ಕುರುಸೇನೆಗ್ ಭೀಷ್ಮ ದಳಪತಿ ಆಯೆ ||

ಮಾದ್ರ ರಾಜಗ್ ಪಾಂಡು ಬಾಲೆಲು
 ಕಾಸ ಅರ್ದತ್ತಲ್ಲು ಆಂಡಲ
 ಆಯೆ ಕೌರವ ಕಡೆಕ್ ಸೇರದೆ ಮಲ್ಲಯೆಂದತ್ತೊ ||
 ರಾಜರಾಜೆರ್ ನಾಲ್ ರಂಗೊದ
 ಸೇನೆ ಕೂಡ್ಡ್ ಹಸ್ತಿನಾವತಿ
 ಸೇರದೆತ್ತೆರ್ ಲೆಕ್ಕೊಗ್ಕೋಹಿಣಿಯೆ ಪತ್ತೊಂಜಿ ||

1

ಆ ಸುಯೋದನೆ ಸಬೆನ್ ಕೂಡ್ಡ್
 ಮಾದ್ರ ಮಾಗದ ಯಾದವಾದಿಲೆ -
 ನಾಡೆ ಲೆಪುಡಯೆ ಗುರುನು ಕರ್ಣನ್ ಬಾವೆ ಸೈಂದವನ್ ||
 ಮಾತೆರೆನ್ ಪುಗರೊಂದು ಕೇಂಡೆನೆ
 ಈತ್ ಮಲ್ಲವೆ ಸೇನೆಗೆಜಮನಿ
 ಏರ್ ಪನ್ನೆಂದಪಗ ಕರ್ಣನೆ ಲಕ್ಕುದುಂತಿಯೆನೆ||

2

ಕುರಿಕುಲಾಯಿನ ಪಾಂಡವೆರ್ ಇನಿ
 ಬದ್‌ಕದಾಸೆಡ್ ಲಡಯಿಗುಂತ್ಯೆರೊ
 ಪಿಲಿತ ಸುಪೊರ್ದ ಕರ್ಣ ಉಲ್ಲೆಂದಕ್‌ಲ್ ತೆರಿಯಂದೆ ||
 ಲಡಯಿದಾ ಕಳಟಕಲೆ ಕರ್ಣನ್
 ಒಯಿತ್ ದಕ್ಕುವೆ ಕೇನ್ ಕೌರವ
 ದಳಪತಿಯೆ ಯಾನಾಪಿ ಏಗಿತೊಡಿತ್ತನಾಯೆತ್ತೊ |

3

ದಾಯೆಕೊಚ್ಚುವ ಬೂಟು ಪಾತೆರೊ
 ಆನಿ ಕಟ್ಟೆದ್ ಚಿತ್ರ ಸೇನೆನೆ
 ರಾಯ ಕೌರವನೊತ್ತ ಕೊಂಡೊನಗೇರ್ ಬುಡ್ಡಯಿನೆ ||
 ಪಾರ್ತನೋ ಈಯೊಂದು ಪನ್‌ಲಯ
 ಬೀಮಪಾರ್ತೆರೆನೇರ್ ಗೆಲ್ಲನ
 ವೀರೆಂದ್‌ದ್ ಪನ್‌ಲ ಪಂಡೆರ್ ದ್ರೋಣೆರಾಪಗನೆ||

4

ಹರಿಯೆ ರಕ್ತಣೆ ಮಲ್ಲೆನಕ್‌ಲೆನ್
 ನಿನನ್ ಕಾಪೈರೆ ಬೀಷ್ಮಗೊರೈಗೆ
 ಸರಿಟ್ ತೀರುನೆ ಕೌರವೇಸ್ವರ ಕೇನ್ದಲಾಯಡನೆ ||
 ದಳಪತಿನ ಪಟ್ಟೊನುಲ ಕಟ್ಟೆಲ
 ಮುಕುಲೆ ಪಾತೆರೊ ಕೇನ್ದ ಸಯ್ಯಡ
 ಪನುಪುನೆನ್ ಕೇನೊಂದು ಸಬೆನ್‌ಲ ಕೈದ್ ಮಲ್ತೊಂದು||

5

ಕತ್ತಲೆದ ಸರಿ ಕರ್ಮೊಕಿಯೆನ್
 ಮಲ್ತದಾ ಕೌರವೆನೆ ಕರ್ಣನ
 ಒಟ್ಟು ಕುಲ್ಲುದು ಒಣಸ್ ಮಲ್ತದ್ ಬೀಷ್ಮನರಮನೆಗೆ ||
 ಒರೈ ಬತ್ತದ್ ಬಾಕಿಲ್‌ಡಲಾ
 ಇತ್ತನಕ್‌ಲೆಡ ತಾನ್ ಬತ್ತನ
 ಸುದ್ದಿ ತೆರಿಪನಗಪಗ ಲೆಪುಡಯೆ ಉಲಯಿಗಾಯನ್‌ಲ||

6

ದಾನೆ ಬತ್ತನೆ ಇರ್ಲೊಡೊರೆನೆ
ಯಾನೆ ಬತ್ತುದುವೆತ್ತೊ ಪನ್ನಡ
ಬೇಕೊ ಪನ್ ಪನ್ ಬತ್ತಿ ಸಂಗತಿ ಪನ್ನಗಾಯೆಪಗ ||
ಪಾಂಡವರ್ ಕುರುಕಂಡೊ ಜಾಗೆಗ್
ಸೇನೆ ಕೂಡ್ ಬತ್ತುದುಲ್ಲೆರ್
ಕಾಳಗೊಗು ಬರೊಡುಂದು ಎಂಕ್ಲೆಗ್ ಇನಿಯೆ ತೆರಿಪದೆರ್ ||

7

ಈರ್ ಎಂಕ್ಲೆನ್ ಕಾಪುನಾರೇ
ಆದ್ ಉಪ್ಪುನಗ್ಕಲೆ ಹಂಕರೊ
ತೂಲೆ ಅಚ್ಚೆರೆ ಮಣ್ಣೆ ಮುಕ್ಕುನ ಬುದ್ಧಿ ಅಕ್ಲೆನವೆ ||
ಜೂಜಿ ಗೊಬ್ಬುದು ಕಳೆಯಿ ರಾಜ್ಯೊನು
ಕಾಳಗೊಡು ಪಡೆಪುನವೆ ಆಸೆಡ್
ಪ್ರಾಣೊ ಕಳೆವೊನೊಡುಂದು ಬತ್ತನೆ ಪಂಡ್‌ದಾನಗನೆ ||

8

ನಿನ್ನವೇ ಸಿದ್ಯಮ್ಮ ಜೋಕುಲು
ಕ್ರಿಷ್ಣ ಸ್ವಾಮಿನ್ ರಾಜಿ ಮಲ್ಲೆರೆ-
ಗತ್ತೊ ಈಡೆಗ್ ಕಡಪುಡನೆ ಪನ್ ಈಯೆ ಕಾಳಗೊಡ ||
ನಿಚ್ಚೆಯೊದ ಮಹ ಬೂಳ್ಳೊ ಲೋಕೊದ
ರಕ್ಷಕಡ ಕೊರೈತ್ತೊ ಆಯೆನೆ
ರಕ್ಷಣೆನ್ ಮಲ್ಪಂದೆ ಬುಡುವೆನೊ ಸರಿಟ್ ಗ್ರೇಯೊನುಲ ||

9

ಇಸೊನು ಕೊರೈಯ ಇಲ್ಲ ಪೊತ್ತಯ
ಪಗಡೆಗೊಬ್ಬದ್ ರಾಜ್ಯೊನೊಯ್ಯಯಿ
ಅಕ್ಲೆ ಬುಡೆದಿನ ಮಾನೊ ದೆಪೈರೆ ತೂಯ ಸಾದನೆಡ್ ||
ಹರಿಯೆ ಕಾತ್‌ನನಕಲೆನೆಂದ್
ತೆರಿಪುಜಯ ನಿಕ್ಕಿತ್ತೆ ನನಗ್‌ಲ
ಲಡಯಿಡೇ ಗೆಲ್ಪೆಂದ್ ಕನ ಕಟ್ಟೊಂದು ಉಲ್ಲನಯ ||

10

ಈರೆಗಚ್ಚೆರೆ ಅಕ್ಲೆನೇಸರಿ
ಏಪೊಲಾ ಪುಗರೊಂದೆ ಉಲ್ಲರ್
ಯಾನ್ ಎಂಚಿನ ಮಲ್ತೆ ಈರೆಗ್ ಮಲ್ಲವನ್ಯಾಯೊ ||
ಬೂಳ್ಳೊಕೊರ್ದಾಯಿನನ್ ಅತ್ತಂ -
ದೇನ್ ಪನಿಯೆರೆಗಿದ್ದಿ ಲಡಯಿಡ್
ಪೋವಡೆನ್ನವೆ ಪ್ರಾಣೊ ಎನ್ನನ್ ಏರ್ಲ ಕಾಪೊಡ್ಪಿ||

11

ಈತ್ ಪಂಡ್‌ದ್ ಕೌರವೇಸ್ವರೆ
ನೀರ್ ಜಪುಡಯೆ ಕಣ್ಣೆಡಾಪಗ

ಬೀಸ್ಮ ಮನಸ್‌ಗ್ ಬೇಜರಾದ್‌ಲ ಪಂಡನಾಯಡನೆ ||
ಯಾನ್ ನಿನ್ನವೆ ಸೇನೆಗೆಜಮನಿ -
ಯಾದ್ ಕಾದುವೆ ಸೋಲು ಗೇಲ್‌ದ
ಯೋಗೊ ಏರೆಗೊ ಅಕ್ಲೆಗಾವುಯ ಪನ್ ಕಡಪುಡಿಯೆ ||

12

ಕೌರವೆನೆ ಸಂತೊಸುಡು ಅರಮನೆ -
ದಾಡೆ ಬತ್ತದ್ ಚಾಕ್ರಿದಕ್‌ಲೆಡ
ತಾನ್ ಬತ್ತನ ಸುದ್ದಿ ತೆರಿಪದ್ ಉಲಯಿ ಪೊಗ್ಗಿಯೆನೆ ||
ಕಾಂಡೆ ಲಕ್ಶ್ಮದ್ ಕರೊ ಕಿರ್ಯೆನ್
ಪೂರ ತೀರ್ಪದ್ ರಾಜ ಚಾವಡಿ
ಗಾಯೆ ಬನ್ನಗ ಸೇರ್‌ದಿತ್ತೆರ್ ಮಾತ ಪರಿವಾರೊ ||

13

ಅಜ್ಜ ಬೀಸ್ಮನ್ ರೇಂಜಿಡುಲಯಿಗ್
ಪೊಗ್ಗದಲ್ಲನೆ ಕಾರ್ ಪತ್ತದ್
ಪುಸ್ಸೊ ಮಾಲೆನ್ ಪಾಡ್ ಪೀಟೊಡು ಕುಲ್ಲದಾಪಗನೆ ||
ದೊಮ್ಮೆರೆಡ ಮುಂಡಾಸ್ ಕಟ್ಟದ್
ಸಿಮ್ಮೊ ಮೋನೆದ ಮುಂಡೊ ಪಟ್ಟಿನ್
ಕಟ್ಟಿಯೆನೆ ಸಿರಿ ಮಂತ್ರೊ ಪನ್ನದ್ ದೇಸೆ ಪಾಡ್ವಾದ್ ||

14

ಪೋಣ್ಣಲೆಡ ಆರತಿನ ಬೆಳಗದ್
ಅಜ್ಜ ಬೀಸ್ಮರ್ ಸೇನೆದೊಡಕರೆ
ಪನ್ ಡಂಗುರೊ ಹಾಕಯೆನೆಲಾ ಕೌರವೇಸ್ವರೆನೆ ||
ಕಪ್ಪೊ ಕಾಣಿಗೆ ಕೊರೈ ಕಾರ್‌ಗ್
ಅಡ್ಲೊ ಬೂರೈರ್ ತುಂಡು ಅರಸುಲು
ಮಲ್ಲ ಬೊಬ್ಬೆನೆ ಆಂಡ್ ಜಯೊ ಜಯೊ ಪನ್ನಿ ಗೋಸಣೆಡ್ ||

15

ನಿಕ್ಕ ಮರೊಯ ಕೌರವೇಸ್ವರೆ
ಜಬ್ಬೆ ಕೈಕಾರಿತ್ತೆ ನಡ್ಗನ
ಚರೊ ನೇಲನ ಕುಜಲ್ ಪರ್ಧಾನ ಪರಬೆ ದಳಪತಿಯೊ ||
ಅತ್ತ ವೈರಿಲೆ ಕೈಟ್ ಇಂಬ್ಯನ್
ಕೆರೈರೆ ಬೋಡಾದ್ ಸೇನೆಗ್
ಮಲ್ಲ ಯಜಮನಿ ಮಲ್ತನೋ ಪನ್ ಪಂಡ್‌ದಾ ಕರ್ಣೆ ||

16

ಬೊಬ್ಬೆ ಪಾಡ್‌ಗ ಬೀಸ್ಮ ಕೋಪೊಡು
ಒಲ್ಲ ಗೆಲ್ತದ ಕರ್ಣ ಪನ್ ಈ
ನಿನ್ನ ಪೌರುಸೊ ಯಾನ್ ತೂತ್‌ಜೊ ದಾಯೆ ಕೊರೆಪುನೆಯೆ ||
ಹಸ್ತಿನಾವತಿದುನ್ನು ತಿಂದ್‌ದ್
ಗರೊ ಹಂಕರೊ ಏರ್‌ದಾಂಡೊಯ
ಕುಲ್ಲ ಮನಿಪಂದಿತ್ತೆ ಪಂಡ್‌ದ್ ಸಬೆನ್ ತೂವೊಂದು ||

17

ಕೇನ್ ಕೌರವರಾಯ ಜಯದ್ರತ
ಕೇನ್ ದುಸ್ವಾಸನೆಲ ಬಾಕಿದ
ವೀರನಾಕ್‌ಲ್ ಮಾದ್ರ ಮಾಗದ ಚೈದ್ಯ ಪರಿವಾರೊ ||
ಕೇನ್‌ಲೆಯೆ ಕುರುಕಂಡೊ ಜಾಗೆಡ್
ಆಪಿಕಾಳಗೊಡೇನ್ ಉದಿತ್‌ನ
ಸೂರೈ ಕಂತುನ ಪಗೆಲ್‌ದುಲಯಿಡ್ ಪತ್ತ್ ಸಾವಿರೊನೆ ||

18

ರಾಜ ರಾಜೆರೆ ತರೆನ್ ಕಡ್ಡ್‌ದ್
ವಾಸುದೇವಡ ಚಕ್ರೊ ಪತ್ತವೆ
ತೇರ್‌ದಾ ಕೊಡಿಮರತ ಹನುಮನ ಬೆರಿನ್ ತಿರ್ಗಾವೆ ||
ಆ ಮಹಿಮೆರಿರ್ದೆರೆನ ಬಾಸೆನ್
ತೀರೈಯೆರೆಯಾನ್ವಡಯೆ ಪನ್ನುನ
ಬೀಸ್ಮನಬ್ಬರೊ ಕೇನ್ದ್ ಕೌರವಗಾಂಡ್ ಸಂತೋಸು ||

19

ಈ ಪರಬೆ ಸಯ್ಯಂದೆ ಬಿಲ್ಲ್‌ನ್
ಯಾನ್ ಪತ್ತಯೆ ಪನ್ದ್ ಕರ್ಣೆನೆ
ಕೋಪೊಡೇ ಸಬೆತಲ್ತ್ ಪಿದಡ್‌ದ್ ಪೋಯೆನಾಪಗನೆ ||
ಕಾಳಗೊದ ಕಳತಾಡೆ ಪೋಪುನ
ಮಾತ ಅಟ್ಟಣೆ ಮಲ್ಲಯೆನೆ ಸರಿ-
ಟಾ ಸುಯೋದನೆ ಮೆಗ್ಯನಕ್‌ಲೆನ ಸಾಯೊಡಾಪಗನೆ ||

20

ಸಾಲ್ ಸಾಲ್‌ಡೆ ನಾಲ್ ರಂಗೊದ
ಸೇನೆನುಂತದ್ ಕೊಂಬು ವಾದ್ಯೊ ನ -
ಗಾರಿ ಬೇರಿದ ಗೌಜಿದಬ್ಬರೊ ಚಕ್ರೊ ಚಾಮರೊದ ||
ತೇಜಿಡೇ ಸರಿ ದಂಡ್ ಪಿದಡ್‌ದ್-
ಲಾಂಡ್‌ಲಪಗನೆಲಾ ಸುಯೋದನೆ
ಕಾರ್ ಪತ್ತೆನೆ ಅಪ್ಪೆನಮ್ಮನ ಬುಕ್ಕೊ ಸಕುನಿನವೆ ||

21

ಪಿದಡಿ ಮೂರ್ತೊಡು ಇಸಮೊ ಗಳಿಗೆನೊ
ಪನುಪನೆನ್ ತೂಯಿಜೆರ್ ಸಾದಿಡ್
ಸಕುನೊ ಹಾಲ್‌ದ ತಿಕ್ಕನೇನಲ ಗಣ್ಯೊ ಮಲ್ತ್‌ಜೆರ್ ||
ನಡತ್ ನಡತ್‌ದ್ ಸೇನೆ ಕುರುಕುಲೊ
ಲಡಯಿದಾ ಕಳತಾಡೆ ಎತ್ತ್‌ದ್
ನಡುಟು ಉಂತುದು ಸುತ್ತ ತೂಯೆರ್ ಉಂತುನೋಲುದು ||

22

ಮೂಡಯಿಡ್ ಎಡ್ಡೆಂದ್ ಬುಡರೊಗು
ಆಪುನವೆ ತಗಡ್‌ಲೆನ್ ಮುಚ್ಚಿದ್

ಮಾತೆರೆನ ಮರೈದಿಗ್ ಸರಿತವೆ ಬುಡರೊ ಮಲ್ಲಯೆರ್ ||
ರಾಜಚಾವಡಿ ಬೇತೆ ದಳಪತಿ
ಗಾಪುನವೆ ನಮುನೆಡ್‌ಲ ಬತ್ತನ
ರಾಜರಾಜೆರೆ ಗೌರವೊಗು ಸರಿಯಾದ್‌ಲಾಂಡಪಗ ||

23

ಸೇನೆ ಎತ್ತ್‌ದ್‌ಲಾಂಡ್ ಲಡಯಿಗ್
ವೀರೆರಂದ್‌ಡ ಬರಡ್ ಪಂಡ್‌ದ್
ಚಾಕ್ರಿದಾಯೆ ಉಲೂಕೆ ಪನ್ನುನ ಜನೊಟ ಪನ್ನುಯೆರ್ ||
ಆಯೆ ಬತ್ತದ್ ಪಾಂಡವೇರೆಡ
ಬಾರಿ ಬಿರ್ಸಡ್ ಪಂಡೆ ನಿಕ್‌ಲೆಗ್
ಕಾಳಗೊನೆ ಬೊಡ್ಡಿತ್ತೆ ಕಾಡ್‌ಗ್ ಪೋಪುನೆಡ್‌ದ್ ||

24

ದಳಪತಿಯೆ ಬೀಸ್ಮೇರ್ ಕೌರವ
ನಕ್‌ಲ್ ಬಿರ್ಸೆರ್ ಸೇನೆದಾಕ್‌ಲ್
ಪುಣನ್ ಪಾಡ್ಡೆರ್ ಪನ್ನಗಾಪಗ ಬೀಮೆನೋಪಿಯೆರೆ ||
ಕಯಿನ್ ದೆರ್ಪುನಗಪಗ ಧರ್ಮಜೆ
ತಲಿತ್‌ದುಂತಯೆ ಚಾಕ್ರಿದಾಯನ್
ಕೆರಡ ಪೋವಡ್ ಪಾಪೊದಾಯಿನ ಜೂವೊದೆಪ್ಪಡಯೆ ||

|| ಲಡಯಿಗ್ ರಡ್ಡ್ ಕಡೆಲಾ ತಯರಾಂಡ್ ||

ರಡ್ಡ್ ಕಡೆತಲ ಸಿಬಿರೊದುಲಯಿಡ್
ಬೊಬ್ಬೆ ಬೊಬ್ಬೆನೆ ಆಂಡ್ ಲಡಯಿದ
ಅಟ್ಟಣೆನ್ ಮಲ್ಲುನವೆ ಅಮಸರೊಡಾಪಿ ನುರ್ಕುದವೆ ||
ಒಡ್ಡವೆರ್ ಕುದುರೆಲೆನ್ ತೇರ್‌ಗ್
ಕುತ್ತುವೆರ್‌ಲಂಕುಸೊಡು ಆನೆಲೆ
ಮಲ್ಲ ತರೆಕೇರೊಂದು ಮಾವುತನಕ್‌ಲೆ ಪರಿವಾರೊ ||

1

ಬಿರುನು ಬಗ್ಗದ್ ನಾರ್ ತಿಕ್ಕವೆ -
ರಕ್‌ಲ್ ಕಡ್ಲೊದ ಪರಿತೆ ತೂವೆರ್
ಪಗರಿ ಸಾಣೆಗ್ ಕೊರ್ದ್ ಪರಿತೆಗ್ ನೀರ್ ದೀಪವೆರ್ ||
ರತೊತ ಕೀಲ್‌ನ್ ಗಟ್ಟಿ ಮಲ್ಲೆರ್
ಕುಡರಿ ಕೂಟ್ಟಿರ್ ಬಲವುದೊಚ್ಚಿಡ್
ಅಲವುದಂಗಿನ್ ಪಾಡ್ಡ್ ಹಾಳಿತೊ ತೂದು ಮಡಿಪುವೆರ್ ||

2

ಕೀರಿಕುಟ್ಟುವೊ ಆನೆಲಾಪಗ
ಬಾರಿ ಮದೊ ಜಪುಡೊಂದು ಕುದುರೆಲು

ಕಾರ್ಡೆರ್ತ್‌ದ್ ಲಾಗೊದಪ್ಪುವೊ ತೇರ್ಗ್ ಕಟ್ಟನವು ||
ಕಾರ್ಡೆತ ವೀರೆರೆನ ಬರ್ಪಿದ
ಬೂಟು ಪಾತೆರೊ ನೆರ್ಪಿ ನೆರಡೆಲು
ಕೇಂಡ್‌ದಾಂಡ್‌ಲ ಕೌರವೇಸ್ವರೆ ಬತ್ತೆ ಬೀಸ್ಮನಡೆ ||

3

ಪಡ್ಡೊಯಿಡ್ ಪಾಂಡವೆರೆ ದಂಡ್‌ಲ
ಬತ್ತೆದುಂತುದು ಆಂಡ್ ನಮೊ ನನ
ಪೊರ್ತು ದೆಪ್ಪನೆ ದಾಯೆ ಪೋಪನವಡ್ಡೆ ಕಳತಾಡೆ ||
ಪುಳ್ಳಿ ಕೌರವೆ ಪಂಡಿ ಪಾತೆರೊ -
ಗೊಪ್ಪುದಾ ದಳಪತಿಯೆ ಸೇನೆಗ್
ಅಪ್ಪಣೆನ್ ಕೊರ್ನಗನೆ ಮಾತೆರ್ ಕಳಕ್ ನುರ್ಕಿಯೆರ್ ||

4

ಪಾಂಡವೆರೆ ಕಡೆಟೀರ್ ಉಲ್ಲೆರ್
ಸೇರ್‌ದೆರೊ ನಮ್ಮಕ್‌ಲ್ ಅಕ್‌ಲೆನ
ಪೋಡಿಗೇಡ್ ಪನೊಡಜ್ಜ ಪನ್ನಗ ಬೀಸ್ಮೆ ಕೌರವಗ್ ||
ತೋಜಯೆನೆ ಸರಿ ದ್ರಸ್ಪದ್ಯುಮ್ಮನೆ
ಆಯೆನಕ್‌ಲೆನ ಸೇನೆಗೊಡಕರೆ
ಮೂಜಿ ಅಕ್ಷೋಣಿದವೆ ದಂಡ್‌ನ್ ದ್ರುಪದೆ ಕನತ್‌ದೆಗೆ ||

5

ಆಪೆಕ್‌ಡೆಲಾ ಕುಂತಿ ಬೋಜೆನೆ
ಸೋಮೆಕೆಲ ಉಂತೊಂದು ಉಲ್ಲೆರ್
ತೂಲ ದ್ರೌಪದಿ ಜೋಕುಲೈವೆರ್ ಉಂತಿ ಪೊರ್ಲನೊರೊ ||
ಬೀಮನಾ ಮಗೆನಾ ಗಟೋದ್ಗಜೆ
ರಕ್ಕಸೆರೆ ಕೂಟೊಡುಲ ತೋಜುವೆ
ವೀರಪಾರ್ತನ ಮಗೆನೆ ಸೆಡಿಲ್‌ದ ಚಿಂಡ್‌ನೊರೊ ತೂಲ ||

6

ಗುರೊ ಆಂಡೊಯ ಬೀಮ ಪಾರ್ತೆರೆ
ಬುಕ್ಕೊ ಮಾದ್ರಿನ ಜೋಕುಲೆನ ಸರಿ
ಕಣ್ಣೆ ದೆರ್ತ್‌ದ್ ತೂಲ ಅಕ್‌ಲೆನ ಒಟ್ಟುಗೇರ್‌ಂದ್ ||
ರತ್ನೊ ರಾಸಿಲೆ ನಡುಟು ಮಾಣಿಕೊ
ಮೆಣ್ಣುನಂಚೆನೆ ಧರ್ಮನಂದನೆ
ಪೊರ್ಲಡುಂತನ ತೂಲ ಪಂಡ್‌ದ್ ತೋಜಯೆನೆ ಬೀಸ್ಮೆ ||

7

ತೇರ್‌ಗೇ ಬೊಲ್ಲೆನೊದ ಕುದುರೆಲೆ -
ನೇರ್ ಒಡ್ಡೆದ್ ಮುಕ್ಕೊಟ್ ಕುಲ್ಲದೆ
ತೂಲ ಕೈ ಮುಗಿಯೊಂದು ಕ್ರಿಷ್ಣನ್ ಲೋಕೊ ರಕ್ಷಕನ್ ||
ಆಯೆಕುಲ್ಲನ ತೇರ್ಪ ಕೊಡಿಮರ-
ಟೀರ್ ಬೆರಿಪಾಡೊಂದು ಕುಲ್ಲದೆ
ವಾಯುನಾ ಮಗೆ ಹನುಮೆ ರಾಮನ ಬಗ್ಗೆ ನಿಜೊವಾದ್ ||

8

ಅಕ್‌ಲೆಡುಪ್ಪುನೆ ಏಳ್ ಅಕ್ಷೋ-
ಯಿಣಿಯೆ ನಮ್ಮಡ ಸೇರ್‌ದುಂಡುಯ
ಗೆಣಿಪುನಗ ಪತ್ತೊಂಜಿ ಅಕ್ಷೋಯಿಣಿದ ಮಾರ್ಬಲೊನೆ ||
ನಮನ ಬಲೊ ಕಮ್ಯತ್ ದ್ರೋಣೆರೆ
ಮಗೆನೆ ರುದ್ರನ ಸಗ್ಗಿ ಪಡೆಯಿನ
ಬೆರಣ ಮಾಣಿಯೆ ಉಲ್ಲೆ ಪೋಡ್ಯಡ ಪಂಡೆ ಕೌರವಡ ||

9

ಗುರುನ ಮಗೆ ರುದ್ರಾವತಾರಿಯೆ
ಪನ್‌ಪಿ ಪಾತೆರೊ ಕೇನ್ಡ್ ಕುರುಪತಿ
ಮನಸ್‌ಡೇತಲ ದೈರೊ ಮಲ್ತ್‌ದ್ ಇತ್ತೆನೊಲಪಗ ||
ಯಮನ ಮಗೆ ಧರ್ಮಜೆನೆ ವೈರಿಲೆ
ಬಿರ್‌ಸ್ ದಟ್ಟಿಸ್ ಕೇನ್ಡ್ ಕೌರವ
ಸಿಬಿರೊದುಲಯಿಗ್ ಬನ್ನಗಾಪಗ ಏರ್ಲ ಮನಿತ್‌ಜೆರ್ ||

10

ಸೀದ ಬತ್ತೆದ್ ಬೀಸ್ಮ ಕಾರ್‌ಗ್
ಬೂರ್ರು ಬುಲ್ಪುನ ಧರ್ಮನಂದನ-
ನಾಯೆ ಲಕ್ಕದ್ ಬುಲ್ಪಡಯ ಮಗ ನಿನ್ನ ರಕ್ಷಣೆಗ್ ||
ವಾಸುದೇವೆನೆ ಉಲ್ಲೆ ಪನ್ನಗ
ಈರೆ ಸಾಂಕ್‌ನ ಕೈಟ್ ಎಂಕ್ಲೆನ್
ಪೂರ್ತಿ ಕೆರೈರೆಗಾದ್ ಆಯ್ಕೆನೊ ಸೇನೆಗೆಜಮಾನಿ ||

11

ಅಪ್ಪೆನಾ ಮಿರೆ ಪೇರ್ ಇಸೊತವೆ
ಪರ್ಡಿ ಬಾಲೆಗ್ ಆಂಡ ಬದುಕುವೊ
ಪನ್ನೆ ಅಜ್ಜೆರೆ ಎಂಕ್ಲು ಕಾಡ್‌ಗ್ ಪೋದು ಬದೊಕ್ಕನುವೊ ||
ಕೊರೈ ಅಪ್ಪಣೆ ಪೋಯೆರೆಗ್ ಇನಿ
ಪನ್ನಗನೆ ಆ ಬೀಸ್ಮ ಧರ್ಮಜ
ನೆತ್ತಿಗೇ ಕೈದೀಡ್ ಪಂಡೆನೆ ದಾಯೆ ಪೋಡ್ಯನೆಯ ||

12

ಹಸ್ತಿನಾವತಿ ಸಿಮ್ಮೊ ಪೀಟೊದ
ರಕ್ಷಣೆದ ದಳಪತಿಯೆ ಆಯ್ಕೆಟ್
ಒತ್ತಾನೆಯ ಈ ಸ್ತಾನೊನೇನೇ ಎನ್ನ ಕರ್ಮೊಂದು ||
ಧರ್ಮ ರಕ್ಷಕೆ ಹರಿಯೆ ಎನ್ನನ್
ತನ್ನವಾತೊಗು ಎಂಚ ಒಯ್ಯುವೆ
ಪನ್ನಿ ಗುಟ್ಟುನು ನಿಕ್ಕೆ ತೆರಿಪವೆ ಪೋಲ ಮುಲ್ಪಡ್ ||

13

ದ್ರೋಣೆರಾಡೆಗ್ ಬತ್ತೆದಾಯೆನೆ
ಕಾರ್ಗ್ ಬೂರಿಯೆ ಗುರುಕುಲೆಂಕ್ಲೆನ್

ಕಾಪುವರೊ ಕೆರ್ಡುವರೊ ಪಂಡ್‌ದ್ ಎಂಕ್ ತೆರಿಪವೊಡು ||
ಆಯೆ ಕೌರವೆ ನುಪ್ಪು ಕೊರ್ನಯೆ
ಯಾನ್ ರುಣೊದೀವೊನಯೆ ಪಂಡ್‌ದ್
ಸೇರ್‌ದೆನೆ ಎಂಕಪಗ ಮನಸ್‌ಗ್ ದುಕ್ಕೊ ಆಪುನವೆ ||

14

ವರ್ದ ಮಾನೊನೆ ತಿಕ್ಕಿ ಸಾತ್‌ಗ್
ಬಿಲ್ಲ್ ದಕ್ಕದ್ ಪೋವೆ ಪನ್ನಗ್
ಧರ್ಮ ನಂದನೆ ದೈರೊ ಮಲ್ತ್‌ದ್ ಸಲ್ಯ ಕೈ ತಡೆಗ್ ||
ಪೋದು ಪಂಡೆನೆ ಮಾದ್ರಿ ಜೋಕುಲೆ
ಈರೆ ಪ್ರಾಣೊನು ದೆಪ್ಪೆಂದ್‌ದ್
ಓರೆ ಕಣ್ಣ್‌ಡ್ ತೂದು ಪಂಡ್‌ದ್ ಪೋಯೆ ಸಿಬಿರೊಡುದು ||

|| ಲಡಯಿಗ್ ಅರ್ಜುನನ ಪಿರಮನಸ್ ||

ಮಾತ ವೀರರ್ ಕಳಕ್ ಜಪ್ಪುಲೆ
ರಾವುತೆರ್ ಕುದುರೆಲೆನ್ ಜಪುಡಲೆ
ಸಾರತಿಲು ತೇರ್‌ಲೆನ್ ದೇರ್‌ದ್ ಕಳಕ್ ನುರ್ಕಾಲೆ ||
ಆನೆಲೆಗ್ ಅಂಕುಸೊಡು ಕುತ್ತಲೆ
ಕಾಳಗೊದ ಜಯೊ ಬೇರಿದಾ ಸೊರೊ
ನಾಲ್ ದಿಕ್ಕಿಗ್ ಕೇನಡ್‌ದ್‌ದ್ ಆಜ್ಜೆ ದಳಪತಿನ ||

1

ಬೀಮೆ ಪೌಂಡ್ರಕೊನುರಿತೆ ಧರ್ಮಜೆ -
ನಾಪಗನೆಲಾನಂತ ಅನಂತ ವಿಜಯೊನು
ದೇವದತ್ತೊದ ಸೊರೊನು ಲಕ್ಕಯೆ ಪಾರ್ತೆ ಉರ್ದೊಂದು ||
ಆ ನಕುಲ ಸಾದೇವನಾಕ್‌ಲ್
ಆಕ್‌ಲೆನ ಮಣಿಪುಷ್ಪಕೊನುಲಾ
ಪಾಂಚಜನ್ಯೊನು ಹರಿಯೆ ಉರಿತ್‌ದ್ ಸೊರೊನು ಲಕ್ಕಾಯೆ ||

2

ಬೂಮಿಯದ್‌ದ್‌ಲಾಂಡ್ ಸಂಕೊದ
ಬಾರಿ ಗೌಜಿದ ಸೊರೊಕು ವೈರಿಲೆ
ಗಾಪಗನೆ ನಡ್‌ಗಿಯೆರೆ ಸುರುವಾಂಡಕ್‌ಲೆ ತಿಗಲೆಗುಳು ||
ಆದಿ ನಾರಾಯಣ್ ಕೈ ಮುಗಿ
ದಾದ್ ತೇರ್‌ಗ್ ಸುತ್ತು ಬತ್ತದ್
ಏರಿಯೆನೆ ಕಲಿಪಾರ್ತೆ ಲಡಯಿನ್ ಮಲ್ಪಿ ಹಂಕರೊಡು ||

3

ಕ್ರಿಷ್ಣೆ ಪಾರ್ತಗ್ ವೈರಿ ಸೇನೆನ್
ದಿಸ್ಪಿ ಪಾಡ್‌ದ್ ತೂಲ ನಿನಡ್‌ದ್

ಗೆಲ್ಪಿಯೆರೆ ತೀರ್ದೊಂದು ಪನ್‌ಲಯ ಎನಡ ಸರಿಯಾದ್ ||
ನಿನ್ನ ಸಾಮರ್ತಿಕಲು ಅಕ್‌ಲೆಡ್
ಪೊಕ್ಕಡನೆ ಆವುಂದು ಎಂಕೇ
ಅಚ್ಚಿರೊನೆ ಆದಾಂಡ್ ನನ ನಮೊ ದಾನೆ ಮಲ್ಪುನಿಯೆ ||

4

ಎನನ್ ಸೋಲ್ಪುವಿ ಸುದ್ದಿ ಬುಡ್ಲಯ
ಕುರುಪತಿನ ಕಡೆಟೀರ್ ಎಂಕಿನಿ
ಎದುರು ಉಂತುನ ವೀರನಕ್‌ಲೆನ್ ಈಯೆ ತೋಜಾಲ ||
ರತೊನು ಉಂತಯೆ ಕ್ರಿಷ್ಣೆ ಕಾಳಗೊ
ಕಳತ ನಡುಟೀ ತೂಲ ಪಂಡ್‌ದ್
ಸರಿಟ್ ಒರಿಯೊರಿಯನವೆ ಗುರ್ತೊನು ಪನ್ನೆ ಇವರಾದ್ ||

5

ನಿನ್ನ ಅಜ್ಜೆನೆ ಸೇನೆದಧಿಕರೊ -
ಡುಲ್ಲೆ ತೂಲಯ ನಿಕ್ಕ ಕಲ್ಪದೆ
ರತ್ತೊ ಗುರುಕುಲು ದ್ರೋಣೆರವುಲೆ ತೂಲ ಉಂತ್‌ದೇರ್ ||
ಅಸ್ತತ್ತಾಮೆಲ ಕೃಪೆರೆನೊಟ್ಟುಗು
ಬಿಲ್ಲ್ ಬಾಣೊನು ಪತ್‌ದುಂತ್‌ದ
ಸಲ್ಯೆ ಸಮ್ಮಲೆನತ್ತೊ ಆಯೆಲ ಕೌರವೆರೆ ಕಡೆಟ್ ||

6

ವೀರಕರ್ಣೆನೆ ಆಯ ಬಾಲೆಲು
ಸೇರ್‌ದೊಟ್ಟಿಗೆ ಉಂತುದುಲ್ಲೆರ್
ನೂದು ಮೆಗ್ಗುಲ್ಲೆರಲ ಈ ತೂಲ ಕೌರವನ ||
ಆಕ್‌ಲೆನ ಜೋಕುಲುಲ ತೋಜ್ಜೆರ್
ಸಾಸೊಡಾಕ್‌ಲ್ ನಿನ್ನ ಮಗಕೇ
ಸಾಟಿಡುಲ್ಲೆರ್ ತೂಲ ಈಪೆಕ್ ಏರ್ ಉಂತ್‌ದಾನೆ ||

7

ನಿನ್ನ ತಂಗಡಿಯತ್ತೊ ದುಸ್ಯಲೆ
ಒರಿ ಪೊಣ್ಣಯ ನಿಕ್‌ಲೆ ಕುಟುಮೊಡು
ಪೊದ್ದೆ ಅತ್ತೊಯ ಆಲೆ ಕಂಡನಿ ವೀರ ಜಯದ್ರತೆನೆ ||
ಯುದ್ಧೋಗೇ ತಯರಾದ್ ಉಂತ್‌ದೆ
ಗೆಲ್ಪೊಲಿಯೊ ತೂಲಂದ್ ಪಂಡ್‌ದ್
ಬುಕ್ಕೊ ಸಕುನಿನ ಕಡೆತ ಸೈನ್ಯೊನು ಪೂರ ತೋಜಾಯೆ ||

8

ಬಾರಿ ಮಲ್ಲವೆ ಆನೆನೇರ್‌ದ್
ಏರ್ ಉಂತ್‌ನೆ ತೂಲ ಆಯೆನೆ
ಬೂಮಿದೇವಿನ ಪುಳ್ಳಿ ನರಕನ ಮಗನೆ ಮಹವೀರೆ ||
ಆಯಡುಂಡುಯ ಬೊಲ್ಲು ಪಂಜಿದ
ಕೋರೆದಾಡೆಡ್ ಮಲ್ತನಂಕುಸೊ
ಆನೆಲೇತೋ ಉಲ್ಲೊ ಆಯಡ ಗೆಲ್ಪುನೆಂಚಪ್ಪ ||

9

ಹಸ್ತಿನಾವತಿದರಸು ಪೀಟೊಗು
ಕಪ್ಪೊ ಕಾಣಿಗೆ ಕೊರ್ಪಿ ವೀರರ್
ಲಕ್ಷೊ ಲಕ್ಷೊದ ಸೇನೆದೊಟ್ಟುಗು ಸೇರ್‌ದಲ್ಲೆರಾಯೆ ||
ಒಟ್ಟು ತೂನಗ ಕೌರವೆರೆ ಕಡೆ-
ಟಿತ್ತಿ ಸೈನ್ಯೊನು ಗೆಲ್ವಿಯೆರೆನೇ
ನಿಕ್ಕಿ ತೀರುನ ಕಸ್ತೊ ಪಂಡ್‌ದ್ ಕ್ರಿಷ್ಟೆ ತೆರಿಪಾಯೆ ||

10

ಎದುರು ಕಡೆಟುಂತ್‌ದ್‌ನ ಅಜ್ಜನ್
ಗುರುನು ಬಾವನ್ ಬಂದು ಬಳಗೊನು
ಮೆಗಿಯನಕಲೆನ ಜೋಕ್ಷು ಬಾಲ್ವೆನ್ ಇಸ್ಪ ಮಿತ್ತೆರೆನ್ ||
ಹರಿಯೆ ತೋಜಯಿಸಾತ್‌ಗರ್ಜುನ
ತಿಗಲೆ ನಡ್‌ದ್‌ಲಾಂಡ್ ಮನಸ್‌ಗ್
ಎತೆತ ಬೇನೆಡ್ ತರೆನೆ ತಿರ್ಗ್‌ದ್ ಬಾರಿ ಪೋಡಿಗಿನೆ ||

11

ಜಕ್ಕಲ್‌ಡ್ ಕುಲ್ಲಾಡ್ ಸಾಂಕ್‌ನ
ಅಜ್ಜ ತಿಗಲೆಗೊ ಬಾಣೊ ಬುಡ್ಡುನೆ
ಕಲ್ಪಯಿನ ಗುರುಕುಲೆಡ ಕಾದೊಡೆ ಸಿವ ಮಹಾದೇವ ||
ಅಸ್ವತ್ತಾಮೆನೆ ಎನ್ನ ಒಟ್ಟಿಗೆ
ಕಲ್ತನಾಯಡ ಲಡಯಿಗುಂತೊಡೆ
ಒರಿಯೇ ತಂಗಡಿನ ಕುಂಕುಮೊನುರ್ದುನೆಂಚೇನ್ ||

12

ಬಾಲೆ ಅಬಿಮನ್ಯುನವೆ ಪಿರಯೊದ
ಜೋಕುಲೆಡ ಕಾದುನವೆ ಪರಿಸಿತಿ
ಆಯಿನೆನ್ ಗೆರೆಪುನಗ ಕಣ್ಣೆಡೆ ನೀರ್ ಅರಿದಾಂಡ್ ||
ಮಾತೆರೆನ್ ಕೆರ್‌ದೇನ್ ಬದ್‌ಕಗ್
ಬೋಡದೇ ಮಹ ನರಕೊ ಗುಂಡಿಗ್
ಬೂರುನಂಚಿನ ಕೆಲಸೊ ಮಲ್ಪೊಡೆ ಎನ್ನ ಹಣೆಬರೊನೊ ||

13

ಬದ್‌ಕ್ ಸಾಸಿತೊ ಅತ್ತ ಪನುಪುನ
ತೆರಿದ್ ಗುರು ಹಿರಿಯೆರೆನ್ ಕೆರ್‌ದಲ
ಪಡೆಪುನವು ನರಮನಿಗ್ ಎಡ್ಡೆನೆ ಅತ್ತ ಗ್ರೇಯ್ಪುನಗ ||
ಸಯಿರೊ ಬೆಗರ್‌ದ್ ಕಾರ್ ಕುಂಬರ್ -
ದಪಗ ತೇರ್‌ಡ್ ಉಂತ್ಯೆರಾಯಿಜಿ
ಬಿರುನು ಪತ್ತನ ಕೈಯ್ಯೆ ನಡ್‌ದ್ ಮಾಲ್ ಮಾಲೊಂದು ||

14

ತೇರ್‌ದಾ ಕಮ್ಮೊದವೆ ಆದರೊ -
ಡಾಯೆ ಉಂತಿಯೆ ಬಿರುನು ದಕ್ಕದ್
ತಾನ್ ಲಡಯಿದ ಕಳಕ್ ಜಪ್ಪಯೆ ಪನ್ನಿ ಯೇಚನೆಡ್ ||

ಪಾರ್ತೆ ಉಂತ್‌ನ ತೂದು ಕ್ರಿಷ್ಟಗ್
ಬಾರಿ ಆಚಿರೊಲಾಂಡ್ ಮನಸ್‌ಡ್
ತಾನ್ ನೆನೆತೆನೆ ಪಾರ್ತೆ ಬುದ್ಧಿಗ್ ಮೋಹೊ ಕಬಿದುಂಡು ||

|| ಸಿರಿಕ್ರಿಷ್ಟೆ ಅರ್ಜುನನ ಮೋಹೊ ಮುಸುಕುನು ತೆಲಪಾಯೆ ||

ತರೆನಡಿಕ್ ಪಾಡೊಂದು ಪಾರ್ತೆನೆ
ರತೊಟು ಉಂತ್‌ನ ತೂದು ಮುರಹರೆ
ಮುಗುರು ತೆಲಿಕೆಡ್ ಕೇಂಡೆನಾಯಡ ದಾನೆ ಆಂಡ್‌ದ್ ||
ತರೆನ್ ತಗ್ಗದ್ ಸೇಂಕ್ ಸೇಂಕ್‌ದ್
ಉಸುಲು ದೆತ್ತೊಂದುಲ್ಲ ದಾಯೆಗ್
ಪನ್‌ಲ ಎನ್ನಡ ಬಾವ ಸೌಕ್ಯೊನೆ ಇದ್ಯೊ ನಿಕ್ಕಿತ್ತೆ ||

1

ಕಾಳಗೊದ ಕಳಟಿತ್ತಿ ವೈರಿಲು
ತೂಪೆರತ್ತೊಯೆ ನಿನನ್ ಈಯೇ
ಪೋಡಿದುಲ್ಲನೆ ಪನ್ದಲಾಕ್‌ಲ್ ರಂಗ್ ಮಲ್ಪಯೆರೊ ||
ಮೂಲು ಯುದ್ಧೊಗು ಸುರುವೆ ಆತ್‌ಜಿ
ಬಾಣೊ ತಾಗ್‌ಜಿ ಗಾಯೊ ತೋಜುಜಿ
ಈಯೆ ಬುಲ್ಪುವ ದಾಯೆ ಪಂಡ್‌ದ್ ಎಂಕ್ ಗೊಂತಾಯ್ತೆ ||

2

ಮೂಜಿ ಲೋಕೊದ ವೀರೆ ನಿನ್ನನ್
ಯಾನ್ ನಂಬುದು ಕಾಳಗೊದವೇ
ಬೂಳ್ಯೊ ಪತ್ತದೆ ಇತ್ತೆ ಎನ್ನವೆ ನಾಲಿ ಕೊಯ್ಯೆತ್ತೊ ||
ಆನಿ ಪನ್ಪಡ ದಾನೆ ಆತುಯ
ಬೂಟು ಬಿಸರ್‌ತಿಗೆಡ್ ಎನ್ನಡ
ದಾನೆ ಪನ್ಪಯ ನೆಂಪು ಮಲ್ಪುಲ ಪಾರ್ತೆ ಸರಿಯಾದ್ ||

3

ಹರಿಯೆ ಸಾಸಿತೊ ಅತ್ತಂದಿತ್ತನ್
ಬದ್‌ಕ್ ರಾಜ್ಯೊಗು ಬೋಡದೇನಿನಿ
ಹಿರಿಯೆರೆನ್ ಗುರುಕುಲೆನ್ ಬಂದುಲೆ ಪೊದ್ವೆರಿಪ್ಪೆರೆನ್ ||
ಕೆರೊಡೆ ಪನ್ಪುನ ದುಕ್ಕೊಡೇನೇ
ಮರುಗುನೆನೆ ಕೇನೆನ್ನ ಮನಸ್‌ಗ್
ತೆರಿನ ಸಂಗತಿ ಪನ್ನೆ ಕೇನ್‌ಲ ಬಾವ ಕೆಬಿಕೊರ್ದು ||

4

ಸಾಂಕ್‌ನಜ್ಜನ್ ವಿದ್ಯೆ ಕಲ್ಪಯಿ -
ನಾಕ್‌ಲೆನ್ ಬಂದುಲೆನ್ ಜೋಕ್ಷೆನ್

ರಾಜ್ಯೊದಾಸೆಗ್ ಬೋಡದೇನೇ ಕೆರ್ಡ್ ಗೆಲ್ಲೊಂದು ||
 ಏತ್‌ದಿನೊ ಬದ್‌ಕೊಂದು ರಾಜ್ಯೊನು
 ಆಳುವೆನೊ ಪನ್ ಸೈತ್ಯದಾದ್‌ಲ
 ಯಾನ್ ಮಲ್ತನ ಪಾಪೊದಾಪಲೊ ಪೋವೊ ಪನ್‌ಲೆನಡ ||

5

ಪಾಪಿಗುಂಡೊಯ ಸೊರ್ಗೊ ನರಕೊನೆ
 ಆಯಗಾಪುನೆ ನಾನ ಜಾತಿದ
 ಪ್ರಾಣಿಯಾದೋ ಪಕ್ಕಿಯಾದೋ ಅತ್ತ್ ಪುರಿಯಾದೋ ||
 ಹಾಲ್ ಜಲ್ಲೊನೆ ಪನ್ನಿ ಸಂಗತಿ-
 ಡೇನ್ ದಾಯೆಗ್ ಲಡಯಿ ಮಲ್ತದ್
 ಪಾಪೊನೇ ಮೇಲ್ಗೊತ್ತ್ ಪಾಡೊನುನೆಂದ್ ಶ್ರೀ ಕ್ರಿಷ್ಣ ||

6

ಏರ್ ದೂರಡ್ ರಂಗ್ ಮಲ್ಪಡ್
 ಯಾನ್ ಕಾಡ್‌ಗ್ ಪೋಪೆ ಧರ್ಮಜ
 ಭೀಮನಾಕ್‌ಲ್ ದಾಲ ಮಲ್ಪಡ್ ಎಂಕ್ ಬೊಡ್ಡಿತ್ತೆ ||
 ಪಾರ್ತೆ ಪನ್ನುನ ಕೇನ್ದ ಕ್ರಿಷ್ಣಗ್
 ಆಯ ಬುದ್ಧಿಗ್ ಮೋಹೊ ಕಬಿತ್‌ನ
 ಪೂರ ತೆಲಪಾಯೆರೆಗ್‌ಲಾದ್‌ಲ ಪನ್ನೆನದ್ವೈತೊ ||

7

ಏರೆನೀ ಕೆರ್ಪುನೆಯ ಅಕ್‌ಲೆನ
 ಆತ್ಮೊನೋ ಪನ್ ದೇಹೊನೋ ಪನ್
 ಏರೆಗೇರೆನ್ ಕೆರ್ಪೆಗ್ ತೀರುಂದು ಪನ್‌ಲೆನಡ ||
 ದೇಹೊ ಮಾತ್ಮೊನೆ ಸೈಪ್ಪುನತ್ತೊಯ
 ಆತ್ಮೊ ಸಯ್ಯರೆಗಿದ್ದಿ ಅವ್ವೇ
 ಸಾಸಿತೊನೆ ಆದುಂಡು ತೆರಿಯೊನು ಪಾರ್ತೆ ಪನ್ನುನೆನ್ ||

8

ಸೂಟು ಪೊತ್ತುನವತ್ತ್ ಗಾಳಿಗ್
 ಆಜಿದುನ್ನುನವತ್ತ್ ಕತ್ತಿದ
 ಗಾಯೊ ತಾಗುನವತ್ತ್ ನೀರ್‌ಡ್ ಪಾಡ್ ಬೊದುಲಂದ್ ||
 ದೇಹೊ ಪರತಾವೊಂದು ಬನ್ನಗ
 ಆತ್ಮೊ ಜಾರ್‌ದ್ ಬೇತೆ ಸೈರೊನು
 ಸೇರುನೆಕ್ ಮರಣೊಂದು ಪನ್ನುನ ಪುದರ್ ಗೊಂತಾಂಡೊ ||

9

ಮರಣೊ ಕಾಲೊಡು ದೇಹೊದುಲಯಿದ
 ಪರಮ ತೇಜಿದ ಆತ್ಮೊ ಕರ್ಮೊದ
 ಪಲೊಕು ಸರಿಯಾಯಿನವೆ ದೇಹೊನು ಸೇರುನೆನೆ ಪಾರ್ತೆ ||
 ಪರತ್ ಅಂಗಿನ್ ದೆತ್ತ್‌ದಕ್ಳದ್
 ಪೊಸತ್ ಪಾಡುನ ಲೆಕೊನೆ ಆತ್ಮೊಲ
 ಅಪಗಪಗ ಬದಲೊಂದು ಉಪ್ಪುನೆ ಕರ್ಮೊದಾ ಪಲೊಟು ||

10

ನಿಕ್ಕ್ ಕೆರ್ಪೆರೆ ಬಲ್ಲಿ ನಿನಡ್‌ದ್
 ಸೈಪ್ಪುನಕ್‌ಲೇರುಂಡು ಬಾನೊಗು
 ಕತ್ತಿ ದಕ್ಳಡ ಬಾನೋ ಪೋಡಿವೊ ಕೇನ್‌ಲಯ ಪಾರ್ತೆ ||
 ಕರ್ಮೊದಾ ಪಲೊಟಾತ್ಮೊ ಸೇರುನೆ
 ಏಕ್ಕ್ ಬೋಡಯಿ ದೇಹೊ ದುಲಯಿಡ್
 ನಿತ್ಯೊ ನಿರ್ಮಲೊ ಚಿನುಮಯಾತ್ಮೊನೆ ಪನ್ದ ತೆರಿಯೊನುಲ ||

11

ಪಾರ್ತೆ ಬಂದುಲೆನೇತೊ ಕೆರ್ನಯಿ
 ಪಾಪಿ ಪಂಡ್‌ದ್ ಲೋಕೊದಾಕ್‌ಲ್
 ದೂರುವೆರ್ ಎನನತ್ತೊ ಕ್ರಿಷ್ಣಾ ದಾಯೆಗೀ ಲಡಯಿ ||
 ಸೂರ್ಯ ಕಿರಣೊನೆ ಪೀತ ಗುಂಡಿಗ್
 ಬೂರ್ಡ್ ಕಿರಣೊಗು ನಾತೊ ಉಂಡೊಯ
 ಏರ್‌ದೂರಡ್ ನಿನ್ನವಾತ್ಮೊಗು ಕೊರತೆ ಎಂಚಿನವು ||

12

ಪರಮತತ್ತೊನು ತೆರಿನ ಜ್ಞಾನಿಗ್
 ಪುಗರುನವೆ ದೂರುನವೆ ಪನ್ನುನ
 ಗುಣೊತ ಲೇಪನೊ ಇದ್ದಿ ತೆರಿಯೊನು ಪಾರ್ತೆ ನನದುಂಬು ||
 ಕೆರಿಯೆನೇ ಯಾನಯನ್ ಎಂಕ್‌ಲ
 ನರಕೊ ಪಾತಕೊ ಆಂಡ್ ಪಂಡ್‌ದ್
 ಮರುಗುನಾಯಗ್ ಮಾಯೊದಾ ಮಮಕಾರೊ ಉಂಡಾವು ||

13

ಹರಿಯೆ ಹಿಂಸೆನ್ ಮಲ್ತನಾಯಗ್
 ನರಕೊ ತಪ್ಪಂದೆನ್ನಿ ಪಾತೆರೊ
 ತೆರಿದ್ ಬಂದುಲೆ ನಾಸೊ ಮಲ್ಪುನ ಸಮೊನೊ ಪನ್‌ಲೆನಡ ||
 ಪರಮ ತೇಜಿದ ಆತ್ಮೊ ಸಾಸಿತೊ
 ಸಯಿರೊ ನಾಸೊಗೆ ಇತ್ತ್‌ನವು ನಿಜೊ
 ಅಯಿನ್ ದೆತ್ತಡ ನಿಕ್ಕ್ ಹಿಂಸೆದ ದೋಸೊ ತಟ್ಟಂದ್ ||

14

ಕರ್ಮೊನೇ ಸೈರೊನುಲ ಪಡೆವುನೆ
 ಕರ್ಮೊನೇ ಕಾಪುನೆಲ ಸೈರೊನು
 ಕರ್ಮೊನೇ ಕೆರ್ಪುನೆಲ ಸೈರೊದ ಮೋಕೆದಾಕ್‌ಲೆನ್ ||
 ಕರ್ಮೊದಾಯ್ತಲ ಉಪ್ಪಡಕ್‌ಲೆನ
 ನಿನ್ನ ಕರ್ಮೊನು ಮಲ್ಪು ಮೋಹೊನು
 ಬುಡ್ಡುಲಪಗನೆ ನಿಕ್ಕ್ ಕರ್ಮೊದ ದೋಸೊ ತಾಗಂದ್ ||

15

ಕೇನ್‌ಲರ್ಜುನ ಲೋಕೊಡಿತ್ತೆನ
 ಈಚರಾಚೆರೊ ಮಾತ ಎನ್ನವೆ

ಯೆನ್ನ ಇಚ್ಚೆಡೆ ನಡಪುನತ್ತಂದತ್ತ್ ಎರ್ದವುಲ ||
 ಲೋಕ ನಡಪುಂಡಿಂಚ ಸುರೆರೆಗ್
 ಸಾನ್ ಎನ್ನವೆ ಆಚ್ಚೆ ಮಾತರೆ -
 ನಾತೊಡೇ ಯಾನುಲ್ಲೆ ಪಂಡ್‌ದ್ ಈಯೆ ತೆರಿಯೊನೊಡು ||

16

ಎನ್ನವೇ ಸಂಕಲ್ಪುಡಾಪುನೆ
 ಸಿಪ್ಪಿ ಸಿತಿಲಯೊ ಪನ್ದ್ ತೆರಿಯೊನು
 ಅನ್ಯ ಗ್ರೇಯಿಕೆ ಬೊಡ್ಡಿ ಕೆರ್ಪುನೆ ಯಾನೆ ಗೊಂತಾಂಡೊ ||
 ನಿಕ್ಕ್ ನಿನ್ನವೆ ಕರ್ಮೊ ಮಲ್ಪುನ
 ಹಕ್ಕ್ ಮಾತೊನೆ ಕೈದ್ ಪತ್ತಲ
 ಯುದ್ಧೊ ಮಲ್ತ್‌ದ್ ನಿನ್ನ ಸಾಮಾರ್ತಿಕೆನ್ ತೋಜಾಲ ||

17

ಸೂರ್ಯ ತೇಜಿಡ್ ಚಂದ್ರ ಕಿರಣೊಡು
 ಬೀಜಿ ಗಾಳಿಡ್ ನೀರ್ ಪರಿಪುಡು
 ಸೇರುದುಲ್ಲೆನೆ ಯಾನ್ ಎನ್ನವೆ ಮಯಿಮೆ ಪಂಡೊನುವೆ ||
 ದೇವತೇಲೆಡ್ ಯಾನ್ ಇಂದ್ರೆನೆ
 ದಾರಗೇಲೆಡ್ ಯಾನ್ ಚಂದ್ರೆನೆ
 ಮಾನವೇರೆಡ್ ಯಾನ್ ರಾಜೆನೆ ಕೇನ್ ಕೆಬಿ ಕೊರುದು ||

18

ಪರ್ವತೋಲೆಡ್ ಮೇರು ಯಾನೇ
 ಸಾಗರೋಲೆಡೇ ಮಲ್ಲ ಸಾಗರೊ
 ಮಾತ ಮುರ್ರೊಲೆಡೇನ್ ಸಿಮ್ಮೊನೆ ಸೇಸೆ ಮರಿಕುಲೆಡ್ ||
 ಪಕ್ಕಿಲೆಡಲಾ ಗರುಡೆ, ಕಾಡ್‌ದ
 ಮಲ್ಲ ಮರೊಕುಲೆಡೇನ್ ಅತ್ತಸ
 ಪೊರ್ದೆರೆಡ್ ಮನ್ನತೆನೆ ರುಸಿಕುಲೆಡೇನ್ ಬ್ರಗುರುಸಿಯೆ ||

19

ಅಚ್ಚರೊಲೆ ಪೈಕಿಡಲ ಸುರುತವೆ
 ಅಚ್ಚರೊನೆಯಾನತ್ತೊ ಪೊಣ್ಣುಲೆ
 ಡಿತ್ತಿನಾ ಗುಣೊ ಏಳ್ ಮಾತಲ ಯಾನ್ ಯಾನಾದ್ ||
 ಉಲ್ಲೆ ಆಣುಲೆ ಪುರುಸ ಸಗ್ಗಿಲ
 ಮಲ್ಲವಾಜೀ ಸಾಸ್ತೊ ಮಾತಲ
 ಯಾನೆ ಪಂಡ್‌ದ್ ಇತ್ತೆ ತೆರಿಯೊನು ನಿಕ್ಕ್ ಅರ್ತಾಂಡೊ ||

20

ದೇವದೇವರೆ ದೈವೊ ಈಯೇ
 ವಾಸುದೇವನೆ ಪನ್ದ್ ಇತ್ತೆನೆ
 ಯಾನ್ ತೆರಿಯೊಂಡೆತ್ತೊ ಕೃಷ್ಣಾ ನಿನ್ನ ಮಯಿಮೆದವೆ ||
 ರೂಪೊನೊಂಚೆಟಿ ತೂವೊಡುಂದುದು
 ಆಸೆ ಎಂಕಾಯಿನೆಟ್ ಎನ್ನಡ
 ಮೋಕೆ ದೀಡ್‌ದ್ ಎಂಕ್ ತೋಜಲ ವಿಶ್ವರೂಪೊನೊರೊ ||

|| ವಿಶ್ವರೂಪೊನರ್ಜುನಗ್ ತೋಜಾಯೆ ||

ಪಾರ್ತ ಇನಿ ನಿಕ್ಕೆನ್ನ ರೂಪೊನು
 ತೂವೆರುಂಡುಡ ನಿನ್ನ ಕಣ್ಣೆಡ್
 ತೂಯೆರೆನೆ ಬಲ್ಯತ್ತೊ ಅಂಚದ್ ಜ್ಞಾನೊ ದಿಪ್ಪಿನ್‌ಲ ||
 ಯಾನ್ ಕೊರೈನೆ ತೂಲ ಎನ್ನವೆ
 ಮಾಮಯಿಮೆಡಿತ್ತನವೆ ರೂಪೊನು
 ಈತ್ ಪಂಡ್‌ದ್ ಪಾರ್ತನೆದುರುಡು ಉಂತ್ಯೆ ಪರಮಾತ್ಮೆ ||

1

ಬೂಮಿಡ್‌ದ್ ಆಕಾಸೊಗತ್ತನ
 ಆ ಮಹಾಮಯಿಮೆದವೆ ರೂಪೊಡು
 ಏತ್ ತರೆಕುಲು ಏತ್ ಕೈಕುಲು ಏತ್ ಆಯುದೊಲು ||
 ಸೂರ್ಯ ಚಂದ್ರೆರ್ ದಾರೆಗೆಲು ಸರಿ
 ತೋಜಿಯೊನೆ ಕಣ್ಣುಲೆಡ್ ಸೈರೊಡು
 ದೇವ ದೇವತೆನಕ್‌ಲ್ ತೋಜೈರ್ ವಸುಕುಲೊಟ್ಟಿಗೆನೆ ||

2

ರುದ್ರೆರಾದಿತ್ಯೇರ್ ಬೂತೊಲು
 ಇತ್ತೊ ರೋಮೊದ ಗುರಿಕುಲೆಡ್ ಸರಿ
 ಪುಣ್ಯೊ ಸುದೆಕುಲು ಬೆಗರ ಪರಿಪುಡು ತೋಜ್ಯೊ ಫಲುಗುಣಗ್ ||
 ಗುಡ್ಡೆ ಪರ್ವತೊಲೊಟ್ಟು ಸೈರೊಡು
 ಒಲ್ಲಲಾ ತೋಜೊಂದು ಮಾಸೊದ
 ಮುದ್ದೆದಂಚೆನೆ ಕಣ್ಣೆಗಾಂಜಿದ್‌ಲಾಂಡ್ ಪೋಡಿಗನೆ ||

3

ಕೋರೆದಾಡೆದ ಬಾಯಿದುಲಯಿಗ್
 ಬೀಸ್ಮ ದ್ರೋಣೆರ್ ಕರ್ಣ ಸೌಬಲ-
 ನಾಕ್‌ಲಲ ಕೌರವೆರೆ ಒಟ್ಟಿಗೆ ತೂಯೆ ಪೊಗ್ಗನೆನ್ ||
 ತೂದು ಬಿಂಗಿರಿಯಾದ್ ಪಾರ್ತನೆ
 ಬಾರಿ ಪೋಡಿಗಿಯಾದ್ ನಡ್‌ಯೆ
 ಕಾರ್‌ಗಡ್ಡೊನೆ ಬೂರು ಪಾರ್ಡನೊ ಪಂಡೆ ಪುಗರೊಂದು ||

4

ದೇವ ನಿನ್ನವೆ ವಿಶ್ವರೂಪೊನು
 ರೂಪ ರೂಪಾದೇನ್ ತೂಯೆನೆ
 ದೇವಲೋಕೊದ ಸುಮನಸೇರೆನೆ ಜಾತಿ ಕೂಟೊಲೆನ್ ||
 ದೇವರಾಜನ್ ಬ್ರಹ್ಮನಕ್‌ಲೆನ್
 ಸೂರ್ಯ ಚಂದ್ರನ್ ದಾರಗೇಲೆನ್
 ಬೂಮಿ ನೀರ್ನ ವಾಯು ಮಂಡಲೊ ಬೂತೊ ಗಣೊಕುಲೆನ್ ||

5

ಲೆಕ್ಕಿಸಿರಿ ಕಲ್ಚುಟಿ ಕಲ್ಚುಡೆ
ರೊಟ್ಟಿಗೆನೆ ಮಲರಾಯೆ ಜುಮಾದಿ
ಮಲ್ಲಮಹ ಪಂಜುಲಿ ಗುಳಿಗೆನೆ ಪನ್ನಿ ಬೂತೊಗುಳು ||
ನೆತ್ತೆರ್ದ ಆವರೊಗು ಬಾಯಿನ್
ಮಿತ್ತ್ ಅಂಗದ್ ಉದ್ದೊ ನಾಲಗೆ
ಬುಡ್ತೆನೆನ್ ತೂನಗನೆ ಪೋಡಿಗೇಯಾಂಡ್ ಮಾಮಯಿಮ ||

6

ಮುರೊ ಪಕ್ಕಿಲು ಸರ್ಪಜಾತಿಲು
ಪಳ್ಳಿ ಅರಣೆಲು ಓಂತಿ ಪೆಗುಡೆ
ನಿನ್ನ ಕಾರೊಡೆ ತಿಗಲೆಡೊರೆಲ ಸೇರ್ದುಲ್ಲತ್ತೊ ||
ನಿನ್ನ ಕಣ್ಣೆಲೆಡಿತ್ತೆ ರಾವೊಂ -
ದರುನಾ ಸೂ ಮೂಜಿ ಲೋಕೊನು
ಪೊತ್ತಪುನಕನ್ಮಾನೊ ಇದ್ದಿಂದೇನ್ ಪೋಡೊಂದೆ ||

7

ಹರಿಯೆ ಪಾವನ ಮೂರ್ತಿ ಮಂಗಲ
ಮಹಿಮೆದಾ ಪರ ಬ್ರಹ್ಮೆ ನಿನ್ನನ್
ಬಜನೆ ಮಲ್ತ್ದ್ ಸರಣು ಸರಣೆಂದೇನ್ ಕೈ ಮುಗಿದ್ ||
ನಿನಡ ಪನ್ನುನೆ ಯಾನ್ ಎನ್ನವೆ
ಬುಡೆದಿ ಪಲಯೆನೆ ಬಾವೆ ಪನ್ನುನ
ಸಲಿಗೇಡೇ ನೆರ್ದುಪ್ಪೆ ನಿನ್ನನ್ ಕೊಲ್ಲ ಮಾಪೆಂಕ್ ||

8

ನಿನ್ನ ಕಾರ್ಗ್ ಅಡೊ ಬೂರುವೆ
ಕ್ರಿಷ್ಟೆನೇ ಈಯತ್ತೆ ಲೋಕೊದ
ರಕ್ಕನೆ ಪರಮಾತ್ಮೆ ನಿರ್ಗುಣೆ ವಿಶ್ವೊ ನಾಯಕನೆ ||

ವಿಶ್ವೊ ರೂಪೊನು ತೂದು ಪೋಡಿಗಿ
ಡೆನ್ನ ಜೂವೂನೆ ಇತ್ತೆ ಒರಿಪುಜಿ
ಪೊರುದಾ ಸಿರಿ ರೂಪೊ ತೋಜಲ ದುಂಬುಡಿತ್ತೆನೆನ್ ||

9

ಆತ್ ಪೊರ್ತುಗು ವಿಶ್ವೊರೂಪೊನೆ
ಮಾಜಿ ಮಾಜಿದ್ ದುಂಬುದಾ ಸಿರಿ
ರೂಪೊ ಕ್ರಿಷ್ಟನ ತೋಜಿದಾನಗ ಪಾರ್ತೆ ಕೈ ಮುಗಿಯೆ ||
ತೂಯನಯ ಓ ಬಾವ ಕೆರ್ಪನೆ
ಏರ್ ಏರೆನ್ ಪನ್ನಿ ಸಂಗತಿ
ಪೂರ ಸರಿ ತೆರಿಂಡತ್ತೊ ಪತ್ತಲ ಬಿರುನು ಕೈ ಕೊರ್ದು |

10

ನಿಕ್ಕಿ ಧರ್ಮಾಧರ್ಮೊ ಪನ್ನುನ
ಬೊಡ್ಡಿ ಯೋಚನೆ ನಿನ್ನ ಕರ್ಮೊನು
ಮಲ್ಪು ಎನ್ನನೆ ನಂಬುದಿತ್ತೆನೆ ಕಳಕ್ ನುರ್ಕುಲಯ ||
ಪನ್ನಿ ಪಾತೆರೊ ಕೇನ್ದಲರ್ಜುನೆ
ದತ್ತ ಕೈಟೇ ತನ್ನ ಗಾಂಡಿವೊ
ಪತ್ತ ಕುರ್ಕದ್ ಲಕ್ಕದುಂತಿಯೆ ಮಲ್ಲ ಅಟ್ಟಿಸ್ಡ್ ||

11

ಪಾರ್ತ ಮನಸ್ಡ್ ಇತ್ತಿ ಮೋಕೆದ
ಪಾಸೊ ಕಡ್ಡದ್ ಕ್ರಿಷ್ಟೆ ತೇರ್ಡ್
ಚಾಟಿ ಬೀಜದ್ ಕುದುರೆಲೆಗ್ ನಾಲ್ವಾಲ್ ಹಾಕ್‌ನಗ ||
ಲಾಗೊ ದೆಪ್ಪುನ ತೂದು ಹನುಮೆನೆ
ಕೀರಿ ಕುಟ್ಟಿಯೆ ತೇರ್ದ ಕೊಡಿ ಮರ
ನೇರ್ದೇ ಕುರ್ಕಾದ್ ರಾಮೆನೆ ಕ್ರಿಷ್ಟೆ ಪಂಡೊಂದು ||

ರಡ್ಡನೆ ಸಂದಿ

ಲಡಯಿ ಸುರುವಾಂಡ್

ಬೀಷ್ವನಾಚ್ಚೆಡ್ ಕೌರವಾದಿಲೆ
ಸೇನೆ ಕಾದ್ಯೆರೆ ಕಳಕ್ ಬನ್ನಗ
ಪಾಂಡವೇರೆನ ಕಡೆಲ ಎತ್ತದ್‌ಲಾಂಡ್ ಕಳತಾಡೆ ||
ಬೇರಿ ತಂಬಟೆ ಕೊಂಬು ವಾದ್ಯೊದ
ಬಾರಿ ಸೊರೊ ಲಕ್ಕಯೆರ್ ಅಪಗನೆ
ಕಾಳಗೊದ ಕಡು ವೀರನಾಕ್‌ಲ್ ದುಂಬು ನುರ್ಕಿಯೆರ್

1

ರತೊನು ಸಾರತಿನಕ್‌ಲ್ ನುರ್ಕದ್
ಎದುರೆದುರು ತಾಂಟಯೆರ್ ರತಿಕೆರ್
ಒರಿಯನೊರಿಯನ್ ನೆರ್ದ್ ಬಿಲ್ಲ್‌ಗ್ ಬಾಣೊ ಕೊಲ್ಪಯೆರ್ ||
ಆನೆಲೆಗ್ ಅಂಕುಸೊಡು ಕುತ್ತೆರ್
ಮಾವುತೆರ್‌ಲಾ ಆನೆಲಪಗನೇ
ಕೀರಿಕುಟ್ಟುದು ಪಿದಡ್‌ನಾಪಗ ವೀರೆರೆದುರಾದ್ ||

2

ಬಾಣೊ ಬುಡಿಯೆರ್ ಮಡುಟು ಕಡ್ತೆರ್
ಆಂಡ ನಾಟ್‌ಜಿ ಅವೆಕ್ ನುರ್ಕಿಯೊ
ಸೇನೆ ಪೊಡಿ ಪೊಡಿಯಾಂಡ್ ಕಾರ್‌ದ ಅಡಿಕ್ ತಿಕ್ಕೊಂದು||
ರಾವುತೆರ್ ಕುದುರೆಲೆನ್ ಏರ್‌ದ್
ಮೂಂಕುದಾ ಕಡಿಯಣೊನು ಒಯ್ತನ
ಸಾತ್‌ಗವು ಲಾಗೊಂದು ಬರಸ್‌ಡ್ ದೆರ್ತೊ ಬಕ್ಕಾರ್ ||

3

ದೆರ್ತ್ ಪತ್ತಿನ ಕಾರ್ ದೀಡಿಯೊ
ತುರ್ತೊಡೆದುರುದ ಕುದುರೆನೇರನ
ಬಿಸೆರೆನವೇ ತಿಗಲೆಗಪಗನೆ ತೂನಗಾಚಿರೊನೆ ||
ದರ್ಪದಾಕ್‌ಲ್ ಕಡ್ತೆಡ್ ಸರಿ
ಕೆರ್ವೊ ಕೆರ್ವೊಂದಕ್‌ಲ್ ಕಡ್ತೆರ್
ಬರ್ಪನಕ್‌ಲೇರುಂಡು ಎದುರುಗು ಪಾರ್ಯೆರಲ್ಲಡ್‌ದ್ ||

4

ಈಟಿ ಬರ್ಚಿನ್ ಕತ್ತಿ ಕೈದಾಲೆ -
ನೇತೊ ಪತ್ತನ ವೀರನಾಕ್‌ಲ್
ಕಾಳಗೊದ ನಡುನಡುಕು ಜತ್ತದ್ ಕಡ್ಡ್ ಕುತ್ತಿಯೆರ್ ||
ನಾಲ್ ನಮುನೆದ ಸೇನೆ ನುರ್ಕಿದು
ಕಾಳಗೊನು ಮಲ್ಪುನಗ ಆಯಿನ
ಬಾರಿ ಬೊಬ್ಬೆನೆ ಮೂಜಿಲೋಕೊದ ಕೆಬಿಯೆ ಕೀಲ್ವಾಂಡ್ ||

5

ರಡ್ಡ್ ಕಡೆಟ್‌ಲ ಒಟ್ಟು ಸೇರನ
ಸೈನ್ಯೊ ಲೆಕ್ಕೊಗು ಆಂಡ್‌ಲಾ ಪದ್ -
ನೆನ್ನೊ ಅಕ್ಷೋಯಿಣಿಯೆ ಲಡಯಿಡ್ ನುರ್ಕ್ ನುರ್ಕ್‌ನಗ ||
ಒರೈನೊರೈನ ಗುರೈನಕ್‌ಲೆಗ್
ಪತ್ತೆರಾವಂದಕ್‌ಲ್ ನೋಪುನ -
ಗಲ್ಪ ಸೈತ್ತೆರ್ ಆಕ್‌ಲಾಕ್‌ಲೆ ಕಡೆತ ಪಟು ಬಟೆರ್ ||

6

ಏರ್ ಸೈತೆರೊ ಏರ್ ಕೆರೈರೊ
ಏರ್ ಏರೆನ ಗುರ್ತೊ ಏರೆಗ್
ಬೂರು ಬೂರುದು ಸೈತ್ತಿ ಪುಣಕುಲೆ ರಾಸಿ ಬೂರ್ದಾಂಡ್ ||
ಕಾರ್ ಕೈ ಪೊಲಿನಕ್‌ಲ್ ಕೆಲವೆರ್
ಪ್ರಾಣೊ ಸಂಕಡೊಡರೆದುನಾಕ್‌ಲ್
ಮೋನೆ ಪೊಡಿ ಪೊಡಿ ಆಯಿನಾಕ್‌ಲ್ ಬೂರ್ಡು ಪುಡೆರಿಯೆರ್

7

ತರೆನೆ ಬಿಚ್ಚಿದ್ ಬೊಂಡು ಸೀಂತ್‌ನ
ಪುಣಕುಲೆತ್‌ಲ ಇತ್ತೊ ಬಂಜಿದ

ಕರ್ಳ್ ಮಾಸೊಲದೊರಿಂದ್ ಸೈತ್ತನ ವೀರ ಯೋದೆರೆನ ||
ಬುಡೆದಿ ಬಾಲ್ಲೆನ ಗತಿಯೆ ದಾಯ್ತನೊ
ಪನುಪುನೇರೆಡ ಅರಸುನಾಚ್ಚೆಗ್
ತರೆನ್ ಬಗ್ಗದ್ ಜೂವೊ ಕೊರೈ ಬೈದ್‌ನಕ್‌ಲತ್ತೊ ||

8

ನೆತ್ತೆರಿದ್‌ಲ ದಾರೆಕಟ್ಟೆದ್
ಒಯ್ತದಂಚಿನೆ ಪೋದು ಎರ್ಕ್‌ದ್
ಅಲ್ಪ ಅಲ್ಪನೆ ಆಂಡ್ ಎಲ್ಯವು ಕೆದುವೆ ನೆತ್ತೆರದ ||
ಐಕ್ಕೈ ಬೂರೈರ್ ಜಾರ್ಡ್ ಕೆಲವೆರ್
ಮಿತ್ತ ಬನ್ನಗ ಕೆಂಪು ಕೆಂಪುದ
ನೆತ್ತೆರದ ಓಕುಳಿಯೆ ಆಂಡ್‌ಲ ಮಾರಿ ಪೂಜೆದವೆ ||

9

ತೇರ್ ಪೊಡಿ ಪೊಡಿಯಾದ್ ಬೂರನ
ಆನೆಲೆನ ಪುಣತಟ್ಟಿ ಒಯ್ತನ
ರಾವುತೆರ್ ಕುದುರೆಲೆನ ಪುಣಕುಲೆ ರಾಸಿ ಏಶೆಂದ್ ||
ತೂದು ಲೆಕ್ಕೊನು ಪನ್ನುನೇರೆಗ್
ಏರ್ ಏರೆಗ್ ಉಲ್ಲೆರಂದ್‌ದ್
ಕಾಳೊಗೊನೆ ಕೈದಾದ್ ಮಾತ್ತೊನೆ ತೆರಿಯೊಡಾತೆತ್ತೊ ||

10

ಪಾಂಡು ಬಾಲೆಲು ತೇರ್‌ನೇರ್‌ದ್
ಕಾಳಗೊಗು ನುರ್ಕ್‌ನಗ ಪಿರವುಡೆ
ಸೇನೆ ಸರೊಲ ಕಾದೈರುಂತಿಯೊ ಕಾಳಗೊದ ಕಳಟ್ ||
ಬೀಸೈ ನೆರ್ಪುನ ಕೇನ್ದಲಪಗನೆ
ಕೌರವಾದಿಲು ಕಳಕ್ ನುಕ್ಕೈರ್
ಬಾರಿ ಗೌಜಿದ ಲಡಯಿ ಸುರುವಾಂಡಪಗ ಕಳಟೊರ್ಮೆ ||

11

ಸಲೈ ನಕುಲಡ ಸಕುನಿ ಯುದೊನು
ಮಲೈ ಸಹದೇವಡನೆ ಅರ್ಜುನೆ
ಲೆತ್ತೆನಾ ಗುರುಮಗನ್ ನಮೊ ನಮೊ ತೂವೊನುಗೊ ಪನ್ನೊ ||
ದುಸ್ಪ ದುಸ್ಸಾಸನೆನೆ ಸಾತ್ಯಕಿ -
ಡಲ್ಪ ಕಾದಿಯೆ ಕುಂತಿ ಬೋಜಡ
ದುಸ್ಸಲೆನ ಕಂಡನಿಯೆ ಲಡಯಿಗ್ ಉಂತ್ಯೆನಬ್ಬರೊಡು ||

12

ದುಸ್ಪದುಮ್ಮೆನೆ ದ್ರೋಣನೆದುರುಡು
ಲಚ್ಚಣಗ್ ಎದುರಾಯಿನಾ ಅಬಿ
ಮನ್ಯು ಬೀಮೆನೆ ಲೆತ್ತೆ ಲಡಯಿಗ್ ಕುರುಡ ಬಾಲೆಲೆನ್ ||
ಭೀಮನಾ ಮಗೆ ನರಕ ಮಗಟನೆ

ಕಾದ್ಯೆರುಂತಿಯೆ ರಡ್ಡೆ ಕಡೆತಲ
ವೀರರೆನ ಕಡುಲಡಯಿದಟ್ಟಸ್ ಬಾರಿ ಜೋರಾಂಡ್ ||

13

ಬಾಣೊ ಬುಡಿಯೆರ್ ಗದೆಟ್ ಹಾಕ್ಯೆರ್
ಈಟಿ ಬರ್ಚಿಡ್ ಕುತ್ ಕೆರೈರ್
ಬಾರಿ ಪುಣ ಪಾಡಿಯೆರ್ ಕಡ್ಡಲೆಡಕ್ಲ್ ಕಡ್ತೊಂದು ||
ದಾರೆ ಕಟ್ವೆದ್ ನೆತ್ತೆರಿದಲ್
ಬೂರೈ ಪುಣಕುಲೆ ರಾಸಿ ಏಶ್ಲ
ಆಂಡ್ ಆನೆಲು ಸೈತ್ತೊ ಕುದುರೆಲು ಬೂರು ಪುಡೆರಿಯೊನೆ ||

14

ಕಳನೆ ಪೊಡಿ ಪೊಡಿಯಾದ್ ನೆತ್ತರ್
ಅರಿದ್ ಎರ್ಕೆದ್ ಕೆಸರ್ ದಿಂಜಿದ್
ಕೊಳಕೆ ಕಂಡೊನೆ ಆಂಡ್ಲಾ ಕುರುಕಂಡೊದಾ ಕಳನೆ ||
ಲಡಯಿ ತೂಯೆರೆ ಮಿತ್ತ್ ಬಾನೊಡು
ಸುಮನಸೆರ್ ಉಂತೊಂದು ಪಂಡೆರ್
ನರಮನಿಯೆರೆನ ಲಡಯಿ ತೂನಗ ಬಾರಿ ಆಚಿರೊನೆ ||

15

ಭೀಮೆ ಗದೆ ಬೀಜಾದ್ ಬರ್ಪನ
ತೂದು ಜೋರುರೊಂದು ಪಾರೈರ್
ಜೂವೊ ಒರಿದಾಂಡೆಂಕ್ಲ ಪೆಜ್ಜಿದ್ ತಿನುವೊ ಪಂಡೊಂದು ||
ಓಲು ದೆಂಗ್ ದ ಉಲ್ಲೆ ಕೌರವೆ
ಆಯ ಬೂಮಿದ ಕೊದಿನ್ ಬುಡ್ವೆ
ತೋಜುಜೆನೆ ಪಂಡೊಂದು ಭೀಮೆನೆ ತಿಗೊಂದುಪ್ಪುನಗ ||

16

ಜುಗರಿ ಗೊಬ್ಬುದು ಕಳೆಯಿ ರಾಜ್ಯೊನು
ಪೆರಪ ಪಡೆಯೆರೆ ಲಡಯಿಗುಂತುನ
ಕೊದಿಯೆ ನಿಹಲೆಗ್ ಸೈಪ್ಪಿ ಕಾಲೊನೆ ಪನ್ದ ಕುರುಪತಿಯೆ ||
ಎದುರು ಬನ್ನಗ ಭೀಮೆ ಹಾಕ್ಯೆನೆ
ಗದೆಟ್ ಕೌರವ ತರೆಕಲಪಗನೆ
ತರೆನೆ ತಿರ್ಗದ್ ಬೂರ್ನಸಾಶ್ ಗ್ ಬೀಸೈನೆದುರಾಯೆ ||

17

ಅಜ್ಜ ಈರೇ ಸಾಂಕ್ ನಾರಲ
ಕೆರೈಡ ಕೆರೈಂದ್ ಭೀಮೆನೆ
ತನ್ನ ಗದನೇ ದಕ್ಕದಾಪೆಕ್ ತಿಗಲೆ ತೋಜಾಯೆ ||
ಎಲ್ಯ ಬಾಣೊನು ಬುಡುದು ಭೀಮನ್
ಅಲ್ಪದ್ ರಟ್ಟಾದ್ ಬೀಸೈನೆ
ಕ್ರಿಷ್ಣ ಪಾತೆರೆ ತೇರ್ ನಾಡೈರೆ ಪೋಯೆ ರತೊನೇರ್ಡ್ ||

18

ಸಲೈ ಸಹದೇವನ್ ಲ ರಟ್ಟದ್
ಬನ್ನಗೆದುರುಗು ತಿಕ್ಕೈನುತ್ತರೆ
ಬಿರೈ ಬಲಿಪುನೆಟೀಯೆ ಬಲಿತಡ ಕೆರೈ ಪಂಡೊಂದು ||
ಉತ್ತರನ ತರೆಕೊಂಜಿ ಪಗರಿನ್
ಬುಡ್ಡು ತೂನಗ ತರೆನೆ ತಿರ್ಗದ್
ಕುತ್ತ ಕಂಡೆನೆ ಬೂರೈ ಸೈತ್ತದ್ ಪೊರು ಕಂತ್ ನಗ ||

19

ಸೇನೆದಾ ತಂಡೇಲನಾಕ್ಲೆ
ಸೂಚನೆದ ರಣೊ ಕೊಂಬುದಾ ಸೊರೊ
ಕೇಂಡ್ ದಾನಗ ಲಡಯಿನುಂತದ್ ಮಾತ ಸೈನಿಕೆರ್ ||
ಆಕ್ಲಾಕ್ಲೆ ಸಿಬಿರೊದುಲಯಿಗ್
ಪೋಯೆರೊಟ್ಟುಗು ರಾತ್ರೆಡಾಕ್ಲೆ
ಕಾಳಗೊನು ಮಲ್ಪಿಯೆರೆ ಬಲ್ಲಿದಕ್ಲೆ ನಿರ್ಣಯೊನೆ ||

|| ರಾತ್ರೆ ಸಿಬಿರೊದುಲಯಿ ||

ಸಿಬಿರೊದುಲಯಿಗ್ ಬತ್ತಿ ವೀರೆರ್
ತರೆತ ಟೊಪ್ಪಿ ಕಿರೀಟೊ ಮುಂಡಸ್
ಗಿರಿತ್ ಗೆತ್ತೆರ್ ಅಂಗಿ ಕವಚೊನು ಪೂರ ಬಿಚ್ಚಯೆರ್ ||
ತಿಗಲೆ ಬಂಜಿಗ್ ಬೆರಿಕ್ ಸೊಂಟೊಗು
ಕಣೆಟ್ ಕತ್ತಿದ್ ಗದೆಟ್ ಬರ್ಚಿಡ್
ಕುಡೆರಿದಾಯಿನ ಗಾಯೊ ಮಾತೆನ್ ತೂದು ದೆಕ್ಕಿಯೆರ್ ||

1

ಮರ್ಡ್ ತಾಗದ್ ಪರಿಡೆಣ್ಣೆನ್
ಮುಟ್ಟಯೆರ್ ಪೊಸ ಕುಂಟು ಕಟ್ವೆದ್
ಮಲ್ಲ ವೈದೈರ್ ಮಂತ್ರವಾದಿಲು ಮಾತ ಸೇರೊಂದು ||
ಗಾಳಿ ಪಾಡೈರ್ ಮಂತ್ರೊ ಮಲ್ತದ್
ನೀರ್ ಮೈತ್ತೆರ್ ಪರಕೆ ಪಂಡೆರ್
ಜೋರು ಪೆಟ್ವೆಡ್ ನೆರಲುನಾಕ್ಲೆ ಕಣ್ಣ್ ಮುಚ್ಚಿಯೆರ್ ||

2

ಕಾರ್ ಕೈ ತುಂಡಾಯಿನಕಲೆನ್
ತೂಪಿ ಕಣ್ಣೆಲ ಪೋಯಿನಕಲೆನ್
ಪ್ರಾಣೊ ಸಂಕಡೊ ತಡೆಯೆರಾವಂದಕ್ಲೆನೊಟ್ಟಿಗನೆ ||
ಆರೆಕಿಗ್ ಬೋಡಿತ್ತಿ ವೈದೈರ್
ಸೇರ್ ದಿತ್ತೆರ್ ಸಿಬಿರೊದುಲಯಿಡ್
ಆಡೆಗನೆ ಕಡಪುಡುದು ಆರೆಕಿ ಸರಿಟ್ ಮಲ್ಪಿಯೆರ್ ||

3

ಆನೆಲೆನ ಕುದುರೆಲೆನ ಪೆಟ್ವೆನ್
ತೂದು ಮರ್ಡನ್ ಕೊರ್ಪಿ ಪಂಡಿತ -
ನಾಕ್‌ಲಿತ್ತೆರ್ ರಡ್ಡ್ ಮೆಯಿತಲ ಸೇನೆದೊಟ್ಟಿಗೆನೆ ||
ಆನೆ ವೈದ್ಯೆರ್ ಕುದುರೆ ವೈದ್ಯೆರ್
ಬೇತೆ ಬೇತೆನೆ ಇತ್ತೆರಾಕ್‌ಲ್
ಮಾಯೊ ಮಂತ್ರೊಡು ಲಕ್ಕದುಂತವೊ ಪನ್ದ ಕೊಚ್ಚೊಂದು ||

4

ಉನ್ನುನಕ್‌ಲೆಗ್ ತಿನ್ನುನಕ್‌ಲೆಗ್
ಪರ್ವನಕ್‌ಲೆಗ್ ಬೋಡು ಬೋಡಯಿ-
ನಲ್ವ ಮಲ್ತ್‌ದ್ ಕೊರೈರಿತ್ತೆರ್ ಅಡಿಗದಕ್‌ಲೇತೊ ||
ಜೆಪ್ಪುವೆರ್ ಕುಲ್ಲುವೆರ್ ಕೆಲವೆರ್
ಬುಲ್ಲುವೆರ್ ಲಕ್ಕುವೆರ್ ಕೆಲವೆರ್
ದಮ್ಮ ಕಟ್ಟೆದ್ ಸೈತ್ತೆರಲ್ವನೆ ಪೆಟ್ವೆಲಾಯ್‌ಕ್‌ಲ್ ||

5

ಕಕ್ಕೆ ಕರುಕುಲು ನಾಯಿ ಕುದೈರ್
ಕರ್ಲೆ ಮಾಸೊನು ಒಯ್ಯುನಾಪಗ
ತುಚ್ಚೊನುನ ಬಾರೊನುನ ಬೊಬ್ಬೆ ಬೊಬ್ಬೆ ಪಿದಯಿಡ್‌ದ್ |
ಕಾಟ್ ಪ್ರೇತೊಲು ರಣಪಿಸಾಸಿಲು
ಬೂರಿ ನೆತ್ತೆರ್ ನಕ್ಕ ನಕ್ಕದ್
ಲಾಗೊದಪ್ಪುನ ಕೀರಿಕುಟ್ಟುನ ಸೊರೊನೆ ಕೇಂಡಾಡೆ ||

6

ತೇರ್‌ದಾ ಚಕ್ಕೊಲೆನ್ ಪೀಂಕದ್
ಬೇತೆ ಪೊಸತ್‌ನ್ ತಿಕ್ಕಯೆರ್ ಸರಿ
ಕೀಲ್ ಬೊಟ್ಟುದು ಗಟ್ಟಿ ಮಲ್ತೆರ್ ಸಿಲ್ಲಿನಕ್‌ಲೊಟ್ಟು ||
ಆಯುದೊಲೆ ಪರಿತೆಲೆನ್ ತೂಯೆರ್
ಸಾಣೆ ಕಲ್ಲ್‌ಡ್ ಉರ್ದು ಉರ್ದು
ಬಾಯಿ ಕೊಡತ್‌ದ್ ಪರಿತೆ ಮಲ್ತೆರ್ ಕತ್ತಿ ಕಡ್ಲೊಲೆನ್ ||

7

ಪಗರಿಲೆನ ಕೊಡಿ ದೂಂಚಿ ಮಲ್ತೆರ್
ಬಿರುತ ನಾರ್‌ದ ಗಟ್ಟಿ ತೂಯೆರ್
ಕುಡರಿ ಮಡುಕುಲು ನಾಯೆರುಚ್ಚೆರ್ ಪನ್ನನಾಯುದೊಲೆ ||
ಪುಡಿನ್ ಗಟ್ಟಿಯೆ ಮಲ್ತೆರಾಕ್‌ಲ್
ಅಕ್‌ಲಕಲೆನಾಯುದೊಲು ಒವ್ವಂ-
ದಕ್‌ಲಕಲೆ ನಾಡೊಂದು ಬೇತೆನೆ ದೀಡೈರಕ್‌ಲಕ್‌ಲ್ ||

8

ಆತ್ ಪೊರ್ತುಗು ಪುಲ್ಯ ಕಾಂಡೆದ
ಬೇರಿ ಬೊಟ್ಟುನ ಬೊಬ್ಬೆ ಕೇನ್ನಗ

ಮಾತೆರ್‌ಲ ಲಕ್ಕೊಂದು ಉಣಿಯೆರೆ ಮೋನೆ ದೆಕ್ಕಿಯೆರ್ ||
ಸಾಲ್‌ಡೇ ಕುಲ್ಲೊಂದು ಉಂಡೆರ್
ಬಾಜೆಲ್‌ಗ್‌ಲಾ ಗರ್ವೊದೇಣ್ಣೆನ್
ಬೋಡು ಬೋಡಯಿನಾತ್ ದಿಂಜದ್ ಬುಡಿಯೆರಾರಿಗನ್ ||

9

ಕಾಳಗೊದ ಕಳ ನುಕ್ಕೈರಾಪುನ
ಸೀಸಕೊನು ಕವಚೊಲೆನ್ ತಿಕ್ಕದ್
ವೀರ ಕಚ್ಚೆನ್ ಬಿಗಿತ್ ಕಟ್ಟೆದ್ ಪಿದಡ್‌ದುಂತನಗ ||
ಮೂಡಯಿಡ್ ಬೊಲ್ವಾಂಡ್ ಕೊಂಬುದ
ವೀರ ಗರ್ಜನೆ ಕೆಬಿಕ್ ನಾಟ್‌ದ್
ಆನೆಕುದುರೆಲು ತೇರ್ ಪಿದಡಿಯೊ ಜಯೊತ ಗೋಸಣೆಡ್ |

ಬೀಸೈ ಕ್ರಿಷ್ಣಡ ಚಕ್ಕೊಪತ್ತಾಯಿ

ನಾಲ್ ರಂಗೊದ ಸೇನೆದಾಕ್‌ಲ್
ಕಾಳಗೊಡು ಪುಣೆವೊಂದು ಪೊಂಬುದು
ಏತ್ ಏತೋ ಸೈತೆರಲ್ವನೆ ಲೆಕ್ಕೊ ಏತಾಂಡೊ ||
ಬೀಸೈ ಕೆರವೆ ಪತ್ತ್ ಸಾವಿರೊ
ಆಂಡ್ ಪೊರ್ತುಲ ಕಂತ್‌ದಾನಗ
ಆನಿದಾ ಲಡಯಿಡ್‌ಲ ಸೋಲೇ ಆಂಡ್ ಧರ್ಮಜಗ್ ||

1

ಮೂಜನೆದ ದಿನೊ ಬೀಸೈ ಭೀಮನ್
ಬಾಣೊಡೇ ಸರಿ ದೂರೊ ರಟ್ಟದ್
ಸಾತ್ಯಕಿನ ಎದುರುಂತ್ಯೆ ಲೆತ್ತೆದ್ ಪಗರಿಡಾಕಿಯೆನೆ ||
ಪಾರ್ತನಾ ಸಿಸೈತ್ತೊ ಸಾತ್ಯಕಿ
ವಾಸುದೇವನ ಬಗ್ಗೆ ಬುಡುವೆನೊ
ಬೀಸೈನಾ ಪಗರಿಲೆನ್ ರಟ್ಟದ್ ಪೆರಪ ಹಾಕಿಯೆನೆ ||

2

ಅಜ್ಜನಾ ರಚ್ಚಣೆಗ್ ಕೌರವೆ
ಸಲ್ಯ ಕೃಪ ದ್ರೋಣೆರೆನ್ ಕಡಪುಡು -
ದಲ್ವ ಸಾತ್ಯಕಿನೆದುರು ಕಾದುನ ತೂದುಲರ್ಜನೆನೆ ||
ಅಕ್ಷಯಾಸ್ತೊನು ದೆತ್ತ್ ರಟ್ಟದ್
ಮುಗಲ್ ಕಬಿಲೆಕ ಮಲ್ತ್ ಮಾತೆರೆ
ನಲ್ವಡ್‌ದ್ ರಟ್ಟದ್ ಬೀಸೈನ ಎದುರು ಉಂತೊಂಡೆ ||

3

ಬತ್ತನಾಮಗ ಪಾರ್ತ ಈ ಎನ
ಪುಳ್ಳಿಯಂಡ್‌ಡ ಎದುರು ಉಂತ್‌ಲ

ನಿನ್ನ ಬಾಣೊದ ಪೆಟ್ವೊದಾ ರುಚಿ ತೂಪೆ ಯಾನಿತ್ತೆ ||
ಅಜ್ಜ ಲಡಯಿದ ಕಳನೆ ಪರಬೆರೆ
ಗತ್ತ್ ಮರೈದಿಡಿರ್ ಪೋಲೆಯೆ
ಎನ್ನ ಸುದ್ದಿಗ್ ಬರಡೆ ಈರೆಡ ಕೋಪೊ ಎಂಕುಂಡು ||

4

ಜಕ್ಕೆಲ್ಡ್ ಕುಲ್ಲಾದ್ ಸಾಂಕ್ಯರ್
ಇತ್ತೆ ಕೆರೆರೆ ಬತ್ತರತ್ತೊಯೆ
ನಡ್ಡಿ ಕೈಟೀ ಪೊರ್ತುದಕ್ಕರೊ ತೀರ್ಂಡ್ ದಕ್ಕಲೆಯೆ ||
ನಿನ್ನ ಸ್ವಾಮಿಯೆ ಕ್ರಿಷ್ಟೆ ನಿನ್ನಡ
ಎನ್ನ ಸಂಗತಿ ಪನುವೆ ಕೇನ್ಲ
ಇತ್ತೆ ಯಾನೇ ದಾಯೆ ಲಡಯಿಗ್ ಬತ್ತೆ ಪನ್ನುನೆನ್ ||

5

ಆನಿ ದುಸ್ಸಾಸನೆನೆ ದ್ರೋಪದಿ
ಸೀರೆನೊಯ್ಪುನತೂದು ಈರೆ
ದಾಯೆ ಮನಿಪಂದಲ್ಪ ಕುಲ್ಯರ್ ಹಿರಿಯೆರಾವೊಂದು ||
ಆ ಮಹಾ ಪತಿರುತೆನ ಕಾರ್ನಿಕೊ
ಲೋಕೊ ಲೋಕೊಗು ತೆರಿಯೊಡುಂದುದು
ಯಾನ್ ಮನಿಶ್ಚಿ ಧರ್ಮೊ ಸೂಸಿಮೊನರ್ತೊ ಮಲ್ತೊಂದು ||

6

ಅನ್ಯೆರೆನ ಎರೈಲೆನ್ ಕಂಡುನ
ಕೌರವೇರೆನ ಜತೆಟ್ ಬತ್ತರ್
ಧರ್ಮ ತೆರಿದಿನ ಈರೆ ದೇರಿಯರತ್ತೆ ಎರೈಲೆನ್ ||
ತಪ್ಪು ಒಪ್ಪುದ ಚರ್ಚಿ ಮೂಲೊಯೆ
ಕ್ರಿಷ್ಟೆ ನಿನ್ನಡ ದಾನೊ ಪನ್ನೆಗೆ
ಸುದ್ದಿ ತೆರಿಪದೆ ಸಂಜಯೆನೆ ಈ ಯುದ್ಧೊ ಮಲ್ಪು ಮಗ ||

7

ಈತ್ ಪನ್ನುನ ಕೇನ್ಡ್ ಪಾರ್ತಗ್
ತಾನ್ ತೂಯಿನ ವಿಶ್ವ ರೂಪೊದ
ನೋಟೊ ಕಣ್ಣೆಗ್ ಆಂಜಿದಾನಗ ದರ್ತೆ ಗಾಂಡೀವೊ ||
ಬೂಮಿ ಆಕಾಸೊಲೆನ್ ದೆಂಗವಿ
ಬಾಣೊ ಒಂಜೆನ್ ಬುಡುದುಲಾನಗ
ಸೇನೆ ಓಲೋ ಬೂಮಿ ಓಲೋ ಪನ್ನೆ ಗೊಂತಾಯ್ತಿ ||

8

ನರನ ಪಗರಿಗ್ ಎದುರುದಸ್ತೊನು
ಬುಡುದು ತೂನಗ ಕ್ರಿಷ್ಟೆ ತೇರ್ನ್
ಎಡತ್ ಮೆಯಿಕೇ ತಿರ್ಗದುಂತಯೆ ಬೀಷ್ಮಗಾಚಿರೊನೆ ||
ಪಗರಿನೆಡತ್ಗ್ ಬುಡ್ಡು ಸಾತ್ಗ್
ಬಲತ್ ತಿರ್ಗವೆನೇತೊ ಬೇಗೊಡು
ಹರಿನ ಕೈತವೆ ಚಲಕ್ಡೆನ್ನವೆ ಬೇಳೆ ಬೆಯ್ತಿಜಿಯೆ ||

9

ಪನ್ನಿ ಯೋಚನೆ ಬೀಸ್ಮಗಾನಗ
ಗೆಲ್ಪುವನೆ ಸಿರಿ ಕ್ರಿಷ್ಟೆ ಪಾರ್ತಗ್
ಸತ್ಯೊ ಪೆಂಡ್ಡ್ ಅರ್ತೊ ಆಯ್ಕೆಟ್ ತಾನ್ ನೆನೆತೊಂಡೆ ||
ಕರ್ಣೆ ತನ್ನನ್ ಸಸರೊ ಮಲ್ಪುನ -
ಗಲ್ಪ ಬಾಸೆನ್ ಪಾಡ್ಡೆ ಯಾನೇ
ಎನ್ನ ಬಾಸೆನ್ ತೀರ್ಸವೆಂದ್ ಪಗರಿ ರಟ್ಟಾಯೆ ||

10

ಬೀಸ್ಮೆ ಬುಡ್ಡವೆ ಪಗರಿ ಕ್ರಿಷ್ಟನ
ಮೋನೆ ಮುಂಡೊಗು ಕಂತ್ದಾನಗ
ದಾರೆದಾರೆನೆ ಅರಿದ್ ನೆತ್ತೆರ್ ಮೇಲ್ ಚಂಡ್ಯಾಂಡ್ ||
ಬೇನೆ ತಡೆಯೆರೆಗಾಯ್ತಿ ಅತ್ತಂ
ದಾಯೆ ತನ್ನವೆ ಮಾನೊ ಪೋಯಿನ
ಬೇನೆಡೇ ಪಿಸ್ಸರೇರ್ಡ್ ಲಾಗಿಯೆ ತಿರ್ತೆ ತೇರ್ಡ್ಡ್ ||

11

ಬಲತ ಕೈದೇರ್ಪುನಗಲಾಯನ
ಮಹಸುದರ್ಸನೊ ಚಕ್ರೊ ಮೂಡುದು
ಕಿಟಿನ್ ರಟ್ಟದ್ ಗರಗರಂದ್ಡ್ ತಿರುಗ್ಗನೆ ತೂದು ||
ಪರಬ ಬೀಸ್ಮನ್ ದೀಡಯೆಂದ್ಡ್
ಗರುವೊ ಕೋಪೊಡು ಕಣ್ಣೆ ಮರಪ್ಪು
ನಪಗ ಬೂಮಿಗ್ಗೆಂಡೊ ಬರ್ಸೊನೆ ದೊರಿನ ಲೆಕ್ಕಾಂಡ್ ||

12

ಬಿರುನು ದಕ್ಕದ್ ಬೀಸ್ಮೆ ಕ್ರಿಷ್ಟನ
ಮಯಿಮೆದಾ ಸಿರಿ ಪಾದೊ ಕಮಲೊಗು
ತರೆನ್ ತಾಂಟದ್ ಮುಗುರು ತೆಲಿಕೆಡ್ ಪಂಡೆನಾಪಗನೆ ||
ನಿನಡ ಪೊಂಬುದು ಸೈತ್ನಾಕ್ಲ್
ಪರಮ ಪದವಿನ್ ಪಡೆತೆರೇತಾಲ
ಹರಿಯೆ ನಾರಾಯಣೆನೆ ಎನ್ನನ್ ಈಯೆ ಕೆರ್ಪನಯೆ ||

13

ಕೆರ್ಪನಯೆ ಅಂದಾಂಡ ಕೆರ್ಡ್ಲ
ನಿಕ್ಕೆ ತೀರಂದೆನನ್ ಕೆರೆರೆ
ಬಗ್ಗಿ ಹೀನೆರ್ ದುಸ್ತೆರೆನ್ ಈ ಕೆರ್ಪನಾಯೆತ್ತೊ ||
ಎನ್ನ ಬಗ್ಗಿಡ್ ಕೊರತೆ ಉಂಡುಡ
ಕೆರ್ಡ್ಲಗೆ ಯಾನಿತ್ತೆ ಸೈತ್ನದ್
ಸೊರೊ ಸೇರ್ಡ್ ಸಾಂತಿಡುಪ್ಪೆನೆ ದೇವ ಸಿರಿ ಕ್ರಿಷ್ಟ ||

14

ನಾಲಿನೊಡ್ಡವೆ ಚಕ್ರೊ ಬರಡ್ಡಯೆ
ಜೋಕುಲಾಟಿಗೆ ಪನ್ನೆ ಗೆರೆಪಡ

ತೀರೊ ನಿನ್ನವೆ ಚಕ್ರೋಗನ್ನಾ ಜೂವೊ ದೆವ್ವರೆಗ್ ||
ಯಾನ್ ಎಂಚಿನ ಬಗ್ಗೆ ಪನ್ಪುನ
ಈ ನಿಗಂಟ್‌ನ್ ಇತ್ತೆ ತೂವೊನು
ದೇವ ದೇವನೆ ಬಗ್ಗೇಪೊಲ ಸೋಲ್ಪುನಾಯೆತ್ತೊ ||

15

ಹರಿಯೆ ಚಕ್ರೊನು ಮಾಯೆ ಮಲ್ತ್‌ದ್
ಮುಗುರು ತೆಲಿಕೆಡ್ ಕುಲೈ ತೇರ್‌ಡ್
ಒರೊಕು ಬೂಮಿಯೆ ಪೊತ್ತುದರುನ ಕೈದ್ ಆಂಡ್‌ಂದ್ ||
ಸುಮನಸಾದಿಲು ಪೂತ ಬರ್ಸೊನು
ಜಪುಡಯೆರ್ ಸಿರಿ ಹರಿನ ತೇರ್‌ಗ್
ಬಿರುನು ಪೆಜ್ಜಿದ್ ಪತ್ಯೆ ಬೀಸೈನೆ ಗೆಲೈಯಾನ್‌ಂದ್ ||

|| ಬೀಸೈನ್ ಗೆಲ್ಪುನ ಸಾದಿ ನಾಡಿಯೆರ್ ||

ಲಡಯಿದಬ್ಬರೊ ಜೋರು ಜೋರಾ
ವೊಂದು ಪಗೆಲ್‌ಡ್ ಮಾತ್ತೊ ಕಾದ್ದೆರ್
ಇರ್‌ಳ್ ಸಿಬಿರೊಡು ಉಪ್ಪೆರಾರೆಕಿ ಮಲ್ತ್ ಮಲ್ತೊಂದು ||
ದಿನೊ ದಿನೊಟು ಸರಿ ಪತ್ತೆಸಾರೊನೆ
ಕಿರಿಟೊದರಸುಲೆ ಪುಣನ್ ಬೀಸೈನೆ
ಜೆಪುಡದಾನಗ ಸೋಲು ಪಾಂಡವನಕೆಲೆಗಾಂಡತ್ತೊ ||

1

ಇಂಚನೇ ಸರಿ ಒಂಬೊ ದಿನೊಲಾ
ಎಂಚ ಕರಿದಾಂಡ್‌ಂದ್ ಪನಿಯೆರೆ
ಗೆಂಚಲಾ ತೀರಂದ್ ಧರ್ಮಚೆ ಬಾರಿ ಬೇಜರೊಡು ||
ಆನಿ ರಾತ್ರೆಡ್ ಮೆಗಿಯನಕೆಲೆನ್
ಕೂಡ್ತು ಕ್ರಿಷ್ಣನ ಕೈ ತಡೆಗಲಾ
ಪೋದು ಪಾದೊಗು ಅಡ್ಲೊ ಬೂರುದು ಪಂಡೆ ಬುಲ್ತೊಂದು ||

2

ಲಡಯಿಡೇ ದಿನೊ ಒಂಬೊ ನೂಕ್ಕೊನೆ
ಕರಿನ ದಿನೊ ಒಂಚೆಚಲ ಅಜ್ಜಿನೆ
ಕೆರ್‌ದ್ ಪಾಡ್ಯೆರ್ ಪತ್ತೆ ಪತ್ತೇ ಸಾರೊ ವೀರೆರೆನ್ ||
ನಮೊನೆ ಸೋಲ್ಪುನೆ ಆಂಡ ಕ್ರಿಷ್ಣಾ
ನಿನನ್ ಕೂಡ್ಲದ್ ಎಂಕ್ಲು ನಿನ್ನವೆ
ಪುದರ್ ಕೀರ್ತಿಗ್ ಕೊರತೆ ಮಲ್ತನ ಲೆಕೊನೆ ಆಂಡತ್ತೊ ||

3

ಇತ್ತೆನೇ ನಮೊ ಪೋಯಿ ಬೀಸೈನೆ
ಇತ್ತೆನಾಡೆಗ್ ಈಯೆ ಆಯಡ

ಬುಲ್ತುದೇ ಪನ್ ಸೋಲು ಆಯಿನ ಮಾತ ಸಂಗತಿನೆ ||
ಯುದ್ಲೊದಾ ಕಳೊಟಾಯೆ ಪೆರಣೊನು
ಬುಡ್ಡಿ ನಮುನೆನ್ ಪನುವೆ ನಿನ್ನಡ
ತನ್ನ ಆಯಿಸ ಕೈದ್ ಮಲ್ಪೆರೆ ಸಮಯೊ ಕಾಪುವೆನೆ ||

4

ಪಾಂಡವೆರ್ ಐವೆರ್‌ಲ ಕ್ರಿಷ್ಣನ್
ಕೂಟೊನುಂದೇ ಇರ್ಲೆ ಬೀಸೈನ್
ತೂಯೆರೆಗ್ ಪೋದೆತ್ತೈರಾಕ್‌ಲ್ ಸಿಬಿರೊದಾಡೆಗೆನೆ ||
ಬಾಕಿಲ್‌ನ್ ಕಾಪುನವೆ ದೂತಡ
ಬೀಸೈರೆನ್ ತೂಯೆರೆಗ್ ಎಂಕುಲು
ಈಡೆ ಬತ್ತೆನೆ ಉಲಯಿ ಬರೊಲಿಯೊ ಕೇನ್ ಆರೆಡನೆ ||

5

ಆಯೆ ಉಲಯಿಗ್ ಪೋದು ಪಾಂಡುನ
ಬಾಲೆಗುಳು ಸಿರಿಕ್ರಿಷ್ಣನೊಟ್ಟಿಗೆ
ಈರೆನೇ ತೂಯೆರೆಗ್ ಬತ್ತೆದ್ ಪಿದಯಿ ಉಂತ್‌ದೆರ್ ||
ಪನ್ನಗನೆ ಆ ಬೀಸೈ ಹಾ ಹಾ
ಪುಳ್ಳಿ ಕೌರವಗಾಂಡೆ ಸೋಲುಂ-
ದಲ್ಪ ನೆನೆತ್‌ದ್ ಪಂಡೆ ಉಲಯಿಗ್ ಅಕ್‌ಲ್ ಬರಡ್‌ಂದ್ ||

6

ಬತ್ತಿ ಕ್ರಿಷ್ಣಗ್ ಅಡ್ಲೊ ಬೂರುದು
ಪುಳ್ಳಿನಕೆಲೆನ ಬೆರಿನ್ ಈಸ್‌ದ್
ಕುಲ್ಲಿಯೆರೆ ಪಂಡೊಂದು ರಾತ್ರೆಡೆ ದಾಯೆಗೆತ್ತಿಯರ್ ||
ಅನ್ಯಯೊದ ನರಮನಿಲು ಕೌರವ-
ನೊಟ್ಟು ಉಲ್ಲೆರ್ ನಿಕ್‌ಲ್ ರಾತ್ರೆಡ್
ತಿರುಗನವು ಸರಿಯತ್ತ ಪನ್ನಗ ಪನ್ನೆ ಧರ್ಮಚೆನೆ ||

7

ಅಜ್ಜ ಎಂಕ್ಲೆಗ್ ಜೂವೊದಾಸೆನೆ
ಇಜ್ಜಿ ಈರೇ ದಿನೊಲ ಯುದ್ಲೊಡು
ಪತ್ತೆ ಸಾರೊದ ಲೆಕೊನೆ ಕೆರ್‌ನಗ ಎಂಕ್ಲು ಬದುಕುವೊನೊ ||
ಸೈಪ್ಪುನೆಕ್ ಪೋಡ್ಯಂದೆ ಈರೆಡ
ನಟ್ಟಿಯೆರೆ ಬತ್ತೆದ್‌ನೆ ದ್ರೌಪದಿ
ಬೊಟ್ಟುನುದ್‌ಡೆ ಪನ್ನ ಬುಲೈನೆ ಸೇಂಕ್ ಸೇಂಕೊಂದು ||

8

ಹರಿಯೆ ನಿಕ್‌ಲೆನ್ ಕಾಪುನಾಯೆನೆ
ಬೆರಿಯೆ ಉಂತೊಂದುಲ್ಲೆ ನನಲಾ
ಬದ್‌ಕಿಯೆರೆ ಬೋಡಾದ್ ಪೋಡ್ಯನೆ ದಾಯೆ ಮಗ ಪನ್‌ಲ
ನಿಕ್‌ಲೆನೊರಿಪೆರೆಗೆನ್ ಉಲ್ಲೆನೆ

ಪಾಠನ ಬಿಸಾತಿಗೆ

ಲಡಯಿನುಂತವೆ ಆಂಡ ಯಾನೇ
ಕಳಟ್ ಕಾದುನ ಪೊರ್ತುಡೆದುರುಗು ಆ ಸಿಕಂಡಿನಾಲ ||

9

ಲಡಯಿಗುಂತಲೆ ಯೇನ್ ದಕ್ಕುವೆ
ಬಿರುನು ಅಪಗನೆ ಪಾರ್ತೆ ಪಗರಿಡ್
ತಿಗಲೆಗಾಕಡ್ ಅಪಗ ಯಾನೇ ಹರಿನ ಎದುರೆದುರು ||
ಪೆರಣೊ ಬುಡುವೆನೆ ಪನ್ನಗರ್ಜುನೆ
ಬುಡಯೆ ಬಾಣೊನು ಈರೆಗಚ್ಚೆರೆ
ಪನಡೆ ಆ ಪಾತೆರೊನು ಪನ್ನಗ ಬೀಸ್ಮೆ ತೆಲಿತೊಂದು ||

10

ಕೆರ್ಪುನವು ದೀಪುನವು ಏರ್ಲ
ಅತ್ತ ಆಯನ ಕರ್ಮೊ ಮಾತ್ತೊನೆ
ಕೆರ್ಪವುನೆ ದೀಪವುನೆ ಅರ್ಪುನ ನಿಕ್ಕಗೊಂತಿದ್ಯೊ ||
ಮಲ್ಲು ಮಲ್ಲುಯು ನಿನ್ನ ಕರ್ಮೊನು
ಸೈಪ್ಪುನಾಕ್‌ಲ್ ಆಕ್‌ಲಾಕ್‌ಲೆ
ಕರ್ಮೊಡೇ ಸಂಪ್ಪೆರ್ಯು ಪೋಡ್ಯಡ ಪೋಲೆ ನಿಕ್‌ಲಿತ್ತೆ ||

11

ಬೀಸ್ಮೆ ಪಂಡನ ಕೇನ್ದ ಮಾತೆರ್
ಬಾರಿ ಸಂತೋಸಾದ್ ಪಿದಡ್‌ದ್
ಪೋದು ಎತ್ತೆರ್ ಬೇಗ ಅಕ್‌ಲೆನ ಸಿಬಿರೊದುಲಯಿಗ್‌ಲ ||
ರಾತ್ರೆ ಧರ್ಮಚೆ ಕಣ್ಣೆ ಮುಚ್ಚಿಚೆ
ದೇವಿ ಗಂಗೆನ ಮಗನ ಪ್ರೀತಿನಾ
ತಾನ್ ನೆನೆತ್‌ದ್ ದುಕ್ಕೊಡುಪ್ಪುನಗಾಂಡ್ ಬೊಲ್ಪೊಲ್ಲು ||

12

ಕಾಂಡೆ ಮಂಗಲ ವಾದ್ಯೊ ಕೇನ್ನಗ
ಪಾಂಡವೆರ್ ಲಕ್ಕೊಂದು ನಿತ್ಯೊಡು
ಆಪುನಾ ಕಿರ್ಯೆಲೆನ್ ಮಲ್ತ್‌ದ್ ಕಾಳೊಗೊದ ಕಳಕ್ ||
ಬೇರಿ ವಾದ್ಯೊ ನಗಾರಿ ಗೌಜಿಡ್
ತೇರ್‌ಲೆನ್ ಏರೊಂದು ಪಿದಡ್‌ನ
ಗಾಪಗನೆಲಾ ಕುದುರೆಲಾನೆಲು ರಾಯ ರಾವುತೆರ್ ||

13

ಜಯೊ ಜಯೊತ ಗೋಸಣೆಡ್ ಪಿದಡ್‌ನ
ಗಪಗ ಬೀಸ್ಮೆಲ ತನ್ನ ಸಿಬಿರೊದ
ಉಲಯಿ ಪಿದಡುನ ಅಟ್ಟಣೆಡ್ ಸರಿ ಉಪ್ಪುನಾಪಗನೆ ||
ಕುರುಪತಿಯೆ ಪಾರ್ಬತ್ತಾದಾಡೆಗ್
ಇನಿಯೆ ಕಂಡಿತೊ ಪಾಂಡು ಬಾಲೆಲೆ
ಪುದರ್ ಮಾಜುನ ದಿನೊನೆ ಪಂಡ್‌ದ್ ಕೊಂಬುನುರಿಪಾಯೆ ||

ರಡ್ಡ್ ಕಡೆತಲ ಸೇನೆ ಸೇರ್‌ದ್
ಮಲ್ಲಿ ಕಾಳಗೊಡೇತೊ ಬೀರೆರ್
ಸೈತ್ತ್ ಬೂರೈರ್ ಪೊಲಿನ ತೇರ್‌ಲೆ ರಾಸಿ ಬೂರ್ದಾಂಡ್ ||
ಕರ್‌ದೊರಿನವೆ ಮಂಡೆ ಪುಡಯಿನ
ಕಣ್ಣೆ ಸೀಂತ್‌ನ ತಿಗಲೆ ಬಿಚ್ಚಿನ
ಸೇನೆದಾಕುಲು ಬೂರ್ದು ಪುಡೆರುನ ತೂಪುನೇರವುಲು ||

1

ಗುರುಮಗೆಲ ವ್ರಸಸೇನೆ ಮಾದ್ರೇ -
ಸ್ವರೆ ಜಯದ್ರತೆ ಸಕುನಿ ದುಸ್ಸಹೆ
ಗುರುಸುಸರ್ಮೆ ವಿಕರ್ಣೆ ಬೂರಿಸ್ರವೆ ಸುಲೋಚನೇಲ ||
ನರಕನಾ ಮಗನೊಟ್ಟು ಯವನೇ-
ಸ್ವರೆ ಕಳಿಂಗೆ ಸುಕೇತು ದುರ್ಜಯೆ
ದುರುಳೆ ದುಸ್ಸಾಸನನ ಒಟ್ಟಿಗೆ ಕಳಟ್ ನುರ್ಕಿಯೆರ್ ||

2

ಬರಡ್ ಎದುರುಗು ಬೀಮ ಪಾರ್ತೆರ್
ಹರಿನ ಸಾಯೊದ ದೈರೊಡಂಕ್ಲೆಡ
ಕಳಟ್ ತೋಜವಡಕ್‌ಲೆ ಬಿಸಾತಿಗೆನ್ ಬರಡಿತ್ತೆ ||
ಲೆಪ್ಪುನಾ ಸೊರೊ ಕೇನ್ದ ಎದುರುಗು
ಬತ್ತೆರೇ ನಕುಲಾದಿ ವೀರೆರ್
ಬಿರ್ರೆ ಸೋಮಕೆ ಆ ಗಟೋತ್ಕಚೆ ವೀರೆ ಪ್ರತಿ ವಿಂದ್ಯೆ ||

3

ಗುರುನ ಮಗನೇ ದ್ರುಪದ ಸೇನಡ
ಕ್ರಪೆನೆ ಸಾತ್ಯಕಿನೆದುರು ಕಾದಿಯೆ
ಗದನ್ ಬೀಜದ್ ದ್ರೋಣನೆದುರುಡು ಉಂತ್ಯೆ ಬಲ ಬೀಮೆ ||
ನರನ ಮಗೆ ಅಬಿಮನ್ಯು ಬೀಸ್ಮಡ
ಲಡಯಿಗುಂತಿಯೆ ಪಾರ್ತೆ ದುಸ್ಸಾ
ಸಡನೆ ಕಾದಿಯೆನಾ ಗಟೋತ್ಕಜನೆದುರು ಬಗದತ್ತೆ ||

4

ಬಾರಿ ಬಿಸ್‌ಡ್ ಲಡಯಿ ಮಲ್ತೆರ್
ಆಯುದೊಲು ತುಂಡಾಯಿನಾಕ್‌ಲ್
ಸಾರತಿಲು ಇದ್ಯಂದ್‌ನಾಕ್‌ಲ್ ತೇರ್ ಪೊಲಿನಕ್‌ಲ್ ||
ಬೂರ್ಡು ಪುಡೆರ್‌ದ್ ಲಕ್ಕೊದುಂತುದು
ಪಾರುನಾಕ್‌ಲ್ ನರಕುನಾಕ್‌ಲ್
ಏತ್‌ಲಾ ಸರಿ ದಿಂಜಿದಾಯೆರ್ ಕಾಳಗೊದ ಕಳಟ್ ||

5

ಪಾರ್ತ್ ದುಸ್ಸಾಸನನ್ ಮಗ್ಗ್ಡ್
ಪಾಡ್ ಉಂತಿಯೆ ಅಪಗ ಕೌರವೆ
ತಾನೆ ಬತ್ತ್ದ್ ಉಂತನಾಪಗ ಪಗರಿಡಾಯನ್ಲ ||
ದೂರೊ ರಟ್ಟದ್ ದುಂಬು ಪೋನಗ
ಮಾದ್ರ ಬೂಪತಿ ಎದುರು ಉಂತಿಯೆ
ಆಯನ್ಲ ರಟ್ಟದ್ ಸಕುನಿನ್ ಕಳಟ್ ಜೆಪುಡಾಯೆ ||

6

ದಾನೆ ಪನ್ನುನೆ ಪಾರ್ತನಬ್ಬರೊ-
ಗೇರ್ ಬರ್ವೆರ್ ಎದುರು ಉಂತೈರೆ
ದ್ರೋಣನಾ ಮಗೆ ಅಸ್ತತ್ವಾಮನೆ ಲೆತ್ತೆ ಅರ್ಜುನನ್ ||
ದಾನೆಯಾ ನಿನ ಬಾರಿ ರಾಪಟೊ
ಆನಿ ಅಮ್ಮೆರ್ ಕಲ್ಪಯೀನೆಟೊ
ದಾನವಂತಕೆ ಸಾಯೊಗಿತ್ತಾದೊ ಲಾಗೊ ದೆಪ್ಪುನೊ ||

7

ಬೆರಣ ಮಾಣಿಗ್ ಚತ್ರಿಯೇರೆಡ
ಲಡಯಿದಾಯೆಗ್ ಉಣಿಯೆರಿದ್ಡಿಡ
ಗಜನಗರೊದರಮನೆಡ್ ಕಮ್ಮಿಯೊ ನಿಕ್ಕ್ ಕೊರ್ಪುಜೆರೊ ||
ಕೊರೆಪಡಯ ಓ ಪಾರ್ತ ಬೆರಣೆರ್
ಬಿರುತ ವಿದ್ಯೆಡ್ ಬಲೊನೆ ಆಯ್ಕೆಟ್
ಅರಸುನಕ್ಲೆಗ್ ಕಲ್ಪವೆರ್ ಸರಿ ಈಲ ಕಲ್ಪಜನ ||

8

ಪಾತೆರುನ ಬೊಡ್ಡಿತ್ತೆ ಮಂತ್ರೊದ
ಬಾಣೊ ರಾಪವೆ ತೆರಣೊ ಉಂಡುಡ
ಈಯೆ ತಲಿಪುಗೆ ತೂಕೊ ನಮೊ ನಮೊ ಪನ್ದಲರ್ಜುನೆನೆ ||
ಸೂತ ಪಗರಿನ್ ಬುಡುದುಲಾನಗ
ನೀರ್ದಸ್ತೊಡು ತೆಕ್ಕಯೆನಲಾ
ಗಾಳಿ ಬೀಜನಗೈಕ್ ಪರ್ವತೊನೆದುರು ಉಂತಾಯೆ ||

9

ಅಕ್ಷಯಾಸ್ತೊಡು ಗುರುನ ಮಗನೇ
ಜೆಪ್ಪಯೆನೆ ಕಲಿ ಪಾರ್ತನಾಪಗ
ಲಕ್ಷವೀರೆರ್ ಎದುರು ಉಂತೈರ್ ಬಾಣೊ ರಾಪಯೆರ್ ||
ಗಣ್ಯೊ ಮಲ್ಪಂದಾಯೆ ಮಾತೆರೆ
ಮಣ್ಣೊ ಮುಕ್ಕಯೆ ಸೈತ್ತೆರೇತೋ
ದುಸ್ಪ ದುರ್ಜನ ಕಡೆಟ್ ಸೇರ್ದ್ ತೀರಿ ಬದ್ಕಿಯೆರೆ ||

|| ಬೀಸ್ಮಾರ್ಜುನೆರೆ ಕಾಳಗೊ ||

ಬೀಸ್ಮೆ ಲಡಯಿಗ್ ಪಿದಡಿ ಸಾತ್ಗ್
ಆಯನಾ ಬೆರಿಸಾಯೊಗಾದೇ
ಮಾದ್ರ ಮಾಗದೆ ಸಲೈ ಸಕುನಿನ ಒಟ್ಟು ಬಗದತ್ತೆ ||
ವೀರಸೈಂದವೆ ಕೌರವೇಂದ್ರನ
ಆಜ್ಜೆಡೇ ದುಸ್ಸಾನಾದಿಲು
ಸೇರ್ದೆತ್ತೈರ್ ಕೊಂಬು ಬಾಂಕೆದ ಗೌಜಿಗದ್ದಲೊಡು ||

1

ದ್ರೋಣೆ ಅಶ್ವತ್ಥಾಮನೊಟ್ಟಿಗೆ
ತೇರ್ಡೇ ಕುಲ್ಲೊಂದು ಬನ್ನಗ
ಬೀಮೆ ತಲಿತ್ದ್ ತೇರ್ನುಂತಯೆ ಗುರುಕುಲೋಡೆಂದ್ ||
ಆತ್ ಪೊರ್ತುಗು ನಕುಲೆಸಹದೇ-
ವಾದಿ ವೀರೆರ್ ಕಳಕ್ ನುಕ್ಕೈರ್
ಸಾತ್ಯಕಿನ ರತೊ ತೂದು ಬೀಸ್ಮೆನೆ ಪಂಡೆನಾಕ್ಲೆಡ ||

2

ಎನ್ನಡನೆ ಕಾದುವರೊ ನಾಯಿಲು
ಬ್ರಹ್ಮೆ ಬರೆಯಿನ ಬರವು ಮಾಜವೆ
ಎಡ್ಡೆ ಪಾತೆರೊಡಿತ್ತೆ ನಡಪುಲೆ ಎನ್ನ ಎದುರುಡ್ಡು ||
ಅರ್ಜುನೆನೆ ಬರಡೀಡೆ ಪನ್ನಗ
ನುರ್ಕಿಯೆರ್ ಮಾತೆರ್ಲ ಬೀಸ್ಮನ
ಅಟ್ಟಸ್ಗ್ ಪೋಡ್ಯಂದೆ ಬಾಣೊದ ಬರ್ಸೊ ಜಪುಡಯೆರ್ ||

3

ಎದುರಾದಕ್ಲ್ ಬುಡ್ಡು ಪಗರಿಲೆ
ಪೊಡಿಯೆರಟ್ಟದ್ ಬೀಸ್ಮೆ ಸಾಸೊಡು
ಬುಡಿಯೆನೇತ್ಲ ಮಂತ್ರೊ ಬಾಣೊಲೆ ಕಣ್ಣೊ ಮೋನೆಗ್ಲ ||
ನಕುಲೆ ಕಳಟೇ ಬೂರೈ ಸಾತ್ಯಕಿ
ಬಲಿಪೆರಂದಜಿ ಮಲ್ತೆ ಬೀಮನ
ಮಗಕ್ಲಾ ಉಸುಲಿದ್ದಿ ಆಯನ ಕಡೆತ ರಕ್ಕಸೆರ್ ||

4

ಸಾಲ್ ಸಾಲ್ಡೆ ಪಾರುನೆನ್ ಸರಿ
ತೂದು ಪಾರ್ತನೆ ಪಂಡೆ ಕ್ರಿಷ್ಣಡ
ದೇವ ನಮ್ಮವೆ ಕಡೆತ ವೀರೆರ್ ತೂಲ ಬಲಿಪುನೆನ್ ||
ಸೋಲು ನಮ್ಮಾಕ್ಲೆಗ್ ಅಜ್ಜಡ
ಆಂಡ್ ನಮ್ಮವೆ ರತೊನು ಆರೆನ
ಕಾಲ ಭೈರವ ನಾಟ್ಯೊದೆದುರುಡು ಇತ್ತೆ ಉಂತಾಲ ||

5

ಬೊಲ್ಪು ಕುದುರೆಲು ಒಯ್ಪುನಾರತೊ
ಕ್ರಿಷ್ಟೆ ದೇರುನ ಪುಣ್ಯೊದಾ ರತೊ
ಬಗ್ಗಿದಾ ಹನುಮಂತೆ ಕುಲ್ಲಿ ಪತಾಕೆದಾ ರತೊನೆ ||
ಬರ್ಪುನೆನ್ ತೂವೊಂದು ಬೀಸ್ಮೆನೆ
ತಿರ್ತ್ ದೀಡ್ ತನ್ನವಾಯುದೊ
ಕಣ್ಣೆ ಮುಚ್ಚಿದ್ ಹರಿನ ದ್ಯಾನೊನು ಮಲ್ತದಾಪಗನೆ ||

6

ದತ್ತ ಕೈಟೀ ಬಿರುನು ಪತ್ತದ್
ಕುರ್ವಯಿನ ಸೊರೊ ಕೇನ್ದಲರ್ದುನೆ
ಅಜ್ಜೆನೇ ಬಿರು ಕುರ್ಕಯಿನ ಪಂಡೊಂದು ತನಬಿರುನು ||
ಪತ್ತದೇ ಕುರ್ಕಾನಗಾ ಸೊರೊ
ಸೊರೊ ಲೋಕೊಗು ಸಾನ್ ಎತ್ತದ್
ನಿಲ್ಕ ತೂಯೆರ್ ದೇವ ದೇವತೆಲೊಟ್ಟು ಮಿತ್ತದ್ ||

7

ಎನ್ನ ಕುಟುಮೊದ ಬಾಲೆ ಬತ್ತನ
ಕಣ್ಣೆ ಮೂಚಿತೆ ಸಿವಡ ಲಡಯಿನ್
ಮಲ್ತನಾಯೆನೆ ಎದುರು ಬತ್ತನ ಯಾನ್ ಪರಬೆತ್ತ ||
ನಿನ್ನ ಬಾಣೊದ ಪೆಟ್ಟೆ ತಡೆಯೆರೆ
ಇತ್ತೆ ತೀರುವೊ ಎಂಕ್ ಮಗ ಈ
ಮುಲ್ಪಡಿತ್ತೆನೆ ಪೋಲ ಆಪೆಕ್ ಕೆರಡ ಎನನಿತ್ತೆ ||

8

ತಮಸ್ ಮಲ್ಪುನೆ ದಾಯೆಗಜ್ಜಾ
ಪರಸುರಾಮನ್ ಗೆಲ್ತನಾರೆಗ್
ಎನನ್ ಗೆಲ್ಪೆರೆ ಕಸ್ತೊ ಆವೊಯೆ ಈರ್ ಪನ್ಲೆನಡ ||
ಜವನ ಪಿರಯೊಡು ಪರಸುರಾಮಡ
ಲಡಯಿ ಮಲ್ತದೆ ಆಂಡ ಎಂಕಿನಿ
ನಿನಡ ತೀರುವೊ ಕ್ರಿಷ್ಟೆ ಪನಡ್ಗೆ ಎನನ್ ತೂವೊಂದು ||

9

ಕ್ರಿಷ್ಟೆ ಪನ್ತನೆ ಲಡಯಿ ಮಲ್ಪೆರೆ
ಗೆಲ್ಪುನೆಕ್ ಸೋಲ್ಪುನೆಕ್ ಏಚನೆ
ಮಲ್ಪುನವು ಬೊಡ್ಡಿಂದ್ ಎನ್ನಡ ಅಂಚ ಯಾನಿತ್ತೆ ||
ಕೆರ್ಪಡ ಕೆರ್ಲೆಂದ್ ಉಂತಾದೆ
ಯುದೊದಾ ಕಳಟೆನ್ನ ಜೂವೊನೆ
ರಟ್ಟಡಜ್ಜೆರೆ ಬುಡ್ಡೆ ಬಾಣೊನು ಎನ್ನ ತಿಗಲೆಗ್ ||

10

ಪಾರ್ಶನಾ ಪಾತೆರೊನು ಕೇಂಡ್
ಬೀಸ್ಮೆ ಕೈಡ್ ಬಿಲ್ಲ್ ತಾಲ್ದ

ಆನಗನೆ ಸಿರಿಕ್ರಿಷ್ಟ ಮೋನೆನ್ ತೂಯೆನರ್ದುನೆನೆ ||
ದಾನೆ ಮಲ್ಪೊಡು ಯಾನ್ ಅಜ್ಜನ
ಮೋಕೆದಾಯೆನೆ ಆದ್ ಆರೆಗ್
ಬಾಣೊ ಬುಡ್ಪುನೆ ಎಂಚ ತೂಲಯ ಬಿಲ್ಲ್ ತಾಲ್ದನೆನ್ ||

11

ಮೋಕೆ ಮೋಹೊನು ಬುಡ್ಡು ಕಾದ್ಲ
ಆನಿ ಯಾನೇ ಪಂಡಿ ಪಾತೆರೊ-
ನೀಯೆ ಮರತನ ಬುಡ್ಡ ಬಾಣೊನು ಬೀಸ್ಮೆನವೆ ಮೇಲ್ಗ್ ||
ಈತ್ ಪನ್ನುನ ಕೇನ್ದಲರ್ಜುನೆ
ಬಾಣೊ ರಾಪಯೆನಜ್ಜ ತಿಗಲೆಗ್
ತಾಗಿ ಪೆಟ್ಟೆದ ಉರಿಕ್ ಬೀಸ್ಮೆಗ್ ಕೋಪೊ ಏರ್ದಾಂಡ್ ||

12

ಸಿವಡ ಕಾದ್ನ ಗರ್ವೊಡೆನ್ನವೆ
ತಿಗಲೆಗಾಕ್ಯನ ಪೋಕ ನಿನ್ನವೆ
ಬಿರ್ಸತಿಗೆನೇತಂದ್ ತೂವೆನೆ ಇತ್ತೆ ಎದುರುಂತು ||
ಪಗರಿ ರಟ್ಟಯೆ ಬೀಸ್ಮೆ ಪಾರ್ಶಗ್
ಅಯಿನ್ ಪೊಲ್ಪುದು ಪೆರಪ ಹಾಕಿಯೆ
ಗರುವೊಡಾಕ್ಲ್ ಏತೊ ಬಾಣೊಲೆ ಬುಡಿಯೆರಿರ್ವೆರಲ ||

13

ಮರಿತ ಮಂತ್ರೊನು ಜಪಿತ್ದರ್ಜುನೆ
ಬುಡುದು ತೂನಗ ಗರುಡ ಬಾಣೊಡು
ಪೊಡಿಯೆ ರಟ್ಟದ್ ಆಯಿಸಾತ್ಗ್ ಸೂತ ಪಗರಿನ್ಲ ||
ನರೆನೆ ಬುಡ್ಡೆನ್ ಬರ್ಸೊ ಜಪುಡದ್
ಸರಿಟ್ ತೆಕ್ಕನಗಪಗ ಪರ್ವತೊ
ಗಿರಿತ ಬಾಣೊನು ಬುಡ್ಡ ತೂದುಲ ವಜ್ರೊಡಾಕಿಯೆನೆ ||

14

ಕತ್ತಲೆನೆ ಕಬಿದಾಂಡ್ಲರ್ಜುನೆ
ಬುಡ್ಡ ಬಾಣೊಡುಲಪಗ ಬೀಸ್ಮೆನೆ
ಬೊಲ್ಪು ಬೆಳಗಯೆ ಸೂರ್ಯನಸ್ತೊಡು ನನಲ ಬುಡ್ಲಂದೆ ||
ಅರ್ಪುನನ್ ಸರಿ ತಮಸ್ ಮಲ್ಪುನ
ಪೊರ್ಪುಗಾಯೆನೆ ಕೋಪೊ ಏರ್ದ್
ಅಕ್ಷಯಾಸ್ತೊನು ಬುಡಿಯೆ ಅಜ್ಜೆರೆ ತೂಲೆ ತೂಲೆಂದ್ ||

15

ಮೂಡಿಗೇಡ್ ದೆಪ್ಪುನಗನೇ
ಬಾಣೊ ಒಂಜಿಯೆ ಕೊಲ್ಪುನಗ ಅವು
ಆಂಡ್ ಪತ್ತಲ ಬುಡ್ಡ ಸಾತ್ಗ್ ನೂದು ರಟ್ಟೆನಗ ||
ಸಾರೊ ವೈರಿನ ಮೇಲ್ಗ್ ಲಚ್ಚೊನೆ
ನಾಟ್ನಗ ಸರಿ ಕೋಟಿ ಕೆರ್ಗ್
ಪಾರ್ಶ ಬಾಣೊನೆ ಲೆಕ್ಕೊದಾಂತಿನವತ್ತೊ ನಿಜೊ ನಿಜೊನೆ ||

16

ಬೀಸೈ ಕಂಗಾಲಾಯೆ ಪಂಡ್‌ದ್
ಪಾರ್ ಬತ್ತೆರ್ ದ್ರೋಣ ಕೃಪೆರ್ಲ
ಆ ದುಸ್ಸಾಸನೆ ಮೆಗ್ಗನಕ್‌ಲೆನ ಒಟ್ಟು ಸೇರೊಂದು ||
ಸಾತ್ಯಕಿಲ ಸಹದೇವನಕುಲೆರ್
ಆ ಗಟೋದ್ಗಜೆ ದ್ರಸ್ತದ್ಯುಮೈಲ
ಸೇರ್‌ದತ್ತೈರ್ ಪಾರ್ತನಾ ಬೆರಿ ಸಾಯೊಗುಂತ್ಯೆರೆಗ್ ||

|| ಬೀಸೈ ಪಗರಿ ಮಂಚವುಡು ಬೂರೈ ||

ಆತ್ ಪೊರ್ತುಗುಲಾ ಸಿಕಂಡಿಯೆ
ಪಾರ್ ಬರ್ಪುನ ತೂದು ಪಾರ್ತೆನೆ
ಬಾರಿ ಎಡ್ಡೆನೆ ಆಂಡ್ ಅಜ್ಜಡ ಕಾದೋಡೀ ಇತ್ತೆ ||
ಕಾಳಗೊದ ಕಳಟನಿಯೆ ನಿಕ್ಕೇ
ಮಾಲೆ ಪಾಡ್ವಲ್ ವಿಜಯ ಲಚ್ಚಿಮಿ
ಪೋಲ ಪಂಡ್‌ದ್ ಕಳಕ್ ನುರ್ಕಯೆ ತನ್ನ ಬಾವನ್‌ಲ ||

1

ಕಳಟ್ ಎದುರುಂತಿಯೆ ಸಿಕಂಡಿಯೆ
ಪರಿತೆದಸ್ತೊನು ಬುಡುದುಲಾಪಗ
ಪರಬ ಎದುರುಂತೊಂದು ಪಂಡೆನೆ ದ್ರುಪದರಾಯ ಮಗೆ ||
ಪೊಸಬೆ ಏರ್‌ಂದಲ್ ಬೀಸೈನೆ
ನಿಲ್‌ಕ್ ತೂನಗ ಈ ಸಿಕಂಡಿಡ
ಲಡಯಿ ಮಲ್ಪನೆ ದಾಯೆ ಪಂಡ್‌ದ್ ಬಿರುನು ದಕ್ಕಿಯೆನೆ ||

2

ಅರ್ಜುನೆಲ ತನ್ನಜ್ಜಗಾಪಗ
ಬಿಲ್ಲೆದರ್ತೆದ್ ಬಾಣೊರಾಪಯೆ
ಪೆಟ್ಟ್ ತಾಗ್‌ದ್ ಬೀಸೈ ತೇರ್‌ದ ಕಬೆಟ್ ತಾಂಗೊಂದು ||
ಸಲ್ಯ ಗುರುಕೃಪೆರಲ್ಪ ಉಲ್ಲರೊ
ಎನ್ನ ತಿಗಲೆಗ್ ತಾಗಿ ಬಾಣೊನೆ
ಅರ್ಜುನನೇ' ಆ ಸಿಕಂಡಿನವತ್ತೆ ಕಂಡಿತೊನೆ ||

3

ಯಮನ ದಂಡೊದ ಪೆಟ್ಟ್ ತಾಂಗುವೆ
ಪರಸುರಾಮನ ಕುಡರಿ ಪೆಟ್ಟೆನ್
ತಡೆವೆನಂತೊದ ಕಾಲ ಬೈರವ ಸೂಲೊ ಗೆದುರುಂತ್ತ್ವೆ ||
ಸೆಡಿಲ್ ಹಾಕಡ್ ಎನ್ನ ರೋಮೊನೆ
ಮೆದುಕುನವು ಅತ್ತಿತ್ತೆ ಪಾರ್ತನ
ಪಗರಿದಾ ಪೆಟ್ಟಿಂಕ್ ತಡೆಯೆರೆ ತೀರುನೆನೆ ಇದ್ದಿ||

4

ಬಾಣೊಲೇತ್‌ಲ ಬೆರಿಟ್ ಕಂತ್‌ದ್
ತಾಲಂದಿತ್ತನ ಲೆಕೊನೆ ಬೀಸೈನೆ
ತಾನ್ ಬೂರೈ ಮಲಂಕನೆನೆ ಸರಿ ಪಗರಿಲೆನ ಕೊಡಿಟ್ ||
ತಾಂಗ್‌ದೇ ಮಂಚವುಡು ಚೆತ್ತನ
ರೀತಿಡಾಯೆನೆ ಕಣ್ಣ್ ಮುಚ್ಚಿದ್
ಬೂರೈ ತೂದುಲ ಬುಲ್ತೆ ಸಾರತಿ ಬೊಬ್ಬೆ ಪಾಡೊಂದು ||

5

ಆಡೆಗೆತ್ತೈರ್ ಕೌರವಾದಿಲು
ಪಾಡಂವೆರ್ ಸಿರಿಕ್ರಿಷ್ಣನೊಟ್ಟಿಗೆ
ಬಾರಿಬುಲ್ತುದು ಸುತ್ತ ಉಂತ್ಯೈರ್ ಮುರೈ ದೀಡೊಂದು ||
ರಾಯೆ ಕುರುಪತಿ ಸೇಂಕ್ ಸೇಂಕ್‌ದ್
ತಾನ್ ಕೆರೈಯೆ ಅಜ್ಜನೆಂದ್‌ದ್
ಏತ್‌ಲಾ ಬುಲ್ತೊಂಡೆ ತಿಗಲೆಗ್ ಹಾಕ್ ಹಾಕೊಂದು ||

6

ಧರ್ಮನಂದನೆ ಮುರೈ ದೀಡುನ
ಸವ್ವೊ ಕೇಂಡ್‌ದ್ ಬೀಸೈ ಮೆಲ್ಲಡ್
ಕಣ್ಣ್ ಬುಡುದೇ ಪಂಡೆ ಬುಲ್ಪಡ ಎನ್ನವಾಂಡಿತ್ತೆ ||
ಅರ್ಜುನೆನೆ ಅರಬಾಯಿ ಕೊರೈಗ
ಎನ್ನ ತರೆತಡಿಕ್ಕೊಂಜಿ ಬಾಣೊನು
ಕುತ್ತದೇ ತರೆ ದೆರ್ತ ಉಂತಲ ಪನ್ನಗುಂತಾಯೆ ||

7

ದೊಂಡೆದಾಪಸೆ ಆಜಿದಾಜಿದ್
ಲಾಂಡೆ ಪರೈರೆ ಕೊರೈ ದಾಯ್ತಲ
ಪಂಡಿ ಸಾತ್‌ಗ್ ಸಿಮೊತ ನೀರ್‌ದ ಚೀಪೆ ಸರ್ಬತ್ತೆ ||
ಮಲ್ಪದಾ ಕೌರವೆನೆ ಕೊರ್ನಗ
ಬೊಡ್ಡಿ ಎಂಕವು ಸುದೊ ನೀರ್‌ನ್
ಕೊರೈ ಪಂಡ್‌ದ್ ಪಾರ್ತ ಮೋನೆನೆ ತೂಯಿನಾಪಗನೆ ||

8

ನೀರ್ ಜಪುಡವಿ ಮಂತ್ರೊ ಬಾಣೊನು
ತಾನ್ ಬಾನೊಗು ಬುಡ್ಡು ಸಾತ್‌ಗ್
ದಾರೆ ಕಟ್ಟೆದ್ ಸುದೊ ಗಂಗೆನೆ ಬತ್ತನೆನ್ ತೂದು ||
ಬೀಸೈನಾ ಬಾಯಿಗ್‌ಲ ಅರಿಪಯೆ
ಬಾರಿ ಸಂತೋಸಾದ್ ಸುದೊದ
ನೀರ್ ಪರ್ದಾದಪಗ ಪಂಡೆನೆ ರಾಯ ಕೌರವಡ ||

9

ತೂಲ ಪಾರ್ತನ ಗುಣೊನು ಬುದ್ಧಿನ್
 ಈಯೆ ದಾಯೆಗ್ ಪಗಟ್ ಕಾದುನೆ
 ಪಾಂಡವೆರ್ ಗೆಲ್ಲುವೆರ್ ಕಂಡಿತೊ ಸೋಲು ನಿಕ್ಕಾವು ||
 ಈತ್‌ನೇಟಲ ಆಯಿನೆನ್ ಈ
 ಪೂರ ಮರತ್‌ದ್ ರಾಜಿಗೊಪ್ಪುಲ
 ಪ್ರೀತಿಡುಪ್ಪುಲೆ ನಿಕ್‌ಲ್ ಮೆಗಿಪಲಯಲ್ಲೆ ಬಾಲೆಗುಳು ||

10

ಅಜ್ಜ ಈರೇ ದುಂಬು ಪನ್ನರ್
 ಕ್ರಿಷ್ಟಲಾ ಪನ್ನೆನಡ ಬತ್ತೆದ್
 ಅಮ್ಮೆರ್‌ಲ ದುಂಬೇತೊ ಸರ್ತಿಲ ಪನ್ನೆನ್ನಡನೆ ||
 ಎನ್ನ ಪಾತೆರೊ ಒಂಜೆ ಅಕ್‌ಲೆಡ
 ಸೈತ್ತೆಡಲ ಸಮೊ ರಾಜಿಯಾವಯೆ
 ದುಪ್ಪೆ ಆದೇ ಚಲೊಟು ಕಾದುವೆ ಕುಂತಿ ಜೋಕುಲೆಡ ||

11

ಈತ್ ಪನ್ನಗ ಬೀಮೆ ಕೋಪೊಡು
 ಯಾನ್ ಪಂಡ್‌ನ ಬಾಸೆ ತೀರ್ಪೆ
 ಈಯೆ ನಂಬುಲ ಕೌರವೇಸ್ವರ ಪನ್ನಗಾಪಗನೆ ||
 ದಾಯೆಗೀ ಪಾತೆರುವ ಅಜ್ಜೆರ್
 ಬೂರುದುಲ್ಲೆರ್ ಆರೆನೆದುರುಡು
 ಪೋಲ ಮುಲ್ಲಡ್ಲೆತ್ತೆ ಪಂಡೆನೆ ಧರ್ಮನಂದನೆನೆ ||

12

ಮಾತೆರೆನ್ ಪೋಯೆರೆಗ್ ಪಂಡ್‌ದ್
 ಯೋಗೊ ದ್ಯಾನೊಡು ಆತ್ಮೊನುಂತದ್
 ಬೀಸ್ಮೆ ಬಾಣೊದ ಕೊಡಿತ ಮಂಚವುಡಿತ್ತೆ ಜೆತ್ತೊಂದು ||
 ಮನಸ್ ನಾರಾಯಿಣನ ಪಾದೊಡು
 ನಿಲೆಟ್ ಉಂತ್‌ನಗಾಯ ಸೈರೊಗು
 ಬಡವು ಬಾಜೆಲ್ ಬೇನೆದಾಯ್ತುಲ ಬೀಸ್ಮೆಗಾಯ್ತೊ ||

ಶ್ರೀ ಅನಂತಕೋಡಿ ಸುಬ್ರಾಯ ದೇವೆರೆ ನಿರ್ಪೊಡು;
 ಪರಿವಾರೊದೈವೊಲೆನ ಬೆರಿ ಸಾಯೊಡು
 ಕೆಲಿಂಜ ದೂರುಡು ನಿಲೆಯಾಯಿನ ಅಪ್ಪೆ
 ಸಿರಿ ಉಳ್ಳಾಲ್ದಿನ ದಯೊಟು;
 ತುಳು ಕೆಲಿಂಜ ಭಾರತೊದ ಬೀಸ್ಮೆಪರ್ವೊ ಪೂರ್ತಿಯಾಂಡ್ ●

ತುಳು ಕೆಲಿಂಜ ಭಾರತೊ

ದ್ರೋಣ ಪವೊ

ಸುರುತ ಸಂದಿ

|| ದ್ರೋಣನ ದಳವಾಯಿ ಪಟ್ಟೊ ||

ಪಗರಿ ಮಂಚವುದಲ್ತ್ ಕೌರವೆ
ಎಸನೊಡರಮನೆಗೆತ್ಯೆ ಪಾಟಕ-
ನಕ್ಲ್ ಮನಿತ್‌ಚೆರಪಗ ರಾಯನ ಮೋನೆ ತೂವೊಂದು||
ಇರ್‌ಳ್ ಸಬೆ ಕೂಡ್ಲಾದ್ ಬರ್ಪಯಿ
ಸಕುನಿ ಸೈಂದವ ಸಲ್ಯನಕ್‌ಲೆನ್
ನನದ ದಳಪತಿ ಪಟ್ಟೊ ಏರೆಗ್ ಪನ್ದ ಕೇನಿಯೆರೆ||

1

ಆತ್ ಪೊರ್ತುಗು ಜವನೆರೊಟ್ಟುಗು
ವೀರೆರೆನ ದುತ್ತೈತೊಡತ್ತಿಯಿ
ವೀರ ಕರ್ಣೆನೆ ಕೌರವೇಂದ್ರನ ಸಬೆಕ್ ಸಂತೊಸುಡು||
ಪ್ರೀತಿದಾಯೆನೆ ಬತ್ತೆ ಪಂಡ್‌ದ್
ಆಸನೋಡುದು ಲಕ್ಕೈದುಂತುದು
ಬಾರಿ ಸಂಬ್ರುಮೊಡಯನ್ ಕೌರವೆ ಲೆತ್ತೆ ಕೈತಡೆಗ್||

2

ಅಜ್ಜ ಬೀಸೈರೆಗಾಂಡ್‌ಲಪಜಯೊ
ಕರ್ಣ ಎಂಕೇರುಂಡು ಪನ್‌ಲಯಿ
ಗೆಲ್ಲುವೆ ಸಾದಿದೈ ಪನ್ನಗ ಪನ್ನೆನಾ ಕರ್ಣೆ||
ಯುದ್ಧೊಗೆಂಕಪ್ಪಣೆನ್ ಕೊರೈಡ
ಗೆಲ್ಲವೆನೆ ನಿನನೇನ್ ಪೋಡೈಡ
ಸಯ್ವಿರಾ ಪಾಂಡವೆರ್ ಎನ್ನಡ ಲಡಯಿ ಮಲ್ತೊಂದು||

3

ಮುರನಿ ಬೀಸೈರೆನೇನ್ ನೆರ್ದನ
ಸಮೋನೆ ಅತ್ತಂದೆಂಕ್ ಬೇಜರೊ
ಮನಸ್‌ಡಾಯ್ನೇನ್ ಕಳೆದ್ ಬರ್ಪೆನೆ ಇತ್ತೆ ಬೀಸೈರೆಡ||
ಸಮೆನ್ ಕೇನುವೆ ಪನ್ದ ಪೋಯೆನೆ
ಲಡಯಿದಾ ಕಳೆತೊಲು ಬೀಸೈನ
ಪಗರಿ ಮಂಚವು ಉಂಡು ಪಂಡ್‌ದ್ ನಾಡ್ ನಾಡೊಂದು||

4

ಬನ್ನಗನೆ ನಾಯಿಗುಳು ಕರ್ಲೆನ್
ಒಯ್ಪುವು ಬೌರೊಂದು ಪ್ರೇತೊಲು
ನೆತ್ತೆರ್‌ನ್ ಜುಂಬೊಂದು ಕಕ್ಕಲು ಇತ್ತೊ ರಾವೊಂದು||
ಅಲ್ಲನೇ ಪಗರಿಲೆನ ಕೊಡಿಟೇ
ಜೆತ್ತಾದಿತ್ತೆನ ಯೋಗೊ ಮೂರ್ತಿನ್
ಕಣ್ಣೆದ್‌ರ್‌ದ್ ತೂಯೆ ಕರ್ಣೆನೆ ಸಿವ ಸಿವಾ ಪನ್ದ||

5

ಕಾರ್ಡ ಮುದೆಲ್‌ಡ್ ಕಣ್ಣೆಡೆನೆ ಸರಿ
ನೀರ್ ಅರಿಪದ್ ಬುಲ್ಲು ಬುಲ್ಲುದು
ಸೇಂಕುನಾ ಸೊರೊ ಕೇಂಡ್‌ದಾನಗ ಬೀಸೈ ಕಣ್ಣುಡುದು||
ಏರ್‌ಮಗ ಬುಲ್ಲುನಯೆ ಪಿಜಿರ್‌ದ್
ತೂಯೆರಾಪುಜೆ ನಿನ್ನ ಮೋನೆನ್
ಈಯೆ ಪನ್‌ಪನ್ ಪನ್ನಗಾಪಗ ಪನ್ನೆ ಕಲಿಕರ್ಣೆ||

6

ಆನಿ ಈರೆನ್ ಹಲ್ಕಿ ಮಲ್ತನ
ಮೂರ್ಕೆ ಕರ್ಣೆನೆ ಯಾನ್ ಈರೆನ
ಕಾರ್ ಪತ್ತದ್ ಸಮೆನ್ ಕೇನುವೆ ಕೊಲ್ಲೆ ಸಮೆನೆಂಕ್||
ತಾನೆ ಬಿಸೆಂದತ್ತೊ ಪನ್ತನೆ
ಈಯೆ ಪಂಡನ ತಪ್ಪು ಎಂಚಿನ
ಏರ್‌ಲಾಂಡಲ ಯುದ್ಧೊ ಮಲ್ಪೆರೆ ತಾನ್ ತಾನ್‌ಂದ್||

7

ಏವೊರೊಡು ನುಕುನವೆ ವೀರೆರೆ
ಗೆಪೊಲಾ ಬೋಡಿತ್ತಿ ಗುಣೊನೇ
ನೇಟ್ ನಿನ್ನವು ತಪ್ಪುದಾಯ್ತಲ ಇದ್ದಿಮಗ ಕರ್ಣೆ||
ಈಯೆ ನನ ಕೌರವನ್ ಗೆಂದಲ
ದೇವೆರೇ ನಿನ ಸಾಯೊಗುಪ್ಪಡ್
ಯಾನ್ ಸಮೆ ಕೊರ್ವೆತ್ತೊ ಪಂಡ್‌ದ್ ತರೆಕ್ ಕೈದೀಡೈ||

8

ಪರಿಯೆ ಪಾಂಡವನಕೆಲೆ ರಚ್ಚಣೆ
ಮಲುಪುನಾಯೆನೆ ಉಲ್ಲೆ ಆಕೆಲೆನ
ಬೆರಿಯೆ ಎನ್ನವು ದಾಲ ನಡಪಂದಿತ್ತೆ ಕಾಳಗೊಡು||
ಅರಸು ಕೌರವಗಾದ್ ಬೆನುಪುನ
ಮನಸ್ ಎನ್ನಡ ಮಾತ್ತೊ ಉಪ್ಪುನೆ
ಲಡಯಿ ಮಲ್ತೆಡ ಎನ್ನ ಜೂವೂನೆ ಪೋವು ಕಂಡಿತೊನೆ||

9

ಸತ್ಯೊ ಜ್ಞಾನೊನು ದಿಂಜ ತೆರಿನಯಿ
ಪನ್ದ ಅರ್ತೊನೆ ಆಂಡ್ ಯಾನ್‌ಲ
ನಿನ್ನ ಏಗಿತೊನರ್ತೊ ಮಲ್ತೆಜಿ ಈಯೆ ಬುದ್ಯಂತೆ||
ನಿಕ್ಕಲಕೆಲೆನ್ ರಾಜಿ ಮಲ್ತೆರೆ
ತಕ್ಕ ಯೇಗಿತೊ ಉಂಡು ಮಗ ಈ
ದುಸ್ಪನಕೆಲೆಗ್ ಬುದ್ಧಿ ಪಂಡ್‌ದ್ ರಾಜಿ ಮಲ್ಪಾಲ||

10

ಬುದ್ಧಿ ಪನಿಯೆರೆ ಯಾನ್ ಅರಸುಗು
ಇತ್ತನಾಯೆನೆ ಅತ್ತ ಆಯನ
ಚಿತ್ತೊದಂಚೆನೆ ನಡಪುನಯೆನೇ ಆದ್ ಇನಿ ಮುಟ್ಟಿ||
ಒಟ್ಟಿಗೆನೆ ದಿನೊ ದೆತ್ತೊ ಬೇಜರೊ
ಮಲ್ಪಡೆಂದ್‌ದ್ ಕಾರ್ ಪತ್ತೆದ್
ಸರ್ತೊ ಪೋಯೆನೆ ಕೌರವನ ಸಬೆ ನಡಪುನಾಡೆಗೆನೆ||

11

ಕರೈ ಬತ್ತನ ತೂದು ಕೌರವೆ
ಅಜ್ಜೆ ನಿನ್ನಡ ದಾನೆ ಪಂಡೆರ್
ನೆರೈರೋ ನಿನನಾರ್ ಪನ್‌ಪನ್ ಪನ್ದ ಕೇನ್ನಗನೆ||
ಪುತ್ತೊಳಿದ ಗುಣೊ ಆರೆನೆಂದ್‌ದ್
ಅರೊ ಮಲ್ತೆಜಿ ದುಂಬು ಈತ್ನಟ್ಟ
ಎನ್ನ ತರೆಕೇ ಕೈನ್ ದೀಡ್‌ದ್ ಸಮೆನ್ ಕೊರೈಯೆ||

12

ಯಾನ್ ದುಂಬೇ ನೆನೆತ್ತೆದಿತ್ತೆನೆ
ಆರ್ ಸರಣಾಗತೆರೆ ದೈವೊನೆ
ಕಾಂಡೆ ಲಡಯಿಗ್ ಪೋವೊಡತ್ತಯ ಏರ್ ದಲವಾಯಿ||
ಈಯೆ ಪನ್‌ಲಯ ಕರ್ಣ ಪಂಡ್‌ದ್
ಕೇಂಡೆ ಕೌರವೆ ಅಪಗನೇ ಗುರು
ದ್ರೋಣರುಪ್ಪುನಗಿತ್ತೆ ಏರೆಗ್ ಪಟ್ಟೊ ಕಟ್ಟುವಯೆ||

13

ಪಗರಿಡಾಯ್ತೆಡ ಸಾಪೊ ಕೊರ್ದುಲ
ಕಿರಿಯೆರೆಗ್ ತೀರ್ನಾರ್ ದ್ರೋಣರ್

ದಳಪತಿಯೆ ನಮ ಸೇನೆಗಾರೇ ಎಡ್ಡೆ ಕುರುವೀರ||
ಪುರಿನ್ ಮಚ್ಚರೊ ಬುಡುದು ಕರ್ಣನೆ
ಪನ್‌ಪಿ ಪಾತೆರೊ ಕೇನ್ದಲಾ ಸಬೆ
ತುಲಯಿ ಮಾತೆರ್ ತಾಟಿ ಬೊಟ್ಟೆರ್ ಪುಗರ್ ಪುಗರೊಂದು||

14

ದ್ರೋಣೆರೆನ್ ತರ್ಪಾದ್ ಕೌರವೆ
ಪೀಟೊಡೇ ಕುಲ್ಲಾದ್ ಸಿಮ್ಮೊದ
ಮೋನೆದವೆ ಸಿರಿ ಮುಂಡೊ ಪಟ್ಟಿನ್ ದೀಡೈ ಗುರುಕುಲೆಗ್||
ವೇದೊ ಮಂತ್ರೊಡು ಪುಣ್ಯೊ ನೀರ್‌ನ್
ಬ್ರಾಣೆರೇ ತಲಿಪುನಗ ಪೋಣ್ಣಲು
ಆರತಿನ ಬೆಳಗಾದ್ ಪಂಡೆರ್ ಪೊರ್ದು ಸೋಬಾನೆ||

15

ಪಾಟಕೆರ್ ಜಯೊ ಗೋಸೊ ಮಲ್ತೆರ್
ಕಾಣೆಗೆನ್ ಸಾಮಂತೆರೇತ್‌ಲ
ದೀಡಿಯೆರ್ ಕೌರವೆನೆ ಲಕ್ಕದ್ ಪಂಡೆ ರಾಜಾಜ್ಜೆ ||
ನಾಲ್ ರಂಗೊದ ಸೇನೆದಾಕ್‌ಲ್
ಮಾತೆರ್‌ಲ ದಳವಾಯಿಲೆನ ನುಡಿ
ತಾಜ್ಜೆಡೇ ಸರಿ ಲಡಯಿ ಮಲ್ತೆದ್ ಜಯೊನು ಸಂಪಲಿಪಿ||

16

ದಳಪತಿನವಾಜ್ಜೆಲೆನ್ ಮೀರ್‌ದ್
ನಡತನಕೆಲೆಗ್ ರಾಜ ಸಾಸನೊ
ತೆರಿದ್ ಮಾತೆರ್ ನಡಪೊಡುಂದುದು ಪಂಡೆ ಇವರಾದ್||
ಈತ್ ಸಂಬ್ರಮೊ ಆನಗನೆ ಸರಿ
ಮೂಡಯಿಡ್ ಬೊಲ್ಪಾಂಡ್ ಲಡಯಿಗ್
ಪೋಪುನಟ್ಟನೆ ಮಲ್ಪಿ ಪಂಡ್‌ದ್ ದ್ರೋಣ ತೆರಿಪಾಯೆ||

|| ದ್ರೋಣಾಚಾರ್ಯೆರೆನ ಸುರುತ ಲಡಯಿ ||

ಸಾರತಿಗ್ ಕೈ ಮುಗಿದ್ ತೇರ್‌ಗ್
ಮೂಜಿಬಲಿ ಬತ್ತೆದ್‌ಲ ಕುದುರೆಲೆ
ಮೋನೆ ಮುಂಡೊಗು ಮುತ್ತೊ ಕೊರ್ದೇ ದ್ರೋಣ ರತೊನೇರೈ||
ಆತ್ ಪೊರ್ತುಗು ಕೌರವೇಸ್ತರೆ
ದ್ರೋಣೆರೆಗ್ ಪುಡ್ಯಾಡ್ ಪಂಡೆನೆ
ಈರ್ ಇನಿ ಧರ್ಮಜನ್ ಕಟ್ಟೆದ್ ಕನಲೆ ಎನ್ನಾಡೆ||

1

ಅರ್ಜುನನ್ ತಪ್ಪಯಡ ಕಂಡಿತೊ
ಧರ್ಮನಂದನನೊಯ್ತೆಕೊಂಡುಪೆ

ಪನ್ನಗನೆ ಆಂಡ್‌ಂದ್ ಒತ್ತಿಯೆನಾ ಸುಯೋದನೆನೆ||

ಕರ್ರೆ ಅಸ್ತತ್ತಾಮೆ ಸಕುನಿಲ
ಒಟ್ಟಿಗೆನೆ ರತೊನೇರ್ಡ್ ಪಿದಡ್‌ದ್
ಬತ್ತನಾಕ್‌ಲ್ ಕಳಕ್ ನುಕ್ಯೆರ್ ಬಾಣೊ ರಾಪಯೆರ್||

2

ದ್ರುಪದರಾಜನ ಸೇನೆ ಎದುರುಗು
ಬರುಪುನೆನ್ ತೂವೊಂದು ದ್ರೋಣೆನೆ
ನೆರ್‌ದ್ ಪಂಡೆನೆ ನಿಕ್‌ಲ್ ನಾಯಿಲು ಎನಡ ಕಾದುವರೊ||
ಬರಡ್ ಬೀಮಾರ್ಜುನೆರ್ ಎನ್ನಡ
ಲಡಯಿಗುಂತಡ್ ಪೆಟ್ಟ್ ತಿನಿಯೆರೆ
ಬಿರ್‌ಸೆರಾಕ್‌ಲ್ ಪಾರಯೆರ್ ನಿಜೊ ಪನ್‌ಲೆ ಅಕ್‌ಲೆಡನೆ||

3

ಚೆತ್ತಿಯೆರೆ ನುಪ್ಪುದವೆ ಕಾರ್ಬರ್
ನಿತ್ತೆ ಉಂತವೆ ಪನ್ದ್ ರಾಪಯೆ
ದ್ವಾಸ್ವದ್ಯುಮ್ನನೆ ಮಂತ್ರ ಬಾಣೊನು ದ್ರೋಣನಾ ತರೆಕ್||
ಬರಿ ಬಾಣೊನು ಅರ್ದೊ ಸಾದಿಡೆ
ರಟ್ಟದಾ ಗುರು ಎದುರು ಪಗರಿನ್
ಬಿಲ್‌ಗೇ ಕೊಲ್ವಾದ್ ದ್ರುಪದನ ಮಗಕ್ ಬುಡುದುಂತ್ಯೆ||

4

ದಾನೆ ಪನ್ನುನೆ ದ್ವಾಸ್ವದ್ಯುಮ್ನನ್
ದೂರೊಗೇ ರಟ್ಟಾಂಡ್ ಬಾಣೊನೆ
ದ್ರೋಣೆ ಸೇನೆನ್ ಅರ್ದೊ ಚಂದ್ರನ ನಮುನೆಡುಂತಾದ್||
ಬೀಮ ಪಾರ್ತೆರ್ ಬರ್ವರಿತ್ತೆನೆ
ಜಾಗ್ರತೆಡ್ ತೂವೊನುಲೆ ಪಂಡ್‌ದ್
ಸೇನೆಗಾಚ್ಚೆನ್ ಕೊರ್ದು ಉಂತಿಯೆ ಬಿರುನು ಪತ್ತೊಂದು||

5

ದ್ವಾಸ್ವದ್ಯುಮ್ನನ್ ರಟ್ಟಯಿನ ಗುರು
ನಿತ್ತೆ ರಟ್ಟಾವೆಂದ್ ಬೀಮನೆ
ಅಟ್ಟಸ್‌ಡ್ ಎದುರುಂತಿನಾಪಗ ದ್ರೋಣೆ ತೆಲಿತೊಂದು||
ರಕ್ತಸನ ಮಡೆ ತಿಂದಿ ತಿಂಬಟು
ಬತ್ತನಯ ಓ ಬೀಮ ಈಯೆ
ಚೆನ್ನ ನಾಯಿದ ಬಂಚಿದಾಯೆನೆ ತಿನೆಲ ಪುಣೊಕುಲೆನ್||

6

ಪುಳಿ ಕಜಿಪು ತಿಂದ್‌ನವೆ ಬ್ರಾಣೆರ್
ಎನಡ ಲಡಯಿಗ್ ಉಂತ್ಲೆರೋ ಪನಿ
ಗುರುಕುಲೀರೇ ಕಚ್ಚೆಡುರ್ಚ್ಚರ್ ಪೆಟ್ಟ್ ತಾಗ್‌ನಗ||
ಗದನ್ ಪತ್ತಲ ತೂಕೊ ನಿನ್ನವು
ಬಿರ್‌ಸತಿಗೆ ಏತುಂಡು ಗೆಲ್ತಡ
ಕಲ್‌ಪಯಿನ ಮರ್ಮಾದಿ ಎಂಕೇ ತಿಕ್ಕು ಬಲಬೀಮ||

7

ಈ ಪೆದಂಬೆನೆ ದುಂಬು ಕಲ್ಪುನ
ಕಾಲೊಡತ್ತಯ ಇತ್ತೆಲಾ ನಿನ
ಪೋಕಲೊದ ರಾಪಟೊನೆ ಉಂಡೊಯ ಪನ್ದ್ ಹಾಕ್‌ನಗ||
ಬೀಮ ಪೆಟ್ಟನ್ ತಪ್ಪವೊಂದೇ
ನೋಟೊ ತೂದೇ ಗದೆಟ್ ಹಾಕ್ಯೆನೆ
ದ್ರೋಣೆ ತಪ್ಪದ್ ಪೆರಪ ಹಾಕ್‌ನ ಪಟ್ಟಡಾ ಬೀಮೆ||

8

ತರೆನೆ ತಿರ್ಗ್‌ದ್ ಬೂರ್ನ ತೂದೇ
ಯಮನ ಮಗೆ ಧರ್ಮಜೆನೆ ಬತ್ತದ್
ಗುರುಕು ಕೈ ಮುಗಿಯೊಂದು ಪಂಡೆನೆ ಸ್ವಾಮಿ ಈರಿತ್ತೆ||
ಲಡಯಿಗುಂತುದು ಎಂಕ್ಲೆಗಾಕ್ಲರೊ
ಪೆರಪ ಎಂಕುಲು ಕೈನ್ ದೆರ್ಪಯೊ
ಎದುರು ಉಂತಿಯೆ ಕೆರ್ರೆ ಪಂಡ್‌ದ್ ಬಿರುನು ಕೈ ಬುಡುದು||

9

ತಿಕ್ಕೆ ಧರ್ಮಜೆ ಪನ್ದ್ ದ್ರೋಣೆನೆ
ಸುತ್ತು ಪಾಡ್‌ದ್ ಪತ್ತಲೆಂದ್‌ದ್
ಸೈನ್ಯೊದಕಾಲೆಡ ಪನ್ನಿ ಪೊರ್ತುಡು ಎತ್ತೆನರುನೆನೆ||
ಪತ್ತೆರೆಗ್ ಪುಣೆಪುನವೆ ವೀರೆರ್
ಅಲ್ಕದುಂತ್ಯೆರ್ ಪಾರ್ತೆ ತೇರ್‌ಡ್
ಬತ್ತನೆನ್ ತೂವೊಂದು ಪೋಡಿಗಡಕ್‌ಲ್ ನಡ್ಗಿಯೆರ್||

10

ಪಾರ್ತೆ ದ್ರೋಣೆರೆನೆದುರು ಉಂತುದು
ಗಾಂಡಿವೊನು ಕೈ ಬುಡುದು ಕೈ ಮುಗಿ
ದಾದ್ ಗುರುಕುಲೆ ಈರ್ ಕಲ್ಪಯಿನೇನ್ ಈರೆಡನೆ||
ತೋಜನಗ ದಾಚೀನೊ ಮಲ್ಪಡೆ
ಲೋಕೊದಾ ಗುರು ಕ್ರಿಷ್ಣನೆದುರುಡೆ
ಮೋಕ್ಷೋಗೇರುವೆ ಪನ್ದ್ ಪತ್ತೆನೆ ದಿವ್ಯೊ ಕೋದಂಡೊ ||

11

ದುಸ್ಸೆರುನ್ನುನು ತಿಂದಿ ಸೈರೊನು
ಸಿಸ್ಯ ಬಾಣೊಡೆ ಕ್ರಿಷ್ಣನೆದುರುಡು
ದೆಪ್ಪುನವೆ ಎಡ್ಡೆತ್ತ ಕಲ್ಪಯಿ ದಿವ್ಯೊದನುರ್ವೇದೊ ||
ನಿಕ್ಕ ಪಲಿತ್‌ದ್ ಉಂಡೊ ಪನ್ನಿ ಪ -
ರೀಕ್ಲೆ ಉಂದೇ ಲಡಯಿ ಬುಡ್ಲಯ
ಬಿಲ್ಲ್ ದೆರ್ತ್‌ದ್ ಬಾಣೊನರುನ್ನ ಎನ್ನ ತಿಗಲೆಗ್‌ಲ ||

12

ವೀರ ಪಾರ್ತೆನೆ ಮಂತ್ರೊ ಬಾಣೊನು
ದ್ರೋಣ ಮೇಲ್‌ಗ್ ಬುಡ್ಡು ಸಾತ್‌ಗ್

ದೂರೊಗೇ ರಟ್ಟಾದ್ ಆನಗ ಗುರುಕು ಮತಿಯಿದ್ದಿ ||
 ಗಾಳಿ ಪಾಡ್ಯೆರ್ ಬಟ್ಟುಗಿತ್ತನ
 ಸೇನೆದಾಕ್ಲ್ ಅಪಗ ಕಣ್ಣನ್
 ಪೂರ್ತಿಬುಲದ್ಲ ತೂಪಿ ಸಮಯೊಡು ಆಂಡ್ ಕತ್ತಲೆನೆ ||

|| ಸಮಸಪ್ತಕೆರ್ ಲಡಯಿಗ್ ಪಿದಡಿಯೆರ್ ||

ದ್ರೋಣನಾ ದಳವಾಯಿ ಪಟ್ಟೊದ
 ಕಾಳಗೊಡು ಸುರುತಾನಿ ಕತ್ತಲೆ
 ಆಯಿ ಸಾತ್ಗ್ ಕೌರವನೆ ಸಬೆ ಕೂಡ್ಲಯೆನೆ ಬೇಕೊ ||
 ಸೇರ್‌ದಿತ್ತೆರ್ ಕರ್ಣ ಸಕುನಿಲು
 ಆ ದುಸ್ಯಾಸನೆ ಸಲೈ ಸೈಂದವೆ
 ಮಾತೆರೆನ ಸರಿ ಮೋನೆ ತೂವೊಂದಾಯೆ ಬೇಜರೊಡು ||

1

ಇನಿತ ಲಡಯಿಡ್ ಸೋಲು ಆಯಿನೆ
 ಪನ್‌ಲೆ ಎಂಚಂದೆನಡ ದಳಪತಿ
 ಗುರುಕುಲೇ ಆಯಿನೆಟ್‌ಲಾಚಿರೊ ಎಂಕ್ ಆಂಡತ್ತೊ ||
 ಮನಿಪುಜರ್ ದಾಯೆಂದ್ ಕೇನ್ನಗ
 ಸಬೆಟ್ ಇತ್ತಾನ ಕರ್ಣೆ ಲಕ್ಶ್ಮದ್
 ಕುರುಪತಿಯೆ ಕೇನಿತ್ತೆ ಯಾನೇ ಪನ್ನಿ ಪಾತೆರೊನು ||

2

ದ್ರೋಣೆರೇ ಧರ್ಮಜನ್ ಪತ್ತೆರೆ
 ಸೇನೆಗಾಜ್ಜೆನ್ ಕೊರ್ನ ಸಾತ್ಗ್
 ಪಾರ್ತಿನಾಡೆಗ್ ಎತ್ತೈ ಎಂಚನೊ ತೆರಿಡ್ ಪಾರೊಂದು ||
 ಬಾರಿ ಕಾಳಗೊ ನಡತ್‌ದಾನಗ
 ಆ ಯುದ್ಧಿಪ್ಪಿರೆ ಗುರುಕು ತಿಕ್ಕಾಜೆ
 ಕಾದ್‌ಕಾದ್‌ದ್ ಬಯ್ಯಗಾನಗ ಸೋಲು ನಂಕಾಂಡ್ ||

3

ಕ್ರಿಷ್ಣೆ ಪಾಂಡವನಕ್‌ಲೆ ರಚ್ಚಣೆ
 ಮಲ್ಲುನಾಯೆನೆ ಆಯಿನೆಟ್ ನಮೊ
 ಗೆಲ್ವಿಯೆರೆ ಕಸ್ತೊಂಡು ಪನ್ನಗ ಆ ತ್ರಿಗರ್ತೆರೆನ ||
 ಕಣ್ಣೆ ಕೆಂಪಾಂಡಪಗ ಕೋಪೊಡು
 ಲಕ್ಶ್ಮದುಂತುದು ಪನ್ನೆರಾ ಸಬೆ
 ಟತ್ತನಕ್‌ಲೆನ ಮೋನೆ ತೂವೊಂದಲ್ಲ ಅಟ್ಟಿಸ್‌ಡ್ ||

4

ಕೇನ್ ಕೌರವ ಕರ್ಣ ಕೇನ್‌ಲ
 ವೀರೆರಾ ದುಸ್ಯಾಸನಾದಿಲು

ಕೇನಿ ಸೈಂದವ ಸಲ್ಯ ಸಕುನಿಲು ಮಾತಾ ಸೈನಿಕೆರ್ ||
 ಏಳ್ ಮೆಗಿ ಪಲಯಲ್ಲು ಎಂಕುಲು
 ದಾನವೆರೆ ಕುಲೊ ಕೀರ್ತಿನೊರಿಪೆರೆ -
 ಗಾಡ್ ಪುಟ್ಪೆದು ಬತ್ತಿ ಸಮ ಸಪ್ತಕೆರ್ ತೆರಿಯೊನುಲೆ ||

5

ಎಂಕ್ಲೆನಮ್ಮೆ ನಿವಾತಕವಚೆಂ
 ದೆನ್ನಿ ವೀರೆನೆ ಸೊಗೊರ್ ಲೋಕೊಡು
 ಯುದ್ಧೊ ಮಲ್ಲುನಗಪಗಲರ್ಜನೆ ಕೆರ್ತನಾಯನ್‌ಲ ||
 ಇತ್ತೆ ಆಯನ ಪಗನ್ ಸಂದವೊ
 ನೆಕ್ಕ್ ತತ್ಯೊಡ ಅಮ್ಮನೆಂಕುಲು
 ಕೆರ್ನ ದೋಸೊದ ಪಾಪೊ ಬರ್ಪುನ ಬರಡ್ ಪಂಡೊಂದು ||

6

ಆಜೊ ಪಾಡ್‌ದ್ ಪಿದಡ್‌ದುಂತನ-
 ಗಾಪಗನೆ ಬೊಲ್ಬಾಂಡ್ ದೂತೆರ್
 ಪಾರ್ತಿನಾಡೆಗ್ ಪೋದು ಪಂಡೆರ್ ಆಣ್ ಈಯಾಂಡ ||
 ಕಾಳಗೊದ ಕಳತಾಡೆ ಬತ್ತದ್
 ವೀರ ಸಮಸಪ್ತಕೆರೆ ಎದುರುಡು
 ಕಾದೊಡುಗೆ ಇದ್ದಿಡನೆ ದಮ್ಮಯ ಪಾಡ್ಡ್ ಬದುಕೊಡುಗೆ ||

7

ಈತ್ ಎಂಕ್ಲೆಡ ಪನ್ನೆರಾಕ್‌ಲ್
 ಏಳ್‌ಜನೊ ರಕ್ಕಸೆರ್ ಉಲ್ಲೆರ್
 ಪಾತಳೊದ ಲೋಕೊಡುದು ಬತ್ತನವಕ್‌ಲ್ ಕೆರ್ಡುವೆರ್ ||
 ಈಯೆ ಬದುಕುನ ಸಾದಿ ತೂವೊನು
 ಕಾದುನವು ಬೊಡ್ಡಿಂ ಪನ್ನಗ
 ಪಾರ್ತೆ ದೂತೆರೆ ಗೆಬ್ಬುಗೆತ್ತಯೆ ಕೈಟ್ ನಾಲ್ವಾಲ್ ||

8

ನಿಕ್‌ಲೆನಾ ದನಿ ಬರಡ್ ಎನ್ನಡ
 ಲಡಯಿ ಮಲ್ಲೆರೆ ಕಾಳಗೊದ ಕಳ-
 ತಡೆಗ್ ಪನಿಯೆರೆ ಪೋಲೆ ಎನ್ನಡ ಮುಲ್ಲ ತಿಂದನೆನ್ ||
 ಅಕ್‌ಲೆಡಲ ಸರಿ ಪನ್‌ಲೆ ಪನ್ನಗ
 ಪುಕುಳಿಗೇ ಕಾರ್ಕೊರ್ನ ಪಾರ್ತೆರ್
 ದನಿಕುಲೆಡ ಪನ್ನೊಂದು ದೂತೆರ್ ಸಿಬಿರೊದಾಡೆಗೆನೆ ||

9

ಅಣ್ಣನ್‌ಲ ತೂವೊನುಲ ದ್ರೋಣೆರ್
 ಒಯ್ಯದೇ ಕೊಂಡೊವೆರ್ ಬೀಮಾ
 ತಪ್ಪವಡ ಸಮ ಸಪ್ತಕೆರೆಡ ಯಾನ್ ಕಾದಿಯೆರೆ ||
 ಇತ್ತೆನೇ ಪೋವೊಡುಗೆ ಕಾಳಗೊ
 ಮಲ್ಲಡ್‌ಯ ಸಹದೇವ ನಕುಲೆರ್
 ದ್ರಸ್ಪದ್ಯುಮ್ಮೆಲ ನಮ ಗಟೋದ್ಲೆ ಪನ್ನ ಪಿದಡಿಯೆನೆ||

10

ದ್ರೋಣನಾಚ್ಚೆಡ್ ಸೇನೆ ಪಿದಡ್ಡಾದ್
ಕಾದಿಯೆರೆ ತಯರಾದ್ ಉಂತ್‌ನ-
ಗಾಪಗನೆ ಪಾಂಡವೆರೆ ಕಡೆತಕ್‌ಲಾಡೆಗ್‌ತ್ತಿಯೆರ್ ||
ಬೀಮ ಸೇನೆನೆ ಕೌರವೇಂದ್ರಡ
ಸಾತ್ಯಕಿಯೆ ಕಲಿಕರ್ಣನೆದುರುಡು
ವೀರನಾ ಸಹದೇವೆ ಸಲ್ಯಡ ನಕುಲೆ ಸಕುನಿಡನೆ ||

11

ಕಾದಿಯೆರ್ ಅತಿರತೆರ್ ಮಾತೆರ್
ನಾಲ್ ರಂಗೊದ ಸೇನೆದಾಕ್‌ಲ್
ಕಾಳಗೊದ ಕಳನಲ್ಪ ಪೊಡಿ ಪೊಡಿ ರಟ್ಟದಾನಗನೆ ||
ಬೀಮೆ ಗದೆ ಬೀಜೊಂದು ಕೌರವ
ನಾಯಿ ಬಲಬಲ ಗದೆಟ್ ಗೊಬ್ಬುಗೊ
ಜೂಜಿ ಮಣ್ಣಾದ ಆಸೆದಾಯಗ್ ಮಣ್ಣಾ ತಿನ್ನವೆನೆ ||

12

ತರೆಕ್ ತಿಗಲೆಗ್ ಹಾಕ್‌ದಾನಗ
ತರೆನೆ ತಿರ್ಗದ್ ಬೂರೈ ಕುರುಪತಿ
ಕೆರ್‌ಪೆನೇ ಬೀಮೆಂದ್ ಬತ್ತೆರ್ ಜಯದ್ರತಾದಿಗುಳು ||
ಎದುರು ಬತ್ತದ್ ಸೈಂದವನ್‌ಲಾ
ಗದೆಟ್ ಹಾಕ್‌ದ್ ಮಗತ್ ಪಾಡಿಯೆ
ಕುರುಪತಿನ ಮೆಗ್ಯಲ್ಲು ಲಡಯಿಗ್ ಬತ್ತನಾಪಗನೆ ||

13

ಓ ದುಸ್ಯಾಸನ ನಿನ್ನ ನೆತ್ತೆರ್ -
ದಾಂಡ್ ಬಾಚೆಲ್ ಎದುರು ಉಂತುಲ
ಸೀರೆನೊಯ್ತನ ಕೈಟ್ ಪತ್ತಲ ನಿನ್ನ ಬಿರುಪಗರಿ ||
ಹಾಕ್ ಹಾಕ್‌ದ್ ಮಗ್ತ್ ಪಾಡ್ಚೆನ್
ತೂದು ಪಾರೈರ್ ಮೆಗ್ಯನಾಕ್‌ಲ್
ದ್ರೋಣೆ ದ್ರುಪದನ್ ಗಿಡರ್‌ದಾಡೆಗ್ ಬತ್ತ ತೂನಗನೆ ||

14

ಕಳಟ್ ಬೂರುದು ಪುಡೆರ್ ಪುಡೆರ್‌ದ್
ಬುಳುಪುನಾ ವೀರೆರೆನ್ ತೂನಗ
ಕನಿಕರೊಡು ಪಂಡೊಂಡೆ ತನ್ನನ್ ತಾನೆ ನೆರೊನುಂದು ||
ದಳಪತಿಯೆ ತಾನಾದ್ ಇಂಚಿನ
ಹಣೆಬರೊನು ತೂಯೆರೆಗ್ ಎಂಕೇ
ಒದಗನೆನೆ ಪಂಡೊಂದು ಉಂತ್‌ನಗಪಗ ಬಗದತ್ತೆ ||

15

ಸುಪ್ರತೀಕೊನೆ ಪನ್ನುನಾನೆಗ್
ಕುತ್ತೈ ಸೂಲೊಡು ಅಪಗಲವ್ವೇ

ನುರು ನುರುದು ಕೆಂಡ್ ಒದ್ದುದು ಸಾರೊ ಸೈನ್ಯೊಲೆನ್ ||
ತಡ್ಡೆ ಕೆಬಿನಾಡಾದ್ ತುಂಬಿಡ್
ರಟ್ಟದೇತೋ ರತೊನು ಪೊಡಿ ಪೊಡಿ
ಮಲ್ತದಾನಗ ಬೀಮೆ ಗದೆಟೇ ಹಾಕ್ಯೆ ತೀರಾತ್ ||

16

ಗದೆತ ಪೆಟ್ವೆನ್ ಗಣ್ಯೊ ಮಲ್ತುಂ-
ದವುಲು ನುರ್ಕುದು ಕೆರ್ಪಿ ನಮುನೆನ್
ತೆರಿದ್‌ಲಾ ಹರಿ ಪಂಡೆನರ್ಜುನಡಪಗ ಅಮಸರೊಡು ||
ನಮನ ಸೇನೆನ್ ಸುಪ್ರತೀಕೊನೆ
ಪೊಡಿಯೆ ರಟ್ಟದ್ ಆಂಡ್‌ಲಾಡೆಗ್
ರತೊನು ತಿರ್ಗಗೊ ಪನ್ದ್ ತಿರ್ಗಯೆ ಆನೆದಾಡೆಗೆನೆ ||

17

ನುರುನಾನೆಗ್ ಪಾರ್ತೆ ಹಾಕ್‌ದ್
ಕೆರ್ ಪಾಡಿಯೆನಪಗಲಾ ಬಗ-
ದತ್ತೆ ಬತ್ತದ್ ಎದುರು ಉಂತಿಯೆ ಬಾಣೊರಾಪಾದ್ ||
ಅರುಜನೆನೆ ಬಗದತ್ತ ಬಾಣೊನು
ರಟ್ಟದಾಪಗ ಎದುರುಗಸ್ತೊನು
ಬುಡ್ಡು ತೂನಗಲೈನ್ ರಟ್ಟದ್ ಅಂಕುಶಾಸ್ತೊನುಲ ||

18

ಮೂಡಿಗೇಡ್ ಇತ್ತನೆನ್ ದೆಪ್ಪುನ-
ಗಾಂಡ್ ಸೂರೈ ಪ್ರಕಾಶೊ ಪಾಂಡವ
ಸೇನೆಗೇ ಗಂಡಾಂತ್ರೊ ಪಂಡ್‌ದ್ ಕ್ರಿಷ್ಟೆ ತೆರಿಯೊಂಡೆ ||
ನೋಟೊ ಪತ್ತದ್ ಪಾರ್ತೆ ತಿಗಲೆಗ್
ವೀರೆನಾ ಬಗದತ್ತೆ ಬಾಣೊನು
ರಾಪನಗ ಎದುರುಂತ್ಯೆ ಕ್ರಿಷ್ಟೆನೆ ತಿಗಲೆನೊಡ್ಡಾದ್ ||

19

ಕ್ರಿಷ್ಟೆ ತಿಗಲೆಡ್ ಅಂಕುಶಾಸ್ತೊನೆ
ಕೌಸ್ತುಬೊದ ಮಣಿತಂಚ ಮೆಣ್ಣಾದ್
ಇತ್ತನೆನ್ ತೂವೊಂದು ಪಾರ್ತೆನೆ ಆಚಿರಾನಗನೆ ||
ಇತ್ತೆ ಕತ್ತಲೆ ಆಂಡ್ ನಮೊ ನನ
ಯುದ್ಲೊನುಂತದ್ ಸಿಬಿರೊದುಲಯಿಗ್
ಪೊಗ್ಗುಗೊಯ ಯಾನಲ್ಪ ಬಾಣೊದ ಕತೆನ್ ತೆರಿಪಾವೆ ||

|| ಬಗದತ್ತನ ಮರಣೊ ||

ರಾತ್ರ ಸಿಬಿರೊದ ಉಲಯಿ ಬತ್ತೆರ್
ಪಾರ್ತೆ ಕ್ರಿಷ್ಟೆರ್ ಲಡಯಿದೈತೊನು

ಪೂರ ಬಿಚ್ಚದ್ ಬೆಚ್ಚ ನೀರ್ಡ್ ಮೀದ್ ಕುಲ್ಲಿಯೆರ್ ||
ಆತ್ ಪೊರ್ತುಗು ಒಣಸ್ ಮಲ್ಪೆರೆ-
ಗಾಕ್ಲೆನ್ ಲೆಪ್ಪುನಗ ಉಂಡುದು
ಆಸಿಗೇಡ್ ಜೆತ್ತೊಂದು ಕ್ರಿಷ್ಣಡ ಕೇಂಡೆನರ್ಜುನೆ ||

1

ದೇವ ಅಂಕುಸೊ ಬಾಣೊದಾಕತೆ
ಕೇನಿಯೆರೆ ತೊಡುವಾಂಡ್ ಐನೇ
ಪ್ರೀತಿದೀಡ್ ಪನೊಡು ಪನ್ನಗ ಕ್ರಿಷ್ಣೆ ಸಂತೊಸುಡು ||
ಕಾಸ್ಯಪೆರೆ ಮಗೆ ದುಸ್ಸೆನೇ ಕನ-
ಕಾಕ್ಲೆ ಪನ್ನುನ ದೈತ್ಯೆ ಲೋಕೊದ
ಬ್ರಾಣೆರೆಗ್ ಪೊಂಜೊವೆಗ್ ಮಲ್ತೆನೆ ಬಾರಿ ಅನ್ಯಾಯೊ ||

2

ಯಜ್ಞೊ ಯಾಗೊನು ಪೂಜೆ ಮಾತೆನ್
ಮಲ್ಪುನಾ ಬ್ರಾಣೆರೆನ್ ಕೆರೈನೆ
ಬುಕ್ಕೊ ಬೂಮಿಡ್ ದೈವೊ ದೇವೆರೆನೇರ್ಲ ನಂಬಂದೆ ||
ಮಲ್ಲ ದೇವೆರೆ ಇಂಬೈ ಪಂಡ್ಡ್
ಬಗ್ಗಿಡೆತ್ತೆರ್ ಪಾಪೊದಾಕ್ಲ್
ತನ್ನ ಸಾಮಾರ್ತಿಕೆನ್ ವರುಣಡ ತೋಜಯೆರೆಗಾದ್ ||

3

ಕಡಲ್ದಾ ಸಿರೆಕಾಯೆ ಹಾಕೊಂ-
ದಪಗ ಬತ್ತದ್ ಬೂಮಿ ದೇವಿಯೆ
ಎನಡ ಪನ್ನಗ ಯಾನ್ ಆಯನ್ ಕೆರ್ದ್ ಪಾಡ್ಚೆಂದ್ ||
ಬೊಲುದು ಪಂಜಿದ ರೂಪೊಡೆನ್ನವೆ
ಅಬತರೊಡು ದಾನವನ್ ಕೆರೈನೆ
ಪುರುಸೆ ಯಾನೇ ಪ್ರಕೃತಿ ಎನ್ನವೆ ಬುಡೆದಿ ಅಂದತ್ತೊ ||

4

ಬೂಮಿ ದೇವಿಗ್ ಎನಡ ಮೋಕೆನೆ
ಆದ್ ಅವ್ವೇ ಪಂಜಿ ರೂಪೊಡು
ಕೂಡಿಯಲ್ ಎನ್ನೊಟ್ಟುಲಾಪಗ ಪುಟ್ಟಿನಾ ನರಕೆ ||
ಆಪಗನೆ ಎನದಾಡೆ ಉದುರುದ್ -
ನೇನ್ ಪೆಜ್ಜಿದ್ ಬೂಮಿ ದೇವಿಯೆ
ಆ ನರಕ ದಾನವಗ್ ಕೊರೈಲ್ ಬಾಣೊ ಮಲ್ಪಯೆರೆ ||

5

ನರಕೆ ಅಂಕುಸೊ ಬಾಣೊ ಮಲ್ತೆನೆ
ಲಡಯಿಡಾಯೆನೆ ಸೈತ್ತೆ ಎನ್ನಡ
ಪಗರಿ ಉಂದೇ ನರಕ ಮಗೆ ಬಗದತ್ತಗಾಂಡವುಲ ||
ಎನ್ನ ಸೈರೊದ ಸೊತ್ತುನೇನೇ

ಕುಲ್ಲಯಿನೆ ತಿಗಲೆಡ್ಲ ಪನ್ನಗ
ಅರ್ಜುನಗ್ ಸಿರಿ ಕ್ರಿಷ್ಣ ಮೈಮೆನೆ ಪೂರ ತೆರಿದಾಂಡ್ ||

6

ಕೌರವೆರೆ ಸಿಬಿರೊದವೆ ಉಲಯಿಡ್
ಪಾರ್ತನಾ ಬಾಣೊದವೆ ಪೆಟ್ಡ್
ವೀರೆನಾ ಬಗದತ್ತೆ ನರಲೊಂದಿತ್ತೆ ನರಕೊಂದು ||
ಪೋಂಡೆ ಎನ್ನವೆ ಸುಪ್ರತೀಕೊನೆ
ಬಾಣೊ ಕ್ರಿಷ್ಣನ ತಿಗಲೆಗಾಂಡ್ಲ
ಯಾನ್ ಬದುಕುಜೆ ಪನ್ದ ಬುಲ್ಪುನಗುಸುಲು ಮಿತ್ತಾಂಡ್ ||

7

ಸೈತ್ತೆನೇ ಬಗದತ್ತೆ ಪಂಡ್
ಬುಲ್ತೆರೇಶ್ಲ ಸಿಬಿರೊದುಲಯಿಡ್
ಬತ್ತ ಪಂಡೆರ್ ಕೌರವೇಸ್ವರಡಪಗ ಬುಲ್ತೊಂದು ||
ಅಲ್ಪನೇ ಸಬೆ ಕೂಡದಾದ್ಲ
ಸೈತ್ತನಾಯಗ್ ಮೋಕ್ಷೊ ತಿಕ್ಕಡ್
ಪನ್ನಿ ದುಕ್ಕೊದ ಪಾತೆರೊಡು ಸರಿಟಿಸನೊ ತೋಜಾಯೆ ||

8

ಲಡಯಿಡೇ ಸೋಲಾಂಡೆ ಬೀಸೈರ್
ಪಗರಿ ಮಂಚವುಡಾರೆ ಜೆತ್ತೆರ್
ಗುರುಕುಲೆನ್ನಡ ಬಾಸೆ ಪಾಡ್ಡೆರ್ ಆ ಯುದ್ಧಿರನ್ ||
ಕಟ್ಡ್ ಕನಪಂದಾರ್ ಪಂಡನ
ನಡತೆನೆನೆ ಇದ್ಯತ್ತೊ ಬ್ರಾಣೆರ್
ಉಣುಪುನೆನೆ ಎನ್ನವುಲು ಅಕ್ಲೆನ ಪಾಂಡವೆರೆ ಪಕ್ಷೊ ||

9

ಈತ್ ಪನ್ನಗ ದೋಣ ಮನಸ್ಗ್
ಬಾರಿ ಬೇಜರೊ ಆಂಡ್ಲಾಪಗ
ಕೇನ್ ಕೌರವ ಎಲ್ಲೆ ಯುದ್ಧೊಡು ಧರ್ಮನಂದನನ್ ||
ಈಡೆ ಒಯ್ತದ್ ಕನಪೆ ಕಟ್ಡ್
ಬಾರಿ ಬಿರ್ಸದ ಚಕ್ರೊ ಕೋಟೆನ್
ಯಾನೆ ಮಲ್ತದ್ ಪತ್ವನಾಯನ್ ನಂಬು ಮಹರಾಜ ||

10

ಪಾರ್ತನೀ ತಪ್ಪಯಡ ಮಾತೊನೆ
ಆ ಯುದ್ಧಿರೆ ತಿಕ್ಕೆ ಇದ್ದಿಡ ಯಾನ್ ಮಲ್ಪುನ ಕೆಲಸೊ
ನೀರ್ಡ್ ಹೋಮೊ ದೀಡಿಲೆಕೊ
ಆವು ಪಾರ್ತನ್ ತಪ್ಪಯೆರೆನೇ
ತೀರುನಕೆಲೇರುಂಡು ಪನ್ನಗ
ವೀರೆರಾ ಸಮಸಪ್ತಕೆರ್ ಲಕ್ಡುಂತೈರಾಪಗನೆ ||

11

ಅರುನನ್ ಇನಿ ಲಡಯಿಡೆಂಕುಲು
ಮಣ್ಣ್ ಮುಕ್ಕವೊ ಕೌರವೇಸ್ವರ
ಚಕ್ರ ಕೋಟೆನ್ ಕಟ್ಟಡ್‌ಯ ಗುರು ದ್ರೋಣೆರಾ ಕಳಟ್ ||
ಕತ್ತಲೆದ ಸಬೆ ಕೌರವೇರೆನ
ಪನ್ನಿ ಪಾತೆರೊನಂದ್ ಮಲ್ತೆರೆ
ಪೊರು ಮೂಡ್‌ಗ ಸಬೆನೆ ಅಗತ್‌ದ್‌ಲಾಂಡ್ ಅಮಸರೊಡು ||

|| ದ್ರೋಣನ ಚಕ್ರ ಕೋಟೆ ||

ನಾಲ್ ರಂಗೊದ ಸೇನೆದಾಕ್‌ಲ್
ಕಾಂಡೆ ಲಕ್ಹದ್ ಕರ್ಮೊ ಕಿರ್ಯೆನ್
ತೀರ್ದಾನಗ ದ್ರೋಣನಾಚ್ಚೆನೆ ಆಂಡ್ ಪಿದಡಿಯೆರೆ ||
ಬೇರಿ ತಂಬಟೆ ಕೊಂಬು ವಾದ್ಯೊಡು
ಕಾಳಗೊದ ಕಳತಾಡೆ ಎತ್ತೈರ್
ಆ ಸುಯೋದನ ಕಡತ ವೀರೆರ್ ಬೊಬ್ಬೆದಬ್ಬರೊಡು ||

1

ದ್ರೋಣೆ ಲೆತ್ತೆನೆ ರಾವುತೇರೆನ್
ಬಾರಿ ಮಲ್ಲ ಉರುಂಟು ಕೋಟೆದ
ಆಕರೊಡು ಕುದುರೆಲೆನ್ ಉಂತಲೆ ಸಾರೊಲಕ್ಷೊನುಲ ||
ಆನೆಲೆನ್ ಉಂತಾಲೆ ಪಿರವುಡು
ಏತ್ ಬೋಡೋ ಆತೆನ್‌ಲ ಸರಿ-
ಟಾದ್ ತೇರುಲು ಉಂತಡವೆತಾ ಬೆರಿತ ಸುತ್ತಲೆಡ್ ||

2

ಕಾರ್ಡೆತ ವೀರೆರೆನ್ ಉಂತಲೆ
ತೇರ್‌ಲೆನ ಸುತ್ತದವೆ ಪಿರವುಡು
ಆ ಸುಯೋದನ ಸೇನೆ ಉಂತಡ್ ನಡುತ ಕಳಟಾಲೆ ||
ವೀರ ಸೈಂದವೆ ಎದುರು ಬಾಕಿಲ್
ಕಾಪಿಯೆರೆ ಉಂತೊಂದು ಪೊಗ್ಗೆರೆ
ಏರೆನ್‌ಲ ಬುಡಿಯೆರೆಗ್ ಬಲ್ಲಿದಾಂಡ್ ಗುರುನಾಚ್ಚೆ ||

3

ಕರ್ರೆ ಸೌಬಲೆ ಸಲೈ ಗುರುಕೃಪೆ
ರೊಟ್ಟಿಗೆನೆ ಕುರುಪತಿನ ಸೇನೆದ
ಸುತ್ತ ತಿರ್ಗೊಡು ಕೌರವಾದಿಲೆ ಜೋಕ್ಲ ಅಲ್ಲು ||
ಚಕ್ರೊ ಸುತ್ತದ ನಡುಟೆ ತಿರ್ಗೊಡು
ಪನ್ನಿ ಉಂತಯೆ ದ್ರೋಣೆ ಸೈನ್ಯೊನು
ಕಟ್ಟಿದಾಯಿನ ಸೈನ್ಯೊ ಕೋಟೆನ್ ತೂದು ಪುಗರಿಯೆರ್ ||

4

ಆತ್ ಪೊರ್ತುಗುಲಾ ತ್ರಿಗರ್ತೆರೆ
ದೂತನಾಕ್‌ಲ್ ನರನ ಕೈತಡೆ
ಪೋದು ಪಂಡೆರ್ ಎಂಕ್ಲೆನರಸುಲು ನಿನನ್ ಕಾಳಗೊಗು ||
ವೀರೆ ಅಂದ್‌ಡ ಬರೊಡು ಪಂಡ್‌ದ್
ಸಾರ್‌ದ್ ಪನಿಯೆರೆ ಎಂಕ್ಲು ಬತ್ತನೆ
ಬಾರಿ ದುಸ್ಪೆರ್ ಅಕ್‌ಲ್ ನಿನ್ನನ್ ಪಜಿಯೆ ತಿನುವೆರ್‌ಯ ||

5

ಬದುಕುವಡ ಈ ಓಡೆಗಾಂಡಲ
ಬಲಿಪುನವೆ ಎಡ್ಡೆಂದ್ ಸಾರ್‌ದ್
ಪನುಪೊ ನಿನ್ನಡ ಪಾಪೊ ಪುಣ್ಯೊನು ದಿಂಜ ನೆನೆತೊಂದು
ನಸೆನ್ ಕೊಂಡ್‌ನೆ ನಾಯಿಲೆಗ್ ಅವು
ನೆಸಲೆ ನಕ್ಕುವೊ ಪನ್ನಿ ಪಾತೆರೊ
ಸಮೋನೆ ಪಂಡ್‌ದ್ ಕೆಬಿತ ಕಂಡೆಗ್ ಹಾಕೈ ದೂತೆರೆಗ್ ||

6

ಪೆಟ್ಟ್ ತಿಂದ್‌ನ ದೂತನಾಕ್‌ಲ್
ಅಯ್ಯೊ ಸೈತ್ತೊನೆ ಪನ್ನಿ ಪಾರೈರ್
ಕಟ್ಟಿ ಕೋಟೆನ್ ತೂದು ದ್ರೋಣೆನೆ ತನನ್ ಪುಗರೊಂಡೆ ||
ಸುತ್ತ ತಿರ್ಗಿಯೆ ನಾಲ್ ರಂಗೊದ
ಸೈನ್ಯೊದಕಲೆಗ್ ದೈರೊ ಪಂಡ್‌ದ್
ಲೆತ್ತ ಪಂಡೆನೆ ದೂತನಕಲೆಡ ನಿಕ್‌ಲ್ ಧರ್ಮಜನ್ ||

7

ತೂದು ಗುರುಕುಲು ಚಕ್ರೊ ಕೋಟೆನ್
ಕಾಳೊಗದ ಕಳಟಾರ್ ಕಟ್ಟೆರ್
ಬೀಮ ಪಾರ್ತೆರ್ ನುರ್ಕುನಾಕ್‌ಲೆನಿತ್ತೆ ಕಡಪುಡೊಡು ||
ಈಯೆ ಪಂಡ್‌ದ್ ಬೇಕೊ ಬರೊಡುಂ -
ದಾಕ್‌ಲೆನ್ ಕಡಪುಡುದು ಕೋಟೆನ್
ಕಾತ್‌ದುಂತ್ಯೆನೆ ದ್ರೋಣೆ ಸುತ್ತಲ ತಿರ್ಗ್ ತಿರ್ಗೊಂದು ||

8

ದೂತೆ ಬತ್ತದ್ ಧರ್ಮನಂದನ
ಕಾರ್‌ಗಡೊನೆ ಬೂರು ಪಂಡೆನೆ
ದ್ರೋಣೆರೆನ್ನನ್ ಈರೆನಾಡೆಗ್ ಇತ್ತೆ ಕಡಪುಡನೆ ||
ಆರ್ ಮಲ್ತೆನ ಚಕ್ರೊ ಕೋಟೆಗ್
ಬೀಮ ಪಾರ್ತೆರ್ ನುರ್ಕಿಯೆರೆನೆ
ತೀರುನಕಲಂದಾಂಡ ಬರೊಡಿಗ್ ಪನ್ನೆರೆನ್ನಡನೆ ||

9

ಈತ್ ಪನ್ನುನ ಕೇನ್ ಧರ್ಮಣೆ
ಬಾರಿಯಸ್ಕದ್ ಚಾಕ್ರಿದಾಯನ್

ಪೋಯೆರೆಗ್ ಪಂಡೊಂದು ತೂಯೆನೆ ಪಾರ್ತೆ ಓಲ್ಲೆಂದ್ ||
ಆಯೆನೇ ಸಮಸಪ್ತಕೇರೆಡ
ಕಾಳಗೊಗು ಸಿರಿ ಕ್ರಿಷ್ಟನೊಟ್ಟಿಗೆ
ಪೋತೆ ಪನ್ನುನ ಸುದ್ದಿ ಕೇಂಡ್ ಚಿಂತೆ ಮಲ್ತೊಂಡೆ ||

|| ಅಬಿಮನ್ಯು ಲಡಯಿಗ್ ಪಿದಡಿಯೆ ||

ಧರ್ಮನಂದನೆ ತರೆಕ್ ಕೈ ದೀ-
ದಲ್ವ ಚಿಂತೆಡ್ ದ್ರೋಣ ಗುರುಕುಲು
ಕಟ್ಟಿ ಸೈನ್ಯೊದ ಕೋಟಿನುರ್ಕುನ ಗಟ್ಟಿಗರೆ ಮೂಲು ||
ಇದೈರೇರ್ಲ ಪಾರ್ತೆ ಕ್ರಿಷ್ಟನೇ
ಬುಕ್ಕೊ ಬಲರಾಮೆತ್ತೊ ಕೋಟೆನ್
ನುರುನಾಕ್ಲ್ ಪೊಡಿಯೆ ರಟ್ಟದ್ ಬರ್ಪುನಕ್ಲಿತ್ತೆ ||

1

ಬಾಲೆನೇ ಅಬಿಮನ್ಯು ನುರ್ಕುವೆ
ಆಂಡ ಪಿರ ಬರೈರೆಗ್ ತೀರಂ -
ದಾಯೆ ಕೆಡಗುವೆ ಬೇತೆ ಏರೆನ್ ಯಾನ್ ಕಡಪುಡೊಲಿ ||
ದ್ರೋಣೆರೆನವೇ ಚಕ್ರ ಕೋಟೆಗ್
ಏರ್ಲಾ ನುರ್ಕಿಯೆರೆಗಿದ್ದಿಡ
ಸೋಲ್ತಿ ಲೆಕ್ಕೊನೆ ಪನ್ದ ಬೇಜರೊಡಿತ್ತೆ ಧರ್ಮಜೆನೆ ||

2

ಅಪಗನೇ ಅಬಿಮನ್ಯು ತೂನಗ
ಬುಲುಪುವೆರ್ ನೇಲ್ಯಮ್ಮೆರೆಂದ್
ಕಯಿತ್ತಲ್ಡ ಉಂತೊಂದು ಕೇಂಡೆನೆ ದಾಯೆ ಬುಲ್ಪುವರ್ ||
ನೆರಿಯೆರೋ ಏರಾಂಡಲೀರೆನ್
ಲಡಯಿಡೇರ್ಲ ಕಂಡ್ ದಾಕ್ಯೆರೊ
ಪನ್ಲೆ ಎನ್ನಡ ಪನ್ದ ಕಾರ್ಗ್ ಅಡ್ಲೊ ಬೂರೊಂಡೆ ||

3

ಕಾಳಗೊದ ಕಳಟಿನಿಯೆ ಗುರುಕುಲು
ಸೇನೆಡೇ ಮಹ ಚಕ್ರ ಕೋಟೆನ್
ತಾನೆ ಮಲ್ತ್ದ್ ನುರ್ಕುನಾಕ್ಲ್ ಬರಡ್ ಪಂಡೊಂದು ||
ದೂತನೇ ಕಡಪುಡುದೇರೀಡೆಗ್
ಪಾರ್ತೆ ಇದೈನೆ ಏರೆನೇನೀ
ಕೋಟೆ ನುರ್ಕರೆ ಇತ್ತೆ ಕಡಪುಡುವೆಂದ್ ದುಕ್ಕಾಂಡ್ ||

4

ದುಕ್ಕೊ ಮಲ್ತಡೆ ಈರ್ ಎನ್ನನ್
ಚಕ್ರ ಕೋಟೆನ್ ಪೊಡಿಯೆ ರಟ್ಟದ್

ಬರೈರೆಗ್ ಕಡಪುಡುಲೆ ಪನ್ನಗ ಧರ್ಮನಂದನೆ ||
ಎಲ್ಯಯೆನೆ ಈ ಮಲ್ಲ ಕೆಲಸೊಗು
ನುರುನವು ಸರಿಯತ್ತ ಮಗ ನಿನ
ಅಪ್ಪೆ ನೆರೆಯಲೊ ಪಾರ್ತೆ ಮನಿಪಂದಿತ್ತೆ ಕುಲ್ಲುವೆನೊ ||

5

ವಾಸುದೇವನ ಮೆಗಿದಿಗನ್ನವೆ
ಪೋಡಿಗನೆ ಆದಾಂಡ ಲೋಕೊಡು
ಏರೆನಪ್ಪೆಗ್ ಮಗನ ದೈರೊನೆ ಬರುವೊ ಪನ್ಲೆನಡ ||
ವೀರೆನೇ ಯಾನ್ಂದ್ ಅಮ್ಮೆರ್
ಏಶ್ಲಾ ಪುಗರುವೆರ್ ಎನ್ನನ್ |
ಈರ್ ಕಡಪುಡಿ ನಮನ ಗೇಲ್ಗ್ ಕಾಳಗೊದ ಕಳಕ್ ||

6

ಕರೈ ಸಕುನಿಲ ಆ ಜಯದ್ರತೆ
ಸಲೈ ಮಾತೆರ್ ಚಕ್ರ ಕೋಟೆನ್
ನುರುನಕ್ಲೆಡ ಲಡಯಿಗುಂತ್ತೆರ್ ನಿಕ್ಕ ಪೋಡ್ಯೆಯೆರ್ ||
ಪಿಲಿತ ಕಿನ್ನಿಯೆ ಏಡ್ ಕುರಿಕುಲೆ
ಪಡೆಕ್ ಪೋಡೈರೆ ಉಂಡೊ ಯಾನೇ -
ಪಲುಗುಣನ ಮಗೆಯಾದ್ ಪೋಡೈನೊ ಕೊರೈ ಅಪ್ಪಣೆನ್ ||

7

ರಾಜ್ಯೊದಾಸೆಗ್ ಧರ್ಮನಂದನೆ
ಬಾಲೆನೇ ವೈರಿಲೆನ ಬಾಯಿಗ್
ನೂಕ್ಕೈ ಪಂಡ್ ದೂರೈರೆನ್ನನ್ ಪೋಪುನವು ಬೊಡ್ಡಿ ||
ಯಾನ್ ಜೈತ್ತದ್ ಬತ್ತೆಡೆನ್ನನ್
ದೂರ್ನಾಕ್ಲೆ ಪುಗರುವೆರ್ ನಿಜೊ
ದಾಲ ಏಚನೆ ಬೊಡ್ಡಿ ಲಡಯಿಗ್ ಪೋಪೆ ನೇಲ್ಯಮ್ಮೆ ||

8

ಆಂಡಲಾ ಈ ಪೋಪುನವು ಸರಿ -
ಯಾದ್ ತೋಜುಜಿ ಎಂಕ್ ಮಗ ನಿನ-
ನೇನ್ ಪೋಯೆರೆ ಪನ್ನುಜಿಂದೇ ಮೋನೆ ತಿರ್ರಾಯೆ ||
ಈರ್ ಪಣಯರ್ ಯಾನೆ ಪೋವೆಂ-
ದಾಯೆ ಪಿದಡುನ ತೂದು ಧರ್ಮಜೆ
ಆಂಡ್ ಮಗ ಜಾಗ್ತೆ ಸಾಯೊಗು ಸೇನೆ ಕಡಪುಡುವೆ ||

9

ಕಾರ್ಗಡ್ಲೊನೆ ಬೂರ್ದು ಪಿದಡಿಯೆ
ವೀರೆನಾ ಅಭಿಮನ್ಯು ಸೆಡಿಲ್ದ
ಸೂತಚಿಂಡ್ ದಲೆಕೊನೆ ರಟ್ಟಿಯೆ ಬೀಮೆನಾಪಗನೆ ||
ಪಾರ್ ದತ್ತಿಯೆ ಸೇನೆದಕ್ಲೆನ್
ಕೂಟೊನುಂದೇ ಅಪಗ ಸಾರತಿ
ತೇರ್ಗೇ ಕುದುರೆಲೆನ್ ಒಡ್ಡದ್ ಕಟ್ಟೊಂತಾಯೆ ||

|| ಅಭಿಮನ್ಯುನಾ ಮರಣೊ ||

ಬೇರಿವಾದ್ಯೊ ನಗಾರಿ ಕೊಂಬುದ
ಬಾರಿ ಬೊಬ್ಬೆಡ್ ತೇರ್‌ನೇರಿಯೆ
ವೀರ ಪಾತನ ಮಗನೆ ಆ ಮಹ ವೀರನಭಿಮನ್ಯು ||
ಸಾದಿ ಬುಡಿ ಜಯ ಸಿರಿನ ಮದಿಮಯೆ
ವಾಸುದೇವನ ಕಾಸ ಅರ್ದದೆ
ಮೂಜಿ ಲೋಕೊಡು ಕೀರ್ತಿ ಪಡೆಯಿನ ಸವ್ಯ ಸಾಚಿ ಮಗೆ ||

1

ತೇರ್‌ನೇರ್‌ದ ಬರ್ಪೆ ಪಂಡ್‌ದ
ಪಾಟಕೆರ್ ಸರಿ ಬೊಬ್ಬೆ ಪಾಡ್ಯೆರ್
ಸಾರತಿಯೆ ಕುದುರೆಲೆಗ್ ಚಾಟೆಡ್ ಹಾಕೈ ನಾಲ್ಕಾಲ್ ||
ನಾಲ್ ಬಕ್ಕರ್‌ಡವ್ವೆ ಲಾಗೊಡು
ರಾದ್‌ಪೋನಗ ದಾನೊ ಗ್ರೆಯ್‌ದ
ತೇರ್‌ನುಂತಯೆ ಕುದುರೆಲೆನ ಕಡಿಯಣೊನು ಒಯ್ಯೊಂದು ||

2

ಎಲ್ಯ ಪಿರಯೊದ ಬಾಲೆ ಈಯೇ
ಚೆಕ್ಕೊ ಕೋಟಿನ್ ನುರ್ಕವನ ಪನ್
ಅಲ್ಯ ಏರೇರುಲ್ಲೆರ್‌ಂದ್‌ದ್ ನಿಕ್ಕ್ ತೆರಿದ್‌ಜೊಯೆ ||
ಸಲ್ಯ ಬೂಪತಿ ಆ ಜಯದ್ರತೆ
ದುಸ್ಸ ದುಸ್ಯಾಸನೆನೆ ಸಕುನಿಲ
ಉಲ್ಲೆರೇತ್‌ಲ ಕೋಟೆದುಲಯಿಡ್ ಪಂಡೆ ಸಾರತಿಯೆ ||

3

ಗುರುಕುಲುಲ್ಲೆರ್ ಕೋಟಿ ಸುತ್ತಲ
ತಿರುಗುವೆರ್ ಓ ಬಾಲೆ ನಿಕ್ಕೇ
ಪಿರಯೊ ಏತಾಂಡ್‌ಂದ್ ಗೆರೆತೊನು ಕೋಟಿ ನುರ್ಕಿಯೆರೆ |
ಪನ್‌ಪುನೆನ್ ಕೇನೊಂದು ಲಾಗಿಯೆ
ರತೊಡುದಾಯೆನೆ ಸಾರತಿನ ತಿರ್-
ತೊಯಿತ್ ಪಾಡ್‌ದ್ ಕಣ್ಣೆ ಮಗ್ತರ್‌ದಯನ್ ತೂವೊಂದು ||

4

ಕೇನ್ ಸಾರತಿ ಎನ್ನ ಎದುರುಗು
ಏರ್ ಬರ್ವೆರ್ ಹರೆನೊ ಬ್ರಹ್ಮನೊ
ಜೂವೊನೊಯ್ಪುನ ಯಮನೊ ಅತ್ತಡ ಕ್ರಿಷ್ಟೆ ಪಾರ್ತೆರೊಯೆ ||
ಯಾನ್ ಮಲ್ಪಯೆ ಗಣ್ಯೊನಕ್‌ಲೆನ್
ದ್ರೋಣೆರತ್ತಡ ಕೌರವಾದಿಲು
ಮಾದ್ರ ಮಾಗದನಕ್‌ಲ್ ಬತ್ತೆರಡೆಂಕ್ ವಾಲೆಕ್ಕೊ ||

5

ಎಡ್ಲೆ ಪಾತೆರೊಡಿತ್ತೆ ತೇರ್‌ದ
ಮಿತ್ತ ಮಿತ್ತರ್‌ದ್ ಕುದುರೆ ದೇರ್‌ಲ
ಇದ್ದಿಡನೆ ನಿನ ತರೆನ್ ಕಡ್ಡಾದ್ ತೇರ್‌ಗ್ ಬಲಿ ಕೊರ್ದೆ ||
ಬಿರ್ರೆರ್‌ಗ್ ಪುಟ್ಟನವೆ ಜೋಕ್ಲೆಗ್
ಬುದ್ಧಿ ಕಮ್ಮಿಯೆ ಪನ್ನಿ ಪಾತೆರೊ
ಸತ್ಯೊ ಪಂಡೊಂದಾಯೆ ನೆನೆತ್‌ದ್ ದೇರೈ ಕುದುರೆಲೆನ್ ||

6

ತೇರ್ ಕೋಟೆದ ಸುತ್ತ ತಿರ್ಗದ್
ಬಾಕಿಲ್‌ದ ಎದುರುಂತ್‌ನೇನ್‌ಲ
ವೀರ ಸೈಂದವೆ ತೂದು ಸಾದಿಗ್ ಅಡ್ಲೊ ಉಂತಿಯೆನೆ ||
ಪಾರ್ತನಾ ಮಗೆ ಬಿಲ್ಲೆಗೇ ಸರಿ
ಬಾಣೊ ಕೊಲ್ಲದ್ ಹಾಕೈನಪಗನೆ
ಆ ಜಯದ್ರತೆ ತರೆನೆ ತಿರ್ಗದ್ ಬೂರೈ ಕಂಕಣೆನೆ ||

7

ಸುತ್ತ ತಿರ್ಗದ್ ರಾವುತೇರೆನ್
ಮಗ್ತ ಪಾಡ್‌ದ್ ಆನೆಲೆನ್‌ಲಾ
ಕೆರ್ದ ತೇರ್‌ಲೆ ಪೊಡಿಯೆ ರಟ್ಟದ್ ಬುಕ್ಕೊ ಕಾರ್‌ಡೆನ್ ||
ಕುಟ್ಟೆ ಕೊರ್ದುಲ ನಡುಕು ಎತ್ತೈನೆ
ಅಲ್ಯ ದುರೈದನನ್ ತೂನಗ
ನೆತ್ತಿಗೇರ್‌ದ್ ಕೋಪೊ ಬಾಣೊಲೆ ಬರ್ಸೊ ಜಪುಡಾಯೆ ||

8

ಅಣ್ಣಗಾಕುವೆ ಪನ್ದಲಾಯನ
ಮೆಗ್ಗನಾಕ್‌ಲ್ ಎದುರು ಬತ್ತೆರ್
ಬಿಲ್ಲೆ ದೆರ್ತ್‌ದ್ ಬಾಣೋ ಬುಡಿಯೆರ್ ಸುತ್ತ ಉಂತೊಂದು
ಬತ್ತಿ ಬಾಣೊಲೆ ತುಂಡು ರಟ್ಟದ್
ಅಕ್ಷಯಾಸ್ತೊನು ಬುಡ್ಡ್ ಸಾತ್‌ಗ್
ಮಿತ್ತ ತಿರ್ತಾಂಡಕ್‌ಲೆ ಉಸುಲೇ ಬೂರ್ದು ಪುಡೆರಿಯೆರ್ ||

9

ಬಾಲೆನಾ ಬೆರಿಸಾಯೋಗೇನೇ
ಪೋಪೆ ಪಂಡ್‌ದ್ ಬೀಮೆ ನುರ್ಕವನ
ಗಾಪಗನೆ ಬಾಕಿಲ್‌ಡ್ ಸೈಂದವೆ ತಲಿತ್‌ದುಂತಾಯೆ ||
ದ್ರೋಣನಾಚ್ಚೆಡ್ ಕರ್ಣ ಸಲೈರ್
ಸೌಬಲಾದಿಲು ಪಾರ್ ಬತ್ತದ್
ಪಾರ್ತನಾ ಮಗನಲ್ಪ ಸೋಲ್ಪಯೆರಾದ್ ಪುಣೆವೊಂದು ||

10

ಪೆಟ್ಟೆ ತಿನ್ನುನ ತೂದು ದ್ರೋಣೆನೆ
ಬತ್ತೆದೆದುರುಗು ಉಂತುದೇ ಅಭಿ-

ಮನ್ಯುನೇ ಪುಗರೊಂದು ಪಂಡೆನೆ ಬಾರಿ ಬಿಸೆಂದ್ ||
ಎಲ್ಯ ಪಿರಯೊದ ಬಾಲೆ ಈಯೇ
ಚಕ್ರ ಕೋಟಿಗ್ ನುಕ್ಯ ಸೈ ಸೈ
ಸಯ್ಯಡಾ ಮಗ ಪೋಲ ಮುಲ್ಲಡಿತ್ತೆ ಬಲಿತೊಂದು ||

11

ಬಲಿಪುನಾಯೆನ ಯಾನ್ ಗುರುಕುಲೆ
ಪಲುಗುಣಗ್ ಪುಟ್ನಯೆ ಈರೆನ
ಬಿರಸತಿಗೆ ಯಾವುಂದು ಬುಡಿಯೆನೆ ಬಾಣೊ ದ್ರೋಣಗ್ಲ ||
ಪಗರಿ ವಿದ್ಯೆನ್ ಕಲ್ಪವನ ಗುರು
ಪಗರಿತಾಗ್ದೆ ಬೂರೈನಲ್ಲನೆ
ಅಪಗ ಬತ್ತೆರ್ ಅತಿರತೆರ್ ಮಾರತೆರ್ ಎದುರಾದ್ ||

12

ಬತ್ತನಕಲೆನ್ ಪೊಡಿಯೆ ರಟ್ಟದ್
ದುಸ್ಸು ದುರೋದನನ್ ಬಾಣೊಡು
ಕಟ್ಟ್ ಪಾಡ್ಡ್ ಕೇಂಡೆ ಜುಗರಿದ ಮಂಡೊ ನಿನಡುಂಡೊ ||
ಕೆರುಜಿಯೆ ನಿನನಿತ್ತೆ ಬೀಮೆನೆ
ನಿನ್ನ ತುಡೆ ಪೊಲಿಪೆಂದ್ ಬಾಸೆನ್
ಪಾಡ್ಡೆನ್ ಆ ಬಾಸೆ ನಡಪೆರೆ ಬುಡುವೆ ತೆರಿಯೊನುಲ ||

13

ಬಾಣೊಡಾಯನ್ ದೂರೊ ರಟ್ಟದ್
ಆನಗನೆ ದುಸ್ವಾಸೆ ತೋಜಿನ -
ಗಾಯನವೆ ಜುಟ್ಟಿಯ್ ಪತ್ತಾದ್ ತಿಗಲೆಗೊದೊಂದು ||
ದೇವಿ ದ್ರಾಪದಿ ಎನ್ನವೇ ನಿಜೊ
ಪ್ರೀತಿದಪ್ಪನೆ ಆರೆ ಸೀರೆನ್
ಮೂರ್ಕ ಈ ಸಬೆಟೊಯ್ತು ನಿನ್ನನ್ ಯಾನ್ ಕೆರುಜಿಯೆ ||

14

ನಿನ್ನ ಕರ್ಲನ್ ಒಯ್ಯದಪ್ಪನೆ
ಜುಟ್ಟುಗೇ ಮುಡಿಪಾವೆ ಪಂಡ್ಡ್
ಎನ್ನನೇ ನೇಲ್ಯಮ್ಮೆ ಆಜೊನು ಪಾಡ್ಡ್ ಕಾಪುವೆರ್ ||
ಕೆರೈರಾರೇ ಪನ್ದ್ ಬಿಲ್ಲಡ್
ಕುಡ್ತು ರಟ್ಟದ್ ತಿರ್ಗ್ ತೂನಗ
ಸಲ್ಯ ಕರ್ಣೆರ್ ಓಂಗುದಿತ್ತೆರ್ ಆಯಗಾಕಿಯೆರೆ ||

15

ಬಾಣೊಡಕಲೆಗ್ ಹಾಕ್ದಾವೆಕ್
ದೂರೊ ರಟ್ಟದ್ ಕಡತ ಕಾಲೊದ
ಕಾಲ ಬೈರವ ನಾಟ್ಯೊ ಗೊಬ್ಬಿಯೆ ಅತಿರತೆರೆನೆದುರು ||
ದ್ರೋಣೆನೆದುರುಗು ತಿಕ್ಕಿ ಸಾತ್ಗ್
ಸ್ವಾಮಿ ಗುರುಕುಲೆ ಈರ್ ಕಲ್ಪಿಯೆ
ಜೋಕುಲೆಗೆ ಎದುರುಂತಿ ವಿದ್ಯೆನ್ ಏರ್ ಕಲ್ಪಿಯೆರ್ ||

16

ಯಾನ್ ಈರೆನ ಸಿಸೈ ಅತ್ತಯೆ
ದಾಚಿನೊಡು ಬುಡಿಯೆರೆಗ್ ಈರೆನ್
ಬೀಮ ಪಾತೆರ್ ನಮನೆಡೆಂಕೇ ದಾಲ ಹಂಗಿದ್ದಿ ||
ಈತ್ ಪಂಡ್ಡ್ ಬಿರುನು ದೆರ್ತದ್
ಬಾಣೊ ರಟ್ಟಯೆ ಗುರುನ ಮುಂಡೊಗು
ದ್ರೋಣ ಮುಂಡೊನೆ ಪುಡದ್ ನೆತ್ತೆರ್ ಅರಿನೆನುದೊಂದು ||

17

ಕರ್ಲನೇಪೆಕ್ ಲೆತ್ತದಾಯಡ
ಗುಟ್ಟುಡೇ ಈ ಹುಡುಗೆ ಬಿಲ್ಲನ್
ಪತ್ತದುಂತ್ಯೆಡ ಸಿವಗ್ ಸಾಧ್ಯೆನೆ ಇದ್ದಿ ಗೆಲ್ಲೆರೆಗ್ ||
ಮೆಲ್ಲ ಪಿರವುಡೆ ಪೋದು ಬಿಲ್ಲನ್
ಪೊಲ್ತು ರಟ್ಟಲ ಪನ್ದ್ ತೆರಿಪನ-
ಗಲ್ಪ ಕರ್ಣೆನೆ ಪಂಡೆ ಗುರುಕುಲೆ ಪನಡೆ ಎನಡೀರ್ ||

18

ಗಾತಕೊಡು ಅಭಿಮನ್ಯುನೇ ನಮೊ
ಸೋಲ್ಪಯೊಡ ನಮಕವ್ವೆ ದೋಸೊನೆ
ಆವು ದುಂಬುಗು ನಂಕಲಪಜಯೊ ಬರುವು ಕಂಡಿತೊನೆ ||
ದಾನೆ ಪನ್ನಯ ಕರ್ಣ ನಮೊ ಇನಿ
ಏರೆಗಾದೇ ಕಾದುನೆಂದ್ಡ್
ಈಯೆ ಗೆರೆತೊನು ಪಾಪೊ ಪುಣ್ಯೊಗ್ ಬಾದ್ಯೆ ಕೌರವೆನೆ ||

19

ನಮೊನೆ ಮಲ್ತನ ತಪ್ಪು ಒಪ್ಪುಗು
ಹೊಣೆನೆ ಕೌರವೆ ನಂಕ್ ಉಪ್ಪುನೆ
ಲಡಯಿಡೇ ಗೆಲ್ಪುನವೆ ಹೊಣೆ ತೆರಿದಿತ್ತೆ ಬಿರುಪೊಲಿಪು ||
ಗುರುಕುಲೇ ಪಂಡ್ಡೆನ್ ಕರ್ಲನೆ
ಪಿರವುಡೆನೆ ಓಂಗೊಂದು ಕಡೆನೆ
ಬಿರುನುಲಾ ಅಭಿಮನ್ಯು ಪತ್ತನ ಮಲ್ಲ ಕೋದಂಡೋ ||

20

ಕಳ್ಳ ಕಡ್ಡನ ಬಿರುನು ಕಂಡ್ಡ್
ಕರ್ಲ ನಿನ್ನವೆ ಜಾತಿ ಸುಬವೊನು
ಎನ್ನಡನೆ ತೋಜಾಯ ಉಂತಲ ನಿಕ್ಕ ಕಲ್ಪಾವೆ ||
ಅಲ್ಪನೇರತೊ ಪೊಲಿದ್ ಬೂರ್ಡ್ಡನ
ಚಕ್ರೋನ್ಯೊತ್ತಾದ್ ಕರ್ಣಗಾಕಿಯೆ
ಬುಕ್ಕೊ ಎದುರುಗು ತಿಕ್ಕಿ ವೀರೆರ್ ತರೆನ್ ಪೊಡಿಮಲ್ತೆ ||

21

ಸಕುನಿ ಸಲೈನೆ ಕೌರವಾದಿಲು
ದುರುಳೆರಕಲೆನ ನೂದು ಬಾಲೆಲು

ಎದುರು ಬತ್ತೆರ್ ಚಕ್ರೊ ತುಂಡುಡೆ ಹಾಕ್ ಹಾಕೊಂದು ||
 ಕುರುಡ ಸಂತಾನೊದವೆ ಕೊಡಿಪುದ
 ಬಿದೆನ್ ಮುತ್ತಯೆ ಕೌರವಾದಿಲು
 ಪಿರವುಡುಂತುದು ಹಾಕಿ ಪೆಟ್ವೆಡ್ ಬೂರೈನಭಿಮನ್ಯು ||

22

ನೂದು ಜೋಕುಲೆ ಪುಣತ ಮೇಲ್ಡ್
 ಬೂರುಲ್ಲಾಯನ ಆತ್ಮೋನೇ ಸರಿ
 ಮೇಲ್ ಲೋಕೊಗು ಪೋನಗನೆ ಆಂಡಪಗ ಕತ್ತಲೆನೆ ||
 ಬಾಲೆದಾ ಪುಣ ತೂವಯೆಂದ್
 ಸೂರೈ ಪಡ್ಡೊಯಿ ಕಡಲ್‌ದುಲಯಿಡ್
 ಸೇರ್‌ದುಂತಿಯೆ ವಿಶ್ವ ಚೇತನೊಡಿದ್ಡಿ ಮಮ್ಮುಮಣು ||

|| ಅರ್ಜುನನ ಎತೆ ||

ಕೆರ್ದಲಾ ಸಮ ಸಪ್ತಕೇರೆನ್
 ಅರ್ಜುನನೆ ರತೊನೇರ್‌ದಾನಗ
 ದುಸ್ವ ಸಕುನೊನೆ ತೋಜಿನಪಗನೆ ಕ್ರಿಷ್ಣ ಸ್ವಾಮಿಡನೆ ||
 ಎನ್ನ ಬಲತವೆ ಕಣ್ಣ ರಟ್ಟೆದ್
 ಜಪ್ಪುನಾ ನೀರ್‌ನಾಲ ಕುದುರೆಲೆ
 ಕಣ್ಣೆಡ್‌ಲ ನೀರರಿಪುನೆನ್ ತೂದೆಂಕ್ ಅಲ್ಮಾನೋ ||

1

ಗುರುಕುಲಣ್ಣನ್ ಕಟ್‌ದ್ ಕೊನೊಯೆರೊ
 ಪಡೆನ್ ಗೆಲ್ಲೆರೊ ಕೌರವಾದಿಲು
 ಪಿದಡ್‌ದೆನೊ ಅಭಿಮನ್ಯು ಕಾಳಗೊ ಕಳಕ್ ನುರ್ಕಿಯೆರೆ ||
 ಮನಸ್‌ಡೆಂಕಾಂಡಿತ್ತೆ ತಲಮಲೊ
 ರತೊನು ತಿರ್ಗಲ ಸಿಬಿರೊದಾಡೆಗ್
 ಪನುಪುನೆನ್ ಕೇನೊಂದು ಕ್ರಿಷ್ಣನೆ ತೇರ್ ತಿರ್ಗಾಯೆ ||

2

ತೇರ್ ಸಿಬಿರೊದ ಉಲಯಿ ಬನ್ನಗ
 ಮಾತೆರ್‌ಲ ಬುಲ್ಲೊಂದು ಅರಬಯಿ
 ದೀಡ್‌ನಾಪಗ ದಾನೆ ಆಂಡ್‌ಂದಿತ್ತೆ ಬುಲ್ಲೆರೆಗ್ ||
 ಏರ್‌ಲಾ ಮನಿತ್‌ಜೆರ್ ಪಾರ್ತಡ
 ಸೇಂಕ್ ಸೇಂಕ್‌ದ್ ಬುಲ್ಲುನೆನ್ ತೂ-
 ದಾಯೆ ಕೇಂಡೆನೆ ಎದುರು ತೋಜಿನ ಮಗನ ಸಾರತಿಡ ||

3

ಪನುಪುನೆಂಚಿನೆತ್ತೆ ಕಾಳಗೊ
 ಕಳಟ್ ದ್ರೋಣೆರ್ ಚಕ್ರಕೋಟೆನೆ

ಬಲೊಟು ಕಟ್ಟೆರ್ ಕೋಟಿ ನುರ್ಕುನ ವೀರೆರೊಂಡು ||
 ಬರಡ್ ಪಂಡ್‌ದ್ ಜನೊನು ಈಡೆಗ್
 ಕಡಪುಡ್‌ನ ತೆರಿಯೊಂದು ಧರ್ಮಜೆ-
 ರಪಗ ಬೇಜರೊಡ್‌ತೆರೀರೇ ಇದ್ಯರ್‌ಂದಲ್ಲ ||

4

ಕೋಟಿ ನುರ್ಕೆರೆ ತೀರುನಾಕ್‌ಲ್
 ಏರ್ಲ ಇದ್ಯೆರೆ ಪನ್ದ್ ಬೇಜರೋ -
 ಡಾರ್ ಉಪ್ಪುನಗಪಗ ಈರೆನ ಮಗೆನೆ ಅಬಿಮನ್ಯು ||
 ತಾನ್ ಪೋಪೆಂದೇತೊ ಹಟೊತಾ
 ಸಾದನೆನ್ ಮಲ್ಪುನಗ ಪಂಡರ್
 ಬಾಲೆ ಈ ಪೋಪುನವು ಸರಿತಯತ್ತೆಂದ್ ಪನ್ನಗನೆ ||

5

ತಲಿಪಡೆನ್ನನ್ ಪಣ್ಡ್ ಪಿದಡ್‌ನ
 ಮಗನ ಬೆರಿ ಸಾಯೊಗುಲ ಸೇನೆನ್
 ಕಡಪುಡಿಯೆರಾ ಧರ್ಮರಾಯೆರ್ ಸ್ವಾಮಿ ಮಗನೊಟ್ಟು ||
 ರತೊನು ಏರ್‌ದ್ ಪಿದಡ್‌ನಾಯಗ್
 ತೆರಿಪಯೆನೆ ಯಾನೇತೋ ಕೋಟೆಡ್
 ಬರ್‌ಪಿ ಗಂಡಾಂತ್ರೊಲೆನ್ ಆಯಗ್ ಆಂಡ ಕೇನ್‌ಜೆನೆ ||

6

ಕೋಟಿ ನುರ್ಕುದು ಕೌರವಾದಿಲೆ
 ಸೇನೆ ಪೊಡಿ ಪೊಡಿ ರಟ್ಟಿದಾಯೆನೆ
 ವೀರ ಕರ್ಣಗ್ ಸಕುನಿ ಸಲ್ಯಗ್ ದ್ರೋಣ ಗುರುಕುಲೆಗ್ ||
 ಹಾಕ್ ಹಾಕ್‌ದ್ ಕೆರೈ ಕೌರವ -
 ನಾಕ್‌ಲೆನ ಬಾಲೆಲೆನ್ ಅಪಗನೆ
 ಮೋಸೊಡಾಯನ ಬಿರುನು ಕಡ್ಡ್‌ದ್ ಕರ್ಲೆ ಸೋಲ್ಪಯೆನೆ ||

7

ರತೊತ ಚಕ್ರೊನು ಪೆಜೆದ್ ಹಾಕ್ಯೆನೆ
 ಅತಿರತೆರೆ ಮಾರತೆರೆ ಜೂವೊನು
 ಯಮನ ಪಾಸೊಗು ತಿಕ್ಕಯೆನೆ ಆ ವೀರೆನೀರೆ ಮಗೆ ||
 ದುರುಳೆರೊಟ್ಟುಗು ಸೇರ್‌ದಾಯನ್
 ಕೆರಿಯೆರೇ ಪಂಡೊಂದು ಬುಲ್ಲುದು
 ಪುಡೆರ್‌ನಾಯನ್ ದೆರ್ತ್ ಲಕ್ಕದ್ ತಿಗಲೆಗಾಕೊಂಡೆ ||

8

ಅಯ್ಯೊ ಮಗನಿನ ಪೊರ್ಲು ತೂಯೆರೆ
 ಎನ್ನ ಕಣ್ಣೆಗ್ ಮಣ್ಣೆ ಪಾಡೈರೆ
 ನಿನ್ನವೇ ಗುಣೋ ಕೀರ್ತಿ ಪನ್ನುನ ಯೋಗೊ ಎಂಕಿದೈ ||
 ಜಿಷ್ಟು ಬುಲ್ಲುನ ತೂದು ಕ್ರಿಷ್ಣಲ
 ಠಕ್ಕಡೇ ಕಣ ನೀರ್‌ನರಿಪದ್
 ಬುಲ್ಲುಡರ್ಜುನ ಪಗೆನ್ ಬೂಟುಗೊ ಕೌರವಾದಿಲೆನೆ ||

9

ಇಸ್ಲೊ ರೂಪೊನು ತೂಯಿ ನಾಯಗ್
ಸೈತ್ತಿ ದುಕ್ಕೊನು ಮರಪಿಯೆರೆಗೆ
ಪೊರು ಏತ್ಲ ಬೊಡ್ಡಿ ಮಾಯೊದ ಬಲ್ಲ ಕಡಿಯೆರೆಗ್ ||
ಬುಕ್ಕೊ ಬತ್ತಾದ್ ಬುಲ್ಲದೇ ಮತಿ-
ತತ್ತಾದ್ನ ಧರ್ಮಜನ್ ತೂದುಲ
ಮಲ್ತನಾರೆಕಿ ತಾನ್ ಸಮದಾನೊನುಲ ಪಂಡೊಂದು ||

10

ಈಪೆಕ್ಡಾಲಾ ಬೀಮೆ ಬುಲ್ಲುನ
ತೂದು ಪಾರ್ತೆನೆ ಕ್ರಿಷ್ಟನೊಟ್ಟಿಗೆ
ಪೋದು ಉಂತಿಯೆನಪಗ ಬೀಮೆನೆ ತರೆಕ್ ಹಾಕೊಂದು ||
ದಾನೆ ಪನ್ನುನೆ ಮೆಗ್ಗ ಯಾನೇ
ಆಯ ಪಿರವುಡೆ ಪೋದು ಕೋಟೆದ
ಬಾಕಿಲ್ಗ ಎತ್ತನಗ ಸೈಂದವೆ ಆನೆ ಕುದುರೆಲೆನ್ ||

11

ಎದುರು ಉಂತದ್ ಲಡಯಿ ಮಲ್ಪಯೆ
ಪಿದಯಿಡೇ ಯಾನೊರಿಯೆನಾಪಗ
ಉಲಯಿಡಿಂಚಿನ ಮೋಸೊ ಮಲ್ತರೆ ಕರ್ಣೆ ದ್ರೋಣೆರಾಲ ||
ಪನುಪನೆನ್ ಕೇನೊಂದು ಪಾರ್ತೆನ್
ಬುಲುಪಡಯೆ ಓ ಬೀಮೆ ಎನ್ನವೆ
ಮಗನ್ ಕೆರೆರೆ ಸಾದಿ ಮಲ್ತನ ಸೈಂದವನ್ ಯಾನ್ ||

|| ದ್ರೋಣಾರ್ಜುನೇರ್ ಎದುರೆದುರಾಯೆರ್ ||

ಪಾರ್ತೆ ರಾತ್ರೇಡ್ ಬಾಣೊ ದೀಪುನ
ಕೋಣೆದುಲಯಿಡ್ ದೀಪೊ ದೀಡ್ಡಾದ್
ತಾನ್ ಪತ್ತುನ ಆಯುದೊಲೆ ಸರಿ ಸಾಲ್ಡುಂತಾದ್ ||
ಗಾಂಡಿವೊನು ಮೂಡಿಗೇನ್ ಕವಚೊನು
ಸೀಸಕೊನುಲಾ ಬುಜೊ ಕಿರೀಟೊನು
ದೀಡ್ಡ್ ದೂಪೊನು ಕೊರು ಪೂಜೆನ್ ಮಲ್ತೆ ಮಹವೀರೆ ||

1

ನೆತ್ತೆರ್ದ ಆವರೊನು ಕೊರೈನೆ
ರುದ್ರ ಗಣೊಕುಲೆ ಜಪೊನು ಮಲ್ತಾದ್

12

ಎಲ್ಲೆ ಉದಿತ್ನ ಸೂರೈ ಕಡಲ್ಗ್
ಮುರುನೇಕ್ ದುಂಬೇನ್ ಆಯನ್
ಕೆರೈಡನೆ ಸೂತಗ್ಗಿ ಕುಂಡೊಗು ಬೂರೈ ಕಂಡಿತೊನೆ ||
ಕರೈ ದ್ರೋಣೆರೆನೇನ್ ದೀಡಯೆ
ಕ್ರಿಷ್ಟನೆದುರುಡೆ ಆಜೊಪಾಡುವೆ
ಪನ್ದ್ ಬೀಮನ ಕಣ್ಣ ನೀರ್ನ್ ಉದೈ ಬೈರಸಡ್ ||

13

ಯುದೊಡೇ ಅಭಿಮನ್ಯು ಸೈತ್ತನ
ಸುದ್ದಿ ಕೇಂಡ್ ಉತ್ತರೆಗ್ ಮತಿ
ಇದ್ದಿಲಾಯನ ಅಪ್ಪೆ ಬುಲ್ಲುನು ಏರ್ ಉಂತವೆರ್ ||
ಕ್ರಿಷ್ಟೆ ಸಮ್ಲೆ ಪಾರ್ತೆ ಅಮ್ಮೆನೆ
ಮಲ್ಲ ಸಗ್ಗಿದ ಬೀಮೆನೇ ನೇ -
ಲೈಮೈನಾ ಸಹದೇವ ನಕುಲೆರ್ ನಿನನ್ ಗೊಬ್ಬಯಿನ ||

14

ಪ್ರೀತಿದಾ ಸಿದ್ಯಮನಾಕ್ಲ್
ಕಾಳಗೊಗು ಪೋಪುನವು ಬೊಡ್ಡಿಂ -
ದೇರ್ಲಾ ಪಂಡ್ಚೆರೆ ಸಿವ ಸಿವ ಬಂದುಲೇರುಂಡು ||
ಆ ಸುಬದ್ದೆನೆ ಬುಲ್ಲು ಬುಲ್ಲುದು
ಬೂರ್ನಾಲೆಗ್ ಕ್ರಿಷ್ಟೆ ಮಾಯೊಡು
ಪ್ರೀತಿದೇ ಸಮದಾನೋ ಪನ್ನಗ ಲಕ್ಡ್ ಕುಲ್ಲಿಯಲ್ ||

|| ರಡ್ಡನೆದ ಸಂದಿ ||

ದಿಕ್ಕ ದಿಕ್ಕಿಗ್ ಚರುನು ಬಲಸಿಯೆ ಬಗ್ಗಿ ಬಾವನೆಡ್ ||
ಆರತಿನ ಬೆಳಗಾದ್ ಪುಲ್ಲದ
ಆಸ್ಡೇ ಕಣ್ಣಡ್ಡೊ ಪೋನಗ
ಮೂಡಯಿಡ್ ಬೊಲ್ಪಾಂಡ್ ಕಾಂಡೆನೆ ಲಕ್ಕೈ ಗೆಲೈನೊಡು ||

2

ಕಾಂಡೆ ಮಲ್ಲುನ ಕರ್ಮೊ ಕಿರೈನ್
ತೀರ್ನದಾಯೆನೆ ಲಡಯಿ ದೈತೊನು
ವೀರಕಚ್ಚೆನ್ ಬಿಗಿತ್ ಕಟ್ಟಾದ್ ಕವಚೊ ಪಾಡೊಂದು ||
ಮೂಡಿಗೇನ್ ಬೆರಿ ಬುಜೊಕು ತಿಕ್ಕದ್
ಶ್ರೀ ಹರಿನ ಕೈತಡೆಗ್ ಬತ್ತಾದ್
ಕಾರ್ಗಡ್ಡೊನೆ ಬೂರು ಪಂಡೆನೆ ಪೋಯಿ ನಮೊ ಕಳಕ್ ||

3

ಕ್ರಿಷ್ಟೆನರ್ಜುನ ಮೋನೆ ತೂದೇ
ಗೆಲೆಡುಲ್ಲನೆ ಬಾವ ಇನಿ ಈ
ಗೆಲ್ಲುವನೆ ಗುರುಕುಲೆನ್ ಸೈಂದವ ಪುಣನ್ ಪಾಡುವನೆ ||
ಪನ್ನಿ ಲಚ್ಚಣೊ ನಿನ್ನ ಮೋನೆಡ್
ಪೊರ್ನು ನೆಗತ್ತ್ ದ್ ತೋಜನೆಟ್‌ಯಾ -
ನಿತ್ತೆ ಪಿದಡಿಯೆ ಪನ್ನಗರ್ಜುನೆ ಹರಿಗ್ ಕೈ ಮುಗಿದ್ ||

4

ಕೊಡಿಮರತ ಹನುಮಂತಗೊಂದನೆ
ಮಲ್ತ್‌ದಾದಾಲ ತೇರ್ಗ್ ಸುತ್ತಲ
ಬಲಿಯೆ ಬತ್ತದ್ ಕುದುರೆಲೆಗ್ ಪುಡ್ಯಾಡ್‌ದಾ ಪಾರ್ತೆ ||
ರತೊನು ಏರ್‌ನ ಸಾತ್‌ಗಪಗನೆ
ಜಯೊ ಜಯೊನೆ ಪಂಡೊಂದು ಪಾಟಕ-
ನಕ್‌ಲ್ ಬನ್ನಗ ಕೊಂಬು ವಾದ್ಯೊ ನಗಾರಿ ಸೊರೊ ಏರ್ಡ್ ||

5

ದ್ರೋಣೆರಾಲ ಜನೈರೊನ್ ಜಾರದ್
ವೀರ ಕಚ್ಚೆನ್ ಬಿಗಿತ್ ಕಚ್ಚೆದ್
ಮೂಡಿಗೇನ್ ತಿಕ್ಕಾದ್ ಬಿಲ್ಲನ್ ಕೈಟ್ ಪತ್ತೊಂದು ||
ಏಳೊ ಗಳಿಗೇನ್ ತೂದು ಪಿದಡ್‌ದ್
ಆನಗನೆ ಜಯದ್ರತೆನೆ ಬತ್ತದ್
ಕಾರ್‌ಗಡ್ಡೊನೆ ಬೂರ್ನು ಪಂಡೆನೆ ಪಾರ್ತೆ ಕೆರ್ದೆಂದ್ ||

6

ಆಜೋ ಪಾಡ್ಡೆಗೆ ಎನನ್ ಬದ್‌ಕವೊ -
ಡಿರ ಪಾರ್ತನ ಕಣ್ಣ್ ತಪ್ಪದ್
ಪಾಂಡವೇರೆಡ್ ಆಯೆ ಮಾತ್ತೊನೆ ಎನನ್ ಕೆರೈರೆಗ್ ||
ತಿರುನಾಯೆನೆ ಪನ್ದ್ ಈಸ್ವರ
ದೇವೆರೇ ವರೊ ಕೊರೈರಾನಿಯೆ
ಯಾನ್ ಆಯನ ಎದುರು ತಿಕ್ಕಡ ಕೆರೈ ಕಂಡಿತೊನೆ ||

7

ನಿನನ್ ಜಾಗ್‌ತೆಡೇನ್ ಕಾಪುವೆ
ಕಿರಿಯೆರಾಯನ್ ಬುಡಯೆ ಪಂಡ್‌ದ್
ಕುರುನ ಕುಟುಮೊದ ಪೊದ್ವ ಮನಸ್‌ಗ್ ದೈರೊ ಪಂಡೊಂದು ||
ಪಿದಡ್‌ನಾಪಗ ಕೊಂಬು ಕಹಳೆದ
ಸೊರೊನೆ ಲಕ್ಕದ್‌ಲಾಂಡ್ ಕೌರವ
ಕಡೆತ ವೀರೆರ್ ಆನೆ ಕುದುರೆಲೆತೇರ್ಡ್ ಪಿದಡಿಯೆರ್ ||

8

ಸೇನೆ ಬತ್ತದ್ ಕಳಟ್ ಉಂತ್‌ನ -
ಗಾಪಗನೆ ದುಸ್ವಾಸ ಸೌಬಲ

ಬಾಹ್ಲಿಕನ್ ಮಾಗದನ್ ಸಿಂದ್ಯನ್ ಒಟ್ಟುಗುಂತಾದ್ ||
ಕೋಟೆ ಕಟ್ಟಿರೆ ಪಂಡ್‌ದಾಪೆಕ್
ಬಾರಿ ಸಗ್ಗಿದ ಚಕ್ರ ಕೋಟೆನ್
ವೀರೆರೆನ್ ಉಂತಾದ್‌ಲಾಡೆಗ್ ಬತ್ತೆ ಕಾಂಬೋಚೆ ||

9

ತೆನ್ನಯಿದ ವಿಂದಾನುವಿಂದೆರ್
ಬುಕ್ಕೊ ಸಮ ಸಪ್ತಕೆರೆ ಕಡೆತವೆ
ರಕ್ಕಸೆರ್ ಸೇರ್‌ಯೆರ್‌ಲಾಕ್‌ಲೆ ದನಿಕುಲೆನ ಪಗೆಟ್ ||
ಪತ್ತೆ ಸಾರೊನೆ ಅರಸುನಾಕ್‌ಲ್
ಲೆಕ್ಕೊಗೇ ತಿಕ್ಕಂದ್‌ನಾತ್‌ಲ
ಜಕ್ಕ ಜವ್ವನೆರೊಟ್ಟು ಸೇರೈರ್ ಆನೆ ಕುದುರೆಲೆಡ್ ||

10

ರಾವುತೆರೆ ಸುತ್ತದವೆ ಪಿರವುಡು
ಆನೆ ಸೇನೆನ್ ಉಂತಯೆನೆ ಸರಿ
ತೇರ್‌ಲೆನ್‌ಲಾ ಪಿರವು ಸುತ್ತುಡು ನಡುಟು ಕಾರ್‌ಡೆನ್ ||
ದ್ರೋಣೆನೇ ನಿಯತಾಯು ಪನ್ನುನ
ವೀರನಾ ಕಾಪಟಿಗಿಡುಂತದ್
ಕೋಟೆ ಕಟ್ಟೆನೆ ನಾಲ್ ರಂಗೊದ ಸೇನೆ ಕೂಡ್ಲಾದ್ ||

11

ಆಪೆಕ್‌ಡ್ ಆ ಬೂರಿಸ್ವವನಾಲ
ಮಾದ್ರ ಬೂಪನ್ ಕೃಪನ್ ವ್ಯಷ ಸೇ-
ನಾದಿ ವೀರೆರೆನೊಟ್ಟುಗುಂತಯೆ ದೀರ್ಗ ಬಾವುಕನ್ ||
ಸೋಮದತ್ತನ್ ದಂಡದಾರನ್
ಕ್ಷೇಮ ದೂರ್ತನ್ ವೀರ ಕರ್ಣನ್
ಬಾಹುಕನ್ ಕೃತವರ್ಮನಸ್ವತ್ತಾಮೆರೆನ್ ನಡುಟು ||

12

ಜಾಗ್‌ತೆಡ್ ಉಂತಾದ್ ಅಕ್‌ಲೆನ
ಸ್ವಾದಿನೊಡು ಜಯದ್ರತನ್ ಬುಡಿಯೆನೆ
ಏರೆಗ್‌ಲ ತೆರಿಯಂದ್‌ನಂಚಿನೆ ದೆಂಗಯೆನೆ ದ್ರೋಣೆ ||
ಕೀರಿ ಕುಟ್ಟಿಯೊ ಆನೆಲಂಕುಸೊ
ಬೇನೆಗಾಪಗ ತೇರ್ಡ ಕುದುರೆಲು
ಲಾಗೊದೆತ್ತೊನೆ ಕತ್ತಿ ಬೀಜಯೆರಪಗ ಸೈನಿಕೆರ್ ||

13

ಸುರುತ ಕೋಟೆದ ಎದುರು ಉಂತುದು
ಪಗರಿದಾ ಗುರು ಆ ಯುದ್ಧಿಸ್ವಿರ
ಕಡೆಕ್ ಪಂಡ್‌ದ್ ಕಡಪುಡಿಯೆನೇ ಕಳಕ್ ಬರಡ್‌ಂದ್ ||
ಹರಿನ ಒಟ್ಟಿಗೆ ಪಾಂಡು ಬಾಲೆಲು
ಕಳಕ್ ಬತ್ತೆರ್ ಚೈದ್ಯ ಕೇರಳೆ
ಯವನೆ ಕೌಸಲೆ ಪಾಂಡ್ಯನಾ ಸಂವೀರೆರೆತ್ತಿಯೆರ್ ||

14

ಪಾರ್ತೆ ಸಾತ್ಯಕಿ ಭೀಮ ಸೇನನ
ಆ ಯುದ್ಧಿಸ್ವಿರನಲ್ಪ ಕಾಪ್ಯರೆ
ಜಾಗ್ರತೆಡ್ ಉಂತಾದ್ ಕ್ರಿಷ್ಣನ ಒಟ್ಟು ರತೊನೇರ್ಡ್ ||
ದೇವದತ್ತೊನು ಉರಿಪುನಾಪಗ
ಆ ವಿರೋದಿಲೆ ತಿಗಲೆ ನಡ್ಗದ್ -
ಲಾಂಡ್ ಎದುರುಗು ಪೋಪುನಕಲೇರ್ಂಡ್ ಪನ್ನಗನೆ ||

15

ದುಸ್ಪ ದುಸ್ಯಾಸನೆನೆ ಎದುರುಗು
ಬನ್ನಗನೆ ಆ ಪಾರ್ತೆ ಮನಸಾಡ್
ಎಣ್ಣೆಯೆನೆ ಈ ಮೂರ್ಕನಾ ಕರೊಯ್ವು ಬೀಮೆಂದ್ ||
ಅಣ್ಣೆ ಪನ್ತಾನ ಆಜೊನೇನೇ
ತಪ್ಪವುನ ಸರಿಯತ್ತ ಪಂಡ್ಡಾದ್
ರಟ್ಟಯೆನೆ ಅಲ್ತಡ್ಡಾದಲಾಯನ್ ಪಗರಿಡಾಕೊಂದು ||

16

ಹರಿಯೆ ರತೊ ತಿರ್ಗಾದ್ ದ್ರೋಣನ
ಎದುರು ಉಂತನಗಪಗ ಪಂಡೆನೆ
ಹರನ ಬಾಣೊಲ ಹರಿಯೆ ಸಾರತಿ ಹನುಮೆ ಕೊಡಿಮರಟ್ ||
ತನ್ ಕ್ ಸಾಯೊಗು ಉಲ್ಲೆರ್ಂಡಾದ್
ಎನಡ ಲಡಯಿಗ್ ಬತ್ತನರ್ಬನ
ನಿನನ್ ಆಡೆಗೆ ಬುಡುವೆನೆಂದಾದ್ ಈಯೆ ಗ್ರೇಯ್ತದನ ||

17

ಯಾನ್ ಈರೆಡ ಲಡಯಿ ಮಲ್ಲೆರೆ
ದಾಯೆ ಬತ್ತನೆ ಪನ್ದ ತೆರಿತ್‌ಜೊ
ಈರ್ ದೆಂಗದ್ ದೀತರತ್ತೊಯೆ ಮೂರ್ಕ ಸೈಂದವನ್ ||
ಆಯನೇ ಬುಡುಕೊರ್ದೆ ಈರೆಡ -
ದಾಲ ಪಗೆ ಇದ್ಯೆಂಕ್ ಪನ್ನಗ
ಈಯೆ ಬುಡ್ಬಲ ತೀಂಡ್ ಆಯನ್ ಬಿಸೆ ಅಂದಡನೆ ||

18

ಎನ್ನ ಬಿಸ್‌ತಿಗೆಲೆನ್ ಕೇನ್ದರೋ
ಕಲ್ಪಯಿನ ಗುರು ಈರೆ ತೊಲೆಂ -
ದಲ್ಪ ರಟ್ಟಯೆ ಮಂತ್ರೊ ಬಾಣೊನು ದ್ರೋಣ ಮೇಲ್ಗವುಲೆ ||
ಕ್ರಿಷ್ಣ ತೂನಗ ದ್ರೋಣಗೇ ಸರಿ
ಸುತ್ತು ಬರ್ಪುನ ಮಂತ್ರೊ ಬಾಣೊನು
ಅರ್ಜುನಗ್ ತೋಜಾದ್ ಪಂಡೆನೆ ದ್ರೋಣೇರೇರ್ಂಡ್ ||

19

ಗೆರೆತ್‌ಜನ ಓ ಮರ್ದ ಈಯೇ
ಗುರುಕು ಎದುರುಂತುವನ ಆರೆನ

ಕರುಣೆಡತ್ತೊಯ ಈಯೆ ಪುದರ್‌ಗ್ ಬತ್ತನಯೆ ಪಾರ್ತೆ ||
ಹರಿನ ಪಾತೆರೋ ಕೇನ್ದಲಾಪಗ
ನರೆನೆ ಬಿಲ್ಲನ್ ಒಯ್ತದಾಪೆಕ್
ಅಡಕ್‌ದಾ ಗುರು ಪಾದೊ ಗಡ್ಡೊನೆ ಬೂರೈ ಪುಗರೊಂದು |

20

ಈರ್ ಪ್ರೀತಿಡ್ ಎಂಕ್ ಕಲ್ಪಯಿ -
ನಾರ್ ಪನ್ನುನ ನೆಂಪು ಮರತ್‌ದ್
ಈರೆಗಾಕ್ಯೆರೆ ಎದುರು ಉಂತನ ಮೂರ್ಕ ಎನನೀರ್ ||
ಕಾಪೊಡಿತ್ತೆನೆ ಸಮೆನ್ ಕೊರಿ ಗುರು -
ದೇವೆರೆಂದಾದ್ ಬುಲ್ಲುನಾಯನ್
ದೇರ್ತ್ ಲಕ್ಕದ್ ನಿನ್ನ ತಪ್ಪಿದ್ಲಿಂದ್ ತರೆನೀಸೈ ||

21

ಅಸ್ತತ್ತಾಮನಲೆಕೊನೆ ಈಯೆ
ಎನ್ನ ಪ್ರೀತಿದ ಸಿಸೈ ಕ್ರಿಷ್ಣನ
ಬಗ್ಗೆ ಯುದ್ಧೊಡು ಗೆಲ್ಲು ಪಂಡ್ಡಾದ್ ಮಲ್ಲೆ ಸಮದಾನೊ ||
ಬುಕ್ಕೊ ರತೊನೇರೊಂದು ಪಾರ್ತೆನೆ
ಸತ್ತು ಸೇನೆದ ನಡುಕು ನುರ್ಕಿಯೆ
ಬಿಲ್ಲ ದೆರ್ತ್‌ದ್ ಬಾಣೊರಾಪಯೆನೇತೊ ಬೆರಿ ಬೆರಿಕ್ ||

22

ಬೂರ್ದು ಸೈತ್ತೆರ್ ನಾಲ್ ರಂಗೊದ
ಸೇನೆದಾಕ್‌ಲ್ ಆನೆ ಕುದುರೆಲು
ಏತೊ ಪುಡೆರ್‌ದ್ ಸೈತ್ತೊ ಪಲುಗುಣ ಬಾಣೊ ತಾಗ್‌ನೆಟ್ ||
ತೇರ್ ಪೊಡಿ ಪೊಡಿಯಾದ್ ಬೂರ್ದವೆ
ರಾಸಿ ಬೈತವೆ ಮುಟ್ಟಿದಂಚೆನೆ
ತೋಜಿನಗ ದ್ರೋಣನಲ ದೂರೈರ್ ಕೌರವಾದಿಗುಳು ||

23

ಆ ಸ್ತುತಾಯುದೆ ಸೈತ್‌ದಾನಗ
ವೀರ ಕಾಂಬೋಜೆನಲ ಎದುರುಗು
ಪಾರ್ ಬತ್ತದ್ ನರನ ಬಾಣೊದ ಪೆಟ್ಟು ತಾಗ್‌ನೆಟ್ ||
ಆಯೆಲಾ ಸೈತ್ತೆಂದ್ ಬತ್ತನ
ವೀರೆರಾವಿಂದಾನುವಿಂದೆರ್
ಕಾದ್ ಕಾದ್‌ದ್ ಕಳಟ್ ಬೂರೈರ್ ಅಪಗ ಕೌರವೆನೆ ||

24

ಯುದ್ಧೊಡೆಂಕುಲು ಮಲ್ಲ ಬಿಸೆರ್
ಪನ್ದ ಬತ್ತದ್ ಸೇರೈರೇತ್‌ಲ
ಇತ್ತೆ ತೂನಗ ಚೆರಿಗೆ ಬರ್ತಿಗ್ ಬತ್ತನಕ್‌ಲಾಂಡೆ ||
ಅರ್ಜುನಡ ಒರೊ ತೂಪೆ ಪಂಡ್‌ದ್
ಬತ್ತದಸೊನು ಬುಡಿಯೆನಪಗನೆ
ಬತ್ತಿ ಬಾಣೊನು ತುಂಡು ರಟ್ಟದ್ ಹಾಕ್ಯೆ ಕೌರವಗ್ ||

25

ಪೆಟ್ವ ತಿಂದನ ಕೌರವೇಸ್ವರೆ
ರಟ್ಟಿಯೆನೆ ಅಲ್ಪಡ್‌ಲರ್ಜನೆ
ಬುಕ್ಕೊಲಾ ಪುಣ ಪಾಡ್ಯೆ ಕಾಳಗೊ ಕಳಕ್ ನುಕ್ಕೊಂದು ||
ಮದ್ಯನದ ಪೊರ್ತಾಂಡ್ ಪಂಡ್‌ದ್
ಕ್ರಿಷ್ಟೆ ನೀರ್‌ದ ಕಿರೆಕ್ ಕುದುರೆಲೆ
ಜಪ್ಪದಾನಗ ನೀರ್ ಬಂಜರೋ ಪರ್ರೊ ಕುದುರೆಗುಳು ||

|| ಸಾತ್ಯಕಿ ಅರ್ಜುನನಾಡೆಗ್ ಬತ್ತೆ ||

ಪಾರ್ತೆ ಬತ್ತೆಜೆದಾನೆ ಪಂಡ್‌ದ್
ಆ ಯುದ್ಧಿಸ್ವರೆ ಸಾತ್ಯಕಿನ್‌ಲಾ
ನಾಡಿಯೆರೆ ಕಡಪುಡಿಯೆನಾಪಗ ಧರ್ಮ ನಂದನನ್ ||
ಕಾಪಿಯೆರೆ ಬೀಮಡನೆ ಪಂಡ್‌ದ್
ಸೀದ ಕಾಳಗೊ ಕಳಟೆ ಬನ್ನಗ
ದ್ರೋಣೆನೆದುರುಗು ತಿಕ್ಕುದಂತದ್ ಕೇಂಡೆ ಸಾತ್ಯಕಿಡ ||

1

ಅರ್ಜುನನ ಸಿಸೈತ್ತೊ ಈಯೇ
ಬತ್ತೆದಾನೆ ಕಾದ್ಯೆರೆಗೊ ಆಂಡ್‌ದ್
ಮಲ್ಪು ಲಡಯಿಡ್ ನಿಕ್ಕ ತೀರುನೆ ಏತ್ ತೂವೊನುವೆ ||
ಬಿಲ್ಲ ದಕ್ಕದ್ ಗುರುನ ಪಾದೊಗು
ಅಡ್ಲೊ ಬೂರುದು ಪಂಡೆ ಈರೆಡ
ಯುದ್ಧೊಗುಂತಯೆ ಯಾನೆ ಪಾರ್ತನ್ ನಾಡಿಯೆರೆಗಾದ್ ||

2

ಮೂಲೆ ಬತ್ತೆನೆ ಎಂಕ್ ಪೋಯೆರೆ
ಸಾದಿ ಬುಡಿ ಮಹ ಸ್ವಾಮಿ ಪನ್ನಗ
ದ್ರೋಣೆ ತೆಲವೊಂದುಂತ್ಯೆ ಸಾತ್ಯಕಿ ಪೋಯೆನಲ್ಪಡ್‌ದ್ ||
ಪೋನಗನೆ ಕುರು ಸೇನೆ ಎದುರುಗು
ಪಾರ್ ಬತ್ತೆದ್ ಬಾಣೊ ಬುಡಿಯೆರ್
ಬಾರಿ ಸಂಕ್ಯೆಡ್ ಗಾಂಡ್ ಗೌಜಿಡ್ ತಿಕ್ಕೆ ತಿಕ್ಕೆಂದ್ ||

3

ಬಿರುಲಪಗರಿಲ ಸಾತ್ಯಕಿಡಲಾ
ಕಯಿಟ್ ಇತ್ತನೆಟಾಯೆ ಹಾಕಿಯೆ
ಪಗರಿಡಾಪಗ ಸೈತ್ತೆರೇಶಲ ವೀರ ಸೈನಿಕೆರ್ ||
ರತೊನೆ ಪೊಡಿ ಪೊಡಿಯಾಂಡ್ ಆನೆಲು
ಕುದುರೆಲೇಶಲ ಸೈತ್ತೊ ಸಾತ್ಯಕಿ
ನರನ್ ತೂಯೆರೆಗಾದ್ ಪೋಯೆನೆ ಕಳಟೆ ನಾಡೊಂದು ||

4

ಅರ್ಜುನನ್ ತೂಯೆರೆಗ್ ಪೋಯಿನ
ಸಿಸೈ ಸಾತ್ಯಕಿ ದಾನೆ ತೋಜುಜೆ
ಪನ್ನ ಬೀಮಡ ಪೋಯೆರೆಂದ್‌ದ್ ಧರ್ಮನಂದನೆ ||
ಪನ್ನಗನೆ ಆ ಬೀಮೆ ನಕುಲಡ
ಅಣ್ಣನೀಯೇ ಕಾಪು ಪಂಡ್‌ದ್
ದಡ್ಕ ಪಿದಡಿಯೆ ಗದೆನ್ ಪುಗಲ್‌ಡ್ ದೀಡ್ಡಲಮಸರೊಡು ||

5

ದಡಧಡಂದ್‌ದ್ ಕಳಟೆ ಪೋನಗ
ಲಡಯಿಗುಂತ್‌ನ ವೈರಿನಾಕಲೆ
ತಿಗಲೆ ನಡ್ಗದ್ ಸಾದಿ ಬುಡಿಯೆರ್ ಅಡಿಕ್ ತೂವೊಂದು ||
ಕಳಟ್ ಬೂರ್ಡ್‌ನ ರಾಸಿ ರಾಸಿದ
ಪುಣಕುಲೆನ್ ಕಡತೊಂದು ಪೋನಗ
ಎದುರು ತಿಕ್ಕಿಯೆ ದ್ರೋಣೆ ಬೀಮನ್ ತೂದು ಕೇಂಡೆಯಡ ||

6

ಓಡೆಗ್‌ಯ ಓ ಬೀಮೆ ದುಂಬುಗು
ಪೋಪುನೆಯ ಪನ್ ಲಡಯಿ ಮಲ್ಪುನ
ಆಸೆಡಂದ್‌ಡ ಎದುರು ಉಂತ್‌ಲ ಎನಡ ತೀರೊಂದು ||
ತೂಲ ಇದ್ದಿಡ ಪಾರ್ತ ಸಾತ್ಯಕಿ -
ನಾಕಲೆನಲೆಕೊ ಬಿರುನು ದಕ್ಕದ್
ಕಾರ್‌ಗಡ್ಲೊನೆ ಬೂರ್ಡು ಪೋಲಯೆ ನಿನ್ನ ಸಾದಿಡೆನೆ ||

7

ಗುರುಕುಲೇ ಈರಾಂಡಲಾ ಇನಿ
ಲಡಯಿದಾ ಕಳಟತ್ತೊ ಉಪ್ಪುನೆ
ಮಟೊಟು ಪನ್ನರ್ ಲಡಯಿದಾ ಕಳಟೇರ್ ಇತ್ತೆರ್‌ಡ ||
ಅಕ್‌ಲ್ ಏರೇ ಆದ್ ಉಪ್ಪಡ್
ಬಿರುನು ದಕ್ಕದ್ ಅಡ್ಲೊ ಬೂರುನ
ಸುಬವೊ ವೀರೆರೆಗತ್ತ ಪಂಡ್‌ದ್ ಈರೆ ಕಲ್ಪದರ್ ||

8

ತೀರೊ ಈರೆಗ್ ಎನಡ ಪಂಡ್‌ದ್
ಬೀಮೆ ಗದೆ ಬೀಜಾನಗಾಪಗ
ಈ ಪೆದಂಬಗ್ ಬುದ್ಧಿ ಕಲ್ಪವೆ ಪನ್ನಲಾ ದ್ರೋಣೆ ||
ಬಾಣೊ ರಟ್ಟನಗೈನ್ ಗದೆಟೇ
ಹಾಕ್ ಹಾಕ್‌ದ್ ಮಲ್ತೆ ಪೊಡಿ ಪೊಡಿ
ಬೂರ್ಲೆ ಗುರುಕುಲೆ ಪನ್ನ ಮಂಡೆಗ್ ಒಂಜಿ ಎತ್ತಾಯೆ ||

9

ತರೆನೆ ತಿರ್ಗದ್ ಬೂರೈನಾ ಗುರು
ಅಪಗ ಬತ್ತೆರ್ ಕೃಪೆರ್ ದ್ರೋಣನ
ಮಗಲ ಎದುರುಗು ಬೀಮನಕಲೆಗ್ ಗದೆಟ್ ಹಾಕಿಯೆನೆ ||

ಗದತ ಪೆಟ್ವೆಡ್ ಮತಿಯೆ ತತ್ತ್ವದ್
ಪುಡೆರುನೆನ್ ತೂವೊಂದು ಕೌರವೆ
ಕುದುರೆ ಆನೆಲೆ ತೇರ್ ಕಾರ್ವಡೆ ಪೂರ ಪೋಲೆಂದ್ ||

10

ಬತ್ತನಾಕ್ಲ್ ಬೀಮನೆದುರುಡು
ಮಲ್ತೆರೇತ್ಲ ಯುದ್ವೊ ಆಂಡಲ
ಒರೈನೇ ಆ ಬೀಮೆ ಪೊಡಿ ಪೊಡಿ ರಟ್ಟದಾನಗನೆ ||
ಸೈತ್ತನಾನೆಲು ಕುದುರೆಲೇತ್ಲ
ಲೆಕ್ಕೊಗೇ ತಿಕ್ಕಂದ್ ಕಾರ್ವಡೆ -
ಕಲ್ಪ ಮತಿ ಇದ್ಯಂದೆ ಬೂರೈರ್ ಪೆಟ್ವೆ ತಿಂದೊಂದು ||

11

ಕಳಟ್ ಬೂರ್ದನ ನಾಲ್ ರಂಗೊನು
ದುರುಳ ಕೌರವೆ ತೂದು ಕೋಪೊಡು
ಗದೆನ್ ಬೀಜದ್ ಎದುರು ಉಂತಿಯೆ ಬೀಮೆ ಸೇನನವೆ ||
ಪಗಡೆ ಗೊಬ್ಬುಗೊ ಬಾಜಿ ಕಟ್ಟುಗೊ
ತರೆನ್ ನಮ್ಮವೆ ಬಲಯ ಕೌರವ
ಸಕುನಿ ದಾಯೆಗ್ ಈಯೆ ಬಲಬಲ ಪನ್ದ ಲೆತ್ತೊಂಡೆ ||

12

ಸೈತ್ತಂಡಲ ಬೀಮಡನೆ ಯುದ್ವೊನು
ಮಲ್ತದೇ ಸೈಪ್ಪೆಂದ್ ಕೌರವೆ
ತನ್ನ ಗದೆ ಬೀಜಾದ್ ಹಾಕಿಯೆ ಬೀಮನಾ ತರೆಕ್ ||
ಪೆಟ್ವೆ ತಪ್ಪದ್ ಪೆರಪ ಬೀಮೆನೆ
ದುಸ್ಸುಗೊಂಜೇ ದೀಡಿ ಸಾತ್ತ್ಗ್
ತಿರ್ಗ್ ತಿರ್ಗ್ ಬೂರೈನಾಯನ್ ತೂದು ಮೆಗ್ಕಲ್ಲು ||

13

ಪಾರ್ ಬತ್ತೊನೆ ಸೊನ್ನೊತ್ತೊಂಬೊಲ
ಸಾಲ್ಡುಂತುದು ಗದೆಟ್ ಕಡೊಡು
ಈಟಿ ಬರ್ಚಿಡ್ ಬಿಲ್ಲ್ ಬಾಣೊಡು ಬೀಮೆಗಾಕಿಯೊನೆ ||
ಬೀಮೆಗಾಪಗ ರುದ್ರ ಸಗ್ತಿಯೆ
ದೇಹೊಗೊಸಯಾವೊಂದು ಕೆರೈನೆ
ಪಾರ್ ದೊರೈರ್ ಇರೈರಾ ದುಸ್ವಾಸೆ ಕೌರವೆಲ ||

|| ಭೀಮನ್ ಕರ್ಣೆ ಮಗ್ತಪಾಡಿಯೆ ||

ಭೀಮನಾ ರುದ್ರವತಾರೊದ
ನಾಟ್ಯೊಡೇ ಕೌರವನ ಪ್ರೀತಿದ
ಸೋದರೆರ್ ಬೀಮಡನೆ ಕಾದ್ದ್ ಸೈತ್ತದ್ ತೂದು ||

ವೀರ ಕರ್ಣೆನೆ ಕಳಕ್ ನುಕುದು
ಪಾರ್ ಬತ್ತೆನೆ ತನ್ನ ಕೈತವೆ
ಬಾಣೊರಟ್ಟದ್ ಉಂತು ಬಂಜೆಲ ನಿನನ್ ದೀಡಯೆನೆ ||

1

ಕಳಟ್ ಬೂರ್ದನ ಪುಣಕುಲೆನ ನಡು
ನಡುಟು ನಿನ್ನನ್ ಜೆಪುಡವೆಂದ್
ನೆರ್ದ್ ಪಗರಿನ್ ಬುಡ್ಡಿ ಕರ್ಣನ್ ತೂದು ಬಲಬೀಮೆ ||
ತಿರ್ಗ್ ದುಂತುದು ತಾನ್ಲಾ ಬಿರು
ಪಗರಿಲೆನ್ ಕೈಟಪಗ ಪತ್ತದ್
ರತೊನು ಪೊಡಿ ಪೊಡಿ ಮಲ್ತೆ ಕರ್ಣನ ಬಾಣೊ ರಟ್ಟದ್ ||

2

ಸಾರತಿಗ್ ಪೆಟ್ಟಾಂಡ್ ಪಂಡ್
ಕೋಪೊಡಾ ಕಲಿ ಕರ್ಣೆ ಬಾಣೊಡು
ಹಾಕೈ ಬೀಮೆಗ್ ಬತ್ತಿ ಬಾಣೊನು ತುಂಡು ರಟ್ಟದ್ ||
ಬೋಂಟೆದಾಕ್ಲ್ ನಾಯಿಲೆನ್ ಸರಿ
ಸಾಂಕುನಂಚಿನೆ ನಿನನ್ ಕೌರವೆ
ಸಾಂಕಿಯೆನೆ ಇನಿ ಎಂಕ್ಲೆ ಮೇಲ್ಗ್ ಬೌರು ಲಾಗಿವನ ||

3

ನಿನನ್ ದೀಡಯೆ ಪನ್ದ ನೆರ್ದಗ
ಕುರಿನ ಮಾಸೊದ ಅಡಿಗ ಮಲ್ತದ್
ಅರಸುಗುಣ್ಣಯಿ ಗವೊ ಎನ್ನಡ ಇತ್ತೆ ನಡಪಂದ್ ||
ನಿನಡ ಸಗ್ತಿಯೆ ಉಂಡೊ ಪಂಡ್
ಮೆಗಿಯೆ ಅರ್ಜನೆ ಆ ವಿರಾಟನ
ಎರ್ಲೆ ಕಂಡೈರೆ ಬತ್ತನಾನಿಯೆ ತೂತೆ ಬಗ್ಳಡಯೆ ||

4

ಬಾಯಿಡೇ ಪಾರ್ತೆದ್ ಪೊರ್ತುನು
ನೂಕುನೆನೆ ದಾಯೆಗಯ ರಟ್ಟಪಿ
ಬಾಣೊಲೆನ್ ತಲೆಪಿಯೆರೆ ತೀರುವೊ ಬೀಮೆ ತೂಲಾಂದ್ ||
ವೀರ ಕರ್ಣೆನೆ ಬುಡ್ಡ ಪಗರಿಲು
ಮೂಜಿ ತುಂಡಾದವುಲೆ ಬೂರಿಯೊ
ಬೀಮೆಲೆತ್ತದ್ ಪಂಡೆ ಕರ್ಣಡ ನನಲ ಬುಡ್ಲಂದ್ ||

5

ನಮುನೆ ನಮುನೆದ ಮಂತ್ರೊ ಬಾಣೊನು
ಬುಡುದು ತೂನಗ ಬೀಮೆ ರಟ್ಟದ್
ತೆಲಿಪುನೆನ್ ತೂವೊಂದು ಕರ್ಣಗ್ ಕೋಪೊ ಏರ್ದಾಂದ್ ||
ಪರಸುರಾಮೆರ್ ಕೊರ್ನ ಸಗ್ತಿದ
ಪಗರಿನೇ ಸರಿ ನೋಟೊ ಪತ್ತದ್
ಬುಡಿಯೆ ಬೀಮನ ತಿಗಲೆಗಾಪಗ ಪೆಟ್ವೆ ತಾಗ್ನೆಟ್ ||

6

ತರೆನೆ ತಿರ್ಗ್‌ದ ಕಳಟ್ ಬೂರಿಯೆ
ತೆರಣೊಡಾಯೆನೆ ಪೆರಪ ಲಕ್ಕ್‌ದ
ಗದನ್ ಪತ್ತನಗಾಯ ಗದನ್‌ಲ ಕರ್ಣೆ ರಟ್ಟಾಯೆ ||
ಬಿರು ಪಗರಿ ಗದೆ ಮಾತ ಕೈಡ್‌ದ
ತಿರ್ತ್ ರಟ್ಟನ ತೂದು ಬೀಮೆನೆ
ಕಯಿಕ್ ತಿಕ್ಕನ ಪುಣನ್ ದೆರ್ತ್‌ದ ಹಾಕ್ಕೆ ಕರ್ಣಿಗ್‌ಲ ||

7

ತೇರ್ ಪೊಲಿನೆತ ಚಕ್ಕೊಡಾಕಿಯೆ
ಆನೆಲೆನದಾಡಲೆನ್ ಒಯ್‌ದ
ಹಾಕ್ ಹಾಕ್‌ದ ಸೈರೋ ಬಚ್ಚಿದ್ ಬೂರೈ ಬಲ ಬೀಮೆ ||
ಬೂರ್‌ನಾಯಗ್ ಕರ್ಣೆ ಹಾಕ್‌ದ
ದಾನವನ ಮಡೆ ತಿಂದಿ ನಾಯಿಯೆ
ಈಯೊ ಎನ್ನಡ ಕಾದುನಯೆ ಪನ್ ಪೋಲ ನಟ್ಟಿಯೆರೆ ||

8

ನಟ್ಟಿದೇ ಸರಿ ಬಂಜಿ ದಿಂಜಪಿ
ನಟ್ಟು ಪರ್ಡೆಸಿಗ್‌ಲ ಯುದ್ಧೊಡು
ಗೆಲ್ಪುನಾಸೆನೆ ದಾಯೆ ಪಂಡ್‌ದ ಬೀಮನೇ ಬಿರುಟು ||
ರಟ್ಟದಾದಲ ಕುಂತಿದೇವಿಗ್
ಕೊರಬಾಸೆನ್ ಮರಪಯೆಂದ್‌ದ
ಕರ್ಣೆ ತಿರ್ಗ್‌ದ ಪೋನಗಪಗನೆ ಪಾರ್ತೆನೆದುರಾದ್ ||

9

ತಿಕ್ಕನಯ ಓ ಕರ್ಣೆ ಪಂಡ್‌ದ
ಅಕ್ಷಯಾಸ್ತೊನು ಬುಡ್ಡು ಸಾತ್‌ಗ್
ಕರ್ಣೆ ರಟ್ಟಿದ್ ಓಲು ಬೂರ್‌ದನೋ ನಾಡೈರೇರುಂಡು ||
ಬುಕ್ಕೊ ಬೀಮನ್ ತೂದು ಆರೆಕಿ
ಮಲ್ತ್ ಲಕ್ಕಯೆ ಕ್ರಿಷ್ಣೆ ತೇರ್‌ನ್
ತಿರ್ಗಯೆನೆ ಜಯದ್ರತನ್ ನಾಡುಗೊ ಪನ್ದಲರ್ಜುನಡ ||

|| ಬೂರಿಸ್ತವನ ಮರಣೊ ||

ಜಯದ್ರತನ್ ನಾಡಿಯೆರೆ ಪಿದಡ್‌ದ
ನರೆಲ ನಾರಾಯಣೆಲ ಪೋನಗ
ಎದುರು ಉಂತ್ಯೆರ್ ಸಲೈ ಗುರು ಕೃಪೆ ಕರ್ಣೆ ಸೌಬಲೆರ್ ||
ಲಡಯಿ ಜೋರಾಂಡವುಲು ಅರುನೆ
ಒರಿಯೆ ಮಾತೆರೆಗೆದುರು ಉಂತುದು
ಪುಣೆಪುನೆನ್ ತೂವೊಂದು ಸಾತ್ಯಕಿ ಎತ್ತಿನಾಡೆಗೆನೆ ||

1

ತೇರ್ ನುರ್ಕಯೆ ಕ್ರಿಷ್ಣನಕಲೆನ
ಕಾಳಗೊದ ನಡು ನಡುಕು ಸಾತ್ಯಕಿ
ಪಾರ್ತನೊಟ್ಟುಗು ಬಾಣೊ ರಾಪಯೆನಪಗ ಕುರುಸೇನೆ ||
ಬಾರಿ ಬಿಸ್‌ಡ್ ಎದುರು ಬತ್ತದ್
ಕಾದನಗನೇ ಆನೆ ಕುದುರೆಲು
ಬೂರ್ದು ಸೈತ್ತೊನೆ ತೇರ್ ಪೊಡಿ ಪೊಡಿಯಾಂಡ್ ಕೌರವೆರೆ

2

ಅರುನನ ಸಿಸೈತ್ತೊ ಸಾತ್ಯಕಿ
ಕರ್ಣೆ ಸೌಬಲೆರಕ್‌ಲ್ ಗಣೊನೊ
ಬಿಲ್ಲ್ ದೆರ್ತ್‌ದ ಬಾಣೊ ರಾಪಪಿ ರಬಸ್ ತೂವೊಂದು ||
ಇಸ್ಸೆ ಕೌರವೆ ಸೋಲ್ವೆ ಇಂದ್‌ದ
ಬತ್ತೆ ಬೂರಿಸ್ತವನೆ ಯುದ್ಧೊಡು
ಬಿರೆ ಅತ್ತಂದಾಯೆ ಯೋಗೊನು ಮಲ್ಪಿ ರಾಜರುಸಿ ||

3

ದಾನೆ ಸಾತ್ಯಕಿ ನಿನ್ನ ಕಾರ್ಬರ್
ಬಾರಿ ಜೋರಾಂಡತ್ತೊ ಸಾಯೊಗು
ಪಾರ್ತ ಕ್ರಿಷ್ಣರ್ ಉಲ್ಲೆರ್‌ಂದ್‌ದೊ ನಿನ್ನ ಹಂಕಾರೋ ||
ಯಾನ್ ನಿನ್ನನ್ ಬುಡಯೆ ಕಂಡಿತೊ
ಬಾಣೊ ಏತುಂಡಿತ್ತೆ ನಿನ್ನಡ
ತೂಲೊ ಪಂಡ್‌ದ ಪಗರಿ ರಟ್ಟಯೆ ಸಾತ್ಯಕಿನ ತೇರ್ ||

4

ಬತ್ತಿ ಪಗರಿನ್ ತುಂಡು ರಟ್ಟಿದ್
ಗಟ್ಟಿದಸ್ತೊನು ಬುಡುದು ತೂನಗ
ಬಿಲ್ಲ್ ಬೂರಿಸ್ತವನ ತುಂಡಾದಲ್ವ ಬೂರ್ನಗನೆ ||
ಕತ್ತಿದಾಯುದೊ ಪತ್ತದುಂತುದು
ಪತ್ತಲಯೆ ಸಾತ್ಯಕಿಯೆ ಕಡೊನ್ನ
ಇರ್ವೆರಲ ಕಡೊನುಗೊ ಜಯೊ ಸಿರಿ ಏರೆ ವಸೊ ತೂಕೊ ||

5

ಕತ್ತಿ ಕತ್ತಿಡ್ ಹಾಕ್ ಹಾಕ್‌ನ
ಪೆಟ್ಟೋಡೆ ಕಿಟಿ ರಟ್ಟದಾನಗ
ಬೊಲ್ವು ಜಗ ಜಗ ಬೂರ್‌ದಾಂಡಲ ಕಾಳಗೊದ ಕಳಟ್ ||
ಕಡೈರುಂತುದು ತಿರ್ಗ್ ತಿರ್ಗ್‌ದ
ಕುಲ್ಲ್ ಲಕ್ಕ್‌ದ ಕಡ್ಡ್ ಕಡ್ಡ್‌ದ
ಬಚ್ಚಿರಾಕ್‌ಲ್ ಮೆಯಿಕ್ ಗಾಯೊನೆ ಆಯ್ವಿ ಇರ್ವೆರೆಗ್ ||

6

ಸಾತ್ಯಕಿಗ್ ಜೋರಾಂಡ್ ಬಚ್ಚೆಲ್
ಸೋಮದತ್ತನ ಮಗೆನೆ ಬಿಸ್‌ಡ್

ಏವುರೊಡು ಕಡ್ಡುನಗ ಸಾತ್ಯಕಿ ಕೈತ ಕಡ್ಡಲೆನೆ ||
ಮೂಜಿ ತುಂಡಾದಲ್ಲ ಬೂರ್ನಗ
ಬೇಕೊ ಬೂರಿಸ್ತವನೆ ಆಯನ
ನಾಲಿಗೇ ತನ ಕತ್ತಿನೊಡ್ಡದ್ ಉಂತ್ಯೆ ಕೆರ್ದೆಂದ್ ||

7

ಆಪಗನೆ ಸಿರಿ ಕ್ರಿಷ್ಟೆ ಪಾರ್ತಡ
ದಾನೆ ತೂಪಯ ನಿನ್ನ ಸಿಸ್ಯನ್
ಆಯೆ ಕೆರ್ಪೆನೆ ನಿಕ್ಕ್ ಕಣ್ಣೆಡ್ ನೆತ್ತೆರಿದ್ಯತ್ತೊ ||
ಬಾಣೊ ಬೂರಿಸ್ತವಗ್ ಬುಡ್ಡಯ
ಸಾತ್ಯಕಿನ್ ಬದ್ಕಾಲ ಪನ್ನಗ
ಆ ದನಂಜಯೆ ಪನ್ನೆ ಕ್ರಿಷ್ಟೆಡ ಯುದ್ಡೊ ಮಲ್ಪುನಗ ||

8

ಧರ್ಮೊ ಬುಡಿಯೆರೆ ಬಲ್ಲಿ ಪಂಡ್ಡದ್
ಎನ್ನ ಗುರುಕುಲು ಪನ್ನೆರಾನಿಯೆ
ಇತ್ತೆ ಬೂರಿಸ್ತವಗ್ ಬಾಣೊನು ಬುಡ್ಡುನವು ಸರಿಯೊ ||
ಎಲ್ಯ ಆಣನ್ ಕೆರ್ದೆರಾಕ್ಲ್
ನಿನ್ನ ಮಗನೇ ಧರ್ಮೊ ತತ್ತದ್
ಇತ್ತೆ ಧರ್ಮೊನು ದಾಯೆ ಕಾಪುವ ಬುಡ್ಡ ನಿನ ಬಾಣೊ ||

9

ಹರಿಯೆ ಪಂಡ್ನ ಕೇನ್ದಲರ್ಜುನೆ
ಪರಿತೆದಸ್ತೊನು ಬುಡ್ಡು ಸಾತ್ಗ
ಕಡುಗೊ ಪತ್ತಾನ ಕೈಯೆ ಬೂರಿಸ್ತವನ ತುಂಡಾಂಡ್ ||
ಅಪಗನೇ ಅರ್ಜುನನ್ ತೂದ್ಲ
ಪನ್ ಪೆ ನಿಕ್ಕೇ ಟಕ್ಕ್ ಕೆಲಸೊನು
ಕಲ್ಪಯಿನೆ ಗುರು ದ್ರೋಣೆನೋ ನಿನ್ನಮ್ಮೆನೋ ಪನ್ಲ ||

10

ನಿನ್ನ ತೇರ್ನ್ ದೇರೈರುಂತ್ನ
ಕ್ರಿಷ್ಟೆನೋ ಪನ್ ಆಯೆ ಟಕ್ಕ್ದ
ಮಲ್ಲ ಮಾಯೊದ ಮೋಸಗಾರನೆ ಕಂಡು ಕಳುವೆತ್ತೊ ||
ಕೆರ್ದೆಯೆನೆಲಾ ಕಾಲಯವನನ್
ತಿಗ್ಗಯೆನೆ ಮಾಗದನ್ ಬೀಮಡ
ಮಲ್ಪಯೆನೆ ಲಡಯಿನ್ಲ ಪಾಂಡವ ಕೌರವೇರೆಡನೆ ||

11

ಗೋಪಿನಕ್ಲೆನ ಮಿಂಡೆ ಪೋಣ್ಣಲೆ
ಸೀರೆ ಕಂಡ್ನ ಕಳ್ಳೆ ಸಮ್ಮಲೆ
ಆಯಿನಾ ಕಂಸನ್ಲ ಕೆರ್ದೆಯೆ ಪಲಯೆ ಪೌಂಡ್ರಕನ ||
ಜೂವೊದೆತ್ತನ ಪಾತಕಿಯೆ ನಿಜೊ
ಆಯೆನೇ ನಿನನಿಂಚಿ ಕೆಲಸೊಗು
ನೂಕ್ ನಾಯೆನೆ ಎನ್ನ ಹಣೆಬರೊನೇರ್ಡ ಪನುವೇನ್ ||

12

ಯೋಗೊ ಗೇನೊಡೆ ಎನ್ನವಾತೊನು
ದೇವೆರೆನ ಪಾದೊಗುಲ ಎತ್ತವೆ
ದಾಯೆ ನನ ಬದುಕುನೆನೆ ಪಂಡ್ಡದ್ ಕಾಳಗೊದ ಕಳಟಿ ||
ಜಾಗೆನಾಡ್ಡದ್ ಕುಲೈನಟ್ಟಿಯಿ
ಪಾಡ್ಡ ಮೂಂಕುದ ಕೊಡಿಟ್ ದಿಸ್ಪಿನ್
ದೀಡ್ಡ ಸೋಹಂ ಪಂಡೊನುಂದೇ ಉಸುಲು ಬುಡುದಾಯೆ ||

13

ಗೋಚರೊನೆ ಇದ್ಯಂದೆ ಕುಲ್ಲದ್
ತಾನ್ ನಂಬುನ ಇಸ್ಸೊ ದೈವೊದ
ಮೂರ್ತಿನೇ ಹೃದಯೊಡುಲ ಕುಲ್ಲದ್ ಯೋಗೊಡುಪ್ಪುನಗ ||
ಸಾತ್ಯಕಿಯೆ ಲಾಗ್ಯೊಂದು ಕತ್ತಿಡ್
ನಾಲಿ ಕಡ್ಡದ್ ತುಂಡು ರಟ್ಟಯೆ
ಪಾರ್ತ ಕ್ರಿಷ್ಟೆರೆಗಾಂಡ್ ಬೇಜರೋ ತೂದುಲನ್ಯಯೊನು ||

14

ದಾಯೆ ಸಾತ್ಯಕಿ ಮಲ್ತನನ್ಯಯೊ
ಯೋಗೊ ಗೇನೊಡು ಕುಲ್ಲನಾಯನ್
ಈಯೆ ಕೆರೈನೆ ಆಯೆನೇ ಮಾಮಲ್ಲ ರಾಜರುಸಿ ||
ಈತ್ ಪನ್ನಗ ಬೂರಿ ಸ್ತವನವೆ
ಆತ್ಮೊ ಜ್ಯೋತಿಯೆ ಮಿತ್ತ್ ಬಾನೊಡು
ಪಾರ್ತ ಕ್ರಿಷ್ಟೆರೆಗಪಗ ತೋಜಿನಗಾಂಡ್ ಸಂತೋಸು ||

|| ಸೈಂದವನ ಮರಣೊ ||

ಪೊರ್ತು ಬಯ್ಯನೆ ಆಂಡ್ ಸೈಂದವೆ
ತಿಕ್ಕ್ಚೆನೆ ನನ ಕತ್ತಲೆಗ್ ಯಾ -
ನೆನ್ನ ಪ್ರಾಣೊನು ದೀವೊನಯೆ ನಿಜೊ ಪನ್ದ ಪಲುಗುಣೆನೆ ||
ಕ್ರಿಷ್ಟ ಮೋನೆನ್ ತೂನಗಪಗನೆ
ಚಕ್ರೊ ಸೂರ್ಯಗ್ ಅಡ್ಡೊ ಪತ್ತದ್
ಮಲ್ತೆ ಕತ್ತಲೆ ದಾರಗೆಲು ಸರಿ ಮೂಡ್ಡೊನಾಕಸೊಡು ||

1

ಗುಡ್ಡೆಡ್ಡದ್ ಕೈಕಂಜಿಗುಳು ಪಾ -
ಬರ್ತೊ ಪಕ್ಕಿಲು ಗೂಡು ಸೇರಿಯೊ
ಗುಮ್ಮೆ ಮೂಲುದು ಕುಪುಳು ಪುದೆಲ್ಡ್ ಮೂಡೊ ಪಾಡಿಯೊನೆ ||
ಕತ್ತಲೆನೆ ಆಂಡತ್ತೊ ಅರ್ಜುನ
ಅಗ್ನಿ ಕುಂಡೊಗು ಲಾಗಿವನ ಈ
ಪನ್ನಗನೆ ಸೂ ಬಾಣೊ ಬುಡುದೇ ಅಗ್ನಿ ಲಕ್ಕಾಯೆ ||

2

ಆ ಜಯದ್ರತೆ ಗುರುನ ಕೋಟೆಡ್
ಏರೆಗ್ಲ ತೋಜಂದೆ ಇತ್ತ್ದ
ಸೂರೈ ಕಂತ್‌ನ ತೂದು ಪಿದಡಿಯೆ ದೈರೊ ಮಲ್ತೊಂದು ||
ಪಾರ್ತೆ ಸೂತವೆ ರಾಸಿ ಮಲ್ತದ್
ವಾಸುದೇವ್ ಅಡ್ಲೊ ಬೂರುದು
ಬಾಸೆ ನಡತ್‌ಜಿ ಯಾನ್ ಬದುಕುನೆ ದಾಯೆ ಪಂಡೊಂದು ||

3

ಕಾಟೋಗೇ ಬಲಿ ಬನ್ನಗಾಯೆನೆ
ಪ್ರೀತಿದಾ ತನ ಬುಡೆದಿನಕಾಲೆನ್
ಏತ್‌ಲಾ ನೆನೆತೊಂದು ಕಣ್ಣೆಡೆ ನೀರ್‌ನರಿಪಾದ್ ||
ತಾನ್ ಬಲಿ ಬರ್ಪಿಂಚಿ ಪೊರ್ತುಡು
ಆ ಜಯದ್ರತೆ ಪಾರ್ತೆ ಸೈಪ್ಪುನ
ತೂಪೆ ಪಂಡ್‌ದ್ ಕಾಟೊದೆದುರುಡು ಉಂತ್ಯೆ ನಿಲ್ಲೊಂದು ||

4

ಕ್ರಿಷ್ಣೆ ಆಯನ್ ತೂಯಿ ಸಾತ್‌ಗ್
ಚೆಕ್ಕೊಜಾರಯೆ ಸೂರೈನಡ್ಲೊಗು
ಇತ್ತ್‌ನೆನ್ ಆಪಗನೆ ಬೂಮಿಡ್ ಜಾಂಡ್‌ ಕತ್ತಲೆನೆ ||
ಬೊಲ್ಪು ಬೆಳಗ್‌ದ್ ಕಳಟ್ ಇತ್ತ್‌ನ
ಸೈನೊ ಸಾಗರೊ ಬೂರ್ನ ಪುಣಕುಲು
ನೆತ್ತರ್‌ದ ಕಿರೆ ಕರ್ಲ ಮಾಸೊನು ತಿನ್ನಿ ನಾಯಿಗುಳು ||

5

ಮಾತ ಕಣ್ಣೆಗ್ ಆಂಜಿನಾಪಗ
ಆ ಜಯದ್ರತೆ ಕ್ರಿಷ್ಣ ದಿಸ್ಸಿಗ್
ತೋಜಿಯೆನೆಲಾಪಗನೆ ಪಾರ್ತಡ ತೋಜದೇ ಪಂಡೆ ||
ತೂಲ ಸೈಂದವೆ ಉಂತುದುಲ್ಲೆನೆ
ಸೂರೈ ಕಂತ್ಯೆರೆ ನನಲ ಪೂರ್ತುಲ
ಬಾಕಿ ಉಂಡುಯ ಕೆರ್ರ ಆಯನ್ ಬಾಣೊ ಬುಡುದಿತ್ತೆ ||

6

ಸಿವನ ಪಾಸುಪತಾಸ್ತೊ ದೆತ್ತದ್
ಬುಡಿಯೆ ಸೈಂದವ ತೆರೆಕಾಲಪಗನೆ
ತರೆನೆ ರಟ್ಟದ್ ನೆಲಕ್ ಬೂರ್ನಗ ಬುಡಡ ಬೂರೈರೆಗ್ ||
ನನಲ ಪರಿತದ ಮಂತ್ರೊ ಬಾಣೊನು
ಸ್ಮರಣೆ ಮಲ್ತದ್ ರಟ್ಟ ತರೆನೇ
ಪರಬೆ ಕ್ಷತ್ರಪೆ ಪನ್ನುನಾಯನ ಕೈಕ್ ಬೂರೈರೆಗ್ ||

7

ಪ್ರಾರ್ತನೆನ್ ಮಲ್ತೊಂದು ಬುಡ್ಲಯ
ಬಾಣೊನೇ ಪನ್ನಗನೆ ಅರ್ಜನೆ

ಬಾಣೊ ಮಂತ್ರೊನು ಪನ್ನ ಬುಡಿಯೆನೆ ಬಗ್ಗಿ ಬಾವನೆಡ್ ||
ಕೋರಿದಾ ಕಿನ್ನಿನ್‌ಲ ಗಿಡಿಕುಲು
ರಾಪವೊಂದೇ ಪೋಪುನಂಚೆನೆ
ಆ ಜಯದ್ರತೆ ತರೆನ್ ಬಾಣೊನೆ ತುಚ್ಚಿದೊಯ್ತೊಂದು ||

8

ಪೊರ್ತು ಕಂತ್‌ನಗಪಗ ಕ್ಷತ್ರಪೆ
ಪೊರ್ತು ದೇವರೆಗ್‌ಗೊರ್ ಕೊರ್ನಗ
ಅಲ್ಪನೇ ಅಂಗೈಗ್‌ಲಾ ತರೆ ಬೂರ್ನ ಸಾತ್‌ಗಯೆ ||
ತಿರ್ತ್ತ ಬೂಮಿಗ್ ಪಾಡ್‌ದಾನಗ
ರಟ್ಟದಾ ತರೆ ಸಾರೊ ಸಾರೊನೆ
ಪುಟ್ಟಿ ತರೆಕುಲು ಪೊಡಿಯೆ ರಟ್ಟಿಯೊ ಬಾರಿ ಆಚಿರೊನೆ ||

9

ಕೇನ್‌ಲರ್ಜುನ ಸೈಂದವನ ತರೆ
ಆಯನಮ್ಮನ ಕೈಕ್ ಬೂರ್ನಗ
ಆಯೆನೇ ನೆಲಕೈನ್ ಪಾಡ್‌ಗ ಸಾರೊ ತುಂಡಾಂಡ್ ||
ದೇವೆರೆಡ ವರೊ ಕೇನ್ ಕ್ಷತ್ರಪೆ
ಆಯನಾ ಮಗ ತರೆನೆ ಬೂಮಿಗ್
ಏರೆ ಕೈಡ್‌ದ್ ಬೂರ್ನ ಆಂಡನೆ ತುಂಡು ತುಂಡಾವು ||

10

ಇದ್ದಿಡಾಯಗ್ ಮರಣೊ ಕಂಡಿತೊ
ಬರೈರೆಗ್ ಇದ್ದಿಂದ್ ವರೊನೇ
ಕೊರೈರಾಯನ ದೇವೆರ್‌ಂದ್‌ದ್ ಎಂಕ್ ತೆರಿನೇಟ್ ||
ನಿನ್ನಡನೆ ತರೆಕೊಂಜಿ ಬಾಣೊನು
ಬುಡ್ಲ ಪಂಡ್‌ದ್ ಯಾನ್ ಪನ್ನನೆ
ಇತ್ತೆ ಅರ್ತಾಂಡತ್ತೊ ಸೈಂದವೆ ಎಂಚಿ ಸೈಪ್ಪೆಂದ್ ||

|| ಇರ್ಲದಾ ಲಡಯಿಡ್ ಗಟೋತ್ಕಜನ ಮರಣೊ ||

ಸೈತ್ತೆ ಸೈಂದವೆ ಪನ್ನ ಕೌರವೆ
ಕ್ಷತ್ರಲೆದ ಸಬೆ ಕೂಡ್‌ದಾನಗ
ಬತ್ತೆರಾಡೆಗ್ ದ್ರೋಣ ಕರ್ಣಿರ್ ಗುರುನ ಮಗೆ ಮಾತ ||
ಬತ್ತನಕಾಲೆನ್ ತೂದು ಕೌರವೆ
ಕೊಚ್ಚಿಯರ್ ನಿಕ್‌ಲೇತೋ ಸೈಂದವ
ರಚ್ಚಣೆನ್ ಮಲ್ತೊಂದು ದ್ರೋಣೆರೆಗಾಂಡೊ ಸಂತೋಸು ||

1

ಮೆಗಿದಿನಾ ಕುಂಕುಮೊನು ಒರಿಪೆರೆ
ನಿಕ್‌ಲೆಗಾಯಿಜೆ ದಾಯೆಗೆಂಕಿ

ಲಡಯಿ ಪಂಡ್‌ದ್ ಬೇಜರೊಡು ಕುರುರಾಯೆ ದೂರ್ದಗನೇ ||
 ಸಬೆಟ್ ಇತ್ತ್‌ನ ಕರ್ಣೆ ಲಕ್ಕಾದ್
 ಮುರಹರನ ಕಾರ್ಬಾರ್‌ಡಾಯೆನೆ
 ನಮನ್ ದೀಡಯೆ ಆಂಡ ಕೌರವ ಕೇನ್ ಎನ್ನಡನೆ||

2

ದೇವರಾಜೆನೆ ಕೊರ್ನ ಸಗ್ಗಿದ
 ಬಾಣೊ ಎನ್ನಡ ಉಂಡು ಅರ್ಜುನ
 ನೇನ್ ದೀಡಯೆ ಸೈಂದವನ್ ಕೆರಿ ಪಗೆನ್ ಸಂದಾವೆ ||
 ಈತ್ ಪನ್ನಗ ಗುರುನ ಮಗಕೇ
 ಬಾರಿ ಕೋಪೊನೆ ಏರ್ಡ್ ಪಂಡನೆ
 ದೇವೆರೆನ್ ದೂರೊಂದು ಅರಸುನ ಮನಸ್ ಮೆಚ್ಚಯೆರೆ ||

3

ತನನ್ ತಾನೇ ಪುಗರುನಾಯೆನೆ
 ಪರಮ ದ್ರೋಹಿಯೆ ಪನ್ನಿ ಸಂಗತಿ
 ಕುರುಪತಿಗ್ ಗೊಂತಾಯ್ಲೆ ನನಲಾ ಕರ್ಣ ಬಿಸರ್ತಿಗೆ ||
 ಈತ್‌ನೇಟ್‌ಲ ತೂದು ಇರ್ಲೇ
 ತೂಯ್ನು ಗುಂಡಿಗ್ ಪಗೆಲ್ ಬೂರ್ದವೆ
 ಬೋಳು ಬಪ್ಪನ ಲೆಕೊನೆ ಕರ್ಣನ್ ನಂಬ್ಬೆ ಕುರುರಾಯೆ ||

4

ಅಸ್ವತ್ತಾಮನ ನುಡಿನ್ ಕೇಂಡ್‌ದ್
 ಕರ್ಣೆ ಕೋಪೊಡು ಬೆರಣ ಮಾಣಿಗ್
 ಉನ್ನಿ ಸಂಗತಿ ಮಾತ್ರೊ ಗೊಂತತ್ತಂದೆ ಕಾಳಗೊದ ||
 ಗುಟ್ಟು ತೆರಿಯಂದಿತ್ತೆ ಪನ್ನೆನೆ
 ನಟ್ಟ್ ತಿನ್ನುನ ನಟ್ಟ್ ಪರ್ದೇ-
 ಸ್ಯತ್ತೊ ಕೌರವ ಇಂಬ್ಯನೇನೇ ದೀಡಯೆಂದ್‌ದ್‌ಲ ||

5

ಕತ್ತಿನೈತ್ತ್‌ದ್ ಕಡ್ಬೆರೆಂದ್‌ದ್
 ನುರುಕ್ಕನಗನೇ ಅಸ್ವತ್ತಾಮೆಲ
 ಕಡ್ಲೊ ಬೀಜದ್ ಉಂತ್ಯೆ ಲಡಯಿಗ್ ಬಲಯ ಕರ್ಣಂದ್ ||
 ಇರ್ಲೆಲ ಕಾದ್ಯೆರೆಗ್ ಉಂತ್‌ನ
 ಗತ್ತ್‌ನೇ ತೂವೊಂದು ಕೌರವೆ
 ಬತ್ತದುಂತಿಯೆ ನಡುಕು ನಿಕ್ ನಿಕ್‌ಲಿತ್ತೆ ಕಾದುನೆನೊ ||

6

ತೆಲಿಪಯೆರೊ ಪಾಂಡವೆರ್ ಪಂಡ್‌ದ್
 ತಲೆತ್‌ದುಂತಯೆ ಇರ್ಲೆರೆನಲಾ -
 ಅಪಗ ದ್ರೋಣೆನೆ ಲಕ್ಕದುಂತುದು ಪಂಡೆ ಕೌರವಡ ||
 ಇನಿಯೆ ಇರ್ಲೆಡ್ ಪಾಂಡವೆರೆನ್
 ಲಗಡಿದೆಪ್ಪುವೆ ಜೀಟಿಗದ ಸರಿ
 ಬೊಲುಪು ಮಲ್ತ್‌ದ್ ಕೊರ್ಲ ಪನ್ನಗ ತಯರ್ ಮಲ್ಪಾಯೆ ||

7

ಲಚ್ಚೊ ಜೀಟಿಗರುವೆ ಸುತ್ತುದು
 ಎಣ್ಣೆ ಮಯ್ತ್‌ದ್ ಪೊತ್ತದಾನಗ
 ಬೊಲ್ಪು ಬೆಳಗ್‌ದ್ ಆಂಡ್ ಕಾಳಗೋ ಕಳಟ್‌ಲಾಪಗನೆ ||
 ಧರ್ಮನಂದನೆ ರಾತ್ರೆಡಿಂಚಿನ
 ಬೊಲ್ಪು ಬೆಳಗ್‌ನೆ ಎಂಚ ಪಂಡ್‌ದ್
 ಕ್ರಿಷ್ಣ ಸ್ವಾಮಿಡ ಕೇನ್ನಗಾಯೆನೆ ಪಂಡೆ ದ್ರೋಣನವೆ ||

8

ಕುಟಿಲ ನೀತಿದ ಗೊಬ್ಬು ಇಂದೆಕ್
 ಅಸುರ ವೀರೆನೆ ಆ ಗಟೋತ್ಕಜೆ
 ಬರಡ್ ಪಂಡ್‌ದ್ ನೆನೆಪುಲಾಪಗ ಬರ್ಲೆ ಕಂಡಿತೊನೆ ||
 ನೆನೆತಿ ಸಾತ್‌ಗ್ ಲಚ್ಚೊ ರಕ್ಕಸ -
 ನಕ್‌ಲೆ ಒಟ್ಟುಗು ಬತ್ತೆ ನೇಲ್ಯೆ -
 ಮ್ಮನವೆ ಪಾದೊಗು ಅಡ್ಲೊ ಬೂರುದು ಕೇಂಡೆ ದಾಯ್ತಂದ್ ||

9

ಯುದ್ಲೊ ಧರ್ಮೊನು ಮೀರ್ಲೆ ದ್ರೋಣೆರ್
 ಇರ್ಲೆಡೇ ಲಡಯಿಗ್‌ಲ ಜೀಟಿಗ
 ಪೊತ್ತಯೆರ್ ನಮೊ ದಾಯೆ ಜಾರುನೆ ನಂಕ್ ತೀರಂದೊ ||
 ಐಕ್ಕ್‌ ನಿನ್ನನ್ ನೆನೆತೆ ಮಗ ಈ
 ಗೆಲ್ಪುನೆಕ್ ಅಡ್ಲಿದ್ಲಿ ಗುರುಕುಲೆ -
 ಗರ್ದುನೆನೆ ಎದುರುಂತುವೆನೊ ಪನ್ ನಿಕ್ ಹಂಗಿದ್ಯೆ ||

10

ಈರೆನಾಸೀರ್ವಾದೊಡೇನೇ
 ಪೋದು ಗುರುಕುಲೆಗದುರು ಉಂತುವೆ
 ದಾಲ ಪೋಡ್ಯಡೆ ಪನ್ದ ಪಿದಡಿಯೆ ಕಾಳಗೊದ ಕಳಕ್ ||
 ಆಯನೊಟ್ಟುಗು ಲಚ್ಚೊ ರಕ್ಕಸ -
 ನಾಕ್‌ಲೆಲ ಪಿದಡೊಂದು ಬನ್ನಗ
 ಸೇರ್‌ದಿತ್ತೆರ್ ದ್ರೋಣನಾಜ್ಜೆಡ್ ಮಲ್ಲ ಕುರುಸೇನೆ ||

11

ಮಾಯಕೊದ ರಕ್ಕಸೆರ್ ನೋತುದು
 ಆನೆ ಕುದುರೆಲೆ ಸೇನೆದಕೆಲೆನ್
 ಏತ್‌ಲಾ ಪುಣ ಪಾಡ್ಲೆ ಆನಗ ಬತ್ತೆ ಕೌರವೆನೆ ||
 ಆ ಸುಯೋದನೆ ಬತ್ತಿ ಸಾತ್‌ಗ್
 ವೀರೆನಾ ಬಲ ಬೀಮ ಮಗನೇ
 ನೋಪುನಗ ಕೈ ದೇರ್ಪೆರೆಗ್ ತೀರಂದೆ ಪಾರಿಯೆನೆ ||

12

ಪೆಟ್ಟೆ ತಿಂದ್‌ದ್ ದ್ರೋಣನೆದುರುಡು
 ಕರ್ಣ ಸಕುನಿನ್ ಸಲ್ಪನಕ್‌ಲೆನ್
 ಲೆತ್ತಾದೇ ಪಂಡೊಂಡೆ ನಮೊ ನನ ಲಡಯಿನುಂತಾದ್ ||
 ನಟ್ಟೆ ತಿನ್ನುನ ಎಡ್ಲೆ ರಾಜ್ಯೊನು

ಧರ್ಮಜೆನೆ ಆಳುವೆನೆ ಪನ್ನಗ
ಸಲ್ಯ ಮನಸ್‌ಗ್ ಬೇಜರಾದ್‌ಲ ಪಂಡೆ ಕರ್ಣಡನೆ ||

13

ದಾನೆ ಮಲ್ಪನೆ ಬೀಮನಾ ಮಗೆ
ದಾನವೆರೆ ಸಂತಾನೊ ಆಯ್ಕೆಟ್
ಮಾಯಕೊಡು ನಮನಿತ್ತೆ ದೀಡಯೆ ಆಯಗೆದುರಾದ್ ||
ಆ ಬಕಾಸುರ ಮಗನ ಒಟ್ಟುಗು
ಮಾಗದನ ಮಗೆ ಕಾಲನೇಮಿಲ
ವೀರ ಸುಕುಮಾರಕೆಲ ಪೋವಡ್ ದಾನವೆರೆನೊಟ್ಟು ||

14

ಆಂಡ್ ಪಂಡ್‌ದ್ ಲೆತ್ತೆನಾಯೆನೆ
ಆ ಹಿಡಿಂಬಾಸುರನ ಮಗನೇ
ಆ ಜಟಾಸುರ ಮಗನ ಒಟ್ಟಿಗೆ ಪಾರ್‌ದೆತ್ತಿಯೆನೆ ||
ಬಾರಿ ಬಿಸ್‌ಡ್‌ಲಾ ಗಟೋದ್ಗಜ -
ಡಾಪಗನೆ ಕಾದ್‌ನಗ ಸೈತ್ತೆರ್
ದಾನವೆರೆ ಬಾಲೆಗುಳು ಬೀಮನ ಪಗೆಟ್ ಕಾದೊಂದು ||

15

ರಕ್ಕಸೆರೆ ಮಗನಕ್‌ಲ್ ಕಾದ್‌ದ್
ಸೈತ್ತೆರ್‌ಂದ್‌ದ್ ಕೌರವಾದಿಲು
ಕರ್ಲ ಮೋನೆನ್ ತೂನಗಾಯೆನೆ ಪಂಡೆನಾಕ್‌ಲೆಡ ||
ಅರ್ಜುನನ್ ಕೆರೈರೆಗ್ ಬೋಡದ್
ಸಗ್ಗಿದಾಯುದೊ ಉಂಡು ಐನೇ
ಇತ್ತೆ ಕಳೆಯೆಡ ದಾನೆ ಮಲ್ಪೊಲಿ ಬುಕ್ಕೊ ಪನ್‌ಲೆನಡ ||

16

ನಮನ್ ಮಾತೆರೆನಾ ಗಟೋದ್ಗಜೆ
ಕೆರಿಯೆಡನೆ ನಮೊ ಏರ್ಡ ಕಾದುನೆ
ಬದ್‌ಕಿಯೊಡ ತೂವೊನುಗೊ ಪನ್ನಗ ಕರ್ಣೆನೊತ್ತೊಂಡೆ ||
ರತೊಟು ಕುಲ್ಲುದು ಸಗ್ಗಿದಾಯುದೊ
ಪತೊನುದೇ ಪಿದಡಿಯೆನೆಲಾಪಗ
ಜಯೊ ಜಯೊಂದುದು ಬೊಬ್ಬೆ ಪಾಡೈರ್ ಪಿರವು ಸೈನಿಕೆರ್ ||

17

ಅಸುರನೆದುರುಡು ತೇರ್‌ನುಂತದ್
ಬಿರ್‌ಸತಿಗೆಡಾ ಕರ್ಣೆ ಪಗರಿನ್
ಬಿರುಕು ಕೊಲ್ಪದ್ ನಾರ್‌ನೊಯ್‌ದ್ ಬುಡಿಯೆ ಸೈಲಂದ್ ||
ಪಗರಿ ದಾನವನೆದೆಕ್ ತಾಗ್‌ನೆ
ಗಪಗ ಪತ್ತೆರೆ ಕೈನ್ ನೀಡಿಯೆ
ಕಯಿಕ್ ತಿಕ್ಕಂದವ್ವೆ ತಿಗಲೆಗ್ ಪೊಗ್ಗುದಾನಗನೆ ||

18

ಕಳಟ್ ಬೂರುದು ಪುಡೆರುನಾಪಗ
ಅಸುರ ವೀರೆರ್ ಒಟ್ಟು ಸೇರ್‌ದ್
ಎದುರು ಉಂತ್ಯೆರ್ ಬಾಣೊ ಬುಡಿಯೆರ್ ಕರ್ಣಗಾಪಗನೆ ||
ಅಕ್‌ಲೆನಾಯೆನೆ ಗಣ್ಯೊ ಮಲ್ತಜೆ
ಪಗರಿರಾಪಯೆ ಮಾತೆರೆಗ್‌ಲಾ
ಪುಡೆರ್ ಪುಡೆರ್‌ದ್ ಕಳಟ್ ಬೂರೈರ್ ಬೀಮ ಮಗನೊಟ್ಟು

|| ದ್ರೋಣಾಚಾರ್ಯೆರೆ ಮರಣೊ ||

ಇರ್ಲೊದಾ ಕಾಳಗೊಡು ಸೈತ್ತೆನ್
ರಕ್ಕಸಿನ ಮಗನೊಟ್ಟು ಇತ್ತೆನ್
ರಕ್ಕಸೇರ್‌ಲ ಕಾದ್ ಕಾದ್‌ದ್ ಸೈತ್ತೆರಾ ದಿನೊನೆ ||
ಬುಕ್ಕೊ ಬೀಮಾರ್ಜುನೆರ್ ಸೇನೆನ್
ಕೆರ್ಲ ಪಾಡೈರ್ ದ್ರಸ್ವ ದ್ಯುಮೈಲ
ಒಟ್ಟು ಸೇರ್‌ದ್ ಮಲ್ತಿ ಲಡಯಿಡ್ ಆಂಡ್ ಪೊಡಿ ಪೊಡಿಯೆ ||

1

ಮಾತೆರೆಗ್ ಅರ್ಜುನನ ಪಿರವುಡೆ
ಕಾದ್ ಕಾದ್‌ದ್ ನಿರ್ದೆಡಾಕ್‌ಲ್
ತೂಂಕ್‌ನೆನ್ ತೂವೊಂದು ಪಾರ್ತೆನೆ ಪಂಡೆನಕ್‌ಲೆಡನೆ ||
ಯಾವು ಕಾಳಗೊ ಒಂತೆ ನಿದೆರಾಲೆ
ಕಾಂಡೆಲಕ್ಕದ್ ತೂಕೊ ಪನ್ನಗ
ಮಾತೆರ್‌ಲ ನಿದೆರಿಯೆರೆ ಸಿಬಿರೊದ ಉಲಯಿ ಪೊಗ್ಗಿಯೆರ್ ||

2

ಸೂರೈ ಮೂಡುದು ಬನ್ನಗಾಕ್‌ಲ್
ಮಾತೆ ಲಕ್ಕದ್ ಕಳಕ್ ನುಕ್ಕೈರ್
ದ್ರೋಣನಾಚ್ಚೆಡ್ ಕೌರವೆರೆ ಕಡೆತಕ್‌ಲ್ ಪಿದಡಿಯೆರ್ ||
ಬಾರಿ ಬಿಸ್‌ಡ್ ಕಾದೈರಾಕ್‌ಲ್
ಆನೆ ಕುದುರೆಲು ತೇರ್ ಕಾರ್ನಡೆ
ಪೂರ ಪೊಡಿ ಪೊಡಿಯಾದ್ ದ್ರೋಣನ ಗೇಲ್ ಕಂಡಿತೊನೊ ||

3

ಬಯ್ಯ ಮುಟ್ಟಲ ಪುಣೆದ್ ಪುಣೆದ್‌ಲ
ಗೆಲ್ಪಿಯೆರೆ ತೀರಂದೆ ರಾತ್ರಡ್
ಪೊಗ್ಗಿಯೆರ್ ಸಿರಿ ಕ್ರಿಷ್ಣನೊಟ್ಟಿಗೆ ಪಾಂಡವೆರೆ ಸೇನೆ ||
ಧರ್ಮಜಡನೇ ಪಂಡೆ ಶ್ರೀ ಹರಿ
ನಮ್ಮೊ ಸೇನೆಗ್ ಸೋಲು ಕಂಡಿತೊ
ಬರ್ಪುನೆನ್ ಉಂತಯೆರೆ ಗುರು ಮಗೆ ಸೈತ್ತೆ ಸೈತ್ತೆಂದ್ ||

4

ನಮನ ಕಡೆತಕ್‌ಲೇರ್‌ಲಾಂಡಲ
ಪನಡ್ ಅಪಗನೆ ದ್ರೋಣೆ ಪಗರಿನ್

ತಿರ್ತ್ ಪಾಡ್ಡ್ ಲಡಯಿನುಂತವೆ ಪನ್ನಗರ್ಜನೆನೆ ||
ಕೆಬಿಕ್ ಕೈ ಪತ್ತೊಂದು ಸಿವ ಸಿವ
ಗುರುನು ಕೆರೈಗಾದ್ ಎಂಕುಲು
ಕಳುನು ಪಂಡ್ಡ್ ನರಕೊ ಗುಂಡಿಗ್ ಬೂರೊಡಯ ಕ್ರಿಷ್ಟ ||

5

ಈತ್ ಪನ್ನಗ ಬೀಮೆ ಕ್ರಿಷ್ಟಡ
ತಾನೆ ಪನ್ನದೊತ್ತೈ ರಾತ್ತೆಡ್
ಮಾತೆರಾಲ ನಿದೆರಿಯೆರ್ ಸೂರೈನೆ ಮೂಡೈ ಮೂಡಯಿಡ್ ||
ಕಾಂಡೆ ಲಕ್ಕ್ಡ್ ಕರ್ಮೊ ಕಿಯೆರ್ನ್
ಪೂರ ತೀರ್ದದ್ ಕಳಕ್ ಜತ್ತೆರ್
ಬೇರಿ ವಾದ್ಯೊ ನಗಾರಿ ಸವೈದ ಗೌಜಿದಬ್ಬರೊಡು ||

6

ದೋಣೆಲಾ ಮೀಯೊಂದು ಬಗ್ಗಿದ
ಪೂಜೆ ಸಂದದ್ ಬಿಲ್ಲ ಬಾಣೊನು
ಮೂಡಿಗೇನ್ ತಿಕ್ಕಾದ್ ಪಿದಡಿಯೆ ಅಪಗ ಸೈನಿಕೆರ್ ||
ನಾಲ್ ರಂಗೊದ ವೀರನಾಕ್ಲ್
ಆಕ್ಲಾಕ್ಲೆ ವಾಹನೊಡು ಸರಿ
ಏರ್ದೇ ಪಿದಡಿಯೆರ್ ಕಾಳಗೊ ಕಳಕ್ ನುರ್ಕಿಯೆರೆ ||

7

ದೋಣೆರಾನಿಯೆ ಮಲ್ತಿ ಲಡಯಿಡ್
ತೇರ್ ಪೊಡಿ ಪೊಡಿಯಾದ್ ಕುದುರೆಲು
ಆನೆಲೊಟ್ಟಿಗೆ ಸೈತ್ ಬೂರೈನ್ ಲೆಕ್ಕೊ ಮಲ್ಪೆರೆಗ್ ||
ಏರೆಗ್ಲ ತೀರಂದ್ ಅಪಗನೆ
ಬೀಮೆನದುರುಗು ಬತ್ತ ಪಂಡನೆ
ದಾಯೆ ಮಲ್ಪರ್ ಲಡಯಿ ಗುರುಕುಲೆ ಸೈತ್ತೆ ಈರೆ ಮಗೆ ||

8

ಮಗೆನೆ ಸೈತ್ನ ದುಕ್ಕೊಡಾಂಡಲ
ಲಡಯಿನುಂತಲೆ ಪನ್ನಗಪಗನೆ
ಕಳುನು ನಂಬಯೆ ಬೀಮೆ ಪಂಡ್ನ ಮಗೆನೆ ಚಿರಂಜೀವಿ ||
ಲಡಯಿನುಂತವುಜಿಂದ್ ರಾಪಯೆ
ಪಗರಿನೇತ್ಲ ವೈರಿ ಸೇನೆಗ್
ಪುಡೆರ್ ಪುಡೆರ್ದ್ ಸೈತ್ತೇರೇತ್ಲ ವೀರ ಪಟು ಬಟೆರ್ ||

9

ಆತ್ ಪೂರ್ತುಗು ಬಾನೊ ಜತ್ತದ್
ಯೋಗಿ ರುಸಿಕುಲು ಕಣ್ಣೆ ಕಾಸ್ಯಪ
ರಾಡೆಗತ್ತೈರ್ ದೋಣೆ ಮಲ್ಪುನ ಕಾಳಗೊದ ಕಳಕ್ ||
ಅತ್ತಿ ಬಾರದ್ವಾಜೆ ವಿಸ್ವಾ -
ಮಿತ್ರ ಗೌತಮೆಗಾರ್ಗೈ ರಿತ್ತೆರ್
ಮಿತ್ರ ಬಾವೊಡು ಕೇಂಡೆರಾಕ್ಲ್ ದೋಣಡಾಪಗನೆ ||

10

ಬ್ರಾಣೆ ಆವೊಂದೀಯೆ ಯುದ್ಯೊಡು
ವೀರೆರೆನ್ ಕೆರ್ಪನವು ಸಮೊನಯ
ಪಾತಕೊನು ತುಂಬ್ಯತ್ತೊ ಹಿಂಸೆನ್ ಈಯೆ ಮಲ್ತೊಂದು ||
ಸೋಲು ಗೇಲ್ದ ಹಂಗ್ ದಾಯೆಗ್
ಜಾತಿಡೇ ಚತ್ತಿಯೊನೊ ಸಾಸ್ತೊನು
ವೇದೊಲೆನ ನೀತಿಲೆನ್ ತೆರಿಪಪಿ ಸುದ್ಯೊ ಬ್ರಾಣೆತ್ತೊ ||

11

ಲಡಯಿನುಂತದ್ ಪೋಲ ಪನ್ನಗ
ಮನಸ್ ಮರ್ಗದ್ ಆಂಡ್ ಪಂಡನೆ
ಅಪಗ ಪೋಯೆರೆ ಬತ್ತಿ ರುಸಿಕುಲು ಬಾನೊನೇರೊಂದು ||
ಲಡಯಿ ಮಲ್ಪುಜಿ ಪನ್ದ ಕುಲ್ದಿನ
ಗಪಗ ವೈರಿಲೆ ಬಾಣೊ ತಾಗ್ಡ್
ಪಿಸ್ ಕೋಪೊಡು ಲಡಯಿ ಮಲ್ಪುನಗಾಂಡ್ ನೆಂಪೊಂಜಿ ||

12

ಮಗೆನೆ ಸೈತ್ತೆಂದೆಕಡ್ ಬೀಮೆನೆ
ಪನತ್ನವು ಕಳುವತ್ತ ಸತ್ಯೊನೊ
ಪಿನೊಡು ಪಂಡ್ಡ್ ಆ ಯುದ್ಧಿಸ್ಪಿರನಾಡೆಗತ್ತಿಯೆನೆ||
ಎನ ಮಗೆನೆ ಸೈತ್ನದಾನೆ ಅಂದೊಯ
ಪನ್ ಯುದ್ಧಿಸ್ಪಿರ ಪನ್ನಗಾಪಗ
ಸಯಿತ್ನದಿನೇ ಅಸ್ವತ್ತಾಪನೆ ಪನ್ನಿ ಆನೆನೆಯ ||

13

ಪನ್ನಿ ಆನೆನೆ ಇಂಚ ಪನ್ನಗ
ಕ್ರಿಷ್ಟ ಸಂಕೊದ ಸೊರೊನು ಲಕ್ಕಯೆ
ಸೈತ್ನದಿನೆ ಆನೆಂದ್ ಪನ್ನುನ ಕೇನ್ರಿ ದೋಣಗ್ಲ ||
ಅಸ್ವತ್ತಾಪನೆ ಸೈತ್ತೆ ಪಂಡ್ಡ್
ಯುದ್ಯೊ ಮಲ್ಪುಜಿ ಯಾನ್ ಯೋಗೊಡು
ಕುಲೈ ಕಳಟೀ ಪನ್ದಲಾಯೆನೆ ಕುಲೈನಾ ಕಳಟ್ ||

14

ಕಣ್ಣ ದಿಪ್ಪಿನ್ ಮೂಂಕುದಾಕೊಡಿ -
ಟಲ್ಪ ಉಂತದ್ ಉಸುಲು ಮಿತ್ತ್ಗ್
ತಿರ್ತ್ ಒಯ್ತದ್ ಬುಡಿಯೆ ಸ್ವಾಸೊನು ಓಂ ಪಂಡೊಂದು ||
ದ್ವಸ್ವದ್ಯುಮ್ಮೆನೆ ಬತ್ತ ತೂನಗ
ಆತ್ಮೊದಾ ಕಿಟಿ ನೆತ್ತಿಡೆನೆ ಸರಿ
ರಟ್ಟುನೆನ್ ತೂವೊಂದು ಕಡ್ಡನೆ ಪುಣಕ್ ದೋಣನವೆ ||

ಶ್ರೀ ಅನಂತಕೋಡಿ ಸುಬ್ರಾಯ ದೇವೆರೆ ನಿರ್ಪೊಡು,
ಪರಿವಾರೊ ದೈವೊಲೆನ ಬೆರಿಸಾಯೊಡು,
ಕೆಲಿಂಜದೂರುಡು ನಿಲೆಯಾಯಿನ ಅಪ್ಪೆ ಸಿರಿ ಉಳ್ಳಾಲ್ದಿನ ದಯೊಟು,
ಕೆಲಿಂಜ ಬಾರತೊದ ದೋಣ ಪರ್ವೊ ಪೂರ್ತಿಯಾಂಡ್.

ತುಳು ಕೆಲಿಂಜ ಬಾರತೊ

ಕರ್ಣ ಪವೊರ್

ಸುರುತ ಸಂದಿ

ಆನಿ ರಾತ್ರೇಡ್ ಕೌರವೇಸ್ವರೆ
ಬಾರಿ ದುಕ್ಕೊಡು ಸಬೆನ್ ಕೂಡ್ಲಯೆ
ರಾದೆನಾ ಮಗೆ ಸಲೈ ಸಕುನಿಲು ಇತ್ತೆರಾ ಸಬೆಟ್ ||
ದ್ವೋಣನವೆ ಮಗೆನಸ್ವತ್ತಾಮನೆ
ಮೋನೆಗೇ ಸರಿ ಮುಸುಕು ಪಾಡ್ಡ್
ಆ ಸಬೆತ ಪಿರವಿತ್ತೆ ಕುಲ್ಲುದು ದುಕ್ಕೊ ಮಲ್ತೊಂದು ||

1

ಅಜ್ಜ ಬೀಸೈರ್ ಪಗರಿ ಮಂಚವು -
ಡುಲ್ಲೆರೇ ಚೆತ್ತೊಂದು ಗುರುಕುಲು
ಪತ್ತನಾಯುದೊ ತಿರ್ತ್ ದೀಡ್ಡ್ ಸೊರ್ಗೊ ಸೇರಿಯರ್ ||
ಗೆಲ್ಲುನಾಸೆನೆ ಇದ್ದಿ ಪಂಡ್ಡ್
ದುಕ್ಕೊಡುಸುಲುನು ಬುಡ್ಡು ಕೌರವೆ
ಪನ್ನುನೆನ್ ಕೇನೊಂದುಲಸ್ವತ್ತಾಮೆ ಲಕ್ಡುಂತೈ ||

2

ದಾಯೆ ಕೌರವ ದುಕ್ಕೊ ಮಲ್ವುವ
ವೀರೆರಿದೈರೊ ನಮ್ಮ ಪೈಕಿಡ್
ಪಾಂಡು ಬಾಲ್ಗೆನ್ ಲಗಡಿ ದೆಪ್ಪುನ ತಿಗಲೆ ತಂಕೊದವೆ ||
ಸೂರೆರೆಡ್ ಕಲಿ ಕರ್ಣೆ ಉಲ್ಲೆನೆ
ಬಾರಿ ಸೌರೊದ ಬಂಟಿನಾಯಗ್
ಸೇನೆದದಿಕಾರೊಲೆನ್ ಕೊರ್ದಯ ಪಟ್ಟೊಗೇರ್ಸಾಡ್ ||

3

ಗುರು ಮಗನ ಪಾತೆರೊನು ಕೇಂಡ್ಡ್
ಪುಗರಿಯೆರ್ ಸಬೆಟ್ತನಾಕ್ಲ್
ಕುರು ಕುಲೊತ ಚಲಗಾರೆ ಕೌರವರಾಯೆ ತರ್ಪಾಯೆ ||
ಬೆರೆಣೆರೆನ್ ದಂಡಾದಿಕಾರಿನ
ತರೆ ಕಿರೀಟೊನು ಮುಂಡೊ ಪಟ್ಟಿನ್
ಲೆಪುಡಯೆನೆ ಪೊಣ್ಣಲೆನ್ ಆರತಿ ಬೆಳಗಯೆರೆಗಾದ್ ||

4

ಕರ್ಣನೇ ಸಿರಿ ಪೀಟೊ ದೀಡ್ಡ್
ಕುಲ್ಲಯೆರ್ ಬ್ರಾಣೆರ್ಲ ಸೀರ್ತೊನು
ಮೈತ್ತೆರಾಯನ ತರೆಕ್ ವೇದೊದ ಮಂತ್ರೊ ಪಂಡೊಂದು ||

ಸಿಮ್ಮೊ ಮೋನೆದ ಮುಂಡೊ ಪಟ್ಟಿನ್
ಕಟ್ಟೆನಗನೇ ವಾದ್ಯೊನುರಿತರ್
ಪೋಣ್ಣಲಾರತಿ ಪತ್ಯೆರಾಪಗ ಆಂಡ್ ಜಯಗೋಸೋ ||

5

ಕಾಣೆಗೆನ್ ಸಾಮಂತೆರಪಗನೆ
ದೀಡಿಯೆರ್ ಸೇನಾದಿಕಾರಿನ
ಕಾರ ಮುದೆಲ್ಡ್ ಕೌರವೇಸ್ವರೆ ಲಕ್ಡುಂತೊಂದು ||
ಕೇನ್ಲೆಯೆ ವೀರಾದಿ ವೀರೆರ್
ಕಾಳಗೊನು ಕಲಿ ಕರ್ಣೆ ಪಂಡ್ಡ್
ರೀತಿಡೇ ಮಲ್ತೊಂದು ಜಯೊ ಸಿರಿನೊಯ್ವಿ ನಮ್ಮಾಡೆ ||

6

ಕಾಳಗೊಡು ನಿಜೊ ಪ್ರಾಣೊ ಪೋಂಡಲ
ಪಾರ್ಡ್ ಬದುಕುನ ಬೊಡ್ಡಿ ಸೈತ್ತ್ಡ್ -
ಪೊಂಡ ಸೊರ್ಗೊದ ಸುಕೊನು ಪಡೆವೊಲಿ ಅವ್ವೆ ಬೋಡಾಂಡ ||
ಪಾರ್ನಕಲೆಗ್ ನರಕೊ ಪ್ರಾಪ್ಪಿಯೆ
ಆವು ದೈರೊಡು ಕಳಕ್ ಜಪ್ಪುಲೆ
ಮಾತ ವೀರೆರ್ ಒರಿಲ ತಪ್ಪವಡೆಂದ್ ಪನ್ನಗನೆ ||

7

ಬೊಳ್ಳಿ ಮೂಡುದು ಬೊಲ್ವು ಏರ್ಂಡ್
ನಿತ್ಯೊ ಕರ್ಮೊನು ತೀರ್ಪದಾಕ್ಲ್
ಅಕ್ಷೆನಾಕ್ಷೆನ ವಾಹನೊಡು ಸರಿ ಏರ್ಡ್ ಪಿದಡಿಯೆರ್ ||
ಕರ್ಣೆ ದಳಪತಿ ಆಯ್ನು ಸುದ್ದಿಯೆ
ಎತ್ತದಾನಗ ಪಾಂಡು ಬಾಲ್ಗೆಗ್
ಅರ್ಜುನನ ಬುಜೊ ರಟ್ಟೆನಗನೇ ಸಂತೊಸಾಂಡಯಗ್ ||

8

ಬೇಕೊ ಬೇಕೊನೆ ಕರ್ಮೊ ಕಿರೈನ್
ತೀರ್ಪದಾಕ್ಲ್ ಲಡಯಿದೈತ್ತೊಡು
ಮಾತ ಪಿದಡ್ಡ್ ಕಳಕ್ ಎತ್ತೈರ್ ಬೇರಿದಾ ಸೊರೊಟು ||
ಆಪೆಕೀಪೆಕ್ ರಡ್ಡ್ ಕಡೆತಲ
ಸೇನೆ ತಯರ್ಡ್ ಉಂತ್ನಾಪಗ
ಕಾಳಗೊಗು ಪಿದಡಿಯೆರೆ ಸೂಚನೆ ಆಂಡ್ ದಲಪತಿಲೆ ||

9

ತೇರ್ ತೇರ್ಗ್ ತಾಂಟ್ಯೊ ಸಾರತಿ
ಸಾರತಿನ ಸರಿ ನೆರೈ ಆನೆಲು
ತಾಡಿಯೊನೆ ಸೊಂಡಿಲ್ಡ್ ತೇರ್ಗ್ ರಾಯರಾವುತೆರ್ ||
ರಾಪಯೆರ್ ಕುದುರೆಲೆನ್ ಕುದುರೆಲೆ
ಮೇಲ್ಗೇ ಮುಂಗಾರ್ ದೀಪದ್
ಆನಗನೆ ಕಾರ್ಡೆತ ವೀರೆರ್ ನುರ್ಕು ನುರ್ಕಿಯೆರ್ ||

|| ಭೀಮ ಸಾತ್ಯಕಿನಹಲೆ ಪೌರುಸೊ ||

ಲಡಯಿ ಸುರುವಾನಗನೆ ಪಿದಡಿಯೆ
ಗದನ್ ಪುಗಲ್ಡ್ ದೀಡ್ಲೆ ಬೀಮನೆ
ಕಳಕ್ ಬನ್ನಗ ನಡಪಿ ಗತ್ತಡೆ ಅದಾರ್ದಾ ಕಳನೆ ||
ಪೊದುಪುನಗ ಓಡುಡುದು ರಟ್ಟುನ
ಪೊರಿತ ನಮುನೆಡ್ ಸೇನೆ ರಟ್ಟಾದ್
ಕೆಲವುದಾಕ್ಲ್ ಅಡಿಕ್ ಬೂರೈರ್ ಕೆಲವು ಪಾರಿಯೆರ್ ||

1

ಕೌರವನ ಕಡೆತಕಲೆ ಪೈಕಿಡ್
ದೈರೊ ಇತ್ತನ ಕೆಲವು ವೀರೆರ್
ಕೈಟ್ಲಾಯುದೊ ಪತ್ತೊನಂದೇ ಎದುರು ಉಂತಿಯೆರ್ ||
ಸೈತ್ತಂಡಲ ಬಲಿಪಯೊನೆ ಪಂಡ್ಡ್
ಮೈಕಯಿಟ್ ಬಲೊ ಇತ್ತನಾಕ್ಲ್
ಸೈತೇರೇತಲ ಬೀಮನೆದುರುದು ಲಡಯಿ ಮಲ್ತೊಂದು ||

2

ತೇರುಲೇ ಪೊಡಿಯಾಯೊ ಆನೆಲು
ಬೂರ್ದು ಸೈತ್ತೊನೆ ಕುದುರೆನೇರ್
ರಾವುತೆರೆ ಪುಣ ಬೂರ್ಡ್ ಕಾರ್ಡೆತಕಲೆ ಉಸುಲಿದ್ದಿ ||
ಸೋಲು ಕೌರವಗಾಂಡ್ ಪಂಡ್ಡ್
ಕ್ಷೇಮದೂರ್ತೆಂದೆನ್ನಿ ವೀರೆನೆ
ಆನೆನೇರ್ ಆಡೆ ಬತ್ತದ್ ಬೀಮಗೆದುರುಂತ್ಯೆ ||

3

ಬಿಲ್ಗೇ ಬಾಣೊಲೆನ್ ಕೊಲ್ವದ್
ರಟ್ಟಿಯೆನೆಲಾ ಬೀಮ ಸೇನಗ್
ಬತ್ತಿ ಬಾಣೊಲೆಗಾಯೆ ಹಾಕಿಯೆ ಗದನ್ ತಿರ್ಗಾದ್ ||
ತನ್ನಡಲ ಮೂಡಿಗಡ್ ಇತ್ತನ
ಮಲ್ಲ ಸಗ್ಗಿದ ಪಗರಿಲೆನಲಾ
ಒಯ್ತ್ ದೆತ್ತದ್ ಬುಡಿಯೆನಾನೆದ ಮೇಲ್ದ ವೀರಗಲ ||

4

ಎದೆಕ್ ತಾಗ್ನ ಪಗರಿಡಾಯೆನೆ
ತಿರ್ತ್ ರಟ್ಟಿಯೆನಪಗ ಮಾವುತೆ
ಪುಣನ್ ತರ್ಕ್ದ್ ಏತೊ ಬುಲೈನೆ ಕಾಳಗೊದ ಕಳಟ್ ||
ಬುಲುಪುನೆನ್ ಕೇನೊಂದು ಆಡೆಗ್
ಗುರುಮಗೆನೆ ಪಾರೊಂದು ಎತ್ತಿಯೆ
ಬಿರುನು ಕುರ್ಕದ್ ಬಾಣೊ ರಾಪಯೆ ಬೀಮಗಾಪಗನೆ ||

5

ಬೆರಣ ಮಾಣಿಗ್ ದಾಯೆ ಲಡಯಿದ
ಕಳನೆ ಉಣಿಯೆರೆ ಇತ್ತನಾಡೆಗ್
ಬಲಿಪುನವೆ ಎಡ್ಡೆತ್ತೊ ಪಂಡ್ಡ್ ಬೀಮ ಹಾಕಿಯೆನೆ ||
ಅಡಿಗ್ ಮಲ್ತ್ದ್ ಬಂಜಿ ದಿಂಜಪಿ
ಕೆಲಸೊ ನಿಕ್ಕಲ ಎಡ್ಡೆ ಲಡಯಿದ
ಕಳಟ್ ಪೊಂಬುರ್ದು ಸೈತ್ತಡೇರಯ ಸಾವು ಮಲ್ಪುನಯೆ ||

6

ನಿನ್ನ ಮಗನೇ ಆ ಗಟೋದ್ಗಜೆ
ಸೈತ್ತದೆನೆ ನನ ನಿಕ್ಕ ಗತಿಯೆ
ಇದ್ದಿ ಪಂಡ್ಡ್ ಬಾಣೊ ರಾಪಯೆನಸ್ವತ್ತಾಮೆನೆಲ ||
ಬತ್ತಿ ಬಾಣೊನು ತುಂಡು ಮಲ್ತ್ದ್
ಬುಕ್ಕೊ ಗದೆಟೇ ಒಂಜಿ ಹಾಕಿಯೆ
ನೆತ್ತೆರ್ನ್ ಕಕ್ಕೊಂದು ಬೂರಿಯೆ ದ್ರೋಣನಾ ಮಗನೆ ||

7

ಆತ್ ಪೊರ್ತುಗು ಎತ್ತೆರಾಡೆಗ್
ವೀರ ಕರ್ಣಲ ಸಲೈ ಸಕುನಿಲ
ಬೀಮಗೇ ಸರಿ ಸುತ್ತು ಪಾಡ್ಡ್ ಬಾಣೊರಾಪಯೆರ್ ||
ಮಾತೆರೆನ ಪಗರಿಲೆನ್ ತಲಿತ್ದ್
ಕಾಳಗೊನೆ ಮಲ್ಪುನೆನ್ ಸಾತ್ಯಕಿ
ತೂದು ಬತ್ತನೆ ಬೀಮ ಸಾಯೊಗು ಯುದ್ಧೊ ಮಲ್ಪಿಯೆರೆ ||

8

ಕರ್ಣಗಾಕಿಯೆ ಸಲ್ಪನಲ್ಪನೆ
ಮಗ್ ಪಾಡಿಯೆ ಸಕುನಿನವೆ ಸರಿ
ಜುಟ್ಟುಡೊಯ್ತದ್ ಕಾರ್ಡ್ ತೊರಿತೆನೆ ತಿಗಲೆಗಾಯನವೆ ||
ನೆತ್ತೆರ್ನ್ ಕಕ್ಕಿಯೆರ್ ಸಾತ್ಯಕಿ
ಪೆಟ್ಟೆ ಹಾಕ್ನೆಟಕ್ಲ್ ಸೇನೆನ್
ಲೆತ್ತದುಂತದ್ ಲಡಯಿ ಮಲ್ಪುಯೆರಲ್ಲ ಸಾತ್ಯಕಿಡ ||

9

ನಾಲ್ ರಂಗೊದ ಸೇನೆದಾಕ್ಲ್
ನಾಲ್ದಿಕ್ಕಡೆ ಸುತ್ತು ಪಾಡ್ಡ್
ಸಾತ್ಯಕಿಗ್ ಹಾಕ್ನಗ ಬೀಮಲ ಹಾಕೈ ವೈರಿಲೆಗ್ ||

ಬೀಮ ಸಾತ್ಯಕಿನಕ್‌ಲೆ ಪೆಟ್ವೆಡ್
ಮಾತ ಸೈನಿಕನಕ್‌ಲ್ ಸೈತ್ತೆರ್
ಕಾಳಗೊದ ಕಳ ನೆತ್ತೆರ್‌ಡ್ ಸರಿ ಮುರ್ಕುದಾಂಡಪಗ ||

|| ರಾಯ ರಾಯೆರೆ ಲಡಯಿ ||

ಸಲ್ಯೆ ಸೇನೆನ್ ಪೊಡಿಯೆ ರಟ್ಟಪಿ
ಬಿರತ್ತಿಗೆನುಂತಾವೊ ಪಂಡ್‌ದ್
ಎಲ್ಯಕ್‌ಲ್ ದ್ರಾಪದಿನ ಜೋಕುಲು ಬತ್ತೆರೆದುರಾದ್ ||
ಮಲ್ಲಕ್‌ಲೆಗೆದುರುಂತುನವೆ ಈ
ಬುದ್ಧಿ ನಿಕ್‌ಲೆಗ್ ಏರ್ ಪಂಡ್‌ದ್
ಕೊರ್ನೆ ಲಡಯಿಡ್ ಸೈಲೆ ಪಂಡ್‌ದ್ ಅಪ್ಪೆ ನೂಕಿಯಲೊ ||

1

ಮಾನೊ ಕೆಟ್ವೆನ ಮಾದ್ರಬೂಪತಿ
ದಾನೊ ಮಲ್ತದ ನಿನ್ನ ಮೆಗಿದಿನ್
ಪಾಂಡುರಾಜ್‌ಗ್ ಪಣವುದಾಸೆಗ್ ಮೋನೆ ನಿಕ್ಕುಂಡೊ ||
ಆಂಡಲಾ ನಿನ ಮೆಗಿದಿ ಬಾಲ್ಗೆಗೆ
ಕಾಳಗೊಡು ಎದುರುಂತ್ಯೆರಾದೇ
ಚೋರು ತಿನಿಯೆರೆಗಾದ್ ಕೌರವ ಕಡೆಕ್ ಸೇರೊಂಡ ||

2

ಲಡಯಿ ಜೋಕ್ಲೆನ ಗೊಬ್ಬು ಪಂಡ್‌ದ್
ನೆನೆತರೋ ನಿಕ್‌ಲಿತ್ತೆ ತೂಲೆಗೆ
ಪಗರಿದಾ ರುಚಿ ಬೆಲ್ಲೊದಡ್ಯೆನೊ ಪನ್ನಾರಾಪಯೆನೆ ||
ದ್ರುಪದರಾಯನ ಮಗಲೆ ಜೋಕುಲು
ಬಿರುಕು ಮಂತ್ರೊದ ಪಗರಿ ಕೊಲ್ವದ್
ಬುಡಿಯೆರಾ ಮಾದ್ರೇಸ ತಿಗಲೆಗ್ ದೈರೊ ಎಂಚಿನವೊ ||

3

ಬಲೊಟು ಸಲ್ಯೆನೆ ಪನ್ನಿ ಪುದರ್‌ಡ್
ಮೆರೆಯಿನಾಯೆನೆ ಜೋಕ್ಲು ಬುಡ್ಯವೆ
ಪಗರಿಲೆನ್ ರಟ್ಟಾದ್ ಬಿಲ್ವೆಗ್ ಬಾಣೊ ಕೊಲ್ವನಗ ||
ಕೆರುವೆ ಚೋಕ್ಲೆನ್ ಸಲ್ಯೆ ಪನ್ನಗ
ಎದುರು ಲಾಗಿಡ್ ಬತ್ತೆ ಸಾತ್ಯಕಿ
ಎನಡ ತೂಲಯ ಸಲ್ಯೆ ಪಂಡ್‌ದ್ ಬಾಣೊ ರಾಪಾಯೆ ||

4

ಸಾತ್ಯಕಿನ ಬಾಣೊದವೆ ಪೆಟ್ವೆಡ್
ಬೂರೈ ತರೆ ತಿರ್ಗನೆಟ್ ಸಲ್ಯೆನೆ
ಆಪಗನೆ ದುಸ್ವಾಸೆ ಬತ್ತೆರ್‌ಡ್ ಯಾದವನ ಎದುರು ||

ಕಾದ್‌ಕಾದ್‌ ಪಾರ್ವ ಜಾಗೆಡೆ
ಏಪೊಗುಲ ಸರಿ ಪಂತಿ ಕೊಡಿಪಂ -
ದಾತ್ ರಬಸ್‌ಡ್ ಪಾರೈ ಕಣ್ಣೆಗ್‌ಲಾಂಜಿಚೆನೆ ದುಸ್ಸೆ ||

5

ಮೆಗಿಯೆ ಪಾರ್‌ದ್ ದೆತ್ತೆ ಮರೈದಿ
ಕುರುನ ವಂಸೊದ ಮಾನೊನೊರಿಪೆರೆ
ಪುಣೆಡ್ ತೂಪೆನೆ ಪನ್ನ ಕೌರವೆ ಬಿರುನು ಕುರ್ಕಾದ್ ||
ಎದುರು ಬತ್ತೆರ್‌ಡ್ ವೀರ ಸಾತ್ಯಕಿ
ತಿಗಲೆಗೇ ಸರಿ ನೋಟೊ ಪತ್ತೆರ್‌ಡ್
ಬುಡಿಯೆ ಪಗರಿನ್ ಅಪಗ ಪೆಟ್ವೆಡ್ ಕಕ್ಕೆ ನೆತ್ತೆರ್‌ನ್ ||

6

ಸಾತ್ಯಕಿನ ರತೊ ಪೊಡಿಯೆ ರಟ್ಟದ್
ಸಾರತಿನ ಕೆರ್ದಾದ್ ಸೇನೆದ
ಆನೆ ಕುದುರೆಲೆ ಪುಣನ್ ಪಾಡಿಯೆ ರಾಯ ಕೌರವೆನೆ ||
ಆ ಯುದ್ಧಿರೆ ತೂದು ಕೌರವ -
ಗೇನೆ ಎದುರಾಪೆಂದ್ ತೇರ್‌ಡ್
ಸೀದ ಬತ್ತೆರ್‌ಡ್ ಬಾಣೊ ರಾಪಯೆ ತೇರ್‌ಗ್ ಕೌರವನ ||

7

ತೇರ್ ಪೊಡಿ ಪೊಡಿಯಾಂಡ್ ಸಾರತಿ
ಬೂರು ಸೈತ್ತೆನೆ ಅಪಗ ಕೋಪೊಡು -
ಲಾ ಸುಯೋದನೆ ಎದುರು ಉಂತುದು ಕೇಂಡೆ ಧರ್ಮಜಡ ||
ಪಾಂಡು ಬಾಲೆಲು ನಿಕ್‌ಲ್ ಅತ್ತೆಯ
ರಾಜ್ಯೊದಾ ನಿಜೊ ಹಕ್ಕು ಕುಂತಿನ
ಜೋಕುಲೆಗ್ ಬರ್ಪುನೆನೆ ಎಂಚಂದೆಂಕ್ ಪನೊಡೀಯೆ ||

8

ನಿಕ್ಕು ಯಮನವೆ ರಾಜ್ಯೊಡುಪ್ಪನ
ಹಕ್ಕು ಮಾತ್ತೊನೆ ಆಡೆ ನಿನ್ನನ್
ಇತ್ತೆ ಕಡಪುಡುವೆಂದ್ ಬಾಣೊನು ಬುಡಿಯೆ ಕುರುವೀರೆ ||
ಬತ್ತಿ ಬಾಣೊನು ತಲಿತೆ ಧರ್ಮಜೆ
ನಿನ್ನ ಅಮ್ಮೆನೆ ಕುರುಡೆ ಆಯ್ಕೆಟ್
ನಿಕ್ಕು ಬುದ್ಧಿನ್ ಕಲ್ಪಯಿಜೆ ಸರಿ ಈಯೆ ಸತ ಮೂರ್ಕೆ ||

9

ಇಸೊನು ತಿನ್ನಯ ಇಲ್ಲ ಪೊತ್ತಯ
ಕುಟುಮೊದಾ ಪೊಣ್ಣನವೆ ಸೀರೆನ್
ಒಯಿಪಯೆನೆ ಕಡು ಮೂರ್ಕ ಜುಗರಿಡ್ ರಾಜ್ಯೊನೊಯ್ತೊಂಡ
ಹರಿನ ಮಾನೊನು ದೆತ್ತ ನಿನ್ನನ್
ಸುರೆರೆ ಸೂಳೆಲೆ ಚಾಕ್ರಿದಾಯೆನೆ
ಕೊನೊದು ಪೋನಗ ಬುಡ್ಡಯಿನ ಗುರ್ತೊಂಡೊ ಪನ್‌ಲೆನಡ

10

ಸಾದುಲೆಗ್ ಸರಿ ಕೋಪೊ ಬತ್ತಾದ್ -
ಲಾಂಡ ಎಂಚಿನ ಆವು ಪಂಡಾದ್
ಎರೆಗ್ಲ ತೆರಿಯಂದ್ ಧರ್ಮಜೆ ಬುಡ್ಡ ಮಂತ್ರಾಸ್ತ್ರೊ ||
ಆ ಸುಯೋದನ ತಿಗಲೆದುಲಯಿಗ್
ನೂರುಲಾನಗ ಮತಿಯೆ ತತ್ತಾದ್
ಬೂರು ಪುಡೆರಿಯೆ ಕಳಟ್ ಸೂರೈನೆ ಕಂತ್‌ದಾನಗನೆ ||

11

ಕತ್ತಲೆನೆ ಅಂಡಂದ್ ಸಂಕೊದ
ಸವೊನಾ ದಳಪತಿಲು ಲಕ್ಕಯೆ -
ರಲ್ಪಡಾದ್ ಕೌರವನ್ ಚಾಕರಿದಕ್‌ಲ್ ತುಂಬಿಯೆರ್ ||
ಧರ್ಮನಂದನೆ ಸಿಬಿರೊದುಲಯಿಗ್
ಬನ್ನಗನೆ ಸಿರಿ ಕ್ರಿಷ್ಟೆ ಪಂಡೆನೆ
ಸಜ್ಜನನ ಬಂಜುರಿಯೆ ಕೌರವ ಕುಲೊಕು ಬಡಬಾಗ್ನಿ ||

|| ಕರ್ಣಗ್ ಸಲ್ಯೆ ಸಾರತಿ ಆಯೆ ||

ರಡ್ಡೆ ಕಡೆತಲ ಸಿಬಿರೊದುಲಯಿಗ್
ಬತ್ತಿ ವೀರೆರ್ ಲಡಯಿದೈತ್ತೊನು
ಬಿಚ್ಚಯೆರ್ ಮೆಯಿ ಕೈತ ಗಾಯೊಗು ಮರ್ಡ್ ತಾಗಯೆರ್ ||
ಪೆಟ್ಟೆ ತಿಂದಾನ ಕೌರವೇಸ್ವರೆ
ಮಲ್ತನಾರೆಕಿಡಾದ್ ಲಕ್ಕನೆ
ಇರ್ಲದಾ ಸಬೆ ನಡಪಿ ಚಾವಡಿಡಾಯೆ ಕುಲ್ಲೊಂದು ||

1

ಗುರುಮಗನ್ ಕೃತವರ್ಮ ಕೃಪೆರೆನ್
ಬರ್‌ಪಯೆನೆ ಕರ್ಣನ್‌ಲ ಕೈತಡೆ
ಲಡಯಿಡಿ ನಿ ಪಾಂಡವೆರೆ ಕೈಮೇಲಾಂಡೆ ಕಲಿ ಕರ್ಣ ||
ಹಿರಿಯೆರಚ್ಚೆರ್ ದ್ರೋಣ ಗುರುಕುಲು
ಮಲ್‌ಪೆರಾವಂದಾನವೆ ಕೆಲಸೊನು
ಮಲುಪನಯೆ ಕರ್ಣಂದ್ ದಳಪತಿ ಪಟ್ಟೊ ಕಟ್ಟಿತ್ತೊ ||

2

ಎರೆನೇನಿನಿ ನಂಬೊಡುಯ ಪನ್
ಬಾಗ್ಯೊ ಹೀನೆನೆ ಆಯೆ ಕುರ್ರಿ -
ಆಂಡ್ ಕುರುಕುಲೊ ಇತ್ತೆ ಪಂಡಾದ್ ದುಕ್ಕೊ ಮಲ್ಪುನಗ ||
ಸಾರತಿನ ಬಲೊಟಾ ದನಂಜಯೆ
ಕಾಳಗೊಡು ಗೆಲ್ಲುನೆನೆ ಅತ್ತಡ
ಆಯೆ ಗಣ್ಯೊನೊ ಎಂಕ್ ಕೌರವರಾಯೆ ಕೇನ್‌ಲಯ ||

3

ಮುರ ವಿರೋದಿಯೆ ಪಾರ್ತ ಸಾರತಿ
ರತಿಕಗೇಪೊಲ ಸಾರತಿನ ಬಲೊ
ಒದಗದಾಂಡನೆ ಗೆಲ್ಲುನೆತ್ತೊಯೆ ನಿಕ್ಕ ತೆರಿಯಂದೊ ||
ಹರಿಯೆ ತೇರ್‌ದ ಕುದುರೆ ದೇರ್‌ಗ
ಕುರಿಲ ರತಿಕನೆ ಆಂಡ ಗೆಲ್ಲುಯೆ
ಎನ್‌ ದೂರುನೆ ದಾಯೆ ಕ್ರಿಷ್ಟೆಗ್ ಸರಿತ ಸಾರತಿನ ||

4

ಒದಗಯಡ ಪಾಂಡವೆರೆ ತರೆತವೆ
ಬರವುನುರ್ದವೆ ನಂಬು ಕೌರವ
ಮುರಹರಗ್ ಸರಿಯಾಯಿ ಸಾರತಿನೊದಗಯೆರೆ ತೀರ್ವೊ ||
ಅರಸುಲೆಗ್ ಸರಿ ಸಾಟಿಯಾಯಿನ
ರತೊನು ನಡಪವಿ ಬುದ್ಧಿವಂತನ
ಒದಗವನ ಪನ್ನಗನೆ ಕೌರವೆ ಪಂಡೆ ಸಂತೊಸುಡು ||

5

ನಿಕ್ಕ ಸರಿತವೆ ಏರ್ ಸಾರತಿ
ಉಲ್ಲೆರಾಯ ಪನ್ ಅಕ್‌ಲೆನೇನೇ
ಒತ್ತಯೊಡು ಕೊಂಡವೆ ಪನ್ನಯ ಏರ್ ಆವುಂದು ||
ಸಲ್ಯ ಬೂಪತಿ ಕುದುರೆ ಹೃದಯೊನು
ಕಲ್ತನಯೆ ರತೊ ಕಲ್ಪೊ ವಿದ್ಯೆನ್
ಒಪ್ಪಿಯೆಡ ಆವಾಯೆ ಕ್ರಿಷ್ಟೆಗ್ ಸರಿ ಸಮಾನೊದಯೆ ||

6

ಅಪಗನೇ ಕೌರವೆನೆ ಸಲ್ಯನ
ಸಿಬಿರೊದುಲಯಿಗ್ ಪೋಯಿ ಸಂಗತಿ
ತೆರಿದ್ ಲೆಪುಡದ್ ಉಲಯಿ ಕುಲ್ಲಯೆ ರಾಜ ಮರೈದಿಡ್ ||
ಕುರುಕುಲೇಸ್ವರೆ ರಾತ್ರೇಡೇಡೆಗ್
ಸವರಿ ಮಲ್ತನೆ ದಾಯೆ ಪನುವನ
ಎನಡ ಎಂಚಿನ ಕಾರ್ಯೊ ಉಂಡುಯ ಬೇಕೊ ಪನ್‌ಲೆನಡ ||

7

ಅಜ್ಜನೇನೇ ನಂಬುದಿತ್ತೆನೆ
ಪತ್ತ ದಿನೊ ಕಾದನರ್ ಕಳಟೀ
ಬಿಲ್ಲೆ ದಕ್ಕಾದ್ ಪಗರಿ ಮಂಚವುಡಾರ್ ಚೆತ್ತನೆಟ್ ||
ಎನ್ನ ಬವುಸೊನೆ ಪೋಂಡು ಪಂಡಾದ್
ಬುಲ್ಪುನಗ ದ್ರೋಣೆರ್‌ಲ ತಿಗಲೆಗ್
ಬೊಟ್ಟುದೇ ಎಂಕಾರ್ ದೈರೊನು ಪನ್ನಗೇನಪಗ ||

8

ಆರೆಗೇ ದಳಪತಿನ ಪಟ್ಟೊನು
ಬಾರಿ ದೈರೊಡು ಏನ್ ಕಟ್ಟಿಯೆ

ಆಂಡ ಎನ್ನವೆ ಹಣೆಬರೊನು ಇನಿ ಏರ್ಡ ಪನುವೇನ್ ||
ಆರ್ಲಾ ಧರ್ಮಜೆನೆ ಪಂಡ್‌ನ
ನೀರ್ ಕೂಟಂದ್‌ನವೆ ಪಜಿ ಕಳು
ಕೇಂಡ್‌ದಾಪಗ ಸೊಗೊ ಸೇರೈರ್ ಅತ್ತೊ ಮಾಮಣ್ಣ ||

9

ಕರೈ ಆಂಡಲ ಗೆಲ್ಲೆ ಪಂಡ್‌ದ್
ಕಟ್ಟಿಯೆನೆ ದಳಪತಿನ ಪಟ್ಟೊನು
ಅರುನ್ನನ ಬಿಸ್‌ತಿಗೆ ಕ್ರಿಷ್ಟನ ಗೊಬ್ಬು ಜೋರಾಂಡೆ ||
ಕ್ರಿಷ್ಟ ಪಾತರ್‌ನ ರತೊಕು ಸಾರತಿ
ತಳ್ಳುಣೊಗು ಪೊಡಿ ಉಪ್ಪುದಂಚೆನೆ
ಒಟ್ಟು ಸೇರ್‌ದ್ ಎನ್ನ ಬಂಜಿಡ್ ಇಸೊನೆ ಬುಳೆದಾಂಡೆ ||

10

ಈರ್ ಇತ್ತೆದ್ ಇಂಚಿ ಆಂಡೆಂ-
ದೇನ್ ಬೇಜರೊಡುಲ್ಲೆ ಈರನ
ಮಾನೊಗೇ ಮಹ ಕೊರತೆ ಮಲ್ಲೆನೆ ಯಾನ್ ಮಾಮಣ್ಣ ||
ದಾನೆ ಆವೊಡು ಪನ್ನ ಎನ್ನಡ
ಸೀದ ಪನ್ನುನ ಬುಡುದು ಮಾರ್ವಡಿ -
ನಾಕಲೆನ ಮುಂಡಾಸ್‌ದಂಚೆನೆ ದಾಯೆ ಸುತ್ತನೆಯೆ ||

11

ಪಾತರ್‌ಗೇ ಸಿರಿ ಕ್ರಿಷ್ಟ ಸಾರತಿ
ಆಯಿನೆಟ್ ಗೆಲ್ಲುವೆನೆ ಇದ್ದಿಡ
ಆಯೆ ಕರ್ಣಗ್ ಸರಿತ ಬಂಟೆನೊ ಪನ್‌ಲೆ ಈರೆನಡ ||
ಈರ್ ಕ್ರಿಷ್ಟನ ಲೆಕೊನೆ ಕರ್ಣಗ್
ಸಾರತಿಯೆ ಆಯರ್‌ಡ ಇರೈರ್
ಜೋಡಿ ಸರಿ ಸರಿಯಾಂಡ್ ಏಗಿತೊಡೀರ್ ಕಮ್ಯತ್ತ ||

12

ಕರೈ ಸಾರತಿಯಾದ್ ಈರೇ
ಗೆಲ್ಲದಾಯನ್ ಹಸ್ತಿನಾವತಿ
ಪಟ್ಟೊದಾ ಮಣೆ ಎಂಕ್ ಸಾಸಿತೊ ಮಲ್ಲಿ ಮಾಮಣ್ಣ ||
ದುಸ್ಸೆ ಪಂಡ್‌ನ ಪಾತೆರೊನು ಸರಿ
ಸಲೈ ಕೇಂಡ್‌ದ್ ಕೋಪೊದುರಿಟೇ
ಕಣ್ಣ ಕೆಂಪಾಂಡಯನ ನೌಂಡುನೆ ತುಚ್ಚೆ ಪರುಕಡೆಯೆ ||

13

ದಾನೆ ಬಗ್‌ಳೆಯ ಪನ್ನ ನನ ಒರೊ
ಯಾನೆ ಸಾರತಿ ಆವೊಡಯ ಆ
ರಾದು ಸಾಂಕ್‌ನ ಮಗಕ್ ಕರ್ಣಗ್ ಜಾತಿ ಹೀನಗ್‌ಲ ||
ಏತ್ ಬಿಸೆನೆ ಆಂಡ ಕರ್ಣನ
ಜಾತಿ ಎಂಚಿನ ಪನ್ದ ತೆರಿದನ
ನೀತಿಡಂಕೇ ಕೊರತೆ ಎಂಚಿನ ತೂದು ಪಂಡ್‌ನೆಯೆ ||

14

ಜಾತಿಡೇ ಸ್ತಾನೆಂಕ್ ಇದ್ದಿಯೊ
ಆಳುವೆ ಊರಿದ್ಯೊ ಸಿಮ್ಮೊದ
ಪೀಟೋ ಪಟ್ಟೊದ ಕತ್ತಿ ಚಾಮರೊ ಮಂತ್ರಿ ಪರಿವಾರೊ ||
ನಾಲ್ ರಂಗೊದ ಸೇನೆ ಇದ್ಯೊಯ
ಯಾಗೊ ಯಜ್ಞೊನು ಕನ್ಯದಾನೊನು
ಯಾನ್ ಮಲ್ಪಾದ್‌ಜೆನೊ ಪನ್‌ಪನ್ ಕೊರತೆ ಎಂಚಿನವು ||

15

ಎನಡ ಕೋಪೊನು ದಾಯೆ ಮಲ್ಪರ್
ಕೊರತೆ ಎಂಚಿನ ಮಲ್ಲೆ ಈರೆಗ್
ರತೊಕು ಸಾರತಿಯಾದ್ ಕ್ರಿಷ್ಟಗ್ ಆಂಡೋ ಮಹ ಕೊರತೆ ||
ರತಿಕೆರೆನ್ ಗೆಲ್ಲಯೆರೆ ಏರ್‌ಲ
ಒದಗುನವು ತಪ್ಪತ್ತ ಈರೇ
ಮುರಹರನಲೆಕೊ ರತೊಕು ಸಾರತಿಯಾದ್ ಗೆಲ್ಲಾಲೆ ||

16

ಚಕ್ರವರ್ತಿಗ್ ಸಾಯೊ ಮಲ್ಪುನ
ಧರ್ಮೊ ಪಂಡ್‌ದ್ ಯಾನ್ ಈಡೆಗ್
ಬತ್ತನೆಯೆ ನಿನಡ್ಡೆಂಕ್ ಮಲ್ಲವೆ ಆಂಡ್ ಮರ್ಯಾದಿ ||
ಬ್ರಮ್ಮ ದೇವರ್ ತ್ರಿಪುರ ದೈತ್ಯರೆ
ಕೆರೈಗ್ ಸಿವಗಾರ್ ಸಾರತಿ
ಕ್ರಿಷ್ಟನರ್ಜುನಗಾಯೆನೇ ಸರಿ ಸರಿತ ಜೋಡ್ಯಾಂಡ್ ||

17

ಇರೈಗ್ ಸರಿ ಈರ್‌ಲಾಯರ್ -
ಡೆನ್ನ ಬಾಗ್ಯೊನೆ ಪನ್ದ ಕಾರ್ಗ್
ಅಡ್ಡೊ ಬೂರಗ್ ಸಲೈ ಕೋಪೊನು ಬುಡುದು ಒತ್ತೊಂಡೆ ||
ಮಲ್ಲಕಲೆ ಸಹವಾಸೊ ಏಪೊಲ
ಕಸ್ತೊ ಪಂಡ್‌ದ್ ನೆನೆತ್‌ದಾಯನ್
ಬರೈ ಪಂಡ್‌ದ್ ಕಡಪುಡಿಯೆನೇ ವೀರ ಮಾದ್ರೇಸೆ ||

|| ಕರ್ಣೆ ಲಡಯಿದ ಕಳಕ್ ಎತ್ತೆ ||

ಬರೈ ಪಂಡ್‌ನ ಸಲೈ ಪಿದಡ್‌ದ್
ಬತ್ತೆ ಕೌರವ ಸಿಬಿರೊದುಲಯಿಗ್
ದುಸ್ಸೆನಾಯನ್ ಪುಗರ್ ಪುಗರ್‌ದ್ ಪನ್ನೆ ಕೈ ಮುಗಿದ್ ||
ಕ್ರಿಷ್ಟ ಪಾತರ್‌ನರತೊಕು ಸಾರತಿ
ಕರ್ಣನಾ ರತೊಕೀರ್ ಸಾರತಿ
ಇರೈಲ ಸರಿ ಸಮೊನೆ ಏಗಿತೊಡೇರ್ಲ ಮೇಲತ್ತ ||

1

ಪರಸುರಾಮ್ಗ್ ಸಿವೆನೆ ಕಲ್ಪದ್
ಕೊರುನ ದನುರ್ವೆದೊನುಲ ಅದಮುಗ್
ಮಟೊಟು ಕಲ್ಪವಡಂದ್ ಬಾರ್ಗವಗಾನಿ ಸಿವೆ ಕೊರ್ನ್ ||
ಪರಮ ವಿದ್ಯೆನ್ ಪರಸುರಾಮಡ
ಸರಿಟ್ ಕಲ್ಪನ ಕರ್ಣನದಮೆನೊ
ಮುಗೆರೆ ಸಾಂಕ್ಯೆಡ್ ಸೂತೆನಾಯೆನೊ ಕರ್ಣ ಪನ್ಲೆನಡ ||

2

ಈರ್ ಸಾರತಿಯಾದ್ ಕರ್ಣನ್
ಕಾಳಗೊಡು ಗೆಲ್ವಾದ್ ಕುರುಕುಲೊ
ಈರೆಡ್ಲಾದೇ ಒರಿನೆ ಪಂಡ್ ಪಂಡ್ ಲೋಕೋ ಪುಗರೊಡಿಯೆ ||
ಆಂಡೆಯಾ ಎನಡಾದ್ ನಿನ್ನವು
ಬಾಗ್ಯೊ ಸಿರಿ ಏರುನೆಕ್ ಬೋಡದ್
ರಾದೆನಾ ಮಗಕೇನ್ ಸಾರತಿಯಾಪೆ ನಂಬೊನುಲ ||

3

ಕಳಟ್ ಎನ್ನವೆ ಪಾತೆರೊಗು ಸರಿ
ಮರಿಯದಿನ್ ಕೊರ್ಲೆಡನೆ ರತೊಡುದು
ಪಿದಡ್ಲಾದೇ ಪೋವೆಂದ್ ಪಂಡ್ ಪೋಯೆನಲ್ಪಡ್ಲಾದ್ ||
ತನ್ ಕ್ ಸಾರತಿ ಸಲ್ಯೆ ಆಯಿನ
ಪರಮ ಸಂತೊಸುಡಪಗ ಕರ್ಣನೆ
ಪಗರಿ ಪೂಜೆಗ್ ತಯರ್ ಮಲ್ತೆನೆ ಸಾಲೆಡಾಯುದೊಲೆ ||

4

ವರುಣ ವಾಯು ಕುಬೇರಿಸ್ತೊನು
ಪರಸುರಾಮನ ಮಂತ್ರೊ ಬಾಣೊನು
ಸರಿಟ್ ಸಾಲ್ಡ್ ದೀದ್ ದೂಪೊನು ಕೊರ್ದು ನೈವೇದ್ಯೊ |
ಎದುರುಡರ್ಪಿತೊ ಮಲ್ತಾದಾದಲ
ಚರುನು ಕಲತ್ದ್ ಮುದ್ದೆ ದೀಡ್ಲಾದ್
ಕುರಿನ್ ಗೋಣನ್ ಕೋರಿ ಪಂಜಿನ್ ತರೆನ್ ಕಡ್ಲೊಂದು ||

5

ನಾಲ್ ದಿಕ್ಕ್ಗ್ ಮಾಸೊ ನೆತ್ತೆರ್
ಬೂತೊ ಗಣೊಕುಲೆಗಲ್ಪ ಬಲಸ್ದ್
ಆವರೊಗು ಸಾಕಿನಿಗ್ ಮಾಸೊನು ಇರೆಟ್ ಬಲಸಿಯೆನೆ ||
ದೀಪೊದಾರತಿ ಕೊರ್ಲೆ ಮಣಿನೆಲ
ಆಡದಾಡದ್ ಸೊರೊನು ಲಕ್ಕಯೆ
ಪಾರ್ದನೊಡು ಪಂಡೊಂಡೆ ಜಯೊಸಿರಿ ಒಲಿದ್ ಬರಡ್ಂದ್ ||

6

ದರೈ ದಾಸ್ಡ್ ಜೆತ್ತಾದಾಯೆನೆ
ನಿದ್ರೆ ಮಲ್ತೆಜೆ ಜಾಗರೊಡೆ ತನ

ಪುಟ್ಟಿ ಸಂಗತಿಡೇನ್ ಒರಿಪುಜಿ ಪನ್ದ ನೆನೆತೊಂಡೆ ||
ಕತ್ತಲೆನೆ ಕರಿದಾಂಡ್ ಮೂಡಯಿ
ಬೊಲ್ಪು ಬೆಳಗ್ಡ್ ಆನಗಾಯೆನೆ
ಲಕ್ಕಿ ಮೀಯೆರೆ ಪೋಯೆ ನೀರ್ನ್ ಕೂಟುದಿತ್ತನಡೆ ||

7

ಮೀದ್ ಸೂರ್ಯ್ಗ್ ಅಗ್ಯೊ ಬುಡಿಯೆನೆ
ವೇದೊ ಮಂತ್ರೊಡು ಜಪೊನು ಮಲ್ತದ್
ಕಾಂಡದಾ ಮಹ ಪೂಜೆ ಸಂದದ್ ಕುಲ್ಲೆನಾಪಗನೆ ||
ಆಯನರಮನೆಡಿತ್ತಿ ಬಂಗರ್
ಮಾಣಿಕೊನುಲಾ ಮುತ್ತು ರತ್ನೊನು
ಸೇವಕೆರ್ ಕನಯೆರೆಗ್ ಪನ್ನೆನೆ ಆಯೆ ದುಂಬ್ಬಾನಿ ||

8

ಬುಡೆದಿ ಪದ್ಮಾವತಿಯೆ ಸೇವಕ -
ನಕ್ಲೆಡನೆ ಕಡಪುಡ್ಲನ ಸೊತ್ತುನು
ಬಡವೆರೆಗ್ ಬೆರಣೆರೆಗ್ ದಾನೊನು ಮಲ್ತೆ ಕೈಯೇರ್ಡ್ ||
ಹರಿಯೆ ಪಾಂಡವನಕ್ಲೆ ರಚ್ಚಣೆ
ಮಲುಪುನಗ ಸಲ್ಯವೆ ಸಾರತಿ
ತನೊಟು ಗೆಲ್ಪುನೆ ಎಂಚ ನಡಪುನೆ ಗುರುನ ಪಿರಿಸಾಪೊ ||

9

ವಾಸುದೇವನ ರಚ್ಚಣೆನೊ ಆ
ಬಾರ್ಗವೆರೆ ಪಿರಿಸಾಪೊನೋ ಇನಿ
ಮೇಲ್ ಒವ್ವಂದಿತ್ತೆ ತೀರ್ಪುನು ಕೊರ್ಪುನಾ ದಿನೊನೆ ||
ದಿವ್ಯೊ ಪುರುಸೆರ್ ಆತ್ಮೊ ಸಗ್ಗಿನ್
ಎನ್ನನೇ ಪಡಿಕ್ಕಲ್ ಮಲ್ತದ್
ಇತ್ತೆನೇ ಕುರುಕಂಡೊ ತೆರಸ್ಡ್ ತೂಕೊ ಮಲ್ಪುವೆರ್ ||

10

ಸ್ವಾಮಿ ಕೌರವಗೇನ್ ಲಡಯಿಡ್
ಕಾದ್ ಕಾದ್ ಕಳಟೆ ಸೈತ್ತದ್
ಸಾಕಿನಿನ್ ಕೈಟೆನ್ನ ತರೆನೇ ಹೃದಯೊ ಕ್ರಿಷ್ಣನವೆ ||
ಪಾದೊ ಪದ್ಮೊಡು ಸೇರ್ಡ್ ಉಪ್ಪುನ
ತೂದು ಕೌರವ ಕಣ್ಣಡರಿನವೆ
ನೀರ್ ಎನ್ನವೆ ಪುಣತ ಮೇಲ್ಗ್ ಬೂರ್ಡನೇ ಧನ್ಯೆ ||

11

ನೆನೆತ್ತಾದಾಯೆನೆ ಅಲವುದಂಗಿನ್
ಬುಜೊ ಕಿರೀಟೊನು ಕರ್ಣ ಕುಂಡಲೊ
ತರೆತ ಟೊಪ್ಪಿನ್ ದೀಡ್ಲ ಮೂಡಿಗ್ಗೆ ಬೆರಿಕ್ ತಿಕ್ಕಾದ್ ||
ಪಿದಡ್ನಗ ಪಾಟಕೆರ್ ಪುಗರ್ಡ್
ಜಯೊ ಜಯೊನೆ ಪನ್ನುನೆನ್ ಕೇಂಡ್
ಕುದುರೆಲೆನ್ ಒಡ್ಡಾಯೆ ತೇರ್ಗ್ ಸಲ್ಯೆ ಸಾರತಿಯೆ ||

12

ನರಮನೀಯನ ಜಲೊ ಆತ್‌ನ
ಪನಿಯೆರೆಗ್ ತೀರಂದಿ ಸೌಕೊದ
ಸುಕೊತ ಸಿದ್ಧಿಗ್ ಪನ್ದ ಜ್ಞಾನಿಲು ನಂಕ್ ತೆರಿಪದೆರ್ ||
ನೇತ ಸಿದ್ಧಿದ ಸಾದನೆಗ್ ಸರಿ
ಸಾದಿಲುಪ್ಪನೆ ರಡ್ಡ್ ಒಂಜನೆ
ಸಾದಿ ಸೈರೊದ ರತೊಕುಲಾತ್ಮೊನೆ ರತಿಕಿಯಾಪುನವೆ ||

13

ಸಾರತಿಯೆ ನಿಜೊ ಬುದ್ಧಿ ಕುದುರೆಲು
ಸೇರ್‌ದೈನಿಂದ್ರಿಯೊಲು ರಡ್ಡನೆ
ಸಾದಿ ತೇರ್‌ಗ್ ರತಿಕೆ ಸಾರತಿ ಬೋಡು ಕುದುರೆಗುಳು ||
ಆತ್ಮೋಗೇ ನಿಜೊ ಬುದ್ಧಿದಾ ಮಹ
ಸ್ತಾನೊಡ್ತನ ಸಾರತಿಗ್ ಯಾ -
ನೇತೊ ಬಗ್ತಿದ್ ಸುಗಿಪೆ ಪಂಡ್‌ದ್ ಕೈನ್ ಮುಗಿಯೊಂಡೆ ||

14

ತೇರ್‌ಗೇ ಬಲಿ ಬತ್ತೆ ಕುದುರೆಲೆ
ಮೋನೆ ಮುಂಡೊಗು ಮುತ್ಸೊ ಕೊರೈನೆ
ದೇವರೆನ್ ಸುಗಿತೊಂದು ಏರ್‌ಯೆ ರತೊಕು ಕಲಿ ಕರ್ಣೆ ||
ಆತ್ ಪೊರ್ತುಗು ಕೊಂಬು ವಾದ್ಯೊಲು
ದೋಲು ತಂಬಟೆ ಸೊರೊನು ಲಕ್ಕಯೊ
ವೀರ ಕರ್ಣಗ್ ಜಯೊನೆ ಜಯೊ ಜಯೊ ಪನ್ದ ಪುಗರಿಯೆರ್

15

ರತೊನೆ ಬನ್ನಗ ಪಳ್ಳೆ ಕುದುಕೆರ್
ಸೊರೊನು ಲಕ್ಕಯೊ ಕರಿಯಪುಚ್ಚೆನೆ
ಎದುರು ಕಡತ್‌ದ್ ಮರಿಯೆ ಜಿಡೆದತ್ತೊಂದು ಇತ್ತನವೆ ||
ಅವಸಕುನೊಲೆನ್ ಅಕ್‌ಲ್ ಗಣ್ಯೊನೇ
ಮಲ್‌ತಾಜೆರ್ ರತೊ ಪೊಂಡು ಕಳೊತವೆ
ನಡು ನಡುಕು ತನ್ನೆಡತ್ ಬಲತ್‌ದ್ ಇತ್ತನಾಕ್‌ಲೆನ್ ||

16

ತೂದು ಕರ್ಣೆನೆ ಪನ್ನೆನರ್ಜುನ -
ನೇರ್ ತೂಪವೆರಕಲೆಗೇನೇ
ಬಾರಿ ಬವುಮಾನೊಲೆನ್ ಪಣವುನು ಕೊರೈ ಬಂಗಾರ್ ||
ಪಾರ್ತನೇ ತೋಜಾಲೆ ಪಲುಗುಣೆ
ಓಲು ಉಲ್ಲೆಂದೆನಡ ಪನ್ನೆಯೆ
ಆ ನರನ್ ನಾಡೊಂದು ತೋಜಲೆ ಸವ್ಯ ಸಾಚಿನಲ ||

17

ತೂತರ್‌ಡ ಪನಿ ಜಿಪ್ಪುನಿತ್ತೆನೆ
ಸ್ವೇತ ವಾಹನೆ ನಾ ದನಂಜಯೆ

ಓಲು ಉಲ್ಲೆಂದೆನಡ ತೆರಿಪಲೆ ದಾಲ ಪೋಡ್ಯೊಡ್ಡಿ ||
ಆ ಕಿರೀಟಿನ್ ತೋಜಲೆಯೆ ನಿಕ್ -
ಲೇರ್ದ ಬೀಬಸ್ಸುನುಲ ಎಂಕಿನಿ
ಆಯಡನೆ ಕಾಳಗೊಡು ಪೊಂಬುರ್‌ದು ಜಯೊನು ಪಡೆವೊನೊಡು ||

18

ಅರ್ಜುನನ ಬಾಣೊಲೆಗ್ ತಿಗಲೆನ್
ಒಡ್ಡವೊಡು ಸರಿಟೆನ್ನ ಪಗರಿಗ್
ಆಯ ತಿಗಲೆದ ನೋಟೊ ತಿಕ್ಕೊಡು ಆಯ ನೆತ್ತೆರ್‌ಡ್ ||
ಎನ್ನ ನೆತ್ತೆರ್ ಬೆರೆಕೆ ಆವೊಡು
ಪತ್ತೊಡಾಯನ ಜುಟ್ಟು ಎನ್ನವೆ
ಜುಟ್ಟುನಾಯೆಲ ಒಯ್ತ್ ಮಗ್‌ಪೊಡು ಕಾಳಗೊದ ಕಳಟ್ |

19

ನನೆವೊಡೆಂಕುಲು ನೆತ್ತೆರ್‌ದವೆ
ಬರುಸೊ ಜಪುಡದ್ ಯಾನ್‌ಲಪಗನೆ
ಕಳಟ್ ಬೂರುದು ಪುಡೆರುನಾಪಗ ಬರ್ವೆ ಕುರುರಾಯೆ ||
ಎನನ್ ಗೆಲ್ಪಯೆರಾದ್ ಪುಣೆಯಿನ
ನಿನನ್ ಮರಪಯೆ ಪನ್ದ ಕಣ್ಣೆಡೆ
ಅರಿಪಯೆಡ ನೀರ್ನಾಯೆನಪಗನೆ ಮೋಕ್ಷೊ ಎಂಕಾವು ||

|| ಕರ್ಣ ಸಲ್ಯೆರೆ ಜಟಾಪಟಿ ||

ಕರೈ ಪನ್ನುನ ಕೇನ್ದ ಸಲ್ಯಗ್
ಮಲ್ಲ ನಾಕೊಸಿಯಾದ್ ಪಂಡೆನೆ
ಕೊಚ್ಚುನೆನೆ ದಾಯೆಗ್‌ಯ ಅರ್ಜುನನೇನ್ ತೋಜಾವೆ ||
ಕೊರೈನವು ಈ ಬೊಡ್ಡಿ ನಿನ್ನವು
ಕೊರೈರೆಗ್ ಎಂಚಿನವು ನಿನ್ನಡ
ಉಪ್ಪುನವು ನಿಜೊ ಹಸ್ತಿನಾವತಿದವ್ವೆ ಬದ್‌ಕತ್ತೊ ||

1

ಪಾರ್ತನಿತ್ತೆನೆ ಯಾನ್ ತೋಜವೆ
ದಾನೆ ಮಲ್ತೆರೆ ತೀರು ನಿಕ್ಕಲ
ಬಾಂಗ್ ಪತ್ತುನೆ ದಾಯೆ ಪನ್ನಯ ಪಳ್ಳೆ ಕುದೈಲೆಕೊ ||
ಮೂಜಿ ಲೋಕೊಡು ವೀರೆನೆಂದ್‌ದ್
ಏರೆಗ್‌ಯ ಪುದರುಂಡು ಆಯನ್
ಏತ್‌ಲಾ ಈ ಹಲ್ವಿ ಮಲ್ತ್‌ದ್ ಮೂಲು ಬಗುಳುವನ ||

2

ನಿನ್ನ ಕರ್ಣದ ಚೋರ್ಣೊ ಕಟ್ಟದ್
ಗೆಲ್ತದೇ ಜಯ ಸಿರಿನ್ ಉಲಯಿಗ್

ಪೊಗ್ಗವುನ ಮಹ ವೀರನೇನೇ ತೋಜವೆನೆ ನಿಕ್ಕೊ ||
ಮುಯ್ಯೆರಾಲೆ ಪುಂಡುಗುಲ ಬಲಿಪೆನೆ
ನುರುನಂಚೆನೆ ನಿನ್ನ ಸೇನೆಗ್
ನುರುನಾಯನ್ ಯಾನ್ ತೋಜವೆ ಮಲ್ಪುನೆಂಚೆನೆನ್ ||

3

ಬೀಸ್ಮ ದ್ರೋಣೆರೆ ತೂಯೆರಾಯನ
ಬಾಣೊಗಿತ್ತನ ಸಗ್ಗಿ ಏಶಂ -
ದಾಕ್ಲೆಗೆ ಆಯಡನೆ ತಿರ್ದ್ಜಿ ಈಯೆ ವಾಲೆಕ್ಕೊ ||
ತೂಯಿಜನ ಈ ಮೂಲು ಮಲ್ತನ
ಕಾಳಗೊಡು ಬೂತೊಲೆನ ಬಂಜಿಗ್
ಏಶ ನೂಕಿಯೆ ಸಾಕಿನೀ ಗಣೊ ಪರ್ನ ನೆತ್ತೆರ್ನ ||

4

ನಿನ್ನ ಸ್ವಾಮಿನ್ ಚಿತ್ರ ಸೇನೆನೆ
ಕಟ್ಟಿದೇ ಕೊಂಡೊನಗ ನಿಕ್ಕೇ
ಬುಡ್ಡಯೆರೆ ದಾಯೆಗ್ಯ ತೀರ್ಜಿ ಇತ್ತೆ ಕೊರೆಪುವನ ||
ಎರ್ದೆ ಕಂಡ್ಯೆರೆ ಆ ವಿರಾಟನ
ಗುಡ್ಡೆಗ್ಲ ಈ ಪೋದು ಆಯಡ
ಪೆಟ್ಟೆ ತಿಂದ್ ಬತ್ತನೆತ್ತೊಯ ಮಾನೊ ಕೆಟ್ಟನಯ ||

5

ಮರಿತ ಎದುರುಡು ತಾನ್ಲಾ ಮರಿ -
ಕುಲೆನ ಜಾತಿಯೆ ಪನ್ದ ನಕ್ಕರ್
ಮೆಯಿನ್ ಕುರ್ಕಂಡ ಮರಿಯೆ ಆವೊಯ ನಿನ್ನ ಹಣೆ ಬರೊನು ||
ತೆರಿನಕ್ಲ್ ಮೂಲಿದ್ಯೆರ್ಂದ್
ಕೊರೆಪುವನ ಓ ಕರ್ಣ ಈಯೆ
ನರನ್ ಗೆಲ್ತನೆ ಓಲು ಪಂಡ್ ಇತ್ತೆ ಪನ್ಲೆನಡ ||

6

ನಾಯಿ ಪಲ್ಲೆಂಕಿಡ್ಲ ಕುಲ್ಲುದು
ಪೋನಗನೆ ಪೀ ತೋಜಿ ಸಾತ್ಗ್
ಲಾಗ್ಯುನಂಚೆನೆ ಈಯೆ ದಳಪತಿ ಆಂಡಲಾ ನಿನ್ನ ||
ಜಾತಿದವೆ ನಿಜೊ ಸುಬವೊ ಬುಡುವನ
ಸೂತಗೇ ದಳಪತಿನ ಪಟ್ಟೊನು
ಆ ಸುಯೋದನೆ ಕಟ್ಟನೆಯೆನೇ ಮರ್ದೆ ನಿಜೊ ನಿಜೊನೆ ||

7

ನಿನ್ನ ಸಾರತಿಯಾದ್ ಬತ್ತನ
ಮರ್ದೆಯಾನ್ಲ ಇತ್ತೆ ಆಯೆನೆ
ದುಸ್ಪೆರೆನ ಒಡನಾಟೊದಾ ಪಲೊ ತಿಕ್ಕನೆಂಕತ್ತೊ ||
ಪನ್ನುನೆನ್ ಕೇನ್ನಗನೆ ಕರ್ಣ
ಕಣ್ಣೆ ಕೆಂಪಾಂಡಪಗ ಕೋಪೊಡು
ಸಲ್ಯ ಮೋನೆನ್ ತೂದು ನಾಂಡುನು ತುಚ್ಚೆ ಪರು ಕಡೆಯೆ ||

8

ಪರಸುರಾಮೆರೆ ಸಾಪೊದಾ ಪಲೊ-
ನನುಬವಿಪಿ ದುರ್ರೋಗೊನೇ ಇನಿ
ಬರಿಯೆರೆಗ್ ಬಲ್ಲಿಂದ್ ಇಂಬ್ಯನ ಪಾತೆರೊನು ಕೇನ್ದ ||
ಮನಿಪುಜತ್ತಂದಿತ್ತೆ ಕಡ್ಡದ್
ಕೆರೊಡೆ ಆಂಡಲ ರಡ್ಡ ಪಾತೆರೊ
ಪನೊಡು ಪಂಡ್ ಪನ್ನುನೆನ್ ಈ ಕೇನ್ ಸಲ್ಯಣ್ಣ ||

9

ಮಾದ್ರ ದೇಸೊದ ನಿಕ್ಲ್ ಗ್ರಾಸ್ತೆರೊ
ಡೋಂಗಿದಾಕ್ಲ್ ಮೋಸಗಾರೆರ್
ಜೂಜಿಗೊಬ್ಬದ ಮರ್ದನಾಕ್ಲ್ ನಿತ್ಯೊ ಕುಡ್ಚೆಲೆರ್ ||
ಆಕ್ಲೆನ ರಾಜ್ಯೊಡುಲ ಬರ್ಸೊನೆ
ಕಾಲ ಕಾಲೊಗು ಸರಿಟ್ ಬೂರುಜಿ
ನೀರ್ ಪರಿಯೆರೆಗಿದ್ದಿ ಬಡವುಗು ನಟ್ಟ ತಿನೊಡಾತೆ ||

10

ಆಣುಲೆಗ್ ಬುಡೆದಿಡನೆ ಸಂಸಯೊ
ಆಣುಲೆಡ ಸಂಸಯೊನೆ ಬುಡೆದಿಗ್
ಪ್ರೀತಿ ಪ್ರೇಮೊಡು ನಡಪುಜಿಯ ಸಂಸಾರೊ ಪ್ರಜೆಕುಲೆನ ||
ರೀತಿ ನೀತಿನ ತೆರಿಯಂದಿತ್ತನ
ರಾಜ್ಯೊದಾ ಪ್ರಜೆಕುಲೆನ್ ಆಳ್ವೆರೆ
ರಾಜೆನೇ ಈಯತ್ತೊ ನಿನ್ನವೆ ಗುಣೊನು ಪನೊಡೇನ್ ||

11

ಕಾಸ್ದಾಸೆಗ್ ಚಕ್ರವರ್ತಿಗ್
ಕಾಸ ಮೆಗಿದಿನ್ ಕೊರೈ ಆಲೆನ
ಬಾಲೆಲೆಗೆ ಎದುರುಂತ್ಯ ಇತ್ತೆದ ಲಡಯಿದಾ ಕಳಟ್ ||
ಈತ್ ಕರ್ಣೆನೆ ಪನ್ನಗಾಪಗ
ಮಾದ್ರರಾಜಗ್ ಕೋಪೊ ನೆತ್ತಿಗ್
ಏರ್ದಾಯೆನೆ ಚಾಟಿ ದಕ್ಕದ್ ಲಾಗ್ಯೆ ತೇರ್ಡ್ಡ ||

12

ನಿನ್ನ ತೇರ್ದ ಕುದುರೆ ದೇರೈರೆ
ಲೆಪ್ಪುಲಯ ನಿನ್ನಮ್ಮನೀಡೆಗ್
ಪನ್ದ ಪಿದಡಿಯೆ ಸಲ್ಯನಾಪಗ ಕರ್ಣ ತಳ್ವಾರ್ ||
ದೆತ್ತದೆದುರುಡು ಉಂತ್ಯೆ ದುಂಬುಗು
ಪಜ್ಜೆ ದೀಡ್ಯಡ ತರೆನ್ ರಟ್ಟವೆ
ಪನ್ನಗನೆ ಆ ಸಲ್ಯೆ ಕಡ್ಲೊನು ಉದ್ಡದೊಯ್ತೊಂಡೆ ||

13

ಕುರುಪತಿಯೆ ಪಾರ್ಬತ್ತೆನಾಡೆಗ್
ನಿಕ್ಲ್ ನಿಕ್ಲೆಲೆ ಲಡಯಿ ಮಲ್ಪುಲೆ

ಸುರುಟು ಎಂಕೇ ಕಾಟೊಗೂರುದು ಬುಕ್ಕೊ ಪುಣೆವೊನುಲೆ ||
ನಿನನ್ ಗೆಲ್ವಯೆರಾದ್ ಮಾಮನ್
ರತೊಕು ಸಾರತಿ ಮಲ್ತೆ ಈಯೆ
ಎದುರು ಉಂತ್ಯನೆ ಕರ್ಣ ಎನ್ನವೆ ಗೋರಿ ಕಟ್ಟೆರೆಗೊ ||

14

ಕರೈ ಪಂಡ್‌ನ ತಪ್ಪನೇನೇ
ಒತ್ತೊನುವೆ ಮಾಮಣ್ಣ ಎನ್ನನ್
ಬದ್ಧಯೆರೆ ಬೋಡಾದ್ ಸಮೆ ಕೊರೊಡೀರ್ ಕರ್ಣಗ್‌ಲ ||
ಪತ್ತಲಯ ಮಾಮಣ್ಣ ಕಾರನ್

ಎನ್ನನೇ ಗೆಲ್ವಯೆರೆ ಬೋಡದ್
ನಿನ್ನವಬಿಮಾನೊಲೆನ್ ಬುಡುದೇ ಕರ್ಣ ಒತ್ತೊನುಲ ||

15

ಸ್ವಾಮಿ ಪಾತೆರೊ ಮೀರಯೆಂದ್‌ದ್
ಕಾರ್ ಪತ್ತನಗಪಗ ಸಲೈನೆ
ಚಾಟಿ ಪೆಜ್ಜಿದ್ ತೇರ್‌ನೇರಿಯೆ ಬಾರಿ ಸಂತೊಸುಡು ||
ಕಾಳಗೊದ ಕಳತಾಡೆ ಎತ್ತನ
ತೇರ್‌ನೇ ತೂವೊಂದು ಪಾಂಡವ
ಸೇನೆ ಕೋಟೆನ್ ಕಟ್ಟೊದುಂತುದು ಕೊಂಬುನುರಿತೇರ್ ||

|| ರಡ್ಡನೆ ಸಂದಿ ||

|| ಬೀಮೆ ಕರ್ಣನ ಮಗನ್ ಕಿರೈ ||

ರಡ್ಡ ಕಡೆತಲ ಸೇನೆ ತಯರ್‌ಡ್
ಉಪ್ಪುನಾಪಗ ಕರ್ಣನಾಜ್ಜೆಡ್
ಯುದ್ಧೋಗೇ ಪಿದಡಿಯೆರಲಸ್ವತ್ತಾಮೆ ಗುರು ಕೃಪೆರ್ ||
ಅಕ್‌ಲೆನೊಟ್ಟುಗು ಆನೆ ಕುದುರೆಲು
ರತೊಕುಲೇತಲ ಪಿದಡ್‌ದಾನಗ
ಕಯಿಟ್‌ಲಾಯುದೊ ಪತ್ತೊನುಂದೇ ಪೋಂಡು ಕಾರ್‌ಡೆನೆ ||

1

ದ್‌ಸ್ವ ದ್ಯುಮ್ಮನ ಅಪ್ಪಣೆಡ್‌ಲಾ
ಕ್ರಿಷ್ಣನೊಟ್ಟಿಗೆ ಪಾರ್ತೆ ಬೀಮೆಲ
ನುಕ್ಕಿಯೆರ್ ಕಾಳಗೊದ ಕಳಕೇ ಕಲಿ ಯುದ್ಧಿಸ್ಪಿರಲೆ ||
ಒಟ್ಟುಗಿತ್ತೊನೆ ನಾಲ್‌ರಂಗೊದ
ಗಟ್ಟಿಗೆರ್ ಆಯುದೊಲೆ ಪತೊನುದು
ಕಿರೈತಲ ಸೈನ್ಯೊನಾಕ್‌ಲ್ ಲಡಯಿ ಜೋರಾಂಡ್ ||

2

ರಡ್ಡ ಮೆಯಿತವೆ ಸೇನೆ ಪೊಡಿ ಪೊಡಿ
ರಟ್ಟನೆನ್ ತೂನಗನೆ ಅಂತ್ಯೊದ
ರುದ್ರ ನಾಟ್ಯೊನೆ ಪನ್ದ ಗ್ರೇಯ್ಲೊಲಿ ತೂಯಿನಾಕ್‌ಲೆಗ್ ||
ಸೈತ್ತೊನೇತಲ ಆನೆ ಕುದುರೆಲು
ಕಣ್ಣೆ ಮುಚ್ಚಿಯೊ ಪಾದಚಾರಿಲು
ಬೊಳ್ಳಿದಾರತೊ ಪೂರ ಪೊಡಿ ಪೊಡಿ ಆಂಡ್ ಕಾಳಗೊಡು

3

ನೆತ್ತೆರರಿನೆಟ್ ಆಂಡ್ ಕಿರೆಕೆದು
ಕರೈ ಮಾಸೊನು ತಿಂದೊ ನಾಯಿಲು

ಕಕ್ಕೆ ಕುರುಕುಲು ಬೂರೊ ಪುಣಕುಲೆ ಮೇಲ್ಗ್ ರಾವೊಂದು ||
ಕರೈನಟ್ಟುನ್‌ನುಂತವೆಂದ್‌ದ್
ತನ್ನ ರತೊನೇ ಬೀಮೆನುರ್ಕಯೆ
ಬಿಲ್ಲ್ ದೆರ್ತ್‌ದ್ ಬಾಣೊ ರಾಪಯೆ ಕರ್ಣನಾ ತರೆಕ್ ||

4

ಬೀಮೆ ಪಗರಿನ್ ತುಂಡು ರಟ್ಟದ್
ವೀರ ಕರ್ಣನೆ ಬುಡಿಯೆ ಬಾಣೊನು
ಮಾಸೊದಡಿಗನ್ ಮಲ್ಪುನಾಯಗ್ ದಾಯೆಗೀ ಲಡಯಿ ||
ಓಡೊನೊಚ್ಚಿಲ ಗಾಳೊಪಾಡ್ಡಯ
ರೇಂಜಿ ತುಂಬುಲ ಕರ್ಣ ನಿನ್ನವೆ
ಜಾತಿ ಸುಬವೊನು ಬುಡುದು ದಾಯೆಗ್ ಬತ್ತ ಕಾಳಗೊಗು ||

5

ಇರೈರಲ ನೆರ್‌ನೆರ್‌ದ್ ಲಡಯಿನ್
ಮಲ್ತೆರೇತಲ ಬಾಣೊ ರಾಪದ್
ಕರೈ ಪೆಟ್ಟೆನ್ ಬೀಮೆ ತಪ್ಪವೆ ಗದೆನ್ ಬೀಜೊಂದು ||
ಬಿಲ್ಲ್ ಬಾಣೊಲು ಗದೆಲ ಬೀಮಡ
ಇತ್ತನೆಟ್ ಕರ್ಣನವೆ ರಾಪಟೊ -
ನಲ್ಪ ತೂಪಯೆರಾಪುಜಿಂದ್‌ದ್ ತಿಗೈನಲ್ಪಡ್‌ದ್ ||

6

ಅಪಗನೇ ಕೃತವರ್ಮನಾಕ್‌ಲ್
ಎದುರು ಬತ್ತದ್ ಬೀಮಗಾಕ್ಯೆರ್
ಗದೆಟ್ ಎತ್ತಯೆ ಅಕ್‌ಲೆ ತಿಗೈಲೆಗ್ ಪೆಟ್ಟೆ ಒಂಜೊಂಜಿ||
ತರೆನೆ ತಿರ್ಗದ್ ಬೂರೈರಾಕ್‌ಲ್
ಸಕುನಿಲಸ್ವತ್ತಾಮೆರಾಡೆಗ್
ಸರ್ರ ಬತ್ತದ್ ಬಾಣೊರಾಪನಗಪಗ ಬಲಬೀಮೆ ||

7

ಹಾಕ್‌ದಕ್‌ಲೆನ್ ಮಗ್‌ತ್ ಪಾಡ್ಲೆನ್
ತೂದು ಬತ್ತೆರ್ ಕರ್ಣ ಬಾಲೆಲು
ಜೋಕುಲೆಗ್ ಎಡ್ಲೆತ್ತ್ ಕಾಳಗೊ ಪೋಲೆ ಮಗನಿಕ್‌ಲ್ ||
ಬೀಮ ಪಾತೆರೊನಕ್‌ಲ್ ಗಣ್ಣೊನೆ
ದಾಲ ಮಲ್ಪಂದೇತೊ ಗರ್ವೊಡು
ಬಾಣೊ ರಾಪಯಿನೇನ್ ತಲಿತ್‌ದ್ ಬೀಮೆ ಮನಿಪಂದೆ ||

8

ಕಳಟ್ ಉಂತಿಯೆ ಜೋಕುಲೆಗ್ ಇನಿ
ಗದಟ್ ಹಾಕುನೆ ಎಂಚ ಪಂಡ್‌ದ್
ಅಪಗ ಕರ್ಣನ ಜೋಕುಲಾಯಗ್ ಪಿರಲ ಹಾಕಿಯೆರ್ ||
ಎಲಯೆಲಾ ಈ ಪುರಿಕುಲೆಗ್ ಎನ
ಬಲೊನೆ ತೆರಿಯಂದಿತ್ತೆ ಕಾದ್ದೆರೊ
ನನೊರೊ ಬುದ್ಧಿನ್ ಪನ್ದ ತೆರಿಪವೆನೆಂದ್‌ದಾ ಬೀಮೆ ||

9

ಎಲ್ಯ ಜೋಕುಲು ಆಂಡಲಕ್‌ಲೆನ್
ಪೆಟ್ಲೆ ಬಾಣೊದ ಎಲ್ಯವತ್ತವು
ಮಲ್ಲ ಸೈರೊಗು ತಾಗಿ ಸಾತ್‌ಗ್ ಬೇನೆ ತಡೆವಂದೆ ||
ಜತ್ತಿ ನೆತ್ತೆರ್ ತೂದು ಬೀಮಗ್
ನೆತ್ತಿಗೇರ್‌ದ್ ಕೋಪೊಡಾಯೆನೆ
ಕರ್ಣನಾ ಮಗಕೊಂಜಿ ದೀಡಿಯೆ ಗದಟ್ ಸೈಲಂದ್ ||

10

ಪಾಪೊ ಬಾಲೆನೆ ತುಲ್ಲು ತುಲ್ಲುದು
ಕಾಳಗೊದ ಕಳಟಲ್ ಬೂರುದು
ಪ್ರಾಣೊ ಬುಡ್ಲೆನ್ ತೂದು ನುಕ್ಯೆರ್‌ಲಾ ಮಹಾರತೆರ್ ||
ಬೂತ ಗಣೊಕುಲೆಗ್‌ಗೊದೇ
ಕೋರಿ ಬಂಟೆನೆ ಮಲ್ತ ಬೀಮೆನೆ
ಆವರೊಗು ನಿನ ನೆತ್ತೆರಾವೊಡು ಉಂತ್‌ಲಯ ಬೀಮೆ ||

11

ಸಿವ ಸಿವಾ ಕರ್ಣನವೆ ಪ್ರೀತಿದ
ಮಗೆಸುಸೇನೆನೆ ಬೂರೈ ಪಂಡ್‌ದ್
ಅತಿರತೆರ್ ಮಾರತೆರ್ ನುಕುನ ಗೌಜಿ ಕೇನೊಂದು ||
ರತೊನು ತಿರ್ಗದ್ ಬತ್ತೆ ಕರ್ಣನೆ
ಅಮಸರೊಡು ಬೀಮನವೆ ಮೇಲ್‌ಗ್
ಬುಡುದು ಮಂತ್ರೊದ ಬಾಣೊನೇಶ್‌ಲ ನೆರೈನಾಯನಾಲ ||

12

ಎಲ್ಯ ಬಾಲೆನ್ ಕೆರೈ ಕಟುಕೆನೆ
ಮಲ್ಲ ಬಿಸೆಂದಿತ್ತೆ ಗ್ರೇಯ್ನ

ನಿನ್ನನಿತ್ತೆನೆ ದೀಡಯೆಂದ್‌ದ್ ಬಾಣೊ ರಾಪಾಯೆ ||
ಕರ್ಣ ಕಡೆಡ್‌ದ್ ಬತ್ತೆರೇಶ್‌ಲ
ಕ್ರಿಷ್ಟ ಪಾರ್ತೆರ್ ಬರಡ್ ಈಯೇ
ಅಟ್ಟಿಲ್‌ದ ಬಟಿ ಏತ್ ಲಡಯಿನ್ ಮಲ್ಲ ಎಂಕ್‌ಲೆಡ ||

13

ಆತ್ ಪೊರ್ತುಗು ಪಾರ್ತ ಕ್ರಿಷ್ಟೆರ್
ಆಡೆಗತ್ತೆರ್ ನರೆನೆ ಬಾಣೊಡು
ಮಾತೆರೆನ್ ಸರಿ ಹಾಕ್ ಹಾಕ್‌ದ್ ದೂರೊ ರಟ್ಟಾಯೆ ||
ಬಾಲೆ ಸೈತ್ತನ ದುಕ್ಕೊಲಾ ತನ
ಮೇಲ್‌ಗ್ ತಾಗ್‌ನ ಪೆಟ್ಲೆಲಾ ದಳ -
ವಾಯಿ ಕರ್ಣಗ್ ಸೋಲು ಆನಗ ತಿರ್ಗೈನಲ್ಲಡ್‌ದ್ ||

|| ಕರ್ಣನ ಪೆಟ್ಲೆಡ್ ಧರ್ಮಜಿ ಕಂಗಾಲ್ ||

ಮಗನ್ ಕೆರ್ನವೆ ಕೋಪೊದಾ ಉರಿ
ಅರ್‌ಲ್‌ದರ್‌ದ್ ಕರ್ಣ ಬೀಮಗ್
ಪಗರಿಡಾಕಿಯೆ ನೆರ್‌ದ್ ಮಂತ್ರೊದ ಬಾಣೊರಾಪಾಯೆ ||
ನಿನನ್ ದೀಡಯೆ ಪಂಜಿ ಜಲ್ಲೊದ
ಕನಿಕರೊನೆ ಇದ್ಯಂದಿ ಬೂತೊನೆ
ಕೊರುಪೆ ಬಾಣೊದ ಇಂಡಿ ಕೈಕೊನು ಪನ್ದ ರಾಪಾಯೆ ||

1

ಬತ್ತಿ ಬಾಣೊನು ಗದಟ್ ಹಾಕ್‌ದ್
ಮಲ್ಲೆ ಪೊಡಿ ಪೊಡಿ ಕರ್ಣಗಪಗನೆ
ರಟ್ಟಯೆನೆ ಬಲೊ ಬೀಮೆ ಪಗರಿನ್ ನೆರ್‌ದ್‌ಲಾಬ್‌ಟೆಡ್ ||
ಪೆಟ್ಲೆ ತಾಗ್‌ದ್ ತರೆನೆ ತಿರ್ಗದ್
ಕುತ್ತ ಕಂಡೆನೆ ರಟ್ಟಿ ಕರ್ಣನೆ
ಬುಕ್ಕೊ ಮಂತ್ರೊದ ನೀರ್ ನಿಂಗ್‌ದ್ ಕರ್ಪುರಗೊಂದು ||

2

ಕಾಲ ರುದ್ರನ ದೇಕಿಡಾಯೆನೆ
ಬಾಣೊ ರಾಪಯೆ ಬೀಮ ತಿಗಲೆಗ್
ಸೂತ ಏರಿಡ್ ಬತ್ತಿ ಬಾಣೊನೆ ನಾಟ್‌ನಾಪಗನೆ ||
ಬೋದೊ ಮತಿ ಇದ್ಯಂದೆ ಬೂರೈನೆ
ಆನೆದಂಚೆನೆ ಕಳಟ್‌ಲಪಗನೆ
ವೀರ ಕರ್ಣನೆ ಬಿರುಟು ರಟ್ಟಯೆ ಬೀಮನಲ್ಲಡ್‌ದ್ ||

3

ಬೀಮೆ ಬೂರೈಂದಾಡೆ ಬತ್ತೆರ್
ಪಾಂಡವೆರೆ ಕಡೆತಕ್‌ಲ್ ತೇರ್‌ಡ್

ಆನೆ ಕುದುರೆಲೆ ಸವರಿ ಮಲ್ತೊಂದೆತ್ಯೆರಾಡೆಗೆನೆ ||

ಆ ವಿರಾಟ ದ್ರುಪದನಾಕಲೆ
ಸೇನೆಲಾ ಸಹದೇವ ನಕುಲೆರ್
ಪಾರ್ದೆತ್ಯೆರ್ ಆಕ್ಲಾಕಲೆ ವಾಹನೊಲೆ ಮೇಲ್ಡ್ ||

4

ಬತ್ತಿ ವೀರೆರೆನಪಗ ತೂಯಿನ
ಕರ್ಣ ಮಂತ್ರೊದ ಬಾಣೊರಾಪಯೆ
ಸೈತ್ತೇರೇತ್ಲ ವೀರನಾಕ್ಲ ಪುಡೆರ್ ಪುಡೆರೊಂದು ||
ಚಕ್ರೊ ಪೀಂಕ್ದ ರಟ್ಟೊ ತೇರುಲು
ಸೈತ್ತೊ ಆನೆಲು ಕುದುರೆಲೇತ್ಲ
ಸಲ್ಯೆ ಮೂಂಕುಡು ಬಿರೆಲ್ ದೀಡಿಯೆ ಕಳನ್ ತೂವೊಂದು ||

5

ಕರ್ಣ ಈ ಮಹವೀರೆ ನಿನ್ನವೆ
ಸಗ್ಗಿ ಸಾದಾರ್ನೊದವೆ ಅತ್ತಾಯ
ಪುಣ್ಯವಂತೆನೆ ನಿನನ್ ಕೌರವೆ ಸಾಂಕ್ನಯೆ ಬಿಸೆ ||
ಮಚ್ಚೆಯೆನೆ ನಿನನೇನ್ ಪುಗರುವೆ
ಮಚ್ಚೆರೊನೆ ಇದ್ಯಂದೆ ತೇರ್ನ್
ದೇರೈರೆಗ್ ಸಾದಿದ್ಯೆ ಪುಣಕುಲೆ ರಾಸಿ ಬೂರ್ನೇಟ್ ||

6

ಈಪೆಕ್ಡೆ ದೇರೈಂದ್ ಕುದುರೆಲೆ
ಮೂಂಕುದಾ ಬಲ್ಲೊಯ್ತ ದೇರಿಯೆ
ಮಾದ್ರ ಬೂಪತಿ ಕರ್ಣನೇತ್ಲ ಪುಗರ್ ಪುಗರೊಂದು ||
ಪಾಂಡವೆರೆ ಕಡೆತಕ್ಲ ಮನಸ್ಡ
ಸೋಲು ಆಂಡಂದೇತೊ ದುಕ್ಕೊಡು
ಪಾರ್ತ ಕ್ರಿಷ್ಟೆರ್ ಮೂಲು ಇದ್ಯೆರೆ ಪನ್ನುನೇರೆಡನೆ ||

7

ಆ ಯುದ್ಧಿಸಿರೆ ಸೇನೆ ಬುಲ್ಲುನ
ತೂನಗಾಯಗ್ ಚತ್ತಿಯೆರೆ ಗುಣೊ
ಜಾತಿ ಸುಬವೊದ ಕೈಪೆ ತಿಗಲೆಡ್ ಪುಟ್ವೊದಾನಗನೆ ||
ದಾಯೆ ಬುಲ್ಲುನೆ ನಿಕ್ಲ ಚತ್ತಿಲೆ
ಜಾತಿವೀರೆರ್ ಅತ್ತೊ ಪನ್ನೆಯೆ
ಸೋಲು ಗೇಲ್ಗ್ ಹಿಗ್ಗ್ ತಗ್ಗುನ ಸುಬವೊ ನಂಕುಂಡೊ ||

8

ಗೆಲ್ಲುನಾವಿದಿ ಕೌರವೇರೆಗ್
ಬರ್ಪುನೆಕ್ ನಮೊ ದಾಯೆ ಜಾರುನೆ
ನಮ್ಮ ಸಾದನೆ ಮಲ್ಲುನವ್ವೇ ನಮ್ಮ ಕರ್ತವ್ಯೊ ||
ಇತ್ತೆ ಯಾನೇ ಕಳಕ್ ನುಕುವೆ
ಕರ್ಣನಾ ಬಲೊ ತೂಪೆ ಪಂಡ್ವ
ಅಪ್ಪಣೆನ್ ಸಾರತಿಗ್ ಕೊರ್ನಗ ರತೊನೆ ತಯರಾಂಡ್ ||

9

ಲಡಯಿದಯೊಡು ದರ್ಮನಂದನೆ
ಬಿರುಪಗರಿ ಪತ್ತೊಂದು ಪಿದಡಿಯೆ
ಅಪಗ ಜಯೊ ಜಯೊ ಪನ್ದ ಪಾಟಕನಕ್ಲ್ ಪುಗರಿಯೆರ್ ||
ನಕುಲ ಸಹದೇವಾದಿ ವೀರೆರ್
ದ್ರುಪದನಾ ಮಗೆ ದ್ವಸ್ವದ್ಯುಮ್ನೇಲ
ಎಡತ್ ಬಲತ್ಡ ಬತ್ತೆರೊಟ್ಟಿಗೆ ತೇರ್ ಬನ್ನಗನೆ ||

10

ಧರ್ಮಜೆನೆ ರಣ ಕಳಕ್ ಬನ್ನಗ
ಕರ್ಣಗಾಚಿರೊ ಆಂಡ್ ದೇವೆರೆ
ಬಗ್ಗಿದಾ ಸನ್ನೇಸಿ ಲಡಯಿಗ್ ಜತ್ತೆನೋ ಪನ್ದ ||
ಯುದ್ಧೊದಾ ಕಳಕೀರ್ ದಾಯೆಗ್
ಬತ್ತನೆಯೆ ಮಹಯೋಗಿ ಈರೇ
ಬಿಲ್ಲ್ ಬಾಣೊಲ ಕೈಟ್ ಪತೊನುದು ದಾಯೆಗೆತ್ತಿಯರ್ ||

11

ದಾಯೆಗೆನ್ನನ್ ತಮಸ್ ಮಲ್ಲುವ
ಓಡೊನೊಚ್ಚುನ ಮೀನ್ ಪತ್ತುನ
ರೇಂಜಿ ತುಂಬುನ ಬುಡುದು ಲಡಯಿಗ್ ದಾಯೆ ಬತ್ತನೆಯೆ ||
ಯಾನ್ ಕಳಟ್ ಯುದ್ಧಿಸಿರೆನೆ ನಿಜೊ -
ವಾದ್ ಚತ್ತಿಯ ಬಂಟಿ ಯುದ್ಧೊಗು
ಪೋಡ್ವುನಯೆ ಯಾನತ್ತ ಉಂತ್ಲ ಕರ್ಣ ಎಂಕೆದುರು ||

12

ಅಪಗ ತೂವೊನುಗೊಂದು ಕರ್ಣೆನೆ
ಪಗರಿ ರಟ್ಟಯೆ ಧರ್ಮ ನಂದನ
ರತೊಕು ಸಾರತಿ ಕುದುರೆಲೆಗ್ಲಾ ಮಂತ್ರೊ ಜಪಿತೊಂದು ||
ಪೊಡಿಯೆ ರಟ್ಟದ್ ಆಂಡ್ ತೇರ್ಲ
ಕುದುರೆಲೆಗ್ ಪೆಟ್ಟಾದ್ ಬೂರಿಯೊ
ಉಸುಲು ಕಟ್ಟಾದ್ ಸೈತೆ ಸಾರತಿ ಧರ್ಮನಂದನೆನೆ ||

13

ತೇರ್ ಕಳವೊಂದಾಯೆ ಬಜಿ ನೆಲ
ಜಾರುನೆಟ್ ಉಂತೊಂದು ಕರ್ಣಡ
ಓರ್ನಗ ಬಾಣೊಂಜಿ ತಿಗಲೆಗ್ ನಾಟ್ವೊದಾನಗನೆ ||
ಕಾಳಗೊದ ಕಳಟಾಯೆ ಬೂರಿಯೆ
ಚಾಕಿರಿದ ಜನೊ ಪಾರ್ ಬತ್ತದ್
ದೇರ್ತ ತುಂಬುದು ಸಿಬಿರೊದುಲಯಿಗ್ ಕೊನೊಯೆರಾರೆಕಿಗ್ ||

14

ನಾಟ್ವೊದಿತ್ತಿನ ಪಗರಿನೊತ್ತದ್
ಬೇನೆದೆಣ್ಣೆನ್ ಮಯ್ಯಾದಾದೇ

ಸೇಕೊ ಕೊರೈರ್ ಮಂತ್ರೊ ಮಲ್ತೆರ್ ಬಸ್ಕೊ ಪಾಡಿಯೆರ್ ||
 ಬಾಯಿಡೇತ್ಲ ಪುಗರ್ ಪುಗರ್ದಾ
 ಪಾಪಿ ಕರ್ಣೆನೆ ಪನ್ದ ದೂರೈರ್
 ಸೇವಕೆರ್ ಬಯೊ ಬಗ್ಗಿಡಾರೆಕಿ ಮಲ್ತೆರಾಪಗನೆ ||

ಆನಗನೆ ಗುರುಮಗನೆ ರಟ್ಟಿಯೆ ಕಳಡ್‌ದಾಪೆಕ್ ||
 ವಾಸುದೇವನೆ ರತೊನು ಸಿಬಿರೊದ
 ಬಾಕಿಲ್ಡ್ ಉಂತಾದ್ ಪಾರ್ತನ್
 ಸೀದ ಪೊಗ್ಗಯೆ ಉಲಯಿಗಪಗನೆ ತೂದು ಧರ್ಮಜನ್ ||

|| ಅರ್ಜುನೆ ಧರ್ಮಜನ್ ತೂಯೆ ||

ಕರ್ಮ ಬಾಣೊದ ಬೆಚ್ಚ ತಾಗ್‌ದ್
 ಧರ್ಮನಂದನೆ ಸಿಬಿರೊದುಲಯಿಡ್
 ದುಕ್ಕೊಡೇ ನರಕೊಂದು ಉಪ್ಪುನಗಪಗ ಪಾಂಡವರೆ ||
 ಸೈನ್ಯೊದೊಡಕರನಾಚ್ಚೆಡಪಗನೆ
 ನುರಿಯೆರ್ ಕೌರವರೆ ಸೇನೆಗ್
 ಪೆಟ್ತ್ ತಿಂದ್‌ದ್ ಕಳನ್ ಬುಡುದೇ ಮಾತ ಪಾರಿಯೆರ್ ||

1

ಆ ತ್ರಿಗರ್ತೆರೆ ಕಡೆತ ರಕ್ಕಸ
 ನಾಕ್‌ಲೆಡ ಕಾದೊಂದು ಇತ್ತ್ನ
 ಪಾರ್ತಡಾ ಹರಿಕ್ರಿಷ್ಟೆ ತೋಜಯೆ ಸೇನೆ ಬಲಿಪುನೆನ್ ||
 ಪೋಂಡೆ ಮರ್ಯಾದಿತ್ತೆ ಆಡೆಗ್
 ಪೋಯಿ ಪಂಡ್‌ದ್ ರತೊನು ತಿರ್ಗದ್
 ಪೋನಗನೆ ರಕ್ಕಸೆರ್ ಎದುರುಗು ಬತ್ತೆದುಂತಿಯೆರ್ ||

2

ಪಗರಿಡಾಕೈರ್ ಅಪಗ ಪಾರ್ತೆನೆ
 ಅಕ್‌ಲೆನ್‌ಲ ಚೆಪುಡಾದ್ ಆನಗ
 ಗುರುಮಗನೆ ಎದುರುಂತ್ಯೆ ಬಾಣೊಲೆ ಬರ್ಸೊ ಜಪುಡಾದ್ ||
 ಗುರುನು ಕೆರೈಯೆ ಪಾಪಿ ಅಜ್ಜನ್
 ಪಗರಿದಾ ಮಂಚವುಡು ಚೆಪುಡಯಿ
 ಪರಮ ಪಾತಕಿ ಎದುರು ಉಂತುಲ ದಾಯೆ ಬಲಿಪುನೆಯೆ ||

3

ಕಲ್ಪಯಿನ ಸಿಸೈರೆನ್ ಕೆರೈರೆ
 ಬತ್ತನಾ ಗುರು ತಾನೆ ಸೈತ್ತನೆ
 ಅಜ್ಜೆನೇ ಬೋಡುಂದು ಪಗರಿಲೆ ಮಂಚವುಗು ಬೂರ್ನೆ ||
 ನಿಕ್ಕೆ ಲಡಯಿದ ಕಳನೆ ದಾಯೆಗ್
 ಉನ್ನುನಾ ಕಳೊ ಎಡ್ಡೆ ಅತ್ತೊಯಿ
 ಪನ್ದ ಮಂತ್ರೊದ ಬಾಣೊ ರಟ್ಟಿಯೆ ದ್ರೋಣನಾ ಮಗಕ್ ||

4

ಸಾರತಿಗ್ ತೇರ್‌ಗ್‌ಲ ಕುದುರೆಲೆ
 ಮೇಲ್‌ಗೇತ್ಲ ಬಾಣೊ ರಟ್ಟಿದ್

5

ಅರ್ಜುನನ ಕಣ್ಣೆಡೆನೆ ಕಣನೀ -
 ರ್ಜತ್ತಾದಾನಗ ಸೇಂಕ್ ಸೇಂಕ್‌ದ್
 ಬುಲೊನುಂದೇ ಕಾರ್‌ಗಡ್ಡೊನೆ ಬೂರೈನಾಪಗನೆ ||
 ಕ್ರಿಷ್ಟಗ್‌ಲ ತಡೆಯೆರೆನೆ ತೀರ್‌ಜಿ
 ದುಕ್ಕೊನಾಪಗ ಧರ್ಮನಂದನ
 ಕೈತಲ್‌ಡ್ ಕುಲೊಂದುಲಾಯನ ಮೆಯಿನ್ ಈಸಿಯೆನೆ ||

6

ಸಾದು ಸಜ್ಜನೆ ಧರ್ಮೊನಿಸ್ಸೆನೆ
 ಆಯಿನಾ ನಿನ್ನಂಚಿ ಗುಣೊತಕ್-
 ಲೇರ್ ನಿಕ್ಕಲ ಪೆಟ್ತ್ ತಿನ್ನುನ ಯೋಗೊ ಆಂಡತ್ತೊ ||
 ಸೂತನಾ ಮಗೆ ನಿನ್ನ ಏಗಿತೊ
 ತೆರಿಯಿಜೆ ಬಾಣೊ ತಾಗದ್
 ಬೇನೆ ಮಲ್ತೆನೆ ಪನ್ದ ಮೆಯಿನೇ ಈಸ್‌ದಾನಗನೆ ||

7

ಹರಿನಮೂರ್ತೊದ ಕೈಯೈ
 ಸರಿರೊನೀಸ್‌ನ ಸಾತ್‌ಗಪಗನೆ
 ಮನಸ್ ಗೆಲೈನೊ ಆಂಡ್ ಧರ್ಮಜೆ ಕಣ್ಣೆ ಬುಲವೊಂದು ||
 ಮೆಗಿಯ ಮೋನೆನ್ ತೂಯೆನಪಗನೆ
 ಮುರಹರಗ್ ಕೈ ಮುಗಿಯೆ ಪಾರ್ತನ್
 ದಿನಾಸ್ ತೂದೇ ಪಂಡೆ ಜೂವೊಡೆ ಬತ್ತನಯ ಮೆಗಿಯ ||

8

ಕರ್ಮಗೀ ಪೋಡ್ಯೊಂದು ಪಾರ್‌ದ್
 ಬತ್ತನೆನೊ ಪನ್ ನಿನನ್ ಆಯೆನೆ
 ಸಯ್ಯಡ್‌ಂದ್ ಬುಡಿಯೆನೋ ಪನ್ ಎಂಚಿ ಬತ್ತನೆಯೆ ||
 ಪತ್ತ ಪುದರ್‌ಡ್ ಮೆರೆಯಿನಾಯೆನೆ
 ಗೆಲ್ಲುವೆನೆ ಪಂಡೊಂದು ಮಾತೆರ್
 ನಿನ್ನನೇ ಪುಗರಿಯೆರ್ ಕರ್ಣನ್ ಈಯೊ ಗೆಲ್ಲುನಯೆ ||

9

ಪುದರ್ ಕೀರ್ತಿಲು ಇತ್ತೆ ಬರ್ಪನೆ
 ಸರಿತ ಜನೊಕುಲೆಗತ್ತ ಮಲ್ಲಯಿ
 ಬೆರಿಯೆ ಓಂಗುನ ಜನೊಕು ಮಾತ್ತೊನೆ ಕ್ರಿಷ್ಟನಾ ಬೆರಿಯೆ ||
 ತಿರ್‌ಗ್‌ನೆಟ್ ಈ ಕೀರ್ತಿ ಬತ್ತನೆ
 ನಿಜೊಕುಲಾಂಡಲ ಕರ್ಣನಂಚಿನೆ
 ಬಿರ್‌ಸತಿಗೆ ನಿಕ್ಕುಂಡೊ ಆಯೆನೆ ಮಲ್ಲ ಬಿರುಬಂಟೆ ||

10

ಅಣ್ಣ ನಿಕ್ಕಿನಿ ಪೆಟ್ವೆ ಆಯಿನ-
ವೆನ್ನ ಮನಸ್‌ಗ್ ದುಕ್ಕೊ ಆಯ್ಕೆಟ್
ಬರೈರೆಗ್ ಪಿದಡ್‌ನಗ ಸಮ ಸಪ್ತಕೆರೆ ಕಡೆತಕ್‌ಲ್ ||
ಯುದ್ಧೊಗುಂತ್ಯೆರ್ ಅಕ್‌ಲೆನೇನೇ
ಗೆಲ್‌ದಾದ್‌ಲ ದುಂಬು ಬನ್ನಗ
ಅಸ್ವತ್ತಾಮನೆ ಕಾದ್ಯರುಂತಿಯೆನಂಚ ಕಡೆಸ್‌ನೆಯ ||

11

ಯಾರು ಈ ಪಾತೆರುನ ಬೊಡ್ಡಿಯ
ವೀರ ಕರ್ಣಗ್ ಎದುರು ಉಂತುನ
ತಾಕತಲ ನಿಕ್ಕಿದ್ದಿ ಕೊಚ್ಚುನ ಬೊಡ್ಡಿ ಈ ಎನಡ ||
ಆಯೆನೇ ಮಹ ಬಿಸೆರ್ ಕೌರವೆ
ಸೇನೆಗೇ ದಳಪತಿಯೆ ಆಯ್ಕೆಟ್
ಸೋಲ್ಪವೆನೆ ನಮನಾಯೆ ನಂಕಲ ದಾಯೆಗೀ ಲಡಯಿ ||

12

ಗುರುನು ಅಜ್ಜನ್ ಸೋಲ್ಪದಾಯಿನ
ಗರುವೊ ದಾಯೆಗ್ ನಿಕ್ಕಿ ಕರ್ಣೆನೆ
ಅಕ್‌ಲೆನಂಚಿನ ಪರಬೆನೋ ಅತ್ತಾಯೆ ಬ್ರಾಣೆನೋಯ ||
ನಮನ್ ಗೆಲ್ಪೆರೆ ಕರ್ಣೆನೇ ನಿಜೊ
ಬಿರ್‌ಸತಿಗೆದಾಯೆತ್ತೊ ಪೊಕ್ಕಡೆ
ನಮೋನೆ ಕಾದುನೆದಾಯೆಗರ್ಜನ ಕೇನ್ ಪನ್ನುನೆನ್ ||

13

ರಾಚ್ಯೊನಾಳಡ್ ಕೌರವೆನೆ ನಮೊ
ಕಾಡ್ ಸೇರುಗೊ ಅವುಲ ಆಯ್ಕಿಡ
ಆಯ ಸೇವೆಡ್ ಬದ್‌ಕೊನುಗೊ ನಮ ಮೆಗಿಯೆ ಪಂಡೊಂದು||
ಎರೆಗಾಂಡಲ ಕೋಪೊ ಗರ್ವೊಲ
ಆಯನಾಯಿನ ಸಗ್ತಿದಾತೇ
ಬೋಡು ಪಂಡ್‌ದ್ ಪನ್ನೆರೇತೋ ತೆರಿನ ಜ್ಞಾನಿಗುಳು ||

14

ಲಡಯಿದಾ ಮಹಬೂಳ್ಳ ಕ್ರಿಷ್ಟೆನೆ
ಪಡೆಯಿನಯೆ ಕಾಳಗೊನೆ ಮಲ್ಪೊಡು
ಪನ್‌ಪೆಡಾಯಡ ಪನ್‌ಲ ತನ್‌ಕೇ ದಾಲ ತೀರಂದ್ ||
ಮಲುಪುವೆಡ ಗಾಂಡಿವೊನು ಆಯಗ್
ಕೊರುಲ ಈ ಸಾರತಿಯೆ ಆದ್‌ಲ
ರತೊನು ದೇರ್‌ಲ ಗಾಂಡಿವೊನು ಈ ಬೊಡ್ಡಿ ಪತ್ತನವು ||

|| ಪಾರ್ತನ ಕೋಪೊಗು ಕ್ರಿಷ್ಟನ ಪಿರಿಮದ್ ||

ಗಾಂಡಿವೊನು ಪತ್ಯೆರೆಗ್ ಸರಿತವೆ
ಏಗ್ಯೆನೇ ಅತ್ತಂದ್ ಧರ್ಮಜೆ
ದೂರ್‌ನೆನ್ ಕೇನೊಂದು ಪಾರ್ತನ ಕಣ್ಣೆ ಕೆಂಪಾಂಡ್ ||
ಕೋಪೊಡಾಯನ ಉಸುಲು ಬೆಚ್ಚನೆ |
ಏರ್‌ದಾನಗ ತಡೆಯೆರಾಯಿಜಿ
ಗೇನೋ ಬಿಂಗಿರಿಯಾದ್ ಉರೆಡ್‌ದ್ ಕಡ್ಲೊ ಪೀಂಕಾಯೆ ||

1

ಧರ್ಮಜನ್ ಕೆರ್ದೆಂದ್ ಕೈತ್ತಡೆ
ಬನ್ನಗನೆ ದ್ರಾಪದಿಯೆ ಅಡ್ಲೊಗು
ಬತ್ತದುಂತ್ಯೆಲ್ ಕ್ರಿಷ್ಟೆ ಕತ್ತಿನ್ ಒಯ್ತು ಗೆತೊನುಂದು ||
ಬುದ್ಧಿ ಕೆಟ್ವೆನ ಮೂರ್ಕ ನಿನ್ನವೆ
ಅಣ್ಣೆ ಹಿರಿಯಯೆನತ್ತೊ ಆಯನೆ
ಕೆರೈರೆಗ್ ದುಂಬೊತ್ತ ನಿಕ್ಕೇ ಮರ್ಲ್ ತಾಗ್‌ನೆನೊ ||

2

ಹರಿಯೆ ಕೇನ್‌ಲ ಯಾನ್ ದುಂಬೇ
ಪನ್‌ತೆ ಗಾಂಡಿವೊನೇನ್ ಪತ್ಯೆರೆ
ಸರಿತಯೆನೆ ಅತ್ತಂದ್ ಏರ್‌ಲ ಪಂಡಿ ಸಾತ್‌ಗೆನೆ ||
ಅಕ್‌ಲೆ ತರೆ ಕಡ್ಲೆಂದ್ ಇತ್ತೆನೆ
ಎನನ್ ಈ ಜನೊಕುಲೆನ ಎದುರುಡು
ಪನ್‌ತೆನೆನ್ ಕೇನ್ಲತ್ತೊ ಈಯೇ ಎನ್ನ ಪಾತೆರೊನು ||

3

ನಡಪಯೆರೆ ಬೋಡಾದ್ ಅಣ್ಣನ್
ಕೆರುವೆ ಪಂಡ್‌ದ್ ಕತ್ತಿ ದೆತ್ತನೆ
ಕೆರ್‌ದಲಿಂಬ್ಯನ್ ಎನ್ನ ಪ್ರಾಣೊನು ಯಾನೆ ದೆತ್ತೊನುವೆ ||
ಬುಡು ಬುಡುಯ ಓ ಕ್ರಿಷ್ಟ ಎನ್ನನ್
ಕೆರಡ್ ಪಾರ್ತನ ಬಾಸೆ ಒರಿಯಡ್
ಕಡುಗೊ ಬುಡು ಆಯನವೆ ಕೈಡ್‌ದ್ ಕೆರಡ್ ಎನನಿತ್ತೆ ||

4

ಸತ್ಯೊನೊರಿಪದ್ ನರಕೊ ಗುಂಡಿಗ್
ಜತ್ತಾನಯೆ ಒರಿ ರುಸಿಯೆ ತಪಸ್‌ಡ್
ಉಪ್ಪುನಗನೇ ಕಳುವೆ ಬೆರಣನ್ ಕೆರೊಡು ಪಂಡೊಂದು||
ಗಿಡರ್‌ನಗ ಆ ಬ್ರಾಣೆ ತಪ್ಪದ್
ರುಸಿನ ಕೈತಲ್ ದೆಂಗ್‌ದಿತ್ತೆಗೆ
ಕಳುವೆ ರುಸಿಟನೆ ಕೇಂಡೆ ಬೆರಣನ್ ತೂಯರೋ ಪನ್ದೊ ||

5

ಸತ್ಯೊನೊರಿಪವೊಡುಂದು ರುಸಿಯೇ
ಕಳ್ಳಗ್ಲ ಆ ಬೆರಣೆ ದೆಂಗ್‌ದ್
ಇತ್ತಿ ಜಾಗೆನ್ ತೋಜದಾನಗ ಕೆರೈ ಬ್ರಾಣನ್‌ಲ ||
ಬ್ರಹ್ಮ ಹತ್ಯೆದ ದೋಸೊ ರುಸಿಕ್‌ಲ
ಬತ್ಸನೆಟ್ ನರಕೊದವೆ ಗುಂಡಿಗ್
ಬೂರ್ದು ಕತೆಗೊಂತಿದ್ಯೊ ನಿಕ್ಕೇ ಧರ್ಮೊ ಸೂಸಿಮೊದ ||

6

ಗುಟ್ಟು ಬೇತೆನೆ ಉಂಡು ಅಂಚದ್
ನಿನ್ನ ಅಣ್ಣನ ತರೆನ್ ಕಡ್ಡದ್
ಕೆರ್ದುನವು ಬೊಡ್ಡಿತ್ತೆ ಕೆರ್ದುನ ಸಾದಿ ಪನ್ನೇನ್ ||
ನೆರ್ದ ಆಯೆನೆ ಮಲ್ತಿ ತಪ್ಪುನು
ಪೂರ್ತಿ ತೋಜದ್ ಅಪಗ ಆಯೆನೆ
ಸೈತ್ತಾನಾ ಪಲೊ ಆಂಡ್ ನಿನ್ನವೆ ಬಾಸೆ ತೀರ್ವಾಂಡ್ ||

7

ಮುರಹರನ ಪಾತೆರೊನು ಕೇಂಡ್‌ದ್
ನೆರಿಯೆನರ್ಜುನೆ ಪಲಯನಪಗನೆ
ನಿನನ್ ಹಿರಿಯಯೆನೆಂದ್ ನಂಬ್‌ನ ಪಾಪಿ ಯಾನತ್ತೊ ||
ಬರತ ಕುಲೊಟೇರುಂಡು ನಿನ್ನವೆ
ನಮನೆದಾ ಪೋರ್ಕೆರ್‌ಲ ಈತ್ನಿಟ
ಲಡಯಿದಾ ಕಳಕೋಲು ನುರ್ಕುಡ ಪೋಡಿಗದ ಒಳ್ಳೆ ||

8

ನಿನ್ನ ಜುಗರಿದ ಮರ್ಲಾಡಿಯೇ
ಚಕ್ರವರ್ತಿನ ಸ್ಥಾನೊ ಕಳೆಯನೆ
ನಮ್ಮ ಬುಡೆದಿನ ಸೀರೆನೊಯ್ಪುನ ತೂಯ ಕಣ್ಣುಡುದು ||
ಅಣ್ಣನಾ ಕಸ್ತೊಲೆನ ಪಾಲ್‌ಗ್
ಮೆಗ್ಯನಕ್‌ಲಂದೆಂಕ್ಲು ಕಾಡ್‌ಡ್
ತಿಗೊರ್ಯ ಪದ್‌ರಾಡೊರ್ಸೊ ನುಪ್ಪುಗು ಗತಿಯೆದಾಂತಿಲೆಕೊ ||

9

ಯಾನ್ ಬದುಕುನೆದಾಯೆ ನಿನ್ನವೆ
ಕಾಸ ಮೆಗಿಯಾವೊಂದು ಪಂಡ್‌ದ್
ನಾಲಿಗೇ ತನ ಕತ್ತಿನೊಡ್ಡೆಯೆನಪಗ ಶ್ರೀ ಕ್ರಿಷ್ಟೆ ||
ದಾಯೆಗೇ ಸೈಪ್ಪುನೆಯ ಅಣ್ಣನ್
ಪಾತೆರೊಡೆ ಕೆರೈಂದೊ ನಿಕ್ಕಲ
ಸಾದಿ ಉಂಡುಯ ಸಯೈರೆಗ್ ನಿಜೊ ಪಾತೆರೊಡೆ ಪಾರ್ತ ||

10

ನಿನ್ನನೀಯೆ ಪುಗರಿಯಡ ಈ
ಸೈತ್ತಿಲೆಕೊನೇ ಆಂಡ್ ಪನ್ನಗ
ಅರ್ದುನೆನೆ ಪುಗರೊಂಡೆ ತನ್ನನ್ ತಾನ್ ಮೆಚ್ಚಿಲೆಕೊ ||

ಪತ್ತ ಪುದರ್‌ಡ್ ಕೀರ್ತಿ ಪಡೆಯಿನ
ಎನ್ನಲೆಕೊ ಉತ್ತಮೆರ್ ಲೋಕೊಡು
ಇತ್ತೆ ಏರುಲ್ಲೆರಾಯ ಪನ್‌ಪನ್ ಕ್ರಿಷ್ಟೆ ಎನಡಿತ್ತೆ ||

11

ಕಾಂಡವೊನು ಸುಡ್ಡಾಯೆ ಇಂದ್ರನ
ಆನೆನೇ ಜಪುಡಾಯಿನಯೆ ನಿಜೊ
ದ್ರೋಪದಿನ ಮದಿಮೆದವೆ ಪಂತೊಡು ಯಾನೆ ಗೆಲ್ತನಯೆ ||
ಪಾಸುಪತೊ ಬಾಣೊನುಲ ಸಿವಡನೆ
ಕಾಳಗೊನೆ ಮಲ್ತದ್‌ಲ ಪಡೆಯಿನ
ವೀರೆ ಯಾನೇ ಗುರುನು ಬೀಸೈರೆನೇನ್ ಗೆಲ್ತನಯೆ ||

12

ಇನಿಯೆ ಕರ್ಣನ್ ಗೆಲ್ಲುನಾಯೆನೆ
ಬರತ ವಂಸೊದ ಪೂರ್ಣ ಚಂದ್ರನೆ
ನರಮನಿಗ್ ನರೆ ಪನ್ನ ಪುದರೇರೆಗ್‌ಲ ಉಂಡಿತ್ತೆ ||
ನಕುಲ ಸಾದೇವೆರ್‌ಲ ಬೀಮೆಲ
ಪಲಯ ಸೇವೆಗ್ ಉಂತಡಾಕ್‌ಲ್
ಇನಿಯೆ ಕಾಡ್‌ಗ್ ಪೋಪೆ ತಪಸ್‌ಗ್ ಎನನ್ ತಲಿಪೊಡ್ಡಿ ||

13

ಅರ್ದುನೆನೆ ಪಿದಡ್‌ನಗ ಕ್ರಿಷ್ಟೆನೆ
ನಿನ್ನ ದೋಸೊ ನಿಮುರ್ತಿ ಆಂಡ್‌ಯ
ಬುಕ್ಕೊ ದಾಯೆಗ್ ಪೋಪುನೆಂದ್‌ದ್ ಮಲ್ತೆ ಸಮದಾನೊ ||
ಧರ್ಮನಂದನೆ ತನನ್ ತಾನೇ
ನೆರ್ದ ಪಿದಡಿಯೆ ಸಿಬಿರೊಡುದುಲಾ
ಮುಲ್ಪ ಉಂತುಜಿ ಯಾನ್ ಮಲ್ತನ ತಪ್ಪು ಮಾಜಯೆರೆ ||

14

ಕಾಡ್ ಸೇರ್‌ದ್ ತಪಸ್ ಮಲ್ಪುವೆ
ಬೀಮ ಪಾರ್ತೆರ್ ದಾಲ ಮಲ್ಪಡ್
ಯಾನ್ ಕೇನುಜಿ ಪನ್ದ ಪಿದಡ್‌ನ ತೂದು ಮಾತೆರ್‌ಲ ||
ಸಾದಿಗಡ್ಡೊನೆ ಉಂತನಾಪಗ
ಪಾರ್ತೆ ಕಾರ್‌ಗ್ ಅಡ್ಡೊ ಬೂರುದು
ತಾನ್ ಉಲಯಿಗ್ ಕನತೆ ಕ್ರಿಷ್ಟಗ್ ಆಂಡ್ ಸಂತೋಸು ||

|| ಕರ್ಣನ್ ಕೆರ್ವೆಂದ್ ಅರ್ಜುನೆ ಆಜೊ ಪಾಡಿಯೆ ||

ನೋತಿ ಲೆಕೊನೇ ಮಲ್ಪುಲಯ ಈ
ಯಾನ್ ಮಲ್ಪುವೆ ಬುಲ್ತಿ ಲೆಕೊನೆ
ಆಟಗಾರರೆ ಕೆರೆಮೊ ಇಂಚನೆ ಪನ್ದ ಸಿರಿ ಕ್ರಿಷ್ಟೆ ||

ರಾಜಿ ಮಲೆನೆ ಮೆಗಿ ಪಲಯನಕ್
ಲಾಪಗನೆ ಸಂತೊಸುಡು ಸಿಬಿರೊಡು
ದ್ರೋಪದಿನ ಸಿರಿ ಮೋನೆ ತೆಲಿಕೆಡ್ ಇತ್ತೆರೊಟ್ಟಿಗೆನೆ ||

1

ನಕುಲ ಸಹದೇವೆರೆಗ್ ಸಂತೊಸು
ಉಲಯಿದಕ್‌ಲೆಗ್‌ಲಾಂಡ್ ಮನಸ್‌ಗ್
ತೆಲಿಕೆದುಲ್ಲೇಸೊನೆಲ ಧರ್ಮಜೆ ಲೆತ್ತೆನರ್ಜುನನ್ ||
ಅರದ್ ಪತ್ತಾದ್ ಪಂಡೆ ನಿನ್ನನ್
ಮೆಗಿಯೆನೆಂದ್ ಪನಿಯೆರೆನೇ
ಕರಿನ ಜಲೊಡು ಮಲ್ಲಿ ಪುಣೊದ ಪಲೊನೆ ಗ್ರೇಯೊನುಲ ||

2

ಬೀಮೆ ಲಡಯಿದ ಕಳಟೆ ಉಲ್ಲೆಡೊ
ಈಯೆ ಬರೈರೆ ಪನ್‌ಲ ಈಡೆಗ್
ಕಾಳಗೊಡು ನನ ಮಲ್ಪುನೆಂಚಿನ ಕರ್ಣನಬ್ಬರೊನೆ ||
ಜೋರು ಜೋರಾಂಡತ್ತೊ ನಮೊ ನನ
ಏರೆ ಸಾಯೊಡು ಗೆಲ್ಪುನೆನೊ ಪನ್
ಪಾರ್ತ ಪನ್ನಗ ಪನ್ನೆ ತನ್ನವೆ ತಿಗಲೆ ಬೊಟ್ಟೊಂದು ||

3

ಅಣ್ಣ ಕೇನ್‌ಲ ಇನಿಯೆ ಪಗೆಲ್‌ದ
ಪೊರು ಕಂತುನದುಂಬು ಕರ್ಣನ್
ಕೆರ್ಡ್ ಪಾಡ್ಡಿಡ ಪೊಣ್ಣು ಪೊಂನೈನ್ ಎಲ್ಯ ಜೋಕುಲೆನ್ ||
ಬ್ರಮ್ಮ ಹತ್ತೈನ್ ಗರ್ಬೊನಾಸೊನು
ಮಲ್ಲಿ ದೋಸೊನೆ ಬಡವೆರಿಲ್ಲನ್
ಪೊತ್ತಯಿನವತ್ತಂದೆ ಇಸೊನೇ ಪಾಡ್ಡ್ ಕೆರೆಯನ ||

4

ಪಾಪೊ ದೋಸೊಲು ಎಂಕ್ ತಾಗಡ್
ಬೂಳ್ಳೊ ಕೊರುದೇ ಕಡಪುಡೆನ್ನನ್
ಪಾಡ್ಡೊನಾಚೊನು ನಡಪದೇ ಪಿರ ಬರ್ವೆ ಪಂಡೊಂದು ||
ಕಾರ್‌ಗಡ್ಡೊನೆ ಬೂರ್ನ್ ಮೆಗ್ಯನ್
ದೇರ್ತ್ ಲಕ್ಕದ್ ಧರ್ಮನಂದನೆ
ಪ್ರೀತಿ ಬಾಮೊಡು ಬೆರಿನ್ ಈಸ್ದ್ ಪನ್‌ಪೆನರ್ಜುನಡ ||

5

ಮೂಜಿ ಲೋಕೊಡು ವೀರೆ ಪನ್ನುನ
ಕೀರ್ತಿದಾ ಪುದರುಂಡು ನಿಕ್ಕೇ
ಸೂತನಾ ಮಗೆ ಏಪೊಗುಲ ಎದುರತ್ತ್ ಕಾಳಗೊಡು ||
ಜಾತಿ ಹೀನನ್ ಪಟ್ಟೋಗೇರ್ದದ್
ಮಾನೊ ಮಾರ್‌ದೆನಾ ಸುಯೋದನೆ
ಈಯೆ ಗೆಲ್ತದ್ ಕರ್ಣ ಪುದರ್‌ನ್ ಮಾಜದೇ ಬರೊಡು ||

6

ಮುತ್ತುದಾರತಿ ಪತ್ಯೆರಾಯಗ್
ಪೊಣ್ಣು ಪೊಂಜೊವು ದ್ರೌಪದಿನವೇ
ಬಟ್ಟಿಗೆನೆ ತೆಲಿತೊಂದು ಸಿರಿ ಸೋಬಾನೆ ಪಂಡೊಂದು ||
ಕಚ್ಚೆನ್‌ಲ ಬಿಗಿತೊಂದು ಮೂಡಿಗ್
ತಿಕ್ಕಯೆನೆ ತನಬೆರಿಕ್‌ಲರ್ಜುನೆ
ಮಲ್ಲ ಗಾಂಡೀವೊನುಲ ಕುರ್ಕದ್ ಪಿದಡ್‌ನಾಪಗನೆ ||

7

ಜಯೊ ಜಯೊನೆ ಪಂಡೊಂದು ಪಾಟಕ-
ನಕ್‌ಲ್ ಪಿರವುಡೆ ಬನ್ನಗಾಪಗ
ಹರಿಯೆ ತೇರ್‌ನ್ ತಯರ್‌ಡುಂತದೆ ಪಾರ್ತಗೇರಿಯೆರೆ ||
ಹನುಮೆ ಕೊಡಿಮರೊ ಕೇರೈನಾಪಗ
ಪಲುಗುಣೆನೆ ಕೈ ಮುಗಿದ್ ಕ್ರಿಷ್ಣಗ್
ರತೊಕು ಬಲಿ ಬತ್ತೊಂದು ಏರ್‌ಯೆ ಗೌಜಿದಬ್ಬರೊಡು ||

8

ಪಾಟಕೆರೆ ಜಯಗೋಸೊ ಕೊಂಬುದ
ವೀರ ಗರ್ಜನೆ ಬೇರಿ ಬಾಂಕೆದ
ಬಾರಿ ಸೊರೊ ಲಕ್ಕನಗ ವೈರಿಲೆ ತಿಗಲೆ ನಡ್ಕೊಂದು ||
ಆನಗನೆ ಹರಿ ತೇರ್ ನಡಪಯೆ
ಸಾದಿಡೇ ಸುಬ ಸಕುನೊ ತೋಜಿದ್
ಕಾಳಗೊಡ ಕಳತಾಡೆಗರ್ಜುನೆ ಎತ್ತದಾನಗನೆ ||

9

ಸಲೈ ಕರ್ಣನ ತೇರ್‌ನಾಪೆಕ್
ಎತ್ತದಿತ್ತೆನೆ ಅಪಗ ಸಕುನಿಯೆ
ಲೆತ್ತ ಪಂಡೆನೆ ಪಾರ್ತ ಲಡಯಿಗ್ ಬತ್ತೆ ಬತ್ತೆಂದ್ ||
ಅಸ್ತತ್ತಾಮೆಲ ಎತ್ತೈನಾಡೆಗ್
ದುಸ್ಸೆ ದುಸ್ಸಾಸೆನೆಲ ಬತ್ತೆನೆ
ಕರ್ಣ ರತೊ ಓಲುಂಡು ಪಂಡ್‌ದ್ ನಾಡೈ ಕೌರವೆನೆ ||

|| ಭೀಮೆ ದುಸ್ಸಾಸನನ ಕರ್ಣ ಒಯಿತೆ ||

ಪಾರ್ತನಾ ರತೊ ಕಳಕ್ ಎತ್ತಾನೆ -
ಗಾಪಗನೆ ಬಲ ಬೀಮೆ ಕೌರವ
ಸೇನೆನೇ ತೌರೊಂದು ಇತ್ತೆನೆ ಕಾಲ ಯಮ ಲೊಕೊನೆ ||
ತೇರ್‌ಲೆನ್ ಪೊಡಿ ಮಲ್ಲೆ ಹಾಕ್‌ದ್
ಆನೆಲೆನ್ ಕುದುರೆಲೆನ್ ಕೆರೈನೆ
ಕಾರ್‌ಡತ ವೀರೆರೆನ ಪುಣ ಪಾಡಿಯೆನೆ ಕಳಟೊಮೆ ||

1

ಗದೆಟ್ ಕಡೊಡು ಬಿಲ್ಲ್ ಬಾಣೊಡು
ಪಗೆತಕ್ಲೆ ತರೆ ತಿಗಲೆಗೇತ್ಲ
ಕೊರುದು ಕೆರೈನೆ ಬೀಮೆ ಪಂಡ್ ಪುಲ್ತೆ ಕೌರವೆನೆ ||
ಮೆಗಿಯನೆದುರುಡು ಬುಲ್ಪುನಾಯನ್
ತರ್ಕ್ ಪತ್ತ್ ಪನ್ನೆ ದುಸ್ಸಾ-
ಸನೆನೆ ಬುಲ್ಪುಡ ಅಣ್ಣ ಯಾನೇ ಕಳಕ್ ನುಕ್ಪೆಂದ್ ||

2

ತನಕ್ ಬೇತೆನೆ ಇತ್ತಿ ಸೇನೆನ್
ಬರಿಯೆರೆಗ್ ಪಂಡೊಂದು ಪಿಡಡಿಯೆ
ಜಯೊತ ಗೋಸಣೆ ಬೇರಿ ವಾದ್ಯೊದ ಸೊರೊನು ಲಕ್ಕಾದ್ ||
ಪಿಡಡನಾ ರತೊ ಆನೆ ಕುದುರೆಲೆ
ತಿಗಲೆ ತಂಕೊದ ವೀರನಾಕಲೆ
ರಬಸ್ ದಬ್ಬರೊಡಪಗ ವೈರಿಲೆಗಾಂಡ್ ಪೋಡಿಗನೆ||

3

ಓಲು ಉಲ್ಲಯ ಬೀಮ ಬಲ ಬಲ
ವೀರ ದುಸ್ಸಾಸನನ ಎದುರುಗು
ಆಯೆ ನಾಡೊಂದುಲ್ಲೆ ಕಾಳಗೊ ಕಳಟ್ ತಿಗೊಂದು||
ಬಾಸೆ ಪಾಡ್ನಯೆನಾಸೆ ತೀರ್ರಯೆ
ರಾದ್ ಲಾಂಡಲ ಎದುರು ಉಂತುಲ
ದಾನೆ ತೋಜುಜ ಪನ್ದ ಲೆತ್ತೆರಾಲಾಯ ಸೈನಿಕೆರ್ ||

4

ದುಸ್ಸ ದುಸ್ಸಾಸನನ ಸೇನೆದ
ಅಬ್ಬರೊನು ತೂವೊಂದುಲರ್ದುನೆ
ಲೆತ್ತೆನೇ ಸಹದೇವನಕ್ಲೆನ್ ನಾಲ್ ರಂಗೊದವೆ ||
ಸೈನ್ಯೊನಪಗನೆ ಸೇನೆದೊಡಕರೆ
ದ್ವಾಸ್ವದ್ಯುಮ್ಮನ್ ತಯರ್ಡುಂತೈರೆ
ಪನ್ದ ತೆರಿಪನಗಪಗ ಬೀಮೆನೆ ಬತ್ತೆ ಪಾರೊಂದು ||

5

ಎರ್ ದಾಯೆಗ್ ಯಾನ್ ಇದೈನೊ
ಬಾಸೆ ಪಾಡ್ನಯೆನಾಯ ಕರ್ಲನ್
ದ್ರೋಪದಿಗ್ ಮುಡಿಪವೆನೆ ಪನ್ನುನ ಆಜೊ ತೀರ್ಸಾವೆ ||
ವೀರ ದುಸ್ಸಾಸನೆನೆ ಬಲ ಬಲ
ಆಣ್ ಅಂದ್ ಡ ಎದುರು ಉಂತುಲ
ಕೌರವಾದಿಲೆ ಕಾಲ ಯಮೆನೇ ಯಾನ್ ಲೆಪ್ಪುನೆಯೆ ||

6

ಬತ್ತನಯ ಓ ಬೀಮ ಎದುರುಗು
ತಿಕ್ಕನಯ ನಿನ ಬಂಜಿ ತಿಗ್ತಾದ್

ಎನ್ನ ಸೊನ್ನತ್ತೆನ್ನೊ ಮೆಗ್ಗಲ್ಲೆನ್ ಲಕ್ಕಾವೆ ||
ಬತ್ತೆನೇ ಪಂಡೊಂದು ಬಾಣೊಡು
ಬರ್ಸೊ ಜಪುಡುಯೆನಪಗ ಬೀಮೆನೆ
ಅಟ್ಟಸ್ಡ್ ಸರಿ ತುಂಡು ರಟ್ಟಯೆ ಬತ್ತಿ ಬಾಣೊಲೆನ್ ||

7

ಗದೆಟ್ ಹಾಕಿಯೆನಪಗ ದುಸ್ಸಾ-
ಸನೆಲ ಗದೆ ಪತ್ತೊಂದು ಉಂತಿಯೆ
ತರೆಕ್ ತಿಗಲೆಗ್ ಹಾಕೊಂಡೇರ್ಲ ಕಳಟ್ ಕಾಳಗೊಡು ||
ಕಡುಗೊ ಪತ್ತೈರ್ ಕಡ್ಡು ಕಡ್ಡೆರ್
ಸುರಿಯೆ ಕುತ್ಯೈರ್ ಕೈಟ್ ಗುದೈರ್
ಇರುವೆರ್ಲ ಸರಿ ಸರಿಟ್ ಕಾದೈರ್ ಕಳನೆ ಪೊಡಿಯಾಂಡ್ ||

8

ಆಯುದೊಲು ದಾಯೆಗ್ ಯ ನಮ್ಮಡ
ತ್ರಾಣೊ ಮೆಯಿಟುಂಡತ್ತೊ ಉರ್ಡುದು
ತೂವೊನುಗೊ ಸರಿ ಮಲ್ಲ ಯುದೊಡ್ಡು ಪಂಡೆನಾ ಬೀಮೆ ||
ಆಂಡ್ ಪಂಡ್ ಪಂಡ್ ತಯರ್ಡುಂತಿಯೆ
ವೀರ ದುಸ್ಸಾಸನೆನೆ ರಟ್ಟೈಗ್
ತೋರೊದಾ ತುಡೆ ಬುಜೊಕು ಬೊಟ್ಟುದು ಕಣ್ಣ್ ಮಗ್ಗರ್ದ್ ||

9

ಪರುನು ಕಡೆವೊಂದಕ್ಲೆ ಓಂಗ್ ದ್
ಸರಿತ ಪತ್ತನ್ ಪತ್ತೈರಾದೇ
ತಿರ್ಗ್ ತಿರ್ಗ್ ನಾಲಿ ಸೊಂಟೊಡು ಬಿಗಿತ್ ಪತ್ತಿಯೆರ್ ||
ಬುಡುಪಯೆರೆ ಪುಣೆವೊಂದು ತೂಯೆರ್
ಇರುವೆರ್ಲ ಸರಿ ಸರಿಟ್ ಬೀಮೆನೆ
ಕಡೆಕ್ ನಾಲಿಡ್ ಪತ್ತಿ ಪತ್ತನ್ ತೀರ್ಲಿ ಬುಡ್ಡಯೆರೆ ||

10

ದತ್ತ ಕಾರ್ನ್ ಅಡ್ಡೊ ದೀಡ್ ದ್
ಪತ್ತಿ ಕೈಟೇ ಸುತ್ತ ತಿರ್ಗ್ ದ್
ಮಗ್ಗ ಪಾಡ್ ದ್ ಕುಲೈ ತಿಗಲೆಡ್ ನಾಲಿನೊತ್ತಿಯೆನೆ ||
ದಮ್ಮ ಕಟ್ಟೆಡ್ ಕಣ್ಣ್ ಮರೆಲ್ ದ್
ತಿರ್ತ್ ಮಿತ್ತೈಗ್ ಉಸುಲು ಪೋಯಿಜಿ
ಸೈತ್ತೆನೇ ದುಸ್ಸಾಸನೆನಪಗನೆ ರುದ್ರನಬತಾರೊ ||

11

ಬೀಮಗಾಯಿನ ಲೆಕೊನೆ ಬಂಜಿನ
ಪೂರ ತಿಗ್ತಾದ್ ಕರ್ಲನೊಯ್ ದ್
ಪಾಡೈ ಪಿದಯಿಗ್ ಲಪಗ ಕೌರವ ಮೋನೆ ತೂವೊಂದು ||
ದಾಯೆ ತೂವೊಂದುಂತ್ಯ ಬುಡ್ಡಲ
ನಾಯಿ ದುಸ್ಸಾಸನನ್ ತೀರುಜೊ
ವೀರ ಕರ್ಣನೆ ಸಲ್ಯ ಕೈಪೆರ್ಲ ಬಲೆಯೆ ಬುಡ್ಡಯೆರೆ ||

12

ವಿರ್ಲಾ ಬರ್ಪುಜರೊ ಮಿತ್ತಾದ
ಲೋಕೊದಾಕ್ಲ್ ಬಾನೊಡುಂತುದು
ದಾಯೆ ತೂಪರ್ ತಿರ್ತ್ ಜಪ್ಪುಲೆ ಇಂಬ್ಯ ರಚ್ಚಣೆಗ್ ||
ಓ ಮುರಾಂತಕ ಯಾನ್ ರಕ್ತಸೆ
ತೀರುವಯ ನಿಕ್ಕಿತ್ತೆ ಇಂಬ್ಯನ್
ಕಾಪಿಯೆರೆ ಪಂಡೊಂದು ತೂಯೆನೆ ಪಾರ್ತನಾಪಗನೆ ||

13

ಬುಡ್ಡಲಯ ಓ ಪಾರ್ತ ಇಂಬ್ಯನ್
ಪತ್ತ ಪುದರ್ದ ವೀರೆ ಅತ್ತೊಯ
ಪತ್ತ ನಿನ ಗಾಂಡಿವೊನಿತ್ತೆನೆ ದಾಯೆಗುಂತೊಂದ ||
ನಿಕ್ಕಲಾ ಗಾಂಡಿವೊನೊ ಪೊಂರ್ಕಗ್
ಪನ್ನಗನೆ ಪಲುಗುಣೆನೆ ಕೋಪೊಡು
ಬಿಲ್ಲಗೇ ಸರಿ ಬಾಣೊ ಕೊಲ್ಪಯೆ ಬೀಮಗಾಕಿಯೆರೆ ||

14

ಆತೆ ಪೊರ್ತುಗು ಕ್ರಿಷ್ಟೆ ಬತ್ತದ್
ಪಾರ್ತನಾ ಕೈಡ್‌ದಲ ಪಗರಿನ್
ಬೇಕೊ ಒಯ್ತದ್ ಪಂಡೆ ಬೀಮಗ್ ರುದ್ರನಬತಾರೊ ||
ಆಯಿನೆಟ್ ನಿನನಾಯೆ ದೀಡಯೆ
ಆಯಗೀ ಕೈ ಮುಗಿಲ ಪನ್ನಗ
ಕಾರ್‌ಗಡ್ಡನೆ ಬೂರೈ ಬೀಮಡ ಕ್ಷಮೆನ್ ಕೇನೊಂದು ||

|| ಭೀಮೆ ತನ್ನ ಬಾಸೆ ತೀರಾಯೆ ||

ಎನ್ನ ಬಾಸೆನ್ ಸಂದವೊಡು ಇನಿ
ಪನ್ನ ಭೀಮೆನೆ ದ್ರೌಪದಿನಲಾ
ಬರೈರೆಗ್ ಜನೊ ಪೋಯಿ ಸಾತ್‌ಗ್ ಎತ್ತಲಾಡೆಗೆನೆ ||
ದುಸ್ಪ ದುಸ್ಯಾಸನನ ಅಂತ್ಯೊದ
ಮುರ್ತ್ಯು ದೇವತೆಲೆಕೊನೆ ಬತ್ತಲ್
ಯುದ್ಧೊ ಬೂಮಿದ ನಡುಟೆ ಮಾರಿದ ಬೀರಿದಂಚೆನೆನೆ ||

1

ಬತ್ತನಾಲೆಗ್ ಭೀಮ ಸೇನನ
ಗುರೊ ತಿಕ್ಕಜಿ ಅಂತ್ಯೊ ಕಾಲೊದ
ರುದ್ರೆನೋ ಪಂಡೊಂದು ಕ್ರಿಷ್ಟನ ಮೋನೆ ತೂನಗನೆ ||
ಕಣ್ಣದಿಪ್ಪಿಗ್ ಸಗ್ತಿ ಕೊರೈನೆ
ಕ್ರಿಷ್ಟನಪಗನೆ ದ್ರೋಪದಿಗ್ ಸರಿ
ರುದ್ರರೂಪೊಡೆ ಬೀಮತೋಜಿಯೆ ದೇವಿ ದ್ರೌಪದಿಗ್ ||

2

ಪಾರ್ ಬತ್ತದ್ ಬೀಮ ಕೈತಲ್
ಕಾರ್‌ಮಡಿತ್‌ದ್ ಕುಲ್ಲನಾಪಗ
ಆನಿ ಪನ್ನನ ಬಾಸೆ ತೀರವೆ ಬುಡೆದಿ ನಿಕ್ಕೇನ್ ||
ದಾರೆಕಟ್ಟದ್ ಅರಿಪಿನೆತ್ತೆರ್-
ನೀಯೆ ಪೂಜಿದ್ ತರೆನ್ ಇಂಬ್ಯನ
ಕೂಲಿಡೇ ಬಾರೊಂದು ಕಟ್ಟಲ ಸೂಡಿ ಕುಜಲ್‌ದವೆ ||

3

ಅಪಗನೇ ನೆತ್ತೆರ್‌ಡ್ ಕುಜಲ್‌ನ್
ಬುಡುಪವೊಂದೇ ಸೂಡಿ ಕಟ್ಟಲ್
ಕರ್‌ಲದಾ ಮಾಲೆನ್‌ಲ ಮುಡಿಪಯೆ ಬೀಮೆ ದ್ರೌಪದಿಗ್ ||
ಬುಡೆದಿ ನಿನ್ನವೆ ಸೀರೆನೊತ್ತಾನ
ದಡಿಗನೇನೇ ಕೆರೈ ಪಂಡ್‌ದ್
ಅರದ್ ಪತ್ತದ್ ಮುತ್ಯೊ ಕೊರೈನೆ ಬಾಸೆ ತೀರ್ಂಡ್‌ದ್ ||

4

ಈರೆನಂಚಿನ ಕಂಡನೀಯೆರ್
ಮಾತ ಪೊಣ್ಣಲೆಗೊದಗಡ್‌ದ್
ಪ್ರೀತಿಡಾಯಗ್ ಮುತ್ಯೊ ಕೊರೈಲ್ ತಾನ್ ಪೋಪೆಂದ್ ||
ಆಯನಾ ಪುಣಕೊಂಜಿ ಒದ್ದುದು
ಸೀದ ಪೋಯಲ್ ಸಿಬಿರೊದಾಡೆಗ್
ಬೀಮೆಕಾರ್‌ಡ್ ಪುಣನ್ ರಟ್ಟದ್ ತನ್ನ ಕೈದಕ್ಕೆ ||

5

ಯುದ್ಧೊ ಬೂಮಿಡೆ ಗದೇನ್ ತಿರ್ಗದ್
ಅಟ್ಟಸ್‌ಡ್ ಕೌರವನ್ ಕೆರೈರೆ
ತಿಕ್ಕುವೆನೊ ಪಂಡೊಂದು ನಾಡಿಯೆ ದುಸ್ಪೆ ಓಲ್ಲೆಂದ್ ||
ಕರ್ಣನಾ ಮಗೆ ತೂದು ಭೀಮನ್
ಕೆರೈರೆಗ್ ಒಂಜಸ್ತೊ ಬುಡಿಯೆನೆ
ಪೆಟ್ಟೆ ತಾಗ್‌ನಗಪಗ ತೂಯೆನೆ ಏರ್ನ್ ಪಗರಿಂದ್ ||

6

ತೂನಗನೆ ವ್ಯಸನೇ ತೋಜಿಯೆ
ಬಾಲೆ ಈ ಸಯ್ಯಡಯೆ ನಿಕ್ಕೇ
ಯಾನ್ ಬಾಣೊನು ಬುಡಯೆ ಕೆರೈಡ ದೋಸೋ ತಟ್ಟುಂದು ||
ಜೋಕುಲಾಟಿಗೆ ಬುಡುದು ಪೋ ಮಗ
ಹಾಕಯೆನೆ ನಿಕ್ಕೇನ್ ಪನ್ನಗ
ಕೇಂಡ್‌ಚೆನೆ ಆ ಬಾಲೆ ಮಂತ್ಯೊದ ಬಾಣೊ ರಟ್ಟಾಯೆ ||

7

ಕರ್ಣ ಮಗನವೆ ಬಾಣೊ ತಾಗ್‌ದ್
ನೆತ್ತೆರ್‌ದವೇ ದಾರೆಮೆಯಿಡ್‌ದ್

ರಟ್ಟನಗ ತರೆ ತಿರ್ಗದಾಪಗ ಬೀಮೆ ಬೂರಿಯೆನೆ ||
 ಕೆರೈ ಬೀಮನ್ ಪಂಡೊನುಂದೇ
 ಗತ್ತಡಾಯೆನೆ ತಿರ್ಗನಾಪಗ
 ಅರ್ಟ್ವನನ ರತೊ ಎದುರು ಬತ್ತನ ತೂಯೆನಾ ಹುಡುಗೆ ||

8

ಕ್ರಿಷ್ಟ ದೇವೆರೆ ಉಂತಲೆಯೆ ರತೊ
 ಅರ್ಟ್ವನಡ ಕಾದಿಯೆರೆ ಬೋಡದ್
 ಯುದ್ಡೊ ಬೂಮಿಡ್ ಮಗ್ತ್ ಪಾಡ್‌ದೆ ಬೀಮನೊರೊತೂಲೆ ||
 ಕೆರೈವೊಡು ಈ ಹುಡುಗನಿತ್ತೆನೆ

ಕರ್ಟ್ವಗಾಪಗ ಕೋಪೊ ಏರ್‌ದ್
 ಬರ್ವೆಲಡಯಿಗ್ ಇದ್ದಿಡಾಯೆನೆ ಕಳಟ್ ತಪ್ಪವೆನೆ ||

9

ವಾಸುದೇವೆನೆ ಪಂಡೆ ಪಾರ್ತಡ
 ತೂಲ ಕರ್ಟ್ವನ ಮಗೆನೆ ಲಡಯಿಗ್
 ಪಾರ್ ಬರ್ಪೆನೆ ಕರ್ಟ್ವ ನಿನ್ನವೆ ಮಗನ್ ಕೆರೈದ್ ||
 ಈತ್ ಪನ್ನಗ ಬಾಣೊ ರಾಪದ್
 ಪ್ರಾಣೊ ದೆತ್ತೆನೆ ಕರ್ಣ ಮಗನವೆ
 ಬೀಮನಾರೆಕೆ ಮಲ್ತದರ್ಜನೆ ಲಕ್ಕೈದುಂತಾಯೆ ||

ಮೂಜನೆ ಸಂದಿ

|| ಕರ್ಣಾರ್ಜುನೇರ್ ಎದುರಾಯೆರ್ ||

ಕಾಳಗೊದ ಕಳತವುಲೆ ಕರ್ಣನ
 ತೇರ್ ಬನ್ನಗ ಕಳಟ್ ಬೂರ್ಡನ
 ಏರೆನಾ ಪುಣ ಪನ್ದ ತೂಯೆನೆ ಸಲೈ ಸಾರತಿಯೆ ||
 ತೂಲಯಾ ವ್ಯಸಸೇನೆ ಸೈತ್ತದ್
 ಬೂರ್ಡ ಪಂಡ್‌ದ್ ಕರ್ಣಗಾಯೆನೆ
 ತೋಜನಗ ತರೆಕೊಂಜಿ ಹಾಕ್‌ದ್ ಬುಲೈನಾ ಕರ್ಣ ||

1

ಅಯ್ಯೊ ಎನ್ನ ಕಡಿರ ಮಗೆನೇ
 ಸೈತ್ತನೆನ್ ತೂಯೆರೆಗ್ ಬ್ರಹ್ಮೆನೆ
 ಎನ್ನ ತರೆಟೇ ಬರೆಯೆನಿದ್ದಿಡ ಆಯೆ ಸಯೈರೆಗ್ ||
 ಕಾರಣೊನೆ ಏರ್ಲತ್ತ ಆವಡ್
 ಪಾರ್ತೆನೇ ಕೆರ್ನಯೆನೆ ಅತ್ತಂ-
 ದೇರೆಗ್‌ಲ ಕೆರೈರೆಗ್ ಆಯನ್ ತೀರೈ ಸಲ್ಯಣ್ಣ ||

2

ಹರಿಯೆ ಸಾರತಿಯಾದ್ ಹನುಮೆನೆ
 ಕೊಡಿಮರಟ್ ಕುಲ್ಲದನ್ ತೇರ್‌ಗ್
 -ಬೊಳಿಯ ಕುದುರೆಲು ನಾಲ್ ಕಟ್ಟನೆನಿತ್ತೆ ತೋಜಾಲ||
 ಪಲುಗುಣನ ನೆತ್ತೆರ್‌ಡ್ ಎನ್ನವೆ
 ಮಗನ ಪುಣಮೀಪಾವೆ ಪನ್ನಗ
 ರತೊನು ದೇರಿಯೆ ಸಲೈ ಕಾಳಗೊ ಕಳಟೆ ದುಮುದುಂಬು ||

3

ಪಾರ್ತೆ ಗಾಂಡಿವೊ ಕುರ್ಕದಾನಗ
 ಆಯಿನಾ ಸೊರೊತೊಟ್ಟಿಗೆನೆ ಹರಿ

ಪಾಂಚ ಜನೊನು ಉರಿಪುನಗನೇ ಆಯ್ ಮಹಗಾಜಿ ||
 ಕಾಳಗೊದ ಕಳತಾಡೆ ಪಾರ್ತನ
 ತೇರ್ ಬರ್ಪುನ ಲಚ್ಚಣೊನು ಸರಿ
 ಮಾದ್ರ ಬೂಪತಿ ತೆರಿದ್ ಎದುರುಡು ತೇರ್‌ನುಂತಾಯೆ ||

4

ತೇರ್ ತೇರ್‌ಗ್ ತಾಂಟ್‌ದಾನಗ
 ವಾಸುದೇವೆನೆ ಸಲ್ಯ ಮೋನೆನ್
 ತೂದು ನೆರೈನೆ ಮಾದ್ರ ಬೂಪತಿ ನಿನ್ನ ಹಣೆ ಬರೊನೆ ||
 ಸೂತ ಮಗನವೆ ಗಾಡಿ ದೇರುನ
 ಚಾಟಿ ಬೀಜುನ ಕುದುರೆ ದೆಕ್ಕುನ
 ಬಾರಿ ಮರ್ಯಾದಿದವೆ ಕೆಲಸೊಗು ಸಂಬಳೇತುಂಡು ||

5

ಎರೈ ಮೇತ್‌ದ್ ಸೂತವಿದೈನ್
 ಕಲ್ತನಯ ಓ ಕ್ರಿಷ್ಟ ಪಂಡ್‌ದ್
 ನುರ್ಕಯೆನೆ ಕುದುರೆಲೆನ್ ಸಲೈನೆ ಚಾಟಿಡಾಕೊಂದು ||
 ಕಿಷ್ಟನಾ ರತೊಕಾಯ ಕುದುರೆಲು
 ಗುತ್ತು ದೆತ್ತದ್ ದೀಡ್ಯೊ ಮುಂಗರ್
 ಅರ್ಟ್ವನನ ಕುದುರೆಲುಲ ಲಾಗಿಡ್ ತೇರ್‌ಗ್ ಕಾರ್ಪಿಡ್ಯೊ ||

6

ಅಪಗ ಕರ್ಣಾರ್ಜುನೇರ್ ಬಾಣೊನು
 ಬಿರುಕು ಕೊಲ್ಪದ್ ಒರೈನೊರೈನ್
 ನೆರಿಯೆರೆಗ್ ಸುರು ಮಲ್ತೆರಾಕ್‌ಲ್ ಕಣ್ಣ ಮಗ್ತದ್ ||
 ಕುರುಕಲೊತ ಸೈನ್ಯಾದಿಕಾರೊನು
 ನಿನ್‌ನ ಲೆತ್ತದ್ ಕೊರೈ ಕೌರವೆ
 ಕುರುಡ ಮಗನೇ ಕುರುಡೆ ಕಂಡಿತೊ ಪನ್ದ ಪುಗರೊಡುಯೆ ||

7

ಜಾತಿ ಚಿತ್ರಲೆ ಕಳಟ್ ಉಂತುನ
 ಏಗಿತೊನೆ ನಿಕ್ಕುಂಡೊ ಸೂತೆರೆ
 ಜಾತಿದಾಯ್ಗ್ ಪನ್ದ್ ಬಾಣೊನು ಬುಡಿಯೆನರ್ಪುನೆನೆ ||
 ರಾದ್ ಬತ್ತನ ಬಾಣೊನಪಗನೆ
 ವೀರ ಕರ್ಣೆನೆ ತುಂಡುರಟ್ಟದ್
 ಪಾಂಡುರಾಜ್ಗ್ ಪುಟ್ಪೊನಾಯೆನೊ ಪನ್ಲ ಎನ್ನಡನೆ ||

8

ರಾಜಸೂಯೊಡು ಜಾತಿ ಪಂತ್ಯೆಗ್
 ಸೇರನೆತ್ತೊಯೆ ನಿಕ್ಲ ಪಂಡ್
 ಬಾಣೊರಾಪಯೆ ಕರ್ಣೆನರ್ಪುನ ಮೇಲ್ಗ್ ರಬಸ್ಡಾಲ ||
 ಪಾರ್ತೆ ಪಗರಿನ್ ತುಂಡು ಮಲ್ತದ್
 ಆ ವಿರಾಟನ ಗುಡ್ಡೆದೆರ್ದೆನ್
 ದೇರಿಯೆರೆ ಬತ್ತನಯೆ ಆಯಿನೆ ದಾನೆ ತೆರಿಯೊನುಲ ||

9

ಮತಿನ ತಪ್ಪವಿ ಬಾಣೊನೀಯೆ
 ಕುಸೆಲ್ ಗೊಬ್ಬುಡು ಬುಡಿಯೆ ಲಡಯಿದ
 ಕೆರಮೊ ತಪ್ಪದ್ ದ್ರೋಣೆರೆನ ನಿಜೊ ಸಿಸ್ಯೆ ಆವೊಂದು ||
 ಬಿರೆಲ್ ದೆಪ್ಪಯನೇಕಲವ್ವನ
 ಸುರೆರೆ ಸೂಳೆನ ಸಾಪೊ ತುಂಬ್ಯನೆ
 ಗುರುನು ಕೆರ್ಮಯೆ ಅಜ್ಜ ತಿಗಲೆಗ್ ಬಾಣೊ ಬುಡಿಯೆತ್ತೊ ||

10

ಬೋಂಟಿದಾಕ್ಲ್ ಸಾಂಕ್‌ದಿತ್ತಾನ
 ನಾಯಿದಂಚಿನೆ ನಿನನ್ ಕೌರವ
 ಸಾಂಕ್‌ದಾನೆ ಎಂಕ್‌ಲೆಗ್ ಬೌರುದು ತುಚ್ಚೊಡುಂದತ್ತೊ ||
 ಬಾರಿ ಬೌರುದ ಸಬೆಟ್ ನಿನ್ನವೆ
 ಬೂಟು ಬಿಸಾರ್ತಿಗೆನ್ ಕಟ್ಟದ್
 ದೀಲ ಪಂಡ್‌ದ್ ಬುಡಿಯೆನರ್ಪುನ ಸೂತ ಪಗರಿಲೆನ್ ||

11

ಬತ್ತಿ ಸೂತನೆ ಪಗರಿಗಾಯೆನೆ
 ಸರೊ ನೋಟೊನೆ ತೂದು ನೀರ್‌ದ
 ಅಸ್ತೊ ಕರ್ಣೆನೆ ಬುಡುದು ತೆಕ್ಕಯೆ ಅಗ್ಗಿಯರ್ಪುನೆನ್ ||
 ಬುಕ್ಕೊ ಪರ್ವತೊ ಬಾಣೊ ರಟ್ಟಯೆ
 ವಜ್ರೊ ಪಗರಿಡ್ ಪೊಡಿಯೆ ಮಲ್ತದ್
 ಸರ್ದ ಬಾಣೊನು ಬುಡಿಯೆನರ್ಪುನೆ ಕರ್ಣಗಾಪಗನೆ ||

12

ಮರಿಕುಲೆನ ಬಾಣೊಗುಲ ಗರುಡನ
 ಪಗರಿ ಬುಡುದಾ ಕರ್ಣ ರಟ್ಟದ್

ಕಳನ್ ಕತ್ತಲೆ ಮಲ್ತೆ ಮಂತೊದ ಬಾಣೊ ರಾಪಾದ್ ||
 ನರೆನೆ ಸೂರೈನ ಮಂತೊ ಜಪಿತ್‌ದ್
 ಬುಡಿಯೆ ಬಾಣೊನು ಅಪಗ ಕಾಳಗೊ
 ಕಳನೆ ಬೆಳಗ್‌ದ್ ಆಂಡ್‌ಲರ್ಪುನೆ ಬುಡ್ ಬಾಣೊಡುದು ||

13

ಕೋಪೊಡರ್ಪುನೆ ಕರ್ಣ ತೇರ್‌ಗ್
 ಬಾಣೊ ರಾಪಯಿ ಸಾತ್‌ಗವ್ವೇ
 ದೂರೊ ರಟ್ಟದ್ ಬೂಂಡ್ ಯೋಜನೊದಾತ್‌ಡಾಪೆಕ್‌ಡ್
 ಮಾದ್ರ ರಾಜೆನೆ ಕುತ್ತಕಂಡೆನೆ
 ಆದ್ ಬೂರೈವೆ ತೇರ್‌ನಪಗನೆ
 ಸಾದನೆಡ್ ಸರಿ ಸರ್ತೊ ಉಂತಯಿ ಸಾತ್‌ಗಾ ಕರ್ಣೆ ||

14

ಸಗ್ಗಿಡೊಂಚೇ ಪಗರಿ ಬುಡ್ಗ
 ಅರ್ಪುನನ ರತೊ ಒಂಜಿ ಮಾಪುಗು
 ರಟ್ಟದಾನಗ ಕ್ರಿಷ್ಟೆ ಕರ್ಣನ್ ಬಾರಿ ಪುಗರಿಯೆನೆ ||
 ಬಿಸೆರ್‌ಡ್ ಮಾಬಿಸೆರ್ ಈಯೆ
 ಕರ್ಣ ನಿನ್ನವೆ ಕೈ ಚಲಾಕ್‌ನ್
 ಕಣ್ಣೆ ದೆರ್ತದ್ ತೂದು ಯಾನೇ ಬಾರಿ ಮೆಚ್ಚಿಯೆನೆ ||

15

ಈತ್ ಪನ್ನುನ ಕೇನ್‌ಲರ್ಪುನೆ
 ಬಾರಿ ನಾಕೊಸಿಯಾದ್ ಮನಸ್‌ಡ್
 ವಾಸುದೇವೆನೆ ಸೀಂತ್ರಿಗೊಬ್ಬುವೆ ಪನ್ದ್ ನೆನೆತೊಂಡೆ ||
 ನಾಸೊ ಮಲ್ಪಯೆ ಕೌರವೇರೆನ್
 ಪಾಂಡು ಬಾಲ್ಟೆನ್ ಲಗಡಿ ದೆಪ್ಪುನ
 ಯೋಜನೆಗ್ ಬೋಡಾದ್ ಕರ್ಣನ್ ಇಂಚ ಪುಗರ್‌ದಾನೆ ||

16

ರಡ್ಡ್ ಕಡೆನ್‌ಲ ಮಣ್ಣೆ ಮುಕ್ಕದ್
 ಹಸ್ತಿನಾವತಿನುಳಯಿ ಪಾಡುನ
 ಗೊಬ್ಬುಗೆನ್ನನ್ ಜೂವೊ ಜೂವೊಡೆ ಕೆರ್ದುನಟ್ಟನೆನೆ ||
 ಯುದ್ಧೊ ಮಲ್ಪುಜಿಯಾನ್ ಬೋಡುಡ
 ಮಲ್ತೊನಡ್ ಈ ಕ್ರಿಷ್ಟೆ ಪಂಡ್‌ದ್
 ಬಿಲ್ಲ ತಿರ್ತ್‌ಗ್ ದೀಡ್ಡ್ ಕುಲ್ಲಿಯೆ ತೇರ್ಡ್ ಮನಿಪಂದೆ ||

17

ದಾನೆಯರ್ಪುನ ನಿನ್ನ ಮನಸ್‌ಗ್
 ಬೇನೆ ದಾಯ್ತಾಂಡ್‌ಂದ್ ಕೇನ್ನಗ
 ಯಾನ್ ಪನ್ನುನೆದಾಯೆ ನಿಕ್ಕೇ ಗೊಂತು ಉಂಡತ್ತೊ ||
 ಆಯ ತೇರ್‌ನ್ ಯಾನ್ ರಟ್ಟಯಿ
 ನೇತ್ ದೂರೊಗು ನಮನ ತೇರ್‌ನ್
 ಆಯೆ ರಟ್ಟಯಿನೊಂಜಿ ಮಾಪುಗು ಅತ್ತೊ ಪರಮಾತ್ಮ ||

18

ಕರ್ಲನೀ ಪುಗರಿಯೆರೆಗುಲಯಿದ
ಗುಟ್ಟು ಬೇತೆನೆ ಉಂಡು ನಿನ್ನವು
ಇಸ್ಕೊದಂಚಿನೆ ಮಲ್ತು ಪನ್ನಗ ಪನ್ನೆ ಶ್ರೀ ಕ್ರಿಷ್ಟೆ ||
ನಮ್ಮ ತೇರ್ದ ದಿನೊ ಹನುಮೆನೆ
ಕುಲ್ದುದುಲ್ಲೆನೆ ದೊಜೊಟು ಯಾನ್‌ಲ
ಉಪ್ಪುನಗನೆ ಕರ್ಲೆ ರಟ್ಟಯೆ ತೇರ್‌ನಾಪೆಕ್‌ಗ್ ||

19

ಆಯ ತೇರ್‌ಗ್ ಸಗ್ತಿ ಉಂಡೊಯ
ಗ್ರೇಯ್‌ದೀಯೆ ತೂಲ ನಿನ್ನವೆ
ಬಾಣೊ ರಾಪಯಿನೇತ್ ದೂರೊಗು ಆಯನಾ ರತೊನು ||
ಆಯನೇನಿನಿ ನಿನ್ನಡ್‌ಲಾ
ಮೇಲ್ ಪಂಡ್‌ದ್ ಪುಗರ್‌ದೆನೊ ಪನ್
ದಾಯೆಗೀ ಮಚ್ಚರೊಡು ಕುಲ್ದ ಪನ್ನಗರ್ಜನೆನೆ ||

20

ಗಾಂಡಿವೊನು ಕುರ್ಕಾದ್ ಮಂತ್ರೊದ
ಬಾಣೊ ರಾಪಯೆ ಕರ್ಣಗಾಪಗ
ಆಯೆಲಾ ರಾಪಯಿನ ಪಗರಲು ಕಬರ್ ಕಬರಾದ್ ||
ಸಾರತಿಗ್ ಕುದುರೆಲೆಗ್ ಹನುಮಗ್
ತಾಗ್‌ನಗನೇ ಪಾರ್ತೆ ತೇರ್‌ಡ್
ಬೋದೊ ತತ್ತಾದ್ ಬೂರ್ನ್ ತೂಯೆನೆ ಕ್ರಿಷ್ಟೆನರ್ದುನನ್ ||

|| ಸರ್ಪ ಬಾಣೊ ||

ಹರಿಯೆ ಪಾರ್ತನ ಉಡಲ್‌ನೀಸನ -
ಗಪಗ ಸೈರೊಡುಲಾಂಡ್ ಉಲ್ಲೆಸೊ
ಬಿರುನು ಕುರ್ಕಾದ್ ಬಾಣೊ ರಟ್ಟಯೆ ಕರ್ಣಗಾಪಗನೆ ||
ಮುಕುಲೆ ಯುದೊನು ತೂಯಿನಾಕ್‌ಲ್
ಪುಗರಿಯೆರ್ ರಾವಣಡ ರಾಮೆನೆ
ಲಡಯಿ ಮಲ್ತಾದ್ ಉಪ್ಪೊಡಿಂಚಿನೆ ಪಂಡೆರಲ್ಲು ||

1

ಅರುನನ ಮೂಡಿಗೇಡ್ ಬಾಣೊಲು
ಕಮ್ಮಿಯಾತ್‌ಜಿ ಏತ್ ಬುಡ್ಡುಲ
ಕರ್ಲ ಮೂಡಿಗೇ ಹಗುರೊ ಆನಗ ತೂಯೆ ಕೈಪಾಡ್ಡೆ ||
ಕೈಕ್ಕ್ ತಿಕ್ಕ್‌ನ ಒಂಜಿ ಪಗರಿನ್
ದೆರ್ತ ತೂನಗ ಕಬರ್ ನಾಲಗೆ
ನೀಡ್ಡ ಇಸೊತವೆ ಉಸುಲು ಬುಡ್ಡುನ ತೂಯೆನಾ ಕರ್ಣೆ ||

2

ಮರಿತ ಬಿಡೆನೇ ಜಾಲಿ ಕಟ್ಟಲ
ಮೇಣಕುನವೆ ಕಣ್ಣಂಡು ಜೂವೊದ
ಮರಿಯೆ ಬೀಲೊನೆ ತುಂಡು ರಟ್ಟಾದ್ ಇತ್ತಾನೆನ್ ತೂಯೆ ||
ಎನನ್ ಈ ಬುಡು ಬಿರುಕು ಕೊಲ್ವದ್
ನಿನನ್ ಗೆಲ್ವವೆ ಕೆರ್ಡಲಾಯನ್
ಪನುಪುನೆನ್ ಕೇನೊಂದು ಕರ್ಣೆನೆ ಅಯಿಟ ಪಾತೆರ್‌ಯೆ ||

3

ಏರ್ ಈ ಮರಿಯಣ್ಣ ಪನ್ ಪನ್
ದಾಯೆಗೆನ್ನವೆ ಮೂಡಿಗೇಡ್ ಇನಿ
ಸೇರ್‌ನೆಯ ನಿಕ್ಕೇನ್ ಎಂಚಿನ ಸಾಯೊ ಮಲ್ಪೊಡುಯೆ ||
ಯಾನ್ ಕಾಂಡವ ಬನೊಟು ಇತ್ತಾನೆ
ವಾಸುಕಿನ ಸಂತಾನೊದಾಯೆನೆ
ಮಾತೆರ್‌ಲ ಲೆಪ್ಪುವೆರ್ ಎನ್ನನ್ ಅಸ್ವಸೇನೆಂದ್ ||

4

ಕಾಂಡವೊನು ಪೊತ್ತಾಯೆನರ್ಜನೆ
ಏತೊ ಪ್ರಾಣಿಲು ಪಕ್ಕಿ ಉಚ್ಚುಲು
ಸೂಕು ಬೂರುದು ಸೈತ್ತೊನಪಗನೆ ಯಾನ್ ರಾವೊಂದು ||
ಜೂವೊದಾಸೆಡ್ ಬಾನೊಗೇರ್‌ನಗ
ಬಾಣೊ ಬುಡುದೇ ಎನ್ನ ಬೀಲೊನು
ರಾನಗನೆ ರಟ್ಟಾಯೆನೆನ್ನವೆ ಜೂವೊ ಜಿಡೆಟೊರಿನೆ ||

5

ಅರುನಡ ಪಗೆ ಎಂಕ್‌ಲಾಯನ್
ಕೆರೈಗ್ ರಾವೊಂದು ಪೋಯೆರೆ
ಕಸ್ಕೊ ಆಯ್ಕೆಟ್ ನಿನ್ನ ಮೂಡಿಗೇದುಲಯಿ ಸೇರೊಂಡೆ ||
ಎನ್ನನೀಯೆ ಬಿರುಕು ಕೊಲ್ವದ್
ರಟ್ಟಯಡ ಯಾನಯನ್ ತುಚ್ಚಿದ್
ಕೆರೈ ನಿನ್ನವೆ ಪಗೆನ್ ಸಂದಯೆರೆನ್ ಸಕಯೊನೆಯೆ ||

6

ಬುಡುಬುಡುಯ ಎನನಿತ್ತೆ ಬಿಲ್ಗ್‌ಗ್
ಕೊಲುಪಯಡ ಯಾನಯನ್ ಕೆರ್ಡೆ
ಜಯೊನು ಒದಗದ್ ಕೊರೈ ಈಯೆ ಗೆಲ್ವ ಎನಡ್ಡಾದ್ ||
ಕಳುವ ಎನ ಮೂಡಿಗೇಡ್ ದೆಂಗ್‌ದ್
ಪಗೆನ್ ಸಂದಯೆರೆಂದ್ ಎನನೀ
ಎಬಗೆ ಮಲ್ಪುವ ಯಾನ್ ಎನ್ನವೆ ಪಗೆಟ ಕಾದಿಯೆರೆ ||

7

ಏರೆ ಸಾಯೊಲ ಬೊಡ್ಡಿ ನಡಪುಲ
ಯಾನೆ ತೂವೊನುವೆಂದ್ ಪನ್ನಗ

ಮಾದ್ರ ಬೂಪತಿ ಪನ್ನೆ ಕರ್ಣಡ ಮರಿತ ಪಾತೆರೊನು ||
 ಕೇಂಡ್‌ದೀಯೆ ಬಿರುಕು ಕೊಲ್ಲು
 ಸಾಯೊ ತಿಕ್ಕನೆನೀಯೆ ಬುಡ್ಡ
 ಆ ಮರಿಕಲರ್ಜುನನ್ ಕೆರೈರೆ ಸಾದಿ ಮಲ್ಪುಲಯ ||

8

ನೆಕ್ಕ ಕೆರೈರೆ ತೀಂಡ್‌ಲಾ ಬೊನೆ
 ತೀರ್ಪಿಡನೆ ನಸ್ಸೊಂಡೊ ಗ್ರೇಯ್ಪುಲ
 ಪನ್ನುನೆನ್ ಕೇನೊಂದು ಸಲ್ಯಡ ಪನ್ನೆನಾ ಕರ್ಣ ||
 ಯಾನೆ ಸೈತ್ತ್‌ದ್ ಸೊಗೊ ಸೇರೊಡು
 ಏರ್ ಸೈತ್ತ್‌ದ್ ಯಾನ್ ಸೇರ್ವನೊ
 ದೇವೆರೆನ್ ನಂಬೊಂದು ಕಾಳಗೊ ಕಳಟ್ ಪುಣೆವೊನುವೆ ||

9

ಒಂಜಿ ಪಾತೆರೊ ಒಂಜಿ ನಾಲಗೆ
 ಒಂಜೆ ಆತ್ಮೊನೆ ಎಂಕ್ ಉಪ್ಪುನೆ
 ದಿಂಜ ಪನ್ನುನೆ ದಾಯೆಗೀ ಮರಿ ಕುಡೆಕ್ ನೂರೊನಡ್ ||
 ನಂಬುವನ ದೇವೆರೆನ್ ಈಯೆ
 ನಂಬ್‌ದನೆ ನಿನನೇರ್ ಪನ್ನುನ
 ನೆಂಪು ಮಲ್ಪುಲ ಕರ್ಣ ಪಂಡ್‌ದ್ ಸಲ್ಯೆ ಪನ್ನಗನೆ ||

10

ಧರ್ಮೊ ದೇವೆರ್ ಪನ್ನ ಕೆಲವೆರ್
 ಮಲ್ಪಿ ಕರ್ಮೊನು ಬುಡುದು ಆಯಿನ
 ಮರ್ದೆರೇಡ್‌ದ್ ಈ ಸಮಾಜೊಗು ಇದ್ದಿ ಪ್ರೇಜನೊನೆ ||
 ನಿನ್ನ ಕರ್ಮೊನೆ ಮಲ್ಲೆ ನಿಕ್ಕೇ
 ಯುದ್ಧೊ ಮಲ್ತ್‌ದ್ ಪಗನ್ ಗೆಲ್ಲುಲ
 ಪನ್ನಲಾ ಮರಿ ಕಬರ್ ನಾಲಗೆ ನೀಂಡ್‌ ಬಾಯಿಡ್‌ದ್ ||

11

ಬೀಲ ಕಡ್ತಲ ಕಬರ್ ನಾಲಗೆ
 ದಾಯೆ ಬಗುಳುವ ನಡಪು ನಡಪುಲ
 ಪೋಯಿಜಿಡ ತಂಬಿಲೊನು ಮಲ್ಪುವೆ ಅಡರ್‌ಡೇನಿತ್ತೆ ||
 ನೋತುರುವೆ ಈ ಕರ್ಣ ಪಂಡ್‌ದ್
 ರಾದ್ ಪೋಂಡಲ್ಪಡ್‌ದಲಾ ಮರಿ
 ಮಾದ್ರ ಬೂಪತಿಗಾಂಡ್ ಬೇಜರೊ ಕರ್ಣಡಾಪಗನೆ ||

12

ನಿನ್ನ ಏಕಿನಿತನೊಟು ಕೌರವ
 ನಿತ್ತೆ ಸೋಲ್ಪವಿ ಗೊಬ್ಬು ನಿನ್ನವು
 ನಿಕ್ಕ ದಳಪತಿ ಪಟ್ಟೊ ಕಟ್ಟನೆ ದಾಯೆ ಗ್ರೇಯ್‌ದನ ||
 ಮಿತ್ತೆ ಪಂಡ್‌ದ್ ಸಾಂಕ್ಯೆ ನಿನ್ನನ್
 ಮಿತ್ರ ದ್ರೋಹೊನೆ ಮಲ್ತ ನಂಬುದು
 ಕಟ್ಟಿ ಕೌರವೆ ಬೀಸ್ಮ ದ್ರೋಣೆರೆನಾಯೆ ನಂಬೈತ್ತೊ ||

13

ಬೀಸ್ಮೆ ಜೆತ್ತದೆ ಪಗರಿ ಮಂಚವು-
 ಡಾಯಡ್‌ದ್ ಬುಕ್ಕೊದಯೆ ದ್ರೋಣೆನೆ
 ಕಾಳಗೊದ ಕಳಚೇರೊ ಪಂಡ್‌ನ ಕಳುನು ನಂಬೊಂದು ||
 ಪ್ರಾಣೊ ಬುಡಿಯೆನೆ ಇತ್ತೆ ಈಯೆ
 ಮಾನೊ ಮರ್ಯಾದಿಂದ್ ಲಡಯಿಡ್
 ದಾಲ ಮಲ್ಪುಜ ನಿಕ್‌ಲ್ ಮೂವೆರ್ ಕೆರೈರಾಯನ್‌ಲ ||

14

ಮಾನೊಗಾದೇ ಪುಣೆಪುನಾಯನ
 ಸಾರತಿಯೆ ಯಾನಾದ್ ಎನ್ನವೆ
 ಮಾನೊ ಕಾಪುನವೆನ್ನ ಧರ್ಮೊನೆ ಸೂತನಾ ಮಗನ ||
 ಗಾಡಿ ದೇರ್‌ದ್ ಎನ್ನ ಮರೈದಿ
 ಮಾರುಜಿಂದ್‌ದ್ ಚಾಟಿ ದಕ್ಕದ್
 ತೇರ್‌ಡ್‌ದ್ ಜತ್ತೊಂದು ಪೋಯೆನೆ ಸಲ್ಯೊನಲ್ಪಡ್‌ದ್ ||

|| ಕರ್ಣಾವಸಾನೊ ||

ಸಲ್ಯೆ ಪೋಯೆಡ ದಾನೆ ಯಾನೇ
 ಒರೈ ಕಾದುವೆ ರತೊನು ದೇರ್‌ದ್
 ಯುದ್ಧೊ ಬೂಮಿಡ್ ಪಿರವು ಜಾರಯೆ ಪನ್ನಲಾ ಕರ್ಣ ||
 ಬಿಲ್ಲ ದೆರ್‌ದ್ ಬಾಣೊರಾಪವೆ
 ಸೈನ್ಯೊದಕಲೆಗ್ ಕೊರ್ಪೆ ಸೂಚನೆ
 ಒಯ್ತದೇ ಕಡಿಯಣೊನು ಕುದುರೆಲೆಗಾಕ್ಕೆ ಚಾಟಿಡ್‌ಲ ||

1

ಕಾಳಗೊದ ಕುರುಕಂಡೊ ನೆತ್ತೆರ್
 ಬೂರ್ದು ಬೊದುಲುದು ಕೆಸರ್ ಆಯ್ಕೆಟ್
 ವೀರ ಕರ್ಣನ ತೇರ್ಡೆ ಚಕ್ಕೊನೆ ತಾರ್‌ಲಾಂಡಪಗ ||
 ಲಾಗಿಯೆನೆ ತಿರ್ತಾಯೆ ಚಕ್ಕೊನು
 ದೇರ್ಪಿಯೆರೆ ತನ ಪುಗಲ್ ಕೊರೈನೆ
 ತಾರಿ ಚಕ್ಕೊನೆ ಮಿತ್ತೆ ಮೆದ್ಕೆಜಿ ಬೆಗರ್ ಸೀಂಟೊಂಡೆ ||

2

ಕಯಿಟ್ ಒಯ್ತನೆ ತರಟ್ ತುಂಬಿಯೆ
 ಪುಗಲ್ ಕೊರ್ದೇ ಅಡಿಯೆ ಪೊಕ್ಕಜಿ
 ಉಸುಲು ಕಟ್ಟದ್ ದಮ್ಮು ಬುಡಿಯೆನೆ ಸೇಂಕ್ ಸೇಂಕೊಂದು ||
 ಕುರುಪತಿಗ್ ಸೋಲಾಂಡೆ ಸಿವ ಸಿವ
 ಎನನ್ ನಂಬುದು ಕಟ್ಟಿ ಕೌರವೆ
 ರುಣೊಟು ಬೂರೈನೆ ಯಾನ್‌ಲಾಯನ ದಾನೆ ಮಲ್ಪೇನ್ ||

3

ಸೋಲು ಕೌರವನತ್ತ್ ಎನ್ನಲ
ಸೋಲು ಏತ್ಲ ಉಂಡು ರುಸಿ ಒರಿ
ಸಾಪೊ ಕೊರ್ರೆರ್ ಎನ್ನ ತೇರ್ನ್ ಬೂಮಿ ನಿಂಗಿಯೆರೆ ||
ಬಾಲೆನಬಿಮನ್ಯನವೆ ಬಿಲ್ಲ್ಯನ್
ಯಾನೆ ಪಿರವುಡೆ ಪೋದು ಕಡ್ತನ
ಮೋಸೊದಾ ಪಲೊ ತಿನಿಯೆರಾಂಡತ್ತೊಂದು ಬುಲ್ತೊಂಡೆ ||

4

ಪೆದ್ದಾನಪ್ಪೆನೆ ನೀರ್ಗ್ ದಕ್ಕಲ್
ವಜೊದಂಗಿನ್ ಇಂದ್ರೆ ನಟ್ಟೆನೆ
ಕಲ್ಪಯಿನ ಗುರು ಸಾಪೊ ಕೊರ್ರೆರ್ ಎನ್ನ ಹಣೆ ಬರೊಟು ||
ಕ್ರಿಷ್ಟೆ ಯಾನೇರ್ಂದ್ ಪಂಡ್ಡ್
ಕೆರ್ರೆನ್ನನ್ ಪಾರ್ತ ಬಾಣೊಗು
ತಿಕ್ಕಯೆನೆ ಪಂಡೊಂದು ಪುಣೆಯೆನೆ ತೇರ್ನೊಯ್ಪೆರೆಗ್ ||

5

ಪಾರ್ತ ಮೋನೆನ್ ತೂದು ಕೇಂಡೆನೆ
ತೇರ್ನೊಯ್ತೆರ್ ಬತ್ತನೆಟ ಎಂ-
ಕೀಯೆ ಪುರ್ಸೊತು ಕೊರ್ಲ ಚಂದ್ರನ ವಂಸೊ ಬೆಳಗಯಿನ |
ವೀರಡನೆ ಯಾನಿತ್ತೆ ನಟ್ಟುವೆ
ತೇರ್ನೊಯ್ತೆನ ಬುಕ್ಕೊ ನಮೊ ನಮೊ
ಕಾಳಗೊನು ಮಲ್ಪುಗೊಯ ಪನ್ನಗ ಪಾರ್ತೆನೊಪ್ಪಿಯೆನೆ ||

6

ಸರಿ ಮೊರಂಪುನು ಊರು ಚಕ್ಕೊಗು
ಕಯಿನ್ ಕೊರ್ದೆ ಮಿತ್ತ ದೆರ್ಪನ
ಎದುರುದಾಯನ್ ತೂದು ಕ್ರಿಷ್ಟಡ ಕೇನ್ನೆನರ್ಜುನೆನೆ ||
ಹರಿಯೆ ಪನೊಡೆಂಕಿತ್ತೆ ಕರ್ಣೆನೆ
ಕುರು ಕುಟುಂಬೊದ ಜನೊನೊ ಅತ್ತಡ
ಜನನೊಡಮ್ಮೆರೆ ಮಗನೊ ದುಂಬುಡು ಏರ್ ಪನೊಡೆಂಕ್ ||

7

ಧರ್ಮಜನ ದೇಕಿಡಲ ತೋಜುವೆ
ಕಸ್ಸೊ ಬರ್ಪೆನೆ ಪನ್ದ ಎಂಕಲ
ದುಕ್ಕೊ ಮನಸ್ಗಲಾಯೆರೆಗ್ ನಿಜೊ ದಾಯ್ತ ಕಾರಣೊನೆ ||
ಪನ್ದ ಕ್ರಿಷ್ಟನ ಮೋನೆ ತೂನಗ
ಪನ್ನೆ ಈ ಕರ್ಣೆನಲ ಮೂರ್ಕನೆ
ನಿನ್ನ ಮಗನಬಿಮನ್ಯನಾ ಬಿರುನಿಂಬೈ ಕಡ್ತನಯೆ ||

8

ಈತ್ ಪನ್ನಗ ಪಾರ್ತ ಮನಸ್ಗ
ಕೋಪೊ ಏರ್ದ್ ಗಾಂಡಿವೊಗು ಸರಿ

ದೇವಿ ಪಾರ್ವತಿ ಕೊರ್ನವಂಜನ ಬಾಣೊ ಕೊಲ್ವಾದ್ ||
ನೋಟೊ ತೂದೇ ಬುಡಿಯೆನಪಗನೆ
ಗಾತಕೊಡು ಕೆರ್ರೆತ್ತೊ ಅರ್ಜುನ
ದೇವರಾಜನ ಮಗನೆ ಸೈ ಸೈ ನಿನನ್ ಮೆಚ್ಚಿಯೆನೆ ||

9

ಪಗರಿ ತಾಗ್ನ ಪೆಟ್ಪಡಾಯನ
ಉಸುಲು ಮಿತ್ತಾಯಿನವು ತಿರ್ತ್ಗ
ಸರಿಟ್ ಜತ್ತಜಿಯಪಗ ನಾರಾಯಣನ್ ನೆನೆತೊಂಡೆ ||
ಬುಲಯಿ ಕಣ್ಣೆಗ್ ವಿಶ್ವೊಡೊಮೆಲ
ಸುಲಿಗೆ ಪಾತಕೊ ಜೂಜುಹಾದರೊ
ಕಳವು ಹತ್ತೆಲು ಮಾನೊ ಬಂಗೊಲು ಮಾತಲೊಂಜಾದ್ ||

10

ಸಾರೊ ಕೈಕುಲು ಸಾರೊ ತರೆಕುಲು
ಬೂಮಿಡ್ ಆಕಾಸೊ ಮುಟ್ಟಲ
ತೋಜಿನಗ ನೆನೆತೊಂಡೆ ಕಲಿಯುಗೊ ಬರ್ಪುನಟ್ಟಣೆನೆ ||
ಯಾನ್ ನನ ಕಲಿಯುಗೊಟು ಪುಟ್ಟುದು
ಏಪೊಗುಲ ಬರಯೆಂದ್ ಕಣ್ಣೆಗ್
ಆಂಜಿನೆನೆ ಈ ವಿಶ್ವ ರೂಪೊನೆ ಪನ್ದ ಕಣ್ಣುಚ್ಚೆ ||

11

ಮಗನ ಪೆರಣೊನೆ ಪೋಯಿ ಸಾತ್ಗ್
ಕಡಲ್ದುಲಯಿಗ್ ಮುಕ್ಕೈ ಸೂರೈನೆ
ಕಬಿದ್ ಕತ್ತಲೆ ಆಂಡ್ ಕೌರವ ಮನೊತ ಬೂಮಿಕೆಗ್ ||
ಮುರಿಯೊಡುದು ಪಾರ್ಬತ್ತೆ ಕರ್ಣನ
ಪುಣತ ಮೇಲ್ಡ್ ಬೂರು ಬುಲೈನೆ
ಪರಮ ಸತ್ಯೊನೆ ಕ್ಷರ ಪ್ರಪಂಚೊಡು ದೆಂಗ್‌ದಾಂಡತ್ತೊ ||

ಶ್ರೀ ಅನಂತಕೋಡಿ ಸುಬ್ರಾಯ ದೇವರೆ ನಿರ್ಮೋಡು ;
ಪರಿವಾರೊ ದೈವೊಲೆನ ಬೆರಿ ಸಾಯೊಡು :
ಕೆಲಿಂಜ ದೂರುಡು ನಿಲೆಯಾಯಿನ
ಅಪ್ಪೆ ಸಿರಿ ಉಳ್ಳಾಲ್ದಿನ ದಯೊಟು :
ತುಳುಕೆಲಿಂಜ ಭಾರತೊದ
ಕರ್ಣ ಪರ್ವೊ ಪೂರ್ತಿಯಾಂಡ್

ತುಳು ಕೆಲಿಂಜ ಬಾರತೊ

ಸಲ್ಯ ಪರ್ವೊ

ಸುರುತ ಸಂದಿ

|| ದಳಪತಿ ಪಟ್ಟೊ ಸಲ್ಯಗಾಂಡ್ ||

ಕರ್ಲನವಸಾನೊದವೆ ರಾತ್ರೊಡ್
ಸಲ್ಯ ಸಕುನಿಲು ಕೃಪೆರಾಲಾ ಕೃತ -
ವರ್ಮೆ ಸೋಮಕೆ ದ್ರೋಣನಾ ಮಗೆ ಕುಲ್ಲದುಪ್ಪನಗ ||
ಕಣ್ಣ ನೀರ್ನ್ ಉರ್ದು ಉರ್ದು
ದುಕ್ಕೊದುಸುಲುನು ಬುಡುದು ಕೌರವೆ
ಪನ್ನೆನಾ ಸಬೆತಕಲೆ ಮೋನೆನ್ ತೂಯೆರಾವಂದೆ ||

1

ಜೂವೊ ಜೂವೊಗು ಬೆಸಿಗಿಯಾಯಿನ
ಬಾವೊದರ್ಕಟ್ ಬಿಚ್ಚಿದಾಂಡೆ
ಏರೆ ಮೋನೆನ್ ತೂದು ದೈರೊಡು ವೈರಿನಾಕಲೆಡ ||
ಕಾದುವೆನೊ ಎನ ಜೂವೊ ದೆತೊನುದು
ಸೇರುವೆನೊ ನನ ಕರ್ಣ ಇತ್ತ್ನ
ಜಾಗೆನೇನಿ ಪನ್ದ್ ಬುಲೆನೆ ವಜ್ರೊ ಮನಸ್‌ದಯೆ ||

2

ನೂದು ಮೆಗ್ಯಲ್ಲೆನ್‌ಲ ಎನ್ನವೆ
ಬಾಲೆ ಲಚ್ಚಣನೇನ್ ಕಳೆದಲ
ದಾಲ ಅಸ್ಕಜಿ ಕರ್ಣ ಮೋನೆನೆ ತೂದು ಬದ್‌ಕೊಂಡೆ ||
ಈತ್ ಪನ್ನಗ ಜಾತಿ ಸುಬವೊದ
ಕೋಪೊ ನೆತ್ತಿಗ್ ಏರ್ದ್ ಪಂಡೆನೆ
ವೀರ ದುಸ್ಸಾಸನನ್ ಕೆರ್ನಯೆ ಬೀಮೆ ತಿಕ್ಕೆಡನೆ ||

3

ಆಯ ಕರ್ಲನ್ ಒಯ್‌ದೆನ್ನವೆ
ಪ್ರೀತಿದಾ ಮೆಗ್ಯನ್‌ಲ ಬರ್ಪವೆ
ಪಾರ್ತ ತಿಗಲೆನ್ ಬಿಚ್ಚದೇನೇ ಲೆಪ್ಪೆ ಕರ್ಣನ್‌ಲ ||
ಏರ್ ಬರ್ವರ್ ಎನ್ನ ಎದುರುಗು
ಆ ಮುರಾರಿಯೊ ಹರೆನೊ ಬ್ರಹ್ಮನೊ
ಬಾರಿ ಗದೆ ಬೀಜಾದ್ ನಲಿತೆನ ತಾಜ ಮರ್ದಲೆಕೊ ||

4

ತರೆಟ್ ಬಿಂಗಿರಿಯಾದ್ ನಲಿಪುನ
ಅರಸು ಕೌರವನಪಗ ಪತ್ತಾದ್

ಸಬೆತ ಗಣೈರ್ ಸಿಮ್ಮೊ ಪೀಟೊಡು ಸರಿಟ್ ಕುಲ್ಲಯೆರ್ ||
ಬುಲಿಪುನವು ಬೊಡ್ಡೆತ್ತೆ ಕೌರವ
ಲಡಯಿಡೆಂಕುಲು ಪಿರವು ಜಾರಯೊ
ಮರಣೊ ಏರೆಗ್ ಇದ್ದಿ ಪನ್‌ಲಯ ಪುಟ್ಟಿ ನರಮನಿಗ್ ||

5

ಮದ್ರ ರಾಜಗ್ ಕಟ್ತ್ ದಳಪತಿ
ಪಟ್ಟೊ ಆಯೆನೆ ಪಾಂಡವೇರೆನ್
ಗೆಲ್ಪುನಯೆ ಪನ್ನಗನೆ ಸಲೈನೆ ಪನ್ನೆ ಕೌರವಡ ||
ಅಸ್ವತ್ತಾಮಗ್ ಪಟ್ಟೊ ಕಟ್ಲೆಲ
ಅರ್ಜುನಗ್ ಸಮ ಜೋಡಿ ಆಯೆನೆ
ಪನ್ನಗನೆ ಅರ್ತಾಂಡ್ ಸಲ್ಯಗ್ ಆಸೆ ಉಂಡುದು ||

6

ಮಾತೆರೆನ ಒತ್ತಾಯೊಗಾದೆ
ತಾನ್ ಒತ್ತೊಂಡೆಂದ್ ಪನಿಯೆರೆ
ಬೋಡದಿಂಚನೆ ಪನ್ನೆ ಪಂಡ್‌ದ್ ಗ್ರೇಯ್ತೆ ಗುರುಮಗೆನೆ ||
ಬಾರಿ ಬಲೊ ಮಾದ್ರೇಸಗ್‌ಂದ್‌ದ್
ಲೋಕೊದಾಕಲ್ ಪುಗುರುವೆರ್ ನಿಜೊ
ಈರೆ ದಳಪತಿ ಆವೊಡುದುದು ದಿಂಜ ಪುಗರಿಯೆನೆ ||

7

ಪುಗುರನನ್ ಕೇನುನಯೆ ಏಪೊಲೊ
ಹಗುರೊ ಆಪೆನೆ ಪನ್ನಿ ಸಂಗತಿ
ತೆರಿನಯೆನೆ ಸಲ್ಯೆತ್ತೆ ಒಪ್ಪಿಯೆ ಮೀಸೆನೀಸೊಂದು ||
ಕುರುಪತಿಯೆ ತರ್ಪಾಯೆ ಸೀರ್ತೊನು
ಬೆರಣೆರೆಡ ಮಯ್ಯಾದ್ ಮಂತ್ರೊದ
ಅರಿನ್ ಪಾಡದ್ ಮುಂಡೊ ಪಟ್ಟಿನ್ ದೀಡ್ಯೆ ಕೌರವನೆ ||

8

ಪೊಣ್ಣಲಾರತಿ ಬೆಳಗೆಯೆರಾಲಾ
ಕುಲ್ಲನಾಕಲ್ ಲಕ್ಕೊದುಂತುದು
ಸಲ್ಯ ಮಹರಾಜಗ್‌ಲ ಜಯೊ ಜಯೊ ಪನ್ದ್ ಕಾಣಿಗೇನ್ ||
ಒಪ್ಪಯೆರ್ ಬಂಗಾರ್ ಬೊಳ್ಳಿನ್
ದುಸ್ಪ ದುರ್ರೋದನೆನೆ ಕಾರ್‌ಗ್
ಅಡ್ಡೊ ಬೂರುದು ಪಂಡೆ ಗೆಲ್ಪವೊಡೀರ್ ಮಾಮಣ್ಣ ||

9

ಬೇರಿವಾದ್ಯೊ ನಗಾರಿ ಬೊಬ್ಬೆದ
ಬಾರಿ ಮಲ್ಲವೆ ಸೊರೊನೆ ಪಾಂಡವ-
ನಾಕ್‌ಲೆನ ಸಿಬಿರೊದವೆ ಉಲಯಿಗ್ ಕೇಂಡ್‌ದಾನಗನೆ ||
ಗೂಡಚಾರೆರ್ ಬತ್ತ್ ಪಂಡೆರ್
ಮಾದ್ರ ಬೂಪತಿಗಾಂಡ್ ದಳಪತಿ
ಸ್ತಾನೊ ಪನ್ನಗ ಧರ್ಮ ನಂದನಗಾಂಡ್ ಬೇಜಾರೊ ||

|| ಕಾಳಗೊದ ಕಳಟ್ ಎದುರೆದುರಾಯೆರ್ ||

ಕ್ರಿಷ್ಟ ಮೋನೆನ್ ತೂದು ಧರ್ಮಜೆ
ಕಸ್ತೊನೇ ಆಂಡತೊ ದೇವಾ
ಪಟ್ಟೊ ಕಟ್ಟೆಗೆ ಮಾದ್ರ ರಾಜಗ್ ಸೇನೆದೊಡಕರನ ||
ಸಮ್ಮಲೆನೆ ಆವೊಂದು ಎಂಕ್ಲೆಡ
ಯುದ್ಯೊ ಮಲ್ಲುವೆರತೊ ಕ್ರಿಷ್ಟಾ
ಬಿಲ್ಲ್ ದೆರ್ಪುನೆ ಎಂಚ ಆರೆನ ಎದುರು ಪರಮಾತ್ಮ ||

1

ಯಾನ್ ಕೆರೆನೆ ಸಮ್ಮಲೆನೆ ನಿಜೊ
ಏರ್ ಏರೆನ್ ಕೆರ್ಪುನೆಯ ಪನ್
ಆಕ್‌ಲಾಕ್‌ಲೆ ಕರ್ಮದವೆ ಪಲೊ ಕೆರ್ಪುನಕ್‌ಲೆನಲ
ಮಾದ್ರಿ ದೇವಿನ ಕಾಸ ಪಲಯೆನೆ
ಪಾಂಡವೆರೆಗೆದುರುಂತ್ಲೆ ಪನ್ನಗ
ಲಾಬೊದಾಸೆಗ್ ದಾಲ ಮಲ್ಲೆರ್ ತಯರ್‌ದಯೆ ಸಲ್ಯೆ ||

2

ಆ ಮುರಾಂತಕೆ ಪನ್ನಿ ಪಾತೆರೊ
ಕೇನ್ನಗನೆ ಉರಿ ಲಕ್ವದಾಂಡಲ
ಬೀಮ ಸೇನಗ್ ತಿಗಲೆ ಬೊಟ್ಟುದು ಪನ್ನನಾಪಗನೆ ||
ಯಾನ್ ಆಯನ ಮಂಡೆದರ್ತ್‌ದ್
ಸಾಕಿನಿಗ್ ಸರಿ ಲಾಬೊ ಮಲ್ಲುವೆ
ಬೂಳ್ಕೊ ಕೊರುಲಣ್ಣಂದ್ ಪಂಡೆನೆ ಧರ್ಮನಂದನಡ ||

3

ಅರುನೆನೆ ಲಕ್‌ದುಂತ್ಯೆ ಮಾಮನ್
ಕೆರ್ದ್ ನರಕೊದ ಗುಂಡಿಡಾಯನ್
ಮುರ್ಚವೆನೆ ಪನ್ನಗಾ ಸಹದೇವೆ ಕೈ ಮುಗಿದ್ ||
ಹಕ್ವದಾ ಸಮ್ಮಲೆನ್ ಕೆರ್ಪುನ
ಹಕ್ವ ಉಪ್ಪುನೆ ಎಂಕ್ ಮಾತೊನೆ
ಅತ್ತೊ ಪಂಡೆದ್ ಪನಡ್ ಕ್ರಿಷ್ಟನೆ ಬೇತೆ ಏರ್‌ದಾಯೆ ||

4

ಪೋಣ್ಣ ಮಗಲಿತ್ತ್‌ದಂಡ ಯಾನೇ
ಸಮ್ಮಲೆನ ಎದುರುಂತುದಯೆ ನಿಜೊ
ಇತ್ತೆ ಆರೆನ ಹಂಗ್ ಎಂಚಿನ ಪಂಡೆ ನಕುಲಾಂಕೆ ||
ಕ್ರಿಷ್ಟ ಮಾತೆರೆ ಮೋನೆ ತೂದೇ
ಪನ್ನ ನಿಕ್‌ಲೆಗ್ ಕೆರ್ಪುರಾಯನ್
ಬಲ್ಲಿ ಧರ್ಮಜೆ ಮಾತ್ರೊ ಕೆರ್ಪುನ ಯೋಗೊದಾಯೆನೆಲ ||

5

ಬೊಲ್ಪು ಆಯಿನ ಸಾತ್‌ಗಾಕ್‌ಲ್
ನಿತ್ಯೊ ಕರ್ಮನು ಮುಗಿತ್‌ದಮಸರೊ
ಮಲ್ತೊನುಂದೇ ದ್ವಸ್ವದ್ಯುಮ್ಮನ ಗೌಜಿ ಕೇನೊಂದು ||
ಬಿಲ್ಲ್ ಬಾಣೊನು ಕತ್ತಿ ಕಡ್ಲೊನು
ಸುರೈ ಕುಡರಿನ್ ಗದೆನ್ ಪತೊನುದು
ಒಟ್ಟಿಗೆನೆ ಪಿದಡಿಯೆರ್ ಮಾರತೆರತಿರತೆರ್ ಮಾತ ||

6

ತೇರ್‌ನೇರ್‌ದ್ ಆನೆ ಕುದುರೆಲೆ
ಮೇಲ್ಲ್ ಕುಲೈರ್ ವೀರ ಪಟು ಬಟ-
ನಾಕ್‌ಲೆಲ ಸರಿ ದತ್ತ್ ಬಲತ್‌ಡ್ ಜಟ್ಟಿಲೆತ್ತಿಯೆರ್ ||
ಬೇರಿ ತಮ್ಮಟೆ ವಾದ್ಯೊ ಕೊಂಬುಲು
ಬಾರಿ ಸೊರೊ ಲಕ್ಕಾಯೊ ಪಾಟಕ
ನಾಕ್‌ಲೆನ ಜಯ ಗೋಸೊ ಕೆಬಿಕೀಲ್ದಾಂಡ್ ಮಾತೆರೆಗ್ ||

7

ಆಪೆಕ್‌ಡ್ ಕೌರವೆರೆ ಸೇನೆಲ
ಮಾದ್ರ ರಾಜನ ಸಂಕೊದಾ ಸೊರೊ
ಕೇಂಡ್‌ದೇ ಪಿದಡಿಯೆರ್ ಕಾಳಗೊದಾಡೆ ರಬಸ್‌ಡ್‌ಲ ||
ತೇರ್ ತೇರ್ತಾಂಟಯೆರ್ ಆನೆಲೆ
ತಾಡೆಯೆರ್ ಆನೆಲೆನ್ ಕುದುರೆಲೆ
ಮೇಲ್ಲ್ ಕುದುರೆಲೆ ಲಾಗೊದೆಪ್ಪದ್ ಕತ್ತಿ ಬೀಜಯೆರ್ ||

8

ಸಾರತಿನ ಸಾರತಿಯೆ ರತಿಕನ್
ಲಾರತಿಗೆ ನೆರೊನುಂದು ಪಗರಿಲೆ
ರಾಪಯೆರೆ ಸುರು ಮಲ್ತೆರಾಕ್‌ಲ್ ಪೋಡಿಗೇನ್ ಬುಡುದು ||
ಆಪೆಕೇಪೆಕ್‌ಡೇತೊ ವೀರರ್
ಬೂರ್ಪು ಸೈತ್ತೆರ್ ಕಣ್ಣ್ ಪೀಂಕ್‌ದ್
ಕಾರ್ ಪೊಲಿನಕ್‌ಲಲ್ಪ ಪುಡೆರೊಂದಿತ್ತೆರೇತೊ ಜನೊ ||

9

ಧರ್ಮ ನಂದನ ಮೆಗ್ಗನಾಕ್‌ಲ್
ಸಲ್ಯ ಮಾಮನ್ ನಾಡೊನುಂದೇ

ಸುತ್ತು ಬತ್ತೆರ್ ನಾಲ್ ದಿಕ್ಕಡೆ ತೇರ್ ನೇರೊಂದು ||
 ಎಲ್ಯಯೆನೆ ಸಹದೇವೆ ತೂಯೆನೆ
 ಮಲ್ಲರತೊ ಸಲ್ಯನವೆ ಪಂಡ್‌ದ್
 ಬಿಲ್ಲ ದೆರ್ತ್‌ದ್ ಬಾಣೊ ರಾಪಯೆ ಮಾದ್ರನಾ ರತೊಕು ||

|| ಸಮ್ಮಲೆಡ ಅರತ್ತಲೆ ಲಡಾಯಿ ||

ತೇರ್‌ನೇ ಸಹದೇವನೆದುರುಡು
 ಸಾರತಿಯೆ ಉಂತಾಯೆನಾಪಗ
 ಮಾದ್ರ ರಾಜೆನೆ ಕಣ್ಣೆ ಮಗ್ಗರ್‌ದುಂತೈನಾಪಗನೆ ||
 ಈರ್ ಎಂಕ್ಲೆನ ಕಾಸ ಮಾಮೆನೆ
 ಆದ್ ಕೌರವ ಕಡೆಕ್ ಪೋಯಿನೆ
 ಚೋರುದಾಸೆಗೊ ಪನ್ನೆ ಎಂಕುಲು ಬಡವೆರೆಂದ್‌ದೊಯೆ ||

1

ಪಲಯ ಬುಡೆದಿಡ ಸೊರ್ಕುನಾಕ್‌ಲ್
 ನಡತೆ ಕೆಟ್ಟನ ಜೋಕ್ಕು ಎನ್ನವೆ
 ಕುಟುಮೊದಾಕ್‌ಲ್ ಅತ್ತ ನಿಕ್‌ಲೆಡ ಇದ್ದಿ ಸಮ್ಮಂದೊ ||
 ಅರಸು ಪೀಟೊಗು ಉದಲ್‌ದಾಲೆಕೊ
 ನಿಕ್‌ಲ್ ಮುತ್ತಿಗೆ ಪಾಡ್ಯರ್‌ಂದ್‌ದ್
 ಕುರುಪತಿನ ಕುಲೊಕೇನ್ ಸಾಯೊಗು ಬತ್ತನಯೆ ತೆರಿಲ ||

2

ಕ್ರಿಷ್ಟೆನೇ ಇನಿ ಎಂಕ್ಲೆ ಕಡೆಡ್‌ದ್
 ಯುದ್ಧೊದಾ ಕಳಟುಲ್ಲೆ ನಡತೆಡ್
 ಕೆಟ್ಟನಕ್‌ಲತ್ತಂದ್ ಬೀಸ್ಮಾದಿಗುಳು ಪುಗರ್‌ದೆರ್ ||
 ಇತ್ತೆ ದೂರ್ರೊ ಪನ್ನೆ ಬಾಣೊನು
 ಸಲ್ಯ ಮೇಲ್‌ಗ್ ರಾಪದಾನಗ
 ಬತ್ತಿ ಬಾಣೊನು ತುಂಡು ರಟ್ಟದ್ ಬುಡಿಯೆ ದುರ್ಬಾಣೊ ||

3

ಸಲ್ಯ ತಂತೊದ ಬಾಣೊ ತಾಗ್‌ದ್
 ಕಣ್ಣೆ ಕತ್ತಲೆಯಾದ್ ಮಗ್‌ರ್‌ಯೆ
 ತನ್ನ ತೇರ್‌ದ ಉಲಯಿಡಾಪಗ ನಕುಲೆ ಪಾರ್ಬತ್ತೆ ||
 ಎನ್ನ ಮೆಗ್ಗನ್ ಮಗ್ಗ್ ಪಾಡ್ಯನ
 ದುಸ್ಸ ಈ ಸಮ್ಮಲೆನೊ ಎಂಕ್ಲೆಗ್
 ನಿನ್ನ ಮಾಸೊನು ನಾಯಿ ಕುದ್ಕೆರೆಗಿತ್ತೆ ತಿನ್ಪಾವೆ ||

4

ಪಗರಿಡಾಕಿಯೆನಪಗ ಸಲೈನೆ
 ಬಿರುನು ದೆರ್ತ್‌ದ್ ಬಾಣೊರಾಪಯೆ

ನಕುಲೆ ಬತ್ತನ ಬಾಣೊನಪಗನೆ ತುಂಡು ರಟ್ಟಾದ್ ||
 ಗದೆಟ್ ಸಲ್ಯನ ಮಂಡೆ ದರ್ಪೆರೆ
 ಕಯಿನ್ ದೇರ್ಪುನಗಪಗ ಮಾದ್ರೆನೆ
 ತಲಿತ್‌ದುಂತಯೆ ಕೈನ್ ಗದೆನ್‌ಲ ಒಯ್ತ್ ದಕ್ಕಿಯೆನೆ ||

5

ನಿನ್ನ ಅಪ್ಪೆಗ್ ಮದಿಮೆ ಮಲ್ತ್‌ದ್
 ಕೊರ್ನ್ ಗುರ್ತೊನು ಮರತ್‌ದೆನ್ನಡ
 ಯುದ್ಧೊ ಮಲ್ಪುವ ಮೂರ್ಕ ಪಂಡ್‌ದ್ ದವುಡೆಗೆತ್ತಾಯೆ ||
 ಪೋಣ್ಣ ಕೊರ್ನಗ ಲೆಂಚೊ ತಿನ್ನಗೆ
 ಪನ್ನೆರಿತ್ತೆಲ ಎನನ್ ಪೆದ್ದನ
 ಅಪ್ಪೆನೇ ಪಂಡ್‌ದಿತ್ತೆರ್ ಹಾಕಿಯೆ ತರೆಕ್ ಸಮ್ಮಲೆನ ||

6

ತರೆನೆ ತಿರ್ಗ್‌ದ್ ಬೂರ್ನಗಾಪಗ
 ರತೊನು ದೇರುನ ಸಾರತಿಯೆ ಸರಿ
 ಟಯಗ್ ಕೂಜೆದ ನೀರ್ ಪರ್ಪದ್ ಗಾಳಿ ಪಾಡಿಯೆನೆ ||
 ಅಪಗನೇ ಮತಿಯಾದ್ ಕರ್ಪುರೊ
 ನಗಿದ್ ಬಿಲ್ಲನ್ ಕೈಟ್ ಪತ್ತದ್
 ಪಗರಿ ರಾಪಯೆ ನಕುಲ ಮೇಲ್‌ಗ್ ಮಂತ್ರೊ ಮಲ್ತೊಂದು ||

7

ಬಾಣೊ ತಾಗ್‌ದ್ ನಕುಲೆ ಬೂರ್ನಗ್
 ತೂದು ಬತ್ತೆನೆ ಪಾರ್ತೆನಾಡೆಗ್
 ಮಾದ್ರಿ ಮಗನ್‌ಲ ಲಕ್ಕದುಂತಯೆ ಮಲ್ತ್‌ದಾರೆಕಿನ್ ||
 ಆ ದುರ್ರೋದನ ಕಡೆಟ್ ಉಂತುದು
 ಕಾಸತಂಗಡಿ ಮಗಕ್ ಹಾಕ್‌ನ
 ಮೂಜಿ ಕಾಸ್‌ದ ನಾಯಿ ನಿನ್ನನ್ ಬುಡಯೆ ಕಂಡಿತೊನೆ ||

8

ಪೋಣ್ಣ ಕಂಡ್ಯೆರೆ ಏಸೊ ಪಾಡಿಯೆ
 ಪೋಣ್ಣ ಸಾಪೊಗು ತಿಕ್‌ದ್ ಬೂರಿಯೆ
 ಗಣ್ಯೊ ಮಲ್ಲೆನೊ ನಿನ್ ಪಂಡ್‌ದ್ ಬಾಣೊ ರಾಪಾಯೆ ||
 ಸಲ್ಯ ಬಾಣೊನು ತುಂಡು ಮಲ್ತ್‌ದ್
 ಅಚ್ಚಯಾಸ್ತೊನು ಬುಡುದುಲರ್ಜುನೆ
 ಅಸ್ತತ್ತಾಪನ ಎದುರು ಉಂತಿಯೆ ಲಡಯಿದಾ ಕಳಟ್ ||

9

ಪಾರೈನರ್ಜುನೆ ಪನ್ನೆ ಸಲೈನೆ
 ಬಾರಿ ಬೊಬ್ಬೆನ್ ಪಾಡ್ ಕೇಂಡ್‌ದ್
 ಬೀಮ ಸೇನೆನೆ ಗದೆನ್ ಬೀಜೊಂದಾಡೆಗೆತ್ತಿಯೆನೆ ||
 ಆಯನಾರ್ಬಟೆ ಕೇನ್ ಕೆಲವೆರ್
 ಜೂವೊ ಬದ್‌ಕಯೆರಾದ್ ಪಾರೈರ್
 ವೀರನಾಕ್‌ಲ್ ತಿಗಲೆ ತಂಕೊಡು ಎದುರು ಉಂತಿಯೆರ್ ||

10

ಸಲೈ ಮಾಗದೆ ಬೀಮೆನಾ ಬಲ -
ಭದ್ರೆ ನಾಲ್ವೆರ್ ಮಾತ್ರೊ ಲೋಕೊಡು
ಮಲ್ಲ ಬುಜೊಬಲೊತಕ್ಲ್ ಪನ್ನುನ ಪುದರ್ ಉಂಡತ್ತೊ ||
ಭೀಮನಟ್ಟಸ್ ಕೇನ್ದ ಸಲೈನೆ
ಬಿಲ್ಲ್ ಬಾಣೊನು ಕೈಟ್ ಪತ್ತಾದ್
ಬರುನಾಯನ ಎದುರು ತೇರ್ನ್ ತಯರ್ಡುಂತಾಯೆ ||

11

ಆನೆಗಾನೆನೆ ಎದುರು ಉಂತ್ನ
ತೂದು ಗುರುಕೃಪೆರಸ್ವತ್ತಾಮೆರ್
ಪಾರ್ ಬತ್ತೆರ್ ಲಡಯಿದಬ್ಬರೊ ತೂಪುನಾಸೆಡ್ಲ ||
ಎರ್ಯಾ ಬತ್ತನಯೆ ಭೀಮೆನೊ
ವೀರ ದುಸ್ಸಾಸನನ್ ನಿಂಗ್ನ
ಮಾರಿ ಬೀರಿಯೊ ಪನ್ದ ಸಲೈನೆ ಬಾಣೊ ರಾಪಾಯೆ ||

12

ಬತ್ತಿ ಪಗರಿನ್ ತುಂಡು ರಟ್ಟದ್
ಮರೈದಿನ್ ಮಾರೊಂದು ಕೌರವೆ
ಮಲ್ಲಯೆಂದ್ ಚೋರುದಾಸೆಗ್ ಪೋಯಿನಾಯೆನೊಯೆ ||

ನಿನ್ನ ಕರ್ಲನ್ ಒಯ್ತದಿತ್ತೆನೆ
ತಿನ್ನವೆನೆ ಸರಿ ನಾಯಿ ಕುದ್ಡಗ್
ಪನ್ದ ಬಾಣೊನು ಬುಡಿಯೆ ಸಲ್ಯಗ್ ನೋಟೊ ತೂವೊಂದು

13

ಬಕನ ಮಡೆ ತಿಂದ್ನಯೆ ಮತ್ಸ್ಯನ
ಅರಮನೆಡ್ ಉಂತ್ನಯೆ ಅಡಿಗ್ಗ
ತಿನಿಯೆರತ್ತೊಯೆ ಚೆನ್ನ ನಾಯಿದ ಬಂಜಿ ನಿನ್ನತ್ತೊ ||
ನಿನನ್ ದೀಡಯೆ ಪನ್ದ ಪರಿತೆದ
ಪಗರಿನೊಂಜೆನ್ ಬುಡುದು ತೂನಗ
ತಿಗಲೆಗಾಯನ ಕಂತ್ದಾನಗ ಬೀಮೆ ಮಗ್ಗಿಯೆನೆ ||

14

ಸಕುನಿ ನಿಲ್ಕದ್ ತೂಯೆ ಭೀಮನ್
ಮಗ್ಗರ್ನೆನ್ ಕೌರವಗ್ ತೆರಿಪಯೆ
ಕುರುಪತಿಯೆ ಪಾರ್ಬತ್ತೆ ಸಲ್ಯನ್ ಪುಗರ್ ಪುಗರೊಂದು ||
ಮರಹರೆನೆ ಧರ್ಮಜನ್ ಲೆತ್ತದ್
ಲಡಯಿದಾ ಕಳಕೀಯೆ ಪೋವೊಡು
ನಿನಡ್ದೇ ಸೈಪ್ಪುನಯೆ ಸಲೈನೆ ಪಂಡೆನೊತ್ತಯೊಡು ||

|| ರಡ್ಡನೆ ಸಂದಿ ||

|| ಯುದ್ಧಿಸ್ತರೆ ಯುದ್ಧೊಗು ಪಿದಡಿಯೆ ||

ಸೂರೈ ನೆತ್ತಿಗ್ ಏರ್ನ್ ಪೊರ್ತುಡು
ವಾಸುದೇವೆನೆ ಪಂಡಿ ಪಾತೆರೊ
ಕೇನ್ದ ಪಿದಡಿಯೆನಾ ಯುದ್ಧಿಸ್ತರೆ ತೇರ್ನೇರೊಂದು ||
ಬೇರಿ ವಾದ್ಯೊ ನಗಾರಿ ತಂಬಟೆ
ಬಾರಿ ಸೊರೊ ಲಕ್ಕಾಯೆನಪಗನೆ
ಪಾಟಕೆರ್ ಜಯೊ ಗೋಸೊ ಮಲ್ತರ್ ಪುಗರ್ ಪುಗರೊಂದು

1

ಅತಿರತೆರ್ ಮಾರತೆರ್ ಒಟ್ಟಿಗೆ
ರತೊಟು ಆನೆಲೆ ಕುದುರೆಲೆನವೆ
ಸವರಿಡಾಕ್ಲ್ ದತ್ತ ಬಲತ್ಡ್ ಬೀಮ ಪಲುಗುಣೆರ್ ||
ಪಿರವುಡೇ ಸಹದೇವ ನಕುಲೆರ್
ಎದುರು ಕಡ್ಡೊನು ಪತ್ತಿ ವೀರೆರ್
ಬರುಪನವೆ ಬರೊ ತೂದು ಸಲ್ಯನ ಕೈತ ಸನ್ನೆಲೆಡ್ ||

2

ಸೇರಿಯೆರ್ ಗುರುಕೃಪೆರ್ಲಸ್ವ-
ತ್ತಾಮೆ ಸೃಂಜಯೆ ಸೋಮದತ್ತೆನೆ
ವೀರೆನಾ ಕೃತವರ್ಮ ಸಕುನಿನ ಒಟ್ಟು ಕೌರವೆಲ ||
ಆಪೆಕೀಪೆಕ್ ರಡ್ಡ ಕಡೆಲಾ
ಸೇರ್ದುಂತುದು ರತೊನು ನುರ್ಕದ್
ಆನೆಲೆನ್ ತಾಡಾದ್ ರಾವುತನಕ್ಲ್ ಕುದುರೆಲೆನ್ ||

3

ಲಾಗೊದೆಪ್ಪದ್ ನುರ್ಕಯೆರ್ ಸರಿ
ಪಾದಚಾರಿಲು ಕತ್ತಿ ಬೀಜದ್
ಕಾಳಗೊನು ಮಲ್ಲುನಗ ವೀರೆರ್ ಬಾಣೊ ರಾಪಯೆರ್ ||
ಆ ವಿರಾಟನ ಸೇನೆ ದ್ರುಪದನ
ವೀರ ಸೈನಿಕನಕ್ಲ್ ದಳಪತಿ
ನೇಮೊ ಕೈಕೊನುದೆತ್ತೆರಾಡೆಗ್ ಲಡಯಿದಾ ಕಳಕ್ ||

4

ಸಲ್ಯೆ ದಳಪತಿ ದ್ವಸ್ವದ್ಯುಮ್ನನ್
ನೆರೈನೇತ್ಲ ಪುಣಕ್ ಕಡ್ಡನ
ಗಟ್ಟಿಗೆನೆ ಎದುರುಂತು ಪಂಡ್ ಪಾಡ್ ಬಾಣೊರಾಪಾಯೆ ||
ಇತ್ತೆ ದಳಪತಿನಕ್ಲ್ ಲಡಯಿನ್
ಮಲ್ತುವೆರ್ ಸಾಬಾಸ್ ಪಂಡ್ ಪಾಡ್
ಸುತ್ತ ಉಂತುದು ತೂಯೆರಕ್ಲೆನ ಬಾರಿ ಕಾಳಗೊನು ||

5

ಸಲ್ಯೆ ಪೆಟ್ವನ್ ತಡೆಯೆರಾಯಿಜಿ
ದ್ವಸ್ವದ್ಯುಮ್ನಗ್ಲಪಗ ದ್ವಪದನ
ಸೈನ್ಯೊ ಸಲ್ಯನ್ ಸುತ್ತು ಪಾಡ್ ಬಾರಿ ಹಾಕ್ನೆನ್ ||
ತಪ್ಪವೊಂದೇ ಬಾಣೊ ರಾಪಯೆ
ಅಚ್ಚಯಾಸ್ತೊದ ಪೆಟ್ವ ತಾಗ್ ಪಾಡ್
ಕುತ್ತ ಕಂಡೆನೆ ರಟ್ಟಿರವುಲೇ ದ್ವಪದ ಸೈನಿಕರ್ ||

6

ನಕುಲ ಸಹದೇವೆರ್ಲ ಎದುರುಗು
ಲಡಯಿಗುಂತ್ಯೆರ್ ಅಪಗ ಮಾದ್ರೇ -
ಸ್ವರೆನೆ ಜೋಕ್ಲೆಗ್ ಬೊಡ್ಡಿ ಲಡಯಿದ ಗೊಡವೆ ಪಂಡೊಂದು ||
ಪಗರಿಡಾಕ್ ನಗಪಗ ಬೇನೆನ್
ತಡೆಯೆರೆನೆ ತೀರಂದೆ ಚಾರೈರ್
ಪಲುಗುಣೆನೆ ಎದುರುಂತ್ಯೆ ಬಾಣೊನು ಬಿರುಕು ಕೊಲ್ವಾಡ್ ||

7

ಕೊಲ್ಪನಗ ಒಂಜಿತ್ತನವ್ವೇ
ಪತ್ತ ಆನಗ ರಾಪಯೆನೆ ಸರಿ
ಅವ್ವೆನೊದಾವೊಂದು ಸಾರೊ ಲಚ್ಚೊನೇ ಆದ್ ||
ತುಚ್ಚಿನಗ ಕೋಟ್ಯಾಂಡ್ಲಕ್ಲೆನ
ಮಗ್ ಪಾಡ್ಗ ಲೆಕ್ಕೊಗೇ ಸರಿ
ತಿಕ್ಕುನೆಂಚವು ಪಾರ್ತ ಬಾಣೊದ ಮಯಿಮನಂಚಿನವು ||

8

ಪಲುಗುಣನ ಬಾಣೊಲೆಡ್ ಆಯೆನೆ
ದಳಪತಿಯೆ ಕಂಗಾಲ್ ಪಂಡ್ ಪಾಡ್
ಕುರುಪತಿಯೆ ಕೃತವರ್ಮ ಕೃಪೆರೆನ್ ಸಕುನಿ ಗುರುಮಗನ್ ||
ಲೆಪುಡದಾಡೆಗ್ ಎದುರು ಉಂತಯೆ -
ನಪಗ ಸಲ್ಯಗ್ ಉಸುಲು ಬುಡಿಯೆರೆ
ಪುರುಸೊತುಲ ಉಂಡಾಂಡ್ ಕರ್ಪುರೊ ಅಗ್ಗಿದೆದುರುಂತ್ಯೆ ||

9

ದಳಪತಿಯೊ ಅತ್ತಿಂಚ್ಚೆ ಪ್ರಲಯೊದ
ಸಿವೆನೊ ಪನ್ನನ ನಮುನೆಡಾಯೆನೆ

ಕಳಕ್ ನುರ್ಕುನ ತೂದು ಬೀಮೆನೆ ಗದೆನ್ ತಿರ್ಗಾದ್ ||
ಎದುರು ಉಂತಿಯೆನಪಗ ಸಲ್ಯೆಲ
ಗಡೆಟ್ ಹಾಕಿಯೆ ಇರೈರ್ಲ ಸರಿ
ಸರಿಟ್ ಗದೆಟೇ ಹಾಕೊನುಂದುಲ ಬೊಡಿಯೆರಾ ಕಳಟ್ ||

10

ಭೀಮೆ ಸೋಲ್ಪುವೆ ಪನ್ದ ಕೌರವ
ನಾಕ್ಲೆನ ಕಡೆತಕ್ಲ್ ಸಲ್ಯೆನೆ
ಸೋಲ್ಪುನಯೆ ಪಂಡೊಂದು ಇತ್ತೆರ್ ಪಾಂಡವೆರೆ ಕಡೆನೆ ||
ಆ ಯುದ್ಧಿರೆ ಸಾರತಿಗ್ ಸರಿ
ಸೂಚನೆನ್ ಕೊರಿ ಸಾತ್ ಗಾಯೆನೆ
ರಾಪಯೆನೆ ರತೊನಕ್ಲೆ ನಡುಕೇ ಭೀಮ ಸಾಯೊಗುಲ ||

|| ಸಲ್ಯೆ ಬೂಪತಿನ ಮರಣೊ ||

ನಡುಕು ಬತ್ತನ ರತೊನು ಸಲ್ಯೆನೆ
ಮಗ್ತ್ ಪಾಡುನೆಕ್ಕೈಕ್ ಪಗರಿನ್
ಬುಡಿಯೆನಪಗನೆ ಆ ಯುದ್ಧಿರೆನೈನ್ ರಟ್ಟಾಯೆ ||
ಬೆರಿ ಬೆರಿಕ್ ಬಾಣೊಲೆನ್ ಸಲ್ಯೆನೆ
ಬುಡುದು ತೂನಗ ಪೊಡಿಯೆ ರಟ್ಟಾದ್
ನೆಲಕ್ ಬೂರ್ನೆನ್ ತೂದು ನಿಲ್ಲಿಯೆ ರತಿಕೆನೇರ್ಂದ್ ||

1

ಓಹೊ ಧರ್ಮಜ ಈಯೆ ಲಡಯಿಗ್
ತೇರ್ಡೆದುರುಂತ್ ನೆನೊ ಪುಕ್ಕಲ
ಕ್ಷೀರಸಾಗರ ಬಟ್ಟನಿಲ್ಲಲ್ ಅಳೆಕ್ ಗತಿ ಇದ್ದಿ ||
ಗಾದೆದಂಚಿನೆ ನಿಕ್ಕ ಉಪ್ಪುನೆ
ಲಾ ಯುದ್ಧಿರೆ ಪನ್ನಿ ಪುದರ್ಡ್
ಓಲು ಈ ಸ್ತೀರೊಟುಂತುದಯ ಪನ್ ಕಾಳಗೊದ ಕಳಟ್ ||

2

ಪುದರ್ಗೇ ತಾರ್ಕಣೆನ್ ಕಟ್ಟಡ
ಲಡಯಿಗೆದುರುಂತುಲಯ ಮರೈದಿ
ಬುಡುದು ಕೌರವ ಕಡೆಕ್ ಸೇರ್ಪ್ ಎನಡ ಕೊರೆಪೊಡ್ಡಿ ||
ನಿನನ್ ಪುಟ್ಟಯಿನಮ್ಮನಾತ್ಮೊಗು
ಸರಿಯೊ ಮಲ್ತನ ಈಯೆ ಪನ್ನಯ
ನಕುಲ ಸಾದೇವೆರೆಗ್ ಬಾಣೊಡು ಬೇನೆ ಮಲ್ತನವು ||

3

ಯಮನ ಮಗೆ ಈ ಪಾಂಡು ರಾಜನ
ಬದ್ಕೆಗಿತ್ತೆನೆ ದಾಯೆ ಪುಣೆಪಯ

ಸಯಿಮಿನಿಡ್ ಉಂಡತ್ತ ಗೋಣದ ಅಂಬಿ ನಾಡ್‌ಲಯ ||
ಪಗಡೆ ಗೊಬ್ಬುದು ರಾಜ್ಯೊ ಕಳೆಯಿನ
ಬುಡದಿನಡವುಗು ದೀಡ್ಡ್ ಗೊಬ್ಬನ
ಸತಪಟಿಂಗನ್ ಕೆರೊಡೆ ಪಂಡ್‌ದ್ ಬಾಣೊ ರಾಪಯೆನೆ ||

4

ಸಲ್ಯ ಬಾಣೊನೆ ತಾಗಿ ಸಾತ್‌ಗ್
ಕಣ್ಣೆ ಕತ್ತಲೆ ಆದ್ ಬೂರೈನೆ
ಧರ್ಮನಂದನೆನಪಗ ಬೀಮಾರ್ಜನೆರ್ ಎದುರಾದ್ ||
ಬನ್ನಗನೆ ಗುರುಮಗನೆ ಕೈಪೆರ್‌ಲ
ಬುಕ್ಕೊ ಕೃತವರ್ಮಾದಿ ವೀರೆರ್
ಬತ್ತದುಂತ್ಯೆರ್‌ಲಪಗ ಕಾಳಗೊ ಕಳನೆ ಪೊಡಿಯಾಂಡ್ ||

5

ಮುಕುಲೆ ಕಾಳಗೊಡೇತೊ ತೇರುಲು
ಪೊಡಿಯೆ ರಟ್ಟಿಯೊ ಆನೆ ಕುದುರೆಲು
ಸಯಿತ್ ಬೂರಿಯೊ ರಣ ಪದಾತಿಲು ಪುಣಕುಲಾಯತ್ತೊ ||
ಕುರುಪತಿನ ಗೇಲ್‌ಂದ್ ಪಂಡರ್
ಕೆಲವುದಾಕ್‌ಲ್ ಧರ್ಮನಂದನೆ
ಜಯೊಸಿರಿನ್ ವಸೊ ಮಲ್ತೆ ಪಂಡ್‌ದ್ ತಾಟಿ ಬೊಟ್ಟಿಯೆರ್ ||

6

ಆ ತ್ರಿಗರ್ತೆರೆ ಕಡೆತ ವೀರೆರ್
ಪಾರ್ತನೇ ನಾಡೊಂದು ಬನ್ನಗ
ಸಾತ್ಯಕಿಯೆ ಎದುರುಂತ್ಯೆನಕ್‌ಲೆಗ್ ಬಾಣೊ ರಾಪಾಯೆ ||
ದಾನವೆರೆನಟ್ಟಿಸ್‌ನ್ ಕೇಂಡ್‌ದ್
ಆಡೆಗೆತ್ತೆರ್ ನಕುಲ ಸಹದೇ-
ವಾದಿ ವೀರೆರ್ ಬತ್ತ ನುಕ್ಕೆರ್ ಕಾಳಗೊದ ಕಳಕ್ ||

7

ಪೆಟ್ಟೆ ತಾಗ್‌ನ ಧರ್ಮನಂದನೆ
ಮರ್ದೆ ಮಂತ್ರೊದ ಗುಣೊಟು ಲಕ್ಕದ್
ಕರ್ಪುರೊನು ಅಗ್ಗೊಂದು ಲಡಯಿಗ್ ಪಿದಡ್‌ನಾಪಗನೆ ||
ದತ್ತಬಲತ್‌ಡ್ ಬೀಮ ಪಾರ್ತೆರ್
ಉತ್ತಮಾಂಜಸೆ ಸೃಂಜಯಾದಿಲು
ಬತ್ತೆರೊಟ್ಟಿಗೆ ನಕುಲ ಸಹದೇವಾದಿ ವೀರೆರ್‌ಲ ||

8

ನಳೆನೊ ನವುಸೆನೊ ದುಂದು ಮಾರೆನೊ
ಕಳಕ್ ಜತ್ನನೆ ಪನ್ನಿ ನಮುನೆಡ್
ಯಮನ ಮಗಿ ಧರ್ಮಜೆನೆ ಕಾಳಗೊ ಕಳಕ್ ನುರ್ಕನಗ ||
ಕುರುಪತಿನ ಕಡೆತಕ್‌ಲ್ ಉಂತ್ಯೆರ್
ತಯರ್‌ಡೇತ್‌ಲ ಆನೆ ಕುದುರೆಲೆ
ಪಡೆನ್ ಕೂಡ್‌ದ್ ಆನಗಾಪಗ ಸಲೈ ಪಿದಡಿಯೆನೆ ||

9

ತೂಲ ಕೌರವ ಅಸ್ವತ್ತಾಮೆಲ
ತೂಲೆ ಇನಿತವೆ ಎನ್ನ ಕಾರ್ಬರ್
ಪಾಂಡವೆರೆ ಪುಣ ಪಾಡ್ಲೆ ಪಂಡ್‌ದ್ ಮಾದ್ರ ಬೂಪಾಲೆ ||
ಬೇರಿ ವಾದ್ಯೊ ನಗಾರಿ ಬೊಬ್ಬೆಡ್
ಕಾಳಗೊದ ಕಳತಾಡೆ ಬತ್ತದ್
ಓಲು ಉಲ್ಲೆಯ ಧರ್ಮನಂದನೆ ಬರಡ್ ಕಾಳಗೊಗು ||

10

ಭೀಮ ಪಾರ್ತೆರೆ ಸಾಯೊಡುಂತಡ್
ಸಾತ್ಯಕಿನ್‌ಲಾ ಚೇಕಿತಾನನ್
ಆ ನಕುಲ ಸಹದೇವನಕ್‌ಲೆನ್ ಕೂಡ್ಲು ಬರಡೀಡೆ ||
ಬಾಂಕೆನುರಿತ್‌ದ್ ಪನ್ನಯೆನೆ ಮಾ-
ದ್ರೇಸೆನಾಪಗ ಕ್ರಿಷ್ಟೆ ಧರ್ಮಜ-
ಗಾಪಗನೆ ಮಹ ಸಗ್ಗಿ ಮಂತ್ರೊನು ಪನ್ನ ಕಲ್ಪಾಯೆ ||

11

ಎದುರೆದುರು ಉಂತೊಂದು ರಾಪದ್
ಪಗರಿನಾಕ್‌ಲ್ ನೆರ್ಮ ನೆರಡೆಡ್
ಕೆಬಿಯೆ ಕೀಲುನ ಲೆಕೊನೆ ಆನಗ ಧರ್ಮನಂದನೆನೆ ||
ಹರಿನ ಮಂತ್ರೊನು ಜಪಿತ್ ಜಪಿತ್‌ದ್
ಬಿರುನು ದೆರ್ತದ್ ಬಾಣೊ ರಾಪಯೆ-
ನಪಗ ಸಲ್ಯನ ತಿಗಲೆಗ್ವೇ ನಾಟ್‌ದಾಂಡತ್ತೊ ||

12

ಬಾಣೊ ತಾಗ್‌ನ ಪೆಟ್ಟೆಡಾಪಗ
ದಾರೆ ಕಟ್ಟೆದ್‌ಲರಿದ್ ನೆತ್ತೆರ್
ಕಾರ್ ಕೈ ಕುಂಬರ್‌ದ್ ಬೂರೈನೆ ಸಲೈ ತೇರುಲಯಿ ||
ಆ ಸುಯೋದನ ಸೇನೆದಾಕ್‌ಲ್
ಪಾರಿಯೆರ್ ಅಲ್ಲಡ್‌ದ್ ಕೌರವ-
ಗಾಯಿನಾ ಸಂಗತಿನ ತೆರಿಪಯೆರೆಂದ್‌ದಮಸರೊಡು ||

ಶ್ರೀ ಅನಂತಕೋಡಿ ಸುಬ್ರಾಯ ದೇವೆರೆ ನಿರ್ಮೋಡು ;
ಪರಿವಾರೊ ದೈವೊಲೆನ ಬೆರಿ ಸಾಯೊಡು
ಕೆಲಿಂಜ ದೂರುಡು ನಿಲೆಯಾಯಿನ
ಅಪ್ಪೆ ಸಿರಿ ಉಳ್ಳಾಲ್ಪಿನ ದಯೊಟು
ತುಳು ಕೆಲಿಂಜ ಭಾರತೊದ
ಸಲ್ಯ ಪರ್ವೊ ಪೂರ್ತಿಯಾಂಡ್.

ತುಳು ಕೆಲಿಂಜ ಬಾರತೊ

|| ಗದಾ ಪರ್ವೊ ||

|| ಸುರುತ ಸಂದಿ ||

|| ಸಲ್ಯೆ ಸೈತ್ತನ ಗಡಿಬಿಡಿತ ಲಡಯಿ ||

ಮಾದ್ರ ಬೂಪತಿ ಸೈತ್ತಿ ಸಂಗತಿ
ಕೇನ್ದ ಕುರುಪತಿ ಕೋಪೋದೇವುರೊ -
ಡಾಪಗನೆ ಕಳಕೆತ್ಯೆ ತನ್ನವೆ ಬಲೊನು ಕೂಡ್ನಾದ್ ||
ಪಾರ್ತನಾಯನ್ ತೂದು ಲೆತ್ತನೆ
ಏರ್ ನನ ನಿಕ್ಕಿತ್ತೆ ದಳಪತಿ
ಈಯೆನೋ ನಿನ್ನಮ್ಮೆನೋ ಪನ್ ಬಲಯ ಕಳಕೆತ್ತೆ ||

1

ಗುರುನ ಮಗೆ ಕೃತವರ್ಮನಾಕ್‌ಲ್
ಕುರುಪತಿನ ಒಟ್ಟಿಗೆ ಸುಸರ್ಮಲ
ಸಕುನಿನಾ ಬಲೊ ಕೂಡ್ನದತ್ತೆರ್ ಕಾಳಗೊದ ಕಳಕ್ ||
ನಕುಲ ಸಹದೇವೆನಲ ಸಾತ್ಯಕಿ -
ನಕ್‌ಲ್ ದ್ರುಪದನ ಸೇನೆದೊಟ್ಟಿಗೆ
ಕಳಕ್ ಬನ್ನಗ ಭೀಮೆನಟ್ಟಿಸ್‌ಡೆತ್ಯೆನಾಡೆಗೆನೆ ||

2

ರಡ್ಡ್ ಕಡೆತಕ್‌ಲೊಟ್ಟು ಸೇರ್‌ದ್
ನೆರ್ಡ್ ನೋತುದು ಬಚ್ಚೆರೇಶಲ
ಅರುನನೆ ಗಾಂಡಿವೊಗು ಬಾಣೊನು ಕೊಲ್ಪದಾಕ್‌ನಗ ||
ಸೈತ್ತ ಬೂರೈರ್ ಕೌರವನ ಬಲೊ -
ಟಿತ್ತನಾಕ್‌ಲ್ ಆನೆ ಕುದುರಲು
ಕತ್ತಿ ಕಡ್ಲೊನು ಪತ್ತಿ ವೀರೆರೆ ಪುಣನೆ ಬೂಂಡೊಲು ||

3

ಪಾರ್ತನೆದುರುಗು ಬಾಣೊನಸ್ತ -
ತ್ತಾಮೆ ಬುಡ್ಡಗ ತುಂಡು ರಟ್ಟದ್
ಪಾಸುಪತೊನರುನನೆ ದೆರ್ಪುನ ತೂದು ಗುರುಮಗೆನೆ ||
ಪಾರ್ ಜಾಗೆಡೆ ಪಂತಿ ಕೊಡಿಪುವೊ
ಆಯುದೊನು ದಕ್ಕಿಯೆರ್ ಕೆಲವೆರ್
ಬಾಕಿದಾಕ್‌ಲ್ ಆನೆಲೆನ ಪುಣಿಡೆಟ್ ದೆಂಗಿಯೆರ್ ||

4

ಬಲಿಪುನಕ್‌ಲೆನ್ ತೂದು ಕೌರವೆ
ನೆರಿಯೆನೇಶಲ ನಿಕ್‌ಲ್ ಆಣುಲೊ
ಪೆದನ ಅಪ್ಪೆಗ್ ಅಮ್ಮಡಿ ಕುಲೆಗ್ ಪಿಲೆನ್ ತುಂಬಯರೆ ||
ಕಳಟ್ ಸೈತ್ತರಡಾಂಡ ನಿಕ್‌ಲೆಗ್
ಸುರೆರೆ ಲೋಕೊಡು ತಾನೊ ಪಾಂಡರ್‌ನಿ
ನರಕೊ ಗುಂಡಿಗ್ ಬೂರ್ವರಂದ್‌ದ್ ಗೌಜಿ ಲಕ್ಕಾಯೆ ||

5

ಕುರುಪತಿನ ಮಹ ಗೌಜಿ ಕೇಂಡ್‌ದ್
ಪೆರಪ ತಿರ್ಗೈರ್ ಪಾರ್ನ್ ವೀರೆರ್
ಬಿರು ಪಗರಿನಾಯುದೊಲೆ ಪತೊನುದು ಕಳಕ್ ನುರ್ಕಿಯೆರ್
ನಕುಲೆನೆದುರುಗು ಬತ್ತದಾಕಿಯೆ
ಸಕುನಿನಾ ಬಲೊಕಲ್ಪ ಮಲ್ಪುನ
ಲಡಯಿ ಜೋರಾಯಿನೆನ್ ತೂವೊಂದೆತ್ಯೆ ಸಹದೇವೆ ||

6

ಇರೈರಲ ಒಟ್ಟಾದ್ ಕಡ್ತೆರ್
ಕೆರೈರೇಶಲ ಸೇನೆದಕ್‌ಲೆನ್
ಲೆಕ್ಕೊ ಮಲ್ಪುನೆ ಏರ್ ಪುಣಕುಲೆರಾಸಿ ಬೂರೈನ್ ||
ಬತ್ತೆನಸ್ತತ್ತಾಮೆ ಕಾಳಗೊ
ಮಲ್ಲೆನಕ್‌ಲೆಡ ಅಪಗ ಪಲ್ಲಣೆ
ಬತ್ತರೋ ಗುರು ಪುತ್ತೆರಂದ್‌ದ್ ಎದುರು ಉಂತೊಂಡೆ ||

7

ಆಪೆಕಡೆ ಸಮಸಪ್ಪಕೇರೆನ
ಕೂಟೊದಾಕ್‌ಲ್ ನನಲ ಉಲ್ಲೆರೆ
ದೀಡಯೆಂದ್‌ದ್ ಪಾರ್ತೆ ಬೀಮಡ ಪನ್ದ ಪೋನಗನೆ ||
ಬೀಮೆ ಗದೆ ತಿರ್ಗಾದ್ ಬನ್ನಗ
ಆ ಸುಯೋದನೆನೆದುರು ತಿಕ್ಕಿಯೆ
ಓ ಜುಗಾರಿದ ಮರ್ದ ಉಂತುಲ ಕಳಟ್ ಗೊಬ್ಬುಗೊಯೆ ||

8

ರಕ್ಕಸಿನ ಕೈ ಪತ್ತಾನಾಯನ
ಬುದ್ಧಿ ರಕ್ಕಸನತ್ತೊ ನಿನ್ನಡ
ಎಡ್ಡತನೊ ಓಲುಂಡು ನಿನ್ನವೆ ಬಂಜಿ ಬಿಚ್ಚಾದ್ ||
ಎನ್ನ ಮೆಗ್ಯನ್ ಲಕ್ಕಾದಂತವೆ
ಪನ್ದ್ ಗದೆ ಬೀಜೊಂದು ಎದುರುಗು
ಬನ್ನಗನೆ ರಣ ಬೀಮೆ ಹಾಕಿಯೆ ಕೌರವನ ತರೆಕ್ ||

9

ತರೆಕ್ ಸರಿ ಪೆಟ್ಟಾಯಿನಾಯನ
ಕುದುರೆಲೆನ ಪುಣತಿದೆಟೆ ನೂರುದು
ಪೊಲಿನ ತೇರಲೆ ರಾಸಿದಡಿಟೆ ದೆಂಗ್‌ದುಂತೊಂಡೆ ||
ಕುರುಪತಿಯೆ ತಪ್ಪಾದೆ ನಾಡುಗೊ
ನಕುಲ ಸಹದೇವಾದಿ ವೀರರ್
ಬಲೆ ಬಲೆಂದಾದ್ ಲೆತ್ತೆ ಬೀಮೆನೆ ನಾಡ್ಲೊ ಕೌರವನ್ ||

|| ಸಕುನಿನ್ ಸಹದೇವೆ ಕೆರೈ ||

ಕುರುಪತಿನ ನಾಡಿಯೆರೆ ಪಾಂಡವ-
ನಕ್‌ಲ್ ಸಾತ್ಯಕಿ ದ್ರೌಪದಿನ ಬಾ-
ಲೆಗುಳು ಐವೆರ್ ನಾಲ್ ದಿಕ್ಕಡೆ ತಿರ್ಗ್ ತಿರ್ಗೊಂದು ||
ಪೊಲಿನ ತೇರಲೆನಟ್ಟಿ ಮಗ್ತಾದ್
ಕುದುರಲಾನೆಲೆ ಪುಣತರಾಸಿನ್
ಬುಡುಪದಾಕ್‌ಲ್ ಓಲು ತೂಂಡಲ ರಾಯೆ ತಿಕ್ಕಜೆನೆ ||

1

ಅಪ್ಪೆ ಬಂಜಿಗ್ ನೂರ್ದಲ ಈ
ಕುರೈ ಬಂಗುಡೆ ಆದ್ ಕಡಲ್‌ಡ್
ಇತ್ತಡಲ ಯಾನ್ಪುಡಯೆ ನಿನ್ನನ್ ಕೆರ್ದ ಪಾಡಂದೆ ||
ನುಪ್ಪು ನೀರ್‌ನ್ ಮುಟ್ಟಯೆಂದಾದ್
ಗಟ್ಟಿದಾ ಸೊರೊಟಲ್ವ ಭೀಮೆನೆ
ಲೆತ್ತೆನಾರ್‌ಟೆ ಕೊರ್ದು ಕೌರವ ಓಲು ಉಲ್ಲಂದ್ ||

2

ರಾಯ ಕೌರವನಿದೈ ಪನ್ನುನ
ಕೇಂಡದಾ ದ್ರೌಪದಾಸ್ತೆ ಸಂಜಯ -
ನಾಪಗನೆ ಕಡಪುಡಿಯೆ ನಾಡೈರೆ ಲಡಯಿದಾ ಕಳಕ್ ||
ಸಾದು ಸಂಜಯೆ ಕಳಟ್ ಪುಣಕುಲೆ
ರಾಸಿನೇ ಕಡತೊಂದು ಬನ್ನಗ
ಸಾತ್ಯಕಿಯೆ ತೂದಯನ್ ನೋಪೈರೆ ಬತ್ತೆ ಬೇರೊಂದು ||

3

ಅಪಗಲಸ್ವತ್ತಾಮೆ ಗುರುಕೃಪ -
ನಕ್‌ಲ್ ಎದುರುಗು ಬತ್ತೆದುಂತೈರ್
ಪರಬಗೀ ಹಾಕಿಯಡ ನಿನ್ನವೆ ಕೈನ್ ಪೊಲಿಪೊಂದು ||
ಅಕ್‌ಲೆನುಲಯಿಡ್ ಆಂಡ್ ಜೋರುಡೆ
ಲಡಯಿಯಾಪಗ ನಕುಲ ಸಹದೇ -
ವೆರ್‌ಲ ಎತ್ತೈರ್ ಕುರುಪತಿನ ನಾಡೊಂದುಲಾಡೆಗೆನೆ ||

4

ಸಾತ್ಯಕಿನ್ ಉಂತಾದ್ ಗುರು ಮಗ -
ಕೇತಲಾ ಹಾಕಿಯೆರ್ ಕೃಪೆರೆನ್
ಪೋಯರ್‌ಡ ಎಡ್ಡೆಂದ್ ಪಂಡರ್ ಮಾದ್ರಿ ಬಾಲೆಗುಳು ||
ಆತ್ ಪೊರ್ತುಗು ಸಕುನಿನಾ ಕಡೆ -
ತಾಕ್‌ಲಾಡೆಗ್ ನುರ್ಕನಾಪಗ
ಓಲ್ಲೆ ನಿಕ್‌ಲೆನ ದನಿಯೆ ಬರಡ್‌ಂದಕಲೆಗಾಕಿಯೆರ್ ||

5

ಸಕುನಿಯಾಡೆಗ್ ಬತ್ತೆ ಜೋಕುಲೆ
ನಿಕ್‌ಲ್ ಪಲಯನ ಬುಡೆದಿಗೇ ಕೈ
ಕೊರಿ ಪಟಿಂಗೆರ್ ಬೂಮಿ ತುಂಬುವೊ ನಿಕ್ಷೆನಿತ್ತೆ ಮಗ ||
ಬಿರುಕು ಬಾಣೊನು ಕೊಲ್ವದಾಕಿಯೆ
ಅಪಗನೇ ಸಹದೇವೆ ಬತ್ತೆನ
ಪಗರಿನ್‌ಲ ರಟ್ಟಾದ್ ಜುಗರಿದ ಮಂಡೊ ಬುಡ್ವಾಲ ||

6

ಜೂಜಿ ಗೊಬ್ಬುದು ರಾಜ್ಯೊ ಕೌರವ
ನಾಕ್‌ಲೆಗ್ ವಸೊ ಮಲ್ತ ನಿನ್ನವೆ
ಜೂವೊನೇನಿನಿ ಯಮಗ್ ಸಂದವೆ ಪನ್ದ್ ಸಹದೇವೆ ||
ಬಾಣೊ ಬುಡೈನ್ ತಲಿಪೆರಾಯಿಜಿ
ಆ ಜುಗಾರಿದ ಮರ್ದಗಾಪಗ
ಪ್ರಾಣೊ ಬುಡಿಯೆನೆ ಕಳಟ್ ಬೂರುದು ಸುಬಲ ರಾಜಮಗೆ |

7

ರಾವಣಗ್ ಮಾರೀಚಿ ಸಮ್ಮಲೆ
ಆಯಿನಯೆನೇ ರಕ್ಕಸೆರೆ ಕುಲೊ
ನಾಸೊ ಮಲ್ತನ ಲೆಕೊನೆ ಕೌರವಗಿಂಬೈ ಸಮ್ಮಲೆನೆ ||
ಆದ್ ಕುರುಕುಲೊ ಮಲ್ತೆ ಕುರೈರಿ
ಲೋಕೊ ಮುಕುಲೆನ ಗುಣೊನು ತೆರಿಯೊಡು
ಏಪೊಗುಲ ಜಾಗ್ರತೆಡ್ ಉಪ್ಪೊಡು ಪಂಡೆ ಶ್ರೀ ಕ್ರಿಷ್ಣ ||

8

ಆ ತ್ರಿಗರ್ತೆರೆ ಕಡೆತ ವೀರರ್
ಪಾರ್ತನೆದುರುಗು ಬತ್ತೆನಾಕ್‌ಲ್

ಬಾಣೊ ರಾಪದ್ ಪಂಡೆರೆಂಕ್ಲೆ ಪಗೆನ್ ಸಂದಾವೊ ||
 ಆವು ಸಂದವೊನಿಂದ್ಲರ್ದುನೆ
 ಬಾಣೊ ಬುಡಿಯೆನೆ ಮಂತ್ರೊ ಮಲ್ತದ್
 ಆಪಗನೆ ಅವು ಕಬರ್ ಕಬರಾವೊಂದು ವೈರಿಲೆನ ||

9

ತಿಗಲೆ ಕಂತ್ದ್ ಮಾತ ಸೈತ್ತೆರ್
 ಕುರುಪತಿನ ಬಲೊ ಮಾತ ಆಯೆರ್
 ಪುಣೊಕುಲಲ್ಪನೆ ಬೂರ್ದು ಒರಿನೆನ್ ಲೆಕ್ಕೊ ಮಲ್ಪುನಗ ||
 ಗುರು ಮಗೆನೆ ಕೃತವರ್ಮೆ ಕೃಪೆರ್ಲ
 ಪೊಲಿನ ತೇರುಲು ಸೈತ್ತಿ ಆನೆಲು
 ಕುರಿದ್ ನಾದುನ ಕುದುರೆಲಿತ್ತೊನೆ ಕಾಳಗೊದ ಕಳಟ್ ||

|| ಕುರುಕಂಡೊಡು ಕುರುರಾಯೆ ||

ಪಾಂಡವೇರೆಗ್ ಕಣ್ಣ್ ತಪ್ಪದ್
 ರಾಯ ಕೌರವೆ ದುಂಬು ಪಿರವುಗು
 ತೂವೊನುಂದೇ ನಡತ್ ಬತ್ತೆನೆ ಕಾಳಗೊದ ಕಳಟೆ ||
 ಬೀಸ್ಮ ದ್ರೋಣೆರೆನೆನ್ ನಂಬಿಯೆ
 ದಾಲ ಮಲ್ಚೆರಕ್ಲ್ ಕರ್ಣನ
 ತೇರ್ಡ್ಡ್ ಮಾದ್ರೆಸೆ ಪೋಯಿನೆಟಾಂಡ್ ಸೋಲಯಗ್ ||

1

ಕ್ರಿಷ್ಟೆ ಪಾಂಡವೇರೆನ್ ಬದ್ಕಯೆ
 ಒರೈನಾಂಡಲ ದೆಪ್ಪರಾಯಿಜೆ
 ಉಲ್ಲೆರಾಕ್ಲ್ ಜೂವೊ ಜೂವೊಡೆ ಲಡಯಿ ಮಲ್ತೊಂದು ||
 ಎನ್ನ ಹಣೆಬರೊ ಓರೆ ಆಯ್ಕೆಕ್
 ಇತ್ತೆ ದೂರುದು ದಾನೆ ಪ್ರೇಜನೊ
 ಪನ್ದ ಗದನೂರೊಂದು ಜಾರ್ಡ್ ಬೂರ್ದು ಲಕ್ಕೊಂದು ||

2

ಕುರಿದ್ ನಾದುನ ಪುಣಕುಲೆನವೇ
 ಗುರುತೊ ತಿಕ್ಕಂದಾಯೆ ಪೋನಗ
 ತರೆಟ್ ಕುಲ್ಲಿಯೊ ಕಕ್ಕೆ ಕುರುಕುಲು ರಾದ್ ರಾವೊಂದು ||
 ಅವೆನ್ ಗದೆ ಬೀಜಾದ್ ಗಿಡರಿಯೆ -
 ನೆದುರು ತಿಕ್ಕಿಯೊ ಸಾಕಿನೀ ಗಣೊ
 ಕುರಿನ ಮಾಸೊನು ನಕ್ಕ ನಕ್ಕದ್ ತಿನ್ನುನೆನ್ ತೂಯೆ ||

3

ನಾಯಿ ಕುದ್ಡೆರ್ ಆನೆ ಕುದುರೆಲೆ
 ಮಾಸೊ ತಿಂದ್ಡ್ ಬಾಂಗ್ ಪತ್ತೆದೊ

ಏಸಿಗದ ಕುರ್ತಲ್ದ ರಾಸಿಡ್ ಬೂರ್ದು ಪುರೆಯೆನೆನ್ ||
 ಮೂಂಕುಗೇ ಕೈ ಪತ್ತದಾಯೆನೆ
 ತೂವೊನುಂದೇ ದುಂಬು ಪೋನಗ
 ಜಾರ್ಡ್ ಬೂರೈನೆ ಬುಕ್ಕೊ ಲಕ್ಕಿಯೆ ಗದೆನ್ ಊರೊಂದು ||

4

ದೆರಿಕಾರ್ನ್ ಪುಣತ ಮೇಲ್ಡ್
 ಒದ್ದುದೇ ಕಡಪಿಯೆರೆ ಮನಸ್ಗ್
 ದುಕ್ಕೊ ಆಯ್ಕೆಟ್ ಕಡಪ ಲಾಗಿನಗಾಯೆ ಬೂರ್ನಗನೆ ||
 ಮಸ್ತಿರಿನ್ ಮಲ್ತೊಂದು ಪ್ರೇತೊಲು
 ಸುತ್ತು ಬರ್ಪೆದೊ ಪುಣತ ರಾಸಿಡೆ
 ನೆತ್ತೆರ್ಡ್ ಸರಿ ಮುರ್ಕುದಾಂಡ್ಲ ಅರಸು ದುತ್ತೈತೊ ||

5

ನರಮನಿನ ಪಜಿ ಮಾಸೊ ತಿಂದ್ಡ್
 ಮರ್ಲ್ ಸುರುವಾಯಿನವೆ ನಾಯಿಲು
 ಕುದುಕೆರೊಟ್ಟಿಗೆ ಬಾಂಗ್ ಪತ್ತೊಂದಿತ್ತೊ ಅವುಲೊಲು ||
 ಮೆಜಿಲ್ದಿತ್ತನ ಪುರಿಕುಲೆನ್ ಸರಿ
 ತಿನಿಯೆರೆಗ್ ರಾವೊಂದು ಕಕ್ಕೆಲು
 ಪುಣಕುಲೆನ್ ಕೊಡತೊಂದು ತಿನ್ನೆದೊ ಕರುಕುಲೆನ ಒಟ್ಟು ||

6

ನಾಯಿ ಕುದ್ಡೆರೆ ಬಾಂಗ್ ಪ್ರೇತೊಲು
 ಕೀರಿ ಕುಟ್ಟುನ ಸೊರೊನೆ ಗೂಮೆಲು
 ಮೂಲುನಾ ಕರು ಕಕ್ಕೆಲೆನ ನಿಜೊ ಬಾಸೆಲೊಟ್ಟಾದ್ ||
 ಕೇನುನಾ ಕೆಬಿ ಕೀಲುನಂಚಿನೆ
 ಆದ್ ಕುರುಪತಿ ಕೆಬಿಕ್ ತನ ಕೈ
 ನಾಪಗನೆ ಪತ್ತೊಂದು ಪೋಪೆದೆ ಮಾಲ್ ಮಾಲೊಂದು ||

7

ಸಾದು ಸಂಜಯೆ ಸೈತ್ತಿ ಪುಣಕುಲೆ
 ನಾತೊ ಮೂಂಕುಗು ಎಡ್ಪುನಾಪಗ
 ಬೇಕೊ ಬೇಕೊನೆ ಕಡತ್ ಬತ್ತೆನೆ ಯುದ್ಡೊ ಬೂಮಿಡೆನೆ ||
 ಸಾತ್ಯಕಿಯೆ ಪಿರ ಪಿರಲ ಆಯನ್
 ಸಾದಿಡೇ ತಲಿತೊಂದು ಉಂತದ್
 ದೀಡಯೆನೆ ನಿನನ್ಂದ್ ಕತ್ತಿನ್ ಬೇರ್ನಗಾಪಗನೆ ||

8

ವೇದ ವ್ಯಾಸೆರ್ ಬತ್ತದಾಡೆಗ್
 ಸಾತ್ಯಕಿನ ಕೈಟಿತ್ತಿ ಕತ್ತಿನ್
 ತಾನ್ ಒಯ್ತದ್ ದೆತ್ತ ಪಂಡೆರ್ ಇಂಬೈ ಎನ ಸಿಸೈ ||
 ಈಯೆ ಕೆರ್ಡಡ ಪಂಡಿ ಸಾತ್ಗ್
 ಕಾರ್ಗಡೊನೆ ಬೂರ್ದು ಎನ್ನನ್
 ಮಾಪಿ ಮಲ್ಪುಲೆ ಎಂಕ್ ಈರೆನ ಸಿಸೈ ಪನ್ನುನವೆ ||

9

ತೆರಿಜಿ ಪನ್ನಗ ಬಾದರಾಯಣೆ
ಬದರಿಕಾಸ್ರಮೊದಾಡೆ ಪೋಯೆರ್
ಪರಬೆ ಸಂಜಯೆ ಕೌರವನ್ ನಾಡೊಂದು ಪಿದಡಿಯೆನೆ ||
ಎಡತ್ ಬಲತ್ ನಿಲ್ಕ ನಿಲ್ಕದ್
ಕುರುಪತಿಯೆ ತೋಜುವೆನೊ ಪಂಡ್
ಕರಕರೆನೆ ಮಲ್ತೊಂದು ನಾಡಿಯೆನಾಸೆ ದೀಡೊಂದು ||

|| ವೈಸಂಪಾಯ ಕೆದುಟು ಕುರುರಾಯೆ ಮುಕ್ಯೆ ||

ಎನ್ನ ಮೆಗಿ ದುಸ್ವಾಸ ಕರ್ಲನ್
ಒಯ್ತಿ ಭೀಮನ್ ತಿಗ್ತ್ ಪಾಡ್
ಬುಕ್ಕೊ ಎನ ಕರ್ಣನ್ ಕೆರ್ರಯೆ ಪಾರ್ತೆ ತಿಕ್ಕಿಯೆಡ ||
ನೆಟ್ಟಿ ಹಾಕ್ ಕೆರ್ರೆ ಪಂಡ್
ತನ್ನಗದೆ ಬೀಜಾನಗಾಯೆನೆ
ನೆತ್ತರ್ಡ್ ಬೊದುಲುಡ್ ನೆಲಟೀ ಜಾರ್ಡ್ ಬೂರಿಯೆನೆ ||

1

ಪುಡೆರ್ ಪುಡೆರ್ ಬಾನೊಗೇಣೆನ್
ಒರಗವುನ ಕನ ಕಟ್ಟೊಂದುಂದೆ
ನಡತ್ ಪೋಪುನ ತೂಯೆ ಸಂಜಯೆ ಪಿರವು ದೂರೊಡುದು ||
ಕುರುಪತಿನ ಗುರ್ತಾದ್ ಲೆತ್ತೆನೆ
ಕುರುಕುಲೇಸ್ವರ ಉಂತು ಉಂತುಲ
ನಿನನ್ ನಾಡೊಂದೀಡೆ ಬತ್ತನ ಸಂಜಯೆನೆ ಯಾನ್ ||

2

ಲೆಪ್ಪುನೆನ್ ಕೇನೊಂದು ಕೌರವೆ
ತಿರ್ಗ್ ತೂಯೆನೆ ಮಂತ್ರಿ ಸಂಜಯೆ
ಪನ್ನ ನಾಚಿಗಡಾಯೆ ತರೆನ್ ಅಡಿಕ್ ಪಾಡ್ಡುಂತ್ಯೆ ||
ಬತ್ತನಯೆ ಬೆರ್ರಲಿಡ್ ಉಂತುದು
ಕಣ್ಣೆಡೆನೆ ನೀರರಿನೆನುದು
ಅಯ್ಯೊ ಕೌರವ ನಿನ್ನ ಬಾಗ್ಯೊನು ತೂಯೆರಾಂಡತ್ತೊ ||

3

ಓಲು ಉಲ್ಲೆರ್ ಜಯೊ ಜಯೊಂದುದು
ಗೋಸಣೆದ ಪಾಟಕೆರ್ ಸಂಪುಗು
ಗಾಳಿ ಬೀಜುನ ಮೋನೆ ತೂಪುನ ಪೊಣ್ಣುಲೋಲುಲ್ಲೊ ||
ನಾಲ್ ರಂಗೊದ ಸೇನೆ ಬೊಲ್ಲುಡೆ
ಚಾಮರೊಲು ತೋಜುಜೆನೆ ನಿನ್ನವೆ
ಪ್ರೀತಿದಾ ಮೆಗ್ಯಲ್ಲು ಬಾಲೆಲು ಕರ್ಣೆ ಇದ್ಯೆತ್ತೊ ||

4

ಕಾಣೆಗೆನ್ ಸಾಮಂತನಾಕ್ಲ್
ಕಾರ ಮುದೆಲ್ಗ್ ದೀಡ್ಡ್ ನೀಟೊನೆ
ಬೂರು ಪುಡ್ಯಾಡುನವೆ ವೀರೆರ್ ಇತ್ತೆ ತೋಜುಜೆರೆ ||
ಯಾನ್ ದಾಯೆಗ್ ಸಯ್ತಜೀತ್ನಿಟ
ಈ ಸುಯೋದನನಿಂಚ ತೂಯೆರೆ
ಆಹ ಪಂಡೊಂದಾಯೆ ಬುಲ್ಲುದು ತರೆಕ್ ಹಾಕೊಂಡೆ ||

5

ದಾಯೆ ಬುಲ್ಲುವ ಮಂತ್ರಿ ಸಂಜಯೆ
ಪೂರ್ವ ಕರ್ಮದ ಪಲೊತ ಕಂಡೊನೆ
ಕಾಯ್ ಪೊತ್ತುದು ಆಂಡ್ ಜಯ ಸಿರಿಜಾರ್ಡ್ ಪೋಯಿನೆಟ್ ||
ಯಾನ್ ಇಂಚೆನೆ ಆಯ್ ಪನ್ನುನ
ಈಯೆ ತೆರಿನಯೆನತ್ತೊ ಬುಲ್ಲಡ
ಆಪುನವು ಆವೊನಡ್ ದಾಯೆಗ್ ಎನನ್ ತೂಪುನೆಯೆ ||

6

ಕುರುಡೆನೇ ನಿನ್ನಮ್ಮೆ ಅಪ್ಪಲ
ಬುಲುಪುವೆರ್ ನಿನ ಸುದ್ದಿ ಕೇಂಡ್
ಅಕ್ಲೆನೀ ಸಮದಾನೊ ಮಲ್ಲುಲ ಬತ್ತದಾಡೆಗೆನೆ ||
ಮೆಗಿಯನಕ್ಲೆನ ಬುಡೆದಿಯಲ್ಲೆಗ್
ಪನುಪುನಕ್ಲೆರುಂಡು ಪನ್ನಗ
ಅರಮನೆಡ್ ಸುಯಿಲಿದ್ದಿ ಬುಲ್ಲುನ ಮಾತ್ರೊ ಕೇನುನೆಯೆ ||

7

ಈತ್ ಪನ್ನಗ ಮುರ್ರೊ ಮುರ್ರೊ -
ದಾಯೆ ಬುಲ್ಲುದು ಕಂಗಲಾಯೆನೆ
ಯಾನ್ ಬರುಜಿ ಅಕ್ಲೆ ಮೋನೆನ್ ತೂಪುನೆಂಚೇನ್ ||
ಬಾನುಮತಿ ಲಚ್ಚಣನ್ ಕೇಂಡಲ್
ಡೇನ್ ಪನ್ನುನೆ ಎಂಚ ಮೆಗ್ಯ-
ಲ್ಲೇನ ಜೋಕುಲೆನಪ್ಪನಕ್ಲೆನ್ ತೀರ್ರೊ ತೂಯೆರೆಗ್ ||

8

ಇನಿತವೇ ದಿನೊ ಒಂಜಿ ತಪ್ಪದ್
ಬದ್ಕೊನುವೆಯಾನೆಲ್ಲೆ ಒರಿಯೆಡ
ಕುರು ಕುಲೊತ ಸಿಮ್ಮಾಸನೊನೆ ಎಂಕಾವು ನಂಬೊನುಲ ||
ಒಯಿರಿಲೆಗ್ ಗತಿ ಕಾಡ್ ಪಾಂಡವ
ನಕ್ಲೆಡೊರಿ ಸೈತ್ತೆಡಲ ಎಂಕೇ
ಅರಸು ಪಟ್ಟೊನೆ ಸ್ತೀರೊತ ಬದ್ಕಂದೇನ್ ತಪ್ಪಾವೆ ||

9

ಮೂಲೆ ವೈಸಂಪಾಯ ಕೆದು ಒಂ-
ಜಾದ್ ಉಂಡುಯೆ ಐಟ್ ಮುರ್ಕುದು

ಈ ದಿನೊನು ನೂಕೊನುವೆ ಎಲ್ಲೆನೆ ಬರುವೆ ಲಕ್ಕೊಂದು ||
ಪಾಂಡು ಬಾಲ್ಗೆ ಕಾಡ್ಗ್ ಪೋಯೆರೆ
ಬೂಳ್ಕೊ ಕೊಪುನ ತೂಲ ಸಂಜಯ
ಈಯೆ ಮುಲ್ಲಡ್ಡೆತ್ತೆ ಬೇಕೊನೆ ಪೋಲ ಅರಮನೆಗ್ ||

10

ಪಾಂಡವೆರ್ ನಾಡೊಂದು ಉಲ್ಲೆರ್
ಮೂಲು ಉಂತ್ಯಡ ತೂವೆರೆನ್ನನ್
ಪೋಯಿನಾಯೆನೆ ಎನ್ನ ಸಂಕಲ್ಪುಲೆನ್ ತೆರಿಪಾದ್ ||
ಮಾತೆರೆನ್ ಸಮದಾನೊ ಮಲ್ಪುಲ
ಪ್ರೀತಿದಾ ಅಪ್ಪೆಮ್ಮನಕಲೆನ
ಸೋಕೊ ದುಕ್ಕೊನು ಈಯೆ ಉಂತದ್ ದೈರೊಡುಪ್ಪಿಲೆಕೊ ||

11

ಬಾನುಮತಿ ಬುಲ್ಪಂದಿಲೆಕೊ ಈ
ಪಾತೆರೊಡೆ ಸಮದಾನೊ ಮಲ್ಪೊಡು
ಯಾನ್ ನಿನ್ನನ್ ನೆರ್ಡ್ ನೂಕ್ಕೆರೆ ಪನ್ನೆ ಸಬೆಟಾನಿ ||
ದಾನೊ ಇಸೊಗಳೆಗಡೆಲ ಆಯಿನ
ಮಾತ ಎನ್ನವೆ ತಪ್ಪುಗೀಯೆ
ಪ್ರೀತಿದೇ ಸಮೆ ಕೊರ್ದುಲಾಸೀವಾದೊ ಮಲ್ಪಿತ್ತೆ ||

12

ಬದ್ಕೊನುಲ ಪಂಡೊಂದು ಬುಲ್ಪುದು
ತರೆಕ್ ಕೈದೀಡ್ಲಾದ್ ಸಂಜಯೆ
ಪಿದಡಿಯೆನೆ ಅಲ್ಪಡ್ಡಾದ್ ದುಕ್ಕೊಡು ನಡತ್ ನಡತೊಂದು ||
ಗುರು ಕೃಪೆರ್ ಕೃತವರ್ಮನಾಕಲ್
ಎದುರು ತಿಕ್ಕೆರ್ ಅಕಲೆಡಲ ಕೌ
ರವನ ಸಂಗತಿ ಪೂರ ತೆರಿಪದ್ ಪೋಯೆ ದುಮುದುಂಬು ||

13

ಕುರುಪತಿಯೆ ಚಲದಂಕ ಮಲ್ಲೆಂ-
ದೆನಿಪಿ ಕೀರ್ತಿದ ಪುದರ್ದಾಯೆನೆ
ಚಲೊನು ಬುಡುವೆನೊ ಪಾಂಡವೆರೆ ಪಗೆ ಸಂದವಂದೆನೆಲ ||
ಲಡಯಿದಾ ಕಳಟಲ್ಪ ಬೂರುದು
ಕುರಿದ್ ನಾದುನ ಪುಣಕುಲೆನ ಸರಿ
ಗುರುತೊ ಸತ ತೂವಂದೆ ಬತ್ತೆನೆ ಕೆದುತ ಬರಿಕಾಯೆ ||

14

ನಿಲಿಕೆ ನೀರ್ಡ್ ಹಂಸ ಪಕ್ಕಿಲು
ಕುಸಲ್ಡೇ ತಿರ್ಗುನೆನ್ ತೂನಗ
ತನ್ಕ ಇಂಚಿನ ಕುಸಲ್ ಇದ್ಯತ್ತೊಂದು ಗೆರೆತೊಂಡೆ ||
ತೆಲಿನ ನೀರ್ಡ್ ಮೋನೆ ದಕ್ಕಾದ್

ಗುರು ಹಿರಿಯ ಪರದೈವೊ ದೇವೆರೆ
ನೆನಪು ಮಲ್ತೊಂದಾಯೆ ಜಪಿತೆನೆ ಮಂತ್ರೊ ಜಲಸ್ತಂಬೊ ||

15

ನೀರ್ಗ್ ದೀಡಿಯೆ ಕಾರ್ನ್ ಮೊರಂ -
ಪಾಯಿಗಾಂಡ್ಲ ನೀರ್ ಸೊಂಟೊದ
ಆಡೆ ಬತ್ತಾದ್ ತಿಗಳೆ ಕಂಟಿಲ್ ತರೆನೆ ಮುರ್ಕನಗ ||
ಆ ಸುಯೋದನೆ ಕಿರೆತ ಉಲಯಿಡ್
ಆಯೆನೇ ಜಲ ಸ್ತಂಬೊ ಮಂತ್ರೊದ
ಮಾತೆಡಾಯಗ್ ದಮ್ಮು ಕಟ್ಟ್ಪಜಿ ಚಳಿಲ ಆಯ್ತೊ ||

16

ಕೃಪೆನೆ ಅಸ್ತತ್ತಾಮೆನಾಕೃತ -
ವರ್ಮನಾಕಲ್ ಕಿರೆತ ದಂಡೆಡ್
ನಿಲ್ಕ ತೂಯೆರ್ ನೀರ್ಡ್ ಮುಗುಳಿಯೆ ಮಿತ್ತೆ ಲಕ್ಕುನೆನ್ ||
ಕುರುಪತಿನ ಉಸುಲುಂದು ಗ್ರೇಯ್ತಾದ್
ಗುರುಮಗೆನೆ ಕೌರವನ್ ಲೆತ್ತಾದ್
ಬಲಯ ಮಿತ್ತಗ್ ನಿನ್ನ ಮರೈದಿನೆಂಕ್ಲು ಒರಿಪಿಯೆರೆ ||

17

ಪಾಂಡವೆರೆ ಸೇನೆಡನೆ ಕಾದ್ದಾದ್
ಈಶನೇಟದ ನಿನ್ನ ಸೋಲುನು
ಪೂರ್ತಿ ಗೆತ್ತಾದ್ ಬುಡುವೊ ಲಕ್ಕುಲ ಮಿತ್ತಗೀ ಬಲಯ ||
ಯಾನೆ ದಳ ಪತಿಯಾದ್ ಪಾರ್ತನ
ಗೇಲ್ನುಂತವೆ ಬೀಮ ಸೇನನ
ಮಾರಿ ಬಂಜಿನ್ ತಿಗ್ತ್ ಲಕ್ಕವೆ ನಿನ್ನ ಮೆಗ್ಗುನಲ ||

18

ಪನ್ನನೆನ್ ಕೇನೊಂದು ಕೌರವೆ
ಕೆಟ್ಟೆ ನಿಕ್ಲೆನ್ ನಂಬುದೇನೇ
ಎಡ್ಡೆ ಪಾತೆರೊಡಿತ್ತೆ ಪೋಲೆಗೆ ಬೇಕೊ ಅಲ್ಪಡ್ಡಾದ್ ||
ಎಲ್ಲೆ ಕಾಂಡೆನೆ ಮಿತ್ತ ಬತ್ತಾದ್
ಎನ್ನ ಪೌರುಸೊ ನಿಕ್ಲೆ ತೂವರ್
ಪನ್ನಿ ಪಾತೆರೊ ಕೇನ್ಡ್ ಮೂವೆರ್ ತಿರ್ಗೈರಲ್ಪಡ್ಡಾದ್ ||

19

ಪಾಂಡವೆರ್ ಐವೆರ್ಲ ಅಕಲೆನ
ಸೇನೆದಾಕಲೆನೊಟ್ಟು ತಿರ್ಗಾದ್
ನೂದು ಯೋಜನೊ ಉದೊ ಅಗೆಲೊದ ಕಾಳಗೊದ ಕಳಟ್ ||
ನಾಡ್ ನಾಡ್ ರಾಯ ಕೌರವೆ
ಆಂಜಿಚೆನೆ ಪಂಡೊಂದು ಮಾತೆರ್
ವಾಸುದೇವನ ಎದುರು ಉಂತ್ಯೆರ್ ಕೈನ್ ಮುಗಿಯೊಂದು ||

|| ರಡ್ಡನೆದ ಸಂದಿ ||

|| ಭೀಮೆ ಕೌರವನ್ ನಾಡುನ ಅಬ್ಬರೊ ||

ಧರ್ಮ ನಂದನೆ ಕ್ರಿಷ್ಟ ಪಾದೊಗು
ಪುಡಿಯಾಡ್ ಪನ್ನೆ ಶ್ರೀ ಹರಿ
ಯುದ್ಧೊ ನಡತ್‌ದಲಾಂಡ್ ಇನಿಕೇ ದಿನೊನೆ ಪದ್‌ನನ್ನೊ ||
ರಡ್ಡ್ ಕಡೆಟ್‌ಲ ಏತೊ ಸೈತ್ತ್‌ದ್
ಅಮ್ಮೆ ಜೋಕುಲೆಗಿದ್ದಿ ಕಂಡನಿ
ಪೊಣ್ಣಲೆಗ್ ಇದ್ಯಂದೆ ಆಯಿನೆ ಮಾತ್ತೊ ಈ ದಿನೊಟು ||

1

ಕುರುಪತಿಯೆ ತಪ್ಪಾದ್ ಎಂಕ್ಲೆನ
ಲಡಯಿದಾ ತೀರ್ಮಾನೊ ಆಯಿಜೆ
ನನಗ್ ಎಂಚಿನ ಸಾದಿ ಪನ್ನಗ ಕ್ರಿಷ್ಟೆ ತೆಲಿತೊಂದು ||
ದಿನೊನೆ ಸಂದುನ ಪೊರ್ತು ಆಯಗ್
ನನಲ ಉಂಡುಯ ರಡ್ಡ್ ಜಾಮೊನೆ
ಅಪಗ ತಿಕ್ಕುವೆ ಭೀಮ ಕೈಕಾಯೆಂದ್ ಪನ್ನಗನೆ ||

2

ಆ ದುರೈದನನೇನ್ ನಾಡುವೆ
ಓಲುದೆಂಗುವೆ ಅಪ್ಪೆ ಬಂಜಿಡೊ
ಗಾಳಿಡೇ ಬಜವಾದ್ ರಾವೆನೊ ತೂಪೆಯಾನ್‌ಂದ್ ||
ಆರ್ಬಟ್‌ಡೆ ಲೆತ್ತೊಂದು ಪಿದಡಿಯೆ
ನಾಪಗನೆ ಗದೆ ಪುಗೇಲ್‌ಡುಂತದ್
ತೂಯಿನಾಕ್‌ಲ್ ಪಾರೈರಾಯನ ಎದುರು ಉಂತಂದೆ ||

3

ಪುಣತ ರಾಸಿಲೆನಟ್ಟಿ ಮಗತ್‌ದ್
ಅಡಿಟ್ ಉಲ್ಲೆನೊ ಪನ್ನ ತೂಯೆನೆ
ಪೊಲಿನ ರತೊಕುಲೆ ರಾಸಿ ಪದ್‌ರ್‌ದ್ ತೂಯೆನಾಪೆಕ್‌ಡ್ ||
ಕುದುರೆ ಆನೆಲು ಮೇಲ್ ಮೇಲ್‌ಗ್
ಸಯಿತ್‌ದೇ ಬೂರ್‌ದನವೆ ಅಟ್ಟಿಡ್
ಜೆಯಿದೆನೋ ಪಂಡೊಂದು ನಾಡಿಯೆ ಭೀಮೆ ಏವುರೊಡು ||

4

ವೀರ ಬಗದತ್ತನವೆ ಆನೆದ
ಬಾರಿ ಮಲ್ಲವೆ ಬಂಜಿ ದುಲಯಿಡ್
ನೂರು ಕುಲ್ಲುದು ಉಲ್ಲೆನೋ ಆ ಮೂರ್ಕೆ ಪಂಡೊಂದು ||
ಬಾತ್‌ದಿತ್ತನ ಪುಣತ ಬಂಜಿಡ್
ದಾನೊ ಪಂದುನ ತೂದು ಭೀಮೆನೆ
ಮೂಲು ದೆಂಗ್‌ದೆ ಪನ್ನ ಹಾಕಿಯೆ ಗದೆಟ್‌ಲಾ ಪುಣಕ್ ||

5

ನಾಯಿ ಆನೆದ ಕರ್ಲ ತಿನಿಯೆರೆ
ನೂರ್‌ದಿತ್ತದ್ ತಿನ್ನಿ ರಬಸ್‌ಡ್
ಆನೆದವೆ ಮಾ ಬಂಜಿ ಪಂದ್‌ನೆ ಪನ್ನ ತೆರಿಯಂದೆ ||
ಭೀಮೆ ಹಾಕ್‌ನಗಪಗ ನಾಯಿಯೇ
ಪೀಂಕನ್‌ಡೆ ಪಿದಡೊಂದು ಬೊಬ್ಬೆಡ್
ಕುಂಯಿಯಿಂದಪಗ ಪಾರುನ ತೂದು ತೆಲಿತೊಂಡೆ ||

6

ಬೋಂಟೆಗಾರೆರ್ ಭೀಮ ಸೇನಗ್
ಮಾಸೊ ಕೊರೊಡುಂದಕ್‌ಲ್ ಕಾಡ್‌ಡ್
ಮೇರ್ ಜಿಂಕೆಲೆ ಬೋಂಟೆದೇರ್‌ದ್ ಮಾಸೊ ತುಂಬೊಂದು ||
ಕಾಳಗೊದ ಕಳತಾಡೆ ಬನ್ನಗ
ಬಾಜೆಲಾಯಿನೆಟಕ್‌ಲ್ ವೈಸಂ-
ಪಾಯ ಕಿರೆತಾಡೆಗೆನೆ ಬತ್ತದ್ ನೀರ್‌ಗ್ ಜಪ್ಪಿಯೆರೆ ||

7

ತಯರ್ ಮಲ್ಲುನಗಲ್ಲ ಮೂವೆರ್
ಕಿರೆತ ದಂಡೆಡ್ ಉಂತ್‌ನಾಕ್‌ಲ್
ಕುರುಪತಿನೆ ಲೆಪ್ಪುನಗ ಗೊಂತಾದಕ್‌ಲ್ ದೆಂಗಿಯೆರ್ ||
ಅಕ್‌ಲ್ ಏರ್‌ಂದಲ್ಲ ಪಿಂದನ
ಸಬರನಾಕ್‌ಲ್ ಕಿರೆತ ನೀರ್‌ನ್
ಪರ್‌ದ್ ಬನ್ನಗ ಭೀಮೆ ನಾಡೆದೆ ಅರಸು ಕೌರವನ್ ||

8

ಭೀಮಸೇನಗ್ ಪುಡಿಯಾಡ್‌ದ್
ಮಾಸೊನೆದುರುಡು ದೀಡ್ ಪಂಡೆರ್
ಆ ಸುಯೋದನೆ ಉಲ್ಲೆ ವೈಸಂಪಾಯ ಕೆದುತುಲಯಿ ||
ತೂಯೊನೆಂಕುಲು ಗುರುಮಗನ್ ಸರಿ
ಆಯೆ ಲೆಪ್ಪೆದೆ ಮಿತ್ತ ಬರೈರೆ
ತಾನ್ ಬರ್ಪುಜಿ ಪನ್ನ ಕೌರವೆ ನೀರ್ ಉಲಯಿತ್ತೆ ||

9

ಸಬರನಾಕ್‌ಲ್ ಪಂಡಿ ಪಾತೆರೊ
ಕೆಬಿಕ್ ಬೂರ್‌ನ ಸಾತ್‌ಗಪಗನೆ
ಅಕ್‌ಲೆ ಕೈಕೇ ಕೊರೈ ಮುತ್ತುದ ಮಾಲೆ ಕಂಟೆಲ್‌ದ ||
ಬರವಸ್‌ಡ್ ರಣ ಭೀಮೆ ಬತ್ತನೆ
ಹರಿನ್ ನಾಡೊಂದಾಡೆ ಲಾಗಿಡ್
ಅವುಲು ತೂಯೆನೆ ತನ್ನಕ್‌ಲೆನಾ ಒಟ್ಟು ಶ್ರೀ ಹರಿನ್ ||

10

ಸ್ವಾಮಿ ಕೇನ್‌ಲ ಆ ದುರೋದನೆ
ನೀರ್‌ದುಲಯಿಡ್ ಮುರ್ಕುದುಲ್ಲೆಗೆ
ಬೋಂಟಿದಾಕ್‌ಲ್ ಪಂಡರೆನ್ನಡ ಇತ್ತಿ ಸಂಗತಿನೆ ||
ತಾನ್ ವೈಸಂಪಾಯನಾ ಕೆದುಡುದು
ದಾನೆ ಆಂಡಲ ಬರ್ಪುಜಿಂದ್‌ದ್
ದ್ರೋಣರೆನ ಮಗೆ ಲೆಪ್ಪುನಗನೇ ಪನ್ನೆಗೆನೆ ದುಸ್ಸೆ ||

11

ಕೆದುಟು ಮುರ್ಕುದು ಇತ್ತನಾಯನ್
ಒಯ್‌ತ್‌ಲಕ್ಕದ್ ಕೆರ್ದೆ ಪನ್ನಗ
ಯಮನ ಮಗೆ ಧರ್ಮಜೆನೆ ಧರ್ಮೊದ ಸಾರೊಗ್ರೇಯ್ತೊಂದು ||
ಲಡಯಿಡಾಯುದೊ ದಕ್ಕನಾಯನ್
ಸರಣು ಬತ್ತನ ನೀರ್ಡ್ ಮುರ್ಕನ
ಒಯಿರಿನಕ್‌ಲೆನ್ ಕೆರ್ದೆನೆ ಬಲ್ಲಿಂದ್ ಉಂಡತ್ತೊ ||

12

ದಾನೆ ಮಲ್ಪುನೆ ಸಾಸ್ತೊ ಮೀರ್‌ದ್
ಆಯನಿನಿ ಕೆರ್ಪನೆನೊ ಪನ್ನಗ
ಮೂರ್ಕ ದುಸ್ಸ ಪಟಿಂಗನೇಪೊಲ ಕೆರೊಲಿ ಪಂಡೊಂದು ||
ವಾಸುದೇವೆನೆ ಭೀಮ ಸೇನನ
ಮೋನೆ ತೂನಗ ಪಂಡೆ ಧರ್ಮಜೆ
ಪೋದು ಆಯನ್ ಮಿತ್ತಲೆಪ್ಪುಗೊ ರಾಜ ಮರ್ಯದಿಡ್ ||

13

ಆವು ಪಂಡ್‌ದ್ ಕೊಂಬು ವಾದ್ಯೊಡು
ಪಾಂಡವೆರ್ ಐವೆರ್‌ಲ ಕ್ರಿಷ್ಣನ್
ಕೂಟೊನುಂದೇ ಪೋದು ವೈಸಂಪಾಯ ಕೆದುತೌಲು ||
ಸಾಲ್‌ಡುಂತುದು ತೂನಗಾಪಗ
ನೀರ್ಡ್ ಪಕ್ಕಿಲು ಮುರ್ಕು ಲಕ್ಕದ್
ಕೌರವೆನೆ ಉಲ್ಲೆಂದ್ ತೋಜವಿ ನಮುನೆಡವು ಮುರ್ಕೊ ||

14

ಲೆಪ್ಪುನೆನೆ ಏರೇರ್ ಪನ್ನಗ
ಒರೊಯ್ಯೆ ಲೆತ್ತೊನುಗೊ ಪಂಡ್‌ದ್
ಕ್ರಿಷ್ಣನಕ್‌ಲೆಗ್ ತೆರಿಪದಾನಗ ಆವು ಪಂಡೊಂದು ||
ಕಲ್ ಕಟ್ಟನ ಕಿರೆತ ದಂಡೆಡ್
ಧರ್ಮಜನ ಒಟ್ಟಿಗೆನೆ ಮಾತೆರ್
ಲೆಪ್ಪುನಟ್ಟನೆಗಲ್ಲ ಉಂತ್ಯೆರ್ ಕೆದುನೆ ತೂವೊಂದು ||

||ಭೀಮನ ಲೆಪ್ಪುಗು ಕೌರವೆ ಲಕ್ಕೆ ||

ಹರಿನ ಒಪ್ಪಿಗೆ ಪಡೆದ್ ಲೆಪ್ಪೆರೆ
ಸುರುಕು ಸಹದೇವೆನೆಲ ಕೆದುತವೆ
ಬರಿಟ್ ಉಂತುದು ಲೆತ್ತೆ ಕೌರವ ಕುರುಕುಲೇಸಂದ್ ||
ಕುರು ಕುಟುಂಬೊಡು ಪುಟ್ಟನಾಯೆನೆ
ಕಿರೆಟ್ ಮುರ್ಕುದು ದೆಂಗ್‌ದುಂತುನೆ
ಸರಿಯೊ ವಂಸೊದ ಮಾನೊ ದೆತ್ತನೆ ಲಕ್ಕೆ ಬಲ ಮಿತ್ತೆ ||

1

ಉತ್ತರೊನೆ ತಿಕ್ಕಜಿಲ ಲೆಪ್ಪುಗು
ಮಿತ್ತೆ ಬತ್ತಜೆ ಪನ್ನ ನಕುಲೆನೆ
ಲಕ್ಕೆ ಲಕ್ಕಲ ದುಸ್ಸ ನಿನ್ನವೆ ಚಲೊಕು ಮರ್ದಿಡ್ ||
ಪನ್ನದನೆ ಆ ಚಲೊನೆ ಓಂಡುಯ
ಮುರ್ಕನೆಟ್ ಚಂಡ್ಯಾದ್ ಪೋಂಡೊಯ
ನಿನ್ನ ಮೋನೆಡ್ ಚೋಲಿ ಉಂಡುಡ ಬೇಕೊ ಬಲ ಮಿತ್ತೆ ||

2

ದಾಲ ಪಂದ್‌ಜಿ ನೀರ್‌ಲಪಗನೆ
ಪಾರ್ತೆ ಬಿರು ಬೀಜಾದ್ ಲೆತ್ತೆನೆ
ಓ ದುರೋದನ ಯಾನೆ ಲೆಪ್ಪುನೆ ಕರ್ಣನಾ ಪುಣನ್ ||
ಮೀಪಯೆರೆ ಈ ಬೋಡು ಪಂಡ್‌ದ್
ಕಾಪುವೆರ್ ನಿನನಿತ್ತೆ ಬತ್ತಡ
ಆಯನವೆ ಗತಿ ತೋಜವೆಂದ್‌ದ್ ದೆಂಗ್‌ದುಲ್ಲನಯ |

3

ಆಣ್ ಮಗೆ ಈ ಅತ್ತೊ ಪೊಣ್ಣನ
ಜಾತಿದಾಯೆನೊ ನೀರ್ಡ್ ದೆಂಗುನ
ಏರ್ ಕಲ್ಪಯಿ ವಿದ್ಯೆ ಪಂಡ್‌ದ್ ಎಂಕ್ ತೆರಿಪಾಲ ||
ಆಂಡಲಾ ಕುರುವೀರೆ ಬತ್ತಜೆ
ಮೇಲ್ ಪಂಡ್‌ದ್ ಹರಿಯೆ ಲೆತ್ತೆದ್
ಪಾಂಡವೆರೆನಾ ರಚ್ಚಕೆನೆ ಯಾನತ್ತೊ ಲೆಪ್ಪುನಯೆ ||

4

ನಿನ್ನವೇ ಸಬೆಕೇನ್ ಬತ್ತದ್
ಕೊರ್ದ ಅಕ್‌ಲೆಗ್ ಐನ್ ಗ್ರಾಮೊನು
ಪನ್ನ ಕೇನ್ನಗ ಎನನ್ ಕಟ್ಟಿರೆ ಪನ್ನನಾಯೆನೆಲ ||
ಮುರುದೇ ಪತ್ತೊಂದು ಉಲ್ಲನ
ಹಸ್ತಿನಾವತಿಡಿತ್ತಿ ಗ್ರಾಮೊಲೆ
ನಿತ್ತೆ ಪಂಡ್‌ದ್ ತಮಸ್ ಮಲೆನೆ ಕ್ರಿಷ್ಣ ಲೆಪ್ಪುನಗ ||

5

ಭೀಮಗೇ ಕಣ್ಣೊತ್ಯೆ ಕ್ರಿಷ್ಟೆನೆ
ಯಾನ್ ಲೆಪ್ಪನೆ ಕಡೆಕ್ ಅಣ್ಣೆನೆ
ನೀತಿ ಧರ್ಮೊನು ಪನ್ದ ಲೆಪ್ಪನಗಪಗ ಬತ್ತಜೆಡ ||
ಆಯನೇನೇ ಮಿತ್ತ ಒಯ್ದಾದ್
ಕಾರ್ಡ್ ಪತ್ತಾದ್ ನೆಲಕ್ ಹಾಕುವೆ
ಈತ್ ಪನ್ನಗ ಧರ್ಮಂದನೆ ಲೆತ್ತೆ ಕೌರವನ್ ||

6

ನಮ್ಮ ಕುಟುಮೊದ ಮಾನೊ ಮರ್ದಿದಿ
ದೆಪ್ಪುವನ ಈ ಎನ್ನ ಮೆಗ್ಗನೆ
ಅತ್ತೊ ರಾಜ್ಯೊನು ಈಯೆ ಆಳ್ ಮಿತ್ತ ಬಲಬೇಕೊ ||
ಇತ್ತೆ ನಮೊ ನಮೊ ರಾಜಿಯಾದೇ
ಕ್ರಿಷ್ಟನೆದುರುಡು ಲಡಯಿನಂತಗೊ
ಸೈತ್ತನಕಲೆಗ್ ಸಾವು ಮಲ್ಪುಗೊ ಪ್ರೇತೊ ಬುಡ್ಪಾಗೊ ||

7

ನಿನ್ನವೇ ಅಪ್ಪೆಮ್ಮನಾಕ್ಲ್
ಮೆಗ್ಗನಕಲೆನ ಬುಡೆದಿಯಲ್ಲು
ನುಪ್ಪು ನೀರ್ನ್ ಬುಡುದು ಉಲ್ಲೆರ್ ಬಾನುಮತಿನೊಟ್ಟು ||
ಮಿತ್ತ ಬತ್ತಡ ಒರಿಯೆ ಆಂಡಲ
ಉಲ್ಲ ಪಂಡ್ ಮನಸ್ಡಾಕ್ಲ್
ಮಲ್ಪೆರ್ಯ ಸಮದಾನೊ ಬಲ ಬಲ ಈಡೆ ನೀರ್ಡ್ಡ ||

8

ಆಯ ನುಸುಲುದ ಮುಗುಳಿ ಮಾತ್ತೊನೆ
ನೀರ್ಡಾಂಜಿನೆನತ್ತೊ ಮೇಲ್ಗ್
ಪಾಂಚೆನೆ ಮೀಂದೊಂದು ಪಂಡ್ ಭೀಮೆನಬ್ಬರೊಡು ||
ಆರ್ಬಟೆನ್ ಕೊರ್ಡಾದ್ ಲೆತ್ತೆನೆ
ಮೂಜಿ ಕಾಸ್ ದ ನಾಯಿ ಅರಸುಲೆ
ಮಾನೊ ದೆತ್ತನ ಪೊಡಸ್ ಮಿತ್ತಗ್ ಬೇಕೊ ಬಲ ಈಡೆ ||

9

ಇಸೊತ ಲಾಡನ್ ಕೈಟ್ ಪತೊನುಯ
ಜುಗರಿ ಗೊಬ್ಬೆರೆ ಮಂಡೊ ಬುಡ್ವಲ
ಬುಡೆದಿ ದ್ರಾಪದಿ ಸೀರೆನೊಯ್ವಲ ತುಡೆನ್ ಬೊಟ್ಟುಲಯ ||
ಬಲಯ ಮಿತ್ತಗ್ ನೀರ್ಡೊಲ್ಲೆದ
ಲೆಕೊನೆ ದೆಂಗ್ ದಾಯೆ ಕುಲ್ಲೆದ
ಚಲೊಕು ಮರ್ದಿದ್ ಗ್ರೇಯ್ನ ಎನಡನೇ ಉಂಡು ||

10

ನಿನ್ನವೇ ಮೆಗಿ ಎನ್ನ ಬಂಜೆಡ್
ಉಲ್ಲೆ ನಿನ್ನನ್ ಕಾಪ್ಪೆ ಬಲ ಬಲ

ಮೆಗ್ಗನಕಲೆನ ಬುಡೆದಿಯಲ್ಲೆಗ್ ಮಯ್ಯು ಬುಡುದಾರೆ ||
ಬತ್ತಜಡ ಪೋವೆಂದ್ ಗಿರೆಪಡ
ಜತ್ತದೇ ಮಿತ್ತೊಯ್ವೆ ನಿನ್ನನ್
ಕೊಚ್ಚಿ ಕೊಚ್ಚಿದ್ ಬೂತೊಗಗಲ್ ಯಾನ್ ಬಲಸುವೆಯಾ

11

ನೀರ್ನಾಜದ್ ಕಡುನು ಪಾಡ್ಡದ್
ಮೀನ್ ಪತ್ತುನ ಲೆಕೊನೆ ನಿನ್ನನ್
ಗೋರು ಗೋರುದು ಮಿತ್ತ ದಕ್ಕುವೆನ್ನ ಗದೆಟಿತ್ತೆ ||
ಓ ಸುಯೋದನ ಈಯೆನಾ ದ್ರಾತ-
ರಾಸ್ತಗೇ ಪುಟ್ಟನಯೆ ಅಂದ್ಡ
ಬೇಕೊ ಬಲ ಬಲ ಕಂಡ್ರ ಕುಟ್ಟಿಂದಿತ್ತೆ ಪನ್ನವಡ ||

12

ಬೀಮ ಪಾತೆರೊ ಕೇನ್ಡ ಕೌರವ -
ಗಾಂಡ್ ಕೋಪೊದ ಬೆಚ್ಚ ಸೈರೊಡು
ಆಯನುಸುಲುಡು ಕಿರೆತ ನೀರೇ ಕೊದಿಪಿಲೆಕ್ಕಾಂಡ್ ||
ಬಾಯಿದಾ ಜಲಮಂತ್ರೊ ಮರತ್ದ -
ಲಾನಗನೆ ಸರಿ ದಮ್ಮು ಬುಡಿಯೆರೆ
ತೀರ್ವಿಲಾಪಗ ಮಿತ್ತ ಬತ್ತೆನೆ ಭೀಮ ಭೀಮಂದ್ ||

13

ಲೆತ್ತೊನುಂದೇ ಗದೆನ್ ಬೀಜದ್
ಧರ್ಮಜೆನೆ ಎದುರುಂತು ಪಾರ್ತೆಲ
ಬಿಲ್ಲ ಪತ್ತಲ ನಕುಲ ಸಹದೇವಾದಿ ವೀರೆರ್ಲ ||
ಒಟ್ಟುಗೇ ಎದುರುಂತಿ ಕ್ರಿಷ್ಟೆನೆ
ಚಕ್ಕೊ ಪತ್ತಲ ಪನ್ದ ಕೌರವೆ
ಅಟ್ಟಸ್ಡ ಗದೆ ಬೀಜದಾನಗ ಪನ್ನೆ ಧರ್ಮಜೆನೆ ||

14

ಮೆಗಿಯ ನಿನ್ನವೆ ದೈರೊನೇರ್ಲ
ಪುಗರುವೆರ್ ಕುರು ವಂಸೊಗೀಯೇ
ಪುದರ್ ಕೀರ್ತಿನ್ ಕನತ ಎಂಕ್ಲೆಗ್ ಎದುರು ಉಂತ್ನೆಟ್ ||
ನಿನಡ ಒರ್ಮಡ ಮಾತೆರೆಂಕುಲು
ಲಡಯಿ ಮಲ್ಪುನ ಸರಿಯೊ ನಿಕ್ಕೇ
ಎದುರು ಉಂತ್ಯೆರೆ ಏರ್ ಪನ್ನಯ ಎಂಕ್ಲೆ ಪೈಕಿಡ್ಲ ||

15

ಈಯೆ ಲಡಯಿಗ್ ಎಂಕ್ ಸಮೊತಯೆ
ಏಪೊಗುಲ ಅತ್ತಿತ್ತೆ ಪಾರ್ತೆನೆ
ದೂರೊ ಉಂತುದು ಬಾಣೊ ರಾಪವೆ ಗದೆನ್ ಪತ್ತಿಯೆರೆ ||
ತೀರ್ವೊ ಆಯಗ್ ನಕುಲ ಸಹದೇ -
ವಾದಿಗುಳು ಎಲ್ಯಕ್ಲ್ ಅಕಲೆಡ
ಕಾಳಗೊನೊ ಪನ್ ಭೀಮ ಮಾತ್ತೊನೆ ಎಂಕ್ ಸರಿತಾಯೆ ||

16

ಆಯೆ ತುಡೆ ಪೊಲಿಪೆಂದ್ ಆಜೊನು
ಪಾಡ್ ಪನ್ನೆ ಆರ್ಣ ಪನ್ನುನ
ಕೀರ್ಡಿತ್ತನ ಬೀಮೆ ಬರಡ್‌ಯ ಎದುರು ಪನ್ನಗನೆ ||
ಆವು ಪಂಡ್‌ದ್ ಕೌರವೇಂದ್ರಗ್
ಮಾಪಿಯೆರೆ ಪೊಸ ಕುಂಟು ಮೆಯಿಕ್‌ಲ
ಪೂಜಿಯೆರೆ ಕಮ್ಮೆನೊದ ಗಂದೊನು ಕೊರ್ಯೆ ತರ್ಪಾದ್ ||

|| ಗದಾಯುದ್ಧೊ ||

ಎದುರೆದುರು ಉಂತಿಯೆರ್ ಲಡಯಿಗ್
ಕುರುಪತಿಲ ಭೀಮನೆಲ ಕರ್ಪುರೊ -
ನಗಿದ್ ಪುಗಲ್‌ಡ್ ಗದನ್ ದೀಡ್‌ದ್ ಕಣ್ಣ್ ಮಗ್ತರ್‌ದ್ ||
ಒರಿಯನೊರ್ಯನ್ ತೂದು ಉಂತ್‌ನ -
ಗಪಗ ಸೇರ್ಯೆರ್ ರಡ್ಡ್ ಕಡೆತವೆ
ಜನೊಕುಲಾಡೆಗ್ ಮೂವೆರಿತ್ತೆರ್ ಕೌರವನ ಕಡೆಟ್ ||

1

ಪಾಂಡವೆರೆ ಕಡೆಟತ್ತೆರೇತ್‌ಲ
ವೀರನಾಕ್‌ಲ್ ಕ್ರಿಷ್ಟೆ ಧರ್ಮಜೆ
ಪಾರ್ತಲಾ ಸಹದೇವ ನಕುಲೆರ್ ತೂಯೆರುಂತಿಯೆರ್ ||
ಆತ್ ಪೊರ್ತುಗು ಸೀರ್ತೊ ಮೀಯೆರೆ
ಪೋಯಿನಾ ಬಲಬದ್ದನಾಡೆಗ್
ಪಾರ್ ಬತ್ತದ್ ತೂಯೆನಿರ್ದೆರ್ ಲಡಯಿಗುಂತ್‌ನೆನ್ ||

2

ಕ್ರಿಷ್ಟೆ ವಂದನೆ ಮಲ್ಲುನಾಪಗ
ನಿನ್ನ ಸೀಂತ್ರಿಡ್ ಲಗಡಿ ದೆತ್ತನೆ
ಎನ್ನ ಸಿಸ್ಯನ್ ಕೌರವೇಂದ್ರನ್ ದಾನೆ ಪನೊಡೇನ್ ||
ಪೊದ್ದೆರೆನ್ ಬದ್‌ಕಾಯ ಪಾಂಡವೆ -
ರೊರೈರತ್ತೊಯ ಎನಡ ಲಡಯಿಗ್
ಇತ್ತೆನೇ ತಯರಾವಡ್‌ಂದ್‌ದ್ ಪತ್ತೆನಾಯುದೊನು ||

3

ಅಣ್ಣ ಎನ್ನವು ಸೀಂತ್ರಿ ಪಂಡ್‌ದ್
ತಪ್ಪು ಗಿರೆಪಡ ಆಯೆ ಮಲ್ತನ
ದುಸ್ಸ ಕರ್ಮನೆ ಲಗಡಿ ದೆತ್ತನೆ ನಿಕ್ಯ ಪನ್ನೇನ್ ||
ತಿನ್ನಯೆನೆ ಇಸೊ ಅರಕ್‌ದಿಲ್ಲನ್
ಪೊತ್ತಯೆನೆ ಕಳು ಕಪಟೊ ಪಗಡೆನ್
ಗೊಬ್ಬಯೆನೆ ಪಾಂಡವೆರೆ ರಾಜ್ಯೊನು ಉಲಯಿ ಪಾಡಿಯೆನೆ ||

4

ಮನೆತನೊಕು ಅಡ್ ಬತ್ತಿ ಪೊಣ್ಣನ
ತುಡೆಕ್ ಸೊಂಟೊಗು ತುತ್ತಿ ಸೀರೆನ್
ಒಯಿಪಯಿನ ಮಹ ಮೂರ್ಕ ಬೂಮಿಡ್ ಬದುಕುನೆಂಚಾಯೆ ||
ಯದುಕುಲೊತ ಮರ್ಯಾದಿ ದೆಪ್ಪಡ
ಕುರುಪತಿನ ಕಡೆಟೇಯೆ ಉಂತುದು
ಲಡಯಿ ಮಲ್ತದ್ ಪನ್ದಲಾ ಹರಿ ಮಲ್ತೆ ಸಮದಾನೊ ||

5

ಧರ್ಮೊ ಯುದ್ಧೊಡೆ ಏರ್‌ಲಾಂಡಲ
ಗೆಲ್ಲುಲೆಕೊ ಈ ಮಲ್ಲು ಪಂಡ್‌ದ್
ಅಲ್ತ್ ದ್ವಾರಕೆಗೆತ್ತೆನಾ ಬಲಭದ್ರೆ ನಡತೊಂದು ||
ಕ್ರಿಷ್ಟೆ ಪಂಡೆನೆ ಕೌರವನ ತುಡೆ -
ಕಿತ್ತೆ ಹಾಕೈರೆ ಬಲ್ಲಿ ಭೀಮನೆ
ಬಕ್ಕೊ ಭೀಮನ ತರೆಕ್ ಹಾಕೈರೆ ಬಲ್ಲಿ ಕೌರವೆಲ ||

6

ಧರ್ಮೊ ಯುದ್ಧೊದ ನೀತಿನಕ್‌ಲೆಗ್
ಪನ್ದಲಾಯನ ಪಾಂಚಜನ್ಯೊನು
ಗಟ್ಟಿಡುರಿಪುನಗಕ್‌ಲ್ ತೂಯೆರ್ ಕಣ್ಣ್ ಮಲೆವೊಂದು ||
ಒರೈನೊರ್ಯನ್ ನೆರ್‌ದ್ ದೂರುದು
ಹಲ್ಕಿ ಮಲೊಂದಕ್‌ಲ್ ಗದನೆಲ
ದೆರ್ತ್ ಪತ್ತೆರ್ ಗದಕ್ ಗದೆಟೇ ಹಾಕ್‌ದುಂತಿಯೆರ್ ||

7

ತರೆಕ್ ತಿಗಲೆಗ್ ಬೆರಿಕ್ ಸೊಂಟೊಗು
ಗದನ್ ಬೀಜದ್ ಹಾಕ್‌ನಾಪಗ
ಮಯಿಕ್ ಪೆಟ್ಟಾವಂದ್‌ನಂಚೆನೆ ಗದೆಟೆ ತಲಿಪೆದೆರ್ ||
ಗದೆ ಗದೆಟ್ ಹಾಕ್‌ನಗ ಸೂತವೆ
ಕಿಟಿಯೆ ರಟ್ತ್‌ದ್ ತುತ್ತನೈತೊಡು
ಗೆಣಿಪಿಯೆರೆ ತೀರಂದ್‌ನಾತ್‌ಲ ಆಂಡ್ ಒಟ್ಟೊಟ್ಟೆ ||

|| ಕೌರವೆ ತುಡೆ ತುಂಡಾದ್ ಬೂರ್ಯೆ ||

ಬಚ್ಚೆಲ್‌ಗ್ ಕರ್ಪುರೊನು ಅಗ್ಗಿದ್
ಇರ್ದೆರ್‌ಲ ಹಾಕೊಂದು ಪುಣೆಯೆರ್
ಒರೈನಾಂಡಲ ಪೆಟ್ಟೆ ತಾಗ್‌ಜಿ ವೈರಿನಾ ಮೆಯಿಕ್ ||
ತಿರ್ಗ್ ತಿರ್ಗ್‌ದ್ ಕುಲ್ಲುದುಂತುದು
ತನ್ನವೇ ಮೊರಂಪೂರ್ಡು ಹಾಕೈರ್
ದತ್ತ ಬಲತಗ್ ಗದನ್ ತಿರ್ಗಾವೊಂದು ಸೇಂಕೊಂದು ||

1

ಜಾಮೊ ಒಂಜಿಯೆ ಕರಿಡ್ ಆಂಡಲ
ಸೋಲು ಗೇಲ್‌ಲ ತೆರಿಜಿ ಮುಕುಲೆನ
ಕಾಳಗೊಡು ಸರಿ ಸುತ್ತುಡುಂತುದು ತೂಪುನಾಕಲೆಗ್ ||
ಏರ್ ಗೆಲ್ಲುವೆರೆನ್ನಿ ಏವುರೋ -
ಡಾಕಲೆಗ್ ಬೊಡಿದಾಂಡ್ ತೂದೇ
ಆ ದುರ್ರೋದನ ತರೆಟ್ ಸೀಂತ್ರಿದ ಬುದ್ಧಿ ಉಂಡಾಂಡ್ ||

2

ನೆರ್ಡ್ ಭೀಮನ ಅಪ್ಪೆ ಕುಂತಿಗ್
ಪಿಲೆನ್ ಪಂಡ್ ಭೀಮ ಮನಸ್‌ಗ್
ಎತೆನ್ ಕುಲ್ಲದ್ ಒಂಜಿ ಹಾಕಿಯೆ ತರೆಕ್‌ಲಾಪಗನೆ ||
ತರೆನೆ ತಿರ್ಗದ್ ಆಂಡ್ ಭೀಮನ
ಉಸುಲು ಮಿತ್ತಾವೊಂದು ಬೂರಿಯೆ
ಕಳಟ್ ಸಿವ ಸಿವ ಪನ್ದ ನುಕ್ಯೆರ್ ಧರ್ಮಜಾದಿಗುಳು ||

3

ಬೀಮನುಸುಲೇ ಬಂದ್ ಆದಲ್
ಕಾರ್ ಕೈ ಚೊಳ್ಳಾದ್ ಸೈತ್‌ನ
ಮಾತ ಲಚ್ಚಣೊ ತೋಜಿದಾನಗ ಬುಲೆ ಧರ್ಮಜೆನೆ ||
ಪಾರ್ತೆ ಕಣ್ಣೆಡೆ ನೀರ್ ಜಪುಡಯೆ
ಆ ನಕುಲ ಸಹದೇವನಾಕ್‌ಲ್
ಏತ್‌ಲಾ ಬುಲೊಂದು ದುಕ್ಕೊಡು ಮುರ್ರೊ ದೀಡಿಯೆರ್ ||

4

ಸೈತ್ತೆನೇ ಭೀಮೆಂದ್ ಕೌರವೆ
ಕಿಡ್ಲಲ್‌ಡ್ ಗದೆ ದೀಡ್ಡ್ ನಲಿತೆನೆ
ಸೊರೊದಾಕ್‌ಲ್ ಪನ್ನೆ ಜಯೊ ಜಯೊ ಕೌರವೆಸ್ವರ್ಗ್ ||
ಧರ್ಮಜೆನೆ ನನ ಕಾಡ್ಗ ಪೋಲಯ
ಚಕ್ರವರ್ತಿಯೆ ಯಾನ್‌ಲಾಯೆನೆ
ನಿಕ್ಕ್ ಎಂಚಿನ ಹಕ್ಕ್ ರಾಜ್ಯೊಡು ನಡಪು ಮುಲ್ಪಡ್ಡ್ ||

5

ಕುರುಪತಿನ ಕೋಡಂಗಿ ನಲಿಕೆನ್
ಮುರಹರೆನೆ ತೂವೊಂದು ಮನಸ್‌ಡ್
ಮುಗುರು ತೆಲಿಕೆಡ್ ಭೀಮ ಕೈತಡೆ ಬತ್ತದಾಪಗನೆ ||
ತಿಗಲೆನೊತ್ತುದು ಉಸುಲು ಬರ್ಪದ್
ನಿಕ್‌ಲ್ ಬುಲ್ಪಡೆ ಭೀಮ ಸೈತ್‌ಜೆ
ಬುಲದ್ ಕಣ್ಣೆನ್ ತೂಪೆ ಪನ್ನಗ ಆಂಡ್ ಸಂತೋಸು ||

6

ಗಾಳಿ ಪಾಡ್ಯೆರ್ ಮೆಗ್ಯನಾಕ್‌ಲ್
ಸೀರ್ತೊ ಪರ್ಪದ್ ಧರ್ಮನಂದನೆ

ಈಡ್ ಕಟ್ಟದ್ ದೀಡ್ಯೆ ನಂಬುನ ದೈವೊ ದೇವೆರೆಗ್ ||
ಭೀಮೆ ಲಕ್ಕದ್ ಕುಲೈ ಕೌರವೆ
ಹಾಕ್‌ನಯೆ ಓಲುಲ್ಲೆ ಪಂಡ್‌ದ್
ಬೂಮಿ ತೂಕೊದ ಗದನ್ ಪುಗೇಲ್‌ಡ್ ದೀಡ್ಡ್ ಲಕ್‌ದುಂತ್ಯೆ ||

7

ನ್ಯಾಯೊ ತತ್ತದ್ ನಿನ್ನ ತರೆಕೇ
ಹಾಕೈನಾ ಕೌರವೆನೆ ನಿಕ್ಕಲ
ನ್ಯಾಯೊ ಬೋಡುಂದಿದ್ದಿ ಹಾಕ್‌ಲ ಪಂಡೆ ಶ್ರೀ ಕ್ರಿಷ್ಣೆ ||
ಓ ದುರ್ರೋದನ ಬಲಯ ಕಳಕೇ
ಕಾಳಗೊನು ಮಲ್ಪುಗೊಯ ಎನ್ನವೆ
ಕಾಲ ಬೈರವ ನಾಟ್ಯೊ ತೂಪವೆ ಪನ್ದ ಲೆಪ್ಪುನಗ ||

8

ಕುರುಪತಿಯೊ ಜಾರುನಯೆ ಭೀಮಡ
ಲಡಯಿ ಮಲ್ಲೆರೆ ಬದುಕುನಾಸೆನೆ
ಬುಡುದು ಗದೆ ಬೀಜೊಂದು ಎದುರುಡು ಉಂತ್ಯೆ ಕಾಳಗೊಗು ||
ಹರಿಯೆ ಎನ್ನನ್ ಲಗಡಿ ದೆಪ್ಪೆರೆ
ಪುಣೆಪುನೆನ್ ಯಾನಿತ್ತೆ ತೂಯೆನೆ
ಕಡತ ಕಾಳಗೊ ಪನ್ದ ನೆನೆತ್‌ದ್ ಗದೆಟ್ ಹಾಕಿಯೆನೆ ||

9

ಪೆಟ್ಟೆ ತಪ್ಪದ್ ಭೀಮ ಸೇನೆನೆ
ದುಸ್ಸು ನಿನ್ನನ್ ದೀಡಯೆಂದ್‌ದ್
ಪೆಟ್ಟೆ ಪಾಡಿಯೆ ತುಡೆಕ್ ಜೂವೊದ ಎಕ್ಕ್ ಇತ್ತಾನಡೆ ||
ತನ್ನ ತುಡೆ ಪೊಲಿದಾನಗಾಯೆನೆ
ದಿಡ್ಡ ಬೂರಿಯೆ ಕಳಟ್‌ಲಾಪಗ
ಅಸ್ವತ್ತಾಮೆಲ ಕೃಪೆರ್ ಕೃತವರ್ಮಾದಿಗುಳು ಕೈಟ್ ||

10

ತಾಂಗ್ ತಾಂಗ್‌ದ್ ಕಳಟ್ ಜೆಪುಡದ್
ಗಾಳಿ ಪಾಡ್ಯೆರ್ ಮಂತ್ರೊ ಮಲ್ಲೆರ್
ನೀರ್ ಪರ್ಪಯೆರಾಂಡಲಾ ಕುರುವೀರೆ ಲಕ್ಕಜೆನೆ ||
ಓ ಮುರಾಂತಕ ನಿಕ್ಕ್ ಲಡಯಿದ
ಬೂಳ್ಳೊ ಕೊರ್ನಗ ಯಾನ್ ಪನ್ತನ
ಪಾತೆರೊನು ಈ ನೆಂಪು ಮಲ್ತದ್ ಮೋಕ್ಷೊನೊದಗಾಲ ||

11

ಸಿಪ್ಪಿ ಸಿತಿಲಯೊ ಪನ್ನಿ ಲೀಲೆದ
ನಿನ್ನ ನಾಟಕೊಗೆನ್ನ ಏಸೊನೆ
ತಕ್ಕ ಮಟ್ಟಡ್ ಆಂಡೊ ಪನ್ ಪನ್ ದೇವ ಶ್ರೀ ಕ್ರಿಷ್ಣೆ ||
ಪನ್ನಿ ಪಾತೆರೊ ಕೇನ್ದ್ ಶ್ರೀ ಹರಿ
ತನ್ನವೇ ನಿಜೊರೂಪೊ ತೋಜದ್
ಕೈತ್ತಲುಂತ್‌ನ ತೂದು ಕೌರವೆ ಮಲ್ಲೆ ಹರಿದ್ಯಾನೊ ||

12

ಮಾತೆರೆಗ್ ಬೇಜಾರೊ ಆನಗ್
ಓ ಸುಯೋದನ ಇನಿತ ರಾತ್ರಡ್
ಪಾಂಡವೆರೆ ತರೆ ಕಡ್ಡದೇ ನಿನ ಎದುರು ದೀಡ್ಡೇಟಿ ||
ಪ್ರಾಣೊ ಪೋವಂದೊರಿಯಡ್ಂದಾದ್
ದ್ರೋಣನಾ ಮಗೆ ಪರಕೆ ಪಂಡ್ಡಾದ್
ಪಾರ್ಡ್ ಪೋನಗ ಆಂಡ್ ಕತ್ತಲೆ ಸೂರ್ಯ ಬೊಲ್ಪಿದ್ ||

13

ಕುರುಪತಿನ ರಚ್ಚಣೆಗ್ ಸೇನೆನ್
ತಯರ್ಡುಂತದ್ ಧರ್ಮ ನಂದನೆ
ಸಿಬಿರೊದುಲಯಿಗ್ ಮೆಗೈನಕಾಲೆನ ಒಟ್ಟು ಸೇರೊಂಡೆ ||
ಹರಿನ್ ಕೊಂಡಾಡೊಂದು ಮಾತೆರ್
ಲಡಯಿದವೆ ಸರಿ ಸುದ್ದಿ ಪಂಡ್ಡಾದ್
ತೆರಿಪಯೆರ್ ಉಲಯಿತ್ತಿ ದ್ರೌಪದಿ ದೇವಿಗಾಪಗನೆ ||

14

ಸೈತ್ತನೋ ಕೌರವೆನೆ ಪಂಡ್ಡಾದ್
ಪರೈಲಪಗನೆ ಪೇರ್ ಬಂಜರೊ
ಕ್ರಿಷ್ಣ ಪಾದೊಗು ಅಡ್ಡೊ ಬೂರುದು ತೆಲಿಕೆ ತೆಲಿತೊಂದು ||
ಎನ್ನ ಮಾನೊನು ಒರಿತನಯೆ ನಿನ
ಲೆಕ್ಕೊ ಇತ್ತನ ಅಣ್ಣನಾಕಲ್
ಪೋಣ್ಣ ಪೊಂಜೊವೆಗುಪ್ಪಡ್ಂದಾದ್ ಪರಕೆನೊಪ್ಪಯಲ್ ||

|| ಕೌರವನ ಮರಣೊ ||

ದ್ರೋಣನಾ ಮಗೆ ಆ ನಡೀರ್ಲಡ್
ಪಾಂಡವೆರೆ ಸಿಬಿರೊದವೆ ಉಲಯಿಗ್
ಕಾಪುನಕಾಲೆನ್ ಕೆರ್ಡ್ ಪೊಗ್ಗಿಯೆನಾಪೆಕೀಪೆಕೆಡೆ ||
ಪಾಂಡವೆರ್ ಓಲುಲ್ಲೆರಂದಾದ್
ನಾಡ್ ನಾಡ್ಡಾದ್ ತೆನ್ನಯಿದ ಪುಡೆ -
ಕಾಯೆ ಬತ್ತದ್ ತೂನಗವುಲೇ ಸಾಲ್ಡೈವೆರಲ ||

1

ಮೋನೆಗೇ ಗುಡಿ ಪಾಡ್ಡ್ ನಿಡೆರ್ನ
ತೂದು ಪಾಂಡವೆರಂದ್ ಗ್ರೇಯಿತೆ
ಆಕಾಲೆನ ತರೆ ಕಡ್ಡದೊಗ್ಗಿನ್ ಪಾಡೈ ಜುಟ್ಟುಡೆನೆ ||
ಏರೆಗಲ ಗೊಂತಾಯ್ ನಿಡೆರೆಡ್
ದ್ರೋಪದಿನ ಬಾಲೆಲೆನ ತರೆನೇ
ಆಯೆ ಕಡ್ಡದ್ ಐನ್ ತರೆಕುಲೆ ಒಗ್ಗಿ ನೇಲೊಂದು ||

2

ಪರಡ್ ಪರಡ್ಡಾದ್ ಪಿದಯಿ ಬತ್ತದ್
ಪುಣಕುಲೆನ ರಾಸಿಲೆನ್ ಕಡ್ಡದ್
ಕುರುಪತಿಯೆ ಬೂರಾಡೆ ಬನ್ನಗ ಸೂರ್ಯ ಮೂಡಿಯೆನೆ ||
ಕಯಿತ ಒಗ್ಗಿನ್ ಜಾದ್ ಕೌರವ-
ನೆದುರು ದೀಡ್ಡದ್ ಮೆಲ್ಲಲೆತ್ತದ್
ಕುರುಕುಲೇಸೆನೆ ತೂಲ ಪಾಂಡವನಕಾಲೆ ತರೆನೀಯೆ ||

3

ಪನ್ನುನೆನ್ ಕೇನೊಂದು ಕೌರವೆ
ಕಣ್ಣ್ ಬುಲದೇ ತೂನಗವ್ವೇ
ಎಲ್ಯ ಚೋಕುಲೆ ತರೆಕುಲೇರೆನ ಪನ್ದ ತೂವೊಂಡೆ ||
ಕೆರೈನೇ ದ್ರೌಪದಿನ ಜೋಕ್ಷೆನ್
ಎನ್ನವೇ ಸಂತಾನೊ ಪೊತ್ತುದು
ಕುರೈಯೆ ಆಂಡತ್ತೊ ಪಂಡ್ಡಾದ್ ತಿಗಲೆಗಾಕೊಂಡೆ ||

4

ಕಣ್ಣ್ ಮಸಲ್ಡಾದ್ ಆಂಡಲಾಯನ
ದಮ್ಮು ಕಟ್ಟದ್ ಸೇಂಕೆ ಸುರುವಾ -
ದಲ್ವನೇ ತನ ಪ್ರಾಣೊ ಬುಡಿಯೆನೆ ಕೌರವೇಸ್ವರೆನೆ ||
ಅಸ್ತತ್ತಾಮೆನೆ ಬಾಯ್ಗ್ ನೀರ್ನ
ಬುಡ್ಡು ರಟ್ಟಿಯೆನಲ್ಪಡ್ಡಾದ್ ತನ
ಇಲ್ಲಡೆಗ್ ಪೋಪೆಂದ್ ಕಾಳಗೊ ಕಳಟೆ ಬಲಿತೊಂದು ||

5

ಕಾಂಡೆ ಲಕ್ಕದ್ ತೂನಗವುಲೇ
ಏತಲಾ ಎರ್ಕನವೆ ನೆತ್ತೆರ್
ದಾಯ್ ಪಂಡ್ಡದ್ ಮಾತನಾಡೈರ್ ಸಿಬಿರೊದಾ ಉಲಯಿ ||
ದ್ರೋಪದಿನ ಚೋಕುಲೆನವೇ ತರೆ
ನಾಲಿಡ್ಡದ್ ಮಿತ್ತಡ್ಡದ್ ರಟ್ಟಿನ
ತೂದು ಬುಲೆರ್ ಮಾತ ದ್ರೌಪದಿ ಮುರೈ ಮುರೈಯೆಂದು ||

6

ಅಸ್ತತ್ತಾಮೆನೆ ಬಾಸೆ ಪಾಡ್ಡದ್
ಕೆರೈ ಪಾಂಡವನಕಾಲೆನೆಂದಾದ್
ಕೆರೈನೆ ಆಯೆಂದ್ ಭೀಮಾರ್ಜುನೆರ್ ಪಿದಡಿಯೆರ್ ||
ಒಟ್ಟಿಗೆನೆ ದ್ರೌಪದಿಲ ಪಿದಡ್ಡದ್
ಬನ್ನಗನೆ ಆ ದುಸೈನೆದುರುಗು
ತಿಕ್ಕೈನಕಾಲೆಗ್ ನೆತ್ತೆರದ ಕಲೆ ಮೇಲ್ಡ ತೋಚೊಂದು ||

7

ಚೋಕುಲೆನ್ ಕೆರೈಯೆನೆ ಇಂಬೈನೆ
ಪಾಪಿ ಪಂಡ್ಡದ್ ಪತ್ಯೆರಾಯನ್

ಭೀಮ ಪಾರ್ತರ್ ಜುಟ್ಟುಡೊಯ್ತೆ ಬೆರಿಕ್ ಗುದ್ದಿಯೆರ್ ||
ನಾಯಿ ಬಲ ಬಲ ತಿನ್ನ ಜೋಕುಲೆ
ಪ್ರಾಣೊ ದೆತ್ತನ ಸಯಿರೊ ಉಂಡುಯಿ
ದೀಡಯೊನೆ ನಿನನ್ಂದ್ ರಟ್ಟಿಡೆ ಪತ್ತದೊಯ್ಪನಗ ||

8

ಕೆರ್ದಡೆಯೆ ನಿಕ್ಲಿತ್ತೆ ಇಂಬ್ಯನ್
ಕೆರೈಡ ಕೃಪ ದೇವಿನನಲೆಕೊ
ಪುತ್ರ ಸೋಕೊಡು ಬುಲ್ಪುವುನ ಸರಿಯತ್ತ ಬುಡ್ಲೆಂದ್ ||
ಪೋಣ್ಣ ಮನಸ್ಸದ ಪೆರ್ಮೆ ಎಂಚಿನ
ಪನ್ನಲಾ ದ್ರೌಪದಿಯೆ ತೆರಿಪದ್
ಕಣ್ಣಾನುದೊಂದಲ್ತ ಪೋಯಲ್ ಸಿಬಿರೊದಾಡೆಗೆನೆ ||

9

ಪಾಂಡವೆರ್ ಮಾತೆಲ್ ಕ್ರಿಷ್ಣನ
ಹೇಳಿಕೆಡ್ ಕೌರವನ ಪುಣನೇ
ರಾಜ ಮರ್ಯಾದಿಡ್ಲ ಸುಡಿಯೆರೆ ಮಲ್ತೆರಟ್ಟಿನೆನ್ ||
ಬಾನುಮತಿಲಾ ಬತ್ತಲಾಡೆಗ್
ದೇವ ಕ್ರಿಷ್ಣನೆ ಪಂಡಿ ಪಾತೆರೊ
ಕೇನ್ಜರ್ ಈರೆನ್ನ ಕರ್ಯಣಿ ಕಡಿತ್ ರಟ್ಟಿಯರ್ ||

10

ಏತ್ಲಾ ಪಂಡೊಂದು ಬುಲ್ಪುದು
ಕಾಟೋಗೇನ್ಬರ್ದೆಂದ್ ಕ್ರಿಷ್ಣನ
ಕಾರ್ ಪತ್ತನಗಪಗ ಪಂಡೆನೆ ನಿನ್ನ ಕೊಸಿಮಲ್ಪು ||
ವೀರ ಕರ್ಣನ ಪುಣನ್ ಕಾಟೋಗು
ದೀಡೊಡೇ ನಿಕ್ಲೆಂದ್ ಪನ್ನಗ
ಪಾಂಡವೆರ್ ಸಿರಿ ಕ್ರಿಷ್ಣ ಮೋನೆನ್ ತೂಯೆರಾಪಗನೆ ||

11

ಕರೈ ಪುಟ್ಟನ ಕತೆನ್ ಅಕ್ಲೆಗ್
ಪನ್ನಗಾಕ್ಲ್ ಬುಲ್ತೆರೇತ್ಲ
ಸತ್ಯೊ ಧರ್ಮೊದ ಮೂರ್ತಿಯಾಯಿನ ಅಣ್ಣನೇ ಕೆರಿಯೊ ||
ಬುಲ್ಪುನಗ ಶ್ರೀ ಕ್ರಿಷ್ಣ ಪಂಡೆನೆ
ಕರ್ದನಾ ಕತೆ ದುಂಬು ಪನ್ನೆಡ
ಯುದ್ಧೊನೇ ಆತ್ವಂದ್ ದುಸ್ಸೆರೆ ನಾಸೊ ಆವಂದ್ ||

12

ಧರ್ಮೊ ಸಾಸಿತೊ ಒರೊಡುಂದುದೆ
ಎನ್ನವೀ ಅಬತಾರೊ ನಿಕ್ಲೆಗ್
ಕರ್ದ ಚಿಂತೆನೆ ಬೊಡ್ಡಿ ಆಯೆನೆ ಮೋಕ್ಷೊ ಪಡೆದುಲ್ಲೆ ||
ಇತ್ತೆ ಆಯನ ಸಾವು ಸೂತಗೊ
ಮಲ್ಪೊಡುಂದುದು ತೆರಿಪದಾನಗ
ಪೊತ್ತಯೆರಲಾ ಕಾಟೋಗೂರುದು ಕರ್ಣನಾ ದಿನೊನೆ ||

13

ಕಳಟ್ ಸೈತ್ತನ ಏತೊ ಅಕ್ಷೋ -
ಯಿಣಿದ ಸೇನೆದ ವೀರನಕ್ಲೆನ್
ಕರ್ಣ್ ಕಡ್ಡಾದ್ ಪೊತ್ತಯೆರೆ ಸರಿ ತೀರೊ ಧರ್ಮಜಗ್ ||
ಪುಣಕುಲೀತ್ಲ ಪೊತ್ತುದಾನಗ
ಅವೆನ ಮೂರಿಡ್ ಊರ್ದ ಜನೊಕುಲು
ಬದ್ಕಯೆರ್ ಪಂಡೊಂದು ಗುಂಡಿಲೆ ತೋಡ್‌ದಲ್ಪು ||

14

ಸೈತ್ತಿ ಪುಣಕುಲೆ ಆನೆ ಕುದುರೆಲೆ
ನೊಟ್ಟು ಗುಂಡಿಡ್ ಪಾಡ್ಡ್ ಕೌಂತೆರ್
ದುಕ್ಕೊದಾ ಬೆಡಿ ಮರ್ದ ಪುಡತೆರ್ ಸೇನೆದಕ್ಲೊಟ್ಟು ||
ಬದ್ಕೊದೊರಿನವೆ ಸೈನ್ಯೊದಕ್ಲೆನ್
ಮರ್ದೊಡ್ ಕಡಪುಡಿಯೆ ಧರ್ಮಜೆ
ಕ್ರಿಷ್ಣ ನಮ್ಮನ್ ಬುಡಯೆ ನಿಕ್ಲೆನ್ ಯಾನ್ ಮರಪಯೆನೆ ||

|| ಮೂಜನೆದ ಸಂದಿ ||

|| ಕಾಳಗೊದ ಕಳಡ್ಡ್ ಅರಮನೆಗ್ ||

ವಾಸುದೇವನ ಒಟ್ಟಿಗೆನಲಾ
ಪಾಂಡವೆರ್ ಅರಮನೆಕ್ ಎತ್ತೆರ್
ರಾಜ ಚಾವಡಿ ದೇಲ ಪುದಕುಲೆ ಗೂಡು ಆಯಿನೆನ್ ||
ತೂದು ಕಣ್ಣೆಡೆ ನೀರ್‌ನರಿಪಯೆ
ಸಾದು ಧರ್ಮಜೆನಪಗ ಬತ್ತೆರ್
ವೇದ ವ್ಯಾಸೆರ್ ಕ್ರಿಷ್ಣ ಪಾದೊಗು ಅಡ್ಲೊ ಬೂರಿಯೆರ್ ||

1

ಮಾತೆರಲ ದೃತರಾಸ್ತ್ರ ಬವನೊಗು
ಪೋದು ತೂನಗ ದೇವಿಯಾ ಗಾಂ-
ದಾರಿ ಮತಿ ಇದ್ಯಂದೆ ಬೂರ್ದಲ್ ಕುರುಡೆ ಪರಡೊಂದು ||
ಆಲೆ ತರೆ ಜಕ್ಕೆಲ್ಡ್ ದೀಡ್‌ದ್
ನೀರ್‌ನರಿಪವೊಂದಿತ್ತೆ ಕಣ್ಣೆಡೆ
ಮಾತೆರತ್ತನ ಏರ್ ಪಂಡ್‌ದ್ ಕ್ರಿಷ್ಣ ತೆರಿಪಯೆನೆ ||

2

ಅಪಗನೇ ಮತಿಯಾದ್ ಕೌರವ -
ನಕಲೆ ಅಪ್ಪನೆ ಕ್ರಿಷ್ಣ ಮೋನನ್
ಸರಿಟ್ ತೂಯಲ್ ಎನ್ನ ಜೋಕುಲೆನೀಯೆ ಕೆರ್ಪಾಯೆ ||
ಹರಿಯೆ ನಿನ್ನಬತಾರೊ ನನಗಾ -
ನಗನೆ ನಿನ್ನವೆ ಬುಡೆದಿ ಜೋಕುಲೆ
ರುಣೋನೆ ಕಡಿಯಡ್ ಪನ್ದ ಸಾಪೊನು ಕೊರೈಲಾ ದೇವಿ ||

3

ವಿದುರ ಸಂಜಯನಕ್ಲ್ ಬತ್ತಾದ್
ಹರಿನ ಕಾರ್ಗ್ ಅಡ್ಲೊ ಬೂರುದು
ರುಸಿನ ಪಾದೊಗು ಪುಡ್ಡಿಯಾಡ್ಯೆ ಬಗ್ಗಿ ಬಾವನೆಡ್ ||
ನಿಕ್ಲ್ ಇತ್ತೆನೆ ವಿದುರ ಸಂಜಯ
ನಕಲೆ ಒಟ್ಟಿಗೆ ಕಾಡ್ ಸೇರ್ದ್
ಮುನಿಕುಲೆನ ಅಸ್ತಮೊಡು ಉಪ್ಪುಲೆ ಪನ್ದ ವ್ಯಾಸೇರಲ ||

4

ಬುಲ್ವಿ ದ್ರಾತರಾಸ್ತನವೆ ಒಟ್ಟಿಗೆ
ಪತ್ನಿ ಗಾಂದಾರಿನ್ಲ ಪೋಯೆರೆ
ಅಪ್ಪಣೆನ್ ಕೊರ್ದಾರ್ ಪೋಯೆರೆ ಬದರಿಕಾಸ್ತಮೊಗು ||
ಸೈಪ್ಪೊ ಪಂಡ್ಡ್ ಕೌರವನವೇ
ಮೆಗಿಯನಾಕಲೆ ಬುಡೆದಿಯಲ್ಲುಲ
ಬುಲ್ವುನಗ ಶ್ರೀ ಕ್ರಿಷ್ಣನಕಲೆಗ್ ಪನ್ನೆ ಸಮದಾನೊ ||

5

ನಿಕ್ಲ್ ಸಯ್ಯಡೆ ಬಗ್ಗಿ ಬಾವೊಡು
ನಿಕ್ಲೆನಾ ಪತಿಕುಲೆನ ನೆಂಪುನು
ದಿನೊಲ ಮಲ್ತೊಂದುಪ್ಪಿ ರಾತ್ರೇಡ್ ಕನಟ್ ತೂವೊನುಲೆ ||
ಪತಿರುತೊಟು ನಿಕ್ಲೆನವೆ ಕಂಡನಿ -
ನಕಲೆ ಮೋನನ್ ತೂವರ್ಂದಾದ್
ವರೊನು ಕೊರೈನೆ ಕ್ರಿಷ್ಣ ನಕಲೆನ ತರೆಕ್ ಕೈ ದೀಡ್ಡ್ ||

6

ಮಲ್ಪಯೆನೆ ತಿಲಹೋಮ ಪಿಂಡೊನು
ಬುಡ್ಡಯೆನೆ ಗಂಗದವೆ ನೀರ್ಡ್
ಸೈತ್ತಾನಾ ಕುಟುಮೊದವೆ ಬಂದುಲೆಗಪಗ ಧರ್ಮಜೆನೆ ||
ಕ್ರಿಷ್ಣನೊಪ್ಪಿಗಡಾಯೆ ಕುಲೈನೆ
ಹಸ್ತಿನಾವತಿದರಸು ಪೀಟೊಡು
ಬತ್ತೆರಾಡೆಗ್ ಮಾತ ಸಾಮಂತೆರಲ ಕಾಣಿಗನ್ ||

7

ಕಾರ ಮುದೆಲ್ಡ್ ದೀಡ್ಡ್ ಪಂಡೆರ್
ಆರ್ಯವರ್ತೊದ' ಚಕ್ರವರ್ತಿಗ್

ಆವೊಡೇ ನಿಜೊ ಜಯೊ ಜಯೊಂದುದು ಮಾತ ಪುಗರಿಯೆರ್ ||
ಭೀಮ ಪಾರ್ತೆರ್ ದೇಸೊ ರಚ್ಚಣೆ -
ಗಾಯೆರಾ ಸಹದೇವನಕುಲೆರ್
ರಾಜ್ಯೊದಾಡ್ಲೆದವೆ ಮಂತ್ರಿಲು ಪಂಡೆ ಶ್ರೀ ಕ್ರಿಷ್ಣ ||

8

ಏರ್ ನಿಕ್ಲೆನ ಕತೆನ್ ಕೇನ್ವೆರೊ
ಆಕ್ಲೆನ ಬವೊರೋಗೊದಾ ಪರಿ -
ಹಾರೊನೇ ಆವುಂದು ಪಿದಡಿಯೆ ಕ್ರಿಷ್ಣ ದ್ವಾರಕಿಗ್ ||
ಮಾತೆರಲ ಕಾರ್ಗಡ್ಲೊ ಬೂರೈರ್
ದ್ರೋಪದಿಲ ಸೌಬದ್ರೆ ಉತ್ತರೆ -
ನಾಕ್ಲೆನ ಒಟ್ಟಿಗೆನೆ ಕಾರ್ಗ್ ಪುಡ್ಡಿಯಾಡಿಯಲ್ ||

9

ತೇರ್ನೇರ್ದ್ ಕುಲೈ ಶ್ರೀ ಹರಿ
ಪಾರ್ತೆ ಕುದುರೆಲೆ ಚಾಟಿ ಪತ್ತಿಯೆ
ಆಪೆಕೀಪೆಕ್ ಧರ್ಮನಂದನೆ ವೀರ ಸಾತ್ಯಕಿಯೆ ||
ಆ ನಕುಲ ಸಹದೇವನಾಕ್ಲ್
ತೇರ್ದಾ ಪಿರವುಡೆನೆ ಎದುರುಡು
ಭೀಮ ಸೇನೆನೆ ಬೇರಿ ವಾದ್ಯೊಡು ಹರಿನ ತೇರ್ಪೊಂಡು ||

|| ಭೀಸ್ಮನ ಮರಣೊ ||

ಸೂರೈ ಬಡಕಯಿ ದಿಕ್ಕೊಗೊತ್ತುದು
ಮೂಡುನವೆ ದಿನೊ ಬತ್ತದಾನಗ
ಭೀಸ್ಮ ಸೈಪ್ಪುನ ದಿನೊನು ಲೆಕ್ಕೊನೆ ಮಲ್ತದಿತ್ತೊಂದು ||
ಬಾಣೊಲೆನ ಮಂಚವುಡು ಜೆತ್ತಾದ್
ದೇವೆರೆನ ದ್ಯಾನೊಡುಲ ಇತ್ತಾನ
ಬಾಗಿರತಿ ಮಗನಾಡೆ ಬತ್ತೆನೆ ಧರ್ಮನಂದನೆನೆ ||

1

ಕಾರ್ ಪೊಜೆಕ್ದ್ ಲೆತ್ತೆನಜ್ಜನ್
ಆಪಗನೆ ಕಣ್ಣುಡುದು ಕೇಂಡೆನೆ
ಏರ್ಮಗ ಲೆಪ್ಪುನಯೆ ಪನ್ನಗ ಯಾನ್ ಧರ್ಮಜೆನೆ ||
ಈರ್ ಸಾಂಕ್ನ ಪುಳ್ಳಿ ಈರೆಡ
ಕಾಳಗೊನು ಮಲ್ಪಾದ್ ಮೆಗ್ಯಡ
ಬಾಣೊ ಬುಡ್ಡಯಿ ಮೂರ್ಕೆ ಕುಟುಮೊನು ನಾಸೊಮಲ್ತನಯೆ ||

2

ಹಸ್ತಿನಾವತಿದರಸು ಪೀಟೊಡು
ಕುಲ್ಟನಯೆ ಪಂಡೊಂದು ಬುಲ್ವುನ

ಧರ್ಮಜನ ನೆತ್ತಿಗಲ ತನಕ್ಕೆ ದೀಡ್ಡ ಪುಗರೊಂದು ||
ಬುಲ್ಪಡಯ ಓ ಧರ್ಮನಂದನ
ನಿನ್ನ ಪುದರ್ಗ್ ಸರಿತ ಕಾರ್ಯೊನು
ಮಲ್ತದೀಯೇ ಚಕ್ರವರ್ತಿನ ತಾನೊಗೇರ್ನತ್ತೊ ||

3

ಹರಿಯೆ ನಿನ್ನವೆ ಕಡೆಟ್ ಇತ್ತಾದ್
ನಿನನ್ ಗೆಲ್ಪಯೆ ಅನ್ಯೆರೊಯ್ಪನ
ಪಿರಿತ ಬಲ್ಗನ್ ಕಡೆಟ್‌ದೀಯೇ ಬರತ ಬೂಮಿದವೆ ||
ನಡುಟು ನಡಿಯ ಸ್ವತಂತ್ರ ಕಮ್ಮೊನು
ಕುಟುಮೊ ನಾಸೊದ ಪಾಪೊ ಇದ್ದಿಯ
ಅಕ್‌ಲೆ ಕರ್ಮೊದ ಪಲೊಟೆ ಸೈತ್ತರ್ ಈಯೆ ಹೊಣೆಯತ್ತ ||

4

ಧರ್ಮಜ್ ಸಮದಾನೊ ಆಯಿಜಿ
ಧರ್ಮ ವ್ಯಾದನ ನಳನ ಕೌಸಿಕೆ
ಕೆರ್ಮ ಪಕ್ಕದ ಕತೆಟ್ ಧರ್ಮೊದ ತಿರ್ಲ್ ಇತ್ತನೆನ್ ||
ಬುಡ್ಡ ಬುಡ್ಡದ್ ಏತೊ ಕತೆಕುಲೆ
ಸತ್ತೊನಾಯಗ್ ತೆರಿಪದಾನಗ
ಸುದೊ ಮನಸ್‌ಡ್ ಅಜ್ಜಕಾರ್‌ಗ್ ತರೆನ್ ದೀಡೊಂಡೆ ||

5

ಆಯ ತರೆನೊಯ್ತೊಂದು ತಿಗಲೆಗ್
ಪಾಡೊನುಂದೇ ಬೀಸ್ಮೆ ಕಣ್ಣನ್
ಪೂರ ಬುಡ್ಡದ್ ಮಿತ್ತ ತೂಯೆನೆ ಅಪಗ ಬಾನೊಗುಲ ||
ಜೋತಿರಾಪುನ ತೂಯೆ ಧರ್ಮಜೆ
ಪ್ರಾಣೊ ಪೋಯಿನ ಅಜ್ಜ ತಿಗಲೆಡೆ
ತಾನ್ ಉಲ್ಲೆಂದಾಯೆ ಲಕ್ಕದ್ ತೂಯೆನೇ ಪುಣನ್ ||

6

ಅಜ್ಜೆ ಸೈತ್ತನ ಸುದ್ದಿ ತೆರಿಪಯೆ
ಮೆಗ್ಯನಕ್‌ಲೆಗ್ ಮಾತ ಬತ್ತದ್
ಬುಲ್ಪದೇ ತುಂಬೊಂದು ಪೋಯೆರ್ ರಾಜನರಮನೆಕ್ ||
ಕಡ್ಡಯೆರ್ ಸಿರಿ ಗಂದೊದಾಮರ
ಕುಕ್ಕದಲ ಮರನಡಿಕ್ ದೀಡ್ಯರ್
ಪೊತ್ತಯೆರೆ ಸರಿ ಕಾಟೊ ಗೂರೈರ್ ಎದುರು ಕಂಡೊಡುಲ ||

7

ಪುಣನ್ ಮೀಪದ್ ಗಂದೊ ಕಸ್ತರಿ
ಮೆಯಿಕ್ ಪೂಜಿದ್ ಪೊಸತ್ ಕುಂಟುನು
ಸರಿಟ್ ತುತ್ತದ್ ತೊಲಸಿ ಮಾಲೆನ್ ಪಾಡ್ಡ ಜೆಪುಡಯೆರ್ ||
ತರೆಕ್ ಕೈ ಪತ್ತೊಂದು ಮಾತೆರ್
ಪುಣಕ್ ಬಲಿ ಬತ್ತದಲ ಬಾಯಿಗ್
ತೊಲಸಿ ನೀರ್‌ನ್ ಬುಡುದು ತುಂಬೈರ್ ನಾಲ್ವೆರೊಟ್ಟಾದ್ ||

8

ಧರ್ಮನಂದನೆ ಸೂಕರೊನುಲಾ
ಪತ್ತದೇ ದುಂಬೊತ್ಯೆ ಕಾಟೊಗು
ಸುತ್ತು ಕೊನತೆರ್ ಬಲತ್‌ದೆಡತ್‌ಗ್ ಪುಣನ್ ದೀಡಿಯೆರ್ ||
ಪುಳ್ಳಿನಕ್‌ಲೈವೆರ್‌ಲ ಸೂಟೆನ್
ಪೊತ್ತವೊಂದೆ ಪೆದಂಬು ಸುತ್ತುಡ್
ತಿರ್ಗದಾಕ್‌ಲ್ ಮೂಜಿ ಸುತ್ತುಗು ಸೂನು ದೀಡಿಯೆರ್ ||

9

ಸಾವಲೆರ್ ಮದುಮಾಸೊ ಬುಡಿಯೆರ್
ಸಾವುನೇ ಪದಿ ಮೂಜನೆ ದಿನೊ
ಬಾರಿ ಗೌಜಿಡ್ ಮಲ್ಪಯೆರ್ ವೈದಿಕೊ ವಿದಾನೊಲೆಡ್ ||
ದಾನೊ ಧರ್ಮೊನು ಕೊರೈರೆತ್‌ಲ
ಊರುದೂರುದ ಬಡವನಕ್‌ಲೆಗ್
ಬ್ರಾಣೆರೆಗ್ ಗತಿ ದಾಂತಿ ಪೊಂಜೊವೆ ಜೋಕುಲೆಗ್ ಮಾತ ||

|| ಧರ್ಮಜಿನೆ ಅಸ್ವಮೇದೊ ಯಾಗೊದ ರುತೊನು ಕೈಕೊಂಡೆ ||

ಎನ್ನ ನೇಲ್ಯಮೈರೆನ ಬಾಲ್ಗನ್
ಬುಕ್ಕೊ ಅಕ್‌ಲೆನ ಜೋಕುಲೆನ್‌ಲಾ
ಕೆರ್ಮಯೆನೆ ಅದಿಕಾರೊದಾಸೆಡ್ ಪನ್ದ್ ಧರ್ಮಜಿನೆ ||
ನಿತ್ಯೊ ದುಕ್ಕೊಡು ರಾಜ್ಯೊದವೆ ಸರಿ
ಮಲ್ಪುಜಿನೆ ಆಡಳ್ಳಿ ತಿನ್ನುಜೆ
ಉನ್ನುಜಿನೆ ಪನ್ನುನವೆ ದ್ರೌಪದಿಗಾಂಡ್ ಬೇಜಾರೊ ||

1

ಆಲ್ ಸಮದಾನೊನುಲ ಪಂಡಲ್
ಭೀಮ ಪಾರ್ತೆರ್ ಪಂಡರೇತ್‌ಲ
ದಾನೆ ಆಂಡಲ ಮನಸ್‌ಡಿತ್ತನ ಪೋಯ್ವಿ ಕಲ್ಮಸೊನೆ ||
ಆ ಪತೀರುತೆ ತರೆಮೆಯಿಕ್ ಸರಿ
ಮೀದ್ ಸುದ್ದೊಡು ವೇದ ವ್ಯಾಸೆರೆ
ದ್ಯಾನೊ ಮಲ್ತಲ್ ಬರೊಡು ದೇವೆರೆ ಈರ್ ಪಂಡೊಂದು ||

2

ಪೊಣ್ಣ ಬುಲ್ಪದ ಲೆಪ್ಪುಗೋಕೊನು -
ದೆತ್ತೆರಾ ಮುನಿ ವೇದವ್ಯಾಸೆರ್
ಪಾದೊ ಪೂಜೆನ್ ಮಲ್ತದಾರೆನ್ ಉಲಯಿ ಕುಲ್ಲಾದ್ ||
ತಾನ್ ಪ್ರಾರ್ತನೆ ಮಲ್ತನೆನೆ ಇನಿ
ದಾಯೆಗಾಂದ್ ಪೂರ ತೆರಿಪನ -
ಗಾರುಸಿಯೆ ಧರ್ಮಜನ್ ತೂಯೆರೆ ಪೋಯೆರಾಯನಡೆ ||

3

ಅರಸು ಧರ್ಮಜ ದಾಯೆ ಕೊರಗುವೆ
ಪನ್‌ಲ ಎನ್ನಡ ಮನಸ್‌ಡಿತ್‌ನ
ಕುರೆನ್ ತೋಜಲ ನಿನ್ನ ಬುಡೆದಿಯೆ ಎನನ್ ಬರ್ಪಯಿನೆ ||
ಎಸನೊ ಮಲ್ತ್‌ದ್ ಸೈರೊ ವ್ಯಾದಿದ
ಬಲೆಕ್ ತಿಕ್ಕವಡಂದ್ ಪನ್ನಗ
ಮುನಿನ ಕಾರ್‌ಗ್ ಅಡ್ಲೊ ಬೂರುದು ಪನ್ನೆ ಧರ್ಮಜೆನೆ ||

4

ಮೆಗಿಪಲಯ ಜೋಕುಲೆನ ನಂಜಿದ
ಪುಗೇಟ್ ಅರ್ಲನ ಸೂವೆ ಪೊತ್ತುದು
ಬರತ ಬೂಮಿಯೆ ಕಾಯ್ದಿ ಓಡಾಂಡತ್ತೊ ಗುರುದೇವಾ ||
ಮೆಗಿಯನಕಲೆನ ಬಂದು ವರ್ಗೊನು
ಅರಸು ಸಾಮಂತೆರೆನ್ ಏತ್‌ಲ
ಕೆರ್‌ಪಯಿನ ಮಹ ದೋಸೊ ಪಾತಕೊ ತುಂಬೈರಾಂಡತ್ತೊ ||

5

ಯಾನ್ ಸೈತ್ತೆಡ ಪಾಪೊದಾ ಪುದೆ
ಮಾತ್ತೊ ಎನ್ನವೆ ತರೆಟ್ ಉಪ್ಪುನೆ
ರಾಜ್ಯೊ ಪಿರವುಡೆ ಬರುವೊ ಎನ್ನವು ಬದ್‌ಕ್ ಸಾಸಿತೊನೊ |
ಏತ್ ಪೊಂಜೊವೆಗಿದ್ದಿ ಕಂಡನಿ
ಏತ್ ಜೋಕುಲೆಗಿದ್ದಿ ಅಮ್ಮೆನೆ
ಏತ್ ಪರಬೆರೆಗಿದ್ದಿ ಬಾಲೆಲು ಎಂಕ್ಲೆ ಕಾಳಗೊಡು ||

6

ಯಾನ್ ಪಾಪಿಯೆ ಆದ್ ಪೋಯೆನೆ
ದಾನೆಯಾಂಡಲ ಎನ್ನ ಮನಸ್‌ಗ್
ದಾಲ ಸಿತಿಮತಿ ಇದ್ದಿ ಪಂಡ್‌ದ್ ಬುಲೈ ಧರ್ಮಜೆನೆ ||
ದಾಯೆ ಬುಲುವ ಧರ್ಮನಂದನ
ವಾಸುದೇವನ ಮನಸ್‌ಡಿಂಚನೆ
ಆವೊಡುಂದುದು ಅತ್ತೊ ನಿಕಲೆನ ಕಡೆಟ್ ಸೇರ್‌ದನೆನೆ ||

7

ದುಸ್ಸೆರೆನ್ ಸರಿ ನಾಸೊ ಮಲ್ತ್‌ದ್
ಧರ್ಮೊನೂರ್ಜಿಪೊಡುಂತವುನವೆ
ಕ್ರಿಷ್ಣನಬತಾರೊದವೆ ಉದ್ದಿಸೊ ನಿಕ್ಕ ತೆರಿಯಂದೊ ||
ದುಕ್ಕೊ ಮಲ್ಪಡ ಪನ್ದ ಕಣ್ಣೆನ್
ಮುಚ್ಚೊನುಂದೇ ಹರಿನ ದ್ಯಾನೊನು
ಮಲ್ತಿ ಸಾತ್‌ಗ್ ಎತ್ತೈನಾ ಮುರಹರೆನೆ ಅರಮನೆಗ್ ||

8

ವೇದವ್ಯಾಸೆರ್ ಬುಕ್ಕೊ ಧರ್ಮಜೆ
ಪಾದೊ ಗಡ್ಲೊನೆ ಬೂರೈರಾಪಗ

ದೇವ ಈ ಧರ್ಮಜೆನೆ ಬುಲುವೆ ತಾನ್ ಪಾಪಿಂದ್ ||
ರಾಜ್ಯೊಗಾದೇ ಮಲ್ತಿ ಲಡಯಿಡ್
ಏತೊ ಬಂದುಲು ಪೊದ್ದೆರಿಸ್ಸೆರ್
ಬೂರ್ದು ಸಯೈರೆ ತಾನ್ ಕಾರಣೊಗಾಯೆ ಪಂಡೊಂದು ||

9

ಸಿಪ್ಪಿ ಸಿತಿಲಯೊ ಪನ್ನಿ ನಾಟಕೊ
ಗೊಬ್ಬಯಿನ ಓ ಸೂತ್ರದಾರಿಯೆ
ಇತ್ತೆ ಇಂಬ್ಯನ ಮನಸ್‌ನೊಪ್ಪಲ ಪನ್ದಲಾರುಸಿಯೆ ||
ಅಡ್ಲೊ ಬೂರ್ದುಗ ಪನ್ನಿನಾ ಹರಿ
ಧರ್ಮಜನ ಪಾಪೊಗುಲ ಪರಿಹರೊ
ಇದ್ಯೊ ವ್ಯಾಸೆರೆ ಈರ್ ದಾಯೆಗೆ ಐನ್ ಪಂಡ್‌ಜರ್ ||

10

ರಕ್ಕಸೇರೆನ್ ಕೆರ್ನ ದೋಸೊಗು
ಅಸ್ವಮೇದೊನು ರಾಮೆ ಮಲ್ಪದ್
ತನ್ನ ಪಾಪೊನು ಕಳೆಯಿ ನಮನೆಡೆ ಧರ್ಮನಂದನೆಲ ||
ಅಸ್ವಮೇದೊನೆ ಪನ್ನಿ ಯಾಗೊನು
ಮಲ್ಪವಡ್ ಪನ್ನಗನೆ ಧರ್ಮಣೆ
ಒಪ್ಪಿಯೆನೆ ಅಕಲೆನವೆ ಎದುರುಡು ದೀಕ್ಷೆ ಕೈಕೊಂದು ||

|| ಧರ್ಮೊದೂರ್ಜಿಪೊ ಆಂಡ್ ||

ತೆನ್ನಯಿದ ರಾಜ್ಯೊಲೆಡ್ ಉಲ್ಲೆರ್
ಬಗ್ಗೆ ಹಂಸದ್ವಜೆ ಸುದನ್ನಲ
ಬುಕ್ಕೊ ತಾಮ್ರದ್ವಜೆ ಮಯೂರ ದ್ವಜೆನೆ ಚಂದ್ರಾಸೆ ||
ಉತ್ತಮೆರ್‌ಲಾಕಲೆಗ್ ಮೋಕ್ಷೊನು
ಕೊರ್ದು ದುಸ್ಸೆರೆ ನಾಸೊ ಮಲ್ಪೊಡು
ಪನ್ದ ಕ್ರಿಷ್ಣೆನೆ ಅಸ್ವಮೇದೊನು ಪಂಡೆ ಮಲ್ಪಯೆರೆ ||

1

ಯವ್ವನಾಸ್ವನ ಕುದುರೆ ತರ್ಪದ್
ಎಡ್ಲೆ ಮೂರ್ತೊಡು ದೇಸೊ ದೇಸೊಗು
ಅರ್ದುನನ ಬೆರಿ ಸಾಯೊಗೇ ಪ್ರದ್ಯುಮ್ನನಾಕಲೆನ್ ||
ಒಟ್ಟಿಗೆನೆ ಕಡಪುಡುದು ಗೆಲ್ತ್‌ದ್
ಕಪ್ಪೊ ಕಾಣಿಗೆ ತಿಕ್ಕನೆನ್ ಸರಿ
ಕರಿ ಮಲ್ತ್‌ದ್ ಯಾಗೊ ಪೂರ್ತಿಲ ಆಂಡ್ ಆರಾಟೊ ||

2

ದಾನೊ ಧರ್ಮೊಡು ಒನಸ್ ತೆನಸ್‌ಡ್
ಊರುದೂರುದ ಬಡವನಕಲೆನ್

ಬ್ರಾಣೆರೆನ್ ಜೋಕುಲೆನ್ ಸಂತೊಸು ಮಲ್ತೆ ಧರ್ಮಜೆನೆ ||
ಆನಿಯೇ ತನ ಎತೆನ್ ಬುಡಿಯೆನೇ
ರಾಜ ರಾಜೆರೆ ರಾಜೆ ಪನ್ನುನ
ಕೀರ್ತಿಡಾಳ್ಯೆನೆ ಧರ್ಮನಂದನೆ ಹಸ್ತಿನಾವತಿನೆ ||

3

ಕಳವು ಕೊಲೆ ಸುಲಿಗಂದ್ ಪನ್ನುನ
ನರಮನಿನ ದುರ್ಗುಣೊಲು ಪರ್ಪುನ
ಜುಗರಿ ಗೊಬ್ಬುನ ಸೂಳೆಗಾರಿಕೆ ಇಲ್ಲ ಪೊತ್ತವುನ ||
ಇಸೊನು ಕೊರ್ಪುನ ಪ್ರಾಣಿ ಪಕ್ಕಿಲೆ
ಬಲಿಕ್ ತರೆಕಡ್ಡುನವೆ ಹಿಂಸೆನ್
ಮಲ್ಪಜೆರ್ ಧರ್ಮಜನ ರಾಜ್ಯೊಡು ಸತ್ತುಲಿದ್ಯತ್ತೊ ||

4

ಯಾಗೊ ಯಜ್ಞೊಡ್ ಹವಿಸ್‌ನುಂಡುದು
ದೇವತೆಲು ಸರಿ ಬರ್ಸೊ ಜಪುಡುವೊ
ಕಾಲೊ ಕಾಲೊಗು ರೈತೆರೆಗ್ ಬುಲೆ ಬಾಗ್ಯೊ ಏರೊಂದು ||
ಜಾಲ್‌ಡೇರ್‌ದ್ ಕದಿಕೆ ಕಿದೆಟ್‌ಲ
ಪೇರ್ ಬೊರಿಪುನ ಪೆತ್ತಕಂಜಿಲು
ಜೋಕ್ಕು ಬಾಲೆಲು ಪೊಣ್ಣು ಪೊಂಜೊವು ನಿತ್ಯೊ ಸಂತೊಸುಡು ||

5

ಉಲ್ಲೆರಾ ಧರ್ಮಜನ ರಾಜ್ಯೊಡು
ನಟ್ಟುನಕ್‌ಲಿದ್ಯೆರ್‌ಲ ವ್ಯಾದಿಡ್
ಎಲ್ಯ ಜೋಕುಲು ಸೈಪಿ ಸುದ್ದಿಯೆ ಇದ್ದಿ ನಿಜೊವಾದ್ ||
ಧರ್ಮ ಚತ್ತೊಲು ನೀರ್ಡ ಕಟ್ಟೆಲು
ದೈವ್ಲೊ ದೇವರೆ ಮಟೊನೆ ಮಂದಿರೊ
ಕಲ್ಪಿ ಜೋಕುಲೆಗುಂಡು ಗುರುಮಟೊ ಕರ್ಚಿ ಅರಮನೆದ ||

6

ನಳನ್ ನವುಸನ್ ದುಂದುಮಾರನ್
ಬರತ ಹಸ್ತಿನ ಕುರುನು ಮೀರ್‌ದ್
ಪುದರ್ ಪಡೆವೊಂದುಲ್ಲೆ ಧರ್ಮಜೆ ಪನ್ದ್ ನಾರದೆರ್ ||
ಪುಗರ್ ಪುಗರ್‌ದ್ ರಾಮ ರಾಜ್ಯೊಡ
ಕತೆನ್ ಪಂಡ್‌ದ್ ಊರುಡೂರುಡೆ
ತಿರುಗುವೆರ್ ನಿಜೊ ಧರ್ಮೊ ಊರ್ಜಿತೊ ಇತ್ತೆ ಆಂಡ್‌ದ್ ||

7

ಈ ಕತೆನ್ ಜನಮೇಜಯಗ್ ಸರಿ -
ಯಾದ್ ವೈಸಂಪಾಯರುಸಿ ನಿಜೊ -
ವಾದ್ ನಾಗರ ಪಂಚಿಮಿದ ದಿನೊ ಪನ್ದ್ ಮುಗಿತನೆಗೆ ||
ಯಾನ್ ಇನಿಯೆ ಕೆಲಿಂಜ ಬಾರತೊ
ಪೂರ್ತಿ ಬರೆಯಿನ ಪುಣ್ಯೊ ದಿನೊಟೀ
ಆಂಡ್ ನಾಗರ ಪಂಚಿಮಿಡ್ ತುಳು ಬಾಸೆಡೇ ಬರೆದ್ ||

8

ಮಂಗಲೊನೆ ಸಿರಿ ಕ್ರಿಷ್ಣ ಮೂರ್ತಿಗ್
ಮಂಗಲೊನೆ ರುಸಿ ವ್ಯಾಸೆರೆಗ್ ಜಯೊ
ಮಂಗಲೊನೆ ತುಳು ಬರವುದಪ್ಪೆಗ್ ದೇವಿ ಸಾರದೆಗ್ ||
ಮಂಗಲೊನೆ ಕತೆನೋದನಕ್‌ಲೆಗ್
ಮಂಗಲೊನೆ ಎನ ಗುರುಕುಲೆಗ್ ಜಯೊ
ಮಂಗಲೊನೆ ಜಯೊ ಜಯೊನೆ ಈ ತುಳುನಾಡ ಜನೊಕುಲೆಗ್ |

ಶ್ರೀ ಅನಂತಕೋಡಿ ಸುಬ್ರಾಯ ದೇವರೆ ನಿರ್ಪೊಡು,
ಪರಿವಾರೊ ದೈವೊಲೆನ ಬೆರಿಸಾಯೊಡು,
ಕೆಲಿಂಜ ದೂರುಡು ನಿಲೆಯಾಯಿನ ಅಪ್ಪೆ ಸಿರಿ
ಉಳ್ಳಾಲ್ದಿನ ದಯೊಟು,
ತುಳು ಕೆಲಿಂಜ ಬಾರತೊ ಬರೆಯಿನ
ಪೂರ್ತಿಯಾಂಡ್

